



Cohamac̣ Yare Yahari Tjuel

Guanano New Testament

Contents

San Mateo	1
San Marcos	69
San Lucas	109
San Juan	178
Hechos	228
Romanos	288
1 Corintios	318
2 Corintios	346
Gálatas	364
Efesios	374
Filipenses	385
Colosenses	391
1 Tesalonicenses	398
2 Tesalonicenses	404
1 Timoteo	407
2 Timoteo	415
Tito	421
Filemón	424
Hebreos	426
Santiago	449
1 San Pedro	457
2 San Pedro	465
1 San Juan	470
2 San Juan	477
3 San Juan	478
San Judas	479
Apocalipsis	482



Cohamacu Yare Yahari Tjuel

New Testament in Guanano

Language: Guanano

Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit www.dbs.org (USA), www.bibleleague.ca (Canada), and www.opendoors.org (Europe).

Copyright and Permission to Copy

Copyright © 2007 Wycliffe Bible Translators, Inc.

Copyright © 2007 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society (www.dbs.org).

PDF generated on 2017-08-24 from source files dated 2017-08-24.

27092fce-45a4-552a-a333-09cdd24ffb8c

ISBN: 978-1-5313-0272-6

San Mateo

Jesucristo Cohamacu macuno to coyea panopu macaina jira

(Lc 3.23-38)

1 Jesucristo coyeare panopu macainare õ sehe ni yahuihtja yuhu. Jesucristo ñuchuno cjiro panopu macariro Davi wama tiro jia tiha. To jшто pano ti ñuchuno cjiro Abrahã wama tiro jia tiha.

² Abrahã Isaa pucuro jiha.

Isaa Jacobo pucuro jiha.

Jacobo Juda cãhu pucuro jiha.

³ Juda pohna pũaro jiha. Fares, Zara jiha.

Ti pocoro Tamar wama tiricoro jiha.

Fares Esrom pucuro jiha.

Esrom Aram pucuro jiha.

⁴ Aram Aminadab pucuro jiha.

Aminadab Naasón pucuro jiha.

Naasón Salmón pucuro jiha.

⁵ Salmón Booz pucuro jiha. Booz pocoro Rahab jiha.

Booz Obed pucuro jiha. To pocoro Rut jiha.

Obed Jesé pucuro jiha.

⁶ Jesé Davi pucuro jiha.

Davi sehe Israe masa bui pũhtoro jiha.

Tiro Uria wama tiro cjiro namonore to nũoari baharo Salomo wama tirirore pohna tiha.

⁷ Salomo Roboã pucuro jiha.

Roboã Abías pucuro jiha.

Abías Asa pucuro jiha.

⁸ Asa Josafat pucuro jiha.

Josafat Joram pucuro jiha.

Joram Uzías pucuro jiha.

⁹ Uzías Jotam pucuro jiha.

Jotam Acaz pucuro jiha.

Acaz Ezequía pucuro jiha.

¹⁰ Ezequía Manase pucuro jiha.

Manase Amón pucuro jiha.

Amón Josia pucuro jiha.

¹¹ Josia Jeconia cãhu pucuro jiha. Tina ti jiri pjare Israe yahpa macainare Babilonia macaina sehe ñaha wahcãha ti ya yahpau.

¹² ã yoa Babilonia yahpai ti suri baharo, Jeconia Salatiere pohna tiha.

Salatie Zorobabe pucuro jiha.

¹³ Zorobabe Abiud pucuro jiha.

Abiud Eliaquim pucuro jiha.

Eliaquim Azor pucuro jiha.

¹⁴ Azor Zadoc pucuro jiha.

Zadoc Aquim pucuro jiha.

Aquim Eliud pucuro jiha.

¹⁵ Eliud Eleazar pucuro jiha.

Eleazar Matán pucuro jiha.

Matán Jacobo pucuro jiha.

¹⁶ Jacobo José pucuro jiha. José María manũno jiha. María sehe Jesu pocoro jire. Jesu sehe masare yũhdohtiro jiro Cristo ti ni pisuriro jire.

¹⁷ Tõ sehe jiro Abrahãre mari quihõ muhtachu, pu Davipũre mari quihõ batoachu ahrina jipihtina ti panamana ji turiaina mehne jia, catorce curuari waro jiha. Pari turi Davire mari quihõ muhtachu, pu Babiloniapu Israe masare ti naahto pano mari quihõ batoachu jipihtina ti panamana ji turiana mehne jia, catorce curuari waro pari turi jiha. ã yoa tuhsu Babiloniapu ti suri baharo mari quihõ muhtachu, pu Cristo to masa bajuachupu mari quihõ batoachu jipihtina ti panamana ji turiaina mehne jia, catorce curuari waro jiha tjoa.

Jesucristo to masa bajarire yahuha

(Lc 2.1-7)

¹⁸ ã yoa õ sehe Jesucristo masa bajuari jire. To pocoro María sehe José namono cjihto jiri jire. Wiho mejeta ti pũaro ji dũcahto pano Espĩritu Santo to tuua mehne wahma nijinocãre bocaro masiha ticoro to basi. ¹⁹ ã yoa José to manũno cjihto quihõno yoariro jiro, tíre masino, ticorore cohãno taro nimaha.

Masa ti ñarocaroi ticorore buhiri tichu yoa duaeraro, masa ti tũhoerasinichuta yaro ca ticorore cohãno taro nimaha. ²⁰Tĩre to tũhoturo watoi Cohamacu anjo sehe cahãnopu Josere bajuaro, o sehe niha:

—José, Davi cjiro panamino, Mariare buo tiro marieno namo tiga. Ticoro Espiritu Santo to yoadohoro mehne wahma nijinocãre bocaricoro jira. ã jicu buo tiro marieno namo tiga ticorore. ²¹Ticoro pohna tirohca. Tirota to macunota to masare, pichacapu wahaborinare yũdohtiro jirohca. To ã yũdohtiro jichu ñacu, Jesu ni wama pisuihca mũhu —niha anjo Josere.

²²Panopu macariro Cohamacu yare yahu mũhtariro cjiro “ã waharohca”, to ni joariro seheta ahri jipihtia ã wahaa tiha. Ahri ã wahahtore o sehe ni joa dutia tiha Cohamacu tirore:

²³“Cũcoro nuhmino, ne mũno mehne jieraricoro, nijinocãre bocaro pohna tirohca to macunocãre.

Tirocã Emanuel wama tirohca”, ni joaa tiha Cohamacu yare. (Emanuel nino: “Cohamacu mari mehneti jira”, nino nica.)

²⁴Cohamacu anjo Josere to ã ni yahuri baharo José sehe wahcã, anjo to dutiro sehetã tiro María mehne wamomaca dũhteha. ²⁵To macunocãre to pohna tihto pano José sehe ticoro mehne jiera tiha. Baharo ticoro sehe pohna tia wahaha. Tiro sehe wihãrirocãre Jesu wamoaha.

Sũ mũja taro macaina Jesucãre ñua suha

2 Herode Judea yahpa macaina ti bui puhtoro to jiri pja tí yahpai jiri macai Belẽi Jesu masa bajuaha. To ã masa bajuari baharo ñahpichohare buheina ñahpichohare noano masiina sũ mũja taro macaina ta, Jerusalẽpu wihiha. ²ã wihiha, masare tó macainare sinituha:

—¿Judio masa ti bui puhtoro jihtiro cjihto mipũre nohopu masa bajuacari tiro? Sũ mũja taropu jina, ñahpichohaca to wahma bajua wahã suchu ñuna, “Puhtoro masa bajuaro nica”, ni masihi sã. ã to bajuachu ñuna, sã cũno mehne tirore ño payona tana tahi opu —ni yahuha buheina masare.

³ã yoa paina Herodere tíre yaha tiha. Ti ã yahuchu tũhoro Herode sehe soro tũhotuha. ã jia jipihtina Jerusalẽ macaina cũhu to yoaro seheta soro tũhotuha tina cũhu. ⁴ã jiro Herode sehe jipihtina sacerdotia puhtoare, mari judio masare buheina cũhure to pjirocari baharo ti cahmachu pihtichu ñuno, tinare sinituha tiro:

—¿Nohopu masa bajuaro hcaro Cristo sehe mũsa tũhotuchu? —ni sinitu ñuha tiro.

⁵õ sehe ni yahuha tirore:

—Belẽi, Judea yahpai jiri macai Cristo masa bajuaro hca. õ sehe ni joaa tiha Cohamacu yare yahu mũhtariro cjiro:

⁶“Belẽi yu yainare Israe masare dutihtiro tarohca.

ã jiro paye macari Judea yahpai jia macari yũdoro jira Belẽ”,

ni joaa tiha Cohamacu yare —ni yahuha tina Herodere.

⁷Ti ã ni yahuri baharo Herode masa ti marieno watoi sũ mũja taropu tarinare pjirocaha. To cahapu tina ti suchu ñuno, tinare sinitu ñuha. To ã sinitu ñuchu tũhoa, ñahpichohacare ti ñuri dachore yahuha tina. ⁸Ti ã yahuri baharo Herode sehe tinare Belẽpu warocaro o sehe niha tinare:

—Tirocãre noano macaga. Tirocãre bocana tjuahna yũhure yahu tjuahga. Yũhu cũhu tirocãre ño payoi wahai tai nija —nimaha tinare Herode.

⁹To ã niri baharo, tina wahaa wahaha. Ti ã wahachu sũ mũja taro ti ñuria ñahpichohaca sehe mũ tãrucuha. ã yoa wihãrirocã to jiro bui waro tjuah wahã suha

tia sehe. ¹⁰ Ā jia ñahpichohacare ñua, tuaro wahcheha tina. ¹¹ Wihārirocā to jiri wuhupū sū, sāa wahaha tina. Ā sāa sua, wihārirocāre to pocoro mehne jirocāre ñuha tina. Ā ñua tina na tuhcuca caha sū, tirocāre ño payoha. Ño payo tuhsu ti caa pocare naroca pjōroca, urure, inciensore, mirra wama tia me sitia cūhure na wio, tīre tirocāre wapa marieno waa tiha. ¹² Tīre wa tuhsu carīa wahaha tina. Ti ā carīchū cahānopū Cohamacu yahuha tinare: “Herode cahai tjuarena tjiga”, ni yahuha Cohamacu tinare cahānopure. To ā ni yahuri baharo, tina sehe wahcāha. Ti ā wahcāri baharo pa mahapū ti ya dihtapū tjuaa wahaa tiha.

José cūhū Jesucāre Egiptopū na duhti wahcāa wahaha

¹³ Ti ā wahari baharo Cohamacu anjo cahānopū Josére bajuaro, ō sehe niha:
—Wahcāga. Herode sehe maharirocāre wajāno taro, macano nina mipure. Ā yoa maharirocāre, to pocoro cūhure Egiptopū cjero na duhti wahcāa wahaga. Tōpūre yū niriro purota jiga —ni yahuha anjo Josére.

¹⁴ To ā nichū tūhoro, José sehe ñamiilhta wahcā, maharirocāre to pocoro cūhure Egiptopū na duhti wahcāa wahaha. ¹⁵ Egiptopū sua, Herode to catiro puro tōpūre jiha tina. Ā yoaha panopū macariro Cohamacu yare yahu muhtariro cjiro to ni joariro seheta. Tīre tirore Cohamacu joa dutia tiha. Ō sehe ni joaa tiha Cohamacu yare: “Egiptopū jirirore yū macure pjirocahi”, ni joaa tiha Cohamacu yare.

Herode macanacāre wajā dutiri jire

¹⁶ Ā yoa ñahpichohare buheina ti duhti yūhduachū tūhoro Herode sehe sua yūhduaha. Ā suaro, Belē macainare, tí maca duhtū caha macaina cūhure

ti pohmare mua pohmare pua cūhma cjuainacāre wajā batoa dutiha tiro. Wahmanore ñahpichoha buheina ñahpichohacare ti ñuri dachore yahuha Herodere. Ti ā nichū tūhoro tiro to wajā duarirocā to masa bajuari dachore masino, “Ōpe cūhmari cjuara” nino, pua cūhma cjuainare jeremā batoa dutiha. ¹⁷ Panopū macariro Jeremía Cohamacu yare yahu muhtariro cjiro to ni joariro seheta ā wahaha. Ō sehe ni joaa tiha tiro: ¹⁸ “Ramá wama tiropū bisiro coa tarohca.

Tuaro cahyaa mehne tiiro coa tarohca. Raquel panamana numia ji turia numiapū Israe masa namosānumia ti pohmare tuaro tiiahca.

Ti pohmare ti wajāchū ñua, ne cahya duhusi”, ni joaa tiha panopū.

¹⁹ Ā yoa Herode to yariari baharo Egiptoi jirirore Josére Cohamacu yairo anjo cahānopū bajuaha. Ā bajuaro ō sehe niha Josére:

²⁰ —Maharirocāre wajā duaina cjiro yariaa wahahre. Ā jicu tirocāre to pocoro mehne Israe yahpapū na tjuaa wahaga muhu —ni yahuha anjo Josére.

²¹ To ā niri baharo tiro wahcā, maharirocāre to pocoro mehmeta Israe yahpapū na tjuaa wahaha. ²² Wiho mejeta Arquelao Herode macuno sehe to pūcūro cohtotariro to jichū tūhoro José sehe Judea yahpai cuiro, tjueraha. Ā jiro pari turita cahānopū tirore yahu namoha tjoa. Tirore pari turi Judea yahpare ji dutieraha. To ā ni yahuri baharo, tina Galilea yahpapū wahaa wahaha. ²³ Tí yahpapūre Nazare wama tiri macai jiha tina. Ā yoaha tina Cohamacu yare yahu muhtaina cjiro ti joariro seheta. Ō sehe ni joaa tiha: “‘Cristo Nazare macariro tjira’, niahca masa”, ni joaa tiha Cohamacu yare yahu muhtaina panopū macaina.

João masare bautisariro masare yahuha

(Mr 1.1-8; Lc 3.1-9, 15-17; Jn 1.19-28)

3 ã yoa baharopu João masare bautisariro jiha. Judea yahpai masa marienopu tiro Cohamacu yare yahu dũcaha masare. ² Õ sehe ni yahuha tinare:

—Muano macariro Cohamacu musa puhtoro to suho jilto mahanocã duhsara. ã jina “Ñano yoeraja”, musa ni tuhotumari cjrيره duhuga. Musa ñaa buhirire cahya, Cohamacu sehere cahmaga musa —ni yahuha tiro tinare.

³ Panopu macariro Isaia Cohamacu yare yahu muhtariro cjiro João to buhetore ò sehe ni joaa tiha:

“Masa marienopu cũiro saũurucu, ò sehe ni buherohca:

‘Mari puhtoro to tahto pano tirore cahmaeraina cjrيره musa tuhotuare cohtota, tirore cahmaina jiga musa’, ni saũurucu buherohca”,

ni joaa tiha Isaia cjiro João cjihtore.

⁴ Tiro João camello pjoari suhtirore sãariro, wahiquiro cahsaroreta tuã dihoriro jiha. Poreroare, macaroca macaina miquina mi cũhure chuã tiha.

⁵ Jerusalẽ macaina, jipiltiro Judea yahpai jiina, Jordão wama tiri ma cahai jiina cũhu tirore tuhoa taha. ⁶ Wihi, tirore tuho, ti ñaa yoirere Cohamacure yahuha tina. Ti ã ni yahuchu tuhoro Jordão wama tiri mai João tinare bautisaha.

⁷ ã jiro payu fariseo curua macaina, saduceo curua macaina cũhu Joãore ti bautisa dutia tachu ñũno tiro tinare ò sehe ni yahuha:

—¿Musa cũhu agãã ñima tiina yoaro sehe musa mahñoa buhea mehne masare dojomehneina jina, Cohamacu musare to buhiri dahrehto pano tirore cui, duhti

masierara musa? ⁸ ã jina potocãta musa ñaa buhirire bujua witi, Cohamacure cahmana jiihna, noa yoa ñoga.

⁹ Õ sehe ni tuhotuena tjiga: “Panopu macariro Abrahã mari ñũchu cjiro jia tiha. ã jina to panamana jina mari Cohamacu yaina jija”, ni tuhotuena tjiga musa. Musare niita nija. Abrahã panamana jiina jimana musa. Musa ã jipachuta tí musa ã jia yaba cjihti jierara. Cohamacu sehe ahri tãa mehne Abrahã coyeare dahre masina. ã jiro Abrahã coyea musa jia wiho waro jira tãa ti wiho waro jiro sehetã. ¹⁰ Õ sehe jira: Masa yucuri yoaro sehetã jira. Cohamacu sehe coma mehne yucurire cãã cohãriro yoaro sehe jira. ã jiro noaa dicha maria yucure nuhcõri mehneputa cãã cohãnohca tiro. Tíre to cãã cohãri baharo, pichacapu jũ cohãnohca tiro. ãta yoaro taro nina masa cũhure tirore cahmaerainare. ¹¹ Yu baharo yu bui tuariro tarohca. Noa yuhduariro jira tiro. Tiro yoaro sehe jieraja yuhu sehe. ã jicu tirore tuhotucu, “Wiho jiriro jija yuhu”, ni tuhotuja yuhu. Yuhu sehe musa ñaare tuhotumari cjrيره tuhotu cohtotainare diapũ bautisacu, co mehne yoamahi. Tiro sehe yu yuhdoro yoarohca. Espiritu Santore masa mehne ã jirucuchũ yoarohca tiro. Wiho mejeta paina sehere ñaare ti tuhotumari cjrيره duhu duaeraina sehere tiro pichaca mehne buhiri dahrerohca. ¹² Yu baharo tariro cahsari cohãriro yoaro sehe jira. Cahsari cohãriro to batiro mehne jipihtia to trigo yapari cahsarire putiwera. To ã putiwera baharo trigo sehere to wihbori wuhui wihborohca. Tó sehetã yoarohca tirore cahmainare yu baharo tariro. To putiwea cahsari sehere tiro jũnohca. Tí pichaca ne yatisi. ãta yoarohca tiro yu baharo tariro tirore cahmaerainare —ni yahuha João.

João Jesure bautisaha

(Mr 1.9-11; Lc 3.21-22)

¹³Baharo Jesu Galileapũ jiriro cjiro waha, Jordão wama tiri mapũ buhu sũha Joãore bautisa dutiro. ¹⁴Wahmanore João tirore bautisa duaeramaha.

—Neho, mũhũ sehe yũ yũdoro tuariro yũhũ sehere mũ bautisachũ noaboa. Mũhũre bautisaboriro jieraja yũhũ —ni yũhtimaha João Jesure.

¹⁵Jesu sehe õ sehe ni yũhtiha tirore:

—Yũhũre bautisasiniga. Õ sehe yoana, Cohamacũ to dutiriro sehetã sohtori tina nija mari —niha Jesu.

To ã nichũ tũhorõ:

—Jai —ni yũhtiha João.

¹⁶Ã ni tuhsũ, Jesure bautisaha. To bautisa tuhsũchũ Jesu diapũ ducuriro maja sũrucũ sũha. To maja sũrucũ sũchũta, mũano parĩ mũaha. Cohamacũ to Espĩritu buja yoaro sehe tiro bui to duji tachũ ñũha. ¹⁷To ã duji tachũ mũanopũ durucuro coa taha:

—Ahrĩro yũ macũ yũ cahĩriro jira. Tiro mehne tuaro wahcheja —nino coa taha mũanopũ.

Watĩno ñaare yoa dutimaha Jesure

(Mr 1.12-13; Lc 4.1-13)

4 ã yoa Espĩritu Santo sehe Jesure masa marienopũ naaha, tũpũ watĩno tirore ñaare to yoa duti ñũhto sehe.

²Tũpũ sũro cuarenta dachori waro chũro marieno jiha Jesu. ã jiro jũca baaha. ³Jũca to baachũ ñũno watĩno sehe tiro cahapũ sũro, õ sehe niha:

—Mũhũ Cohamacũ macũno jicũ, ahri tãa pocare chũa dojomehnega —nimaha tiro Jesure.

⁴Jesu õ sehe ni yũhtiha:

—Yoeraja. Cohamacũ yare ti joari pũĩ õ sehe nina: “Masare chũa mehne dihta catieraro cahmana. Jipihtia Cohamacũ to ya yahua mehne jiro cah-

mana”, nina Cohamacũ —ni yũhtiha Jesu watĩnore.

⁵To ã ni yũhtiri baharo watĩno sehe Jerusalẽpũ “Cohamacũ ya macã”, ti niri macapũ Jesure naaha. Tũpũ na sũro, Cohamacũ ya wũhũ bui Jesure na sũha tiro. ⁶Na sũ tuhsũ, tirore õ sehe nimaha:

—Cohamacũ yare ti joari pũ õ sehe nina:

“Cohamacũ to anjoare mũhũre ñũ wihbo dutirohca. ã jia tina sehe mũhũre ñũ wihboahca,

‘Tãcapũ pũha tu muari’ nia”,

nina ti joari pũ. To ã niri potocã jichũ mũhũ Cohamacũ macũno jicũ yahpapũ pju bora ñoñũjũta yũhũre. Mũhũre tina ti yoadohochũ ñoñũjũta yũhũre —nimaha watĩno.

⁷Jesu pju bora ño duaeraro õ sehe ni yũhtiha:

—Cohamacũ yare ti joari pũ õ sehe nina: “Mũsa pũhtoro Cohamacũ to niri cjiirire ‘¿Potocã tjiijari?’ ni masi duana Cohamacũre yoa ño duti macaena tjiga”, nina Cohamacũ yare ti joari pũĩ —niha Jesu.

⁸To ã ni yũhtiri baharo mũa yũhdũdũ tũcupũ Jesure na mũjaha watĩno tjoa. Tũ buipũ mũja pja sũ, jipihtia macarine ñoroca boroha Jesure. Ti cjuaa cũhũre ñoha. ⁹ã ñono Jesure õ sehe nimaha:

—Yũhũre na tuhcuã caha sũ, ño payoga mũhũ. Mũ ã yoachũ jipihtia ahri macarine mũhũre waitjta —ni yahumaha watĩno.

¹⁰To ã nichũ Jesu õ sehe ni yũhtiha:

—Satana, wahaga mũhũ. Õ sehe nina Cohamacũ yare ti joari pũĩ: “Mũ pũhtoro Cohamacũ dihtare ño payoga. To ya dutia dihtare yoaga”, nina Cohamacũ yare ti joari pũĩ —niha Jesu watĩnore.

¹¹To ã nichũ tũhorõ watĩno wahaa wahaha. To wahari baharo anjoa sehe wihi, Jesure yoadohoa tirore chũa waha.

Galilea yahpai Jesu buhe ducaha

(Mr 1.14-15; Lc 4.14-15)

¹² Ā yoa Joãore peresu ti yoachu tuhoro, wahaah wahaha Jesu. Waha, Galilea yahparu suha. ¹³ Tóí jiri macapu Nazarepu waha, yuhdu wahcã, Capernau wama tiri macapu suha. Galilea wama tiri bucpariro duhtu cahai jira Capernau. Tí maca Zebulô yahpa cahai, Neftalí yahpa cahai jire Capernau. Tópu su, jiha Jesu. ¹⁴ Āta yoaha Jesu panopu macariro Cohamacu yare yahu muhtariro Isaia cjiro to ni joariro seheta. Ō sehe ni joaa tiha:

¹⁵ “Zebulô yahpa cahai, Neftalí yahpa cahai, bucpariropu waharoi, Jordão pa buhusehe coapu Galilea yahpa jira.

Tí yahpa judio masa jieraina ya yahpa jira.

¹⁶ Tó macaina Cohamacu yare noaare masierara.

Ā masierapahta noarirore nuapu masiahca.

Tina sehe Cohamacure ne masierara.

Ā jia pichacapu wahaborina jimaha.

Ā jiro cüiro tinare Cohamacu yare masichu yoarohca”,

ni joaha Isaia cjiro.

¹⁷ Tópu jiro, Cohamacu yare yahu ducaha Jesu:

—Musa ñaare tuhotumari cjirore duhu, noaa sehere tuhotu cohtota, Cohamacureta macaga musa. Muano macariro Cohamacu jipihtina bui puhtoro to suho jihto mahanocã duhsara —ni yahu ducaha tiro.

Pititiaro wahi wajainare tiro mehne macaina cjihtire pjiha Jesu

(Mr 1.16-20; Lc 5.1-11)

¹⁸ Ā yoa Galilea wama tiri bucpariro duhtu cahapu Jesu sito wahcãmahno nuha Simore, to bahuro Andre mehne.

Simota Pedro ti ni pisuriro jiha. Tina sehe wahi wajaina jia, ti wauyucure doca ño mujaa niha bucpariropu.

¹⁹ —Yuhu mehne macaina cjihti taga musa. Yuhu mehne musa tachu, musa wahire ñaha cahmachuina musa jiro seheta, Cohamacu yaina cjihtire masare pji cahmachuina cjihtire yoaihtja musare. Yuhu mehne musa tachu ā yoahntina cjihtire cüihtja musare —niha tiro tinare.

²⁰ To ā nichu tuhoata ti wauyucure cünoca, tiro mehne wahaah wahaha.

²¹ Ā yoa Jesu tina mehne yuhdu wahcã, Santiagore to bahuro João mehne boca suha tjoa. Tina Zebedeo pohna jiha. Ti yaria dohoriai ti pucuro mehne tina cühu ti wauyucure cahnoa niha. Tina puarore tiro pjirocachu tuhoa, tina sehe dóihtja ti pucurore, dohoria cühure cü, Jesu mehne wahaha.

Payu masare buheha Jesu

(Lc 6.17-19)

²³ Ā yoa jipihtiro Galilea yahpare Jesu buhe tiniha. Judio masa mari buhea wuhusepu noaa buheare, muano macariro puhtoro to suho jia tiare buheha. Tinare buhe, dohatiinare noaina wahachu yoaro jipihtia dohatiare cohaha tiro. ²⁴ To ā yoare tuhoa Siria yahpa macaina jipihtiropu tí yahpai jiina tirore masi ducaha. Ā masia, soro jia dohatia cjuainare, tuaro puriare cjuainare, watia ti sāanohrinare, ñama yaria munare dohatiinare, tini masieraina cühure na suha. Ti ā na suchu nuño jipihtina tinare noaina wahachu yoaha Jesu. ²⁵ To ā yoachu nuha, Galilea yahpa macaina, Decapoli wama tiropu jia macari macaina, Jerusalē macaina, Judea yahpa macaina, Jordão pa buhusehe coa macaina payu masa tiro mehne wahaha.

Tācupu mūja, tói buheha Jesu masare

5 Masa payu to cahai ti suchu űuno Jesu tācupu mūjaha. Mūja su, tói dujiha. Tói to dujichu to buheina sehe tiro cahapu suha. ²Ti suchu űuno ō sehe ni buhe đucaha:

Ō sehe jiina jira wahcheina*(Lc 6.20-23)*

³—Ti űana tuhotumari ćjirire duhu, noaa sehere tuhotu cohtotaina Cohamacure cahmaina wahcheina jira. Mũano macariro puhtoro to suho jiropure wahaahca tina. Mũano macaa ti ya jira.

⁴Yahco tiina cũhu wahcheina jira. Tinare wahchechu yoarohca mari Pũcu.

⁵Painare yũhdũruca duainera űa jica nieraina wahcheina jira. Cohamacu “Waihtja”, tinare to nirire ćjũaahca tina.

⁶Cohamacu to dutiro sehe yoa duaina, noare yoa duaina wahcheina jira. Cohamacu to yoadohochu tina noare yoa sohtori tiaha.

⁷Painare pja űũina wahcheina jira. Ti ű pja űũchu Cohamacu tina cũhũre pja űũnohca.

⁸Ti űaa buhirire cosanohrina wahcheina jira. Cohamacure űũahca tina.

⁹Masare bosaina wahcheina jira. Tinare “Yũ pohna jira”, ninohca Cohamacu.

¹⁰Cohamacu dutiare ti yoari buhiri ti űano yoanohrina sehe wahcheina jira. Mũano macariro puhtoro to suho jiropu to yare ćjũaahca tina.

¹¹Yũ yare masa yoari buhiri paina musare ti tuhtipachũta wahcheina jira masa. Musare ti űano yoapachũta wahcheina jira masa. Yũ yaina masa jiri buhiri musare jipihtia űaa ti quiti dojomehnepachũta ti mahũopachũta

wahcheina jira masa. ¹²Cohamacu yare yahu muhtainare masa pano jiinare tinapũreta űano yoa muhtaha. Masa cũhũre ti yoariro sehe ti yoachũ wahchega. Noano yajeripohna tiga. ű jiro mũanopũ masa suchu pũro noano yoarohca musare Cohamacu —ni yahuha Jesu.

Moa yoaro sehe, buhriaro yoaro sehe jira Jesu yaina*(Mr 9.50; Lc 14.34-35)*

¹³ű yoa Jesu ō sehe ni buhe namoha:

—Moa wahiquire dihire to űano wa-haerachu yoaro sehetu masa sehe yũ yaina sehe jipihtina painare űaare ti yoa duaerachu yoara. Wiho mejeta moa sehe ti űaa wahachu pari turi noaa yoahto basioerara. Tí moa ne noaerara. Ti ű wahachu tí moare cohũno cahmana. Ti ű cohũri baharo tí bui masa tu cũna. Ne yaba ćjihti jierara tí moa ti cohũa. (Ti yaba ćjihti jieraro sehetu jiena tũiga masa. Cohamacu ya sehere cohũena tũiga) —ni yahuha Jesu.

¹⁴ű yoa tiro ō sehe ni buhe namoha:

—Buhriaro marine to űũchu yoaro sehetu masa sehe yũ yaina sehe ahri yahpa macainare Cohamacure masichũ yoara. Tũcu bui jiri macare nũohto basioerara. ¹⁵ű yoa sihũriare masa sihũa, biato docapu nũoerara. Tiare sihũriare mũanoi duhu payora tí wũhu macaina jipihtina ti űũhtiare. ¹⁶Ō sehetu masa cũhu buhriaro yoaro sehe jiina jina, noare yoaga. Masa ű yoachũ űũa masa mari Pũcu mũano macarirore űo payo, “Tuariro, noariro jira”, niaha —ni yahuha Jesu.

Cohamacu to dutiare to joari ćjirire yahuha Jesu

¹⁷ű ni tuhsũ, tinare ō sehe ni yahu namoha:

—Ahrire masa masichũ cahmaja yũhu. Cohamacu to dutiare Moise ćjirore to cũrĩre, to yare yahu muhtaina

cjiri ti joari cjiri cūhure cohāi tai nierahi. Tí dutiare mūsare noano yahu potoi tai nii. Tí dutiare ti quihōno jichu űoi tai. Ti niriro seheta yoa sohtori tii tai nii. ¹⁸Potocā mūsare nii nija. Pihitiri dacho pano jisnichu Cohamacu dutia Moise cjirore to cūrire ne mahanocā baro cohāsi mari. Ahri yahpa, mūano cūhu ti jisnino puro to dutia cūhu jirucuahca. Ā jirucua ti niriro seheta sohtori tirohca. ¹⁹Ā jia tí dutiare cāina yūhdurūcaa, painare tó sehe yūhdurūca dutia, mūano macariro puhtoro to suho jiropu cahamaca yoaro sehe jiahca. Cūno dutiacā to jipachuta tina yūhdurūcaa, cahamaca yoaro sehe jiahca tina. Paina tí dutiare noano yoaa, painare tí yoaro sehe yoa dutia, mūano macariro puhtoro to suho jiropu puhtoa yoaro sehe jiahca tina sehe. ²⁰Mūsare niita nija yūhu. Judio masare buheina, fariseo curua macaina cūhu Cohamacu cahmaare quihōno yoerara. Tina ti yoariro yūhoro Cohamacu cahmaare yoaga mūsa sehe. Mūsa ā yoerana, puhtoro Cohamacu to suho jiropure ne susi mūsa —ni yahuha Jesu.

Susiniare yahuha Jesu

(Lc 12.57-59)

²¹Ā ni tuhsu, tinare ō sehe ni yahu namoha:

—Panopu macaina ō sehe ni ti yahuri cjirire tūhori jimare mūsa: “Masare wajāena tjiga. Masare wajāriro ti buhiri dahrehtiro jira”, ti niri cjirire tūhori jimare mūsa. ²²Ahri ti yahuri yūhdo curero mūsare ahri sehere yahu namoihtja. To coyeiro mehne susiniriro sehe ti buhiri dahrehtiro jira masunore wajāriro yoaro seheta. To coyeirore tuhtiriro, “Ne tūho masia maerariro jira mūhu”, niriro buhiri dahre dutiina cahai ti naahitiro jira. “Tūho masierariro jira mūhu”, to coyeirore nirirore pichacapu wahahto cua yūhduara tirore.

²³Mūsa coyeiro mūsare to űu tuhtichu ō sehe yoaga. Cohamacu wūhupu Cohamacure mūsa űo payohto pano, wahiquirore jū mūo, mūsa wahto pano ō sehe yoaga. ²⁴Mūsa wahtire duhu cū, mūsa coyeiro cahapu waha, “Pari turi cahmachena tjjihna. Tó purota duhujihna tíre”, niga tirore. Mūsa ā niri baharo Cohamacure wa, űo payona wahaga to wūhupu.

²⁵Pairo mūhure to yahusā duachu, puhtoro mūsare beseriro cahapu mūhure to naa duachu, tiro mehne suaro marieno wahaga. Masare beseriro cahapu to na suhto pano tiro mehne noano jiga. Mū ā yoachu űuno tiro mūhure yahusāeraboca. Mū ā yoerachu tópure mūsa sūchu tiro sehe mūhure masare beserirore yahusānohca. To ā yahusāchu, beseriro sehe peresu yoainapure mūhure warohca. Ā jia tina mūhure peresu yoahca. ²⁶Potocā nii nija mūhure. Tópu jisniihca mūhu. Pu ti wapa dutirire mūhu wapa pahñoipu wijaaihca mūhu —ni yahuha Jesu.

Pairo namono mehne űano yoare yahuha Jesu

²⁷Ō sehe ni yahu namoha Jesu:

—Panopu macainare ō sehe ti ni yahuri cjirire tūhori jimare mūsa: “Pairo namono mehne űano yoena tjiga”, ti niri cjirire tūhori jimare mūsa. ²⁸Ahri ti yahuri yūhdo curero mūsare ahri sehere yahu namoihtja. Numinore űahaeraparota, cūiro ticorore űano goa pjaro, űano wacū tūhoturo űano yoa tuhsuha ticoro mehne.

²⁹Ā jicu mū capariaca poto buhusehei jiriacā mehne űano yoacu, tiare orewe na mū cohāboriro seheta ti űaa yoare duhuga. Tíre duhueracu pichacapu wahaichca. Mū capariacare mū cohāchu tia capariaca dihta butira. Mūhu sehere pichacapu mū wahachu űa yūhduara. Ā

jicu tí ñaa yoaare duhuga. ³⁰ Ñ jicu mü wamomaca poto buhusehei jiri wamomaca mehne ñano yoacu, tí wamomacare mü dute cohaboriro seheta tí ñaa yoaare duhuga. Tíre duhueracu pichacapü wahaiha. Mü wamomacare mü cohächü tí wamomaca dihta butira. Mühü sehene pichacapü mü wahachü ña yuhduara. Ñ jicu tí ñaa yoaare duhuga —ni yahuha Jesu.

To namonore cohāare yahuha Jesu

(Mt 19.9; Mr 10.11-12; Lc 16.18)

³¹ Ñ sehe ni yahu namoha Jesu:

—Panopü ahri cühure niha: “To namonore cohā duariro to cohāhtore yahuri pü mehne ticorore cohā masina”, nimaha panopü. ³² Ahri ti yahuri yuhdo curero müsare ahri sehene yahu namoihtja. To namono paio mehne ñano yoareraricoro to jipachuta to manüno ticorore cohāboca. To ñ cohā daporicoro paiore manü tiro ñano yoaro nica ticoro paio mehne jiro. To manüno ticorore ñ cohāno ticorore paio mehne ñano yoachü yoara. To baharo namo tiri cühü ticoro mehne ñano yoaro nina — ni yahuha Jesu.

Wama payo niare yahuha Jesu

³³ Ñ sehe ni yahu namoha Jesu:

—Panopü macaina ñ sehe ti ni yahuri cjirire tuhori jimare müsa: “Müsa niriro seheta yoaga. ‘Cohamacü mehne potocā ñ yoaihtja’, müsa niriro seheta yoaga”, ti ni yahuri cjirire tuhori jimare müsa. ³⁴ Ahri ti yahuri yuhdo curero müsare ahri sehene yahu namoihtja. “Müano mehne potocā nii nija”, ni müano mehne wama payo niena tjiga. Müano sehe Cohamacü mari puhtoro to süho jiro jira. Wiho jiro jierara. To ñ jichü ñuna müano mehne ñ niena tjiga. ³⁵ Ahri yahpa mehne ne wama payo “Potocā nii nija”, niena tjiga. Ahri yahpa Cohamacü ya yahpa jira. To ñ jichü ñuna

ñ niena tjiga. “Jerusalē mehne potocā nii nija”, ne wama payo niena tjiga. Tuariro mari puhtoro ya maca jira Jerusalē. Wiho jiro maca jierara. To ñ jichü ñuna ñ niena tjiga. ³⁶ “Yü dapu mehne potocā nii nija”, ni wama payo niena tjiga. Müsa pjoari ti yehsea wahachü yo masierara müsa. Ti ñia wahachü cühure yo masierara müsa. Ñ yo masieraina jina “Yü dapu mehne potocā nii nija”, ni wama payo niena tjiga. ³⁷ “Yoanahtja”, nina wama payoro marieno ñ sehe dihta tíre nirucuga. “Yoasi”, nina cühü wama payoro marieno nirucuga. Müsa wama payo nina, watino ñariro to dutiriro seheta yoana nica müsa —ni yahuha Jesu.

Ti cahma suaare yahuha Jesu

(Lc 6.29-30)

³⁸ Ñ sehe ni yahu namoha Jesu:

—Panopü ñ sehe ti ni yahuri cjirire tuhori jimare müsa. “Mühure paio mü capariacare to cjā tihāriro seheta mühü cühü tirore cjā tihā cahmaga. Mü piriacare to cjā nuhariro seheta mühü cühü cjā nuha cahmaga”, ti niri cjirire tuhori jimare müsa. ³⁹ Ti yahuri yuhdo curero ahri sehene yahu namoihtja müsare. Mühure ñano yoarirore ñ ñunocahga. Cü buhusehe mü wahsupure to cjächü, pa buhusehe cühure cjā dutiga tirore. ⁴⁰ Pairo buhiri dahre dutirirore mühure to yahusächü, dutirirore sehe mü camisare mühure yahusārirore wa dutiboca. To ñ wa dutichü, tirore waga. Mü bui macari suhtiro cühure wa namoga tirore. ⁴¹ Pairo surara paye barore cü kilómetro mühure to naabasa dutichü, pa kilómetrore waha namoga tjoa. ⁴² Mühure sinirirore waga. Tuhsü, paio mühure to waso dutichü wasoga tirore —ni yahuha Jesu.

Müsare ñu tuhtiinare cahiga

(Lc 6.27-28, 32-36)

⁴³ Ñ sehe ni yahu namoha Jesu:

—Masa õ sehe nina: “Musa mehne macainare cahīga. Á yoa musare ñu tuhtiinare ñu tuhti cahmaga tjoa”, ti niri cjiire tuho muhtari jimare musa. ⁴⁴Ti yahuri cjiri yũdo curero ahri sehere yahu namoihtja musare: Musare ñu tuhtiinare cahīga. Á cahina tinare noano yoaga. Musare ñano yoainare ti ya cjihtire Cohamacure sini payoga. ⁴⁵Musa ā yoana mari Pucu muano macariro pohna jira musa. Cohamacu sehe cūno potori yoara masare. Ñaina cūhure, noaina cūhure sū sichu yoara tiro. Tuhsu, Cohamacu dutiare yoaina cūhure, yoaeraina cūhure coru tachu yoara tiro. Masare cūno potori to yoariro seheta musa cūhu yoaga. ⁴⁶Musare cahina dihtare musa cahichu tí ne yaba cjihti jierara paina sehere musa cahierachu. Puhtoa ya cjihtire wapa na cohtaina cūhu tó seheta yoara. Á jina jipihtinare cahīga. ⁴⁷Musa coyea dihtare musa noano piti bocachu tí cūhu ne yaba cjihti jierara paina sehere musa noano piti bocaerachu. Cohamacure masieraina cūhu tó seheta yoara. Á jina jipihtinare noano piti bocaga. ⁴⁸Ñaa marieina jiga musa. Musa Pucu muano macariro to ñaa marieriro to jiriro seheta musa cūhu ñaa marieina jiga —ni yahuha Jesu.

Noaa yoare yahuha Jesu

6 Pari turi tiro õ sehe ni yahu namoha: —Cohamacu ya cjihtire noare yoana, “Cohamacu yare yoa pahnoina jija sã”, ni yahuena tjiga painare. Musa ā ni yahuri buhiri noare musa yoari cjiri ne yaba cjihti jierara. Á jiro Cohamacu muano macariro noare musa yoari wapa musare ne wasi. ²Á jina pjacuoinare yoadohona, tíre masare yoa ñoena tjiga. Masa ti ñuenoi yoadohoga tinare. Caina noaa ti yoare yoa ñohna mahapu jiiinare, judio masa mari buhea

wuhusepu jiina cūhure. Tina mari baharo buhusehei ñano yoa cohtaina jira. Á yoa ñohna tina, “Noaina jira”, masare ni ñu dutia. Ti ā ni ñuchu ā yoa ñoina sehe wahche tuhsure. “Noaina jira” ni, masa ti ño payochu wahche tuhsure tina. Á jiro Cohamacu sehe ne wahche namochu yoasi tinare. ³Á jina pjacuoinare yoadohona, masa ti ñuenoi yoadohoga tinare. Musa mehne macaina mehne jina ti ñuenoi pjacuoinare yoadohoga. ⁴Masa ti ñueraropu musa yoadohopachuta Cohamacu sehe ñuna. Á ñuno musa ā yoari wapa warohca musare —ni yahuha Jesu.

Cohamacure siniare yahuha Jesu

(Lc 11.2-4)

⁵ Pari turi tiro õ sehe ni yahu namoha:

—Cohamacure sinina, mari baharo buhusehei ñano yoa cohtaina yoaro sehe yoena tjiga musa. Judio masa mari buhea wuhusepu ducu, mahapu cūhure ducu, Cohamacure sini ñohna tina masare. Á sini ñoa potocā masa tinare ti ño payochu tí mehne tina wahche tuhsure. ⁶Cohamacure sinicu tacu, mu ya tahtiapu biha sãaga. Biha sãa, musa Pucu ñumahnorerarore siniga. Musa ā yoachu masa marieno musa sinipachuta musa Pucu musare tuhrohca. Á tuhoro musare noano yoarohca tiro.

⁷Á jina Cohamacure sinina, tuhuturo marieno musa sinirireta pari turi sini majare tjua mujaena tjiga. Ó seheta yoara Cohamacure masieraina. “Payu durucua mehne Cohamacure sã sinichu tiro sãre tuhrohca”, ni tuhutumana tina. ⁸Tina yoaro sehe yoena tjiga. Musa sinihto pano musa Pucu musa cahmaare masi tuhsura. ⁹Á jina õ sehe ni sininahca Cohamacure:

“Sã Pucu, muano macariro muhu ñaa marieriro ā jirucura.

¹⁰ Mipure jipihtina bui puhtoro jiga.

Muanopu mā dutiro seheta ti yoariro seheta ahri yahpa macaina cūhu yoajaro.

¹¹ Ā jicu dachoripe sā chuhtire warucuga sāre.

¹² Paina sāre ti nāno yoarire sā boja.

Ā jicu mūhu cūhu sā nāno yoarire boga.

¹³ Ā jicu sā nāare yoa duana sā goa pjachū nūcu tīre yoa duti tjiga.

Ā jicu sāre nāare yoerachū yoaga.

[Mūhu sā puhtoro tuariro ā jirucuihca. Jipihtina mūhure ā nō payorucuahca],”

ni siniga Cohamacure.

¹⁴ Paina mūsare ti nāa yoarire mūsa bochu nūno, mūsa Pūcu mūano macariro cūhu mūsa nāa yoarire borohca. ¹⁵ Wiho mejeta paina mūsare ti nāa yoarire mūsa boerachū mūsa Pūcu cūhu mūsa nāa yoarire ne bosī —ni yahuha Jesu.

Chu duhuare buheha Jesu

¹⁶ Ā jiro tiro tinare ō sehe ni yahu namoha:

—Cohamacure nō payona tana chu duhuna bujua witiina yoaro sehe yoa nōena tjiga. Tō sehe yoara mari baharo buhusehei nāno yoa cohtaina. Tina ti wūhdūa poca cahyaina yoaro sehe jira. Ti ā jiina jichū ti chu duhuchū nū masina masa. Potocāta mūsare nii nija. Tinare masa nō payochū cahmana tina. Ā jia tinare ti nō payochū nūa tina wahche tuhsure. (Cohamacu sehe tireore ti nō payori wapa tinare wahchechū yoasi. Ā jina tina yoaro sehe yoa nōena tjiga mūsa.) ¹⁷ Mūsa chu duhuna, mūsa pjoarire co mehne wa payo wūha majare payoga. Ā jina mūsa wūhdūa pocare cosaga. ¹⁸ Mūsa ā yoachū mūsa chu duhuchū nū masisi masa. Mari nū mahnoerariro Cohamacu dihta mūsa chu duhuare nū masinohca. Mūsa sahsero mūsa jichū tiro mūsa mehne ā jirucura. Ā nūno tiro mūsare noano yoarohca tireore mūsa nō payori wapa —ni yahuha Jesu.

Muano macaare cjuā dutiha Jesu

(Lc 12.33-34)

¹⁹ Ā jiro tiro ō sehe ni yahu namoha:

—Ahri yahpa macaare na cahmachuena tjiga. Ō macaā baa wahaboca. Ti baerachū yacariru naboca tīre. To yacaerachū machū tuaboca. Ā jia ahri yahpa macaā nu butihtō cuara. Ā jina ahri yahpa macaare tuaro cahmaena tjiga. ²⁰ Mūano macaā sehere cahmaga mūsa. Mūano macaare machū tua masierara. Tōpū mūsa cjuāa ne baerara. Tōpūre yacariro na masierara. Ā jina mūano macaare cahmaga mūsa. ²¹ Tōpū mūsa cjuāa ti jichū, mūano macaare Cohamacu yare tuaro wacūna mūsa —ni yahuha Jesu.

Masa ti tuhoturo seheta yoara

(Lc 11.34-36)

²² Ā jiro ō sehe ni yahu namoha tinare:

—Sihāria to noano buhriachū mari nū masino seheta Cohamacu yare tuhotuna to yare noano yoa masinahca mūsa. Mūsa tuhoturo seheta yoara mūsa. Cohamacu yare tuhotuna noaare yoara mūsa. ²³ To yare tuhotuerana nāare yoara mūsa. Mūsa nāa dihtare mūsa tuhoturucuchū tī nāa sehe nābiaa jira —ni yahuha Jesu.

Niñerure cahīna, Cohamacu sehere cahīerara

(Lc 16.13)

²⁴ Ā jiro tiro ō sehe ni yahu namoha tinare:

—Cūiro Cohamacu sehere wacūno, tuabiaro niñeru sehere wacūerara. Niñeru sehere tuabiaro wacūno Cohamacu sehere wacūerara. Niñeru dihtare cahmariro jiro Cohamacure wahchechū yoerara. Cohamacu cūhure, niñeru cūhure puarore cahma yūhdūrucahto basioerara mūsare —ni yahuha Jesu.

Cohamacu to pohnare ñu wihbora

(Lc 12.22-31)

²⁵ Ñ jiro tinare õ sehe ni yahu namoha:

—Ñ jicu musare nii nija: Musa chuare, sihniare, suhti cühure pjíro cahya tühotuena tjiga. Musare bajuamehnenno chuare chuhtina cjihti dihtare suhti sáahtina cjihti dihtare Cohamacu yoeraha musare. ²⁶ Minichahca perire Cohamacu to ñu wihboare masiga musa. Tina weseri maeraina jira. Ñ yoa chuare ti wihboa wuhuse tinare mariahna. Musa Pucú muano macariro sehe tinare ti chuhtire wara. Minichahca yuhdoro musa sehere cahina Cohamacu. Ñ jiro musa cühure ñu wihborohca tiro. ²⁷ Pjíro musa tühotua mehne cū hora musare cati namochu yoa masierara musa. Ñ jiro musa pjíro tühotua yaba cjihti jierara.

²⁸ Ñ jina musa suhti sáahtire pjíro cahya tühotuena tjiga. Macaroca macaa cohorí ti cohoare tühotuga. Tí cohorí ti basi suhtire yoerara. Wiho mejeta tí cohorí noaa suhti yoaro sehe noaa cohorí bajura. ²⁹ Salomo cjiro noaa suhtire sáariro to jipachuta tí cohorí sehe tiro yuhdoro noabia cohorí waro jira. ³⁰ Cohorire noaa cohorí yoara Cohamacu sehe. Tí cohorí sehe mahaa dachoricā jirucuma ñai boraahara. Mahanocā ji, pa dachoi pichacapū jūa wahara. Ti ñ jipachuta cohorire noaa cohorí jichū yoara Cohamacu. Ñ jiro Cohamacu cohorire to noaa cohorí to yoariro yuhdoro musa cühure noano yoarohca. Suhtire warohca. Cohamacure mahanocā wacū tuara musa. ³¹ Ñ jina musa chuhtire, musa sihnihtire, musa suhti sáahtire pjíro cahya tühotuena tjiga. ³² Cohamacure cahmaeraina sehe tíre ñ macarucua nina. Musa Pucú muano macariro jipihtia musa cahmaare masina. To ñ masichū pjíro cahya tühotuena tjiga. ³³ Cohamacu musa puh-

toro to jihto cjihtore cahma muhtaga musa. Jipihtia paye baro yuhdoro tirore cahmaga musa. Noare to yoa dutia cühure cahmaga. Musa ñ yoari baharo Cohamacu sehe musa cahmaa duhsachu warohca. ³⁴ Ñ jina ñamichacapure musa dohse wahahtore pjíro cahya tühotuena tjiga. Musa ñ pjíro cahya tühotuna payubiaa jahca musa tühotuchū to purota mu surohca —ni yahuha Jesu.

Painare “Ñaina jira”, niena tjiga

(Lc 6.37-38, 41-42)

7 Ñ jiro tiro tinare õ sehe ni yahu namoha:

—Painare “Ñaina jira”, niena tjiga musa. Musa ñ nierachu Cohamacu musare “Ñaina jira”, nisi. ² Painare “Noano yoerara”, musa ni ñuriro sehetā Cohamacu sehe musa cühure ña ni ñunohca. ³ Mari piti dahre buhechu õ sehe yoaina jira musa. Musa coyeyiro to capariacapū mahari pohcarocā to sáachu tí pohcarocāre noano ñuna musa. Musa ya capariaca sehere pjiri pjī to jipachuta tí pjīne ne ñuerara musa. Mahari pohcarocāre musa ñuno sehetā musa coyeyiro to ñano yoaa sehere noano ñuna musa. Musa basi musa ñaare tuaro yoapanahata tíre masierara musa, pjiri pjīne musa ñueraro sehetā. ¿Dohse jiro baro ñ jijari musa? ⁴ Ñ sehe niina jira musa: “Coyeyiro, ñaare yoai nica muhū. Ñ jicu tíre duhuga”, niina jira musa. Ñ niina jipanahta pjíro ñaare yoara musa sehe. ¿Dohseana musa ñaare yoapanahata tíre masierajari musa? ⁵ Masa ti baharo buhusehei ñano yoa cohtaina jira musa ñ yoaina. Pjiri pjīne musa capariacai jiri pjīne musa na muhtaboriro sehetā musa ñano yoaa sehere duhu muhtaga. Musa ñ yoari baharo musa coyeyiro to ñano yoare duhuchū yoa masiboca, mahari pohcarocāre musa naboro sehetā.

⁶Dieya yoaro sehe jiina, yesea yoaro sehe jiina cūhu ñabiainare Cohamacu ya noa yuhduare ti ño payoeraare yahuena tjiga tinare. “Tinapu bujupe, ñano ni, musare ñabiaro yoari”, nina yahuena tjiga tinare —ni yahuha Jesu.

**Cohamacure mari
siniare yahuha Jesu**

(Lc 11.9-13; 6.31)

⁷ Ñ jiro tiro tinare ò sehe ni yahu namoha:

—Cohamacure siniga musa. Musa sinina musa sinirire ñahanahca. Musa sinirire bocanahca. Tirore ã sinirucuga musa. Musa ã yoachū tiro musare warohca. ⁸ Jipihtina Cohamacure siniina naahca. Ñ yoa ti sinirire bocaahca. Jipihtina Cohamacure ã sinirucuinare tiro tinare warohca.

⁹ ¿Musa pohna pão curire musare ti sinichū tāca sehere wabocari musa tinare? Ne wasi musa. ¹⁰ ¿Musa pohna wahire musare ti sinichū agã sehere wabocari musa tinare? Ne wasi. ¹¹ Musa ñaina jipanahta musa pohñare noaare waa tíre musa. Ñ jiro Cohamacu sehe musa yuhdoro noaare wara musare to pohñare tirore siniinare. Musa pohñare musa wariro yuhdoro Cohamacu sehe to pohñare wara.

¹² Paina musare ti noano yoachū cahmana musa. Tinare musa noano yoachū cahmano seheta musa cūhu noano yoaga tinare. Ti noano yoerapachuta musa sehe tinare noano yoaga. Æta yoa dutira Cohamacu dutia Moise cjirore to cūripū Cohamacu yare yahu muhtaina cjiri ti joari cjiri cūhu —ni yahuha Jesu.

Mahari sopacacã quitire yahuha Jesu

(Lc 13.24)

¹³ Ñ jiro tiro ò sehe ni yahu namoha tinare:

—Муанорū Cohamacu cahapū waha duana to yare yoaro cahmana musare.

Ñ jina to yare ã yoamacanocaeraro cahmana. Mahari sopacacãpū musa sãa duachū mijo curera. Tó seheta mijo nina Cohamacu cahapū musa waha duachū. Pichacapū masa ti wahachū mijoerara. Pjiri sopacapū mari sãachū mijoerara. Tí sopacapū masa ti sãaboro seheta pichacapū masa ti wahachū mijoerara. Ñ jia payū masa tórpū waha nina. ¹⁴ Cohamacu cahapū musa waha duachū mijo nina. Mahainacã masa tórpū wahaahca. Tórpū wahaina jipihtia dachoripe Cohamacu mehne jirucuahca —ni yahuha Jesu.

**Masa ti yoirire ñuna ti
jia tiare masija mari**

(Lc 6.43-44)

¹⁵ Ñ jiro tiro ò sehe ni yahu namoha tinare:

—Noano yoaga. “Cohamacu yare yahu muhtaina jija”, ni mahñoinare tuhoena tjiga musa. Tina oveja yoaro sehe suaeraina sehe bajumana. Ti tuhotuapū ñaina jira tina. ¹⁶ Ti ñano yoachū ñuna, ñaina ti jichū masinahca musa. Ti noano yoachū ñuna noaina ti jichū masinahca musa. Agã potacu se tōhorine dicha tierara. Pota tidū cūhu higuera pocare dicha tierara. ¹⁷ Noadū yucucu noaare dicha tira. Ñadū sehe ñaare dicha tira. ¹⁸ Noadū yucucu ñaare ne dicha tierara. Ñ yoa ñadū noaare dicha tierara. ¹⁹ Noaare dicha tiera yucure ñate cohānoca, pichacapū jūnohca. Æta yoarohca Cohamacu to cahmaare yoerainare. ²⁰ Ñ jina “Cohamacu yare yahu muhtaina jija”, ni mahñoinare ò sehe masinahca. Ti yoirire ñuna, mahñoina ti jiare masinahca —ni yahuha Jesu.

**“Musare ne masieraja”, ninohca
Cohamacu payū masare**

(Lc 13.25-27)

²¹ Ñ jiro tiro ò sehe ni yahu namoha tinare:

—Payu yuhure “Puhtoro”, niina jipahta muano macariro puhtoro Cohamacu to suho jiropure wahasi tina. Yu Pucu muano macariro to cahmaare yoina dihta puhtoro to suho jiropure wahaahca. ²²Pihtiri dacho jichu payu masa o sehe niahca yuhure: “Puhtoro, mu yare sa buhehi. Mu wama mehne watiare cohā wiohi. A yoa mu tuua mehne payu yoa nohi sa”, yuhure niina jahca. ²³O sehe ni yuhtiihca tinare: “Mūsare ne masieraja. Naa buhiri tiina jira musa. A jina yu cahai taena tjiga”, ni yuhtiihca tinare.

Pua wuhu yoaina quitire yahuha Jesu

(Lc 6.47-49; Mr 1.22)

²⁴A yoa jipihtina ahri yu buherire tuhoringa yu dutiare yoaina, noano tuho masiriro wuhu dahreriro yoaro sehe jira tina. Tiro sehe cuāa copari taa wapapu saha, wuhure noano dapu dūcaha. ²⁵Ti wuhure to tuhsuri baharo coro tuaro ta, dia mini yuhdua waha, tuaro wihnono wāha. A to tuaro wāpachuta ti wuhu cuāno taa wapa bui to dapori wuhu jiro ne waha su cahaerara. ²⁶A jia jipihtina yu buherire tuhopahta yu dutiare yoeraina, tuho masierariro wuhu dahreriro yoaro sehe jira. Tiro sehe to wuhure paduro buicā dapu, noano yoa dūcaeraha. ²⁷Ti wuhure to tuhsuri baharo, coro tuaro ta, dia mini yuhdua waha, wihnono tuaro wāha. A tuaro wāno ti wuhu sehere wāroca cūnocaha. A jiro ti wuhu tuaro bora su cahaa waha —ni yahuha Jesu.

²⁸To a ni buhechu tuhoa, cuāa waha masa. ²⁹“Tiro potocāta puhtoro jira. A jiro noano masi pahñoriro marine buhera tiro. Mari judio masare buheina yoaro sehe buherara”, ni tuhoutuha tina.

Jesu cami baarirore noariro wahachu yoaha

(Mr 1.40-45; Lc 5.12-16)

8 Jesu tūcapu buhe dujiriro cjiro dujia wahaha. To a dujiachu nua masa payu tiro baharo wahaha. ²To a wahachu cūiro cami bucu baariro tirore piti boca, na tuhcu caha su, tirore siniha:

—Puhtoro, muhu yuhure noariro yoa duacu yoaga —niha.

³To a nichu tuhoro to wamomaca mehne Jesu tirore nā payoha.

—Jai, muhure noariro wahachu yoaja —niha Jesu tirore.

To a nichuta ti to cami baari cjiri yati mua wahaha. ⁴A ni tuhsu Jesu tirore o sehe niha tjoga:

—Yu muhure o sehe yoarire ne painare yahui tjia. Mu pjacure noari pjacu to waharire sacerdotere noi wahaga. Moisere Cohamacu to cūiro sehetā sacerdotere minichahcare waga mu yuhdurire ti noano masihtō sehe —niha Jesu.

Surara puhtoro to muno to dohatichu Jesu noariro wahachu yoaha tirore

(Lc 7.1-10)

⁵Tō baharo Jesu Capernau wama tiri macapu to suchu cien surara puhtoro to cahai su, tirore tuaro o sehe ni siniha:

⁶—Puhtoro, yuhure dahra cohtariro pjacu buhariro jiro waha masieratjiahno tirore tuaro purichu yu wuhupu coahre tiro —niha tiro Jesure.

⁷To a nichu, Jesu “Jai”, ni yuhtiha:

—Tirore to dohatiare yuhdachu yoai wahaihtja —niha Jesu.

⁸⁻⁹To a nichu o sehe niha surara puhtoro:

—Puhtoro, noanohca. Tai tjia. Yu yuhdoro noa yuhduariro jira muhu. Ya wuhui muhure sāa ta dutiboriro jieraja yuhu. Mu masia mehne noariro wahachu yoaga tirore. Mu a yoachu yu

yuhure dahra cohtariro noariro waharohca. Yuhure yu bui jiina paina puh-toa dutira. Yuhu cūhu surarare dutija. Cūirore “Wahaga”, yu nichu tiro wahara. Pairore “Taga”, yu nichu tiro tara. Yuhure dahra cohtarirore “Ahrire yoaga”, yu nichu tīre yoara. (Muhu cūhu dutirirota jira. Ā jiro mu dutiro seheta tiro dohatiriro yuhdūrohca) —niha tiro.

¹⁰To ā nichu tuho cūaa waharo payu masa tiro mehne jiinare ō sehe niha Jesu:

—Potocāta musare niita nija. Ahriro surara puhtoro Israe masuno jierariro Cohamacure tuaro wacū tuara. Tiore dahra cohtarirore yu noariro wahachu yoahire masi tuhsuha. Ne Israe masare ahriro yoaro sehe jiinare nūerasinija.

¹¹Musare niita nija. Payu ahriro yoaro sehe Cohamacure wacū tuaina jipih-tiro macaina muano macariro puhtoro to suho jiropu sūa, tōpu jiina mehne chuahca. Abrahā, Isaa, Jacobo mehne chuahca tina. ¹²Masa paina sehe puhtoro Cohamacu to suho jiropu wahaborina ti jipachuta nanopu nahitianopu cohānocanohca tinare. Tōpu to cohārina tuaro tii, cahyaa mehne bahca dihoahca —ni yahuha Jesu.

¹³Tīre ā ni tuhsu, surara puhtoro ō sehe niha:

—Tjuahga mu ya wuhupu. Muhure dahra cohtariro yuhdūrohca. “Potocāta yuhdūrohca”, ni mu tuhoturiro seheta yuhdūrohca —niha Jesu.

To ā nino watoihita tiore dahra cohtariro sehe noa tuhsuha.

Pedro marechonore dohatiricorore yuhdoha Jesu

(Mr 1.29-31; Lc 4.38-39)

¹⁴Baharo Jesu Pedro ya wuhupu su, Pedro marechono dohatichu nūha tiro. Juaro tichu cama bui coāha ticoro. ¹⁵To ā jichu nūtjiāhno to wamomacare nā payoha. To ā nā payochuta juaro surua

wahaha. Suruchu tuhoturo ticoro sehe wahcāruca, tinare chuare payoha.

Jesu payu dohatiinare yuhdoha

(Mr 1.32-34; Lc 4.40-41)

¹⁶Ā yoa nāmichahapu payu watia ti sāanohrinare masa na wihaha Jesu cahapu. Ti ā na wihichu nūno cū tahata to waha dutichu watia wahaa wahaha. Tuhsu, jipih-tina dohatiina ti na surinare ti dohatiare cohā pahnoha Jesu. Ā jia noa wahaha tina. ¹⁷Āta yoaha tiro panopu macariro Cohamacu yare yahu muhtariro Isaia cjiro to niriro seheta. Ō sehe ni joaa tiha: “Mari dohatiare yuhdonocanohca tiro. Mari duti tiare cohānocanohca”, ni joaa tiha Isaia cjiro Jesure.

Cāina Jesu mehne waha duamaha

(Lc 9.57-62)

¹⁸Jesu payu masa to cahai ti jichu nūno:

—Sie coapu basa pahājihna —niha.

¹⁹Ti pahāhto pano judio masare buheriro Jesu cahapu su, ō sehe niha:

—Buheriro, muhu mehne waha duaja nohoi mu waharoi —niha.

²⁰Jesu ō sehe ni yuhtiha:

—Cāina macaroca macaina wahiquina ti copari cjuara. Minichahca cūhu ti suhti cjuara. Yuhu masuno Cohamacu warocariro sehe yu cariri wuhu maeraja. (Ā jina yuhu mehne tana nāno yuhdūnahca musa) —ni yuhtiha Jesu.

²¹Ā yoa paio Jesu buheriro ō sehe niha:

—Puhtoro, yu pucu to yariachu yasinii wahaihtja. Ā ya tuhsu pinihta muhu mehne wahaihtja —niha tiro Jesure.

²²Jesu ō sehe ni yuhtiha:

—Yuhure cahmaeraina yariaina yoaro seheta jira. Tina sehe yariainare yajaro. Ā jicu muhu sehe yuhu mehne macariro cjihto taga —niha tiro.

Jesu wihnonore yusu dutiha

(Mr 4.35-41; Lc 8.22-25)

²³ Ā ni tuhsu Jesu to jiriapu dohoriapu samuha. Ā jia to buheina cūhu tiro mehne waha, samuha. ²⁴ Tí bucupariropu ti pahāchu waro wihnono tuaro taha. Ā jia pahcōri dohoriare mionocamaha. Ā wihnono wāpachuta Jesu sehe carino niha. ²⁵ To ā wahachū űua tina tirore wahcōha. Wahcō ō sehe niha:

—Pūhtoro, yūhdoga. Mari mini yariana tana nija —niha tina.

²⁶ Ti ā nichu Jesu ō sehe ni yūhtiha:

—ĶDohse jiro baro cuimacanicana nijari mūsa? Yūhure wacū tuaeraina jira mūsa —niha Jesu tinare. Ā ninota wahcārūcu sū, wihnonore pahcōri cūhure “Yūsua wahaga”, niha. To ā nichu wihnono yūhdūa wahaha. Ā jia pahcōri cūhu yusu bora wahaha. ²⁷ To ā yoachū űu cūaa, ō sehe niha tina:

—ĶCue, dohse jiro baro masūno jijari ahriro? Ahri wihnono, pahcōri cūhu to dutichu yūhdurūcaerara tirore —niha tina.

Watīare cohā wioha Jesu

(Mr 5.1-20; Lc 8.26-39)

²⁸ Tinare ā wahari baharo pahā sū, Gadara macaina ya yahpapu sūha. Tōpu ti sūchu puaro mūa masa copari watopu jiina Jesure piti bocaha. Tina watīa ti sāanohorina cuaina jiha. Ā jiro tōpu masa ti wahamahnoeno jiha. ²⁹ Tirore piti boca, ō sehe ni sañurucuha:

—ĶMūhu Cohamacu macūno dohse yoai tai tajari mūhu sā cahapure? ĶSāre Cohamacu to buhiri dahrehti pja to jierapachuta sāre buhiri dahrei tai nijari mūhu? —ni sañurucuha tina.

³⁰ Tó cahai payu yesea maca chua niha. ³¹ Tinare űua, watīa ō sehe niha Jesure:

—Sāre cohā wiocu sina yesea cahapu yeseare sāa dutiga sāre —ni siniha watīa Jesure.

³² —Jai, wahaga —niha Jesu.

To ā nichu watīa puaro masa mehne jirina cjiri waha, yesea ti pjacūripu sāaha. Ā yoa tinare ti sāari baharo, yesea pari cūnūpu mūroca buha, bucupariropu bora űoja, mini yaria piltia wahaha.

³³ Ti ā wahachū űua yeseare űu wihboina sehe cui, mūroca wahaha. Macapu sū, yesea ti minirire yahu site pahűoha. Watīa ti sāanohrinare Jesu to cohā wiori cūhure yahu pahűoha tina. ³⁴ Ā ti yahu siteri baharo tí maca macaina jipihtina Jesure űua taha. Ā jia tirore űua, tuaro mehne waha dutiha tirore.

Pjacu buharirore noariro wahachu yoaha Jesu

(Mr 2.1-12; Lc 5.17-26)

9 Ā ti waha dutiri baharo Jesu dohoriapu samu, bucupariropu pahā, to bucupari macapu sūha. ² Tōpu paina pjacu buharirore to coāri cahsaro mehne yo wua wihiha Jesu cahai: “Jesu ahrirore to dohatiare yūhdūchu yoarohca”, ni tūhotuha tina. Ti ā ni tūhotuchū masino dohatirirore ō sehe ni yahuha Jesu:

—Macu, wahchega mūhu. űano mū buhiri tiare cohā tuhsūja yūhu —niha tiro.

³ To ā nichu tūhoa cāina mari judio masare buheina ō sehe ni tūhotumaha: “Ahriro wiho jirore ā nino, ‘Cohamacu jija’, nino nina. Ā nino Cohamacure űano nino nina”, ni tūhotumaha tina. ⁴ Ti ā ni tūhotuchū masino, ō sehe niha Jesu:

—ĶDohseana ā űano tūhotujari mūsa? ⁵ “űano mū buhiri tiare cohā tuhsūja”, yu nichu, “Mahűorirore jira”, nina mūsa noano masierapanahca. “Wahcārūca, wahaga”, yu nichu yu niri potocā jia jichū dōihta mūsa masinahca. ⁶ Yūhu masūno Cohamacu warocariro ahri

yahpai masa ti ñano buhiri tiare cohã masija yuhũ. Masa ti ñano buhiri tiare cohãhtiro cjihtore cüre Cohamacu yuhure. Yu ã cohãrire msa masihtõ sehe õ seheta yoa ñoihtja msa ñuhti cjihtire —niha Jesu.

Tinare ã ninota, pjacu buharitore õ sehe niha:

—Wahcãrucaga. Mu coãri cahsarore na wahcãga mu ya wuhũpu —niha tirore.

⁷To ã nichu tuhoro pjacu buhariro wahcãrucu su, to ya wuhũpu tjuaa wahaha. ⁸Masa to ã wahachu ñua cuiha. ã yoa Jesure Cohamacu to tuare to wachu ñua masa Cohamacure ño payo, noano durucuha.

Jesu Mateore pjija

(Mr 2.13-17; Lc 5.27-32)

⁹Ti ã yoari baharo Jesu tópu jiriro ta, yuhure Mateore boca wihire. Puhtoa ya cjihtire masare wapa na cohtariro jimai. ã jicu tí pjare yu dahrari tahtiapu dujii. Tói yu dujichu ñuno õ sehe nire yuhure:

—Yuhũ mehne macariro cjihto taga muhu —nire Jesu yuhure.

To ã nichu tuhocu wahcãruca tiro mehne wahi.

¹⁰Baharo ya wuhũpu Jesu cũhu chua tare. Payu puhtoa ya cjihtire wapa na cohtaina, “Ñano yoaina”, ti niina cũhu sã mehnetã chũre. ¹¹Tina mehne sã chũchu ñua, fariseo curua macaina sãre Jesu buheinare õ sehe nire:

—¿Dohsearo musare buheriro wapa na cohtaina mehne, ñano yoaina mehne chũjari? —nire tina sãre to buheinare.

¹²⁻¹³Ti ã nichu tuhoro Jesu sehe piti dahre buhea mehne yũhtire:

—Dohatieraina duhturure macaerara. Dohatiina dihta duhturure macana. Ñaare yoaina dohatiina yoaro sehe jira. ã jicu ñaare yoaina dihtare ti ñaare ti tuhutumari cjiire duhu, noa sehere ti tuhutu cohtotachu yoai tai

nii yuhũ. Ti basi “Noaina jija sã”, ni tuhutuina barore yahui tai nierahi. Cohamacu to nirire ti joarire masiga msa. “Wahiquinare msa wajã, jũ muoa mehne yuhure msa ño payochu cahmaeraja. Painare msa pja ñuchu sehere cahmaja”, ni joaha. Ahri to joari to dohse niare masiga msa. Tíre noano buhe namona wahaga —nire Jesu fariseo curua macainare.

Chu duhuare sinituha

João buheina Jesure

(Mr 2.18-22; Lc 5.33-39)

¹⁴Baharo João masare bautisariro to buheina Jesu cahapu su, õ sehe ni siniture:

—Sã João buheina sehe Cohamacure ño payona tana, chu duhuja. Fariseo curua macaina cũhu ãta chu duhura. ¿Dohse yoaa mu buheina sehe chu duhuerajari? —nire tina Jesure.

¹⁵Jesu to tuhutua mehne piti dahre buhero taro tinare õ sehe ni yũhtire:

—Õ sehe jira tí: Wamomaca duhteropu ti pjirocaina wamomaca duhteriro mehne jia, chu duhu masierara. Tó seheta yu buheina cũhu yuhũ mehne jia, chu duhu masierara. Yuhũ wamomaca duhteriro yoaro sehe jija. Wamomaca duhteriro bose numu to yoachu tiro mehne macaina cahyaa mehne jierara. ã jia chu duhuina jierara. Yu Pũcu Cohamacu yuhure to naari baharo pinihtare yu buheina mehne jisi yuhũ. ã jia tí pjaruta yu buheina cũhu chu duhuahca —ni yũhtire Jesu.

¹⁶Panopu macaa buhea wahma buhea mehne ti buhe more duachu ñuno õ sehe ni namore Jesu tinare piti dahre buhero:

—Ne wahma cahsaro suhtiro cahsaro mehne munano suhtirore sere õno cahmaerara. ã yoachu wahma cahsaro mari cosari baharo munano suhtirore waja cahmachu, pjiario tuhũchu yoara.

(Ahri yoaro sehe ni, muna buhea wahma buhea mehne piti dahre buheraro cahmana.) ¹⁷ Ā jina ne se co bisia core wahiquiro cahsaro wajuru mehne muna wajuru mehne posaeraro cahmana. Ā yoachū se co bisia pahmoapū muna wajurure tuhrenocahna. To tuhnuhū se co cūhū, wajuru cūhū cohōa wahara. Ā jina se co wahma core wahma wajurupū posaro cahmana. Ā yoachū se co cohōeraa, wajuru cūhū cohōerara. (Tó se-heta wahma buhea muna buhea mehne buhe moreraro cahmana) —ni yahure Jesu tinare.

**Jairo maconore noaricoro
yoa, cahā nūricoro cūhūre
noaricoro yoaha Jesu**

(Mr 5.21-43; Lc 8.40-56)

¹⁸ To ā ni yahuro watoi judio masa mari buheri wūhū pūhtoro Jesu cahapū wihire. Wihi, na tuhcuca caha sū, ō sehe nire:

—Yū maco yoatapū yariaa wahahre. Tidorore mū wamomacare duhu payoi taga. Mū ā yoachū masanohca —nire tiro Jesure.

¹⁹ To ā nichū tuhoro Jesu wahcārūca tiro mehne wahare. Sā to buheina cūhū wahai. ²⁰ Sā mahai waharucuhū tói numino ā cahā nūrucuricoro Jesu baharo būhusehei ta, to suhtiro sohtoare űaha űūha. Doce cūhmari waro dachoripe cahā nūrucuricoro jiha. ²¹ Ō sehe ni tuhoutuha ticoro ā yoaro: “To suhtirore űaha űūco, noaricoro wahacohca”, ni tuhoutuha ticoro. ²² To ā yoachū masino Jesu majarerūcu sū, ticorore ō sehe nire:

—Maco, wahchega mūhū. Mū yūhūre wacū tuaa mehne noaricoro tjuara mūhū mipūre —nire tiro.

To ā nichūta noaa wahare ticoro.

²³ Ā yoa tuhsū Jesu pūhtoro ya wūhūpū sūre. Sāa sūro, űahacaha tiinare teneniaca yoaro sehe jiriare putiinare űūre. Payū masa ti űano bisichū cūhūre

tūhore tiro. ²⁴ Ti ā nichū tuhoro masare ō sehe nire:

—Wijaahga mūsa. Yariaerari jira ticoro. Carīno nina —nire tinare.

To ā nichū tuhoa, “Ā nimacanocano nina ahroro”, nia masa bujūre tirore. ²⁵ Ā jiro wūhū puhichapūre masare to wio pahūori baharo yariaricoro cahapū sū, to wamomacare űahaha. To ā űahachū masa caha sū, wahcārūcu sūha ticoro. ²⁶ To ā yoarire tuhoa, tó macaina masa jipihtina yahu sitere.

**Pūaro capari bajuerainare
ñūchū yoaha Jesu**

²⁷ Ā yoaro Jesu tói jiro to wahachū, pūaro capari bajueraina tirore pisu nūnū tire:

—Davi panamino masare yūhdohtiro, sāre pja űūga mūhū —ni sañurucure tina.

²⁸ Ti ā nichūta Jesu pa wūhūpū sāare. To ā sāachū masia capari bajueraina to cahapū sāa wahare. Ti ā sāa sūchū űūno tiro sehe siniture tinare:

—“Marine űūchū yoarohca tiro”, űni tuhoutuari mūsa yūhūre? —nire tiro.

—Pūhtoro, āta ni tuhoutuja sā —ni yūhtire tina.

²⁹ Ti ā nichūta ti caparire űa payore. Ā űa payorota ō sehe nire:

—Yūhūre “Ā yoarohca”, mūsa ni tuhoutu-
turo seheti ā yoaja —nire Jesu.

³⁰ To ā nichūta ti capari sehe noaa wahare. Ā yoa Jesu ō sehe nire tinare:

—Ahri yū ō sehe yoarire painare ne yahuena tjuaga —nire.

³¹ To ā nipachūta waha, tói jjinare yahu sitere tina to ā yoarire.

**Durucuerarirore
durucuhū yoaha Jesu**

³² Tí wūhūre ti wijaachū waro cūiro durucuerarirore na tare masa. Watīno tiro mehne jiro tirore durucuerachū yoaha. ³³ Ti na sūchū űūno watīnore

Jesu cohã wiore. To ã cohã wiochũ watĩno to sãanohriro cjiro sehe durucua wahare. To ã yoachũ ñua jipihtina cua pihtiare.

—Ne, ahri yahpa Israe yahpapure õ sehe yoare ñuera tihi mari —ni durucure tina ti basi.

³⁴ Fariseo curua macaina sehe soro ni durucure:

—Watia pũhoro to tuaa mehne watĩare cohãna ahriro —ni durucure tina.

Masare pja ñuha Jesu

³⁵ ã yoa jipihtia macari tói jia macaricãre, bujua macari cũhure buhe tinino wahare Jesu. Noaa buheare judio masa mari buhea wũhũsepũ buhero wahare tiro. ã jiro pũhoro Cohamacũ to suho jihtore yahure. Jipihtia dohatia cũhure tó macainare yũhdore tiro. ³⁶ Masa payũ ñano yũhdũina, pjacũoro wahaina ti jichũ ñũno Jesu tinare pja ñure. Tina oveja pua marieina yoaro sehe ti jichũ ñũno Jesu tuaro pja ñure tinare. ³⁷ ã jiro õ sehe nire tiro sãre to buheinare, piti dahre buhero:

—Yo payũ ti bucua tuhsuchũ payũ jichũ dahraa pjĩro jira. Wiho mejeta dahraina sehe mahainacã jira. (Tó se-heta noaa buheare tuhohtina payũ jichũ pjĩro jira mari dahraa. To ã jipachũta mahainacã dahrari masa yoaro sehetã noaa buheare buhehtina cũhũ mahainacã jira.) ³⁸ ã jina noaa buheare buhehtinare painare to warocah-tore siniga Cohamacũre —nire Jesu.

Jesu doce waro bese dapoha to warocahtinare

(Mr 3.13-19; Lc 6.12-16)

10 Baharo doce sãre to buheinare Jesu pjiroca, tuaare cũre sãre. Watĩare sã cohã masihti cjihtire jipihtia dohatiare sã cohã masihti cjihtire cũre sãre.

² Õ sehe wama tii sã Jesu to bese cũrina: Simo jire. Tiroreta Pedro ni pisure Jesu. Simo bahũro Andre cũhũ jire. Santiago cũhũ to bahũro João mehne jire. Tina Santiago cũhũ pũcũro Zebedeo wama tire. ³ Felipe, Bartolomé, Toma, yũhũ Mateo jii sã. Yũhũ sehe puhtoa ya cjihtire masare wapa na cohtarimo jimai. Sã mehne paio Santiago jire. Tiro sehe Alfeo macuno jire. ã jiro Tadeo cũhũ jire. ⁴ Simo cananeo ya curua macarimo cjiro, Juda Iscariote cũhũ jire. Juda sehe Jesure ñu tuhtiinare ñohtiro jire.

Jesu to buheinare buhe dutiro warocaha

(Mr 6.7-13; Lc 9.1-6)

⁵ ã yoa sãre doce to buheinare warocaro, “Õ sehe mũa yoanahca”, ni yahu quihõre sãre Jesu:

—Judio masa jieraina cahapũre wahaena tjiga. Ne Samaria yahpai jia macaripũ cũhũre wahaena tjiga. ⁶ Israe yahpa macaina cahapũ sehere wahaga. Tina oveja peri wisia wahaina yoaro sehe Cohamacũre masieraina jira. ⁷ “Mũano macarimo to suho jihto mahano cã duhsara”, ni buhega tinare. ⁸ ã jina camĩ bucũ baainare, paye payũ soro jia dohatiare cjuaina cũhũre noaina yoaga. Yariainare masoga. Watia masare ti sãanohorinare cohã wioga tinare. Mũsare ã wanocai nija ahri tuaare. ã jina mũa cũhũ yũ ã wanocarimo sehetã masare noaina ã yoanocahga.

⁹ Mũa wahana niñerure ne naaena tjiga. ¹⁰ Ne mũa wajure, pũaro camĩsare, pua wahpa dahpo suhtire, mũa tjua yucũ cũhũre naaena tjiga. Mũa sãano dihtare sãa wahcãga. Paye suhtire naaena tjiga. Mũa buhena waharopũ jina tina sehe mũsare mũa puhĩ cjihtire waahca. ãta waro cahmana tinare.

¹¹ Tĩ macaripũ suna, ji coaro mehne carĩnore warirore macaga. ã jina tĩ wũhũhta tjuasiniga. Pũ, coã wahanapũ

wijaahga tí wuhure. ¹² Æ jina wuhupu sãahna, “¿Jimajari mûsa?” niga tí wuhu macainare. ¹³ Mûsare noano ti cahmachu “Cohamacu mehne noano jiga mûsa”, niga tinare. Mûsare ti cahmaerachu, mûsa ã niborire niena tjiga. ¹⁴ Æ jina mûsare ti cahmaerachu, ti tuho du-aerachu tí wuhure wijaahga. Wijaana, dahpo suhti macaa dihta pohcarire wajã site cûga mûsa tinare ti ya buhirire masichu yoana. Tí maca macaina mûsare ti cahmaerachu ãta yoaga tina cûhure. ¹⁵ Potocã mûsare niita nija. Ahri dacho pihlichupure Sodoma macaina, Gomorra macaina cûhu tuaro buhiri tihtinata jira. Ti ã jipachuta tina yuhdoro mûsare cahmaeraina buhiri tihtina jiaha —ni yahure Jesu.

Jesu yainare paina ti ñano yoahtore yahuha Jesu

¹⁶ Æ ni tuhsu õ sehe ni namore:

—Yuhure tuhoga mûsa. Oveja yoaro sehe jiinare mûsare ñaina watoi warocai nija. Tina ñaina macaroca macaina yaya suaina yoaro sehe jira. Æ jina mûsa sehe paina wahiquina wacû masina yoaro sehe jiga. Æ jiina jipanahta buja yoaro sehe ne suaeraina jiga mûsa. ¹⁷ Noano yoaga mûsa. Masa mûsare puhtoare waahca. Tuhsu Judio masa mari buhea wuhusepu cãpeahca mûsare. ¹⁸ Æ jia yu yaina mûsa jiri buhiri macari macaina puhtoa cahapu ti bui jiina puhtoa cahapu cûhure naahca mûsare. Æ jina mûsare tópu ti naachu tinare judio masa jieraina puhtoa cûhure noaa buheare buhenahca mûsa. ^{19–20} Mûsare puhtoare ti wachu tinare mûsa nihtire “Cue, masieraboca”, ni tuhoutuena tjiga. Mûsare ti sinituchuta mûsa nihtire masinahca. Æ masina tinare yahuna mûsa tíre mûsa mu sũro durucuna nisi. Cohamacu sehe mûsa Pucu to Espiritu mehne mûsare durucuhu yoarohca.

²¹ Tí pjare ti wahmisuma ti bahanare wajã dutia waahca puhtoare yu yaina ti jiri buhiri. Ti pucusuma ti pohnare wajã dutia waahca puhtoare. Ti pohna sehe ti pucusumare wajã dutia waahca puhtoare. ²² Jipihtina masa sehe yu yaina mûsa jiri buhiri mûsare ñu tuh-tiahca. Ti ã yoapachuta ahri yahpai mûsa catisinino puro mûsare ti ñano yoarire cãno pjana yuhure, yu buhea cûhure duherana, yuhdunahca mûsa. ²³ Cûmacai mûsare ti ñano yoachu pa macapu duhti wahcãga. Potocã mûsare niita nija. Israe yahpai jia macarine jipih-tia tí macaripu mûsa duhti wahcãhto pano, yuhu masuno Cohamacu warocariro ahri yahpapu tjua taihtja.

²⁴ Ne cãiro buheriro tirore yahuriro buipu jierara. Cahamacuno cûhu to puhtoro bui cure jierara. ²⁵ Æ jiro õ sehe tuhuturo cahmana buherirore: “Yuhure buheriro yoaro seheta jiihtja”, ni tuhuturo cahmana. Cahamacuno cûhure ãta ni tuhuturo cahmana. “Yu puhtoro yoaro seheta jiihtja”, ni tuhuturo cahmana. (“To bui jiihtja. Æ jicu yu puhtoro to ñano yuhduriro seheta ñano yuhdusi yuhu sehe”, ni tuhutueraro cahmana.) Yuhu sehe wuhu puro yoaro sehe jija. Mûsa sehe tí wuhui dahraina yoaro sehe jira. Æ jia masa yuhure “Beelzebú jira”, ni yahusã, mûsa cûhure yu yainare ñano ni durucuahca tina —ni yahure Jesu.

“¿Diro barore cuichu noajari?” ni yahuha Jesu

(Lc 12.2-7)

²⁶ Æ ni tuhsu õ sehe ni namore:

—Æ jina mûsare ñano yoainare cuiena tjiga. Masa ti ya sãari cjirire baharo paina masiahca. Æ jia ti nuori cjiri cûhure paina masiahca. ²⁷ Mûsare yaroca yu yahuri cjirire payu masa watoi buhe turiaga mûsa. ²⁸ Masunore wajãina to pjacu dihtare wajãna. To yajeripohna yariaerara. Æ jina mûsare wajã duainare

cuiena tjiga. Cohamacu sehere cuiga. Tiro musa pjacurire, musa yajeripohnari cūhure pichacapu cohā masina. Ā jina tiro sehere cui, yuhtiga musa.

²⁹ Puarō siripia wapa mariahna. Ti ā wapa mariapachuta cūirocāre Cohamacu ne boerara. Cohamacu to dutierachū ne yarierara tirocā. ³⁰ Ā jiro musa pjoarire ne cū pjoada duhsaro marieno masi pahñona Cohamacu. Tó seheta musa jia tia cūhure masi pahñona Cohamacu. Ā masino musare ñu wihborucura. ³¹ Siripiare to cahño yūhdoro, musa sehere cahña Cohamacu. Ā jina pjíro tuhotuena tjiga musa —ni yahure Jesu.

**Jesure musa wacū tuari
cjirire yahuga masare**

(Lc 12.8-9)

³² Ā jiro tinare ō sehe ni yahu namore: —Cūiro “Jesu yairo jija”, masare to ni yahuchū yūhū cūhū tirore “Yū yairo jira”, ni yahuihtja yū Pucure mūano macarirore. ³³ Wiho mejeta cūiro “Jesu yairo jieraja”, masare to nichū yūhū cūhū “Yū yairo jierara tiro”, ni yahuihtja yū Pucure —ni yahure Jesu.

Jesu masare tju wachu yoara

(Lc 12.51-53; 14.26-27)

³⁴ Ā ni tuhsū ō sehe ni yahu namore: —¿Dohse ni tuhotujari musa yūhure? “Tiro masare to buheri baharo paina tinare ñu tuhtisi”, ¿ni tuhotujari musa? Ā jierara. Masare yū buheri baharo cāina yū yare tuhoahca. Paina sehe tinare ñu tuhtiahca. Cāno potori waro jisi masa. ³⁵ Bucūna yū buheare ti tuhori buhiri ti pohna yū buheare cahmaeraa, tinare ñu tuhtiahca. Bucū numia yū buheare ti tuhori buhiri ti pohna numia yū buheare cahmaeraa, tinare ñu tuhtiahca. Ti marechosanumia yū buheare ti tuhori buhiri ti macū namosānumia yū buheare

cahmaeraa, tinare ñu tuhtiahca. ³⁶ Ā jia masa ti coyeare ñu tuhtiina jiahca.

³⁷ Yūhure ti cahīboriro yūhdoro ti pucūsuma sehere cahī yūhdurūcaā yū yaina jisi tina. Yūhure ti cahīboriro yūhdoro ti pohna sehere cahī yūhdurūcaā yū yaina jisi tina. ³⁸ Ā jia paina crusapū yū yariahto seheta yū yaina ti jiri buhiri ñano yūhdūahca tina cūhū. Tó sehe ñano yūhdū duaeraina yū yaina jisi tina. ³⁹ Masa yūhure wacūno marieno ti mū sūro yoaa, pichacapū wahaahca tina. Ā jia yū yare ā yoarucua jipihitia dachoripe yūhū mehne jirucuahca tina —ni yahure Jesu.

Mari wapatahtore yahuha Jesu

(Mr 9.41)

⁴⁰ Ā ni tuhsū ō sehe ni yahu namore:

—Mūsare yū yainare cūiro noano cahmano, yūhū cūhure cahmano nina tiro. Ā yoa tiro yūhure noano cahmariro yūhure warocariro cūhure cahmano nina. ⁴¹ Ā jiro Cohamacu yare yahuriro wapatarohca. Tirore noano yoarohca Cohamacu. Ā jiro to yare yahuriro to jichū ñano paio tirore noano cahmano, yahuriro yoarō seheta wapatarohca tiro cūhū. Ā yoa paio noano yoariro wapatarohca. Tuhsū, noano yoariro to jichū ñano paio sehe tirore noano cahmano noano yoariro yoarō sehe wapatarohca tiro cūhū. ⁴² Yū yairo cūiro to jichū ñua, wiho jiriro to jipachuta dohse jiina tirore core ti sihōchū mahanocā ti wapachuta potocāta tinare noano yoarohca Cohamacu —ni yahure Jesu.

**João masare bautisariro to buheinare
Jesure sinitu ñu dutiro warocaha**

(Lc 7.18-35)

11 Sāre to buheinare to ā ni yahuri baharo tó cahai jia macaripū buhero wahare Jesu.

² Ā yoa to yoarire João peresui jiriro tuhorocaha. Ā tuhoro João to buheinare

Jesure sinitu ñu dutiro warocaha. ³ ã jia Jesu cahapu su, sinitu ñure tina João buheina.

—¿João “Yu baharo paio tarohca”, to niriro tjijari muhu? ¿To niriro mu jierachu paire cohtanahcari sa? —ni sinitu ñure tina sehe Jesure.

⁴ Ti ã nichu tuhoro Jesu õ sehe ni yuhtire:

—Mipure musa tuhore, musa ñureire Joãoe yahuna wahaga: ⁵ “Capari bajueraina ñuna. Tini masieraina tinina. Cami bucu baina noaina wahara. Tuhõ bocaeraina tuhoa wahara. Yariaina masaa wahara. Tina jipihinare noaina wahachu yoahi yuhu. Tuhsu, pjacuoinare noaa buheare yahuja. ⁶ Yuhure tuhoro ‘Potocã tjira’, niriro tiro wahcheriro jira” ni, Joãoe yahuna wahaga —nire Jesu.

⁷ João buheina ti wahari baharo, Jesu sehe João to jia tiare yahu ducare payu masare:

—Masa marienopu João cahapu suna, tjare wihnono to wãroca cohtotachu yoariro sehetã to buheare cohtota mujarirore ñuna suerare musa. ⁸ “Noaa suhti tirirore ñuna wahajihna”, nierare musa João cahapu masa marienopu wahana. Noaa suhti tiina wapa bujuare cjuaina puhtoã ya wuhusepu jira. ⁹ Masa marienopu suna Cohamacu yare yahu muhtarirore ñuna sure musa. Potocã tjira. João Cohamacu yare yahu muhtariro jira. Paina Cohamacu yare yahu muhtaina yuhdoro jiriro jira tiro. ¹⁰ Panopu Cohamacu yare ti joari puu Joãoe õ sehe ni yahu joaa tiha:

“Cohamacu to macunore õ sehe niha: ‘Mu pano muhure yahuyuhtirore warocai nija’, niha”,

ni joaa tiha panopure Joãoe. ¹¹ Musare potocã niita nija. Paina jipihina bui jira João bautisariro. Ahri turupure to ã jipachuta muano macariro puhtoro

to suho jiropure jipihina docapu jiriro pinihta João bui jira.

¹² João masare bautisariro to buhe, bautisa ducachu payu masa muano macariro puhtoro to suho jirore pihitichu yoa duaa, ti mu suro cahmache, ture yoa duamana. ¹³ Cohamacu yare yahu muhtaina ti joari cjirire, Cohamacu Moise cjiriro to cûri cjiripu cûhure buhena puhtoro Cohamacu to suho jihtore masija mari. João cûhu tureta yahure. ¹⁴ “Elia tarohca”, panopu ti niriro cjirota jira João sehe. Panopu macaina ti nire “Potocã tjira”, ni duana João ti ã niriro cjiro to jichu masinahca musa. ¹⁵ Noano tuhoga musa ahrire.

¹⁶ ¿Mipu macaina masa yabaina yoaro sehe jijari tina, musa tuhutuchu? Tina macanacã yoaro sehe jira. Paina ti cahmano sehe ti yoerachu tó wahaerara tinacãre. Pache duaropu pape dujia, õ sehe ni pisurucura tinacã ti basi: ¹⁷ “Musa basahti cjihtire sa putipemahi. ¿Dohseana musa basaerari sa ture putipechu? Sa tuaro nahacaha tiipe, sañurucumahi. ¿Musa sehe dohseana sa mehne tiiperari?” nirucuina yoaro sehetã jira mipu macaina cûhu. Mipu macaina ti cahmano sehetã sa yoerachu ñua tó wahaerara tinare. ¹⁸ Tina yoaro sehe yoana õ sehe yoara musa mipu macaina. João bautisariro Cohamacure ño payoro taro chu duhuro vinore sihnierare. To ã sihnierachu ñuna “Watino to saanohriro, tuho masierariro jira”, nimare musa tiro sehere. ¹⁹ Yuhu masuno Cohamacu warocariro jicu yuhu chu, sihnija. Yu ã yoachu ñuna õ sehe nina musa yuhu sehere: “Ñuga. Ahriro pjiro cheriro, cahariro jira. Wapa na cohtaina, ñano yoaina cûhu ti piti tiriro jira ahriro”, nina musa yuhure. (ã nina macanacã yoaro sehe durucuina jira musa. Musã cahmano sehe sa yoerachu tó wahaerara musare. Ne

sahsaerara m̄sa.) Ā masierapanahta s̄a yoarire n̄na, Cohamacu masiare s̄a cjuachu masinahca m̄sa —nire Jesu tinare.

Ti ñaare cahyaeraina ya macari macainare tuhtiha Jesu

(Lc 10.13-15)

²⁰ Baharo macari macainare tuhtire Jesu. Tí macarine paye macari yuhdoro Cohamacu tuua mehne yoa ñomare tiro. To ā yoa ñopachuta ti ñaare tuhotumarire duherasinire tina. Ā jiro ō sehe ni tuhtire tinare tiro:

²¹ —Corazī macaina, m̄sa ñano yuhdunahca. Betsaida macaina, m̄sa cūhu ñano yuhdunahca. M̄sa ya macaripure Cohamacu tuua mehne yoa ñomahi. Tiro wama tiri macare, Sidō wama tiri maca cūhure to tuua mehne yu yoa ñochu ñna panopu tó macaina sehe ti ñaare cahyabo. Ā yoa ti ñaare tuhotumari cjurire tuhotu cohtotabo. Cahyaa suhtire s̄a, niti pohcare tina bui dahra site payoboa ti ñaa cahyaare ñoa. ²² M̄sare niita nija. Buhiri dahrehti dacho jichu Cohamacu Tiro macaina, Sidō macaina yuhdoro ñaina m̄sa jiri buhiri m̄sare ñano waro buhiri dahrerohca tiro. ²³ Capernau macaina, m̄sa mu suro m̄nanopu waha duamana. M̄sare Cohamacu pichacapu cohānohca. M̄sa ya macapu Cohamacu tuua mehne yoa ñomahi. M̄sa yuhure tuhoerare. Sodoma wama tiri macare Cohamacu tuua mehne yu yoa ñochu tí maca sehe mipu jisiniboa. ²⁴ M̄sare niita nija. Buhiri dahrehti dacho jichu Cohamacu Sodoma macainare to yaro yuhdoro, m̄sa sehere m̄sa ñaa buhiri ñabiario buhiri dahrerohca —nire Jesu tí macari macainare.

“Yu cahapu sona taga”, niha Jesu

(Lc 10.21-22)

²⁵ Tí pjare ō sehe nire Jesu to Pucuro mehne durucuro:

—Yu Pucu, m̄hu m̄nāno macaina bui puhtoro, ahri yahpa macaina bui puhtoro jira. Ahri mu buheare “Noano masiina jija s̄a”, niinare masichu yoaerare m̄hu. Buhe pahnoeraina sehere mu yare masichu yoare m̄hu. Mu ā yoachū, “Noana”, nija yuhu m̄hure. ²⁶ Ā tjira. Tina sehere ti masichu cahmare m̄hu —nire Jesu to Pucurore.

²⁷ Ā ni tuhsu, masare ō sehe ni yahu namore:

—Yu Pucu jipihtiare yuhure ware. Tiro dihta yuhure noano masina. Ā jina s̄a dihta yuhu yu masi dutiina mehne yu Pucure masija s̄a. ²⁸ M̄sa ñano buhiri tia nucua yoaro sehe jira. Nucua m̄na m̄sa tahrino seheta ñano buhiri tiare pumea wahara m̄sa. Ā pumeina jina yuhure cahmaga m̄sa. M̄sare sochu yoaihtja. M̄sa ñaa yoare duhuchū yoaihtja. ²⁹ Yu dutiare yoaga. Yu yare noano masiga. Yuhu niji siaro yaro jija. Yu ā jiri jichu yu yare noano masiga m̄sa. Ā yoa yuhu mehne sogā m̄sa. Ā sona noano yajeripohna tinahca m̄sa. ³⁰ Yu yare m̄sa yoachū mijoerara. Ā yoa m̄sa muri cjiri ti nucueraro seheta yuhu sehe m̄sa bihoro purota yoa dutija m̄sare —nire Jesu.

Judio masa ti sori dachoi trigo parorire pahaha Jesu buheina

(Mr 2.23-28; Lc 6.1-5)

12 Mahanocā to ā ni buheri baharo wesepu sui. S̄a to buheina juca baana, trigo parorire paha, chu tuhsu yuhdu wahcāi s̄a. ² S̄a ā yoachū ñna, fariseo curua macaina Jesure ō sehe nire:

—Tuhsiniga s̄are. ¿Dohse yoa tina Sabado mari sori numu to jipachuta

dahrajari, trigo parorire ā pahaa? Mari dutiare yūhdurūcaā nina —nire tina.

³⁻⁴Jesu yūhtire. “Yū buheina yūhdurūcaā nierare”, ni yahuro taro ō sehe ni yūhtire:

—Davi cjiro tiro mehne macaina mehne jūca baaro Cohamacū wūhūpū sāa, Cohamacū ya pāore chuha. Tí pāore sacerdotea dihtare chū dutira. Cohamacū dutiare ti joari pū painare tí pāore chū dutierara. ¿Davi cūhū tíre ti yoari cjiire Cohamacū joari pūpū buherari mūsa? (Tí pāore chūro Cohamacūre yūhdurūcaro nieraha. Michare ahri yaparire chūa yū buheina cūhū Cohamacūre yūhdurūcaā nierara.)

⁵Ā yoa Cohamacū wūhūi dahraina sacerdotea ne soerara mari soa nūmūrine. Ā soerapahta Cohamacū dutiare yūhdurūcaina jierara. ¿Tíre buherari mūsa Cohamacū Moise cjirore to cūri pūi? ⁶Mū sare niita nija. Cohamacū wūhūre nō payona tí wūhūi dahraina ti soerachū nūpanahta “Noanohca”, nina mūsa. Tí wūhū yūhdoro yūhū sehere nō payoro cahmana. ⁷Cohamacū yare ti joari pū ō sehe nina: “Wahiquinare wajā, jū mūoa mehne yūhūre mūsa nō payochū cahmaeraja. Painare mūsa pja nūchū sehere cahmaja yūhū”, nina to yare ti joari pū. To ā nire mūsa noano tūhona yū buheinare tuhtieraboa mūsa. Tina tíre chūa yūhdurūcaā nierare. Ā jina tinare tuhtieraboa mūsa. ⁸Yūhū masuno Cohamacū warocariro ahri dacho Sabado dachore masa ti yoahire yahurirota jicu puhtoro tjija —nire Jesu fariseo curua macainare.

Wamomaca būhariro quti jira

(Mr 3.1-6; Lc 6.6-11)

⁹To ā niri baharo waha, judio masa mari buheri wūhūpū sui sā Jesu mehne.

¹⁰Tōi wamomaca būhariro jire. Ā jia

fariseo curua macaina sehe Jesure yahūsāa taa, tirore ō sehe ni siniture:

—Sabado dachoi mari sori dachoi masunore noariro yoa dutierara Cohamacū. ¿Ā tjijari mū tuhotuchū? —ni siniture tina.

¹¹Jesu ō sehe ni yūhtire tinare:

—¿Mūsa yairo oveja Sabado jichū copapū to bora sāachū tirore na wioerabocari mūsa? Na wionahca mūsa. ¹²Oveja yūhdoro jira masuno sehe, Cohamacū to nūchū. Ā jiro Sabado jichū masunore yūhdochū noa nina —ni yūhtire Jesu tinare.

¹³Ā ni tuhsū, wamomaca būharirore ō sehe nire:

—Mū wamomacare siōrocaga —nire tiro.

To ā nichū būhariro sehe siōroca, noari wamomaca wahare. ¹⁴Ti sori nūmūi to ā yoachū nūa, fariseo curua macaina waha, ti basi ō sehe niha:

—¿Dohse yoa Jesure wajānahcari mari? —niha tina ti basi.

Cohamacū yare yahu mūhtariro panopū macariro Jesure yahuha

¹⁵Jesu ti ā nire masino, waha wahare. To ā wahachū payū masa tirore nūnū tire. Ti ā nūnū tichū nūno tiro sehe jipihtina tina mehne macainare dohatiinare noaina wahachū yoare. ¹⁶Ā yoaro dohatiina cjiire tinare to yūhdorire painare yahu dutierare tiro. ¹⁷Ā dohatiinare noaina wahachū yoaro Cohamacū yare yahu mūhtariro Isaia cjiro panopū to ni joariro seheta yoaro nire Jesu. Ō sehe ni joaa tiha Isaia:

¹⁸“Ō sehe nina Cohamacū: ‘Ahiri yū cahamacūno jira. Tiro yū beseriro jira.

Tirore cahīja.

Ā jicu tiro mehne wahcheja.

Yū Espiriture tirore waitjtja.

Ā jiro yū tuua mehne jipihtina masare yū buheare yahurohca tiro.

¹⁹ Ā yahuro tiro ne purīno mehne yahusi. Ā yoa niĵi siaroca yahuriro jiro sañurucusi.

Tuhsu, maca macari mahai payu masa watoi tiro tuaro sañurucu yahusi.

²⁰ Wujucu o muquearucu suchu to nuhnerachu yoaro seheta masa cūhure niĵi siaro dero yorohca tiro.

Pjiroca jūri pichacare to yaeraro seheta masa cūhure noano yorohca tiro.

Āta yoarucurohca tiro watīnoro to yūhdurūcahto pano.

²¹ Ā jia payu masa tirore wacū tuaahca', nina Cohamacu',

ni joaa tiha Isaia.

**“Jesu watīno tuaare
cjuara”, ni yahusāha masa**

(Mr 3.19-30; Lc 11.14-23; 12.10)

²² Cū dachoi watīno to cohtotarirore masa na tare Jesu cahapu. Tiro sehe watīno cjuaro durucu masierare. Tuhsu, capari ne nūerare. Ti ā na wihichu nū, noariro wahachu yoare Jesu tirore. To ā yoachu watīno to cohtotariro cjiro nū, durucure. ²³ To ā wahachu nūa, masa nū cuaa wahare.

—ĶAhriro Davi cjiro panamino masare yūhdohtiro jĵari? —nire tina ti basi.

²⁴ Jesu watīare to cohārire tuhoa fariseo curua macaina ō sehe ni tūhoture:

—Beelzebū watīa puhtoro to tuaa mehne watīare cohāna Jesu —ni tūhoture tina.

²⁵ Ti ā ni tūhotuchū masino, Jesu quiti mehne piti dahre yahure tinare:

—Watīno ya tuaa mehne watīare cohāi nieraja. Cū yahpa macaina ti basi cahma wajāa, tí yahpa macaina yaria pihtia wahaboa. Cū maca macaina ti basi cahmachea tí maca macaina waha pihtia wahaboa. Cū wūhu macaina cūhu āta wahaboa. ²⁶ Ā jia Beelzebū watīa puhtoro sehe watīare cohāno, tina watīa ti basi cahmachea niboa. Ā jia

tina cūhu waha pihtia wahaboa. ²⁷ Ō sehe ni yahusāna musa yūhure: “Tiro Beelzebū yoadohoa mehne watīare cohāna”, ni yahusāna musa. Musa mehne macaina cūhu watīare cohāna. ĶWatīno to tuaa mehne watīare cohājari tina cūhu, musa nūchū? Ā cohāerara. Tīre masina musa. Yūhu cūhu watīno tuaa mehne watīare cohāeraja. ²⁸ Ā jicu yūhu sehe watīare cohācu Cohamacu to Espiritu tuaa mehne tinare cohāja. Yū ā cohāchū nūna ō sehe masiga musa: Cohamacu masa bui puhtoro ahri yahpūre ji tuhsura mipure.

²⁹ Ō seheta jira mari piti dahre buhechū: Tuariro ya wūhūpu paio sāa su yaca masierara. Tuarirore dūhteraro to ya wūhūpu sāa su yaca masierara. Tirore to dūhteri baharo sāa su yaca masina —ni yahure Jesu. (Ā ni yahure watīnoro to yūhdurūcarire yahuro. Watīno tuariro to jipachūta Jesu tirore yūhdurūcara watīare cohāno.)

Ā ni tuhsu ō sehe ni yahu namore Jesu: ³⁰—Cūiro yūhure cahmaeraro, yūhure nū tuhtiriro jira. Cūiro yūhure yoadohoeraro, yūhure wapū tichū yoaro nina.

³¹ Ā jicu masare potocā niita nija yūhu. Jipiltia nāare masa ti yoachu ti durucuchū cūhure Cohamacu bo masina. Ā boparota Espiritu Santore ti nāno ni durucuchū tí pinine ne bosī. ³² Yūhure masuno Cohamacu warocarirore yūhure ti nāno ni durucurire bo masina Cohamacu. Espiritu Santo sehere ti nāno ni durucurire ne bosī Cohamacu. Mipure, pihtiri dacho baharopū cūhure ti ā niri cĵirire bosī tiro —ni buhere Jesu tinare.

**Masa ti durucuarē tūhona ti
jia tiare masija mari**

(Lc 6.43-45)

³³ Ā ni buhe tuhsu, piti dahre buhero ō sehe ni yahu namore tinare:

—Noadũ yucũcũ noaare dica tira. Ñaadũ yucũcũ ñaare dica tira. Yucũcũ dichare masina “Tũ dichata jira”, ni masija mari. (Mari ã masino seheta masa ti durucuarẽ tũhona ti jia tiare masija mari.) ³⁴ Agãa ñima tiina yoaro sehe ñaina jira mũsa. Mũsa ñaina jina, noaare ni masierara mũsa. Mari wacũapũ mari tũhoturiro seheta mari dũseroi wija. ³⁵ Noariro noaare tũhotura. ã jiro noaare durucura. Ñariro ñaare tũhotura. ã jiro ñaare durucura. ³⁶ Mũsare niita nija. Noano tũhotu durucuina jiga mũsa. Noano durucuerana, buhiri dahrehti dacho jichũ mũsa ã nimacancarire Cohamacũre yahu yũhdũnahca. ³⁷ Quihõno mũsa durucurire masino “Noaina jira”, ninohca Cohamacũ. Tuhsũ, ñano mũsa durucurire masino “Ñaina jira”, ninohca tiro —nire Jesu tinare.

**Masa ñaina Jesure Cohamacũ
tuaa mehne yoa ño dutiha**

(Mr 8.12; Lc 11.29-32)

³⁸ To ã niri baharo mari judio masare buheina, fariseo curua macaina cũhu tirore õ sehe nire:

—Buheriro, Cohamacũ warocariro jicũ Cohamacũ tuaa mehne yoa ñoga sãre —nimare tina.

³⁹ Jesu õ sehe ni yũhtire:

—Mipũ macaina ñaina, Cohamacũre cahmaeraina Cohamacũ tuaa mehne yũ yoa ñochũ ñũ duamana. Ti ã ñũ duapachũta Cohamacũ yare yahu mũhtarirore Jona cjiro panopũ macarirore Cohamacũ to tuaa mehne to yoari dihtare yoa ñonohca masare. ⁴⁰ Jona tia dacho waro pjiriro wahi pjaro puhichapũ jiha. To ã wahariro seheta yũhũ cũhũ masũno Cohamacũ warocariro tia dacho waro masa copapũ jiihca. ⁴¹ Nĩnive macaina sehe Jona Cohamacũ yare to yahurire tũhoa ti ñaa yoarire cahya, Cohamacũ mehne macaina tjuaha. ã tjuaina

jia buhiri dahrehti dacho jichũ tina mipũ macainare ti ñaare tũhotumari cjirore duhuerainare “Ñaina jira”, ni yahusãahca. Jona cjiro tinare Cohamacũ yare to yahuchũ tũhoa noaare cahmaha tina sehe. ã cahmaa noano yoaa niha mipũ macaina yũhdoro. ã jia tina mipũ macainare “Ñaina jira”, ni yahusãahca. Mũsare niita nija. Mipũ mũsare yũ buhea Jona cjiro to buheri yũhdoro jira. ⁴² ã yoa buhiri dahrehti dacho jichũ pũhtorocoro sur macaricoro panopũ macaricoro ducu, mipũ macainare “Ñaina jira”, ni yahusãnohca ticoro cũhũ. Ticoro Salomo panopũ macariro to masiare tũho duaro yoaropũ ahri yahpa pa bũhũsehẽpũ jiricoro Salomore tũhoro taha. ã yoaro noano yoaro niha mipũ macaina yũhdoro. ã jiro ticoro “Ñaina jira”, ni yahusãanohca mipũ macainare. Mũsare niita nija. Mipũ mũsare yũ buhea to buheri yũhdoro jira —nire Jesu tinare.

**Watĩno pari turi masũnore to
sãari quitire yahuha Jesu**

(Lc 11.24-26)

⁴³ ã ni tuhsũ, pari turi Jesu to tũhotua mehne õ sehe ni piti dahre buhere tinare:

—Watĩno masũnore cohtotariro cjiro waha, tiro co marieni yahpai tini, to jihto cjihtore macamaha. ⁴⁴ ã bocaeraro, õ sehe ni tũhotuha tiro. “Masũno yũ cohãriro cjiro mehmeta pari turi jii wahaihtja”, ni tũhotuha tiro. ã ni tũhoturo tiro tjuaa waha, to cohãriro cjiroreta bocaaha. ã to bocachũ masũno sehe noariro jimaha. ⁴⁵ ã jiro watĩno paina siete watĩare to yũhdoro ñainare pjiro wahaha. To ã pjichũ tina jipihtina tiro mehne jiha. Masũno sehe tó pano cũiro watĩno to cohtotariro jiro, ñariro jimaha. Mipũ sehẽre payũ watĩa ti cohtotariro jiro, tó pano to jiriro yũhdoro ña yũhdũariro jiha. Mipũ macaina Cohamacũre masimarina tirore cohãa, tina

cūhū ñaa yūhdūina warota wahaahca — nire Jesu tinare.

Jesu coyeya tiro mehne sūhūdu duaha

(Mr 3.31-35; Lc 8.19-21)

⁴⁶Masare to ā ni durucuro watoi to pocoro to bahana mehne sopacai ducu, tiro mehne sūhūdu duare. ⁴⁷Ā jiro cūiro Jesure ō sehe ni yahure:

—Mū poco mū bahana mehne sopacai ducura, mūhure sūhūdu duaa —nire.

⁴⁸To ā nichū tūhoro tirore yahurirore ō sehe nire Jesu tinare buhero taro:

—ĶNoa jijari yū poco, yū bahana cūhū, mūsa ñuchū? —nire.

⁴⁹Ā nino, sāre to buheinare ñuipuro, ō sehe nire:

—Ahrina jira yū poco yū bahana yoaro sehe jiina. ⁵⁰Tina yū Pūcū mūano macariro to cahmaare yoara. Tó sehe yoaina yū bahū, yū baho, yū poco yoaro seheta jira —nire Jesu tinare.

Jesu wesere toari masuno quitire yahuha

(Mr 4.1-9; Lc 8.4-8)

13 Tí dachoihta Jesu wūhūi jiro wijaare. Wijaa, būcupariropū waha, būcupariro dūhtū cahai dujire. ²To ā dujichū ñaa payū masa tiro cahapū cahmachu wahpata yūhdūa, bihsaro yoare Jesure. Ā bihsachū ñūno dohoriai samu, tiapū dujire tiro. Masa sehe padūroi ducure. ³Ā jiro payū to tūhotua mehne piti dahre yahure tinare buhero taro. Ō sehe nire tiro:

—Toari masuno toaro, to toaa yaparire doca site cūno wahaha. ⁴To ā doca site cū wahcāchū paye yapari maha dūhtū cahai bora caha sūha. Ā bora caha suare tí yaparire minichahca duji ta, chūnocaha.

⁵Ā yoa paye yapari sehe tāa wapa buicā bora caha sūha. Tāa wapa buicā dihta mariea cureroi dōihta dumaha. ⁶Ā duri jipahta, sū to tuaro sichū, nuhcori

mariaa, ñaia wahaha. ⁷Paye yapari sehe tja watoi bora caha sūha. Tja sehe dia yūhdūa waha, toaa sehere wajānocaha. ⁸Paye yapari sehe noari yahpai bora caha sūha. Noano dua jia noano dicha tiha. Paye yucū cien yapari, paye yucū sesenta yapari, paye yucū treinta yapari dicha tiha. ⁹Ahrire tūho duaina noano tūhoga mūsa —nire Jesu.

Jesu quti mehne to buherire yahuha

(Mr 4.10-12; Lc 8.9-10)

¹⁰To ā niri baharo sā to buheina tiro cahai sū, sinitui sā tirore:

—ĶNe, dohseacū masare quti mehne piti dahre buhejari mūhū? —ni sinitui sā.

¹¹Jesu ō sehe ni yūhtire:

—Mūano macariro masa bui pūhtoro masare to noano sūho jiare panopū macaina ti masierari cjirire mū sare yū buheinare masichū yoara Cohamacū. Paina sehere ā yoerara tiro. ¹²Ā jiro masiinare masi namochū yoarohca tiro. Ā jia tina sehe noano masiahca. Masieraina sehe mahanocā ti masipachuta tina sehere masierachū yoarohca tiro. ¹³Ā jicū quti mehne buheja. Ō sehe jira. Mipū macaina ñūpahta, ñūeraina cjiri yoaro sehe tjuara. Ā jia tūhopahta masierara. Tíre tūhoeraina yoaro sehe jira tina. ¹⁴Ā jiina jia Isaiā cjiro panopū macariro to ni joariro seheta yoara tina. Ō sehe ni joa tiha:

“Ō sehe nina Cohamacū: ‘Yū yare tūhonahca mūsa.

Ā tūhopenahta, ne masisi mūsa.

¹⁵Mūsa dapu butiina tjuara.

Tuhsū, mūsa cahmo coparire bihara mūsa, “Tūhori”, nina.

Mūsa caparire wihmitjiahna mūsa, “Ñūri”, nina.

Ā yoerana noano ñūna masiboa mūsa.

Ā yoa tūhona, masiboa mūsa.

Mūsa wacūapū noano masiboa.

Ã masiina baro jina, mûsa tûhotu-mari cjirire tûhotu cohtota, yûhûre macaboa.

Mûsa ã macachu ñuno, yûhû sehe mûsa buhiri tiare cohâboa', nina Cohamacu",

ni joaha Isaia cjiro.

¹⁶Mûsa sehe mûsa capari mehne ñûna, masina. Mûsa cahmo mehne tûhona, masina. Ã jina wahcheina jira mûsa. ¹⁷Mûsare niita nija. Mipû mûsa ñûare mûsa tûhoare panopû macaina Cohamacu yaina cjiri tuaro ñû duamaha. Cohamacu yare yahu muhtaina cjiri cûhu tíre tuaro ñû duamaha. Wiho mejeta ne ñûeraha. Mipû mûsa tûhoa cûhure tuaro tûho duamaha tina. Ã masi duapahta tíre masieraha —ni yahure Jesu sãre to buheinare.

Jesu wesere toari masuno quitire yahu pahñoha

(Mr 4.13-20; Lc 8.11-15)

¹⁸Baharo Jesu sãre õ sehe ni yahu namore:

—Tûhoga mûsa. Wesere toari masuno quitire mûsare yahuihtja. Yûhûre tûhona, noano masiga. ¹⁹Doca site cûa yapari noaa buhea yoaro sehe jira. Ã jia maha duhtu cahai boraa yapari noaa buhea yoaro sehe jira. Masa noaa buheare tûhopahta ne masierara. Noaa buheare masa ti tûhochu ñuno watino sehe ta, tí buheare noaa buheare masi dutierara masare. Minichahca tí yaparire ti dota nariro seheta yoara watino. ²⁰Ã yoa tãa wapa buicã boraa yapari noaa buhea yoaro sehe jira. Ã jia masa noaa buheare tûho, wahchea mehne dóihtta tíre tûho nana. ²¹Ã tûho napahta tãa wapa buicã jia yucu nuhcori mariea yucu yoaro seheta ahrina masa cûhu tuaerara. Ã tuaeraa ñano yûhûda, yû yaina ti jiri buhiri paina tinare ti ñano yoachû ñûa yû ya sehere duhunocahna. Paina tinare ti

ñano yoachû tíre cûno pjaeraa, yû yare duhunocahna. ²²Ã yoa tja watoi boraa yapari noaa buhea yoaro sehe jira. Ã jia masa noaa buheare tûho, ahri yahpa macaare pjíro cahya tûhotua, niñerure cahina. Ti ã yoachû tí sehe noaa buheare ducatarata. Ti ã ducatachû masa noaa sehere yoerara. ²³Ã yoa noari yahpai boraa yapari noaa buhea yoaro sehe jira. Masa noaa buheare tûhoa, tíre noano masina. Ã masiina jia, Cohamacu to cahmano seheta noaare yoara tina. Cãina pjíro noaare yoara cien yapari dicha tiro seheta. Paina doca curero noaare yoara sesenta yapari dicha tiro seheta. Paina mahanocã noaare yoara treinta yapari dicha tiro seheta —ni yahure Jesu sãre.

Trigo watoi tja diari quitire yahuha

²⁴Ã yoa pari turi to tûhotua mehne piti dahre buhere Jesu:

—Muano macariro masa bui puhtoro to sûho jiro õ sehe jira. Wese puro to wesepû noaa yaparire to toariro seheta jira muano macariro masa bui puhtoro to sûho jiro. ²⁵Wese puro jipihtina tiro mehne macaina cûhu ti carino watoi tirore ñû tuhtiro tara. Ã taro trigore ti toariro tjure toaha. Toa tuhsu waha wahaha. ²⁶Baharo trigo duha. Ã jiro ti dicha tia cahachu waro diaa wahaha. ²⁷Ã jia wese purore dahra cohtaina tiro cahapû su, yahua: “¿Puhtoro, noaa yapari dihtare mu wesere mu toapachuta, dohse yoa tja cûhu di-ajari tí wesere?”, niha tina. ²⁸“Yûhure ñû tuhtiro jia tí tjure toaro”, niha wese puro. “¿Tjure sã curechû cahmajari muhû?” nimaha tirore dahra cohtaina. ²⁹“Tjure curena tjiga, tjure curemahna ‘Trigo sehere cureri’, nina. ³⁰Trigo tja mehnetata bucuawahnosinijaro. Dicha ñaini pja jichû, trigo dicha nainare õ sehe nihtja: ‘Tjure cure muhûtaga. Tuhsu mûsa curerire jûga. Ba-

haro trigore pahaga. Paha pahño, tíre yu wihbori wuhupü cüga', nihtja tinare", niha wese püro —nire Jesu, quti mehne yahuro.

Mostaza yapa quitire yahuha Jesu

(Mr 4.30-32; Lc 13.18-19)

³¹ ã yoa paye quti mehne säre õ sehe ni buhere tjoa:

—Muano macariro masa bui puhtoro to suho jiro mostaza yapacã yoaro sehe jira. Tí yapacã mahabiari yapacã jira. ³² Tí yapacãre wesepü to toari baharo, noano dura. ã jiro pji curedu wahara. ã wahachu minichahca peri tu dupuripü suhti suhara. (Tó se-heta muano macarirore mari puhtororesi masiina mahainacã ti ji muhtapachuta baharopü tina payü wahaahca) —ni yahure Jesu.

Pão bucuaro quitire yahuha Jesu

(Lc 13.20-21)

³³ ã yoa paye quti mehne säre õ sehe ni buhere tjoa:

—Muano macariro masa bui puhtoro to suho jiro pão bucuaro yoaro sehe jira. Tíre numino cü wajuru trigo pohcare co mehne noano tíre dahra morena pão bucuahcore. To ã yoachu pão bucuaro sehe trigore noano sahserücü sara. (Tó seheta pão bucuaro to sahserücü saro se-heta muano macarirore mari puhtororesi payü masa jipihtiromo macaina masiahca) —nire Jesu.

Quti mehne Jesu to buherire yahuha

(Mr 4.33-34)

³⁴ Ahri jipihtiare buhero, quti mehne yahure Jesu. Quti marieno yahuerare tiro tinare. ³⁵ ãta yoare tiro Cohamacu yare yahu muhtariro cjiro to ni joariro seheta. Õ sehe ni joa tiha panopü: “Quti mehne yahuihtja.

Cohamacu ahri yahpare to bajuamehneri baharo ne masare to yahuerari cjirire yahuihtja”, ni joa tiha Cohamacu yare yahu muhtariro cjiro.

Trigo watoi tja diari quitire yahu pahñoaha

³⁶ ã yoa masare coha siti, wuhupü säa wahare Jesu. ã jina sä to buheina tiro cahapü sü, sinitui sä:

—Trigo watoi tja diari quitire yahu pahñoaga säre —ni sä tirore.

³⁷ Jesu õ sehe ni yuhtire säre:

—Wese püro noaa yaparire toariro yoaro sehe jija yahu. Yuhu masuno Cohamacu warocariro jija. ³⁸ Wese sehe ahri yahpa yoaro sehe jira. Noaa yapari dua muano macariro puhtoro to suho jiropü jihtina cjihti yoaro sehe jira. Tja sehe watino yaina yoaro sehe jira. ³⁹ Wese pürore nü tuhtiriro tjare toariro watino yoaro sehe jira. Tí ñaini pja sehe pihhiri dacho yoaro sehe jira. ã jia trigore naina anjoa yoaro sehe jira. ⁴⁰ Tjare ti cure jüriro seheta pihhiri dacho jichu watino yainare, pichacapü jü cohãahca tinare. ⁴¹ Yuhu masuno Cohamacu warocariro yu anjoare warocaihtja. Yu ã warocachu anjoa sehe ñaare yoa dutinare, ñaare yoinare puhtoro yu suho jiropüre jimarinare na wioahca. ⁴² Na wio tuhsu pichacapü cohãahca tinare. Tópü tina tuaro tii, cahyaa mehne bahca dihoahca. ⁴³ ã jia Cohamacu yaina ti Pücuaro puhtoro to suho jiropü jahca. Tói jia, sü dacho macariro yoaro sehe noano buhriaahca tina. Ahrire noano tuhoga musa —ni yahure Jesu.

Noa yuhduare to nuorire to bocari quitire yahuha

⁴⁴ ã yoa paye quti mehne õ sehe ni yahure tjoa:

—Muano macariro masa bui puhtoro to suho jiro niñeru to nuori yoaro sehe

jira. Masuno tíre wesepu wacüeno boca, pari turi tíre nño namona. Á yoaro tuaro wahcheha tiro. Á jiro to bocari cjirire nano taro, tí wesere nuchü duaha. Á nuchü duaro to yare dua pahño, tí wesere nuchüha. Mñano macariro puhtoro to suho jiro to bocari cjiri yoaro sehe jiha. (To bocarire to cahma yuhduariro seheta mñano macarirore masa bui puhtorore noano ti masini baharo masa tuaro cahmana tirore) —ni yahure Jesu.

Wapa bujuri yapa quitire yahuha

⁴⁵ Á yoa paye quti mehne ò sehe ni yahure tjoa:

—Mñano macariro masa bui puhtoro to suho jiro wapa bujua yaparire perla wama tia yaparire nuchüriro yoaro sehe jira. ⁴⁶ Tí yaparire macano noa yuhduri yapare boca. Á bocaro, tí yapare nuchü duaro, jipihtia to yare dua pahñono wahaha. Á dua tuhsü tí yapare wapa bujuri yapare nuchüra. (Tí yapare tuaro to cahmariro seheta mñano macarirore masa bui puhtorore noano ti masini baharo masa tuaro cahmana tirore) —nire Jesu.

Wañuno quitire yahuha

⁴⁷ Á yoa paye quti mehne Jesu ò sehe ni yahure tjoa:

—Mñano macariro masa bui puhtoro to suho jiro wañuno ti docañodu yoaro sehe jira. Tü wañuno mehne payu wahi soro jiinare ñahana. ⁴⁸ Tü to wahpaa wahachu wahi wajäina sehe ture paduropu waja maja, noaina wahire besera. Noainare ti puhusepu bese säana. Ñaina wahire cohānocahna. ⁴⁹ Pihtiri dacho jichü ò sehe jirohca. Anjoa sehe masare beseahca. Ñainare na wioahca noaina cahapu jimarinare. ⁵⁰ Na wio, tinare pichacapu cohāahca. Tói tina tii, tuaro cahyaa mehne bahca dihoahca ñaina sehe —ni yahure Jesu.

Mña buheare, wahma buhea cñhure yahuha

⁵¹ To ã ni yahuri baharo tiro ò sehe ni siniture säre:

—¿Ahri jipihtiare tuhojari mña? —ni siniture tiro.

—Tuhoja sä —ni yahtii sä.

⁵² Sä ã nichü tiro yahure säre:

—Judio masare buheina mñano macariro masa bui puhtoro to suho jirore buhea, puaro buheare yahura. (Panopü ti buhea cñhure mipü ti buhea cñhure yahura.) Tina, Judio masare buheina wuhü puaro yoaro sehe jira. Tiro to wuhü jiare noare na wioro, wahmaare, mñaa cñhure na wiora tiro —nire Jesu säre.

Jesu Nazarepu wahaha

(Mr 6.1-6; Lc 4.16-30)

⁵³ Tí quitire to buheri baharo, wahai sä tiro mehne. ⁵⁴ Waha, to bucuari macapu sühi. Tópü sü, judio masa mari buhea wuhusepu buhere tiro. To ã buhechu tuhoa, tuho cuaa wahare tina.

—Cuenah, ¿ahriro nohopü tuhoari ahri buheare? ¿Dohsearo noano masi pahñojari ahriro? Cohamacu tuua mehne yoa ñona tiro to basi. ⁵⁵ Ahriro taboa dahrari masuno macuno jimanaro. Á yoa to pocoro María jimanaro. Á yoa Santiago, José, Simo, Juda, to bahana jimanabu. ⁵⁶ Mipure to bahana numia ahri macai jira. Á jiro tiro mari yoaro sehe jiro tjira. ¿Á jiparota nohopü tuhoari tiro ahri buheare? —ni durucure tina ti basi.

⁵⁷ Á jia tina tirore cahmaerare. Ti ã cahmaerachu ñuno ò sehe nire Jesu tinare:

—Cohamacu yare yahu muhtaritore paina ño payora. Ti ã ño payopachuta to ya maca macaina, to coyera tirore ño payoerara. Á jina yuhure ño payoerara mña òi yu bucuariro jichü —nire tiro tinare.

⁵⁸ Ā jiro tirore ti wacū tuaerachū ñũno “Cohamacū macũno jira”, ti ni duaerachū ñũno, tí macai Cohamacū tuaa mehne payu tahari yoa ñoerare Jesu.

**João bautisariro cjiro
to yariarire yahuha**

(Mr 6.14-29; Lc 9.7-9)

14 Tí pjare Herode Galilea macariro puhtoro Jesu to yoirire tuhorocaha. ² Ā tuhoro ō sehe nimaha:

—João masare bautisariro yariariro cjiro pari turi bajuaro nica. Ā jiro mipure to bajuari baharo ahri tuaare cjuara tiro bajuamehneare yoaro —nimaha Herode to cahamacare. (Jesure “Joãota jira”, ni tuhotumaha tiro Joãore ti wajãri baharo.)

³⁻⁵ Joãore to wajã dutihtu pano Herode to bahuro Felipe namonore namo tiha. To Ā yoachū ñũno João bautisariro Herode sehere ō sehe nia timaha:

—Mũ bahũ namonore namo ticũ Cohamacū dutiare yuhdurũcai nina mũhu —nia timaha João.

To Ā niri buhiri Herode tirore wajã duamaha. “João Cohamacū yare yahu mũhtariro jira”, ni tuhotura judio masa” nino, tina sehere cuiha Herode. “Joãore yũ wajãchũ tina suaboca” nino, tinare cuiha. Ā cuiro Joãore wajã duaeramaha. Ā wajã duaeraparota Herode tirore ñaha duhte duti, peresu yoaha. To namono Herodia to dutiro mehne Ā yoaha. ⁶ Ā yoa Herode to masa bajuari dacho jichũ bose mũmũ yoaha tiro. Tóí Herodia macono bose mũmũ wihiina ti ñurocaroi basa ñoha. To Ā basa ñochũ ñũno Herode wahcheha. Ā wahchero ticorore ō sehe niha:

⁷—Cohamacū mehne potocã niita nija. Yuhũre mũ sinino purota waihtja yuhũ mũhũre —niha jũna Herode sehe Herodia maconore.

⁸ To Ā nichũ tuhoro Herodia to maconore to sinihtore yahuha ticorore. To Ā yahuchũ to macono sehe ō sehe ni siniha Herodere:

—João masare bautisariro dapure cã ta dutiga. Ā yoacu waparo mehne tí dapure waga yuhũre —niha ticoro.

⁹ To Ā nichũ tuhoro Herode tuoro cahyaha. Masa ti ñurocaroi “Waihtja mũhũre”, niha tiro. Ā jiro tiro buo tiro “Mũhũre to dapure waeraja”, ni masieraha ticorore. Ā jiro ticoro to dutiriro se-heta Herode sehe to cahamacare Joãore wajã dutiha. ¹⁰ João dapure cã taroca dutiha jũna. ¹¹ Ā cã ta tuhsũ, waparo mehne to dapure na taha tina. Herodia maconore to dapure ti wachũ, ticoro sehe to pocorore yuhdoha tjoa.

¹² Ti Ā yoari baharo João buheina ta, to pjacũre masa copapũ na cũha. Ā cũ tuhsũ, tina tíre Jesure yahua tare.

Cinco mil bui masare chua waha Jesu

(Mr 6.30-44; Lc 9.10-17; Jn 6.1-14)

¹³ Ti Ā ni yahuchũ tuhoro, Jesu sã mehne dohoriai samu, masa marienopũ suho wahare. Jesu tópu to wahachũ tuhoa, masa ti ya macaripũ jirina ta, mahapũ tirore nũnũ ti wahcãre. ¹⁴ Tuhsũ, sã wahã suri baharo tiro payu masare ñũno, pja ñũre tinare. Ā pja ñũno tina mehne macaina dohatiinare noaina wahachũ yoare. ¹⁵ Ñamichahapũ sã to buheina tirore ō sehe nii:

—Ñamichahapũ jira. Ō masa marienopũ jira. Ā jicũ macaripũ masare ti chũhtire nuchũ dutiga ti puhu tihti cjihtire —nimai sã tirore.

¹⁶ Jesu yũhtire sãre:

—Wahaea tjijaro tina. Musa basita chuare waga tinare —nire sãre.

¹⁷—Cũ wamomaca pihtia pão curi, puaro wahi mehne jira sãre. Tí dihtare cjuaja sã —ni yũhtii sã.

¹⁸—Tíre yuhũre na tahga mũsa —nire sãre.

¹⁹To ã nichu tuhona na wahcãhi sã to cahai. Sã na sãri baharo tja bui masare tiro duji dutire juna. Ti dujichu cinco pão curire, puaro wahire na, manopu ñu muo, Cohamacure “Noana”, nire. Æ ninota pão curire nuha, sãre to buheinare ware. To ã wachu sã sehe tãre masare witi. ²⁰Æ jia jipihitina noano chu, yapi yuhdua wahare. Ti yapi wahy-orire doce puhuse waro na cahmachu, wahpo dapoì sã to buheina. ²¹Tóì tãre churina mua dihtare mari quihõchu cinco mil mua jire. Numia, macanacã cõhu jire.

Jesu co bui ducu wahcãha

(Mr 6.45-52; Jn 6.16-21)

²²Baharo sãre to buheinare Jesu bucupariro pa buhusehe coapu pahãyu dutire masare to coha sitirowato. ²³Coha siti tuhsu, tucupu muja, Cohamacure sinino wahaha. Æname tóì tiro cãirota jiha. ²⁴Tí pjaihta bucupariro dacho macai dohorio mehne pahãrucuna nimai sã. Wihnono tuaro ta, pahcõri bujua wahcã, dohorio cjã sãare. ²⁵Wihnono tuaro to wãchu bohrea muja tahto pano Jesu co bui ducu tare sã cahapu juna. ²⁶Sã cahapu to tachu ñuna cui nii sã. Æ cuina sañurucumai sã:

—Yariariro cjiro pjacu jira —ni sañurucumai sã.

²⁷Sã ã cuichu ñuno Jesu õ sehe nire:

—Ne yuhure ñu cãena tjiga. Yuhuta jija —nire sãre.

²⁸To ã nichu tuhoro Pedro õ sehe nire tirore:

—Puhtoro, potocãta mahuata jicu, co bui yuhure mu cahapu ducu wahcã dutiga —nire tiro.

²⁹—Taga —ni yuhure tiro sehe.

To ã nichu Pedro dohorioapu jiro co bui ducu sã Jesu cahapu ducu wahcãmare. ³⁰Wihnono tuaro to tachu ñuno cuire tiro. Æ cuio diha boraa wahamare.

—Yuhure yoadohoga puhtoro —ni sañurucure tiro Jesure.

³¹To ã nichuta to wamomacare ñaha:

—Mahanocã wacũ tuara mahu yuhure. ¿Dohseacu yuhure wacũ tuaerajari mahu? —nire tiro Pedore.

³²To ã niri baharo dohorioapu samu tare tina. Ti ã samu tari baharo wihnono yusu borare. ³³Æ jina sã to buheina dohorioapu jiina na tuhucua cahã su, Jesure ño payoi:

—Potocãta mahu Cohamacu macunota jira —nii sã tirore.

Genesare macaina dohatiinare yuhdoha Jesu

(Mr 6.53-56)

³⁴Æ yoarina cjiri pahã, Genesare wama tiri yahapu sui. ³⁵Tó macaina Jesure ñu masire. Æ masia tó cahai jinare Jesu to wihire yahu site pahõre. Æ ti yahu sitechu tuhoina payu dohatiinare tiro cahapu na tare.

³⁶—Mu suhtiro dũtu cahã dihtare sãre ñaha ñu dutiga —ni sinire tina Jesure. Æ jia to suhtirore ñaha ñuinape tópeinata noaina wahare.

Masa ñaina wahachu yoare yahuha Jesu

(Mr 7.1-23)

15 Æ yoa Jerusalẽ macaina, fariseo curua macaina, marine judio masare buheina mehne Jesu cahapu wihia, õ sehe ni siniture tirore:

²—¿Dohse yoa mari ñuchusuma cjiropu ti yoa dutiro sehetã yoaerajari mu buheina sehe? Tina ti chũto pano ti dutiro sehetã wamo cosaerara —nire tina Jesure.

³Jesu õ sehe ni yuhure tinare:

—¿Musa sehe dohse yoana Cohamacu dutia sehere yoaerajari musã? ¿Dohse yoana mari ñuchusuma cjiri panopu macaina ya dutia dihtare yojari musã sehe? ⁴Õ sehe nina Cohamacu: “Musa

pucsumare ño payoga”, nina. “Cũiro to pucsumare ñaare quiti dahreriro jiro tí buhiri paina ti wajãhtiro cjihto jirohca”, nina Cohamacu. ⁵To ã nipachuta õ sehe ni dutira musa sehe ti pucsumare yoadoho dutierana: Ti pucsumare ti waborire Cohamacu sehere wa dutira musa. Æ ni buhemana musa. ⁶Æ buhena ti pucsumare ño payochu yoerara musa. Musa ã yoana Cohamacu dutiare yuhdurucana nina musa, mari ñuchusuma cjiri panopu macaina ya dutia dihtare yoana. ⁷Masa ti baharo buhusehei ñano yoa cohtaina jira musa. Cohamacu yare yahu muhtariro Isaia cjiro musare potocãta yahu joaa tiha panopure:

⁸“Ahrina masa yuhure noano durucupahta ti tuhutuare yuhure ne ño payoerara.

⁹Æ jia yuhure ti ño payoa ne yaba cjihti jierara.

‘Cohamacu ya dutia jira ahri’, ni mahño buhera ti ya buhea sehere”;

ni joaa tiha Isaia cjiro —nire Jesu fariseo curua macainare, mari coyca judio masare buheina cũhure.

¹⁰Æ ni tuhsu to cahapu paina cũhure pjiroca, õ sehe nire:

¹¹—Yuhure tuhona taga. Tuhsu, yu niare noano tuho ñahaga musa. Musa duserihi sãa sehe musa chua sehe musare buhiri tichu yoerara. Musa ñaa durucua sehe musa duseri wijaa sehe musare buhiri tichu yoara —nire Jesu.

¹²To ã ni buheri baharo sã to buheina sehe tirore yahui:

—Mu ã nichu tuhoa fariseo curua macaina suaa nire —ni yahui sã tirore.

¹³Tĩre tuhoro, õ sehe ni yuhtire sãre:

—Tina fariseo curua macaina toaa yucu yoaro sehe jira. Yu Pucu muano macariro jipihia toaa yucure toaerari cjirire nuhcori mehneta cure, cohãnohca. Åta yoarohca tinare. ¹⁴Tinare ã ñnocahga musa. Tina capari ñueraina ti

ñu masieraro seheta ne Cohamacu yare masierara. Æ jia pichacapu wahaahca. Æ masierapahta paina masierainare buhe duamana. Æ jia tina, ti buheina cũhu soro jia buheare cahmaahca, capari ñueraina painare tuã wahcã, jipihina copapu ti borariro seheta —nire Jesu.

¹⁵To ã nichu tuhoro Pedro õ sehe nire:

—Ahri quitire masa ti duseri wijaa quitire yahu namoga sãre tjoa —nire tiro Jesure.

¹⁶Jesu õ sehe ni yuhtire:

—¿Ne, tuhoerasinijari musa? ¹⁷Masa ti chuare chuchu tí ti duseroi sãahna. Æ jia ti pjaropu sãa su, yuhdu wijaa wahara. Wiho waro jira. Mari chua marine buhiri tichu yoerara, Cohamacu to ñuchu. ¿Ahrire masierajari musa? ¹⁸Masa ti duseroi wijaa, ti durucua sehe ti tuhutuapu tara. Ti durucua sehe ñaa jia masare buhiri tichu yoara. ¹⁹Ñaa tuhutua, masare wajãa, paio namono mehne ñano yoaa, ñano yoaa numia mehne ñano yoaa, yacaa, mahñoa, masare ñano quiti dahrea masa ti tuhutuapu tara. ²⁰Tĩ ñaa sehe masare buhiri tichu yoara. Wiho mejeta mari ñuchusuma cjiri ti yoaa tiroro cjiro seheta masa wamo cosaerapahta ti chuchu tí masare buhiri tichu yoerara —nire Jesu.

Judio masono jieraricoro Jesure wacũ tuaha

(Mr 7.24-30)

²¹Æ ni buhe tuhsu, sãre suho wahare tjoa. Tiro wama tiri maca cahapu Sidõ wama tiri maca cahapu sui sã. ²²Sã tõpu suchu Canaa yahpa macaricoro tõi jioricoro Jesu cahapu wihiro, sañurucure:

—Puhtoro, Davi panamino masare yuhdũchu yoahitiro, yuhure pja ñuga mũhu. Yu macore yuhdũchu yoabasaga mũhu. Yu maco watĩno to cohtotaricoro, ñabiaro yuhdũra ticoro —ni sañurucure to pocoro.

²³To ā nipachūta Jesu tiorore yuhtierare. To ā yoachū űna sā to buheina sehe tirore ō sehe nimai:

—Waha dutiga tiorore. Nu cariboro bisica —nimai sā.

²⁴Sā ā nichū tuhoro Jesu ō sehe ni yuhtire tiorore:

—Israe masare Cohamacure masieraina dihtare yoadoho dutiro warocare yu Pucu yuhure —nire tiro.

²⁵To ā nipachūta Jesu dahpori cahai na tuhcuca caha sure ticoro tirore űo payoro.

—Puhtoro, yoadohoga yuhure —nire ticoro.

²⁶Jesu ō sehe ni yuhtire tiorore:

—Ō sehe jira ahri: Wahmanore wuhu puro pohna ya chūare dieyacāre yu wa muhtachū tó wahaerara. (Israe masa yare pa yahpa macainare yu wa muhtachū tó wahaerara) —nire Jesu tiorore piti dahre yahuro.

²⁷—Ā tjira puhtoro. Ā jipachūta dieyacā cūhu wuhu puro mesa docai ti chū site boroare chū cohtara tinacā cūhu. (Pa yahpa macaricoro yu jipachūta yuhu cūhure yoadoho masina muhu) —ni yuhtire ticoro.

²⁸To ā nichū tiro ō sehe ni yuhtire:

—Ne numino, muhu yuhure tuaro wacū tuara. Mu cahmano seheta ā waharohca —nire Jesu tiorore.

To ā nichūta dōihta noaricoro wahare to macono.

Payu dohatiinare noaina wahachū yoaha Jesu

²⁹Ā ni tuhsu sāre suho waha, Galilea wama tiri bucupariro duhtū cahapū suho sure tjoa. Su, mahaducā tūcure muja, tu buipū dujire. ³⁰Tōi to jichū payu masa tini masierainare, capari űuerainare, cū buhusehe űano dahporo tiinare, durucu masierainare, payu paina dohatiinare tiro cahapū na wihire masa. Na wihi tuhsu Jesu dahpori cahai duhu cūre

tina. Ti ā duhu cūri baharo noaina wahachū yoare Jesu tinare. ³¹To ā yoachū űna masa űu cūaa wahare. Durucu masieraina ti durucuchū űna, cū buhusehe űano dahporo tiina noaina ti wahachū űna, tini masieraina ti tinichū űna, capari űueraina ti űuchū űna, cūaa wahare tina. Ā jia ō sehe nire:

—Israe masa mari puhtoro, Cohamacu tuariro, noariro jira —ni űo payore tina Cohamacure.

Cuatro mil masare chūare waha Jesu (Mr 8.1-10)

³²To ā yoari baharo Jesu sāre to buheinare to cahapū pjiroca, ō sehe nire:

—Ahrina masa yuhu mehne tia dacho waro ji tuhsura. Ā yoa tinare ti puhi mariaha. Ti puhi mariachū űucu tinare pja űuja. “Tinapu jūca baaina, mahai borari”, nicu tinare chūa marieno ti wuhusepu waha duti duaeraja. Ā jicu tinare puhi wa duaja —nire tiro.

³³To ā nichū sā to buheina tirore sinitu űui:

—¿Dohse yoa mari ōre masa marienopure pāore boca wabocari mari? —nii sā tirore.

³⁴—¿Nohope curi pāo curire cjuajari musa? —nire Jesu.

—Siete curi, wahi cūhure mahainacā cjuaja —ni yuhtii sā.

³⁵Sā ā nichū tiro masare yahpai duji dutire. ³⁶Tuhsu siete pāo curire, wahicā cūhure na, Cohamacure “Noana”, nire. Ā ninota pāo curire nuha, sāre to buheinare ware. Ā jina sā sehe tí chūare masare witii. ³⁷Ā jia masa tíre chū, yapi yuhduwa wahare. Ti yapi wahy-orire siete puhuse waro wahpo dapoi sā. ³⁸Tōi churinare mua dihtare mari quihochū cuatro mil waro mua jire. Numia, macanacā cūhu jire. ³⁹Ti ā chū tuhsuchū Jesu masare waha dutire. Ā ni tuhsu dohoriapū samu, Magadán wama tiri yahpau sāre suho sure.

**Fariseo curua macaina, saduceo
curua macaina cūhū
Cohamacu tuaa mehne Jesu
to yoa ñochū ñū duamaha**

(Mr 8.11-13; Lc 12.54-56)

16 Ñ yoa fariseo curua macaina, saduceo curua macaina mehne Jesu cahapū wihire. To ñnano yochū ñū duamare tirore yahusā duaa. Ñ jia tina tirore Cohamacu tuaa mehne yoa ño dutimare to masierachū ñū duaa, “Cohamacu warocariro jierara”, nia taa. ²Ti ã yoa dutichū Jesu ò sehe ni yūhtire tinare:

—Ñamichahapū sū sāachū to noano sohāchū ñūna “Noari ñami jirohca”, nina mūsa. ³Tuhsū, bohrearo ñichuri dacho to jichū ñūna “Coro tarohca”, nina mūsa. Ñ noano masiina jipanahta Cohamacu tuaa mehne mū sare yū yoa ñochū ñūpanahta ne tíre noano masierara mūsa. ⁴Mipū macaina ña yūhdūina Cohamacūre cahmaeraina Cohamacu tuaa mehne yū yoa ñochū ñū duamana. Yoa ñosi yūhū. Cohamacu yare yahu mūhtariro cjiro Jona cjiro to dohse waharirore masi tuhsūre mūsa. Tí dihtare ñoihtja mū sare —ni yūhtire Jesu.

Ñ ni yahu tuhsū suho wahaa wahare tjoa.

**Fariseo curua macaina,
saduceo curua macaina ti
ñaa buheare yahuha Jesu**

(Mr 8.14-21)

⁵Bucuparirore sã pahāna, pãore bo pahā tari jihti sã. ⁶Ñ jiro Jesu sãre ò sehe ni yahure:

—Noano yoanohbū. Fariseo curua macaina, saduceo curua macaina ti pão bucuarore ñūna noano yoaga. Cua nina tí —ni yahure.

⁷To ã nichū tuhona tuho wisia wahana, sã basi tíre ò sehe ni durucui:

—Mari pãore mari na taerachū ñūno ã nipucū tiro —nimai sã, sã basi.

⁸Sã ã nirire masino, sãre ò sehe ni siniture:

—¿Dohse yoana pão sehere wacūjari mūsa? Mahanocā waro yūhure wacū tuara mūsa. ⁹¿Masierasinihari mūsa? ¿Cinco mil mūare cinco pão curire yū nuha warire numia cūhure yū warire wacūerajari mūsa? ¿Ti yapi wahyorire doce pūhūse waro mūsa wahpo daporire wacūerajari mūsa? ¹⁰¿Ñ jicu siete pão curire nuha, cuatro mil mūare yū warire numia cūhure yū warire wacūerajari mūsa? ¿Nohope pūhuse waro mūsa wahpo daporire wacūerajari mūsa? ¹¹¿Ñ jina pão bucuarore yū yahuchū dohse yoana noano tuhōerari mūsa? Ñ nicū pão warore nicū nieraja. Fariseo curua macaina, saduceo curua macaina ti pão bucuarore ñūna noano yoaga. Cua nina tí —ni yahure sãre tiro.

¹²To ã ni yahuchūpū sã masii. “Pão bucuarō” nino, pão warore nino nierare. Ñ nino fariseo curua macaina, saduceo curua macaina ti buheare nino niri jimare sãre. “Ti ya buheare tuhōena tjiga”, nino nire.

**Jesu potocā Cristo to jiare Cohamacu
warocariro to jiare yahuha Pedro**

(Mr 8.27-30; Lc 9.18-21)

¹³Ñ yoa Jesu mehne wahana, Cesarea Filipino wama tiri maca cahai jia macaripū sui sã. Tuhsū, macapū sã suri baharo Jesu sãre to buheinare siniture:

—¿Diro baro jicari yūhū masa yūhure ti tuhōtuchū? —ni siniture tiro.

¹⁴—“João masare bautisariro jira”, nina mūhure. Paina “Elia jira”, nina. Ñ yoa paina sehe tjoa, “Jeremía jiboca o paio Cohamacu yare yahu mūhtariro cjiro jiboca”, nina —ni yūhtii sã tirore.

¹⁵—¿Mūsa sehe mūsa tuhōtuchū diro baro jicari yūhū? —ni sinitu ñure tjoa.

¹⁶Simo Pedro ò sehe ni yūhtire:

—Muhũ Cristo Cohamacũ warocariro jira. Cohamacũ catiroro waro macũnota jira muhũ —ni yũhtire Simo Pedro.

¹⁷To ã nichũ tuhoro Jesu tirore õ sehe nire:

—Simo Jona macũno muhũ wahcheriro jira. Õ sehe ni yũhũre mu yũhtichũ masa ti ni yahuri jierara. Yũ Pũcu muano macariro sehe tíre muhũre masichũ yoare. ¹⁸Muhũre niita nija. Muhũ Pedro wama tiroro jira. (Pedro nino, “tãca”, nino nina.) Ahri tãa wapa bui pjiri wuhũre yũ yoaboriro seheta yũ yaina sehene pjiri curua jichũ yoaihca yũhũ. ã jia wafino to yaina mehne ne yũ yainare yũhdũrucasi. ã jia yũ yaina ne pichacapũ wahasi. ¹⁹Muano macariro mari pũhtoro to sũho jiro macari sawire muhũre waihtja. ã jicu ahri yahpare ñaare mu yoa dutierachũ muanopũ cũhũre yoa dutisi. Ahri yahpare noaare mu yoa dutichũ muanopũ cũhũre yoa dutia jiahca —nire Jesu.

²⁰To ã niri baharo sãre to buheinare õ sehe nire:

—Yũhũre “Cristo jira tiro”, ni yahu sitesiniena tjiga painare —ni dutire sãre.

**Jesu to yariahtore, to masa
wijaahto cũhũre yahuha**
(Mr 8.31–9.1; Lc 9.22–27)

²¹Tí pjata Jesu sãre to buheinare noano yahu pahño dũcare:

—Jerusalẽpũ yũhũre waharo cahmana mipure. Tõpũ mari coyea judio masa bucuna, sacerdotea pũhtoa, marine judio masare buheina cũhũ yũhũre ñano yoahca. Yũhũre wajãahca. ãta ñano yũhdũro cahmana yũhũre. ã jicu tia dacho wahaboroi masa wijaihcã —ni yahure sãre tiro. ²²To ã nichũ tuhoro Pedro sehe pa sehe curerocã Jesure narũcu sũ, tirore õ sehe nire:

—Pũhtoro, mu nino sehe ã wahaero tjijaro. Muhũre tina wajãea tjijaro —nimare tiro Jesure.

²³To ã nichũ tuhoro Jesu majarerũca, tirore õ sehe nire:

—Satana yoaro sehe durucui nina muhũ. ã nii tjiga. Mu tuhotua masa ya jira. Cohamacũ ya jierara. ã jicu yũ yoahtere dũcata duara muhũ —nire Jesu Pedrore.

²⁴To ã niri baharo sãre yahure:

—Cũiro yũ yairo ji duaro, to cahmano yoa duamarine duhunocanhca. Crusapũ yũ ñano yũhdũhtiro seheta yũ yairo to jiri buhiri ñano yũhdũparota yũhũre duhusi. ã jiro yũ yare yoarucuriro jirohca. ²⁵Masũno yũhũre wacũno marieno to mu sũro to cahmano seheta yoariro pichacapũ waharohca. Tuhsũ, masũno yũ yare ã yoarucuriro jipihtia dachoripe yũhũ mehne muanopũ jirucurohca tiro. ²⁶¿Cũiro masũno ahri yahpa macaare jipihtiare cjuariro Cohamacũre cahmaeraro pichacapũ waharo, yabare wapatajari tiro? ã jiiro ne wapataerara. Pichacapũ to wahachũ ne dohse wapa wiohto basioerara. ²⁷Yũhũ masũno Cohamacũ warocariro yũ yaina anjoa mehne ahri yahpapũ tjua tacũ yũ Pũcu to si sitea mehne tjua tacũ jipihtina masare ti ñaa yoari buhiri buhiri dahreihãta. Noaa sehene ti yoachũ noano yoaihtja tinare. ²⁸Potocã musare yahuihtja. Cãina musa õpũre jina musa yariahto pano yũhũre yũ tachũ yũ pũhto sãachũ cũhũre ñunahca —ni yahure Jesu.

Jesu to pjacũre cohtotaha

(Mr 9.2–13; Lc 9.28–36)

17 ã yoa seis dachori baharo Jesu Pedrore, Santiagore to bahũro João cũhũre muadũ tũcupũ tina dihtare pji mujare. ²Muanopũ ti sũri baharo ti ñũrocaroi to pjacũre cohtotaha. To wũhdũa sũ dacho macariro yoaro sehe si siteha. Tuhsũ, to suhtiro buhriaro yoaro seheta yehsea tiha. ³To ã cohtotachũ Jesu Moise cjiro, Elia cjiro mehne ti

suhuduchũ ñũha tina tiaro Jesu buheina.

⁴ Æ jiro Pedro Jesure õ sehe nimaha:

—Puhtoro, mari õi jichũ noa duara. Mu cahmachũ tia wuhucã yoaihtja. Mu ya wuhucã, Moise ya wuhucã, Elia ya wuhucã yoaihtja —nimaha tiro.

⁵ To ã nino watoi me curua noano si sitea me ti bui duji pja wihiha. To ã duji pja wihichũta, me curua watoi õ sehe nino coa taha:

—Ahroro yũ macũ yũ cahiriuro jira. Tiro mehne wahcheja. Tirore tũhoga —nino coa taha.

⁶ Æ nino coa tachũ tũhoga to buheina cuaa waha, yahpai doca caha sũha. ⁷ Ti ã wahari baharo Jesu tina cahapũ su, tinare bua carerota, õ sehe niha:

—Wahcãrucaga mũsa. Mipũre mũsa ñũrĩre, mũsa tũhori cũhũre cuiena tjiga —niha tiro tinare.

⁸ To ã nichũ tina ñũroca, Jesu dihtare ñũha. Ti ñũrina cjiri sehe marieraha jũna.

⁹ Æ jia tũcũpũ ti duji tachũ Jesu tinare tuaro mehne õ sehe niha:

—Michapucacã yũ ã waharire painare yahuena tjiga. Yũhũ masuno Cohamacũ warocariro yũ yaria masa wijaari baharo tĩre painare yahuga mũsa —niha Jesu.

¹⁰ To ã niri baharo Pedro cũhũ tirore õ sehe ni sinituha:

—“Cristo masare yũhdohtiro to tahto pano Eliare ta muhtano cahmana”, nina marine judio masa buheina. ¿Dohse jiro baro ã nijari tina? —ni sinituha tina tirore.

¹¹ Jesu õ sehe ni yũhtiha:

—Potocã tjira. Eliare ta muhta dutire Cohamacũ, jipihitiare cahno muhtahtirore. ¹² Õ sehe nicũ musare nii nija. Elia wihi tuhsũre. To ã wihipachũta tina tirore ne ñũ masierare. Æ jia ti dohse yoa duaro ñano yoari jire tirore. Æta yoahca yũhũ cũhũre. Yũhũ masuno Cohamacũ warocariro jija. Ti ã yoachũ ñano yũhdũihca yũhũ —niha Jesu.

¹³ To ã ni yahuchũ tina noano tũhoga. “Elia” nino, João bautisarirore nino niha. Tĩre masiha tina.

Jesu ñama yaria munare dohatirirore yũhdoha

(Mr 9.14-29; Lc 9.37-43)

¹⁴ Æ yoa payũ masa cahapũ ti duji tachũ ñũno cũiro mũno Jesu cahapũ su, na tuhcuca caha sũre.

¹⁵ —Puhtoro, yũ macũcãre pja ñũga. Tiro ñama yaria munare dohatiriro jira. Æ jiro tiro ñabiaro yũhdũra. Payũ tahari pichacapũ bora su caha mũjana tiro. Cãa tahari diapũ bora ñoja mũjana. ¹⁶ Æ jicu mũ buheina cahapũ tirore na sũmahi. Tina tirore noariro wahachũ yoa masierare —nire tiro Jesure.

¹⁷ Jesu õ sehe ni yũhtire:

—Mipũ macaina, mũsa ñaa buhiri tiina jira. Yũhũre ne wacũ tuaerara. Yoabiari pja musare buhemaja yũhũ. ¿Noho puro yoari pja yũhũre mũsa caribobocari? Tirore na tahga yũhũre —nire Jesu.

¹⁸ Æ jiro watĩnore to tuhtichũta watĩno sehe masunocãre sãariro cjiro wahaa wahare. To ã wahari baharocãta noariro wahare tiro.

¹⁹ Baharo sã to buheina sã sahsero jina Jesure õ sehe ni sinitui:

—¿Dohse yoana sã sehe ahroro sehere watĩnore cohã masierari, mũ tũhotuchũ? —ni sinitui sã.

²⁰ Jesu õ sehe ni yũhtire:

—Yũhũre mahanocã wacũ tuara mũsa. Potocã musare yahuita nija. Mostaza yapacã mahari yapacã jiparota duropũ pjidũ wahara. To ã wahariro seheta Cohamacũre wacũ tuana õ sehe wahachũ yoa masinahca mũsa. Ahdũ tũcũre “Sohõpũ wahaga”, mũsa nichũ, waharohca. Cohamacũre tó seheta wacũ tuana, jipihitiare yoa masina mũsa. ²¹ [Wiho mejeta ahroro baro watĩnore mũsa cohã duana Cohamacũre tuaro sinino cahmana

mūsare. Ā yoa duana chū duhuro cahmana mūsare Cohamacūre sinina tana] —nire Jesu sāre.

**Pari turi Jesu to variahtore,
to masahtore yahuha**

(Mr 9.30-32; Lc 9.43-45)

²² Ā yoa Galilea yahpā sā tinichū, Jesu sāre ō sehe ni yahure:

—Yūhū masāno Cohamacū warocariri jija. Masa yūhure űaha, painapure yūhure waahca. ²³ Ā ti wari baharo yūhure wajāahca tina. Ā ti wajāricū tia dacho wahaboroi masa wijaahca —ni yahure tiro sāre.

To ā ni yahuchū tūhona tuaro cahyai sā.

**Cohamacū wūhū macaa wapa
cjhirtire sinituha paina**

²⁴ Ā jina Capernaupū sā sūchū, Cohamacū wūhū macaa cjhirtire wapa na cohtaina Pedro cahapū sū, tirore ō sehe ni sinitu űure:

—ĶMūsare buheriro Cohamacū wūhū macaa wapa cjhirtire wapajari tiro? —ni siniture tina.

²⁵ —Wapara tiro —ni yūhtire Pedro.

To ā niri baharo wūhūpū to sāachū Jesu ō sehe ni sinitu mūhtare Pedrorre:

—ĶSimo, dohse ni tūhotujari mūhū? ĶAhri yahpa macaina pūhtoa yabaina sehere wapa cahmajari, mū tūhotuchū? ĶTina mehne macainare wapa cahmajari? ĶO pa yahpa macaina sehere wapa cahmajari, mū tūhotuchū? —ni siniture tiro Pedrorre.

²⁶ —Pa yahpa macaina sehere wapa cahmana —ni yūhtire Pedro.

To ā nichū Jesu ō sehe ni yahure:

—Ā jiro pūhtoro to ya yahpa macainare wapa cahmaerara. ²⁷ Ā jipachūta wapa na cohtainare suachū yoa duaeraja mari. Ā jina wapanahca tinare. Wūcupariorpū wahaga. Tōpū sū, yohgari canore doca űoga. Ā yoa

wahi mūhure chūriore tūāga. To dūseropū niñeru tūre bocaihca mūhū. Tí tū quihōno wapa tiri tū jirohca. Yūhure, mūhū cūhure Cohamacū wūhū macaina ti wapa cahmachū noano quihōno mū sūrohca tí tū. Tí tūre bocacū mari wapamonore wapai wahaga —nire Jesu Pedrorre.

**Jesu buheina tina mehne macariorre
pūhtoro sō duaa nimaha**

(Mr 9.33-37; Lc 9.46-48)

18 Tí pjare sā to buheina Jesu cahapū sū, ō sehe ni sinitui tirore:

—ĶMūano macariro pūhtoro to sūho jiorpūre sā mehne macariro diro baro sehe wahabocari pūhtoro? —ni sinitui sā.

² Sā ā nichū Jesu nijinocāre pjiorca, tirocāre sā panoi duhu dapore. Duhu dapo tuhsū, sāre ō sehe nire:

³ —Potocā mūsare yahu bahrañoihtja. Ahrina macanacā Cohamacūre ti pūhtoro waro tūhotura. Ā jina mūsa cūhū pano mūsa tūhotumari cjirire cohtotaerana, tinacā yoaro sehe tūhotuerana mūano macariro pūhtoro to sūho jiorpūre wahasi mūsa. ⁴ Ā jiro mūano macariro pūhtoro to sūho jiorpūre niji siaroca yoariro painare yūhdūracā duaerariro ahriro nijinocā yoaro sehe tūhoturirota paina bui pūhtoro wahara. ⁵ Ā jina yū yare yoana tana ō sehe jiiacāre cahmana, yūhū cūhure cahmana mūsa —ni yahure Jesu.

Ñaare yoachū cua nina

(Mr 9.42-48; Lc 17.1-2)

⁶ Ā ni yahu tuhsū, tinare ō sehe ni yahu namore:

—Ahrirocā sehe jirore yūhure wacū tuarirocāre yahuihtja mūsare. Pairo ahrirocā sehe jirore űaare yoa dutiro tiro űabiario yūhdūrohca. Cūirote to wamūare pjiria tācare dūhte yo, pjiri mapū tirore ti cohāchū űano wahaboa

tiro. Ā jiro ahrirocā sehe jiriore ñaare yoa dutiuro tiro sehe pjiri mapu ti cohāriro yūhdoro ñano yūhdūrohca. ⁷Masare ñaare yoachū yoaa jira. Tíre yoaa ahri yahpa macaina ñano yūhdūra. Ñaare yoarucura masa. Ti ā yoachū tinare ñaare yoachū yoaina sehe ñabiario yūhdūahca.

⁸Mū wamomaca mehne ñano yoacu tí wamomacare mū ðate cohāboro seheta tí mū ñaa yoaa sehere duhuga. Tíre duhueracu pichacapū wahaihca. Tópūre ne pichaca yatierara. Mū wamomacare mū cohāchū tí si dihta butiboa. Tuhsū, mūhū sehe ā si jipaihta baharo Cohamacū mehne jiihca. Pūa wamomaca mehne pichacapū wahacu mū ā wahachū ñaa yūhdūaboa mūhūre. Ā jicu tí mū ñaa yoaa sehere duhuga.

Mū dahporo mehne ñano yoacu tí dahporo cūhūre mū ðate cohāboro seheta tí mū ñaa yoaa sehere duhuga. Tíre duhueracu pichacapū wahaihca. Tópūre ne pichaca yatierara. Mū dahporore mū cohāchū tí si dihta butiboa. Tuhsū, ā si jipaihta baharo Cohamacū mehne jiihca. Pūa dahporo mehne pichacapū wahacu mū ā wahachū ñaa yūhdūaboa mūhūre. Ā jicu tí mū ñaa yoaa sehere duhuga.

⁹Mū capariaca mehne ñano yoacu tiare orewe mū cohāboro seheta tí mū ñaa yoaa sehere duhuga. Tíre duhueracu pichacapū wahaihca. Tópūre ne pichaca yatierara. Tiare mū cohāchū tia dihta butiboa. Cū bñhusehe capariaca mariapaihta baharo Cohamacū mehne jiihca. Pūa capariaca mehne pichacapū wahacu mū ā wahachū ñaa yūhdūaboa mūhūre. Ā jicu tí mū ñaa yoaa sehere duhuga —ni yahure Jesu.

Oveja butiriuro quitire yahuha Jesu

(Lc 15.3-7)

¹⁰Ā ni tuhsū, tinare ō sehe ni yahu namore:

—Ne, ahriacāre macanacāre ñū yabiena tjiga. Mūsare niita nija yūhū. Tinacāre ñū wihboina anjoa mūanopū jiina sehe yū Pūcu cahapū ā jirucura. ¹¹[Yūhū masūno Cohamacū warocariro ahri yahpapū pichacapū wahaborinare yūhdūchū yoai tai nii yūhū] —ni yahure Jesu.

¹²Ā ni tuhsū to tūhotua mehne ō sehe ni quiti dahre buhere sāre:

—Ovejare ñū wihboriuro cien ovejare cjuariuro cūiuro oveja butia wahachū ō sehe yoarohca tinare ñū wihboriuro sehe. Paina ovejare noventa y nueve ovejare ti chūri campopū duhu dapo, butiriuro macano waharohca. ¹³Potocā niita nija mūsare. Tirore bocaro wahcherohca tiro. Paina noventa y nueve dñsaina mehne wahchera tiro. Tinare to wahcheriuro yūhdoro butiriuro sehere bocaro tuaro wahcherohca. ¹⁴Tó seheta ñū wihboriuro oveja to butichū cahmaeraro seheta mūsa Pūcu mūano macariuro ahriina wiho jiina cūhūre pichacapū ti wahachū cahmaerara —ni yahure Jesu.

Mū coyeiuro mūhūre ñano to yoachū ō sehe yoa dutiha Jesu

(Lc 17.3)

¹⁵Ā ni tuhsū ō sehe ni yahu namore:

—Mū coyeiuro mūhūre ñano to yoachū tiro mehne sñhūdui wahaga. Mūsa sahsero tíre sñhūduga. Mū ā yoachū tiro mūhūre tñhoboca. To tñhocū “Mūhūre ne pari turi ō sehe yoasi yūhū”, to nichū mū coyeiuro pari turi piti tii nica mūhū. ¹⁶Mūhūre to tñho duaerachū pinihta cūiuro mehne waha duacu o pūaro mehne waha duacu tinare piti ti wahcā, pari turi tirore sñhūduna wahaga. Mūsa ā yoachū mūsare pūaro o tiarore to tñhoeraputiachū ñūna paina Jesu yainare tirore yahūsāga, Cohamacū yare ti joari pū to niriuro seheta. ¹⁷Ā jina mūsa mehne macaina cūhūre to tñho duaerachū jipihtina Jesu

yaina cahmachuinare yahusāna wahaga. Ā jina Jesu yaina cahmachuinare to tuho duaerasinichu nūna Cohamacure cahmaeraritore musa yoaboriro sehe yoaga tirore. Wapa na cohtaritore musa yoaboriro sehe yoaga tirore.

¹⁸ Potocā musare niita nija. Ahri yahpai musa Jesu yaina nāare musa yoa dutierachu muanopu cūhure yoa dutisi. Ahri yahpai musa noaare yoa dutichu muanopu cūhure yoa dutia jahca.

¹⁹ Pari turi musare yahuihtja ahrire: Musa puaro Cohamacure sinichu, musa puaro musa sinirire cūno potori musa tuhutuchu yu Pucu muano macariro tīre yoarohca. ²⁰ Puaro o tiaro yu yaina yu yare yoahina cjihti ti cahmachuchu yuhu tina mehne jija —ni yahure Jesu.

Cahamacuno pairo to wapamonore to bo duaerari quitire yahuha Jesu

²¹ Baharo Pedro Jesu cahapu su, o sehe ni siniture:

—¿Puhtoro, yu coyeiro mu yairo payu tahari yuhure nāno to yoachu nūcu nohope tahari tīre boihcari yuhu? ¿Siete tahari boihcari yuhu? —ni siniture Pedro.

²² Jesu o sehe ni yuhtire:

—Siete tahari dihta mūhure pairo to nāno yoirire mu bochu tō wahaerara. Payu tahari mūhure nāno to yoachu cūhure boga.

²³ Muano macariro masa bui puhtoro to suho jiro ahri quiti yoaro sehe jira. Jipihtina masa bui puhtoro jiro tirore dahra cohtainare tirore wapamoinare wapa pahno duti dutimaha. ²⁴ Ti wapamori cjirire to quihō ducachu, tirore dahra cohtaina sehe pjīro wapamoriro tiro cahapu na taha. Wapamori pjiibiaro wapamoha to puhtoro. ²⁵ Ā jiro tiro to wapa masierachu nūno to puhtoro tirore, to namonore, to pohinare cahamaca sō, tinare painare dua dutimaha. Ā yoa jipihtia to cjuaa cūhure

dua duamaha, to wapamonore wapa dutiro. ²⁶ To ā dua dutichu pjīro wapamori sehe na tuhcu caha su, to puhtoro tuaro siniha: “Puhtoro, yuhure pja nūcu cohtasiniga. Mūhure wapa pahnoihca”, niha tiro to puhtoro. ²⁷ To ā nichu tuhoro, tirore pja nūno to wapamoriro āta bonocaha.

²⁸ To ā yoari baharo pjīro wapamori cjiro sehe waha, pairo dahra cohtaritore tirore mahanocā wapamoriro boca suha. Ā boca sūro wamua nāhaha tirore. “Yuhure mu wapamonore wapa bahrañoga”, niha tiro tō mehne macariro to yoaro sehe dahra cohtaritore. ²⁹ To ā nichu pairo dahra cohtariro sehe na tuhcu caha su, tirore tuaro sinimaha. “Yuhure pja nūcu mahanocā cohtasiniga. Mūhure wapa pahnoihca”, nimaha pairo dahra cohtariro tirore. ³⁰ To ā ni sinipachuta tō mehne macariro tirore yuhtieraha. Tuhsu, tiro pairo dahra cohtaritore peresu yoa dutiha. Pu to wapa pahnochupu wiorohca tirore. ³¹ Pjīro wapamori cjiro mahanocā wapamoriro to nāno yoachu nū, susini, paina dahra cohtaina sehe ti puhtoro yahusāa wahaha. ³² Ti ā ni yahusāchu tuhoro ti puhtoro ti yahusāiroro pjiroca, o sehe niha: “Mūhu nābiariro jira. Mu yuhure tuaro sinichu mu wapamoriro bo pahnomahi yuhu. ³³ Mūhure yu ā yoapachuta mūhu sehe mūhure wapamoriro boerayuiti. Mu wapamori sehere yu boriro sehetā tiro mūhure to wapamori cūhure mu bochu noabiaboa. ¿Dohseacu tirore pja nūerari mūhu ā yoacu?” niha to puhtoro tirore. ³⁴ Ā nino tuaro sua, peresu yoaha tirore dahra cohtaritore. Pu to wapa pahnochupu wiorohca —ni yahure Jesu.

³⁵ Ā ni tuhsu, o sehe ni ahri quitire yahu batoare:

—Tó seheta yorohca yu Pucú mʉano macariro mʉsare. Mʉsa jipihtina mʉsa coyea mʉsare ti ñano yoarire noano mʉsa bo pahñoerachu tiro mʉsare buhiri dahrerohca —nire Jesu.

**Ti namosānumiare
cohāare yahuha Jesu**

(Mr 10.1-12; Lc 16.18)

19 Tíre to ā ni yahuri baharo tiro Galileai jiro Judea yahpapu säre sʉho wahare. Jordāo pa buhusehe coapu sui sã. ²Tópu sã wahachu payu masa säre nunu ti wahcäre. Tina mehne macainare dohatinare noaina wahachu yoare tiro.

³Ā yoa cãina fariseo curua macaina Jesure yahusã duaa, ñano to durucuchu tuho duaa, tirore õ sehe ni sinitu ñure:

—¿Mari cahmano seheta mari namore cohāchu noabocari? ¿Mari dutia sehe tó seheta yoa dutijari, mʉ tuhotuchu? —ni sinitu ñure tina.

⁴Jesu õ sehe ni yʉhtire:

—¿Cohamacu yare ti joari pui ne ahrire buherasiniri mʉsa? Ō sehe ni joaa tiha: “Wahmanopure ahri yahpare bajuamehneriro mʉno, numino cʉhure yoaha”, ni joaha. ⁵Tuhsu õ sehe ni joa namoha: “Mʉno to pucʉsumare cohā wija, to namono mehne jirohca. Ā jia tina puaro jipahta cʉ pjacu yoaro seheta jira”, ni joa namoa tiha. ⁶Ā jia tina puaro yoaro sehe jierara. Cʉ pjacu yoaro sehe jia nina. Cohamacu to wamomaca duhte dutiina jira. Ā jia tinare duhueraro cahmana —nire Jesu tinare.

⁷To ā nichu fariseo curua macaina õ sehe ni siniture tjoa:

—Mʉ ā ni yahupachuta õ sehe ni joaa tiha Moise cjiro sehe: “Mʉ namore cohā duacu papera pui tíre joaga. Ā joacu tí püre mʉ namore mʉ wari baharo ticorore cohā masina mʉhu”, ni joaa tiha Moise cjiro. ¿Mʉ nino sehe jipachuta

Moise cjiro sehe dohsearo õ sehe ni joari? —ni sinitu namore tina tirore.

⁸Jesu õ sehe ni yʉhtire tinare:

—Cohamacure mʉsa ñuchusuma ti tuho duaerachu ñuno ti namosānumiare ti cohāchu, “Āta yoawahnojaro”, ninocaa tiha Moise. To ā nipachuta wahmanopure ahri yahpare ā jierara. ⁹Mʉsare niita nija. Masuno to namono to ñano yoerapachuta ticorore cohāno, pacorore namo tiro, tiro pacoro mehne ñano yoaro nina. [Tuhsu, ahriro to cohāricorore namo tiro cʉhu ticoro mehne ñano yoariro jira] —nire Jesu.

¹⁰To ā nichu tuhona, sã to buheina sehe tirore õ sehe nii:

—Tó sehe mʉno to namono mehne ti cahma cohāerachu mari sehere mari namo tierachu noaboca —nii sã.

¹¹Jesu õ sehe ni yʉhtire:

—Mʉsa nino seheta jira. Ā jiro cãinare namo ti dutierara Cohamacu. ¹²Mʉare namo ti dutieraa cãa jira. Cãina mʉa numiare cahmaeraina masa bajuara. Paina mʉa masa ti wapari tōhoca ti warina sehe namo ti masierara. Paina mʉa mʉano macariro ti puhtoro yare yoadoho duaa, namo tierara. Ā jia ahriina namo ti duaeraina āta tuhutunocaina, tó seheta ti ji sohtori tichu noana —nire Jesu säre.

**Macanacã ya cjihtire
Cohamacure sini payoha Jesu**

(Mr 10.13-16; Lc 18.15-17)

¹³Ā yoa masa macanacãre Jesu cahapu na wihire. Ā na wihia, tina Jesure to wamomacare tinacã bui ña payo duti duamare. Ā yoa tinacãre Cohamacure sini payo duti duamare Jesure. Ti ā yoachu ñuna sã to buheina tinare tuhtimahi. ¹⁴Sã ā tuhtichu ñuno, säre Jesu õ sehe nire:

—Macanacã yu cahapu tajaro. “To cahai wahaena tjiga”, niena tjiga tinacãre. Tinacã Cohamacure ti puhtoro tuhutura.

puhtoro Cohamacu to suho jiina ahri-nacā yoaro sehe tuhoutuina baro dihta jira —nire Jesu säre.

¹⁵ Ā ninota to wamomacare tinacā bui ña payo tuhsu, wahaa wahare.

Pache puro Jesure sinitu ñuha

(*Mr 10.17-31; Lc 18.18-30*)

¹⁶ To ā yoari baharo cūiro masuno Jesu cahapu wihi, siniture tirore:

—¿Ne, buheriro, jipihtia dachoripe Cohamacu mehne ā jirucu duacu, noare yoa duacu di baro sehere yoabocari yuhu? —nire tiro.

¹⁷ —¿Dohse jiro baro yuhure noaa barore ni sinitujari muhu? Cohamacu dihta noariro jira. Jipihtia dachoripe Cohamacu mehne ā jirucu duacu to dutiare yoaga —nire Jesu.

¹⁸ —¿Di baro dutia sehere nii nijari? —ni sinitu namore tiro.

Jesu ō sehe ni yuhtire:

—Masare wajäecu tjiga. Namo tiroropu paye numia manu tia numia mehne jiecū tjiga. Yacaecu tjiga. Mahñoa mehne painare yahusäecu tjiga. ¹⁹ Mu pucusumare ño payoga. Mu basi mu cahino sehetā mu cahai jiro cūhure cahiga. Ahri dutiare yoaihca muhu —nire Jesu.

²⁰ —Ahri dutiare ne yuhdurucaera tihī yuhu. ¿Dohse yoa namoihcari yuhu jipihtia dachoripe Cohamacu mehne jirucu duacu? —nire tiro Jesure.

²¹ To ā nichu tuhoro Jesu ō sehe ni yahu namore:

—Muhu ñaa buhiri marieriro ji duacu mu ya jipihtiare duai wahaga. Ā duacu jipihtia mu wapatarī niñerure pjacuoinare waga. Mu ā yoachu payu mu wapataa manopu, Cohamacu cahapu jiyuahca. Mu ā yoari baharo yuhu mehne macariro cjihto taga —ni yahure Jesu.

²² To ā nichu tuhoro tuaro cahyare. Tiro payu pache cjuariro jiro, tíre

pjacuoinare wa duaeraro, cahya, wahaa wahare.

²³ To ā wahari baharo Jesu säre to buheinare ō sehe ni yahu namore:

—Potocā musare niita nija. Pache puro puhtoro Cohamacu to suho jiro pure to waha duachu mijobiara. ²⁴ Musare yahu namoihtja: Camello sehe awicā copapu to sāa nuhri wijaa duachu basioerara tirore. To ā jiro yuhdoro pache puro puhtoro Cohamacu to suho jihropu to waha duachu mijobiara —nire tiro.

²⁵ To ā nichu tuhona sā cuaa waha, sā basi ō sehe nii:

—Cue, to nino sehetā jichu, ne cūiro masuno Cohamacu cahapu waha masieraboca —nii sā basi.

²⁶ Sā ā nichu Jesu säre ñuroca ō, ō sehe ni yahure:

—Masa ti basi ti mu sūro yuhdu masierara. Wiho mejeta Cohamacu sehe masare pichacapu wahaborinare yuhdo masina. Tiro jipihtiare noano yoa masi pahñoriro jira —nire tiro säre.

²⁷ To ā nichu Pedro tirore ō sehe nire:

—Tuhosiniga. Sā sehe sā ya jipihtiare cūnocaa tii muhu mehne wahana tana. ¿Sā ō sehe yoana, dohse jiare wapatanahcari sā? —nire tiro.

²⁸ To ā nichu tuhoro ō sehe nire Jesu:

—Musare niita nija: Pihitiri dacho jichu jipihtia wahma dihta cohtotaahca. Tí pjarure yuhu masuno Cohamacu warocariro yuhu puhtoro yu dujiroi si siteroi dujiilhca yuhu. Tóí yu dujichu musa cūhu doce dujia pahtarihi puhtoa ti dujia pahtarihi dujinahca. Ā jina Israe masare doce curuari macainare besenahca musa noaina, ñainare. ²⁹ Ā yoa yu yare yoana tana musa wuhusere, musa bahanare, musa pucusumare, musa pohinare, musa weserire cūnocarina jina, pjíro wapatanahca. Tuhsu, jipihtia dachoripe Cohamacu mehne jirucunahca. ³⁰ Wiho mejeta mipure payu puhtoa jirina cjiri

tí pjarure wiho jiina tjuanocaahca. Tuhsu, mipure payu wiho jiina jirina cjiri tí pjarure puhto cohtotaahca tjoa —ni yahure Jesu sare to buheinare.

Se wesere dahraina quitire yahuha Jesu

20 ã yoa Jesu pari turi to tuhotua mehne piti dahre õ sehe ni yahu namore tjoa:

—Muan macariro masa bui puhtoro jira. Wese puro quiti mehne puhtoro Cohamacu to suho jirore yahuihtja musare. Tiro wese puro bohrea paricaroi to wesere dahrahtinare pjiro wahaha. ²“Cũ tu niñeru tu wapaihtja cũ dachore”, niha tinare. “Jai”, niha dahrahtina. Ti ã nichu wesepu dahra dutiro warocaha tiro tinare. ³ ã yoa dachopu nueve hora jichu pache duaropu wahaha tiro. Tõpu sũro, paina dahraerainare ñuha. ⁴ ã ñuno tinare õ sehe niha: “Musa cũhu yu wesere dahrana wahaga. Noano wapaihtja”, niha tiro tinare. ⁵ To ã nichu tuhoa, tina cũhu wesepu dahraa wahaha. ã yoa wese puro cohari pja jichu, ñamichahapu tres hora jichu cũhure painare dahra dutiha. ⁶ ã yoa ñamichahapu cinco hora jichu pache duaropu tiro wahaha tjoa. Tõpu sũ, paina dahraerainare ñuno, tinare õ sehe niha: “¿Ne yaba barore yoerapanahta cũ dacho ñurucu nahñoajari musa?” ni sinitu ñuha tinare. ⁷ “Ne, sare dahraa mariaha”, ni yuhtihina tina. “Musa cũhu yu wesere dahrana wahaga”, niha tinare. ã jia to niriro seheta to wesere dahraa wahaha. ⁸ ã yoa ñamichahapu dahra duhuri pja jichu wese puro to yaina dahrainare cohtaritore õ sehe niha: “Dahrainare pjiga. Ti wihichu tinare wapa. Ti baharopu yu dahra dutirinare wapa muhtaga. Tinare wapa tuhsu, paina cũhure wapa tuhsu, yu dahra duti muhtainare wapa batoaga juna”, niha tiro. ⁹ ã yoa cinco hora jichu dahra du-

cainare cũ tu niñeru tu wapaha. ¹⁰ To ã wapachu ñuha, “Sare bui curero waparohca”, ni tuhotumaha to duti muhtaina cjiri sehe. Tina cũhure cũno potori wapanocaha. ¹¹ ã jia niñerure to wapachu ti puhtoro mehne susinia ti basi õ sehe cahma niha: ¹² “Ahrina sã baharopu to dahra dutirina sehe cũ horata dahrahe. Sã sehe cũ dacho noano dahra nahñoamahi. Ñano sũ sihre sare. Sã ã yoi pja dahrapachuta sã baharopu dahra ducaina cũhure cũno potoriga wapanocahre tiro”, ni suaha tina ti basi. ¹³ Cũiro tina mehne macariro to ã nichu tuhoru, wese puro yuhtihina tirore: “Ne coyero, ‘Cũ tu niñeru ture wapaihtja’, nimahicu musare. Yu ã nichu yuhtihine musa. ã jicu yu niriro seheta musare wapaihtja. Quihõno wapaihtja musare. Ne yacaerahi musare. ¹⁴ ã jicu yu waparirina, mu wuhupu tjuahga. Ahrirore baharo yu dahra dutiriro cũhure musare yu wapariro purota wapaihtja. ¹⁵ Yu yu niñeru jira ahri. ã jicu yu cahmano seheta ahri mehne wapaihtja. ¿Painare yu noano wapachu ñu tuhtijari muhu?” niha tiro wese puro —ni yahure tí quitire Jesu.

¹⁶ ã nino, õ sehe ni yahu namore tiro:

—Ahri quiti ti nino seheta baharo macari curua wiho jiina yoaro sehe ya curua ji muhtari curua puhto ya curua jirohca muanopu. ã yoa ji muhtari curua puhto ya curua cjiro sehe ti baharopu macari curua wiho jiina ya curua tjuarohca muanopu —ni yahure Jesu.

Pari turi Jesu to yariahtore, to masa wijahtore yahuha

(Mr 10.32-34; Lc 18.31-34)

¹⁷ ã yoa Jerusalõpu wahana cũnoihita waharucuma, sare doce to buheinare pjiroca tuhsu, pa sehẽpu sã dihtare naahre Jesu. Sã sahsero sã jichu sare õ sehe ni yahure:

¹⁸—Tuhoga yuhure. Mipure Jerusalēpū wahana nija mari. Tópū yuhure masunore Cohamacū warocaritore naha, painapure yuhure waahca. Sacerdotea puhtoare, mari coyea judio masare buheina cūhure yuhure waahca. Ā jia yuhure wajā dutiahca tina. ¹⁹Ā wajā dutia, judio masa jieraina sehere yuhure waahca. Ti ā wari baharo tina sehe yuhure bājūpe, tjana, crusapū cja puhaahca yuhure. Ā jii yū yariari baharo tia nūmū wahaboroi masa wijaaahca —ni yahure Jesu säre.

Santiago, João mehne ti pocoro tinare sinibasaha Jesure

(Mr 10.35-45)

²⁰Ā yoa Zebedeo namono puaro to pohna mehne Jesu cahapū sū, na tuhcuca caha sūha tirore sinino taro:

²¹—¿Dohse yū yoachū cahmajari muhu? —niha Jesu ticorore.

—Mūhū puhtoro sāacu yū pohmare dutiina sōga. Ā yoacu mū pju buhuseheri batoī dapoga tinare —ni siniha ticoro.

²²Jesu ō sehe ni yūhtiha:

—Musa nāno yuhduhtore masierapanahca ā sinina musa. ¿Mipure yū nāno yuhduhto seheta musa cūhū nāno yuhdūna cūno pjabocari musa? —niha Jesu ticoro pohmare.

—Cūno pjanahca —ni yūhtiha Santiago, João mehne.

²³—Potocā tjira. Yū nāno yuhduhto seheta nāno yuhdūnahca musa cūhū. Wiho mejeta yuhū mehne dutihtinare, yuhū mehne dujihtinare bese masieraja yuhū. Yū Pucū sehe cahno tuhsure tíre. Ā jia to besehtina dihta yū poto buhusehei yū cō buhusehei dujiahca —niha Jesu tinare.

²⁴Ā jina sā paina diez to buheina sehe Santiago, João ahrina puaro mehne susinii sā. Jesure ti pocoro to sinibasarire tuhona susinii tina mehne. ²⁵Sā

ā susinichū nūno, Jesu säre jipihtina to buheinare pji cahmachu, ō sehe ni yahure säre:

—Cohamacure masieraina puhtoa sehe ti masare dutia, purīno mehne dutira. ²⁶Musa sehe ne ā yoasi musa basi. Musa mehne macariro puhtoro ji duaro, jipihtina tiro mehne macaina cahamacuno jiro cahmana tirore. ²⁷Ā yoa jipihtinare dutiriro ji duariro paina cahamacuno jiro cahmana tirore. ²⁸Tō seheta jiriro jija yuhū cūhū. Yuhū masuno Cohamacū warocariro ahri yahpapure masare yoadohocu tacu tai. Tuhsū, payū masa ya buhirire yariai tai nii. Ā yoa masare pichacapū wahaborinare yuhduchū yoai tai nii —nire Jesu säre.

Puaro capari bajuerainare nūchū yoaha Jesu

(Mr 10.46-52; Lc 18.35-43)

²⁹Ā yoa Jericópū jirina sā wahachū payū masa Jesure nūnū tire. ³⁰Ti ā nūnū tichū Jesu to yuhduchū puaro capari nūeraina maha duhtū cahai dujiina tuhore. Ā tuhōa, ō sehe ni sañurucure:

—Sā puhtoro, Davi cjiro panamino masare yuhdohtiro, säre pja nūga —ni sañurucure.

³¹Ti ā ni sañurucuchū masa sehe tinare tuhtire:

—Dihta mariahga —nire masa tinare.

Ti ā tuhtichū tuhōa, ti pano sañurucuriro yuhdo curero sañurucu namore tjōa:

—Sā puhtoro, Davi cjiro panamino, säre pja nūga —ni sañurucure.

³²Ti ā nichū tuhoro Jesu sarūca, tinare pjiroca, ō sehe ni sinitu nūre:

—¿Dohse musare yū yoachū cahmajari musa? —ni sinitu nūre.

³³—Sā puhtoro, säre nūchū yoaga —ni yūhtire tina.

³⁴Ti ā nichū Jesu tinare pja nūre. Ā pja nūno ti caparire nā payore. To ā nā

payochuta tina sehe ñua wahare. Ñ ñua, tireore ñun ti wahcäre.

Jerusalēpu suha Jesu

(Mr 11.1-11; Lc 19.28-40; Jn 12.12-19)

21 Ñ yoa Jerusalēpu sã suhto pano Betfagé wama tiri macapu su muhtasinii sã Jesu mehne. Betfagé tücu Olivo wama tidu cahai jire. Tópu suro, sã mehne macainare puaro to buheinare Jesu to pano waroca muhtare. ² Ñ sehe ni yahure tinare:

—Sí macapu burroare nana wahaga.

Tópu suna, dóihta burrore to macunocã mehne ti duhte daporicorore boca sunahca. Tinare boca, yuta dare pjã, na tabasaga yuhure. ³ Musa pjächu ñuno, cüiro dohse jiriro, “¿Dohseana tana burroare pjãjari musa?” to nichu tuhona ñ sehe ni yuhtiga: “Mari puhtoro burroare cahmarocasinire. Michapucacã tinare wiarohca tiro”, ni yuhtiga tireore —ni duti warocare Jesu to buheina puarore.

⁴ Ñ yoare Cohamacu yare yahu muhtariro cjiro to ni joariro seheta. Ñ seheta ni joa tiha panopu:

⁵ “Jerusalē macainare ñ sehe ni yahuga: Ññuga musa.

Musa puhtoro musa cahapu tara.

Tiro masa noariro jira.

Burro macunocã bui pisariro tarohca’, ni yahuga Jerusalē macainare”,

ni joa tiha panopu.

⁶ Jesu to dutirocaina puaro tí macapu su, to dutiro sehta yoaha tina. ⁷ Burrore, to macunocã cühure na ta, ti bui sãa suhtire tjuwe na, burrocã bui pjüpaha payore tina. Ti ñ yoari baharo Jesu tirocã bui muja pjare waharo taro.

⁸ Muja pja tuhsu, tirocã bui Jerusalēpu wahare. To tachu ñua masa payu ti bui macaa suhtire tjuwe na, saño cü muhtare to wahahti mahai, Jesure ño payoa. Paina sehe püri tia dupürire mahai duhu cü muhta wahcäre tireore ño payoa. ⁹ Ñ

yoa to pano wahaina, to baharo ñun ti ina mehne ñ sehe ni sañurucure:

—Davi cjiro panaminore marine yuhdohtirore wahche payojihna. Ahriro Cohamacu to warocariro noano jijaro. Muano macarirore “Tuariro jira”, ni wahche payojihna —ni sañurucure masa.

¹⁰ Ñ jia Jerusalēpu ti sachu tó macaina sehe ñu caaa wahare.

—¿Cue, diro baro jijari ahriro? —ni cahma siniture tina.

¹¹ Paina masa ñ sehe ni yuhtire:

—Ahriro Cohamacu yare yahu muhtariro Nazare Galilea yahpai jiri maca macariro Jesu wama tiro jira —ni yahure tina masare.

Cohamacu wuhupu suha Jesu

(Mr 11.15-19; Lc 19.45-48; Jn 2.13-22)

¹² Baharo Cohamacu wuhupu sure Jesu. Tí wuhupu su, sãa wahare. Tí wuhupu duainare, nuchüina cühure cohã wiore tiro. Ñ yoaro niñeru cohtotaa mesarire na majareroca doca cü mujare. Bujaare duaina ti dujia pahtari cühure äta yoare. ¹³ Ñ yoaro tinare ñ sehe nire:

—Cohamacu yare ti joari püi ñ sehe nina: “Yu wuhu Cohamacu mehne durucuri wuhu wama tirohca”, nimare to joari püi. Musa sehe ahri wuhüi duana musa basi cahma yacara musa —nire tiro tinare.

¹⁴ To ñ yoari baharo capari ñueraina, tini masieraina cühu Cohamacu wuhupu tiro cahapu wihire. Ti ñ wihichu tinare noaina wahachu yoare tiro. ¹⁵ Ñ noare to yoachu ñua, sacerdotea puhtoa, marine judio masare buheina cühu suare tiro mehne. Ñ yoa macanacã Jesure “Davi cjiro panamino masare yuhdohtiro, tuariro jira muhu”, ti ni ño payochu tuhoha tó cühure tina suare. ¹⁶ Ñ sua ñ sehe nire Jesure:

—¿Ti ñ nichu tuhoerajari muhu? Ñ niea tjjaro —ni tuhtire tina Jesure.

Ti ã tuhtichu tuhoru Jesu tinare õ sehe ni yuhtire:

—Tina ti ã nichu tuhoja. ¿Cohamacu yare ti joari pui ahrire ne buherari musa? “Macanacãre, wihãinacãre Cohamacure noano ño payochu yoare muhu”, nina Cohamacu yare ti joari pui —nire Jesu (“Macanacã yuhure ti ño payochu noana”, nino).

¹⁷ Æ ni tuhsu tinare cohã wahcã, Betania wama tiri macapu su, tí ñamine tói jire.

Jesu higueraçure yaria dutiha

(Mr 11.12-14, 20-26)

¹⁸ Pa dachoi bohrearopu Jerusalèpu tjuaroo, juca baare Jesu. ¹⁹ Æ juca baaro, maha duhtu cahai jidü higueraçu wama tidure ñuno, tu dichare macano wahamare. Dicha mariahe tu sehe. Puri dihta jire. Tu ã jichu ñuno Jesu ture õ sehe nire:

—Ahdü ne pari turi dicha tisi —nire tiro.

To ã nichuta dóihta tu sehe ñaia wahare. ²⁰ Tu ã wahachu ñuna sã to buheina ñu çua wahai.

—Cue, ¿dohsearo ahdü dóihta ñaia wahajari? —ni sinitui sã.

²¹ Jesu õ sehe ni yuhtire:

—Potocã nii nija musare. Cohamacure noano wacü tuaga. “Potocã ã yorohca tiro”, nina ahdure yu yorairo seheta yoa masinahca musa çuhu. Tuhsu, ahdure yu yaria dutiriro yuhdoro yoa masinahca musa. Ahdü tucure “Duha na, pjiri mapu cohãdu jijaro”, musa nichu duha cohãdu jirohca. ²² Cohamacure musa wacü tuachu, “Yu siniriro seheta ã waharohca”, musa ni wacüchu musa siniriro seheta ã waharohca —nire Jesu sãre.

Jesure dutirirore sinituha paina

(Mr 11.27-33; Lc 20.1-8)

²³ Æ yoa Cohamacu wuhupu tju su, buhere tiro. To ã buhechu sacerdoea

puhtoa, mari coyea judio masa bucna mehne tiro cahapu wihi, õ sehe ni siniture:

—¿Dohseacu canure ã yoari muhu? ¿Noa muhure ture ã yoa dutiri? —ni siniture tina.

²⁴ Ti ã nichu Jesu õ sehe ni yuhtire:

—Musa sehene sinitu muhtaitja. Noano yuhure musa quihõno yuhtichu musare yahuhtitja yuhu çuhu. ²⁵ ¿João masare to bautisachu diro baro sehe tireore bautisa dutia tiari, musa tuhotuchu? ¿O Cohamacu dutiera tiari? ¿O masa sehe dutia tiari, musa tuhotuchu? —ni siniture Jesu tinare.

To ã nichu tina sehe ti basi õ sehe nire:

—¿Dohse ni yuhtinahcari mari? “Cohamacu Joãoore dutia tiri jire”, mari nichu, “¿Dohseana Cohamacu Joãoore to dutipachuta tireore tuho duaerari musa?” niboca Jesu marine. Æ jina “Cohamacu Joãoore dutia tiri jire”, ni yuhti masieraja mari. ²⁶ Ahrina masa sehe “Potocãta João Cohamacu yare yahu muhtariro jire”, ni tuhotura tina. Æ ni tuhotua “João to bautisachu Cohamacu sehe tireore dutierari jire”, mari nichu tuhoa masa suaboca mari mehne. Æ jina tí çuhure yahu masieraja mari —nire tina ti basi.

²⁷ Ti ã niri baharo Jesure õ sehe ni yuhtire tina:

—Joãoore bautisa dutirirore sã masieraja —nire tina.

Ti ã nichu tuhoru õ sehe nire Jesu:

—Tí pja pinihta yuhu çuhu musa sinitu muhtarire yahueraja musare. Yu yoraire dutirirore yahueraja musare —nire tiro tinare.

Puaro puçuro quitire yahuha Jesu

²⁸ To ã niri baharo Jesu to tuhotua mehne paye quitu mehne piti dahre buhe namore tinare:

—¿Ne, dohse ni tuhotujari musa ahri quitire? Puaro puçuro jiha. Wahmino

sehene õ sehe niha to p̄curo: “Mac̄, wesep̄ dahrai wahaga”, niha. ²⁹“Wahaeraja”, ni yuhtimaha to mac̄no wahmanore. Ā niparota baharop̄re wesep̄ waha duaro jiha tirore. Ā jiro wahaha tiro. ³⁰Tuhs̄, ti p̄curo to mac̄no d̄hsariro cahap̄ s̄, to wahminore to dutiriro seheta wesep̄ waha dutimaha. “Jai”, nimaha d̄hsariro sehe. Ā niparota wahaeraha tiro. ³¹¿Diro sehe to p̄curo to dutiriro seheta yoari? —ni siniture Jesu.

—To wahmino sehe yoaha —ni yuhtire tina.

Ti Ā nichu Jesu õ sehe ni yahure:

—Musare niita nija. Wapa na cohtaina, m̄a mehne ñano yoarucua numia ti buip̄ waro m̄sa sehe ñabiaina jira. Ā jia p̄htoro Cohamacu to s̄ho j̄rop̄re m̄sa s̄borirore tina sehe musare m̄ c̄ s̄ m̄htaahca. ³²João bautisariro buhero musare “Noano yoaga”, ni yahumare. Ā to yahuch̄ d̄hsariro to p̄curore to yuhtierariro seheta tirore tuhoerare m̄sa. Ā yoa tirore yuhtierare. Wapa na cohtaina sehe, m̄a mehne ñano yoarucua numia c̄hu tirore tuhore. Ti Ā tuhoch̄ ñure m̄sa. M̄sa Ā ñupanahta tirore ne tuho duaerare m̄sa. Tuhs̄, tuhoerare m̄sa —nire Jesu sacerdotea p̄htoare, mari coyea judio masa buc̄na c̄hure.

Ñaina dahra cohtaina quitire yahuha Jesu

(Mr 12.1-12; Lc 20.9-19)

³³Ā yoa Jesu pari turi to tuhota mehne õ sehe ni piti dahre tinare buhe namore:

—Ahri quitire tuhoga m̄sa. Yahpa p̄ro jiha. Tiro to ya yahpai se dari c̄j̄htire toaha. Toa tuhs̄, sahr̄nore dapo, sere ti tu m̄tohti copare saha, m̄ari wuhc̄a dahreha.

³⁴Ā jiro tí wesere painare c̄u b̄husehe coa pahma c̄ha. Ā pahma c̄no tí wesere tinare ñu wihbo duti, pa yahpap̄ wahaha tiro. ³⁴Ā yoa se ñiri p̄ja jich̄ wese p̄ro tirore dahra cohtainare wesere ñu wihboina cahap̄ warocaha. Wese macaa to toaa dichare to ya coa macaa dichare na dutiro warocamaha. ³⁵To Ā warocach̄ wesere ñu wihboina sehe tirore dahra cohtainare ñano yoaha. C̄iurore tuaro c̄j̄, pairore waj̄, pairore t̄a mehne docaha. ³⁶Baharo wese p̄ro pari turi tirore dahra cohtainare to waroca m̄htarina bui curero p̄htoa jiri curuare warocaha t̄joa. To Ā warocach̄ wesere ñu wihboina tina c̄hure m̄nanota yoaha t̄joa.

³⁷Ā yoa to waroca batoariro to mac̄no jiha. “Ȳ mac̄ sehene ño payoahca”, nino tirore warocamaha. ³⁸To Ā ni tuhutupach̄ta wesere ñu wihboina to mac̄no to tach̄ ñu, õ sehe niha: “Wese p̄ro mac̄no jira ahriro. Tirore waj̄jihna mari. Mari Ā waj̄ch̄ ahri wese mari ya wese t̄juarohca”, nimaha tina ti basi. ³⁹Ā niata tirore ñaha, wese d̄ht̄ cahai na wahc̄a, waj̄ha tina tirore.

⁴⁰¿Ne, wese p̄ro taro dohse yoarohcari tiro wesere ñu wihboinare, m̄sa tuhotech̄? —ni siniture Jesu sacerdotea p̄htoare, buc̄na c̄hure.

⁴¹To Ā nichu tina õ sehe ni yuhtire:

—Tiro painare wesere ñu wihbohtinare cohtotarohca ji m̄htainare ñabiainare waj̄ano taro. Tirore quih̄no dichare t̄ju wahtina sehene ñu wihbo dutirohca —ni yuhtire tina.

⁴²Ti Ā nichuta Jesu yahu namore tinare:

—¿Cohamacu yare ti joari p̄i ahrire yuh̄re to ni joari c̄j̄irire ne buherari m̄sa?

“Ahriro Cristo t̄ca yoaro seheta jira.

T̄care wuh̄ dahreina ti coh̄no seheta masa tirore coh̄ahca.

Ti ā yoapachuta mipure wuhū dahreina wuhure yoaa ti cū muhtari tācare ti cūno seheta Cohamacu tirore puhto sōre.

Cohamacu sehe ahrire yoare.

To ā yoachū űna, ‘Noa yuhduara’, ni tuhoutuja mari”,

ni joaa tiha panopū. ¿Tíre ne buherari mūsa? ⁴³Mūsa niita nija yuhū. puhtoro Cohamacu to suho jiro mūsa jihto cjihto jiboa. To puhtoro jirore paina sehere mūsa jiborirore warohca Cohamacu. Paina masa sehe to dutiro seheta yoahca. ⁴⁴[Jipihtina tia tāca bui bora pjainare payū dihicā peri yih-sorohca tia tāca. Tuhsū, tia tāca sehe masūno bui bora pjaro tahānocanohca tirore. To pjacu cjirore daa manaricā wahachū yoarohca. (Tó seheta yuhure cahmaeraina yū buhiri dahrehtina űnano yuhduahca) —nire Jesu sacerdotēa puhto-
toare, mari coyēa judio masa bācūna cūhure.]

⁴⁵Tí quitire to ā nichū tuhoa, “Sohō to yahu muhtari quti wesere űn wi-hboina quti mehne marine nino nica tiro”, ni tuhouture tina. ⁴⁶Ā ni tuhotua, tirore űnaha duamare. Masa sehe Jesure űno payo “Cohamacu yare yahu muhtariro jira tiro”, niina jia tiha tina. Tíre masia, sacerdotēa puhtoa, bācūna mehne masare cuia, Jesure űnahaerare.

Pjiri bōse nūmū macaa quitire yahuha Jesu

22 Ā yoa pari turi to tuhoutua mehne paye quti mehne tinare buhe dū-care Jesu:

²—Mūano macariro puhtoro to suho jiro ahri quti yoaro sehe jira. Cā yahpa macaina bui puhtoro jiha. Ā yoa to macūno ya nūmū bōse nūmū yoaha. To wamomaca dūhteri bōse nūmū jiha. ³Ā yoa puhtoro tirore dahra cohtainare bōse nūmūre űna tahtinare pji dutiro warocamaha. Tina sehe ta duaeraha.

⁴Ā jiro painare pji dutiro warocamaha tjoa tirore dahra cohtainare. “Yū pjiro-cainare ō sehe ni yahuga. ‘Mari chūhtire dahre tuhsūre. Wachūare, wachūacā dihi tiinacā cūhure wajā tuhsūre. Ā yoa jipihtiro bōse nūmū macaa cjihtire cahno tuhsūre. Ā jina bōse nūmū macaare chūna taga’, ni yahuga tinare”, ni warocamaha puhtoro tirore dahra cohtainare. ⁵Dahra cohtaina ti ā yahuri baharo to pjirocarina cjiri ā tuhoutunocaha. Bōse nūmūre űna wahaeraha. Cūiro to wesepū waha wahaha. Pairo to dahraare űno wahaha. ⁶Paina sehe tirore dahra cohtainare űnaha, tinare űnano yoa, wajānocaha jūna. ⁷Ti ā yoachū tuhoro, puhtoro sehe suaha. Sua, ti ā wajāri buhiri buhiri dahre dutiro to surarare warocaha. Ā jia surara tinare wajā pahūno, ti ya macare jūnocaha. ⁸Ti ā yoari baharo, puhtoro tirore dahra cohtainare ō sehe niha: “Bōse nūmū macaa cjihtire cahno tuhsūmahre. Wiho mejeta yū pjiroca muhtarina cjiri yū bōse nūmūre űnaborina jierara. űnaina jira tina. ⁹Ā jina macare jia maharipū dohse jiina mūsa boca sūinare bōse nūmūre űnūhtinare pjiga”, niha tirore dahra cohtainare. ¹⁰To ā nichū tirore dahra cohtaina maharipū waha, jipihtinare ti boca sūinare, űnaina, noaina cūhure yahuha. Ti ā pjiri baharo to cahapū suha tina peri. Noano tí bōse nūmū ti yoari tahtiare masa wahpata yuhduah wahaha.

¹¹Tóti ti dūjichū puhtoro sehe cūirore wamomaca dūhteri nūmū macari suhtirore sāaerarirore űnaha. ¹²“¿Ne coyēiro, dohse yoacu wamomaca dūhteri nūmū macari suhtirore sāaerapaihta sā tari mūhū?” ni sinituha puhtoro. To ā sinituchū masūno sehe yūhtieraha. ¹³To ā yūhtierachū űno tirore dahra cohtainare ō sehe niha: “Ahriroro to wamomacarine dūhtega. To dahpori cūhure dūhtega. Dūhte

tuhsu na wijaa, sopacapu cohāga tirore nahitianopu. Tōpu tiro tuaro tii, cahyaro mehne bahca dihorohca”, niha puhtoro —ni yahure Jesu.

¹⁴To ā niri baharo ō sehe ni batoare tiro:

—Ahri quti jiro seheta Cohamacu payu masa to pjirocarina ti jipachuta mahainacā tiro mehne tjuaahca —ni yahu batoare Jesu.

Puhtoa ya wapare paina sinituha Jesure

(Mr 12.13-17; Lc 20.20-26)

¹⁵To ā niri baharo fariseo curua macaina waha, Jesure ti yahusāhtore ti basi durucuha tina. To nāno yuhtichu tuho dua nimaha tirore yahusā taa.

¹⁶Ā durucua tina mehne macainare, Herode ya curua macaina cūhure Jesure sinitu dutia warocaha. Tina sehe Jesu cahapu wihi, tirore mahño cū sinitu nūmare:

—Buheriro, potocā durucuriro mahñoa marieriro mu jichu masija sā. Cohamacu yare quihōno mu yahuchu cūhure sā masija. Ā jicu cūiro puhtoro waro to jipachuta tiro cūhure dōrero marieno potota yahura muhū. ¹⁷Ā jicu sāre yahuga. ĶRoma macariro jipihitina bui puhtoro jirirore gobierno macaare marine waparo cahmajari, mu tuhotuchū? ĶMari dutia tirore wapa dutijari? —ni siniture tina Jesure.

¹⁸Ti ā nichu tuhoro tirore ti yahusā duaare masino ō sehe nire:

—Mahñopeina jira musa. ĶDohseana yu nāno durucuchū tuho duajari musa?

¹⁹Mipure niñeru ture puhtoare wapahti ture na tahga. Tí ture niñjihna —nire tiro.

To ā nichu tuhoa niñeru ture na tare tina.

²⁰Ti ā na tachū ō sehe ni siniture tiro tinare:

—ĶDiro baro masu wahājari ahri ture? ĶDiro baro wama wahājari? —ni siniture.

²¹—César, masa bui puhtoro masu, to wama cūhu wahāna —ni yuhtire tina.

Ti ā nichu tuhoro Jesu ō sehe ni yahure:

—Tí pja pini masa bui puhtoro yare tiro sehene waga. Cohamacu yare Cohamacu sehene waga —nire Jesu.

²²To ā nichu tuhoa, tuho cūaa waha, waha wahare Herode ya curua macaina.

Saduceo curua macaina Cohamacu to masoare sinituha Jesure

(Mr 12.18-27; Lc 20.27-40)

²³Ā yoa tí dachoihta cāina saduceo curua macaina Jesu cahapu wihire. Saduceo curua macaina sehe “Cohamacu yariainare masosi”, ni tuhotuina jire. Ā jia ō sehe nire tirore tina:

²⁴—Buheriro, ō sehe ni buhea tiha Moise cjiro: “Cūiro to wahmino namo tiro pohna mariaparota to yariachu to bahurore to wahmino namono cjirore nuano cahmana. Ā yoaro to wahmino munano to pohna tiboro seheta pohna tiro cahmana to bahurore. Ā jia to pohna to wahmino munano pohna yoaro sehe jiahca”, ni joaa tiha Moise cjiro —nire tina saduceo curua macaina.

²⁵Tíre ā ni yahu tuhsu ahri quitire yahu namore tina Jesure:

—Cūiro masuno jiha. Seis to bahana jiha. Ti wahmino sehe namo ti, pohna marieriro yariaa wahaha. Tuhsu, paio to bahuro cūhu to wahmino namono cjirore nuoa. ²⁶To ā nuuari baharo to wahmino yoaro seheta pohna mariaparota yariaa wahaha tjoa. Ā yoa ahriro bahuro to wahmino munano yoaro seheta pohna mariaparota yariaa wahaha. Ā dihta wahaha cūiro pohna waro. Ne pohna mariapahta yaria pihitia wahaha tina. ²⁷Ti namono cjiro cūhu ti baharota

yariaa wahaha juna. ²⁸ ¿Ne, Cohamacu jipihtinare yariaina cjirire to masochu diro baro namono jibocari ticoro? Tina jipihtina ticorore namo tirina cjiri jiha. ¿Á yoa diro namono sehe jibocari ticoro pototi? —ni siniture tina.

²⁹ Jesu õ sehe ni yuhtire tinare:

—Cohamacu yare ti joari püre, to masia cühure ne masierara musa. Á yoa musa tuhota sehe ne potocá jierara. ³⁰ Yariarina cjiri ti masa mujari baharo tina anjoa yoaro sehe jira. Tina namo marieina, manu mariea numia jira tóprure. ³¹ Yariarina cjiri ti masa wijaahto sehere musare yahuihtja. ¿Cohamacu musare to niri cjirire ne buherari musa? Õ sehe niha tiro: ³² “Yuhú Abrahã, Isaa, Jacobo ti puhtoro tjija’, nina Cohamacu”, ni joaa tiha panopure. Ti yariari baharo “Ti puhtoro tjija”, ni yahuha Cohamacu. Á niparota yariarina cjiri puhtoro jierara Cohamacu. “Ti puhtoro tjija”, to nia mehne catiina ti jichu masija mari. Tiro catiina puhtoro jira —ni yahure Jesu tinare.

³³ To ã ni buhechu tuhoa payu masa tuho cuaa wahare.

Cãno noa yuhduro to dutiare yahuha Jesu

(Mr 12.28-34)

³⁴ Á yoa saduceo curua macaina Jesure ti yuhti masierachu tuhoa, fariseo curua macaina sehe tiro cahapu cahmachure. ³⁵ Cahmachu, tina mehne macariro marine judio masare buheriro sehe Jesu to ñano nichu tuho duaro mahño cū sinitu ñumare tirore.

³⁶ —¿Buheriro Cohamacu ya dutia noa yuhduaro di baro sehe jijari, mu tuhochu? —ni siniture tiro.

³⁷ Jesu tirore õ sehe ni yuhtire:

—“Tuaro musa yajeripohna mehne, musa tuaa mehne, noano musa wacua

mehne Cohamacure cahiga”, nina Cohamacu. ³⁸ Ahri dutiata paye dutia yuhdoro noa yuhduara. ³⁹ Ahri dutia baharo paye dutia noa yuhduara: “Mu basi mu cahino sehetu mu cahai jiina cühure cahiga”, nina Cohamacu. ⁴⁰ Ahri puaro dutiare yoana, jipihtia paye dutiare yoa pahñona nija mari. Cohamacu yare yahu muhtaina cjiri panopu ti joari cühure yoa pahñona nija mari —ni yahure Jesu.

¿Diro baro coyeyro jijari Cristo?

(Mr 12.35-37; Lc 20.41-44)

⁴¹ Á yoa fariseo curua macaina tói cahmachuina ti jichu ⁴² Jesu tinare õ sehe ni siniture:

—“Cristo, Mesia mari ni pisuriro Cohamacu to warocahiro jira”, nina musa. ¿Diro baro jijari Cristo ñuchuno cjiro panopu macariro, musa tuhochu? —nire tiro.

—Cristo Davi cjiro panamino jirohca —ni yuhtire tina.

⁴³ Jesu õ sehe ni yahure tinare:

—¿Cristo Davi cjiro panamino to jichu dohsearo Davi sehe puhtoro tiari Cristore? ¿Dohsearo ã puhtoro ti dutiri Espíritu Santo tirore? Õ sehe niha Davi cjiro:

⁴⁴ “Cohamacu yu puhtorore õ sehe nire: ‘Õi yu poto buhusehei dujiga.

Á jicu muhure ñu tuhtiinare muhure yuhdurucabasaihca yuhú’, nire Cohamacu yu puhtorore”, ni joaha Davi cjiro. ⁴⁵ Á ni joarota Davi cjiro puhtoro tiha Cristore. ¿Davi cjiro Cristo ñuchuno cjiro jiro dohsearo tiro puhtoro tiari Cristore? (Cristo Davi cjiro puhtoro tjira) —ni yahure Jesu.

⁴⁶ To ã ni yahuchu tina tirore ne yuhti masierare. Á jia tó purota sinitu duhuncare tina tirore. Tuhsu tirore cuia pari turi sinitu ñuerare tirore juna.

**Judio masare buheina, fariseo
curua macaina cūhū ti ñano
yoaare yahuha Jesu**

(Mr 12.38-40; Lc 11.37-54; 20.45-47)

23 Æ yoa payu masare sã cūhure Jesu õ sehe ni yahure tjoa:

²—Marine judio masare buheina fariseo curua macaina cūhū Cohamacu dutia Moise cjirore to cūri cjirire yahuina jira tina. ³Ti Æ yahuina jichū musare ti yahuriro seheta tīre yoa pahñoga musa. Æ yoapanahata tinare ñu cūena tjiga musa. Ti buheriro seheta yoerara tina. ⁴Masare payu dutira tina. Æ dutipahta ti dutiro sehe masa ti yoerachū ñua tinare yoadoherara. ⁵Masa ti ñurocaro dihta noano yoa ñomana tina. Cohamacu yare ti joari pūre ti duhu sãa caa pocacāre, bujū curea caa pocacāre ti wūhdūa poca bui dūhte yohre tina masare ñu dutia. Ti yachūri cūhure dūhte yohre. Æ yoa ti suhtipū ti duhu yoaa bocari bujūbia bocari jira. Cohamacure ti ño payorire masa sehere yoa ñoa nimana tina. ⁶Tuhsū, bose numūri jichū puhtoā ti dujiapū duji duara. Judio masa mari buhea wūhusepū cūhure noaa dujia pahtari dihtare jicoara tina. ⁷Æ yoa mahapū ño payoa mehne paina tinare ti noano piti bocasinichū cahmana tina. Tinare “Buheriro”, masa ti ni pisuchū cahmana.

⁸Paina musare pisua “Buheriro”, niea tjijaro. Musa jipihtina cūno potori jina nina. Æ yoa musare buheriro cūirota jija yūhū Cristo. ⁹Ahri yahpa macainare “Mari pūcu”, nina tinare ño payona nica. Ne Æ niena tjiga. Muano macariro dihta mari Pūcu jira. Tiro dihtare ño payoro cahmana marine. ¹⁰Æ yoa masunore “Pūhtoro”, niena tjiga. Musa pūhtoro yūhū Cristo sehe cūirota jija. ¹¹Cahamacuno yoaro sehe musare yoadoheriro tiro tjica musa pūhtoro jihtiro.

¹²Cūiro pūhtoro ji duaro tirore wiho jirore yoaro sehe jiro cahmana. “Wiho jirore jija yūhū”, ni tuhoturiro painare yūhdūruca duaerariro tiro sehe pūhtoro jirohca —ni yahure Jesu.

**Judio masare buheina, fariseo
curua macaina mehne ti
mahñopeare yahuha Jesu**

¹³To Æ niri baharo tinare õ sehe ni yahu namore:

—Musa judio masare buheina, fariseo curua macaina cūhū ñano yūhdūnahca. Mahñopeina jira musa. Soro musa buhechū tuhoa musare tuhorina sehe pūhtoro Cohamacu to sūho jiroppure wahasi. Musa cūhū tōppure wahasi. Æ buhena tōppure waha duainare dūcatana nina musa.

¹⁴[Musa judio masare buheina, fariseo curua macaina cūhū ñano yūhdūnahca. Mahñopeina jira musa. Wapewahya numia ya wūhūserē manocahna musa tí numiare. Tuhsū, yoari pja masa ti ñurocaroi Cohamacure sini ñomana musa masare. Musa Æ yoari buhiri paina bui curero Cohamacu pjīro buhiri dahrerohca musare.]

¹⁵Musa judio masare buheina, fariseo curua macaina cūhū ñano yūhdūnahca. Mahñopeina jira musa. Pjiri mapū pahā, yoaro macaa yahparipū wahara musa, musa dutiare yoahrtirore macana tana. Musa dutiare yoahrtirore boca, tirore buhera. Musa Æ yoachū tiro sehe musa yūhdoro pichacapū wahahtiro jirohca.

¹⁶Musa ñano yūhdūnahca. Capari ñūeraina ti ñū masieraro seheta masieraina jira musa. Æ jipanahta painare buhemana musa. Õ sehe ni buhemana musa: “Cohamacu wūhū mehne yū nino seheta yoaihtja’, niriro to niriro sehe to yoerapachūta noanohca”, ni buhemana musa. “Cohamacu ya wūhū macaa uru mehne yū nino seheta yoaihtja’,

niriro tiro sehere to niriro sehetā yoa sohtori tiro cahmana” ni, tí cūhūre buhemana mūsa. ¹⁷Capari űueraina ti űū masieraro sehetā masieraina jira mūsa. Tuho masieraina jira. ¿Di baro sehere űo payoro cahmajari? Urure űo payoeraro cahmana. Cohamacū sehe tí uru to wūhūi jichū noaa jichū yoara tíre. Ā jina to wūhū sehere űo payoro cahmana mū sare. Ā jia mūsa buhea sehe tó wahaerara. ¹⁸Ahri cūhūre buhemana mūsa: “Cohamacū wūhū macari mesa mehne yū nino sehetā yoaihtja’, niriro to niriro sehetā to yoerachū noanohca”, ni buhemana mūsa. “Tí mesa bui jia mehne Cohamacūre űo payoa tí wari mehne yū nino sehetā yoaihtja’, niriro tiro sehere to niriro sehetā yoa sohtori tiro cahmana”, ni buhemana mūsa. ¹⁹Capari űueraina ti űū masieraro sehetā masieraina jira mūsa. ¿Di sehe tí waro jijari, mūsa tuhotuchū? Cohamacūre masūno to űo payoro to wari cjiri tí waro jiera curera. Tí mesa bui Cohamacūre to wachū, noaa wahara tí mesa bui jia. Ā jiro tí mesa sehe wiho jiri mesa jierara. Cohamacūre űo payoa tí wari bui curero noari mesa jira. ²⁰Ā jiro “Cohamacū wūhū macari mesa mehne yū nino sehetā yoaihtja’”, cūiro nino, tí mesa bui macaa to wari mehne tiro ā nino nica. Ā jia mūsa buhea sehe tó wahaerara. ²¹“Cohamacū wūhū mehne yū nino sehetā yoaihtja’”, cūiro nino, potocāta Cohamacū mehneta ā ninota nica. Cohamacū tí wūhū macariro jira. ²²Ā jiro “Mūano mehne yū nino sehetā yoaihtja’”, cūiro nino, Cohamacū to jiropū mehneta ā nino nica. Ā jiro Cohamacū mehneta ā nino nica. Tiro sehe tó macariro jira. Ā jia mūsa buhea sehe tó wahaerara.

²³Mūsa judio masare buheina, fariseo curua macaina cūhū űāno yūhdūnahca. Mahűopeina jira mūsa. Moa yoaro sehe

jiare chūare coachū yoare cjuana mahānocā wamana mūsa. Cohamacūre űo payona tana sacerdoteara wamana mūsa. Mahānocā wamana mūsa. Menta, anis, comina wama tia coachū yoare wamana mūsa. Ā wapanahatja noare yoerara mūsa. Tuhsū, masare pja űuerara mūsa. Ā yoa Cohamacūre wacū tu-aerara mūsa. Toaa dichare mūsa narire mahānocā sacerdoteara mūsa wachū noa nina. Ā wana ű sehe yoa namoga: Noare yoaga. Ā yoa pja űuga masare. Tuhsū, Cohamacūre wacū tuaga. ²⁴Capari űueraina ti capari űueraro sehetā masieraina jira mūsa. ű sehe yoara mūsa: Mūsa ya dutiare yoa dutina, wiho jia waro dutiare yoara mūsa. Ā yoapanahata Cohamacū to pototi to dutia warore yoerara mūsa.

²⁵Mūsa judio masare buheina, fariseo curua macaina cūhū űāno yūhdūnahca mūsa. Mahűopeina jira mūsa. Mūsa waparire, mūsa sihnia wahwarire bui mūsa cosaro sehetā noare yoa űōmana mūsa buicā warohna. Ā yoapanahata Cohamacū yare quihōno yoerara mūsa. Paina yare maina, mūsa basi dihta bujuare na duaina jina, ā dihta tuhotura mūsa. ²⁶Capari űueraina ti űū masieraro sehetā masieraina jira mūsa fariseo curua macaina. űāare mūsa tuhotuare cohtotaga. Mūsa ā yoana masa ti űūrocaroi noaina jinahca mūsa.

²⁷Mūsa judio masare buheina, fariseo curua macaina cūhū űāno yūhdūnahca. Mahűopeina jira mūsa. Masa copa, yehsea mehne ti wisōri copa yoaro sehe jira mūsa. Masa tí copare ti űūchū noari copa bajura. To ā bajupachūta, puhicha macariro baarirore, to cohārine, űāare űuerara tina. ²⁸Tó sehetā mūsa cūhū masa ti űūrocaroi noaina sehe bajumana mūsa. Ā noaina sehe bajuina mūsa jipachūta mūsa tuhotuapū űāa, mahűoa ji yūhdūara yariaina yoaro sehetā —ni yahure Jesu.

**Judio masare buheina, fariseo
curua macaina cūhure to
buhiri dahrehtore yahuha Jesu**

²⁹ Ā ni tuhsu ō sehe ni namore tinare:

—Musa judio masare buheina, fariseo curua macaina cūhu ñano yuhdunahca. Mahñopeina jira musa. Cohamacu yare yahu muhtaina cjiri panopu macaina ti masa coparire noano cahnomana musa. Tuhsu, noano yoaina cjiri ti masa coparire noano cahnomana musa. ³⁰ Ā yoana ō sehe nirucumana musa: “Panopure sã ñuchusuma cjiri ti yoariro sehe sã sehe yoeraboa. Tí pjaru jiinare Cohamacu yare yahu muhtaina cjirire sã wajäeraboa”, nirucumana musa. ³¹ Ā nina musa ñuchusuma cjiri Cohamacu yare yahu muhtainare wajärina cjiri ti jiri cjirire bajuro wana nica. Tinare wajärina cjiri panamana ji turaina musa jia cūhure bajuro wana nica musa. ³² Musa ñuchusuma cjiri ti yoariro seheta yoa sohtori tiwahnoga.

³³ Agãa ñima tiina yoaro sehe ñabina jira musa. Musa ñaa tuhotumari cjirire cohtota duaerana Cohamacu musa ñaa buhirire pichacapu musare to cohähto pano duhti masierara musa. ³⁴ Ā jii musare niita nija. Cohamacu yare yahu muhtainare, paina noano masinare, paina musare buhehtinare musa cahai warocaihtja. Yu ã warocachu musa sehe cãina tinare wajänahca. Painare crusapu cã puhanahca. Painare musa buhea wuhusepu tjananahca. Ā yoana macaripepu tinare ñano yoa, muroca nunu tinahca musa. ³⁵ Musa ã yoana jipihitina ñaa marieinare musa wajäri buhiri buhiri tinahca. Noariro Abe cjirore Caĩ to wajäri buhiri jipihtina musa cūhu buhiri tinahca. Jipihtina to baharo jiiinare noainare ti wajäri buhiri cūhure buhiri tinahca musa cūhu. Ā yoa Cohamacu wuhu cahai wahiquinare ti wari mesa cahai Zacariare wajäre tina. Tiro

sehe Berequias macuno jire. Ā jina Zacaria cūhure ti wajäri buhiri buhiri tinahca musa cūhu. ³⁶ Potocã musare yahuita nija. Tina jipihtinare ti wajäri buhiri mipu macaina cūhu musa buhiri tinahca —ni yature Jesu.

Jerusalē macainare tuaro cahīha Jesu
(Lc 13.34-35)

³⁷ Ā ni tuhsu ō sehe ni namore:

—Cue, Jerusalē macaina, Cohamacu yare yahu muhtaina cjirire wajärina jira musa. Musa coyea panopu macaina cjiri cūhu äta yoarina cjiri jiha. Ā yoa musa cahai to warocaina cjirire tãa mehne doca wajärina jira musa. Caracoro to pohñare to cãa mua dũpũri mehne to moha coãno seheta payu tahari cahirucumahi musare. Musare cahmamahi. Musa sehe yuhure ne cahmaerare. ³⁸ Mipure musa ya maca cohãri maca cjiro jirohca. ³⁹ Potocã musare niita nija. Baharopu taihtja yuhu. Ā yu tachu ñuna musa yuhure “Cohamacu tuaa mehne tariro noano tajaro”, ninahca. Yuhure musa tĩre nihto pano yu tjuu tahto pano pari turi yuhure ñusi musa —nire Jesu tinare.

**“Cohamacu wuhu cohãri
wuhu jirohca”, niha Jesu**

(Mr 13.1-2; Lc 21.5-6)

24 Ā yoa Cohamacu wuhui jiroro Jesu to wijaa wihichu sã to buheina tí wuhure tí wuhu cahai jia wuhuse cūhure ñuna:

—Ahri wuhuse jira. Ñuga wuhu cūhu —nii sã tire.

² Jesu ō sehe ni yuhtire:

—Ahri wuhusere mipure ñumana musa. Musare yahuita nija. Ahri wuhusere jipihtia musa ñuri cjiri ahri wuhuse macaa tãa cūhu cohõ pihtia wahaahca. Ne cūria tãca tjuasi —nire tiro sãre.

Pihtiri dacho cjihtore yahuha Jesu

(Mr 13.3-23; Lc 21.7-24; 17.22-24)

³Baharo Olivo wama tidu tūcupu su, tópu dujire Jesu. Tóí to dujichu sā to buheina sā sahsero tiro cahapu su, ō sehe ni sinitu űuhi:

—Yahuga sāre. ¿Dohse jichu ā waharohcari mu niriro sehe waharo? ¿Pihtiri dacho panocāre to jichu cūhure, mu tjua tahto cūhure dohse to waha dachu űunahcari sā? —ni sinitu űui sā.

⁴Jesu ō sehe ni yuhtire:

—Noano yoaga masa. Musare paina ti mahñoare tuhoena tjiga. ⁵Payu masa “Cristo jija yuhu”, ni mahñoina taahca. Ti ā mahñoachu tuhoa payu masa Cohamacu yare duhuahca. ⁶Musa cahacāi masa paina ti cahma wajāchu tuhonahca masa. Tuhsu, yoropu cūhure ti cahma wajāchu tuhorocanahca masa. Ā tuhopanahta ne tíre pjíro tuhotuena tjiga. Ā waharohca. Ti ā yoachu pihtiri dacho cjihto dūhsasininohca mini. ⁷Tí pjare cū yahpa macaina pa yahpa macaina mehne cahma wajāahca. Ā yoa cūiro puhtoro yaina paio puhtoro yaina mehne cahma wajāahca. Tuhsu, payu masa juca mehne yariaahca. Ā yoa dohatia payu jiahca. Tuhsu, pjaró yahpa űuhminohca. ⁸To ā wahachu ahri yahpa macainare ti űano yūhdu namohto dūhsasinina mini. űano yūhdusiniahca.

⁹Tí pjare paina musare űaha, űano yoa dutia waachu musare paina puhtopure. Ti ā wachu musare wajāahca. Yu yaina masa jiri buhiri jipihtina musare űu tuhtiahca. ¹⁰Tí pjare payu yu yaina jimarina cjiri yūhure cohāahca. Ā jia tina mehne macainare tina űu tuhtiahca. Ā yoa tina mehne macaina ti jipachuta tinare űano yoahinare waahca tina. ¹¹Tí pjare payu “Cohamacu yare yahu muhtaina jija”, ni mahñoina ji-

ahca. Ā jia payu masa ti mahñoare tuhoahca. ¹²Tí pjare űabiaro yoahca masa. Ā yoa tina mehne macainare cahī namosi. ¹³Ā jina masa tuaina jina, ahri yahpai masa catisinino puro cūno pjarucuna, yūhdunahca masa. ¹⁴Tuhsu, ahri noaa buhea jipihtiropu ahri yahpapure ti yahua buhea jiahca. Puhtoro Cohamacu to suho jiare yahuri buheare ti yahu siteri jiahca, jipihtina tí buheare ti masihto sehe. Ti ā yahuri baharo pihtiri dacho ducarohca.

¹⁵Cohamacu yare yahu muhtariro Daniel cjiro panopu macariro űabiarore Cohamacu yare űano yoarore yahua tiha panopure. Tí pjare tiro űariro sehe Cohamacu wūhpu to ducuchū űunahca masa. Ahri yu nirire noano masiga masa. ¹⁶Tóí to ducuchū űua, Judea yahpapu jiina sehe tūyucu cahapu muroca duhtijaro. ¹⁷Soaro mehne muroca duhtijaro. Tí pjare ti wūhuseri bui macaa waparipu jiina wūhū puhichapu jiare ti yare na wahaea tjijaro ti waha bahrañohto sehe. ¹⁸Tuhsu, tí pjare paina ti weseripu jiina ti bui macaa suhti wūhupu jia suhtire na wahaea tjijaro ti waha bahrañohto sehe. ¹⁹Tí pjare nijipocosanumia, ti pohnare pūa numia cūhū pjacuro wahaahca. ²⁰Ā jina Cohamacure ō sehe ni siniga: “Puhiro jichu judio masa sā soa numari jichu cūhure sā muroca duhtihiti dacho jiero tjijaro”, ni siniga masa Cohamacure. ²¹Tí dachorire masa nu űano wahaahca. Ahri yahpare to bajuamehneri baharo masa űano ti yūhduu jisinia tiha. Ti ā jipachuta jipihtia tí puria yūhdoro pihtiri dacho panocā űabiaro yūhduahca masa. Ā űano ti yūhduri baharo pari turi tó sehe űabiaro yūhdusi ahri yahpai juua. ²²Cohamacu tí dachorire mahaa dachoricā jisnichu yorohca. To ā yoerachu ne cūiro masuno yūhdueraboca. Ā jiro to beserina ti yūhdūhti

cjihtire mahaa dachoricã ã cūsininohca Cohamacu.

²³Tí pjare paina musare “Ñuga. Õi jira Cristo”, ti nichu tinare tuhoena tjiga. “Tói jira Cristo”, ti nichu tinare tuhoena tjiga. ²⁴“Cristo jija”, ni mahñoina, “Cohamacu yare yahu muhtaina jija”, ni mahñoina jiahca tí pjare. Æ jia Cohamacu to beserinare mahñoa, tina bajuamehneare yoa ñoahca. Ti ã yoa ñochu ñna, Cohamacu yaina cãina tinare tuhoa “Potocã tjira” nia, Cohamacu yare pa tehe nia duhuboca. ²⁵Ahri jipihtiare musare yahuyuja musare to ã wahahto pano. Æ jina tuhoga musa. ²⁶Paina masa musare “Ñuga. Masa marienopu jira Cristo”, ti nichu tópure ñna wahaena tjiga. Æ yoa tina “Õi ahri tahti pocai jira tiro”, ti nichu tinare tuhoena tjiga. ²⁷Yuhu masuno Cohamacu warocariro wacūenoca tjua taihtja. Oroca sitero muanore sū mūja taropu, sū sãnopu wacūenoca to oroca siterocaró seheta wacūenoca tjua taihtja yuhu. ²⁸Yucaare mari ñna, yariario to pjacu cjiro jichu mari noano masinahca. (Tó seheta ahri musare yu yahuyurire musa ñna noano masinahca ahri yahpapu yu tjua tahto mahanocã to duhsachu cūhure) —ni yahure Jesu.

Cristo ahri yahpapu to tjua tahtore yahuha tiro

(Mr 13.24-37; Lc 21.25-33;
17.26-30, 34-36)

²⁹ Æ yahu tuhsuro tinare õ sehe ni yahu namore:

—Tí dachori masa ti ñano yuhdua dachori baharo sū dacho macariro, ñami macariro cūhu buhria duhua wahaahca. Ti ã wahachu ñahpichoha poca muanopu jia poca bora wahaahca. Tuhsu, muano macaa yahpari tuaro ñuhmiahca. ³⁰Tí pjata yuhu masuno Cohamacu warocariro muanopu yu bajuamehnenore yu ñochu ñnahca masa.

Æ ñna jipihtia curuari macaina tiaahca. Tuhsu, yu tuua mehne, yu si sitea mehne muano macaa me bui ahri yahpapure yu tjua tachu ñnahca tina. ³¹Corneta bisiro coa tarohca. To ã coa tachu yu yaina anjoare jipihtiropu ahri yahpapu warocaihtja. Tuhsu, jipihtiropu yu yaina yu beserinare tina naahca.

³²Mipure higueraçure tuhutuga musa. Tu quiti mehne musare piti dahre buheihhtja. Tu yucucu pūri tichu ñna, cūhma mahanocã to duhsachu masina musa. ³³Tó seheta ahri jipihtia yu niri cjirire ti ã wahachu ñna, yu tjua tahto mahanocã to duhsachu masinahca musa. ³⁴Potocã niita nija musare. Tí pja macaina ti yariahto pano jipihtia yu niriro seheta ã waharohca. Muano, ahri yahpa cūhu pihtia wahaahca. ³⁵Muano cūhu ahri yahpa cūhu pihtia wahaahca. Yu durucua sehe ne cohtotasi. Jipihtia yu niriro seheta ã waha sohorti tiarohca.

³⁶Tí dachore yu tjua tahti dachore, tí ora cūhure masieraja yuhu. Anjoa cūhu tíre masierara. Masa cūhu masierara. Yu Pacu dihta tíre masina.

³⁷Noé to jiri pja macaina ti jiri seheta ahri yahpapu yu tjua tahto panocãre tó seheta jiahca masa. ³⁸Yahpa to minihto pano masa chu, sihni, yoaha. Tuhsu, mua, numiare namo tiha. Noé cūhu ti dohoriapu ti samuhto pano ã yoaa timaha masa. ³⁹Dóihta tuaro coro ta, wacūenoca yahpa minia wahaha. Masa cūhu mini pihtia wahaha. Wacūenoca to miniro seheta yuhu masuno Cohamacu warocariro ahri yahpapure wacūenoca tjua taihtja. ⁴⁰Tí pjare wesepu puaro dahraina ti jichu cūiro yuhure cahmarirore naaihca. Æ yoa yuhure cahmaerario tói tjuarohca. ⁴¹Tí pjare puaro numia cūnoi ti yore arëa numia jichu cūcoro yuhure cahmaricorore naaihca. Æ yoa yuhure cahmaeraricoro tóihta tjuarohca.

⁴²Noano wacū masi cohtaga. Yūhū mūsa pūhtoro, yū tjuā tahti dachore ne masierara mūsa. ⁴³Ahrīre wacūga mūsa. Yacarīro to wūhūpū to sāa yacahto panore wūhū pūro masino, tí nāmine tiro carīeraboa, yacarīrore cohtarō taro. Ā yoa yacarīrore to wūhūpū sāa dutieraboa. Yūhū yacarīro to wacūenoca to tariro sehta wacūenoca taihtja. ⁴⁴Ā jina yū yare ā yoarucuna yūhūre cohtaga. Yūhū masūno Cohamacū warocarīro ahri yahpāpū tjuā tai wacūenoca taihtja —nīre Jesu.

**Dahra cohtarīro to
pūhtorore ño payorīrore, ño
payoerārīro cūhūre yahuha**

(Lc 12.41-48)

⁴⁵Ā yoa Jesu to tūhotua mehne ō sehe ni piti dahre buhe namore tjoa:

—Dahra cohtarīro to pūhtorore ño payorīro tūho masirīro jira. To ā jichū ñūno paina dahra cohtaina bui cūna tirore to pūhtoro sehe waharo taro. Ā tirore cū tuhsū wahaa wahara pūhtoro. To ā wahachū ñūno, chūri pja jichū dahra cohtarīro painare chūare witira. ⁴⁶Baharo pūhtoro to ya wūhūi tju wihira. To tju wihichū ñūno dahra cohtarīro sehe to pūhtoro to dutirīro sehta yoa pahñorīro jiro, wahcherīro jirohca. ⁴⁷Potocā mūsare niita nija. To ā noano dahrachū ñūno to pūhtoro jipih-tia to yare ñū wihbohtiro cūnohca tirore. ⁴⁸⁻⁴⁹Wiho mejeta ñarīro dahra cohtarīro sehe “Yū pūhtoro so bajuerara” nino, paina dahra cohtainare cjāpe, pjīro chū, sihni, cahaina mehne caharohca. ⁵⁰Baharo to pūhtoro wacūenoca tjuā tarohca. Tí dachore ne masierara dahra cohtarīro. ⁵¹Pūhtoro sehe tjuā taro ñarīro to yoirire tūhoro, tirore tuaro buhiri dahrerohca. Ā buhiri dahrero, masa ti baharo buhusehei ñano yoa cohtaina ti waharopū cohānohca tirore. Tópūre tiro

tuaro tii, cahyaro mehne bahca dihorohca —ni yahure Jesu.

**Diez nuhmia quiti
mehne buheha Jesu**

25 Ā yoa Jesu pari turi to tūhotua mehne ō sehe ni piti dahre buhe namore tjoa:

—Mūano macarīro masa bui pūhtoro to sūho jia ahri quiti yoaro sehe jira: Diez nuhmia jiha. Cū ñami tina ti sihāa poca mehne wamomaca dūhtehtirore piti bocaa wahaha. ²Tina mehne macaa numia cinco numia tūho masiera numia jiha. Paye numia sehe cinco numia tūho masia numia jiha. ³Tūho masiera numia sehe ti sihāa pocare, posa tia pocare naamaha. Paye pocare se posa tia pocare ti pihtichū ti pioborire naaeraha. ⁴Tūho masia numia sehe ti sihāa poca se posa tia pocare naaha. Paye se poca cūhūre naaha. ⁵Ā jia wamomaca dūhtehtiro to bajuerachū tí numiare wūjo purīchū carīa wahaha. ⁶Ā ti carīni baharo ñami dacho macai sañurucuro coa taha: “Tūhoga. Wamomaca dūhtehtiro taro coa tara. Tirore piti bocana taga”, ni sañurucuro coa taha. ⁷To ā nino coa tachū tūhoa tí numia wahcā, ti sihāa pocare cahnoha. ⁸Ā yoa tūho masiera numia sehe paye numia tūho masia numiare ō sehe niha: “Sā sihāa poca yatia nina. Ā jina mahanocā mūsa ya sere waga sāre”, ni sinimaha tí numia. ⁹Ti ā sinipachūta tūho masia numia ō sehe ni yūhtiha: “Sā ya se mari jipihtinare mū sūeraboca. Ā jina se cjuainare mūsa basi nuchūna wahaga”, ni yūhtiha tūho masia numia sehe. ¹⁰Ti ā nichū tūhoa, tūho masiera numia sere nuchūa wahaha. Ti ā wahari baharo wamomaca dūhtehtiro wihīha. Ā to wihichū ñūa ti yare cahno tuhsūri numia tūho masia numia tirore piti bocaha. Piti boca, to wamomaca dūhteri bose nūmūpū tiro mehne ñūa wahaha.

Tuhsu, bose numare ti yoari wuhupu paina mehne tí numia ti sãari baharo, sopacare bihanocaha. ¹¹Baharopu tuho masiera numia sehe wihimaha. “Puh-toro, sãre pjõohga”, nimaha tí numia. ¹²“Potocã musare niita nija. Musare masieraja yuhu”, niha tiro tí numiare.

¹³“Á jina tuho masia numia ti yare ti noano cahno tuhsu ti cohtariro seheta yu tahtore noano cohtaga musa cõhu. Yu tjua tahti dachore tí hora cãhure ne masierara musa —ni yahure Jesu.

Niñeru turi uru turi quitire yahuha Jesu

¹⁴“Á ni yahu tuhsu to tuhotua mehne õ sehe ni piti dahre buhe namore tjoa:

—Tí pja yu tjua tahti pja ahri quiti yoaro sehe jirohca. Wahu puro jiha. Tiro pa sehupu tinino waharo taro, tirore dahra cohtainare pjirocaha. Á yoaro tinare to yare cohta dutiha.

¹⁵“Á cohta dutiro ti wihbo masino puro tinare niñeru turire waha. Cãirore cinco turi wapa bujua turi uru turire waha. Pairore puu tu waha. Pairore cõ tu waha. Tinare wa tuhsu, wahaa waha. ¹⁶“Á yoa cinco turi to wariro dõihita to wahari baharota tí turi mehne paye barore nuchuha. To nuchurire painare duaha. To duari wapa diez turi waro wapataha tiro. Á jiro diez turi cjuaha. ¹⁷“Á yoa puu tu to wariro dõihita to wahari baharota tí turi mehne paye barore nuchuha. To nuchurire painare duaha. To duari wapa pititia turi waro wapataha tiro. Á jiro pititia turi cjuaha. ¹⁸Cõ ture to wariro sehe copa saha, tí ture yaha, tí copapu nuono.

¹⁹“Yoari pja baharo ti puh-toro wihhi. Á wihiro to niñeru turi mehne ti ñaha namorire quihõno taro tirore dahra cohtainare pjirocaha. ²⁰“Á to pirocachu cinco turi to wariro cjiro to puh-toro cahapu su, diez turi wiaha tirore. “Cinco

turi yuhure ware muhu. Ñujuta. Tí turi mehne paye cinco turire ñaha namohi”, niha tirore. ²¹“Noano yoari jire muhu. Muhu noariro, yu dutiriro seheta yoariro jira. Mahanocã mehne noano yoare muhu. Á jicu mipure mähure jiro mu dahrahtore cõihtja. Á jicu yuhu mehne wahchega muhu”, niha to puh-toro. ²²“Á yoa puu ture nariro cjiro to puh-toro cahapu su, yahuha tirore: “Puu tu yuhure ware muhu. Ñujuta. Tí turi mehne paye turi puu tu ñaha namohi”, niha tiro. ²³“Noano yoari jire muhu. Muhu noariro, yu dutiriro sehe yoariro jira. Mahanocãre noano yoare muhu. Á jicu mipure pjiro mu dahrahtore cõihtja. Á jicu yuhu mehne wahchega muhu”, niha to puh-toro. ²⁴“Á yoa cõ ture nariro cjiro to puh-toro cahapu su, yahuha tirore: “Puh-toro, muhu paina sehere tuaro dahra dutiriro jira. Á tuaro dahra dutiriro jicu toaa maerariro jipaihta tí dichare muhu nana. ²⁵Mu ã jiriro jichu mähure cuihi. Á cuicu copa saha, tí copapu mu niñeru ture nuohi. Ñujuta. Õi jira mu niñeru tu”, niha tiro. ²⁶To puh-toro to ã nichu tuhoro tirore õ sehe niha: “Muhu ñariro, capa bujuriro jira. Yu toaa maerariro jipaihta tí dichare yu nariro jichu masina muhu. ²⁷Yu ã jiriro jichu ñucu ya ture niñeru wihbõri wuhupu wihboboa muhu. Mu ã wihbochu tina tí ture wiaapu paye niñeru wa namoboa tina”, niha puh-toro tirore. ²⁸“Á nino paina tirore dahra cohtainare dutiha tiro: “Niñeru ture maga tirore. Diez turire cjuariro sehere waga. ²⁹Cjuainare wa namoihtja. Á jia pjiro cjuaaahca. Cjuaraina sehere mahanocã ti cjuapachuta tíre maihtja. ³⁰Ahriro dahra cohtariro yaba cjihti jierara. Nahitianopu ñanopu cohãnocahga tirore. Tõpu tiro tuaro tii, cahyaro mehne bahca dihorohca”, niha puh-toro —ni yahure Jesu.

Buhiri dahrehtore yahuha Jesu

³¹ Ā yoa Jesu ō sehe ni yahu namore:

—Yuhū masuno Cohamacu warocariro jipihtina anjoa mehne puhtoro jicu tacu, yu puhtoro dujiropu yu si sitea mehne dujihca. ³² Ā yu dujichu, ahri yahpa macaina jipihtina yu cahai cahmachuahca. Ti ā cahmachuri baharo pua curua tinare tju waihtja. Ovejare nu wihboriro to ovejare, to cabra cūhure to tju wariro sehetā masare tju wa dapohtja. ³³ Ā tju wacu oveja yoaro sehe jiina noainare yu poto buhusehei bese dapohtja. Ā yoa cabra yoaro sehe jinare nainare yu cō buhusehei bese dapohtja. ³⁴ Yu ā yoari baharo yuhū jipihtina bui puhtoro sehe yu poto buhusehei yu bese dapoinare ō sehe ni yahuihtja: “Yu Pucu musare noano yoare. Ahri yahpare bajuamehnenopu musa ya cjihtire puhtoro to suho jirore cahno basayu tuhsure Cohamacu. Ā jina mipure to cahnoripore jina taga. ³⁵ Yu juca baachu musa sehe yuhure chuare ware. Yu nahma yapiochu yuhure musa sihore. Musa cahai yu tinichu yuhure nu masierapanahta yuhure noano piti bocare musa. ³⁶ Suhti maerariro yu jichu nuna musa sehe yuhure suhti saare. Dohatiriro yu jichu musa yuhure nuna tare. Peresui yu jichu cūhure yuhure nuna tare musa”, nihtja noainare. ³⁷ Yu ā nichu tuhoa tina yuhure sinituahca: “¿Puhtoro dohse jichu mu juca baachu mūhure chuare wari sã? ¿Dohse jichu mu nahma yapiochu mūhure sihōri sã? ³⁸ ¿Dohse jichu mūhure nu masierapanahta mūhure noano piti bocari sã? ¿Dohse jichu suhti maerariro mu jichu mūhure suhti sãari sã? ³⁹ ¿Dohse jichu mu dohatichu o peresui mu jichu cūhure mūhure nuna sari sã?” niahca yuhure. ⁴⁰ Ti ā ni sinituchu tuhocu yuhū puhtoro

tinare yahuihtja. “Potocā musare niita nija. Ahrina yu yaina mehne macariro wiho jiriro to jipachuta, tirore musa tō sehetā yoare. Ā jirirore ā yoana, yuhure yoaro sehetā yoana nire musa tinare”, ni yahuihtja.

⁴¹ Noainare yu ā ni yahuri baharo yu cō buhusehei ducuinare yuhū jipihtina bui puhtoro ō sehe ni yahuihtja: “Cohamacu to buhiri dahrehtina jira musa. Yuhū mehne tjuarena tjiga. Pichacapu wahaga musa. Tí pichaca ne yatierara. Watino, to yaina anjoa cūhu ti jihtore tí pichacare yoare Cohamacu. ⁴² Yu juca baachu musa sehe yuhure chuare waerare. Yu nahma yapiochu musa yuhure sihōerare. ⁴³ Yuhure masierana musa yuhure piti bocaerare. Ā nuncaboare. Suhti maerariro yu jipachuta, yuhure suhti sāerare musa. Dohatiriro yu jichu peresui yu jichu cūhure ā nuncare musa yuhure”, ni yahuihtja tinare nainare. ⁴⁴ Yu ā nichu tuhoa tina yuhure sinituahca: “¿Puhtoro, mu juca baachu, mu nahma yapiochu, sã masierariro mu jichu, suhti maerariro mu jichu, dohatiriro mu jichu, peresupū mu jichu dohse jichu sã sehe mūhure yoadoherari?” ni sinituahca yuhure. ⁴⁵ Ti ā ni sinituchū yuhū tinare ō sehe ni yahuihtja: “Potocā musare niita nija. Ahrina yu yaina mehne macariro wiho jirirore musa ne yoadoherare. Ā jirirore musa yoadoherana, yuhureta ā yoana nire musa”, ni yahuihtja tinare. ⁴⁶ Ā jiro tinare ā buhiri dahrerucurohca Cohamacu. Tí buhiri dahrea ne pihtisi. Ā yoa, noaina sehe jipihtia dachoripe noano jirucuahca —ni yahure Jesu.

Sacerdotea puhtoa, judio masa bucuina mehne Jesure wajā duaha

(Mr 14.1-2; Lc 22.1-2; Jn 11.45-53)

26 Tí jipihtiare to buheri baharo Jesu sãre to buheinare ō sehe ni yahure:

²—Pua dacho baharo pascua jirohca. Tíre msa masina. Tí pjare yhu masunore Cohamacu warocaritore ñahaahca. Ñaha tuhsu, yuhure crusapu wajahca —nire tiro sare.

³Á yoa sacerdotea puhto, judio masa bucna cñu cahmachuha. Caifa sacerdotea bui puhtoro ya wñu cahmachuha tina. ⁴Tói cahmachu, ti mahñoa mehne Jesure ñaha ti wajãhtore cahma sñudua niha:

⁵—Bose numu jichu tiore ñahaena tjijihna, “Masa suari”, nina —niha tina ti basi.

**Numino me sitia se
mehne Jesure pio payoha**

(Mr 14.3-9; Jn 12.1-8)

⁶Tí pjare Simo cami bucu baariro cjiro ya wñu jire Jesu. To jiri maca Betania wama tiri maca jire. ⁷Tí wñu to churo watoi cãcoro numino me sitia na ta, Jesu dapu bui pio payore. Tí me sitia alabastro wama tiriai posa tire. Wapa bujua co jire. ⁸To ã pio payochu ñna sã Jesu buheina suahi.

—¿Dohsearo ahricoro ahri me sitia co wapa bujuare ã yoa sitejari? ⁹Tí me sitiare duaboa. Á duaro pjro wapa nabo. Á nano tí niñerure pjacoinare waboa ahricoro —nii sã to buheina.

¹⁰Sã ã ni suachu ñno, Jesu õ sehe ni yahure sare:

—Á niena tjiga ticorore. Yuhure noano yoaro nina. ¹¹Pjacoina sehe msa mehne ã jirucuahca. Á jina tina sehere msa wa masina. Yuhu sehe ahri yahpare msa mehne ã jirucusi. ¹²Yuhure ti yahto pano yu pjacure cahnoyuro, ticoro yuhure pio payore. ¹³Potocã musare niita nija. Jipihtiro ahri yahpau noaa buheare ti yahuropu ahricoro mipure to yoarire yahuahca. Ti ã yahuchu tñhoahca ticorore masa payu wacũahca —ni yahure Jesu sare.

**Juda Iscariote Jesure ñu tuhtiinare to
ñohtore yahuha sacerdotea puhtoare**

(Mr 14.10-11; Lc 22.3-6)

¹⁴Tí pjare cãiro sã mehne macariro Juda Iscariote sacerdotea puhtoahcapu suha. ¹⁵Su, tinare õ sehe ni sinituha:

—¿Jesure musare yu ñochu noho puro wapanahcari msa? —ni sinituha tinare.

To ã nichu tina tiore treinta tãri plata tãrire waha. ¹⁶Ti ã wari baharo Juda sehe Jesure to ñohti ñamine cohtasiniha.

**Jesu to buheina mehne to
chu batoari numu jiha**

(Mr 14.12-25; Lc 22.7-23; Jn 13.21-30; 1Co 11.23-26)

¹⁷Bucuaerari pãore ti chua numuri ducari numu sã to buheina sehe õ sehe ni sinitu ñuhi Jesure:

—¿Mari pascua maca chũtore noho baroi cahnoyu dutirocaijari mñu sare? —ni sinitu ñuhi tiore.

¹⁸Sã ã nichu tiro õ sehe ni yahure sare:

—Jerusalẽpu wahaga. Tói jirirore õ sehe ni yahuga: “Marine buheriro to ñano yuhũhti pja mahanocã dũsatjiãyuhti. Pascua jichu mu ya wñu Jesu sare to buheinare suho chuhto jiyuhti”, ni yahuga tí wñu purore —ni warocare Jesu sare.

¹⁹To ã ni warocachu sare to dutiriro sehetã yoana, pascua jichu sã chuhtore cahnoyui sã.

²⁰Á yoa tí ñamine sã mehne doce to buheina mehne churo nire Jesu. ²¹Sã churo watoi tiro sare õ sehe ni yahure:

—Potocã musare niita nija. Cãiro msa mehne macariro yuhure ñu tuhtiinare ñonohca yuhure —ni yahure tiro sare.

²²To ã nichu tñhona tuaro cahyana, tiore sinitu ñu ducã sã cãina jipihtina:

—¿Puhtoro, yuhuta jijari mñure ñohtiro? —ni sinitui.

²³ Sã ã ni sinituchũ tiro õ sehe ni yũhtire:

—Yũ chũri wapai yũhũ mehne soha chũrirota jira yũhũre ñũ tuhtiinare ñohtiro. ²⁴ Panopũ yũhũre ti joariro se-heta yũhũ masũno Cohamacũ waro-cariro yariaihca. Æ jiro yũhũre ñũ tuhti-inare ñoriro ñano yũhdũrohca. Tiro sehe to masa bajuerachũ noa yũhũduaboa. Ñano yũhdũeraboa —nire Jesu.

²⁵ To ã nichũta tireore ñohtiro Juda õ sehe ni siniture:

—Buheriro, ¿mũhũre ñohtiro tjjjari yũhũ? —ni siniture tiro.

Jesu õ sehe ni yũhtire:

—Ûjũ. Mũhũta jira —nire.

²⁶ Æ ni yahu tuhsũ sã to buheina mehne chũro taro nire. Æ yoa Jesu pãore na, Cohamacũre “Noana”, nire. Æ ni tuhsũ tĩre nuha, sãre to buheinare witire.

—Ahrire na, chũga. Ahri yũ pjacũ jira —nire tiro.

²⁷ Æ ni tuhsũ tiro sihniri wahware na, Cohamacũre “Noana” ni, sãre ware.

—Mũsa jipihtina ahrire sihniga.

²⁸ Ahri yũ di jira. Payũ masa ti ñaa yoari buhirire cohãcũ tacũ yariaihca. Æ yariacũ yũ dire cohãihca. Cohamacũ “Mũsare yũhdoihtja”, to ni cũriro mũ suchũ yũ ã yũ yariaro mehne to niriro sohtori tihca. ²⁹ Mũsare niita nija. Yũ Pũcũ pũhtoro to suho jiropũ mũanopũ mũsa mehne wahma co vinore sihniihtja. Mari ã sihnihto pano ahri co vinore sihni namosi yũhũ —nire Jesu sãre.

³⁰ Æ jina Cohamacũre ño payo basana cũnore basa tuhsũna tũcũ Olivo wama tidũpũ sũi sã.

**Pedro Jesure to
cohãhtore yahuha Jesu**

(*Mr 14.26-31; Lc 22.31-34; Jn 13.36-38*)

³¹ Tõpũ sã suchũ Jesu sehe sãre õ sehe ni yahure:

—Micha ñami yũhũre cohã wahcã-nahca mũsa. Õ sehetã nina Cohamacũ to yare ti joari pũi yũhũre yahuro: “Ovejare ñũ wihboriro yoaro sehe jirirore yũhũ Cohamacũ cohãihtja. Yũ ã cohãchũ to yaina oveja yoaro sehe jiina duhti site wahcãa wahaahca”, nina Cohamacũ to yare ti joari pũi. ³² Æ yoa Cohamacũ yũhũre to masori baharo mũsa pano Galileapũ wahayuihca yũhũ —nire tiro.

³³ To ã nichũ tuhoro õ sehe nimare Pedro:

—Yũhũ mehne macaina jipihtina mũhũre ti cohã wahcãpachuta yũhũ sehe mũhũre ne cohãsi —nimare Pedro tireore.

³⁴ Jesu õ sehe ni yũhtire:

—Potocã niita nija mũhũre. Micha ñami caraca to duhto pano “Yũhũ Jesure masieraja”, niihca mũhũ. Tia taha ã ni-ihca mũhũ —nire tiro Pedrorre.

³⁵ To ã nipachuta Pedro õ sehe ni yũhtire:

—Mũhũ mehne yũhũre ti wajã dua-pachuta “Jesure masieraja”, ne nisi yũhũ —ni yũhtimare Pedro.

Æ jina sã cũhũ paina to buheina Pedro to niriro sehetã nimai sã Jesure.

**Getsemanĩ wama tiropũ
Cohamacũre siniha Jesu**

(*Mr 14.32-42; Lc 22.39-46*)

³⁶ Æ yoa Getsemanĩ wama tiropũ Jesu sã to buheina mehne waha, tõpũ sũ, sãre õ sehe nire:

—Õi dujiyusiniga. Mũsa õi dujiro wato sohõ cureropũ Cohamacũre siniha wahai nija —nire tiro sãre.

³⁷ Æ ni tuhsũ, Pedrorre, pũaro Zebedeo pohnare tina tiarore pji wahcãre. Pji wahcã tuhsũ, tiro tuaro cahya, ñano yajeripohna tiha. ³⁸ Æ cahyaro tó mehne macainare to pji wahcãrinare õ sehe niha:

—Tuaro ñano yajeripohna tija yũhũ. Yũhũre tuaro purĩno sehetã tuhõtui nija

michapucacā yu yariaboro seheta. Sohō curero wahasinii nija. Ōi tjuasiniga. Ā yoa yu cūno potori catiga mūsa cūhu — niha tiro tinare.

³⁹ Ā ni tuhsu mahanocā waha namo, yahpai na tuhcuca caha su, Cohamacure ō sehe niha:

—Mai, yu űano yuhduhtire yoa duaeracu yoai tjia. Yu ā nipachuta yu cahmano sehe yoai tjia. Muhu sehe masina. Mu cahmano seheta yoaga yuhure —ni siniha tiro Cohamacure.

⁴⁰ Ā ni tuhsu, tiaro to buheina cahapu wihimahno, carīinare boca wihaha tiro. Ā boca wihiro Pedrore ō sehe niha:

—ĶCū hora waro yu cūno potori cati masierari muhu? ⁴¹ Noano yoaga mūsa. Mūsa mu sūro quihōno yoa duamana mūsa. Wiho mejeta mūsa basi tīre bihoerara. Ā jina Cohamacure siniga űano mūsa yoerahto sehe —ni yahuha Jesu.

⁴² Ā ni yahu tuhsu, pari turi waha, Cohamacure ō sehe ni siniha:

—Mai, yu űano yuhduhtire yoa duacu yoaga yuhure. Mu cahmano seheta yoaga —ni siniha tiro.

⁴³ Ā ni tuhsu, to buheina tiaro buheina cahapu pari turi wihaha tjia. Ā wihiro carīinaretā boca wihaha tjia. Wujo caha yuhduaha tina. ⁴⁴ Ā jiro tinare cūnoca, pari turi waha, Cohamacure siniha. Tó pano to niriro seheta niha tjia. ⁴⁵ Ā ni tuhsu to buheina cahapu wihi, tinare ō sehe niha:

—ĶCarī, sosinina nijari mūsa? Tó purota carīga mūsa —niha tiro.

Ā ni tuhsu, ō sehe ni namoha Jesu:

—Tuhosiniga. Michapucacā yuhu masunore Cohamacu warocarirore űainare waahca yuhure. ⁴⁶ Wahcāga. Basa wahana. űuga. Yuhure űu tuhtiinare űohtiro ōi tara —niha tiro.

Jesure űu tuhtiina tirore peresu yoaha

(Mr 14.43-50; Lc 22.47-53; Jn 18.2-11)

⁴⁷ To ā nino watōi sā mehne macariro cjiro Juda sehe wihire. Tiro mehne masa payu wihire. Tina sacerdotēa puhtoā, judio masa bucūna cūhu ti warocarina jire. űosaa pĵinine, yucu siri cūhure cĵuare. ⁴⁸ Wahmanore Jesure űu tuhtiinare űohtiro masare ō sehe ni yahu quihō tuhsuaha:

—Yu wahsupu wihmirota jirohca mūsa űahahtiro. Tirore yu wihmire baharo űahaga tirore —niha Juda tinare.

⁴⁹ To ā ni tuhsu baharo wihiro, Jesu cahapu dōi waha baharōre.

—Buheriro, Ķjimajari muhu? —ni tirore wahsupu wihmire.

⁵⁰ To ā wihmichu Jesu ō sehe nire:

—Coyeiro, Ķmichapucacā mu yoa duarire yoaga? —nire tiro.

To ā ni tuhsuchu tina Jesure űahare.

⁵¹ Ti ā yoachū űuno Jesu mehne macariro to űosari pĵine tuāwe na, sacerdotēa bui puhtoro cahamacunore to cahmonore dute pahrēnocare. ⁵² To ā yoachū űuno Jesu tirore ō sehe ni yahure:

—Mu űosari pĵine wihboga. Painare mu űosachū ti űosa cahmachū yari-aihca muhu. ⁵³ Yu Pucure yuhure yu yoadoho dutichū tiro sehe payu anjoare doce curuarire yu cahai warocaboa tiro. ĶTīre masierajari muhu? ⁵⁴ Ā yoadohoboriro to jipachuta tirore yuhure yoadoho dutisi yuhu. Yu ā dutierachū Cohamacu yare ti joari pū to niriro seheta ā waharohca —nire tiro.

⁵⁵ Ā ni tuhsu masare ō sehe ni yahure tiro:

—ĶDohse jiro baro mūsa űosaa pĵini mehne, yucu tiri mehne yacarirore ti yoariro seheta mūsa yuhure űahana tajari? Dachoripe Cohamacu wuhupū musare yu buhe dujichū, mūsa yuhure

ne ñahaerare. ⁵⁶ ã jipachuta ahri jipihtia ã waharo cahmana Cohamacu yare yahu muhtaina cjiri ti ni joariro seheta —nire Jesu.

Tirote ti ã ñahachu ñuna sã to buheina tirote cohã muroca wahcãa wahai sã.

Judio masa puhtoa Jesure sinituha

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ ã yoa tirote ñaharina cjiri sacerdotea bui puhtoro Caifa wama tiroto ya wuhupu na suha tirote. Tí wuhuihta marine judio masare buheina, bucuna cūhu cahmachuha. ⁵⁸ Tópu Jesure ti naachu Pedro yoaropu tinare ñu nunu tiha. ã nunu tiro Caifa ya wuhure ducatarisahrĩnore su, tí sahrĩno puhichapu sãa wahaha. Sãa su, tí wuhure cohtaina surara mehne dujiha. Jesure ti dohse yoachū ñuno taro niha.

⁵⁹ ã jia sacerdotea puhtoa, mari coyea judio masa bucuna, paina puhtoa mehne Jesure wajã duti duaa, tiro to quihõno yoerarire ti yahusãhtire wacū macamaha. ⁶⁰ Wiho mejeta tíre bocaeraha. To quihõno yoerari mariapachuta, payu masa tirote ti cahmano yahusãmacanocaha. ã jia puaro ti baharo macaina tirote ⁶¹ õ sehe ni yahusãha tjoa:

—Ahriri õ sehe nire: “Cohamacu wuhure cohã masija. ã cohacu tia numu wahaboroi tí wuhure pari turi yoaihtja”, to nichu tuhohi sã —ni yahusãmacanocaha Jesure.

⁶² Ti ã niri baharo sacerdotea bui puhtoro wahcãrucu su, Jesure õ sehe ni sinituha:

—¿Ahrina mūhure ti yahusãpachuta tinare yuhti cahmaerajari mūhu? ¿Mūhure ti yahusãriri dohse ni yuhti cahmajari mūhu? —niha puhtoro.

⁶³ To ã nichu tuhparota Jesu ãta tuhhotunocaha. To ã yuhtierachu ñuno

sacerdotea bui puhtoro pari turi sinituha tjoa:

—Cohamacu catiriro wama mehne potocã niga mūhu. Mu ã nierachu tiro mūhure buhiri dahrerohca. Yahuga sãre. ¿Cristo Cohamacu macunota jijari mūhu? —ni sinituha tjoa.

⁶⁴ To ã nichuputa Jesu õ sehe ni yuhtiha:

—Tirota jija. Musare potocã yahuita nija. Baharo yuhu masuno Cohamacu warocariro yu Pucu jipihtina bui tuariro cahapu to poto buhusehepu yu dujichu ñunahca musa. ã yoa muano macaa me bui yu tachu cūhure ñunahca musa —ni yuhtiha Jesu.

⁶⁵ To ã nichu tuhoro sacerdotea bui puhtoro, to basi to sãari suhtirore tuhrenocaha painare “Sua yuhduara”, ni ñu masi dutiro. ã tuhrenocahno õ sehe niha:

—Cohamacure pjiro ñano durucuro nina ahriro. ã jina to ñano durucure tuh tuhsuja mari. ã jia tó peinata yahusãjaro ahrirore. Oihita to ñano durucuchū tuhoja mari. ⁶⁶ ¿Dohse yoanahcari mari mipure ahrirore? —ni sinituha tiro paina puhtoare.

—To ñari buhiri wajãnocano cahmana tirote —ni yuhtiha tina.

⁶⁷ Ti ã niri baharo to wuhduare chahcho puti sihõ mūja, tirote cjãpe, dota mūjaha tina. ⁶⁸ Tirote cjãpe tuhsu, õ sehe nipeha tirote:

—¿Diro sehe mūhure cjãjari? Cristo jicu ñuerapaihta yahuga sãre —ni cjãpe dota mūjaha tina.

“Tirote masieraja”, niha Pedro Jesure

(Mr 14.66-72; Lc 22.56-62; Jn 18.15-18, 25-27)

⁶⁹ ã yoa tí wuhu cahai jiri wapai noari wapai Pedro sehe dujiha. To ã dujichu ñuno sacerdotea bui puhtoro cahamacono tiro cahapu sũro, õ sehe niha:

—Mũhũ cũhũ Jesu Galilea macariro mehne jire —niha ticoro.

⁷⁰To ā nichũ tũhoro, Pedro ō sehe niha:

—¿Dohse nimacanocaco nijari mũhũ? Mũ nirirore ne masieraja yũhũ —niha Pedro ticorore jipihtina ti tũhorocaroi.

⁷¹To ā niri baharo tí wapa macari sahrĩno sopaca cahapũ wahaha Pedro. Tói to jichũ pacoro cahamacono tireore ñũno, tói jiinare ō sehe niha:

—Jesu Nazare macariro mehne jire ahriro cũhũ —niha ticoro Pedrore tjoa.

⁷²To ā nichũ tũhoro Pedro ō sehe ni yahtihã:

—Cohamacũ mehne potocã nii nija. Tiro mũ nirirore ne masieraja yũhũ —ni yahtihã Pedro.

⁷³Ā yoa mahanocã baharota tói ducuina Pedro cahapũ waha, tireore ō sehe niha tjoa:

—Potocã tjira. Jesu yaina mehne macariro jira mũhũ cũhũ. Tina yoaro seheta durucura mũhũ —niha tina Pedrore.

⁷⁴Ti ā nichũ Pedro ō sehe ni yahtihã:

—Potocã Cohamacũ mehne nii nija mũsare. Yũhũ potocã yũ nierachũ Cohamacũ yũhũre buhiri dahrejaro. Tireore mũsa nirirore ne masieraja yũhũ —ni yahtihã tiro tinare.

To ā nichũta caraca duha. ⁷⁵To duchũ tũhoro Jesu tireore to nirire wacũha. “Caraca to duhto pano ‘Jesure masieraja’, niĩhca mũhũ. Tia taha ā niĩhca mũhũ”, Jesu to niri cjiire wacũha Pedro. Ā wacũno, tí sahrĩno sopacare wi-jaa, tuaro tiĩha.

Pilato cahapũ Jesure naaha

(Mr 15.1; Lc 23.1-2; Jn 18.28-32)

27 Ā yoa bohrearopũ sacerdotea puhtoa, mari judio masa bucũna cũhũ Jesure ti wajã dutihtore cahma sũhũduha. ²Ti ā yoari baharo tireore dũhte, Pilato cahapũ naa, tireore waha Pi-

latore. Pilato sehe tí yahpa macaina puhtoro jire.

Juda Iscariote yariaa wahaha

³Ā yoa Jesure ti wajã dutichũ ñũno Juda sehe Jesure ñoriro tireore to ñori cjiire tuaro wacũ cahyaha. Ā cahyaro treinta tũri to ñahari niĩneru tũriire wiaro waharo, sacerdotea puhtoa cahapũ, bucũna cahapũ sũ, ō sehe niha:

⁴—Jesu mũsare yũ ñoriro ñaa mari-eriro to jipachũta tina wajã dutire tireore. Ā jicũ mũsare tireore ñocu ñano yoai nihti yũhũ —ni yahuha Juda tinare.

To ā ni yahuri baharo tina ō sehe ni yahtihã:

—Āta yoawahnojaro. Sãre yaba cjihti jierara tí mũ ā nia. Mũhũ dihta ā ni tũhutura tíre —ni yahtihã tina tireore.

⁵Ti ā ni yahtiri baharo Cohamacũ ya wũhũi Juda to niĩneru tũriire doca site cũnocaha. Doca site cũnoca, wahaa wahaha. Waha, yuta dare dũhte yo, to basi wamũai tju suha, puroca yoja sũ, yariaa wahaha juna.

⁶Ā jia sacerdotea puhtoa niĩneru tũriire naa, ō sehe niha:

—Ahri niĩnerure Cohamacũ wũhũ macari caropũ niĩneru wiħbori caropũ mari cũ masieraja. Ahri niĩneru mehneta masũnore wajã dutire. Ā jia mari dutia marine tó sehe jia niĩnerure wiħbo dutierara —niha tina ti basi.

⁷Ti ā niri baharo “Ō sehe yoajihna”, ti ni sũhũduri baharo dihi biatorire yoariro ya yahpare nuchũha. Tí tũri mehne nuchũha. Pa sehe macaina ti wihi ti yariachũ ti yahti yahpa cjihtore tí yahpare nuchũha. ⁸Ā jia tí yahpare “Di yahpa” wamoare masa. Mipũ cũhũre āta wama tira. ⁹Ahri jipihtia ā wahari jire Jeremía cjiro panopũ “Ā waharohca”, to ni joariro seheta. Tiro Cohamacũ yare yahu mũhtariro cjiro jiha. Ō sehe ni joa tiha tiro: “Treinta niĩneru tũriire plata tũriire ‘Tó purota wapanahca tireore

sā nāhahtore', niahca Israe masa. ¹⁰Ā jia tí tūri mehne dihi biatorire yoariro ya yahpare nuchuahca tina. Ō seheta yuhure yoa dutire Cohamacu", ni joaa tiha Jeremía panopu.

Pilato Jesure sinituha

(Mr 15.2-5; Lc 23.3-5; Jn 18.33-38)

¹¹Ā yoa Pilatore ti wari baharo tiro sehe Jesure ō sehe ni sinituha:

—¿Potocāta judio masa ti puhtorota jijiari mūhu? —ni sinituha Jesure.

—Mū nino seheta tiro tjija —ni yuhtihā Jesu.

¹²Ā ni yuhtiparota, sacerdotea puhtoa, bucuna cūhu ti yahusāchu yuhtieraha tiro. ¹³To ā yuhtierachu nūno Pilato ō sehe ni sinituha:

—¿Ahri jipihitia mūhure ti yahusārire tuhoerajari mūhu? —ni sinituha tiro Jesure.

¹⁴To ā ni sinitupachuta Jesu ne cū dūsero yuhtieraha. To ā yuhtierachu nūno Pilato cūaa wahaha.

Jesure wajā dutiha

(Mr 15.6-20; Lc 23.13-25; Jn 18.38–19.16)

¹⁵Cūhmaripe pascuaripe masa yairo cjihtore cūiro peresupū jirirore Pilato ā wiobasa mūjaa tiha. Masa ti wio dutirirore wiobasa mūjaa tiha. ¹⁶Tí pjare Barrabá wama tiriro peresupū jiha. Tirore masia tiha payu masa. ¹⁷Ā yoa ti ā cahmachuchū Pilato sehe ō sehe ni sinituha tinare:

—¿Diro sehere musare wiobasabocari yuhū? ¿O Barrabá sehere o Jesure Cristo ti nirirore wiobasabocari yuhū? —ni sinituha tiro.

¹⁸Jesure masa ti cahīchu nūa judio masa mari puhtoa tirore nū tuhtihā. Ā nū tuhtia tirore waha Pilatore. Ā jiro masa ti cahīri buhiri judio masa mari puhtoa ti nū tuhtirire masino Pilato Jesure wio duamaha.

¹⁹Ā yoa Pilato masare soro sehe yoainare to beseri pahtai to dujichū to namono tirore quiti warocaha: “Micha nāmine Jesure cahāco, tuaro nāno yuhdūhi. Ā jicu tirore nāa marierirore ne jiape yoai tjiga mūhu”, ni yahurocaha to namono Pilatore.

²⁰Ā jia wahmanopure sacerdotea puhtoa, bucuna cūhu masare ō sehe ni duti tuhsūha. “Barrabá sehere wio duti, Jesu sehere wajā dutiga”, ni dutiha masare.

²¹Ā yoa Pilato masare ō sehe ni sinituha: —¿Ahriina purare diro sehere musare wiobasabocari yuhū? —ni sinituha.

—Barrabá sehere wiobasaga sāre —ni yuhtihā.

²²—¿Ahriro Jesu Cristo ti niriro sehere dohse yoahcari yuhū mūsa ā ni sañurucuchū? —ni sinituha tiro.

—Crusapū cjā puha wajāga tirore —ni yuhtihā masa jipihitia.

²³—¿Yaba barore nāare yoari ahriro mūsa ā nichū? —ni sinitu namoha tiro. To ā nichū tuhoa tina tuaro mehne sañurucuha:

—Crusapū cjā puha wajāga tirore —ni sañurucuha masa tirore.

²⁴Ti ā ni sañurucuchū tuhoro, tirore ti tuho duaerachū nūno “Masa sua, cahmacheboca” nino, yuhtirota ō sehe yoaha Pilato. Masa ti nūrocaroi tiro wamo cosaha. Ā wamo cosaro ō sehe niha:

—Ahrirore nāa marierirore wajāri buhiri ya buhiri jierara. Mūsa ya buhiri jira —nino wamo cosaha.

²⁵To ā nichū tuhoa jipihitia masa ō sehe niha:

—Ahrirore wajāri buhiri sā, sā pohna cūhu sā ya buhiri jijaro —niha masa.

²⁶Ti ā nichū tuhoro Pilato Barrabáre peresupū jirirore wio dutiha masa ti cahmarirore. Ā yoa tuhsū Jesu sehere yuta dari mehne tjana duti, tirore crusapū wajā dutiro wiaha surarare.

²⁷ To ā wiachū Pilato ya wuhupū to surara Jesure na suha. Ā yoaa tina surara jipihtina Jesu cahapū cahmachuha. ²⁸ Ā cahmachua to suhtire tjuwe na, puhtoro ya suhtiro sehe bajuri suhtirore tirore sāaha. ²⁹ Ā sāa tuhsū, pota sorore yoaa tuhsū, to dapu bui duhu payoha. Ā duhu payo tuhsū, wujūcure poto buhusehe sehe dahra suhaha. Dahra suha tuhsū, na tuhcuca caha su, bujūpeha tirore:

—Noano tagā. Judio masa puhtoro noano tagā —ni bujūpeha tirore.

³⁰ Ā niata tirore chahcho puti sihō mūja, ti dahra suhadū cjirore tirore tuāwe na, to dapure cjāha tū mehnetā. ³¹ Ti ā bujūperi baharo ti sāari suhtirore tjuwe na, to ya suhti sehere sāaha tjoa. Sāa tuhsū, crusapū wajāa taa tirore na wijaaha.

Tina Jesure crusapū cjā puha, wajāha
(*Mr 15.21-32; Lc 23.26-43; Jn 19.17-27*)

³² Tirore na wahcā, Simo wama tirirore Cirene macarirore piti boca, tirore Jesu to wuuri crusare wua wahcā dutire.

³³ Wua wahcā, Gólgota wama tiropū sure. Gólgota nino, “Dapu cohā”, nino nina. ³⁴ Tuhsū, vinore suēa co nīmaca macaa co mehne ti morea core Jesure wamare tina. Tí core sihni nū, sihniere tiro.

³⁵ Ā yoaa to suhtire ti tjuwe nari baharo tirore crusapū cjā puhare tina. Ā cjā puha tuhsua, to sāa suhti cjirire ti basi cahma witia taa, “¿Noa yaro jirohcari ō?” ni masia taa, docapea poca mehne docape mūjaha tina. [Ā yoaa Cohamacū yare yahu mūhtariro cjiro to ni joariro seheta yoaa nire tina. Ō sehe ni joaa tiha tiro: “Yū suhtire ti basi naa taa, ‘¿Noa yaro jirohcari ō?’ ni, docapea poca mehne docape mūjaha tina”, ni joaa tiha panopū.]

³⁶ Docape tuhsū tirore nū dujirucure tina. ³⁷ Ā yoaa Jesure “¿Yaba buhiri

mehne yariabocari tiro?” ti ni masihto sehe, ō sehe ni ti joa ōri pjīne crusapū duhu ōha tina. “Ahroro Jesu judio masa bui puhtoro jiro jira”, ni joa ōre tina tí pjīpū. ³⁸ Baharo puaro yaca bucūna cūhure Jesu cahai paye crusari pjīnipū cjā puha dapore tina. Cūiro to poto buhusehei, paio to cō buhusehei cjā puha dapore tina. ³⁹ Crusari cahai yūhdū wahcāina Jesure nū, ti dapu pocare yureroca, tirore nāno durucure:

⁴⁰ —¿Cohamacū wūhure cohā, tia dacho wahaboroi pari turi tí wūhure dahrehtiro jijari mūhū? Cohamacū macūno jicū mū basi dujia taga. Ā yoaa mū basi yoadohoga. Ā jii yūhdū witiuhca mūhū —nire masa.

⁴¹ Āta ni bujūpere tirore. Sacerdotea puhtoā cūhū, marine judio masare buheina cūhū bucūna cūhū tirore ā ni bujūpere:

⁴² —Tiro painare yūhdoriro jiparota to basi yūhdō masierara. “Israe masa puhtoro jija”, nimana tiro. Ā jina to basi duji tachū nūna tirore wacū tuānahca. ⁴³ Tiro sehe Cohamacūre wacū tuāmana. Tuhsū, “Cohamacū macūno jija”, nimana tiro. To ā jiro jichū Cohamacū sehe tirore yoadohojaro —ni bujūpere tina.

⁴⁴ Yaca bucūna tiro cahai ti cjā puharina cjiri cūhū tó seheta tirore bujūpe, nāno ni durucure tina cūhū.

Jesu yariaa wahaha

(*Mr 15.33-41; Lc 23.44-49; Jn 19.28-30*)

⁴⁵ Ā yoaa cohari pja jichū tia hora waro jipihtiropū nahitiano jire. ⁴⁶ To nahitia duhuchū waro Jesu tuaro sañurucure:

—Elí, Elí ¿lama sabactani? —nire tiro. Ā nino ō sehe nino nire: “Yū Cohamacū, yū Cohamacū, ¿dohseacū yūhure cohāri mūhū?” nino nire.

⁴⁷ To ā nichū tuhoā cāina tóí ducuina ō sehe nimare:

—Cohamacu yare yahu muhtariro Elia cjirore pjirocaro niboca —nimare tina.

⁴⁸Ti ã ni tuhsuchu cūiro tina mehne macariro wihmi nari suhtepu vino suēa core soha tuhsu, na muroca, yucucu sohtoai duhte õ, Jesure wihmi dutimare. ⁴⁹To ã yoachu ñua paina wihmi dutirirore õ sehe nimare:

—Depusinia. Elia wihi, ahrirore to na borochu ñusinijihna mari —nimare paina.

⁵⁰Ti ã niri baharo pari turi sañurucu, Jesu sehe yariaa wahare. ⁵¹To ã yariachuta Cohamacu wahu macari suhtiro, ti ducataro suhtiro dacho macai bui sehe tuhnu bora ta, tuhnuroca yoja sua wahaha. Tuhsu, yahpa cūhu ñuhmire. To ã ñuhmichu tãa bujua poca wahtia wahare. ⁵²Ã yoa masa coparire pjõochu, payu Cohamacu yaina cjiri panopu yariarina cjiri masa wijaaha. ⁵³Masa wija, Jesu sehe to masa wijaari baharo tí coparire cohānoca, noari macapu Jerusalēpu wahare tina. Tõpu ti wahachu payu masa ñua tiha tinare.

⁵⁴Ã jia yahpa to ñuhmichu ñua, payu paye ti ã wahachu ñua surara puhoro to surara mehne cuaa wahare. Tina Jesure crusapu jirirore cohtaina jire. Cuaa waha, õ sehe nire:

—Potocã tjiri jimana. Ahriro Cohamacu macanota jiri jimana —nire tina.

⁵⁵Ã yoa Galileapu Jesu mehne tari numia cjiri tirore yoadohori numia cjiri yoropu tirore crusapu jirirore ñurocarucua nire. ⁵⁶Tí numia mehne María Magdalena jire. Pacoro María wama tiri-coro cūhu jire. Ticoro sehe Santiago, José cūhu pocoro jire. Pacoro Zebedeo namono jire.

Jesu pjacure masa copapu cūha José
(Mr 15.42-47; Lc 23.50-56; Jn 19.38-42)

⁵⁷Ã yoa ñamichahapu José Arimatea macariro pache puro tõi sua tiha. Tiro

Jesu buheriro jire. ⁵⁸Ã yoa Pilato cahapu su, Jesu pjacure siniha. To ã sinichu tuhoro Jesu pjacure tirore wa dutiha Pilato. ⁵⁹To ã dutiri baharo José sehe Jesu pjacure na boro, noari suhtiro wete marieni suhtiro mehne to pjacure wahmaha. ⁶⁰Wahma tuhsu, José to ya masa copapu siõ payoha to pjacure. Tí copa ti tãcai sahari copa wahma copa jire. Tí copapu yo sãa duhu payo tuhsu, pjiria tãcare tju turē wahcãha tia mehne bihoro taro. Biha tuhsu, wahaa wahaha. ⁶¹Ã jia María Magdalena, pacoro María mehne tí copare ñu dujirucuha.

Jesure ti cūri copare surara cohtaha

⁶²Ã yoa pa dachoi, Pascua cjihtore ti cahnoru dacho baharo, sabado jichu sacerdotea puhtoia fariseo curua macaina cūhu Pilato cahai cahmachuha. ⁶³Cahmachu tuhsu õ sehe niha tina Pilatore:

—Puhtoro, tiro mahñoriro Jesu catisinino õ sehe niha tiro: “Tia dacho wahaboroi masa wijaailha yuhū”, niha tiro. ⁶⁴To ã niriro jichu to buheina sehe to pjacure yacaboca. Æ yacaa masare õ sehe niboca: “Jesu masa wijaare”, niboca tina. Tiro Jesu sehe masare mahñono nire. Wiho mejeta to buheina sehe “Tiro masa wijaare” nia, mahñoina jiahca tina. Æ jiro Jesu to mahñoriro yuhdoro ti ya mahñoa sehe ñaa yuhduarohca. “Æ yacari” nicu, tia dacho waro to masa copare mu surarare cohta dutiga —niha tina Pilatore.

⁶⁵Pilato õ sehe ni yuhtia:

—Jai. Yu yaina surara cohtajaro. Æ yoa musa cūhu musa bihoro puro tí copare noano cohtaga —niha tiro tinare.

⁶⁶To ã nichu tina waha, tí copapu bihari tãca mehneputa ñahachuputa wih-tã ñahaha masa ti sãachu ñu masia taa. Æ yoa tuhsu, surarare tí copare cohta dutiha.

Jesu masa wijaaha

(Mr 16.1-8; Lc 24.1-12; Jn 20.1-10)

28 Ñ yoa judio masa mari sori dacho sabado dacho sehe to yuhduri baharo domingo jichu ñami curero jichu María Magdalena, pacoro María mehne Jesu masa copare ñua wahaha. ²Tí pjare dóihta yahpa tuaro ñuhmi bahrañoaha. To ã ñuhmichu mari puhtoro to yairo anjo muanopu jiro duji ta, masa copare bihari tácare tju turēroca, tia bui dujiha. ³Tiro anjo orocasitero yoaro sehe noano si siteriro, to suhti yaja pjoa yoaro sehe noano yehsea suhti jiha. ⁴To ã bajuachu tí copare cohtaina surara cui yuhdua, tetere, bui warohna yaria yuhdua wahaha. ⁵Ñ yoa tuhsu anjo sehe tí numiare õ sehe niha:

—Yuhure cuiena tjiga. Crusapu ti cjä puhariro, Jesure musa macachu masija yuhu. ⁶Wiho mejeta tiro sehe mipure õre mariaha. To niriro seheta tiro masa wijaa wahare. To pjacure ti duhu payoriro cjirore ñuna taga. ⁷Ñ ñu tuhsuna to buheina cahapu ño duaro waha, õ sehe ni yahuna wahaga: “Jesu masa wijaare. Ñ jiro musa pano Galileapu tiro wahayurohca. Tõpu tirore ñunahca musa”, ni yahuna wahaga musa. Ahri yu nirire wacuga musa —niha anjo tí numiare.

⁸To ã niri baharo tí numia masa copapu jia numia soaro mehne wijaa, tirore cuipahta wahche yuhdua mehne Jesu buheinare yahua wahaa, murocaha. ⁹Ñ wahaa numiare Jesu piti boca, õ sehe niha:

—¿Noano jimajari musa? —niha tiro.

To ã niri baharo, tina sehe tiro cahapu su, to dahporire ñaha, tirore ño payoha.

¹⁰—Cuiena tjiga musa. Yu buheinare “Galileapu wahaga”, ni yahuna wahaga. Tõpu yuhure ñuahca tina —niha Jesu tinare.

Masa copare cohtaina surara ti ñurire yahuha

¹¹To ã niri baharo tí numia ti waharo watoi caina masa copare cohtaina mehne macaina surara, Jerusalēpu sacerdotea puhtoare yahu pahñoa wahaha. Jesu to masa copapu wijaarire yahu pahñonocaha. ¹²Ti ã ni yahuchu sacerdotea puhto, judio masa mari bucuna mehne cahmachuha. Cahmachu, suhnduha. Ñ jia surarare mahño dutia payu niñerure wapaha.

¹³—Õ sehe niga musa masare: “Ñami sã carino watoi to buheina sehe masa copapu wihi, to pjacure nanocari jire”, ni yahuga masare. ¹⁴Musa ã ni yahuchu Pilato sehe musa carí yuhduarire tuhocaboca. To ã tuhochu, “Musare tuhtiri”, nina musare yahubasanahca sã tirore —niha tina surarare.

¹⁵Ti ã niri baharo surara sehe niñerure ñaha, tinare ti mahño dutiro seheta masare yahua wahaha tina. Ñ jia tó sehe Jesu to masa copare wijaarire yahurucura judio masa. Mipu cuhure ata ni yahura tina.

Jesu buhe dutiro to cürinare dutiha

(Mr 16.14-18; Lc 24.36-49; Jn 20.19-23)

¹⁶Ñ yoa sã Jesu buheina once buheina tucupu Galileai jidupu Jesu to waha dutidupu wahai sã. ¹⁷Tõpu su, Jesure ñuna, ño payoi tirore. Ñ ño payoina jipanahta, sã caina “Ahriro Cohamacu macuno jieraboca”, ni tuhutumai. ¹⁸Sã ã ño payochu tiro sehe sã cahapu wihi, õ sehe nire:

—Ahri yahpapure, muano cuhure Cohamacu jipihtinare dutiro waro jichu yoare yuhure. ¹⁹To ã yoachu õ sehe dutija musare: Jipihtiro macainare yu yare buhena wahaga. Yu yaina ti wahahto sehe buhena wahaga. Ñ yoana yu Pucu to wama mehne, yu wama mehne, Espiritu Santo to wama mehne tinare

bautisaga. ²⁰ ã jina m̄sare ȳ dutirire
ti yoa pah̄nohti çjhtire buhega tinare
m̄sa. ã yoana ah̄rire ȳ nihtire wac̄uga:
Jipihtia dachoripe ah̄ri yahpa to jiro

puro m̄sa mehne ã jirucuihca. M̄sa
mehne ȳ ã jirucuhtore wac̄uga m̄sa —
ni yahure s̄are Jesu.

San Marcos

João masare bautisariro buhe ducaha
(Mt 3.1-12; Lc 3.1-9, 15-17; Jn 1.19-28)

1 Ahri tjuí Jesucristo Cohamacu macuno to yoare noaa buheare yahu ducaja.

² Cohamacu yare yahu mǎhtariro cjiro Isaia to joariro seheta ahri yahua jira. Ō sehe ni joaha tiro:

“Cohamacu to macunore ō sehe niha: ‘Mu pano mǎhure yahuyuhtirore warocai nija.

³ Ā jiro tiro masa marienopu waharohca. Tirore tǎhoinare yahuro sañurucurohca: “Mari puhtoro to tahto pano musa ñaa tǎhotuare cohtota, cahno mǎhtagata musa”, ni sañurucurohca’, niha Cohamacu”,

ni joaa tiha Isaia cjiro João cjihtore.

⁴ João masare bautisariro masa marienopu masare buhea tiha:

—“Sǎ noaina jija”, ni musa tǎhotumari cjirire duhu, musa ñaa buhirire cahya, Cohamacu sehere cahmaga musa. Ā jina bautisarina jiga. Musa ā yoachu ñuno Cohamacu musa ñaa buhirire borohca — ni buhea tiha tiro.

⁵ Ā yoa jipihtina Judea yahpa macari macaina, Jerusalē macaina mehne tiro cahapu ti suchu ñuno João sehe Jordão wama tiri mapu bautisaha tinare. Tinare to bautisaho pano tina sehe ti ñaa yoarire yahu yǎhduha Cohamacure.

⁶ Tiro João sehe camello pjoari suhtirore sǎariro wahiquiro cahsaroreta tuǎ dihoriro jiha. Poreroare, macaroca macaina miquina mi cǎhure chua tiha.

⁷ Ā yoa ō sehe ni buhea tiha:

—Yu baharo yu yǎhgoro tuariro tarohca. Noa yǎhduariro jira tiro. Tiro yoaro sehe jieraja yǎhu sehe. Ā jicu tirore tǎhotucu, “Wiho jiro jija yǎhu”, ni tǎhotuja yǎhu. ⁸ Musare bautisacu co mehne

yoamahi. Tiro sehe yu yǎhgoro yoarohca. Espiritu Santore musa mehne jirucuchu yoarohca —ni buhea tiha João.

João Jesure bautisaha
(Mt 3.13-17; Lc 3.21-22)

⁹ Ā yoa tí pjare Jesu Nazarepu Galilea yahpai jiri macapu jiro Jordão wama tiri mapu suha. Tǎpu to suchu João bautisaha tirore. ¹⁰ To ā bautisa tuh-suchu Jesu diapu ducuriro sǎrucu sǎro muano to parǎ muaa wahachu ñuha tiro. To parǎ mǎachuta Espiritu Santo buja yoaro sehe Jesu bui duji pja suha.

¹¹ To ā duji pja suchu mǎanopu durucuro coa taha:

—Mǎhu yu macu yu cahĩro jira. Mǎhu mehne tuaro wahcheja —nino coa taha mǎanopu.

Satana ñaare yoa dutimaha Jesure
(Mt 4.1-11; Lc 4.1-13)

¹² Tí pjare Jesure masa marienopu Espiritu Santo naaha. ¹³ Tǎpǎre sǎro cuarenta dachori waro jiha. Watĩno sehe Jesu to ñaare yoachu ñu duaro, ñaare yoa dutimaha tirore. Tuhsu, Jesu wahiquina nucu macaina mehne jiha. Tói to jichu ñua anjoa sehe tirore yoadhoa, chũare waha.

Jesu Galilea yahpai buhe ducaha
(Mt 4.12-17; Lc 4.14-15)

¹⁴ Ā yoa Joãoire peresupu ti biha daporǎ baharo Jesu sehe Galilea yahpapu noaa buheare puhtoro Cohamacu to suho jiare yahuro wahaha. ¹⁵ Ō sehe ni yahuha:

—Mipǎre ō sehe jira. Puhtoro Cohamacu musare to noano suho jihto mahanocǎ dǎhsara. Ā jina “Sǎ noaina jija”, musa ni tǎhotumari cjirire duhuga. Musa ñaa buhirire cahya, Cohamacu sehere cahmaga. Ahri noa buheare “Quihōnota jira”, ni tǎhoga musa —ni buhea tiha Jesu tinare.

**Jesu pititiarore wahi
wajāinare “Yuhū mehne
macaina cjihti taga”, niha**

(Mt 4.18-22; Lc 5.1-11)

¹⁶Tíre yahu tuhsu, Galilea wama tiri bɔcɔpariro duhtu cahapu sito wahcāmahno ñuha Simore, to bahuro Andre mehne. Tina wahi wajāina jiha. Ā jia ti wañuyucurire bɔcɔpariropu doca ñoa niha. ¹⁷Ā yoa Jesu tinare ō sehe niha:

—Yuhū mehne macaina cjihti taga musa. Yuhū mehne musa tachu musa wahire ñaha cahmachuina musa jiro seheta, Cohamacu yaina cjihtire masare pji cahmachuina cjihtire musare wahachu yoihtja. Yuhū mehne musa tachu ā yoahina cjihtire cūihtja musare —niha Jesu tinare.

¹⁸To ā nichu tuhoa ti wañuyucurire cūnoaca, tiro mehne wahaa wahaha.

¹⁹Ā yoa tina mahanocā yuhdu wahcā, Santiagore, to bahuro João mehne boca suha tjoa. Tina sehe Zebedeo pohna jiha. Ti yaria dohoriapu wañuyucurire cahnoa niha. ²⁰Ā yoa tiro to pjirocachu tina sehe ti pucurore, tiro mehne dahra cohtaina mehne dohoriapu cūnoaca, Jesu mehne wahaa wahaha.

**Watia ti cohtotariro
Jesure piti bocaha**

(Lc 4.31-37)

²¹Ā yoa tina Capernau wama tiri macapu suha. Tópu suro Sabado jichu judio masa sā buheri wuhupu buhero sāaha tiro. ²²Sā judio masare buheina yoaro sehe jieraha tiro. Noano masi pahñoriro ji, noano waro buheha. To ā buhechu tí maca macaina tuho cuaa wahaha. ²³Tí pjare cūiro tí wuhui jiro watia ti cohtotariro jiha. Tói jiro ō sehe niha Jesure:

²⁴—Muhū Jesu Nazare macariro cariboi tjiḡa sāre. ¿Dohse yoi tai nijari sāre?

¿Muhū sāre butichu yoi tai nijari? Cohamacu macano buhiri tia marieriro mu jichu masija yuhū —ni sañurucuha tiro Jesure.

²⁵To ā nichu tuhoro Jesu tuhtiha watiare:

—Dihta mariaha. Wijaaha tirore —niha Jesu.

²⁶Ā jia watia tirore yahpupu doca caha su tunuchu yoa, to tuaro sañurucuro watoihta wijaaha tirore. ²⁷Ā jia jipihitina tí wuhui dujiina ñu cuaa yuhduha wahaha.

—Cue, ¿wahma buhea jijari ahri? Tiro puhtoro yoaro seheta dutira watiare. To dutichu tina watia sehe yuhdurucaerara tirore —ni durucuha tí wuhui dujiina ti basi.

²⁸Ā jia mahaa dachoricā baharoihta dóihta jipihitina Galilea yahpa macaina tíre to yoarire tuho sahsea wahaha.

**Jesu Simo Pedro marechonore
noaricoro wahachu yoaha**

(Mt 8.14-15; Lc 4.38-39)

²⁹Ā yoa Jesu cūhu judio masa mari buheri wuhupu jiina wijaaha. Ti ā wijaari baharo Jesu, Santiago, João, paina tina mehne macaina cūhure Simo to bahuro Andre mehne ti ya wuhupu suho sāa suha. ³⁰Tí pjare Simo marechono juaro mehne to dohatichu cama bui to coāchu yahuha Jesure. ³¹Ti ā yahuchu tuhoro tiro sehe ticoro cahapu suro, to wamomacare ñaha, ticorore waja wahcō dapoha. To ā waja wahcō dapochuta ticorore juaro surua wahaha. To ā sururi baharo ticorota tinare chuare payoha.

**Jesu payu dohatiinare
noaina wahachu yoaha**

(Mt 8.16-17; Lc 4.40-41)

³²Ā yoa sū sāari baharo nahi borachupu masa payu dohatiinare, watia ti cohtotarinare Jesu cahapu na suha.

³³Ā jia jipihitina tí maca macaina

cahmachurucū sūha tí wūhū sopacai.
³⁴ Ā jiro Jesu payū dohatiinare, payū soro jia dohatia cjuainare noaina wahachū yoaha. Watīa cūhūre, masare sāamarinare payū cohā wioha. Ā jiro watīa Jesure ti masichū ñuno Jesu sehe tinare durucu dutieraha.

Jesu buhe tinino wahaha

(Lc 4.42-44)

³⁵ Ā yoa ñami curerocā wahcā, nahitia curechuta masa marienopū Cohamacūre sinino wahaha Jesu. ³⁶ To ā wahari baharo Simo cūhū tirore macaa wahaha. ³⁷ Tina tirore boca sū, ō sehe niha:

—Masa jipihtina mūhūre macaa nihre —niha tina.

³⁸ Ti ā nichū tūhoro ō sehe niha Jesu tinare:

—Tinare buhe tuhsūhi. Pa sehepū ō cahacā macaa macaripū wahajihna mari. Ahri yahpa macainare yahu site pahñoi tahi. Ā jicū yūhū paye macari macaina cūhūre buheihtja —niha Jesu.

³⁹ Ā ni tuhsū, jipihtia Galileai jia macaripū judio masa mari buhea wūhusepū buhero, watīare masare sāamarinare cohā wioha.

Jesu cami barirore noariro wahachū yoaha

(Mt 8.1-4; Lc 5.12-16)

⁴⁰ Ā yoa paio dohatiriro cami bariro Jesure piti bocaro, na tuhcuca caha sū ō sehe ni siniha:

—Mūhū yūhūre noariro wahachū yoa duacu yoaga —niha cami bariro.

⁴¹ To ā nichū tūhoro Jesu tirore pja ñūha. Ā jiro to wamomacare siōroca, tirore ña payoha. Ā ña payoro ō sehe niha:

—Tīre yoa duaja. Noariro jiga mūhū —ni yahuha Jesu.

⁴² To ā nichūta dohatiriro to cami bari cjiri yati mūaa wahaha. Noariro wahaha

tiro. ⁴³ To ā wahachū ñuno Jesu tirore tuaro mehne ō sehe ni yahuha:

⁴⁴ —Painare ahrire yahuecū tjiga. Ā yahuerapaihta mū pjacūre sacerdotere ñoga. Cohamacū dutia Moise cjirore to cūriro seheta yoaga. Ā yoacu minichah-care waga sacerdotere noariro mū waharire mū ñohti cjihtire —niha Jesu. Ā ni tuhsū “Wahaga”, niha tirore.

⁴⁵ To ā yahu dutierapachūta tiro waha, jipihtia macari macainare Jesu to yoarire yahuha. To ā yahuri baharo Jesu masa payū ti jiropūre waha masieraha. Ā jiro tiro mahainacā ti jiropū jiha. Tópū to jichū payū macari macaina tiro cahapū sūha.

Jesu pjacu buharirore ducuchū yoaha

(Mt 9.1-8; Lc 5.17-26)

2 Mahaa dachori baharo Jesu Capernaupū tjuaa wahaha. Wūhūi to jichū masa tūhoha. ² Ā jia tói masa payū cahmachū tí wūhūre wahpata wijaa sūrucaha. Ā jiro Jesu tinare noaa buheare yahuha. ³ To ā yahuro wato, pititiaro mūa jipihtiri pjacu buharirore na wihaha. ⁴ Ti masa payū jichū ñūa Jesu cahapū sāa masieraha. Ā jia tina wūhū buipū Jesu bui waroi mahanocā muji pahmare nawe, pjacu buharirore to coāri cahsaro mehne duhu boroha Jesu cahai. “Jesu ahrirore to dohatiare yūhdūchū yoarohca”, ni tūhotuha tina. ⁵ Ti ā ni tūhotuchū masino Jesu sehe dohatirirore ō sehe ni yahuha:

—Macū, mū ñaa yoari buhiri tiare cohā tuhsūja —niha Jesu pjacu buharirore.

⁶ To ā nichū tūhoa sā coyea judio masare buheina tópurē dujiina ti basi ō sehe ni tūhotumaha: ⁷ “Ahriro ā ni durucuro tjiaro. Cohamacūre ñano durucuro nina tiro. Tiro masūno mari yoaro seheta jiro jira tiro cūhū. Ā jiro to ñaa yoari buhiri tiare cohā masierara. Cohamacū dihta masa ti ñaa yoari buhiri

tiare cohã masina”, ni tũhotumaha tina.
⁸ Ti ã ni tũhotuchũ ñũno Jesu ti tũhotu-
 are masino õ sehe niha:

—¿Dohse yoana mũa ã ni tuho-
 tujari? ⁹ “Mũ ñaa yoari buhiri tiare
 cohã tuhsuja”, yũ nichũ “Mahñoriro
 jira”, yũhũre nina mũa masierapanahta.
 “Wahcãrucã, wahaga”, yũ nichũ to
 tinichũ ñũna yũ niri potocã jia jichũ dõ-
 lhta masinahca mũa. ¹⁰ Yũhũ masũno
 Cohamacũ warocariro ahri yahpapũre
 masa ti ñaa yoari buhiri tiare cohã
 masija yũhũ. Ahrire mũa masihtõ sehe õ
 seheta to wahachũ yoaihtja —niha Jesu
 judio masare buheinare.

Tinare ã ninota pjacũ buharirore õ
 sehe niha:

¹¹ —Mũhũre niita nija. Wahcãrucaga.
 Mũ coãri cahsarore na wahcãga mũ ya
 wũhũpũ —niha Jesu tireore.

¹² To ã nichũta pjacũ buhariro cjiro
 wahcãrucũ sũ to coãri cahsarore na, jip-
 ihtina ti ñũrocaroi wijaa wahaha. To ã
 yoachũ ñũa tina jipihtina ñũ cũa wa-
 haha. “Cohamacũ tuariro jira” ni, “Ne,
 mari õ sehe yoaaare ñũera tihi”, niha tina
 ti basi.

**Jesu Levíre Mateo ti
 ni pisurirore “Yũhũ mehne
 macariro cjihto taga”, niha**

(Mt 9.9-13; Lc 5.27-32)

¹³ ã yoa pari turi Jesu bucũpariro
 duhtũ cahapũ wahaha tjoa. Tõpũ sũro
 masa payũ tiro cahai ti cahmachuchũ
 ñũno tiro buheha tinare. ¹⁴ ã yoa tuhsũ
 tõpũ jiro wahamahno Levíre Alfeo
 macũnore to dahrari tahtiapũ boca sũha.
 Paina mehne puhtõa ya cjihtire wapa na
 cohtaina jiha Leví cũhũ. Tireore boca sũro
 õ sehe niha:

—Yũhũ mehne macariro cjihto taga
 mũhũ —niha Jesu Levíre.

To ã nichũta Leví sehe wahcã sũrucã,
 Jesu mehne wahaa wahaha.

¹⁵ ã yoa baharo Jesu sehe to buheina
 mehne Leví ya wũhũpũ chũro niha. Jesu
 mehne wahaina sehe payũ jiha. Cãina
 puhtõa ya cjihtire wapa na cohtaina, ã
 jichũ paina masa “Ñaa dihtare yoara”, ti
 niina mehne payũ mesa cahai duji, tina
 cũhũ tiro mehne cũnoi suho chua niha.

¹⁶ Tõpũ ti dujiri baharo paina sã coyẽa
 judio masare buheina, fariseo masa ya
 curua macaina mehne Jesu to chũ du-
 jichũ ñũha tina. ã ñũa õ sehe ni sinituha:

—¿Dohsearo ñãno yoaina, puhtõa ya
 cjihtire wapa na cohtaina mehne chũ-
 jari Jesu? —ni sinituha judio masare
 buheina Jesu buheinare.

¹⁷ Ti ã nichũ tuhoro piti dahre buhea
 mehne õ sehe ni yũhtiha Jesu:

—Dohatieraina duhturure macaerara.
 Dohatiina dihta duhturure macana.
 Ñãno yoaina dohatiina yoaro sehe
 jira. ã jicũ ñãno yoainare yahui tai
 nihi yũhũ. Ti basi “Noaina jija sã”, ni
 tũhotuinare yahui tai nierahi yũhũ
 —niha tiro tinare.

Chũ duhuare Jesure sinituha paina

(Mt 9.14-17; Lc 5.33-39)

¹⁸ Tí pjare João buheina, fariseo cu-
 rua macaina cũhũ Cohamacũre ñõ payoa
 taa, chũera tiha. ã jia masa Jesure õ sehe
 ni sinituha:

—João buheina, fariseo buheina cũhũ
 Cohamacũre ñõ payoa taa chũerara.
 ¿Dohse yoa mũ buheina sehe chũ
 duhuerajari? —niha tina Jesure.

¹⁹ Jesu to tũhotua mehne quitĩ dahre
 buhero tinare õ sehe ni yũhtiha:

—Õ sehe jira tí: Wamomaca duh-
 teriro bõse mũmũ to jichũ tiro mehne
 macaina cahyaro mehne jierara. Tuhsũ,
 chũeraina jierara. Tõ seheta yũ buheina
 cũhũ yũhũ mehne jia, chũ duhu masier-
 ara. ²⁰ Yũ Pũcũ Cohamacũ yũhũre to
 naari baharo pinihtare yũ buheina
 mehne jisi yũhũ. ã jia tí pjapũta yũ

buheina cūhu chu duhuahca —niha Jesu.

²¹ Panopu macaa buhea wahma buhea mehne ti buhe more duachu ñuno õ sehe ni namoha Jesu tinare piti dahre buhero:

—Ne, wahma cahsaro suhtiro cahsaro mehne múnano suhtirore sere õno cahmaerara. Mari ã yoachũ wahma cahsaro mari cosari baharo múnano suhtirore waja cahmachu, pjibiario tuh-nũchu yoara. ²² ã yoa ne se co bisia core wahiquiro cahsaro wajuru mehne muna wajuru mehne posaeraro cahmana. Mari ã yoachũ se co bisia pahmoapu muna wajurure tuhřenocahna. To tuhũchu se co cūhu, wajuru cūhu cohõa wahara. ã yoa se co wahma core wahma wajurupu posaro cahmana. Mari ã yoachũ se co cohõera, wajuru cūhu cohõerara. (Tó se-heta wahma buhea muna buhea mehne buhe moreraro cahmana) —ni buheha Jesu tinare.

Sabado jichũ Jesu buheina trigo parorire pahaha

(Mt 12.1-8; Lc 6.1-5)

²³ Pa dacho Sabado jichũ Jesu cūhu trigo wesepũ wahaha. To buheina sehe trigo parorire paha yũhdũ wahcāha.

²⁴ Ti ã yoachũ ñua õ sehe ni tuhtiha fariseo curua macaina Jesure:

—Tuhosiniga säre. ¿Dohse yoa tina Sabado mari sori nũmu to jipachũta dahrajari? Marine dutiare yũhdurũcaa nina —niha tina Jesure.

²⁵⁻²⁶ Ti ã nichũ tuhoro Jesu tinare yuhtiha. “Yu buheina yũhdurũcaa nierara”, nino taro õ sehe niha:

—Davi cjiro tiro mehne macaina mehne juca baaro, Cohamacũ wũhũpũ sãa, Cohamacũ ya pãore chũha. ã chũro tiro mehne macaina cũhũre tí pãore waha. Tí pãore sacerdotea dihtare chũ dutira. Cohamacũ dutia ti joari tjui painare tí pãore chũ dutierara. Tí pjare Abiata wama tiriro sacerdotea puhtoro

jihã. ¿Davi cūhu tíre ti yoari cjirore Cohamacũ yare ti joari tjui buherari mũsa? (Tí pãore chũro Cohamacũre yũhdurũcaro nieraha. Michare ahri yaparire chũa yũ buheina cūhu Cohamacũre yũhdurũcaa nierara) —niha Jesu tinare.

²⁷ ã ni tuhsũ õ sehe ni namoha:

—ã yoa Cohamacũ Sabado dachore ti sori nũmu cũno masa ya dacho cjihto cũno nire dahra wahyarinare so dutiro. Tí dachore ño payohtina cjihtire cũno nierare masare Cohamacũ. ²⁸ ã jicu yũhu masũno Cohamacũ warocariro ahri dacho Sabado dachore masa ti yoahire yahurirota jicu puhtorota jija —niha Jesu tinare.

Wamomaca buhariro quti jira

(Mt 12.9-14; Lc 6.6-11)

3 ã yoa Jesu sã judio masa buheri wũhũpũ sũro sãaha tjõa. Tí wũhũ cũiro wamomaca buhariro dujiha.

² Sabado jichũ Jesu wamomaca buharirore to noariro yoachũ ñũ duaha cãina tí wũhũ dujiina. To ã yoachũ ñua tirore yahusã duamaha. “Mari sori nũmũ Jesu dahraro nina”, ni yahusã duamaha tina. ã jia Jesu to sãa tachũ ñua, tirore yahusã duaina sehe tiro dihtare ñũroca õha. ³ Tirore ti ã ñũroca õpachũta Jesu sehe wamomaca buharirore õ sehe niha:

—Wahcã sũrucaga jipihtina ti ñũrocaroi —niha.

⁴ ã ni tuhsũ tí wũhũ dujiinare õ sehe ni yahuha:

—¿Sabado jichũ noaare yoachũ noajerari? ¿O ñaare yoachũ sehere noajerari, mũsa tuhõtuchũ? Sabado jichũ masũnore masochũ noa nina. Masũnore wajãchũ sehere noaerara —ni yahuha Jesu tinare.

To ã nipachũta tina yũhtieraha. ⁵ Ti ã yũhtierachũ ñuno Jesu tina mehne suaha. Ti tuhõ duaerachũ ñuno Jesu cahyaha.

—Mu wamomacare siōrocaga —niha tiro wamomaca buharirone.

To ā nichu tuhoro tiro to wamomacare siōrocaga. To ā yoachuta noari wamomaca wahaha. ⁶To ā noari wamomaca wahachu ñua, fariseo curua macaina wijaa wahaha. Wijaa, Herode mehne macaina mehne cahmachu, “¿Dohse yoa Jesure wajānahcari mari?” niha tina ti basi.

Masa payu bucupariro duhtu cahapu jiha

⁷⁻⁸Ā yoa pari turi Jesu to buheina mehne bucupariro cahapu wahaha tjoo. Ti ā wahachu ñua Galilea macaina masa payu to baharo suha. Ā jia Judea yahpa macaina, Jerusalē macaina, Idumea yahpa macaina, Jordāo wama tiri ma sie coa macaina, Tiro wama tiri maca macaina, tó cahai jiina, Sidō wama tiri maca macaina, tó cahai jiina mehne masa payu jipihtina to yoarire tuhoa, tiro cahapu suha. ⁹⁻¹⁰Tópu sua, payu masa jiha. Payu dohatiinare noaina to yoachu tuhoa, paina dohatiina cūhu Jesure piha dua, tju bihsarucu suha. Ti ā tju bihsarucu suchu ñuno, Jesu busocare cahnopohobasa dutiha to buheinare. ¹¹Ā yoa paina watia ti cohtotarina sehe Jesure ñua tiro cahai na tuhcuca caha suha.

—Muhu Cohamacu macuno jira —ni sañurucuha tina tirore.

¹²Ti ā sañurucuhu tuhoro tinare Cohamacu macuno to jiare tuaro mehne ni dutieraha Jesu.

Jesu to buheinare doce to warocahinare bese dapoha

(Mt 10.1-4; Lc 6.12-16)

¹³Ā yoa Jesu tūcupu mija, to cahmainare pjirocaga. To pjirocachu tuhoa, tiro cahapu mija suha tina. ¹⁴Ti mija suri baharo doce muare tiro mehne macaina cjihtire, paye

macaripure to yare buhe duti to warocahinare, bese dapoha Jesu. ¹⁵Ā yoaro dohatiinare ti yuhdohti cjihtire, watiare ti cohā wiohti cjihti cūhure cūha tinare. ¹⁶⁻¹⁹Ahrinare doce muare Jesu bese dapoha: Simo, Santiago Zebedeo macuno, João to bahuro, Andre, Felipe, Bartolomé, Mateo, Toma, Santiago Alfeo macuno, Tadeo, Simo cananista ya curua macariro cjiro, Juda Iscariote, tina jiha to bese daporina. Jesu Simore Pedro ni wama pisuha. Santiagore, João mehne Boanerges ni wama pisuha. Boanerges “Wapo yoaro sehe jiina tuaro bisina jira”, nino nina. Juda Iscariote Jesure ñu tuhtiinare ñohtiro jiha. Tinare bese dapo tuhsu, dujiaa, Jesu to buheina mehne wuhuru sãa wahaha.

“Jesu watino tuaare cjuara”, ni yahusãha masa

(Mt 12.22-32; Lc 11.14-23; 12.10)

²⁰Ā yoa tói pari turi masa payu cahmachua bihsa niha. Ti ā bihsachu ñuno Jesu chu masieraha. Tuhsu, to buheina cūhu chu masieraha. ²¹Ā jia paina Jesu coyea tīre tuhoa, tiro cahapu sua, tirore ñahamaha.

—Tiro tuho masierariro waharo nina —nimaha tina.

²²Paina o sehe niha:

—Beelzebú tirore ā wahachu yoaro nica. Tiro watiare cohāno Beelzebú watia puhtoro to tuua mehne tinare cohāna —niha Jerusalēpu tarina sã judio masare buheina.

²³Ti ā nichu tuhoro Jesu sehe tinare pjiroca, to tuhotua quiti mehne piti dahre yahuha tinare:

²⁴—Watino ya tuua mehne watiare cohāi nieraja. Watia ti basi cohā masierara. Cū yahpa macaina ti basi cahma waja, tí yahpa macaina yaria pihtia wahaboa. ²⁵Cū wuhu macaina ti basi cahmachea tí wuhu macaina waha pihtia

wahaboa. ²⁶Tuhsu, Satana watia puh-toro sehe watiare cohano ti basita cah-machea niboa. A jia tina waha pihitia wahaboa.

²⁷O sehetu jira mari piti dahre buhechu. Tuariro ya wuhupu pairo saa su yaca masierara. Tuariroro duhter-aro to ya wuhupu saa su yaca masier-ara. Tuariroro to duhteri baharo saa su yaca masina —ni yahuha Jesu. (O sehe ni yahuha watinore to yuhdurucarire yahuro. Watino tuariro to jipachuta Jesu tire yuhdurucara watiare cohano.)

²⁸A ni tuhsu o sehe ni yahu namoha Jesu:

—Potocã niita nija musare. Jipih-tia ñaare masa ti yoachu ti duru-cuchu cuhure Cohamacu bo masina. ²⁹A boparota Espiritu Santore ti ñano duru-cuchu ti pinine ne bosu. Ti a niri buhiri a buhiri tirucuina jahca —niha Jesu tinare.

³⁰Jesu Espiritu Santo to tuua mehne watiare to cohapachuta “Tiro watino to tuua mehne watiare cohano nina”, nimaha masa. Ti a nichu tuhoro ti quitire Espiritu Santo quitire yahuha Jesu tinare.

Jesu coyeta tire pjiha

(Mt 12.46-50; Lc 8.19-21)

³¹A yoa Jesu bahana to pocoro mehne wihia. A wihia sopacapu jia, painare pji dutiha tire. ³²A jia masa tiro cahapu dujiina yahuha tire:

—Mu poco, mu bahana mehne sopacapu pji nina mure —niha tina.

³³Ti a nichu tuhoro o sehe niha Jesu tinare buhero taro:

—¿Noa jijiari yu poco, yu bahana cuhu, musa nuchu? —niha tiro tinare buhero taro.

³⁴A nino to cahai dujiinare ñno o sehe niha:

—Ahrina jira yu poco yu bahana yoaro sehe jiina. Cohamacu cahmaare yoara

ahrina. ³⁵To sehetu yoaina yu bahu, yu baho, yu poco yoaro sehetu jira —ni buheha Jesu tinare.

Jesu wesere toari masuno quitire buheha

(Mt 13.1-9; Lc 8.4-8)

4 A yoa pari turi bucupariro duhtu cahapu Jesu masare buhe ducaha tjoa. A topure buhe ducaro masa payu tiro cahapu ti cahmachuchu ñno Jesu sehe do-horiapu samu wijaa, pahsaha. A jia masa sehe bucupariro duhtu cahai ducuha. ²A jiro Jesu payu to tuhutua mehne quitire dahre yahuha tinare buhero taro:

³—Ahrini quitire tuhoga musa —niha tiro tinare.

—Toari masuno toaro, to toaa yaparire doca site cino wahara. ⁴To a doca site cu wahachu paye yapari mahai bora caha suha. A bora caha suare ti yaparire minichahca duji ta, chunocaha. ⁵A yoa paye yapari sehe taa wapa bui dihta se mininoca bui bora caha suha. Taa wapa buica dihta mariea cureroi bora caha su, doi dumaha. ⁶A doi duri jipahta, nuhcori mariaa, su to tuaro sichu, ñaia wahaha. ⁷Paye yapari sehe tjia watoi bora caha suha. Tjia sehe dia yuhduu waha, toaa sehere wajanocaha. A jia tjia watoi jiare dica mariachu yoaha. ⁸Paye yapari sehe noari yapari bora caha suha. Noano du, noano dica tiha. Paye yucu treinta yapari, paye yucu sesenta yapari, paye yucu cien yapari dica tiha. ⁹Ahrine tuho duaina noano tuhoga musa —niha Jesu.

Jesu quiti mehne to buherire yahuha

(Mt 13.10-17; Lc 8.9-10)

¹⁰A yoa ti sahsero jia doce to buheina, paina Jesu mehne jiina cuhu ti quitire masi duaa, Jesure sinitu ñha. ¹¹Ti a sinitu ñuri baharo Jesu o sehe ni yahuha:

—Cohamacu masa bui puh-toro masare to noano suho jiare, panopu

paina ti masierari cjirire musare masichu yoara Cohamacu. Paina sehere ã yoerara tiro. Æ jicu tinare quitu mehne dihta buheihija. ¹² Æ jia tina ñapahta ñueraina cjiri yoaro sehe tjuara. Æ jia tuhopahta tuho ñaha masisi. Tina tuho ñahaina jia, ti ñaa yoarire cahya, Cohamacure macaboa. Ti ã macachu ñuno, tiro sehe ti ñaa yoari buhirire bonocaboa. Æ jipachuta tina sehe ne tuho duaerara —niha Jesu.

**Jesu wesere toari masuno
quitire yahu pahñoa**

(Mt 13.18-23; Lc 8.11-15)

¹³ To ã niri baharo õ sehe ni yahu namoha tinare:

—¿Ahri quitire tuhoerasinijari musa? ¿Musa ahri quitire tuhoerana, dohse paye quitire tuhonahcari musa? —niha Jesu tinare.

Æ ni tuhsu tiro õ sehe ni yahu tinare:

¹⁴ —Toari masuno toaro, to doca site cúa yapari noaa buhea yoaro sehe jira. ¹⁵ Æ yoa mahai boraa yapari noaa buhea yoaro sehe jira. Cäina noaa buheare ti tuhochu ñuno Satana sehe ta, tí buhea noaa buheare ti tuho ñahamarire bochu yoara tinare, minichahca tí yaparire ti churo seheta yoaro. ¹⁶ Æ yoa tãa wapa bui dihta se mininocã bui boraa yapari noaa buhea yoaro sehe jira. Æ jia paina noaa buheare tuho, wahchea mehne dóihta tíre tuho nunu wahcãna. ¹⁷ Æ tuho nunu wahcãpahta tãa wapa buicã jia yucu nuhcori mariea yucu yoaro sehe ahrina masa cãhu yoari pja cãno pjaerara. Æ cãno pjaeraa, yu yare ti cahmari buhiri paina tinare ti ñano yoachu, ñano yuhdua, yu yare duhunocahna. Paina tinare ti ñano yoachu tíre cãno pjaeraa, yu yare duhunocahna. ¹⁸ Æ yoa tja watoi boraa yapari noaa buhea yoaro sehe jira. ¹⁹ Æ jia paina sehe noaa buheare tuhoa, ahri yahpa macaare wacũ nunu yuhduara. Niñerure bujua cahma,

paye baro cãhure payu cahma, tíre goa pja yuhduara tina. Ti ã tuhtotuchu tí sehe noaa buheare ducatarata. Ti ã ducatachu masa noaa sehere yoerara. Dicha maria yucu yoaro seheta jira. ²⁰ Æ yoa noari yahpai boraa yapari noaa buhea yoaro sehe jira. Æ jia paina sehe noaa buheare tuhoa tíre cahmana. Tíre masiina jia, Cohamacu to cahmano seheta noare yoara tina. Cäina mahanocã noare yoara treinta yapari dicha tiro seheta. Paina bui curero noare yoara sesenta yapari dicha tiro seheta. Paina pjíro noare yoara cien yapari dicha tiro seheta —ni yahuha Jesu tinare.

Jesu sihãria quitire buheha

(Lc 8.16-18)

²¹ Æ ni tuhsu õ sehe ni yahu namoha Jesu:

—Ne, sihãriare ti sihãri baharo tiare dihi biato docapu cãerara. Æ jia tiare coãri casario docapu cãerara. Muanopũ duhu payora noano buhria dutia. ²² Jipihiti ti masierari cjirire baharo masa masiahca. Sihãria to buhriachu mari ñu masino seheta panopure ti masierari cjirire masiahca masa. ²³ Ahrire noano tuhoga musa. ²⁴ Mahanocã masi duana mahanoã masinahca. Pjíro masi duana pjíro masinahca. Æ jina musa tuhona noano tuho nunuga. ²⁵ Noano tuho nunuriro noano masinohca. Tuho nunuerariro “Mahanocã tuhoja”, to nipachuta tí sehe butia waharohca —niha Jesu tinare.

Jesu trigore toariro quitire buheha

²⁶ Æ ni tuhsu õ sehe ni yahu namoha:

—Cohamacu masa bui puhtoro to suho jia trigore toariro yoaro sehe jira. ²⁷ Toa tuhsu bohrearo to toari duare ñuna tiro. “¿Dohse du wijaa ta bucãjari tí?” ni ñu masierara toariro to basi. ²⁸ Tí toari ti basi dicha tira. Pari pũca ji muhtana. Baharo pari paro wi-

jaa bucuara. ²⁹Tí parori bucu tuhsuchũ ñũno pahara. Pahari pja jira. (To toaa ti bucuarire to masieraro seheta Cohamacũ yaina masa ti wahachu cũhũre yahu pahũno masierara masa) — ni buheha Jesu.

Mostaza yapa quitire yahuha Jesu

(Mt 13.31-32; Lc 13.18-19)

³⁰Ã ni tuhsũ õ sehe ni buhe namoha Jesu piti dahre buhero:

—¿Ne Cohamacũ masa bui puhtoro to suho jia yaba baro yoaro sehe jijari, msa tuhotuchũ? ¿Di quiti mehne tíre yahunahcari? ³¹Mostaza yapacã yoaro sehe jira puhtoro Cohamacũ to suho jia. Tí yapacã to toachũ mahabiari yapacã jira. ³²Ã jiparota tí yapacã noano dura. Ã jiro pjibiadu wahara. Ã jia tu dupuri bujua dupuri bucuachũ ñua minichahca peri tu dupuripu suhti suhara. (Pjibiadu to wahariro seheta mũano macarirore mari puhtororesi masiina mahainacã ti ji muhtapachuta baharopũ tina payũ waahca) —niha Jesu.

Quiti mehne to buherire yahuha Jesu

(Mt 13.34-35)

³³Ã ni tuhsũ, tí quiti ti niriro seheta payũ quitire tuho ti cũno pjarõ puro noaa buheare buheha tinare. ³⁴Quiti marieno yahueraha tinare. Tuhsũ, ti sahsero jinare Jesu noano yahu pahũoha to buheinare.

Jesu wihnonore yusũ dutiha

(Mt 8.23-27; Lc 8.22-25)

³⁵Ã yoa tí dachoreta nahi borachupũ Jesu to buheinare õ sehe niha:

—Basa, sie coapũ pahãjihna —niha tinare.

³⁶To ã nichũ tuhoa Jesu to jiriapũ dohoriapũ samu, masare yahpapũ ducuinare tõihta cũ, to buheina dihta Jesure na pahãa wahaha. Ã yoa paye buso mehne paina cũhũ tinare piti ti

pahãa wahaha. ³⁷Ti ã pahãchũ wihnono tuaro taha. Ã taro dohoriare pahcõri tuaro cã sãaha. Mahanocã duhsamaha ti miniboro. ³⁸To ã waharo watoi Jesu sehe dohoria oturopũ suhti puti mehne to dapu ño tu tjiãhno carĩno niha. Ã jia tina tirore wahcõha.

—Buheriro, mari mini yariana tana nija. ¿Ã jica niera putiajari muhũ? —niha tina tirore.

³⁹Ti ã nichuta Jesu sehe wahcã, wihnonore:

—Tõ purota wã duhuga —niha. Ã ninota pahcõri cũhũre:

—Yusua wahaga —niha bucuparirore.

To ã nichuta wihnono yuhduã wahaha. Ã jia pahcõri cũhũ yusũ boraa wahaha.

⁴⁰—¿Dohse ni cuimacanocana nijari msa? ¿Msa yuhũre wacũ tuaerasinijari? —niha Jesu.

⁴¹To ã yoachũ ñua tina cua yuhduã wahaha.

—Cue, ¿dohse jiro baro masũno jijiari ahriro? Ahri wihnono, pahcõri cũhũ to dutichũ yuhdurucaerara tirore —niha tina ti basi.

Watia ti cohtotarirore noariro wahachũ yoaha Jesu

(Mt 8.28-34; Lc 8.26-39)

5¹⁻²Ã yoa tina sie coapũ Gerasa macaina ya yahpapũ pahã suha. Pahã su, Jesu sehe dohoriapũ sãariro maja surucaha. To ã maja surucari baharocãta, watia ti cohtotariro tãa copari, masa copari watoi jiro wija ta, tiro cahapũ taha. ³Tiro watia ti cohtotariro masa copari watoi jiro jia tiha. Tirore ne cãiro coma da pjiri da mehne ñaha duhte cũno bihoeraha. ⁴Payũ tahari masa tirore dahpori wupõa sorori mehne comaa dari mehne duhte timaha. To wamomacari cũhũre duhte timaha. Wiho mejeta tiro sehe comaa darire nuha, dahpori wupõa

sorori cūhure nuha site mujaha. Ā jia tiro tuariro to jichū ñua masa sehe tireore cjuaa bihoeraa tiha. ⁵Ñamine, dachore tū yucuripū jia copari taa copari watoi ā sañurucua tiha tiro. Ā yoa taa mehne to basi to pjacure cjāye mujaa tiha tiro. ⁶Ā yoa Jesu to maja surucachū yoaropū Jesure ñuroca, tiro cahapū muroca ta, na tuhca caha suha, tireore ño payoro taro. ⁷⁻⁸—Watia wijaahga tireore —niha Jesu.

To ā nichū tuhoro watia ti cohtotariro ō sehe ni sañurucuha:

—Jesu, Cohamacu Jipihtina Bui Jiriro macuno, ¿yabare yoai tai nijari muhu yuhure? Cohamacu to ñurocaroi sinija yuhū mūhure. Yuhure ñano yoai tjiga —ni sañurucuha watia ti cohtotariro Jesure.

⁹—¿Yabariro wama tijari muhu? — niha Jesu tireore.

—Sā payū jija. Ā jina “Payū watia”, wama tija. ¹⁰Ahri dihtapū jiiinare säre pa yahpapū waha dutiecu tjiga —ni payū tahari siniha watia ti cohtotariro.

¹¹Tí pjare ti cahacāi tūcu dahpotoi yesea nuina payū chua niha. ¹²Tóti ti churucuchū ñua ō sehe ni siniha watia:

—Sina yesea cahapū warocaga säre ti pjacuripū sā sāahto sehe —ni siniha watia tireore.

¹³Ti ā nichū tuhoro “Jai. Wahaga”, niha Jesu. To ā dutichū, watia masunopū jirina cjiri sehe wijaa, yesea pjacuripū sāaha. Tina yesea sehe payū waro jiha, dos mil. Ā yoa tinare ti sāari baharo, yesea jipihtina bucupariro duhtū cahapū pari cunūpū muroca buha, tí taropū bora ñoja, mini yaria pihtia wahaha.

¹⁴Ti ā mini yariachū ñua yeseare ñū wihboina sehe muroca wahcā, pjiri macapū cūhure, daa macaricāpū cūhure tíre yahu sitea wahaha. Ti ā yahuchū tuhoa, masa sehe payū ti ā waharire ñua wahaha. ¹⁵Ā jia Jesu cahapū wihia, payū watia ti cohtotariro cjiro to suhti

tiro, tuho masiro to dujichū ñua, cui niha. ¹⁶Watia ti cohtotariro cjirore, yesea cūhure ti ā waharire ñua sehe paina masa ti cahai wihinare noano yahu pahñoa. ¹⁷Ti ā yahu pahñochū tuhoa, Jesure tuaro mehne pa sehepū waha dutiha.

¹⁸Ā yoa dohoriapū Jesu to samuchū ñuno, “Mūhū mehne waha duaja” ni, tuaro sinimaha watia ti cohtotariro cjiro sehe Jesure. ¹⁹To ā nichūta Jesu tireore ō sehe ni yahuha:

—Yūhū mehne taecu tjiga. Mū ya wūhūpū mū coyca cahapū yūhū mū puh-toro mūhure yū yoarire yahui wahaga. Mūhure yū pja ñūrire yahuga tinare — niha tireore.

²⁰To ā nichū watia ti sāanoriro cjiro sehe Decapoli wama tiropū jia macaripū Jesu tireore to yoari cjirire yahu dūcaha. To ā ni yahuchū tuhoa jipihtina masa chua wahaha.

**Jairo maconore yuhduchū
yoa, cahā ñuricoro cūhure
yuhduchū yoaha Jesu**

(Mt 9.18-26; Lc 8.40-56)

²¹Ā yoa pari turi Jesu to majare pahā suchū masa payū tiro cahapū bucupariro duhtū cahapū cahmachuha. ²²Ti ā cahmachuchū sā judio masa buheri wūhure ñū wihboriro Jairo wama tirore wihi, Jesure ñū, to dahpori cahapū na tuhca caha sūro, ²³ō sehe niha:

—Yū macocā yariaro nihre. Ā jicu ticorore mū wamomaca mehne ña payo, noaricoro yoai taga. Mū ā yoachū ticoro masanohca —niha tiro Jesure.

²⁴To ā nichū Jesu cūhū sehe tiro mehne wahaha. Mahai to wahachū payū masa tireore nunū ti wahcā bihsaro surucu suha tireore. ²⁵To ā bihsaro wahachū numino doce cūhmari waro dachoripe cahā ñurucuricoro tóti jiha. Tó pano payū duhturua ticorore ñano yuhduchū yoaha. ²⁶Ā yoa duh-

turuare jipihtia to niñeru mehne wamaha ticoro co tiro. Ti ã yoapachuta ticoro mñananota jirucuha. Æ jiro ticoro tó pano to jiro yuhdoro ñano wahaha. ²⁷To ã ñano yuhdoricoro to jichu masia Jesu to yoirere tuhoa paina tíre yahuha ticorore. Æ ti yahuchu tuhoro ticoro Jesu baharo masa payu watoi wihi, Jesu suhtirore ñaha ñuha. ²⁸“Yuhu to suhtiro dihtare ñaha ñuco noaricoro wahacohca”, ni tuhoutuha. ²⁹Æ jiro ticoro to ñaha ñuri baharo to cahã ñuare duhuro to pjacure noari pjacu tuhoutuha. ³⁰Æ jiro Jesu to tuua mehne dohatiare to cohãrire masino, masa watoi majare ñuha.

—¿Noa yu suhtirore ñaha ñuri? —niha tiro.

³¹To ã nichu tuhoa to buheina ò sehe niha:

—Bihsa nina. Æ jia masa payu mũhure pihanocahna. “¿Noa yuhure ñaha ñuri?” nicu, ¿dohseacu ã nijari mũhu? —niha tina sehe tirore.

³²Æ jiro Jesu tirore ñaha ñuricorore macaha. ³³To ã macano watoi ticoro sehe to pjacu noano wahachu tuhoutu cuí, tetera na tuhcuca caha suha to panoi tirore ño payoro. ³⁴Æ jiro ticoro potu yahu pahñoa tirore. To ã ni yahuri baharo Jesu ticorore ò sehe ni yahuha:

—Maco, yuhure mu wacu tuua mehne noaricoro tjuara mipure. Wahchea mehne wahaga. Dohatia marienicoro jiga —niha Jesu ticorore.

³⁵To ã ni durucuro watoi judio masare buheri wuhure ñu wihboriro ya wuhu macaina yahua wihiha:

—Mu maco yariaa wahahre. Æ jicu buherirore pji tai tjiga —niha tina.

³⁶Ti ã nipachuta ã tuhutonocahno, Jesu ñu wihborirore ò sehe ni yahuha:

—Cahya tuhoutu tjiga. Yuhure wacu tuaga. Tí dihtare yoaga —niha ñu wihborirore.

³⁷Æ ni tuhsu Santiago, to bahuro João, Pedro tina dihtare “Yuhu mehne taga”,

niha Jesu. ³⁸Æ pji wahcãno sã judio masa buheri wuhure ñu wihboriro ya wuhuru suha tina. Tí wuhuru masa payu ñano bisi, ñahacaha tiia ti sañurucuhu ñuha Jesu.

³⁹—Ñano ni, ñahacaha tiiena tjiga musa. Maharicorocã musa ã ni tiichu yariaerara. Carino nina —niha Jesu tinare.

⁴⁰To ã nichu tuhoa “Æ nimacanocano nina ahriro”, ni bujuha tina sehe tirore. Ti ã yoachu tiro tinare sopacaru wio pahñonocaha. Æ wio tuhsuro maharicorocã pucsumare, tiro mehne macaina cãhure ticorocã cãhuru naaha Jesu.

⁴¹Æ naa tuhsuro Jesu ticorocãre to wamomacare ñaha:

—Talita cumi —niha tiro. (“Talita cumi” nino, “Maharicorocã wahcãga”, nija yuhu”, nino nina.)

⁴²To ã nichuta ticorocã wahcãrucu su, tiniha. Doce cãhmari cjuaricoro jiha ticoro. Ticorore to ã yoachu ñua tina cã yuhduu wahaha. ⁴³Ti ã yoachu ñuno, Jesu tuaro mehne tíre to yoirere yahu site dutieraha. Æ yoa tuhsu ticorore chua wa dutiha.

Nazare macaina Jesure cahmaeraha

(Mt 13.53-58; Lc 4.16-30)

6 Æ yoa tópu jiro waha, Jesu to buheina mehne to ya dihtaru tju suha. ²Æ tju sũro Sabado jichu sã judio masa buheri wuhuri buhe dũcãha Jesu. To ã buhechu masa payu tirore tuhoa, cãaa wahaha.

—Cue, ¿ahriro nohopu tuhoari ahri buheare? ¿Dohsearo noano masi pahñonocajari ahriro? Cohamacu tuua mehne yoa ñona tiro to basi. ³Ahriro taboa dahrari masũno María macũno, Santiago, José, Juda, Simo ti wahmino jimanaro. Æ yoa to bahana numia mari ya macai jisnimanabu. Æ jiro tiro mari yoaro sehe jiro tjira —niha tina Jesure tuhomarina.

Ã jia Jesure ñu tuhtia, tirore cahmaeraha. ⁴Ti ã cahmaerachu ñño õ shehe niha Jesu:

—Cohamacu yare yahu muhtarirore paina ño payora. Ti ã ño payopachuta to ya maca macaina, to coyea, to ya wuhui jiina ño payoerara tirore. Ã jina yuhure ño payoerara msa õi yu bucaririro jichu —niha Jesu tinare.

⁵Ã jiro tí macai jiro Jesu Cohamacu tuua mehne yoa ño masieraha. Ã yoaeraparota cáina dohatiina bui to wamomacare duhu payo, noaina wahachu yoaha tiro. ⁶Ã jiro tó macaina Jesure ti quihõno tuhoerachu ñño cuua wahaha tiro. Ã jiro Jesu tó cahai jia macaripu buhero wahaha.

Jesu doce buheinare buhe dutiro warocaha

(Mt 10.5-15; Lc 9.1-6)

⁷Ã yoa Jesu doce to buheinare pjiroca, puaro dihta warocaha tinare macaripure buhe dutiro. Ã jiro to tuaare waha tinare watiare ti cohã wiohto shehe. ⁸Ã warocaro pãore, wajure, niñerure tiro naa dutieraha tinare. Ti tjuayucu dihtare naa dutiha. ⁹Ã ni tuhsu, dahpori tu cúa cahsarire sãa dutiha tinare. Cũnota suhtirore sãa dutiha tinare. Puaro sãa dutieraha. ¹⁰Ã jiro õ shehe ni yahuha tinare:

—Jipihtia macaripu musare ti carĩno wachu tí wuhuihta tjuasiniga. Coã wahanapu wijaahga tí wuhure. ¹¹Ã jina pa maca macaina musare ti cahmaerachu, ti tuho duaerachu tí macare yuhduana dahpori macaa dihta pohcari mene wajã site cūga msa tinare ti ya buhirire masichu yoana —ni yahuha Jesu tinare.

¹²Ã jia tina doce buheina masare ti ñaa tuhotumari cjirire tuhotu cohtota duti, Cohamacure maca duti, buhea wahaha. ¹³Ã wahaa payu watiare cohã wio, dohatiinare se mehne wisõa, noaina wahachu yoaha.

João masare bautisarirore paina wajãha

(Mt 14.1-12; Lc 9.7-9)

¹⁴Ã yoa Jesure masa payu masiha. Ã jiro to yoarire puhtoro Herode tuhorocaha. Ã tuhorocarõ õ shehe ni tuhotumaha tiro paina mehne:

—João masare bautisariro yariariro cjiro pari turi bajuaro nica. Ã bajuariro jiro to tuua mehne tíre yoaro nica —ni durucumaha Herode paina mehne. (“Jesu Joãota jira”, ni tuhotumaha.)

¹⁵Paina shehe õ shehe ni tuhotumaha:

—Elia jira —ni tuhotumaha.

Paina shehe:

—Cohamacu yare yahu muhtariro panopu macaina cjiri yoaro shehe jira tiro —ni tuhotumaha Jesure.

¹⁶Ti ã ni tuhotupachuta Herode shehe Jesu to yoarire tuhorõ õ shehe ni tuhotumaha:

—João dapure yu cjã ta dutiriro cjiro bajuaro nica —ni tuhotumaha.

¹⁷⁻¹⁸Joãore ti wajãhto pano Herode tirore ñaha duti, peresu yoa dutiha. Tó pano Herode to bahuro Felipe namonore Herodiare namo tiha.

—Mũ bahũ namonore namo ticũ Cohamacu dutiare yuhducaĩ nica mũhũ —ni yahumaha João Herodere.

To ã niri buhiri to namono Herodia Joãore peresu ti yoachu cahmaha. ¹⁹Ã jiro ticoro shehe Joãore ñu tuhtiro, tirore wajã duti duamaha. Ã yoa duaparota ticoro tirore wajã duti masieraha. ²⁰Herode Joãore cuiro, “João noare yoiro, ñaa buhiri marieriro jira”, ni tuhotuha. Ã jiro Herodere cariboro yoaha João shehe tirore yahuro. Ã to caribopachuta tiro wahchea mehne tuhomaha Joãore. ²¹To ã wahchea mehne tuhopachuta Herodia tirore to wajã duti dacho mũ suha. Tí pjare Herode to masa bajuari dacho jichu tiro bose mũmũ dahreha. Ã jia to gobierno macaina, to

surara puhto, Galilea macaina puhto cãhu to ya bose numure ñua wihia. ²²Ti ã wihiri baharo Herodia macono bose numu ñuno wihiro ti ñurocaroi basa ñoha. To ã basa ñochu ñua Herode to pjirocaina mehne wahcheha. Æ jiro õ sehe niha Herode ticorore:

—Mũ cahmaare siniga yuhure. Æ jicu waihtja mũhure mũ cahmaare. ²³Cohamacũ mehne potocã nii nija mũhure. Mũ sinino puro yũ yare dacho macai waihtja mũhure —niha tiro ticorore.

²⁴To ã nichu tuhoru ticoro Herodia macono sehe to pocoro cahapu waha, õ sehe ni sinituha:

—¿Yabare sinicohcari yuhu? —ni sinituha ticoro to pocorore.

—João masare bautisariro dapure siniga —niha to pocoro.

²⁵To ã nichuta ticoro Herodia macono ño duaro mehne puhtoro Herode cahapu waha, siniha:

—João masare bautisariro dapure waparõ mehne waga yuhure —niha ticoro.

²⁶To ã nichu tuhoru puhtoro Herode sehe tuaro cahyaha. Masa ti ñurocaroi “Waihtja mũhure”, ni tuhsuha tiro. Æ jiro buõ tiro “Mũhure waeraja”, ni masieraha ticorore. ²⁷Æ jiro dóihta surarare peresupu jijnare cohtarirore João dapure cã ta, na ta dutiha. ²⁸To ã dutichu tuhoru surara sehe waha, to dapure cã ta, waparõ mehne na taha. Na ta tuhsu, nuhminore Herodia maconore waha. To ã wachu ticoro to dapure ñaha, to pocorore yuhdoha.

²⁹Æ jia João buheina sehe tĩre tuhoa tũpũre waha, to pjacu cjirore na wahcã, tãcapu ti sahari copapu na sãa duhu payoha.

Jesu cinco mil bui masare chua waha

(Mt 14.13-21; Lc 9.10-17; Jn 6.1-14)

³⁰Æ yoa Jesu to warocarina to cahapu tju sua, ti yoirire ti buherire yahuha tĩrore. ³¹Tĩ pjare masa payu ã majareru-

cua, tinare chũro waeraha. Æ jiro õ sehe niha Jesu tinare:

—Masa marienopu mari sahsero sosinina wahajihna —niha tinare.

³²Æ jia tina ti sahsero dohoria mehne masa marienopu wahaha. ³³Tĩ ã wahachu ñua masa payu tinare masiha. Æ masia payu macari macaina mahapu waha, Jesu to suhtopu tina masa sehe mũroca wahcã su muhtaha. ³⁴Tĩ ã suchu Jesu wahã su, busocapu sãariro majano, tiro masa payu jijnare ñuha. Oveja puã marieina yoaro sehe jiha tina masa, to ñuchu. Æ jiro Jesu tinare pja ñuno, payu noaare buhea tiha tinare. ³⁵Ñamichahapu doce buheina Jesu cahapu su õ sehe niha:

—Õ masa marienopu jira. Ñamichahapu jira. ³⁶Õ cahacã jia macaripu daa macaricãpu, bujua macaripu ti chuhtire nuchu dutiga masare ti puhu tihti cjihtire —niha tina Jesure.

³⁷—Chũare waga tinare —nimaha Jesu to buheinare.

To ã nichu õ sehe ni yuhtihã:

—¿Dos cientos dachori dahrari wapa niñeru mehne ti chuhti pãore nuchubocari sã? —niha tina Jesure.

³⁸—¿Nohope curiri pãõ curiri jijari? Ñuna wahaga —niha tiro.

To ã nichu tina sehe chũare boca õ sehe niha:

—Cũ wamomaca pihtia curiri pãõ curiri, puaro wahi jira —niha tina.

³⁹Tĩ ã nichu tuhoru Jesu sehe pja curuari tja bui duji dutiha masare. ⁴⁰To ã duji dutiri baharo tina pja curuari dujiha. Cãa curuari cincuenta masa jiha. Paye curuari sehe cien masa jiha. ⁴¹Tĩ ã duji tuhsuchu ñuno Jesu sehe cũ wamomaca pihtia curiri pãõ curirire, puaro wahi mehne na, muanopu ñuha. Æ ñuno Cohamacũre “Noana”, niha. To ã niri baharo pãõ curirire nuha, to buheinare masare witi dutiro waha. Æ yoa tuhsu, puaro wahire witi dutiha jipiptinare.

⁴² ã jia jipihtina chũ, yapi yũhdũa wahaha. ⁴³ Ti yapi wahyorire doce pũhũse waro pãore, wahi cũhũre na cahmachu wahpo dapoha tina. ⁴⁴ ã yoa pãore chuina mũa dihtare ti quihõchũ cinco mil mũa jiha. (Numia cũhũ, macanacã cũhũ tõi chuina jiha.)

Jesu co bui ducu wahcãha

(Mt 14.22-27; Jn 6.16-21)

⁴⁵ Tĩ pjata Jesu to buheinare dohoripũ samu duti, sie coapũ Betsaidapũ to pano pahãyu dutiha. ã jiro ti pahãri baharo Jesu sehe masare coha sitiha. ⁴⁶ Coha siti tuhsũ tũcupũ Cohamacũre sinino wahaha. ⁴⁷ Baharo ñamipũ dohoriai bũcupariro dacho macai ti pahãrucuchũ Jesu cãirota ti pahã tariropũ jiha. ⁴⁸ Tõpũ jiro, tina ñano yũhdũ ti wajachũ ti panoi wihnono tachũ ñũrocãha tiro. ã jiro bohrea mũja tahto pano tina cahapũ waharo co bui ducu wahcãha. Tinare tiro yũhdũ wahcã duamaha. ⁴⁹ To yũhdũ wahcã duapachũta tirore co bui to tachũ ñũa, “Yariariro cjiro jiboca”, ni tuhotumaha tina. ã ni tuhotua tina sañurucuha. ⁵⁰ Jipihtina tirore ñũa, ñũ cũa waha, sañurucuha. Ti ã ñũ cũachũ ñũno Jesu tinare õ sehe ni yahuha:

—Ne, yũhũre cuiena tjiã. Yũhũta jija —niha tinare.

⁵¹ ã ni tuhsũ tiro tina mehne dohoripũ samua wahaha. To samuri baharocãta wihnono yũhdũa wahaha. To ã wahachũ tina sehe cũa yũhdũa wahaha. ⁵² To pão payũ yoarire wacũeraha tina. Tua yũhdũariro to jiare noano tuho ñahaeraha.

Jesu Genesare macainare, dohatiinare noaina wahachũ yoaha

(Mt 14.34-36)

⁵³ ã yoa tina pahã sũ, Genesare dih-tapũ wahã sũ, tia dohoriare dũhte poho, dũhtũ cahapũ pahsaha. ⁵⁴ ã yoa tina dohoripũ jiina ti majachuta masa sehe

Jesure ñũ masiha. ⁵⁵ ã ñũ masia jipihtiro ti ya yahpapũ mũroca maja, dohatiinare ti coãa cahsari mehne yo wahcã, sũha Jesu cahapũ. “Jesu tõpũ jihre”, masa ti nichũ tuhoa to cahapũ sũha tina. ⁵⁶ ã jia jipihtia macari to sũa macaripũ, bũjua macaripũ, daa macaricãpũ, pache duaina cahapũ, masa dohatiinare ti cũnopũ Jesure to suhtiro dũhtũ cahare ñaha ñũ dua tuaro siniha tina:

—Mũ suhtiro dũhtũ caha dihtare sãre ñaha ñũ dutiga —ni siniha.

ã jia to suhtirore ñaha ñũinape tõpeinata noaina wahaa tiha.

Masa ñaina wahachũ yoare yahuha Jesu

(Mt 15.1-20)

7 ã yoa Jerusalẽpũ tarina sã coyera judio masare buheina, fariseo curua macaina cũhũ Jesu cahapũ cahmachuha. ²⁻⁴ Fariseo curua macaina jipihtina paina judio masa cũhũ ti ñũchũsuma cjiripũ ti yoa dutiriro seheta wamo cosaro marieno chũera tiha. ã jia pache duaina cahapũ waha, sũ, majare tju wihiina cũhũ ti yoa dutiriro seheta wamo cosaro marieno chũera tiha. Payũ paye dutia cũhũre ti ñũchũsuma cjiripũ ti yoa dutiare yoaa tiha. Tasa waparire cosaa, dihi biatorire cosaa, comaa biatorire cosaa, yoaa tiha tina judio masa, “Cohamacũ ã cahmana”, nia. ã jia sã coyera judio masare buheina, fariseo curua macaina cũhũ Jesu cahapũ cahmachua, Jesu buheina wamo cosaro marieno ti chũchũ ñũha. ⁵ ã ñũ tuhsua Jesure õ sehe ni sinituha:

—Mũ buheina chũa, mari ñũchũsuma cjiiri ti yoa dutiriro cjiro seheta ti wamomacarine wamo cosaerara. ¿Dohse yoa mari dutiare yoajerajari? —niha tina Jesure.

⁶ Ti ã nichũ tuhorõ Jesu õ sehe ni yahuha tinare:

—Masa ti baharo buhusehei ñano yoa cohtaina jira musa. Panopure Cohamacu yare yahu muhtararo cjiro Isaia potocata yahuro niri jira musa yoaro sehe tuhoreinare. O sehe ni yahu, joaa tiha tiro:

“Ahrina masa yuhure noano durucu-pahta ti tuhotuapu yuhure ne ño payoerara.

7 Ñ jia yuhure ti ño payoa yaba cjihti jierara. ‘Cohamacu ya dutia jira ahri’, ni mahño buhera ti ya buhea sehere”, ni joaha Isaia cjiro. 8 Tí potocá tjira. Cohamacu ya dutia sehere duhu, masa ti yoa dutia sehere cohtota yoa yuhdurucu sua tira musa. 9 Cohamacu ya dutiare cohãna, musa coyeyá ya dutia sehere yoara musa. 10 Ñ sehe yoana Cohamacu ya sehere yuhdurucana nina musa: Panopure o sehe niha Cohamacu Moise cjiro to joariro seheta: “Musa pucsumare ño payoga. Cãiro to pucsumare ñano quitidahreriro jiro tí buhiri ti wajãhtiro cjihto jirohca”, niha Cohamacu Moise cjirore to cãiri dutiai. 11 To ã nipachuta o sehe yoa dutira musa ti pucsumare yoadoho dutierana: Ti pucsumare ti waborire Cohamacu sehere wa dutira musa. Ñ ni buhemana musa. 12 Ñ buhena ti pucsumare ño payochu yoerara musa tinare. 13 Ñ yoana Cohamacu dutiare yuhdurucana nina musa mari ñuchusuma cjiro ya dutia sehere yoana. Painare musa buhea dihtare tuho dutira musa. Payu tó sehe jiare yoara musa —niha Jesu tinare.

14 Ñ ni tuhsuro paina cãhure pjirocaha tiro. O sehe niha tinare:

—Musa jipihtina yuhure tuhona taga. Tuhsu yu niare noano tuho ñahaga musa. 15 Musa duserire sãa sehe musa chãa sehe musare buhiri tichu yoerara. Ñaare musa tuhotua sehe musare ñaina jichu yoara. 16 [Yuhure noano tuhoga musa] —niha Jesu.

17 Tinare ã ni yahu tuhsu Jesu masa cahapu jiriro cjiro waha, wuhupu sãa wahaha. Ñ to sãa suchu ñua to buheina sehe

to buherire sinitu ñuha. Ti ã sinitu ñuchu tuhoro o sehe niha tiro:

18 —¿Musa cãhu ne tuho ñahaerasinijari tíre? Musa duserire sãa sehe musa chãa sehe musare ñaina jichu yoerara, Cohamacu to ñuchu. 19 Tí musa tuhotuapure sãaerara. Musa pjaropu sãa su, yuhdu wijaa wahara —niha Jesu.

Ñ nino “Jipihtia chãa noaa jira”, nino niha. 20 Ñ yoa o sehe ni namoha tjao:

—Musa ñaa durucua sehe musa duseri wijaa sehe musare ñaina jichu yoara, Cohamacu to ñuchu. 21–22 Ñano tuhotua, numia mehne ñano yoarucua, yacaa, masare wajãa, namo tiriropu jiparota pacorore manu tiricorore wãana tia, paio yare tuaro cjoa, ñano yoaa, mahñoa, buo tiro marieno ñaa yoaa, paina ti cãuare ñu yabia, ñano quitidahrea, “Painare yuhdurucaja”, ni tuhotua, tuho masieraina jia, tí jipihtia musare musa tuhotuapu tara. 23 Jipihtia ahri ñaa musa tuhotuapu taa, musare ñaina jichu yoara, Cohamacu to ñuchu —niha Jesu.

Judio masono jieraricoro Jesure wacú tuaha

(Mt 15.21-28)

24 Ñ ni tuhsuro Tiro wama tiri maca cahapu, Sidõ wama tiri maca cahapu sũro tó macari wuhupu sãa wahaha. Ñ sãahno painare to jiri wuhure yahu dutieraha. Ñ yahu dutieraparota tinare tiro duhti masieraha. 25 Tí pjareta numino to macono watino to cohtotaricoro to cahai jiha. Ñ jia Jesu yoarire ñua paina to pocorore yahuha. Ti ã yahuri baharo to pocoro sehe waha, Jesu dahpori cahapu na tuhcuca caha suha tirore ño payoro. 26 Ticoro Sirofenicia wama tiri yahpa macaricoro jiha.

—Watĩnore cohã wiosiniga yu macore —ni siniha ticoro Jesure.

27 To ã sinichu tuhoro o sehe niha Jesu:

—Wahmanore wuhũ pũro pohna ya chuare dieyacãre yũ wa muhtachu tó wahaerara. Israe masa yare pa yahpa macainare yũ wa muhtachu tó wahaerara —niha Jesu ticorore piti dahre yahuro.

²⁸—Ã tjira puhtoro. Ã jipachuta dieyacã cũhũ mesa docai ti pohna ti chu site boroare chu cohtara tinacã cũhũ. (Pa yahpa macaricoro yũ jipachuta yuhũ cũhũre yoadoho masina mũhũ) —ni yuhtihã ticoro.

²⁹—Mũ ã ni yuhtichũ mũ macore watĩno wijaa tuhsuhre. Ñũco wahaga —niha Jesu ticorore.

³⁰To ã nichũ tuhoro majare tjuaa, to wuhũpũ tju sũro, to maconore watĩno marienicorore camapũ jiricorore ñũha.

Cahmono tuhoeraritore, durucu masieraritore noariro wahachũ yoaha Jesu

³¹Tĩ pjare Jesu Tiro wama tiri maca cahapũ jiro waha, Sidõ wama tiri macare sũ yuhdu wahcã, Decapoli wama tiropũ jia macarine sũ yuhdu wahcã, Galilea wama tiri bucũpariropũ sũha jũna. ³²Ã jia cahmono tuhoeraritore, noano durucu masieraritore Jesu cahapũ na wihaha paina.

—Mũ wamomaca mehne ña payoga tirore —ni siniha tina tirore.

³³Ti ã nichũta Jesu sehe tuhoeraritore na wahcã, masa marienopũ sũho sũha. Ti sahsero jiha. Tuhsũ, Jesu to wamo picari mehne tuhoerariro cahmo coparire be sõha. Ã yoa tuhsũ, chahcho puti, to ñahmanore ña payoha.

³⁴Ã yoa tuhsũ mũanopũ ñũ mũo, yajeri na, õ sehe niha:

—Efata —niha Jesu. (“Efata” nino, “Pjõohga”, nino nina. Ã nino tirore tuho dutiro niha. Ã nino noano durucu dutiro niha.)

³⁵To ã nichũta tiro sehe tuho boca, to ñahmano bidaro wahachũ tuhoturo

noano durucuha. ³⁶Ã jiro Jesu tinare tĩre painare yahu site dutieraha. To ã yahu site dutierachũ tuhopahta tina sehe painare yahu site namoha. ³⁷Ã jia masa tuho cua yuhdua waha, õ sehe niha:

—Jipihtiare tiro noano yoara. Tuhoeraritare noano tuhochũ yoara. Durucu masieraina cũhũre noano durucuchũ yoara Jesu —niha masa.

Cuatro mil bui masare chuare waha Jesu

(Mt 15.32-39)

8 Tĩ pjare pari turi masa payũ ti cahmachuri baharo chũa maeraina ti jichũ ñũno Jesu to buheinare pjirocaha:

²—Ahrina masa tia dacho waro yuhũ mehne ji tuhsũra. Ã yoa tinare puhi mariaha. Ti puhi maerachũ ñũcu tinare pja ñũja yuhũ. ³Paina tina mehne macaina yoaropũ tahre. “Tinapũ jũca baaina mahai borari”, nicũ tinare chũa marieno ti wuhũsepũ waha duti duaeraja. Ã jicũ tinare puhi wa duaaja —niha Jesu to buheinare.

⁴—¿Dohse yoa mari õre masa marienopũre pãore boca wabocari mari? —niha to buheina sehe Jesure.

⁵—¿Nohope curiri pão curirire cjuajari mũsa? —ni sinituha Jesu.

—Siete curiri jira —niha tina.

⁶Ti ã ni yuhtichũ tuhoro, tiro masare yahpai duji duti, siete curirire pão curirire na, Cohamacũre “Noana”, niha. Ã ni tuhsũ, tĩ curirire nuha, to buheinare wa, masare witi dutiha. To ã dutiri baharo to buheina sehe pãore masare witiha. ⁷Ã jia wahi cũhũre mahainacã cjuaha tina. Ã jiro tinare Cohamacũre “Noana” ni, wahi cũhũre witi dutiha. ⁸Ti witi tuhsuchũ tina chũa, yapi yuhdua wahaha. Ti yapi wahyorire siete puhũse waro wahpo dapoha tina. Tina cuatro mil bui masa jiha. ⁹⁻¹⁰Ã yoa tuhsũ Jesu masare coha sitiha. Coha siti tuhsũ to buheina mehne dohoriapũ samuha.

Samu tuhsu Dalmanuta wama tiro cahapu wahaha.

**Fariseo curua macaina Jesure
Cohamacu tuaa mehne yoa ño dutiha**

(Mt 16.1-4; Lc 12.54-56)

¹¹ Ñ yoa fariseo curua macaina wihi, Jesu mehne cahma sayoha. Tina Jesure Cohamacu tuaa mehne yoa ño dutia, to yoa ño masierachu ñu duamaha. ¹² Ti ã dutichu tuhoro Jesu cahyaro mehne yajeri sãano, õ sehe niha:

—¿Musa mipu macaina dohse yoana musa Cohamacu tuaa mehne yoa ñoare ñu duajari? Potocã niita nija musare. Mipu macinare musare Cohamacu tuaa mehne ne yoa ñosi yuhu —niha Jesu.

¹³ Ñ ni tuhsu waha, pari turi dohoriapu samu, sie coapu pahãa wahaha.

**Fariseo curua macaina, Herode
mehne macaina cùhure ñaare ti
buheare yahuha Jesu**

(Mt 16.5-12)

¹⁴ Ñ wahaa, pãore boa waha, dohoriai cù curita pãore cjuaha tina. ¹⁵ Ñ yoa Jesu cuaro mehne yahuha tinare:

—Noano yoanohbu. Fariseo curua macaina, Herode mehne macaina cùhu ti pão bucharore ñuna noano yoaga. Cua nina tí —ni yahuha.

¹⁶ To ã nichu tuhoa tina to buheina sehe tíre ti basi õ sehe ni durucuha:

—Mari pãore mari na taerachu ñuno ã nino nica ahriro —nimaha tina ti basi.

¹⁷ Ti ã nirire masino tinare õ sehe ni sinituha Jesu:

—¿Dohse yoana musa pão borire wacùjari musa? ¿Musa masierasinihari? ¿Tùho ñahaerasinihari? ¿Tùho duaera-jari musa? ¹⁸ ¿Capari tiina jipanahta ñuerajari musa? ¿Ñ jina cahmori tiina jipanahta tuhoerajari musa? ¿Musa ahrire wacùerajari? ¹⁹ ¿Yuhu cù wamomaca pihitia pão curirire nuha, cinco mil bui masare yu warire wacùerajari musa?

¿Ti yapi wahyorire nohope puhusere pão curirire wahpo dapori musa? —niha Jesu tinare.

—Doce puhuse —ni yuhtiha tina tirore.

²⁰ —¿Ñ yoa yuhu siete curirire pão curirire cuatro mil bui masare yu wari baharo nohope puhusere pão curiri wahpo dapori musa? —niha Jesu.

—Siete puhuse —ni yuhtiha tina tirore.

²¹ —¿Ñ ñupanahta noano tuho ñahaerasinihari musa? —niha Jesu tinare.

Jesu capari ñueraritore ñuchu yoaha

²² Ñ yoa tina Betsaidapu ti suchu ñua, masa sehe capari ñueraritore na wihiha.

—Tirore ña payoga —ni, tuaro siniha tina Jesure.

²³ Ti ã sinichu tuhoro, Jesu capari ñuerariro wamomacare ñaha, tí maca duhtu cahapu tirore tuã wahcãha. Tópna su, to caparire chahcho puti, to wamomacari mehne tirore ña payoha.

—¿Mu ñuchu bajujari? —ni sinituha Jesu.

²⁴ To ã nichu tiro sehe ñuno, õ sehe niha:

—Muare ñuja. Yu ã ñupachuta tina yucuri tinia yucu yoaro sehe bajura —niha capari ñuerariro cjiro.

²⁵ To ã nichu tuhoro Jesu sehe to wamomacari mehne to caparire ña payoha tjoa. To ã ña payori baharo capari ñuerariro cjiro tuaro to ñuchu to capari noano bajuha. Ñ yoaro jipihitiare noano ñuha tiro. ²⁶ To ã ñu masichu ñuno, Jesu tirore to wuhupu warocaha.

—Macapu pinihtare wahai tjiga —niha Jesu tirore.

**“Jesu potocã Cristo, Cohamacu to
warocariro jira”, ni yahuha Pedro**

(Mt 16.13-20; Lc 9.18-21)

²⁷ Ñ yoa Jesu to buheina mehne Cesarea Filipino wama tiri maca cahai jia

macaripü waha namoha. Tópü ti waharo wato, Jesu õ sehe ni sinitu ñüha to buheinare:

—¿Diro baro jicari yuhü masa yühüre ti tühotuchü? —ni sinitu ñüha tiro tinare.

²⁸To ã sinitu ñüchü tuhoa õ sehe ni yuhtiha tina:

—“João masare bautisariro cjiro jira”, nina paina. Paina “Elia jira”, nina. Paina “Cohamacü yare yahu mühtaina cjiri mehne macariro jira”, nina mühüre —ni yuhtiha to buheina tire.

²⁹Ti ã ni yuhtiri baharo Jesu õ sehe ni sinitu namoha tinare:

—¿Musa sehe musa tühotuchü diro baro jicari yuhü? —ni sinitu ñüha tjoa.

—Mühü Cristo Cohamacü masare yühdo duti to warocariro jira —ni yuhtiha Pedro.

³⁰To ã nichü tühoro Jesu õ sehe niha:

—Yühüre “Cristo jira tiro”, ni yahu sitesiniena tjiga painare —niha tinare.

Jesu to yariahtore, to masa wijaahto cühüre yahuha

(Mt 16.21-28; Lc 9.22-27)

³¹Tinare to ã ni sinitu ñüri baharo, õ sehe ni buhe ducaha tiro:

—Yuhü masüno Cohamacü warocariro jija. ã jicü tuaro ñano yühducuhca. ãta waharo cahmana yühüre. Mari coyea judio masa, bucuna, sacerdotea puhto, mari judio masare buheina yühüre cahmaeraa, yühüre wajã dutiahca. Ti ã wajächü tia dacho wahaboroi masa wijaaihca —niha Jesu tinare.

³²ã nino ne tühö wisiachü yoaro marieno yahuro niha tinare. To ã nichü tühoro Pedro sehe pa sehe curerocã Jesure narücü sü, tire õ ã ni dutieraha.

³³To ã ni dutierachü tühoro Jesu to buheinare majare ñü, tuhtiha Pedore:

—Satana yoaro sehe durucui nina mühü. ã nii tjiga. Mü tühotua masa ya

jira. Cohamacü ya jierara —niha tiro Pedore.

³⁴ã ni tuhsü masare to buheina mehne tiro cahapü pjiroca, õ sehe niha:

—Cüiro yü yairo ji duaro, to cahmano yoa duamarire duhuncanohca. ã jiro crusapü yü ñano yühduhtiro seheta tiro yü yairo to jiri buhiri ñano yühduparota yühüre duhüsi. ã jiro yü yare yoarucuriro jirohca. ³⁵Masüno to mü süro to cahmano seheta yoariro pichacapü tiro waharohca. ã yoa masüno yü yare ã yoarucuro, noa buheare ã yoarucuro, jipihtia dachoripe yühü mehne müanopü jirucurohca. ³⁶¿Cüiro masüno ahri yahpa macaare jipihtiare cjuariro pichacapü waharo yabare wapatajari tiro? ã jiro ne wapataerara.

³⁷Pichacapü to wahachü ne dohse wapa wiohto basioerara. Masüno to jia tia wiho waro jierara. ³⁸Mipüre ñaina, Cohamacüre cahmaeraina ti mü süro ti yoari dacho jiro nina. Cãina yü wamare, yü buheare ni dua buo tiboca. Ti ã yoachü ñücü yuhü masüno Cohamacü warocariro noaina anjoa mehne yü Pücü to si sitero mehne tjua tacü yü wamare ni duapahta buo tiinare buo tisãaihca yuhü cühü —ni yahuha Jesu.

9 ã ni tuhsü õ sehe ni namoha Jesu: —Potocãta niita nija müsare. Cãina musa õpüre jiina musa yariahto pano puhtoro Cohamacü to suho jiropüre yü säachü yühüre ñunahca —niha Jesu tinare.

Jesu to pjacüre cohtotaha

(Mt 17.1-13; Lc 9.28-36)

²ã yoa seis dachori baharo Jesu Pedore, Santiagore, ã yoa Santiago bahuro João cühüre müadu tücüpu tina dihtare pji müjaha. Müanopü ti müja süri baharo ti ñürocaroi to pjacüre cohtotaha. ³To suhtiro noano si sitero, noano yehseri suhtiro wahaha. Ahri yahpa macaa numia suhti cosaa numia ã yehsechü yoa

masierara. ⁴Ā jia Elia cjiro, ā jichu Moise cjiro mehne Jesu mehne ti sũhũdũchũ ñũha tina tiaro Jesu buheina. ⁵⁻⁶Ā jia tina tuaro cuiha. Ā cuiro dohse ni masieramahno ō sehe nimaha Pedro:

—Puhtoro, mari ōi jichũ noa duara. Tia wũhũcā yoanahtja sã. Mũ ya wũhũcā, Moise ya wũhũcā, Elia ya wũhũcā yoanahtja —nimaha tiro Jesure.

⁷To ā niri baharocāta, me curua ti bui duji pja sũha. To ā duji pja sũchũta, me curua watoi ō sehe nino coa taha:

—Ahriri yũ macũ yũ cahĩriro jira. Tũhoga tirore —nino coa taha.

⁸Ā nino coa tachũta Pedro cũhũ ñũrocamaha. Jesu dihtare ñũha. Ti ñũrina cjiri sehe mariaha jũna. ⁹Ā jiro tũcũpu ti duji tachũ Jesu tinare ō sehe ni yahuha:

—Michapucacā yũhũre ā waharire painare yahuena tjiga. Yũhũ masũno Cohamacũ warocariro yũ yaria masa wijaari baharo tíre painare yahuga mũsa —ni yahuha tiro.

¹⁰Ā jia to dutiriro seheta tina ti ñũriri yahueraha painare. Ā jia tina ti basi ō sehe ni sinitu durucuha:

—“Yũ yaria masa wijaari baharo” nino, ¿dohsearo ā niri tiro? —ni durucuha tina.

Ā jia Jesure ō sehe ni sinituha:

¹¹—“Cristo to tahto pano Eliare ta mũhtano cahmana”, nina mari coyera judio masare buheina. ¿Dohse jiro baro ā nijari tina? —ni sinituha tina tirore.

¹²⁻¹³Jesu ō sehe ni yũthiha:

—Potocã tjira. Eliare ta mũhta dutire Cohamacũ, jipihtiare cahno mũhtahtiro cjihtore. Yũhũ masũno Cohamacũ warocariro payũ tahari ñano yũhũdũhca. Paina yũhũre cahmaeraa, ñano yoahca. ¿Tĩ cũhũre masijari mũsa? Ā jicu ahrire nihtja mũsare: Elia wihi tuhsure. To ā wihipachũta tina ti cahmariro seheta tirore ñano yoaha. Āta ni joaha tirore —niha Jesu tinare.

Jesu wahma wahmua tarirore noariro wahachu yoaha

(Mt 17.14-21; Lc 9.37-43)

¹⁴Ā yoa duji ta, paina buheina cahapũ sũ, payũ masare ñũha Jesu. To buheina sehe judio masare buheina mehne cahma sayoa niha. ¹⁵Ā jia Jesu cũhũ ti duji tachũ ñũa, jipihtina masa cũaa waha, tiro cahapũ mũrocaa wahaha. Tiro cahapũ sũa:

—¿Tamajari? —niha tirore.

¹⁶—Tamaja —ni tuhsũ—, ¿dohse ni cahma sayona niri mũsa tina mehne? —ni sinituha Jesu to buheinare.

¹⁷To ā ni sinituchũ tuhororo, masa watoi ducuriro ō sehe ni yahuha tirore:

—Buheriro, yũ macũre watĩno to cohtotarirore mũhũre na tamahi. Watĩno sehe tirore durucu dutierara. ¹⁸Yũ macũre to ñahachũ yahpapũ bora, bahca diho, bũhaa wahaa tire tiro. Ā jicu mũ buheinare watĩnore cohã wio dutimahi. Yũ ā dutipachũta tina sehe cohã wio masierare watĩnore —ni yahuha Jesure.

¹⁹To ā nichũ tuhororo Jesu ō sehe niha tinare:

—Ne, yũhũre wacũ tuaerara mũsa. Yoabiarĩ pja mũsare buhemaja yũhũ. ¿Noho puro yoari pja yũhũre mũsa caribobocari? Tirore na tahga yũhũre —niha Jesu.

²⁰To ā nichũ tuhoa watĩno to cohtotarirore Jesu cahai na taha. Ti na wihichũ ñũno watĩno sehe wahma wahmua tarirore yahpapũ doca caha sũ, tunu teterechũ yoaha. Ā yoa sahpo tua wahaha.

²¹—¿Noho puro yoari pja watĩno to cohtotarirore jijari ahriri? —ni sinituha Jesu sehe to pũcũrore.

—Wihãrirocã jiroputa tiro watĩno to cohtotarirore jira. ²²Ā cohtotaro payũ tahari watĩno sehe tirore pichacapũ, copũ cũhũre cohã wajãmaha. Ā jicu

muhū yoa masicū sāre pja ñū, yoadohoga —niha to p̄scuro Jesure.

²³To ā nichū tūhoro ō sehe niha Jesu:

—¿Dohsea jiro baro “Muhū yoa masicū”, nijari muhū yuhure? Yuhure mu wacū tuachū ñūno, Cohamacū jipihitiare yoa pahño masina muhure yoadohobasaro —niha Jesu.

²⁴To ā nichūta wahma wahmūa tariro p̄scuro ō sehe ni sañurucuha:

—Muhure wacū tuaja. Yū wacū tuaerachū ñūscū yuhure yoadohoga muhure yū noano wacū tuahto sehe —niha tiro.

²⁵Ā jiro masa payū tina cahapū muroca ta, ti cahmachuchū ñūno, Jesu watīnore ō sehe ni tuhtiha:

—Muhū durucu dutierariro, tūho dutierariro ahrirore cohtotariro wijaaaha. Ā wijaaacū tirore pari turi cariboi tjiga —niha Jesu.

²⁶To ā nichū tūhoro watīno sañurucu, wahma wahmūa tarirore yahpapū doca caha sū tunu teterechū yoa, wijaaaha. To ā wijaaachū wahma wahmūa tariro yariariro yoaro sehe wahaha.

²⁷—Tiro yariaa wahara —nimaha masa payū.

Ti ā nipachūta Jesu sehe to wamomacare ñaha, tirore wahcōha. To ā wahcōchū wahcāha tiro sehe. ²⁸Baharo Jesu cūhū wuhupū ti sāa suchū to buheina tirore ō sehe ni sinitu ñūha:

—¿Dohseana sā sehe watīnore cohā wio masierari, mū tūhotuchū? —ni sinitu ñūha tina.

²⁹—Ahriro baro watīnore cohā wio duana Cohamacure tuaro sinino cahmana mūsare. [Ā yoa duana chū duhuro cahmana mūsare Cohamacure sinina tana] —ni yuhtiha Jesu tinare.

Pari turi Jesu to yariahtore, to masa wijaahtore yahuha

(Mt 17.22-23; Lc 9.43-45)

³⁰Ā yoa tópu jiina waha, Galilea yahpapū sū, yuhduaha. Tópu ti waharire

paina ti masichū cahmaeraha Jesu to buheinare buhe duaro. ³¹Tópu sūro to buheinare buhea tiha. Ō sehe ni buheha:

—Yūhū masūno Cohamacū warocariro jija. Masa yuhure ñaha, painapure yuhure waahca. Ti ā wari baharo yuhure wajāahca tina. Ti ā wajāricū tia dacho wahaboroi masa wijaaahca —niha tinare.

³²To ā nichū tūhoa tina noano tūhoreraha. Ā jia cuia tirore tíre sinitu ñū namoeraha.

Jesu buheina tina mehne macarirore puhtoro sō duaa nimaha

(Mt 18.1-5; Lc 9.46-48)

³³Ā yoa tina Capernaupū ti sūri baharo wuhupū ti jichū Jesu sehe ō sehe ni sinituha tinare:

—¿Mahapure tana, dohse ni durucu tana niri mūsa? —ni sinituha tinare.

³⁴To ā nichū tina yuhtieraha. Mahapure taa, cahma ō sehe ni durucu taa niha:

—¿Mari mehne macarirore diro sehere mari puhtoro sōnahcari mari? —ni durucua niha mahai tarucua.

³⁵Ā jia ti ā nirire buo tia Jesure yuhtieraha. Ti ā yuhtierachū ñūno Jesu nuju sū, to buheinare doce buheinare pjiroca ō sehe niha:

—Mūsa puhtoa ji duana jipihitina masa ti cahamaca jiro cahmana mūsare. Tuhsū, wiho jiina jipihitina docai jinahca mūsa —niha Jesu tinare.

³⁶Ā nino nijinocāre tina watoi duhu dapoha. Duhu dapo tuhsū tirocāre na wūa, ō sehe ni yahuha:

³⁷—Yū yare yoa duana ahrirocāre mūsa cahmana, yūhū cūhure cahmana mūsa. Ā yoa yuhure cahmana, yuhure warocariro mari P̄scū cūhure cahmana mūsa —niha Jesu tinare.

**Marine ñu tuhtiriro jieraro,
mari mehne macariro jira**

(Mt 10.42; Lc 9.49-50)

³⁸ Baharo João õ sehe niha Jesure:

—Buheriro, mu wama mehne mu tuaa mehne watiare cohã wiorirore sã ñuhi. Tiro mari mehne macariro to jierachu ñña tîre tirore yoa dutiera tihî sã —niha tina.

³⁹ Ti ã nichu tuhoro Jesu tinare õ sehe ni yahuha:

—Ã niena tjiga musa tirore. Cãiro yu wama mehne Cohamacu tuaa mehne yoaro, baharo yuhure ñano ni durucu masierara. ⁴⁰ Marine ñu tuhtiriro jieraro, tiro mari mehne macariro jira. ⁴¹ Musare potocãta nii nija. Yu yaina musa jichu ñña paina musare ti yoadohochu ñño Cohamacu tinare noano yoarohca. Core musare ti sihõochu mahanocã ti wapachuta tinare noano yoarohca Cohamacu ti ã yoari wapa —niha Jesu tinare.

Ñaare yoachu cua nina

(Mt 18.6-9; Lc 17.1-2)

⁴² Æ yoa Jesu õ sehe ni yahu namoha:

—Ahrirocã sehe jirirore yuhure wacũ tua ducarirore yahuiltja musare. Pairo ahrirocã sehe jirirore ñaare yoa dutiro tiro ñabiaro yuhdurohca. Cãirore to wamupũ pjiria tãcare duhte yo, pjiri mapũ tirore ti cohãchu ñano wahaboa tiro. Æ jiro ahrirocã sehe jirirore ñaare yoa dutiriro tiro sehe pjiri mapũ ti cohãriro yuhdoro ñano yuhdurohca.

⁴³⁻⁴⁴ Mu wamomaca mehne ñano yoacu tí wamomacare mu dũte cohãboro seheta tí mu ñaa yoaa sehere duhuga. Tíre duhueracu pichacapũ wahaihca. Tópũre ne pichaca yatierara. [Æ yoa dachoa ne yarierara.] Mu wamomacare mu cohãchu tí si dihta butiboa. Tuhsũ, muhu sehe ã si jipaihta baharo Cohamacu mehne jiihca. Pua wamomaca mehne

pichacapũ wahacu mu ã wahachu ñaa yuhduaboa muhure. Æ jicu tí mu ñaa yoaa sehere duhuga.

⁴⁵⁻⁴⁶ Mu dahporo mehne ñano yoacu tí dahporo cũhure mu dũte cohãboro seheta tí mu ñaa yoaa sehere duhuga. Tíre duhueracu pichacapũ wahaihca. [Tópũre ne pichaca yatierara. Æ yoa dachoa ne yarierara.] Mu dahporore mu cohãchu tí si dihta butiboa. Tuhsũ, ã si jipaihta baharo Cohamacu mehne jiihca. Pua dahporo mehne pichacapũ wahacu mu ã wahachu ñaa yuhduaboa muhure. Æ jicu tí mu ñaa yoaa sehere duhuga.

⁴⁷⁻⁴⁸ Mu capariaca mehne ñano yoacu tiare orewe mu cohãboro seheta tí mu ñaa yoaa sehere duhuga. Tíre duhueracu pichacapũ wahaihca. Tópũre ne pichaca yatierara. Æ yoa dachoa ne yarierara. Tiare mu cohãchu tia dihta butiboa. Cũ buhusehe capariaca mariapaihta baharo Cohamacu mehne jiihca. Pua capariaca mehne pichacapũ wahacu mu ã wahachu ñaa yuhduaboa muhure. Æ jicu tí mu ñaa yoaa sehere duhuga.

⁴⁹ Ahri yahpai jina ñano yuhdunahca musa. Pichacapũ mari jũchu marine purĩno seheta ñano yuhdunahca musa. ⁵⁰ Moa noano coara. Moa coerachũ, coa yoahito basioerara. Moa coeraro tí moa ne noerara. Tí moare dohseahito basioerara. Moa noano to coaro seheta musa cũhu ji coaina jiga. Tuhsũ, paina mehne noano mehne jiga —ni yahuha Jesu tinare.

**Ti namosãnumiare
cohãare yahuha Jesu**

(Mt 19.1-12; Lc 16.18)

10 Æ yoa tiro tũpũ jiriro waha, Judea yahpa cahapũ sũ, Jordão wama tiri ma pa buhusehe coapũ sũha. Tópũ to sũchu ñña masa payũ tiro cahapũ cahmachuha tjoa. Ti ã cahmachuchũ ñño tó pano to buheriro seheta pari turi buheha tjoa. ²To ã buhero watoi

fariseo curua macaina wihia. Jesure ñano to durucuchũ tuho duamaha tina tire yahasã duaa. Æ tuho duaa tina Jesure õ sehe ni sinitu ñuha:

—¿Mari namore cohãchũ noabocari? ¿Mari dutia sehe tó sehetã yoa dutijari, mũ tuhotuchũ? —ni sinitu ñuha tina.

³—¿Dohse yoa dutiri Moise cjiro mũsare? —ni yuhtiha Jesu.

⁴—“Mũ namore cohã duacu papera pũĩ tíre joaga. Æ joacu tí pũre mũ namore mũ wari baharo ticorore cohã masina mũhũ”, ni joa tiha Moise cjiro —ni yuhtiha fariseo curua macaina sehe.

⁵Ti ã nichũ tuhorõ õ sehe ni yahuha Jesu:

—Cohamacũ dutiare mũsa yoa duaerachũ ñũno ã ni joa tiha Moise cjiro.

⁶To ã ni joariro jipachũta ahri yahpare bajuamehneriro mũno, numino cũhũre yoaha. ⁷Æ jiro mũno to pũcusũmare cohã wijaa, to namono mehne jirohca.

⁸Æ jia tina pũaro jipahta cũ pjacu yoaro sehe jira. Tina pũaro yoaro sehetã jierara. Cũ pjacu yoaro sehe jia nina. ⁹Cohamacũ to wamomaca duhte dutiina jira. Æ jia tinare duhueraro cahmana —niha Jesu tinare.

¹⁰Æ ni tuhsũ tiro to buheina mehne wũhũpũ sãa wahaha. Wũhũpũ sãa sũa, ti namosãnumiare cohãare to buheina sinitu ñuha tjoa tire. ¹¹Ti ã sinitu ñũchũ tiro õ sehe ni yuhtiha:

—To namonore cohãriro pacorore namo tiro, pacoro mehne ñano yoariro jira. Æ jiro to cohãricorore ñano wahachũ yoaro nina. ¹²Æ yoa numino sehe to manũnore cohãno, pairore manũ tiro, tiro mehne ñano yoaricoro jira —niha Jesu tinare.

Macanacã ya cjihtire Cohamacũre sini payoha Jesu

(Mt 19.13-15; Lc 18.15-17)

¹³Æ yoa macanacã Jesure ña payo dutia taa tinacãre Jesu cahapũ na taa

tiha. Ti ã na tachũ ñũa to buheina sehe tinacãre na tainare tuhtiha. ¹⁴Ti ã tuhtichũ ñũno Jesu suaha tina mehne. Æ suaro õ sehe niha tinare:

—Macanacã yũ cahapũ tajaro. “To cahai wahaena tjiga”, niena tjiga tinacãre. Tinacã Cohamacũre ti puhtoro tuhotura. Puhtoro Cohamacũ to suho jiina ahri-nacã yoaro sehe tuhotuina bare dihta jira. ¹⁵Potocã niita nija mũsare. Ahri-nacã Cohamacũ ti puhtoro cjihtore cahmana. Ti yoaro sehetã mũsa cũhũ Cohamacũ mũsa puhtoro cjihtore cahmaerana, puhtoro Cohamacũ to suho jihtina ne jisi mũsa —niha Jesu.

¹⁶Æ ni tuhsũ Jesu macanacãre na wũa tjiãhno, tinacãre ña payoro, õ sehe niha:

—Ahri-nacã noainacã wahajaro —ni sini payoha Cohamacũre.

Pache pũro Jesure sinitu ñuha

(Mt 19.16-30; Lc 18.18-30)

¹⁷Æ yoa Jesu mahai to waharucuchũ paio sehe mũroca wihi, to dahpori cahapũ na tuhcuã caha sũha tire ño payoro.

—¿Ne, noariro buheriro, yũhũ jipihtia dachoripe Cohamacũ mehne ã jirucu duacu dohse yoacũhcarĩ yũhũ? —niha tiro Jesure.

¹⁸To ã nichũ Jesu õ sehe ni yuhtiha:

—¿‘Noariro’ ni pisujari mũhũ yũhũre? Noariro sehe Cohamacũ dihta jira. ¹⁹Ahri Cohamacũ dutiare masina mũhũ: Masare wajãena tjiga. Namu tiriropũ paye numia mehne jiena tjiga. Yacaena tjiga. Mahũno mehne pairore yahusãena tjiga. Paina yare mahũno naena tjiga. Mũsa pũcusũmare ño payoga. Ahri dutiare yoaihca mũhũ —ni yahuha Jesu tire.

²⁰—Buheriro, yũhũ tí jipihtiare wahma wahmũa tariro jiiptũa yũhdũrucaera tihĩ yũhũ —niha tiro Jesure.

²¹To ã nichu tuhoro Jesu sehe tirore cahia mehne ñuroca õre. Æ ñuroca õno, õ sehe niha:

—Mahanocã duhsara muhure mu yoa pahnohto. Jipihtiare mu yare duai wahaga. Æ yoacu jipihtia mu wapatariniñerure pjacuoinare waga. Mu ã yoachu payu mu ya noaa muanopu, Cohamacu cahapu jiyuahca. Mu ã yoari baharo yuhu mehne macariro cjihto taga —niha Jesu tirore.

²²To ã nichu tuhoro tiro sehe payu pache cjuariro jiro tíre pjacuoinare wa duaeraro, cahya, jicoaeraa, wahaa wahaha.

²³To ã cahyachu ñno Jesu majarercu suro, to buheinare ñuroca õ, õ sehe niha:

—Pache puã puhtoro Cohamacu to suho jiropure ti waha duachu mijobiara —niha tinare.

²⁴To ã nichu tuhoa tina sehe tíre tuho cuaa wahaha. Æ ni tuhsu Jesu pari turi õ sehe ni yahu namoha tinare:

—Coyea, jipihtina [Cohamacure wacuno marieno “Mari mu suro mari cjuaa mehneta noano yuhduhahca”, ni tuhotuina pache puã] puhtoro Cohamacu to suho jiropure ti waha duachu mijobiara. ²⁵Camello sehe awicã copacare to sãa nuhri wijaa duachu basioerara. To ã jiro yuhdoro pache puho puhtoro Cohamacu to suho jiropure to waha duachu nu mijobiara —ni yahuha Jesu tinare.

²⁶To ã nichu tuhoa tina sehe tuho cua yuhduu waha, ti basi õ sehe niha:

—Cue, to nino seheta potocã jichu ne cüiro masunore yuhdoeraboca Cohamacu —niha tina ti basi.

²⁷Ti ã nichu tuhoro Jesu tinare ñuroca õ, õ sehe niha:

—Masa ti basi ti mu suro yuhdu masierara. Wiho mejeta Cohamacu sehe masare pichacapu wahaborinare yuhdo

masina. Tiro jipihtiare noano yoa masi pahnoriro jira —niha Jesu tinare.

²⁸To ã nichu Pedro tirore õ sehe niha:

—Tuhosiniga. Sã sehe jipihtia sã yare cunocaa tii muhu mehne tana —niha tiro Jesure.

²⁹To ã nichuta Jesu õ sehe niha:

—Potocã niita nija musare. Noaa buheare, yu yare yoana tana yuhure ño payona tana musa wuhusere, musa bahanare, musa pocsanumiare, musa pohinare, musa weserire cunocarina jina, pjíro wapatanahca musa mipure. ³⁰Æ yoana musa wuhuserire, musa bahanare, musa pocsanumiare, musa pohinare, musa weserire, tó pano musa cjuariro yuhdoro mipure payu cjuanahca musa. Æ yoa paina musare ñano yoaahca. Æ jina baharopure pa turupu jipihtia dachoripe Cohamacu mehne jinahca.

³¹Mipure payu puhtoã jirina cjiri tí pjarure wiho jiina tjuanocaahca. Æ yoa mipure payu wiho jiina jirina cjiri tí pjarure puhtoã cohtotaahca tjoa —ni yahuha Jesu tinare.

Pari turi Jesu to yariahtore, to masa wijaahtore yahuha

(Mt 20.17-19; Lc 18.31-34)

³²Æ yoa tina mahapu maja, Jerusalëpu mujaa niha. Jesu ti panocã mu tãha. Æ to mu tãchu ñua to buheina ñu cuaa wahaha. Æ yoa ti baharo nunu tiina sehe cuiro mehne nunu tiha. Æ yoa Jesu doce to buheinare ti sahsero naaha tjoa. Æ naa tuhsu, masa tirore ti dohse yoahtere Jesu yahu ducaha tinare:

³³—Tuhoga yuhure. Mipure Jerusalëpu wahana nija mari. Tópu masa yuhure masunore Cohamacu warocarirore ñaha, painapure yuhure waahca. Sacerdotea puhtoare, mari coyea judio masare buheina cühure yuhure waahca. Æ jia yuhure wajã dutiahca tina. Æ wajã dutia judio masa jieraina sehene yuhure waahca. ³⁴Ti ã

wari baharo tina sehe yuhure bujipe, chahcho puti sihō, tjana, wajāahca. Ā yoa yu yariari baharo tia nūmu wahaboroi masa wijaaahca —ni yahuha Jesu tinare.

Santiago João mehne Jesure siniha

(Mt 20.20-28)

³⁵ Ā yoa Santiago, João mehne Jesu चाहपु स्या, siniha tire. Tina Zebedeo pohna jiha. Ā jia ō sehe ni siniha:

—Buheriro, sã sinino seheta sãre yoaga mūhu —niha tina Jesure.

³⁶ —¿Dohse yu yoachu cahmajari mūsa? —niha Jesu tinare.

³⁷ —Jipihtina bui puhtoro jicu sãre mūhu mehne duji dutiga. Cũiro mu poto buhusehei pairo mu cō buhusehei duji dutiga sãre, mūhu mehne puhto sã jightho sehe —niha tina Jesure.

³⁸ Ti ā nichu tuhoro ō sehe ni yahuha Jesu tinare:

—Musa nãno yuhduhtore masierapanaha ā sinina yuhure. ¿Mipure yu nãno yuhduhto seheta nãno yuhduna cãno pjabocari mūsa cūhu? —ni sinituha tinare.

³⁹ To ā sinituchu tuhoa tina ō sehe ni yuhtiha:

—Cũno pjanahca —ni yuhtiha tina.

Ti ā nichu Jesu ō sehe ni yahuha:

—Yu nãno yuhduhto seheta nãno yuhdunahca mūsa cūhu. ⁴⁰ Mūsa ā yuhduhtina mūsa jipachuta, yuhu mehne dutihtinare, yuhu mehne dujihtinare bese masieraja yuhu. Ahrire yu Pucu sehe cahno tuhsure. Ā jia to beshetina dihta yu poto buhusehei yu cō buhusehei dujiahca —niha Jesu tinare.

⁴¹ Ā jia paina diez buheina Santiago, João ahрина puaro mehne susiniha ti ā sinirire tuhoa. ⁴² Ti ā susinichu nũno Jesu to buheinare pjiroca, ō sehe niha:

—Cohamacure masieraina puhto sehe ti masare dutia, purino mehne

dutira. ⁴³ Mūsa sehe ne ā yoasi mūsa basi. Diro mūsa mehne macariro mūsa bui puhtoro ji duaro, jipihtina tiro mehne macaina cahamacuno yoaro sehe jia tiro cahmana tire. ⁴⁴ Ā yoa diro mūsa mehne macariro masare dutiriro ji duariro mūsa cahamacuno yoaro sehe jia tiro cahmana tire. ⁴⁵ Tó seheta jiriro jija yuhu cūhu. Yuhu masuno Cohamacu warocariro jipacuta ahri yahpape yuhure mūsa yoadohtire masare sini tai nierahi. Mūsa sehene yoadohoi tai nii. Ā yoacu payu masa ya buhirire yaria, wapabasai tai nii. Yu ā yariaro mehne payu masare pichacapu wahaborinare yuhduchu yoai tai nii —niha Jesu tinare.

Bartimeore, capari ñuerarirore nūchu yoaha Jesu

(Mt 20.29-34; Lc 18.35-43)

⁴⁶ Ā yoa baharo tina Jericopu suha. Jesu to buheina mehne, ā jichu paina masa payu mehne ti macai jiina ti wahachu ti macare ti yuhdu wahcachu waro, Bartimeo sehe ti wahari maha duhtu cahai dujiha. Tiro Timeo macuno capari ñuerariro jiro, masare niñerucare ā sinirucuriro jiha. ⁴⁷ Ti wahari maha duhtu cahai dujiro, “Jesu Nazare macariro tara”, ti nichu tuhoro, Bartimeo sehe ō sehe ni sañurucuha:

—Jesu, Davi cjiro panamino masare yuhdohtiro, pja ñuga yuhure —ni sañurucuha Jesure.

⁴⁸ To ā nichu tuhoa masa payu Bartimeore “Dihta mariaha”, ni tuhtiha tina tire. Ti ā ni tuhtichu tuhoro Bartimeo tó pano to sañurucuriro yuhdo curero sañurucu namoha tjoa:

—Jesu, Davi cjiro panamino masare yuhdohtiro, pja ñuga yuhure —ni sañurucuha tiro.

⁴⁹ To ā ni sañurucuchu tuhoro Jesu sehe tjuarucu su, “Pjirocaga tire”,

niha. To ã nichu tuhoa tina sehe capari ñuerarirore õ sehe ni yahuha:

—Wahcheha. Wahcãrucaga. Tiro muhure pjira —niha tina Bartimeore.

⁵⁰Ti ã nichu tuhoro to bui macari suhtirore tjuwe cū, pu wahcãrucu su, Jesu cahapu surucu suha. ⁵¹Ã jiro, Jesu sehe õ sehe ni sinituha tirore:

—¿Dohse yu yoachu cahmajari muhu? —niha Jesu tirore.

—Yu puhtoro, yuhure ñuchu yoaga — niha capari ñuerariro Jesure.

⁵²—Wahaga muhu. Muhu yuhure wacu tuacu noariro wahara —niha Jesu tirore.

To ã nichuta capari ñuerariro ñua wahaha. Ñ noariro waharo Jesu mehne mahapu wahaa wahaha.

Jerusalēpu suha Jesu

(Mt 21.1-11; Lc 19.28-40; Jn 12.12-19)

11 Ñ yoa tina Jerusalēpu ti suhto panocã tucū Olivo wama tidu dũhtu cahai jiri maca Betfagé wama tiri maca cahai, ã jichu Betania wama tiri maca cahai su muhtaha. Tí macari puã maca cahai Jesu sũro, to buheina puãrore warocaro taro, õ sehe ni yahu quihõha:

²—Sí macapu wahaga. Tõpu suna dóhta burrocãre ti duhte daporirocãre boca sunahca. Tiro ne cũiro ti pisamahnoer- airocã jica. Tirocãre bocana, yuta dare pjã, na tabasaga yuhure. ³Musa tirocãre pjãchu ñũno cũiro dohse jiriro, “¿Dohse yoana tana burrocãre duhte daporiri dare pjãjari musa?”, to nichu tuhona, õ sehe ni yuhtiga tirore: “Mari puhtoro burrocãre cahmarocasinare. Michapucacãta wiarohca tiro”, ni yahuga tirore —ni yahu duti warocaha to buheina puãrore.

⁴To ã nichu waha, tí wuhu sopaca cahai burrocãre ti duhte daporirocãre bocaha. Boca, tirocãre pjãha. ⁵Tirocãre yuta dare ti pjãchu ñua tói ducuina õ sehe ni sinituha tinare:

—¿Dohse yoana tana burrocãre duhte daporiri dare pjãjari musa? —ni sinituha tina.

⁶Ti ã nichu tuhoa, tina sehe Jesu to niriro seheta yahuha tói ducuinare. Ti ã ni yahuchu tuhoa tói ducuina sehe “Naahga”, niha tinare. ⁷Ã jia tina burrocãre Jesu cahapu na suha. Ti na sũri baharo tirocã bui ti bui sãa suhtire ti pjũpaha payo tuhsuchu ñũno, Jesu sehe tirocã bui muja pja, wahaha. ⁸Tirocã bui to wahachu ñua, masa payu ti bui sãa suhtire tjuwe na, to wahahti mahai saño cū muhtaha, Jesure ño payoa. Paina sehe campopu pũri tia dũpũrire yucu dũpũrire dũte na ta, to wahahti mahai duhu cũha.

⁹Ã jia to pano wahaina, to baharo nunu tiina mehne õ sehe ni sañurucuha:

—Ahrirore wahche payojihna. Ahriro Cohamacu to warocariro noano jijaro.

¹⁰Mari ñuchu Davi cjiro puhtoro to noano suho jiriro seheta, ahriro marine to suho jihto cũhu noano jijaro. Muano macariro Cohamacu, muhu tuariro waro jira —ni sañurucuha tina.

¹¹Ti ã yoari baharo Jesu sehe Jerusalēpu suha. Su, Cohamacu ya wuhupu sãa sũro, tí wuhui jiare jipihtiare ñu pahñonocaha. Ñu tuhsu “Ñamichahapu waro jira marine” nia, Jesu to buheina doce buheina mehne Betaniapu wahaa wahaha.

Jesu higueraçure yaria dutiha

(Mt 21.18-19)

¹²Ñ yoa pa dachoi tina Betaniapu jina wahaa wahaha. Ñ jiro Jesu sehe juca baa, yoaropu higuera wama tidure noano pũri tidure ñũno tu dichare macano wahamaha. ¹³Dicha mariaha. Dicha tiri pja jieraro pũri dihta jiha. ¹⁴Ñ jiro dicha mariachu ñũno õ sehe niha:

—Ahdũ dichare masa ne pari turi chuea tjijaro. Ne dicha tiero tjijaro — niha Jesu.

To ā nichu to buheina sehe tuhoha.

Jesu Cohamacu wuhure Cohamacu mehne durucuri wuhure yoa dutiha

(Mt 21.12-17; Lc 19.45-48; Jn 2.13-22)

¹⁵To ā yoari baharo tina Jerusalēpu suha. Tópu suro, Jesu Cohamacu ya wuhuru sāa suro pache duainare, nuchuina cūhure cohā wioha. Ā yoaro niñeru cohtotaa mesarire yo wahcō na majare cū mujaa tiha. Bujaare duaina ti dujia pahtari cūhure āta yoaha. ¹⁶Ā yoaro paye barore na sāa dutieraha masare. ¹⁷Tó sehe yoa tuhsu, Jesu ō sehe ni buheha tinare:

—Ō sehe nina Cohamacu yare ti joari pūi: “Yū wuhū Cohamacu mehne durucuri wuhū wama tirohca. Ā jiro jipihtiro macaina ya wuhū cjihto jirohca”, ni joaa tiha Cohamacu yare ti joari pūi. To ā nipachuta mūsa sehe ahri wuhūi duana, mūsa basi cahma yacara mūsa —ni buheha tinare.

¹⁸To ā ni buhechu jipihtina masa sehe tuho cuaa wahaha. Ā jia sacerdotea puh-toa, sā judio masare buheina mehne tirore cui niha. Ā jia tina tirore ti wajāhti cjihtire wacū macamaha. ¹⁹Ti ā yoachu nānichahapu Jesu to buheina mehne ti macapu jirina cjiri wahaa wahaha.

Higueracu nāia wahaha

(Mt 21.20-22)

²⁰Ā jia bohrearo mahapu maja taa, higueracure nūha. Tu nuhcoripu nāi duca, nāia wahaha tu. ²¹Tare nūno Pedro sehe wacūno ō sehe niha:

—Buhero, nūga. Higueracu mu yaria dutidu yaria wahari jira —niha Pedro.

²²To ā nichuta Jesu ō sehe ni yahuha tinare:

—Cohamacure wacū tuaga mūsa. ²³Potocā niita nija musare. Ahdu tūcure pjiri mapu mūsa cohā dutichu mūsa niriro seheta ā waharohca. Cohamacure noano mūsa wacū tuachu

“Yū siniriro seheta ā waharohca”, mūsa ni tuhotuchū mūsa niriro seheta ā waharohca. ²⁴Ā jicu ahrire yahuihtja musare. Cohamacu mehne durucuna, tirore sinina, “Yū siniriro seheta warohca yuhure”, ni tuhotuga. Mūsa ā ni tuhotuchū nūno Cohamacu mūsa siniare warohca. ²⁵Ā yoana Cohamacu mehne mūsa durucutoho pano musare paina ti nāno yoachu mūsa suari cjihtire duhuga. Mūsa ā yoachu nūno Cohamacu mūano macariro mūsa nāa buhirire tiro cūhu sua duhurohca. ²⁶[Musare nāno yoinare mūsa sua duhuerachu mari Pucu cūhu mūano macariro mūsa nāa buhiri sehene bosi tiro cūhu] —niha Jesu.

Sacerdotea puh-toa, judio masare buheina, bucuna mehne Jesu mehne cahma sayoha

(Mt 21.23-27; Lc 20.1-8)

²⁷To ā niri baharo tina Jerusalēpu wahaha tjoa. Ā jia Jesu Cohamacu wuhūi to tinichū nūa sacerdotea puh-toa, sā judio masare buheina, bucuna mehne tiro cahapu sua tirore ō sehe ni sinitu nūha:

²⁸—¿Dohseacu canure ā yoari muhu? ¿Noa muhure tīre ā yoa dutiri? —ni sinitu nūha tina Jesure.

²⁹Ti ā nichu Jesu ō sehe ni yuhtihā:

—Mūsa sehene sinitu muhtaihtja. Noano yuhure mūsa yuhtichū musare yahuihtja yuhū cūhu. ³⁰¿João masare to bautisachu diro baro sehe tirore bautisa dutia tiari, mūsa tuhotuchū? ¿O Cohamacu dutiera tiari? ¿O masa sehe tirore dutia tiari, mūsa tuhotuchū? —ni sinituha tinare.

³¹To ā nichu tina sehe ti basi ō sehe niha: “¿Dohse ni yuhtinahcari mari? ‘Cohamacu Joãoire dutia tiri jire’, mari nichū, ‘¿Dohseana Cohamacu Joãoire to dutipachuta tirore tuhoerari mūsa?’ ni-boca Jesu marine. ³²Ā yoa, ‘João to bautisachu Cohamacu sehe tirore dutier-

ari jire', mari nichu masa sehe suaahca mari mehne", niha tina ti basi. "Potocāta João Cohamacu yare yahu muhtariro jira", ni tuhutua tiha masa sehe. Ti ā ni tuhutuchu masia, Joāore doca dahre du-aeraha sacerdotea puhtoa cūhu, "Masa suari", nia. ³³ Ā jia tina Jesure ō sehe ni yuhtiha:

—Joāore bautisa dutirirore sā masier-aja —niha tina Jesure.

—Tí pja pinihta yuhu cūhu ahrire yu yoaere dutirirore yahueraja musare — niha Jesu tinare.

**Ñaina dahra cohtaina
quitire yahuha Jesu**

(Mt 21.33-46; Lc 20.9-19)

12 Ā yoa Jesu to tuhutua mehne ō sehe ni piti dahre buhe dūcaha tinare:

—Wese puro se dari cjihtire toaha. Toa tuhsu, sahrinore dapo, sere ti tu mutohti copare saha, muari wuhucā dahreha tiro. Tuhsu, tí wesere painare cū buhusehe coa pahma cūno, tí wesere nū wihbo dutiha. Nū wihbo duti tuhsu, pa yahpau wahaha tiro. ² Baharo se niri pja jichu wese puro tirore dahra cohtarirore wese macaa to ya coa macaa dichare na dutiro warocamaha. ³ Ā jia tí wesere nū wihboina sehe tirore dahra cohtarirore ñaha, cjāha. Ā yoa tuhsu tirore dahra cohtarirore se tōhorine waerapahta tjuaa dutiha tirore. ⁴ Ā jiro wese puro pairo tirore dahra cohtarirore warocamaha tjoa. Ā jia wesere nū wihboina sehe tirore dahra cohtarirore dapure cami dahre, ñano yoaha tina tirore. ⁵ Tuhsu, pairo sehere to warocachu nū wihboina tirore wajāha. Payu paina cūhure ā dihta yoa mujaha. Paina sehere cjā, paina sehere wajāha tina.

⁶ Ā jiro wese puro macno dihta dūh-saha. Tiro to cahiro jia. Ā jiro to macnore warocaha juna, "Yū macu sehere ño payoahca", nino. ⁷ To ā ni tuho-

tupachuta tina nū wihboina ti basi ō sehe ni durucuha: "Wese puro macno baharo ahri wesere cjuah tiro jira ahriro. Tirore wajājihna mari. Ā jiro ahri wese mari ya wese tjuarohca", nimaha tina ti basi. ⁸ Ā nia tirore ñaha, wajā, wese duhtu cahapu na wahcā, cohānocahna tina tirore.

⁹ ¿Ne wese puro taro dohse yoarohcari tiro wesere nū wihboinare? Ō sehe yoarohca tinare: Tiro tinare wajāno, paina sehere wesere nū wihbo dutirohca. ¹⁰⁻¹¹ ¿Cohamacu yare ti joari pūre ahrire buherari musa? Ō sehe ni joaa tiha:

"Ahriro Cristo tāca yoaro seheta jira.

Tācare wuhu dahreina ti cohāno seheta masa tirore cohāhca.

Ti ā yoapachuta mipure wuhu dahreina wuhure yoaa ti cū muharti tācare ti cūno seheta Cohamacu tirore puhto sōre.

Cohamacu sehe ahrire yoare.

To ā yoachū ñuna, 'Noa yuhduara', ni tuhutuja mari",

ni joaa tiha panopu. ¿Tíre ne buherari musa? —niha Jesu tinare.

¹² To ā nichu tuhoa sacerdotea puhtoa, sā coyea judio masare buheina, bucuna mehne ō sehe ni tuhutuha: "Jesu wesere nū wihboina quiti mehne marine tuhtiro nina", ni tuhutuha. Ā ni tuhutuha Jesure ñaha duamaha. Ā ñaha dua-pahta masare cui niha. Ā cuia tirore cohā wahcā wahaha.

**Fariseo curua macaina, Herode ya
curua macaina mehne gobierno
macaa wapare sinituha Jesure**

(Mt 22.15-22; Lc 20.20-26)

¹³ Waha, tina fariseo curua macainare, Herode ya curua macaina cūhure Jesure sinitu dutia warocaha tjoa. Jesu ñano to yuhtichu yoa duamaha tina, tirore yahusā taa. ¹⁴ Ā jia Jesu cahapu sua, tirore mahño cū sinitu ñumaha:

—Buheriro, potocã durucuriro, mahñoa marieriro m̄ jich̄ masija sã. Cohamacu yare quihõno m̄ yahuch̄ cũhure masija sã. Ā yoa cũiro puhtoro waro to jipachuta tiro cũhure dõrero marieno potota yahura m̄h̄. Ā jicu sãre yahuga. ¿Roma macariro jipihtina bui puhtoro jirirore gobierno macaare marine waparo cahmajari, m̄ tũhotuch̄? ¿Mari dutia tirore wapa dutijari, m̄ tũhotuch̄? —ni sinitumaha tina Jesure.

¹⁵ Ti ã sinituch̄ tũhoro ti yahusã duare masino õ sehe ni sinituha tinare:

—¿Dohseana yu ñano durucuch̄ tũho duajari m̄sa? Mipure niñeru ture na tahga. Tí ture ñũjihna —niha Jesu tinare.

¹⁶ To ã nich̄ tũhoa tina sehe cũ ture na taha. Ti na wihich̄ Jesu õ sehe ni sinituha tinare:

—¿Diro baro masu wahãjari ahri ture? ¿Diro baro wama wahãjari? —ni sinituha tiro.

—César, masa bui puhtoro masu, to wama cũh̄ wahãna —ni yũhtiha tina.

¹⁷ Ti ã nich̄ Jesu õ sehe ni yahuha tinare:

—Tí pja pinihta masa bui puhtoro yare tiro sehere waga. Cohamacu yare Cohamacu sehere waga —ni yahuha Jesu.

To ã nich̄ tũhoa, tũho cãaa wahaha.

Saduceo curua macaina Cohamacu to masoare sinituha Jesure

(Mt 22.23-33; Lc 20.27-40)

¹⁸ Ā yoa cãina Saduceo curua macaina Jesu cahap̄ wihia. Saduceo curua macaina sehe “Cohamacu yariainare masosi”, ni tũhotuina jimaha. ¹⁹ Ā jia tina õ sehe niha tirore:

—Buheriro, õ sehe ni buhea tiha Moise cjiro: “Cũiro to wahmino namo tiriro pohna mariaparota to yariach̄ ñũno to bahũrore to wahmino namono cjirore nũoano cahmana. Ā yoaro to wahmino

mũnano to pohna tiboro seheta pohna tiro cahmana to bahũrore. Ā jia to pohna to wahmino mũnano pohna yoaro sehe jiahca”, ni joaa tiha Moise cjiro —niha tina Jesure.

²⁰ Tíre ni tuhsu, ahri quitireta yahu namoha Jesure:

—Cũiro masuno jiha. Seis to bahana jiha. Ti wahmino sehe namo ti, pohna mariaparota yariaa wahaha. ²¹ Tuhsu, paio to bahũro cũh̄ to wahmino namono cjirore cjuamaha. To ã nũoari baharo to wahmino yoaro seheta pohna mariaparota yariaa wahaha tjoa. Ā jiro ahriro bahũro to wahmino mũnano yoaro seheta pohna mariaparota yariaa wahaha tjoa. ²² Ā dihta wahaha cũiro pohna waro. Ne pohna mariapahta yaria pihtia wahaha tina. Ti namono cjiro cũh̄ ti baharota yariaa wahaha. ²³ ¿Ne, Cohamacu jipihtinare yariaina cjirore to masoch̄ diro namono sehe jirohcari ticoro? Tina jipihtina ticorore namo tirina cjiro jiha. ¿Ā jiro diro namono sehe jibocari ticoro pototi? —ni sinituha tina.

²⁴ Jesu õ sehe ni yũhtiha tinare:

—Cohamacu yare ti joari pũre, to masia cũhure ne masierara m̄sa. Ā jia m̄sa tũhotua sehe ne quihõno jierara. ²⁵ Yariarina cjiro ti masa mũjari baharo tina anjoa yoaro sehe jira. Tina m̄sa namo tierara tõpũre. ²⁶ Yariarina cjiro ti masa wijaah̄to sehere m̄sare yahuihtja: Tíre Moise cjiro noano yahu pahñoa. To mahaducã jũri quitire õ sehe ni yahuha tiro: “Yũh̄ Abrahã, Isaa, Jacobo ti puhtoro tjija”, ni yahure Cohamacu yũhure”, ni joaa tiha Moise cjiro to joari tju. ²⁷ Ti yariari baharo “Ti puhtoro tjija”, ni yahuha Cohamacu. Ā niaparota yariarina cjiro puhtoro jierara Cohamacu. “Ti puhtoro tjija”, to nia mehne catiina ti jich̄ masija mari. Tiro catiina puhtoro jira. Ā jina “Yariaina masasi”, ni tũhotuna quihõno tũhotuerara m̄sa —niha Jesu tinare.

Cũno noa yũdũro to dutiare yahuha Jesu

(Mt 22.34-40)

²⁸ ã yoa cũiro sã coyea judio masare buheina mehne macariro tina cahapũ wihi, ti cahma durucuchũ tuhoha. Jesu to noano yũhtiare tuhoro õ sehe ni sinituha tirore:

—¿Cohamacũ ya dutia noa yũdũroo di baro sehe jijari, mũ tuhutuchũ? —ni sinituha tiro Jesure.

²⁹ Jesu tirore õ sehe ni yahuha:

—Ahri dutiata paye dutia yũdũroo noa yũdũara: “Israe masa tuhoga. Cohamacũ mũa pũhtoro yũhũ cũirota jija. ³⁰ Tuaro mũa yajeripohnari mehne, noano mũa wacũia mehne, mũa tuaa mehne yũhũre cahĩga”, nina Cohamacũ. ³¹ Ahri dutia baharo paye dutia noa yũdũara: “Mũ basi mũ cahĩno seheta mũ cahai jiina cũhũre cahĩga”, nina Cohamacũ. Ahri pũaro dutia jipihtia paye dutia yũdũroo jira —ni yahuha Jesu tirore.

³² To ã nichũ tuhoro judio masare buheriro õ sehe niha:

—Ã tjira. Buheriro, potocã nina mũhũ. Cohamacũ cũirota jira. Pairo tiro yoaro sehe jiriro mariahna. Mũ nia potocã tjira. ³³ Cohamacũre tuaro mari yajeripohnari mehne, mari wacũia mehne, mari tuaa mehne tirore cahĩno cahmana marine. Yũ cahai jiiinare yũ basi yũ cahĩno seheta tina cũhũre cahĩno cahmana yũhũre. Wahiquinare wajã jũ mũo mari wari mehne mari ño payochũ noa nimana. Ahri yũdũroo Cohamacũre masa cũhũre mari cahĩa noa yũdũara. Mũ ã nia potocã tjira —niha judio masare buheriro Jesure.

³⁴ To ã noano yũhtichũ tuhoro Jesu õ sehe ni yahuha tirore:

—Mahanocã dũhsara mũhũre Cohamacũre mũ noano masihtõ —niha tirore.

To ã nichũ tuhõa paina cuia, ne sinitu ñũeraha tirore.

¿Diro baro coyeroo jijari Cristo?

(Mt 22.41-46; Lc 20.41-44)

³⁵ ã yoa Cohamacũ wũhũi buhero õ sehe niha Jesu:

—“Cristo Davi cjiro panamino jira”, ni buhera mari coyea judio masare buheina. ¿Dohse yoa ã ni buhejari tina?

³⁶ Davi cjiro to basi Espĩritu Santo to dutiriro seheta õ sehe ni yahuha tiha:

“Cohamacũ yũ pũhtoroõ õ sehe nire: ‘Õi yũ poto buhũsehei dujiga.

Ã jicũ mũhũre ñũ tuhtinare mũhũre yũdũrucabasaihca yũhũ’, nire Cohamacũ yũ pũhtoroõ”,

ni joaa tiha Davi cjiro. ³⁷ ã ni joaro Davi cjiro pũhtoro tia tiha Cristore.

¿Davi cjiro Cristo ñũchũno cjiro jiparõta dohsearo Davi sehe pũhtoro tiari Cristore? Cristo Davi cjiro pũhtoro jira —ni yahuha Jesu.

To ã ni buhechũ payũ masa wahchea mehne tuhõa tirore.

Jesu judio masare buheina ti ñaare yahuha

(Mt 23.1-36; Lc 11.37-54; 20.45-47)

³⁸ ã yoa tiro buhe namono õ sehe niha:

—Mari coyea judio masare buheina ti ñaa yoare noano ñũga. ã jina ti yoaro sehe yoarena tjiga. Tina yoaa suhti sãa, masa ti ñũrocarõi majarea, pache duarõpũ paina pũhtoare noano ño payõ ti sinino sehe ti piti bocasinichũ cahmana tina. ³⁹ ã cahmaina jia, mari judio masa buhea wũhũsei noaa dujia dihtare duji duara. Tuhsũ, bose numũ jichũ tõ cũhũre noaa dujia dihtare cahmana tina. ⁴⁰ Tina wapewahya numia ya wũhũsere ti ya cũhũre mana tí numiare. ã yoaina jia, tina masa ti ñũrocarõi yoari pja Cohamacũ mehne durucumana masare ñũ dutia. Ti ã yoari buhiri paina

bui curero tinare Cohamacu pjíro buhiri dahrerohca —niha Jesu tinare.

Wapewahyoro to warire yahuha Jesu

(Lc 21.1-4)

⁴¹ ã yoa Jesu niñeru wihbori caro cahapu dujiha. Tí caropu masa ti niñeru duhu sãachu ñu dujiro niha. (Tí niñeru Cohamacu wuhure ti cahnochü ti wapahti jiha.) ã jia pache puã tí caropu pjíro duhu sãaha. ⁴² ã yoa wapewahyoro pjacuoricoro tí caropu ta, puã tucãre duhu sãaha. Puã tu cü centavo posa jira. ⁴³ Tí turire to duhu sãachu ñuno to buheinare pjirocaha:

—Potocã niita nija musare. Ahricoro wapewahyoro pjacuoricoro sehe niñeru wihbori caropu duhu sãano paina jipihitina ti wari yuhdoro wahre ticoro sehe. ⁴⁴ Paina pache puã pjíro ti wapachuta ti ya pjíro duhsara. Ahricoro sehe pjacuoricoro jiparota jipihitia to chuhtire to nuchuboacãre wa pahñohe —ni yahuha Jesu.

“Cohamacu wuhü cohãri wuhü jirohca”, niha Jesu

(Mt 24.1-2; Lc 21.5-6)

13 ã yoa Cohamacu wuhupure ti wijaachu cüiro buheina mehne macariro õ sehe niha:

—Buheriro, ñuga. Ahri wuhuse noaa tãa mehne ti yoa wuhuse noacaa wuhuse jijari —niha tiro.

² To ã nichu Jesu õ sehe ni yahuha tinare:

—Ahri jipihitia mari ñuri wuhuse cjiri, ahri tãa cühu cohõ pihtia wahaahca. Ne cürria tãca tjuasi —niha Jesu tinare.

Pihitiri dacho cjihtore yahuha Jesu

(Mt 24.3-28; Lc 21.7-24; 17.22-24)

³ ã yoa Jesu Olivo wama tidu tücupu Cohamacu wuhü potoi jidupu suha. Tu bui dujiha. Tói Pedro, Santiago, João,

Andre mehne ti sahsero jia, tina tirore õ sehe ni sinituha:

⁴ —Yahuga sãre. ¿Dohse jichu ã waharohcari mu niriro sehe waharo? ¿Pihitiri dacho panocã to jichu dohse to waha ducachu ñunahcari sã? —ni sinituha tina Jesure.

⁵ Jesu õ sehe ni yuhtihia:

—Noano yoaga musa. Tuhsu, paina ti mahñoare tuhoena tjiga musa. ⁶ Payu masa “Cristo jija yuhu”, ni mahñoina taahca. Ti ã mahñoachu tuhoa payu masa Cohamacu yare duhuaahca.

⁷ Musa cahacãi masa paina ti cahma wajächu tuhonahca musa. Tuhsu, yoaropu cühure ti cahma wajächu tuhorocanahca musa. ã tuhorocapanahca ne tíre pjíro tuhotuena tjiga. ã waharohca. Ti ã yoachu pihitiri dacho cjihto duhsasininohca mini. ⁸ Tí pjare cü yahpa macaina pa yahpa macaina mehne cahma wajãahca. ã yoa cüiro puhtoro yaina paio puhtoro yaina mehne cahma wajãahca. Tuhsu, pjaró yahpa ñuhminohca. ã yoa payu masa juca mehne yariaahca. To ã wahachu ahri yahpa macainare ti ñano yuhdu namohto duhsasinina mini. Ñano yuhdusinihca.

⁹ To ã wahachu ñuna musa basi noano yoaga. Paina musare ñaha, ñano yoa dutia waahca paina puhtoapure. ã yoa judio masa mari buhea wuhusei musare cjãahca. Ti ã yoachu bujua macari macaina puhtoa, ti bui puhtoa cühu musare buhiri dahrea taa sinituahca musare. Yu yaina musa jiri buhirire paina musare yahusãhca. ã jina yare yahunahca musa tinare. ¹⁰ ã jia pihitiri dacho pano noaa buheare jipihitiro yahpari macainare yahua buhea jahca. ¹¹ ã jina musare buhiri dahre dutia, buhiri dahre dutiriro cahapu ti naachu tirore musa nihtire “Yahu masieraboca”, ni tuhotuena tjiga musa. Tí pjare musa nihtire musare Espiritu Santo yahurohca.

To ã yahurire yahuga m̄sa. M̄sa m̄ s̄uro durucusi m̄sa. Esp̄ritu Santo sehe m̄sare durucubasarohca. ¹²Tí pjare c̄airo to bahurore wajã dutiro warohca. Pairo sehe to wahminore wajã dutiro warohca. Ti p̄curo to pohnare wajã dutiro warohca. Ā yoa ti pohna sehe ti p̄c̄us̄umare wajã dutia waahca. ¹³Ȳu yaina m̄sa jiri buhiri m̄sare masa jipihtina ñu tuhtiahca. Ā ñano ȳuh̄d̄u-panahta ȳu yare m̄sa ne coh̄erach̄u pihtiri dacho jich̄u m̄sare ȳuh̄doiha.

¹⁴Ā yoa ñabiarore Cohamac̄u yare ñano yoirore ñunahca m̄sa. Cohamac̄u ya w̄uh̄i to ducuch̄u ñunahca. Tói tirore jieraro cahmana. [Panop̄ Cohamac̄u yare yahu m̄htariro Daniel cjiro tirore yahuro joaa tiha.] Tói to ducuch̄u ñua Judea yahpap̄u jiina t̄yuc̄up̄u duhti m̄roca m̄j̄aa waha-jaro. Ahri ȳu nirire noano masiga m̄sa. ¹⁵Soaro mehne m̄roca duhtijaro. Tí pjare ti w̄uh̄seri bui macaa waparip̄u jiina w̄uh̄ puhichap̄u jiare ti yare na wahaea t̄j̄jaro ti waha bahrañohto sehe. ¹⁶Ā jia tí pjare paina ti weserip̄u jiina ti bui macaa suhtire w̄uh̄p̄u jia suhtire na wahaea t̄j̄jaro ti waha bahrañohto sehe. ¹⁷Tí pjare niji pocosanumia, ti pohnare p̄ua numia c̄uh̄u pjac̄oro wahaahca. ¹⁸Ā jina õ sehe ni siniga Cohamac̄ure: “Puh̄iro jich̄u ã wahaero t̄j̄jaro”, ni siniga tirore. ¹⁹Tí dachorire masa nu ñano wahaahca. Ahri yahpare to bajuamehneri baharo masa ñano ti ȳuh̄dua jia tiha. Ti ã jipach̄uta jipih-tia tí pur̄ia ȳuh̄doro pihtiri dacho jich̄u masa ñabiaro ȳuh̄duahca. Ā ñano ti ȳuh̄d̄uri baharo pari turi tó sehe ñabiaro ȳuh̄d̄usi ahri yahpai j̄una. ²⁰Ā jiro Cohamac̄u tí dachorire mahaa dachoricã ti jich̄u yoarohca. To ã yoerach̄u ne c̄airo mas̄uno ȳuh̄d̄eraboa. Ā jiro to beserina ti ȳuh̄d̄uti c̄j̄ihtire mahaa dachoricã ã c̄usininocha Cohamac̄u.

²¹Tí pjare paina m̄sare “Ñuga. Ōi jira Cristo”, ti nich̄u tinare t̄uh̄oena t̄j̄jga. “Tói jira Cristo”, ti nich̄u c̄uh̄ure t̄uh̄oena t̄j̄jga. ²²“Cristo jija”, ni mah̄ñoina, “Cohamac̄u yare yahu m̄htaina jija”, ni mah̄ñoina jiahca tí pjareta. Ā jia Cohamac̄u to beserinare mah̄ñoa, tina bajuamehneare yoa ñoahca. Ti ã yoa ñoch̄u ñua, Cohamac̄u yaina c̄aina tinare t̄uh̄oa “Potocã t̄jira” nia, Cohamac̄u yare pa tehe nia duhuboca. ²³Ahrire yahuyuja m̄sare to ã wahahto pano. Ā jina noano yoaga m̄sa —ni yahuha Jesu.

Jesu yahpap̄ure to t̄jua tahtore yahuha

(Mt 24.29-35, 42-44; Lc 21.25-36)

²⁴Ā ni tuhs̄u õ sehe ni yahu namoha Jesu:

—Tí dachori ti ñano ȳuh̄d̄uri baharo s̄u dacho macariro, ñami macariro c̄uh̄u buhria duhua wahaahca. ²⁵Ti ã wach̄uta ñahpichoha poca m̄anop̄u jia poca bora wahaahca. Ā jia m̄ano macaa yahpari tuaro ñuhmiahca. ²⁶Tí pjata ȳuh̄u mas̄uno Cohamac̄u warocariro taihtja. Ȳu ã tach̄u m̄anop̄u ȳu tuua mehne ȳu si sitea mehne m̄ano macaa me bui ahri yahpap̄ure ȳu t̄jua tach̄u ñuahca masa. ²⁷Ā jic̄u ȳu yaina anjoare jipihtirop̄u ahri yahpap̄u warocaihtja. Ā jia jipihtirop̄u ȳu yaina ȳu beserinare tina naahca.

²⁸Mip̄ure higuerc̄ure t̄uh̄otuga m̄sa. T̄u quiti mehne m̄sare piti dahre buheihtja. T̄u yuc̄uc̄u p̄uri tich̄u ñuna, c̄uh̄ma mahanocã duhsach̄u masina m̄sa. ²⁹Tó seheta ahri jipihtia ȳu niri c̄j̄irire ti ã wahach̄u ñuna, ȳu t̄jua tahto mahanocã duhsach̄u masinahca m̄sa. ³⁰Potocã niita nija m̄sare. Tí p̄ja macaina ti yariahto panore jipihtia ȳu niriro seheta ã waharohca. ³¹M̄ano, ahri yahpa c̄uh̄u pihtia wahaahca. Ȳu durucua sehe ne cohtotasi. Jipihtia ȳu niriro seheta ã waha sohtori tiarohca.

³² Tí dachore yu tjua tahti dachore, tí hora cūhure masieraja yūhū. Anjoa cūhū tíre masierara. Masa cūhū ne masierara. Yu Pucū dihta tíre masina.

³³ Mūsa cūhū tí dachore masierara. Ā jina noano yoaga. Noano cohtaga. (Cohamacure siniga mūsa.) ³⁴ Ō sehe cohtaga mūsa. Ahri quiti mehne mūsare piti dahre buheihtja. Wūhū puro yoaropū to tinino seheta jira ahri. Tiro to wahahto pano to cahamacare wūhure cohta dutiha. Cāinare ti dahrahtire cūha. Ā jiro wūhure nū wihborirore tirore to tjua tahtore cohta dutiha. ³⁵ Ā jina mūsa cūhū noano wacū masi cohtaga. Wūhū puro to tjua tahtore tina ti masieraro seheta yūhū mūsa puhtoro yu tjua tahti dachore masierara mūsa cūhū. Nānichahapū, nāmi dacho macapū, caraca to duri pja jichū, bohrearopū taboca. ³⁶ Yu ā wacūenoca yu wihiltore masina, yu yare ā yoarucuina jiga mūsa. Ā yoa yūhure noano cohtaga. ³⁷ Ā jicū mūsare yu nino seheta jipihtinare ā nija mūsare: Noano wacū masi cohtaga —niha Jesu tinare.

Sacerdotea puhtoā, judio masare buheina mehne Jesure wajā duaha

(Mt 26.1-5; Lc 22.1-2; Jn 11.45-53)

14 Ā yoa tí pjare pascua wama tiri bose nūmū cjihto bēcuaerari pāore ti chuhti nūmūri cjihto pua dacho dūhsasiniha. Tí pjare sacerdotea puhtoā, ā jichū sā coyēa judio masare buheina mehne dohse yoa ti mahñoa mehne Jesure naha ti wajāhtore cahma sūhūdua niha:

²—Mari bose nūmūri yūhdoro puro tirore nāhasiniēna tjiijhna, “Masa sua sañurucuri”, nina —niha tina ti basi.

Numino me sitia se mehne Jesure pio payoha

(Mt 26.6-13; Jn 12.1-8)

³ Ā yoa Jesu cūhū Betaniapū, Simo cami bēcū baariro cjiro ya wūhupū jiha. Tópū ti churo watoi numino sehe alabastro mehne ti yoariare me sitia nardo wama tia sere posa tiriare na wihihā. Tí se sehe wapa būjū niha. Ā na wihiro, ticoro tiare poharoca, Jesu dapu bui pio payoha. ⁴ To ā yoachū nūa paina suaa waha, ti basi ō sehe niha:

—¿Dohse yoaro ahricoro ahri me sitia co wapa būjūare ā yoa sitejari? ⁵ Tíre ticoro duaboa. Tíre duaro tres cientos niñeru pūrīne wapataboa. Ā wapataro, tí niñerure pjacūoinare waboa ticoro —ni cohtaha paina sehe ticoro to ā yoachū nūa.

Ā jia tina tiorore tuhtiha.

⁶ Tí ā nichū tuhoro Jesu tinare ō sehe ni yahuha:

—Ā niena tjiga tiorore. Yūhure ticoro noano yoaro nina. ⁷ Pjacūoina sehe mūsa mehne ā jirucuahca. Ā jina mūsa cahmari pja tinare wa masina. Yūhū sehe ahri yahpare mūsa mehne ā jirucusi. ⁸ To cjuaro puro mehne ticoro yūhure ā yoahre. Yūhure ti yahto pano yu pjacure cahnoyuro, me sitiare pio payohre ticoro. ⁹ Ā jicū potocā niita nija mūsare. Jipihtiro ahri yahpapū noaa buheare ti yahuropū ahricoro mipure to yoarire yahuahca. Tí ā yahuchū tuhoa tiorore masa payū wacūahca —ni yahuha Jesu.

Juda Iscariote Jesure nū tuhtiinare to űohtore yahuha sacerdotea puhtoare

(Mt 26.14-16; Lc 22.3-6)

¹⁰ Tí pjareta Juda Iscariote wama tirore doce to buheina mehne macariro Jesure to űohtire yahuro wahaha tirore nū tuhtiinare, sacerdotea puhtoare. ¹¹ To

ã ni yahuchũ tuhoa, sacerdotea puhtoa tíre tuhoa wahcheha.

—Muhũre niñerure wanahtja —niha tina Judare.

Ti ã nichũ tuhoro, tiro Jesure ñũ tuhtiinare to dohse yoa ñohto cjihtore wacũ macaha.

**Jesu to buheina mehne to
chũ batoari nũmũ jiha**

(Mt 26.17-29; Lc 22.7-23; Jn 13.21-30; 1Co 11.23-26)

¹²Bucuaerari pãore ti chũa nũmũri ducari nũmũ sehe oveja pascua macaina cjihtire ti wajãhti nũmũ jiha. Tí nũmũ to buheina sehe õ sehe ni sinitu ñũha Jesure:

—¿Mari pascua macaa chuhtire noho baroi cahnoyu dutirocaijari muhũ sãre? —niha tina tirore.

¹³Ti ã nichũta Jesu sehe puaro to buheinare õ sehe ni yahu warocaha:

—Jerusalẽpu wahaga. Tõpu mũsa sũchũ co situ wũariro mũsare piti bocarohca. To piti bocachũ tiro mehne wahaga. ¹⁴Ã wahana tiro to sũho sãari wuhũpu suna, tí wuhũ puore õ sehe niga: “¿Dí tahtiai yuhũ yũ buheina mehne pascua macaa chuare chũnahcari?” ni sinitu dutirocahre buheriro”, niga tí wuhũ puore. ¹⁵Mũsa ã nichũ tuhoro, tõpu muano macari tahtiare pjiri tahtiare, noano ti cahnoyuri tahtiapũre mũsare ñonohca wuhũ puore. Tói mari chuhti cjihtire dahrega mũsa —niha Jesu tinare.

¹⁶To ã nichũ tuhoa tina to buheina tí macapũ wahaha. Tõpu ti sũchũ tinare to niriro seheta ã wahaha. ã jia tina pascua macaa chuare dahreha.

¹⁷Ã yoa nahitia bora tachũ Jesu doce to buheina mehne tí wuhũpuore sũha.

¹⁸Tí wuhũpu ti sũri baharo, tina mehne mesapũ chũro Jesu tinare õ sehe ni yahuha:

—Potocã niita nija mũsare. Cũiro mũsa mehne macariro yuhũ mehne chũrirota yuhũre ñũ tuhtiinare ñonohca yuhũre —ni yahuha Jesu tinare.

¹⁹To ã nichũ tuhoa tina sehe cahyaha.

—¿Yuhũta jijari muhũre ñohtiro? —ni sinitu pihtiaha tina cãina jipihtina Jesure.

²⁰—Mũsa mehne macarirota jira tiro. Yũ chũri wapai yuhũ mehne soha chũriro tjira yuhũre ñũ tuhtiinare ñohtiro. ²¹Panopũ yuhũre ti yahu joariro seheta yuhũ masuno Cohamacũ warocariro yariaihca. Yuhũre ñũ tuhtiinare ñoriro pjacuoro yuhũdũrohca. Tiro to masa bajuerachũ noaboa —niha Jesu tinare.

²²Ã ni yahu tuhsũ, to buheinare sũho chũro, Jesu pãore na, Cohamacũre “Noana”, niha. ã ninota, tí curire nuha, witiha tinare.

—Ahrire na chũga. Ahri yũ pjacu jira —niha tiro tinare.

²³Ã ni tuhsũ tiro sihnia posa tiri wahware na, Cohamacũre “Noana” ni tuhsũ, waha tinare. To wachũ tina jipihtina tíre sihni pihtiaha.

²⁴—Ahri yũ di jira. Payũ masa ti ñaa yoari buhirire cohãcũ tacũ yariaihca. ã yariacũ yũ dire cohãihca. Cohamacũ “Mũsare yuhũdoihtja”, to ni cũriro mũ sũchũ yũ ã yariaro mehne to niriro sohtori tirohca. ²⁵Potocã niita nija mũsare. Mipũre ahri co, se core ne sihni namosi yuhũ. Pu puhtoro Cohamacũ mũsare to sũho jichũpu ahrire coã pari turi sihni ihca tjoa —niha Jesu tinare.

**Pedro Jesure to
cohãhtore yahuha Jesu**

(Mt 26.30-35; Lc 22.31-34; Jn 13.36-38)

²⁶To ã ni tuhsũchũ tina Cohamacũre ño payoa cũno basaare basaha. Ti basa pahñori baharo, tũcũ Olivo wama tidũpu tina wahaa wahaha. ²⁷Tõpu sũho sũro Jesu tinare õ sehe ni yahuha:

—Mipure musa jipihtina yuhure cohānahca. Ō seheta nina Cohamacu yare ti joari pūi yuhure yahuro: “Ovejare ñu wihboriro yoaro sehe jirirore Cohamacu cohānohca. Ā to cohāchū to yaina oveja yoaro sehe jiina duhti site wahcāa wahaahca”, nina Cohamacu yare ti joari pūi. ²⁸ Ā yoa Cohamacu yuhure to masori baharo musa pano Galileapu wahayuihca yuhu —niha Jesu tinare.

²⁹ To ā nichu Pedro sehe ō sehe niha:

—Yuhu mehne macaina jipihtina ti cohā wahcāpachuta yuhu sehe mūhure ne cohāsi —nimaha Pedro tireore.

³⁰ Jesu ō sehe ni yuhtiha:

—Potocā niita nija mūhure. Micha ñami pinihtare caraca pua taha to duhto pano “Yuhu Jesure masieraja”, niihca mūhu. Tia taha ā niihca mūhu —niha Jesu Pedore.

³¹ To ā nipachuta Pedro ō sehe ni tuaro bisiro yuhtiha:

—Mūhu mehne yuhure ti wajā duapachuta “Jesure masieraja”, ne nisi yuhu —ni yuhtimaha tiro Jesure.

Pedro to ā nichu tuhoa tiro mehne macaina cūhu ā dihta ni yuhtiha.

Getsemaní wama tiropu Jesu Cohamacure siniha

(Mt 26.36-46; Lc 22.39-46)

³² Ā yoa tina Getsemaní wama tiropu wahaha. Tópū sūro, ō sehe niha Jesu:

—Cohamacure yu sinino watōi ōi dujiyusiniga musa —niha to buheinare.

³³ Ā ni tuhsu Pedore, Santiagore, Joāore tina tiarore pji wahcāha. Tinare ā pji wahcāno, pjīro tuhotu dūcaha tiro. Ā yoa ñano yajeripohna tiha.

³⁴ Ā cahyaro tó mehne macainare to pji wahcāinare ō sehe niha:

—Yuhu ñano yajeripohna tii nija. Ñano purīnore tuhotui nija. Tí mehne yariahto cua yuhduaro coa taca yuhure. Ōi tjuaga. Yu cūno poterita catiga musa cūhu —niha Jesu tinare.

³⁵⁻³⁶ Ā ni tuhsu tiro tōpu mahanocā waha namo, yahpai caha sūro, Cohamacure ō sehe niha:

—Mai, mūhu jipihtiare yoa masina. Ā jicu yu ñano yuhduhtire yoa duaeracu yoai tjia. Yu ā nipachuta yu cahmano sehe yoai tjia. Mūhu sehe masina. Mu cahmano seheta yoaga yuhure —ni siniha tiro Cohamacure.

³⁷ Ā ni tuhsu, tiaro to buheina cahapu wihiro, carīinare boca wihiha tiro. Tinare ñano Pedore ō sehe niha:

—Simo, ¿carīi nijari mūhu? ¿Cū hora waro yu cūno potori cati masierari mūhu? ³⁸ Noano yoaga musa. Musa mu sūro quihōno yoa duamana musa. Wiho mejeta musa basi tīre bihoerara. Ā jina Cohamacure siniga ñano musa yoaeraho sehe —niha Jesu Pedore.

³⁹ Ā ni yahu tuhsu pari turi waha, Cohamacure siniha. Tó pano to siniriro seheta siniha tjoa. ⁴⁰ Ā sini tuhsuro pari turi tina cahapu wihiha tjoa. Ā wihiro carīinare boca wihiha tjoa. Wūjo caha yuhduaha tina. Ā jia tina Jesure dohse ni masieraha. ⁴¹ Ā yoa pari turi Cohamacu mehne to durucuro sūri baharo tina cahapu wihi, tinare ō sehe niha:

—¿Carī, sosinina nijari musa? Tó puro carīga musa. Michapucacā yuhure Cohamacu warocarirore ñano yoainare ti wahti pja mu su tuhsura. ⁴² Wahcāga. Basa wahana. Ñūga. Yuhure ñu tuhtiinare ñohtiro ōi tara —niha Jesu tinare.

Jesure ñu tuhtiina tirore peresu yoaha

(Mt 26.47-56; Lc 22.47-53; Jn 18.2-11)

⁴³ To ā nino watōihta Juda, doce buheina mehne macariro cjiro wihiha. Tiro mehne masa payu ñosaa pjīni, yucu siri cjuaina cūhu wihiha. Sacerdotea puhto, sā judio masare buheina, ā jichu bucūna, ti warocarina jiha masa sehe.

⁴⁴ Wahmanore Jesure ñu tuhtiinare ño-

htiro sehe tiro mehne tahtinare õ sehe ni yahu quihõ tuhsuha:

—Yü wahsupu wihmiriro tirota jirohca müsa ñahahtiro. Tirore yu wihmiri baharo ñahaga tirore. Ä yoana tirore noano ñahaga to duhtierahto sehe —ni yahu quihõ tuhsuha Juda sehe.

⁴⁵ Ä yahu quihõ tuhsuro wihirota Jesu cahapü dóihtha waha bahrañoha.

—Yü puhtoro —ninota wahsupu wihmiha tirore.

⁴⁶ To ä yoachü ñua tina Jesure ñahaha.

⁴⁷ Ti ä yoachü ñuno cüiro Jesu cahapü ducuina mehne macariro to ñosari pjine tuäwe naroca, sacerdotea bui puhtoro cahamacunore to cahmonore dute pahreñocaha.

⁴⁸ To ä yoachü Jesu õ sehe niha:

—¿Dohse jiro baro müsa ñosaa pjini mehne, yucu tiri mehne tajari? ¿Yaca bucurore müsa ñahano seheta yuhü cühure ñahana tana nijari? ⁴⁹ Dachoripe Cohamacu wuhpü musare yu buhe dujichü, müsa yuhure ne ñahaerare. Müsa ä ñahachü ahri jipihtia ä waharo nina Cohamacu yare ti ni joariro seheta —niha Jesu masare.

⁵⁰ To ä ni tuhsuchü, Jesu buheina tirore cohä wahcä, jipihtina müroca site wahcäa wahaha.

⁵¹ Ä yoa cüiro wahmüno suhti mari-eriro cüno coma yosaro dihta comariro Jesu baharo ñu nünü timaha. To ä ñu nünü tichü ñua tirore ñahamaha. ⁵² Tirore ti ñahachü ñuno to coma yosarore cohäno, suhti mari-eriro mürocaa wahaha.

Puhtoa cahapü naaha Jesure

(Mt 26.57-68; Lc 22.54-55, 63-71; Jn 18.12-14, 19-24)

⁵³ Ä yoa sacerdotea bui puhtoro cahapü Jesure na wahcäha. Ti na süri baharo sacerdotea puhtoa, bucüna, sä coyeya judio masare buheina cühü jipihtina cahmachuha. ⁵⁴ Tiro Pedro sehe

Jesu baharo yoaropü nünü tiha. Ä nünü tiro sacerdotea bui puhtoa ya wuhü cahapü suha. Ä süro tiro tí wuhure cohtaina surara mehne pichaca duhtü cahai sohma dujiha.

⁵⁵ Sacerdotea puhtoa, jipihtina paina puhtoa cühü Jesure wajä dutia taa, Jesu to quihõno yoeararire ti yahusähtire wacü macamaha. Wiho mejeta türe bocaeraha.

⁵⁶ Ä wacü bocaerapahta payü masa tirore ä yahusämacanocaha. Ti ä yahusäa potocä jieraha. Pairo soro ni, paio soro niha. ⁵⁷ Ä yoa paina wahcärücü sü, Jesure õ sehe ni yahusäha tjoa:

⁵⁸ —Ahriri õ sehe nire: “Yuhü ahri wuhure Cohamacu wuhure masa ti dahreri wuhure cohäihtja. Ä cohäcü tia nümü wahaboroi tí wuhure pari turi yoaihtja. Tí wuhü masa ti dahreri wuhü jisi”, to nichü sä tuhohi —niha tirore yahusäina.

⁵⁹ Ti ä ni yahusäpachüta ti yahusäa cühü potocä jieraha. Pairo soro ni, paio soro niha tjoa.

⁶⁰ Ti ä nichü tuhoro sacerdotea puhtoro ti watoi ducuriro wahcärücü sü, Jesure õ sehe ni sinituha:

—¿Ahrina mühure ti yahusäpachüta tinare yuhti cahmaerajari mühü? ¿Mühure ti yahusärire dohse ni yuhti cahmajari mühü? —niha tiro Jesure.

⁶¹ To ä nichü tuhparota Jesu äta tuhhotunocaha. To ä yuhtierachü ñuno sacerdotea bui puhtoro tirore sinituha tjoa:

—Cristo, ¿Cohamacu warocarirota jijiari mühü? ¿Noariro Cohamacu macüno warota jijari mühü? —niha tiro Jesure.

⁶² —Tiro tjija. Ä jina yuhure masunore Cohamacu warocarirore yu Pücü jipihtina bui Jiriro to poto buhusehei yu dujichü ñunahca müsa. Ä yoa müano macaa me watoi yu tachü cühure ñunahca müsa —niha Jesu tirore.

⁶³⁻⁶⁴ To ã nichuta sacerdotea bui puhtoro sehe to sãari suhtirore to basi tuhrênocaha painare “Sua yuhduara”, ni ñu masi dutiro.

—Cohamacure ñano durucuro nina ahriro. To ñano durucure tuho tuh-suja mari. Æ jia tópeinata yahusãjaro ahrirore. ¿Æ jina dohse yoanahcari mari mipure ahrirore? —niha sacerdotea bui puhtoro paina puhtoare.

—Cohamacure to ñano durucuri buhiri wajãnocano cahmana tirore —ni yuhtiha paina puhtoa.

⁶⁵ Æ ni yuhti tuhsu, cãaina tina mehne macaina Jesure chahcho puti sihõ muja, to caparire duhte ducata, tirore cãã, dota mujaha. Cãã tuhsu õ sehe ni bujupeha:

—¿Noa jijari muhure dotaro? Ñuera-paihta yahuga sãre —ni bujupeha tina.

Ti ã cãã dotari baharo puhtoro yaina surara sehe tirore na wahcã, tina cõhu tirore ti wamomacari mehne ñano cãã namoha.

“Tirore masieraja”, niha Pedro Jesure

(Mt 26.69-75; Lc 22.56-62; Jn 18.15-18, 25-29)

⁶⁶ Æ yoa wuhu cahai jiri wapai noari wapai Pedro to jichu sacerdotea bui puhtoro cahamacono wihiha. ⁶⁷ Ticoro Pedro to sohmachu ñuno tiro dihtare ñurucuha.

—Nazare macariro mehne, Jesu mehne muhu cõhu jihre —niha ticoro Pedore.

⁶⁸ To ã nichu tuhoro tiro õ sehe niha:

—¿Dohse nimacanocaco nijari muhu? Mu nirirore ne masieraja yuhu —niha Pedro ticorore.

To ã niri baharo Pedro sahrõno sopaca macari mahapu wahaha. Tõi to ducuhu caraca duha. ⁶⁹ Tõi to jichu ñuno cahamacono sehe ticoro cahapu ducuinare yahurocaha tjoa.

—Ahriro cõhu Jesu buheina mehne macariro jira —niha ticoro.

⁷⁰ To ã nichu tuhoro Pedro pari turi õ sehe niha tjoa:

—Tirore masieraja yuhu —niha tjoa.

Baharo curero tõi ducaina Pedore õ sehe niha:

—Potocã tjira. Muhu Galilea macariro jira. Æ jicu tina mehne macarirota jira muhu —niha tina tirore.

⁷¹ Ti ã nichu tuhoro tiro õ sehe ni yuhtiha:

—Potocãta Cohamacu mehne nii nija musare. Potocãta yu nierachu Cohamacu yuhure buhiri dahrejaro. Tirore musa nirirore ne masieraja yuhu —ni yuhtiha Pedro tinare.

⁷² To ã nichuta caraca duha tjoa. To ã duchu tuhoro Jesu tirore to nirire wacõha: “Caraca puã taha to duhto pano muhu yuhure ‘Jesure masieraja’, niihca muhu. Tia taha ã niihca muhu”, Jesu to nirire wacõha Pedro sehe. To ã nirire wacõno, tuaro tiirucuha Pedro.

Pilato Jesure sinituha

(Mt 27.1-2, 11-14; Lc 23.1-5; Jn 18.28-38)

15 Æ yoa bohrearopu sacerdotea puhtoa, bucuna, sã judio masare buheina, jipihtina paina puhtoa mehne cahmachu, durucuha Jesure ti yoah-tire masia taa. Tirore ti wajãhtore durucu cahno tuhsu, Jesure duhte, na wahcã, Pilatore waha tirore. ² Tirore ti na su wachu ñuno Pilato tirore õ sehe ni sinituha Jesure:

—¿Potocãta judio masa ti puhtoro tjijari muhu? —ni sinitu ñuha tiro Jesure.

—Æja. Mu nino sehetã tirota jija —ni yuhtiha Jesu.

³ Æ yoa sacerdotea puhtoa payu ni yahusãha tirore. ⁴ Ti ã ni yahusãchu tuhoro Pilato tirore õ sehe ni sinituha tjoa:

—Ahrina muhure payu yahusãa nina. ¿Ti ã yahusãpachuta dohse yoacu ne yuhtierajari muhu tinare? —niha tiro.

⁵To ā nipachuta Jesu ne pari turi yuhti namoeraha. Ā jiro Pilato cuaa wahaha.

Jesure wajā dutiha

(Mt 27.15-31; Lc 23.13-25; Jn 18.38–19.16)

⁶Cuhmaripe pascuaripe masa yairo cjihtore cūiro peresupū jiriore, masa ti wio dutiriore Pilato ā wiobasa mūjaa tiha. ⁷Tí pjare Barrabá wama tiroiro peresupū jiha. Tiro puhtoare cohā duaina, masare wajāina mehne macariro jiha. ⁸Ā jia masa payū Pilato cahapū sua, tirore ō sehe ni siniha:

—Cuhmaripe säre mū yoarucuriro se-heta yoaga säre. Cūiro peresupū jiriore säre wiobasaga —niha tina.

⁹Ti ā nichūta Pilato tinare ō sehe ni sinitu nūha:

—¿Ahriri Jesure mūsa judio masa puhtoro yū wiobasachū cahmajari mūsa? —ni sinitu nūha masare Jesure wio duaro.

¹⁰Jesure masa ti cahīchū nūa sacer-dotea puhtoa cūhū tirore nū tuhtiha. Ā nū tuhtia tirore waha Pilatopure. Ā jiro masa ti cahīri buhiri sacer-dotea puhtoa ti nū tuhtirire ti peresu yoa dutichū masino Jesure wio duamaha Pilato. ¹¹To ā wio duapachūta sacer-dotea puhtoa masare Jesu mehne suachū yoaha. Ō sehe ni dutiha tinare: “Jesu wijaachū cahmaeraja. Barrabá sehere wioga”, ni dutiha masare. ¹²Ā jiro Pilato Barrabáre ti wio dutiri baharo Pilato sehe tinare ō sehe ni sinituha tjao:

—¿Ahriri judio masa ti puhtoro mūsa niriore sehere dohse yoaihcari yūhū mūsa ā nichū? —ni sinituha tiro.

¹³—Crusapū cjā puha wajāga tirore —ni sañurucuha masa.

¹⁴—¿Yaba barore nāare yoari ahriri mūsa ā ni sañurucuchū? —ni sinitu namoha tinare.

To ā nichū tuhoa tina sañurucu namoha tjao:

—Crusapū cjā puha wajāga tirore —ni sañurucuha tina.

¹⁵Ti ā ni sañurucuchū tuhorō Pi-lato sehe masare wahchechū yoa duaro Barrabáre peresupū jiriore wio dutiha masa ti wio dutiriore. Tirore to wio dutiri baharo, Jesu sehere nāno tjanaye dutiha. Tirore ti tjanayeri baharo, tirore surarare wiaha, crusapū cjā puha wajā dutiro.

¹⁶Ā yoa surara Pilato ya wūhū puhichapū pretorio wama tiri wūhū puhichapū tirore na sāa suha. Na sāa su tuhsū, tina mehne macaina surarare pjiroca, cūnoi cahmachu dutiha. ¹⁷Cahmachu tuhsū, tina puhtoro ya suhtiro yoaro sehe bajuri suhtirore Jesure sāa, pota sorore yoa, tí sorore to dapu bui duhu payoha. ¹⁸Ā yoa tuhsū ō sehe ni bujūpeha tina tirore:

—Noano tagā. Judio masa puhtoro noano tagā —ni bujūpeha.

¹⁹Ā niata yucūcū mehne to dapure cjā mūja, tirore chahcho puti sihō mūjaha tina. Tuhsū, cua pisaro yoaina yoaro se-heta tirore na tuhcuca caha sū, nō payoro sehe yoaa, bujūpeha tirore. ²⁰Ā yoa bujūpe tuhsū ti sāari suhtirore tjuwe naroca, to ya suhti sehere tirore sāa, tirore crusapū cjā puha wajāa waha, naa wahaha tina.

Tina Jesure crusapū cjā puha, wajāha

(Mt 27.32-44; Lc 23.26-43; Jn 19.17-27)

²¹Jesure ti ā naano watoi, tói wahariro Simo Cirene macariro campopū sūriro, tina cahapū to wihichū nūa surara sehe tirore Jesu to wūari crusare wūa wahcā dutiha. Alejandro, Rufo puaro pūcuro jiha Simo sehe.

²²Baharo, Gólgota wama tiropū Jesure na suha. Gólgota nino, “Dapu cohā”, nino nina. ²³Tópu tirore ti na sūri baharo, se core, mirra wama tidū co mehne ti morea core Jesure wamaha. Wiho mejeta tiro sehe tí core

sihni duaeraha. ²⁴ Baharo tina Jesure crusapũ cjã puha dapoha. Cjã puha dapu tuhsũ, to sãa suhti cjirire ti basi cahma witia taa, “¿Noa yaro jirohcari õ?” ni masia taa, docapea poca mehne docape mujaha tina.

²⁵ Jesure crusapũ ti cjã puhachũ tia hora waro duhsasiniha cohari pja to suhto. ²⁶ ã yoa crusapũ õ sehe ni joari pjĩne duhu õha tina tireto ti yahusãrere yahu duaa. “Ahrĩro judio masa bui puh-toro jiro jira”, ni joaha tina tí pjĩne. ²⁷ ã yoa pũaro yaca bucuna Jesu cahai paye pjĩnipũ crusaripũ ti cjã puha daporina jiha tina. Cũiro to poto buhusehei, paio to cõ buhusehei cjã puha dapoha tina cũhũre. ²⁸ [Ti ã yoachũ panopũ Cohamacũ yare ti yahu joariro seheta ã waharo niha. Õ sehe ni joaa tiha: “Dutiare yuhdũrucaina mehne macariro jira’, ni tuhature masa tireto”, ni joaa tiha panopũ.]

²⁹ ã yoa crusari cahai yuhdũ wahcãina Jesure ñũ, ti dapu pocare yurerũca, tireto ñano ni durucuha:

—Noana. Noana. ¿Cohamacũ wuhũre cohã, tia dacho wahaboroi pari turi tí wuhũre dahrehtiro jijari muhũ? ³⁰ ã jiro jicũ, mu basi dujiaga. ã jicũ mu basi yoadohoga. ã jii yuhdũ witiilhca muhũ —ni bujũpeha tina.

³¹ Ti yoaro seheta sacerdotea puhtoã cũhũ sã judio masare buheina cũhũ tireto ã ni bujũpeha. ã ni bujũpeã õ sehe niha ti basi:

—Tiro painare yuhdoriro jiparota to basi yuhdo masierara: ³² “Cristo, Cohamacũ warocariro Israe masa puh-toro jija”, nimana tiro. ã jina to basi to duji tachũ ñũna tireto wacũ tuanhca —ni bujũpeha tina.

ã yoa yaca bucuna tiro cahai ti cjã puha õrina cjiri cũhũ tó seheta tireto ñano ni bujũpeha tina cũhũ.

Jesu yariaa wahaha

(Mt 27.45-56; Lc 23.44-49; Jn 19.28-30)

³³ ã yoa cohari pja jichũ tia hora waro jipihtiropũ nahitiano wahaha. ³⁴ To nahitia duhuchũ waro Jesu tuaro sañurucuha:

—Eloi, Eloi, ¿lama sabactani? —niha tiro.

ã nino õ sehe nino niha. “Yũ Cohamacũ, yũ Cohamacũ, ¿dohseacũ yuhũre cohãri muhũ?”, nino niha.

³⁵ To ã nichũ tuhõã cãina tõi ducuina õ sehe nimaha:

—Tuhõã musa. Cohamacũ yare yahu muhtarirore Elia cjirore pjirocaro nina —nimaha tina.

³⁶ ã jiro cũiro tina mehne macariro wihmi nari suhtere vino suẽã core to sohari suhtere na mũroca, yucũcũ sohtoapũ duhte õ, Jesure wihmi dutiha. ã wihmi dutiro, õ sehe nimaha:

—Depusinia. Elia cjiro wihi ahrirore to na bororo tachũ ñũsinijihna mari —nimaha tiro painare.

³⁷ To ã niri baharo Jesu sehe tuaro sañurucu, yariaa wahaha. ³⁸ To yariachũta Cohamacũ wuhũ macari suhtiro tõe to jiri tahtia waropũ ti ducataro suhtiro dacho macai bui sehe tuhũnũ bora ta, pũã cahsaro tuhũnũroca yoja sua wahaha. ³⁹ To ã yariachũ ñũno surara puh-toro Jesu to wahãno potoi ducuriro õ sehe niha:

—Potocã tjiri jimana. Ahriro Cohamacũ macũnota jiri jira —niha tiro.

⁴⁰ ã yoa yoaropũ ducua numia cũhũ Jesure ñũrocarucua niha. Tí numia mehne María Magdalena jiha. Pacoro María wama tiricoro cũhũ jiha. Ticoro sehe José, to bahũro Santiago ti pocoro jiha. Pacoro Salomé jiha. ⁴¹ Tí numia Jesu yahuare quihõno tuhõã numia jia, Galilea yahpai to jisnichũ tireto piti ti, yoadohõã tiha. Tí numia mehne payũ

paye numia cūhū Jerusalēpū Jesu to sūho tarina numia jiha.

Jesu pjacure masa copapū cūha

(Mt 27.57-61; Lc 23.50-56; Jn 19.38-42)

⁴²⁻⁴³ Ā yoa tí dacho to yariari dacho Sabado pano judio masa sã sori nūmū pano jiri dacho jiha. Ā yoa Pas-cua macaa cjihtire ti cahnorī dacho jiha. Tí ñamihta José Arimatea macariro cuiro marieno Pilato cahapū sūha Jesu pjacure sinino sūro. José judio masa sã puhtoā mehne macariro, puhtoā ti cua pisaro ñūriro waro jiha. Tiro puhtoro Cohamacu masare to sūho jihtore cohtaro niha. ⁴⁴ Ā yoa José Pilatore to ā sinichū tuhoro, tuho cūaa wahaha Pilato sehe. “¿Jesu yaria tuhsuari?” ni tuho-turo, cūaa wahaha. Ā jiro surara puhtorore pjiroca ō sehe niha tirore:

—¿Potocāta Jesu yariaa wahari? —ni sinituha tirore.

⁴⁵ To ā nichū surara puhtoro ō sehe ni yuhtiha:

—Āja. Yariaa wahahre —niha.

To ā nichū tuhoro, Pilato Jesu pjacure wa dutiha Joséré. ⁴⁶ To ā wa dutiri baharo José noari suhtirore nuchūbasaha. Nuchūbasa tuhsū, Jesu pjacū cjirore na boro, suhtiro mehne wahma, masa copapū tācai ti sahari copapū to pjacure siō sãa payoha. Siō sãa payo tuhsū, tí copa cahai jiria tācare pjiria tācare tju turē wahcā, tí copare biha dapoha. ⁴⁷ María Magdalena, ā jichū María José pocoro Jesure ti na sãa duhu payorirore ñūha.

Jesu masa wijaaha

(Mt 28.1-10; Lc 24.1-12; Jn 20.1-10)

16 Ā yoa Sabado dacho yūhdūri baharo, sū sãari baharo, María Magdalena, Salomé, ā jichū María Santiago pocoro, tina tiaro numia wisōa me sitia core nuchūha Jesu pjacure wisōa taa. ² Ā jia domingo bohrea muja tachū Jesure ti duhu payori copapū ñūa wahaha tina.

³ Tí copa cahapū waharucua, ō sehe niha tina ti basi:

—¿Tí copare bihari tācare noa marine pjōobasarohcari na? —niha tí numia ti basi.

⁴ Baharo tí copa cahapū sua, tí copare bihari tācare, pjiria tācare ti nawe cūri-are ñūha tina. ⁵ Ā ñūa tí copapū sãa wahaha. Tópū sua, cūiro wahmūnore ti poto bñhusehei dujirirore, yehseri suhtiro sãarirore ñūa, cūaa wahaha tina.

⁶ Ti ā cuachū ñūno, tiro sehe ō sehe niha tí numiare:

—Yūhūre ñū cūaena tjiga. Jesu Nazare macariro, crusapū ti cjā puha wajāriro cjirore mūsa macana nimana. Wiho mejeta tiro sehe masa wijaa tuhsūhre. Ōre mariaha. Tirore ti duhu payoro cjirore ñūga. ⁷ “Tiro mūsa pano Galileapū wahayuhto jiyuhti. Tói to niriro seheta mūsa tirore ñūhtina jiyuhti”, ni yahuna wahaga to buheinare, Pedro cūhūre —ni yahu dutiha wahmūno tí numiare.

⁸ To ā nichū tuhoa tina cui, tetere, masa copa cahai jirina mūrocaa wahaha. Ā cuiā painare yahueraha.

Jesu María Magdalenare bajuaha

(Jn 20.11-18)

⁹ [Ā yoa Jesu sehe domingo ñamicunucā to masa wijaari baharo, María Magdalenare to siete watia to cohānohricorore tiro bajua muhtaha. ¹⁰ Jesu mehne macaina cjiri sehe to yariachū ñūa, tuaro cahya, tia niha. Ā ti tiiro watoi, María Magdalena sehe Jesure to ñūrire tinare yahuro sūmaha. ¹¹ “Jesu catihre. Ñūhi yūhū”, ni yahumaha ticoro. To ā ni yahupachūta, tina sehe ticorore ne tuho duaeraha.

Jesu to buheinare bajuaha

(Lc 24.13-35)

¹² Baharo puaro tina mehne macaina masa marienopū ti tinichū Jesu soro ba-

juriro tina cūhure bajuaha tjoa. ¹³To ã bajuachũ ñua tina tjua waha, paina Jesu yainare tíre yahuha. Ti ã ni yahupachũta tina cūhure tuho duaeraha.

**Jesu to yare buhe dutiro
warocaha to buheinare**

(Mt 28.16-20; Lc 24.36-49; Jn 20.19-23)

¹⁴Baharo to buheina oncere mesa cahapũ ti chũ dujiro wato, tinare bajuaha tjoa Jesu. Tirore ñurinare ti yahuchũ ti tuho duaerari buhiri, tirore ti noano wacũ tuaerari buhirire masino, tiro tuhtiha tinare. ¹⁵Ã tuhti tuhsũ, tinare õ sehe niha:

—Ahri yahpa jipihtiropure ahri yũ ya quiti noaa buheare jipihtina ahri dacho macainare noano yahu site pahõona wahaga. ¹⁶Yũhure wacũ tuainare ti bautisarinare pichacapũ wahaborinare yũhdorohca Cohamacũ. Tuhsũ, yũhure wacũ tuaeraina Cohamacũ to buhiri dahrehtina pichacapũ wahahtina jiahca.

¹⁷Ã jia yũhure wacũ tuaina yũ tuaa mehne õ sehe yoaahca: Yũ tuaa mehne, yũ wama mehne watĩare cohã wioahca. Tuhsũ, wahmaa duserire durucuahca. ¹⁸Ã yoa agãare ti ñahachũ, jipihtia ñima dohse jia ñimare ti sihnichũ, tinare ne purĩsi. Ã yoa dohatiina bui ti wamomacarine ti ña payochũ tina noaina wahaahca —ni yahuha Jesu to buheinare.

Jesu mũanopũ mũjaa wahaha

(Lc 24.50-53)

¹⁹Ã ni yahu tuhsũ mari puhtoro Jesu mũanopũ mũjaa wahaha. Tópũ sũro Cohamacũ poto buhusehei dujiha tiro mehne puhtoro jiro. ²⁰Ã jia tina jipihtiropũ noaa buheare Cohamacũ masare to yũhdũchũ yoahiti buheare buhea wahaha. Ti ã buhechũ mari puhtoro tinare yoadohoha. To tuaa mehne yoa ño masichũ yoaha tinare, masare to ya buheare tuho dutiro. Tó puro tjira.]

San Lucas

1¹⁻³ Puhtoro Teófilo, ahrire mu buhehti cjihtire muhare joarocai nija. Jesu sa mehne jisninino to yoari cjiire payu paina joa daca tuhsure. Wahmanopure Jesure nuina cjiri, to yare buheina cjiri ti ni yahuriro seheta paina tře joa daca tuhsure. A jicu ahri jipihitiare noano masi pahno duacu buhei. A jicu yuhu cuhu tře noano joa duaja mu buhehti cjihtire yoacu tacu. ⁴Jesu yare yahuina muhare buhe tuhsure. Tře noano mu masi namohto sehe ahri tjure muhare joarocai nija.

João masare bautisahtiro to masa bajuahitire anjo yahuha

⁵Herode Judea yahpa macaina puhtoro to jichu cuiro sacerdote Zacaria wama tiroto jia tiha. A jiro Zacaria to ya curua macaina sehe sacerdotea curua Abias cjiro ya curua jiha. Zacaria namono cuhu sacerdote Aaro cjiro panamaono ji turiaricoropu jiha. Ticoro Elisabe wama tiricoro jiha. ⁶Tina puaro Cohamacu dutiare noano yoa pahnoina ti jichu nuono, "Ahrina yu cahmano seheta a jia tirucura", ni nuha Cohamacu tinare. ⁷Ticoro Elisabe ne pohna marienico ro jiha. A jia tina puaro ne pohna marieina ji, bucuna waro jiha.

⁸A yoa sacerdotea ti dahraare dahraa taa, o sehe yoaa tiha: Dahra muhtari curua cjiro pa curua mehne cahma cohtota mujaa tiha. A jia Zacaria ya curua macaina dahrahti dachori jichu, tina dachoripe sacerdotea ti dahraa tirucururo seheta Cohamacu ya wuhupu dahraa taa niha. ⁹Sacerdotea Cohamacure ti no payori mesapu inciensore me sitia pohcare juhtiro cjihtore besea taa, docapea mehne besea tiha. A yoa ti quihori dacho jichu Zacaria ya curua macaina me sitiare juhtirore besea taa docapeha.

A docapea Zacariare beseha. A jiro tiro puhtoro Cohamacu ya wuhupu saa wahaha me sitiare juono waharo. ¹⁰Ti wuhupu tře to juono watoi jipihitina masa sehe sopacapu Cohamacure sinia tiha. ¹¹Ti pjare Cohamacu yairo anjo Cohamacure no payori mesa poto buhusehei bajuarucu suha Zacariare. ¹²To a bajuachu nuono Zacaria tirore nu cna yuhduu wahaha. ¹³To a cuachu nuono anjo tirore o sehe ni yahuha:

—Zacaria, cuu trega. Cohamacu mu sinirire tuhore. A jina mipure musa pohna tinahca. Musu macu cjihto masa bajuarohca. To bajuachu "João" ni wama pisuga tirocare. ¹⁴⁻¹⁷"Tiro yu tuua mehne payu noaare yoarucururo jira", ni nuohca Cohamacu mu macure. Tiro to masa bajuari baharo vinore, sihbiori cuhare sihnisi. A jiro tiro to masa bajuahito pano Espiritu Santo to niriro sehe yoaruro jirohca tiro. Espiritu Santo tiropure saarucu su tuhsu a baju yoarucurohca tiro mehne. A yoa payu Israe masare Cohamacu mari puhtoro cahmaeraina cjiire noano cahmachu yoarohca mu macu. Mari puhtoro to tahto pano Elia cjiro Cohamacu yare yahu muhtaruro to buheriro seheta Espiritu Santo to yoadohoro mehne Cohamacu to tuua mehne mu macu cuhu buhero hca. A buhero ti pucsuma ti pohna mehne niano jimarinare ti noano cahma cah jichu yoarohca. A yoa Cohamacure yuhdurucaina cjiri cuhare noano no payoa mehne yuhtichu yoarohca. A buhero mari puhtoro Cohamacu yaina cjihtire yoarohca tiro. A jicu to masa bajuari baharo muhu wahcheihca. Payu paina cuhu wahcheahca —niha anjo Zacariare.

¹⁸To a nichu tuhoro Zacaria sehe o sehe ni sinituha anjore:

—Sa bucuna jija. A jicu mu niri potoca jichu dohse masicuhcari yuhu? —niha tiro.

¹⁹To ā nichu anjo sehe tirore ō sehe ni yahuha:

—Yuhu Gabrie wama tiroro jija. Cohamacu cahamacuno to cahai ducuriro jija yuhu. Cohamacu ahri noaa quitire yahu dutiro, mu cahai yuhure warocare. ²⁰Yu yahuriro sehta potocāta waharohca. Yu ā nipachuta yuhure muhu potocā tuhoerare. Ā jicu mipure muhu durucu masierariro wahaihca. Mu macu to bajuari baharo durucuihca tjoa —niha anjo Zacariare.

²¹Sopacapu jiina masa Zacariare cohtaa niha. “¿Dohse jiro baro tiro Cohamacu wuhupu jiro, so wijaa taerajari?” ni, cohtaa niha masa tirore. ²²Tuhsu, tiro wuhupu jiro wijaa wihi, tina mehne durucu masieraha. “Tiro Cohamacu wuhui bajuare ñuno niboca”, ni tuhotu masiha tina. Ā jiro tiro durucu masierariro jiro to wamomacari mehne yoa cayoha masa ti masihto sehe.

²³Cohamacu wuhui to dahraa pihitchu, tiro to namono mehne tjuaa wahaha ti wuhupu. ²⁴Ti ā tju suri baharo to namono Elisabe niji pocoro jiha. Ā jiro ticoro cinco sūri waro masa cahai waharaha. ²⁵Ō sehe ni tuhotuha ticoro: “Mipure yuhure Cohamacu yoadohore juna. Pohna marienico jico buobiaro yuhduhi yuhu. Cohamacu to yoadohoro mehne mipure nijinocāre bocaja yuhu”, ni tuhotuha ticoro.

Jesu to masa bajuahtore yahuha anjo

²⁶⁻²⁷Elisabe cinco sūri niji pocoro to ji wahcāchu waro Cohamacu sehe anjore Gabrie wama tirore nuhmino, ne mua mehne jieraricoro chapu warocaha. Ticoro María wama tiricoro Nazarei Galilea yahpai jiri macai jia tiha. José wama tiroro jiha to manuno cjihto. Tiro panopu macariro Davi cjiro panamino ji turiaropu jiha. ²⁸Ā to warocachu María chapu sūro, anjo ō sehe ni yahuha:

—María, ¿jimajari muhu? Cohamacu muhure yoadohoro nina. Muhure noano yoaro nina —niha anjo ticorore.

²⁹To ā nichu tuhoro, ticoro tuaro wacū tuhotuha. Anjo to yahurire tuhoturo “¿Dohse nino baro yuhure ā nicari?” ni wacūha ticoro. ³⁰To ā ni tuhotuchū masino anjo ō sehe ni yahu namoha ticorore:

—María, Cohamacu muhure tuaro cahina. Ā jico muhure yu yahuhtire tuho caeco tjiga. ³¹Noano tuhoga. Cūiro nijinocāre pohna tichohca muhu. Tirocā to masa bajuari baharo, “Jesu” ni wama pisucuhca muhu tirocāre. ³²⁻³³Tiro tua yuhduariro jirohca. Ā jia tirore “Cohamacu Jipihtina Bui Jiroro macunota jira”, ni masiahca masa. Mu macu ñuchuno munanopu Davi cjiro Israe masa ti puhtoro to jia tiroro cjiro sehta mu macu cjihto cūhure cūnohca Cohamacu. Ā jiro jipihtia dachoripe tiro Israe masare dutirohca. Puhtoro to jihto ne pihtisi —niha anjo.

³⁴To ā nichu tuhoro María sehe ō sehe ni sinituha:

—¿Dohse yuhu manū mariapacohta pohna tibocari yuhu? —niha ticoro.

³⁵To ā nichu tuhoro anjo ō sehe ni yuhtihca:

—Espíritu Santo to tuua mehne muhure nijinocāre bocachu yoarohca. Ā jiro Cohamacu Jipihtina Bui Jiroro to tuua muhure to masurca caharo sehta bajuaeraparota tarohca muhure. Ā jia “Cohamacu macuno, ñaa buhiri tia marieriro jira”, niahca masa mu macure. ³⁶⁻³⁷Cohamacu jipihtiare yoa masina. Ā jiro mu coyeacoro Elisabe cūhu bucoro waro jiparota mipure niji pocoro jira ticoro. Ticoro pohna tirohca munocāre. Masa ticorore “Nijinocā boca masienico jira”, ti niricoro cjiro mipure nijinocāre to bocari baharo seis sūri waro wahara —niha anjo Mariare.

³⁸To ā nichu María ō sehe ni yuhtihca:

—Yuhure tuhoga. Mari puhtoro to cahamacono jija yuhũ. Mũ niriro seheta yuhure ã wahajaro —niha ticoro.

To ã niri baharo anjo wahaa wahaha.

María Elisabere ñũno wahaha

³⁹To ã niri baharo María tũyucuri jiri yahpapy Judea yahpai jiri macapy ño duaro wahaa wahaha. ⁴⁰Tõpũ sũro, Zacaria ya wuhũpũ sãano, “¿Jimajari?”, niha ticoro Elisabere. ⁴¹To ã nichũ Elisabe to tuhochũta, to macũno sehe niji suhtiropũ jirocã ñuhmiha. Elisabe Espĩritu Santo to dutiriro seheta yoa pahñoricoro jiro, to tuaare cjuaricoro jiha. ⁴²Ã jiro tuaro wahchea mehne ticoro bisiro durucuha:

—Jipihtia numia yũhdoro mũhure noano yoahre Cohamacũ. Mũ macũ cũhure noano yoahre Cohamacũ. ⁴³Cue, yũ puhtoro pocoro yũ cahai mũ tachũ noano yoara yuhure Cohamacũ. ⁴⁴Mũ yuhure “¿Jimajari?” mũ nichũ yũ macũ sehe niji suhtiropũ jirocã wahchea mehne ñuhmihti yuhure. ⁴⁵Cohamacũ to niriro seheta yoarohca. Ã jico to yahurire tuhoricoro jico wahchericoro jira mũhũ —niha Elisabe Mariare.

⁴⁶To ã nichũ María õ sehe ni yũhtiha: “Cohamacũ noariro, tuariro jira’, nija.

Yuhũ noano yajeripohna tija.

⁴⁷Cohamacũ yuhure pichacapũ wahaboricorore yoadohoriro jira.

Ã jiro mipũre yuhure noano wahchea mehne jichũ yoara.

⁴⁸⁻⁴⁹Tiro yuhure to cahamaconore wacũri jira. Cohamacũ tua yũhũariro noaa dihtare yuhure yoadohohre.

Ã jia mipũre ‘Ticorore Cohamacũ noano yoahre’, jipihtina masa ã ni, durucuahca yuhure.

Cohamacũ ñaa marieriro jira.

⁵⁰Jipihtia dachoripe jipihtina tirore ño payoinare tiro pja ñũriro jira.

⁵¹Cohamacũ to tuaa mehne yoaha. ‘Painare yũhdũrucaja’, niinare yũhdũrucaha tiro.

⁵²Puhtoare cohãha tiro. Ã jiro cahamaca sehere tiro puhtoa yoaro seheta cũha tinare.

⁵³Juca baaina cjirire tiro noaa chuare waha. Tuhsũ, payũ cjuaina cjirire paye baro cjuaeraina yoaha tiro.

⁵⁴⁻⁵⁵Mari ñuchũsuma cjirire to yahu cũiro seheta yoa pahñoha Cohamacũ.

To cahamaca Israe masare tiro yoadohoha.

Abrahã cjirire mari ñuchũsuma cjirire jipihtina to coyey to baharo jina cũhure Cohamacũ jipihtia dachoripe ã pja ñũrucuriro jia tiha.

Tinare to yahu cũire boeraha Cohamacũ”,

niha María.

⁵⁶Tia sũ waro Elisabe mehne jiha ticoro. Tõ puro to jiri baharo to ya macapy tjuua wahaha María.

João masa bajuaha

⁵⁷Elisabe to niji wahcõri baharo to macũno masa bajuaha. ⁵⁸Ã jia Cohamacũ ticorore to ã noano yoachũ to ya maca macaina to coyey cũhũ ticoro mehne wahcheha. ⁵⁹Ocho dachori to masa bajuari baharo, to pũcũsuma tirocãre mahanocã to pjacũ cahsarocãre yihso dutia taa niha. Ã jia tina mehne macaina ti cahapũ suha ti yihsochũ ñũa taa. Tina mehne macaina Zacaria to pũcũro wamare tirocãre wamoa duamaha. ⁶⁰Ti ã wamoa duapachũta to pocoro õ sehe niha:

—To pũcũro wamare wamoeraja. João wamoanahca tirocãre —niha ticoro.

⁶¹—Mũ coyey ne cũiro João wama tiroro mariaha —niha tina ticorore.

⁶²Ã jia ti wamomacari mehne yoa ño, Zacariare õ sehe ni sinitu ñũha tina:

—¿Mũhũ waro dohse wamoa duajari mũ macũre? —ni sinitu ñũha tirore.

⁶³Ti ã nichũ tiro sehe joahti pjĩne siniroca, ñaha, joaha: “Yũ macũ João wama tirohca”, ni joaha Zacaria. To ã ni joachũ tina sehe cũaa wahaha. ⁶⁴To ã ni joari baharo tirore durucuchũ yoaha Cohamacũ. Æ jiro tiro durucua wahaha jũna:

—Cohamacũ tuariro, noariro jira — niha tiro.

⁶⁵To ã ni durucuchũ tũhoa tó macaina cũaa wahaha. Æ jia ahri jipihtiare Judea yahpa macainare tũyucũ watoi jijnare masa yahu siteha. Æ jia masa tó macaina noano masi pihtia wahaha. ⁶⁶Jipihtina tíre tũhoa wacũha. “Cohamacũ tuaare ahrirocã cjuara. Æ jiro wiho jiriro jierara ahrirocã”, ni tũhotuha masa.

Zacaria Cohamacũre ño payoha

⁶⁷Æ yoa to pũcũro Zacaria sehe Espĩritu Santo to dutiriro seheta yoa pahñoriro jiro to tuaare cjuariro jiro Cohamacũ yare õ sehe ni yahuha:

⁶⁸“Mari Israe masa Cohamacũre, mari puhtorore wahche payojihna mari. To yaina jija mari.

Æ jiro tiro mari cahapũ wihiro, marine yoadoho, noano yũhdũchũ yoaro taro nina.

⁶⁹Cohamacũ marine, pichacapũ wahaborinare yũhdũchũ yoahitirore, tua yũhdũarirore warocara.

Ahriro marine yũhdũchũ yoahitiro cjihto sehe Cohamacũre dahra cohtariro Davi cjiro panamino ji turiariro jira.

⁷⁰Panopũre to yaina waro, to yare yahu mũhtaina cjirire ahri õ sehe wahahito cjihtore yahu cũ mũhta tuh-sũa tiha.

⁷¹‘Mũsare ñũ tuhtiinare, jipihtina mũsare ñano yoainare dũcataihtja’, ni cũha Cohamacũ marine.

⁷²Mari ñũchũsuma cjiripũre ‘Mũsare pja ñũi, yoadohoihtja.

Mũsare yũ yahu cũire wacũihtja’, niha Cohamacũ.

Tí pjarũre to ni cũiro seheta mipũre marine sohtori tiro taro nina.

⁷³⁻⁷⁵Panopũre õ sehe ni cũa tiha Cohamacũ Abrahãre: ‘Potocã niita nija mũhũre.

Mũ coyea baharopũ ji nũnũhtinare paina tinare ti ñũ tuhtichũ, yũhũ sehe tinare dũcataihtja.

Æ jia mũ coyea sehe ne cuiro marieno yũ dutiare yoa, yũhũre ño payoahca.

Tina ti catiro puro yũ ñũrocaroi buhiri marieno, quihõno jia tiina jiru-cuahca’, ni yahu cũa tiha Cohamacũ mari coyeyo Abrahã cjirore”,

niha Zacaria. Æ ni tuhsũ tiro to macũno cũhũre õ sehe niha tjoa:

⁷⁶⁻⁷⁷“Macũ, mũhũre õ sehe niahca masa: ‘Cohamacũ Jipihtina Bui Jiriro yare yahu mũhtarirota jira’, ni masiahca mũhũre.

Mũhũ mari puhtoro Cristo to tahto panore masare yahuyui wahaihca.

Æ yahuyui wahacũ, õ sehe ni yahuyuihca tinare: ‘Mari puhtoro tarohca.

Tiro masa ñaa yoari buhiri tiare cohã, pichacapũ wahaborinare yũhdoro-hca mũsare’, ni yahuihca mũhũ.

Æ ni yahucũ, mari puhtoro to tahtore cahnoyu dutii niihca mũhũ tinare.

⁷⁸Cohamacũ sehe marine tuaro pja ñũriro ji, marine noano yoariro jitjiãno, tiro marine pichacapũ wahaborinare yũhdũchũ yoa duara.

Æ jiro tiro Cristore buhriaro yoaro sehe jiriore mari cahapũ warocara.

⁷⁹Tiro mari cahai wihiro marine pichacapũ wahaborinare nahitiano waropũ jimarinare buhriaro marine to noano ñũ bocachũ yoaro seheta Cohamacũ ya potocã ni yahuaire masichũ yoarohca tiro.

Æ yoa mari tiro mehne cũno mehne mari noano ji masihtõ cjihto cũhũre yahurohca marine”,

niha Zacaria.

⁸⁰ Ā yoa Zacaria macuno noano pjacu tiriro bucuaaha. Ā bucuro, Cohamacure tuaro ño payoriro jiha. Tuhsu, yoari pja masa marienopu jia tiha. Israe masare buhe ducaro tóputa to jiro cjiroi jia tiha.

Jesu masa bajuaha

(Mt 1.18-25)

2 Tí pjare jipihitia yahpari macaina bui puhtoro Augusto jia tiha. Ā jiro jipihitinare quihō dutiha. ² Ahrina masare ti coā quihō ducachu Siria yahpa macaina puhtoro Cirenio wama tiriro jiha. ³ Ā jia jipihitina ti ñuchusuma panopu macaina ya macaripu ti wamare joa ōa wahaha. ⁴ José cūhu Nazarepu Galilea yahpai jiri macapu jiina waha, Judea yahpapu Belē wama tiri macapu suha. Puhtoro Davi cjiro panopu macariro to masa bajuariro jiha Belē. José Davi cjiro panamino jii turariro jiro puhtoa masare to quihō dutichu tuhoro Belēpu to wamare joa ō dutiro wahaha. ⁵ Ā jiro tiro María to namono cjihto mehne tópu to wamare joa ō dutiro suha. Ticoro sehe wihārirocāre cjuaro caharicoro jiha. ⁶ Ā jiro Belēpu suro ticoro niji wahcōha. ⁷ Tópure masa ti cariri wahu ne mu sseraha tinare. Ā jiro ticoro pohna ti tuhsu, tirocāre suhtiro mehne coma, wachua ti churi wahwai, tja bui tirocāre duhu payoha. Tirocā wahma to pohna ti muhtarirocā jiha.

Anjoa ovejare ñu wihboinare bajuaha

⁸ Tí ñamine campopu ovejare ñu wihboina ti yaina ovejare ñu wihboa niha. ⁹ Tópu ti jichu Cohamacu warocariro anjo tinare bajuaha. To ā bajuachu Cohamacu to si sitea tinare buhriaha. To ā si sitechu ñua, ovejare ñu wihboina cuia wahaha. ¹⁰ Ti ā wahachu anjo tinare ō sehe ni yahuha:

—Noaa quitire musare yahui taja. Jipihitinare masare wahchechu yoarohca ahri quiti. Ā jina yuhure cuiena tjiga musa. ¹¹ Micha ñamine puhtoro cjiro Davi ya macapu musare pichacapu wahaborinare yuhdohtiro, Cristo Cohamacu warocariro mari puhtoro masa bajua tuhsuhre. ¹² Suhtiro mehne comariro wachua churi wahwa bui ti duhu payoriro musa ñuhtiro tiro tjirohca —ni yahuha anjo tinare.

¹³ To ā nichuta payu muano macaina jii muhtariro anjo mehne Cohamacure wahche payoha. Ō sehe ni wahche payoha tina:

¹⁴ “Cohamacure muano macarirore ño payojihna.

Ā jia Cohamacu to cahina cuiro marieno cahmacheno marieno noano jijaro”, ni wahche payoha anjoa peri.

¹⁵ Ā ni wahche payo tuhsu muanopu ti mujari baharo ovejare ñu wihboina sehe ti basi cahma durucuha:

—Ahrire Cohamacu marine to yahurire Belēpu basa ñujihna —niha tina ti basi.

¹⁶ Ā nia ño duaro waha wahaha tina. Maríare, Josére boca su, wihārirocāre wachua churi wahwai ti duhu payorirocāre ñuha tina. ¹⁷ Ovejare ñu wihboina tirocāre ñu tuhsu anjo wihārirocāre to yahurire yahu turiaha painare. ¹⁸ Ti ā ni yahu turiachu jipihitina tinare tuho cuaa wahaha. ¹⁹ Ahri jipihitiare María wacū tuhoturucuha. ²⁰ Ā yoa ovejare ñu wihboina sehe anjo to yahuriro seheta jichu ñua, “Cohamacu tuariro jira”, ni wahcheha. Ā ni wahche, majare tjuaa wahaha.

Cohamacu wuhupu Jesu pucusuma tirocāre naaha

²¹ Cū somana baharo wihārirocā to pjacure mahanocā cahsarocāre yihso na tuhsu tirocāre tina Jesu wamoaha. Jesure wahma to bocahto pano anjo sehe

“Jesu’ ni wama pisuga tirocäre”, ni yahu tuhsuha. Ä jia tirocäre “Jesu” ni wama pisuha.

²² Cohamacu dutia Moise to yahuriro seheta yoaa taa José, María mehne Jerusalêpu wahaha. Tópu wahaha María to pohna tiri baharo to noaricoro to wahari baharo to ä waharire ñono taro. Ä wahaa, tina Jesucäre naa wahaha. Tirocäre Cohamacure “Ahrirocä mü yairo cjihto jira”, ni ñoa wahaha. ²³ Ö sehe yoaha Cohamacu yare ti joari püi to yoa dutiriro seheta. “Jipihtina müsa pohna wahma bajua mühtainacäre Cohamacure ñoga. ‘Ahrirocä mü yairo cjihto jira’, ni ñoga”, ni dutia tiha Cohamacu. ²⁴ Ä ño tuhsu Cohamacu to yoa dutiriro seheta tina minichahcare waa wahaha Cohamacure ño payoa. Ö sehe dutia tiha Cohamacu: “Bujaa puaro waga yuhure. O tina mariachu urítua wihäinacä puaro waga yuhure ño payona”, ni dutia tiha Cohamacu. To yoa dutiriro seheta yoaha tina ticoro pjacu noari pjacu to waharire ñoa taa.

²⁵ Jerusalêi Simeo wama tiro jija. Tiro quihöno yoariro, Cohamacure ño payoriro jiro, Cohamacu Israe masare to yoadohtire cohtariro jija. Tiro Espíritu Santo to nino sehe yoariro jija. ²⁶ Ä jiro tiro to yariahto pano Cohamacu to warocahitire Cristore to ñuhti cjihtire tó pano yahu tuhsuha Espíritu Santo tirore Simeore. ²⁷ Ä jiro Espíritu Santo tirore to dutichu Cohamacu wuhupu säa wahaha. To säa suri baharo Jesu pucusuma ti macunocäre na säaha. Cohamacu to dutiriro seheta yoaa niha. ²⁸ Simeo sehe tirocäre waa na, Cohamacure ño payo, “Noana” ni, tiro mehne durucuha.

Ö sehe niha tiro Cohamacure:

^{29–32} “Mipu pinihtare puhtoro, mü niriro seheta jipihtina masare pichacapu wahaborinare yuhduchu yoahitiro cjihtore warocahre mühu.

Tiro judio masa jierainare buhero mühure noano masichu yoarohca tinare.

Masare yuhdohtiro Israe masunore mühu cüha.

Sä coyeirore Israe masunore mü cüchu jipihtina masia, ‘Israe masare noano yoara Cohamacu’, niahca masa.

Ahrirocä säre yuhduchu yoahitiro jira.

Ä jicu ahrirocäre ñu tuhsucu, mipure noano wahcheriro yariahca”, niha Simeo.

³³ Simeo tirocäre to ä nichu Jesu pucusuma sehe tuho cuua wahaha. ³⁴ Ä jiro Simeo tinare “Noano jiga müsa” nino, tiro María Jesu pocorore ö sehe ni yahuha:

—Cohamacu ahrirocäre beseha. To ä beseriro to jipachuta judio masa payu tirore yuhdurucaahca. Ä yoaa tina pichacapu wahaahca. Judio masare payu yuhdohtirore Cohamacu beseha tirocäre. Tiro Cohamacu yare yahuriro to jipachuta masa payu tirore ñano ni yahu wajaahca. ³⁵ Ti ä yoachu paina ti ñano wacüare masiahca. Ä jico mühu taro cahyacohca —niha Simeo Mariare.

³⁶ Tói Cohamacu yare yahu mühtaricoro Ana wama tiricoro jija. Ticoro Fanuel macono jiro, Aser cjiro ya curua macaricoro jija. Bucoro waro jija. Ticoro nuhmino jiro manü tiha. Ä yoaa siete cühmari to manüno mehne jija. Tó puro to jiri baharo to manüno yariaha. ³⁷ Ä jiro ochenta y cuatro cühmari waro wapewahyoro jia tiha ticoro. Ä jiro ticoro dachopu cühure ñamipü cühure Cohamacu yare yoaro taro chuaeraro, Cohamacu mehne durucu, Cohamacu wuhure ne wijaaera tiha. ³⁸ Simeo to durucuro watoi ticoro tina cahai wihiro, wahchero Cohamacure “Noana”, niha. Ä jiro Jerusalê macainare pichacapu wahaborinare yuhdohtirore cohtainare ticoro Jesucäre yahuha tina jipihtinare.

**José, María, Jesu mehne
Nazarepu tjuua wahaha tjoa**

³⁹ Cohamacu to dutiriro seheta yoa tuhsua, tina ti ya macapu Nazarepu tjuua wahaha. Galilea yahpai jiha tí maca Nazare. ⁴⁰ Jesu sehe noano bucua, tuariro wahaha. Á jiro tiro noano tuho masiriro bucua. Cohamacu tire noano yoaha.

**Jesu wahma wahmua tariro jiro,
Cohamacu ya wuhui judio masare
buheina mehne sühuduro niha**

⁴¹ Cuhmaripe Jesu pucusuma Jerusalèpu pascua numurine bose numurine yuhdoa wahaa tiha. ⁴² Á jia Jesu doce cuhmari to cjuhachu waro ti yoarucuriro seheta tina jipihtina Jerusalèpu bose numurine yuhdoa wahaha tjoa. ⁴³ Tí macapu su, tí bose numurine yuhdo tuhsu tina ti ya macapu majare tjuua wahaha tjoa. Wiho mejeta Jesu sehe ti á majare tjuapachuta, Jerusalèpu tjuanocaha. To pucusuma sehe tíre to tjuarire masieraha. ⁴⁴ “Paina mari mehne macaina mehne taca mari macu”, ni tuhotumaha tina. Á jia tina cü dacho waro noano Jesu marieno waharucumaha. Tí dacho pihtichu waro tina Jesure ti coyey watoi á jichu ti ñu masiina watoi cühure macamaha. ⁴⁵ Wiho mejeta ne bocaeraha. Á jia tina pari turi Jerusalèpu majare tjuua wahaha tjoa, tire macaa wahaa.

⁴⁶ Tia dacho baharo Cohamacu wuhui wijaroi tire boca suha. Tói Jesu judio masare buheina watopu duji, tinare tuho, tinare sinituro niha. ⁴⁷ Tina jipihtina Jesure to quihõno yuhtichu tuhoa noano masirocã to jichu ñua, tina cuaa wahaha. ⁴⁸ Jesu pucusuma cühü tire ñua, tina cühü cuaa wahaha. Á jiro to pocoro tire õ sehe niha:

—Macu, ¿dohseacu á yoari mühü sãre? Sã mü pucusuma pjíro tuhotu, cahya, macana nihi mühure —niha ticoro to macunore.

⁴⁹ To á nichu tuhoro tiro to pucusumare õ sehe ni yuhtihia:

—¿Dohseana yuhure macari musa? Yu Pucu waro ya wuhui ji to dutiriro seheta yoai nija. ¿Tíre masierajari musa? —niha tiro tinare to pucusumare.

⁵⁰ To á ni yahupachuta tina to yahuare tuho ñahaeraha.

⁵¹ Á yoari baharo, Jesu to pucusuma mehne Nazarepu tjuua wahaha. Tju su, to pucusumare ne yuhdurucaerariro jia tiha tiro. Ahri jipihtia to yoarire ñuno María noano tuhotu, wacürucua tiha. ⁵² Á yoa Jesu bucua, noano tuho masiriro wahaha. Tó sehe jiro to ji bucuchu ñuno, Cohamacu sehe tire noano ñu ji coa, tuaro cahia tiha. Masa cühü tire tó seheta noano ñu ji coa, tuaro cahia tiha.

**João masare bautisariro masare
Cohamacu yare yahuha**

(Mt 3.1-12; Mr 1.1-8; Jn 1.19-28)

3 Tí pjare ti bui puhtoro jiro Tiberio wama tiro to puhtoro jiri baharo quince cuhmari wahaha. Tuhsu, Puncio Pilato wama tiro sehe Judea yahpa macaina puhtoro jiha. Á yoa Herode wama tiro sehe Galilea yahpa macaina puhtoro jiha. To bahuro Felipe sehe Iturea yahpa macaina, Traconite yahpa macaina cühü ti puhtoro jiha. Tuhsu, Lisanas wama tiro Abilinia yahpa macaina puhtoro jiha. ² Tí pjare Ana, Caifa mehne jipihtina sacerdotia bui puhtoa jiha. Ahrina jipihtina ti jiri pjare João Zacaria macuno masa marienopu jirirore Cohamacu sehe tire to yare buhe dutiha. ³ Á jiro Jordão wama tiro ma duhtu cahai jiri yahpai jipihtiropu João buhero wahaha:

—“Noaina jija sã”, ni m̄sa t̄hotu-mari c̄jirire t̄hotu cohtota, Cohamac̄ure cahmaga m̄sa. Ā yoana tíre m̄sa yoirire ñona tana, bautisaina jiga. M̄sa ā cohtotach̄u ñuno Cohamac̄u m̄sa ñaa buhirire borohca —ni buhea tiha tiro.

⁴Isaia c̄jiro panop̄u macariro Cohamac̄u yare yahu m̄htariro to joariro seheta ahriro Joaō yoaro niha. Ō sehe ni joaa tiha Isaia c̄jiro Joāo to buhehtore:

“Masa marienop̄u durucu sañurucuriro ō sehe ni buherohca: ‘Mari puhtoro to tahto pano “Noaina jija sã”, ni m̄sa t̄hotumari c̄jirire t̄hotu cohtota, Cohamac̄ure cahmaga m̄sa.

⁵Pja w̄h̄turi, pja buri c̄h̄ure noari wapa mari yoiriro seheta, tuhcu maharine potoa mahari mari yoiriro seheta, ñaa maharine noaa maharine mari yoiriro seheta, wetere m̄sa cosariro seheta m̄sa ñaa t̄hotuare cohtota, cahno m̄htaga m̄sa.

⁶M̄sa ā yoach̄u Cohamac̄u m̄sare pichacap̄u wahaborinare to yuh̄d̄ch̄u yoach̄u ñuahca jipihti ahri yahpa macaina’, ninohca tiro sañurucu yahuriro sehe”,

ni joaa tiha Isaia c̄jiro panop̄ure.

⁷Masa paȳu Joāo cahai wihia tiro tinare bautisach̄u cahmaha tina. Ā jiro tiro tinare ō sehe ni yahuha:

—Agāa ñima tiina yoaro seheta masare dojomehneina, cui duhti duaina jira m̄sa. M̄sa ñaa yoirire m̄sa cahya, duhu duaerari buhiri Cohamac̄u to buhiri dahrehto pano duhti masierara m̄sa. ⁸Potocāta m̄sa ñaa t̄hotumarine cohtotaina jina, Cohamac̄ure cahmaina jina, tíre m̄sa yoaa mehne ñoga. Ō sehe ni t̄hotu wisiena tjiga. “Panop̄u macariro Abrahã mari ñuch̄u c̄jiro jia tiha. Ā jina to panamana jina mari Cohamac̄u yaina jija”, ni t̄hotu wisiena tjiga m̄sa. M̄sare niita nija. Abrahã panamana

m̄sa jiina jimana m̄sa. M̄sa ā jipach̄uta tí m̄sa ā jia yaba c̄jihti jierara. Cohamac̄u sehe ahri tãa mehne Abrahã coyeare dahre masina. Ā jiro Abrahã coyea m̄sa jia wiho waro jira tãa ti wiho waro jiro seheta. ⁹Ō sehe jira: Masa yucuri yoaro seheta jira. Cohamac̄u sehe coma mehne yuc̄urire c̄jā cohãriro yoaro sehe jira. Ā jiro noaa dica maria yucure nuhc̄ōri mehneputa c̄jā cohãnohca tiro. Tíre to c̄jā cohãri baharo, pichacap̄u j̄u cohãnohca tiro. (Āta yoaro taro nina masa c̄h̄ure tiore cahmaerainare) —ni yahuha Joāo masare.

¹⁰To ā nich̄u tuhoa masa sehe tiore ō sehe ni sinitu ñ̄cha:

—¿Dohse yoanahcari sã? —niha tina Joãore.

¹¹—Pua suhtiro c̄juariro suhti mari-erirore c̄ño waga. Ā yoa m̄sa ch̄ua c̄juana paina c̄h̄ure waga —niha Joāo.

¹²Mahainacã puhtoa ya c̄jiltire wapa na cohtaina c̄h̄u tinare to bautisach̄u cahmaha. Ā jia Joāo cahai wihia, tiore ō sehe ni sinituha:

—¿Buheriro, sã sehe dohse yoanahcari sã? —niha tina tiore.

¹³—M̄sa puhtoa ti wapa na dutiro purota masare wapa naga. Mahño na namoena tjiga —ni yahuha Joāo tinare.

¹⁴Paina surara tiore ō sehe ni sinituha tjoa:

—¿Sã sehe dohse yoanahcari? —niha tina tiore tjoa.

—Masa ti niñerure maena tjiga. Ā yoana mahñoa mehne ti niñerure naena tjiga. M̄sare ti waparo purota wahchega —ni yahuha Joāo.

¹⁵Masa Cristore Cohamac̄u to waroc-ahtirore cohtaa niha. Ā jia ō sehe ni t̄hotu d̄c̄aha tina Joãore. “Ahriro Joāo sehe Cristo jiboca”, ni t̄hotumaha tina. ¹⁶Ti ā nich̄u tuhoro Joāo jipiltinare ō sehe ni yahuha:

—Yũ baharo yũ yũdoro tuariro taro-hca. Noa yũdũariro jira tiro. Tiro yoaro sehe jieraja yũhũ sehe. Ā jicũ tireore tũhotucũ, “Wiho jiro jija yũhũ”, ni tũhotuja yũhũ. Yũhũ sehe mũsare bautisacũ co mehne yoamahi. Tiro sehe yũ yũdoro yoarohca. Espĩritu Santore masa mehne Ā jirucuchũ yoarohca. Wiho mejeta paina sehere ti ñaare tũhotumari cjrĩre tũhotu cohtota dueraina sehere tiro pichaca mehne buhiri dahrerohca. ¹⁷Yũ baharo tariro cahsarire cohãriro yoaro sehe jira. Cahsarire cohãriro to batiro mehne jipihtia to trigo yapari cahsarire putiwera. Ā yoa tuhsũ trigo sehere to wihbori wũhũ cũnohca. Tó se-heta yoarohca ti tireore cahmainare yũ baharo tariro. To putiwea cahsari sehere tiro jũnohca. Tĩ cahsarire to jũri pichaca ne yatisi. (Āta yoarohca tiro yũ baharo tariro tireore cahmaerainare) —ni yahuha João.

¹⁸Payũ to Ā ni yahua mehne masare noa buheare yahuha João. ¹⁹Tuhsũ, puhtoro Herode sehe to bahũro Felipe namonore to namo tiri buhiri, pjĩro ñaare to yoari buhiri cũhũre João tireore yahumaha. ²⁰To Ā ni yahuri buhiri Herode sehe ñaare yoa namoha, Joãore peresu yoaro.

João Jesure bautisaha

(Mt 3.13-17; Mr 1.9-11)

²¹Joãore ti peresu yoahito pano paina masare João sehe bautisaro niha. Tinare bautisaro Jesu cũhũre bautisaha. To Ā bautisachũ, Jesu diapũ ducuriro Cohamacure to sinino watoi mũano parĩ mũa wahaha. ²²To parĩ muari baharo Espĩritu Santo buja yoaro sehe Jesu buipũ duji taha. To Ā duji tachũ mũanopũ durucuro coa taha:

—Mũhũ yũ macũ yũ cahĩriro jira. Mũhũ mehne wahcheja —nino coa taha mũanopũ.

Jesu coyea panopũ macainare yahua jira ahri

(Mt 1.1-17)

²³Jesu to buhe dũcari cũhmare treinta cũhmari cjuaha tiro. “Tiro José macũno jira”, ni tũhotumaha masa. José sehe Elĩ macũno jija. ²⁴Elĩ Matat macũno jija. Matat Levĩ macũno jija. Levĩ Melqui macũno jija. Melqui Jana macũno jija. Jana José macũno jija. ²⁵José Matatĩas macũno jija. Matatĩas Amós macũno jija. Amós Nahum macũno jija. Nahum Esli macũno jija. Esli Nagai macũno jija. ²⁶Nagai Maat macũno jija. Maat Matatĩas macũno jija. Matatĩas Semei macũno jija. Semei Josec macũno jija. Josec Joiadá macũno jija. ²⁷Joiadá Johanán macũno jija. Johanán Resa macũno jija. Resa Zorobabe macũno jija. Zorobabe Salatie macũno jija. Salatie Neri macũno jija. ²⁸Neri Melqui macũno jija. Melqui Adi macũno jija. Adi Cosam macũno jija. Cosam Elmodam macũno jija. Elmodam Er macũno jija. ²⁹Er Josué macũno jija. Josué Eliezer macũno jija. Eliezer Jorim macũno jija. Jorim Matat macũno jija. ³⁰Matat Levĩ macũno jija. Levĩ Simeo macũno jija. Simeo Juda macũno jija. Juda José macũno jija. José Jonan macũno jija. Jonan Eliaquim macũno jija. ³¹Eliaquim Melea macũno jija. Melea Mená macũno jija. Mená Matatá macũno jija. Matatá Natán macũno jija. ³²Natán Davĩ macũno jija. Davĩ Jesé macũno jija. Jesé Obed macũno jija. Obed Booz macũno jija. Booz Sélah macũno jija. Sélah Nahasón macũno jija. ³³Nahasón Aminadab macũno jija. Aminadab Admĩn macũno jija. Admĩn Arnĩ macũno jija. Arnĩ Esrom macũno jija. Esrom Fares macũno jija. Fares Juda macũno jija. ³⁴Juda Jacobo macũno jija. Jacobo Isaa

macuno jiha. Isaa Abrahã macuno jiha. Abrahã Taré macuno jiha. Taré Nahor macuno jiha. ³⁵Nahor Serug macuno jiha. Serug Ragau macuno jiha. Ragau Péleg macuno jiha. Péleg Éber macuno jiha. Éber Sélah macuno jiha. ³⁶Sélah Cainán macuno jiha. Cainán Arfaxad macuno jiha. Arfaxad Sē macuno jiha. Sē Noé macuno jiha. Noé Lame macuno jiha. ³⁷Lame Matusalē macuno jiha. Matusalē Enoco macuno jiha. Enoco Jared macuno jiha. Jared Mahalaleel macuno jiha. Mahalaleel Caina macuno jiha. ³⁸Caina Eno macuno jiha. Eno Sete macuno jiha. Sete Adão macuno jiha. Adão Cohamacu to yoariro jiha.

Watīno ñaare yoa dutimaha Jesure

(Mt 4.1-11; Mr 1.12-13)

4 Jesu Espiritu Santo to dutiriro se-heta yoa pahñoriro jiro, tiro Jordão wama tiri mapu jiro tjuua wahaha. To ã tjuua wahachu Espiritu Santo sehe tirore masa marienopu naaha. ²Tópu suro cuarenta dachori waro jiha. Tópu to jiro wato watīno sehe Jesure ñaare yoachu cahmamaha. Á jiro ñaare yoa dutimaha tirore. Tí dachorire Jesu chueraha. Á jiro tí dachori pihtichu waro tiro júca baaha.

³To ã júca baachu ñuno watīno ò sehe nimaha Jesure:

—Muhu Cohamacu macuno jicu, ahria tãcare chua dojomehnega —nimaha Jesure.

⁴Jesu ò sehe ni yuhtiha:

—Yoeraja. Cohamacu yare ti joari pui ò sehe nina: “Masare chua mehne dihta catieraro cahmana. [Jiphtia Cohamacu ya yahua mehne jiro cahmana]”, nina Cohamacu —ni yuhtiha Jesu watīnore.

⁵To ã niri baharo watīno sehe tirore tucu muadu buipu na mija surota jiphtia macari perire ño bahrañoa Jesure.

⁶Á ñono Jesure ò sehe ni yahuha:

—Jiphtia ahri macari yuhure to wari cjiri jira. Á jicu yu cahmarirore wa masija. Á jicu ahri macarine, ti cjuua mehne muhure waithtja. (Yu ã wachu ahri macari macainare muhu dutihca.) ⁷Yuhure mu ño payochu ahri macari jiphtia macarine muhure waithtja —niha watīno Jesure.

⁸Jesu ò sehe ni yuhtiha tirore:

—Muhure ño payoeraja. Ò sehe nina Cohamacu yare ti joari pui: “Mu puhtoro Cohamacu dihtare ño payoga. To ya dutia dihtare yoaga”, ni joa tiha Cohamacu yare —niha Jesu watīnore.

⁹⁻¹¹To ã niri baharo Jerusalēpu watīno sehe tirore na wahcã, Cohamacu wuhu bui na sãha tirore. Na su tuhsu tirore ò sehe nimaha:

—Cohamacu yare ti joari pu ò sehe nina:

“Cohamacu yaina anjoare muhure ñu wihbo dutirohca. Á jia tina sehe muhure ñu wihboahca, ‘Muhupu tãcapu puha tu muari’ nia”,

ni joa tiha Cohamacu yare ti joari pui. To ã niri quihõno jichu muhu Cohamacu macuno jicu, yahpapu pju bora ño ñujata yuhure. Muhure yoadohochu ño ñujata yuhure —niha watīno Jesure.

¹²Jesu pju bora ño duaeraro ò sehe ni yuhtiha tirore:

—Cohamacu yare ti joari pui ò sehe nina: “Musa puhtoro Cohamacu to niri cjirire ‘¿Potocã tjjari?’ ni masi duana, Cohamacure yoa ño duti macaena tjiga”, nina Cohamacu yare ti joari pui —niha Jesu watīnore.

¹³Á jiro watīno jiphtia ñaare Jesure yoa dutimaha. Á duti tuhsuro mahanocã duhu wahcãsinia.

Galilea yahpai Jesu buhe ducaha

(Mt 4.12-17; Mr 1.14-15)

¹⁴Baharo Jesu Galileapu tjuua wahaha. Á jiro, tiro Espiritu Santo tua mehne yoaha. Tói jiphtiropu masa

tirore quiti tiha. ¹⁵Judio masa buhea wuhusei tiro buhea tiha. Ā jia jipihtina masa tirore noano durucuha.

**Nazare macaina
Jesure ne cahmaeraha**

(Mt 13.53-58; Mr 6.1-6)

¹⁶⁻¹⁷Baharo Nazarepu Jesu to bucuariroputa tju suha. Tópu tju suro, Sabado jichu to ā yoarucuro seheta tiro judio masa ti buheri wuhupu sāa suha. Tói tiro Cohamacu yare ti joari püre buhero taro ducuha. To ā ducuchu ñua tó macaina sehe Cohamacu yare yahu muhtarero Isaia cjiro to joari püre tirore waha. Tí pui Jesu ahri yahuare bocaro buheha:

¹⁸“Cohamacu to Espiritu yuhu mehne jiro, yuhure dutira.

Tiro pjacuoinare noaa buheare yahu dutiro warocare yuhure.

Ā yoa peresupu jiina cuhure tinare to yuhdohtore yahu dutiro warocare yuhure.

Capari ñueraina ti noano ñuhto cjihtore, painare ti ñano ti yoapeinare wiohtiro cjihtore yuhure warocare.

¹⁹Mari puhtoro Cohamacu to yainare pichacapu wahaborinare to yuhdohtore yuhure yahu dutiro warocare”,

ni buheha Jesu.

²⁰Ā ni buhe tuhsu Jesu ti püre noari tia turēnoca, wuhu macarirore wia tuhsu, dujiha. To dujichu ñua tói jiina jipihtina tiro dihtare ñua. ²¹Ti ā yoachu tiro tinare ō sehe ni yahu ducaha:

—Ahri michapucacā yu buheriro seheta Cohamacu to niriro mu suro nina —niha Jesu.

²²To ā nichu tuhoa “Ahriro noariro jira”, ni tuhoutuha tina. Ā jia tina to noano buhechu tuhoa, cuaa wahaha. Ā cuaa waha, ō sehe niha tina ti basi:

—Cuenah, ¿José macuno jierajari ahriro? —niha tina ti basi.

²³Ti ā nichu masino Jesu ō sehe ni yahuha tinare:

—Yu buheare tuho duaerana, ō sehe ni tuhutura musa yuhure: “Duhturu waro hatiro to basi co ti masina duhturu waro to jiare ñono. Muhu cuhu duhturu to yoa ñono seheta mu niriro sehe jirore jicu Cohamacu tuua mehne yoa ñoga sare. Capernaupure Cohamacu tuua mehne yoa ñoyuhti muhu. Sā cuhure ā yoa ñoga, mu buheare ‘Potocā tjira’, sā ni masihto sehe”, ni duara musa yuhure.

²⁴Ahrire yahuhtja musare. Cohamacu yare yahu muhtarirore to ya maca macaina cahmaerara. Ā jina yuhure cahmaerara musa ōi yu bucuariro jichu. ²⁵Yuhure tuhoga mipure. Panopu Elia to jiri pjarure tia cuhma noano pa cuhma dacho maca waroi ne coro taeraha. Ā jiro jipihtiroputa ne chua mariaha. Tí pjare payu wapewahya Israe yahpau ti jipachuta Cohamacu Elia cjirore tinare yoadoho dutiro warocaeraha. (Eliare, Cohamacu ya cuhure ti cahmaerachu ñuno tinare yoadoho dutiro warocaeraha.) ²⁶To ya macare ā yoa dutieraparota pa yahpai Sidō cahai jiri macai Sarepta wama tiri maca macaricoro wapewahyore yoadoho dutiro Elia cjirore warocaha Cohamacu.

²⁷Baharo Cohamacu yare yahu muhtarero Eliseo cjiro to jiri pjarure Israe yahpau payu cami baina ti jipachuta cūiro Israe masunore ne noariro wahachu yoeraha Eliseo cjiro. To ya yahpa macainare yoeraparota Naaman wama tirirore Siria yahpa macariro dihtare noariro wahachu yoaha tiro. Ā yoaro Israe masare yoadohoeraro, Israe masuno jierariro sehene yoadohoha Cohamacu —niha Jesu tinare.

²⁸To ā nichu tuhoa jipihtina tí wuhui jiina sua yuhdua wahaha. ²⁹Ā jia tina wahcārūca, Jesure na wijaa, tí maca duhtu cahai jiri cunupū tirore tjuroca boro duamaha. ³⁰Ti ā yoa duapachuta Jesu ti watoihta wahaa wahaha.

**Watīno to cohtotariro
Jesure piti bocaha**

(Mr 1.21-28)

³¹Baharo Jesu Galilea yahpai jiri macapū Capernau wama tiri macapū sū, Sabado jichu masare buheha. ³²Tiro noano masi pahñoriro to buhechu tuhoa masa tuho cuaa wahaha. ³³Tí wuhui watīno to cohtotariro jiro, ō sehe ni tuaro sañurucuha:

³⁴—Mūhu Jesu Nazare macariro sāre cariboi tjia mūhu. ¿Dohse yoai tai nijari sāre? ¿Mūhu sāre butichu yoai tai nijari? Yūhu masija Cohamacu macūno, ñaa marieriro mū jiare —ni sañurucuha Jesure.

³⁵To ā nichu tuhorō Jesu tuhtiha watīnore:

—Dihta mariahga. Wijaaahga tirore —niha Jesu.

To ā niri baharo masūnore watīno sehe yahpapū doca caha sū tunuchū yoaro, tirore wijaaaha. To ā yoari baharo tiro sehe noariro tjuaha. ³⁶Tói jiina jipihtina to ā wahachū ñu cuaa wahaha. Ā jia ti basi ō sehe ni durucuha:

—¿Yaba baro buhea jijari ahri ā wahachū yoaa? Cuenah. Tuaro mehne puhtoro yoaro seheta ahriro watīare dutira. Ā jia to dutiro seheta tina masare wijaara —ni durucuha tina ti basi.

³⁷To ā yoachū ñua tí yahpapū jipitiropū masa Jesu yoarire yahu siteha.

**Jesu Simo Pedro marechonore
noaricoro wahachū yoaha**

(Mt 8.14-15; Mr 1.29-31)

³⁸Judio masa ti buheri wuhure wijaa, Simo ya wuhupū sāa sūha Jesu. Tói Simo

marechonō dohati, tuaro juaro tiha. Ā jia tina ticoro to dohatichū yahuha Jesure. ³⁹Ti ā yahuri baharo tiro ticoro cahai sū, juarore suru dutiha. To ā suru dutiri baharo ticorore juaro surua waha, dōihta noaricoro wahaha. Ticoro ā waharo wahcā nuju sū, tinare chuare payoha.

**Payu dohatiinare noaina
wahachū yoaha Jesu**

(Mt 8.16-17; Mr 1.32-34)

⁴⁰Sū sāari baharo jipihtina masa tó cahai jiina dohatiinare Jesu cahapū na sūha. Dohatiina payu soro jia dohatiare cjuaha. Ā jiro Jesu to wamomacari mehne tina bui ña payo, jipihtinare ti dohatiare noano yuhduchu yoaha. ⁴¹Watīa cūhure Jesu to wijaa dutichū tina wijaa wahaa, ō sehe ni sañurucuha:

—Mūhu potocāta Cohamacu macūno jira —niha tina Jesure.

Jesu Cohamacu warocariro to Cristo to jichū watīa masiha. Ā jiro Jesu tinare durucu dutieraha, “Cristo jira’, ni yahu si-teri”, nino.

Galilea yahpai buheha Jesu

(Mr 1.35-39)

⁴²Bohrea mūja tachū Jesu tí macai jiro waha, masa marienopū sūha. To ā sūri baharo masa tirore maca, boca sua ō sehe niha:

—Sā ya macai tjuaga. Wahai tjiga —nimaha tina Jesure.

⁴³Ti ā nipachuta tiro sehe ō sehe ni yuhtiha:

—Cohamacu masare puhtoro to noano sūho jiare noaa buheare paye macaripū cūhure buhero cahmana yuhure. Cohamacu yuhure warocare tíre yahuhtirore —niha Jesu tinare.

⁴⁴Ā ni tuhsuro judio masa ya yahpa macaa wuhūsei, judio masa ti buhea wuhūsei tiro buhe tiniha.

**Jesu to buheinare payu
wahire bocachu yoaha**

(Mt 4.18-22; Mr 1.16-20)

5 Pa numu Jesu Genesare wama tiri bucupariro duhtu cahapu suha. Tói to jichu ñua payu masa Cohamacu yare tuho duaa tirore nunu ti suha. Noano wahpa tarucu suha masa peri. ²Puaria buso paduroi pahsaa busore Jesu ñua. Tí buso macaina wahi wajaina maja suncu, ti wañuyucure cosaa niha. ³Ñ jiro Jesu Simo yariapu samua wahaha. Samu tuhsu tia dohoriare dia duhtu cahai coariare siõ buhu dutiha. Tuhsu, dohoriapu duji, masare buheha. ⁴Buhe tuhsu, Jesu Simore õ sehe niha:

—Dacho maca cureroi siõ wioga. Ñ jina muhu mehne macaina mehne musa wañuyucure doca ñoga wahi ñahana — niha Jesu.

⁵To ã nichu tuhoru Simo Jesure õ sehe ni yuhtihia:

—Puhtoro, wahi maca bohreamahi sã micha ñamine. Bohreapanahta ne cüirocã wajærahti sã. Ñ wajærapanahta mu dutiro seheta doca ño ñunahtja —ni yuhtihia Simo.

⁶Ñ ni tuhsu tina doca ñoha. Ñ ti doca ñochu ti wañuyucure payu wahi sãaha. Payu ti sãachu wañuyucu tuhna wahamaha. ⁷Ñ wahachu ñua tina paria macainare tina mehne macainare pjirocaha:

—Musa cühu yoadohona tagã sãre — ni pjirocaha Simo cühu.

Tina ti ã yoadohori baharo puria buso noano minipahro bocaha wahire. ⁸Simo Pedro ã wahi payu ti sãachu ñuno, Jesu panoi na tuhcuca caha su, tirore õ sehe ni yahuha:

—Yu puhtoro, muhu mehne jiboriro jieraja yuhu. Ñariro jija yuhu. Ñ jicu mu cahai ji masieraja —niha Simo Pedro Jesure.

⁹Tiro, jipihtina tiro mehne macaina cühu payu wahi sãachu ñua, cuaa wahaha tina cühu. ¹⁰Puaro Simo Pedro mehne macaina Zebedeo pohna Santiago to bahuro João mehne, tina cühu ñu cuaa wahaha. Ti ã cuachu ñuno Jesu Pedreore õ sehe ni yahuha:

—Cuacu tjiga. Mipure muhu wahire ñaha cahmachuriro mu jiro seheta Cohamacu yaina cjihtire pji cahmachuriro jiihca muhu —niha Jesu Simo Pedreore.

¹¹To ã niri baharo tina ti busore bucupariro duhtu cahapu waja mo cünoca, ti ya jipihtiare tóihita cünoca, Jesu mehne wahaa wahaha.

**Jesu cami barirore
noariro wahachu yoaha**

(Mt 8.1-4; Mr 1.40-45)

¹²Ñ yoa Jesu pa macai to jichu cami bariro tirore piti bocaha. Ñ piti bocaro tiro Jesure ñu, na tuhcuca caha su, õ sehe ni tuaro siniha:

—Puhtoro, muhu yoa duacu yuhure noariro yoa masina muhu —ni siniha.

¹³To ã niri baharo Jesu tirore ña payoro õ sehe niha:

—Tíre yoa duaja. Mipure noariro jiga muhu —niha.

To ã nichuta to cami bari cjiri yati mua wahaha. ¹⁴Ñ jiro Jesu tirore õ sehe ni dutiha:

—Ahri yu õ sehe yoarire painare yahui tjiga. Sacerdote cahai wahaga mipure. Ñ jicu mu pjacure noari pjacu to waharire ñoga tirore. Cohamacu dutia Moisere to cüri to niriro seheta yoaga. Ñ yoacu sacerdotere puaro minichahcare waga noariro mu waharire sacerdoteari ñoi tai —niha cami bariro cjirire.

¹⁵“Yahui tjia”, to nipachuta jipihitropu masa tirore yahu site namoha. Ti ã yahu sitechu tuhoa masa payu tiro cahapu suha. Dohatiina noaina waha duaa, tina cühu tiro cahapu suha. ¹⁶Ti

ã supachuta Jesu masa marienopu Cohamacure sinino wahaha.

**Jesu pjacu buharirore
noariro wahachu yoaha**

(Mt 9.1-8; Mr 2.1-12)

¹⁷ Pa dachoi Jesu to buhechu fariseo curua macaina, judio masare buheina cūhu tói dujiha. Tina jipihina Galilea yahpai jia macari macaina, Judea yahpai jia macari macaina, Jerusalē macaina jiha. Ti ã jichu ñuno Jesu Cohamacu tuua mehne dohatiinare noaina wahachu yoaha. ¹⁸ Mahainacã mua pjacu buharirore to coãri cahsaro mehne yo wua wihiha. Ñ jia tirore Jesu cahai cū duaa, wuhupu yo sã duamaha tina tirore. ¹⁹ Ñ sã duapahta masa payu jichu tina tirore yo sã masieraha. Ñ jia tirore wuhu buipu yo mujaha. Yo muja su, mahanocã muji pahmare nawe, tí copai pjacu buharirore to coãri cahsaro mehnetu duhu boroha Jesu cahai jiina watoi. ²⁰ “Jesu ahrirore to dohatiare yuhdunchu yoarohca”, ni tuhoutuha tina. Ti ã ni tuhoutuha masino Jesu pjacu buharirore õ sehe ni yahuha:

—Coyeiro, mu ñaare yoari buhiri tiare yuhu cohã tuhsuja —niha Jesu tirore.

²¹ To ã nichu tuhoa fariseo curua macaina, judio masare buheina cūhu ti basi õ sehe ni tuhutumaha: “Ahriro ã ni durucuero tjiaro. Tiro masuno mari yoaro sehe jiro, ñaare to yoari buhiri tiare cohã masierara. Cohamacu dihta masa ti ñaare yoari buhiri tiare cohã masina”, ni tuhutumaha tina.

²² Jesu ti ã ni tuhoutuare masino, õ sehe niha:

—¿Dohse yoana ã ni tuhoutuari musa?

²³ “Mu ñaa yoari buhiri tiare yuhu cohã tuhsuja”, yu nichu, “Mahñoriro jira”, yuhure nina musa noano masierapanaha. “Wahcãruca wahaga”, yu nichu yu niri potocã jia jichu dóihta masinahca. ²⁴ Yuhu masuno Cohamacu waro-

cariro ahri yahpai ti ñaare yoari buhiri tiare cohã masija yuhu. Masa ti ñaare yoari buhiri tiare cohãhtiro cjihtore cūre Cohamacu yuhure. Yu ã cohãrine musa masihtu sehe õ sehetu yoa ñoihtja musa ñuhti cjihtire —niha Jesu.

Ñ ni tuhsu pjacu buharirore õ sehe niha:

—Muhure niita nija. Wahcãrucaga. Mu coãri cahsaro na wahcãga mu ya wuhupu —niha tirore.

²⁵ To ã nichu tuhoroa jipihina ti ñurocaroi wahcãruca, to coãri cahsaro na, to ya wuhupu tjuua wahaha. Ñ waharo tiro Cohamacure ño payoro, wahchea mehne noano durucuha. ²⁶ To ã yoachu ñua masa sehe jipihina cūaa wahaha. Tina cūaa waha, Cohamacure ño payoa, wahchea mehne noano durucuha:

—Michare soro jiare ñuhi sã —niha tina.

Jesu Levire piha

(Mt 9.9-13; Mr 2.13-17)

²⁷ Ñ yoa tuhsu waha, Leví wama tirirore to dahrari tahtiapu jirirore boca suha Jesu. Leví sehe puhtoa ya cjihtire masare wapa na cohtariro jiha. A boca saro tirore õ sehe niha:

—Yuhu mehne macariro cjihto taga muhu —niha tiro Levíre.

²⁸ To ã nichu Leví sehe jipihina to dahraare duhunoca, Jesu mehne wahaa wahaha.

²⁹ Baharo Leví ya wuhui bese numu Jesure yoa payoro niha. Tói payu wapa na cohtaina, paina cūhu Leví mehne dujiha. ³⁰ Tina mehne Jesu cūhu ti dujichu ñua mahainacã fariseo curua macaina, judio masare buheina mehne sua, Jesu buheinare õ sehe ni sinitu ñuha:

—¿Dohseana ñano yoaina, wapa na cohtaina mehne chujari musa? —ni tuhtiha tina.

³¹Ti ā nichu tuhoro Jesu yuhtiha tinare. Ō sehe ni piti dahre buheha:

—Dohatieraina duhturure macaerara. Dohatiina dihta duhturure macana. Ņaare yoaina dohatiina yoaro sehe jira. ³²Ā jicu űaare yoainare yahui tai nihi yuhu Cohamacure cahma duticu. Ti basi “Noaina jija sã”, ni tuhotuinare yahui tai nierahi yuhu —niha Jesu.

Chu duhuare Jesure sinituha paina

(Mt 9.14-17; Mr 2.18-22)

³³Ā yoa mahainacã masa Jesure ō sehe ni sinitu űuha:

—João buheina payu tahari Cohamacure ño payoa taa chu duhura. Ā yoa, tina payu tahari Cohamacure sinina. Fariseo buheina cūhu ti yoaro seheta yoara. Ti ā yoapachuta mu buheina sehe Cohamacure ño payoa taa chu duhuerara. ¿Dohse yoa ā yoerajari tina? —niha tina Jesure.

³⁴Ti ā nichu Jesu to tuhotua mehne quitu dahre buhero taro tinare ō sehe ni yuhtiha:

—Ō sehe jira ti: Wamomaca duhteropu ti pjirocaina wamomaca duhteriro mehne jia, chu duhu masierara. Tó seheta yu buheina cūhu yuhu mehne jia, chu duhu masierara. Yuhu wamomaca duhteriro yoaro sehe jija. Wamomaca duhteriro bose numu to yoachu tiro mehne macaina chueraina jierara. ³⁵Yu Pucu Cohamacu yuhure to naari baharo pinihtare yu buheina mehne jisi yuhu. Ā jia tí pjaruta yu buheina cūhu chu duhuahca —niha Jesu.

³⁶Panopu macaa buheha wahma buheha mehne ti buhe more duachu űuno ō sehe ni namoha Jesu tinare piti dahre buhero:

—Ne wahma suhtirore mahari cahsarocã tuhrē na, munano suhtirore sere ōno cahmaerara. Mari ā sere ōna wahma cahsarore tuhrē cohāna nija. Ā yoa wahma cahsaro munano suhtiro mehne

cūno potori bajuerara. (Tó seheta muna buheha wahma buheha mehne piti dahre buheraro cahmana.)

³⁷Ā yoa ne se co bisia core wahiquiro cahsaro wajuru mehne muna wajuru mehne posaeraro cahmana. Mari ā yoachu se co bisia pahmoapu muna wajurure tuhrēnocahna. To tuhnuchu se co cūhu, wajuru cūhu cohōa wahara. ³⁸Ā yoa se co wahma core wahma wajurupu posaro cahmana. Mari ā yoachu se co cohōera, wajuru cūhu cohōerara. (Tó seheta wahma buheha muna buheha mehne buhe moreraro cahmana.) ³⁹Muna core masa ti sihniri baharo, wahma core cahmaerara tina. Ō sehe nia tire masa: “Muna co wahma co bui curero noaa jira”, nia tire masa —niha Jesu tinare.

Sabado jichu Jesu buheina trigo parorire paha yuhdu wahcāha

(Mt 12.1-8; Mr 2.23-28)

6 Pa dacho Sabado jichu Jesu cūhu trigo wesepu sūha. Tópū sū, to buheina sehe trigo parorire paha, tí pohcarire sahca site boro, tí yaparire chu wahcāa niha. ²Ti ā yoachu űua mahainacã fariseo curua macaina tinare ō sehe ni sinituha:

—¿Dohse yoana mūsa Sabado mari sori numu to jipachuta dahrajari? Marine dutiare yuhdurucana nina mūsa —niha fariseo curua macaina Jesure.

³⁻⁴Ti ā nichu tuhoro Jesu tinare yuhtiha, (“Yu buheina yuhdurucāa nierara”), nino taro:

—Davi cjiro tiro mehne macaina mehne jūca baaro, Cohamacu wuhupu sãa, Cohamacu ya pāore chūha. Ā churo tó mehne macaina cūhure tí pāore chu dutiro waha. Tí pāore sacerdotēa dihtare chu dutira. Cohamacu dutia tí pāore painare chu dutierara. ¿Davi cjiro tíre to yoari cjirire buherari mūsa? (Tí pāore churo Cohamacure yuhdurucaro nieraha. Michare ahri yaparire chūa

yū buheina cūhū Cohamacūre yūhdurū-caa nierara.) ⁵Yūhū masūno Cohamacū warocariro ahri dacho Sabado dachore masa ti yoachtire yahurirota jicū pūh-torota jija —niha Jesu.

Wamomaca buhariro quti jira

(Mt 12.9-14; Mr 3.1-6)

⁶Pa dacho Sabado jichū Jesu judio masa ti buheri wūhupū sāa sūro, buheha masare. Tói wamomaca poto buhusehe buhariro jija. ⁷Mahainacā judio masare buheina, fariseo curua macaina cūhū Jesure yahusā duamaha. “Sabado dachoi masunore noariro wahachū yoaboca Jesu” ni, nū nūnū yahusā duamaha tina Jesure. ⁸Jesu ti tūhotuare masino, buharirore ō sehe niha:

—Wahcā sūrucaga jipihtina ti nūro-caroi —niha tireore.

To ā niri baharo buhariro sehe wahcārūcū sū, tói ducuha. ⁹Ā jiro Jesu tinare ō sehe ni sinituha:

—Mūsare sinituhtja: ¿Sabado jichū yabare yoa dutijari Cohamacū dutia? ¿Noaare yoachū noaerajari? ¿O nāare yoachū sehere noajari, mūsa tūhotuchū? Sabado jichū masunore masochū noa nina. Sabado jichū masunore wajāchū sehere noaerara —niha Jesu tinare.

¹⁰Ā nino Jesu tinare nūroca ō pahño, buharirore ō sehe niha tjoa:

—Mū wamomacare siōrocahga —niha tiro.

To ā nichuta buhariro sehe siōroca, noari wamomaca wahaha. ¹¹To ā yoachū nūa tina Jesu mehne tuaro suaha. Ā suaa ō sehe niha:

—¿Dohse yoanahcari mari ahrirore? —niha tina ti basi.

Jesu to buheinare doce to warocahtinare bese dapoha

(Mt 10.1-4; Mr 3.13-19)

¹²Tí dachorire Jesu tūcupū Cohamacūre sinino mūjaa wahaha.

Tópū jiro, nāmine Cohamacū mehne durucu bohreaha. ¹³Bohrearopū to buheinare to cahapū pjirocaha. Pjiroca tuhsū, tina mehne macainare doce waro to warocahtinare bese dapoha. ¹⁴⁻¹⁵Ahrina jija Jesu to bese daporina: Simo jija. Simore Pedro ni pisuha Jesu sehe. Simo bahūro Andre, Santiago, João, Felipe, Bartolomé, Mateo, Toma, Santiago jija. Santiago sehe Alfeo macūno jija. Ā jia Simo cananista ya curua macariro cjiro, ¹⁶Juda Santiago macūno, Juda Iscariote tina jija to bese daporina. Juda Iscariote sehe Jesure nū tuhtiinare nōhtiro jija.

Jesu payū masare buheha

(Mt 4.23-25)

¹⁷Ā yoa Jesu to buheina mehne tūcu buipū jirina duji taa, payū paina to buheina mehne duji wihirūca, noari wapai ducuha tina. Jipihtiro Judea yahpa macari macaina, Jerusalē macaina, Tiro wama tiri maca macaina, Sidō wama tiri maca macaina, pjiri ma dūhtū cahai jia macari macaina masa payū tiro cahapū wihia. ¹⁸Tina Jesu buheare tuhoa taa, ti dohatiare cohāchū cahmaha tina. Watia ti cohtotarina cūhū tiro cahapū wihi, noaina wahaha. ¹⁹Jesu to tuaa mehne noaina wahachū yoaha tinare. Ā jia tina jipihtina tireore dahra nūa taha.

Jesu wahcheare, cahyaa cūhūre buheha

(Mt 5.1-12)

²⁰Baharo Jesu to buheinare nū, ō sehe ni yahuha:

—Mūsa pjacūoina, pūhtoro Cohamacū to sūho jiropū wahanahca mūsa. Ā jina mūsa wahchenahca.

²¹Mipūre mūsa jūca baaina yapiina jinahca. Ā jina wahchenahca.

Mipū tiina jina, baharo mūsa būjūnahca. Ā yoa mūsa wahchenahca.

²² Yuhũ masũno Cohamacũ to warocariro jija. Ā jina yũ yare yoina mũsa jiri buhiri paina mũsare ti ñũ tuhtipachũta wahcheina jira mũsa. Mũsare ti cohãpachũta wahchenahca. Mũsare ti ñano durucupachũta “Ñaina jira”, mũsare ti nipachũta mũsa sehe wahchenahca. ²³ Mũsare ti ā yoachũ ñũno mũanopũ mũsa suchũ pjĩro noano yoarohca Cohamacũ mũsare. Ā jina tuaro wahcheina jiga. Noano yajeripohna tiina jiga. Mũsare ñũ tuhtiina ti coyera panopũ macaina tó seheta ñano yoaha Cohamacũ yare yahu mũhtaina cjiri cũhũre.

²⁴ Ā yoa mũsa mipũ payũ cjuaina ahri yahrapũ mũsa noano jinoca tuhsũre. Ā jina ñano yũhdũina jinahca mũsa.

²⁵ Mipũ yapiina mũsa jũca banahca. Mũsa ā jina ñano yũhdũnahca.

Mipũre mũsa bujũina jina baharopũ mũsa cahya, tiinahca. Ā jina mũsa ñano yũhdũnahca.

²⁶ “Cohamacũ yare yahu mũhtaina jija”, ni mahũoinare “Noaina jira”, nimaha payũ panopũ macaina. Ā nimarina ti coyera mipũ macaina cũhũ āta “Noaina jira”, niboca cãina mũsa mehne macainare. Ti ā nimarina mũsa jina ñano yũhdũnahca mũsa cũhũ —ni buheha Jesu.

Mũsare ñũ tuhtiina ti jipachũta tina cũhũre cahĩga

(Mt 5.38-48; 7.12)

²⁷ Ā yoa õ sehe ni buhe namoha Jesu: —Yũhũre tuho duainare, mũsareta nii nija. Mũsare ñũ tuhtiina ti jipachũta tina cũhũre cahĩga. Mũsare ñũ tuhtiinare noano yoaga. ²⁸ Mũsare “Ñano yũhdũjaro”, niina ti jipachũta noa dutiga tinare. Mũsare ñano yoina ti jipachũta “Tina cũhũ noano jijaro”, ni sini payoga Cohamacũre. ²⁹ Cũiro mũsa wahsupure to cjãchũ, pa buhũsehe cũhũre cjã dutiga tirore. Mũsa bui macari suhtirore to

machũ mũsa camisa cũhũre ā wanocahga tirore. ³⁰ Mũsare siniriore to sinino purota waga tirore. Mũsa yare to nachũ tirore sinituena tjia pari turi tíre. ³¹ Paina mũsare ti noano yoachũ cahmana mũsa. Tinare mũsa noano yoachũ cahmano seheta mũsa cũhũ noano yoaga tinare. Mũsare ti noano yoerapachũta mũsa sehe tinare noano yoaga.

³² Mũsare cahĩina dihtare mũsa cahĩchũ tí ne yaba cjihti jierara paina sehere mũsa cahĩerachũ. Ñaina cũhũ tinare cahĩina dihtare cahĩna. ³³ Ā jina mũsare noano yoina dihtare mũsa noano yoachũ tí cũhũ ne yaba cjihti jierara paina sehere mũsa noano yoerachũ. Tíre ñaina cũhũ yoaa tire.

³⁴ Ā yoa “Yũhũre wiaa tire”, mũsa niina dihtare mũsa wasochũ ne tí yaba cjihti jierara. Ñaina cũhũ painare “Yũhũre wiaa tire”, ti niinare wasoa tire. ³⁵ Ā jina mũsa sehe mũsare ñũ tuhtiina cũhũre cahĩga. Ā yoa, tinare noano yoaga. Pairore wasona “Yũhũre ne wiasi ahriro”, ni tuhotuenata tirore wasoga. Cohamacũ sehe tirore ji coeraina cũhũre, ñaina cũhũre noano yoara. To yoaro seheta yoaga mũsa cũhũ. Mũsa ā yoachũ Cohamacũ pjĩro noano yoarohca mũsare. Mũsa ā yoana Cohamacũ tua yũhdũariro mũano macariro pohna jinahca. ³⁶ Mari Pũcũ mũano macariro to pja ñũrĩro seheta mũsa cũhũ masare pja ñũga —ni yahuha Jesu.

Paina cũhũre “Ñaina jira”, niena tjiga

(Mt 7.1-5)

³⁷ Ā yoa tinare õ sehe ni yahu namoha: —Painare “Ñaina jira”, niena tjiga mũsa. Mũsa ā nierachũ Cohamacũ mũsa cũhũre “Ñaina jira”, nisi. Paina mũsare ti ñano yoirere ti ñano niri cũhũre boga mũsa. Mũsa ā bochũ ñũno Cohamacũ mũsa cũhũre mũsa ñaa yoari buhirire borohca. ³⁸ Paye barore cjuana painare waga. Mũsa ā wachũ Cohamacũ mũsare

warohca. Ā waro noano quihōno musare pjíro warohca. Wahpa yuhduaro warohca. Painare mŕsa wariro purota Cohamacu mŕsa cŕhure warohca —niha Jesu tinare.

³⁹ Ā ni tuhsu Jesu quti mehne piti dahre buhero ō sehe ni yahu namoha:

—Capari ñŕeraina sahsero ti basi noano tuā wahcā masierara. Ā tuā wahcāa, tina pŕaro doca wahā su bora sāa wahaahca coparu. (Tó seheta Cohamacu yare masieraina painare buhe masierara. Ā jia tina jipihina pichacaru wahaahca.) ⁴⁰ Buheina tinare buherirore masi yuhducaerara. Ā jipahta jipihina buheina ti noano buhe pahñori baharo tinare buheriro yoaro seheta jiahca —niha Jesu.

⁴¹ Ā ni tuhsu paye quti mehne yahu namoha:

—Mari piti dahre buhechu ō sehe yoaina jira mŕsa: Mŕsa coyero to capariacaru mahari pohcarocā to sāachu tí pohcarocāre noano ñŕna mŕsa. Mŕsa ya capariacare pjiri pjí to jipachuta tí pjíne ne ñŕerara mŕsa. (Mahari pohcarocāre mŕsa ñŕno seheta mŕsa coyero to ñano yoaa sehere noano ñŕna mŕsa. Mŕsa basi mŕsa ñaare tuaro yoapanahata tíre masierara mŕsa pjiri pjíne mŕsa ñŕeraro seheta.) ¿Dohse jiro baro ā jijari mŕsa? ⁴² Ō sehe niina yoaro sehe jira mŕsa: “Coyero, muhu ñaare yoai nica muhu. Ā jicu tíre duhuga”, niina yoaro sehe jira mŕsa. Ā niina jipanahta pjíro ñaare yoara mŕsa sehe. ¿Dohseana mŕsa ñaare yoapanahata tíre masierajari mŕsa? Masa ti baharo buhusehei ñano yoaa cohtaina jira mŕsa ā yoaina. Pjiri pjíne mŕsa capariacai jiri pjíne mŕsa na muhtaboriro seheta mŕsa ñaa yoaa sehere duhu muhtaga. Mŕsa ā yoari baharo mŕsa coyero to ñano yoare duhuchu yoaa masiboca

mahari pohcarocāre mŕsa naboro seheta —ni buheha Jesu.

Masa ti durucuare tuhona ti jia tiare masija mari

(Mt 7.17-20; 12.34-35)

⁴³ Ā yoaa piti dahre buhero ō sehe ni yahu namoha tinare:

—Noadu yucucu ñaare dicha tierara. Ā yoaa ñadu noaare dicha tierara. ⁴⁴ Yucucu dichare masina tŕe masina. Pota tidu higuera pocare dicha tierara. Ā yoaa agā potacu se tōhorine dicha tierara. ⁴⁵ Tó seheta jira masa cŕhu. Noariro to tuhoutuaru noaa jira. Ā jiro tiro noaare yoara noadu to noano dicha tiro seheta. Ñariro to tuhoutuaru ñaa jira. Ā jiro tiro ñaare yoara ñadu ñaare to dicha tiro seheta. Mari tuhoutuaru marine ti jiro seheta durucuja mari —ni yahuha Jesu.

Pua wuhu yoaina quitire yahuha Jesu

(Mt 7.24-27)

⁴⁶ Ā yoaa tinare ō sehe ni yahu namoha:

—Masa yuhure “Puhtoro”, nina. Ā nianahta yu dutia sehere yoerara mŕsa. ¿Dohse jiro baro ā yoajari? ⁴⁷ Jipihina yuhure cahmaina yu yahuare tuhora. Ā jia yu dutiare yuhducaerara. Ō seheta jira yuhure yuhducaeraina: ⁴⁸ Wuhu dahreriro yoaro sehe jira tina. Tiro cuāa coparire taa wapai to suchupu saha, wuhure noano dapo ducaha. Tí wuhu noano to yoari wuhu jiro dia to minichu tuaro to cotiapachuta tí wuhu noano tjuaha. ⁴⁹ Ā jia yu dutiare tuhopahta yuhducaina sehe wuhure noano yoerariro yoaro sehe jira. Tí wuhure buicā dapo, noano dahre ducaeraha. To ā cŕri wuhu jiro dia minino to cotiachu dóihata tí wuhu burra wahaha. Ā jiro tí wuhu tuaro bora su cahaa wahaha —niha Jesu.

**Surara puhtoro cahamacunore
to dohatichu Jesu noariro
wahachu yoaha tirore**

(Mt 8.5-13)

7 Tí quitire masare yahu tuhsu Jesu cūhu Capernaupū suha. ²Tóí jiro cien surara puhtoro to cahamacunore tuaro cahīha. To cahamacunore sehe dohatiriro jiro, yariaro cahariro jimaha. ³Ā jiro Jesu to yoare tuhoru, judio masa bucunare Jesu cahapū warocaha puhtoro sehe.

—Dohatirirore noariro wahachu yoai taga —ni yahu dutiro warocaha puhtoro bucunare.

⁴Tina Jesu cahapū sua, ō sehe ni tuaro mehne yahuha tirore:

—Surara puhtoro sāre warocahre. To cahamacunore dohatirirore to yūhdūchū cahmahre tiro. Tiro puhtoro sehe noariro jira. To ā jichū yoadohoga tirore. ⁵Mari ya maca macainare tiro cahīna. Ā jiro tiro sā buheri wūhūre ti yoari wapa wapare —niha bucuna Jesure.

⁶Ti ā ni yahuchū tuhoru Jesu sehe tina mehne wahaha. Surara puhtoro ya wūhu cahacāi to sūro cahachū puhtoro sehe tiro mehne macainare Jesure ō sehe ni yahu dutiro warocaha:

—Puhtoro, noanohca. Tai tjiga. Noariro jieraja yūhu. Ya wūhūi mūhūre sāa ta dutiboriro jieraja yūhu. ⁷Ā jicu mū cahai wahaeraja. Yū ā jipachūta mū masia mehne noariro wahachu yoaga mūhū tirore. Mū ā yoachū yū cahamacunore noariro waharohca. ⁸Yūhūre yū bui jiina paina puhtoia dutira. Ā jicu yūhū cūhū surarare dutija. Cūirore “Wahaga”, yū nichū tiro wahara. Pairore “Taga”, yū nichū tiro tara. Yū cahamacunore “Ahrire yoaga”, yū nichū tīre tiro yoara. (Mūhū cūhū dutirirota jira. Ā jiro mū dutiriro seheta

tiro dohatiriro yūhdūrohca) —ni yahu dutiha surara puhtoro.

⁹To ā nichū tuho sua waharo, payū masa tiro mehne jiinare majarerūcu sū, ō sehe ni yahuha:

—Mūsare niita nija. Tiro surara puhtoro Israe masūno jierariro Cohamacure tuaro wacū tuara. To cahamacunore yū noariro wahachū yoahire masi tuhsura. Israe masare ne ahriro yoaro sehe jiinare űuerasinija —niha Jesu.

¹⁰To ā niri baharo surara puhtoro Jesu cahai to warocarina sehe ti puhtoro ya wūhūpū tjuua wahaha. Tju sū dohatiriro to noariro jichū űuha tina.

**Jesu wapewahyoro
macunore masoha**

¹¹To ā yoari baharocā Nai wama tiri macapū Jesu to buheina mehne payū masa mehne wahaha. ¹²Tí macare sāari sopaca cahai to suchū yariarirore masa na wijaa taa niha. Yariariro pocoro wapewahyoro jiha. Cūirota jiro yari-aha. Ā jia tó macaina masa payū ticoro mehne wahaha. ¹³To ā wahachū űuno Jesu ticorore pja űuha.

—Tiieco tjiga —niha Jesu ticorore.

¹⁴Ā nino yariariro to masa putihi űa payoha. To ā űa payochū űua tí putire wūaina sehe sūrucaha.

—Macū, yūhū mūhūre ō sehe nija. Wahcā nuju suga —niha Jesu.

¹⁵To ā niri baharo yariariro cjiro wahcā nuju sū, durucuha. Ā jiro Jesu tirore to pocorore waha. ¹⁶To ā yoachū űua tina jipihtina cuia wahaha. Ā jia tina Cohamacure űo payoa, ō sehe niha:

—Cohamacū yare yahu mūhtariro masi yūhdūariro mipū pinihtare mari watoi jira —niha tina.

—Cohamacū marine to yainare yoadohoro wihi tuhsūhre —niha paina.

¹⁷Ā jia jipihtina Judea yahpa macainare tó dūhtū cahai jia macari

macainare Jesu to yoare masa yahu site pahñoa.

**João masare bautisariro to
buheinare Jesure sinitu dutiha**

(Mt 11.2-19)

¹⁸⁻¹⁹ ã yoa Jesu to yoare ñua Joãore yahu to buheina. Á ti yahuchũ tuhoro pũarore tiro cahai pjiroca, Jesure sinitu dutiro warocaha João. Ô sehe ni sinitu dutiha:

—¿João “Yũ baharo paio tarohca”, to niriro tjijari mũhũ? ¿To niriro mũ jierachũ pairore cohtanahcari sã? —ni sinitu dutiha João pũaro to buheinare.

²⁰ ã yoa tina Jesu cahai sũ, sinituha tire:

—João masare bautisariro mũhũre sinitu dutiro warocahre sãre. ¿João “Yũ baharo paio tarohca”, to niriro tjijari mũhũ? ¿To niriro mũ jierachũ pairore cohtanahcari sã? —ni sinituha tina Jesure.

²¹ Tý pjata payũ dohatinare, watĩa ti cohtotainare, capari ñũerainare noaina wahachũ yoaha Jesu. ²² ã jiro João warocainare Jesu õ sehe ni yũhtiha:

—Mipũre mũsa ñũrire mũsa tuhorire Joãore yahuna wahaga: Ô sehe niga: “Capari ñũeraina ñũna. Tini masieraina tinina. Cami bũcũ baaina noaina wahara. Tuho bocaeraina tuhoa wahara. Yariaina masaa wahara. Tina jipihitinare noaina wahachũ yoahi yũhũ. ã yoa pjacuoinare noaa buheare yahuja. ²³ Yũhũre tuhoro ‘Potocã tjira’, niriro tiro wahcheriro jira”, Joãore ni yahuna wahaga —niha Jesu.

²⁴ João buheina ti wahari baharo Jesu sehe João to jia tiare yahu dũcaha payũ masare:

—Masa marienopũ sũna tjare wi-hnono to wãroca cohtotachũ yoariro seheta to buheare cohtota mũjarire ñũna sũerare mũsa. Á yoariro jierare João. ²⁵ “Noa suhti tirire ñũna waha-

jihna”, nierare mũsa masa marienopũ wahana. Noaa suhti tiina wapa bũjũare cjuaina puhto ya wũhũsepũ jira. Masa marienopũ jierara. ²⁶ Masa marienopũ sũna Cohamacũ yare yahu mũhtarire ñũna suhre mũsa. Potocã tjira. João Cohamacũ yare yahu mũhtariro jira. Paina Cohamacũ yare yahu mũhtaina yũdoro jiro jira tiro. ²⁷ Panopũ Cohamacũ yare ti joari pũi Joãore õ sehe ni yahu joa tiha:

“Mari Pũcũ to macũnore õ sehe niha:

‘Mũ pano mũhũre yahuyũhtire warocai nija’, niha Cohamacũ”,

ni yahu joa tiha panopũre Joãore.

²⁸ Mũsare potocã niita nija. Paina jipihitina bui jira João. Ahri turupũre to ã jipachũta mũanopũre Cohamacũ masare puhtoro to noano sũho jiro pũre jipihitina docapũ jiro pinihta João bui jira —niha Jesu masare.

²⁹ To ã nichũ tuhoa jipihitina masa, puhto ya cjihtire wapa na cohtaina mehne João to bautisarina jia õ sehe ni tuhotuha Cohamacũre. “Cohamacũ qui-hõno yoariro jira”, ni tuhotuha tina.

³⁰ Fariseo curua macaina sehe judio masare buheina cũhũ João to bautisanohrina ji duaeraha. Á jia tinare Cohamacũ to yaina to yoa duachũ cahmaeraha.

³¹ ã yoa Jesu pari turi õ sehe ni yahuha:

—¿Mipũ macaina masa yabaina yoaro sehe jijari tina, mũsa tuhotuchũ?

³² Tina macanacã yoaro sehe jira. Paina ti cahmano sehe ti yoerachũ tó wahaerara tinacãre. Pache duaropũ pape dujia, õ sehe ni pisurucura tinacã ti basi: “Mũsa basahti cjihtire sã putipemahi. ¿Dohseana mũsa basaerari sã tíre putipechũ? Sã tuaro ñahacaha tiipe, sañurucumahi. ¿Mũsa sehe dohseana sã mehne tiiperari?” nirucuina yoaro seheta jira mipũ macaina cũhũ. (Mipũ macaina ti

cahmano seheta sã yoaerachu ñua tó wahaerara tina cũhure.)³³ João bautisariro Cohamacũre ño payoro taro ne chueraro, vinore sihniere. To ã sihniereachu ñuna “Watĩno to cohtotariro jira”, nimahre mũa tireore.³⁴ Yũhu masũno Cohamacũ warocariro jicu, yũhu chu sihniã. Yũ ã yoachu ñuna õ sehe nina mũa yũhu sehere. “Ñũga. Ahriro pjĩro churiro, cahariro jira. Puhtoa ya cjihtire wapa na cohtaina, ñano yoaina cũhu ti piti tiriro jira ahriro”, nina mũa yũhure. ã nina macanacã yoaro sehe durucuina jira mũa. (Mũa cahmano sehe sã yoaerachu tó wahaerara mũsare. Ne wahcherara mũa.)³⁵ ã masierapanahã sã yoa ñorire ñuna, Cohamacũ yare sã masichũ masinahca mũa —ni yahuha Jesu.

Simo wama tiriro fariseo curua macariro ya wũhũ jiha Jesu

³⁶ Fariseo curua macariro to wũhũpu chu dutiro pjiha Jesure. To ã pjichũ Jesu to ya wũhũpu sũ, ti chũri mesa cahai nuju sũha.³⁷⁻³⁸ Tĩ macapũre ñaare ñaare yoarucuricoro cjiro jiha. Jesu fariseo curua macariro ya wũhũpu to dujichũ ticoro tuhoha. ã tuho tuhsũ alabastro mehne yoariare me sitia posa tiriare na ta, Jesu baharo buhũsehei wihi tarũca, tiha. ã tiro Jesu dahporire to yahco co mehne wayo, to pjoari mehne pahã cohãha. To dahpori wũachu ñũ ticoro to dahporire wihmi, me sitia mehne pio payoha.³⁹ To ã yoachu ñũno fariseo curua macariro Jesure pjiriro to basi õ sehe ni tuhutumaha: “Ahricoro tireore ñaha ñaricoro ñaare yoarucuricoro jira. Ahriro Jesu Cohamacũ yare yahu muhtariro jiro tíre masiboa”, ni tuhutumaha.⁴⁰ To ã ni tuhutuare masino Jesu õ sehe ni yahuha tireore:

—Simo mipũ pinihtare mũhure yahu duaja —niha Jesu.

—Buheriro, ¿yũhure dohse ni yahu duajari mũhũ? —ni yũhtiha Simo.

⁴¹ To ã nichũ Jesu õ sehe ni piti dahre buhe yũhtiha:

—Puhtorere puaro wapamoina jiha. Cũiro wapamoriro quinientos niñeru tũrire wapamoha. Pairo sehe cincuenta niñeru tũrire wapamoha.⁴² ã jia tina ti wapamoare ti wapa bihoerachu ñũno puhtoro ti wapamoare wapa dutieraha. ¿Mipũ pinihtare diro sehe wapamoriro sehe to puhtorere cahĩ yũhdũrohcarĩ? —ni sinituha Jesu.

⁴³ Simo õ sehe ni yũhtiha:

—Buah, pjĩro wapamoriro mahanocã wapamoriro yũdoro to puhtorere cahĩ yũhdũboca —niha Simo.

—Potocã ni yũhtihre mũhũ yũhure —niha Jesu.

⁴⁴ ã ni tuhsũ tireore pio payoricorore majare ñũ, Jesu Simore õ sehe ni yahu namoha:

—Ahricorore ñũga mũhũ. Mũ ya wũhũpu yũ sãa wihiri baharo yũ dahporire cosahti core yũhure waerare mũhũ. Ahricoro sehe to yahco co mehne yũ dahporire wayo, to pjoari mehne pahã cohãhre yũhure.⁴⁵ Mũhũ sehe yũhure piti boca wihmierare. Ahricoro sehe õi yũ dujiro puro yũ dahporire wihmihre.⁴⁶ Mũhũ sehe yũ dapure se mehne pio payoerare. Ticoro sehe yũ dahporire me sitia mehne pio payohre.⁴⁷ ã nicu mũhureta yahui nija. Ahricoro to ñaa yoari cjiri payũbia jira. ã jiricoro jiparota ticoro tuaro cahĩhre yũhure. ã jicu ñaare to yoari buhirire cohãhi. ã jia ñaare ti yoari buhirire mahanocã yũ cohãnohrina mahanocã cahĩna yũhure —niha Jesu Simore.

⁴⁸ ã ni tuhsũ tiro ticorore õ sehe ni yahuha:

—Mipũ pinihtare ñaare mũ yoari buhirire boja —niha Jesu.

⁴⁹ To ã nichũ tuhoa Jesu mehne dujina ti basi õ sehe ni durucuha:

—¿Dohse jiri ro baro jijari ahriro ñaa buhirire boriro? —niha tina ti basi.

⁵⁰ Ñ ni tuhsu, Jesu numinore ò sehe ni yahuha:

—Yuhure mu wacū tuachū mūhure pichacapū wahaboricorore yuhdoja. Cuiro marieno mu wuhupū tjuaa wahaga —niha Jesu ticorore.

Numia Jesure yoadohoha

8 Baharo bujua macaripū daa macar-icāpū cūhure sū, Cohamacū masare puhtoro to noano suho jiare noaa buheare yahuha Jesu. Doce to buheina sehe tiro mehne jiha. ² Ñ yoa numia cūhū watia ti cohtotari numia cjiri, dohatia numia cjiri Jesu noaa numia to yoari numia tiro mehne tiniha. “María”, ti nimaricorore “Magdalena”, ni pisua tiha ticorore. Ticorore siete watiare Jesu cohā wioha tó pano. Ñ jiro ticoro cūhū Jesu mehne tiniha. ³ Cuza wama tiriro Herodere dahra cohtaina puhtoro cjiro namono Juana cūhū Jesu mehne tiniha. Susana wama tiricoro cūhū paye numia mehne payū ti cjuaa mehne tireore yoadohoha.

Jesu wesere toari masuno quitire yahuha

(Mt 13.1-9; Mr 4.1-9)

⁴ Ñ yoa payū macari macaina Jesu cahapū cahmachuha. Ti ã cahmachuri baharo Jesu to tuhota mehne quitu dahre tinare ò sehe ni yahuha buhero taro:

⁵ —Toari masuno toaro, to toaa yaparire doca site cūno wahaha. To ã doca site cū wahcāchū paye yapari mahai bora caha suha. Ti ã bora caha sūchū paye yaparire masa tū diho cūha. Ñ jia paye yaparire minichahca duji ta, chunocaha. ⁶ Ñ yoa paye yapari sehe taa wapa bui dihta se mininocā bui bora caha suha. Tí yahpapū co mariaha. Ñ jia tí yapari du wija tarucuma ñaia wahaha. ⁷ Paye yapari sehe tja watoi bora caha

suha. Tja sehe tí toaa mehne duha. Tja sehe dia yuhdua waha, toaare wajanocaha. ⁸ Paye yapari noari yahpai bora caha suha. Noano dua jia noano dicta tiha. Ñ jia payū dicta tiha —niha Jesu.

Ñ ni tuhsu ò sehe tuaro ni namoha:

—Ahriro tuho duaina noano tuhoga musa —niha tiro.

Jesu quitu mehne to buherire yahuha

(Mt 13.10-17; Mr 4.10-12)

⁹ Baharo to buheina tí quitire masi dua, Jesure ò sehe ni sinituha:

—¿Ahri quitu mehne dohse ni yahui nijari muhū? —ni sinituha tina.

¹⁰ Tí ã nichū Jesu ò sehe ni yuhtiha:

—Cohamacū masa bui puhtoro to noano suho jiare panopū paina ti masierari cjirire musare masichū yoarohca Cohamacū. Paina sehere ã yoerara tiro. Tinare quitu mehneta buheihitja. Yū ã yoachū tina yū buheare tuhopahta masisi —niha Jesu to buheinare.

Jesu wesere toari masuno quitire yahu pahnoha

(Mt 13.18-23; Mr 4.13-20)

¹¹ Ñ ni tuhsu tinare ò sehe ni yahu namoha:

—Ñ sehe ni yahura ahri quitu: Toaa yapari noaa buhea yoaro sehe jira. ¹² Ñ yoa maha duhtū cahai bora yapari sehe noaa buhea yoaro sehe jira. Caina masa noaa buheare ti tuhochū ñno watino sehe ta, tí buheare masi dutierara masare, minichahca tí yaparire ti chū cohāno sehetā yoaro. To ã yoerachū tina Cohamacūre wacū tuaboa. Ti ã wacū tuachū ñno Cohamacū sehe tinare pichacapū wahaborinare yuhdobo. ¹³ Ñ yoa taa wapa bui dihta se mininocā bui bora yapari noaa buhea yoaro sehe jira. Ñ jia masa noaa buheare tuho, wahchea mehne tíre tuho nunū wahcāna. Ñ tuho nunupahta taa wapa buicā jia yucū nuhcori mariea yucū yoaro sehetā ah-

rina masa cūhū yoari pja cūno pjaerara. Ā cūno pjaeraa yū yare ti cahmari buhiri paina tinare ti űano yoachū űūa yū yare duhunocahna. ¹⁴ Ā yoa tja watoi bora ya pari noa buhea yoaro sehe jira. Ā jia masa noa buheare tuhopahta, ahli yahpa macaare wacū nūnū yūhdūara. Niñerure bujūa cahma, paye baro cūhūre payū cahma, tíre goa pja yūhdūara tina. Ti ā yoachū tí sehe noa buheare dūcatara. Ti ā dūcatachū masa noa sehere yoarera. Dicha maria yucu yoaro sehta jira. ¹⁵ Ā yoa noari yahpai bora ya pari noa buhea yoaro sehe jira. Ā jia masa noa buheare tuhoa, noano mehne tí buheare yūhdūraerara. Ā jia yucūcū dicha tiro sehta noa buheare tuhoina sehe Cohamacū to cahmano sehta noaare yoara —niha Jesu.

Jesu sihāria quitire buheha

(Mr 4.21-25)

¹⁶ Ā ni tuhsū paye quiti mehne piti dahre buheha tiro:

—Ne sihāriare ti sihāri baharo tiare dihi biato docai cūerara masa. Ā yoa tiare coāri casario docai cūerara. Muanopū tiare duhu payora wūhūpū sāa taina ti noano űū sāahto sehe. ¹⁷ Jipihti ti masierari cjiire baharo masa masiahca. Sihāria to buhriachū mari űū masino sehta panopū ti masierari cjiire masiahca masa.

¹⁸ Ā jina mūsa tuhona noano tuho nūnūga. Noano tuho nūnūriro, noano masinohca. Tuho nūnūerariro “Mahanocā tuhoja”, to nipachūta tí sehere boa waharohca —niha Jesu.

Jesu coyea tirore pjiha

(Mt 12.46-50; Mr 3.31-35)

¹⁹ Baharo Jesu bahana ti pocoro mehne tiro cahapū wahaa nimaha. Masa payū jichū to cahapū sūeraha. ²⁰ Ā jiro cūiro Jesure ō sehe ni yahuha:

—Mū poco mū bahana mehne sopacapū ducuhre. Mūhūre űūa taa niyuhti —niha tiro Jesure.

²¹ To ā nichū Jesu ō sehe ni yahuha jipitinare:

—Cohamacū ya buheare tuhoina, tíre yūhdūraeraina tinata yū poco yū bahana yoaro sehe jira —niha Jesu tinare.

Jesu wihnonore yusū dutiha

(Mt 8.23-27; Mr 4.35-41)

²² Pa dachoi Jesu to buheina mehne dohoriapū samu:

—Basa, pahājihna —ni, tina jipitina tia mehne bucūpariropū pahāa wahaha.

²³ Ā pahāno carīa wahaha Jesu. Ti ā pahārucuchū waro tuaro wihnono taha. Wihnono to tachū bujūa pahcōri wahcā, tinare mionocamaha. Ā to wahachū minihto cua yūhdūaha tinare. ²⁴ Ā wahachū űūa Jesu cahai waha, tirore wahcōha.

—Buheriro, mari mini yariana tana nijā —niha tina.

Ti ā nichū Jesu sehe wahcā, wihnonore “Tó purota wā duhuga”, niha. Ā ninota pahcōri cūhūre “Yusua wahaga”, niha. To ā nichūta wihnono yūhdūa wahaha. Ā yoa pahcōri cūhū yusū bora wahaha. ²⁵ Ā wahari baharo Jesu tinare ō sehe niha:

—¿Mūsa yūhūre wacū tuaerasinijari? —niha tiro.

To ā nichū tina sehe cui, cūaa waha, ti basi ō sehe ni durucuha:

—Cue, ¿dohse jiro baro masuno jijiari ahriro? Ahri wihnono, pahcōri cūhū to dutichū yūhdūraerara tirore —niha tina ti basi.

Watīa ti cohtotarirore noariro wahachū yoaha Jesu

(Mt 8.28-34; Mr 5.1-20)

²⁶ Ā yoa tina sie coapū Gerasa macaina ya yahpapū pahā sūha. Tí yahpa Galilea yahpa potoihta jiha. ²⁷ Tóí Jesu to maja

sũrucũ sũchũ waro tó macariro watĩa ti cohtotariro tiro cahapũ taha. Tiro yoari pja suhti marieriro jiro, to wuhũpũre ne jieraha. Ā yoa masa copari tãa copari watoĩ jia tiha tiro. ²⁸⁻²⁹ Ā jia payũ tahari watĩa tirore ñahaha. Ā jiro tiro peresui to jichũ to wamomacarine dahporire comaa dari mehne dũhteriro jiparota, tiro tí darire nuha mũjaha. Ā yoa watĩa sehe tirore masa marienopũ na wahcãa tiha. Ā yoa tiro Jesure ñũroca õ tuaro saũurucu, Jesu panoĩ na tuhcuca caha sũha. To ã yoachũ ñũno Jesu sehe tirore õ sehe ni dutiha:

—Watĩa, duhuga ahrirore —niha Jesu.

To ã nichũ tuhoro watĩa ti cohtotariro tuaro saũurucu, õ sehe ni sinituha Jesure:

—Jesu, ¿Cohamacũ Jipihtina Bui Jiro macũno yabare yoai tai nijari mũhũ yũhũre? Yũhũre, ñano yoai tjiga —niha watĩa ti cohtotariro.

³⁰ To ã nichũ Jesu sehe õ sehe ni sinituha tirore:

—¿Yabariro wama tjari mũhũ? —niha.

Payũ watĩa tiro mehne jiha. Ā jiro õ sehe niha watĩa ti cohtotariro:

—Watĩa payũ wama tija sã —ni yũhtiha watĩa ti cohtotariro tiro.

³¹ —Cuãri copapũ sãre waha dutiecũ tjiga —ni, tuaro siniha watĩa sehe.

³² Tí pjare tóĩ tũcũ dahpotoi yesea payũ chua niha. Ti tóĩ chuchũ ñũa watĩa õ sehe ni siniha Jesure:

—Sina yesea cahapũ warocaga sãre ti pjacuripũ sã sãahto sehe —ni siniha watĩa.

Ti ã sinichũ tuhoro “Jai. Wahaga”, niha Jesu. ³³ To ã dutichũ, watĩa masũno mehne jirina cjiri sehe wahaa, yesea pjacuripũ sãa wahaha. Ā yoa tinare ti sãari baharo, yesea jipihtina bũcupariro dũhtũ cahapũ pari cũnũpũ mũroca buha, tí taropũ bora ñoja, mini yaria pihtia wahaha.

³⁴ Yeseare ñũ wihboina yesea ti ã minichũ ñũa, cui, mũrocaa wahaha. Ā mũroca wahcã pjiri macapũ cũhũre, daa macaricãpũ cũhũre tíre ti ñũrire yahu sitea wahaha. ³⁵ Ti ã yahuchũ tuhoa, masa sehe payũ ti ã waharire ñũa wahaha. Ā jia Jesu cahai sũ, watĩa ti cohtotariro cjirore to suhti tirore, tuho masiriro to dũjichũ ñũha tina. Tí jipihitiare ñũa, tina cui niha. ³⁶ Watĩa ti cohtotariro cjiro noariro to waharire ñũina, ti ñũrire painare noano yahu pahũoha. ³⁷ Tí pjata Gerasa yahpa macaina payũ Jesure tuaro cuia, tirore pa sehepũ waha dutiha. Ti ã waha dutichũ Jesu dohoripũ samu, waharo taro niha. ³⁸ Watĩa ti cohtotariro cjiro Jesu to wahahto pano tuaro siniha tirore:

—Mũhũ mehne waha duaja —ni sinimaha.

³⁹ To ã nichũta Jesu tirore õ sehe ni yũhtiha:

—Mũ ya macapũ wahaga. Ā wahacũ Cohamacũ mũhũre to yoarire yahuga painare —niha Jesu.

To ã niri baharo waha to ya macapũ sũro watĩa ti cohtotariro cjiro sehe Jesu tirore to yoarire jipihtina to ya maca macainare yahaha.

**Jairo maconore yũhdũchũ
yoa, cahã ñũricoro cũhũre
yũhdũchũ yoaha Jesu**

(Mt 9.18-26; Mr 5.21-43)

⁴⁰ Pari turi Jesu tí bũcupariropũ pahãa wahaha tjoa. To pahã tariropũta masa payũ tirore cohtaa niha. Ā cohtaa, tirore piti bocasiniha wahchea mehne. ⁴¹⁻⁴² Tóĩ judio masa buheri wũhũ pũhtoro Jairo wama tirore Jesu cahai sũ, to dahpori cahai na tuhcuca caha sũha tirore ño payoro. To macono yariaro niha. Ticoro cãcorota jiricoro doce cũhmari cjuaricoro jiha. Ā jiro tiro to ya wũhũpũ Jesure pji wahcãha. “Jai” ni, tiro mehne wahaha Jesu cũhũ.

Mahai ti ã wahachũ payũbia masa tirore nũnũ ti wahcã, bihsaro sũrũcũ sũha tirore.⁴³ To ã bihsaro wahachũ numino doce cũhmari waro ã cahã ñũrucuricoro tõi jiha. Tõ pano duhturuare jipihtia to niñeru mehne wapamaha ticoro co wa dutiro. Ti ã co wapachũta mũnanota jirucunocaha ticoro.⁴⁴ Æ jiro ticoro Jesu baharo masa payũ watoi wihi, Jesu suhtirore to ñaha ñũchũta to cahã ñũa pihtia wahaha.⁴⁵ To ã ñaha ñũchũ tuhoturo Jesu õ sehe ni sinituha:
—¿Noa yũ suhtirore ñaha ñũri? —niha tiro.

Jipihtina “Yoerahi”, niha. Æ jia Pedro cũhũ õ sehe niha:

—Buheriro, bihsa nina. Æ jia masa payũ mũhũre pihanocahna. ¿Dohseacũ ã ni sinitujari mũhũ? —niha tina Jesure.

⁴⁶ Ti ã nichũ Jesu õ sehe ni yũhtiha:

—Michapucacã yũhũ noaricoro wahachũ yoahi cãcorore. Æ jicũ yũhũre to ñaha ñũchũ masija —niha tiro.

⁴⁷ To ã nichũ tuhorõ ticoro duhti masieraro, teterericoro Jesu cahai na tuhcuca caha sũha tirore ñõ payoro. Æ jiro jipihtina masa ti tuhorõ to dohatiare, Jesure to ñaha ñũrire to noaricoro to waharire yahuha ticoro.⁴⁸ To ã ni yahu tuhũchũ Jesu ticorore õ sehe ni yahuha:

—Maco, yũhũre mũ wacũ tuua mehne noaricoro tjuara mipũre. Wahchea mehne wahaga —niha ticorore.

⁴⁹ To ã nino watoi Jairo ya wũhũ jiro yahuho wihiha:

—Mũ macocã yariaa wahahre. Æ jicũ buherirore pji tai tjiga —niha tiro.

⁵⁰ To ã nichũ tuhorõ, Jairore õ sehe ni yahuha Jesu:

—Cahya tuhotui tjiga. Yũhũre wacũ tuaga. Tĩ dihtare yoaga. Mũ ã yoachũ ticorocã masaa waharõhca —niha Jesu.

⁵¹ Æ ni tuhsũ to wũhũpũ sũ, Pedro, João, Santiago, dohatiricoro pũcũsuma tõpeinata na sãaha. Paina sehere Jesu

sãa dutieraha.⁵² Tõi jipihtina masa ti ñahacaha tiro watoi sãa sũha Jesu.

—Tiiena tjiga. Ticorocã yariaerare. Carĩno nica —niha tiro.

⁵³ To ã nichũ tuhoa tina sehe ticoro yariaricoro to jichũ masia, Jesure bujũha. “Æ nimacanocano nina”, ni bujũha.⁵⁴ Æ yoa Jesu ticorocã wamomacare ñaha, õ sehe ni pisuha:

—Maharicorocã wahcãga —niha.

⁵⁵ To ã nichũta yariaricoro masaa waha, tĩ pjata wahcãrucũ sũha ticorocã. To wahcãri baharo Jesu ticorore chũare wa dutiha.⁵⁶ To ã masachũ ñũa to pũcũsuma ñũ cuua wahaha. Æ jiro Jesu tĩre painare yahu dutieraha.

Jesu doce to buheinare buhe dutiro warocaha

(Mt 10.5-15; Mr 6.7-13)

9 Æ yoa Jesu doce to buheinare pjiroca, to tuaare waha tinare. Watĩare ti cohãhti cjihtire, dohatiinare noaina ti yoahti cjihtire to tuaare waha tinare.² Æ yoa tuhsũ tinare Cohamacũ masare puhtoro to noano sũho jiare buhe dutiro, dohatiinare noaina wahachũ yoa dutiro warocaha tinare.³ Õ sehe ni dutiha Jesu tinare:

—Musa wahana paye barore naena tjiga. Tjuadũre, wajure, chũare, niñerure naena tjiga. Mũsa sãano dihtare sãa wahcãga. Paye suhtire naena tjiga.

⁴ Jipihtia macaripũ mũsare ti carĩno wachũ tĩ wũhũhta jinocasiniga. Coã wahanapũ wijaahga tĩ wũhũre.⁵ Paye macari macaina mũsare ti cahmaerachũ ñũna tĩ macarine yũhdũ wahcãa wahaga. Æ wahana mũsa dahpori macaa dihta pohcari mene wajã site cũga mũsa tinare ti ya buhirire masichũ yoana —niha Jesu.

⁶ To ã niri baharo to buheina sehe waha, jipihtia macaripũ noaa buheare yahu tinia tiha. Æ yoa dohatiinare noaina wahachũ yoaa tiha.

Jesu to yoarire Herode tuhoha

(Mt 14.1-12; Mr 6.14-29)

⁷ Ā yoa Herode Galilea yahpa macaina puhtoro Jesu yoarire tuhoro caha. “¿Diro baro jijari tiro Jesu?” niparota ne masieraha. Cāina ō sehe nimaha Jesure: “João masare bautisariro cjiro pari turi bajuaro nica. Ā jiro ‘Jesu’, ti niriro tiro tjira”, nimaha cāina. Ti ā nichu tuhoro Herode Jesure dohse ni masieraha. ⁸ Paina “Tiro Elia cjiro mipu bajuaro nina”, nimaha. Paina sehe “Cohamacu yare yahu muhtaina panopu macaina mehne macariro cjiro mipu bajuaro nica”, nimaha Jesure. ⁹ Ti ā ni durucupachuta ō sehe ni tuhoutuha Herode sehe: “João dapure dute ta duti tuhsuhi yuhu. ¿Mipure jiro masa ti yahuriro diro baro jibocari tiro sehe?” ni tuhuturo tiro Jesure nu duamaha.

Jesu cinco mil bui masare chua waha

(Mt 14.13-21; Mr 6.30-44; Jn 6.1-14)

¹⁰ Ā yoa Jesu to warocarina tiro cahapu tju sua, ti yoarire yahuha Jesure. Ti yahu tuhsuchu Jesu tina dihtare Betsaida wama tiri macapu suho wahamaha. ¹¹ Ti waharire masia, masa payu tinare nunu ti wahcāha. Jesure ti mu suchu nuño piti bocasiniha Jesu tinare. Ā jiro tiro Cohamacu masare puhtoro to noano suho jiare tinare yahu, dohatiinare noaina wahachu yoaha.

¹² Nānichahapu doce to buheina tiro cahapu su, Jesure ō sehe ni yahuha:

—Ō masa marienopu jira. Ō majano macaa macaripu, daa macaricāpu cūhure ahrina masare warocaga. Carīa ti chuhti cjihtire maca dutiga tinare —niha tina Jesure.

¹³⁻¹⁴ Ti ā nichu Jesu ō sehe ni yuhtiha tinare:

—Ā nienata chūare waga tinare —niha.

To ā nichu tuhoha tina ō sehe ni yuhtiha:

—Cū wamomaca pihtia pāo curiri, puaro wahi tó purocāta cjuaja mari. ¿Ahrina payu masa ti chuhti cjihtire nuchubocari sā? —niha to buheina.

Payu masa ti jichu nuā ā niha to buheina. Tóprare cinco mil mua jiha. (Numia, macanacā cūhu jiha.) Ā jiro Jesu ō sehe ni yahuha to buheinare:

—Cincuenta masare cū curuai duji dutiga. Paye curuari cūhure tópeinata duji dutiga —niha Jesu to buheinare.

¹⁵ To ā nichu to buheina to dutiro seheteta yoa, jipihtina masare duji dutiha.

¹⁶ Duji duti tuhsu Jesu cū wamomaca pihtia pāo curirire puaro wahi mehne na, manopu nuha. Ā nuño Cohamacure “Noana”, niha. To ā niri baharo pāo curirire nuha, to buheinare masare witi dutiro waha. ¹⁷ Ti ā witi tuhsuchu, tina jipihtina masa chu, yapi yuhduā wahaha. Ti yapi wahyorire doce puhuse waro wahpo dapoha to buheina.

Jesu potocā Cristo to jiare Cohamacu warocariro to jiare yahuha Pedro

(Mt 16.13-19; Mr 8.27-29)

¹⁸ Cū dacho Jesu cūirota jiro, Cohamacure sinino niha. To ā sinino watoi to buheina tiro cahapu suha. Ā jiro Jesu ō sehe ni sinitu nuha tinare:

—¿Diro baro jicari yuhu masa yuhure ti tuhoutu chu? —ni sinitu nuha.

¹⁹ To ā sinituchu tuhoha to buheina ō sehe ni yuhtiha:

—“João masare bautisariro jira”, nina mūhure. Paina “Elia cjiro jira”, nina. Paina “Panopu macariro Cohamacu yare yahu muhtariro cjiro masa wijariro cjiro jira”, nina mūhure —ni yuhtiha to buheina sehe tire.

²⁰ Ti ā niri baharo Jesu tinare ō sehe ni sinitu nuha tjoa:

—¿Musa sehe musa tuhoutu chu diro baro jicari yuhu? —ni sinitu nuha tjoa.

—Mũhũ Cristo Cohamacũ warocariro jira —ni yũhtihã Pedro.

Jesu to yariahto cjihtore yahuha

(Mt 16.20-28; Mr 8.30-9.1)

²¹ Ā yoa Pedro “Cristo jira mũhũ”, to nĩre painare Jesu yahu site dutieraha to buheinare. ²² Ā ni yahu site dutiera tuhsũ õ sehe ni namoha:

—Yũhũ masũno Cohamacũ warocariro tuaro ñano yũhdũihca. Āta yũhdũro cahmana yũhũre. Ā jia mari coyẽa judio masare buheina, bucũna, sacerdotẽa pũhtoa mehne yũhũre cahmaeraa, yũhũre wajãahca. Ti ã wajãri baharo tia dacho wahaboroi masa mũjaihca —niha Jesu tinare.

²³ Baharo jipihĩtinare õ sehe ni yahuha Jesu:

—Cũiro yũ yairo ji duaro, to cahmano yoa duamarine duhunocanoĩca. Ā yoa crusapũ yũ ñano yũhdũhtiro se-heta yũ yairo to jiri buhiri ñano yũhdũparota yũhũre duhusi. Ā jiro yũ yare yoarucuriro jirohca. ²⁴ Masũno yũhũre wacũno marieno to mũ sũro to cahmano se-heta yoiro pichacapũ tiro waharohca. Ā jiro yũ yare ã yoarucuriro jipihtia dachoripe yũhũ mehne mũanopũ jirucurohca. ²⁵ ¿Cũiro masũno ahri yahpa macaare jipihtiare cjuariro Cohamacũre cahmaeraro pichacapũ waharo yabare wapatajari tiro? Ā jiro ne wapataerara. ²⁶ Cãina yũhũre, yũ buheare bũo tiboca. Ti ã yoachũ ñũcũ yũhũ cũhũ yũhũre ã yoinare bũo tisãaihca. Yũhũ masũno Cohamacũ warocariro noaina anjoa ti si sitea mehne, yũ si sitea mehne, yũ Pũcũ to si sitea mehne tjuã tacũ tinare bũo tisãaihca. ²⁷ Potocã niita nija mũsare. Mipũre cãina mũsa õpũre jiina mũsa yariahto pano Cohamacũ jipihtina bui pũhtoro noano to sũho ji dũcachũ ñũnahca —niha Jesu tinare.

Jesu pjacũ cohtotaha

(Mt 17.1-8; Mr 9.2-8)

²⁸ Ā yoa ocho dachori tíre to yahuri baharo Jesu Pedrorẽ, Joãore, Santiagore tina dihtare pjiha. Ā yoa waha, Cohamacũre sinia waha, tũcupũ mũjaa wahaha tina. ²⁹ Cohamacũre to sinino watoi Jesu wũhdũã cohtotaha. To ã cohtotachũ to suhtiro minoari suhtiro noano yehseri suhtiro wahaha. ³⁰ To ã waharo watoi pũaro mũã tiro mehne durucua niha. Durucuína sehe Elia cjiro, Moise cjiro jiha. ³¹ Tina mũano macaã si sitea mehne bajuaha. Jesu baharocãta Jerusalẽpũ to yariahtore tina Jesu mehne durucua niha. ³² Pedro cũhũ wũjo caha yũhdũaha. Ā carĩpahta cũã wahcã wihi Jesu to si siteare ñũã, pũaro tiro mehne ducuína cũhũre ñũã. ³³ Moise cjiro cũhũ ti wahahto panocã Pedro Jesure õ sehe nimaha:

—Pũhtoro, mari õre jichũ noã duara. Tia wũhũcã yoahtjã. Mũ ya wũhũcã, Moise ya wũhũcã, Elia ya wũhũcã yoahtjã —nimaha Pedro.

Ā niparota to nĩre ne masieraha. ³⁴ To ã ni durucuro watoi tinare me curua duji boro pja sũha. To ã duji boro pja sũchũ ñũã tina cuiã wahaha. ³⁵ Tuhsũ, me curua puhichapũ õ sehe ni durucuro coã taha:

—Ahriro yũ macũ, yũ beseriro jira. Noano tũhoga tirore —nino coã taha me curua puhichapũ.

³⁶ To ã nino coã tari baharo Jesu dihtare ñũã tina. Baharo ti ñũire painare yahueraha. Ne cũirore yahueraha.

Jesu watĩno to cohtotarirocãre noariro wahachũ yoaha

(Mt 17.14-21; Mr 9.14-29)

³⁷ Pa dachoi tina tũcupũ ti duji tachũ payũ masa Jesure piti bocaha. ³⁸ Ā jiro tina mehne macariro Jesure õ sehe ni pisuha:

—Buheriro, mūhure tuaro ahrire sini duaja yūhū. Yū macū cūirota jira. Ā jicū tirore nūbasaga mūhū. ³⁹ Watīno tirore nāha, sañurucuchū yoa, tunu teterechū yoa, sahpo tua wahachū yoaa tihre. Ā yoaro watīno yū macure nāno yuhdūchū yoa, ne duhu duaerara. ⁴⁰ Mū buheinare watīnore cohā wio duticū tuaro sinimahi. Yū ā sinipachūta tina sehe tirore cohā wio masierare —niha tiro Jesure.

⁴¹ To ā nichū Jesu sehe ō sehe niha:

—Mipū macaina mūsa nāina jira. Ķ Yūhure ne wacū tuaeraputiajari? Yoabiari pja musare buhemaja yūhū. Ķ Noho puro yoari pja yūhure mūsa caribobocari? —ni tuhtiha Jesu.

Ā ni tuhsū watīno ti cohtotariro pūcurore ō sehe niha:

—Mū macure na taħga —niha.

⁴² To ā niri baharo to macūno Jesu cahapū to taro watoi watīno sehe tirore yahpapū doca caha sū, tunu teterechū yoaha. To ā yoachū Jesu watīnore wijaa dutiha. To ā wijaa dutichū watīno sāarirocā noariro wahaha. Ā jiro Jesu sehe tirocāre wiaha to pūcurore. ⁴³ Cohamacū tuaa mehne noariro to wahachu nūa, jipiltina masa cuaa wahaha.

Pari turi Jesu to yariahtore, to masahtore yahuha

(Mt 17.22-23; Mr 9.30-32)

Masa Jesu to yoarire ti nū, cuaa wahachū Jesu sehe to buheinare ō sehe ni yahuha:

⁴⁴ —Michapucacā yū yahuhtire boena tjiga mūsa. Yūhure Cohamacū to warocarirore paio yūhure nāha dutiro warohca masare —niha Jesu.

⁴⁵ To ā nipachūta tina sehe to yahuare noano tuho nāhaeraha. To yahurire tinare masihto basioeraha. Tí pjata Cohamacū tinare tíre tuho nāha dutierasiniha. Ā jia tina cuia, tíre tirore sinitu nūeraha.

Jesu buheina tina mehne macarirore puhtoro sō duamaha

(Mt 18.1-5; Mr 9.33-37)

⁴⁶ Baharo Jesu buheina durucu sayoa niha:

—Ķ Mari mehne macariro diro sehe puhtoro ti cohtotacari? —ni sayoa niha tina ti basi.

⁴⁷ Tí ā nichū Jesu sehe ti tuhotuare masino, ninjocāre to cahai duhu dapo, to buheinare ō sehe ni yahuha:

⁴⁸ —Yū yare yoana tana ahrirocāre cahmana yūhū cūhure cahmana mūsa. Ā yoa yūhure cahmana, yūhure warocariro cūhure cahmana mūsa. Mūsa mehne macariro mūsa cahamacūno jiro tiro cūhū puhtoro tjirohca —niha Jesu.

Marine nū tuhtiriro jieraro, mari mehne macariro jira

(Mr 9.38-40)

⁴⁹ Baharo João Jesure ō sehe ni yahuha:

—Buheriro, mū wama mehne watīare cohārirore sā nūhi. Tiro mari mehne macariro to jierachū nūna tíre tirore yoa dutiera tihi sā —niha João Jesure.

⁵⁰ To ā nichū Jesu Joãoire paina buheina cūhure ō sehe ni yahuha:

—Ā niena tjiga mūsa tirore. Marine nū tuhtiriro jieraro, tiro mari mehne macariro jira —niha Jesu to buheinare.

Jesu Santiagore, João cūhure tuhtiha

⁵¹ Tí pjare Jesu muanopū to wahahto panocā, “Jerusalēpū wahaihtja”, niha tiro. Ā nino tópu waharo niha. ⁵² Ā jia Jesu to panoi warocaina waha, Samaria yahpa macari macapū sū, tói Jesu to jih-tore cahno duamaha. ⁵³ Jesu Jerusalēpū waharo taro niha. Tópu wahahtiro to jichū tuhoa, tó macaina tirore cahmaeraha. ⁵⁴ Tíre tuhoa Santiago, João mehne ō sehe ni yahuha Jesure:

—Pũhoro, mũ cahmachũ mũano macari pichaca mehne tinare wajã dutinahca —niha tina tireore.

⁵⁵ Ti ã nichũ Jesu majare ñũ, tuhtiha tina pũarore.

[—Espíritu Santo yaina jira mũsa. Mipũ mũsa tuhoturo seheta tiro sehe tuhotuerara. Yũhũ masũno Cohamacũ warocariro ahri yahpapũ tacũ pichacapũ wahaborinare yoadohotiro tai. Masare butichũ yoacũ tacũ nierahi —ni yahuha Jesu.]

⁵⁶ ã tuhti tuhsũ, pa macapũ Jesu cũhu waha wahaha.

Paina Jesu mehne wahamaha

(Mt 8.19-22)

⁵⁷ Tina mahai ti wahachũ, masũno Jesure õ sehe ni yahuha:

—Mũhũ mehne waha duaja nohoi mũ waharoi —niha tiro.

⁵⁸ To ã ni tuhsũchũ Jesu õ sehe ni yũhtiha:

—Cãina macaroca macaina wahiquina ti copari cjuara. Minichahca cũhũ ti suhti cjuara. Yũhũ masũno Cohamacũ warocariro sehe yũ carĩri wũhũ maeraja —niha Jesu.

⁵⁹ Baharo pairore Jesu pjiha:

—Yũhũ mehne macariro cjihto taga —niha.

To ã nichũ tiro õ sehe ni yũhtiha Jesure:

—Pũhoro, yũ pũcũ to yariachũ yasinii wahaihtja. ã ya tuhsũcũ pinihta mũhũ mehne wahaihtja —niha tiro.

⁶⁰ To ã nichũ Jesu õ sehe ni yahuha:

—Yũhũre cahmaeraina yariaina yoaro seheta jira. Tina sehe yariainare yajaro. ã jicũ mũhũ sehe Cohamacũ masare pũhoro to noano sũho jiare noaa buheare buhei taga —niha Jesu tireore.

⁶¹ ã yoa paio Jesure õ sehe niha:

—Pũhoro, mũhũ mehne wahaihtja. Wahmanore yũ coyeare coha sitisinii wahaihtja —niha tiro Jesure.

⁶² To ã nichũ Jesu õ sehe ni yahuha tireore:

—Wachũ sahari pjĩne tuã puriro mehne dahrariro noari dare saha duara. ã dahrariro to baharo buhusehere majare ñũno, noano potori da saha masierara. (Tó seheta Cohamacũ yare yoaro taro, dahrariro tó pano to jia tiare tuaro wacũboca tíre duhu duaeraro, dahrariro to majare ñũno seheta.) ã wacũriro Cohamacũ mari pũhoro yare dahraboriro jierara —niha Jesu.

Jesu setenta y dos buheinare buhe dutiro warocaha

10 Baharo Jesu paina buheinare setenta y dos buheinare bese, macaripepũ to wahahto pano warocayuha. Cãa macaripũre pũaro dihta warocaha tiro. ² ã warocarõ õ sehe ni yahuha tinare piti dahre buhero:

—Trigo payũ ti bucũa tuhsũchũ payũ jichũ dahraa pjĩro jira. Wiho mejeta dahraina sehe mahainacã jira. Tó seheta noaa buheare tuhohtina payũ jichũ pjĩro jira mari dahraa. To ã jipachũta mahainacã dahrari masa yoaro seheta noaa buheare buhehtina cũhũ mahainacã jira. ã jina noaa buheare buhehtinare painare to warocahtore siniga Cohamacũre mũsa. ³ Wahaga mũsa. Mũsare yũ warocachũ mũsa oveja pohna yaya watoi ti jiro seheta mũsa cũhũ ñaina suaina watoi jinahca. ⁴ Niĩneru wajure, bujuawacũa waju cũhũre, dahpo suhtire naaena tjiga. Mũsa mahai tinina painare boca sũ durucuenta tjiga. Poto wahaga. ⁵ Jipihtia mũsa sãa wũhũsepũ sãahna “Ahri wũhũ macaina noano jijaro”, ni mũhtaga. ⁶ Tí wũhũ macaina noano mehne jiina cahmachea marieina ti jichũ, tíre niga tinare. Noano mehne ti jierachũ ñũna tí wũhũ macainare ã niena tjiga. ⁷ Cũ wũhũi sãa sũrucana ti noaina jichũ tí wũhũihta tjuaga. Tói ti duhu payorire

chũ, sihnituga. Dahrainare ti wapataare nano cahmana. Æ jina ti wapataare ti nano seheta ti duhu payorire naga m̄sa cũhu. Æ jina cũ wũhuihta m̄sa s̄ri wũhuihta jina, tí maca macaa wũhusepũ ji tiniena tjiga. ⁸Macapũre m̄sa s̄na tó macaina sehe musare ti cahmaina jichũ ti chua ti duhu payorire chũga. ⁹Tó macaina dohatiinare noaina wahachũ yoaga. Æ jina õ sehe niga tinare: “Cohamacũ mipũre mari pũtoro noano to sũho jihtore yahuna nija musare”, niga tinare. ¹⁰Pa macapũ m̄sa suchũ tina sehe musare cahmaeraboca. Ti Æ cahmaerachũ ñuna tí maca dacho macapũ waha, õ sehe niga tinare. ¹¹“Ahri maca macaa dihta pohcari mene wajã site cũna nija sãre m̄sa cahmaerari buhiri ñona. Æ jina ahrire wacũga. Cohamacũ mari pũtoro mipũre to noano sũho jihtore yahuna nija musare”, niga tinare. ¹²Musare potocã niita nija. Sodoma macaina ñabiaina jiha. Ti Æ jipachũta pihtiri dacho jichũ Cohamacũ to buhiri dahreri dacho jichũ Sodoma macaina yũdoro musare cahmaeraina sehene buhiri dahrerohca —niha Jesu.

**Paye macari macaina
Cohamacũre yũdũrucaina jira**

(Mt 11.20-24)

¹³Baharo Jesu õ sehe niha macari macainare:

—Corazĩ macaina, m̄sa ñano yũdũnahca. Betsaida macaina, m̄sa cũhu ñano yũdũnahca. M̄sa ya macaripũre Cohamacũ tuaa mehne yoa ñomahi. Tiro wama tiri macare, Sidõ wama tiri maca cũhũre to tuaa mehne yũ yoa ñochũ ñna tó macaina sehe ti ñaare cahyaboa. Æ yoa “Noaina jija”, ni ti tũhotumari cjirire tũhotu cohtotaboa. Dõih̄ta tina duji, cahyaa suhtire sãa, ti basi niti pohcare ti bui dahra site payoboa ti ñaare cahyaare ñoa. ¹⁴Cohamacũ to buhiri

dahreri dacho jichũ Tiro macaina, Sidõ macaina yũdoro ñaa buhiri tiina m̄sa jiri buhiri musare ñano waro buhiri dahrerohca tiro. ¹⁵Capernau macaina, m̄sa mũ sũro m̄sanopũ waha duamana. M̄sa Æ waha duapachũta m̄sa ñaa buhiri tiina m̄sa jiri buhiri musare Cohamacũ pichacapũ cohãnohca —niha Jesu.

¹⁶ Æ ni tuhsũ Jesu to buheinare õ sehe ni yahuha:

—Musare tũhoina yũhũ cũhũre tũhora. Musare cahmaeraina, yũhũ cũhũre cahmaerara. Æ jia yũhũre cahmaeraina, tina yũhũre warocariro cũhũre cahmaerara —niha Jesu tinare.

Setenta y dos buheina tju wih̄iha

¹⁷Baharo setenta y dos buheina wahchea mehne tju wih̄iha:

—Pũtoro, m̄ wama mehne mũ tuaa mehne watĩare sã dutichũ tina sehe sãre yũdũrucarare —niha tina Jesure.

¹⁸Ti Æ nichũ Jesu õ sehe ni yũhtiha tinare:

—M̄sanopũ to oroca site bora taro seheta, watĩno to bora tachũ ñũhi.

¹⁹Noano tũhoga. Musare yũ tuare wahi yũhũ. Æ jina agãare, pichõno soroare, watĩnore marine ñũ tuhtirirore m̄sa yũdũrucachtire wahi yũhũ. Æ jia tina musare ñano yoa masierara. ²⁰Yũ Æ wapachũta watĩa musare ti yũdũrucarachu ñuna tí dihtare wahchena tjiga. Ahri sehene wahchega. M̄sanopũ Cohamacũ yaina ti wamare to joa õri tjui m̄sa wamare to joa õchũ ñuna, tí sehene wahchega m̄sa —niha Jesu tinare.

Jesu wahcheha

(Mt 11.25-27; 13.16-17)

²¹Tí pjare Espĩritu Santo Jesure tuaro wahchechũ yoaha. Æ jiro Jesu õ sehe niha:

—Mai, mũhũ m̄sanopũ cũhũre yahpapũ cũhũre pũtoro jira. Masi

yuhdurucu sūinare mu yahuerari cjiire wiho jiina sehere yahure muhu. Mu ā yoachū nūcu “Noa yuhduara”, nija. Ā tjira, Mai. Mu yoa duariro seheta, mu cahmariro seheta tinare mu yare yahure —niha Jesu.

Ā ni tuhsu painare ō sehe niha:

²²—Yū Rūcu jipihtiare yuhure ware. Yū Rūcu dihta yuhure masina. Yuhū cūhu tirore masija. Yū beserina cūhu tirore masina, yū masi dutiina jia. Tōpeinata yū Rūcure masija sā —niha Jesu.

²³To ā niri baharo ti sahsero ti jichu Jesu to buheinare ō sehe niha:

—Ahri jipihtiare mūsa nūna wahcheina jira. ²⁴Potocā tjira. Payū Cohamacu yare yahu mūhtaina cjiiri, yahpari macaina pūhtoa cūhu mipū mūsa nūrire nū duamaha tina cūhu. Ā jia mūsa tūhori cūhure tūho duamaha —niha Jesu.

Noariro Samaria macariro quitire yahuha Jesu

²⁵Tí pjata judio masare buheriro Jesu cahai wihi, Jesure nāno to durucuchū yoa duamaha tirore yahusā duaro:

—¿Buheriro, yuhū jipihtia dachoripe Cohamacu mehne ji duacu dohse yoaihcari yuhū? —ni sinituha tiro Jesure.

²⁶To ā nichū Jesu ō sehe ni yūhtiha tirore:

—¿Dohse ni yahujari Cohamacu yare ti joari pūi? ¿Cohamacu to ni joari cjiire dohse ni tuhotujarita muhu? —niha Jesu tirore.

²⁷To ā nichū tiro ō sehe ni yūhtiha:

—Ō sehe niha Cohamacu: “Tuario mūsa yajeripohnari mehne, noano mūsa tuaa mehne, mūsa wacūa mehne Cohamacure cahīga. Ā yoa mu basi mu cahīno seheta mu cahai jiina cūhure cahīga” —niha tiro Jesure.

²⁸To ā nichū Jesu ō sehe ni yahuha:

—Quihōno nire muhu. Tīre yoaga. Ā yoa cu jipihtia dachoripe Cohamacu mehne jiihca muhu —niha tirore.

²⁹“Ahriro Cohamacu dutiare yoa pahñoriro jira”, masa tirore ti ni tuhotuchū cahmaha judio masare buheriro. Ā cahmano tiro Jesure ō sehe ni sinituha:

—¿Yabariro baro jicari yuhure mu cahī dutiriro? —niha tiro.

³⁰To ā nichū Jesu ō sehe ni piti dahre quti mehne yūhtiha:

—Cū dacho Jerusalēpu tariro Jericópū wahariro mahai to tinichū yacaina tirore nāhaha. Ā nāhaa, to suhtirore tjuwe na, tirore tuaro cjāha. Ā tuaro cjāa, mahano to yariaro cahachū waro duhuha tina tirore. ³¹Tí pjata sacerdote tí mahapū taha. Ā taro ti cjāriro cjiore nūparota maha pa buhusehe dūhtū cahai do yuhdu wahcā, yuhduā wahaha. ³²Ā yoa Cohamacu wuhū dahrariro cūhu pjacūoriro cahai sū, tirore nū, maha pa buhusehe coai do yuhdu wahcāa wahaha. ³³Ā yoa Samaria macariro sehe tōi waha, yoa cureropū pjacūorirore nū, tirore pja nūha. ³⁴Ā pja nūno, tiro pjacūoriro cahai sū, se, vino mehne morea core to camine pio sihōha. Pio sihō tuhsū suhtiro cahsaro mehne dūhteha to camine. Tuhsū, pjacūorirore to burro bui duhu payo, carīni wuhūpū na sūha tirore. Tōi jiro, Samaria macariro noano nū wihboha tirore. ³⁵Pa dachoi tiro carīni wuhū pūrore pua tu niñeru turire wa, ō sehe niha: “Ahrirore nū wihboga. Ahri mu sūrachū pari turi tjua tacu wapa pahñoihtja”, niha Samaria macariro wuhū pūrore —niha Jesu.

³⁶Ā ni tuhsū judio masare buherirore ō sehe ni sinituha Jesu:

—¿Ahrina tiaro mūa diro sehe jijari pjacūorirore cahīro? —niha Jesu.

³⁷To ā nichū tūhoro buheriro sehe Jesure ō sehe ni yūhtiha:

—Pjácøorirore yoadohoriro jica tirore cahĩro —niha tiro Jesure.

—Wahaga. Mũhũ cũhũ masare tó seheta yoai wahaga —niha Jesu buherirore.

Marta, María cũhũ cahai Jesu tiniha

³⁸ ã yoa Jesu to buheina mehne ti wahachũ, pa macapũ ti tinichũ, Marta wama tiricoro tinare to wũhũi sãa ta dutiha. ³⁹ To bahoro María to dahpori cahai duji, to buheare tũhoha. ⁴⁰ To ã yoachũ ñũno Marta to dahraa pjĩro jichũ suaha. ã jiro ticoro Jesure õ sehe ni sinituha:

—Puhtoro, ¿yũhũ cũcoro yũ dahrachũ yũhũre yũ baho to yoadohoerachũ mũhũre noajari, mũ ñũchũ? Ticorore yũhũre yoadoho dutiga —niha Marta Jesure.

⁴¹ To ã nichũ Jesu õ sehe ni yũhtiha:

—Marta, dahraa pjĩro cjuaco pjĩro tũhotura mũhũ. ⁴² Cohamacũ to yare tũho dutira. María noaare yoaro taro tíre cahmahre. ã jicũ yũhũre to tũhochũ “Dahradohoco wahaga”, nieraja ticorore —niha Jesu Martare.

Jesu Cohamacũre siniare buheha

(Mt 6.9-15; 7.7-11)

11 Cũ dacho Jesu Cohamacũre sinino niha. To sini tuhsũchũ, cũiro to buheina mehne macariro tirore õ sehe niha:

—Puhtoro, João to buheinare to buheriro seheta Cohamacũre siniare sã cũhũre buhega mũhũ —niha tiro Jesure.

² To ã nichũ tũhoro Jesu tinare õ sehe ni yahuha:

—Õ sehe ni Cohamacũre siniga:

“Sã Pũcũ, mũhũ ñaa marieriro ã jirucura. Mipũre jipihtina bui puhtoro jiga.

³ ã yoa dachoripe sã chũhtire warucuga sãre.

⁴ Paina sãre ti ñano yoarire sã boja.

ã jicũ mũhũ cũhũ sã ñaa yoarire boga.

Tuhsũ, sã ñaare yoa duana sã goa pjachũ ñũcũ tíre sãre yoa duaerachũ yoaga”,

ni siniga Cohamacũre —niha Jesu tinare.

⁵ Baharo Jesu quiti mehne to buheinare õ sehe ni buheha:

—Cũiro ñami dacho macai to coyeiro ya wũhũpũ waha, tirore õ sehe ni siniha: “Coyeiro tia curi pão curi waga yũhũre.

⁶ Pairo yũ coyeiro tinino tariro michapucacãta ya wũhũi wihihre. ã yoa tirore yũ chũa waboa mariahna”, niha tiro to coyeirore.

⁷ To ã nichũ to coyeiro wũhũ puhichapũ jiro yũhtiha: “Yũhũre cariboi tjiga. Sopa pahma bihariro jira. Yũhũ yũ pohna mehne carĩna nija. Wahcãno pjaeraca yũhũre. Mũhũre chũare waboricũ jieraja”, niha to coyeiro.

⁸ ¿Dohse waharohcari sinirirore? Potocã niita nija mũsare. To coyeiro jiparota, chũa waboriro wahcã duaeraha. Wahcã duaeraparota chũa siniriro sehe bũo tiro marieno to yoari pja sinirucuchũ tũhoro jipihtia to siniriro seheta warohca.

⁹ ã jicũ ahrire mũsare ni yahui nija: Cohamacũre siniga. ã sinina mũsa sinirire ñahanahca. Mũsa sinirire bocanahca. Tirore ã sinirucuga. Mũsa ã yoachũ tiro mũsare warohca.

¹⁰ Jipihtina Cohamacũre siniina ti sinirire naahca. ã yoa ti sinirire bocaahca. ã jiro jipihtina Cohamacũre ã sinirucuinare tiro tinare warohca.

¹¹ ¿Mũsa pohna mũsare wahire ti sinichũ agã sehene wabocari mũsa tinare?

¹² ¿Mũsa pohna caraca diecare ti sinichũ pichõno soro sehene wabocari mũsa tinare? Ne wasi.

¹³ Mũsa ñaina jipanahta mũsa pohnare noaare wa masina mũsa. ã yoa Cohamacũ sehe mũsa wari yũhdoro noaare wara mũsare. Tiro mari Pũcũ mũano macariro to Espĩritu Santore warohca tirore siniinare —niha Jesu to buheinare.

**“Jesu watīno tuaare
cjuara”, ni yahusāha masa**

(Mt 12.22-30; Mr 3.19-27)

¹⁴Tí pjare Jesu watīnore cohā wioro niha. Watīno sehe durucu masierariro jichu yoaha masunore. Ā jiro watīno masunore to duhuri baharo masuno sehe durucu dūcaha. To durucuchū tūhoa masa payū cūaa wahaha. ¹⁵Ti ā cūapachuta paina sehe ō sehe niha:

—Ahriro Jesu watīare to cohā wiochū Beelzebú wama tiriro watīa puhtoro sehe tirore yoadohora —niha paina.

¹⁶Paina “¿Jesu Cohamacū to warocariro jijari?” ni masi duaa tirore Cohamacu tuaa mehne yoa ño dutimaha. ¹⁷Ti ā dutichū tūhoro “Watīno tuaa mehne watīare cohā wiora”, ni ti tūhotuare masino, tinare ō sehe ni yahuha Jesu:

—Watīno ya tuaa mehne watīare cohā wioi nieraja. Cū maca macaina ti basi cahma wajāa, tí maca macaina yaria pih-tia wahara. Ā jia cū wūhū macaina ti basi cahmachea, tí wūhū macaina waha pih-tia wahara. ¹⁸Ā yoa watīno yaina watīa ti basi cahmachea, tina watīa cūhū waha pih-tia wahaboa. Cū curua ji masieraboa. Mūsa yūhure ō sehe nina. “Tiro watīno tuaa mehne watīare cohā wiora”, mūsa yūhure nina nica. ¹⁹¿Yūhure mūsa niri potocā jichū mūsa mehne macaina watīare cohā wioa, watīno tuaa mehneta cohā wiojari tina cūhū, mūsa ñūchū? Mūsa mehne macaina watīare cohā wioa, watīno tuaa mehne cohā wioa nierara. Ahrire masina watīno to tuaa mehne watīare yū cohā wioerachū masinahca mūsa. ²⁰Ā jicu yūhū sehe watīare cohā wiojū Cohamacū tuaa mehne cohā wioja. Ahrire masina, Cohamacū mūsa puhtoro to noano sūho ji dūcaare masinahca mūsa.

²¹Tuariro to wamoa mehne to wūhure to ñū wihbochū to yare paina

na masierara. ²²To ā ñū wihbopachuta pairo tua yūhdūriro tiro mehne cahmache, tirore yūhdūruca, to wamoare manoca, to yare manocahna. (Ō seheta yoa yūhdūrucaro cahmana watīare.) ²³Cūiro yūhure cahmaeraro, yūhure ñū tuhtiriro jira. Cūiro yūhure yoadohoeraro yūhure ñano yoaro nina —ni buheha Jesu.

**Watīno pari turi masunore to
sāari quitiye yahuha Jesu**

(Mt 12.43-45)

²⁴Ā yoa to tūhotua mehne ō sehe ni piti dahre buheha tinare:

—Watīno masunore duhuro tiro co marieni yahpai tinino, to sohto cjihtore macamaha. Bocaeraro, ō sehe ni tūhotu-tuha: “Masuno yū duhuriro mehne pari turi jii wahaihtja”, ni tūhotuha tiro. ²⁵Ā nino tiro tjuwa waha, masunore bocaha. Ā to bocachū masuno sehe noariro jimaha. ²⁶Tuhsū, watīno paina siete watīare tiro bui ñaa yūhdūinare nano wahaha. Na wihi, tina jipihtina watīa masuno mehne jiha. Ā jiro masuno sehe tó pano cūiro watīnore cjuaro, ñariro jimaha. Mipū sehere payū watīa ti cohtotariro jiro, tó pano to jiriro yūhdoro ña yūhduariro jiha —niha Jesu.

Jesu wahcheare yahuha

²⁷Tíre to ā nichū masa watoi jiricoro numino Jesure ō sehe ni yahuha:

—Mūhure pohna tiricoro, mūhure pūricoro wahchericoro jira —niha Jesure.

²⁸To ā ni tuhsūchū tūhoro Jesu ticorore ō sehe ni yūhtiha:

—Cohamacū durucuaru tūhoina to du-tiare yoaina tina tjuca wahcheina —niha Jesu ticorore.

**Masa ñaina Jesure Cohamacu
tuaa mehne yoa ño dutiha**

(Mt 12.38-42; Mr 8.12)

²⁹ Ñ yoa payu masa Jesu cahai ti wi-hichu, tiro tinare õ sehe ni yahu namoha:

—Mipũ macaina nu ñaina jira. Cohamacu tuaa mehne yũ yoa ñochũ ñũ duamana. Ti ã ñũ duapachuta Jona panopũ macariro Cohamacu tuaa mehne to yuari dihtare ñonohca Cohamacu tinare. ³⁰ Jona Cohamacu yare yahu muhtariro jiro, tiro Nínive macainare Cohamacu yare to masichu yoariro seheta yũhu masuno Cohamacu warocariro masichu yoaja mipũ macainare.

³¹ Buhiri dahrehti dacho jichũ pũhtorocoro sur macaricoro panopũ macaricoro ducu, mipũ macainare “Ñaina jira”, ni yahusãnohca ticoro. Ticoro Salomo panopũ macariro to masiare tuho duaro yoaropũ ahri yahpa pa sehẽpũ jiricoro Salomoro tuho taha. Ñ yoaro noano yoaro niha mipũ macaina yũhdoro. Ñ jiro ticoro yahusãnohca mipũ macainare. Ñ nicũ musare potocã niita nija. Mipũ musare yũ buhea Salomo to buheri yũhdoro jira. ³² Buhiri dahrehti dacho jichũ Nínive macaina cũhu ducu, mipũ macainare “Ñaina jira”, ni yahusãhca tina. Jona tinare Cohamacu yare to yahuchũ tuhoa, ti ñaare tuhotumarire tuhotu cohtota Cohamacure cahmaha tina sehe. Ñ cahmaa noano yoaa niha mipũ macaina yũhdoro. Ñ jia tina cũhu mipũ macainare “Ñaina jira”, ni yahusãhca. Musare potocã niita nija. Mipũ musare yũ buhea Jona to buheri yũhdoro jira —ni yahuha Jesu.

Masa ti tuhoturo seheta yoara

(Mt 5.15; 6.22-23)

³³ Ñ ni yahu tuhsũ, piti dahre buhero õ sehe ni yahu namoha tinare:

—Masa sihãriare sihãa nuoerara. Tiare sihãa dihi biato docapũ duhu dapoer-

ara. Tiare muanoi duhu payora wũhũpũ sãa taina ti noano ñũ sãahto sehe. ³⁴ Si-hãria to noano buhriachũ mari noano ñũ masino seheta noare tuhotua mehne noare yoa masinahca musa. Musa tuhoturo seheta yoara musa. Noare tuhotuna noare yoara musa. Noare tuhotuerana ñaare yoara musa. ³⁵ Ñ jina noano yoaga. Musa tuhotuapũ ñaa jiero tjijaro. Ñaare goa pjaena tjiga. ³⁶ Tuhsũ musa tuhotuapũ noaa jichũ, ñaa ne mariachũ noaa dihtare tuhotunahca — ni buheha Jesu.

**Fariseo curua macaina, judio masare
buheina cũhũre Jesu tuhtiha**

(Mt 23.1-36; Mr 12.38-40; Lc 20.45-47)

³⁷ Jesu to buhe tuhsũchũ ñũ fariseo curua macariro tirore to ya wũhũpũ chũ dutiro pjilha. Ñ jiro Jesu tiro ya wũhũpũ sãa sũ, ti chũroi tina mehne nuju sũha. ³⁸ To ã nuju sũchũ fariseo curua macariro sehe Jesure ñũ nunũno judio masa ti wamo cosarucuro seheta to wamo cosaerachũ ñũno õ sehe ni tuhotuha: “Cuenah. ¿Ahriro dohsearo wamo cosaerajari mari yoaro sehe?” ni tuhotuha. ³⁹ To ã ni tuhotuchũ masino Jesu tirore õ sehe ni yahuha:

—Musa fariseo curua macaina sihnia wahwarire, wapari cũhũre bui sehe dihtare musa cosaro seheta noare yoa ñona musa buicã warohna. Ñ yoapanahta Cohamacu yare quihõno yoaerara. Paina yare maina jina, ñaa dihtare tuhotura musa. ⁴⁰ Tuho masieraina jira musa. Cohamacu musa pjacũrire yoariro musa tuhotuhti cũhũre yoaha. ¿Tĩre masierajari musa? ⁴¹ Ñ jina musa yare pjacũoinare waga musa. Musa ã yoana noare tuhotuina jinahca.

⁴² Musa fariseo curua macaina ñano yũhdũnahca. Moa yoaro sehe jiare chũare coachũ yoare cjuana mahanocã wamana musa. Cohamacure ño payona tana sacerdotearẽ wamana musa.

Ã wapanahtha noaare yoaerara mûsa. Ã jina masare pja ñuerara mûsa. Ã yoa Cohamacure ño payoerara mûsa. Toaa dichacãre mûsa narire mahanocã Cohamacure mûsa wachû noa nina. Ã wana õ sehe yoa namoga: Noaare yoaga. Ã yoa pja ñuga mûsa masare. Tuhsû, Cohamacure ño payoga mûsa.

⁴³ Mûsa fariseo curua macaina ñano yuhdunahca. Buheri wuhurpû jina, noaa dujia dihtare duji duara mûsa. Pache duaropû masa musare puhtoare noano ño payo ti sinino sehe ti piti bocasinichû cahmana mûsa.

⁴⁴ Ñano yuhdunahca mûsa. Masa copa nûori copa yoaro seheta jira mûsa. Tí copa cahai masa jia, puhicha macariro baarirore ñuerara tina. Tó seheta masa mûsa cahai jia, mûsa tuhotuapû ñaa jiare masierara tina —niha Jesu tinare.

⁴⁵ To ã nichû tuhoro judio masare buheina mehne macariro Jesure õ sehe ni yahuha:

—Buheriro, tíre nicû sã cûhure ñano nii nica mûhû —niha tiro Jesure.

⁴⁶ To ã nichû Jesu õ sehe ni yuhtiha:

—Potocã tjira. Judio masare buheina mûsa cûhû ñano yuhdunahca. Mûsa painare ti bihoeraare yoa dutira tinare. Ã dutipanahta mûsa sehe tinare ne mahanocã yoadoherara tí dutiare ti yoahto sehe.

⁴⁷ ã jina mûsa ñano yuhdunahca. Cohamacu yare yahu muhtaina panopû macaina ti masa coparire noano cahnomana mûsa tinare ño payoro sehe yoana. Mûsa ã yoapachûta panopû macaina mûsa coyea sehe tinare wajãha. ⁴⁸ Tina sehe Cohamacu yare yahu muhtaina cjirire ti wajãriro seheta mûsa cûhû yoaboa. Ã jina mipure ti masa coparire cahnomana mûsa. Ã cahnona mûsa coyea tinare ti wajãri cjirire wacû bajuro wana nica mûsa. Ã ti wajãrire wacûna “Noa nina”, nina nica mûsa.

⁴⁹ Cohamacu to masia mehne õ sehe ni yahuha: “Yû yare yahu muhtaina cûhure yû buhe duti cûrina cûhure warocaihtja tinare. Ã jia tina yû warocainare painare wajã, painare ñano yoaahca”, niha Cohamacu. ^{50–51} Ahri yahpare Cohamacu to bajuamehneri baharo Caï sehe Abere wajãha. Tuhsû, Cohamacu yare yahu muhtaina cjirire Abe baharo jiina cûhure ñaina wajãha. Baharo Zacariare Cohamacu wuhûi Cohamacure ño payori mesa cahai mûsa coyeata wajãha. Jipihtina tinare ti wajãri buhiri mipû macainare Cohamacu buhiri dahrerohca. Ã tjira. Musareta nii nija. Jipihtina tinare ti wajãri buhirire mipû macainare Cohamacu buhiri dahrerohca.

⁵² Mûsa judio masare buheina, ñano yuhdunahca. Cohamacu masiare ti joaa pûrine cjuapanahta painare yahuerara mûsa. Mûsa basi Cohamacu yare tuhorerara. Tuhsû, paina to yare ti tuhõ duapachûta tíre mûsa tinare tuhõ dutierara —niha Jesu tinare.

^{53–54} To ã nichû tuho judio masare buheina fariseo curua macaina cûhû tiro mehne sua tirore ñano ni durucuha. Ã jia Jesu to ñano ni yuhtichû tuhõ duaa, tina payû mahño cû sinitu ñumaha tirore, tirore yahusã duaa.

Fariseo curua macaina ti ã mahñorucurire Jesu yahuha

12 ã yoa Jesu cahai masa payû cahmachua, bihsa yuhduaha. Tó Jesu to buheinare õ sehe ni yahu ducaha:

—Noano wacû masiga mûsa. Fariseo curua macaina ti pão bucuarore ñuna noano wacû masiga. Ti mahñorucurire nii nija “Pão bucuaro”, nicû. ² Jipihtia ñaare paina ti masierari cjirire baharo masiahca. ³ ã yoa ñamipure ti pjiroca durucuri cjirire buhriaroi to bajuro waro seheta masiahca jipihtina. Bihari tahti-

apɔ pairore yaroca ti nimari cjiřire masa payɔ masiahca —ni yahuha Jesu.

Masa ti cuihtirore yahuha Jesu

(Mt 10.28-31)

⁴ Ā ni tuhsɔ Jesu ɔ sehe ni yahu namoha tinare:

—Potocā niita nija musare. Masa wajāina wajā tuhsɔ pari turi ti wajāřina cjiřire ñano yoa namo masierara. Ā jina musare wajā duainare cuiena tjiřa. ⁵ Mipɔre masa cuihtirore masa ño payohtirore yahuihtja. Cohamacɔ sehere cui, ño payoga. Tiro masa yariari baharo pichacapɔ cohā masina musare. Ā tjira. Potocā nii nija. Cohamacɔ sehere cui, ño payoga.

⁶ Cinco siripia wapa mariahna. Ti ā wapa mariapachuta cūirocāre Cohamacɔ ne boerara. ⁷ Ā yoa masa pjoarire ne cū pjoa da duhsaro marieno masi pahñona Cohamacɔ. Tó seheta masa jia tia cūhɔre masi pahñona Cohamacɔ. Ā masino musare ñɔ wihborucura. Siripiare to cahñno yuhdoro masa sehere cahña Cohamacɔ. Ā jina tirore ño payona cuiena tjiřa masa —niha Jesu.

Jesu yaina masa jiare yahuga masare

(Mt 10.32-33; 12.32; 10.19-20)

⁸ Ā yoa Jesu ɔ sehe ni yahu namoha:

—Musare niita nija. Cūiro “Jesu yairo jija”, masare to nichɔ ñɔcɔ, yuhɔ masuno Cohamacɔ warocariro “Tiro yɔ yairo jira”, ni yahuihtja Cohamacɔ yaina anjoare. ⁹ Cūiro “Jesu yairo jija”, masare nierariro sehere yuhɔ “Tiro yɔ yairo jierara”, ni yahuihtja Cohamacɔ yaina anjoare.

¹⁰ Cūiro yuhɔre ñano to ni durucuchɔ tí ñaa buhirire Cohamacɔ bo masina. Ā boparota cūiro Espiritu Santo sehere to ñano ni durucuchɔ tí ñaa buhirire ne Cohamacɔ bosɔ.

¹¹ Mari judio masa buheri wuhɔpɔ puhtoahai paina musare na sãa yahusāahca. Ti ā yahusāchɔ masa ni ducatahti cjihtire “Cue, masieraboca”, ni tuhoutuena tjiřa. ¹² Tí pjaihta Espiritu Santo masa yahuhti cjihtire yahurohca —niha Jesu.

Pache pɔro quitire yahuha Jesu

¹³ Ā yoa masa mehne macariro Jesure ɔ sehe ni yahuha:

—Buheriro, sã pɔcɔ to yariari baharo to ya cjiři sãre tjuara. Ā jicɔ yɔ wahmine tĩre yuhɔ cūhɔre quihõno tju wa dutiga —niha tiro Jesure.

¹⁴ To ā nichɔ Jesu ɔ sehe ni yuhthi:

—Ne tí barore tju waboricɔ jieraja yuhɔ —niha Jesu tirore.

¹⁵ Ā ni tuhsɔ Jesu jipihtinare ɔ sehe ni yahuha:

—Noano yoaga masa. Pachere, paye baro cūhɔre cahñena tjiřa. Payɔ cjuapanaha tí mehmeta wahche tuhsɔeraja mari —niha Jesu.

¹⁶ Ā ni tuhsɔ Jesu quitĩ mehne ɔ sehe ni yahuha tinare:

—Pache pɔro noari yahpare cjuaha. Ā jia tí yahpɔpɔ to toaa noano dicha tiha. ¹⁷ Ā jiro tiro to basi ɔ sehe ni tuhutumaha: “Dicha wihboa wuhɔse ne mɔ sɔerara. ¹⁸ Mipɔre ɔ sehe yoaihtja: Mipɔ yɔ wihboa wuhɔsere cohānoca, mɔna wuhɔse cjiři yuhdoro wahma wuhɔse yoaihtja. Tí wuhɔsei yɔ toaa dichare, jipihtiare yɔ yare wihboihtja. ¹⁹ Yɔ ā yoari baharo, ɔ sehe ni tuhoutuhtja yɔ basi: ‘Yuhɔ jiape cjuariro jija. Noano soihtja. Ā jicɔ chɔ, sihni, wahcheihtja’, ni tuhoutuhtja yɔ basi”, ni tuhutumaha tiro. ²⁰ To ā ni tuhoutuɔchɔ Cohamacɔ tirore ɔ sehe ni yahuha: “Muhɔ ne tuhõ masierariro jira. Micha ñamihtia muhɔ yariaihca. Mɔ ā wahachɔ mɔ ya mɔ cahñi butia wahaahca”, niha Cohamacɔ tirore —niha Jesu masare.

²¹ Tíre nino, masare õ sehe ni yahuha Jesu:

—Áta wahaahca pache pua Cohamacure wacüeraina. Payu pachere, niñerure to ya cjihti dihtare wihboriro, Cohamacure wacüeraro tiro pjacüoriro jirohca, Cohamacu to ñuchü. Á jiro Cohamacu tirore ñu jicoaerara —niha Jesu.

Cohamacu to pohñare ñu wihbora

(Mt 6.25-34)

²² Á yoa Jesu to buheinare õ sehe ni yahuha:

—Ahrire müsare nii nija: Musa chuhti cjihtire, musa suhti säahtire pjíro cahya tuhoutuena tjiga. ²³ Cohamacu müsare bajuamehñeno, chuhtina cjihti dihtare yoaeraha müsare. Tuhsü, suhti säahtina cjihti dihtare yoaeraha tiro müsare. ²⁴ Minichahca perire Cohamacu to ñu wihboare masiga. Tina weseri maeraina jira. Á jia chüare ti wihboa wuhuse tinare mariahna. Ti á jiina jichü ñño tinare Cohamacu ti chuhtire wara. Minichahca yuhdoro musa sehere cahina Cohamacu. ²⁵ Pjíro musa tuhoutua mehne cü hora waro müsare cati namochü yoa masierara musa. Á jiro musa pjíro tuhoutua yaba cjihti jierara. ²⁶ ¿Á yoa pjíro musa tuhoutua ti yaba cjihti jierapachuta dohse yoana musa chuhtire, musa sihnihtire, musa säahtire pjíro cahya tuhoutujari?

²⁷ Macaroca macaa cohore tuhotuga. Tí cohoiri ti basi suhtire yoaerara. Á yoaerapahta noaa suhti tiina yoaro sehe noaa bajura tí cohoiri. Salomo cjiro noaa suhtire säariro to jipachuta tí cohoiri sehe tiro yuhdoro noabíaa cohoiri waro jira. ²⁸ Cohore noaa cohoiri yoara Cohamacu sehe. To á yoapachuta cohoiri sehe mahaa dachoricá jirucuma ñai boraahara. Mahanocá ji, pa dachoi pichacapü júa wahara. Ti á jipachuta cohore noaa cohoiri jichü yoara Co-

hamacu. Á jiro Cohamacu cohore to noaa cohoiri to yoariro yuhdoro musa chüare noano yoarohca. Suhtire warohca. Mahanocá Cohamacure wacü tuara musa. ²⁹ Á jina musa chuhtire, musa sihnihtire pjíro cahya tuhoutuena tjiga. ³⁰ Cohamacure cahmaeraina sehe ahri yahpa macaina sehe tíre á macarucua nina. Mari Pücu müano macaroi jipihitia musa cahmaer masina. To á masichü pjíro cahya tuhoutuena tjiga. ³¹ Cohamacu musa puhtoro to jihto cjihtore cahma muhtaga. Jipihitia paye baro yuhdoro tirore cahmaga musa. Musa á yoari baharo Cohamacu sehe musa cahmaa duhsachü warohca —ni yahu namoha Jesu.

Muanopu mari payu cjuu masija

(Mt 6.19-21)

³² Á ni tuhsü, tinare õ sehe ni yahu namoha:

—Yü cahina, mahainacá jipanahta, cuiena tjiga musa. Cohamacu musa puhtoro to noano suho jiropure tiro mehne musa jichü cahmana tiro. ³³ Á jina musa yare dua pahñoga. Tíre duanoca tí niñerure na, pjacuoinare waga. Tó sehe musa yoachü müano macaa musa wapataa ne pihtisi. Muanopu musa ya jia ne pihtierara. Tópure musa yare na masierara yacariro. Á yoa machü chüü tíre tua masierara. ³⁴ Muanopu musa ya jichü müano macaa dihtare tuhoutuhca musa —niha Jesu.

Jesu to tjua tahtore cohta dutiha to yainare

³⁵⁻³⁶ Á ni tuhsü tinare õ sehe ni yahu namoha:

—Musa yare cahnoyu tuhsuina yoaro sehe yu yare á yoarucuína jina cohtaga yuhure. Dahra cohtaina ti puhtoro wamomaca duhteri bose numupü to wahachü to tjua tahtore tina cohtara. Tina ti á cohtariro seheta yu

tjua tahtore cohtaga m̄sa cūh̄. Pūhtoro to wūh̄p̄ wihi, sopacare to dotachū tūhoa tina dōihta pjō sōhna tireore. ³⁷Dahra cohtaina ti pūhtoro to wi-hichū to cahmano seheta yoarucuina jia, wahcheina jiahca. Ti ā yoachū ñno pūhtoro sehe dahra cohtariro yoaro sehe cohtorohca. Ā yoaro dahra cohtainare duji dutiro, tiro ti ch̄are duhu payorohca. ³⁸Tiro to wihihti pja ñami dacho macap̄, o bohrearop̄ to jipachuta dahra cohtaina sehe to wihihti pjare tireore noano cohtaina jia, wahcheina jiahca tina. ³⁹Ahr̄ire wacūga m̄sa. Yacariro wūh̄p̄ to wihihto pano tí wūh̄ p̄ro masierara. Wūh̄ p̄ro yacariro to wihihtore masino, tiro yacarirore s̄a dutieraboa. Ā jiro wacūenoca tara yacariro. ⁴⁰Ā jina m̄sa cūh̄ cohtaga. Yūh̄ mas̄no Cohamacū warocariro wacūenoca taihca. Ā jina yū yare ā yoarucuina jina cohtaga m̄sa — niha Jesu tinare.

**Dahra cohtariro to
pūhtoro ño payorirore, ño
payoariro cūh̄re yahuha**

(Mt 24.45-51)

⁴¹To ā nichū Pedro sehe ō sehe ni sinituha Jesure:

—¿Ahr̄i quitire yahucū s̄are nii nijari? ¿O jipihtinare ā nii nijari? —niha Pedro.

⁴²To ā nichū Jesu to tūhotua mehne ō sehe ni piti dahre buheha tinare:

—Dahra cohtariro to pūhtoro ño payoriro tuho masiriro ō seheta jira. Pūhtoro tinino waharo, dahra cohtarirore to wūh̄re cūna. To cūriro sehe dutiriro jirohca. Ā jiro tiro ch̄ari pja jichū paina dahra cohtainare ch̄are witira. ⁴³Baharo pūhtoro to wihichū dahra cohtariro sehe to pūhtoro to dutiriro seheta yoa pahñoriro jiro, tiro wahcheriro jirohca. ⁴⁴Potocā niita nija m̄sare. To ā yoachū to pūhtoro jipihtia to yare ñū wihboriro cūnohca tireore.

⁴⁵To ā cūpachuta dahra cohtariro “Yū pūhtoro yoari pja bajuerara”, niboca. Ā nino paina dahra cohtainare muare, numia cūh̄re c̄jape, payū chū, sihni, cahaboca. ⁴⁶To ā yoari baharo wacūenoca to pūhtoro wihirohca. Ā wihiro tireore ñano buhiri dahrerohca. Ā jiro Cohamacūre yuh̄d̄urucainare to coh̄arirop̄ tireore coh̄nohca.

⁴⁷Ā yoa dahra cohtariro to pūhtoro cahmaare masiriro jiparota t̄re to yoaerachū, tiro to noano dahraerachū to pūhtoro sehe tireore yuta da mehne tuaro tjananohca. ⁴⁸Pairō sehe dahra cohtariro to pūhtoro cahmaare masierariro jiro to noano yoaerachū ñno to pūhtoro sehe pjiroca dero tireore tjananohca. Cohamacū to cahmaare masichū yoara masare. Ā jiro masirirore yūhtiro cahmana. Tuhsū, noano masirirore noano yūhtiro cahmana —niha Jesu.

Jesu masare cahma tju wachū yoara

(Mt 10.34-36)

⁴⁹Ā ni tuhsū Jesu tinare ō sehe ni yahuha tjao:

—Pichaca to jūwero seheta yūh̄ ahr̄i yahpapure Cohamacū tireore cahmaerainare to buhiri dahrehtore tinare masichū yoai tai nii. Mip̄ pinihta t̄re ti masichū tuaro cahmaja yūh̄. ⁵⁰Yūh̄ ñano yūh̄d̄ūihca. Yū ā ñano yūh̄d̄ūhtire cohtacū, ñano yajeripohna tija yūh̄. ⁵¹¿Dohse ni tūhotujari m̄sa yūh̄re? “Tiro masare to buheri baharo paina tinare ñū tuhtisi”, ¿ni tūhotujari m̄sa yūh̄re? Ā jierara. Masare yū buheri baharo c̄aina yū yare tūhoahca. Paina sehe tinare ñū tuhtiahca. C̄ano potori waro jisi masa. M̄sare nii nija. Masa yū buheare tūhoa, p̄a curua cahma tju waahca. ⁵²Mip̄re cū wūh̄ macaina cinco masa yū buheare tūhoa, p̄a curua ti basi cahma tju waahca. Cū curua tiaro, pa curua p̄aro jiahca. ⁵³To p̄c̄uro to mac̄nore ñū tuhtirohca yū yairo to jiri

buhiri. Tuhsu, paio macano cūhu to pucurore ñu tuhtirohca to pucuro yu yairo to jiri buhiri. Ā yoa to pocoro to maconore ñu tuhtirohca yu yacoro to jiri buhiri. Tuhsu, pacoro macono cūhu to pocoro ñu tuhtirohca to pocoro yu yacoro to jiri buhiri. Ā yoa to marechono to macu namonore ñu tuhtirohca yu yacoro to jiri buhiri. Tuhsu, pacoro macu namono cūhu to marechonore ñu tuhtirohca yu yacoro to jiri buhiri. Āta waharohca, yu buheare ti tuhochu —niha Jesu.

Noari dacho cjihtore, ñari dacho cjihtore masa ti masiare yahuha Jesu

(Mt 16.1-4; Mr 8.11-13)

⁵⁴ Ā yoa Jesu masare õ sehe ni yahuha tjoa:

—Ahrie sehepu coru siterire ñuna, dóhta “Coro tarohca”, nina musa. Musa ã niri baharo coru tara. ⁵⁵ Ā yoa surpu wi-hnono tachu “Siri dacho jirohca”, nina musa ahri yahpai jiina. Musa ã niri baharo dacho sira. ⁵⁶ Musa mahñoperu-cuina jira. Musa ahri yahpare muano cūhure ñuna, noari dacho cjihtore, ñari dacho cjihto cūhure masina musa. Ķ Ā jina mipu macaa dachorire masipanahta dohseana ahri yahpa macaina mipure musa dohse wahahtore masierajari musa? —niha Jesu.

Musare ñu tuhtiro mehne musa cahmacherire cahma pjāga

(Mt 5.25-26)

⁵⁷ Ā ni tuhsu õ sehe ni yahu namoha:

—Ķ Mūhu quihōno mu yoahtire masierajari mūhu mipu? ⁵⁸ Pairo mūhure yahusāno waharo buhiri dahre dutiri wūhupu waha dutiboca. Tópū wahana “Pari turi mūhure ā yoasi”, nicu cahma pjāga. Mu ã cahma pjāerachu tiro buhiri dahre dutiro cahapu naaboca mūhure. Tuhsu, buhiri dahre dutiro sehe mūhure surarare to wachu, mūhure surara peresu yoahca.

⁵⁹ Mūhure nii nija. Tópū jisiniihca mūhu. Pu ti wapa dutirire mu wapa pahñoi-pu wijaiihca mūhu —niha Jesu.

“Noaina jija”, ni musa tuhutumarine tuhutu cohtota, Cohamacure cahmaga

13 Tí pjare mahainacā masa Jesure õ sehe ni yahua tiha:

—Galilea macaina wahiquirore wajā jū muo Cohamacure ti ño payoro watoi Pilato sehe tinare wajāha. To ã wajāchu wahiquiro di mehne masa di moreha — ni yahuha tina Jesure.

² Ti ã ni yahu tuhsuchu Jesu õ sehe ni yahuha:

—Ķ Galilea macaina Pilato to wajā-rina cjiire dohse ni tuhutujari musa? Ķ Ti ã yariachu paina Galilea macaina yūhdoro ñaina ti jiri buhiri ã yoa dutiri Cohamacu tinare, musa tuhutuchū? ³ Jierara. Musare niita nija. Musa sehe “Noaina jija” ni, musa tuhutumari cjiire tuhutu cohtotaerana, Cohamacure cahmaerana, musa cūhu yariana pichacapu wahanahca. ⁴ Ā yoa sohō jirina diez y ocho masa Siloé wama tiri wūhu muari wūhu ti bui bora pja wajā pahñoha. Ķ Ā waha yariaa, paina Jerusalē macaina yūhdoro ñaina jiri tina, musa tuhutuchū? ⁵ Jierara. Musare niita nija. Musa ñaa tuhutumari cjiire tuhutu cohtotaerana, Cohamacure macaerana, musa cūhu yarianahca. Ā jina pichacapu wahanahca —niha Jesu tinare.

Higueracu dicha mariedu quitire yahuha Jesu

⁶ Ā ni tuhsu quitu mehne piti dahre yahuha tinare:

—Wese puo to wesepu higueracure cjuaha. Ā jiro tiro tu dichare macano wahamaha. Bocaeraha. ⁷ Bocaeraro tiro wese dahrarirore yahuha. “Tuhoga yūhure. Tia cūhma waro higueracu dichare macamaja. Dicha mariaha. Tu

dicha mariachũ tũre cjã cohãnocahga. Tũ yũ wesei jichũ padũre yũhũ toa masieraja. Yũ wesei jiri yahpa macaare wiho waro nana tũ”, niha wese puro tireore dahra cohtarirore. ⁸To ã nichũ tũhoro dahra cohtariro ò sehe niha: “Pũhoro, ahdu cũ cũhma waro ducusinijaro. Tũ dahpotoi yũhũ sahaitja. Tuhsũ, wahiquire tũ mehne tí copare yaihtja. ⁹Yũ ã yoari baharo tũ pa cũhmai dicha tiboca. Tũ dicha tierachũ mũhũ cjã cohã dutiuhca”, niha dahra cohtariro wese purore —ni yahuha Jesu.

Sabado dachoi Jesu dohatiricorore noaricoro wahachũ yoaha

¹⁰Tí pjare Sabado dachoi Jesu judio masa buheri wũhũ buhero niha. ¹¹Tói watĩno to cohtotaricoro jiha. Watĩno sehe diez y ocho cũhmari waro dohatichũ yoaha ticorore. ã jiro pari muti ducuricoro jiro, pototo ducu masieraha. ¹²To ã jichũ ñũno Jesu ticorore ñũ, ò sehe ni pisuha:

—Numino, mũ dohatia pihtia wahahre —ni pisuha Jesu.

¹³To ã pisuri baharo ticorore to ña payochũ dóihtta ticoro noano pototo ducuricoro wahaha. ã waharo “Cohamacũ tuariro, noariro jira”, ni ño payoha ticoro. ¹⁴Jesu ticorore Sabado dachoi to noaricoro yoachũ ñũno judio masa buheri wũhũ pũhoro sehe tiro mehne suaha. ã suaro tiro masare ò sehe niha:

—Seis dachori jira mari dahraa dachori. ã jina mũsa dohatiinare noaina wahachũ yoa duana, tí dachore tíre yoaga. Sabado dachore mari sori dachore tíre yoaena tjiga —niha wũhũ pũhoro.

¹⁵To ã nichũ Jesu ò sehe ni yũhtiha:

—Mũsa ã mahñorucuina jira. Mũsa wachũre, burro cũhũre cjuana Sabado

dachoi ti dũhteri dare pjã, tinare na buha, sihni dutiboa. ¹⁶Mipũ ahricorore Abrahã cjiro coyeacorore watĩno diez y ocho cũhmari waro ticorore dohatichũ yoahre. ¿Sabado dachoi ticorore noaricoro wahachũ yoa dutierajari mũsa? —niha Jesu.

¹⁷To ã nichũ tũhoa, tina bũoro wahaha. ã jia paina sehe jipihtina Jesu yoarire ñua, wahcheha.

Mostaza yapa quitire yahuha Jesu

(Mt 13.31-32; Mr 4.30-32)

¹⁸ã yoa Jesu quti mehne piti dahre buheha masare:

—¿Ne Cohamacũ masa bui pũhoro to noano sũho jia yaba baro yoaro sehe jijari, mũsa tũhotuchũ? Ahri quti mehne tíre pũhoro to sũho jiare yahuihtja yũhũ. ¹⁹Mostaza yapacã yoaro sehe jira. Tí yapacãre toari masũno to wesei toaha. To toari baharo tí yapacã duha. ã jia tũ bũcuachũ minichahca peri tũ dũpũripũ suhti suhaha. (Tó seheta mũano macarirore mari pũhoro masiina mahainacã ti ji mũhtapachũta baharopũ tina payũ wahaahca) —niha Jesu.

Pão bũcũaro quitire yahuha Jesu

(Mt 13.33)

²⁰ã ni tuhsũ, pari turi Jesu ò sehe ni piti dahre buheha:

—¿Ne Cohamacũ masa bui pũhoro to noano sũho jia yaba baro yoaro sehe jijari, mũsa tũhotuchũ? ²¹Pão bũcũaro yoaro sehe jira. Tíre numino cũ wajuru trigore co mehne noano tíre dahra morena pão bũcuahore. To ã yoachũ pão bũcũaro sehe trigore noano sahserũcũ sũra. (To sahserũcũ sũro seheta mũano macarirore mari pũhoro payũ masa masiahca) —niha Jesu.

Mahari sopacacã quitire yahuha Jesu

(Mt 7.13-14, 21-23)

²² Æ yoa Jesu bujua macaripu, daa macaricãpu cũhure buhe wahcã, Jerusalẽpu suro taro niha. ²³ To Æ waharo watoi cãiro Jesure õ sehe ni sinituha:

—Puhtoro, ¿mahainacã masare pichacapu wahaborinare yuhdorohcari Cohamacu? —ni sinituha tiro Jesure.

To Æ nichu Jesu piti dahre buhero õ sehe ni yahuha:

²⁴ —Payu masa Cohamacu cahapu waha duaa, sãa duamana. Mahari sopacacãre musa sãa duachu mijo curera. Tó seheta Cohamacu cahapu musa waha duachu mijo nina. Masa Æ sãa duapahta sãa masierara. Æ jina musa sehe mahari sopacacãre musa tuaro sãa duaboro seheta Cohamacu sehete tuaro masiga. ²⁵ Õ sehe yoarohca Cohamacu payu masare. Tiro wuhu puero yoaro sehe jira. Wuhu puero wahcã, sopacacãre biharohca. To Æ yoachu sopacacãpu ducuna, sopa pahmare dotanahca. Æ dotana õ sehe ninahca: “Puhtoro, sopa pahmare pjõohga”, musa nichu wuhu puero sehe õ sehe ni yuhtirohca. “Musare ne masieraja yuhu. Nohoi musa tariro cũhure masieraja”, ni yuhtirohca. ²⁶ To Æ nichu musa õ sehe ni yuhtinahca: “Muhu mehne sã chu, sihnihi. Sã ya macai buhere muhu”, ninahca musa. ²⁷ Musa Æ nichu tiro sehe õ sehe ni yuhtirohca: “Musare ne masieraja. Nohoi musa tariro cũhure masieraja. Jipihtina musa ñaa buhiri tiina yu cahai taena tjiga”, ninohca wuhu puero. ²⁸ Æ yoa Abrahã cjirore, Isaa cjirore, Jacobo cjirore, jipihtina Cohamacu yare yahu muhtaina cjirore Cohamacu masare puhtoro to noano suho jirore ti jichu ñuna, musa sehe sopacapu cohãrina jina tuaro tiinahca. Æ tiina jina, musa tuaro cahyaro mehne

piri bahca dihonahca. ²⁹ Tí pjare jipihtiro macaina puhtoro Cohamacu to noano suho jiropure su, tiro mehne chu dujiahca. ³⁰ Mipure wiho jiina jirina cjiri tí pjare puhtoa jiahca. Æ jia mipure puhtoa jirina cjiri tí pjare wiho jiina jiahca —niha Jesu.

Jerusalẽ macainare tuaro cahãha Jesu

(Mt 23.37-39)

³¹ Tí pjare mahainacã fariseo curua macaina Jesu cahapu sua, tirore õ sehe ni yahuha:

—Herode muhure wajã duara. Æ jicu pa sehẽpu wahaga muhu —niha tina tirore.

³² Ti Æ nichu Jesu sehe õ sehe ni yuhtuha:

—Herode mahñoa payũriro jira tiro. Õ sehe ni yahuga tirore: “Jesu watãre cohã wioro nina. Tuhsu, dohatiinare noaina wahachu yoaro nina. Tíre michare, ñamichaca cũhure yoarohca. Ñamichaca bohrearo dahra batoarohca”, ni yahuga Herodere. ³³ Æ jicu michare waha, ñamichaca cũhure waha, ñamichaca bohrearo cũhure waha, Jerusalẽpu suihca. Cohamacu yare yahu muhtarirore yuhure wajãahca masa. Cohamacu yare yahu muhtainare ti wajachu Jerusalẽpu jiro cahmana tinare. Æ jicu yuhu cũhure Jerusalẽpu jiro cahmana.

³⁴ Cue Jerusalẽ macaina. Musa Cohamacu yare yahu muhtaina cjirore wajã, musa cahai to warocainare tãa mehne doca wajãre musa. Musa coyeya panopu macaina cũhu ãta yoarina cjiri jiha. Caracacoro to pohmare to cjãpu dupuri mehne to moha coãno seheta payu tahari musare cahũrucumahi. Musare cahmamahi. Musa sehe yuhure ne cahmaerare. ³⁵ Mipure musa jiro cohãri maca jirohca. Potocã niita nija musare. Cohamacu mari puhtoro to tuaa mehne taihca yuhu. Yu Æ tachu ñuna

musa yuhure “Cohamacu tuaa mehne tariro noajaro”, ninahca. Yuhure musa tîre nihto pano pari turi yuhure ñusi musa —niha Jesu tinare.

Dohatirirore noariro wahachu yoaha Jesu

14 Pa dacho Sabado dacho jichu fariseo curua macaina puhtoa mehne macariro ya wuhuru Jesu churo wahaha. Tí wuhui jiina tiro dihtare ñuroca oha. ²Ti ã ñuroca oño watoi yachuri wipiriro, ñuchua wipiriro tiro cahapu suha. ³Ã jiro Jesu judio masare buheinare, fariseo curua macaina cûhure õ sehe ni sinituha:

—¿Sabado dachore dohatirirore noariro wahachu yoa dutijari Cohamacu yare ti joari pui? —ni sinituha Jesu.

⁴To ã ni sinitupachuta tina yuhtieraha. Ti yuhtierachu ñuno Jesu dohatirirore noariro wahachu yoa, “Wahaga”, niha tirore. ⁵Ã yoa tuhsuro, tinare õ sehe ni sinituha tjoa:

—¿Cûiro musa mehne macariro to macuno Sabado dachoi mari sori dachoi copapu to bora sâachû na wioerabocari?” musa ã nina. “¿To wachu cûhure na wioerabocari?” musa ã nina —niha Jesu.

⁶To ã nipachuta tina to sinituare yuhti masieraha tjoa.

Wamomaca dâhteropu pjirocainare yahuha Jesu

⁷Fariseo curua macariro ya wuhui jiro tí wuhû macariro to pjirocaina noaa dujiare ti besechu ñûha Jesu. ã ñû tuhsu õ sehe ni yahuha jipihtinare:

⁸—Wamomaca dâhteri bese numû musare to pjirocachû, noaa dujiare bese dujiena tjiga. Musa yuhdoro cua pisainare pjirocaboca ahri wuhû puro. ⁹To ã yoachû musa noaa dujiai dujichû, “Ah-rina cua pisainare musa dujiare waga”, niboca wuhû puro musare. To ã nichu

musa sehe buo tina, ñaa dujiai dujiboca. ¹⁰Ã jina wuhû puro musare to pjirocachû, ñaa dujiai duji muhtaga. Musa ã yoachû wuhû puro musare “Noaa dujia sehere dujina taga”, ninohca musare tiro. Musa ã wahachu paina to pjirocaina sehe musare ño payoa mehne ñuahca.

¹¹Cûiro to basi “Puhtoro tjija”, ni tuhoturiro cahamacuno jirohca. Pairo “Cahamacuno jija”, ni tuhoturiro painare yuhduruca duaerariro tiro sehe puhtoro jirohca —niha Jesu tinare.

¹²Ã ni tuhsu Jesu wuhû purore õ sehe ni yahuha:

—Muhû bese numû dahrecu mu cahai jiinare, mu bahanare, mu coyeare, pache pure pjiecu tjiga. Mu tinare pjichû muhû cûhure tina cûhû pji cahmaahca tjoa. ã pji cahmaa muhure ti wapamoare wapaahca. ¹³Muhû bese numû dahrecu pjacuoinare, tini masierainare, cû buhusehe dahporo dojori tiinare, capari ñuerainare pjirocaga. ¹⁴Mu ã yoachû ñuno Cohamacu muhure noano yoarohca. Tina sehe muhure ti wapamoare wapa masierara. ã jiro noaina yariaina ti masa mujari pja jichû Cohamacu sehe noare mu yoari wapa muhure noano yoarohca —niha Jesu wuhû purore.

Pjiri bese numû quitire yahuha Jesu

¹⁵To ã nichû tuhoro paio churi mesa cahai dujiriro, Jesure õ sehe ni yahuha:

—Cohamacu masare puhtoro to noano suho jiroi to churi mesa cahai dujiina tuaro wahcheina jiahca —niha tiro Jesure.

¹⁶To ã nichû Jesu ahri quitire yahuha tirore:

—Pjiri bese numû dahreriro payu masare pjirocacha. ¹⁷To pjirocari baharo bese numû dachoi to cahamacunore to pjirocainare yahu dutiro warocaha. “Ma, jipihtiare bese numû macaa cjihtire cahno tuhsûhre. ã jiro musare pjirocahre”, ni yahu dutiha to cahamacunore.

¹⁸To cahamacuno to ã ni yahupachuta, to pjirocaina sehe “Waha masieraja”, niha tina. To pjiroca muhtariro õ sehe ni yahuha to cahamacunore: “Michapucacã yahpare nuchuhi. Æ jicu tí yahpare ñui wahai tai nija. Æ yoacu waha masieraja. Ño payo curea yuhure. Yuhure basioerahca”, niha to pjiroca muhtariro sehe to cahamacunore. ¹⁹Pairo sehe õ sehe niha: “Wachure pua wamomaca phtiinare michapucacãta nuchuhi. Æ jicu wachure buhe cayo ñui wahai tai nija ti waja wahcãhtore. Æ yoai waheraja. Yuhure basioerahca”, niha tiro cuhu. ²⁰Pairo sehe õ sehe niha: “Yuhu michapucacã wamomaca duhtehi. Æ jicu bose numupu waha masieraja”, niha tiro to cahamacunore. ²¹To ã nichu to cahamacuno sehe tjua waha, to puhtoropure ti niri cjiroca yahu pahnoha. To ã ni yahuchu to puhtoro tuaro susini, õ sehe niha to cahamacunore. “Macari macaa maharipu pjacuoina ti ducua maharipu wahaga. Æ jicu pjacuoinare, tini masierainare, capari ñuerainare, cã buhusehe dahporo dojori tiinare cjero na tahga tinare”, niha puhtoro. ²²Baharo curero to cahamacuno yahuha to puhtorore: “Puhtoro, mu dutiriro seheta yoahi. Yu ã yoapachuta paina cuhu mu suahca”, niha to cahamacuno. ²³To ã nichu puhtoro tirore õ sehe ni dutiha: “Campopu wahaga. Tõ bujua maharipu jiinare, daa maharicãpu jiina cuhure masare yu wuhupu ta dutiga, ya wuhu to noano wahpahto cjihto sehe. ²⁴Potocã nii nija muhure. Ah-rina yu pjiroca muhtarina yu chure ne mahanocã chusi”, niha puhtoro —ni yahuha Jesu.

Jesu mehne wahachu mijo nina

²⁵Tí pjare payu masa Jesu mehne wahaha. Æ jiro Jesu tinare majare ñu, õ sehe ni yahuha:

²⁶—Cãiro yu buheriro ji duaro painare to cahiro yuhdoro yuhu sehese cahino cahmana. To pucure, to pocore, to namonore, to pohmare, to bahanare, to pjacu cuhure to cahiro yuhdoro yuhu sehese cahino cahmana. Æ yoeraro yu buheriro ji masierara. ²⁷Cãiro yu buheriro ji duaro yu yare ã yoarucuriro jirohca. Æ yoa crusapu yu ñano yuhduhtiro seheta yu yairo to jiri buhiri ñano yuhdu duaeraro yu buheriro ji masierara. ²⁸Ahrire masiyuro cahmana musare. Õ sehe jira tí: Wuhu dahreriro to muari wuhure yoahito pano wuhu wapa tihtire quihõ cã muhtana. Æ yoaro to wuhure to pahnohtore masina tiro. ²⁹Wapa tihtire quihõeraro to wuhure yoaro pahnoeraboa. Æ jia tirore ñuina bujupẽbo. ³⁰“Ahriro to wuhure yoaro bihoerare”, ni bujupẽbo. ³¹Puhtoro paio puhtoro yaina mehne ti cahma wajãhto pano, to yaina surarare to cahma wajã dutihto pano, to surarare quihõnohca. “¿Yuhu diez mil surara mehne paio veinte mil surara cjuariro mehne cahma wajãcu bihobocari yuhu?” ni tuhuturo quihõnohca tiro. ³²Æ quihõno, to bihoeratore masinohca. Æ masino paio puhtoro to surara mehne cahma wajãno tariro yoaropu to jichuta, bihoerario sehe “Cahma wajãena tjijihna”, ni dutiro warocaboa dahra cohtarirore. ³³Æ jina yu buheina ji duana, musa yoahitire musare masino cahmana. Musa yoa duari sehese cohã duaerana, yu buheina ji masierara —ni yahuha Jesu.

Moa coerarore yahuha Jesu

(Mt 5.13; Mr 9.50)

³⁴Æ ni tuhsu tinare õ sehe ni yahu namoha:

—Moa noano coara. To coerachu coa yoahito basioerara. ³⁵Moa coerachu tí moa ne noaerara. Tí moare dohseahito

basioerara. Tí ã jichu tí moare cohãno cahmana. Ne yaba cjihti jierara ti cohõa. (Ti yaba cjihti jieraro seheta jiena tjiga musa. Moa noano to coaro seheta musa cõhu ji coaina jiga. Tuhsu, paina mehne noano mehne jiga.) Ahrire noano tuhoga musa —niha Jesu.

Oveja butiriro quitire yahuha Jesu

(Mt 18.10-14)

15 ã yoa pa dachoi payu puhtoaya yare wapa na cohtaina paina “Ñaare yoina”, ti niina mehne Jesure tuhoa taha. ²Ti ã yoachũ ñua fariseo curua macaina, judio masare buheina cõhu Jesure ñu tuhtia, õ sehe niha ti basi:

—Ahriro ñainare piti tira. ã jiriro jirota tina mehne chura —ni durucuha tina ti basi.

³Ti ã ni durucuchũ Jesu to tuhõtua mehne õ sehe ni piti dahre buheha tinare:

⁴—¿Cien oveja puro cãiro oveja butichũ ñuno dohse yorohcari tiro? Õ sehe yorohca. Tiro noventa y nueve ovejare ti churi campopũ cũ, butirirore macano waharohca. Ovejare bocaropũ duhurohca. ⁵Tirore bocaro wahcherohca. ã jiro to comapariaca buipũ tirore cjã payo, to wuhupũ na tjuaa waharohca. ⁶Na tju sũ, to cahai jinare, to coyeare pji cahmachunohca. “Yũ oveja butirirore boca tuhsuhi. ã jina yuhũ mehne wahchega”, ninohca tiro tinare. ⁷Potocã niita nija musare. Noventa y nueve oveja payu ti jiriro seheta, payu masa õ sehe ni tuhõtura: “Ñano yoaeraja. ã jicu yũ ñaare cahya, yũ tuhõtumari cjirire tuhõtu cohtotasi yuhũ”, ni tuhõtura payu masa. Ti ã ni tuhõtuchũ ñua muano macaina Cohamacũ cahai jiina wahcherara. Pairo sehene wahchera. Butiriro oveja cãirota to butiriro seheta to puro tirore to bocariro seheta cãiro ñariro to ñaare cahyachũ, “Ñano yoaeraja”, ni to tuhõtumari cjirire

tuhõtu to cohtotachũ, Cohamacũre to cahmachũ ñua, Cohamacũ cahai jiina tuaro wahchera —niha Jesu.

Niñeru tu butiri quitire yahuha Jesu

⁸ ã ni yahu tuhsu, paye quiti mehne piti dahre yahu namoha tjõa:

—¿Diez niñeru tari cjuaricoro cũ tu butichũ ñuno dohse yorohcari ticoro? Õ sehe yorohca ticoro. Sihãriare sihã, wuhure coha, noano maca pahõnonohca. Tí ture bocaropũ duhurohca. ⁹Tí ture boca tuhsu, to cahai jinare, to coyeare pji cahmachunohca. “Niñeru tu ya tu yuhure butiri ture bocahi. ã jina yuhũ mehne wahchega”, ninohca ticoro. ¹⁰Potocã niita nija musare. Tõ seheta cãiro ñariro to ñaare cahyachũ, “Ñano yoaeraja”, ni to tuhõtumari cjirire tuhõtu to cohtotachũ Cohamacũre to cahmachũ Cohamacũ yaina anjoa sehe tuaro wahcheahca —niha Jesu.

To macano butiri quitire yahuha Jesu

¹¹ ã ni yahu tuhsu Jesu paye quiti mehne piti dahre yahu namoha tjõa:

—Bucuro pohna puro mua jiha. ¹²Duhsariro sehe õ sehe niha to pucurore: “Mai, mu yariari baharo yuhure mu wahtire yuhure wa bahrañoga”, niha tiro to pucurore. To ã nichu ti pucuro puaropureta to pohñare witira to cjuari cjirire. ¹³Mahaa dachoricã baharo duhsariro to yare jipihtiare na, yoropũ pa yahpapũ wahaa wahaha. Tõpũ sũro tuhõ masierariro seheta yoa, to niñerure to yare yoa site pahõnocaha. ¹⁴To yoa site pahõnori baharo tí yahpapure ne chũa marieni pja ji dũcaha. ã jiro tiro jũca baaha. ¹⁵ ã jiro tí yahpa macaa dahraare macaha. To bocachũ to puhtoro yesea cohtariro sõha tirore. ¹⁶ ã jiro tiro yeseare nu, ti chũare chũ duamaha. To ã chũ duapachũta tí chũare tõ macaina waeraha tirore.

¹⁷ Ā yoa tirore tói wacūa taha jūna. “Yū pūcūre dahra cohtaina sehe bujua chūare chūca. Ti chū dūhaa cūhū bujua dūhsaca. Ti ā noano yūhdūro watoi yūhū sehe ōi jicū, jūca yariāi nija. ¹⁸ Mipūre yū pūcū cahapū tjuāihtja. Yū pūcū cahapū sūcū ō sehe nihtja tirore: ‘Mai, Cohamacūre űano yoahi. Mūhū cūhūre űano yoahiti. ¹⁹ űariro jija. Mū macū jiboriro jieraja yūhū. Mūhūre dahra cohtaina seheta yoaga yūhūre’, nihtja yū pūcūre”, ni tuhoutuha tiro. ²⁰ Ā ni tuhoutuha wahcārūca, to pūcūro cahapū tjuāa wahaha. Tōpū to suriro tjuā tachū to pūcūro sehe yoaropūta to macūnore űūha.

To ā wihichū űūno to macūnore pja űūha. Ā pja űūno to cahai mūroca wahcā tirore cĵā suhsu mūa, to wahsupui wihmiha to pūcūro to macūnore. ²¹ “Mai, Cohamacūre űano yoahi. Mūhū cūhūre űano yoahiti. űariro jija yūhū. Mū macū jiboriro jieraja yūhū”, niha tiro to pūcūrore. ²² To ā nichū tuhoro to pūcūro sehe dahra cohtainare pjiha: “Cjero, noa yūhdūri suhtirore na tahga. Ā jina yū macūre sāaga. Sāa tuhsū, to wamomaca sāari sorore sāa, to dahporire dahpo suhti cūhūre sāaga. ²³ Sāa tuhsū, dihi tiriocā wachūcāre wajāga. Bose nūmū yoajihna. ²⁴ Ahriro yū macū yariariro seheta wahare. Ā wahaparota mipūre catira tiro. To butiboriro seheta jirirore mipūre bocahi. Ā jina bose nūmū yoajihna”, niha to pūcūro. To ā niri baharo bose nūmū dahre dūcaha tina.

²⁵ “Tī pjare to wahmino sehe wesepū jija. Wesepū jiriro coha tjuā taro wūhū cahai sūro, ti basaare tuhoro caha tiro. ²⁶ Ā tuhoro caro, cūiro dahra cohtarirore pjiroca, tirore sinitu űūha tiro: “ĴDohse yoa basaa niri?” ni sinitu űūha tiro dahra cohtarirore. ²⁷ “Mū bahū tju wihihre. Tiro noariro, catiriro to tju wihichū mū pūcū dihi tiriro wachūcāre wajā dutihre”, ni yūhtiha dahra co-

htariro. ²⁸ To ā ni yahuchū to wahmino sehe tuaro suaro, wūhūpū sāa taeraha. To sāa taerachū űūno to pūcūro sopacapū wijaa ta, “Sāa taga” ni, tuaro pjimaha to macūnore. ²⁹ “Tuhoga, Mai. Yoari pja mūhūre dahra cohtariro seheta mūhūre yoadohomahi. Ā jicū mū dutiare ne cū taha yūhdūrucaera tihī. Yū mūhūre dahra cohtapachūta yūhūre ne waerare mūhū. Ne cūiro wahiqurocāre ne waera tire mūhū yūhūre yū piti tina mehne yū bose nūmū dahrehti cĵihtire. ³⁰ Wiho mejeta ahriro mū macū sehe űaina numia mehne mū yare yoa site pahūoyuhti. Tīre yoa site pahūo tuhsū, tiro wūhūpū to tju wihichū dihi tiriocāre wachūcāre wajā dutiyuhti mūhū to chūhtiro cĵihtore”, niha to wahmino to pūcūrore. ³¹ “Macū, yūhū mehne jipihtia dachoripe mū jichū jipihitia ya mū ya cūhū jira. ³² Mū bahū sehe yariariro seheta wahare marine. Ā yoa mipūre tiro catiriro jira. Tiro butiboriro seheta jire. To ā wahari baharo mipūre tirore bocahi. Ā jina to tju wihichū mari bose nūmū yoa wahchechū noana”, niha tiro to macūnore —niha Jesu tinare.

Niñeru űū wihbo cohtariro tuhō masiriro quitire Jesu yahuha

16 Ā yoa ahri quitire to buheinare ō sehe ni yahuha Jesu:

—Pache pūro ya niñerure űū wihbo cohtariro niñerure noano to űū wihboerachū űūno paio sehe yahusāha pache pūrore: “Tiro mū niñerure yoa sitero nina”, ni yahusāha tirore. ² To yahusā tuhsūri baharo niñeru űū wihbo cohtarirore pjirocaha. Ā pji tuhsū, to wihichū űūno, tirore pūhtoro ō sehe niha: “Pairo yū niñerure mū yoa siterire yūhūre yahure. Ā jicū mipūre yū yare űū wihboriro jisi mūhū. Ā jicū yū yare mū yoari cĵirire yahu pahūo joaga. Mūhūre cohāi nija”, niha to pūhtoro tirore. ³ To ā niri baharo ō sehe

ni tūhotuha ñu wihboriro to basi: “Yū puhtoro yūhure cohāno taro nica. Yūhu tuaeraja. Ā jicu tuaro dahraare bihoeraja. Tuhsu, painare yūhu niñerure sinicu buobiario yūhduboca yūhu. ¿Dohse yoaihcari yūhu?”⁴ Mipū pinihtare yū yoahtire masija yūhu juna. Ō sehe yū yoachū yū dahraa maerachū yū puhtorore wapamoina yūhure cahīahca. Ā jia ti wuhusepū sāa dutiahca yūhure”, ni tūhotuha tiro.⁵ Ā ni tūhoturo tiro jipitina to puhtorore wapamoinare pjirocaha. Pjiroca tuhsu, cohtaha. Ā cohtaro wihi muhtariorore ō sehe ni sinituha tiro: “¿Yū puhtorore noho puro wapamojari muhū?” niha tiro.⁶ To ā nichū wapamoriro sehe ō sehe ni yūhtiha: “Cien tambores sere olivo dicha mehne ti yoari sere wapamoja tirore”, ni yūhtiha tiro. To ā ni yahuchū niñeru ñu wihboriro sehe ō sehe ni yahuha: “Ōi jira mū wapamonore joa ōri pū. Dujiga. Ā jicu mū wapamonore dacho macai na, dacho macai joa cahnoga”, niha ñu wihboriro wapamorirore.⁷ Ā ni tuhsu paio wapamorirore sinituha tiro: “¿Muhū waro, noho puro wapamojari?” niha tjoa. “Cien waju trigo yapari wajure wapamoja yūhu”, niha wapamoriro niñerure ñu wihborirore. “Ōi jira mū wapamonore joa ōri pū. Mū wapamonore ochenta joa cahnoga”, niha ñu wihboriro.⁸ To ā noano mahño minichū ñuno “Ahriro mahñoriro noano masiriro jica”, ni tūhotuha to puhtoro niñerure ñu wihborirore. Ahri dacho macaina, Cohamacure cahmaeraina ti yare cahnorire ti niñeru ti ñu wihborire Cohamacu yaina yūhdoro masica tina — niha Jesu.

⁹ Ā ni tuhsu Jesu ō sehe ni yahu namoha:

—Ahri quitire ā ni yahucū, musare ō sehe niita nija. Mūsa cjuaa, pjacuoinare mūsa wachū, tina sehe musare cahīahca. Mūsa ā yoachū mūsa

cjuaa pihtari baharo mūsa muanopū sachū musare cahīahca tōpūre.

¹⁰ Wiho jiina ya dahraare quihōno yoana, puhtoa ya dahraa cūhure quihōno yoanahca. Wiho jiina ya dahraare quihōno yoerana, puhtoa ya dahraa cūhure quihōno yoasi mūsa.¹¹ Ā jina ahri yahpai mūsa cjuaa mehne mūsa noano yoerana Cohamacū musare to yoa dutia cūhure noano yoasi mūsa.¹² Ā jiro paio yare mūsa noano yoabasaerachū ñuno mūsa ya cjihtire wasi musare.

¹³ Cūiro Cohamacū sehere wacūno, tuabiaro niñeru sehere wacūerara. Niñeru sehere tuabiaro wacūno Cohamacū sehere wacūerara. Niñeru dihtare cahmariro jiro Cohamacure wahchechū yoerara. Cohamacū cūhure, niñeru cūhure puarore cahma yūhduracahto basioerara musare. Niñerure cahma yūhdurario Cohamacure noano ño payo masierara —niha Jesu.

¹⁴ To ā nichū tuhoa fariseo curua macaina sehe tirore bujupeha. Tina sehe niñerure cahīha. Ā jia bujupeha.¹⁵ Ti bujupechū tuhoru Jesu tinare ō sehe ni yahuha:

—Masa ti ñurocaroi mūsa noano yoamana. Mūsa ā yoachū “Noaina, quihōno yoaina jira”, nimana masa musare. Cohamacū sehe mūsa tūhotuare masina. Masa “Noa yūhduara”, ti nirire Cohamacū sehe soro ni tūhotu, tīre ñu yabira —niha Jesu.

Cohamacū to dutiare, puhtoro to suho jiare yahuha Jesu

¹⁶ Ā ni tuhsu ō sehe ni namoha Jesu:

—João masare bautisariro to jihto pano Moiseru to cūri dutia mehne Cohamacū marine dutire. Cohamacū yare yahu muhtaina cjiri ti joari cjiri mehne cūhure marine dutire. Mipū sehere João to buhe ducari baharo noaa buheare, Cohamacū masare puhtoro to noano suho

jia cūhure masi ducara masa. Ā masia masa ti mū sūro ti tuaa mehne Cohamacu masare puhtoro to noano sūho jirore sāa duamana.

¹⁷ Moiserere to cūri dutiai Cohamacu to niriro seheta yoa pahñonohca tiro. Cohamacu yare yahu muhtaina cjiri ti joari cjiripū cūhure to niriro seheta yoa pahñonohca tiro. Mūano cūhū ahri yahpa cūhū ti pihtia wahapachūta Cohamacu to niriro seheta yoa pahñonohca —niha Jesu.

Namonore cohāare yahuha Jesu

(Mt 19.1-12; Mr 10.1-12)

¹⁸ Ā ni tuhsu ō sehe ni namoha Jesu:

—Masuno to namonore cohāno, pacorore namo tiro, tiro ticoro mehne nāno yoaro nina. Tuhsu, masuno paio to cohāricorore namo tiro, tiro cūhū ticoro mehne nāno yoaro nina —niha Jesu.

Pache puro cūhure, Lázaro cūhure to yahuri quitire buheha Jesu

¹⁹ Ā yoa paye quiti mehne piti dahre yahuha Jesu:

—Tí pjarure pache puro jiha. To suhti sehe wapa bujubiaha. Tuhsu, dachoripe tiro noaa dihtare churo, payū cjuaha tiro. ²⁰ Ā yoa tí pjare paio pjacuoriro, Lázaro wama tiriro jia tiha. Tiro to pjacu payū camī tiriro jiha. To ā jiriro jichū paina sehe tireore pache puro ya wuhūpu na sūha. ²¹ Ā jiro pjacuoriro sehe pache puro to churi mesa docai yahpai dujiro to chū site boroare chumaha. “To chū site boroare chūcū yapicūhca yūhū”, ni tuhotumaha tiro. Ā jia dieya to camine nehnea taa tiha. ²² Baharo pjacuoriro to yariaa wahachū, Abrahā cahapu paraíso wama tiropū anjoa tireore naa mūjaha. Pache puro cūhū to baharocāta yariaa wahaha. To yariachū tireore yaha. ²³ Ā yoa pache pūrore tuaro pichaca

jūha. To ā tuaro jūchū, pichacapū jiro muanopū jirirore Abrahāre nūha. Lázaro cūhure nūha. ²⁴ Nū tuhsu, tiro Abrahāre pisurocaha: “Coyeiro Abrahā, pja nūga yūhure. Pichacapū yūhū nāno yūhdūi nica. Yū ā wahachū Lázarore yūhure warocaga. Tiro core to wamo picapū soha, yū nāhmanore co mehne nehajarō. Tōre yūsojaro tiro”, niha pache puro. ²⁵ To ā nichū Abrahā tireore ō sehe ni yahuha: “Coyeiro, catiriro jicū jipih-tiare mūhū noare cjuahre. Lázaro sehe dachoripe nāno yūhdūhre. Mipū sehere mūhū nāno yūhdūchū tiro sehe ōpūre wahchea mehne jinocahno nina. ²⁶ Ā yoa mari watoi cūāri copa jira. Ā jia ōre jiina tōpūre waha masierara. Tuhsu tōre jiina ōpū ta duaina ta masierara”, niha Abrahā pache pūrore. ²⁷ To ā nichū pache puro ō sehe ni namoha: “Coyeiro, tuaro sinija mūhure. Lázarore yū pūcū ya wuhūpu warocaga. ²⁸ Yūhū cū wamomaca pihtiina bahana tija. Lázaro tinare yahujaro. Tina ōre nāno yūhdūropūre taea tjjaro”, niha tiro. ²⁹ To ā nichū Abrahā sehe ō sehe ni yūhtiha: “Cohamacu dutiare Moise marine to cūri cjirire, Cohamacu yare yahu muhtaina ti joari cjirire cjuara mū bahana. Ā jia mū bahana tūreta tuhojaro”, niha Abrahā. ³⁰ To ā nichū pache puro sehe yūhtiha: “Coyeiro Abrahā, tūre cjuapahta noano tuhosi. Lázaro yariariro masariro tina cahapu to suchū nūa tina sehe ti nāare cahya, noare cohtotaahca. Ā jia noare yoaahca yū bahana sehe”, niha pache puro cjiro. ³¹ To ā nichū Abrahā sehe ō sehe ni yahuha: “Mū bahana Moise to cūri pū to yahuare, Cohamacu yare yahu muhtaina cjiri ti yahuare tuhoeraina jira. Ā jia Lázaro yariariro cjiro masariro to jipachūta tina Cohamacure tuho duasi”, niha Abrahā —ni yahuha Jesu.

Ñaare yoachũ cua nina

(Mt 18.6-7, 21-22; Mr 9.42)

17 Ñ yoa Jesu õ sehe ni yahuha to buheinare:

—Masare ñano yoachũ yoaa payũ jira. Ñ jia masa ñaare yoara. Ti ã jipachuta masunore ñaare yoachũ yoariro sehe ñabiaro yũhdũrohca. ²Masunore to wamuai pjiria tãca duhte yo, pjiri mapũ tirore ti cohãchũ ñano wahaboa tiro. Pairo sehe ahrinacã mehne macarirocãre ñaare yoachũ yoaro pjiri mapũ ti cohãriro yũhdoro ñano yũhdũrohca. Tirore tuaro buhiri dahrero cahmana. ³Noano yoaga musa. Musa coyero ñano to yoachũ ñuna “Yoai tjiga”, niga tirore. Ñ jina tiro to ñaare cahyachũ, noaare to cohtotachũ musa sehe to ñaa yoare boga. ⁴Ñ yoa musa coyero cũ dachoihta si-ete tahari musare ñano to yoachũ tópe tahari musare, “Yũ ñaare cahyaja. Pari turi ã yoasi”, to nichũ tópe taharita to ñaa yoare boga —niha Jesu.

Cohamacũre wacũ tuaare yahuha Jesu

⁵Ñ yoa Jesu buhe duti to cũina tirore õ sehe niha:

—Cohamacũre sãre noano wacũ tua namochũ yoaga —niha tina Jesure.

⁶Ti ã nichũ Jesu õ sehe ni yũhtiha:

—Mostaza yapacã mahari yapacã jiparota duropũ pjidũ wahara. To ã wahariro seheta Cohamacũre pjíro wacũ tuana, õ sehe wahachũ yoa masinahca musa. Ahdũ sicómoro wama tidũre õ sehe ni masina: “Mũhũ yucucũ mũ basi duhtu wahcã, pjiri mapũ bora ñojaga”, ni masina musa. Musa ã nichũ tũ yucucũ sehe musa dutiro seheta waharohca —niha Jesu.

Dahra cohtariro to dahraare yahuha Jesu

⁷Baharo õ sehe ni buheha Jesu:

—Musare dahra cohtariro jiro wesepũ tjana, ovejare ñũ wihbora. ¿Dahra cohtariro to tju wihichũ dohse nibocari musa tirore? “Cjero taga. Mũ chua õi jira”, ¿nibocari musa? ⁸Ñ nierara musa. Tirore õ sehe nina musa: “Yũ chũare doha cahnoga. Ñ jicũ yũ chũ sihnichũ yũhure cohtaga. Yũ baharo mũhũ cũhũ chũ sihniga”, nina musa dahra cohtarirore. ⁹Dahra cohtariro musa dutiare to yoachũ tirore “Noana”, nierara musa. To dahraa dihtare yoaro nica tiro. ¹⁰Musa cũhũ tiro yoaro sehe tjira. Cohamacũ to dutiro sehetã yoa pahõna õ sehe ni tuhutuga musa: “Sã cũhũ dahra cohtaina dihta jija. Wiho jiina jija sã. Sã dahraa dihtare yoaja sã”, ni tuhutuga musa —niha Jesu to buheinare.

Diez cami baainare noaina wahachũ yoaha Jesu

¹¹Pa dacho Jerusalẽpũ Jesu waharo niha. Tópũ waharo Samaria yahpa, Galilea yahpa dacho macai yũhdũ wahcãha. ¹²⁻¹³Pa macapũ wahari mahapũ to tinichũ diez cami baaina sehe tirore piti bocaha. Ñ jia tina yoa cureropũ ducua pisuha:

—Jesu, puhtoro, sãre pja ñũga —niha tina.

¹⁴Ti ã nichũ tinare ñũ, õ sehe ni yahuha Jesu:

—Sacerdotere musa pjacũre noaa pjacũri ti waharire ñona wahaga —niha tinare.

To ã niri baharo ti waharo watoi tina ti pjacũri noaina wahaha. ¹⁵Ñ jiro cũiro tina mehne macariro noano to pjacũ wahachũ ñũno, Jesu cahapũ majare tjuaha. Ñ tjuaro tuaro mehne Cohamacũre ño payoha. “Cohamacũ tuariro, noariro jira”, tuaro ni, ño payoha tiro. ¹⁶Ñ nino tiro Jesu dahpori cahai na tuhcuã caha sũ, “Noana”, niha tiro. Tiro sehe Samaria macariro jiha. ¹⁷To ã yoari baharo Jesu õ sehe ni yahuha:

—Diez jihre masa noaina wahaina. ¿Paina nueve dñhsaina sehe nohopu jicari tina? ¹⁸Ahriro pa yahpa macariro dihta Cohamacure “Noana”, nino taro tjua tahre. ¿Dohse yoa paina taerari? —niha Jesu.

¹⁹Á ni tuhsu Jesu õ sehe ni yahuha na tuhcuca caha surirore:

—Wahcãrucaga. Wahaga. Mũhu Cohamacure wacũ tuacu, noariro wahahre mũhu —niha Jesu tireore.

Cohamacu masare puhtoro to noano sũho jihtore yahuha Jesu

(Mt 24.23-28, 36-41)

²⁰Tí pjare mahainacã fariseo curua macaina Jesure õ sehe ni sinituha:

—¿Dohse jichu puhtoro Cohamacu masare sũho ji dũcarohcari? —niha tina.

Ti ã nichu Jesu õ sehe ni yũthiha:

—Cohamacu masare puhtoro to noano sũho ji dũcachu masa ñu masierara.

²¹“Cohamacu masare puhtoro to noano sũho jia õi jira”, ni masierara. “Sohõpu jira”, ni masierara. Cohamacu masare puhtoro to noano sũho jia masa ti tuhotuapu jira —niha Jesu fariseo curua macainare.

²²Á ni tuhsu Jesu to buheinare õ sehe ni yahuha:

—Baharo yũhu masũno Cohamacu warocariro ahri yahparu yũ tjua tah-tore tuaro cahmanahca musa. Cũ dachoihta yũhure ñu duapanahca yũhure ñusi musa. Musa yũhure ã ñu duapachuta tí pjare tasi yũhu. ²³Paina musare õ sehe niahca: “Tirore ñũga. Tiro Cristo jira. Ahrirore ñũga. Ahriro Cristo jira”, niahca musare. Ti ã nipachuta tinare tuhoena tjiga. ²⁴Oroca sitero wacũenoca to oro-ca sitero seheta yũhu cũhu masũno Cohamacu warocariro wacũenoca tjua tailca. ²⁵Á yũ tjua tahto pano yũhu tuaro ñano yũhdũihca. Á jia yũhure mipu macaina cahmasi. ²⁶Noé to jiri pja macaina ti jiri-ro seheta yũhu masũno Co-

hamacu warocariro yũ tjua tachu tó se-heta jiahca masa. ²⁷Noé to jiri pjare jip-ih-tina masa ã churucua tiha. Á yoa si-hnirucua tiha. Á jia mũa numiare namo-tia tiha. Noé pjiria dohoriapu to samuhto pano Cohamacu tinare to miohto pano tí jipihtiare masa yoarucua tiha. Tó se-heta jirohca pari turi yũ tjua tachu cũhure. ²⁸Lote to jia tiri pja macaina ti jiri-ro seheta yũ tjua tachu jiahca masa. Lote to jia tiri pjare masa chu, si-hni, nuchu, dua, weserire toaa, wũhuse yoaha. ²⁹Ti ã yoaro watoi Sodoma wama tiri macai jiri-ro Lote to wahari dachoi mũano macaa pichaca, picha sohãa poca tãa peri cũhu coro taro seheta tina bui bora ta, tinare wajã pahñonocaa tiha. ³⁰Yũhu masũno Cohamacu warocariro wacũenoca yũ tjua tachu tina yoaro se-heta yoaina jiahca masa tí pjare.

³¹’Tí pjare cãiro to wũhu bui macari wapapu jiri-ro wũhu puhichapu to ya jichu tíre nano sãaeno tjijaro to waha bahrañohto sehe. Tuhsu, wesepu jiri-ro cũhu tí pjare to wũhupu piha taero tjijaro to waha bahrañohto sehe. ³²Lote namono to waharire wacũga musa. ³³Masũno yũhure wacũno marieno to mũ suru to cahmano seheta yoaro pichacapu waharohca. Yũ yare ã yoarucuri-ro sehe jipiltia dachoripe yũhu mehne mũanopu jirucurohca.

³⁴’Tí ñamine puaro cũ casario bui carĩnare cãiro yũhure cahmarirore naaihca. Tuhsu, yũhure cahmaerari-ro tói tjuarohca. ³⁵Tí pjare puaro numia cũnoi ti trigore arẽa numiare cũcoro yũhure cahmaricore naaihca. Tuhsu, yũhure cahmaeraricoro tõihta tjuarohca. ³⁶[Á yoa wesepu puaro dahrainna ti jichu cãirota naihca. Cãiro tói tjuarohca] —niha Jesu.

³⁷To ã nichu to buheina sehe õ sehe ni sinituha tireore:

—¿Nohopu ã waharohcari? —ni sinituha tina.

Ti ã nichu Jesu õ sehe ni yuhtiha:

—Yucaare mari ñuna, yariariro to pjacu cjiro jichu mari noano masinahca. (Tó seheta ahri musare yu yahuyurire musa ñuna noano masinahca ahri yahpapu yu tjua tahto mahanocã to dahsachu cühure) —niha Jesu.

Wapewahyoro to buhiri dahre dutia quitire yahuha Jesu

18 Ñ yoa Jesu tinare Cohamacure siniare yahuro õ sehe niha:

—Musa Cohamacure sinina, cohtaga to yuhtitfore. Yoari pja cohtapanahca cahyaena tjiga. Tirore sinina duhuena tjiga —niha Jesu.

²To ã nirire buhero taro ahri quiti mehne piti dahre yahuha tinare:

—Pa macapu ti buhiri dahre dutiriro jiha. Tiro Cohamacure ño payoeraha. Ñ yoa masa cühure ño payoeraha. ³Wapewahyoro cühü tópu jiha. Ticoro tiro cahapu suroca majareno õ sehe niha: “Yühure ñu tuhtirirore buhiri dahre dutiga muhu. Yühure ni ducataga”, ni sinirucua ticoro tirore. ⁴To ã nichu payu tahari tiro “Yoasi yuhu”, nimaha ticorore. To ã nipachuta ticoro payu tahari ã sinirucuro tirore caribobiario yoaha. To ã caribochu, tiro õ sehe niha to basi: “Yuhu Cohamacure, masa cühure ño payoeraja. ⁵Yu ã ño payoerariro yu jipachuta ahricoro sehe yühure caribobiara. Yühure ã cariboro yühure pomea wahachu yoarohca ticoro. To ã ni yahusãrucuchu ticorore ñu tuhtirirore buhiri dahre dutiitja”, niha buhiri dahre dutiriro —niha Jesu.

⁶Ñ nino Jesu tinare õ sehe ni yahu namoha:

—Ñ niha tiro ñariro buhiri dahre dutiriro. To niri cjirire wacüga musa. ⁷Tiro yuhdoro Cohamacu sehe to yainare to beseinare ñamipu cühure, dachopu cühure tirore sinirucuinare yuhtiro, yoadohorohca. ⁸Musare niita

nija. Cohamacure ti siniriro seheta dóicãta tinare yoadohorohca. ¿To ã yuhtiriro to jipachuta yuhu masuno Cohamacu warocariro ahri yahpapu tjua tacu Cohamacure wacu tuainare bocabocari yuhu? —niha Jesu.

Puaro Cohamacure ti sinia quitire yahuha Jesu

⁹Ñ yoa pari turi piti dahre buhero õ sehe ni yahuha Jesu: “Sã sehe noaina jija. Paina sehe ñano yoaina jira”, ni tuhotuina barore Jesu õ sehe ni yahuha:

¹⁰—Cohamacu ya wuhupu puaro mua Cohamacure sinia wahaha. Cüiro fariseo curua macariro jiha. Pairo puhtoa yare wapa na cohtariro jiha. ¹¹Ñ yoa fariseo curua macariro sehe wahcãrucu su, õ sehe ni yahuha Cohamacure: “Cohamacu, yuhu paina yare mahñoepa mehne nariro, ñano yoariro, paina namosãnumia mehne wuana tiriro ne jieraja. Paina yoaro sehe ñariro jieraja. Ahriro wapa na cohtariro yoaro sehe ñariro ne jieraja yuhu. Ñ jicu muhure ‘Noana’, nija Cohamacu. ¹²Yuhu so-manaripe puã dachore ne chueraja, mu yare yoacu tacu. Tuhsu jipihtia dohse jiape yu wapataa cühure mahano (diezmo) wa mujaja yuhu muhure ño payocu”, niha fariseo curua macariro Cohamacure. ¹³Ñ yoa wapa na cohtariro sehe yoa cureropu muhri yo ducu su, manopure ñu muoeraha. Ñ ñu muoeraro, to pëbuhui cãroca õ, õ sehe ni siniha Cohamacure: “Cohamacu, yuhu ñaare yoariro jija. Ñ jicu muhu pja ñuga yühure”, niha tiro Cohamacure. ¹⁴Musare niita nija. Ahriro wapa na cohtariro sehe Cohamacu to ñuchu buhiri marieriro to ya wuhupu tjuaa wahaha. Wiho mejeta paio fariseo curua macarirore “Mu ñaa buhirire cohãhi”, nieraha Cohamacu. “Yuhu noariro waro jija”, ni tuhoturirore Cohamacu buoro dahrerohca. Wiho mejeta “Yuhu ñaare

yoariro jija. Ā jicu tíre tuaro cahyaja” niriore Cohamacu wahchechu yoarohca tiro sehere —niha Jesu.

**Macanacá ya cjihtire
Cohamacure sini payoha Jesu**

(Mt 19.13-15; Mr 10.13-16)

¹⁵ Ā yoa masa ti pohnare wihānacāre Jesure ña payo dutia ta, to cahapu na wihimaha. Ti ā yoachū ñua Jesu buheina tinacāre na wihiinare tuhtiha. ¹⁶ Ti ā tuhtichū ñuno Jesu wihānacāre pjirocaha to cahapu. Pjiroca tuhsū ō sehe niha tiro to buheinare:

—Macanacá yu cahapu tajaro. “To cahai wahaena tjiga”, niena tjiga tinacāre. Tinacā Cohamacure ti puhtoro tuhotura. Puhtoro Cohamacu to suho jiina ahri-nacā yoaro sehe tuhotuina baro dihta jira. ¹⁷ Potocā niita nija musare. Ahri-nacā Cohamacu ti puhtoro cjihtore cahmana. Ti yoaro seheta musa cūhu Cohamacu musa puhtoro cjihtore cahmaerana, puhtoro Cohamacu to noano suho jihtina ne jisi musa —niha Jesu.

Pache puro Jesure sinitu ñuha

(Mt 19.16-30; Mr 10.17-31)

¹⁸ To ā niri baharo judio masa puhtoa mehne macariro Jesure ō sehe ni sinitu ñuha:

—¿Ne noariro, buheriro, jipihtia dachoripe Cohamacu mehne ji duacu, dohse yoaihcarí yuhū? —niha tiro.

¹⁹ To ā nichū Jesu ō sehe ni yuhtiha:

—¿“Noariro”, ni pisujari muhu yuhure? Noariro sehe Cohamacu dihta jira. ²⁰ Ahri Cohamacu dutiare masina muhu. “Numia mehne ñano yoaecu tjiga. Masare wajāecu tjiga. Yacaecu tjiga. Mahñoa mehne pairore yahusāecu tjiga. Mu pucusumare ño payoga”, ni dutira Cohamacu —niha Jesu.

²¹ To ā nichū tiro Jesure ō sehe ni yuhtiha:

—Tíre jipihtiare yu wahma wahmua tariro jiputa yuhduracaera tili yuhū —niha tiro.

²² To ā nichū tuhoró, Jesu tirore ō sehe ni yahuha:

—Mahanocā duhsara muhure mu yoa pahñohto. Jipihtiare mu yare duai wahaga. Ā yoacu jipihtia mu wapatarí niñerure pjacuoinare waga. Mu ā yoachū pjíro mu wapataa manopu, Cohamacu cahapu jiyuahca. Mu ā yoari baharo yuhū mehne macariro cjihto taga —niha Jesu tirore.

²³ To ā nichū tuhoró tiro sehe payu pache cjuariro jiro tíre pjacuoinare wa duaeraro, tuaro cahya, waha wahaha.

²⁴ To ā cahyachū ñuno Jesu ō sehe ni yahuha painare:

—Pache pu Cohamacu masare puhtoro to noano suho jiropure ti wahachū basioera curera. ²⁵ Camello sehe awicā copacāre to sãa nuhri wijaa duachū basioerara. To ā jiro yuhdoro pache puro puhtoro Cohamacu noano to suho jiropure to waha duachū nu mijobiara —niha Jesu.

²⁶ To ā nichū tirore tuhoina ō sehe niha:

—Cue, mu nino seheta potocā jichū, ne cūiro masuno Cohamacu cahapu waha masieraboca —niha tina Jesure.

²⁷ Ti ā nichū Jesu ō sehe ni yuhtiha:

—Masa ti basi ti mu suro yuhdu masierara. Wiho mejeta Cohamacu sehe masare pichacapū wahaborinare yuhdo masina. Tiro jipihtiare noano yoa masi pahñoriro jira —niha Jesu tinare.

²⁸ To ā nichū Pedro tirore ō sehe niha:

—Tuhosiniga. Sã sehe jipihtia sã yare cūnoaca tii muhu mehne wahana —niha tiro Jesure.

²⁹ To ā nichū Jesu ō sehe niha:

—Potocā musare niita nija. Musā Cohamacu yare yoana tana musa wuhusere, musa namosānumiare, musa bahanare, musa pucusumare,

musa pohnare cūnocarina jina, pjíro wapatanahca musa mipure. ³⁰Musa cūriro yūhoro wapatanahca. Ā jina musa yariari baharo jipihtia dachoripe Cohamacu mehne jirucunahca musa —niha Jesu tinare.

Pari turi Jesu to yariahtore, to masa wijaahtore yahuha

(Mt 20.17-19; Mr 10.32-34)

³¹Ā yoa Jesu doce to buheinare ti sahsero naaha. Ā naano tinare ō sehe ni yahuha:

—Tuhoga yuhure. Mipure mari Jerusalēpu wahana nija. Tópu yuhure masunore Cohamacu warocaritore Cohamacu yare yahu muhtaina cjiri panopu ti yahuriro cjiro seheta paina ā yoahca yuhure. ³²Tópu masa yuhure ñahaa, judio masa jieraina sehere waahca yuhure. Yuhure ti wari baharo tina yuhure bujupē, ñano ni, yuhure chahcho puti sihōahca. ³³Tuhsu, yuta dari mehne tjana tuhsu wajāahca yuhure. Ti ā wajāri baharo tia dacho wahaboroi masa wijaaahca yuhu —niha Jesu tinare.

³⁴To ā nichu to buheina to yahuare noano tuho ñahaeraha. Cohamacu tíre tinare noano tuho ñahachu yoerasiniha.

Capari ñueraritore ñuchu yoaha Jesu

(Mt 20.29-34; Mr 10.46-52)

³⁵Ā yoa Jesu cūhu Jericó wama tiri maca cahacāpu suha. Tói capari ñuerariro maha dūhtu cahai duji, niñerure sinino niha. ³⁶Ā jiro masa payu to cahai ti yuhduachu tuhoro tiro sinituha tinare:

—¿Dohse yoaa payu masa yuhdujari? —ni sinituha tiro.

³⁷—Jesu Nazare macariro waharo nina —ni yahuha paina tire.

³⁸Ti ā ni yahuchu tuhoro tiro ō sehe ni sañurucuha:

—Jesu, Davi cjiro panamino masare yuhdohtiro, yuhure pja ñuga —ni sañurucuha Jesure.

³⁹To ā nichu to pano waha muhtaina sehe, “Dihta mariahga”, ni tuhtiha tire. Ti ā ni tuhtipachuta tó pano to sañurucuro yuhdo curero sañurucu namoha tjoa:

—Davi cjiro panamino masare yuhdohtiro, yuhure pja ñuga —ni sañurucuha tiro.

⁴⁰To ā ni sañurucuchu tuhoro, Jesu sehe tjuarucu su, “Pjirocaga tire”, niha. To ā nichu tina sehe capari ñueraritore pji wahcāha. Ti ā pji wahcāchu tiro Jesu cahapu to suchu Jesu sehe tire ō sehe ni sinituha:

⁴¹—¿Dohse yu yoachu cahmajari mahu? —niha Jesu tire.

—Yu puhtoro, yuhure ñuchu yoaga —ni yuhtiha capari ñuerariro.

⁴²—Ñuga. Yuhure wacū tuacu, noariro wahara mahu —niha Jesu tire.

⁴³To ā nichuta capari ñuerariro ñua wahaha. Ā noariro waharo, tiro Jesu mehne waha, “Cohamacu tuariro jira”, niha tiro. Ā jia masa payu capari ñuerariro to ñuchu ñua “Cohamacu noariro, tuariro jira”, niha tina cūhu.

Zaqueo Jesure piti bocaha

19 Ā yoa Jesu Jericópu su, tí macapu yuhdu wahcāno taro niha. ²Pache puero Zaqueo wama tiriro puhtoa ya cjihtire wapa na cohtaina puhtoro tói jiha. ³Ā jiro tiro Jesure “¿Diro baro jicari?” ni ñu masino taro Jesure ñu duamaha. Ā to ñu duapachuta yahparirocā to jichu masa payu tirocāre ducataha. ⁴Ā jiro tiro masare muroca yuhdu waha, sicómoro wama tidu yucacupu mujaha Jesure ñuno taro. Baharo curero tu cahai Jesu yuhduaro taro niha. Ā jiro Zaqueo tui cohtaro niha. ⁵To ā cohta pisaro watoi

Jesu sehe tã dahpotoi sũrũca, Zaqueore ñũroca mũo, tirore õ sehe niha:

—Zaqueo mipũre mũ wũhũi tjuasinihtja yũhũ. Ā jicũ cjero duji taga —niha Jesu tirore.

⁶To ā nichũ Zaqueo sehe soaro mehne duji ta, tuaro wahchea mehne to wũhũrũ pji wahcãha Jesure. ⁷To ā ni piti bocachũ ñũa, jipihtina masa ti basi õ sehe ni durucuha:

—Ahriri Jesu ñaare yoariro ya wũhũrũ tinino waha duara —ni durucuha jipihtina ti basi.

⁸Zaqueo sehe piti boca tuhsũ tõi ducu, Jesure õ sehe ni yahuha:

—Pũhtoro tũhoga yũhũre. Jipihtia yũ yare dacho macai pjacũoinare waihtja. Ā jicũ yũhũ pairore cien niñeru tũrire mahño mariro jicũ, cuatro cientos niñeru tũrire wapa bui payoihtja tirore —niha Zaqueo Jesure.

⁹To ā nichũ Jesu sehe õ sehe ni yahuha tirore:

—Michare mũhũre mũ wũhũi jiina cũhũre pichacapũ wahaborinare Cohamacũ yũhdo tuhsũra. Mũhũ cũhũ Abrahã cjiro coyero jira. ¹⁰Yũhũ masũno Cohamacũ warocariro pichacapũ wahaborinare macai tai nii. Tõpũ wahaborinare noano yũhdoi tai nii —niha Jesu Zaqueore.

Niñeru tũri uru tũri quitire yahuha Jesu

(Mt 25.14-30)

¹¹Ā yoa tirore tũhoinare Jesu paye quiti mehne piti dahre yahuha. Mahanocã dũhsaha Jerusalẽpu to sũhto. Ā jia tirore tũhoina õ sehe ni tũhotuha: “Pũhtoro Cohamacũ mipũre sũho ji dũcaro taro nina”, ni tũhotuha tina. ¹²Ti ā ni tũhotuchũ Jesu õ sehe ni yahuha tinare:

—Cũiro pũhtoro sãhtiro to ya yahpa macaina bui pũhtoro jihtiro yoaropũ waharo taro niha. Tõpũre to sũchũ ñũno

ti bui pũhtoro tirore pũhtoro sõno taro niha. Pũhtoro sãhtiro ya maca macaina bui pũhtoro sõno taro niha tirore. Baharo to ya wũhũrũ tju wihiro taro niha. ¹³Wahmanore to wahahto pano pũhtoro diez dahra cohtainare pjirocãha. Ā pjirocaro, tiro tinare cãinare tĩpe tũri niñeru tũri wapa bũjua tũri uru tũrire waha. Wa tuhsũ, õ sehe ni yahuha tinare: “Yũhũ yũ mariachũ ahri niñeru mehne mũsa wapata namohtire macaga”, niha tiro dahra cohtainare. ¹⁴Pũhtoro sãhtiro to jipachuta to ya maca macainata tirore cahmaeraha. Ā cahmaeraa, ti warocahtinare tirore pũhtoro sõhtirore yahu dutia warocaha. “Ahriri sã pũhtoro jichũ cahmaeraja sã”, niha tina ti yahu duti warocaina sehe. ¹⁵Ā ti cahmaerapachuta baharo ti pũhtoro sãaha tiro. Ā pũhtoro sãa tuhsũro tiro to wũhũrũ tju taha. Ā tju wihiro tiro dahra cohtainare to niñeru mehne ti wapata namoare masino taro, tinare pjirocãha. ¹⁶To pjirocaro baharo, wihi mũhtariro tirore yahuha: “Pũhtoro mũ niñeru tũ, yũhũre mũ wari tũ mehne diez tũri wapata namohi yũhũ”, niha dahra cohtariro to pũhtoro. ¹⁷“Noano yoari jire mũhũ. Mũhũ noariro dahra cohtariro jira. Mũhũ mahanocã mehne yũ dutiriro seheta yoa pahñoriro jicũ mipũ diez macari macaina ti pũhtoro cjihto wahaihca mũhũ”, niha pũhtoro dahra cohtariro. ¹⁸To baharo wihiriro tiro mehne macariro õ sehe niha: “Pũhtoro, mũ niñeru tũ, yũhũre mũ wari tũ mehne cinco tũri wapata namohi yũhũ cũhũ”, ni yahuha to pũhtoro. ¹⁹“Cinco macari macaina pũhtoro cjihto wahaihca mũhũ”, niha pũhtoro tirore. ²⁰To ā niri baharo paio dahra cohtariro wihi, õ sehe ni yahuha: “Pũhtoro, mũ niñeru tũ õi jira. Suhtiro cahsaro mehne coma, tí tũre wihbohi. ²¹Mũhũ tuaro dahra dutiriro jira. Paina yare mana mũhũ. Tuhsũ, tuaro dahra dutiriro

jicu dahraerariro jipacuta muhu paina ya dahrari wapare nana. A yoa toaerariro jipaihta dichare nariro jira muhu. A jicu muhure cui nihi”, niha to puhtoro “Wapataerahi yuhu”, ni yahuro.²² “Muhu a nicu nana yoariro jira muhu. Yuhure mu a niri buhiri muhure buhiri dahreihtja yuhu. Yuhu muhure tuaro dahra dutiriro yu jichu masina muhu. Paina yare yu nachu toaerariro jipai dichare nariro yu jichu masina muhu.²³ Yu a jiriro jichu nupacuta ya ture niheru wihbori wuhupu cuerare muhu. Tíre ti wasori wapa wapata namoboa muhu. ¿Dohseacu a yoaerari muhu? Tíre mu yoachu tju wihicu wapata namoboa yuhu”, niha ti puhtoro.²⁴ A ni tuhsu tiro cahai ducuinare dutiha: “Niheru ture maga tirore. Diez turre cjuarirore waga”, niha puhtoro.²⁵ To a nichu tina sehe o sehe ni yahuha tirore: “Puhtoro, diez ture cjuariro payu cjuu tuhsura”, niha tina.²⁶ Ti a nichu puhtoro o sehe ni yuhtiha: “Musare niita nija. Jipihtina cjuainare wa namoihtja. Cjuaarariro sehere mahanocā to cjuapachuta tíre maihtja.²⁷ Mipu pinihta yuhure nu tuhtinane yuhure ti puhtoro ji dutierainare yu cahai na tahga. A yoana yu nuurocaroi wajāga tinare”, niha puhtoro dahra cohtainare —ni buheha Jesu.

Jerusalēpu suha Jesu

(Mt 21.1-11; Mr 11.1-11; Jn 12.12-19)

²⁸ A ni tuhsu Jesu paina pano Jerusalēpu wahaha.²⁹ A yoa tina Jerusalēpu ti suhto panocā tūcu Olivo wama tidu duhtu cahai jiri maca Betfagé wama tiri maca cahai, a jichu Betania wama tiri maca cahai su muhtaha. Tí macari puu maca cahai Jesu sūro, to buheina puarore warocaro taro, o sehe ni yahu quihōha:

³⁰—Sí macapu burrocāre nana wahaga. Tōpu suna, burrocāre ti duhte daporiocāre boca sunahca. Tiro ne cūiro

ti pisamahnoerarirocā jica. Tirocāre bocana, yuta dare pjā, na tabasaga yuhure.³¹ Tirocāre musa pjāchu nūno, cūiro dohse jiriro “¿Dohse yoana tana burrocāre duhte dapori dare pjājari musa?” to nichu tuhona o sehe ni yuhtiga tirore: “Mari puhtoro burrocāre cahmarocasinire”, ni yahuga tirore —ni yahu duti warocaha to buheina puarore.

³² To a nichu tina puaro sehe to niriro pu suha. Ti a suchu jipihtia Jesu to niriro sehetā wahaha.³³ A jia tina tirocāre ti pjāchu nua tirocā puu tinare o sehe ni sinituha:

—¿Dohse yoana tana burrocāre duhte dapori dare pjājari musa? —ni sinituha tina.

³⁴—Mari puhtoro burrocāre cahmarocasinire —ni yuhtiha tina.

³⁵ A ni yahu tuhsu tirocāre Jesu cahapu na suha. Na su tuhsu ti bui sāa suhtire tirocā bui pjūpaha payo tuh suchu nu, Jesu sehe tirocā bui to muja pjāchu yoadohoha tina.³⁶ Jesu tirocā bui to pisachu to wahahto pano masa ti bui sāa suhtire tjuwe na, to wahahti mahai saño cū muhtaha, Jesure ño payoa.³⁷ Tina Jerusalē cahacāpu su, Olivo wama tidu dujiari mahapu suha. Tōpu Jesu to buhechu tuhoina payu jipihtia Cohamacu tuua mehne to yoa ñorire, noaa to yoarire ti ñuri cjuirire wacūa, Cohamacure “Noariro, tuariro jira”, ni sañurucuha. A yoa Cohamacure ño payoa, o sehe ni sañurucuha:

³⁸—Ahrriro Cohamacu to warocariro, mari puhtoro noano jijaro. Muano macaina noano jijaro. Muano macariro Cohamacu, muhu tuariro waro jira —ni ño payoha tina.

³⁹ Ti a nichu tuhoa fariseo curua macaina mahainacā ti watoi jiina Jesure o sehe ni yahuha:

—Buheriro, mu buheinare dihta mariea dutiga —niha tina.

⁴⁰—Músare niita nija. Tina ti sañuru-cuerachu tãa peri sehe sañurucuboa — niha Jesu fariseo curua macainare.

⁴¹ Æ ni tuhsu Jesu Jerusalê cahacãpu su, tí macare ñãrocaro, tiha. ⁴² Õ sehe niha tiro:

—Jerusalê macaina mipu pinihtare musare pichacapu wahaborinare Cohamacu to yũdohtore musa masichu noa yũduaboa. Æ jipachuta mipure musa tíre ne tuho duaerare. Æ jiro Cohamacu tíre musare masi dutierare. ⁴³ Musare ñu tuhtiina musa jiri macare soroahca. Æ yoa musare tina wijaaro wasi. ⁴⁴ Tí pjata tina musa ya macare cohã pahñoahca. Musa cũhure wajãahca. Musare ñu tuhtiina noano cohã pahñoahca musa ya macare. Cohamacu pichacapu wahaborinare musare to yũdohtore musa masi duaerare. Musa masi duaerari buhiri musare ñu tuhtiinare Cohamacu musare cohã dutirohca —niha Jesu Jerusalê macainare.

Cohamacu wũhupu Jesu suha

(Mt 21.12-17; Mr 11.15-19; Jn 2.13-22)

⁴⁵ Æ yoa Jerusalẽpu sũro, Jesu Cohamacu wũhupu sãa wahaha. Æ yoaro pache duainare tí wũhupu jinare boca sũro, tinare cohã wionocaha. ⁴⁶ Õ sehe niha tiro tinare:

—Õ sehe nina Cohamacu yare ti joari pũi: “Yũ wũhu Cohamacu mehne durucuri wũhu wama tirohca”, niha to yare ti joari pũi. To Æ nipachuta musa sehe ahri wũhi duana, musa basi cahma yacara musa —niha Jesu.

⁴⁷ Æ yoa dachoripe Cohamacu wũhupu Jesu buheha. Æ jia sacerdotea puhtoa, judio masare buheina, masa puhtoa cũhu tirore ti wajãhti cjihtire wacũ macaha. ⁴⁸ Masa jipihtina tirore Æ tuhorucua, to buheare noano tuho nũnũina jiha. Tí Æ noano tuho nũnũchu ñua, Jesure wajã duaina sehe tirore ti wajãhtire bocaerasiniha.

Sacerdotea puhtoa, judio masare buheina, bucuna mehne Jesure sinitu ñuha

(Mt 21.23-27; Mr 11.27-33)

20 Pa dachoi Cohamacu wũhi Jesu masare noaa buheare buhero niha. To Æ buhechu sacerdotea puhtoa, judio masare buheina, bucuna mehne tiro cahapu wihia, tirore õ sehe ni sinitu ñuha:

²—Yahuga sãre. ¿Dohseacu canure Æ yoari muhu? ¿Noa muhure tíre Æ yoa dutiri? —niha tina Jesure.

³Ti Æ nichu Jesu õ sehe ni yũhtiha tinare:

—Musa sehene sinitu muhtaihtja. Yahuga yũhure. ⁴¿João masare to bautisachu diro baro sehe tirore bautisa dutia tiari, musa tuhotuchu? ¿O Cohamacu dutiera tiari? ¿O masa sehe dutia tiari, musa tuhotuchu? —ni sinituha Jesu tinare.

⁵To Æ nichu tina sehe ti basi õ sehe niha:

—¿Dohse ni yũhtinahcari mari? “Cohamacu Joãoire dutia tiri jire”, mari nichu, “¿Dohseana Cohamacu Joãoire to dutipachuta tirore tuho duaerari musa?” niboca Jesu marine. Æ jina “Cohamacu Joãoire dutia tiri jire”, ni yũhti masieraja mari. ⁶Ahrina masa sehe “Potocãta João Cohamacu yare yahu muhtararo jira”, ni tuhotura tina. Æ ni tuhotua “João to bautisachu Cohamacu tirore dutierari jire”, mari nichu tuhoa marine tãa mehne docaboca masa. Æ jina tí cũhure yahu masieraja mari —ni durucuha tina ti basi.

⁷ Æ ni durucu tuhsua tina Jesure õ sehe ni yũhtiha:

—Joãoire bautisa dutirirore sã masieraja —niha tina.

⁸Ti Æ nichu Jesu õ sehe ni yũhtiha:

—Tí pja pinihta yũhu cũhu musa sinitu muhtarire yahueraja musare.

Ahrire yu yoaire dutirirore yahueraja musare —niha tiro tinare.

**Naina dahra cohtaina
quitire yahuha Jesu**

(Mt 21.33-44; Mr 12.1-11)

⁹ Ā yoa Jesu to tuhotua mehne piti dahre ō sehe ni buhe dūcaha masare:

—Wese pūro se dari cjihtire toaha. Toa tuhsu, tí wesere painare cū buhusehe coa pahma cūha. Pahma cūno tí wesere tinare nū wihbo dutiha. Ā duti tuhsu pa yahpapu waha, yoari pja bajueraha.

¹⁰ Tuhsu, se niri pja jichu wese pūro to cahamacunore wesere nū wihboina cahapu warocaha. Wese macaa to toaa dichare to ya coa macaare na dutiro warocamaha. Ā jia nū wihboina sehe to cahamacunore wiho piti boca cjanocaha tirore. Ā cjanocaa, tina tirore dichare waerapahta tjuaa dutiha tirore. ¹¹ Ā jiro wese pūro paio to cahamacunore tí wese macaa toaa dichare na dutiro warocamaha tjoa. Ā jia wesere nū wihboina tiro cūhure cja, nāno yoaha. Ā yoa tuhsu tirore tí dichare waerapahta tjuaa dutiha tjoa. ¹² Tirore ti ā yoari baharo wese pūro paio cahamacunore warocamaha tjoa. To ā warocachu nua, wesere nū wihboina sehe tiro cūhure cami dahre, tí wese duhtu cahai cohānocaha tirore.

¹³ Ti ā yoari baharo wese pūro ō sehe ni tuhotumaha: “¿Dohse yoaihcari yuhu? Ō sehe yoaihtja. Yuhu yu macure yu cahirirore warocaihtja. Tina tirore nō payoboca”, ni tuhotumaha wese pūro sehe. ¹⁴ Ā jia to macunore to warocarirore to suchu nua nū wihboina sehe ti basi ō sehe ni durucuha: “Ahriro wese pūro macuno jira. Baharo ahri wesere cjuahitiro jira. Tirore wajajihna. Mari ā yoachu ahri wese mari ya wese tjuarohca”, nimaha tina ti basi. ¹⁵ Ā ni tuhsua wese pūro macunore wese duhtu cahai cohā, wajānocaha tirore. ¿Ti ā yoachu

nūno dohse yoarohcari wese pūro wesere nū wihboinare? —niha Jesu.

¹⁶ —Tiro wesere nū wihboinare wajāno taro, paina sehere wesere nū wihbo dutirohca —ni yuhtiha Jesu to basi.

To ā nichu tuhoa masa sehe ō sehe niha:

—Marine ā wahaero tjiijaro —niha tina.

¹⁷ Ti ā nichu Jesu sehe tinare ō sehe ni sinituha:

—¿Cohamacu yare ti joari pūre ō sehe ni durucua, dohse nino nijari, musa tuhotuchu?:

“Ahriro Cristo tāca yoaro seheta jira.

Tācare wuhu dahreina ti cohāno seheta masa tirore cohāhca.

Ti ā yoapachuta mipure wuhu dahreina wuhure yoaa ti cū muhtari tācare ti cūno seheta Cohamacu tirore puhto sōhre”,

ni joaha. ¹⁸ Jipihtina tia tāca bui bora pjainare payu dihicā peri yihsorohca tia tāca. Tuhsu, tia tāca masuno bui bora pjaro, tahānocanohca tirore. Ā tahāno to pjacu cjirore daa manaricā wahachu yoarohca. (Tō seheta yuhure cahmaeraina, yu buhiri dahrehtina nāno yuhduahca) —niha Jesu.

**Puhtoa ya wapare
paina sinituha Jesure**

(Mt 21.45-46; 22.15-22; Mr 12.13-17)

¹⁹ To ā nichu tuhoa judio masare buheina sacerdotea puhtoa cūhu, “Jesu wesere nū wihboina quitu mehne marine tuhtiro nina”, ni tuhotuha tina. Ā ni tuhotua tina Jesure naha duamaha. Ā naha duapahta tina masare cui niha. ²⁰ Ā cuia, Jesure ti nahahtu pjare cohtasiniha tina. Ā jia tina quihōno yoaina yoaro sehe ji mahno dutiha painare. To nāno ni yuhtichu yoa duaa nimaha tirore yahusā duaa. Ā jia Jesure sinitu dutia warocaha mahnoinare. Jesu nāno to ni durucuchu tuhoa tí yahpa macaina bui puh-

torore peresu yoa dutia taa nimaha. ²¹ Ñã jia tina Jesure mahño cū ò sehe ni sinitu ññmaha:

—Buheriro, potocã durucuriro, mahñoa marieriro mū jichū sã masija. Ñã jicu wiho jinare, puhtoã cūhure cūno potori yoara mūhū. Mūhū Cohamacu yare potocã mū buhechū cūhure sã masija. ²² Yahuga sãre. ¿Ne, Roma macarirore jipihtina bui puhtoro gubierno macaare marine waparo cahmajari, mū tūhotuchū? ¿Mari dutia wapa dutijari, mū tūhotuchū? —ni sinituha tina Jesure.

²³ Ti ã nichū tūhoro Jesu ti ñano yoa duaare masino, tinare ò sehe ni yūhtiha:

²⁴ —Mipure niñeru ture na tahga. Tí ture ññjihna —niha.

Tí ture ti na wihichū ñño ò sehe niha Jesu:

—¿Diro baro masu wahājari ahri ture? ¿Diro baro wama wahājari? —niha Jesu tinare.

—César, masa bui puhtoro jiriyo ya masu, to wama cūhū wahāna —ni yūhtiha tina.

²⁵ Ti ã nichū Jesu ò sehe ni yahuha:

—Tí pja pinihta masa bui puhtoro yare tiro sehere waga. Cohamacu yare Cohamacu sehere waga —niha Jesu tinare.

²⁶ Ñã to noano yūhtichū, masa ti ññrocaroi Jesure ñano ni durucuchū yoa masieraha tina. Ñã jia Jesu yūhtiare tūhoa, tina cuaa waha, dihta mariea wahaha.

Saduceo curua macaina Cohamacu to masoare sinituha Jesure

(Mt 22.23-33; Mr 12.18-27)

²⁷ Ñã yoa mahainacã saduceo curua macaina Jesu cahapu wihiha. “Cohamacu yariainare masosi”, ni tūhotuina jia saduceo curua macaina. Ñã jia tina ò sehe niha tireore:

²⁸ —Buheriro, ò sehe ni buhea tiha Moise cjiro: “Cūiro to wahmino namo

tiro pohna mariaparota to yariachū ñño to bahore to wahmino namono cjirore ññoano cahmana. Ñã yoaro to wahmino mūnano to pohna tiboro seheta pohna tiro cahmana to bahore. Ñã jia to pohna to wahmino mūnano pohna yoaro sehe jahca”, ni joaa tiha Moise cjiro —niha tina.

²⁹ Tíre ni tuhsu ahri quitire yahu namoha tjoa Jesure:

—Cūiro masuno jiha. Seis to bahana jiha. Ti wahmino sehe namo ti, pohna marieriro yariaa wahaha. ³⁰ Ñã jiro paio to bahuro cūhū to wahmino namono cjirore nuoaaha. To ã ññoari baharo to wahmino yoaro seheta pohna mariaparota tiro cūhū yariaa wahaha. ³¹ Ñã jiro ahriro bahuro cūhū to wahmino mūnano yoaro seheta pohna mariaparota yariaa wahaha. Ñã dihta wahaha cūiro pohna waro. Ne pohna mariapahta yaria pihtia wahaha. ³² Ti namono cjiro cūhū ti baharota yariaa wahaha. ³³ ¿Ne Cohamacu jipihtinare yariaina cjirore to masochū diro namono sehe jibocari ticoro pototi? Tina jipihtina ticoro namo tirina cjiro jiha. ¿Ñã jiro diro baro namono jirohcaro? —ni sinituha tina.

³⁴ Ti ã nichū Jesu ò sehe ni yūhtiha:

—Mipū macaina wamomaca duhtera. ³⁵ Ti ã duhtepachuta paina sehe pa turu macaina sehe ã jierara. Paina mūare, numia cūhure to yainare Cohamacu ñaa marieina jichū yoarohca. Tina ti yariari baharo masa mūjaahca. Ñã yoa tina tōpu wamomaca duhterara. ³⁶ Ñã jia tina anjoa yoaro seheta ne yariasi. Tina Cohamacu to masorina jia, Cohamacu pohna jira. ³⁷ Mipure yariarina cjiro ti masa wi-jaehto sehere musare yahuihtja. Tíre Moise cjiro noano yahu pahñoa tiha. To mahaducã jūri quitire ò sehe ni yahua tiha tiro: “Yūhū Abrahā, Isaa, Jacobo ti puhtoro tjiya’, ni yahure Cohamacu yūhure”, ni joaa tiha Moise cjiro. ³⁸ Ti yariari baharo “Ti puhtoro tjiya”, ni

yahua tiha Cohamacu. Ā nīparota yariarina cjiro puhtoro jierara Cohamacu. “Ti puhtoro tjija”, to nia mehne catiina ti jichu masija mari. Tiro catiina puhtoro jira. Jipihtina masa catira Cohamacu to nuchu —niha Jesu tinare.

³⁹⁻⁴⁰To ā nichu tina sehe pari turi Jesure sinitu duaeraha. Ā jia mahainacā judio masare buheina o sehe niha:

—Buheriro, muhu noano yuhtihre — niha tina Jesure.

¿Diro baro coyeyiro jijari Cristo?

(Mt 22.41-46; Mr 12.35-37)

⁴¹Baharo Jesu o sehe ni yahuha tinare:

—“Cristo Davi cjiro panamino jirohca”, ni buhera paina. ¿Dohse yoa tina ā ni buhejari? ⁴²Davi cjiro to basi Salmopu to joari tjupu o sehe ni joaa tiha:

“Cohamacu yu puhtorore o sehe nire: ‘Ōi yu poto buhusehei dujiga.

⁴³Ā jicu mūhure nu tuhtiinare mūhure yuhdurucabasaihca yuhu’, nire Cohamacu yu puhtorore”,

ni joaa tiha Davi cjiro. ⁴⁴Ā ni joaro Davi cjiro puhtoro tiha Cristore. Davi cjiro Cristo nuchuno cjiro jiparota Cristore puhtoro tiha. ¿Davi cjiro Cristo nuchuno cjiro jiparota dohse jiro baro tiro puhtoro tiari Cristore? —ni yahuha Jesu. (Cristo sehe Davi cjiro puhtoro jira.)

Judio masare buheina ti űaa yoaare yahuha Jesu

(Mt 23.1-36; Mr 12.38-40; Lc 11.37-54)

⁴⁵Masa payu Jesure ti tuhoro watoi Jesu sehe to buheinare o sehe ni yahuha:

⁴⁶—Mari judio masare buheina ti űaa yoaare űna noano wacu masiga. Ā jina ti yoaro sehe yoaena tjiga. Tina yoaa suhti űaa, masa ti űurocaroi majarea, pache duaropu paina puhtoare noano űo payo ti sinino sehe ti piti bocasinichu cahmana tina. Ā cahmaina jia, tina mari judio masa buhea wuhusei noaa dujia

dihtare bese duji duara. Tuhsu, bese numu jichu to cūhure noaa dujia dihtare cahmana. ⁴⁷Tina wapewahya numia ya wuhusere ti ya cūhure mana ti numiare. Ā yoaina jia, tina masa ti űurocaroi yoari pja Cohamacure sinimana masare nu dutia. Ti ā yoachū tinare Cohamacu jiro buhiri dahrerohca —niha Jesu tinare.

Wapewahyoro Cohamacu wuhui to warire yahuha Jesu

(Mr 12.41-44)

21 Ā ni yahu tuhsu niűeru wihbori caroi pache pua ti niűerure ti duhu űachū nu dujiro niha Jesu. Ti niűeru Cohamacu wuhure ti cahnochū ti wapahti jiha. ²Ā nu wapewahyoro pjacuoricoro to pua tucare to duhu űachū cūhure nuha. ³Tire nu tuhsu o sehe ni yahuha:

—Potocā niita nija musare. Ahricoro wapewahyoro pjacuoricoro sehe niűeru wihbori caropu duhu űaano paina jipihina ti wari yuhdoro wahre ticoro sehe. ⁴Paina pache pua jiro ti wapachuta ti ya jiro dūhsara. Ahricoro sehe pjacuoricoro jiparota jipihtia to chuhtire to nuchuboacare wa pahnohre —ni yahuha Jesu.

“Cohamacu wuhu cohāri wuhu jirohca”, niha Jesu

(Mt 24.1-2; Mr 13.1-2)

⁵Ā yoa paina Cohamacu wuhure o sehe ni űaa niha:

—Noaa tāa mehne yoari wuhu, noacari wuhu jijari. Masa Cohamacu ya wuhu cjihtire ti wari cjiro cūhu ti wuhupure noaca cūri jira —ni durucua niha.

Ti ā nichu Jesu o sehe ni yahuha tinare:

⁶—Ahri jipihtia mari űari cjiro wuhuse, ahri tāa cūhu cohō pihtia wahaahca. Ne cūria tāca tjuasi —niha Jesu tinare.

Pihtiri dacho cjihtore yahuha Jesu

(Mt 24.3-28; Mr 13.3-23)

⁷To ā nichu tuhoa tina sehe ō sehe ni sinituha tireore:

—Buheriro, ¿dohse jichu mu niriro sehe waharo ā waharohcari? ¿Pihtiri dacho panocā jichu dohse to waha ducachu ñnahcari sā? —ni sinituha tina Jesure.

⁸Jesu ō sehe ni yuhtiha tinare:

—Noano yoaga musa. Ā jina musare paina ti mahñoare tuhoena tjiga. Payu masa “Cristo jija yuhu”, niina taahca. Ā nia, “Mipure pihtiri dacho cjihto mahanocā dūhsara”, niahca. Ti ā nichu tinare tuhoena tjiga. ⁹Ā yoa paina “Cahma wajāa nina”, musare niahca. “Mipure puhtoare masa cohāa nina”, niahca. Musa tíre tuhona cuiena tjiga. Pihtiri dacho pano ō sehe waha muhtanohca. To ā wahachu pihtiri dacho cjihto dūhsasinohca mini —niha Jesu.

¹⁰Ā ni tuhsu ō sehe ni yahu namoha:

—Cū yahpa macaina pa yahpa macaina mehne cahma wajāahca. ¹¹Tuhsu, tuaro yahpa ñuhmi, masa payu juca mehne yaria, jipihtiro macaina dohatiahca. Ā yoa mūano macaa bajuamehneare masa ñua, ñu cūaa wahaahca.

¹²Ahri jipihitia ti ā wahahto pano, paina musare ñaha, ñano yoahca. Tuhsu, mari judio masa buhea wuhsei tina musare yahusā, peresu yoahca musare. Ti ā yoachū yahpari macaina puhto panoi, macari macaina puhto panoi ducunahca musa ti yahusāhtina. Yu yaina musa jiri buhiri ā yoahca. ¹³Ti ā yahusāchū musa sehe noaa buheare tinare yahunahca. ¹⁴Tí pjare musare ti yahusāchū puhtoroore musa yuhtihtore “Yahu masieraboca”, ni tuhotuena tjiga musa. ¹⁵Yuhu musare yahubasaihtja. Musare ā yoadohocu tuho masiare, noaa durucua cūhure musare yahuchū yoaihtja. Musa ā yoachū musare ñu tuhtiina

sehe musa durucua tuho, “Tí potocā jierara”, ni yuhti masisi. ¹⁶Tí pjare musa pūcūsuma, musa bahana, musa coyea, musa mehne macaina cūhu musare ñu tuhtiinare waahca musare yu yaina musa jiri buhiri. Ti ā yoachū musare ñu tuhtiina musa mehne macainare painare wajāahca. ¹⁷Ā yoa yu yaina musa jichū ñua, jipihitia musare ñu tuhtiahca. ¹⁸Musare ā ñu tuhtipahta ne mahanocā musare ñano yoasi. ¹⁹Ā jina Cohamacure wacū tuaina jiga musa. Musa ā yoana, Cohamacu mehne ā jirucunahca.

²⁰Ā yoa payu surara Jerusalēpu ti soroachū ñua, Jerusalēne ti cohāhto to mahanocā dūhsachū masinahca musa. ²¹Ti ā yoachū ñua Judea yahpai jina tūyucu cahapu muroca duhtijaro. Ā yoa Jerusalēi jiina wahajaro. Ā yoa campoi jiina Jerusalēpu wahaea tji-jaro ti waha bahrañohto sehe. ²²Tí dachorihī buhiri dahrea dachorihī jipihitia Cohamacu yare ti joari pū to niriro cjiro seheta ā waharohca. ²³Jipihtiropu ahri yahpai ñano yuhduahca. To ā wahachū, niiji wahcōa numia, ti pohnare pūina numia cūhu pjacuoro wahaahca. ²⁴Paina ahri maca Jerusalē macaina mehne cahma wajāahca. Ā cahma wajāa, paina ahri maca macainare jipihitia yahparipu na wahcā, peresu yoahca. Ā jia judio masa jieraina Jerusalēne ñano yoa, tinare yuhdurucaahca. Judio masa jieraina ya dacho to pihtichupu Jerusalē macainare ñano yoa duhuaahca —ni yahuha Jesu.

Jesu yahpapu to tjua tahtore yahuha

(Mt 24.29-35, 42-44; Mr 13.24-37)

²⁵Ā ni yahu tuhsu, tinare ō sehe ni yahu namoha:

—Tí pjare sū dacho macariro, ñami macariro, ñahpichoha cūhu cohtotaahca. Jipihitia ahri yahpa macaina “Cue, yarianahca”, ni

tuhotuina pjiri ma macaa pahcōri cuaro choro ti bisiro coa tachū tuhoa tuaro cuiahca. ²⁶Tí pjare mũano macaa yahpari, ñahpichoha cūhu tuaro ñuhmiahca. Ti ā wahachū ñua, masa sehe ahri yahpa to pihitihtore cohtaa, tuaro cuiahca. ²⁷Tí pjata yūhu masuno Cohamacu warocariro Cohamacu tuua mehne to si sitea mehne yū tachū ñuahca masa. ²⁸Ahri ti ā waha ducachū ñua, wacū tuaina jiga. Ā jina mũanopu ñuga. Tí pjare Cohamacu musare pichacapū wahaborinare to yūhdohto mahanocā dūhsarohca —niha Jesu.

²⁹Ā ni tuhsu ahri quiti mehne piti dahre buheha Jesu:

—Higueracure, paye yucu cūhure tuhutuga musa. ³⁰Tí yucūri pūri tichū ñua, cūhma cjihtō to mahanocā dūhsachū masina musa. ³¹Tó seheta ahri jipihitia yū niri cjirire ti ā wahachū ñua, Cohamacu masare puhtoro to noano sūho jihti pja mahanocā dūhsachū masinahca musa.

³²Musare potocā niita nija. Tí pja macaina ti variahto pano jipihitia yū niriro seheta ā waharohca. ³³Mũano, ahri yahpa cūhu pihitia wahaahca. Yū durucua sehe ne cohtotasi. Jipihitia yū niriro seheta ā waha sohtori tiarohca.

³⁴Yū tjua tahti dachore ne masierara musa. Ā jina noano yoaga. Bose mũmūrine bujua yoarucuenta tjiga. Ā jina cahaena tjiga. Ahri yahpa macaare pjiro tuhoutuena tjiga. Musa yū niriro seheta yoana, wacūenoca ahri yahpapū yū tachū musa ne cuasi. ³⁵Wahiquirore yurida wahiquirore wacūenoca to tuā suhoro seheta wacūenoca taihca yūhu. Jipihitina ahri yahpa macaina ti masieraro watoi tí dachoi wacūenoca ā waharohca. ³⁶Noano wacū masi cohtaga. Ā jina Cohamacure ahrire ā sinirucuga: “Ahri pihitiri dachore ā wahachū yūhure yoadohoga. Tuaare waga yūhure ahrire noano yū yūhduhti cjihtire. Tuhsu, Cri-

store mũ warocarirore cuiro marieno yūhure piti bocachū yoaga”, ni siniga Cohamacure —niha Jesu.

³⁷Ā yoa tí dachore Cohamacu wūhui Jesu buheha tiha. Ñaminipe buhe tuhsuro Olivo wama tidū tūcupū waha, tōpū ji bohrea tiha. ³⁸Bohrea taharipe jipihitina masa Cohamacu wūhupū tirore tuhoa wahaa tiha.

Sacerdotea puhtoa, judio masare buheina mehne wajā duaaha Jesure

(Mt 26.1-5, 14-16; Mr 14.1-2, 10-11; Jn 11.45-53)

22 Ā yoa tí pjare bucaerari pāore ti chuhti bose mũmūri mahanocā dūhsaha. Tí bose mũmūri pascua wama tiha. ²Ā jia sacerdotea puhtoa, judio masare buheina mehne Jesure wajā duaa, ti wajāhtore wacū macaha. Jesure wajā duapahta, masa sehere cuiha, “Suari”, nia.

³Ā yoa watīno Juda Iscariotere ñano to yoa dutichū Juda sehe yūhtihā tirore. Juda doce buheina mehne macariro jimaha. ⁴Ā yoa tiro sacerdotea puhtoare, Cohamacu wūhu macaina surara puhtoa mehne cūhure suhuro waha. Ti cahapū sū, tinare Jesure to ñohtore suhuro tina mehne. ⁵To ā nichū tuhoa, tina wahche, “Mūhure niñerure wapanahitja”, niha tina Judare. ⁶Ti ā nichū Juda “Jai, tirore musare ñohtja”, ni masa ti ñueraro watoi Jesure ñu tuhtinane to ñohti ñamine cohtasiniha.

Jesu buheina mehne to chū batoari mũmū jiha

(Mt 26.17-29; Mr 14.12-25; Jn 13.21-30; 1Co 11.23-26)

⁷Bucaerari pāo bose mũmūri ti ji ducari dacho jiha. Ā jiro pascua macaina cjihtire ovejare ti chuhtinane ti wajāhti mũmū jiha. ⁸Tí pjata Pedrore, João cūhure Jesu ō sehe ni yahuha:

—Bose n̄m̄m̄i mari ch̄htire cahnoyuna wahaga —niha Jesu tinare.

⁹—¿Mari pascua macaa ch̄htire noho baroi cahnoyu dutirocaijari m̄h̄u s̄are? —ni sinituha tina tire.

¹⁰Ti ā nich̄u Jesu ō sehe ni yahtih̄a:

—Jerusalēp̄u m̄sa s̄uch̄u co situ w̄ariro m̄sare piti bocarohca. To piti bocach̄u tiro mehne wahaga. ¹¹Ā waha-na tiro to s̄ho s̄ari w̄h̄p̄u s̄na tí w̄h̄u p̄rore ō sehe ni yahuga. “¿Dí tahtiai ȳh̄u ȳ buheina mehne pascua macaa chuare chunahcari?” ni sinitu dutirocahre buheriro”, niga tí w̄h̄u p̄rore. ¹²M̄sa ā nich̄u t̄horo, t̄p̄u m̄ano macari tahtiare p̄jiri tahtiare, noano tí cahnoyuri tahtiap̄ure m̄sare ñonohca w̄h̄u p̄ro. Tóí mari ch̄hti c̄j̄htire dahrega m̄sa —niha Jesu tinare.

¹³To ā nich̄u tina tí macap̄u wahaha. T̄p̄u tí s̄uch̄u tinare to niriro seheta wahaha. Ā jia tina pascua macaa chuare dahreha.

¹⁴Ti ch̄ri p̄ja jich̄u Jesu doce to buheina mehne ch̄ dujiha. ¹⁵⁻¹⁶T̄p̄u tí ch̄rop̄u dujiro Jesu tinare ō sehe ni yahuha:

—M̄sare niita nija. Ahri pascua bese n̄m̄urine mari dahreja Cohamac̄u to yainare to ȳh̄dohtore wac̄na. Baharo Cohamac̄u masare p̄htoro to noano s̄ho j̄rop̄u to yainare ȳh̄do tuhsurohca. To ā ȳh̄dohto pano ahri n̄m̄uri baro macaare pari turi ch̄eraja ȳh̄u. Ā j̄ic̄u m̄p̄ure ñano ȳh̄d̄u, ȳ yariahto pano ahri pascua macaa chuare m̄sa mehne tuaro ch̄ duaa tih̄i —niha Jesu.

¹⁷⁻¹⁸Ā ninota Jesu sihniri wahware na, Cohamac̄ure “Noana”, ni sini, tinare ō sehe ni yahuha:

—M̄sare niita nija. Cohamac̄u j̄ip̄ihtina bui p̄htoro to noano s̄ho j̄ihto pano ahri vinore ne pari turi sihnisi ȳh̄u. Ā jina ahri vinore na, m̄sa basi witi, sihniga —niha Jesu.

¹⁹Ā ni tuhs̄u p̄o curire na, Cohamac̄ure “Noana”, niha. Ā ninota, tí curire nuha, witiha tinare. Tí curire witirota, tinare ō sehe ni yahuha:

—Ahri ȳ p̄jac̄u jira. Ȳ p̄jac̄u ȳh̄ure ñu tuhtiinare ti wari p̄jac̄u jirohca. M̄sa ñaa yoari buhirire coh̄acu tac̄u yariaihca ȳh̄u. Ā jina ȳh̄ure m̄sa wac̄uhti c̄j̄htire ahrire ch̄uga —niha Jesu.

²⁰Ā ch̄u tuhs̄u tó seheta tiro tinare sihniri wahwa c̄h̄ure waha. Ā waro, tinare ō sehe ni yahuha:

—M̄sa ñaa buhirire coh̄acu tac̄u yariaihca. Ā yoacu ȳ dire coh̄aihca. Cohamac̄u “M̄sare ȳh̄doihtja”, to niriro m̄ s̄uch̄u ā ȳ yariaro mehne to niriro sohtori tirohca.

²¹M̄p̄ure t̄hoga m̄sa. Ȳh̄ure ñu tuhtiinare ȳh̄ure ñohtiro m̄p̄ure ȳh̄u mehne ōi dujira. ²²Cohamac̄u to dutiro sehta ȳh̄u mas̄no Cohamac̄u warocariro yariaihca. To ā yaria dutipach̄uta ȳh̄ure ñu tuhtiinare ñoriro pinihta ñabiaro ȳh̄d̄rohca —niha Jesu tinare.

²³To ā nich̄u tina sehe ti basi ō sehe ni sinituha:

—¿Jesure ñu tuhtiinare ñohtiro mari mehne macariro diro baro j̄icari na? —ni durucuha tina ti basi.

“¿Mari mehne macariro diro sehe j̄icari na p̄htoro?” ni durucuha Jesu buheina ti basi

²⁴Baharo Jesu buheina ō sehe ni durucuha:

—¿Mari mehne macariro diro sehe j̄icari na p̄htoro? —ni durucuha ti basi.

²⁵Ti ā ni durucuch̄u t̄horo Jesu tinare ō sehe ni yahuha:

—Cohamac̄ure cahmaeraina p̄htoa sehe ti masare dutia, pur̄no mehne dutira. Ā jia p̄htoare “Tina masare yoadohoina jira”, nimana paina masa tinare. ²⁶M̄sa sehe tó sehe yoasi m̄sa basi. M̄sa mehne macariro m̄sa wahmi se-

here to bahuro yoaro sehe jiro cahmana. Musa mehne macariro puhtoro ji duaro cahamacuno yoaro sehe jiro cahmana tire. ²⁷ ¿Diro jijari puhtoro? ¿Chũ dujiri sehe puhtoro jijari? ¿O chuare duhu payoriro sehe puhtoro jijiari? Chũ dujiriota jica puhtoro. To ã jipachuta yũhũ sehe cahamacuno yoaro seheta musare yoadohoi tai.

²⁸ Masa yũhũre ti ñano yoapachuta musa sehe yũhũre duhuerare. ²⁹ Æ jicu yũ Pũcu yũhũre to puhtoro sũriro seheta musa cũhũre puhtoa sũihtja yũhũ. ³⁰ Yũhũ puhtoro yũ jichũ yũ chũri meisai musa cũhũ chũ, sihninahca. Æ yoana musa puhtoa dujiare dujinahca. Musa tõi dujina Israe masare doce curuari macainare besenahca musa ñaina, noainare —niha Jesu to buheinare.

Pedro Jesure to cohãhtore yahuha Jesu

(Mt 26.31-35; Mr 14.27-31; Jn 13.36-38)

³¹ Æ ni tuhsũ Pedore Jesu õ sehe ni yahuha:

—Simo Pedro yũhũre tuhoga. Musare jipihtinare yũhũre cohãchũ yoa duara wafĩno. Trigo wese puro to trigore to wã site cohãriro seheta musare jipihtinare wafĩno ñano yoa duara “Ñaaare yoa-jaro”, nino. Æ yoa duaro, Cohamacũre sinihre. ³² To ã sinichũ ñũcu yũhũ sehe Cohamacũre sini payohi mũhũre. Yũhũre mũ wacũ tua duhuerahiti cjihtire sini payohi mũhũre. Æ jicu mũhũ yũhũ mehne macariro pari turi jicu mũ coyeare yũ yainare yoadohoga mũhũ —niha Jesu Pedore.

³³ To ã nichũ Pedro õ sehe ni yũhtiha:

—Puhtoro, yũhũre ti peresu yoapachuta, yũhũre ti wajã duapachuta mũhũ mehne macariro jiihtja —nimaha Pedro.

³⁴ Jesu õ sehe ni yũhtiha:

—Pedro mũhũre niita nija. Micha ñami caraca to duhto pano “Jesure

masieraja”, niihca mũhũ painare. Tia taha ã niihca mũhũ —niha Jesu Pedore.

Jesure ti ñano yoa dũcahto mahanocã dũhsaha

³⁵ Æ ni tuhsũ Jesu to buheinare õ sehe ni yahuha:

—¿Sohõ jiri pja musa niñeru wajuru marieina, pjiri wajuru marieina, dahpo suhti marieina musare yũ warocachũ paye baro dũhsari musare? —ni sinitu ñũha Jesu.

—Ne sãre yaba dũhsaerare —ni yũhtiha tina.

³⁶ —Tĩ pjare musare dũhsaerapachuta mipũ sehene niñeru wajurure cjuana tíre naga. Pjiri wajurure cjuana cũhũ naga. Æ jina musare ñosari pjĩ mariachũ musa suhtire duana tí pjĩne nuchũga. ³⁷ Ahrire musare nii nija. Cohamacũ yare ti joari pũi ti niriro seheta yũhũre ã waharo cahmana. Õ sehe niha tí pũi: “Tiro dutiare yũhdũrucaina mehne macariro jira’, ni-ahca masa”, ni joaa tiha —niha Jesu.

³⁸ —Ñũga puhtoro. Pua pjĩ ñosaa pjĩ-nine cjuaja sã —niha to buheina.

—Tõ puro tjica —ni yũhtiha Jesu.

Getsemanĩ wama tiropũ Jesu Cohamacũre siniha

(Mt 26.36-46; Mr 14.32-42)

³⁹ Æ yoa Jesu to ã yoarucuriro seheta Olivo wama tidũ tũcũpũ wahaha. To ã wahachũ to buheina tiro mehne wahaha. ⁴⁰ Tõpũ sũro tiro tinare õ sehe ni yahuha:

—Cohamacũre siniga ñano musa yoaeraho sehe —niha Jesu tinare.

⁴¹ Æ ni tuhsũ tiro to sahsero mahanocã waha namo, na tuhcuca caha sũ, ⁴² Cohamacũre õ sehe ni siniha:

—Mai, yũ ñano yũhdũhtire yoa duaeracu yoai tjia. Yũ ã nipachuta yũ cahmaa sehene yoai tjia. Mũhũ sehe masina. Mũ cahmano seheta yoaga yũhũre —ni siniha Jesu Cohamacũre.

⁴³ [To ã sinichu mũanopu duji tariro anjo Jesure bajua, yoadohoha tireore. ⁴⁴ Tuhsu, Jesu ñano yajeripohna ti, tuaro mehne Cohamacure siniha. Æ jia to so witia di yahpari yoaro sehe jia tireore wijaa, yahpapu bora caha suha.]

⁴⁵ Cohamacure sini batoa wahcãrucu su, tiro to buheina cahapu wihiha. Æ to wihichu to buheina tuaro cahyaina jia, carã niha. ⁴⁶ Æ jiro Jesu tinare õ sehe ni yahuha:

—¿Dohseana carãna nijari musa? Wahcãga. Cohamacure siniga ñano musa yoerahto sehe —niha Jesu tinare.

Jesure ñu tuhtiina tirore peresu yoaha

(Mt 26.47-56; Mr 14.43-50; Jn 18.2-11)

⁴⁷ To ã ni durucuro watoi masa payu wihiha. Juda doce buheina mehne macariro cjiro masare mu tã tariro jiha. Æ jiro tiro Jesu cahai wihi, wahsupu wihmiha tireore. ⁴⁸ To ã wihmichu Jesu tireore õ sehe ni sinituha:

—Judá, ¿yuhu masunore Cohamacu warocaritore yuhure ñu tuhtiinare ñocu yuhure wahsupu wihmijari muhu? —niha Jesu.

⁴⁹ To ã niri baharo Jesu buheina masa Jesure ti ñahahtire masia, tirore sinituha:

—Puhtoro, ¿sã ñosaa pjini mehne tina mehne cahmachema? —niha tina.

⁵⁰ Ti ã niri baharo cãiro Jesu buheina mehne macariro sehe sacerdotea bui puhtoro cahamacunore to ñosari pji mehne to cahmonore poto buhusehei jiri cahmonore cã pahrãnocaha. ⁵¹ To ã yoachu ñuno Jesu tireore õ sehe niha:

—Æ yoai tjiga —niha.

Ni, cahamacuno cahmono jiro cjiroi ña payoha. To ã ña payochuta cahmono mũnano seheta jiha tjoa. ⁵² Æ yoa tuhsu sacerdotea puhtoare, Cohamacu wuhu macaina surara puhtoare, bucuna

cãhure tireore ñaha tainare Jesu õ sehe ni sinituha:

—¿Dohse jiro baro musa ñosaa pjini, yucu tiri mehne yacaritore ti yoariro seheta musa yuhure ñahana tajari? ⁵³ Dachoripe Cohamacu wuhupu musa mehne yu jichu, musa yuhure ne ñahaerare. Æ jipachuta mipure musa ya dacho yuhure musa ñano yohti dacho jira. Mipu watino to ñano yohti dacho cãhu jira —niha Jesu.

“Tirore masieraja”, niha Pedro Jesure

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Tina Jesure ñaha tuhsu sacerdotea bui puhtoro ya wuhupu naaha tina tireore. Ti tãpu naachu Pedro yoaropu tinare ñu nãnu tiha. ⁵⁵ Puhtoro wuhupu su, tã wuhu cahai jiri wapai, noari wapa dacho macai pichaca wijãha paina. Ti ã wijãchu ñuno Pedro pichaca cahai dujiina mehne dujiha. ⁵⁶ To ã dujiri baharo cãcoro cahamacono tireore noano ñu, painare õ sehe ni yahuha:

—Ahriro cãhu tiro mehne jihre —niha ticoro.

⁵⁷ To ã nichu tuhoro Pedro õ sehe ni yuhtiha:

—Numino, tirore ne masieraja yuhu —nimaha tiro.

⁵⁸ Ticoro to ã niri baharocãta paio Pedre ñu, õ sehe niha tjoa:

—Muhu cãhu tina mehne macariro tjira —niha tiro.

—Ne jieraja —nimaha Pedro.

⁵⁹ Cã hora baharo paio painare õ sehe ni yahuha:

—Potocã tjira. Ahriro Galilea macariro jira. Æ jiro potocãta Jesu mehne jihre ahriro cãhu —ni yahuha tiro painare.

⁶⁰ To ã nichu Pedro õ sehe ni yuhtiha:

—Ne, mu nirirore masieraja yuhu —ni yuhtiha Pedro.

To ā ni durucuro watoi caraca duha. ⁶¹To ā duchūta Jesu wūhū cahai jiroo Pedrore majare nūrocaha. To ā yoachū Pedro sehe Jesu to yahurire wacūha. “Micha nāmi caraca to duhto pano, ‘Yūhū Jesure masieraja’, nīihca mūhū. Tia taha ā nīihca mūhū”, Jesu to niri cjirore wacūha Pedro. ⁶²Ā wacūno Pedro tōpū jiroo wijaa ta, tuaro tiirucuha.

Jesure bujūpe, cĵaha tina

(Mt 26.67-68; Mr 14.65)

⁶³Ā jia Jesure cohtaina surara tirore bujūpe, cĵā mūjaha. ⁶⁴Ā cĵā mūja, to caparire duhte dūcata, tirore ō sehe ni sinituha:

—ĶDiro mūhūre cĵājari? Nūerapaihta yahuga sāre —ni sinitu, bujūpeha tina.

⁶⁵Ā jia payū nāno ni durucuha tina tirore.

Jesure puhtoia sinituha

(Mt 26.59-66; Mr 14.55-64; Jn 18.19-24)

⁶⁶Bohrearoi judio masa bucūna, sacerdotea puhtoia, judio masare buheina cūhū cahmachuha. Ti ā cahmachunoi paina tina cahapū Jesure na taha.

⁶⁷—Yahuga sāre. ĶCristota jijari mūhū? —ni sinituha tina Jesure.

Ti ā nichū Jesu ō sehe ni yūhtiha:

—Mūsare yū yahuchū, yūhūre tūhosi mūsa. ⁶⁸Mūsare yū sinituchū yūhūre yūhtisi mūsa. ⁶⁹Mūsa yūhtierapachūta baharo curero jipihtia dachoripe yūhū masuno Cohamacū warocariro Cohamacū tua yūhūariro to potō būhūsehei dujihtja —niha Jesu.

⁷⁰To ā nichū tina jipihtina sinituha tjoa pari turi:

—ĶĀ nicū Cohamacū macūnota jijari mūhū? —niha tina.

—Tirota jija mūsa nino seheta —ni yūhtiha Jesu tinare.

⁷¹To ā nichū tūhoa, tina ō sehe ni durucuha ti basi:

—Ahiro Cohamacūre pjūro to nāno durucuchū mari basi tūhohi. Ā yoa ahrirore yahusāina tōpeina tĵijaro. (Tōpeina mehne tirore mari wajā duti masija) —niha tina ti basi.

Pilato Jesure sinituha

(Mt 27.1-2, 11-14; Mr 15.1-5; Jn 18.28-38)

23 Ā ni tuhsū tina jipihtina wahcāruca, Jesure Pilato cahapū naaha. ²To cahapū na sua, Jesure yahusā dūcaha:

—Ahiro mari ya yahpa macainare to nāno yoa dutichū sā tūhohi. Mari bui puhtoro ahiro wapa dutierara. Tuhsū, tiro “Puhtoro jija. Cristo masare yūhdohtiro jija yūhū”, ni durucure to basi —ni yahusāha tina Jesure.

³Ti ā ni yahusāri baharo Pilato Jesure ō sehe ni sinituha:

—ĶJudio masa puhtorota jijari mūhū? —niha tiro Jesure.

—Mū nino seheta tiro tĵija —ni yūhtiha Jesu.

⁴To ā nichū Pilato sacerdotea puhtoia, masa cūhūre ō sehe ni yahuha:

—Ahiro yaba buhiri mariaha —niha tiro.

⁵To ā nipachūta tina tuaro yahusā namoha:

—Tiro to buhea mehne masare cahmachuchū yoara. Galilea yahpai tiro tīre yoa dūcare. Ā yoa dūca tuhsū jipihtiro Judea yahpapū tīre tiro yoare. Mipū ōpū cūhūre tīre yoaro taro nina —ni yahusāha tina.

Herode Jesure sinituha

⁶Ti ā ni yahusāchū tūhoro Pilato sehe ō sehe ni sinituha:

—ĶAhiro Galilea macariro jijari? —niha tiro.

⁷—Tō macariro tĵira —ni yūhtiha paina.

Ti ā ni yuhtichu tuhoro Pilato sehe Jesu to jiri yahpare masino puhtoro Herode ya yahpa macariro Jesu to jichu masiha. Tíre masino Jesure Herode cahai warocaha. Tí pjare Herode Jerusalēi jia tiha. ⁸Tó panopu Herode Jesure tuhoa tiha. To ā tuhori baharo yoari pja baharo tirore nu duaha. Jesu Cohamacu tuua mehne to yoa nochu nu duamaha tiro. Ā jiro tiro Jesure nuño, wahcheha. ⁹Ā jiro payu tahari sinituha Jesure. To ā sinitupachuta Jesu ne yuhtieraha tirore. ¹⁰Sacerdotea puhto, judio masare buheina cūhu Herode cahai wahcāruca, tuaro Jesure yahusāha. ¹¹Ti yahusāri baharo, Herode to surara mehne bujūpe, Jesure nāno yoaha. Ā bujūpea, noari suhtirore puhtoro to sāari suhtiro yoaro sehe bajuri suhtirore sāaha tina Jesure. Ā bujūpe tuhsu, tirore Pilato cahapu warocaha tjoa. ¹²Tí dachore Herode, Pilato mehne noano ti basi cahma yoaina ji dūcaha. Tó panore ti basi cahma nu tuhtiina jisnimaha.

Masa Jesure wajā dutiha

(Mt 27.15-26; Mr

15.6-15; Jn 18.39-19.16)

¹³Ā yoa Pilato sacerdotea puhtoare, paina puhtoare, masa cūhure to pjirocachu, cahmachuha. ¹⁴Ti cahmachu pihichu nuño ō sehe niha Pilato tinare:

—Ahriroro yuhure na tana, “Tiro masare nāno yoa dutira”, nimahre musa yuhure. Mipu musa nuocaroi ahriroro noano sinitu pahñohi tjoa. Yu ā sinituri baharo musa tirore ā yahusārucuchu tirore nāa buhiri ne mariahna, yu nuichu. ¹⁵Herode cūhu tirore “Ne, nāa buhiri mariahna”, nihre. Ā nino ahriroro pari turi sāre wa majare tjuhre tjoa. Ā jina ahriroro to nāa buhiri mariachu tirore musa wajā duti masierara. ¹⁶Ā jicu tirore yuta dari mehne tjana dutiuhca yuhu. Ā ti tjanari baharo tirore woihtja —nimaha Pilato masare.

¹⁷[Cuhmaripe pascua bose numarine masa yairo cjihstore cūiro peresupu jirirore Pilato wiobasa mujaa tiha.] ¹⁸Ā jia Pilato “Jesure woihtja”, to nichu tuhoa jipihtina masa ō sehe ni sañurucuha:

—Tirore Jesure wajāga. Sā yairo cjihstore Barrabá sehere sāre wiobasaga —ni sañurucuha masa.

¹⁹Tí pjare Barrabá wama tiroro Jerusalēpu puhtoare cohā duaina mehne macariro, masunore wajāriro peresupu jiha. Ā jia tirore masa wio dutia niha. ²⁰Pilato Jesu sehere wio duamaha. Ā jiro tiro masare sinitu nuha tjoa. ²¹To ā wio duapachuta tina tirore ō sehe ni sañurucuha tjoa:

—Crusapu cjā puha wajāga tirore. Wajāga tirore —ni sañurucuha tina.

²²Ti ā nichu Pilato tia taha waharoi ō sehe nimaha tinare:

—¿Yabare nāno yoari tiro musa ā ni sañurucuchu? Ne tirore nāa buhiri mariahna. Ā jicu tirore wajā duti masieraja. Tirore yuta da mehne tjana dutiuhca. Tó purota yoa dutiuhca. Ā yoacu woihca tirore —niha Pilato.

²³To ā nipachuta tina tuaro mehne sañurucu namo, Jesure crusapu wajā dutiha. Ti ā ni sañurucuchu tuhoro ti cahmariro seheta Pilato yoaha. ²⁴Tirore ti siniriro seheta Pilato Jesure wajā dutiha. ²⁵Ā dutiro tiro peresupu jirirore masare cahmachechu yoarirore, masare wajārirore masa ti siniriro seheta Pilato Barrabá sehere wioha. Tuhsu, Pilato Jesure crusapu wajā dutiha.

Tina Jesure crusapu cjā puha, wajāha

(Mt 27.32-44; Mr 15.21-32; Jn 19.17-27)

²⁶To ā wajā dutichu tina Jesure wajā waha, naaha. Tí pja ti ā yoaro watoi Simo wama tiroro Cirene macariro campopu sūriro wihiha. Jerusalēpu to wihichu nuha Jesure naaina tirore piti boca,

ñaha, Jesu to wuari crusare tirore wua wahcã dutiha Jesu baharo.

²⁷ Æ yoa masa payu Jesure ñu nunu tiha. Æ jia masa watoi jia numia tirore ti ã yoachu ñua tuaro tiha. ²⁸ Ti ã ti-ichu tuhoro, tí numiare Jesu majare ñu, ò sehe niha:

—Jerusalē macaa numia, yuhure tiiena tjiga. Musa basi, musa pohna musa ñano yuhduhtire masina, tiibasaga. ²⁹ Paye dachori jichu ñabiaro yuhdunahca musa. Tí pjare masa ò sehe niahca: “Pohna mariea numia, pohna tierari numia, pñera numia mipu mari jichu noabiaboa”, niahca masa. ³⁰ Tí pjare tũcure ò sehe ni durucuahca masa. “Mũhu tũcu sã buipu bora pjaga. Sãre dũcatabga”, niahca masa cuia. ³¹ Masa buhiri marierirore yuhure ò sehe ti yoachu, ñaa buhiri cjuaina sehe ñabiaro wahaahca —niha Jesu.

³² Paina puaro, dutiare yuhdurucaina ti jichu tina cũhure Jesu mehne ti wajãhtinare naaha tina. ³³ Tinare naa, “Dapu cohã”, wama tiropu su, crusapu Jesure cã puha õha. Puaro yuhdurucaina cũhure paire to poto buhusehei, paire to cõ buhusehei cã puha õha. ³⁴ [Ti ã yoachu Jesu ò sehe niha:

—Mai, ahrina mipu ti ñaa yoarire boga tinare. Tina ti dohse yoarire masierara. Æ jicu ti ñaa yoari buhirire boga —niha Jesu.]

Æ yoa Jesu suhtire cahma witia tina docapeha. To suhti cjirire “Noa yaro jirohcaro õ”, ni cahma docapeha tina. ³⁵ Tuhsu, masa tõi ducuina ti ñurucuro watoi judio masa puhtoa Jesure ò sehe ni bujũpeha:

—Tiro paina masare yariaborinare yoadohoyumahtiro. Æ jiro tiro Cristo Cohamacu to beseriro jiro, mipu yariaboriro jiro, to basi yoadohojaro —ni bujũpeha tina.

³⁶ Surara cũhu tirore bujũpeha. Jesu cahai sua, tina tirore ñaa co vinore wamaha. ³⁷ Tĩre waa, ò sehe niha tina:

—Mũhu judio masa ti puhtoro jicu mu basi yoadohoga. Æ jii yuhdu witiilha mũhu —ni bujũpeha tina.

³⁸ Æ yoa tiro bui ti cã puha õri pjĩne ò sehe ni joaha: “Ahriro judio masa bui puhtoro jiriro jira”, ni joaha. (Griego ya mehne, Roma macaina ya mehne, judio masa ya mehne ã ni joaha.)

³⁹ Pairo tiro mehne ti cã puha daporiro yuhdurucariro sehe ò sehe ni, ñano durucuha Jesure:

—¿Mũhu Cristo masare yuhdoriro jierajari? Mu basi, sã cũhure yoadohoga —niha tiro Jesure.

⁴⁰ To ã nichu tuhoro pairo yuhdurucariro Jesu poto buhusehei ti cã puha daporiro sehe tirore ò sehe niha:

—Mari cũhure cãno potori buhiri dahrera tina. ¿Dohseacu Cohamacure ne ño payoerajari mũhu? ⁴¹ Marine ñaa buhirire yoaa, quihõno yoaa nina tina. Ñaare mari yoari buhiri marine buhiri dahrera tina. Ahriro sehe ñaare yoarere —niha tiro pairo yuhdurucarirore.

⁴² Æ nino, tiro Jesure ò sehe niha:

—Jesu, mũhu puhtoro jicu, tjua tacu, yuhure wacũga —niha tiro Jesure.

⁴³ To ã nichu tuhoro, ò sehe niha Jesu:

—Mũhure ahrire nii nija. Michare paraíso wama tiropu mũhu yuhu mehne jiihca —niha Jesu tirore.

Jesu yariaa wahaha

(Mt 27.45-56; Mr 15.33-41; Jn 19.28-30)

⁴⁴ Æ yoa cohari pja jichu sũ si duhua wahaha. Æ jiro jipihtiro tí dihtapure tia hora waro noano nahitiano jiha. ⁴⁵ Nahitiano to jiro watoi, Cohamacu wũhu macari suhtiro, dũcatari suhtiro dacho maca waroi bui sehe tũhnũ bora ta, puca cahsaro tũhnũroca yoja sua wahaha. ⁴⁶ Æ jiro Jesu ò sehe ni tuaro sañurucuha:

—Mai, yu catiare muhure wiaja mu nu wihbohto cjihtore —ni sañurucuha Jesu.

Á ni tuhsu yariaa wahaha.

⁴⁷To á yariachu ñuno, surara puh-toro sehe “Cohamacu tuariro jira”, nino: “Ahriro Jesu cjiro potocãta noariro jiri jimana”, niha surara puh-toro.

⁴⁸Á jia ti wajächu ñua tarina Jesu to yariachu ñua, ti wuhusepu tjuaa wahaha. Tjuaa waha, ti ñaa yoarire cahyaa mehne ti pëbuhui cãã õ wahcãha. ⁴⁹Jipih-tina Jesu yaina tiro mehne macaina, Galileapu tiro mehne tari numia cõhu Jesure yoraropu ñurocarucua niha.

Jesu pjacure masa copapu na sãa duhu payoha

(Mt 27.57-61; Mr 15.42-47; Jn 19.38-42)

⁵⁰⁻⁵¹Tí pjare José wama tiriro tói jiha. Judea yahpai jiri maca Arimatea wama tiri maca macariro jiha. Tiro noariro, quihõno yoariro jiro, Cohamacu to puh-toro ji ducãhtore cohtariro jiha. Á jiro tiro judio masa puh-tora mehne macariro jiparota Jesure ti wajã dutichu cahmaeramaha tiro. ⁵²Á jiro Pilato cahapu su, Jesu pjacure siniha. ⁵³Sini tuhsu, Jesu pjacure na boro, noari suhtiro mehne to pjacure wahmaha. Á wahma tuhsu, masa copapu tãcai ti sahari copapu na sãa duhu payoha to pjacure. Tí copare ne paina yariainare duhu payoerasiniha mini. ⁵⁴Tí dacho Sabado dacho macaã cjihtire ti cahnoyuri dacho jiha. Sabado judio masa ti sori numu cjihto mahanocã duhsaha.

⁵⁵Á jia Galileapu Jesu mehne tari numia masa copapu José mehne wahaha. Masa copapu su, tí copare nu, Jesu pjacure ti duhu payorire nuha. ⁵⁶Baharo ti wuhusepu tjuaa waha, me sitia mehne wisõa co mehne cahnoha tina. Tuhsu, Sabado jichu Cohamacu to dutiare Moise cjirore to cõri to dutiriro seheta tina soha.

Jesu masa wijaaha

(Mt 28.1-10; Mr 16.1-8; Jn 20.1-10)

24 Domingo jichu bohrearopu tí numia ti me sitia ti cahnoyumarire Jesu masa copapu na wahcãmaha. ²Tí copapu sua, tí copare bihari tãca pjõo ti duhu cõri tãcare nuha. ³Á ñua tina tí copapu sãa wahaha. Jesu pjacure bocaeraha tina. ⁴To pjacure bocaeraa, “¿Dohse wahapju?” ni tuhoutuha tina. Tí á ni tuhoutu durucu coãno watoi puaro mua si sitea suhti tiina tina cahai ducua. ⁵Tói ti ducuchu nu, numia cuia na tuhcuca caha suha. Tuhsu, mua sehe tí numiare õ sehe ni yahuha:

—¿Dohseana yariariro to jiriro cjirore tirore macajari mua? Mipure tiro catiriro jira. ⁶Tiro õre mariahna. Masa wijaa tuhsuhre. ¿Sohõ jiri pjare Galileapu mua mehne jiro musare to niri cjirore wacujari mua? ⁷“Yuhure Cohamacu warocarirore paio warohca ñainare. To á wari baharo yuhure crusapu cãã puha wajãahca tina. Á jicu yu yariari baharo tia dacho wahaboroi masa wijaaahca yuhu”, ¿musare to niri wacujari mua? —niha mua sehe.

⁸Ti á nichu tuhoa, numia sehe Jesu to niri wacũha. ⁹Ti á niri baharo tina tjuaa waha, once buheinare paina cõhure tãre yahu pahõoha. ¹⁰Tí numia sehe María Magdalena, Juana, María Santiago pocoro jiha. Tí numia mehne paye numia cõhu jiha Jesu buheinare yahua numia. ¹¹Ti á ni yahupachuta Jesu buheina sehe “Potocã nia nieraca. Mahõopea nica ahri numia”, ni tuhoutu-maha. Á jia tí numiare tuho duaeraha.

¹²Ti á nichu tuhora, Pedro sehe masa copapu muroca wahcã, ñuno wahaha. Tí copapu su, tiro muhri caha, ñuroca sõha. Jesure ti wahmari suhtiro dihtare nuha. “¿Dohse wahari na?” ni tuhoutu, tiro wuhupu tjuaa wahaha.

**Emau wama tiri macapũ
wahari mahapũ Jesu bajuaha**

(Mr 16.12-13)

¹³Tí dachoihta pũaro Jesu buheina mehne macaina Emau wama tiri macapũ waha niha. Jerusalē once kilómetro yoaro jira Emaupũ suhto. ¹⁴Emaupũ waha, jipihitia Jerusalēi tí pjare to ā waharire Jesure ti ñano yoarire durucu wahcãa niha. ¹⁵Ti ā ni durucuro watoi Jesu sehe ti cahapũ sũ, tina mehne waha. ¹⁶Tiروه ñũpahta tina tiروه “Jesu jira”, ni ñũ masieraha.

¹⁷—¿Dohse ni cahya durucu wahcãa nijari mũa? —ni sinituha Jesu.

¹⁸To ā nichũ tuhoa tina cahyaro mehne sũruca, Cleofa wama tiriro sehe Jesure õ sehe ni yũhtiha:

—¿Mipũre Jerusalēi tiniriro jipaihta mũhũ dihta ti yoari cjirire masierajari? —ni sinituha tiro.

¹⁹—¿Dohse wahari Jerusalēi? —niha Jesu.

To ā nichũ tina õ sehe ni yũhtiha:

—Jesure Nazare macarirore ti yoarire nina nija. Tiro Cohamacũ yare yahu mũhtariro jimahre. Ā jia to durucurire tuhoa to yoari cũhũre ñũa, “Tuariro jira”, ni tuhotuhre masa. Cohamacũ cũhũ āta ni tuhotuca. ²⁰Mari sacerdotea pũhũa, paina pũhũa mehne tiروه wajã dutia, painare wahre. Ti ā wachũ paina sehe tiروه crusapũ cjã puha wajãhre. ²¹“Roma macainare cohãhtiro Israe masa pũhũaro cjihto jira”, ni tuhotumahi sã tiروه. Micha mehne tia dacho wahara tiro to yariari baharo. ²²⁻²³Mahainacã numia sã mehne macaa numia sãre cũachũ yoahre. Bohrearopũ Jesu to masa copapũ tí numia sũ, to pjacũre bocaerayuhi. To pjacũre bocaeraa, tina tju wihi yahuhre. “Sãre anjoa bajuahre. Jesu catiyuhi”, ni yahuhre numia sehe. ²⁴Ti ā nichũ paina sã mehne macaina tí copapũ sũ, numia ti niriro seheta

ñũyuhiti. Tina cũhũ Jesure ñũerayuhi — niha tina Jesure.

²⁵Ti ā niri baharo Jesu õ sehe ni yahuha tinare:

—Mũa ne tuho masiera cureina jira. ¿Cohamacũ yare yahu mũhtaina cjiri ti nirire noano tuhoerari mũa? ²⁶Cristore to pũhũaro jihto pano mũanopũ to mũjahto pano tiروه ñano yũhdũro cahmare. ¿Tĩre masierasinihari mũa? — niha Jesu tinare.

²⁷Ā nino Cohamacũ Cristore to ni yahu ti joari cjirire Jesu yahu pahũonocaha tinare. Moise cjiro to joari cjirire Jesu yahu dũcaha. Tuhsũ, jipihitia Cohamacũ yare yahu mũhtaina cjiri Cristore ti joari cũhũre yahu pahũonocaha tiro.

²⁸Tina ti wahari macapũ ti sua cahachũ, Jesu sehe tinare yũhdũ wahcãno sehe yoaro nimaha. ²⁹To ā yoapachũta tina tiروه waha dutieraha:

—Sã mehne tjuaga. Ñamichahapũ jira. Nahinopũ nina —niha tina tiروه.

Ā jiro Jesu tina mehne wũhũpũ sãa wahaha. ³⁰Wũhũpũ sãa sũ, tiro tina mehne ti chũri mesapũ nuju sũ, pãore na, Cohamacũre “Noana”, niha. Ā nino tí pãore nuha na, tinare waha. ³¹To ā yoachũ ñũa tina Jesure ñũ masiha. Ti ñũ masi mũari baharo tiro buti mũa waha. ³²To ā buti mũa wahachũ ñũa tina ti basi õ sehe ni durucuha:

—Mahai tiro marine to durucuro watoi Cohamacũ to joari cjirire to yahuro watoi tuaro mari wacũ tuhotua mehne noano wahchea mehne tuhotuhi mari — niha tina ti basi.

³³Ā ni tuhsũ tina dóicãta Jerusalēpũ majare tjuaa wahaha tjoa. Tópũ sua, once buheinare paina mehne cahmachuinare boca. ³⁴Ā ti sũchũ, once buheina õ sehe niha:

—Potocãta mari pũhũaro masa wi-jaayuhi. Simo Pedro tiروه ñũyuhiti — niha once buheina.

³⁵ Ti ā nichu puaro Emau macaina mahai Jesure ti nūrire yahuha:

—Jesu to pāore to nuhachu sã ñu masihi tirore —ni yahu pahñoha tina painare.

Jesu to buheinare bajuaha

(Mt 28.16-20; Mr 16.14-18; Jn 20.19-23)

³⁶ Ti ā ni yahuro watoi ti cahai ji tuh-suha Jesu sehe.

—¿Jimajari mūsa? Noano jiga mūsa — niha tiro tinare.

³⁷ To ā nichu tuhoa tina “Mari yari-ariro cjirore ñuna nija”, ni tuhhotua, tu-aro cuiha. ³⁸ Ti ā cuichu ñuno tiro tinare ō sehe ni yahuha:

—¿Dohseana cuijari mūsa? ¿Dohseana “Ahri potocã jierara”, nijari mūsa? ³⁹ Yu wamomacarine, yu dahpori cūhure ñuga. Mūsa yūhure ñuna, ñu masinahca. Yūhure ñaha ñuga. Ñaha ñuna, masi-nahca mūsa. Yariariro cjiropu pjacu mariaha. Yūhu sehe pjacu tija —niha Jesu.

⁴⁰ Ā nino to wamomacari cūhure, to dahpori cūhure ñoha tinare. ⁴¹ To ā ñopachuta tina tuaro wahche, cuaa waha, “Ahri potocã jieraca”, ni tuhoh-tusnimaha. Ti ā tuhohuchū masino Jesu tinare sinitu ñuha:

—¿Ōi chua jijari? —niha tiro.

⁴² To ā nichu tuhoa wahi doharirore mi cūhure waha tirore. ⁴³ Tíre na, ti ñurocaroi Jesu chūha. ⁴⁴ Chu tuhsu, Jesu yahuha tinare:

—Sohō jiri pja mūsa mehne jicu mū sare yu yahuriro seheta mipu yūhu ā wahahi. Cohamacu dutia Moise cjiro marine to cūri cjiro to ā ni joariro seheta yūhure ā wahahre. Cohamacu yare yahu mūhtaina cjiro, Salmo joari tjure joaina

cūhu panopu yūhure ti ni yahuriro se-heta mipure yūhure ā wahahre. Āta wa-haro cahmahre —niha Jesu.

⁴⁵ Ā ni tuhsu Cohamacu yare ti yahu joari cjirore to buheinare masichu yoaha Jesu:

⁴⁶ —Cohamacu yare ti joari cjiro ō sehe niha: “Cristore ñano yūhduro cahmana. Ā jiro tia dacho wahaboroi to yari-ari baharo tiro masa wijaarohca. ⁴⁷ To masa wijaaari baharo jipihtia yahparipu to yaina Cristo yare yahuahca. Masa ti ñaa yoarire ti cahyahti cjihtire, “Ñano yoaeraja” ni, ti tuhohumarire ti cohto-tahti cjihtire, Cohamacure ti cahmahti cjihtire, ti ñaa buhiri tiare to cohāhti cjihtire yahuahca to yaina. Ā yahua taa, Jerusalēpu yahu dūcaahca”, niha Cohamacu yare ti joari pūi —niha Jesu.

⁴⁸ Ā ni tuhsu ō sehe ni yahu namoha:

—Mūsa sehe ahri jipihtiare ñurina jira. Ā jina painare yahunahca. ⁴⁹ Cohamacu “Tirore mū sare warocaihtja”, to nirirore yūhu sehe mū sare warocaihtja. Ā jina Jerusalēpu ahri muano macaa tuua mū sare to wihihore cohtaga mūsa —niha Jesu to buheinare.

Jesu muanopu mujaa wahaha

(Mr 16.19-20)

⁵⁰ Ā ni tuhsu Jesu tinare Jerusalēi jinare Betania cahapu naaha. Tōpu su, Jesu to wamomacari mehne ñui muo, “Noano jiga”, niha tinare. ⁵¹ Ā ni tuhsu, tinare cū, muanopu mujaa wahaha. ⁵² To mujari baharo tina tirore ño payo, Jerusalēpu tuaro wahchea mehne tjuaa wahaha. ⁵³ Tói jia, dachoripe tina Cohamacu wūhu Cohamacu mehne durucu, “Noana”, ni ño payoha tina tirore.

San Juan

Cohamacu ya duserore yahuriro masunota ji ducaha

1 Dóiputa ahri yahpa to jihto panoputa Cohamacu ya duserore yahuriro Cristo masare yuhdachu yoahrtiro dóihta ji tuhsua tiha. Tiro Cohamacu mehne jiha. ²Á yoa tirota Cohamacuta jinocahno niha. ²Dóiputa wahmanoputa Cristo Cohamacu mehne jiha. ³Á yoa wahmanopure ne mariahri cjirire bajuamehneha. Ahri yahpare, muanore, jipihtiare, jipihitina cūhure bajuamehne dutiha Cohamacu tirore. Á jiro ahrire bajuamehne pahñooha tiro. Ahrire mipure mari ñuare, mari ñuera cūhure to bajuamehnerachu ne mariaboa. ⁴Cristo catiare wariro jiro nina. Buhriaro marine to noano ñu masichu yoaro seheta tiro to Pucuro muano macarirore noano masichu yoara. Á yoaro to Pucuro muano macarirore masichu yoara masare. ⁵Ahri yahpa macaina ñaare ti wacū ti goa pjaa nahitiano yoaro sehe jia nina. Cohamacu ya duserore yahuriro buhriaro noano marine to ñu masichu yoaro seheta masare masichu yoara. Á yoa nahitiano buhriarore to yuhduracaeraro seheta Cristore ñaa ne yuhduracaerara.

⁶⁻⁷Cohamacu João wama tiriro sehere warocaha, Cristore buhriaro yoaro sehe jirirore masare yahu muhta dutiro. To á warocachu João sehe masare yahuro tare to yahurirore Cristore jipihitina ti wacū tuahti cjihtire. ⁸João sehe Cristo jierare. Á jieraro tiro Cristo sehere masare yahu muhtano tare. ⁹Cristo buhriaro yoaro sehe jiriro jipihitina masare Cohamacure masichu yoahrtiro sehe ahri yahpapu tari jire. Potocā tjira

ahri. Tiro buhriaro yoaro sehe jiriro waro tjira.

¹⁰Cristo ahri yahpai jia timare. Ahri yahpare bajuamehneriro jiri jimare. To á jipachuta ahri yahpa macaina sehe tirore ne masierare. ¹¹To ya yahpai tiro masa bajuari jimare. To ya yahpai masa bajuariro to jipachuta to ya yahpa macaina sehe ne tirore cahmaerare. ¹²Ti á cahmaerapachuta, tirore cahmaina sehere, tirore wacū tuaina sehere Cohamacu to pohna jichu yoari jire. ¹³Tina Cohamacu pohmata jia nina. Á jia masa ti masa bajuariro seheta jierara, Cohamacu pohna ti wahachu. Tuhsu, masa ti cahmariro seheta jierara, Cohamacu pohna ti wahachu.

¹⁴Á jiro Cristo masuno to ji ducari baharo mari mehneta jire tiro. To á jichu ñuna masare cahiri, potocā jiare yahuriro to jichu sā masii. Tiro dihta Cohamacu macuno jiro tuariro noariro jire. To á jiriro jichu sā masii. ¹⁵João Cristore yahu muhtano ō sehe ni sañurucure masare yahuro:

—Siro tara yu ō sehe ni yahuriro: “Tiro yu baharo tariro jira. Á jiparota tiro yu yuhdoro tuariro jira. Tiro yu masa bajuahto panoputa ji tuhsua. Á jiro tiro yu yuhdoro tuariro jira”, musare yu ni yahuriro ahriro tjira —nire João Cristore masare yahuro.

¹⁶Tiro Cristo sehe noariro tuaro masare cahiriro jiro marine jipihitinare noano yoarucure. ¹⁷Cohamacu dutiare Moise cjiro sehe cūbasa muhtaa tiha marine. Jesucristo sehe Cohamacu masare to cahiare buhero tare. Cohamacu to potocā durucua cūhure buhero tare tiro. ¹⁸Masa ne Cohamacure ñuerara. Tirore mari ñuerapachuta to macuno to tuaro cahiriro cūirota jiriro sehe to Pucurore marine masichu yoare.

**Paina João masare
bautisarirore sinituha**

(Mt 3.11-12; Mr 1.7-8; Lc 3.15-17)

¹⁹Sã coyea judio masa puhtoia Jerusalēi jiiinare sacerdotiare, Cohamacu wuhui dahraina cūhure João cahapu warocari jire. “¿Diro baro jijari mūhu?” ni sinitu dutia warocari jire tinare. Ti ā ni sinituchū ō sehe ni yahure João sehe. ²⁰Ne yaro marieno yahure. Potota yahure:

—Yuhū Cristo Cohamacu masare yuhdūchū yoa dutiro to warocariro jieraja —nire tiro.

²¹To ā nichū tina sehe tirore pari turi siniture tjoa:

—¿Mūhū Cristo jieracu, Elia sehe jijari mūhu? —nire tina.

—Jieraja yuhū —nire tiro.

—¿Sã cohtariro Cohamacu yare yahu mūhtariro sehe jijari mūhu? —nire tina.

—Tiro jieraja yuhū —nire João sehe.

²²To ā nichū tina tirore pari turi ō sehe ni siniture tjoa:

—Sāre sinitu dutiinare sã noano yahuhto sehe poto sāre yahu bahrañoga. ¿Diro baro sehe jijari mūhu? ¿Mū basi mūhū sehe dohse jiro baro “Jija yuhū”, nijari mūhu? —nire tina Joāore.

²³Ti ā nichū ō sehe ni yūhtire tiro:

—Masa marienopū ō sehe ni sañuru-curiro jija yuhū Cohamacu yare yahu mūhtariro Isaia cjiro to ni yahuriro seheta: “Mari puhtoro to tahto pano mūsa ñaa tuhotuare cohtota, cahno mūtaga mūsa”, ni masare yahu sañurucuriro jija yuhū —nire João tinare.

²⁴Joāore sinituina fariseo curua macaina ti warocarina jire. ²⁵Ā jia tina Joāore ō sehe ni siniture tjoa:

—¿Mūhū Cristo, Elia, Cohamacu yare yahu mūhtariro sã cohtariro jierapacūta dohseacu masare bautisajari mūhu? —nire tina.

²⁶Ti ā nichū tuhorō ō sehe ni yūhtire tiro:

—Yuhū co mehne masare bautisaja. Pairo sehe mūsa masierariro mūsa watoi ji tuhsura. ²⁷Tiro sehe yū baharo tariro yū yūhdoro tuariro jira. Noa yūhduariro jira. Tiro yoaro sehe jieraja yuhū sehe. Ā jicu tirore tuhotucū, “Wiho jiro jija yuhū”, ni tuhotuja yuhū —nire João tinare.

²⁸Ā ni durucure tina, Betaniapū Jordāo wama tiri ma pa būhusehe coapu, João masare to bautisariropu.

**Jesu Cohamacu to warocariro to
oveja yoaro sehe jiro jira**

²⁹Pa dachoi Jesu João cahai cahacā curero to tachū João tirore ñūno ō sehe nire:

—Ñuga. Ahriro Cohamacu to warocariro to oveja yoaro sehe jiro jira. Ovejare mari wajāriro seheta masa ahriro cūhure wajāahca. Ā yariaro ahri yahpa macainare ti buhiri tiare cohānohca tiro. ³⁰Ahrirota jira yū ō sehe niriro: “Yū baharo tariro yū yūhdoro tuariro jira. Yū masa bajuahto pano tiro ji tuhsuha. Ā jiro tiro yū yūhdoro tuara”, yū niriro ahrirota jira. ³¹Yuhū sehe ahrirore noano waro masiera tihi. Ā masierapaita co mehne bautisai tai nii yū coyea Israe masa ahrirore ti masihto sehe —nire João.

³²Ā ni tuhsu João to ñūri cjirore ō sehe ni yahu namore tjoa:

—Espiritu Santo muanopū buja yoaro sehe duji ta, Cristo mehne to tjuachū ñūhi. ³³Cohamacu yūhure to yahuerachū tirore ne masieraboia yuhū. Wiho mejeta tiro yūhure masare co mehne dipū bautisa duti warocariro Cohamacu sehe ō sehe ni yahu mūhta tuhsure yūhure: “Espiritu Santo duji ta to bui to tjuarucu sūriro tirota jirohca. Tiro sehe Espiritu Santore to yaina mehne ā jirucuchū yoarohca”, nire Co-

hamacu yuhure. ³⁴ Mipɔ pinihtare to ̃ ni yahurirore n̄u tuhsuhi yuh̄u. ̃ Ā n̄uc̄u “Ahr̄iro potoc̄ata Cohamac̄u mac̄no jira”, ni yahuja yuh̄u musare —ni yahure Joāo s̄are.

Jesu buheina to pji m̄htaina jira

^{35–36} Pa dachoi Joāo mehne s̄a p̄aro to buheina s̄a ducuch̄u, Jesu s̄a cahai yuh̄du wahc̄ano nire. To ̃ yuh̄du wahc̄ach̄u Joāo tirore n̄no, pari turi ̃ o sehe nire s̄are:

—N̄uga. Ahr̄iro Cohamac̄u to oveja yoaro sehe jiroto jira —nire Joāo.

³⁷ To ̃ nich̄u s̄a p̄aro to buheina sehe t̄ire tuhona Jesu baharo wahahi. ³⁸ S̄a ̃ wahach̄u n̄no Jesu s̄are majare n̄u, ̃sehe ni siniture:

—¿Nohop̄u wahajari musa? —nire tiro.

To ̃ nich̄u s̄a c̄uh̄u ̃ sehe ni sinitu n̄u tirore:

—Rabi, ¿nohop̄u jijari m̄uh̄u? —nihi s̄a tirore. (Rabi s̄a ya mehne nina “buheriro”, nina nija.)

³⁹ —Yuh̄u mehne tatjiāhna n̄na taga —nire Jesu s̄are.

To ̃ nich̄u s̄a sehe to jiroto n̄na wahai. Tí pjare n̄amichap̄u cuatro hora jire. ̃ Ā jina tí dachore tiro mehne tjuai s̄a.

⁴⁰ S̄a p̄aro Joāore tuhoina, Jesure n̄nu ti wahc̄aina yu piti Andre mehne jii. Andre sehe Simo bahuro jire. ⁴¹ ̃ Ā jiro tiro d̄oihta to wahminore Simore maca, boca, tirore ̃ sehe ni yahuha:

—Mesiare Cohamac̄u marine yuh̄duch̄u yoa dutiro to warocarirore s̄a bocahi —niha Andre Simore. (Mesia s̄a ya mehne nina “Cristo”, nina nija.)

⁴² ̃ Ā ni tuhsu tiro Simore Jesu cahai naahre. To cahai ti such̄u n̄no Jesu sehe Simore ̃ sehe nire:

—Muh̄u Simo wama tiroto, Jona mac̄no jira. Mip̄ure m̄uh̄ure Cefa ni wama pisuihtja —nire Jesu Simore.

(Cefa s̄a judio masa ya mehne nina “Pedro”, nina nija.)

Felipere, Natanae c̄uh̄ure pjiha Jesu

⁴³ Pa dachoi Jesu Galilea yahpap̄u waha duare. ̃ Ā jiro to wahahto pano tiro Felipere piti boca, ̃ sehe nire:

—Yuh̄u mehne macariro cjihto taga —nire Jesu.

⁴⁴ Felipe sehe Betsaida macariro jire. Tiro, Andre, Pedro mehne c̄u maca macaina jire tina. ⁴⁵ ̃ Ā yoa Felipe Natanaene maca, tirore bocaro ̃ sehe ni yahure:

—Cohamac̄u dutiare Moise cjiro to joari p̄up̄u to yahurirore paina Cohamac̄u yare yahu m̄htaina cjiro c̄uh̄u ti yahurirore s̄a bocahi. Jesu Nazare macariro, José mac̄no tjira —nire tiro Natanaene.

⁴⁶ —Nazarep̄ure ne c̄airo noariro mariahna —nire Natanae.

—N̄u taga m̄uh̄u —nire Felipe.

⁴⁷ ̃ Ā yoa Jesu cahai to such̄u n̄no Jesu sehe ̃ sehe nire Natanaene:

—Ahr̄iro mip̄u tariro potoc̄ata noariro judio mas̄no waro jira. Tirore mah̄noa ne mariahna —nire Jesu Natanae sehere.

⁴⁸ To ̃ nich̄u tuhoro Natanae sehe tirore ̃ sehe ni siniture:

—¿Dohseacu yuh̄ure noano masijari m̄uh̄u? —nire.

—Felipe m̄uh̄ure to pjihto pano, higeracu docai mu jich̄u n̄uhi yuh̄u m̄uh̄ure —nire Jesu.

⁴⁹ To ̃ nich̄u Natanae sehe tirore ̃ sehe nire tjao:

—Buheriro, potoc̄ata m̄uh̄u Cohamac̄u mac̄no jira. M̄uh̄u Israe masa s̄a Puh̄toro cjihto jira —nire Natanae.

⁵⁰ To ̃ nich̄u tuhoro ̃ sehe ni yuhtire Jesu:

—Higeracu docai m̄uh̄ure yu n̄urire masicu yuh̄ure “Cohamac̄u mac̄no jira”, ni wac̄u tuara m̄uh̄u. ¿Tita m̄uh̄ure ̃ masich̄u yoajari? Ahri m̄uh̄ure yu n̄uri

yahdoro Cohamacu tuaa mehne yoa ñoihca yuhũ. Yũ ã yoa ñochũ ñuihca mũhũ —nire Jesu Natanaene.

⁵¹ Æ ninota õ sehe ni yahu namore:

—Potocãta mũhũre niita nija. Yuhũ masũno Cohamacu warocariro tjija. Mũanopũ parĩ mũachũ Cohamacu to yaina anjao yũ bui ti duji tachũ, ti mũjachũ cũhũre ñuihca mũhũ —nire Jesu tirore.

Caná wama tiri macapũ ti wamomaca dũhteropũ Jesu wahaha

2 Tia dacho baharo Canái Galilea yahpai jiri macai wamomaca dũhteri bose mũmũ jire. Æ jiro Jesu pocoro tí wũhũpũ jire. ² Jesu mehne sãre to buheina cũhũre wamomaca dũhteropũ pjirocare tina. ³ Ti bose mũmũ macaa vino pihtichũ Jesu pocoro tirore õ sehe ni yahure:

—Mipũre vino pihtia wahare —nire ticoro Jesure.

⁴ To ã nichũ tuhorõ Jesu õ sehe nire:

—Inõ, ¿dohseaco taco tíre yuhũre yahujari mũhũ? Masa yuhũre ti masihtõ dũhsasinina mini —nire Jesu to pocorore.

⁵ To ã niri baharo to pocoro sehe ti cahamacare õ sehe ni dutire:

—Yũ macũ to dutiriro seheta yoaga —nire ticoro.

⁶ Tí pjarũre sã coyera judio masa Cohamacu yare yoaa taa masare ti pjarũre ã cosarucunoca dutia tire. Æ yoa tí wũhui seis situ pari tãa mehne ti yoaa situ pari co posa tia situ pari jire. Tí situ pari Cohamacu yare yoaa taa ti cosaa co posa tia pari cjiri jire. Tí situ parire cincuenta a setenta litro posa mũ sure. ⁷ Tói ti jichũ ñũno tí wũhũ macaina cahamacare õ sehe ni dutire Jesu:

—Ahri situ parire co mehne pio sãa namoga wahpaa pari ti wahahto sehe —nire Jesu.

To ã nichũ tina sehe noano wahpo dapõ pahñonocare ti parire.

⁸ Ti ã yoari baharo Jesu tinare õ sehe ni dutire tjõa:

—Mipũre tí core wa na, wũhũ macarirore waga —nire.

To ã nichũ tuhoa tí core wa na, wũhũ macarirore ware.

⁹ Ti ã wachũ tiro sehe tí core vino to wahachũ yoaa core sihni ñũre. Tí core nohoi to tarirore masierare tiro. To ã masierapachuta to cahamaca tí core waina sehe masire. Wũhũ macariro ã masieraro wamomaca dũhterirore pjiroca, ¹⁰ õ sehe ni yahure:

—Paina masa noaa core vinore wa mũhtana. Masa ti noano sihniri baharo ña curea core wara tina. Mũhũ sehe noaa core wihbo, baharo curero tí core ware sãre —nire wũhũ macariro wamomaca dũhterirore.

¹¹ Canái Galileai jiri macai Jesu core vino to wahachũ yoari cjiri coã to ba juamehne dũcari jire. Æ yoaro painare to tuaare ñore Jesu. To ã ñori baharo sã to buheina tirore wacũ tuai.

¹² Baharo Jesu to pocorore, to bahanare, sãre to buheina cũhũre Capernaupũ suho sure. Tópũ suna, mahaa dachoricã tjuasinii sã.

Jesu Cohamacu wũhũpũre sũha

(Mt 21.12-13; Mr 11.15-18; Lc 19.45-46)

¹³ Pascua jichũ judio masa sã bose mũmũri cjihti mahanocã dũhsatjiãhre. Æ jiro Jesu Jerusalẽpũ sure. ¹⁴ Tópũ sũro tiro Cohamacu wũhũpũ sãa sũro, wachũare, ovejare, bujaare duainare boca sure. Tuhsũ, niñerure cohtotaina ti mesaripũ ti dujichũ tina cũhũre boca sure. ¹⁵ Æ boca sũro yuta dari mehne tjãnari da yoa, tinare jipihtinare sopacapũ tjana nũnũ wionocare. Oveja, wachũa cũhũre tjana nũnũ wionocare tiro. Æ yoa niñeru cohtotaina ti mesarire na majarero ca doca cũnocare. Ti niñeru tũri

cāhure doca sitenocare. ¹⁶ Ā yoa tuhsu bujaare duainare ō sehe nire:

—Musa bujaare na wijaahga. Yū Pūcu ya wuhure pache duari wuhū yoaena tjiga —nire Jesu tinare.

¹⁷ To ā yoachū nūna sā to buheina sehe Cohamacū yare ti joari pūi to niri cjrيره wacūi: “Cohamacū, mū wuhūre tuaro cahija. Ā cahīcu mū wuhūre nāno ti yoachū nūcu tuaro cahyaja yuhū’, ni joaa tiha Cohamacū yare ti joari pūi”, ni wacūi sā Jesu buheina.

¹⁸ Jesu to ā yoari baharo sā coyeya judio masa puhtoā tirore ō sehe ni siniture:

—¿Dohseacu mūhū ahrinare Cohamacū wuhūpūre jjinare cohā wiori? Cohamacū mūhūre tíre yoa dutiriro to jichū Cohamacū tuaa mehne yoa nōga mūhū sā nūhti cjihtire —nire tina Jesure.

¹⁹ Ti ā nichū Jesu ō sehe ni yūhtire:

—Ahri wuhūre musa cohāchū tia dacho wahaboroi tuhsuhtja yuhū —nire Jesu tinare.

²⁰ —Tia dacho mehne ahri wuhūre tuhsusi mūhū. Cuarenta y seis cūhmari waro ti yoari wuhū jira ahri wuhū —nire tina Jesure.

²¹ To ā nichū tina tirore noano tūhoerare. Jesu “Ahri wuhūre” nino, to pjacūre nino niri jimare.

²² Ā yoa to yariari baharo, to masa wi-jaari baharo sā to buheina sehe to niri cjrيره wacūna, Cohamacū yare ti joari pūre Jesu to yahuri cāhure “Tí potocā tjira”, ni wacūi sā.

Jipihtina ti wacūare Jesu masina

²³ Pascua bose nūmūri jichū Jesu Jerusalēpū jire. Tóti to jichū masa payū Cohamacū tuaa mehne to yoa nōchū nūna tirore wacū tuare. ²⁴ Ti ā wacū tuapachūta Jesu masa ti wacūare noano masino, “Yūhūre ā wacū tuarucuahca”, ni tūhotueraha. ²⁵ Tiro masa ti tūhotuare

noano masire. Ā masino masa ti tūhotuare painare ne sinitu nūerare.

Jesu Nicodemore yahuha

3 Tí macai Nicodemo wama tiro, judio masa puhtoā mehne macariro jire. Tiro fariseo curua macariro jire. ² Cū nāmi tiro Jesu cahai ta, tiro mehne ō sehe ni suhūduri jire:

—Buheriro, mūhū Cohamacū to buhe dutiro to warocariro mū jichū sā masija. Mūhū payū tahari Cohamacū tuaa mehne yoa nōna. Cohamacū mūhūre to yoadohoerachū, mūhū sehe to tuaa mehne ne ā yoa nōaeraboā —niri jire Nicodemo Jesure.

³ To ā nichū tūhoro Jesu sehe ō sehe ni yahuri jire:

—Potocā mūhūre niita nija. Pari turi masa bajuariro yoaro sehe wahariro dihta mari puhtoro Cohamacū mehne ji masina —niha Jesu.

⁴ —Cuenah. ¿Bucūro sehe dohse yoa pari turi masa bajuabocari tiro? To pocoro niji suhtiropū majare sāa, pari turi bajua masieraboca tiro —niri jire Nicodemo.

To ā nichū tūhoro Jesu ō sehe ni yūhtiri jire tjoa:

⁵ —Potocā niita nija mūhūre. Co mehne, Espiritu Santo to tuaa mehne pari turi masa bajuariro dihta mari puhtoro Cohamacū mehne ji masina. ⁶ Nūmia nijipocosanūmia jia, macanacāre masa bajuachū yoara. Espiritu Santo sehe masare Cohamacū pohna jichū yoara. ⁷ “Pari turi masa bajuariro yoaro sehe wahariro dihta mari puhtoro Cohamacū mehne ji masina”, yū nichū, tūho wisiecu tjiga. ⁸ Espiritu Santo masare Cohamacū pohna to yoachū wihnono yoaro sehe jira. Wihnono to tariropū tara. To taro coa tachū mari tūhoja. Ā tūhōpanahta to tarirore, to waharirore ne masieraja. Tó seheta yoara

Espíritu Santo masare Cohamacu pohna jichu yoaro —niri jire Jesu Nicodemore.

⁹—Mũ niare noano masieraja —niri jire Nicodemo.

¹⁰To ã nichu tuhoro õ sehe niri jire Jesu:

—Mũhu judio masare buheriro jipaita, ¿dohseacu yũ niare tuhoerajari?

¹¹Potocã mũhũre niita nija. Sã masirire, sã ñũrre sã yahuja. Sã ã yahupachũta ne mũsa sã coyeya judio masa ne tuho duaerare. ¹²Ahri yahpa macaa mehne masa ti masa bajuari mehne mũhũre piti dahre yũ buhe muhtarire “Potocã tjira”, nierara mũsa. ã nierana piti dahre buhero marieno Cohamacu yare yũ yahuchũ cũhũre “Potocã tjira”, nisi mũsa.

¹³Ne cũiro mũanopũ Cohamacu cahapũ wahariro ne pari turi tjua tasi. Yũhũ masũno Cohamacu warocariro yũhũ dihta mũanopũ jiriro ahri yahpapũ tahi. (ã jicu yũhũ dihta Cohamacu yare mũsare yahu masija.) ¹⁴Panopũre masa marienopũ Moise cjiro bronce wama tiri comaa mehne ti yoarirore agãre yucucu ti dapodu sohtoapũ duhu õ dapoha. Yũhũ cũhũre masũno Cohamacu warocarirore tiro agãre to duhu õ daporiro seheta yũhũ cũhũre duhu õ dapoahca.

¹⁵Yũhũre ti ã yoari baharo jipihtina yũhũre wacũ tuaina jipihtia dachoripe Cohamacu mehne ã jirucuahca —niri jire Jesu.

Cohamacu jipihtinare cahĩna

¹⁶ã ni tuhsũ õ sehe ni namori jire Jesu:

—Cohamacu jipihtina ahri yahpa macainare tuaro cahĩna. ã jiro yũhũre to macũnore cũirota jiriore Cohamacu warocare jipihtina yũhũre wacũ tuaina pichacapũ ti wahaerahto cjihtore. ã jia Cohamacu ya catia mehne ã catirucuahca tina. ¹⁷Cohamacu yũhũre to macũnore masare buhiri dahre dutiro warocaerare ahri yahpapũre. Masare

pichacapũ wahaborinare yũhdũchũ yoah tiro cjihto sehẽre yũhũre warocare.

¹⁸Yũhũre Cohamacu macũnore wacũ tuainare ne buhiri dahresi Cohamacu. Yũhũre wacũ tuaeraina pinihtare Cohamacu buhiri dahre duti tuhsũre. Masa yũhũre Cohamacu macũnore cũirota jiriore ti wacũ tuaerari buhiri buhiri dahrerohca tinare. ¹⁹Yũhũ Cohamacu macũno ahri yahpapũ tacũ buhriro to noano marine to ñũ masichũ yoaro seheta Cohamacu yare noano masichũ yoaja. Yũ ã masichũ yoapachũta, yũhũre wacũ tuaeraina sehẽre yũhũre cahmaerara. Ti ñaa yoaa sehẽre noano cahmana. Ti ã cahmari buhiri tinare buhiri dahre duti tuhsũre. ²⁰Jipihtina ñaare ã yoarucuina baro ti ñaa yoare duhu duaerara. ã jia buhriro to bajuro dahrero seheta ti ñaa yoarire “Bajuro dahreri” nia, yũhũre cahmaerara tina. ²¹Quihõno yoaina sehẽre yũhũre, yũ buhea cũhũre cahmana. Cohamacu yoadohoro mehne to yare ti yoare yũ noano bajuro dahrechũ buo tierara tina. ã jia yũhũre buhriro yoaro sehẽre jiriore cahmana —ni yahuri jire Jesu.

Pari turi João masare bautisariro Jesure yahuha

²²Baharo Jesu sãre to buheinare Judea yahpapũ suho wahare. Tópũ sũro tó macaina mehne mahaa dachoricã tjua, tinare bautisare. ²³João cũhũ masare bautisaro niha Enón wama tiri macai. Enón Salim wama tiri maca चाहai jire. Tói dia jire. Tói dia jichũ João bautisaro niha masare. ²⁴Tirore ti peresu yoah to pano Enóni masare bautisaro niha João.

²⁵Tí pjare João buheina mehne macaina mahainacã judio masũno mehne bautisaa macaare durucua niha. ²⁶ã jia tina João cahapũ sũa, tirore õ sehẽre ni yahuha:

—Buheriro, Jordão sie coapu mũhu mehne jiro “Tiro tjica”, mũ niro sehe mipure masare bautisaro nina. To ã yoachu jipihina tiro cahapu dihta wahara —niha tina João.

²⁷ Ti ã nichu tuhoro João õ sehe ni yuhtiha:

—Tiro tuariro to jichu Cohamacu sehe tirore ã jichu yoariro jira. ²⁸ “Cristo jieraja”, yu nichu tuhore musa. ã jierapaihta to pano to waroca muhtariro jija yuhu. ²⁹ Cristo mehne masa ti wahachu ñucu tuaro wahcheja. Õ sehe jira tí: Wamomaca duhterico to manuno mehne jiro wahara. Wamomaca duhtetirore cohtariro sehe duhtetiro to namo tichu ñuno to durucuchu tuhoro tuaro wahchera. ã jicu yuhu wamomaca duhtetirore cohtariro to wahcheriro se-heta Cristo mehne masa ti wahachu ñucu tuaro wahcheja. ³⁰ Cristo sehere wacu tuaro cahmana masare. Yuhu sehere wacu tuaeraro cahmana masare — ni yuhtiha João.

Cohamacu macuno muanopu tariro jira

³¹ ã ni tuhsuro õ sehe ni namoha João:

—Muanopu tariro jipihina yuhdoro tuariro jira. Ahri yahpau jiina jina ahri yahpa macaina jija mari. ã jina ahri yahpa macaare durucuja mari. Muanopu tariro sehe jipihina yuhdoro tuariro jira. ³² To ñuri cjiire, to tuhori cjiire tiro yahura. To ã yahupachuta to yahuaire masa sehe ne tuho duaerara. ³³ Muanopu tariro to yahuaire masa tuhoa, tíre cahmaa, “Cohamacu potocã niro jira”, nia nina tina. ³⁴ Ahriro Cristore Cohamacu warocarore Espiritu Santo ya tuaare cū pahõona Cohamacu. ã jiro tiro Cohamacu ya durucuaire yahura. ³⁵ Cohamacu to macunore tuaro cahina. ã jiro jipihina bui ti puhtoro ji dutire to macunore. Jipihina puro ji dutire tirore. ³⁶ Cohamacu macunore wacu tuaina

sehe Cohamacu catia mehne ã catirucuahca. To macunore cahmaeraina sehe Cohamacu catia mehne jisi. ã jiro Cohamacu tinare tuaro buhiri dahrerohca —niha João.

Jesu Samaria macaricoro mehne durucuha

4 Jesu João yuhdoro payu buheinare to cjuachu João yuhdoro masare to bautisachu fariseo curua macaina tuhrocacha. ² Ti ã tuhorocapachuta Jesu sehe to basi masare bautisaerare. Sã to buheina sehe masare bautisahi. ³ Fariseo curua macaina ti ã masichu tuhoro Jesu sehe Judea yahpai jiro Galilea yahpau sare suho tjuaa wahare.

⁴ Tõpu wahana Samaria yahpare su yuhdu wahcana tana nihi sã. ⁵ ã yuhdu wahcana Samaria yahpai jiro macapu Sica wama tiri macapu suhi. Tí maca cahai panopu macariro Jacobo cjiro to macuno José cjirore to wari yahpa jire. ⁶ Tói Jacobo cjiro co to naari copa jire. ã yoa Jesu sehe yoaropu tariro cjiro jiro, tiro wahya yuhduaro tí copa duhtu cahai nuju sure. Tí pja tói to so nuju suri pja cohari pja waro jire. ⁷⁻⁸ Sã to buheina sehe macapu chuare sã nuchuna wahari baharo cūirota tiro tói tjua nuju sure. ã so nuju suro Samaria macaricoro tí copau co waro to wihichu Jesu ticorore core siniha:

—Core waga yuhure —niha.

⁹ —Mũhu judio masuno jira. Yuhu sehe Samaria macaricoro jija. ¿Dohseacu yuhure core sinijari mũhu? —niha ticoro Jesure. Judio masa Samaria macainare ñu tuhtiina jira. ã jiro ticoro ã niha.

¹⁰ To ã niri baharo Jesu ticorore õ sehe ni yahua:

—Mũhure Cohamacu to yoadoho duarire masico, mũhure core sinirirore masico, mũhu yuhu sehere siniboa. Mũ ã sinichu paye co sehere waboa yuhu.

Tí co sehe catichu yoara —niha Jesu ticorore.

¹¹To ã nichu tuhoro ticoro õ sehe ni yuhtiha tireore:

—Ne mũhure situ mariahna. Wiho mejeta ahri copa cuãri copa jira. ¿Ã jicu ahri catichu yoaa core nohopu wabocari mũhu? ¹²Mari ñuchu cjiro Jacobo panopu macariro ahri copare marine cúa tiha. Tiro, to pohna, to nuina cũhu ahri core sihnia tiha. “Paye core waboa yũhu” nicu, ¿Jacobo yũdoro masiriro jijari mũhu, ã ni tuhotucu? —niha ticoro.

¹³To ã nichu Jesu õ sehe ni yuhtiha:

—Jipihtina ahri core sihniina, pari turi ñahma yapioahca. ¹⁴Ya co sehere sihniina ne pari turi ñahma yapiosi. Æ jia ya core sihniina Cohamacu mehne ã jiru-cuahca. Ma pohtapu co to ã wijaarucuro seheta ya co ne pihtisi —niha Jesu.

¹⁵To ã nichu tuhoro numino sehe õ sehe niha:

—Ne pari turi yu ñahma yapioerahto sehe tí core waga yũhure. Æ jico pari turi ne õpũre co wasi —niha ticoro.

¹⁶To ã nichu Jesu ticorore õ sehe ni yahuha:

—Tí pja pinihta mu manũre pjico waha. Pji tuhsu õpu taga tiro mehne —niha Jesu ticorore.

¹⁷⁻¹⁸—Manũ marienico jija yũhu —niha ticoro.

—Potocãta nimana mũhu. Mũhu cinco tahari manũ ti tuhsũmare. Tuhsu, mipũre mũhu mehne jiro mu manũ jierara. Æ yoa “Manũ marienico jija” nico, potocãta nimana mũhu —niha Jesu ticorore.

¹⁹To ã nichu tuhoro õ sehe niha ticoro:

—Ne, Cohamacu yare yahu mũhtariro jira mũhu, yu tuhotuchũ. ²⁰Sã ñuchusuma cjiri ahdu tũcupũ Cohamacure ño payoa tiha. Æ jina mũsa sehe judio masa “Jerusalẽi Cohamacure

ñõ payoro cahmana masare”, nia tire mũsa judio masa —niha ticoro.

To ã nichu Jesu õ sehe ni yuhtiha:

²¹—Numino yũhure tuhosinga. Baharopũ ahdu tũcui, Jerusalẽpu cũhure mari Pũcare ño payosi mũsa. ²²Mũsa sehe mũsa ño payoriro masierara. Masare yũhdũchu yohtiuro judio masũnota jira. Æ jina sã judio masa sehe sã ño payoriro masija. ²³Mipũre baharopũ cũhure Cohamacure potocã ño payoina ti noano tuhotua mehne tireore ño payoahca. Tó sehe mari ño payochũ cahmana Cohamacu. ²⁴Cohamacu pjacu marieriro to jichũ masa tireore ñuerara. Æ jia tireore ño payoa, ti noano tuhotua mehne tireore noano potocã ño payoro cahmana masare —niha Jesu.

²⁵To ã nichũta ticoro õ sehe ni yuhtiha:

—Mesia, “Cristo” ti niriro sehe masare yũhdũchu yohtiuro, to tahti cjihtire masija yũhu. Tiro taro, marine jipihtiare buhe pahñonohca —niha ticoro.

²⁶—Yũhũta jija Cristo —niha Jesu ticorore.

²⁷To ã ni yahuchũ waro wihina sã to buheina sehe Jesu numino mehne to durucuchũ ñũna, cuaa wahi. Æ cuapanahca “¿Dohse cahmajari mũhu? ¿Dohse nii nijari mũhu ticorore?” ni sinitu ñũerahĩ. ²⁸Æ jiro numino to siture tói duhu daponoca, macapu waha, masare yahuro, õ sehe niha:

²⁹—Yu yoari cjirire yahu pahñorirore ñũna taga mũsa. Tiro potocãta Cristo jiboca pa tehe nino —niha ticoro.

³⁰To ã nichu tuhõa tí maca macaina sehe Jesure ñũa taa nire. ³¹Tí pjare sã Jesu buheina sehe tireore tuaro chũ dutimai:

—Buheriro, chũga —nimai sã.

³²—Soro jia chũare cjuaja yũhu. Tíre mũsa masierara —nire tiro.

³³To ã nichu tuhona sã basi õ sehe ni durucui:

—¿Paina tirore chũare wa tuhsuari? —nii sã basi.

Sã ã nichu Jesu õ sehe ni yahure:

³⁴—Masa sehe chu ji coara. Yũhũre warocariro to cahmaare yoacu ji coaja yũhu sehe to yoa dutiriro seheta yoa pahñocu tacũ. ³⁵“Cuatro sũri dũhsara dicha naahto”, wese pũro to niriro seheta mũsa sehe ni tuhotuena tjiga. “Cohamacu yare sã yahuhto dũhsasinina”, ni tuhotuena tjiga. Potocã niita nija mũsare. Mipũ pinihtare masare ñũga. Dicha tichu mũsa naari pja to jiriro seheta, mipũ pinihta masa yũ buheare ti tuhohti pja jiro nina. ³⁶Toaa dichare naainare ti wapariro seheta yũ yaina cjihti naainare yũ yare buheinare ti ã yoari wapa tinare noano yoaihtja yũhu. Ti ã buhechu tuhoa yũ buheare tuhoina yũ yaina sehe Cohamacu mehne jipihitia dachoripe jirucuahca. Æ jia tinare buhe mũhtaina, baharo yũ yaina jichu yoaina cũhu cũno potori wahcherucuahca. ³⁷“Cũiro toa mũhtariro jira. Pairo sehe toaa dichare nariro jira”, nia tiha panopũ. Tí potocã tjira. Ti ã niriro seheta cãina yũ yare yahu mũhtaina jira. Paina sehe yũ yare buhea yũ yaina jichu yoaina jira. ³⁸Wese pũro to yaina dahraina toaeraina ti jipachũta to toaa dichare tinare naa dutiro warocara. Tó seheta masare buhe mũhtaeraina mũsa jipachũta yũ yaina cjihti yoa duticu warocaja mũsare. Paina sehe tinare buhe mũhta tuhsure. Ti buherinapũre pari turi buhe namona, yũ yaina jichu yoanahca mũsa sehe. Æ jina buhe mũhtaina sehe ti yoadohoro mehne painare yũ yaina jichu yoanahca mũsa —nire Jesu.

³⁹Tí pjare Samaria macaricoro “Yũ yoari cjirire tiro yahu pahñore”, to ã nichu tuhoa Samaria macaina payũ Jesure wacũ tua, tirore cahmaha. ⁴⁰Æ jia Samaria macaina Jesu cahai sua,

“Sã mehne tjuasiniga”, nire tirore. Ti ã nichu sã cũhu tiro mehne pũa dacho tó tjuasinii. ⁴¹Paina cũhu payũ Jesure tuhoa cahmare tirore. ⁴²Õ sehe nire masa numinore:

—Wahmanopũre mu yahurire tuhona, Jesure cahmahi. Mipũ pinihtare Jesu to durucuiare tuhona tirore wacũ tuana, tirore cahmaja. Æ jina tiro sehere tuhona ahri yahpa macainare pichacapũ wahaborinare yũhdũchu yoariro potocã to jichu mipũ sã masija —nire masa Samaria macaricorore.

Pũhtoro macunore dohatirirore noariro wahachu yoaha Jesu

⁴³Pũa dacho baharo Jesu sãre Galilea yahparũ sũho wahare. ⁴⁴Wahmanopũre õ sehe nia tire tiro: “Cohamacu yare yahu mũhtarirore to ya yahpa macaina tirore ño payoerara. Æ jia yũhũre ño payoerara õ macaina õi yũ bucũariro jichu”, nia tire Jesu. ⁴⁵Æ jia Galileapũ to sũchu tó macaina tirore noano piti bocare. Tó pano Jerusalẽi bese numũ Jesu Cohamacu tuua mehne to yoachũ ñũrina jire tina.

⁴⁶Æ yoa Canápũ Galileai jiri macapũ core vino to wahachu yoari macapũ waha wahai sã tiro mehne. Caná cahai jiri macai Capernau wama tiri macai jipihitia bui pũhtoro docai jiriro pũhtoro macũno dohatiro niha. ⁴⁷Tuhsũ, Jesu Judeapũ jiriro Galileapũ to sũchu pũhtoro tuhoha. Tíre tuhoro Jesu cahapũ wihire:

—Yũ macu yariaro nihre. Æ yoa tirore noariro wahachu yoai taga —ni tuaro mehne pjire tirore.

⁴⁸To ã nichu tuhoro Jesu õ sehe ni yũhtire:

—Cohamacu tuua mehne yũ yoachũ ñũerana, ne yũhũre wacũ tuarera mũsa —nire Jesu tirore.

⁴⁹To ã nichu pũhtoro sehe õ sehe nire:

—Puhtoro, yu macu to yariahto pano taga —nire tiro Jesure.

⁵⁰—Tjuaahga. Mu macu catica —nire Jesu.

To a nichu tuhoro, “To niriro se-heta catirohca yu macu” nino, puhtoro tjuaa wahare. ⁵¹A tjuaarucurirore to cahamacu tirore piti boca, o sehe ni yahuha:

—Mu macu catihre —ni yahuha tina tirore.

⁵²—¿Noho waroi su jichu noariro wahari tiro? —ni sinituha tiro to cahamacare.

—Canure cohari pja baharocã juaro suruhre tirore —niha tina.

⁵³Ti a nichu tuhoro o sehe ni tuhoutuha tiro: “Jesu yuhure to a ni yahuri pjaihta juaro surua wahari jire”, ni tuhoutuha puhtoro sehe. “Potocãta nino niri jira yuhure” nino, tiro jipihtina to coyea mehne Jesure wacu tuaha.

⁵⁴Jesu Judea yahpau jiriro Galilea yahpau to suri baharo puhtoro macunore noariro to waharire mari quihochu puu taha Cohamacu to tuua mehne yoa no tuhsure Jesu.

Tini masierarirore noariro wahachu yoaha Jesu

5 Baharo judio masa Cohamacure sa no payori bose numuri jichu Jesu Jerusalapu sure tjoa. ²Toi oveja wama tiri sopaca चाहै चुसुरी copa jihre. Sa judio masa ya mehne nia Betesda wama tiri copa jihre. Ti copa चाहै cinco tihamahnoera tahti poca jihre. ³Ti tahti pocai payu dohatiina coare. Capari nuraina, cu bhusehe dahporo naina, pjacu bhaina tina ti copa चाहै jia, [co nuhmi mua mujanore cohtaa nire. ⁴Topu buharo ti copa macaa core caa tahari nuhmichu yoa mujare anjo. Ti copa macaa co nuhmiri baharo na mio muhtariro sehe dohse jiare dohatiare cjuariro noariro wahare.] ⁵A yoa toi

treinta y ocho cuhmari waro dohatiriro jire. ⁶Toi to coachu nuno to a yoari pja dohatiriro jichu masire Jesu tirore. A masino tirore o sehe ni siniture:

—¿Pjacu dohatia marieriro ji duajari muhu? —nire Jesu.

⁷To a nichuta dohatiriro o sehe ni yuhtire:

—Ti co to nuhmichu yuhure co jiri copapu naboriro mariahna. Ti copapu yu na mio duapachuta paina sehe yu pano a na mio muhtarucura —nire tiro Jesure.

⁸—Wahcarucaga. Mu coari cahsarore naa, wahaga —nire Jesu tirore.

⁹To a nichuta dohatiriro sehe to coari cahsarore naa, ducu ducare. Ti dacho Sabado judio masa sa sori numu jire.

¹⁰Ti dachoi Jesu to a yoachu nua judio masa sa puhtoa sehe dohatiriro cjirore o sehe ni yahuha:

—Michare Sabado dacho mari sori numu jipachuta mu coari cahsarore naahna muhu. A yoacu mari dutiare yuhdurucui nina muhu —niha tina tirore.

¹¹—Yuhure yu dohatiare cohãriro sehe o sehe nire yuhure: “Mu coari cahsarore na, wahaga”, nire tiro yuhure —ni yuhtihã dohatiriro cjiro.

¹²—¿Tire muhure a niriro sehe diro baro jijari tiro? —ni sinituha tina.

¹³Toi masa payu ti jichu nuno Jesu sehe waha tuhsuha. A jiro dohatiriro cjiro sehe tirore noariro wahachu yoarirore to wamare masieraha. ¹⁴Baharo Cohamacu wuhui Jesu tirore piti boca, o sehe ni yahure:

—Tuhosiniga muhu yuhure. Mipure noano pjacu tira muhu. Naare yoa namoi tjiga. Pari turi naare yoa namocu mu dohatiriro yuhdoro wahaihca muhu —nire Jesu tirore.

¹⁵To a niri baharo dohatiriro cjiro sehe sa judio masa puhtoa tirore sinituina cjiro cahapu suro, o sehe ni yahuha tinare:

—Jesu wama tiro yuhure noariro wahachu yoahre —ni yahuha tiro.

¹⁶ Æ yoa Sabado jichu Jesu dohatirirore to dohatiare to cohachu masia judio masa sã puhtoa sehe tirore ñu tuhtia, yahusãa dua ducare.

¹⁷ Æ tirore ti yahusãa duachu masino Jesu sehe õ sehe ni yahure tinare:

—Yũ Pucũ mipure dahrasinina. Yũhu cũhu dahrasinii nija —ni yahure tirore yahusãa duinare.

¹⁸ To ã nichu judio masa sã puhtoa sehe tiro mehne tuaro suaa, tó pano ti niriro yuhdoro tirore wajã duare. Sabado dachore sã sori numure cãirore to noariro yoachu ñua tina suare. Æ suaa tiro Cohamacũre “Yũ Pucũ” to nichu tuhoa, tina sehe tó pano ti niriro yuhdoro sua namoha tjoa. “Yũhu Pucũ” nino, Jesu to basi ‘Cohamacũ mehne cãno potori jija’, ni wacũca tiro”, ni tuhture judio masa sã puhtoa.

Jesu Cohamacũ to warocariro jira

¹⁹ Æ yoa Jesu tinare õ sehe ni yahure:

—Potocã musare niita nija. Yũhu, Cohamacũ macũno, yũ mũ sũro yoaeraja. Yũ Pucũ to yoirire ñucũ, tíre yoaja. ²⁰ Yũ Pucũ yuhure, to macũnore, cahĩna. Æ jiro to yoirire yuhure ño pahĩona. Ahri mipũ to tuaa mehne yũ yoari yuhdoro tiro payere yoa dutirohca yuhure. To ã yoa dutichu to tuaa mehne yoa ñoihca yũhu. Æ jina ñu cãnahca musa. ²¹ Yũ Pucũ yariarinare to masoriro seheta yũhu cũhu yũ cahmainare masoihtja. ^{22–23} Ne yũ Pucũ sehe masa ti ñaa buhirire buhiri dahreriro jierara. Yũhu sehere tíre ti ñaa buhirire buhiri dahrehtirore cũre yũ Pucũ. Jipihtina masa tirore ti ño payoriro seheta yũhu cũhure ti ño payohti cjihtire buhiri dahrehtirore cũre yuhure. Yuhure to macũnore ño payoerana yũ Pucũ cũhure ño payoerara musa. Tiro jira yuhure warocariro —nire Jesu.

²⁴ Æ ni tuhsũ õ sehe ni yahu namore:

—Potocãta musare nii nija. Yũ durucuarẽ tuhoina yuhure warocarirore wacũ tuaina jipihtia dachoripe muanopũ ã jirucuahca. Æ jicu tinare buhiri dahresi yũhu. Æ jia tina pichacapũ wahaborina yuhduahca. ²⁵ Potocã musare niita nija. Pichacapũ wahahtina yuhure Cohamacũ macũnore ti tuhohti pja mipũ jira. Baharopũ cũhure yuhure tina tuhoahca tjoa. Æ tuhoa tuho nunũina sehe Cohamacũ mehne ã jirucuahca. ²⁶ Cohamacũ yũ Pucũ sehe ã jirucuchũ yoariro jira. Æ jiro yuhure to macũnore ã jirucuchũ yoahrtiro ji dutire tiro yuhure. ²⁷ Æ jicu yũhu masuno Cohamacũ to warocariro yũ jichu tiro masare buhiri dahrehtirore cũre yuhure. ²⁸ Ahrire tuhona, tuho cãaena tjiga musa. Pa dachopũre jipihtina yariaina masa coparipũ jiina yũ durucuchũ tuhoahca. ²⁹ Æ tuhoa, noaare yoaina cjiri jipihtia dachoripe Cohamacũ mehne jihtina cjihti masa mujaahca. Ñaare yoaina cjiri sehe ñaare ti yoari buhiri pichacapũ wahaahca —ni yahure Jesu.

³⁰ Æ ni tuhsũ õ sehe ni yahu namore:

—Yũhu yũ mũ sũro ne yoaeraja. Ne yũ basi yũ cahmano yoa duaeraja. Yuhure warocariro to dutiriro seheta yoa duaja. Æ jicu to niriro seheta buhiri dahreja. Tuhsũ yũhu masare buhiri dahrecũ quihõnota yoaja. ³¹ “Yũhu tuariro jija”, yũ ni yahuchũ “Mũ yahua ne quihõno jierara”, ni masiboca musa. ³² Pairo jira yuhure yahuriro. Tiro João sehe masare yahure yuhure. Masare yuhure to yahuri cjiri quihõno tjira. Tíre yũhu noano masija. ³³ Musa paina sehene Joãoopũre yuhure sinitu dutina warocare. Æ jiro potocãta yahure tiro musare. ³⁴ “Cohamacũ macũno jira ahriro”, yuhure ni yahuhtinare macaeraja. Æ macaerapacũta João masuno to jipachũta yuhure “Cohamacũ macũno jira”, to ni yahurire yahui nija. Musa yuhure wacũ tuahti

cjihtire, m̄sa pichacap̄ wahaborina m̄sa ȳhd̄hti cjihtire ȳh̄re Joāo to yahurire yahui nija. ³⁵Sihāria mahaa dachoricā to ñu masichu yoaro seheta Joāo m̄sare buhe m̄htano mahanocā to catiro puro m̄sare masichu yoare. To ā buhech̄u t̄hona mahaa dachoricā wahchere m̄sa. ³⁶Ȳu jia tiare to ā buhepach̄ta Cohamacu sehe ȳu jiare noano yahura. To ā yahuch̄u Joāo ȳu jiare to yahua ȳhdoro jira Cohamacu ya yahua. Ā jicu Cohamacu to tuaa mehne ȳh̄re to yoa dutiri cjiire mipu yoai nija. Ahrire ȳu yoach̄u ñuna potocāta Cohamacu to warocariro ȳu jiare masina m̄sa. ³⁷Ā yoa ȳu P̄cu ȳh̄re warocariro to basi “Tiro ȳu warocariro jira”, ni yahura m̄sare. To ā ni yahupach̄ta to durucua ne t̄hoerare m̄sa. Ā jina m̄sa tirore ne masierare. ³⁸Ȳh̄re Cohamacu warocarirore m̄sa ne t̄ho du-aerare. Ā jina m̄sa Cohamacu yare ne cahmaerare. ³⁹Cohamacu yare ti joari p̄re m̄sa buhena, “Mari ahri p̄re buhena jipihtia dachoripe Cohamacu mehne ā jirucunahca”, nina m̄sa. Tí p̄ita ȳh̄re yahura. ⁴⁰Tí p̄u ȳh̄re to yahupach̄ta m̄sa sehe ȳh̄re cahmaerara. Jipihtia dachoripe Cohamacu mehne m̄sa ā jirucuhti cjihtire ȳh̄re sini duaerara m̄sa —ni yahure Jesu.

⁴¹Ā ni tuhsu ō sehe ni namore:

—Ȳh̄re m̄sa ño payoerach̄u ñucu suaeraja ȳh̄u sehe. ⁴²M̄sa sehe Cohamacure m̄sa cahierach̄u masija ȳh̄u. ⁴³Cohamacu ȳu P̄cu ȳh̄re to dutiro sehta ȳu tapach̄ta m̄sa ȳh̄re cahmaerare. Pairo sehere Cohamacu tirore warocaerario to jipach̄ta to m̄u s̄ro to tapach̄ta tiro sehere cahmanahca m̄sa. ⁴⁴Paina masa m̄sare ti ño payoch̄u cahmana m̄sa. Cohamacu m̄sa mehne to ji coach̄u cahmaerara m̄sa. Tiro dihta Cohamacu waro jira. Ā cahmaerana ȳh̄re t̄hoerara m̄sa. Ȳh̄re wacū tuaerara. ⁴⁵M̄sare ȳu P̄cup̄re ne

yahusāsi ȳh̄u. Tíre masiga m̄sa. Moise cjiro to joari p̄u sehe m̄sare yahusānohca. “Tí p̄u macaa dutiare mari yoa pah̄nōna, Cohamacu cahai wahanahca”, m̄sa niri p̄u sehe m̄sare yahusānohca. ⁴⁶Moise cjiro to joari p̄u ȳh̄u sehere yahuha. Ā jina tí p̄re “Potocā tjira” nina, ȳu yahua c̄h̄re “Potocā tjira”, ni-boa m̄sa. ⁴⁷Moise cjiro to joari p̄re “Potocā tjira” nierana, ȳu ya durucua c̄h̄re “Potocā tjira”, nisi m̄sa —nire Jesu tinare.

Cinco mil bui masare ch̄ua waha Jesu

(Mt 14.13-21; Mr 6.30-44; Lc 9.10-17)

6 Ā to buheri baharo yoa cureri pja baharo Galilea wama tiri buc̄pariro pa buh̄sehe coap̄u s̄a to buheinare Jesu suho pah̄a wahare. Tí taro pjiri taro pa wama Tiberia wama tire. ²Tó pano Galilea yahpai Jesu Cohamacu tuaa mehne yoa ño, dohatiinare ti dohatiare to coh̄ch̄u masa ñua tire. Ā jia Jesu to pah̄ch̄u ñua, masa payu tirore n̄n̄u ti pah̄re. ³Ā yoa baharo tí taro d̄ht̄u cahap̄u Jesu s̄are suho pah̄a su, t̄uc̄p̄u m̄ja, tu buip̄u s̄are suho dujire. ⁴Tí dachore Pascua wama tiri bose n̄m̄u cjihto, s̄a judio masa ya bose n̄m̄u suhti dacho cjihto mahaa dachoricā d̄hsare. ⁵⁻⁶Tópu dujiro, Jesu payu masa to cahap̄u ti tarucuch̄u ñ̄re. Ā ñ̄no Felipere ō sehe ni sinitu ñ̄re:

—¿Ahrina masa ti ch̄hti cjihtire nohopu nuchunahcari mari? —nire Felipere.

Jesu to basi to yoah̄t̄re masiparota Felipere ā sinitu ñ̄re “¿Dohse ni ȳhti-rohcari?” nino. ⁷To ā sinitu ñ̄ch̄u t̄horo Felipe sehe ō sehe ni ȳhtire:

—Ocho s̄ari posa dahra wapataa niñeru mehne ch̄uare mari nuchupach̄ta masare c̄inare daacā ch̄uare mari witipach̄ta ne m̄u s̄u —nire Felipe Jesure.

⁸ Æ yoa paio, sã mehne macariro Andre, Simo Pedro bahuro sehe Jesure ò sehe ni yahure:

⁹ —Ahriri wahma wahmua tariro cinco pão curirire, ã jichu wahi puarocã cũhure cjuara. Wiho mejeta masa sehe payubia jira. Æ jiro ahri mahanocã chua ne mu susi —nire Andre.

¹⁰ To ã niri baharo:

—Masare duji dutiga musa —nire Jesu sã to buheinare.

Tói daacã tja jiro jire. Sã duji dutichu masa nuju su phtiare tja bui. Tina mua dihtare sã quihõchũ cinco mil wahtaroi jire. ¹¹ Ti ã nuju suchũ ñũno Jesu sehe pãore na, Cohamacure “Noana”, nire. Æ ni tuhsurota sãre to buheinare witi dutire. To ã dutichũ sã sehe tói dujiinare witi wahcãi. Tuhsũ, puaro wahi cũhure witihi tinare. Jipihtinare noano ti chu duaro puro chuare tinare witihi. ¹² Baharo masa sehe yapi yũhdũa wahare. Ti ã yapi yũhdũachũ ñũno Jesu sãre ò sehe ni yahure:

—Ti chu duharire noano saa cahmachu pahũoga. Æ yoana ti chu duhaare ne bosì —nire.

¹³ To ã nichũ tuhona sã sehe cinco pão curiri duhsarire sã saa cahmachuchũ doce puhuse waro wijare. ¹⁴ Æ jia Jesu tíre to tuua mehne to yoa ñochũ ñũa, masa sehe ò sehe nire:

—Potocãta jira. Ahriri Cohamacu yare yahu muhtariro ahri yahpapũ “Tarohca”, ti niriro mari cohtariro tjira —nire tina.

¹⁵ Æ jia tina Jesure ti puhtoro jihtiro cjihtore ñaha sũ duamare. Jesu ti ã ni tuhotuare masino pari turi cãirota tũcupũ wahaa wahare.

Jesu co bui ducu wahcãha

(Mt 14.22-27; Mr 6.45-52)

¹⁶ Ñamichahapũ sã to buheina bucũpariropũ buhai. ¹⁷ Tópũre buhu sũ, dohoriapũ samu, Capernau wama tiri

macapũ majare pahãi. Tí pjare sã majare pahãri pjare ñamipũ jire. Jesu sehe sã cahapũ tju wihierasire mini. ¹⁸ Sã ã majare pahãno watoi wihnono tuaro sãre tachũ, pahcõri bujua pahcõri wahcãre. ¹⁹ Sã cinco kilómetro suboro waroi sã suchũ waro Jesu sãre mu sãre. Co buipũ to tachũ ñũi sã. Æ sã chahi to tachũ ñũna, sã sehe cua yũhdũa wahacũrũ. ²⁰ Sã ã cua yũhdũachũ ñũno tiro sãre ò sehe ni yahure:

—Cuiena tjiga. Yũhũta jija —nire Jesu.

²¹ To ã nichũ tuhona sã wahchea mehne tirore piti boca samu dutihi. To samuri baharocãta wacũenoca sã wahari yahpapũre pahã sũ tuhsũhi.

Masa sehe Jesure macaha

²² Æ yoa tí ñamine masa bucũpariro pa buhusehe coapũ tjuaina sehe sã yaria busoca, sã pahãhtia cũria to jichũ ñũre. Tia mehne sã sahsero sã pahã wahachũ cũhure ñũre tina. Tuhsũ Jesu sã mehne to pahãerachũ ñũre tina. Æ jia pa dachoi tirore tói cohtaa niri jimare tina. ²³ Ti ã cohtaro watoi, paye buso, Tiberia wama tiri macapũ taa buso Jesu Cohamacure “Noana”, to niriro cahacã cureropũ, masare to chua witiro cahacã cureropũ wahã sũri jire tí buso. ²⁴ Æ yoa sãre Jesu to sũho jimarirore to mariachũ ñũa, masa tí busopũ samu, Capernaupũ sãre nunũ ti pahã tari jire, Jesure maca taa.

Jesu catichũ yoaa chua yoaro sehe jiro jira

²⁵ Ti pahã wihiri baharo, Jesure boca wihi, tina masa ò sehe ni sinitu ñũre tirore:

—Buheriro, ¿dohse jichũ tari muhũ õpũre? —ni sinitu ñũre tina.

²⁶ Ti ã ni sinitu ñũchũ, Jesu tinare ò sehe ni yahure:

—Potocã niita nija musare. Yuhu musare Cohamacu tuaa mehne yu yoa ñopachuta yuhure sehere wacũ tuaerara musa. Yuhure wacũ tuaerapanahta yuhure macana musa. Yuhu mehne bajua chu, musa yapirina cjiri jina yuhure maca tari jira musa. ²⁷Wiho mejeta chua ne ã jirucuerara. Baharopu pihitia wahara. Æ jina tĩre ã macarucuenã tĩjiga musa. Paye baro chua soro jia chuare bocana jipihtia dachoripe Cohamacu mehne jirucunahca. Æ jia tĩ chua pinihta ne pihtisi. Tĩ chuare yuhu masuno Cohamacu warocariro musare waitija. Cohamacu yu Pucu yuhure tĩ baro chuare wa dutiriro jira. Tirota to warocariro yu jiare ño tuhsure musare —nire Jesu.

²⁸To ã nichu tuhõa tina õ sehe ni sinitu ñure tirore:

—¿Cohamacu to yoa dutiare yoana tana dohse yoanahcari sã? —ni sinitu ñure tina.

Jesu sehe ti ã nichu tuhõro, õ sehe ni yuhtire tinare:

²⁹—Cohamacu musare õ sehe dutira. To warocarirore musa noano tuho, wacũ tuachũ cahmana tiro —ni yuhtire Jesu.

³⁰To ã nichu tuhõa tina õ sehe nire tjoa:

—Cohamacu warocariro jicu tiro to tuaa mehne yoa ñõga sãre muhure sã noano wacũ tuahto cjihtore. ¿Yaba barore yoa ñobocari muhu? ³¹Mari ñuchusuma cjiripu panopu macaina masa marienopu maná wama wama tiare chua tiha. Cohamacu yare ti joari pũpu õ sehe ni yahura: “Tiro tinare muano macaa chuare waa tiha ti chuhti cjihtire”, ni joaa tiha Cohamacu yare ti joari pũpu. ¿To ã yoariro seheta yoaih-cari muhu cũhu? —nire tina.

³²Ti ã nichu tuhõro õ sehe ni yahure Jesu tinare:

—Potocã musare niita nija: Moise cjiro muano macaa chuare waera tire musare. Yu Pucu sehe muano macaa chuare potocã jia chuare musare wariro jira. ³³Cohamacu to chua muanopu duji ta, jipihtiro yahpa macainare catichu yoa masina —nire Jesu tinare.

³⁴—Puhtoro, dachoripe tĩ baro chuare ã warucuga sãre —nire tina.

³⁵Ti ã nichu tuhõro, Jesu sehe õ sehe ni yahure tinare tjoa:

—Yuhu sehe catichu yoaa chua yoaro sehe jiro jija. Mari ya chuare mari churi baharocãta dõicãta jua baa wahaja mari tjoa. Sihnia cũhure mari sihniri baharocãta ñahma yapioa wahaja tjoa. Wiho mejeta diro yuhure cahmariro, yuhure wacũ tuariro, ne jua baaeriro yoaro seheta to wahchea sehe tirore ne pihtisi. ³⁶Musa sehe yuhure ñupanahta yuhure wacũ tuaerasinina mini. Tĩreta musare yahumahi yuhu. ³⁷Jipihitina yu Pucu yu yaina cjihtire yuhure to cũrina sehe yuhure cahmaahca. Æ jii yuhure cahmainare ne cohãsi yuhu.

³⁸Muanopu tacu yu cahmano yoai tai nierahi. Yuhure warocariro to cahmariro seheta yoai tai nii yuhu. ³⁹Ahrita jira yuhure warocariro to cahmaa waro: Jipihitina yu yaina cjihti yuhure to warina cjirire yu boerachu cahmana yuhure warocariro pihtiri dachoi ti masa mujahto cjihtore. ⁴⁰Jipihitina yuhure Cohamacu macunore ñuina, yuhure wacũ tuaina jipihtia dachoripe tiro mehne ti jirucuchũ cahmana yu Pucu. Æ jicu pihtiri dachoi tinare masoihtija —nire Jesu.

⁴¹“Yuhu muanopu taa chua yoaro sehe jiro jija”, to nichu tuhõa judio masa sã puhtoã sehe tiro mehne sua, ⁴²ti basi Jesure ñano ni durucure:

—¿Ahiro Jesu Josã macuno jierajari? To pucuro, to pocoro cũhure mari masija. Tuhsu mari yoaro sehe pjacu tĩrota jira. ¿Æ jiparota dohsearo

“Muanopu tahi”, nijari tiro? —ni suare tina.

⁴³Ti ã nichu tuhoro Jesu õ sehe ni yahure tinare:

—Musa yuhure ñano ni durucuena tjiga. ⁴⁴Yu Pucu yuhure warocariro sehe masare yuhu sehene cahmachu yoara. To ã yoerachu masa sehe yu yaina ji masieraboa. Pihitiri dachoi yu yainare masoihca yuhu. ⁴⁵Cohamacu yare yahu muhtaina cjiri sehe õ sehe ni joaa tiha: “Cohamacu tinare buherohca”, ni joaa tiha Cohamacu yare yahu muhtaina cjiripu. Jipihtina yu Pucu to buheare tuhoina, tirore yuhtiina yuhure cahmana. ã jia yu yaina jira.

⁴⁶Yu Pucure ne cãiro masuno ñuerare. Yuhu Cohamacu warocariro dihta yu Pucure ñuhi. ⁴⁷Potocã niita nija musare. Yuhure wacũ tuariro jipihtia dachoripe yu Pucu mehne ã jirucurohca. ⁴⁸Yuhu catichu yoaa chua yoaro sehe jiriro jija. ⁴⁹Musa ñuchusuma cjiri masa marienopu manãre chua tiha. ã tãre chuapahta yariaa wahaa tiha. ⁵⁰Muanopu taa chũare yu nia chũare masuno churo, ne pichacapu wahasi. ⁵¹Yuhu muanopu taa chua catichu yoaa chua yoaro sehe jiriro jija. Ahri chũare chũriro jipihtia dachoripe yu Pucu mehne ã jirucurohca. Ahri chua catichu yoaa chua yoaro sehe jia yu pjacuta jira. Jipihtiri yahpa macaina Cohamacu mehne ti ã jirucuhti cjihtire yu pjacure waihtja. ã wacu yariaihca —nire Jesu.

⁵²To ã nichu tuhoa sã coyera judio masa sehe tãre õ sehe ni durucure ti basi:

—¿Ahriro dohse yoa to pjacure chuhti cjihtire warohcari? —nire tina ti basi.

⁵³Ti ã nichu tuhoro Jesu õ sehe ni yahure:

—Potocã niita nija musare. Yuhu masuno Cohamacu warocariro jija. Yu pjacure chuerariro, yu dire sihnierariro Cohamacu ya catia mehne ã jirucusi. ⁵⁴Yu pjacure chũriro, yu dire sihniriro

yu ya catia mehne ã jirucurohca. ã jicu pihitiri dachoi tirore masoihtja. ⁵⁵Yu pjacu potocãta chua waro yoaro sehe jira. Yu di potocãta sihnia waro yoaro sehe jira. ⁵⁶Yu pjacure chũriro yu dire sihniriro yuhu mehne wahchea mehne jirucura. Yuhu cũhu tiro mehne wahchea mehne jirucuja. ⁵⁷Yu Pucu yuhure warocariro ã jirucura. ã jirucuro, yuhu cũhure ã jirucuchu yoara. ã jia yuhure ã jirucurire masa chua, Cohamacu mehne muanopu ã jirucuahca tina cũhu. ⁵⁸Ahrita jira muanopu taa chua. Mari ñuchusuma cjiri manã wama tia ti chũri cjiri yoaro sehe jierara ahri chua. Tina sehe tí chũare chuapahta yariaa wahaa tiha. Ahri chua sehene chũriro muanopu ã jirucurohca —nire Jesu.

⁵⁹Capernaupu judio masa sã buheri wuhui Jesu buhero, ãta ni yahure.

Jesu buheare tuhona muanopu ã jirucunahca mari

⁶⁰Payu Jesure cahmaina to ã ni buheare tuhoa, õ sehe ni durucure:

—Ahri buhea nucu mijona. ã jina mari tuho duaera cureja —ni durucure tina ti basi.

⁶¹Ti ã nichu Jesu sehe ti durucure masire. ã masino tiro õ sehe ni siniture tinare:

—¿Ahri buheare tuhona suajari musa? ⁶²¿Yuhu masuno Cohamacu warocariro muanopu yu tjuaa wahachu ñuna dohse ni tuhotubocari musa? ⁶³Espiritu Santo masunore catichu yoara. Masa sehe ti basi catichu yoerara. Espiritu Santo masare to catichu yoiriro seheta yu buhea sehe musare Cohamacu mehne ã jirucuchu yoara. ⁶⁴Cãina musa mehne macaina ne yuhure wacũ tuaerara —nire Jesu.

Wahmanopure Jesu tirore wacũ tuaerainare masire. Tirore ñu tuhtiinare ñohtiro cũhure masi tuhsure. ã tirore wacũ tuaerainare masino “Cãina musa

mehne macaina yuhure wacū tuaerara”, nire Jesu.

⁶⁵ Ā ni tuhsu ō sehe ni namore:

—Ō sehe ni yahumahi musare: “Yu Pycu sehe masare yuhū sehere cahmachu yoara. To ā yoaerachū masa sehe yu yaina ji masieraboa”, musare nii nimahi —nire Jesu.

⁶⁶ To ā ni buhechū tūhoa payu Jesure cahmamarina cjiri tirore cohā, tiro mehne pari turi wahaerare. ⁶⁷ Ti ā yoachū nūno Jesu sāre doce to buheinare ō sehe ni siniture:

—¿Musa cūhu yuhure cohānahcari? —ni siniture sāre.

⁶⁸ To ā nichū Simo Pedro ō sehe ni yuhtire tirore:

—Puhtoro, sāre pairo buheriro mari-ahna. Mu ya buheare tūhona Cohamacu mehne ā jirucunahca sã. Mu ya buhea dihta tíre yahura sāre. ⁶⁹ Ā jina sã mūhure wacū tuaja. Ā yoa mūhū noariro, Cohamacu macūno to warocariro mu jichū sã masija. Ā jina mūhure cohāsi sã —nire Simo Pedro Jesure.

⁷⁰ To ā nichū tūhoro Jesu ō sehe ni yahure sāre:

—Yuhū sehe musare doce besehi. Wiho mejeta cūiro musa mehne macariro watino yairo cjihto jira —nire sāre to buheinare.

⁷¹ Ā nino Judare Simo Iscariote macūnore nino niri jire. Juda sehe doce buheina sã mehne macariro Jesure nū tuhtiinare űohtiro jire.

Jesu bahana tirore “Cohamacu macūno jira”, ni masieraha

7 Baharo Jesu Galilea yahpai tinino wahare. Judea yahpai judio masa tirore wajã duare. Ti ā wajã duachū masino tiro tí yahpau wahaerare. ² Judio masa daa wuhūsecã sã yoahiti nūmuri bōse nūmuri mahanocã dūhsatjiāhre. ³ Ā jia Jesu bahana tirore ō sehe ni yahure:

—Judeapu wahaga. Tóí mu yainare Cohamacu tuua mehne mu űohtiro cjihto wahaga mūhū. ⁴ Masare yoa űo duacu yaeraro cahmana mūhure. Yoa űono cahmana. Potocāta Cohamacu tuua mehne yoiro jicu tíre masare űoga —nimare tina.

⁵ To bahana jipahta Jesure “Cohamacu macūno jira”, nierare. Ā jia, ā nire tina tirore. ⁶ Ti ā niri baharo Jesu ō sehe ni yahure tinare:

—Masa yuhure ti noano masihti pja dūhsasinina mini. Musa sehe nū duana bōse nūmuri jichū waha masina. ⁷ Ahri yahpa macaina musare nū tuhtierara. Yuhū ti űaa buhirire yu yahuchū tina yuhū sehere nū tuhtira. ⁸ Bōse nūmuri jichū wahaga musa sahsero. Yuhure yu wahahto dūhsasinina mini. Ā jicu yuhū sehe bōse nūmūrīne nūi wahaerasinija —nire Jesu tinare.

⁹ Ā nino tiro Galileai tjuare.

Jesu daa wuhūsericã ti yoiro nūmuri bōse nūmuri jichū wahaha

¹⁰ Bōse nūmūripū Jesu bahana ti űua wahari baharo Jesu cūhu ti baharo wahare. Ā waharo masa ti űueraro watoi wahare. ¹¹ Bōse nūmūrihi jiina judio masa sã puhtoa tirore macare:

—¿Nohopū jicari tiro? —ni sinituha tina.

¹² Ā jia masa cūhu Jesure payu yahuwajaha. Paina “Tiro noariro jira”, niha. Paina sehe “Tiro űariro jira. Masare mahūnoiro jira”, ni yahuwajaha tina.

¹³ Ā nipahta judio masa sã puhtoare cuia, masa ti űueraropū Jesure yahuwajaha.

¹⁴ Bōse nūmuri dacho macai Cohamacu wuhūpū Jesu sãa sūro, buhere. ¹⁵ To ā buhechū sã coyēa judio masa tūho cuua waha, ō sehe nire:

—¿Ahriro buheropu buhemahnoerariro jiparota dohsearo noano masi pahñonocajari? —nire tina tirore.

¹⁶Ti ã nichu Jesu õ sehe ni yahure tinare:

—Yu buheri cjiri yu ya durucua jierara. Yuhure warocariro ya durucua sehe jira ahri buhea. ¹⁷Cohamacu cahmaare yoa duaina yu buhea sehere Cohamacu ya durucua ti jichu masiahca. Yu mu suru yu buherachu cuhure masiahca tina. ¹⁸Cũiro to mu suru to masia mehne buheriro jiro “Yuhu dihtare ño payoga”, niriro jira tiro. Wiho mejeta yuhure warocariro sehere musa ño payochu cahmaja yuhu sehe. Yu ã nichu tuhona “Potocã durucuriro jira tiro. Ne mahñoerara”, ni masinahca musa.

¹⁹Cohamacu dutiare Moise cjiro sehe cãa tiha musare. To ã cũpachuta musa jipihtina tí dutia sehere ne yuhtierare. ¿Dohseana yuhure wajã duajari musa? —nire Jesu sã coyera judio masare.

²⁰—Muhu tuho masierariro, watino to cohtotariro jira. Muhure wajã duaina mariahna —ni yuhtire tina Jesure.

Ti ã nichu Jesu õ sehe ni yuhtire:

²¹—Sori numu Sabado jichu cã tahata Cohamacu tuaa mehne dohatiriro to dohatiare yu cohãchu musa ñu cãaa wahare. ²²Mari ñuchusuma cjiri panopu macaina sehe ti pjacure mahanocã cahsarocãre yihsoina ti yoariro seheta Moise cjiro yihso dutiha. To ã dutichu Sabado mari sori numu jipachuta masunore to pjacure mahanocã cahsarocãre yihSORA musa. ²³Sabado jichu masunore to pjacure mahanocã cahsarocãre yihSORA musa, Moise cjiro dutiri cjirore yoana tana. ¿Musa cãhu Sabado dachoi tíre yoapanahata tí dachoi dohatirirore jipihtia to pjacure noariro yu yoachu ñuna dohseana yuhu mehne suari musa? ²⁴Yu yoarire musa noano masierapanahata, yuhure ñano tuhoutuena tjiga. Musa

noano masiri baharo yuhure musa tuhoutua potocã tjiahca —nire Jesu.

Jesu wahmanopu to tarirore yahuha

²⁵To ã ni yahuri baharo mahainacã Jerusalẽ macaina tirore õ sehe ni yahuwajare:

—¿Ahriro judio masa puhtoia ti wajã duariro jierajari? ²⁶Ã tirore ti wajã duapachuta jipihtina panoi masare buhero nina tiro. Wiho mejeta tirore wajã duaina jipahta ã ñunocahna. “Tiro potocãta Cristo jira”, ¿ni tuhutubocari puhtoia sehe? ²⁷Wiho mejeta ahriro Jesu to tarirore sã masija. Cristo sehe masare yuhduchu yoahrtiro to tachu to tariro sehere masimahnoerara. ã jiro masare yuhduchu yoahrtiro Cristo waro jierara Jesu —ni yahuwajare tina Jerusalẽ macaina.

²⁸Ti ã niare masino, Jesu õ sehe ni tuaro sañurucu buhere Cohamacu wuhui:

—Yuhure õ sehe ni tuhutura musa: “Tirore masija. ã jina to tariro cuhure masija”, ni tuhutumana musa. Musa ã ni tuhutupanahta yuhure warocarirore ne masierara musa. Yuhure warocariro potocã niriro, potocã yoariro jira. Tirore ne masierara musa. ²⁹Tirota yuhure warocare. ã jicu tiro cahaputa tahi. ã jicu yuhu sehe tirore masija —nire Jesu judio masare.

³⁰To ã nichu tuhoa tirore ñaha duamare. Ti ã ñaha duapachuta Jesu to ñano yuhduhti pja duhsasinire. ã jia tina tirore ñaha masierare. ³¹Paina masa sehe payu tirore wacũ tua, õ sehe nire:

—Ahriro Jesu sehe payu tahari Cohamacu to tuaa mehne yoa ño tuhsure. Jipihtina paina yuhdoro Cohamacu tuaa mehne yoa ñohna tiro. ã yoarota Cristo Cohamacu to warocariro tjira ahriro Jesu —nire Jesure wahma wacũ tua ducaina.

Fariseo curua macaina Jesure peresu yoa dutiha

³² Masa Jesure ti ã ni durucuchu tuhoa sacerdotea puhto, fariseo curua macaina mehne Jesure ñaha dutia warocaha surarare.

³³ Æ jiro Jesu judio masare õ sehe nire:

—Maha dachoricã msa mehne jisinihca. Æ jicu baharocãta yuhure warocariro cahapũ wahaihca. ³⁴ Yũ jithopũ msa waha masierara. Æ jina yuhure macapanahca ne bocasi msa —nire Jesu judio masare.

³⁵ To ã nichũ tuhoa tina ti basi õ sehe ni durucure:

—¿Ahriro ã nino nohopũ wahabocari, msa tuhotchũ? ¿Griego masa cahai judio masa waha siteina ti jia macari cjiropũ griego masapũre buhero wahabocari ahriro? ³⁶ “Yũ jithopũ msa waha masierara. Æ jina msa yuhure macapanahca ne bocasi”, to nichũ ¿dohse nino baro ahriro ã nijari? —ni durucure judio masa ti basi.

Catichũ yoaa mårine yahuha Jesu

³⁷ Bose numuri pihtiri dacho tí dacho waro jiro nire. Tí dachoi Jesu tói ducuro, tuaro mehne sañurucu õ sehe ni yahure:

—Ñahma yapioina core ti tuaro cahmano seheta jipihtia dachoripe Cohamacũ mehne msa jithire tuaro cahmaina yuhure siniga. Msa ã sinichũ Cohamacũ yaina musare ji dutiitja. ³⁸ Yuhure wacũ tuainare õ sehe ni joaa tiha Cohamacũ yare ti joari tju: “Måri pohtaripũ catichũ yoaa co to ã wijaarucuro seheta Cohamacũ yaina mehne catichũ yoariro ã jirucurohca”, ni joaa tiha Cohamacũ yare ti joari tju —ni yahure Jesu judio masare.

³⁹ Æ catichũ yoarirore wama payo yahuro “Yuhure wacũ tuainare Espiritu Santo saarucũ sũ msa waharohca”, nino nire Jesu. Tiro manopũ

to mjaerasinichũ Espiritu Santo sehe wihierasiniha.

Judio masa pua curua tju waha

⁴⁰ Jesu to ã nichũ tuhoa, masa payũ õ sehe ni durucure:

—Ahriro potocãta Cohamacũ yare yahu muhtariro mari cohtariro jira —nire masa.

⁴¹ Æ sehe nire paina sehe:

—Ahriro Cristo marine yuhdũchũ yoahitiro jira —nire.

Paina sehe õ sehe nire tjoo:

—Cristo taro, Galilea yahpa macariro jisi tiro. Ahriro Jesu sehe tó macariro tjira. ⁴² Cristo Davi cjiro panamino ji turiariro jirohca. Æ jiro Davi ya maca cjiroi Belõi Cristo masa bajuarohca. Æ seheta ni yahura Cohamacũ yare ti joari pui. Ahriro Jesu sehe Belõi masa bajueraha. Æ jiro tiro Cohamacũ to warocariro Cristo waro jierara —nire tina.

⁴³ Æ jia Jesure tuhomarina cjiri tju ware ti basi pua curua. ⁴⁴ Mahainacã masa sehe Jesure ñaha duamare. Æ ñaha duapahta tirore ñahaerare.

Judio masa puhto Jesure ne wacũ tuaeraha

⁴⁵ Æ yoa surara sacerdotea puhto cahapũ fariseo curua macaina cahapũ tjuaa wahaha. Ti tju suchũ ñna tina surarare sinituha:

—¿Dohseana Jesure ñahaerari msa? —ni sinituha tina sehe.

⁴⁶ —Tiro noaputiario durucuro jihre. Paina tiro yoaro sehe durucina ne mari ahna —ni yuhtihca surara tinare.

⁴⁷ Ti ã nichũ fariseo curua macaina sehe õ sehe ni yahuha:

—¿Musare to mahnochũ “Potocã nino nica”, niri msa cũhũ? ⁴⁸ Mari puhto Jesure wacũ tuaeraina jia ne tirore cahmaerare. Sã cũhũ ã jina tirore cahmaeraja. ⁴⁹ Ahriro masa sehe Cohamacũ dutiare Moise cjirore to cõrire masierara.

Ã masieraina jia Jesure wacũ tuaina jia tirore cahmana. Ti ã cahmari buhiri tinare Cohamacu buhiri dahrerohca — niha fariseo curua macaina.

⁵⁰ Fariseo curua macariro Nicodemo Jesure suhduro suriro cjiro tõi jiha tina mehne. Ti ã nichu tuhoõ õ sehe niha tiro cũhu tinare:

⁵¹ —Jesu to ñano yoirire masieraja mari. Ã masierana tiro marine to yahuhto pano tirore buhiri dahre masieraja mari. Ã masierapanahata tirore buhiri dahrena, mari ya dutiare yuhdurucana nija mari —niha Nicodemo tinare.

⁵² To ã nichu tuhoa õ sehe ni yuhtiha tina:

—¿Mũhu cũhu tiro yoaro seheta Galilea macariro tjijari? Cohamacu yare ti joari tjure buhe pahõoga. Ã buhecũ, “Cohamacu yare yahu muhtaina ne cãiro mariaha Galileare”, ni buhe masihca mũhu. Ã jiro ã nimacanocano nina Jesu —ni yuhtiha tina Nicodemore.

⁵³ [Ti ã niri baharo ti ya wuhusepu tjuaa wahaha.

Mũno mehne ñano yoiricorore judio masa puhtoã wacũenoca su pjaã

8 Jesu tãcupũ Olivo wama tidũpu wahare. ² Ã yoa pa dachoi bohrearo jichũ Cohamacu wuhũpu tiro sure tjoa. To ã suchũ ñua masa payũ tiro cahai cahmachure. Ti ã cahmachuchũ ñũno tiro sehe dujitjiãhno tinare buhe dũcare. ³ To ã buhero watoĩ sã coyeya judio masa buheina, fariseo curua macaina mehne tí wuhũpu numinore na tare. Ticoro mũno mehne to ñano yoachũ waro wacũenoca su pja suha tina ticorore. Ã su pja sua ticorore Cohamacu wuhũpu na sãare tina. Na sãa su tuhsũ jipihtina panoi ticorore duhu dapo, ⁴ õ sehe nire:

—Buheriro, ahricoro mũno mehne ñano to yoachũ waro wacũenoca ticorore su pja suhi. ⁵ Cohamacu dutiare

Moise cjiropũ marine to cũri õ sehe nina: “Mũno mehne ñano yoiricorore tãa mehne doca, wajãga”, nia tiha Cohamacu dutia. Mũhu waro, ¿dohse ni tuhotujari ahrire? —ni siniture tina Jesure.

⁶ Jesu to ñano nichu tuho duaã nimate tina tirore yahusã duaã. Ti ã sinitupachũta Jesu sehe puhsa nuju su, yahpapũ to wamo pica mehne joare. ⁷ Ã jiro ã ti ni siniturucuchũ Jesu sehe wahcãruca, tinare õ sehe ni yahure:

—Musa mehne macariro ñano yoeari sehe ticorore tãa mehne doca mũhtajaro —nire Jesu.

⁸ Ã ni tuhsũ pari turi tiro puhsa nuju, yahpapũ joare tjoa. ⁹ Tĩre tuhoa ti ñaa yoirire wacũa, ti wahmisũma sehe wijaa mũhtare. Ti baharo tina mehne macaina cũhu wijaa pihitia wahare. Ã ti wijaa pihitiari baharo numino tõi ducuricoro Jesu mehne tjuare. ¹⁰ Ã jiro Jesu wahcã nuju su, ticorore õ sehe ni sinitu ñũre:

—¿Nohopũ wahari tina? ¿Mũhũre buhiri dahre duamarina mariajari mipũre? —nire ticorore.

¹¹ —Mariaha, puhtoro —ni yuhtire ticoro.

—Yũhu cũhu buhiri dahreraja mũhũre. Wahaga. Ã jico ñaare yoa namoeco tjiga —nire Jesu ticorore.]

Buhriaro marine to ñũ masichũ yoaro seheta Jesu ahri yahpa macainare Cohamacũre masichũ yoara

¹² Pari turi Jesu tí wuhũpu jĩinare õ sehe ni yahure:

—Buhriaro marine to ñũ masichũ yoaro seheta yũhu ahri yahpa macainare Cohamacũre masichũ yoaja. Yũhũre wacũ tuariro jipihtia dachoripe Cohamacu mehne ã jurucurohca. Ã jiro tiro noare wacũnohca. Ã yoa tiro ñaare wacũ duasi —ni yahure Jesu.

¹³ To ã nichu tirore fariseo curua macaina õ sehe nire:

—Muhū mū basi mū jia tiare ā ni durucui nina. Ā jia mū ō sehe ni, mū mū sūro mū nimacanocachū tí yaba cjihti jierara —nire tina Jesure.

¹⁴Ti ā nichū Jesu ō sehe ni yuhtire:

—Yū tarirore masija yūhū. Yū wahahto cūhure masija yūhū. Mūsa sehe ne tíre masierara. Mūsa ō sehe nipachūta yū jia tiare mūsare yū yahuri potocā tjira. ¹⁵Mūsa mū sūro mūsa űiri dihtare masina mūsa. Ā jina noano masierara mūsa. Ā masierapanahca yūhure űano ni durucura mūsa. Yūhū sehe yū mū sūro masare ne ā nieraja. ¹⁶Ā jicu masa ti jia tiare űū masicu yū mū sūro űū masieraja. Yūhū pini yū Pūcu yūhure warocariro mehne űū masija. Ā jicu masa ti jia tiare yū űū masia tí potocā tjira. ¹⁷Mūsare dutia ti joari pūi ō sehe ni yahura: “Pūaro masa cūno potori ti yahuchū ti yahua potocā tjira”, ni yahu joari jira. ¹⁸Yūhure yahuriro mehne sā pūaro tjija. Yūhū yū jia tiare yahuja. Tuhsū, yū Pūcu cūhū yahura yūhū sehere. Tirota jira yūhure warocariro —nire Jesu.

¹⁹—¿Nohopū jicari mū Pūcu? —ni siniture tina.

—Yūhure mūsa masierara. Yū Pūcu cūhure masierara mūsa. Yūhure masina, yū Pūcu cūhure masiboa mūsa —ni yuhtire Jesu tinare.

²⁰Jesu tinare buhero ā ni durucure Cohamacū wūhūi ti niñeru duhu sāa caa poca cahai. To űano yūhduhti pja dūhsasinire. Ā jia tina mehne to jipachūta tina tirore űahaerare.

“Yū wahahtopūre mūsa sehe waha masisi”, niha Jesu

²¹Pari turi Jesu tinare ō sehe ni yahure tjoa:

—Yū tariropū wahaihca. Yū wahari baharo yūhure macanahca mūsa. Ā jina mūsa űaa buhiri tiina yarianahca. Yū wahahtopūre mūsa sehe waha masisi —ni yahure Jesu.

²²—“Yū wahahtopūre mūsa sehe waha masisi”, ¿to nichū tūhoa ahriro to basi wajā yariarohcari ā nino? —nire sā coyea judio masa ti basi.

²³Ti basi ti ā nichū masino ō sehe ni yahure Jesu tinare:

—Mūsa sehe ahri yahpa macaina jira. Yūhū sehe mūano macariro jija. Ahri yahpai bajuarina jira mūsa sehe. Mūanopū tariro jija yūhū sehe. ²⁴Mūsa yū jia tiare yū nirire “Potocā jierara” nina, mūsa űaa buhiri tiina yarianahca mūsa. Ā jicu “Mūsa űaa buhiri tiina yarianahca mūsa”, nimahi mūsare —nire Jesu tinare.

²⁵—¿Noa baro jijari mūhū? —ni siniture tina.

—Wahmanopūre yū nirucuriro seheteta jija yūhū. ²⁶Mūsare yū yahuhti pjíro dūhsasinina. Tuhsū, mūsa űano yoari buhirire mūsare yū yahuhto cjihto pjíro dūhsasinina mini. Ā jicu yūhure warocariro to yahuri cjirore ahri yahpa macainare yahuja. To yahuri potocā tjira —nire Jesu tinare.

²⁷“Yūhure warocariro”, to nichū tūhoa “Mari Pūcu jica”, ni tūhotuerare tina. ²⁸Ti ā ni tūhotuerachū űūno Jesu ō sehe ni yahure tinare:

—Yūhure masūnore Cohamacū warocarirore mūsa yucūcu taño mehne wahcō daponahca. Mūsa ā yoana, “Tiro Cohamacū warocariro tjira”, ni masinahca. Ā jina yū mū sūro yū yoaerario yū jia tiare masinahca mūsa. Ā jina yū Pūcu yūhure to buheri dihtare yahuriro yū jia cūhure masinahca mūsa. ²⁹Yūhure warocariro sehe yūhū mehne jira. To cahmaare jipihtia dachoripe yoarucuja. Ā jiro yūhure tiro ne cohāerara —nire Jesu tinare.

³⁰To ā nichū tūhoa, tirore masa payū wacū tuare.

**Cohamacu pohñare, ñaare
yoaina cūhure yahuha Jesu**

³¹ Ā jia paina judio masa Jesure wacū tuare. Ā jiro Jesu tinare õ sehe ni yahure:

—Yū dutiare yoa pahñoina jina, potocāta yū buheina jira mūsa. ³² Ā jina potocā masinahca mūsa. Potocā jiare masina, ñaa yoare duhu masinahca. Ā jina cahamaca yoaro sehe ji namosi mūsa —nire Jesu tinare.

³³ To ā nichū tuhoa tina õ sehe ni yūhtire:

—Sā sehe panopū macariro Abrahā cjiro panamana ji turiaina jija. Ā jina ne paina ti cahamaca jieraja sā. Ā jicu “Cahamaca yoaro sehe ji namosi” nicū, ¿dohse jiro baro sāre ā nijari mūhū? —ni siniture tina Jesure.

³⁴ Ti ā nichū tuhoro õ sehe nire tiro:

—Potocā mūsare niita nija. Jipihtina ñaare yoaina sehe ti ñaa yoare duhu masierara. Ā jia tí ñaa sehe ti puhtoro yoaro sehe jira. Ā jiina jia cahamaca yoaro sehe jira tina. ³⁵ Cahamacuno sehe to puhtoro ya curua macariro jipihtia dachoripe jirucuerara. Ā jiro painare dutiri jierara. Tí wūhū macariro sehe to macuno sehe jipihtia dachoripe potocāta tí curua macariro jira tiro. (Yūhū sehe Cohamacu macuno jija. Ā jicu dutiri jija. Mūsa ñaa yoare duhu dutihtja.) ³⁶ Ā jina yūhū Cohamacu macuno ñaare yū duhuchū yoarina jina potocāta ñaare duhurina jira mūsa. (Ā jina tí ñaa cahamaca yoaro sehe ji namoerara mūsa.) ³⁷ Abrahā cjiro panamana ji turiaina mūsa jichū masija. Ā jipanahta yū yahua sehere tuho duaerara mūsa. Ā jina yūhūre wajā duara mūsa. ³⁸ Yū Pūcū yūhūre to masichū yoari cjirire yahuja mūsare. Yū ā yahupachūta mūsa pūcū watīno mūsare to dutiare yoara mūsa cūhū —nire Jesu tinare.

³⁹—Abrahā cjiro panopū macariro sā ñūchū cjiro jia tiha. Ā jiro watīno sā pūcū jierara —ni yūhtire tina.

Ti ā nichū Jesu õ sehe ni yūhtire:

—Abrahā panamana jina, to yoariro sehetā yoaboa mūsa. ⁴⁰ Cohamacu yūhūre potocā to yahuare mūsare yū yahupachūta yūhūre wajā duara mūsa. Abrahā cjiro sehe ne ā yoera tiha. ⁴¹ Mūsa pūcū to yoariro sehetā yoara mūsa —nire Jesu tinare.

To ā nichū tina õ sehe ni yūhtire:

—Wamomaca duhtemahnoeraina pohna jieraja sā. Cūirota jira sā Pūcū. Tirota jira Cohamacu —nire tina.

⁴² Ti ā nichū Jesu õ sehe ni yūhtire:

—Cohamacu mehne macariro jicu, õpūre tahi. Ā jina Cohamacu mūsa Pūcū to jichū yūhūre cahīboa mūsa. Yū mū sūro taerahi yūhū pinihta. Cohamacu to warocachū tahi õpūre. ⁴³ ¿Dohseana yū durucuarē tuhoerajari mūsa? Yū yahuare tuhona bihoerara mūsa. Ā jina tuho duaerara mūsa. ⁴⁴ Mūsa pūcū sehe watīno jira. Ā jina watīno cahmaa sehere yoa duara mūsa. Ahri yahpa wahmanopū to ji dūcachūpū, mipū cūhūre tiro masare wajārucuriro jira. Tirore potocā durucua mariaha. Ā jiro tiro potocā ne durucuerara. Tiro wahmanopūre mahño muhta dūcariro jia tiha. Ā jiro tiro ā mahñorucuriro jiro, mahñoare yahura. ⁴⁵ Yūhū sehe mūsare potocā yahuja. Ā yū yahuchū yūhūre tuhoerara mūsa. ⁴⁶ “Mūhū ñano yoariro jira”, yūhūre ni masierara mūsa. ¿Potocā mūsare yū yahupachūta dohseana tuhoerajari mūsa? ⁴⁷ Cohamacu pohna sehe to durucuarē tuhora. To pohna jierana, to durucuarē tuho duaerara mūsa —nire Jesu tinare.

**Abrahā cjiro to jihto pano Cristo
sehe ji muhta tuhsua tiha**

⁴⁸ To ā nichū tuhoa judio masa tirore õ sehe nire:

—“Muhũ Samaria macariro jira. Ā jicu tuho masierariro watĩno to cohtotariro jira muhũ”, sã niri potocã tjira —nire tina Jesure.

⁴⁹ Ti Ā nichũ tuhoro õ sehe ni yũhtire Jesu:

—Tuho masierariro, watĩno to cohtotariro jieraja yũhũ. Yũ Pũcure ño payoja. Mũsa sehe yũhũre ño payoerara. ⁵⁰ Yũhũre masa ti ño payohtire macaeraja yũhũ. Yũ Pũcu sehe masare yũhũre ño payo dutira. Tiro pinihta yũ jia tiare noano ñũ masino, Āta ño payo dutira. Tuhsũ, yũhũre ti cahmaerari buhiri buhiri dahreriro jirohca tiro. ⁵¹ Potocãta musare nii nija. Yũ dutiare yoariro jipihitia dachoripe Cohamacũ mehne Ā jirucurohca —nire Jesu.

⁵² To Ā nichũ tuhoa õ sehe nire tina:

—Mipũ pinihtare tuho masierariro, watĩno to cohtotariro mũ jichũ sã noano masija. Abrahã cjiro yariaa wahaha. Cohamacũ yare yahu muhtaina cjiri cũhũ yaria pihitia wahaha. Ā jicu “Yũ dutiare yoariro jipihitia dachoripe Cohamacũ mehne Ā jirucurohca” nicũ, ¿dohse nicũ Ā nijari muhũ? ⁵³ ¿Sã ñũchũ cjiro Abrahã yũhdoro tuajari muhũ? Tiro cjiro, Cohamacũ yare yahu muhtaina cjiri cũhũ yariaa wahaha. ¿Muhũ sehe diro baro jijari muhũ Ā ni durucucũ? Muhũ Ā niboriro jierara —nire tina.

⁵⁴ Ti Ā nichũ tuhoro Jesu õ sehe ni yahu namore:

—Yũhũ yũ basi “Tuariro jija yũhũ” nicũ, tuariro jieraboca yũhũ. Yũ Pũcu sehe “Tiro tuariro jira”, nina yũhũre. “Sã yairo Cohamacũ”, mũsa niriro sehe yũ Pũcu tjira. ⁵⁵ Mũsa sehe yũ Pũcure ne masierara. Yũhũ sehe tirore masija. “Tirore masieraja” nicũ, mũsa yoaro seheta mahũnoa payũriro jiboa yũhũ. Potocãta tirore masija. Ā jicu to dutiare yoaja. ⁵⁶ Ahri yahpũ yũ tahtore mari ñũchũ cjiro Abrahã cjiro masia tiha. Ā masino tiro wahchea tiha —nire Jesu.

⁵⁷ To Ā nichũ tina õ sehe ni yũhtire:

—Muhũ cincuenta cũhmari cjuæerasinica. Abrahã cjiro panopũ macariro jira. ¿Mipũre tiro cjirore muhũ dohsea masiboari? —nire judio masa Jesure.

⁵⁸ —Potocã musare niita nija. Abrahã to jihto pano yũhũ sehe ji muhta tuhsua tii —nire Jesu tinare.

⁵⁹ To Ā nichũ tuhoa tina sehe tãare na, tirore doca duamare. Ti Ā doca duapachuta Jesu sehe Cohamacũ wũhũ jirore duhti wijaa wahare.

Capari ñũerarirore ñũchũ yoaha Jesu

9 Ā yoa Jesu sã to buheina mehne mahai wahana paioire capari ñũerarirore boca sũi. Tiro wahma masa bajaroputa capari ñũerariro jia tiha. ² Sã cũhũ tirore ñũna, õ sehe ni sinitu ñũhi Jesure:

—¿Buheriro, ahriro dohsearo capari ñũerariro masa bajua tiari? ¿Ñaaire yoaa tiari Ā waharo? ¿O to pũcũsuma sehe ñaaire yoaa tiari to Ā wahachũ? —ni sinitu ñũhi sã sehe Jesure.

³ Sã Ā nichũ tuhoro õ sehe ni yũhtire tiro:

—Ahriro to ñaaire yoari buhiri capari ñũerariro wahaerare. To pũcũsuma cũhũ ñaaire ti yoari buhiri capari ñũerariro wahaerare. Cohamacũ sehe tirore capari ñũerachũ yoare tirore ñũchũ yoaro taro masare to ñohtire. ⁴ Yũhũre warocariro to cũrire mipũre yoaro cahmana yũhũre. Ñamipũ mari dahra masieraro seheta baharopũ yũhũre warocariro to cũrire yoa masieraja yũhũ. ⁵ Ahri yahpũ buhriaro marine to ñũ masichũ yoariro seheta jirore jicu ahri yahpa macainare Cohamacũ yare masichũ yoaja yũhũ —nire Jesu.

⁶ Ā ni tuhsũrota yahpũ chahcho puti cũre. To Ā chahcho puti cũrire dahra more, capari ñũerarirore to caparire wisõre. ⁷ Ā wisõno õ sehe nire Jesu:

—Siloé wama tiri copai cuhsari copai mu caparire cosai wahaga —nire Jesu. (Siloé sã ya dusero mehne nia “Warocari copa”, nia nire.)

Jesu to caparire cosa dutiriro sehe waha, cosa, capari ñariroru tju wihire. ⁸To tju wihichu tiro cahai jiina tirore ñare. Tó pano niñeru siniriro cjiro to jichu ñarina tirore õ sehe nire ti basi:

—¿Ahririro sohõ jiriro niñeru siniriro cjiro jierajari? —nire tina.

⁹—Tirota jira wiho —nire paina sehe.

—Tiro jierara. Ñ jieraparota tiro yoaro sehe bajuriro jira —nire paina.

Ti ã nichu tuhoru capari ñuerariro cjiro sehe õ sehe nire:

—Tiro tjija yuhu —nire tinare.

¹⁰To ã nichu masa tirore õ sehe ni siniture:

—¿Capari ñuerariro cjiro jicu dohse waha ñari muhu? —ni siniture tina tirore.

¹¹—Jesu wama tiriro dihta sohãare dahra more, yu caparire wisõre. Yuhure wisõ tuhsu “Siloé wama tiri copapu mu caparire cosai wahaga”, to nichu cosai suhi yuhu. Yu ã cosari baharo yu capari noano bajure yuhure —ni yahure tiro masare.

¹²—¿Muhure ã yoariro nohopu jicari tiro? —nire tina.

—Buah. Nohoi jiro jica —nire tiro.

Capari ñuerariro cjirore fariseo curua macaina sinituha

¹³Ñ ni durucu tuhsu tina capari ñuerariro cjirore fariseo curua macaina cahapu naahre. ¹⁴Tí dacho Jesu dihta sohãare dahra more capari ñuerarirore noariro to yoari dacho Sabado dacho jire. Tí dacho sã sori numu jire. ¹⁵Ñ jia fariseo curua macaina sehe tirore õ sehe ni sinituha tjoa:

—¿Dohse yoa muhu ñari? —ni sinituha tina.

—Dihta sohãa mehne yu caparire wisõhre. Ñ jicu yu caparire yu cosari baharo ñu ducahi yuhu —ni yahuha tiro tinare.

¹⁶—Tiro Sabado dacho mari sori numu mari dahra dutierari numu dahrahe. Ñ jiro tiro Cohamacu yairo jierara —niha paina fariseo curua macaina sehe.

Paina sehe õ sehe niha:

—Ñaaire yoariro õ sehe noariro wahachu yoa masierara. Ñ jiro tiro noariro jiboca —niha paina.

Ñ jia tina puu curua ti basi tju waha.

¹⁷Ñ jia pari turi tina capari ñuerariro cjirore õ sehe ni sinituha tjoa:

—¿Muhure mu caparire noano yoarirore muhu waro dohse ni tuhotujari Jesure? —niha tina tirore.

—Tiro potocãta Cohamacu yare yahu muhtariro jira —niha capari ñuerariro cjiro.

¹⁸Wahmanopure judio masa õ sehe ni tuhotumaha: “Ahririro capari ñuerariro cjiro jierara”, ni tuhotumaha tina. Ñ ni tuhotua capari ñuerariro cjiro pucsumare pjirocaha tina. ¹⁹Pjiroca tuhsu, to pucsumare õ sehe ni sinituha fariseo curua macaina puhtoa:

—¿Ahririro potocãta musa macu jijari? ¿Dõihita tiro capari ñuerariro masa bajuari? ¿Potocãta capari ñuerariro cjiro jiparota dohsearo ñujari mipure? —ni sinituha tina to pucsumare.

²⁰—Ahririro sã macuta jira. Ñ yoa dõihita capari ñuerariro masa bajua tire tiro. ²¹Tíre masipanahta to ñurire, tirore ñuchu yoariro cõhure masieraja sã. Sã macure sinituga. Bucuro jira tiro. Tiro to basi yahu masina —niha to pucsuma.

²²Judio masa sã puhtoa wahmanopure õ sehe nia tiha:

—“Jesuta Cristo Cohamacu warocariro jira”, niinare mari buhea wuhusepu sãa dutisi sã —nia tiha judio masa puhtoa.

Ti ā nichu tuhoa capari nuerariro cjiro pucsuma sehe judio masa puhtoare cui niha. ²³ Ā cuia, “Bucuro jira tiro. Tiroreta sinituga”, niha tina judio masa puhtoare.

²⁴ Baharo judio masa sā puhtoa pari turi capari nuerariro cjirore pjirocaha tjoa. Pjiroca tuhsu, ō sehe niha tirore:

—Cohamacu mehne poto yahuga muhu. Jesure mahñoriro to ñaa yoariro jichu sā masija. Ā jicu poto yahuga sare —niha judio masa capari nuerariro cjirore.

²⁵ Ti ā nichu tuhoro ō sehe ni yuhtiha tiro:

—Jesure to ñaa yoariro to jichu masieraja yuhu. Cñota masija yuhu. Panopure capari nuerariro jia ticuru yuhu. Mipu sehene ñuja yuhu. Tí dihtare masija yuhu —ni yuhtiha capari nuerariro cjiro tinare.

²⁶ —¿Dohse yoari muhure tiro? ¿Mu capari ñuhto cjihtore dohse yoari tiro muhure? —ni sinituha tina tjoa.

²⁷ —Tíreta musare yahu tuhsumahicu yuhu. Yu ā ni yahupachuta musa ne tuho duaerare yuhure. ¿Dohse yoa duana pari turi yu yahuchu tuho duajari musa? ¿Musa cuhu to buheina ji duajari? —niha tiro tinare.

²⁸ To ā nichu tuhoa tina tuhtiha tirore:

—Muhu Jesu buheriro jira. Sā sehe Moise cjiro buheina jija. ²⁹ Potocāta Cohamacu Moise cjirore durucua tiha. Jesu to tarirore sā masieraja —niha tina capari nuerariro cjirore.

³⁰ Ti ā nichu ō sehe ni yuhtiha tiro:

—¿Tiro to tarirore musa masierachu yuhure ñuchu yoariro jiro Cohamacu warocariro jierabocari tiro?

³¹ Cohamacu ñaa yoainare ti siniare tuhoerara. Tí pinihtare mari masija. Tinare tuhoeraparota Cohamacure ño payorirore, to dutiare yoarirore to siniare tuhora Cohamacu.

³² Wahmanopure ahri yahpa to ji

dacachupure ne coā masa bajuaropu capari nuerarirore ne cūiro baro ñuchu yoariro mariea tiha. ³³ Ā jiro Jesu Cohamacu warocariro jieraro yuhure ñuchu yoeraboa tiro —niha tiro tinare.

³⁴ —Muhu dóihtā ñariro jia tiha. ¿Ā jipacuta sare buhe duajari muhu? —niha judio masa sā puhtoa tirore.

Ā ni tuhsuata tina tirore cohā wionocaha.

**Jesu yare cahmaeraina capari
ñueraina ti ñu masieraro
seheta Cohamacure masierara**

³⁵ Ā yoa capari nuerariro cjirore ti cohā wiorire Jesu tuhore. Ā tuhoro capari nuerariro cjirore boca suro, tirore ō sehe ni siniture:

—¿Masunore Cohamacu warocarirore wacu tuajari muhu? —nire Jesu.

³⁶ —¿Puhtoro, noa jijari tiro? Tirore masicu wacu tuaihtja tirore —nire capari nuerariro cjiro Jesure.

³⁷ —Tirore ñu tuhsure muhu. Mipure muhu mehne durucuriro tiro tjija yuhu —nire Jesu capari nuerariro cjirore.

³⁸ —Puhtoro, muhure wacu tuaja —nire capari nuerariro cjiro.

Ā ninota tiro Jesu panoi na tuhcuca caha su, tirore ño payore.

³⁹ To ā ño payochu ñuno ō sehe nire Jesu:

—Noaina, ñaina cuhu ti yoarire masichu yoai tai ahri yahpapure tahi. Capari ñueraina ti ñu masieraro seheta tina yoaro sehe jiina yu Pucure masierara. Ā masierainare yu Pucure masichu yoai tai tahi yuhu. “Sā noano masija”, ni tuhutumarina noano ti masierarire masichu yoai tai tahi yuhu —nire Jesu.

⁴⁰ To ā nichu tuhoa mahainacā fariseo curua macaina tirore ō sehe nire:

—“Capari ñueraina ti ñu masieraro seheta noano masierara musa cuhu”, ¿ni nijari muhu sare? —nire fariseo curua macaina Jesure.

⁴¹ Ti ā nichu Jesu ō sehe nire:

—Capari n̄eraina ti n̄u masieraro seheta potocā m̄sa noano masierachu, m̄sare buhiri mariaboa. “Sā noano masiina jija”, m̄sa niri buhiri buhiri tiina jisina m̄sa mip̄ure —nire Jesu tinare.

Ovejare n̄u wihboriro quitire yahuha Jesu

10 Baharo quitire mehne piti dahre buhero taro ō sehe nire Jesu:

—Potocāta nii nija m̄sare. Ovejare wihbori sahr̄ino sopacai sāaerariro, sopaca marienopu sāariro sehe yaca bucuro jira. ²Sopacai sāariro sehe ovejare n̄u wihboriro jira. ³Sopacare cohtariro sopacare p̄jōohna ovejare n̄u wihboriro to sāahto sehe. Ovejare n̄u wihboriro to durucuch̄u tuho tara to nuina oveja peri. Tinare p̄jirocaro, ti wama mehne pisurocarucura tiro. Ā yoaro tinare sahr̄inopu jiinare p̄ji wiorucura sopacap̄u. ⁴To yainare jip̄ihtinare p̄ji wio tinare m̄u t̄arucura. Oveja sehe to durucuar masia, to baharo n̄unu tirucura. ⁵Pairore ti masierariorore n̄unu tierara tina. Ā jia paina ti durucuar tuhoa, cui m̄urocaa wahara —nire Jesu tinare.

⁶Ahri quitire to ā yahupachuta to yahuare tuho n̄ahaerare tina.

Jesu ovejare noano n̄u wihboriro yoaro seheta to yainare noano n̄u wihbora

⁷Pari turi Jesu tinare ō sehe ni yahure tjoa:

—Potocāta m̄sare nii nija. Ovejare wihbori sahr̄ino sāari sopaca yoaro sehe jija yuh̄u. ⁸Jip̄ihtina yu pano tarina quihōno yu durucuar buheraina, ovejare n̄u wihbo mah̄noina yacaina yoaro sehe jira. Ti ā jipachuta yu yaina sehe oveja yoaro sehe jiina painare ne tuho wahc̄aerara. ⁹Yuh̄u ovejare wihbori sahr̄ino sāari sopaca yoaro sehe jija.

Ti sopacai sāaina yoaro sehe tjira yuh̄ure wacū tuaina. Ā jicu yuh̄u tinare pichacap̄u wahaborinare yuh̄d̄uch̄u yoaihtja. Oveja sehe tinare n̄u wihboriro mehne ti cahmaare bocaro yoaro seheta yu yuh̄d̄uch̄u yoina cūhu yuh̄u mehne ti cahmaare bocaahca. Yuh̄u tinare noano d̄ucata, noano n̄u wihboihca —nire Jesu.

¹⁰ Ā ni tuhsu ō sehe ni namore:

—M̄sare mah̄noare buheina, ovejare n̄u wihbo mah̄noina sehe ovejare yacaina yoaro sehe jira. Yacaa taa, wajāa taa, dojomehnea taa tara tina. Wiho mejeta yuh̄u sehe yu yainare, oveja yoaro sehe jiinare, tuaro waro ti wahchea mehne ā catirucuch̄u yoai tahi.

¹¹Ovejare noano n̄u wihboriro yoaro sehe jija yuh̄u. Ovejare noano n̄u wihboriro tinare noano d̄ucata, to yariahtore ne cuierara. Tó yoaro seheta yuh̄u cūhu yainare noano d̄ucata, yariahca, tinare ne soro wahaerahto sehe. ¹²Oveja p̄uro cahamacuno sehe potocā ovejare n̄u wihboriro jierara. Ā jia oveja to yaina jierara. Ā jiro yairo ovejare to ch̄uro tach̄u n̄uno to cahamacuno sehe ovejare coh̄a cūnoca, m̄urocaa wahara. To ā coh̄a cūri baharo, yairo ovejare to n̄ahach̄u n̄ua oveja peri m̄uroca site wahc̄aa wahara. ¹³To cahamacuno sehe to wapataa dihtare cahmana. Ā jiro tiro ovejare noano n̄u wihbo ji coaerara —nire Jesu.

¹⁴ Ā ni tuhsu ō sehe ni namore:

—Ovejare noano n̄u wihboriro yoaro sehe jija yuh̄u. Ā jicu yu yainare masija yuh̄u. Ā jia yu yaina sehe yuh̄ure masina. ¹⁵Tó seheta yu P̄ucu cūhu yuh̄ure masina. Ā jicu yuh̄u cūhu yu P̄ucure masija. Oveja yoaro sehe jiina yu yaina Cohamacu mehne ti ā jirucuti c̄jiltire yariaihca yuh̄u. ¹⁶Paina oveja pa sahr̄ino macaina yoaro sehe jiina paina masa cūhu yu yaina jiahca. Tina cūhure naaihca. Ā jia yu durucuch̄u tuho wahc̄ahca tina cūhu. Ā jia yu yaina jip-

ihkina cū curuata jiahca. Ā jicu yuhū dihta yu yainare nū wihboihca —nire Jesu.

¹⁷ Ā ni tuhsū ō sehe ni namore:

—Yu yaina Cohamacu mehne ti ā jirucuhti cjihtire yariaihca. Yu yariari baharo masa mujaihca. Yu ā yoachtiro jichu yu Pucu yuhure cahina. ¹⁸ Yu wajā dutierachū yuhure wajā masieraboa tina. Yu cahmano seheta yuhure wajāahca. Ā jicu yu yaina Cohamacu mehne ti ā jirucuhti cjihtire yariaihca. Yaria masija yuhū. Ā yoa masa mūja masija. Yu Pucu yuhure tīreta yoa dutire —nire Jesu.

¹⁹ To ā nichu tuhoa judio masa pua curua tju ware. Paina soro tuhotu, paina cūhū soro tuhoture:

²⁰ —Tiro watīno to cohtotariro jira. Ā jiro tuho masierariro jira. ¿Dohseana tirore pari turi tuhojari mūsa? —nire paina payu judio masa.

²¹ Paina sehe ō sehe nire:

—Watīno to cohtotariro jiro ā ni durucueraboa. Capari nūerarirore nūchū yoa masierara watīno to cohtotariro. Ā jiro jiro tiro watīno to cohtotariro jierara —nire paina judio masa.

Judio masa Jesure cahmaeraha

²² Pa dachoi sā coyeya judio masa Jerusalēi bose nūmuri yoaa nire pari turi. Cohamacu wuhure panopu tirore ti wari cjirire ti wacūhti dachori jire. Tí pjare puhiro jire. ²³ Tí dachoi Salomo wama tiri tahtiapu Cohamacu wuhū jiri tahtiapu Jesu nū tinino nire. ²⁴ Tí tahtiapu to jichu nūa sā coyeya judio masa tiro cahapu cahmachu, tirore ō sehe ni siniture:

—Yoaputari pja sāre noano yahueraca mūhū. Poto sāre noano yahu bahrañoga mūhū. ¿Cristo Cohamacu to warocariro tjijari mūhū? —nire tina Jesure.

²⁵ Ti ā nichu tuhoro ō sehe ni yuhtire Jesu:

—Mūsare yahu tuhsūmajacu yuhū. Yu ā yahupachūta yuhure tuho duaerare mūsa. Yu Pucu yuhure to dutiriro seheta to tuaa mehne yoa nōja. Ā yoacu yu Cristo jiareta mūsare nōi nija. ²⁶ Yu ā nōpachūta yuhure tuho duaerara mūsa. Mūsa sehe yu yaina jierara. Ā jina paio yaina oveja yoaro sehe jiina jina, yuhū sehete tuhoerara mūsa. ²⁷ Ovejare nū wihborirote to yaina ti tuhororo seheta yuhū cūhure yu yaina tuhoro. Ā jicu yu yainare masija yuhū. Ā jia tina yuhū mehne wahara. ²⁸ Ā jicu jipihtia dachoripe Cohamacu mehne ā catirucuchū yoaja tinare. Ā jia tina sehe pichacapū ne wahasi. Ā jia yu yainare yu nū wihbochū paina sehe ne cūirote yuhure ma masierara tinare. ²⁹ Ā yoa yu Pucu yu yainare yuhure wariro jipihtina yuhodoro tuariro jira. Ā jiro yu Pucu sehe yu yainare to nū wihbochū, ne cūiro tiro cūhure ma masierara tinare. ³⁰ Yuhū yu Pucu mehne cūirota jija —nire Jesu judio masare.

³¹ To ā nichu tuhoa judio masa sehe tirore ti doca wajāhti tāare pari turi namare tjoa. ³² Ti ā yoachū nūno Jesu ō sehe ni siniture tinare:

—Yu Pucu ya tuaa mehne payu tahari yoa nōmahi mūsare. ¿Di baro sehete yu yoari buhiri yuhure tāa mehne doca wajā duajari mūsa? —ni siniture Jesu.

³³ To ā nichu tuhoa ō sehe nire tina:

—Cohamacu tuaa mehne mū yoa nōri buhiri mūhure tāa mehne doca wajā duajaja sā. Cohamacure mū nāno durucuri buhiri mūhure tāa mehne doca wajā duajaja sā. Masuno jipaihta “Cohamacu jija yuhū”, mū nia buhiri mehne mūhure tāa mehne doca wajā duajaja sā —ni yuhtire tina.

³⁴ Ti ā ni yuhtichū tuhoro Jesu tinare ō sehe ni yahure:

—Mūsa cūhure “Cohamana”, ni pisure Cohamacu. Āta ni joaa tiha to dutiare ti joari pūi. ³⁵ Cohamacu yare ti joari pū

quihōno to jichu mari masija. “Mahñoa jira”, tí püre ni masieraja mari. Á jiro to yare masinare potocãta tiro “Cohamana”, ni pisura. ³⁶ Cohamacu yuhure besetjiãhno, ahri yahpüre warocare. Á jicu yuhu “Cohamacu macuno jija”, yu niri buhiri “Cohamacure ñano durucuro nina Jesu”, nina musa yuhure. ¿Dohseana yuhure ã nijari musa? ³⁷ Yu Pucu to cahmariro sehta to tuaa mehne yu yoa ñoerachu pinihtare yu buherire “Potocã tjira”, nieraboca musa. ³⁸ Yu Pucu to tuaa mehne yu yoa ñopachuta yuhu sehere tuho duaeraboca musa. Á tuho duaerapanahta to tuaa mehne yu yoa ñochu ñuna yu yoarire “Potocã tjira”, niga musa. Musa ã nina, yu Pucu mehne sã cūno potori sã jichu masinahca musa. Á jina yuhu yu Pucu mehne cūno potori yu jichu masinahca musa. Á jina tuho ñahanahca musa —nire Jesu tinare.

³⁹ To ã nichu tina pari turi tirore ñaha duamare. Ti ã ñaha duachu ñuno tiro duhti wijaa wahare.

⁴⁰ Á wijaariroputa João masare to bautisa muhtariropu Jordão sie sehpu pari turi wahare tjoa. Tõpu sũro tjuanocare tiro. ⁴¹ Á jia masa payu tirore ñua sure. Ó sehe nire tina ti basi:

—João sehe Cohamacu tuaa mehne yoa ñoerare. Á to yoa ñoerapachuta jipihãtia Jesure to yahuri cjiri sehe potocãta jira —nire masa ti basi.

⁴² Á jia tõpüre masa payu wacũ tua ducare Jesure.

Lázaro wama tiro yariaa wahaha

11 Á yoa cūiro Lázaro wama tiro to wahmiosãnumia María, Marta cūhu mehne Betania wama tiri macai jia tire. Tiro cū numu dohatia wahari jire. ² Tiro wahmiono María sehe baharo Jesu to dahporire me sitia wisõ, to pjoari mehne tirore pahã cohãhticoro jiri jire. ³ Á yoa to dohatia wahachu ñua, to wah-

miosãnumia sehe painare Jesure yahu dutirocari jire:

—Puhtoro, mu cahĩro dohatiro nina —ni yahu dutirocari jire Lázaro wahmiosãnumia.

⁴ Tí quitire tuhorõ õ sehe nire Jesu:

—Mipüre Lázaro to dohatia to variahti cjihti jierara. Cohamacu tuare masare ñohti cjihtire mipüre tiro dohatira. Á jia yuhu to macuno tuariro yu jia cūhure ñuahca masa —nire Jesu.

⁵ Jesu Martare, to bahoro cūhure, Lázaro cūhure tuaro cahãa tire. ⁶ Á nino Lázaro dohatiriro to jichu tuhoparota tõi Jesu sehe puã dacho tjuasinire. ⁷ Puã dacho baharo Jesu õ sehe nire sãre to buheinare:

—Pari turi Judea yahpapu tjuaa waha-jihna tjoa —nire sãre.

⁸ —Buheriro, canupucãta judio masa tõi macaina mūhure tãa mehne doca wajã duamare. ¿Dohseacu tõpu pari turi tjuaa waha duajari mūhu? —nihi sã to buheina.

⁹ Sã ã nichu tuhorõ, tirore ti wajã masierasininore yahuro, piti dahre buhero sãre õ sehe nire:

—Pjĩro tuhotuena tjiga. Cũ dachore doce horari waro jira. Sũ dacho macariro to jisnichu, noano ñaja mari. Á jina dachore tinina ne puha tu mua boraeraja mari. ¹⁰ Wiho mejeta nahitianoĩ tinina sehe puha tu mua boraã wahara. Sũ dacho macariro mariachu noano ñũerara tina —nire Jesu. (Á nino õ sehe nino niri jimare: “Mipüre yu Pucu yare yu yahu pahñohto duhsasinina. Á jia yuhure wajã masierasininina”, nino niri jimare.)

¹¹ Á nino sãre õ sehe ni yahu namore tjoa:

—Mari mehne macariro Lázaro, carĩno nica. To ã carĩpachuta yuhu tirore wahcõĩ wahaihãtia —nire sãre.

¹² —Puhtoro, Lázaro carĩro jiro, yuhdurohca —nimahi sã.

¹³Sã ã nipachuta Jesu “Carĩno nica” nino, “Yariaa wahaca”, nino niri jimare. To ã nichu tuhona “Lázaro soro nica”, ni tuhutumai sã sehe. ¹⁴Sã ã ni tuhotuchu masino Jesu potu yahure sãre:

—Lázaro yariaa wahaca. ¹⁵Yu marieno to yariachũ, noa nina. ã jina m̃sa yahure wacũ tua namonahca. M̃sa yu jia tiare masi namo, m̃sa yahure wacũ tua namohti cjihti jiahca ahri. ã yoana basata. Mari ñna wahajihna to cahapũ —nire Jesu.

¹⁶Toma suhuduariro wama tiriro õ sehe nire sãre:

—Mari cũhu Jesu mehne wahajihna. Tirore wajãa, mari cũhure wajãjaro — nire Toma.

Jesu ã jirucuchũ yoariro masare masoriro jira

¹⁷ã yoa sã tópr̃re sã s̃na cahachũ waro tó macaina õ sehe ni yahure Jesure: —Pititia dachori wahara Lázaro cjirore masa copapũ ti siõ sãari baharo —ni yahuha tirore.

¹⁸Betania wama tiri maca sehe Jerusalẽ cahacãi tia kilómetro yoaro jire. ¹⁹ã jia Lázaro to yariari baharo, payũ Jerualẽ macaina sã coyeya judio masa Martare, María cũhure ñahacaha tiia taa tari jire. ²⁰Tópr̃re sã s̃na cahachũ tuhoro, Marta sehe sãre piti bocaro wihire. Wiho mejeta to bahoro María sehe to ya wuhupũ tjuari jire. ²¹Marta sehe Jesure piti boca wihi, õ sehe nire tirore:

—Puhtoro, yu bahũ to yariahto pano mu õi jichũ, tiro yariaeraboa. ²²Mipũ cũhure Cohamacure mu sini payochũ, tiro mu sinino seheta yorohca —nire Marta Jesure.

²³—Mu bahũ masa wijaarohca —nire Jesu ticorore.

²⁴—ãja. Ahri yahpa to pihitiri dachoi yariarina cjiri ti masa wijaahiti dachoi

to masa wijaahitore masija yuhũ —nire ticoro sehe.

²⁵To ã nichu Jesu õ sehe ni yahure tjoa:

—Yuhũ masa wijaachũ yoariro jija. Yuhũ ã jirucuchũ yoariro jija. Yuhure wacũ tuariro yariaparota ã catirucurohca. ²⁶ã jia jipiltina Cohamacũ mehne ã catirucuina, yuhure wacũ tuaina pichacapũ ne wahasi. ¿Ahrire masijari m̃hũ? —nire Jesu ticorore.

²⁷—Puhtoro, masija yuhũ. Cristo Cohamacũ macuno, masare yuhduchũ yoariro “Ahri yahpapũ tarohca”, ti niriro mu jichũ masija yuhũ —nire Marta Jesure.

Lázaro to masa copa cahai Jesu tiia

²⁸Marta ã ni tuhsũ to bahoro Marĩare pjiro wahare:

—Marine buheriro mari ya macai taro nina. M̃hure pjihre —ni yaroça yahuri jire Marĩare.

²⁹To ã nichu tuhoro María ño duaro wahcãruca, sã cahapũ tari jire Jesure ñno taro. ³⁰Ti ya macapũ suerasinihi sã. Marta sãre to piti bocaroihita jisinihi sã. ³¹Judio masa tí wuhũ Marĩare ñahacaha tiia niha. ã jia ticoro to wahachũ ñna, tina ticorore nunũ ti tari jire. “To wahmino cjirore ti siõ sãari copapũ tiro waharo nina ticoro”, ni tuhaturi jimare tina. ã ni tuhotua ticorore nunũ ti tari jire.

³²ã yoa María sã cahapũ wihiro, Jesure ñũ, to dahpori cahai na tuhcuca caha sure.

—Puhtoro, yu bahũ to yariahto pano mu õi jichũ tiro yariaeraboa —nire ticoro Jesure.

³³ã jiro ticoro judio masa ticoro mehne tarina cũhu ti tiichũ ñno Jesu sehe tuaro cahya ñano yajeripohna tire.

³⁴—¿Lázaro cjirore nohopũ siõ sãari m̃sa? —ni siniture Jesu.

—Ñui taga —ni pji wahcãre tina.

³⁵Ti ā nichu tuhoro Jesu tiia wahare.

³⁶—Lázaro cjirore Jesu tuaro cahiri jira —nire judio masa ti basi.

³⁷Wiho mejeta paina tina mehne macaina sehe õ sehe nire:

—Capari ñuerarirore ñuchu yoariro jira ahriro Jesu. ¿Á jiro Lázaro cühure to yariaborore yuhdachu yoeraboari ahriro? —nire tina ti basi.

Lázaro masa wijaaaha

³⁸Á jiro pari turi Jesu tuaro cahya namore. Á jina sā jipihtina to masa copapu suhi. Tí copa tácapu ti sahari copa jire. Tí copapu to pjacu cjirore siõ sāa, táca pjiria mehne tju biha cūri jire tina.

³⁹—Tācare na pjõohga —nire Jesu.

To ā nichu tuhoro Marta yariariro cjiro wahmiono õ sehe nire:

—Pũhtoro mipu pititia dachori waha tuhsura to yariari baharo. Á jiro to pjacu cjiro urĩbiahca —nire Jesure.

⁴⁰—“Yuhure wacū tuaco Cohamacu tuaare ñucohca”, mũhure nimahi —nire Jesu Martare.

⁴¹To ā niri baharo tina tācare na pjõohre. Á ti na pjõori baharo Jesu sehe mũanopu ñu, Cohamacure õ sehe nire:

—Mai, yuhure mũhu tuho tuhsuhre. Tíre mũ yoachu masicu wahcheja mũhure. ⁴²Á yoa yuhure mũhu dachoripe ā tuhurucura. Tíre masija. Á masipaihta yuhũ mũ warocariro yũ jiare õre ducuina ti masihti cjihtire mũhure ā nii nija. Tíre “Potocã tjira”, ti nihti cjihti cühure ā nii nija —nire Jesu to Pucurore.

⁴³Á ni tuhsu Jesu tuaro sañurucure:

—Lázaro, wijaa tagá —ni sañurucure tiro.

⁴⁴To ā nichu yariariro cjiro to wamacarine to dahpori cühure suhti cahsari mehne ti wahmariro cjiro, to dapure suhtiro mehne ti wahmariro cjiro, masa copapu wijaa tare juna.

—Ti wahmari cjirore pjāga —nire Jesu.

Judio masa puhtoa sehe Jesure ñaha duamaha

(Mt 26.1-5; Mr 14.1-2; Lc 22.1-2)

⁴⁵To ā masochu ñua, payu judio masa Maríare ñua tarina mehne macaina Jesure wacū tuare. ⁴⁶Wiho mejeta paina sehe, tina mehne macaina sehe fariseo curua macaina cahapu waha, su, Jesu to yoarire yahuri jire tinare. ⁴⁷⁻⁴⁸Á jia sacerdotea puhtoa, fariseo curua macaina puhtoa cūhu cahmachu, ti basi õ sehe ni durucuha:

—Jesu payu tahari Cohamacu tuaa mehne yoa ño mũjana. To ā yoa ñoare mari tirore ā ñunoca mari ducataerachũ, jipihtina masa tirore wacū tua, tiro mehne waha pihtiaboca. Á yoa tiro Jesure ti puhtoro cjihto ti sõchu ñua, Roma macaina puhtoa sehe “Marine cohã nina”, ni sua, ñano yoahca marine. Tuhsu, Cohamacu wuhure cohã duti warocaahca ti yaina surarare. Mari ya dihta cühure maahca tina. ¿Á jina dohse yoanahcari mipure? —ni durucuha tina ti basi.

⁴⁹Ti ā nipachuta pairo Caifa wama tiro, tí cuhmare sacerdotea bui puhtoro jirore tinare õ sehe ni yahuha:

—Musa sehe ne masierara. ⁵⁰Judio masa jipihtina mari ya cjihtire cūiro masuno to yariachu noana. To yariaerachu mari jipihtina judio masare cohã pahñonocaboa. Tíre musa masierara —niha Caifa tinare.

⁵¹Á nino to mũ sũro ā nino nieraha. Sacerdotea bui puhtoro to jichu judio masa ya cjihtire Jesu to yariahtore Cohamacu sehe Caifare ā ni yahu dutiha. ⁵²Jesu yariaro judio masa dihtare yuhdachu yoaro taro nierare. Á yariaro jipihtina Cohamacu pohna ahri yahpapu ji siteina cūhu cū curuata ti jihti cjihtire yariahtiro jire Jesu. ⁵³Á jia tí dachoi-

hta tina “¿Jesure dohse yoa wajānah-cari mari?” ni durucua, tirore wajā taa nimaha.

⁵⁴Tirore ti ā wajā duachu masino Jesu payu judio masa watoi pari turi tinino wahaerare. Ā jiro masa marieno cahacāi Efraī wama tiri macapu sāre suho wahare. Sāre tí macai suho tjuasinire Jesu.

⁵⁵Tí pjare pascua bose numuri sā judio masa sā bose numuri cjlhto mahanocā duhsatjāhre. Ā jia bose numuri panocā masa payu paye macari macaina Jerusalēpu cahmachure. Pascua macaare ti chuhto pano Cohamacu yare yoaa taa ti nāa buhiri cosaa taa nire.

⁵⁶Tí pjare tina Jesure macaa niri jire. Ā jia Cohamacu wuhupu jiina ō sehe ni durucuha:

—¿Bose numurine nūno taerabocari Jesu, mūsa tuhotchū? —ni durucuha tina ti basi.

⁵⁷Ā jia sacerdotea puhtoā, fariseo curua macaina cūhu ō sehe ni yahu dutiha masare:

—Jesu to jirore mūsa masina, yahuga sāre. Tirore nāhana tana nija —niha puhtoā masare.

María Jesu dahporire me sitia mehne pio payore

(Mt 26.6-13; Mr 14.3-9)

12 Jesu sā to buheina mehne Betaniapu sā suri baharo pascua dachori seis dachori waro duhsasinire. Lázaro Jesu to masoriro cjiro tí maca macariro jire. ²Sā suri baharo Jesu cūhu ya chuā cjlhtire yoare paina. Ā yoa Lázaro, Jesu, sā mehne mesai nuju suhi. Sā ā nuju suri baharo Marta chuare payore sāre. ³Tuhsu, María me sitia sere nardo wama tidu macaa sere cū kilo dacho macai na ta, Jesu dahporire pio payore. Pio payo tuhsu to pjoari mehne tju cosare. To ā pio payori baharo tí wuhu noano me siti sahsea wahare. ⁴Sā mehne

macariro, Jesure nū tuhtiinare nōhtiro Juda Iscariote sehe ō sehe nire:

⁵—¿Dohse yoaro ahricoro ā yoa sitejari? Tíre ticoro duaboa. Ā duaro tres cientos dachori posa dahrari wapa wapataboa. Ā jiro ticoro tí niñerure pjacuoinare waboa —nire tiro.

⁶Juda sehe pjacuoinare yoadoho du-aerare. Tiro sā niñerure wihbobasariro jiparota yacariro jire. Tuhsu, tiro sā niñerure cāa tahari na mujare. Ā jiro “Tí niñerure naihtja” nino, ā nire Mariare tiro.

⁷To ā nichu tuhoro ō sehe nire Jesu:

—Ā niecu tjiga ticorore. To me sitiare yuhure to duharire yuhure pio payore, yuhure masa copapu ti siō sāahto pano yu pjacure cahnoyuro. Pjacuoina sehe mūsa mehne ā jirucuahca. Ā jina tinare wa masina mūsa. ⁸Yuhu sehe ahri yahpapure mūsa mehne ā jirucusi —nire Jesu.

Sacerdotea puhtoā Lázarore wajā duaha

⁹Ā yoa Jesu Betaniapu to jichu tuhoa sā coyera judio masa payu tirore nūa tare. Tiro dihtare nūa taa nierare. Lázaro yariariro cjirore Jesu to masorirore tiro cūhure nūa taa nire. ¹⁰Ti nūa surire masia sacerdotea puhtoā Lázaro cūhure wajā duare. ¹¹Lázaro yariariro cjiro Jesu to masoriro jichu nūa payu masa Jesure wacū tuare. To ā masochu nūa payu judio masa ti sacerdotea ya buhea sehere duhunocari jire. Ā ti duhuchu nūa sacerdotea puhtoā sehe sua yuhduā Lázarore wajā duare.

Jerusalēpu suha Jesu

(Mt 21.1-11; Mr 11.1-11; Lc 19.28-40)

¹²Pascua bose numurine ti yoachu payu masa Jerusalēpu nūa wahari jire. Pa dachoi Jerusalēpu Jesu to tahto cjlhtore masa tuhori jire. ¹³Ā jia pja pū sahnarine na wahcā, tirore piti bocaa wa-

hare. Ñã piti bocaã õ sehe ni sañurucure tina:

—Ahriroro wahche payojihna. Ahroro Cohamacu to warocariro noano yuhdujaro. Ahroro Israe yahpa macaina mari puhtoro tjira —ni sañurucure tina.

¹⁴ Jesu burrocã to bocariro bui pisare. “Õ sehta yoarohca”, ni joaa tiha Cohamacu yare ti joari tjui:

¹⁵ “Jerusalẽ wama tiri maca macaina, cuiena tjiga masa.

Ñuga. Musa puhtoro burrocã bui pisa tara”,

ni yahuha Cohamacu yare ti joari tjui.

¹⁶ “To ã ni joari Jesure nino nica” ni, sã to buheina noano masierasinihi. Ñã masierasinihanahta mũanopu Jesu to mũjari baharo sã ti joari cjirire wacũ boca tuho ñaha masihi. Õ sehe ni tuhotuhi: “Cohamacu yare ti joari tju sehe Jesure yahuro nimaha. Ñã jia Cohamacu yare ti joari tju to niriro sehta yoare masa Jesure”, ni tuhotu, sã masihi.

¹⁷ Lázarore ti siõ sãari copapu jirirore Jesu to pisuchũ tirore to masochũ ñurina cjiri yahure masare. ¹⁸ Ñã jia Lázarore Jesu masorire ti tuhoro baharo masa payũ Jesure ñua tare. ¹⁹ Ti ã tachũ ñua fariseo curua macaina ti basi õ sehe niri jire:

—Jipihtina Jesu yaina dihta wahaa nina mipure. Ñã jina mari dohse yoa masieraja tinare —niri jire fariseo curua macaina ti basi.

Mahainacã griego masa Jesure maca taha

²⁰ Ñã yoa bose numuri Cohamacure ño payoa taina mehne macaina mahainacã griego masa jire. ²¹ Ñã jia tina Felipe cahapu wihiri jire. Felipe sehe Betsaida wama tiri maca Galilea yahpai jiri maca macariro jire. Ñã jia tiro cahapu wihirina õ sehe niri jire tirore:

—Jesure ñũ duaaja sã —niri jire tina.

²² Ti ã nichũ tuhoro Felipe Andrepure tĩre yahuro wahari jire. Ñã jia tina puaro Jesure yahure. ²³ Ti ã yahuri baharo Jesu tinare õ sehe ni yahure:

—Yũhũ masũno Cohamacu warocariro jija. Yũhũre jipihtina ti ño payohti pja mipure jirota nina. Mipure yũ yariahti pja jirota nina. ²⁴ Potocãta musare yahui nija. Toari yapare yahparu mari yaerachũ, tí yapare mari toaerachũ cũ yapata tjuarohca. Ñã jiro tí yapare mari yari baharo dicha tirohca. (Tó sehta yũ yariari baharo yũhũre masa copapu ti siõ sãari baharo payũ masare Cohamacu mehne ã jirucuhina jichũ yoaihca yũhũ.) ²⁵ Ahri yahpai masa jiare pjĩro tuhotuboca masa. Ñã tuhotuna Cohamacure wacũerana, pichacapũ wahanahca masa. Ahri yahpai masa jiare ã tuhotunocahna, Cohamacu mehne ã jirucunahca. ²⁶ Yũ yare yoa duana, yũ buheare noano tuhoga masa. Musa ã yoana masa cũhũ yũ jihtopure jinahca. Yũ yare yoarirore yũ Pucu sehe wahchea mehne ñũnohca —nire Jesu.

Jesu to yariahtore yahuha

²⁷ Ñã ni tuhsũ õ sehe ni namore:

—Mipure yũhũ ñano yajeripohna tija. ¿Yũ Pucure dohse nihcari yũhũ? “Mai, yũ ñano yuhduhtore yoai tjia yũhũre”, ¿nibocari yũhũ? Tĩre nieraja yũhũ. Ñãno yuhduhtiro cjihota ahri yahpapure tahi. Ñã yoa yũ ñano yuhduhti pja mipure jiro nina —ni yahure Jesu sãre to buheinare.

²⁸ Ñã yoa õ sehe nire to Pucurore:

—Mai, mũ tuariro jiare mipure ñoga masare —nire Jesu to Pucurore.

To ã nichũ mũanopu durucuro coa tare:

—Tuariro yũ jiare masare ño tuhsũhi. Mipure ã jicu pari turi ñoihca masare —nino coa tare.

²⁹ To ã nino coa tachũ tuhoa tói ducuína masa payũ õ sehe nire:

—Wupō jica ā coa taro —nire masa.

—Anjo Jesure yahuro nire —nire paina masa.

³⁰ Ō sehe nire Jesu sehe:

—Muanopu yuhure tuho dutiro ā nino coa taerare. Mūsa sehere tuho dutiro ā nino coa tare. ³¹ Mipure ahri yahpa macaina ti nāno yoari buhirire buhiri dahrerohca tinare. Ahri yahpa macaina ti puhtorore watinore cohānohca Cohamacu. ³² Ā jicu yuhure crusapu ti wahcō dapochnu payu masare yuhu mehne macaina ti wahachu yoaihca yuhu —nire Jesu.

³³ Ā nino “Crusapu to yariahtore”, yahuro nire Jesu masare. ³⁴ To ā nichu tuhoa masa sehe tirore ō sehe nire:

—Cohamacu yare ti joari tjui ō sehe nina: “Cristo jipihtia dachoripe jirohca”, ni joaa tiha. ¿To ā ni joachu mūhure masunore Cohamacu warocarirore dohse jiro baro mūhure crusapu wahcō dapoahcari masa? ¿Masuno Cohamacu warocariro noa jijari tiro? —ni siniture tina.

³⁵ Ti ā nichu ō sehe ni yuhtire Jesu:

—Buhriaro to nū masichu yoaro se-heta jicu masare Cohamacu yare noano masichu yoaja yuhu. Baharo curerocā mūsa mehne jisi yuhu. Mū sare yu buhechu mipure tuhoga nāare mūsa yoerahti cjihtire Cohamacu mehne mūsa ā jirucuhti cjihtire. Yu buheare tuhoeraina nahitianoi tiniina yoaro se-heta ti wahahtore masierara. ³⁶ Yuhu buhriaro yoaro sehe jiro tjija. Ā jicu mū sare buhecu Cohamacu yare noano masichu yoaja mū sare. Mipure yu wahahto pano yuhure wacū tuaga. Ā wacū tuana yu yaina jinahca mūsa —nire Jesu.

Ā ni yahu tuhsu duhti wahcā wahare.

Judio masa Jesure cahmaeraha

³⁷ Payu tahari Cohamacu tuaa mehne tinare Jesu to yoa nōpachuta judio masa payu tirore ne tuho duarare. ³⁸ Co-

hamacu yare ti joari tjui Isaia cjiro to joariro seheta ā yoaa nire tina. Ō sehe ni joaa tiha Isaia cjiro:

“Cohamacu, mū buheare sā yahuchu masa tuho duarare.

Mū tuare tinare mū yoa nōpachuta, tíre ‘Potocā jierara’, nire tina”,

ni joaa tiha Isaia cjiro.

³⁹ Ti ā tuho duaerachu nūno Cohamacu tinare masierachu yoare. Tí cūhure Isaia cjiro ō sehe ni joaa tiha tjoa: ⁴⁰ “Capari nūeraina yoaro sehe jiina jichu yoaa tiha Cohamacu tinare.

Ā yoa to yare masierachu yoaa tiha tinare.

Ā jia to tuare nūpahta tina ti nūrire tuho nāhaerara.

Ā jia to buheare tuhopahta tíre tuho nāhaerara tina.

Cohamacu ya buheare masia, ti nāa yoari buhirire cohā dutiboa.

Ā jiro tinare yuhdachu yoaboa tiro”,

ni joaa tiha Isaia cjiro Cohamacu yare ti joari tjui. ⁴¹ Ā ni joaro Isaia cjiro Cristo tuare masino to niriro seheta Cristore yahu joaa tiha tjoa.

⁴² Paina Jesure ti cahmaerapachuta judio masa, sā puhtoa mehne macaina cūhu payu Jesure wacū tuaa, tirore cahmare. Ā cahmapahta tina fariseo curua macainare cuia painare “Jesu mehne sāahi”, ni yahu duarare. Tíre ti yahuchu tuhoa Jesure ti cahmari buhiri judio masa sā buheri wūhupu tinare sāa dutieraboa fariseo curua macaina sehe. ⁴³ Cohamacure wahchechu yoa duapahta tí yuhdoro fariseo curua macaina sehere wahchechu yoa duare Jesure cahma ducaina. Ā jia tina “Jesu yaina wahahi”, ni painare yahu duarare.

Jesu yahuare ti tuho duaerari buhiri masa buhiri tiahca

⁴⁴ Ā yoa Jesu tuaro sañurucu, ō sehe ni yahure:

—Yuhure wacū tuariro, yuhū dihtare wacū tuaerara. Yuhure warocariro cūhure wacū tuara tiro. ⁴⁵Tuhsu, yuhure masiina yuhure warocariro cūhure masina. ⁴⁶Buhriaro to ñu masichū yoaro seheta ahri yahpapū Cohamacū yare masichū yoai tai nihi yuhū. Ā jicū Cohamacū yare masare masichū yoaja. Nahitianoī wahariro yoaro sehe jiriro ñaare yoarucura. Yuhure wacū tuariro tiro yoaro sehe yoasi. Yuhure wacū tuariro quihōno tūhorohca. ⁴⁷Paina yū yahuare tūhopahta yū niriro seheta yoerara. Ti ā yoerapachūta yū yahuare ti yoerari buhirire buhiri dahresi yuhū sehe tinare. Ahri yahpapūre buhiri dahrei tai nierahi yuhū. Ahri yahpa macainare pichacapū wahaborinare yūhdūchū yoahrtiro cjihto tai nihi yuhū. ⁴⁸Yuhure cahmaerainare, yū yahua cūhure cahmaerainare buhiri dahrea jiahca. Tina yū yahuare ti tūhoerari buhiri ahri yahpa pihtiri dachoi buhiri tiaha. ⁴⁹Yuhū yū mū sūro yahueraja. Yū Pūcū yuhure warocariro sehe yuhure yahu dutire. Ā jia yū yahua sehe to ya durucua jira. ⁵⁰To ya durucuaire “Quihōno jira” nina, Cohamacū mehne ā jirucunahca mūsa. Ā jicū yū Pūcū to yahu dutiriro seheta yahuja mūsa —nire Jesu.

Jesu to buheina dahporire cosaha

13 Ā yoa pascua bose nūmuri panocā ahri yahpare to cohā wahcāhto cjihtore to Pūcūro cahapū to wahahto cjihtore masire Jesu. Tuhsu, ahri yahpa macainare to yainare tiro tuaro cahire tina mehne to jiro puro. Ā cahīrucura to yainare.

²Tí ñamine Jesu sã to buheina mehne sã chūchū Juda Iscariotere Simo macūnore Jesure ñu tuhtiinare ño duti tuhsūri jire watīno sehe. ³Tuhsu, to Pūcūro Cohamacū Jesure jipihtina

bui to pūhtoro sōrire masire Jesu. Ā yoa Cohamacū cahapū to tari cjrire, baharo mūanopū to mūjahti cūhure masire. ⁴Ā masino wahcāruca, to suhtiro bui macanore tjuwe na, tóre cū tuhsu, suhtiro cahsaro mehne to pjarō yūjūi dūhtere. ⁵Dūhte tuhsu, waparōi core pio sãa, sã to buheinare sã dahporire cosa dūcare. Sãre cosa tuhsu to dūhteri cahsaro mehne pahā cohāre sã dahporire.

⁶Paina buheinare cosa wahcā, Simo Pedropūre sūre. To dahporire to cosahto pano Pedro sehe tirore ō sehe nire:

—Pūhtoro, ¿yū dahporire cosai tai ni-jari mūhū? —nire Jesure Pedro.

⁷—Michapucacā mūhure yū yoahire masierara mūhū. Ā masierapacūta baharo masiilhca mūhū —nire Jesu.

⁸—Yū dahporire ne cosasi mūhū —nire Pedro.

—Mūhure yū cosaerachū yū yairo jisi mūhū —nire Jesu.

⁹—Pūhtoro, yū dahpori dihtare cosai tjiga. Yū dahporire, yū wamomacarine, yū dapu cūhure cosaga —nire Pedro.

¹⁰To ā nichū Jesu piti dahre buhero ō sehe nire:

—Cūiro masūno cuhsūro to pjacūre noano tju cosa pahñona. Ā jiro pari turi tirore tju cosaro cahmaerara. To dahpori dihtare cosaro cahmana. Jipihtina mūsa ñaa yoari buhirire cosarina cjiri mūsa jipachūta cūiro mūsa mehne macariro to ñaa yoari buhirire cosamahnoerariro jira —nire Jesu.

¹¹Jesu tirore ñu tuhtiinare ñohtirore masire. Ā masino “Cūiro mūsa mehne macariro to ñaa yoari buhirire cosamahnoerariro jira”, nire.

¹²Sã dahporire cosa tuhsu, to suhtirore sãa tuhsu, nuju sūre to dujiriroih̄ta.

—¿Michapucacā mūsa yū yoarire tūho ñahajari mūsa? ¹³Mūsa yuhure “Buheriro”, ni pisuna, “Pūhtoro”, ni

pisuna potocāta nina nica yuhure. Musare buheriro, mūsa puhtoro potocāta jija yuhū. ¹⁴ Ā jina yuhū musare buheriro, mūsa puhtoro jipaihta mūsa dahporire cosariro yū jichū nūna mūsa cūhū mūsa mehne macaina dahporire cosaga. ¹⁵ Michapucacā musare cosacu, baharo mūsa yoahci cjihtire musare űoi nija. Mūsa mehne macainare mūsa yoadohtire űoi nija. Musare yū yoariro seheta mūsa cūhū yoaga. ¹⁶ Potocā musare niita nija. Mūsa yū cahamaca yoaro sehe jiina yū bui jierara. Musare buhe duti yū warocarina jira mūsa. Ā jina yū bui jierara mūsa. Ā jicuta “Yū yoariro seheta yoaga”, nihi musare. ¹⁷ Ahrire masina, yū dutiare yoana, wahcheina jinahca mūsa.

¹⁸ Musare jipihtinare ā nieraja. Yū beserinare masija yuhū. Cohamacu to yare ti joari tjuī to ni joariro seheta ā waharohca. “Yuhū mehne chūrirota yuhure wajā duare”, ni joaa tiha Cohamacu yare ti joari tjuī. ¹⁹ To ā yoahito pano ahrire yahuyui nija musare. Yuhure to ā yoari baharo “Jesuta Cristo Cohamacu warocarirota jira”, mūsa nihti cjihtire ahrire musare yahuyui nija yuhū. ²⁰ Potocā musare niita nija. Yū warocainare cahmariro yuhū cūhure cahmana tiro. Tuhsū, yuhure cahmariro yuhure warocariro cūhure cahmana tiro —nire Jesu säre to buheinare.

Juda Jesure űu tuhtinare to ñohtore yahuha Jesu

(Mt 26.20-25; Mr 14.17-21; Lc 22.21-23)

²¹ Ā ni yahu tuhsū Jesu tuaro cahyare. Ā cahyaro ű sehe ni yahure tiro säre:

—Potocāta musare nii nija. Cūiro mūsa mehne macariro yuhure űu tuhtinare yuhure űonohca —nire Jesu.

²² To ā nichū tūhona Jesure űohtirore masierana, sā basi cahma űuroca űi. ²³ Cūiro Jesu to buheina mehne macariro yuhū, Jesu to cahūiro sehe

to pari wahpa dujīhi. ²⁴ Yū ā dujichū űūno Simo Pedro yuhure to wamomaca mehne yoa űo, siniture:

—Ĵ Jesure űohtirore diro sehere nino nibocari Jesu? Yahuga säre —ni to wamomaca mehne yoa űo, sinitu űure Pedro.

²⁵ To ā nichū yuhū sehe Jesu cahacāi dujīro jicu sinitu űūhi tirore:

—Puhtoro, Ĵ dirore nii nijari mūhū? —ni sinitu űūhi yuhū.

²⁶ —Ahri pāore dahra waha na, soha yū wahtiro sehe tirota jira yuhure űohtiro —nire Jesu.

Ā ni tuhsū ti pāo to dahra waha narirore soha tuhsū tīre Judare Simo Iscariote macunore ware. ²⁷ Ā yoa pāore to űahari baharo watīno sehe Judare űano yoa dutiri jire. Ā jiro Jesu tirore ű sehe nire:

—Mū yoahito cjihtore cjero yoa bahrañoga mūhū —nire Jesu Judare.

²⁸ To ā nichū tūhona sā mesapu dujiina, Jesu Judare to nirire noano tūho űahaerahi. ²⁹ Cāina ű sehe ni tūhotumahi: “Judā sā niñerure wihboriro jira. Ā jiro bose numūi sā chuhti cjihtire nuchū dutiro warocare Jesu Judare. O pjacuoinare niñerure wa dutiro niboca Jesu”, ni tūhotumahi sā cāina. ³⁰ Ā yoa Juda tí pāore űaha tuhsū, wijaa wahare. To wijaa pja űami jire.

Wahma dutiare yahuha Jesu

³¹ To ā wijaa baharo ű sehe nire Jesu:

—Mipū pinihtare yuhū masuno Cohamacu warocariro yū tuariro yū jia tiare űonohca Cohamacu masare. Ā jicu Cohamacu to tuariro to jiare űoihca yuhū sehe. ³² Ā jiro Cohamacu to tuaare yū űochū tiro sehe yū ya tuaa cūhure mipū pinihtare űono taro nina. ³³ Yū pohna yū cahūina, yuhure tūhoga. Mahaa dachoricā mūsa mehne jisinihca. Yū wahari baharo yuhure macanahca mūsa. Ā jicu mari coyea judio masare

yū niriro seheta mūsa cūhure nija. “Yū wahahtore mūsa sehe waha masierara”, tinare yū niriro seheta mūsa cūhure ā ni yahuja. ³⁴ Wahma dutiare musare yahuihtja. Mūsa mehne macainare cahīga mūsa. Musare yū cahīriro seheta, mūsa mehne macainare cahīga. ³⁵ Ā jina mūsa mehne macainare mūsa cahīchū űna yū yaina mūsa jiare masiahca paina —nire Jesu sāre.

“Jesure masieraja”, Pedro to nihto cjihtore yahuha Jesu

(Mt 26.31-35; Mr 14.27-31; Lc 22.31-34)

³⁶ To ā nichū Simo Pedro Jesure ō sehe ni sinitu űnure:

—Pūhtoro, űnopenhū wahaihcarī mūhū? —nire Pedro.

—Yū wahahtopure mipure yūhū mehne waha masierara mūhū. Mipure waha masierapaihta baharo yū cahai wahacūhca —nire Jesu Pedrorē.

³⁷ —Pūhtoro, űdohseacū mipure mūhū mehne waha masierabocari yūhū? Yūhure ti wajā duapachūta mūhure ne duhusi yūhū —nire Pedro Jesure.

³⁸ —Ā tjjari? űMūhure ti wajā duapachūta, mūhū yūhure duhueraihcarī? Potocāta mūhure nii nija. Caraca to duhto pano “Jesure masieraja”, niīhca mūhū painare. Tia taha ā niīhca mūhū —nire Jesu Pedrorē.

Jesu Cohamacū cahapū wahari maha yoaro sehe jira

14 Baharo Jesu sāre ō sehe ni yahure:

—Ne cahya pjīro tūhotuena tjiga. Cohamacure wacū tuaga. Ā jina yūhū cūhure wacū tuaga. “Cohamacū mehne yūhdūnahca”, ni tūhotuga tirore. Yūhū cūhure āta ni tūhotuga mūsa. ² Yū Pūcū to jiropure payū wūhūse jira. Mūsa jihto cjihtore cahnoyui wahai nija. Tī potocā tjira. Ā jicū musare tīre yahuja. ³ Ā jicū

mūsa jihto cjihtore cahno tuhsū, ōpūta pari turi majare tjuā taihtja yūhū. Ā jina tōi yū jiroita mūsa cūhū jinahca tjoa. ⁴ Mipure yū suhtopure wahari mahare masi tuhsura mūsa —nire Jesu sāre to buheinare.

⁵ —Pūhtoro, mū suhtore masieraja sā. űĀ jina dohse yoa mū wahari mahare masinahcarī sā? —ni sinitu űnure Toma Jesure.

⁶ To ā ni sinituchū tūhoro Jesu sehe ō sehe ni yūhtire:

—Yūhū Cohamacū cahapū wahari maha yoaro sehe jiro jija. Cohamacū cahapū wahacū yoariro, potocā yahuriro, ā catirucuchū yoariro jinocaita nija yūhū. Ā jia yū yaina dihta yū Pūcū cahapū wahaahca. ⁷ Panopū yūhure masina, yū Pūcū cūhure masiboa mūsa. Mipure tirore űnure mūsa. Ā jina tirore masi tuhsura mūsa —nire Jesu sāre.

⁸ To ā nichū Felipe sehe ō sehe nire:

—Pūhtoro, mari Pūcure űnoga sāre. Tō purota űnū duaja sā —nire tiro.

⁹ To ā nichū Jesu ō sehe ni yahure:

—Felipe, űyoari pja yūhū mehne jipaihta, mūhū masierasinihari yūhure? Yūhure űnūriro yū Pūcū cūhure űnū tuhsure. Ā jicū “Mari Pūcure űnoga sāre” nicū, űdohseacū ā nijari mūhū yūhure? ¹⁰ Yūhū yū Pūcū mehne pūaro jipanahta cūirota jija. űTīre “Potocā jierara”, ni imeje nijari mūhū? Musare yahucū yū mū suro yahui nieraja. Yū Pūcure yahubasai nija. Ā jiro tiro yūhū mehne jiro to tuā mehne yoa űnona. ¹¹ Yūhū yū Pūcū mehne pūaro jipanahta cūirota jija. Tīre “Potocā tjira”, ni wacūga mūsa. Tīre “Potocā tjira” nierana, Cohamacū tuā mehne yū yoa űnoare wacūna, yū Pūcū mehne yū cūirota jiare “Potocā tjira”, ni wacūga mūsa. ¹² Potocāta musare nii nija. Yūhure wacū tuariro yū yoariro seheta yoarohca. Ā yoa tiro yū yūhdoro yoarohca. Yū Pūcū

cahapu tjuai tai nija mipure. Æ jiro yuhure wacu tuariro yu yuhdoro Cohamacu tuaa mehne yoa ñonohca. ¹³ Æ jicu yuhure wacu tuaina ti sinino purota yoaihca. Æ yoacu yu Pucu to tuariro jiare ñoihca. ¹⁴ Yuhure wacu tuaina musa jichu musa sinino purota yoaihtja —nire Jesu.

“Espíritu Santore musare warocaihtja”, ni yahuha Jesu

¹⁵ Æ ni tuhsu õ sehe ni namore:

—Yuhure musa cahina, yu dutiare noano yoanahca. ¹⁶ Yu Pucure sinibasaihtja. Yu ã sinibasachu yu Pucu sehe paire musare yoadohtirore musare warocarohca. Æ jiro tiro musare yoadohtirore sehe jipihtia dachoripe musa mehne ã jirucurohca. ¹⁷ Tiro potocãta yahuriro Espiritu Santo tjira. Ahri yahpa macaina yuhure cahmaeraina sehe tirore masierara. Æ jia tirore cjuã masierara. Tirota musa mehne ã jirucurohca. Æ jina tirore masina musa.

¹⁸ Musare cohãsi yuhu. Musa mehne jihtiro cjihto tjua taihca yuhu tjoa. ¹⁹ Wiho mejeta mahanocã duhsara yu wahahto cjihto. Yu wahari baharo ahri yahpa macaina yuhure wacu tuaeraina yuhure pari turi ñusi. Musa sehe yuhure ñunahca. Yu catiriro jichu musa cuhu jipihtia dachoripe Cohamacu mehne catirucunahca. ²⁰ Tí dachoi yu tjua tahti dachoi yuhu yu Pucu mehne cãirota sã jichu masinahca musa. Æ jina yuhu mehne macaina musa jichu musa mehne macariro yu jichu cuhure masinahca musa. ²¹ Yu dutiare yoariro yuhure cahãrirota jira. Æ jiro yuhure cahãrirore yu Pucu sehe cahãnohca. Æ jicu yuhu cuhu yu dutiare yoarirore cahãihca. Æ yoa yu jia tiare noano masichu yoaihca tirore —nire Jesu sãre to buheinare.

²² Sã mehne macariro paio Juda wama tirore jire. Juda Iscariote Jesure ñu tuhtiinare ñohtiro jierare tiro. Pairo

Juda jire. Æ jiro tiro Jesure õ sehe ni siniture:

—Pũtoro, ¿dohse yoajari muhu tinare ã nicu? ¿Ahri yahpa macainare muhure masichu yoeracu, dohse yoacu sã dihtare muhure masichu yoaihcari muhu? —ni siniture Juda.

²³ To ã nichu tuhoro Jesu tirore õ sehe ni yahure:

—Yuhure cahina, yu dutiare noano yoa nina. Ti ã yoachu yu Pucu sehe tinare cahãnohca. Æ jina tina mehne jina tanahca sã. ²⁴ Yuhure cahãriro yu dutiare yoerara. Tuhsu, yu yahua musa tuhori cjiri sehe yu ya yahua jierara. Yuhure warocariro ya yahua sehe jira. Tiro yu Pucu tjira.

²⁵ Musa mehne jisnicu ahire musare yahusinii nija. ²⁶ Baharo yu sinibasachu yu Pucu Espiritu Santore warocarohca musare. Tiro Espiritu Santo sehe musare yoadohtiro jiro, musare buhe pahãnohca tiro. Æ yoa musare yu yahuri cjirire musare wacũchu yoarohca tiro.

²⁷ Musare noano jichu yoaihca yuhu. Yuhu yu noano jirore seheta noano jichu yoaihca musare. Ahri yahpa macaina ti mahãoperiro seheta yoasi yuhu musare. Yuhu pinihta potocãta noano jichu yoaihca musare. Cahya pjfro wacũena tjiga musa. Æ jina cuiena tjiga musa. ²⁸ “Yuhu wahaihca. Æ jicu musa mehne jihtiro cjihto tjua taihtja tjoa”, musare yu ã ni yahuchu tuho tuhsure musa. Tíre tuhona, wahcheboa musa. Yuhure musa potocã cahãrina jina, wahcheboa musa. Yu Pucu sehe yu yuhdoro tuara. Æ jina tiro cahapu yu wahahto cjihtore musa masiri baharo yuhure cahina, wahcheboa musa. ²⁹ Yuhure musa wacu tuahti cjihtire yu wahahtore yahuyui nija musare.

³⁰ Ahri yahpa macaina pũtoro watino sehe tara mipure. To ã tachu yuhu musa mehne yu durucu batohti

pja mahanocã dũsara. Tiro sehe yũhũre yũhdũrũca masierara. ³¹Wiho mejeta yũhũre yũ Pũcũ to dutiriho seheta yoaja yũhũ. Āta yoaja yũhũ yũ Pũcũre yũ cahĩare ahri yahpa macaina ti masihti cjihtire. Wahcãrucaga. Basa wahana —nire Jesu sãre to buheinare.

Jesu secũ yoaro sehe jiriho jira

15 Baharo piti dahre buhero sãre õ sehe nire Jesu:

—Yũhũ potocãta secũ yoaro sehe jiriho jira. Yũ Pũcũ sehe secũre ñũ wihboriho yoaro sehe jiriho jira. ²Yũ yaina secũ dũpũri yoaro sehe jiina yũhũ mehne macainata jira. Dicha mariea dũpũri secũre ñũ wihboriho to paha cohãriho seheta yũ Pũcũ to cahmaare yoerainare cohãna. Dicha tia dũpũri secũre ñũ wihboriho to cahnoriro seheta yũ Pũcũ to cahmaare yoainare yoado-horohca tiro “Yũ cahmaare yoa namo-jaro”, nino. ³Yũ yahuare tũhona, “Potocã tũjira”, nire mũsa. Ā jiro yũ Pũcũ mũsa ñaa yoari buhirire cohã tuhsũre. ⁴Yũhũ mehne macaina jiga mũsa. Ā jii mũsa mehne jiihca. Secũ dũpũri secũ mehne wahã sũera dũpũri jia, tí dũpũri sehe dicha mariaha. Tó seheta yũhũ mehne macaina jierana yũ Pũcũ cahmaare yoa masierara mũsa.

⁵Yũhũ secũ yoaro sehe jiriho jira. Mũsa sehe tũ dũpũri yoaro sehe jiina jira. Yũhũ mehne macariho mehne yũ jichũ dicha tia dũpũri yoaro sehe tiro yũ Pũcũ cahmaare yoara. Yũhũ mehne macaina jierana yũ Pũcũ cahmaare yoa masierara mũsa. ⁶Ñaa dũpũri to cohãboriho seheta yũhũ mehne macaina jierainare yũ Pũcũ cohãnohca. Tí dũpũri ñaia wahachũ secũre ñũ wihboriho tí dũpũri na cahmachũ pichacapũ jũ cohãnohca. Āta yoarohca Cohamacũ yũhũ mehne macaina jierainare.

⁷Yũhũ mehne macaina jina, yũ buheare boeraboca mũsa. Ā boerana, mũsa

cahmano purota siniga. Ā jicũ mũsa sinino purota yoabasaihtja. ⁸Yũ Pũcũ cahmaare yoaina mũsa jichũ ñũa “Jesu yaina jira ahrina”, ni masiahca masa. Ā jia mũsare ñũa yũ Pũcũre ño payoahca. ⁹Yũ Pũcũ yũhũre to cahĩriho seheta mũsare yũhũ cũhũ cahĩa tihi. Yũ cahĩina jirucuga mũsa. ¹⁰Yũ cahĩina jirucuina yũ dutiare yoara. Yũ Pũcũ to dutiare yoaja yũhũ. Ā yoacu to cahĩriho jirucuja yũhũ. Tó seheta mũsa cũhũ yũ dutiare yoana yũ cahĩina jirucunahca mũsa.

¹¹Ahrire mũsare yahuhi yũhũ mehne mũsa noano wahchehto cjihtore. Ā jina tuaro wahchenahca mũsa. ¹²Õ sehe dutija mũsare: Mũsare yũ cahĩriho seheta mũsa mehne macaina cũhũre cahĩga. ¹³Cũiro masũno tiro mehne macariho yaro jiboriore yariaro tiro mehne macariore tuaro cahĩna, paina ti cahĩriho yũhdoro. ¹⁴Ā jina yũ dutiare yoana yũhũ mehne macaina jira mũsa. ¹⁵Potocãta yũhũ mehne macaina waro jira mũsa. Mũsa ã jiina jichũ jip-ihtia yũ yoarire yahuja mũsare. Cahamacũno to puhtoro yoarire masierara tiro. Ā jicũ “Yũ cahamaca wiho jiina jira mũsa”, mũsare nieraja. Yũ Pũcũ yũhũre to yahurire mũsare yahu pahĩohi. Ā yahucũ “Yũhũ mehne macaina jira mũsa”, mũsare nija mipũre. ¹⁶Mũsa sehe yũhũre ne beserare. Yũhũ sehe mũsare beserare yũ Pũcũ cahmaare mũsa yoachtina cjihtire. Mũsa ã yoachũ mũsa yoaa ne wiho waro jisi. Ā jia mũsa yoaa ã jirucuahca. Mũsa ã yoachũ yũhũre mũsa wacũ tuachũ yũ Pũcũre mũsa sinino purota tiro mũsare warohca. ¹⁷Ahrire mũsare dutija yũhũ: Mũsa mehne macainare cahĩga mũsa —ni yahure Jesu.

Jesure to yaina cũhũre ahri yahpa macaina ñũ tuhtira

¹⁸Ā yoa tiro õ sehe ni yahu namore:

—Ahri yahpa macaina musare ti ñu tuhtichu ñuna ahrire wacuga musa: Musare ti ñu tuhtihito pano yuhu sehere ñu tuhti ducare tina. ¹⁹ Cohamacure cahmaeraina musa jisnichu, tina mehne macainare ti cahiro sehetu musa cuhure cahiro tina. Ahri yahpa macaina musa jisnichu musare besi. A jina mipure ahri yahpa macaina waro jierara musa. Musa a jierachu ñua ahri yahpa macaina musare ñu tuhtira. ²⁰ “Yu yaina jina musa yu bui jierara”, musare yu niri cjiire wacuga musa. A yu docai jiina jina yu ñano yuhduriro sehetu ñano yuhdunahca musa cuhu. Yuhure ñano yuarinata musa cuhure ñano yoahca. Yu buhechu yuhtirinata musa buhechu cuhure yuhtiahca tina. ²¹ Ahri yahpa macaina yuhure warocarore masierara. A jia yuhure wacu tuaina musa jichu ñua tina ñano yoahca musa cuhure.

²² Tinare yu buhei taerachu yuhure ti cahmaerari buhiri buhiri mariaboa. Mipure tinare yu buheri baharo “Naa buhiri mariaha sare”, ni masierara tina. ²³ Yuhure ñu tuhtiro yu Pucu cuhure ñu tuhtira. ²⁴ Cohamacu to tuaa mehne paina ti ne yoaerare yoa ñohi. A yoa tinare ture yu yoa ñoerachu tinare ñaa buhiri mariaboa. Cohamacu tuaa mehne yu yoa ñoare ti ñuri baharo yuhure yu Pucu cuhure ñu tuhtira tina. ²⁵ A ñu tuhtia Cohamacu yare ti joari tjui doiputa to ni joariro sehetu yoa nire tina. O sehe ni joa tiha: “Tinare yu ñano yoerapachuta yuhure ñu tuhtire tina”, ni joa tiha doiputa Cohamacu yare ti joari tjui.

²⁶ Yu baharopu musare yoadohohtiro, yu Pucu mehne jiro musare yu warocahitiro Espiritu Santo tjira. Tiro potocata yuhuro jira. A jiro tiro taro yu jia tiare yuhurohca musare. ²⁷ Masare yu buhe ducachuputa musa cuhu dachoripe yuhu mehne a jirucure. A jina musa cuhu yu

jia tiare yuhurohca painare —ni yahure Jesu.

16 A ni tuhsu sare o sehe ni yahu namore:

—Baharo yu buheare yuhu cuhure musa coharahti cjihtire ahrire jipihtiare yahuhi musare. ² Judio masa mari buhea wuhusepu musa saa duachu saa dutisi musare yu yaina musa jiri buhiri. A jia pa tehepu musare wajaa, “Cohamacu cahmaare yoana nija”, ni tuhotuahca paina. ³ Yu Pucure, yuhu cuhure tina masierara. A masieraa musare ñano yoahca tina. ⁴ A jina musare ñano ti yoachu ñuna, “Ti o sehe yoahito panota Jesu yahu tuhsure sare”, ni wacinahca musa. Musa a ni wacuthi cjihtire mipure ahrire yahu muhtai nija musare —ni yahure Jesu.

Espiritu Santo to yoahitire yahuha Jesu

A ni tuhsu o sehe ni yahu namore Jesu:

—Wahmanopure musa mehne jicu ahrire musare yahuerahi. ⁵ Mipu sehere yuhure warocariro cahapu wahai-hca wahai tai nija. “¿Nohopu wahaihcari muhu?” yuhure ni, ne cuiro barota sinitu ñuerara musa. ⁶ A sinitu ñuerapanahta yu wahahtore musare yu yahu mujachu musa ñano yajeripohna tira. ⁷ Musare potocata yahui nija. Yu wahari baharo musare noanocanohca. Yu manopu wahaerachu musare yoadohohtiro sehe taeraboa. Wahacu musare tirore warocahitja yuhu. ⁸ Yu a warocachu tiro tarohca. A wihiro ahri yahpa macaina ñaa yoaina ti ñaa buhiri tiare tinare masichu yoarohca tiro. Noano jia tia cuhure buherohca tiro masare. Tuhsu, Cohamacu masare to buhiri dahrehto cuhure masichu yoarohca masare yoadohohtiro sehe. ⁹ Yuhure wacu tuaeraina jira ahri yahpa macaina. A jiro yoadohohtiro sehe masa ñaa yoaina ti ñaa buhiri tiare tinare masichu yoarohca.

¹⁰Yü Pücu cahapü wahaihca. Yü ä wahari baharo müsa yühüre ne nüsinisi. Ä jiro noano jia tia cühüre masichü yoarohca yoadohohtiro sehe. ¹¹Ahri yahpa macaina puhtoro watinore Cohamacü buhiri dahre duti tuhsüre. Ä jiro Cohamacü masare, watino mehne macainare to buhiri dahrehti cühüre masichü yoarohca yoadohohtiro sehe.

¹²Pjüro jira müsare yü yahuhti cjihti. Wiho mejeta müsa sehe yü yahu pahñochnü, tuho ñaha pahñoeraboa. ¹³Ä jiro potocä jiare yahuro Espiritu Santo sehe müsare quihöno jiare yahu pahñoono tarohca. Tiro to mü süro müsare yahusi. Yü Pücu tirore to yahu dutirire tiro yahurohca müsare. Ä yoa “Baharopü ö sehe waharohca”, ni yahuyurohca tiro sehe müsare. ¹⁴Ä yoa yü yare müsare tiro yahurohca. Ä yahuro yühüre ño payochü yoarohca müsare. ¹⁵Jipihia yü Pücu ya yü ya cühü jira. Ä jicu “Espiritu Santo sehe yü yare yahurohca müsare”, nihi müsare —ni yahure Jesu.

“Cahyaina jipanahta baharo wahchenahca müsa”, ni yahuha Jesu

¹⁶Ä ni tuhsü ö sehe ni yahu namore:

—Mahanocä baharo yühüre nüsi müsa. Ä jina baharocäta müsa yühüre ñunahca tjoa —nire Jesu säre to buheinare.

¹⁷To ä nichü tuhona, sä sehe mahainacä ö sehe ni durucüi sä basi:

—“Mahanocä baharo yühüre nüsi müsa. Ä jina baharocäta müsa yühüre ñunahca tjoa” nino, ¿dohse nino ä niri marine? Ä yoa “Yü Pücu cahapü wahaihca” nino, ¿dohse jiro baro marine ä niri tiro? ¹⁸“Mahanocä” nino, ¿dohse nino ä niri tiro? To yahurire noano tuho ñahaeraja mari —ni durucüi sä basi.

¹⁹Sä ä ni durucuchü Jesu tirore sä sinitu duarire masino, säre ö sehe ni yahure:

—“Mahanocä baharo yühüre nüsi müsa. Ä jina baharocäta yühüre ñunahca tjoa”, ¿yü niri cjirire sinitu duajari müsa? ¿Tíre yü nire tuho ñahaerajari müsa? ²⁰Potocäta müsare nii nija. Yü yariachü ñuna müsa tiainahca. Tuhsü, tuaro cahyanahca. Ä jia yühüre ño payoeraina sehe wahcheahca. Müsa sehe cahyaina cjiri jipanahta, baharo wahchenahca müsa. ²¹Ö sehe jira tí: Numino nihi wahcöno, to ñano yuhduhtu pano jira. Ä jiro ticoro tuaro cahyara. Ä cahyaparota to pohna tiri baharo ticorore puríre wacüerara ticoro. Wihärirocä ahri yahpapü to masa bajuachü ticoro wahchera. Ä jiro ticorore puríre wacüerara ticoro. ²²Tó seheta müsa mipure cahyanahca. Baharo müsare ñunihca tjoa. Yühüre ä ñuna müsa tuaro wahchenahca. Müsa ä wahchechü paina müsare cahyachü yoa masisi.

²³Tí dachoi yühüre müsa nüri dachoi yühüre sinitu nüsi müsa. Masi tuhürinapü jinahca. Potocäta müsare nii nija. Yühüre müsa wacü tuachü ñuno yü Pücre müsa siniare tiro müsare warohca. ²⁴Yühüre wacü tuaina jina, Cohamacüre sini masina müsa. Ahri dachoi panoi tirore ä sinierasini müsa. Yühüre wacü tuatjiähna Cohamacüre siniga. Müsa ä sinichü müsa sinirire müsare warohca, müsa wahche pahñohti cjihtire —nire Jesu säre.

Ñainare Jesu yuhdurucaha

²⁵Ä ni tuhsü ö sehe ni namore:

—Quiti mehne müsare yahua tihi. Ä yahupaihata baharo müsare quiti mehne yahusi yühü. Ä yahueracü yü Pücu sehere noano poto yahuihtja müsare. ²⁶Tí dachore müsa ya cjihtire yü Pücre sini payosi yühü. Yühüre wacü tuana, müsa basi tirore sininahca. ²⁷Müsa yühüre cahina. Ä jina yü Pücu cahapü yü tariro jichü “Potocä tjira”, nina müsa. Ä nina müsa jichü ñuno, yühüre cahina

musa jichu ñuno yu Pucu sehe musare cahina. To ã cahichu tireo musa sininahca. ²⁸Yu Pucu cahai jiri jicu ahri yahpapore tai yuhu. Æ jicu mipure ahri yahpaju jiriro jisinicu yu Pucu cahapu wahaihca —nire Jesu.

²⁹To ã nichu sã to buheina õ sehe nii:

—Mipã pinihta quti marieno durucui noano poto yahui nina muhu sare.

³⁰Muhu noano masi pahñoriro mu jichu mipã pinihtare sã masija. Æ jia paina muhure buhe masierara. Tire mipure sã noano masija. Sã noano masiina jina, Cohamacu cahapu tariro mu jichu “Potocã tjira”, nija sã —nii sã Jesure.

³¹Sã ã nichu Jesu õ sehe ni yuhtire sare:

—¿Mipure “Potocã tjira”, nijari musa juna? ³²Baharo curero jipihtina musa wuhusepu waha siteina jina, yuhure cohãnahca musa. Musa ã cohãpachuta yu Pucu sehe yuhu mehne jira. Æ jicu yuhu cãirota jieraja. ³³Ahrire musare yahu muhtahi, yuhure musa wacũ tuaa mehne musa noano jihto sehe. Cohamacure cahmaeraina cahapu musa jichu ñano yoahca musare tina. Ti ã yoapachuta wahchega musa. Ahri yahpa macaina ñaa buhiri tiinare, ti puhtoro watino cãhure yuhdurucariro jija yuhu. Æ jina yuhure wacũ tuana wahchega musa — nire Jesu sare to buheinare.

Jesu to buheina ya cjihtire Cohamacure sini payoha

17 Æ ni yahu tuhsu Jesu muanopu ññroca mucu, Cohamacure õ sehe ni durucure:

—Mai, mipure mu yahu quihõriro seheta yuhure ñano ti yoahiti pja mu surota nina. Yuhure mu macure masare ño payochu yoaga. Mu ã yoachu muhure masare ño payochu yoaihca yuhu cãhu. ²Jipihtina bui puhtoro yuhure cãre muhu. Æ jicu yuhure mu warinare muhu mehne ã jirucuchu yoaihca yuhu. Tuhsu,

muhure masare ño payochu yoaihca yuhu. ³Muhu dihta Cohamacu waro jira. Yuhu Jesucristo mu warocariro jija. Æ jia jipihtina muhure masiina, yuhu cãhure masiina muanopu mari mehne ã jirucuahca —nire Jesu.

⁴Æ ninota õ sehe ni namore Cohamacure:

—Ahri yahpapore mu yoa dutiri cjirire yoa pahñoja yuhu. Æ yoacu muhure masare ño payochu yoaja yuhu. ⁵Ahri yahpa to jihto pano muhu mehne yu jichu jipihtina yuhure ti ño payo muhtariro seheta mipure yuhure ti ño payochu yoaga tjoa.

⁶Ahri yahpai jiinare yuhure mu warinare muhure masichu yoahi. Mu warina mu yaina jira. Æ jicu tinare ware muhu yuhure. Æ jia mu dutiare yoare tina. ⁷⁻⁸Yuhure mu yahurire tinare buhehi. Yu ã buhechu tuhoa yu buheare cahmare tina. Æ jia potocãta mu cahai tariro yu jichu masina tina. Tuhsu, mu warocariro yu jichu “Potocã tjira”, ni tuhotura tina. Æ yoa jipihtia yu ya mu ya ti jichu masina tina.

⁹Ti ya cjihtire muhure sini payoi nija. Paina ya cjihti sehene sini payoi nieraja yuhu. Yuhure mu warina mu yaina jira. Æ jicu ti ya cjihtire sini payoi nija muhure. ¹⁰Tina jipihtina mu yaina jira. Æ jia mu yaina sehe yu yaina jira. Yuhure wacũ tuaa yu tuariro jiare masichu yoara tina masare.

¹¹Mipure ahri yahpapore tjuasi yuhu. Mu cahapu waha tai nija. Yu ã wahapachuta mipure yuhure mu warina ahri yahpare tjuaahca. Mai, muhu noariro jira. Yuhure mu warinare mu tuaa mehne ñu wihbobasaga. Mu ã ñu wihbochu mari cãirota mari jiro seheta tina cãhu cã curuata jahca. ¹²Tina mehne jicu mu tuaa mehne tinare noano ñu wihbohí. Cãiro pinihta pichacapu waharohca mu yare ti joari tjui to yahuriro seheta.

¹³Mipure mu cahai wahai tai nija. Ñ jicu ahri yahpai ahri jipihtiare yu yainare yahuja yuhu mehne ti noano wahchehto cjihtore. ¹⁴Mu yare yahuhi tinare. Tina yu yoaro seheta ahri yahpai ji dojahtina jierara. Ñ jia ahri yahpa macaina sehe tinare ñu tuhtira. ¹⁵“Ahri yahpai jiinare, yu yainare naaga”, nieraja. Ñ nierapaihta tinare noano ñu wihboga “Wafino ñaare yoa dutiri”, tinare nicu. ¹⁶Ahri yahpa macariro jieraja. Tina cuhu yu yoaro seheta ahri yahpai ji dojahtina jierara. ¹⁷Yu yainare mu buhea mehne noaina wahachu yoaga tinare. Mu yahua sehe potocã tjira. ¹⁸Ahri yahpapure yuhure mu warocariro seheta yuhu sehe yu yaina cuhure mu yare buhe duticu warocahi. ¹⁹Mu cahmaare yoahrtiro cjihtore yariahtiro jicu yu pjacure waja. Ñ waja yuhu yu yaina cuhu mu cahmaare potocã ti noano yoahiti cjihtire.

²⁰⁻²¹“Yu yaina mipure jiina dihtare yoadohoga”, ni sini payoeraja yuhu. Yu yaina painare yu yare ti buheri baharo paina cuhu yuhure wacu tuaahca. Tina cuhure yoadohoga, yu yaina jipihtina cu curuai ti jilto cjihto sehe. Yuhu muhu mehne mari pvaro jipanahta cuiro tjija. Mari cuirota mari jiro seheta tina cuhu mari mehne cu curuaihta jijaro. Cu curuaita jijaro mu warocariro yu jiare jipihitina masa “Potocã tjira” ti nihto sehe. ²²Yuhure mu masichu yoariro seheta yu yainare yu jia tiare masichu yoai. Tinare yu ñ masichu yoachu cuirota mari jiriro seheta tina cuhu cu curuaita jiahca. ²³Yuhu tina mehne jija. Tuhsu, muhu yuhu mehne jira. Mari ñ jiina jichu yu yaina potocãta cu curuaita noano jiahca. Cu curuaita ti jichu ñua mu warocariro yu jiare ahri yahpa macaina masiahca. Tuhsu, yuhure mu cahiro seheta yu yaina cuhure mu cahiare masiahca masa.

²⁴Mai, ahri yahpa to ji dcahto pano yuhure cahia tire muhu. Ñ cahicu yu masi pahnoriro, si siteriro yu jichu ñore muhu. Ñ jicu yuhure mu warina yuhu mehne ti jichu cahmaja masi pahnoriro, si siteriro yu jichu ti masihtu cjihtire. ²⁵Mai, muhu noariro jira. Ahri yahpa macaina ñaina muhure masierara. Yuhu sehe muhure masija. Ñ jia mu warocariro yu jichu masina yu yaina. ²⁶Muhure tinare masichu yoai. Baharopu cuhure muhure tinare masichu yoaihtja yuhure mu cahiro seheta painare ti cahiti cjihtire. Ñ jicu yu yaina mehne jiihca —nire Jesu Cohamacure.

Jesure peresu yoaha

(Mt 26.47-56; Mr 14.43-50; Lc 22.47-53)

18 To ñ niri baharo Jesu sã cuhu to buheina Cedro wama tiri mare pahã, olivo wama tia yucuri ti toari wesepu sui. ²Payu tahari ti wesei, ti yucu docai sã Jesu mehne cahmachua tii. Ñ jiro Juda Jesure ñu tuhtiinare ñohtiro ti wesere masire. ³Ñ masino pu curua surarare mu tã tare ti wesepu Jesure ñono taro. Cu curua surara waro jire. Pa curua surara Cohamacu wuhure cohtaina jire. Tina sacerdotea puhto, fariseo curua macaina ti warocaina jire surara, Cohamacu wuhure cohtaina mehne. Ñ taa sihã pocare, sihã yucuri cuhure sihã tare. Ti wamo cuhure cjuare tina. ⁴Ti wesepu ti wihiri baharo Jesu to ñano wahahtore masino, tinare piti boca, õ sehe ni siniture:

—¿Noare macana nijari musa? —nire Jesu.

⁵—Jesu Nazare macarirore macaja sã —ni yuhure tina.

—Tiro tjija yuhu —nire Jesu.

Juda sehe, Jesure ñaha dutiro noriro tina mehne jire. ⁶Ñ jia “Tiro tjija yuhu”, Jesu to nichuta tina sehe caaa waha, yahpapu du siti mua bora caha sure. ⁷Ti

ã wahachũ ñũno tinare pari turi õ sehe ni siniture Jesu:

—¿Noare macana nijari mûsa? —nire.

—Jesu Nazare macaritore macana nija sã —ni yũhtire tina tjoa.

⁸—“Tiro tjija”, ni tuhsũmahicũ yũhu mûsare. Æ jina yũhure ñahana, ahrinare yũhu mehne macainare peresu yoena tjiga mûsa —nire Jesu.

⁹Æ sãre cahĩno ne cũirore butichũ yoerare. Æ yoaro tó pano Cohamacũre to niriro seheta yoaro nire tiro. “Yũhure mũ warinare ne cũirore boerahi”, to niriro seheta yoaro nire Jesu. ¹⁰Æ yoa Simo Pedro ñosari pjĩne cjuaro, tí pjĩne tuã we naroca, sacerdotea bui puhtoro cahamacũno Malco wama tiriro cahmonore cjã pahrẽnocare. To pototo buhũsehe macari cahmonore cjã pahrẽnocare. ¹¹Æ to cjã pahrẽchũ ñũno Jesu tirore õ sehe nire:

—Mũ ñosari pjĩne wihboga. Yũ Pũcũ yũhure to ñano yũhdũ dutiriro seheta ñano yũhdũihtja yũhu —nire Jesu Pedrore.

Sacerdotea bui puhtoro cahapũ Jesure naaha tina

(Mt 26.57-58; Mr 14.53-54; Lc 22.54)

¹²To ã ni tuhsũchũta surara, ti puhtoro mehne, Cohamacũ wũhure cohtaina surara cũhu Jesure ñaha, tirore dũhtere. ¹³Dũhte tuhsũ Ana cahapũ naa mũhtare tina. Ana sehe Caifa marechũno jire. Caifa sehe tí cũhmare sacerdotea bui puhtoro jire. ¹⁴“Judio masa ya cjihtire cũiro masũno yariachũ noana”, niriro cjiro jire Caifa sehe.

“Jesure masieraja”, niha Pedro

(Mt 26.69-70; Mr 14.66-68; Lc 22.55-57)

¹⁵Æ jina yũhu Simo Pedro mehne Jesure yoa cureropũ ñũ nũnũ tii. Yũhu sehe sacerdotea bui puhtoro to ñũ masiriro jicũ Jesu baharo puhtoro wũhũ jiri sahrĩnopũ sãa wahai. ¹⁶Yũ ã sãachũ

Pedro sehe sahrĩno sopacai tjuarũcũ sũre. Æ jicũ majare wijaa ta, sopacare cohtaricorore sinitu ñũi “Ahriro Pedro sãa ta masijari”, nicũ. Yũ ã sinitu tuhsũchũ ticoro Pedrore sãa ta dutire. To sãa ta dutiri baharo yũhu Pedrore na sãa wahai. ¹⁷Yũ ã na sãachũ ñũno sopacare cohtaricoro sehe Pedrore õ sehe ni siniture:

—¿Jesu buheina mehne macariro jierajari mũhũ? —nire ticoro Pedrore.

—Jieraja yũhu —ni yũhtire Pedro sehe.

¹⁸Sã sũhto pano tó macaina cahamacã, surara mehne ti sohmahti pichacare wijã tuhsũri jire. Yũsua nire. Æ jia tina tí pichaca dũhtũ cahai ducua, sohmaa nire. Ti ã sohmachũ ñũno, Pedro cũhu waha, sohmare.

Sacerdotea puhtoro Jesure sinituha

(Mt 26.59-66; Mr 14.55-64; Lc 22.66-71)

¹⁹Æ yoa sacerdotea bui puhtoro Jesu buherire, sãre to buheina cũhure sinitu ñũri jire Jesure. ²⁰To ã sinituchũ Jesu sehe õ sehe ni yũhtiri jire tirore:

—Jipihtinare buhecũ ti panoi ducuhi. Æ buhecũ judio masa mari buhea wũhũsei Cohamacũ wũhu cũhure ã buherucuhi. Mûsa ñũenoĩ buherahi yũhu. ²¹¿Dohseacũ yũhure sinitujari mũhũ? Sinitu duacũ yũ buheinare sinitu ñũga. Yũ buherire tina masina —ni yũhtiri jire Jesu.

²²To ã nichũ tũhoro tói ducuriro surara sehe to wamomaca mehne Jesure cjãri jire.

—Æ nii tjiga sacerdotea bui puhtoro —niri jire surara sehe Jesure.

²³To ã nichũta Jesu õ sehe niri jire:

—Ñano yũ ni durucurire yahuga yũhure. ¿Potocãta mûsare yũ yahupachũta, dohseacũ yũhure cjãjari mũhũ? —niri jire Jesu surarare.

²⁴Baharo Ana Jesure paina ti dũhterirore Caifa sacerdotea bui puhtoro cahapũ warocari jire.

**“Jesure masieraja”,
pari turi niha Pedro**

(Mt 26.71-75; Mr 14.69-72; Lc 22.58-62)

²⁵ Ñ yoa Simo Pedro pichaca duhtu cahai ducuro, sohmano nire. Ñ to sohmarucuchu ñua, tó macaina tirore ò sehe ni siniture:

—¿Muhu cūhu Jesu buheina mehne macariro jierajari muhu? —nire tina Pedore.

—Jieraja yuhu —ni yuhtire Pedro.

²⁶ Tuhsu, sacerdotea bui puhtoro cahamaca mehne macariro, Pedro to cahmono cja pahrēriro coyeiro sehe Pedore ò sehe ni siniture:

—¿Jesure ti ñahari wesei yu jichu muhu cūhu tiro mehne jierapahte? —ni siniture tiro Pedore.

²⁷ —Yuhu tiro mehne jierahi —nire Pedro. To ñ nichuta caraca dure.

Jesure Pilato sinituha

(Mt 27.1-2, 11-14; Mr 15.1-5; Lc 23.1-5)

²⁸ Ñamiwacūnu jichu Caifa ya wuhupu jirina Jesure naa wijaa, tí maca macaina puhtoro Pilato ya wuhupu naa wahare tina. Ñ wahapahta to ya wuhupu sāerare. Pascua dachori jichu tina tí bese numuri macaare chuhtina jia ò sehe nire: “Judio masuno jierara Pilato. To ñ jiriro jichu to ya wuhure sāana, mari dutiare yuhdurucana niboca. Ñ jina mari sāachu marine bese numuri maca chūare chu dutierahca”, nire tina. Ñ nia puhtoro Pilato ya wuhure sāerare Jesure naahrina sehe. ²⁹ Ti ñ sāa taerachu ñuno Pilato tina cahapu, wuhu sopacapu surucu suro, tinare ò sehe ni siniture:

—¿Yaba buhirire ahrirore yahusā duajari musa? —nire Pilato tinare.

³⁰ —Ahriro to noariro jichu wuhure sā waeraboa. Ñariro jira tiro —ni yuhtire tina.

³¹ Ti ñ nichu Pilato ò sehe nire:

—Musa sehe tirore naahga. Ñ jina musa ya dutia ti niriro sehta tirore buhiri dahrega —nire Pilato tinare.

—Musa Roma macaina ya dutia sehe sare masunore wajā dutierara —nire tina Pilatore.

³² Ñ nia Jesure judio masa ti wajā duarire masichu yoaa nire. Jesu sehe crusapu to yariahtore tó pano to yahuriro sehta ñ waharo nire. ³³ Ti ñ ni durucuri baharo Pilato sehe wuhupu majare sāa, Jesure pjirocari jire. Pjiroca tuhsu, tirore ò sehe ni sinituri jire:

—¿Judio masa ti puhtoro tjijari muhu? —ni sinituri jire Pilato.

³⁴ —¿Mu mu surota ñ sinitui nijari muhu yuhure? ¿O paina sehe yuhure ti yahusāri baharo tíre sinitu ñujari muhu? —niri jire Jesu Pilatore.

³⁵ —Judio masuno jieraja yuhu. Mu ya yahpa macaina, sacerdotea puhtoa cūhu wuhure ware sare. ¿Yabare ñano yoari muhu ti ñ buhiri dahre duachu? —niri jire Pilato.

³⁶ —Ahri yahpa macariro puhtoro jieraja yuhu. Ahri yahpa macariro puhtoro yu jichu yu buheina yuhure yoadohoboa. Judio masare yuhure ñaha dutieraboa. Yu puhtoro jia ahri yahpa maca jierara —niri jire Jesu Pilatore.

³⁷ —¿Ñ jicu puhtoro jijari muhu ñ nicu? —niri jire Pilato.

—Mu nino sehta puhtoro tjija. Masa ti puhtoro jihtiro cjihto masa bajuai yuhu. Ñ jicu ahri yahpapu tai ti puhtoro jicu tacu, potocā jiare yahucu tacu. Jipihina potocā jiare tuho duaina, yu yahua tuhora —niri jire Jesu.

³⁸ —¿Yaba baro jijari potocā jia? Potocā jiare masihto basioerara —niri jire Pilato.

Judio masa Jesure wajā dutiha

(Mt 27.15-31; Mr 15.6-20; Lc 23.13-25)

Ñ ni tuhsu Pilato judio masa cahai majare tjua waha, tinare ò sehe ni yahure:

—Ahriri Jesure yaba buhiri mariahna. ³⁹Cuhmaripe pascua jichu cãiro perezui jirirore musa wio dutirucura. ¿Ã jicu ahriri Jesureta musa puhtoro cjihto musare wiobasabocari yuhu? —nire Pilato judio masare.

⁴⁰To ã nichu tuhoa judio masa õ sehe ni sañurucure:

—Tirore wioi tjiga. Barrabá sehere sãre wiobasaga —ni sañurucure judio masa Pilatore.

Barraba sehe yaca bucuro jire.

19 Ti ã ni sañurucuri baharo Pilato Jesure tjana dutiri jire. To ã dutichu to mua sehe tirore tjanari jire. ²Tjana tuhsu tina pota soro dahre tuhsu, Jesu dapu bui duhu payori jire. Duhu payo tuhsu, puhtoa ya suhti barore tirore sãa, payu tahari tiro cahacãi suruca, õ sehe ni bujuperi jire tina:

³—Noano tagã. Judio masa puhtoro noano tagã —ni bujupe, Jesu wuhduahi cjã mujari jire.

⁴Ã yoa pari turi Pilato judio masa cahapu waha, tinare õ sehe ni yahure:

—Tuhoga musa. Ahrirore ñaa buhiri mariahna. Ã jicu tíre musa masihtu cjihtire musa cahai tirore na tai tai nihi —nire tiro.

⁵To ã ni tuhsuchuta Jesu pota soro pisariro, puhtoa ya suhti barore sãariro, wuhni jiriro wijaa tare. To ã wijaa tachu Pilato tinare õ sehe nire:

—Ñuga. Ahriri tjira tiro —nire Pilato.

⁶To ã ni tuhsuchu tuhoa, sacerdotea puhtoa, Cohamacu wuhu cohtaina surara cõhu Jesure ñua, sañurucure:

—Crusapu cjã puha wajãga tirore. Crusapu cjã puha wajãga tirore —ni sañurucure tina.

—Tirore ne ñaa buhiri mariahna. Ã jina musa basita tirore naaga. Ã jina musata tirore crusapu cjã puha wajãga —nire Pilato tinare.

⁷—Tiro to basi “Cohamacu macuno jija”, nia tire. Tíre to ã nichu sã du-

tia sehe tirore wajã dutira —nire tina Pilatore.

⁸Ti ã nichu tuhoru tó pano to cuiriro yuhdoro cuia wahare Pilato sehe. ⁹Ã jiro pari turi to wuhupure majare sãa, Jesure õ sehe ni sinituri jire tjoa:

—¿Noho macariro jijari muhu? —niri jire Pilato Jesure.

To ã ni sinitupachuta Jesu tirore yuhtierari jire.

¹⁰To ã yuhtierachu ñano Pilato tirore õ sehe ni sinitu namori jire:

—¿Yuhure yuhtierari muhu? Yuhu muhure peresui jirirore wio masija. Ã yoa muhure crusapu cjã puha wajã duti masija yuhu. ¿Tíre masierajari muhu? —niri jire Pilato Jesure.

¹¹—Cohamacu muhure to dutierachu yuhure ñano yoape dutieraboa muhu. Yuhure ñu tuhtiinare ñoriro sehe mu yuhdoro ñano buhiri tira —niri jire Jesu Pilatore.

¹²To ã nichu tuhoru Pilato sehe tirore wio duari jimare. To ã wio duapachuta pari turi judio masa õ sehe ni sañurucure:

—Jesu “Puhtoro jija” nino, mari jipihtina bui puhtoro jirirore Roma macarirore ñu tuhtiriro jira tiro. Ã jicu tirore wiocu muhu cõhu mari bui puhtoro jirirore ñu tuhtiriro jiihca —ni sañurucure judio masa Pilatore.

¹³Ti ã nichu tuhoru Jesure wuhni jirirore na wijaa ta, buhiri dahre dutiro taro to dujiri pahtai nuju sure Pilato sehe. Tóti to buhiri dahre dutiri wapa, tãa mehne ti yoari wapa judio masa sã ya mehne Gabatá wama tire. ¹⁴Tí dacho pascua dacho bose numu sã chuhti cjihtire sã cahnori dacho jire. Tí pjare cohari pja waro jire. Nuju su tuhsu Pilato masare õ sehe ni yahure:

—Ahriri tjira musa puhtoro —nire tiro.

¹⁵To ã nichu tuhoa judio masa õ sehe ni sañurucure:

—Yariajaro tiro. Yariajaro tiro. Crusapũ cjã puha wajãga tirore —ni sañurucure tina.

—¿Musa puhtoro to jipachuta tirore crusapũ cjã puha wajã dutijari musa? —nire Pilato.

To ã nichũ tuhoa õ sehe ni yuhtire sacerdotea puhtoa:

—Mari jipihtina bui puhtoro Roma macarirota sã puhtoro jira. Pairo puhtoro sãre mariahna —ni yuhtire sacerdotea puhtoa.

¹⁶ Ti ã ni durucuri baharo Pilato Jesure crusapũ cjã puha wajã dutiro, tirore ware tinare, tirore wajãhtinare.

Jesure cjã puha wajãha tina

(Mt 27.32-44; Mr 15.21-32; Lc 23.26-43)

¹⁷ Æ jia tina Jesure naa wijaare. Ti naa wijaachũ Jesu sehe to crusare to basi wua naa, dapu cohã wama tiropũ sure. Sã judio masa ya mehne dapu cohã Gól-gota wama tire. ¹⁸ Tópũ sua tina Jesure cjã puha õre. Tuhsũ, paina puarore cũiro to poto buhusehei, paio to cõ buhusehei cjã puha dapore tina. Æ jiro Jesu ti dacho macai jire. ¹⁹ Ti cjã puha tuhsuchũ, Pilato taboa pjĩne joa, Jesure ti cjã puha õri crusai cjã puha õ dutire tí pjĩne. Õ sehe ni joare tiro: “Ahriri Jesu Nazare macariro, judio masa bui puhtoro jira”, ni joare Pilato tí pjĩne. ²⁰ Tí pjĩne joaro judio masa ya dusero mehne, Roma macaina ya dusero mehne, griego masa ya dusero mehne joare tiro. Æ yoa Jesure crusapũ ti cjã puha daporiro maca cahacãi jire. Tó cahacãi jiina payũ judio masa Pilato joarire ñũ, buhere. ²¹ Æ buhe tuhsũ judio masa sã sacerdotea puhtoa õ sehe nire Pilatore:

—“Ahriri judio masa puhtoro jira”, ni joai tjiga. Sã puhtoro jierara ahriri. Æ jicũ õ sehe ni joa cahnoga mũhũ. “Ahriri ‘Judio masa puhtoro jija’, ni cũirota to basita ã ni tuhoturiro jira”, ni joa cahnoga —nire sacerdotea puhtoa.

²² —Yũ joa mũhtariro seheta jirohca —nire Pilato tinare.

²³ Jesure ti cjã puhari baharo pititiaro surara sehe Jesu suhtire ti basi witire. Ti ã witi duapachuta cũ suhtirota yoari suhtiro dohori marieni suhtiro jire. Tí suhtiro suhari suhtiro jire. ²⁴ Tí suhtiro to ã jichũ õ sehe nire tina ti basi:

—Ahri suhtirore tuhrẽna tjijihna. Ahri suhtirore nahtiro cjihtore masi duana, docapejihna mari —nire tina ti basi.

Æ docapea, Cohamacũ yare ti joari tjui ti ni joariro seheta yoaa nire tina. “Yũ suhtire tina ti basi witire. Æ jia yũ suhtire nahtiro cjihtore masi duaa, docapere tina”, ni joaa tiha Cohamacũ yare ti joari tjui. To ã ni joariro seheta ã yoaa nire tina.

²⁵ Surara ti ã yoachũ Jesu pocoro, Jesu mũono, María Cleofa namono, María Magdalena mehne Jesu crusa cahacãi ñurucure tina. ²⁶ Æ jiro to pocoro yũhũ to cahĩriro cũhũ to cahacãi sã ducuchũ ñũno to pocorore õ sehe ni yahure Jesu:

—Mipũre ahriri mũ macũ cjihto jira —nire Jesu to pocorore.

²⁷ Æ ni tuhsũ, yũhure õ sehe ni yahure tiro:

—Mipũre ahricoro mũ poco cjihto jira —nire Jesu yũhure.

To ã niri baharo Jesu pocorore yũ ya wũhũpũ jĩ dutii.

Jesu yariaa wahaha

(Mt 27.45-56; Mr 15.33-41; Lc 23.44-49)

²⁸ To ã ni yahuri baharo õ sehe ni tuhotu masiri jire Jesu: “Jipihtia Cohamacũ yũhure dahra dutiro to cũrire yoa pahũohi”, ni tuhotu masiri jire Jesu. Æ masino Cohamacũ yare ti joari tjui to ni yahuriro seheta õ sehe nire Jesu:

—Ñahma yapioca yũhure —nire Jesu.

²⁹ Æ yoa tói vino suẽa core posa tiri situ dujire. Æ jiro tói jiriro wihmi nari suhtere suẽa co mehne ti sohari suhtere yucucũ hisopo wama tidũ sohtoai duhte

õre. Duhte õ tuhsu, Jesu duseroi siõ muo, siõ õre. ³⁰Tí core Jesu wihmi tuhsu õ sehe nire:

—Tó puro tjica —ninota to dapure muhriruca, yoja su, variaa wahare.

Surara Jesu patipahma batoi ñosaha ñosadu mehne

³¹Tí dacho pascua bose numu pano jire. Tí bose numu macaare sã chuhti cjihtire sã cahnoru numu jire. ã jia pa dacho Sabado jichu tí bose numu jichu crusaripu ti wajarinare cõ duaerare judio masa. Tí dacho Cohamacure ti ño payori dacho bose numu jire. ã jia tí dachoi ti cã puharina cjiire crusapu ti jichu cahmaerare tina. ã jia ti cã puharina cjiire ti ñuchua cohãrine cã nuha dutia taa judio masa siniha Pilatore, ti yaria murocahto cjihto sehe. Ti ã yoari baharo ti pjacuri cjiire na boro bahrañoa taa nire. ³²Ti ã dutichu surara sehe crusari cahapu su, cãiro yacariro cjiro ñuchua cohãrine cã nuhare. Pairo cãhure ãta yoare tina. ³³ã jia Jesu ñuchua cohãrine cã nuha tamaa, to yariariro jichu ñua, cã nuhaerare.

³⁴ã cã nuhaeraa cãiro surara to patipahma batoi ñosadu mehne ñosare. To ã ñosachu dóihta to di, co mehne wijaare. ³⁵To ã wahachu ñui yuhu. Yuhu ahri tjure joariro musare potocã yahuja. Potocã yu yahua jichu masija yuhu. Musare yahuja musa cãhu Jesure musa wacõ tuahto sehe. ³⁶Cohamacu yare ti joari tju to niriro seheta ã wahare: “To cohãrine ne cõ cohãre cã nuhaerare”, to ni joariro seheta Jesu ñuchua cohãrine ne cõ cohãre cã nuhaerare. ³⁷ã yoa pa tju Cohamacu yare ti joari tjui õ sehe nina: “Tirore ti ñosariro cjirore ñuahca tina”, ni joaa tiha Cohamacu yare ti joari tjui.

Jesu pjacure masa copapu cãha

(Mt 27.57-61; Mr 15.42-47; Lc 23.50-56)

³⁸To yariari baharo José Arimatea macariro Jesu pjacu cjirore na bororo taro, Pilatore siniri jire. José sehe paina judio masare cuuro, Jesure wacõ tuariro to jiare yahu duaerari jire. To pjacu cjirore to siniri baharo Pilato sehe to pjacure naa dutiri jire. To ã na dutichu José crusa cahai su, Jesu pjacu cjirore naa wahari jire. ³⁹Nicodemo cãhu me sitiare yucacu di pohca, mirra wama tia me sitia yucacu pohca mehne dahra moreare na tari jire. Jesu pjacu cjirore masa copapu ti siõ sãahto pano ti cahnohti jiri jire tí me sitia. Ti na tari cjiri treinta kilo nucuri jire. Nicodemo sohõ jiri pja Jesu mehne to coã durucuri pja ñamipu Jesu cahai suriro jiri jire. ⁴⁰ã jia tina puaro Jesu pjacu cjirore naa, judio masa sã yariainare sã yoarucuriro seheta to pjacu cjirore me sitia mehne suhtiro cahsaro mehne wahmari jire. ⁴¹Crusapu Jesure ti wajãno cahai wese jire. Tí wese pu masa copa tãcapu wahma ti sahari copa jire. Tí copai ne yariariro cjirore siõ sãaerasinire. ⁴²Pascua dacho bose numu judio masa sã bose numu sã chuhti cjihtire sã cahnoru dacho jire. To ã jiri dacho jichu tí copa cahacã to crusa jichu, tõi siõ sãari jire tina Jesu pjacu cjirore.

Jesu masa wijaaha

(Mt 28.1-10; Mr 16.1-8; Lc 24.1-12)

20 Domingo ñami curero jichu, bohreahto panocã María Magdalena Jesu masa copapu suri jire. Tõpu suru tí copare ti tju bihari tãcare ti pjõo cãria tãcare ñuri jire ticoro. ²ã ñuricoro jiro sã cahapu murocaatare ticoro. Simo Pedro mehne yuhu sã puaro jii. Wihi, õ sehe ni yahure sãre ticoro:

—Mari puhtoro pjacu cjirore naanocari jihre. Ā jina tiro cjirore ti cūrire mari masieraja —nire ticoro sāre.

³To ā nichu tuhona, Pedro mehne masa copapu űna wahai sā. ⁴Ā űna wahana sā puaro muroca wahcāi. Ā murocana, yuhu Pedrore muroca yuhdu wahcācu masa copapu su muhtai. ⁵Tōpu sūcu muhri caha űuroca sōi tí copapure. Muhri caha űuroca sōcu tirore ti wahmari suhtiro cjiro dihtare űni. Ā jii tí copare sāerahi. ⁶Yū ā űuri baharopu Simo Pedro yū baharo wihire. Wihi, masa copapu sāa, to pjacu cjirore ti wahmari suhtiro cjirore űure tiro. ⁷Jesu dapure ti wahmari cahsaro cūhure űure tjoa. Tí cahsaro soro coāno to turēri cahsaro jire. ⁸Ā jicu yuhu cūhu masa copapu su muhtariri tí copapu sāai. Jesure to ā mariachu űucu “Potocāta Jesu masa wijaari jira”, ni tuhotui yuhu. ⁹Tí copapu sā wahahto pano Cohamacu yare ti joari tjui Cristo to yariahtore yahurire, to masa wijaahore yahuri cūhure sā noano tuho űahaerasinimai. Tí copare yū űuri baharo, “Potocāta Jesu masa wijaari jira”, ni tuhotui yuhu. ¹⁰Ā űu tuh-suna sā wuhusepu tjuaa wahai.

Jesu María Magdalenare bajuaha

(Mr 16.9-11)

¹¹Ā yoa masa copapu María majare tjua ta tí copa sopacapu wihi, ducuro, tiro niri jire. Ā tiiparota ticoro muhri caha űuroca sōri jire masa copapure. ¹²Ā űuroca sōno puaro anjoare, yehsea suhti tiinare Jesu cjiro to coāriro cjiropu ti dujichu űuri jire ticoro. Cāiro to dapu coāriro cjiroi dujiri jire. Pairo to dahpori coāriro cjiroi dujiri jire. ¹³Tinare to űuchu tina sehe ticorore ō sehe ni siniriti jire:

—Numino, ¿dohse jiro baro tiico nijari muhu? —niri jire tina.

—Yū puhtoro pjacu cjirore naanocari jihre. Ā jico to pjacu cjirore ti cūrire masieraja yuhu —niri jire ticoro.

¹⁴Ā ni tuhsu, majarerucu sumahno Jesure tōi ducurire űuri jire ticoro. Ā űuparota Jesure űu masierari jire ticoro.

¹⁵—Numino, ¿dohse jiro baro tiico nijari muhu? ¿Noare macaco nijari? —niri jire Jesu ticorore.

“Ahriro ahri wesere űu wihboriro jira”, ni tuhotumari jire ticoro Jesure. Ā ni tuhoturo, ō sehe niri jire ticoro:

—Muhuta to pjacu cjirore naariro jicu to pjacure mu cūrirore yahuga yuhure. Mu yahuri baharo to pjacu cjirore naaco wahacohtja —niri jire ticoro tirore.

¹⁶To ā niri baharo Jesu ō sehe niri jire:

—María —niri jire.

To ā ni pisuchu tuhoro majare űuroca, ticoro hebreo ya mehne sā judio masa ya mehne ō sehe niri jire:

—Raboni —niri jire ticoro Jesure. (Raboni nino “Buheriro”, nino nina.)

¹⁷—Yū Pucu cahapu mujaerasiniji yuhu. Yū ā mujaerasinichu yuhure űahaeco tjiga. Tuhsu, paina yū yaina cahapu wahaga. Ti cahapu sūco ō sehe ni yahuga tinare: “Yū Pucu cahapu wahai tai nija. Musa Pucu cūhu jira tiro. Yū yairo Cohamacu cahapu wahai tai nija. Musa yairo Cohamacu cūhu jira tiro’, nihre Jesu”, ni yahuga tinare —niri jire Jesu Maríare.

¹⁸To ā niri baharo María Magdalena sā Jesu buheina cahapu wihi, yahure sāre:

—Mari puhtorore űuhi yuhu —ni, Jesu ticorore to yahu dutirire yahure sāre ticoro.

Jesu to buheinare bajuaha

(Mt 28.16-20; Mr 16.14-18; Lc 24.36-49)

¹⁹Tí dacho domingoi űamichahai sā Jesu buheina sā coyey judio masare cuina, wuhupu biha sāa, dujii sā. Sā ā du-

jichu Jesu sā watoi bajuaruču sūro, sāre ō sehe nire:

—¿Jimajari mūsa? Noano jiga mūsa — nire.

²⁰ Ā ni tuhsu, to wamomacarine, to patipahma bato cūhure sāre űore. Ā jina sā tirole sā puhtoro űna, wahchei. ²¹ Pari turi Jesu sāre ō sehe nire:

—Noano jiga mūsa. Yu Pucu yūhure to warocariro seheta, mūsa cūhure yu ya buheare buhehtinare warocaja —nire Jesu sāre.

²² Ā ni tuhsu tiro sāre puti sāare. Ā puti sāano Espiritu Santo sāre to sāaruču su mūa wahahtore űono nire sāre. űo tuhsu ō sehe nire:

—Mipu Espiritu Santore űahaga mūsa, mūsa mehne jighthore. ²³ Paina ti űaa yoirire mūsa bochu, āta jiahca. Ā jia paina ti űaa yoirire mūsa boerachu tí bori jisi —nire Jesu sāre to buheinare.

Jesure masa wijaarore Toma űuha

²⁴ Jesu sā watoi to bajuachu Toma sūhduariro ti ni pisuriro sā mehne mariahre.

²⁵ To ā mariachu sā mehne macaina tirole yahumare:

—Mari puhtoro sā űuhi —ni yahu-mai sā Tomare.

Sā ā ni yahupachuta ō sehe nire Toma:

—To wamomacarine ti cĵa puhaa coparire űueracu tí coparire yu wamo pica mehne be űueracu, “Potocāta masa wijaari jira”, nisi yūhu. Ā yoa to patipahma batoi jiri copare yu wamomaca mehne siō sōeracu, “Potocāta masa wijaari jira”, nisi yūhu tirole —nire Toma.

²⁶ Ocho dachori baharo pari turi sā to buheina sā wūhupu jii. Tí pjare Toma sā mehne jire jūna. Tí wūhu bihari wūhu jire. Bihari wūhu to jipachuta Jesu wūhupu sāa taro, sā watoi bajuaruču sūro ō sehe nire:

—¿Jimajari mūsa? Noano jiga —nire.

²⁷ Ā ni tuhsu, tiro Tomare ō sehe ni yahure:

—űuga yu wamomacarine. Ā yoa mū wamo pica mehne yu wamomacarine ti cĵa puhaa coparire be űuga. Tuhsu, mū wamomaca mehne yu patipahma batoi jiri copare siō sō űuga. “Potocā jierara”, nii tjiga. “Potocā tjira”, niga mūhu, — nire Jesu Tomare.

²⁸ To ā niri baharo Toma ō sehe ni yūhtire:

—Mūhu yu puhtoro jira. Mūhu yu yairo Cohamacu jira —nire Toma Jesure jūna.

²⁹ —Yūhure mū űuri baharo yūhure wacū tuara mūhu. Paina sehe yūhure űuerapahta yūhure wacū tuaahca. Ā jia tina mū yūhdoro wahcheahca —nire Jesu Tomare.

Jesure masa ti masihtu cĵihtire ahri tjure joaha João

³⁰ Ā yoa payu paye cūhure Cohamacu to tuua mehne yoa űore Jesu sā mehne jiro. Tíre to yoirire ahri tjui joa pahűoerati yūhu. ³¹ Ā joa pahűoerapaita ahri tjui yu yahuaire joahi “Jesuta Cristo Cohamacu to warocariro jira. Tiro potocāta Cohamacu macūno jira”, mūsa ni masihtu cĵihtire. Ā jina mūsa tirole wacū tuaina Cohamacu mehne mūsa ā jirucuhti cĵihtire joahi ahri tjure.

Jesu sietu to buheinare bajuaha

21 Baharo Tiberia wama tiri bācupariro duhtu cahai sāre to buheinare Jesu pari turi bajuare tjoa. Sāre bajuaro ō sehe yoare tiro tjoa. ² Simo Pedro, Toma sūhduariro ti niriro, Natanae Galilea yahpai jiri maca Caná wama tiri maca macariro, Zebedeo pohna sā puaro, paina puaro buheina sā ōpeinata cahmachui.

³ Sā ā cahmachuri baharo Simo Pedro sāre ō sehe nire:

—Wahi wajāi wahai nija —nire tiro.

—Sã cūhũ mũhũ mehne wahanahťja —nii sã tirore.

Ā ni tuhsũ buhaa waha. Ā jina dohorria mehne waha. Wiho mejeta tí ñamine sã noano maca bohreapanahta ne cūiro wahi wajãerahi. ⁴Bohrea parĩ cahachu Jesu padũroi to ducuchũ tirore ñumai sã. Ā ñũpanahta tirore “Jesu jira”, ni ñũ masierahi sã. ⁵Ā jiro sãre tiro õ sehe ni siniture:

—¿Ne, wahi wajãri musa? —nire Jesu.

—Ne wajãeraputiati sã —ni yuhtii sã.

⁶—Dohoria poto buhusehe sehe doca ñoga. Tie sehe doca ñona wahi wajãnahca musa —nire sãre.

To ã nichũ tuhona sã to niriroihta doca ñoi. Sã doca ño tuhsuchũ payũ wahi sãare. Payũ wahi sãachũ wañũnore dohoriapũ waja sãana bihoerahi sã. ⁷Ā jicu yũhũ Jesu cahĩro Pedore õ sehe ni yahui:

—Mari puhtorota jira siro padũroi ducuriro —nii Pedore.

Yũ ã nichũ tuhoro Jesuta to jichũ masino, Simo Pedro to suhtirore sãare. Wahi wajãno taro to suhtirore tjuweriro jisinare. To suhtirore sãa tuhsũ, diapũ pjuroca ñojare. ⁸Sã paina buheina dohoriai jina, cien metro yoaro diapũre pahsai sã. Ā jina wañũnore wahi payũ sãadũre dohorria mehne waja ñũjai sã. ⁹Dũhtũ cahai wahã suna pichaca niti dihta sí coãri pichaca bui Jesu to puhõ cūrirore wahire ñũi sã. Pão cūhũre ñũi sã.

¹⁰Sã ã ñũchũ ñũno Jesu sãre õ sehe nire:

—Michapucacã musa wajãrinare mahainacã na tahga —nire sãre.

¹¹To ã nichũ Simo Pedro sehe Jesu mehne jiro dohoriapũ samu, wañũnore, bujũina wahi ciento cincuenta y tres wahi sãadũre waja majare. Payũ wahi sãapahta wañũnore tuhrẽrare.

¹²—Chusinina taga —nire Jesu sãre.

“¿Noa baro jijari mũhũ?” ni sinitu ñũerahi sã tirore. Sã puhtoro to jichũ masii sã. ¹³Ā yoa Jesu pichaca cahapũ sũro, pãore na, sãre witire. Wahi cūhũre witire.

¹⁴Ā jiro Jesu to masa wijaari baharo padũroi bajuaro tia taha sãre to buheinare bajuaro nire.

Jesu Simo Pedro mehne sũhũduha

¹⁵Sã chũri baharo Jesu Simo Pedore õ sehe ni siniture:

—Simo Jona macũno, ¿ahrinare mũ cahĩro yũhdoro yũhũre cahĩjari mũhũ? —nire Simo Pedore.

—Puhtoro, mũhũre cahĩja yũhũ. Mũhũre yũ cahĩchũ masina mũhũ —ni yuhtire Simo Pedro.

—Ā jicu ovejacãre ti nuriro seheta yũ yainare buhega mũhũ —nire Jesu.

¹⁶Ā ni tuhsũ pari turi tiro Simo Pedore õ sehe ni siniture:

—Simo Jona macũno, ¿yũhũre cahĩjari mũhũ? —nire Jesu.

—Puhtoro, mũhũre cahĩja yũhũ. Mũhũre yũ cahĩchũ masina mũhũ —ni yuhtire Simo Pedro.

—Ovejare ñũ wihboriro ovejare to noano ñũ wihboriro seheta, yũ yainare noano buhe ñũ wihboga —nire Jesu Pedore.

¹⁷Ā ni tuhsũ pari turi tiro Simo Pedore õ sehe ni siniture:

—Simo Jona macũno, ¿potocãta yũhũre cahĩjari mũhũ? —nire Jesu tjoa.

Tia taha ã ni to sinituchũ tuhoro Simo Pedro tuaro cahyare.

—Puhtoro, mũhũ masi pahñona. Mũhũre yũ cahĩchũ masina mũhũ —ni yuhtire Simo Pedro.

—Ovejare ti nuriro seheta yũ yainare buhega mũhũ. ¹⁸Potocã mũhũre niita nija. Mũhũ wahmũno jicu mũ suhtire sãa, mũ cahmariropũ tinia tiri jire mũhũ. Ā jiricu mũ jipachũta baharo mũ bucũro jichũ, mũ wamomacarine mũ siõrocachu

pairo mǎhure suhtire sǎanohca. Tuhsǎ, mǎ waha duaerapǎ mǎhure naanohca —nire Jesu Simo Pedrore.

¹⁹ Ā nino Simo Pedrore dohse waha to yariahtore yahuro nire. Ā jiro Simo Pedro yariaro Cohamacǎre “Noariro, masi pahñoriro jira”, masa ti nichǎ to yoah-tore yahuro nire Jesu. Ā Pedro mehne sǎhǎdu tuhsǎro ō sehe ni namore Jesu tirore:

—Quihōno yǎ buheriro seheta yoaga mǎhǎ —nire Jesu Pedrore.

Jesu to cahĩriro buheriro ahri tjure joariro jira

²⁰ To ā nichuta Pedro sehe majare ñǎroca, yǎhure Joǎore Jesu to cahĩriro buherirore tinare yǎ nǎnǎ tichǎ ñǎno Pedro Jesure siniture. Yǎhǎ sehe to ñǎriro tó pano ō sehe niriro jii: “Pǎhtoro, ¿mǎhure ñǎ tuhtiinare ñohtiro sehe diro baro jicari tiro?” ni, Jesure sinitu ñǎriro jii yǎhǎ. Tí pjare Jesu to pari wahpa chǎ dujii yǎhǎ sehe. ²¹ Ā jiro yǎhure ñǎno Pedro Jesure ō sehe ni siniture:

—Pǎhtoro, ¿ahriro sehe dohse waharohcari? —ni siniture.

²² —Tíre mǎhure yahueraja. Ahri yahpapǎ yǎ tjua tahto pano ahrirore jirucuchǎ yǎ yoachǎ tíre masierara mǎhǎ. Ā jicǎ mǎhure yahueraja. Quihōno yǎ buheriro seheta yoaga mǎhǎ —nire Jesu Pedrore.

²³ Tíre to yahurire jipihtina Jesu yaina ti basi yahu sitemare. Tíre yahu sitea ō sehe nimare tina sehe: “Jesu to cahĩriro buheriro yariasi”, ni yahu sitemare yǎhure Jesu yaina ti basi. Tí ā nipachuta “Tiro yariasi”, nino nierari jimare Jesu. “Ahri yahpapǎ yǎ tjua tahto pano ahrirore jirucuchǎ yǎ yoachǎ tíre masierara mǎhǎ. Ā jicǎ mǎhure yahueraja”, nire Jesu Pedrore.

²⁴ Jesu buheriro ahrire yahuriro, ahri tjure joariro jija yǎhǎ. Ā jina ahri yǎ yahua quihōno jichǎ masija mari.

²⁵ Payǎ paye cǎhure Jesu yoare. To yoarire mari joa pahñochǎ tí tjuri joaa tjuri payǎbia wahaboa. Ā jia tí tjurire mari wihbochǎ mǎ sueraboa ahri yahpa. Wahpaa yǎhdǎa wahaboa, yǎ tǎhochtǎ. Tó puro tjira.

Hechos

“Espíritu Santo tarohca”, niha ahri tjure joariro

1¹⁻² Teofilo, ahri quitire muhure joarocai nija. Pano yu joa muhtari pure Jesu to yoare, to buheare muhure yahu tuhsui. Pu manopu to mujarire yahu batoai. To mjahto pano Jesu Espiritu Santo mehne dutiha to bese curinare.³ A yoa Jesu crusapu to yariari baharo payu tahari pjacu tiriro bajua mujaha to curinare, tina “Potocata tiro catira”, ti ni masihto sehe. Cuarenta dachori waro tiro bajua mujaha tinare. A bajuaro tiro to basi to catiriro jiare nono niha tinare. A bajuaro puhtoro Cohamacu to suho jiare yahuha tinare.

⁴ Jesu to curina mehne jisinino tinare o sehe ni yahuha:

—Jerusalaita jisiniga mipure. “Espiritu Santore musare warocaihtja”, yu Pacu to nirirore cohtasiniga. Tíre to nirire musare yahui yuhu.⁵ João musare bautisaro co mehne yoamare. Yuhu sehe ti yuhdoro yoihtja musare. Maha dachoricā baharo yuhu sehe Espiritu Santore musa mehne jirucuchu yoihtja musare —niha Jesu.

Jesu manopu mujaa wahaha

⁶ A yoa tina tucu Olivo wama tidupu Jesu mehne cahmachuina sehe o sehe ni sinitu nuha tire:

—Puhtoro, cimipure sare Israe yahpare pari turi cu, mari coyea warore puhto soihcari muhu? —ni sinitu nuha to yaina.

⁷ Ti a nichu tuhoro Jesu o sehe niha:

—Musa puhto sahti pjare yahu quihoro, a wahachu yoariro yu Pacu dihta jira. Musa sehere tíre ne masihto basioerara.⁸ Wiho mejeta musare Espiritu Santo to wihichu Cohamacu ya

masiare cjuanahca musa. Ti masiare musa cjuana Jerusalē macainare, jipihina Judea yahpa macainare, Samaria yahpa macainare, a yoa jipihina ahri dacho mu suro macainare noa buheare buhenahca musa. Yu yariarire, yu masa mujarire tinare buhenahca musa —ni yahuha Jesu tinare.

⁹ To a ni tuhsuri baharota, Cohamacu Jesure manopu mujachu yoaha juna. Tina tire ti nu nuhu muochuta me curua watopu sa, buti mujaa wahaha.¹⁰ To a buti mujari baharota tina Jesu to mujarirore ti nu muono watoi puaro anjoa yehsea suhti tiina Jesu to curina watoi bajuarucu suha.¹¹ A bajuarucu su, tinare o sehe niha:

—Musa Galilea macaina, ¿dohse jiro baro nu muorucuna nijari musa? Ahriro Jesu, musa mehne jirore cjirota, Cohamacu manopu to mujachu yoarirota, mipure to mujachu musa nuriro seheta, pari turi duji tarohca tjoa —ni yahuha anjoa tinare.

Jesu to curina Juda cjirore cohtotahtirore beseha

¹² A yoa Jesu yaina tucu Olivo wama tidupu jiina duji taa, Jerusalēpu tju suha. Tu tucu cu kilómetro bui curero yoaro jira Jerusalē duhtu cahapure.¹³ Tju su, tina manopu ti jiri tahtiapu mujaa wahaha. Ahrina jiha: Pedro, João, Santiago, Andre, Felipe, Toma, Bartolomé, Mateo, Santiago, Simo, Juda jiha. Santiago sehe Alfeo macuno jiha. Simo sehe cananista wama tiri curua macariro jimaha. Juda sehe Santiago macuno jiha.¹⁴ Payu tahari ahrina jipihina, to curina, a jichu numia, María Jesu pocoro, a yoa Jesu bahana mehne cihu noano cahmachu, Cohamacure a sinirucua tiha.

¹⁵ A yoa ti dachorire masa payu cahmachuha. Ciento y veinte jia jiboa. A jiro Pedro sehe tiro mehne macaina Cristo

yaina watoi ducu, ò sehe ni yahuha tinare:

¹⁶—Yũ coyea, Cohamacũ panopũ to niriho sehetã ã waharo nihre. Tíre Espíritu Santo Davi cjirore yahu dutiha Juda cjirore. Juda cjiro Jesure ña-hahtinare ñoriro jihre. ¹⁷Ã yoahitiro jiparota mari mehne Jesu yare yoariro jimahre. ã jiro sã mehne macarirota jimahre —niha Pedro.

¹⁸Juda cjiro sehe Jesure ño dutia ti waparire to wiari baharo to basita wajã yariaha. ã yoaro boraã waha, to tu misida tuhũa waha, yariaã wahaha. To wiari cjiri mehne paina mahanocã yahpare nuchũha. ¹⁹Jipihtina Jerusalẽ macaina masi pihtinocari jire Juda cjiro to ñano yoarire. ã masia ti ya dũsero mehne to niñeru mehne ti nuchũri yahpa cjirore Acéldama wamoari jire. Acéldama nia, “Di yahpa”, nia nina. ²⁰Baharo ò sehe ni namoha Pedro:

—Panopũ to joariro sehetã ã wahahre Juda cjiro. Salmo to joari tjui ò sehe ni joaa tiha:

“Tiro to jiri wũhũ masa marieni wũhũ tjuarohca.

Ne noa jisi tí wũhũre”,

ni joaa tiha. Ò cũhũre ò sehe ni joaa tiha:

“Pairo to dahraã cjirore cohtotariro jirohca”,

ni joaa tiha Salmopũ.

²¹⁻²²Ã jina mari cũiro besejihna. João masare bautisariro cjiro masare to buhero watoi cãina Jesu yaina mari mehne wahare. Tina mehne macarirore cũiro bese nano cahmana mari mehne macariro cjihto. Jesu mehne mari jichũ mari mehne ã jirucirirore besero cahmana. ã mari beseri baharo Jesu to masa mũjarire mari mehne buherohca —ni yahuha Pedro to coyeare Cristo yainare.

²³To ã nichũ tuhõa pũarore bese dapõha tina. Cũiro José Justo wama tirirore beseha. Tiro Barsaba ti ni pisuriro jiha. Bese tuhsũ, pairore Matia

wama tirirore beseha. ²⁴⁻²⁵Tinare bese dapõ tuhsũ, tina Cohamacũre ò sehe ni siniha:

—Mũhũ sã puhtoro jipihtina masa ti tuhõtuare masina. Ahrina pũaro sã beseina jira. Juda cjirore cohtotahitirore diro mũ cahmarirore besega. Jesure co-hãtjiãhno Juda cjiro sehe pichacapũ wahaha. Tirore cohtotahitiro Jesu to cũiro jirohca. ã jiro sã mehne noaa buheare buherohca —ni siniha tina Cohamacũre.

²⁶Ã niata tãa mehne doca mũjaha beseã taa. Matia yaro to noano quihõno wijachũ, tiro sehe Jesu to cũrina once cũrina mehne macariro tjuaha.

Espíritu Santo Jesu yaina mehne ji dũcaha

2 ã yoa Pentecoste wama tiri dacho jichũ tina jipihtina cũ wũhũi cahmachuha. ²Tí pjareta wihnono to tuaro taro sehetã mũanopũ bisiro coa taha. To ã bisiro coa tachũ tuhõha jipihtina tí wũhũpũ jiina. ³Ã yoa picha pohna yoaro sehe jia tina jipihtina dapu poca bui bajuaha. Tí picha pohnaricã ñahmanoricã yoaro sehe bajuha. ⁴Ã yoa Espíritu Santo tinapũre sãarũcũ sua wahaha. Tinapũre to sãarũcũ sua wahachũ, paina ya durucũare to durucuchũ yoaa mehne tina sehe paina ya durucũare noano durucũha.

⁵Tí dachõre Jerusalẽpũ payũ judio masa, cũ curua macaina masa jipahta, paró paye yahpari macaina jiha. Cohamacũre ño payõina jiha. ⁶Ã yoa mũanopũ coa tachũ tuhõha tina Jesu buheina cahapũ payũ cahmachu wahcãha. Cahmachuina masape ya durucũare Jesu buheina ti durucũ pahõochũ tuhõha, tina tuhõ cũaa wahaha.

⁷⁻⁸—Cuenah. ¿Dõhse yoaa ahrina Galilea macaina jipahta mari ya durucũare noano durucũjari? Tina mari ya yahpapũ taina yoaro sehetã durucũa nina —niha tina sehe.

9-10—Jipihtina mari durucuaré mipure durucua nina: Õpe yahpari macaina mari õre cahmachuina jija: Partia macaina, Media macaina, Elam macaina, Mesopotamia macaina, Judea macaina, Capadocia macaina, Ponto macaina, Asia macaina, Frigia macaina, Panfilia macaina, Egipto macaina, Libia yahpai Cirene cahapũ jiina, Romapũ taina jija mari. Cãina judio masa waro jija mari. Paina judio masa dojoina jija mari. ¹¹ Creta macaina cũhũ, Arabia macaina cũhũ jira mari mehne. Mari payũ paró macaina soro durucua tiina mari jipanata ahrina sehe mari masape curuari macaina durucuaré ti durucuchũ tuhõja mari. Tina mari ya durucua mehne Cohamacũ tuaa mehne to yoarire yahua nina —ni durucuha masa ti basi.

¹² ã niata tina cãaa waha, ti ñuri cũhũre ti tuhõri cũhũre noano tuhõ ñahaeraha.

—¿Ahrina dohse jiro baro paina ya mehne Cohamacũ yare ã noano durucujari, mũa tuhõtuchũ? —ni cahma sinitu ñũha tina ti basi.

¹³ Wiho mejeta paina Jesu yaina ti durucuchũ tuhõina mehne macaina sehe tinare õ sehe ni bujũpeha:

—¿Dohse ahrina sihbiori sihni cahaa nijari? —ni bujũpeha paina tinare Jesu yainare.

Pedro masare yahuha

¹⁴ ã jiro Pedro once Jesu to cũrina mehne wahcãrucũ sũ, tuaro durucutjiãhno masare õ sehe ni yahuha:

—Mũa Judea yahpa macaina, jipihtina Jerusalẽpũ jiina, ahrire masiga mũa. Yũ yahuchũ tuhõga mũa. ¹⁵ Mũa tuhõtua quihõno jierara. Nueve hora jira mipũta. Mari chũ sihni hora jierasina. ã jia ahrina cahaina jierara.

¹⁶ Ahrina Cohamacũ panopũ to niriro seheta yoaa nina. Tí pjapure Joere Co-

hamacũ yare yahu mũhtariro cjirore, ahrire yahu dutia tiha Cohamacũ sehe:

¹⁷ “Sohtori tia dachõri jichũ õ sehe jirohca: ‘Yũ yairo Espiriture masare jipihinare warocaihtja.

ã jia mũa pohnapũ yũ yare yahuahca.

ã yoa mũa mehne macaina wahma yapia bajuamehneare ñũahca.

ã jia mũa mehne macaina bucũna cahãnopũ cahãahca.

¹⁸ ã jicũ yũ cahamacare, mũare, numia cũhũre yũ yairo Espiriture warocaihtja.

ã jia tina yũ yare yahuahca.

¹⁹ Tuhsũ, yũ tuaa mehne bajuamehneare yoa ñõihca mũanopũ.

Yahpũ cũhũre yũ bajuamehneare ñõihca: Dire, pichacare, mene ñõihca.

²⁰ Tuhsũ, sũ dacho macariro nahitianore cohtotarõha.

Ñami macariro di yoaro sehe sohãriro cohtotarõha.

Õ sehe waharõha Cristo mũa pũhtõro to tahti dacho, yũ niri dacho panoi.

Tí dachõ ñũ cãaa wahaahca masa.

ã jiro wiho jiri dacho jisi.

Tí dacho noari dacho jirohca.

²¹ ã jiro õ sehe jirohca.

Jipihina masa Cristõre ti ñaa buhirire cohã duti siniinare tiro tinare pichacãpũ wahaborinare yũhdorõhca’, nina Cohamacũ”,

ni joaha Joe.

²² Mũa Israe masa yũ yahuchũ tuhõga: Jesu Nazare macariro sehe Cohamacũ to warocariro jihre. Jesure to warocarire masa ti masihtõ sehe Jesu to Pucũro ya tuaa mehne yoa ñõhre mũaare. Mũa tíre masina. ²³ Jesure wajã dutina judio masa jierainare wahre mũa. Cohamacũ panopũ to cahmariro seheta, “ã waharõhca”, to niriro seheta ã yoahre. ã jina mũa Jesure crusãpũ wajã dutihre Cohamacũ dutiare cjuærainare. ²⁴ Mũa ã yoapachũta Cohamacũ sehe Jesure yariariro cjirore

masohre. Pari turi ne yariasi tiro. Tiro yaria dojoerara. Ā catirucuhtiro jira.
²⁵ Ō sehe nia tiha Davi cjiro panopu macariro Cristo to ni durucuboriro seheta:

“Yū puhtoro yuhū mehne jira muhū.

Jipihtia dachoripe Cohamacu yū puhtoro yū cahai mu jichū űaa tihi yū cuierahto sehe.

²⁶⁻²⁷ Muhū Cohamacu yuhūre yariaina ti jiropure ne cohāsi.

Yuhūre mu cahīrore űanopu cohāsi muhū.

Yuhū mu cahamacuno muhūre űo payoriro jija.

Yū pjacure baa dutisi muhū.

Ā jicu tuaro wahcheja.

Wahchea mehne durucuja.

Ā jicu muhūre Cohamacure noano wacū tuariro jicu űaa buhiri marieriro jicu cuiro marieno noano jinocaja.

²⁸ Yuhūre pari turi catichū yoaihca muhū.

Yuhū mehne mu jichū tuaro wahcheja”, ni joaa tiha Davi cjiro Cristo to ni durucuboriro seheta.

²⁹ Coyea, ō sehe noano yahuihtja musare Davi cjirore mari coyeiro, panopu macarirore. Tiro yariaa wahaha. Ā jiro tiro to masa copa mipure jisinina. (Ā jiro “Yū pjacure baa dutisi muhū”, ni joaro to basi wama payo yahuro nieraha.) ³⁰⁻³¹ Panopu Cohamacu Davi cjirore ō sehe niha: “Potocā nii nija. Mu panamana ji turiaina mehne macariro mu yoaro seheta ahri yahpa macaina bui puhtoro jirohca”, nia tiha Cohamacu Davi cjirore. Davi Cohamacu yare yahu muhtariro cjiro jiha. Ā jiro Cristore Cohamacu to puhto sōhtore masino, Cristo to masa mujahtore yahu muhta tuhsūha Davi sehe. Ō sehe niha: “Tiro yariaina ti jiropure ji dojoasi. To pjacu tōi baasi”, nia tiha Davi cjiro. ³² Ahriro Jesureta Cohamacu masohre. Sā jipihtina

tirore űūhi. ³³ Mipure Cohamacu poto buhusehepu jira dutiro jiro. Tō panopu to Pucuro “Espiritu Santore mu yainare warocaihtja”, to ni cūriro seheta wari jire Jesure. Ā jiro Jesu sehe ahriare Espiritu Santore warocari jira. Ā jina mipure Espiritu to yoare musa űū, tuhona nina. ³⁴ Davi cjiro sehe Jesu to mujariro seheta muanopu mujaeraa tiha. Ā jiro tiro to basi ō sehe nia tiha:

“Cohamacu ō sehe nire yū puhtoro: ‘Yū poto buhusehei dujiga muhū.

³⁵ Muhure űū tuhtiinare muhure cūihtja mu cahamaca yoaro sehe jihtinare’, nire Cohamacu yū puhtoro”, nia tiha Davi cjiro.

³⁶ Ā jina jipihtina Israe masa ahriare noano masiga musa: Ahriro Jesure musa crusapu wajāriro cjirore musa puhtoro sōhre Cohamacu sehe. Tirore musare yuhdohtirore Cristore cūre Cohamacu — ni yahuha masare Pedro.

³⁷ To ā nichū tuhoa tuaro cahya, pjiro tuhota, masa sehe Pedro cūhure ō sehe ni sinitu űūha:

—¿Sā coyea, dohse yoanahcari sā? — ni sinitu űūha tina.

³⁸ Ti ā ni sinitu űūchū ō sehe ni yuhtihā Pedro:

—Musa űaa yoari buhirire cahyaga. Musa űaa tuhutumari cjirire tuhota cohtota, “Ā tjiri jira” ni, Cohamacureta maca, tuhoga. Ā yoa Jesu yaina jina, bautisarina jiga musa jipihtina. Jesure musa wacū tuachū űūno, musa űaa yoari buhirire borohca Cohamacu. Tō sehe musa yoachū Espiritu Santore warohca musare. ³⁹ Musare, musa pohinare, musa panamana ji turiainare, yoaro macainare, ā yoa jipihtina Cohamacu mari puhtoro to beserinare, “Potocāta yuhdoihtja musare”, ni cūha Cohamacu —niha Pedro.

⁴⁰ Tuhsū, tuaro mehne ō sehe ni yahu quihōha tinare:

—Ahri yahpa macaina, Cohamacure ji coerainare buhiri dahrerohca Cohamacu. Wiho mejeta musa sehe, tina watoi jiina, Cohamacu yahurire, “Á tjira”, ni bahrañoga musa yuhduhto sehe —yahu quihōha Pedro masare.

⁴¹To ā nichu tuhoa tina payu to yahuire noano tuhoha. Ā jiro tinare tiro bautisa dutiha. Tí dachore Cohamacu yaina mehne macaina tres mil masa waha namoha. ⁴²Ā yoa tina masa Cristo to cūrina mehne dachoripe cahmachu, tí buheare tuho nunu, tíre yuhti mujaa tiha. Tina pāore nuha, cahma witi, Cohamacure sini, Cristo to cūrina mehne noano jinocaa tiha.

Jesu yaina wahma ji ducaina ti jia tiare yahuha

⁴³Ā yoa Cohamacu to tuaa mehne yoa ño mujaha to cūrina. Ti ā yoachu ñua masa jipihtina ñu cūaa wahaa tiha. ⁴⁴Jipihtina Jesure wacū tuaina cahmachu, noano jinocaa tiha. Ā jia ti yare cahma witia tiha. ⁴⁵Ti yare dua, jipihinare paye baro maerainare cāina ti cahmaare waa tiha tina. ⁴⁶Ā jia dachoripe tina Cohamacu wuhu wijaaroi cahmachua tiha. Ā yoa cāa wuhuse, ti ya wuhusepu cūhure nohopeina cahmachu, pāore nuha, wahchea mehne tina cūnoi chua tiha. ⁴⁷Ti ā cahmachuno watoi “Cohamacu noariro jira”, ni ño payoa tiha. Paina masa tinare ji coa yuhdua tiha. Ā yoaro dachoripe Cohamacu painare to yaina to yuhdohtina wahachu yoaa tiha.

Tini masierarirore noariro wahachu yoaha Cohamacu

3 Cū numu ñamichapū tres jichu Cohamacu mehne durucuri pja jichu Pedro, João mehne Cohamacu wuhupu wahaa niha. ²Dachoripe tí wuhure ti sahrí sāari sahrīno tāa mehne ti yoari sahrīno macari sopaca cahai paina cūiro

masunore na ta duhu dapoa tiha. Tí sopaca noari sopaca wama tiha. Tiro masuno sehe wahma masa bajaroputa dojori wahiro jiro tini masierariro jiha. Ā jiro tiro tí sopaca cahai niñerure sini dujia tiha tí sopacai sāainare. ³Ā yoa Pedro, João mehne tí sopacare ti sāa cahachu tini masierariro sehe tinare ñu, niñerure siniha. ⁴Ā jia tina puaroputa tirore ñu, Pedro sehe ō sehe niha:

—Sāre ñuga mūhu —niha Pedro tirore.

⁵To ā nichu tuhoro “Ahrina mahanočā yuhure niñerure waahca”, ni tuhoturo ñuroca ō tuhoha tinare. ⁶To ā ni tuhotupachuta Pedro tirore ō sehe ni yahuha:

—Niñerure cjueraja yuhu. Cjuera-paihta, ahrire yoaihtja mūhure. Jesu-cristo Nazare macariro to tuaa mehne wahcāruca, tiniga mūhu —niha Pedro tini masierarirore.

⁷Ā ninota to wamomacare potu buhusehe macari wamomacare ñaha, tirore waja wahcō dapoha. To ā yoachuta tini masierarirore to ñuchua tuaa wahaha. ⁸To ā wahachuta tiro wahcāruca purucu su, tini ducaha. Ā tini ducaro tiro waha, pu tini “Cohamacu noariro jira”, to ni wahcheriro mehne tina mehne Cohamacu wuhu macari sahrīno puhichapū sāa wahaha. ⁹To ā tinichu “Cohamacu noariro jira”, to nichu masa jipihtina tirore ñuha. ¹⁰Ā jia masa tirore ñu masiha. Tiro Cohamacu wuhu macari sahrīno tāa mehne to yoari sahrīno macari sopaca noari sopaca cahai niñerure to sini dujirire masiha masa. Ā jia tiro to tinichu ñua, ñu cūaa wahaha.

Cohamacu wuhui Pedro masare buheha

¹¹Ā yoa tini masierariro cjiro Pedro cūhure to siō suha mujano watoi, masa jipihtina ñu cūaa waha, noari wapapu Salomo wama tiri wapapu

muroca wahcã, cahmachuha. ¹²Ti ã cahmachurucũ suçhũ ñũno, Pedro sehe õ sehe ni yahuha tinare:

—Musa Israe masa, ¿dohseana ahrirore ñũ cãajari? ¿Dohseana sãre musa ñũ ñũñajari? Sã sehe sã ya tuaa mehne noaina sã jia tia mehne sã mũ sũro ahrirore tinichũ yoerahi sã. Jesu sehe tíre yoahre. ¹³Abrahã, Isaa, Jacobo mari ñũchũsuma, panopũ macaina ti yairo Cohamacũ sehe to cahamacũno Jesure Jipihtina Bui Jiro cũhre. Wiho mejeta musa sehe tó sehe jirore tirore ñũ tuhtiinare wahre. Baharo puhtoro Pilato tirore to wio duapachuta, musa sehe tirore to wiochũ cahmaerare. ¹⁴Pilato tirore wio duamahre. Wiho mejeta musa Jesure ñaa buhiri marierirore, quihõno yoiroro cahmaerana, pairoro masa wajãriro sehene wio dutihre musa. ¹⁵Ã yoana Jesure marine catichũ yoiroro wajãchũ yoare musa sã coyea judio masa. To yariachũ Cohamacũ tirore masohre. Tíre sã ñũhi. ¹⁶Ã jina Jesu pjiriro to jia tiare wacũ tuaina jija. Tirore sã ã wacũ tuachũ ñũno ahrirore musa mipũ ñũrirore musa ñũ masirirore Jesu sehe to tuaa mehne tinichũ yoahre.

¹⁷Yũ coyea, musa puhtoa mehne Jesure noano masierapanahta tirore wajãchũ yoare musa. Tíre masija yũhũ. ¹⁸Wiho mejeta panopũ macaina Cohamacũ yare yahu muhtaina cjiri Cohamacũ tinare to yahu dutiriro seheta, yahua tiha tina. “Cristo ñano yũhdũ, yarirohca”, ni yahua tiha tina. Ti ã ni yahuriro seheta ã wahahre mipũre. ¹⁹Ã jina musa ñaare yoari buhirire cahyaga. Musa tuhotumari cjirire tuhotu cohtota, ñaare musa goa pjarire duhu, Cohamacũreta majarerũca, to ya sehene quihõno tuhoga. Musa tirore majarerũca, quihõno tuhochũ ñũno, Cohamacũ

musa ñaare yoari buhirire borohca. Ã boro, musare wahchehti dachorire cũ, musare noano yajeri sãachũ yoarohca tiro. ²⁰Ã yoa tiro musa puhtoro cjihtore to beseriro Cristore musare warocarohca tjoa. Tiro Cristo sehe Jesuta jira. ²¹Cohamacũ cahapũ jisininohca Jesu, pũ Cohamacũ ahri yahpapũ jipihtiare wahma to cohtota pahñochũpũ. To ã cohtota pahñochũ Cohamacũ yare yahu muhtaina cjiri, to yaina waro panopũ yahu quihõ tuhsua tiha. ²²Moise cjiro tíre yahuro õ sehe ni muhtaha: “Cũiro mari mehne macarirore mari coyeiroreta Cohamacũ yare yahu muhtaitiro cjihtore Cohamacũ mari puhtoro warocarohca musare. Yũhũre to warocariro seheta warocarohca tiro cũhũre. Ã jina musare to yahuchũ tuhona, ‘Jai’, ni yũhti pihtinocaga musa. ²³Õ sehe jirohca. Jipihtina tirore yũhtieraina to cohãhtina jiahca. Cohamacũ yaina mehne macaina jisi tina”, ni muhtaa tiha Moise cjiro.

²⁴Jipihtina Cohamacũ yare yahu muhtainape Samue, ã yoa to baharo jiina cũhũ mipũ jia dachori cjihtire yahu muhtaa tiha. ²⁵Mari ñũchũsuma cjirire, Cohamacũ yare yahu muhtaina cjiri cũhũre panopũ macainare yahua tiha Cohamacũ. Mari cũhũre ã ni yahuro nia tiha. Abrahãre to niriro seheta mari cũhũre ni yahuro nia tiha. Õ sehe ni yahua tiha Cohamacũ Abrahãre: “Jipihtiro ahri yahpa macainare noano yoaihtja. Õ sehe tíre yoaihtja: Mũ coyeiro baharo jirore sehe masare noano yoabasarohca yũhũre”, nia tiha Cohamacũ Abrahãre. ²⁶Cohamacũ to macũnore masa wijachũ yoaro mari cahapũ waroca muhtare mari ñaa yoare duhuchũ yoaitirore. Ã yoaro marine tiro noano yoare —niha Pedro tinare.

**Pedro, João mehne
puhtoa mehne suhuduha**

4¹⁻³ Pedro, João cūhu masa mehne ti durucuro watōi sacerdotēa, Cohamacu wūhure cohtaina surara puh-toro, saduceo curua macaina cūhu tinare tuhōha. Ō sehe ni buheha Pedro João mehne masare:

—Jesu to yariari baharo masa mūjaa wahahre. To ā masa mūjarire nūna mari cūhu baharo to yaina mari masa mūjahtore masija mari —ni yahuha Pedro cūhu.

Ti ā nichu tuhōa puhtoa sehe tina mehne suaha. Ā suaa nahi cahachū nūa tina Pedrore, João cūhure naha, peresu yoaha. ⁴ Ā tinare peresu ti yoapachūta payū ti yahuare tuhōina sehe “Potocāta jira”, ni tuhōtuha. Ā jia Jesu yaina payū waha, tí dachoi wahma to yaina ji ducaina, ā yoa tó panopū Jesure wacū tua tuhsurina mehne mūa sahserore mari quihōchū, cinco mil masa sūro cahai jiha.

⁵ Ā yoa pa dachoi tí maca macaina puhtoa, bucūna, ā yoa judio masa buheina cūhu Jerusalēpū cahmachuha.

⁶ Ti ā cahmachunoi sacerdotēa bui puh-toro, Ana wama tiriro cūhu tōi jiha. Ā yoa to coyēa cūhu jiha. Caifa, João, Alejandro, paina mehne Ana coyēa cūhu jiha. To coyēa to dahraare dahraina jiha tina cūhu. ⁷ Ā jia tina Pedro cūhure ti cahmarocachū, surara sehe puhtoa watopū tinare naa wihi dapoha. Ti ā na wihi dapochū, tina puhtoa ō sehe ni sinitu nūha Pedro cūhure:

—¿Noa ya tuaa mehne mūsa tirore noariro yoari? ¿Noa jijari mūsare tíre yoa dutiriro? —ni sinitu nūha tina.

⁸ Ti ā nichu tuhoro Espiritu Santo to yoa dutiriro seheta to tuaa mehne yahuha Pedro tinare:

⁹ —Mūsa puhtoa, ¿mūsa bucūna, sā dohse yoa ahriro tini masierarirore sā

tinichū yoarire masi duana, sāre sinitu nūna nijari mūsa? ¹⁰ Tí pja pini ahrire masiga mūsa jipihtina, Israe masa. Jesucristo Nazare macariro, mūsa crusapū wajāriro, Cohamacu to masoriro tiro sehe ahriro tini masierarirore noariro wahachū yoahre. Ā jina ahrirore mipure mūsa nūrocaroi to tinichū nūna mūsa. Ō sehe nina Cohamacu yare ti joari pūi Jesu cjihtore yahuro: ¹¹ “Ahriro tāca yoaro sehe jiriro jira. Tācare wūhu dahreina wiho jiriare ti cohāriro seheta mūsa judio masa tirore cohāhre. Mūsa ā yoapachūta mipure wūhu dahreina wūhure yoaa ti cū mūhtari tācare ti cūriro seheta Cohamacu tirore puh-toro sōhre. Tiro Cristo mariachū Cohamacu yaina wahaeraboa masa. (To ā wiho jiriro jierapachūta mūsa mari puh-toa mehne tirore cahmaerare. Mūsa ā cahmaerapachūta Cohamacu sehe tirore mari puh-toro sōhre)”, ni joaha panopū. ¹² Ne, paio masare pichacapū waha-borinare yūhdoriro ne mariahna. Ahri yahpapure Jesu dihta masare yūhdoriro jira. Ne paina tiro yoaro sehe jiina mariahna —ni yahuha Pedro tinare.

¹³ To ā ni yahuri baharo Pedro, João mehne buhemahnoeraina jipahta cuiro marieno ti buhechū nūa, puhtoa, bucūna, judio masa buheina mehne nū caaa wahaha. Ā jia Jesu yoaro sehe ti buhechū nūa, ō sehe masiha tina: “Potocā Jesu mehne macaina tjira ahriro”, ni masiha tina. ¹⁴ Ā yoa tini masierariro cjiro Pedro cūhu mehne jiha. Tiro to noariro jichū nūha puhtoa, bucūna, judio masa buheina mehne. Ā jia tina Pedro cūhure “Nāno yoaa nina”, ni yahusā masieraha. ¹⁵ Ā yahusā masieraa puh-toa ti cahmachuri tahtiapū jiiinare Pedro cūhure wijaa dutiha. ¹⁶ Ti wijaaari baharo puhtoa sehe ti basi ō sehe ni suhuduha: —¿Ahrinare dohse yoanahcari mari? —ni durucuha tina ti basi.

Ō sehe ni durucu namoha:

—Pedro, João Cohamacu tuaa mehne tini masieraritore tinichu yoari jire. Ā jia Jerusalē macaina jipihtina ti ā yoarire masica. Ā jina mari sehe “Ā yoerare tina” ni masieraja mari. ¹⁷ Ā jina Jesu to buheri cjiire painare buhe dutiena tjijihna tinare, “Paina tí buheare cahmari”, nina —ni durucuha tina ti basi.

¹⁸ Ā ni durucu tuhsua Pedro cūhure pjiroca, ō sehe niha:

—Jesu to buheri cjiire ne buhena tjiga painare. Tíre ne durucu namoena tjiga —ni yahumaha tinare.

¹⁹ Ti ā ni yahuchu tuhoa tina Pedro João mehne ō sehe ni yuhtiha tinare:

—Musa ō sehe ni dutichu musare yuhtina, Cohamacu sehere yuhdurucana niboca sã. ¿Diro ya sehere sã yoachu quihõno jijari Cohamacu to ñurocarore? ¿Musa ya sehere sã yoachu quihõno jijari? ¿Cohamacu ya sehere sã yoachu quihõno jierajari, musa tuhotuchu? ²⁰ Sã sehere sã ñurire, sã tuhorire sãre yahto basioerara —ni yuhtiha Pedro, João mehne.

²¹ Ti ā nichu tuhoa puhtoa sehe pari turi dutimaha tjoa tinare:

—Jesu to buherire musa buheri buhiri ñano yuhdunahca musa —niri jimare puhtoa tinare.

“João, Pedro mehne ñano yoaa nina”, ni masierari jire tina. Ā jia masa sehe tini masierariro to noariro wahachu ñua, “Cohamacu potocãta noariro jira”, niha masa. Ti ā nichu tuhoa puhtoa sehe Pedro cūhure ti dohse yoa buhiri dahreboare bocaeraa, tinare wioha. ²² Tini masierariro, noariro ti yoariro cuarenta cūhmari bui cjuariro jiha.

Jesu yaina ti cuierahto cjihtore siniha Cohamacure

²³ Ā yoa, Pedro João mehne ti wiori baharo tina mehne macaina cahapu sũ, sacerdoeta puhtoa, bucuna jipihtia

tinare ti niri cjiire yahuha. ²⁴ Ti ā ni yahuchu tuhoa tina jipihtina cūno potori Cohamacure siniha:

—Sã puhtoro muhu muanore, yahpare, mári cūhure yoariro jipihtina catinare bajuamehneriro jira muhu. ²⁵ Mu Espiritu Santo sã ñuchu cjiore Davire mu cahamacure ahrire yahu dutia tiha mu niro sehetā:

“¿Dohse yoa Israe masa jieraina suajari? ¿Dohse yoa Cohamacure ti yuhduruc-ahtire wiho waro durucujari tina?

²⁶ Payu yahpari macaina puhtoa cahmachu, mari puhtoro Cohamacure, to puhtoro sōriro Cristo cūhure ñu tuhti, ñano yoa duara tinare”, ni yahua tiha Davi cjiro mu ni dutiriro sehetā.

²⁷ Ā tjira. Ahri macai Herode, Poncio Pilato, judio masa jieraina, ā yoa judio masa cūhu cahmachuhre, mu beserirore Jesure noariro mu cahamacure wa-jãa taa. ²⁸ Tí pja mu cahmariro sehetā “Ā waharohca”, mu niro sehetā yoahre tina. Mu masia mehne ā ni yahuha muhu. ²⁹ Ā jicu mipure sã puhtoro, tina sãre purino mehne mu jia tiare ti yahu namo dutierachu wacũ payoga muhu. Sãre mu cahamacare cuiro marieno mu buheare yahuchu yoaga sãre. ³⁰ Muhu mu tuaa mehne dohatiinare noaina yoaga. Ā jicu mu buheare cuiro marieno yahu dutiga sãre. Ā yoa Jesu noariro mu cahamacure to tuaa mehne yoa ño masichu yoaga sãre. Ā jicu dohatiinare noaina sã waha dutichu to tuaa mehne yoadohoga sãre —ni siniha tina Cohamacure.

³¹ Ti ā ni siniri baharo, ti cahmachuri wuhu ñuhmi muua wahaha. To ā ñuhmichuta Espiritu Santo to tuaa mehne wacũ tua namoina wahachu yoaha tinare. Tinare ā wahachu Espiritu Santo to dutiriro sehetā yoaa, cuiro marieno Cohamacu yare yahu namoha tjoa tina.

Jesu yaina ti yare tju waa tiha

³²⁻³³ ã jia Cohamacu to tuaa mehne tina Jesu to cürina õ sehe ni yahua tiha masare: “Jesu yariariro to masarire sã ñuhi”, ni yahua tiha tina masare. Æ jiro tinare jipihtinare Cohamacu noano yoadohorucua tiha. Æ yoa Jesure wacu tuaina payu jia, tina cüno potori tuhutuina jia tiha. Æ jia tina ti yare ti cjuare “Yu ya dihta jira”, ne niera tiha. Tina jipihtina ti yare paye baro maerainare tina mehne macainare tju waa tiha. ³⁴ Æ jia tina mehne macaina pjacuoina mariea tiha. Tina mehne macaina yahpari cjuaina, wuhuse cjuaina ti yare duaa tiha. ³⁵ Æ duaa ti wapa narire tina na ta, Jesu to cürinare waa tiha. Æ jia tina sehe tíre tina mehne macainare tju waa tiha. Jipihtina cjuerainare tju waa tiha. ³⁶ Tí pjare cüiro tina mehne macariro José wama tiroiro jiha. Jesu to cürina Josére Bernabé ni wama pisuha. To wama Bernabé “Masare wahchechu yoariro jira”, nia nina. Tiro Leví ya curua macariro Chipre nucu macariro jiha. ³⁷ Æ jiro tiro yahpare cjuariro jiro tíre duaha. Æ duaro to wapa narire Jesu to cürinare waha tiro painare witi dutiro.

Anania to namono Safira mehne mahñoa

5 Paina cühu Bernabé yoaro sehe yoaa timaha. Tina Anania wama tiroiro, to namono Safira wama tiricoro jiha. Ti ya yahpare duaha tiro. ² Æ duaparota tiro to wapatarire to basi naha. To namono cühu to Æ yoarire masiha. Æ jiro ti wapataa ti duharire na ta, Jesu to cürinare waha Anania sehe. Æ waro “Wa pahñoi nija”, nimaha tiro. ³ To Æ yoachu ñuno Pedro tireore õ sehe ni yahuha:

—Anania, watino mähure mahño dutiri jire Espiritu Santore. Æ jicu mü ya yahpare dua, mü wapatarire mü basi nari jire mühu. ⁴ Mü duahto pano mü

ya yahpa jihre. Æ jiro mü duari baharo mü ya wapataa jihre. ¿Æ yoacu dohse jiro baro Æ mahñori mühu? Mühu sã dihtare mahñoerare. Cohamacu cühure mahñohe mühu —niha Pedro tireore.

⁵ To Æ nichu tuhorota, Anania sehe doca caha sü, yariaa wahaha. Æ jia jipihitina tiro to Æ wahachu masia, tuaro cuiha. ⁶ To yariari baharo wahma yapia ta, to pjacure suhtiro cahsaro mehne wahma, sopacapu na wijaa, masa copapu cohänocaha tireore.

⁷ Æ yoa tia hora baharo Anania münano namono, to yariarire masieraro Pedro cahapu sãaha. ⁸ Æ jiro Pedro ticorore õ sehe niha:

—¿Musa ya yahpare duatjiähna noho puro wapataru musa? —niha tiro.

Æ jiro ticoro to manuno münano to niriro purota, “Tó purota wapatahi sã”, ni yuhtimaha ticoro.

⁹ To Æ ni yuhtichu tuhoro Pedro õ sehe ni yahuha ticorore:

—¿Dohse yoana musa cüno potori Cohamacu Espiriture mahño duajari? “¿Potocãta marine buhiri dahrebocari?” nina. Tuhoga mipure. Mü manü cjirore yarina tara. Mühu cühure mü pjacure naa taa nina —niha Pedro.

¹⁰ To Æ ni yahuchuta ticoro doca caha sü, yariaa wahaha. Æ jia wahma yapia tí wuhure sãa wihi, ticoro pjacure na wijaa wahaha. Na wijaa, to manuno münano pari wahpa ticoro pjacure masa copapu cohãha. ¹¹ Æ jia Jesu yaina jipihtina paina tíre tuhoa cui yuhdua wahaha.

Jesu to cürina Cohamacu tuaa mehne yoa ñoha

¹² Æ yoa masa watoi Jesu to cürina payu tahari Cohamacu tuaa mehne yoa ñoha tiha. Æ yoa tina Salomo wama tiri tahtiapu tihamahnoeni tahtiapu cahmachua tiha. ¹³ Æ jia paina Jesu yaina jieraina sehe cui curea, tina cahapu wahaera tiha. Æ cuipahta tinare Jesu yaina

warore “Noaina jira ahrina”, nia tiha masa. ¹⁴ Ā jia m̄ua, numia payu Jesure wacu tua ducaa tiha. ¹⁵ Ā jia tina dohatiinare na ta, coma yosaa mehne pjūpaha duhu cūa tiha mahapu tinare. Ā yoaa Pedro tinare to ņa payochu cahmaha tinare na taina sehe dohatiina ti noaina wahachu cahmaa. Tinare to ņa payoerachu Pedro ti bui masurca cūchu cahmaha tina. Tí dihtare cahmaa tiha ti noaina wahahto sehe. ¹⁶ Ā jia Jerusalē cahai jia macari macaina cūhu dohatiinare, wafia ti saina cūhure na taa tiha. Ti ā na tachu tina jipihtina ti pjacari noaina wahaha.

Jesu to cūrinare paina ņano yoaa tiha

¹⁷ Ti ā yoachū ņua sacerdotea bui puhtoro, tiro mehne macaina mehne Pedro cūhure ņu tuhtiha. Sacerdotea puhtoro mehne macaina saduceo curua macaina jiha. ¹⁸ Ā ņu tuhtia tina sua yūhdua Jesu to cūrinare ņaha, peresu yoaha. ¹⁹ Ā jiro ņamipu Cohamacu yairo anjo pjōoha tinare peresu dujiinare. Ā yoa tinare wijaa ta dutiro ō sehe ni yahuha anjo:

²⁰ —Cohamacu wuhupu wahaga. Tí wuhupu jina Cohamacu to masorire ahri noaa buheare yahuga masare —niha anjo tinare.

²¹ To ā nichu tuhoa, ņamiwacūnu jichu Cohamacu wuhupu sāa, masare buhea tiha tina. Tí dachoihta sacerdotea puhtoro, tiro mehne macaina, Israe masa puhtoa mehne cahmachu, Jesu to cūrinare peresupu jiiinare na ta dutimaha surara puhtoare. ²² Wiho mejeta surara puhtoa peresu ti yoari wuhupu waha, ņumaha. Tinare bocaeraha. Bocaeraa tjuaa wahaha. Tju su ō sehe ni yahuha ti puhtoare:

²³ —Peresupu jia pahmari bihaa pahmari jihre. Ā jia tí pahmari cahai ti peresu yoinare cohtaina ti ducuchū ņūhi sā. Wiho mejeta pjōo sāa, sā ņuchū, ti peresu yoina mariahe —ni yahuha tina.

²⁴ Ti ā nichu tuhoa, surara Cohamacu wuhure cohtaina puhtoro, sacerdotea puhtoa mehne tíre tuho, caaa waha, “¿Dohse waha sohtori tiahcu tina ā yoaa?” ni tuhotuha tina. ²⁵ Ā jiro tina cahapu paio su, tinare ō sehe ni yahuha:

—Musa peresu yoina Cohamacu wuhupu jihre. ņana wahaa wiho. Tí wuhupu masare buhea nihre tina —ni yahuha.

²⁶ To ā nichu tuhoro, surara puhtoro, to surara mehne waha, Jesu to cūrinare pari turi ņaha taha tjoa. Wiho mejeta tinare surara tuhtieraha. Ā jia tinare cjaborina jipahta, masare cuia cjaeraha tinare. “Ahrinare mari cjachū paina masa sehe taa mehne docaahca marine”, ni tuhotuha tina surara sehe. ²⁷ Ā jia tinare na ta, puhtoa panoi duhu dapoha tina. Ti ā na wihi dapochu sacerdotea puhtoro tinare ō sehe ni tuhtiha:

²⁸ —Mūsare sā tuaro dutimahi. “Jesu yare buhena tjiga”, nimahi sā mūsare. Sā ā nipachuta musa sehe jipihtina Jerusalē macinare buhehe musa. Jesu to yariari buhiri, sare buhiri tichu yoa duana nica musa —niha puhtoro sehe.

²⁹ To ā nichu tuhoro Pedro sehe paina Jesu to cūrina mehne ō sehe ni yūhtiha:

—Cohamacu to dutiri sehere yoa muhtanahtja. Ā jina baharo Cohamacu cahmachu masa ti dutiare yoanahtja. ³⁰ Cohamacu, mari coyea panopu macaina puhtoro, Jesure masori jire. Tirota jira musa crusapu cja puha wajā dutiro. ³¹ Jesure “Noairo jira” ni, to poto buhusehei duji dutihre Jesure Cohamacu sehe. Ā jiro Jesu masa puhtoro, masare masori jiro, Israe masare ti ņaa yoinare cahyaina ji dutiro, ti ņaa yoina buhirire cohā duara Jesu. ³² Ā jina sā sehe Jesu to yoinare ņurina jina tíre yahuja sā. Espiritu Santo tíre ņuriro jiro yahura tiro cūhu. Tirore Espiritu Santore Cohamacu warocahre. Jipihtina Co-

hamacu dutiare yoainare tiro Espiritu Santore wahre —ni yahuha tinare.

³³To ā nichu tuhoa puhtoa sehe sua yuhduaha. Ā suaa, tina Jesu to cūrinare wajā duamaha. ³⁴Wiho mejeta Gamalie, fariseo curua macariro tói jiro tinare wajā dutiro taro nieraha. Tiro puhtoa mehne macariro, dutiare buheriro to jichu, masa tirore ño payoa tiha. Tiro Jesu to cūrinare mahanocā cohta dutiro pa sehepu tinare naa wahcā dutiha surarare. ³⁵Ti ā naari baharo tiro ō sehe ni yahuha masare:

—Musa Israe masa, ahrinare musa yoahrire noano tuhotuga “Musapu wajāri”, nina. ³⁶Wacūga Teuda cjirore. Tiro to basi “Masare yuhdruarariro jija yuhū”, nire masare. To ā yoachū ñua, masa payu cuatro cientos masa tiro mehne macaina tjuare. Baharo paina sehe tirore wajāri jire. To buheare buherina cjiri sehe waha sitea wahari jire. Ā jia tina cjiri mipure mariaha. ³⁷Baharo masare ti quihōri pja jichu Galilea macariro Juda wama tiroro cjiro masare to buhechu tiro mehne masa payu tjuare. Tiro cūhu yariaa wahari jire. Ā yoa to yaina jipihtina waha sitea wahari jire. ³⁸Ā nicu musare mipu ahrire nii nija. Ā ñunocahga ahrinare Jesu yare yahuinare. Ā yoa ahri buhea, ahri ti ya buhea Cohamacu ya buhea jieraa, pihtia wahaahca Teuda cūhu ti ya buhea ti pihtiro seheta. ³⁹Wiho mejeta ahri Cohamacu ya buhea jia, ne pihtisi. Ahri buhea Cohamacu ya jichu ne ahrire butichu yoa masierara musa. Musa ahrire butichu yoa duana Cohamacu mehne cahmachena niboca musa —niha Gamalie tinare.

⁴⁰To ā ni yahuchū tuhoa, “Potocā tjira”, ni tuhotuha masa. Ā jia tina Jesu to cūrinare pjiroca, ti wihichū ñua, tinare tjanaha. “Jesu yare buhe namoena tjiga musa”, ni tuhsu, tinare waha dutiha. ⁴¹Ti ā waha dutichū tuhoa tina

puhtoa cahapu jirina cjiri waha waha. Jesu yare ti yoari buhiri ñano yuhduaha tuaro wahcheha Jesu to cūrina. ⁴²Ā jia dachoripe Cohamacu wuhū cahai jia waparihi, ti ya wuhusei Cristo yare buhea, yahua tiha tina.

Siete yoadohoinare beseha Jesu yaina

6 Tí dachorire Jesu yaina payu waha. Wiho mejeta ti ā waharo wato, cū curua macaina judio masa jipahta, pa sehepu masa bajuaina griego ya durucuina jiha. Ā jia tina tóita masa bajuaina hebreo ya durucuinare ō sehe ni tuhotu, nureha: “Dachoripe masare yoadohoare ti witichū, mari griego ya durucuina wapewahya numia sehere daacā waro wara”, ni tuhotu, nure cohtaha. ²Ti ā nurechu masia, Jesu cūrina, doce jiina sehe jipihtina Jesu yainare ti cahapu pjiroca, ō sehe ni yahuha tinare:

—Sā Cohamacu yare buheina jija. Tíre duhu, masare yoadohoare witiborina sā jirucuchū tó wahaerara. ³Musa sā coyee, siete muare, paina noaina ti niinare Espiritu Santo to dutirire yoainare, noano tuho masinare macaga. Tinare ahri dahraare cūga musa. ⁴Wiho mejeta sā sehe dachoripe Cohamacure sini mūja, Cohamacu yare painare buhenahca —ni yahuha tina Jesu to cūrina.

⁵Ti ā nichu tuhoa, “Jai. Āta yoajihna”, niha tina jipihtina Jesu yaina. Baharo Estebāre Cristore wacū tuarirore, Espiritu Santo to dutiare yoarirore beseha tina. Ā jichu Felipere, Prócorore, Nicanore, Timore, Parmenare, Nicola cūhure Jesu yainare yoadohoitinare beseha tina. Nicola sehe Antioquía macariro, judio masuno jierariro, judio masa ya buheare cahmano, tina mehne sāariro jiha. ⁶Tinare bese tuhsu, ti beserinare Jesu cūrina cahai na wihaha tina. Ti ā na wihichū ñua, tina Jesu cūrina sehe tinare Cohamacure sini payo tuhsu, ti dapu poca bui ti wamomacarine duhu payoha.

⁷ Ā yoa Jesu yaina painapure Cohamacu yare yahu site pahñoa wahaha. Ā jia Jerusalēpu jiina paina Jesu yaina payu waha namoha. Sacerdotea cūhu payu Jesu yaina wahaha.

Paina Estebäre ñahaha

⁸ Ā yoa cūiro masare yoadohoare witi cohtariro Estebā sehe Cohamacu to noano yoriro ji, Cohamacu tuaare cjuariro jiha. Ā jiro tiro Cohamacu tuua mehne yoa ño mujaha masa ti ñurocaroi. ⁹ Wiho mejeta judio masa buheri wuhu macaina tireore ñu tuhti, to yahuchu, tireore soro ni cohtaha. Tina soro ni cohtaina “Cahamaca ji, wijarina cjiri”, wama tiri curua macaina sehe jiha. Ā jia Cirene macaina, Alejandría macaina, Cilicia macaina, ā jichu Asia macaina cūhu jiha tina. ¹⁰ Tireore soro ni cohtapahta, Espiritu Santo to masia mehne Estebā to durucu mihnichu, tina to buheare ti dohse soro ni yuhtiboare wacū bocaeraha. ¹¹ Ti soro ni yuhtiboare wacū bocaeraa, tina painare mahño dutia, wapa tinare. Ti ā mahño dutichu ō sehe ni yahusāmaha tina:

—Ahriro Cohamacure, ā jichu Moise cijirore Cohamacu to cūri dutia cūhure to ñano durucuchu sā tuhohi —ni yahusāmaha tina mahñoina Estebäre.

¹² Ti ā nichu tuhoa masa, judio masa buheina, bucuna cūhu tiro mehne suaha. Ā jia tina Estebäre ñaha, ti puhtoa cahapu naaha tireore. ^{13–14} Ā yoaa tina painare mahño dutiha:

—Ahriro dachoripe Cohamacu wuhure, to dutia cūhure ñano durucuriro jira. Tuhohi sā tireore to ō sehe nichu: “Jesu Nazare macariro Cohamacu wuhure cohā, ā yoa Moise dutiri cjiri, marine to yahu cūri cjirire cohtotarohca”, nihre Estebā sā tuhochu —ni mahño yahusāmaha tina.

¹⁵ Ā jia jipihtina tói dujiina Estebäre noano ñuroca ō, to wuhduare ñuha tina. Anjo yoaro sehe bajuha to wuhdua.

Estebā Jesu yare yahuha

7 Ā yoa sacerdotea bui puhtoro ō sehe ni sinitu ñuha Estebäre:

—¿Ahrina ti nia potocā tjijari? —ni sinitu ñuha tiro Estebäre.

² To ā nichu tuhoro, Estebā sehe tinare ō sehe ni yuhtihā:

—Coyea, bucuna sā pucusuma tuhoga. Abrahā mari ñuchu cijiro panopu macariro Mesopotamiapu to jisnichu, Harāpu to jitho pano, Cohamacu tuariro si siteriro sehe tireore Abrahāre bajuaa tiha. ³ Ā bajuaro, Cohamacu ō sehe ni yahua tiha tireore: “Mu ya yahpare, ā jichu mu coyea poto cūhure duhunoca, wahaga. Pa yahpa, yu mūhure ñohti yahpapure wahaga”, nia tiha Cohamacu Abrahāre. ⁴ To ā nichu tuhoro Abrahā cūhu Caldea yahpai jiina wijaa, Harāpu su, jisinia tiha. Abrahā pucuro to yariari baharo, tiro cūhu tí macai wijaa, ahri yahpa, mipu musa jiri yahpapu Cohamacu yoadohoro mehne taa tiha. ⁵ Cohamacu Abrahāre opu suho na taparota, tireore dói “Ahri yahpa puro jiga”, ni cūerasinia tiha. Ne mahanocā ahri yahpare, “Pu tiga mūhu”, ni dutierasinia tiha tiro. Wiho mejeta Abrahā pohna marieriro to jipachuta, Cohamacu sehe tireore ō sehe ni yahu muhtaa tiha. “Mūhure ā jichu mu panamana, pa tjuru macainapu cūhure ahri yahpare waihtja”, nia tiha Cohamacu Abrahāre. ⁶ Ā ninota ō sehe ni yahu namoa tiha Cohamacu. “Mu panamana pa tjuru macaina pa yahpapu waha, tópu paina cahapu jia, ti cahamaca jahca tina. Tuhsu, cuatro cientos cūhmari waro tó macaina ñano yoapeahca mu panamanare. ⁷ Ā jicu tó macainare ti ā yoari buhiri buhiri dahreihija yuhu. Yu ā yoari baharo mu

panamana ji turiaina ahri yahpapu wihi, yuhure ño payohtina jiahca tina”, nia tiha Cohamacu Abrahãre. ⁸To ã ni yahu cãare ti noano wacũrucuhto sehe, õ sehe yoa turia wahcã dutiha tirore. Mũno pjacure mahanocã cahsarocãre yihso na dutia tiha tirore. Æ jiro ocho dachori to macũno Isaare to pohna tiri baharo, mahanocã cahsarocãre yihso naa tiha tiro Isaa pjacure. Baharo Isaa Jacobore pohna ti, to pjacu cũhure mahanocã cahsarocãre yihso naa tiha. Baharo Jacobo cũhu doce to pohmare ã dihta yoaa tiha ti pjacurire. Tina doce mua sehe tópe curuari, mari masa curuari dahpoto macaina cjihti jia tiha.

⁹Æ yoa baharo, tina Jacobo pohna, mari ñuchusuma cjiri, ti bahuro Josére pahsu tia, paina ti cahamacũno cjihtore duanocaa tiha Egiptopũ wahainare. Ti ã yoapachuta, Cohamacu Josére yoadohoa tiha. ¹⁰Jipihti tí to ñano yuhduare Cohamacu tirore noano yuhduachu yoaa tiha. Cohamacu tirore noano tuho masichũ yoaa tiha. Æ yoa faraõ Egipto macaina puhtoro sehere Josére ñũ ji coachũ yoaa tiha. Æ jiro faraõ sehe Josére puhto sãa tiha, tiro mehne masare dutihtiro cjihtore. Tirore faraõ ya wũhu cũhure puhtoro cãa tiha.

¹¹Æ yoa tí pjapure Egiptopũ, Canapũ cũhure paró ne coro taeraa, yahpa sehe wuaa sãa wahaa tiha. To ã wua sãa wahachu, masa ti toamari cũhu ñai pih-tia wahaa tiha. Æ jia mari ñuchusuma cjiri ñano yuhdua, ti chuboare ne bo-caeraa tiha. ¹²Wiho mejeta Egiptopũ “Trigo jiyuhca”, ti nichũ tuhoro, Jacobo sehe to pohmare, mari ñuchusuma cjirire tópu coã warocaa tiha. ¹³Baharo pari turi to warocarina cjiri Egiptopũ ti suchũ tjoa, José to wahmisumare “Musa bahuta jija yũhu”, ni yahu, tinare masichũ yoaa tiha. Tí pja puhtoro faraõ sehe José coyeeare coã ñũno nia tiha. ¹⁴Baharo José to wahmisumare,

ti pũcũro Jacobore, ã jichũ jipihtina ti coyeeare cũhure cahmarocaa tiha. To coyeeare setenta y cinco masa jia tiha. ¹⁵To macũno to pjirocachũ tuhoro Jacobo cjiro wahaa tiha Egiptopũ to macũno cahapũ. To macũno cahapũ jiro, tiro yariaa wahaa tiha. Æ yoa to pohna, mari ñuchusuma cjiri cũhu tópu yaria pih-tia wahaa tiha. ¹⁶Tina ti yariari baharo, ti coyeeare ti pjacuri cjirire Siquẽ wama tiropũ naa tiha. Tópu na sũ, tãa coparipũ Abrahã Hamor pohmare niñeru mehne to nuchuri yahpapũ tina ti pjacuri cjirire cãa tiha.

¹⁷Æ yoa Cohamacu Abrahãre “Canaa yahpare waitjtã mũhure”, to ni cũrũro cjiro mũ sũro cahachu, Abrahã panamana, Israe masa, Egiptoi jisinia payũ wahaa tiha. ¹⁸Ti ã payũ wahari baharo, paio faraõ, Egipto masa puhtoro José cjirore masierariro sãa tiha. ¹⁹Tiro mari coyeeare mahño, ñano yoa, ti pohmare mua pohmare wajã dua, cohãnoca dutia tiha tinacãre. Wahma bajuainacãre cohã dutia tiha “Tinacã yarijaro”, nino. ²⁰To ã yoaro watoi Moise cjihto sehe masa bajuaa tiha. Tirocã noariro, Cohamacu to noano ñũ jicoariro jia tiha. Tia sũ waro to pũcusuma tirocãre noano ñũ wihboa tiha. ²¹Æ jiro Moiserẽ nũo namo masieraa, diapũ tirocãre puñuroi comape mehne ti bihari puñuroi poho bũroha. Ti ã yoachu faraõ macono tirocãre ñũ boca, na maja, to macũnore yoaro sehetã cjuua tiha tirocãre. ²²Æ jia tina Egipto macaina, noano masiina ya jipihtiare Moiserẽ buhe bũcũoa tiha. Baharo, ne cuiro marieno durucuriro, puhtoa jia tia cũhure miñni yuhdurucũ sũrũro wahaa tiha Moise.

²³Æ yoa tiro cuarenta cũhmari cjuaro to coyeeare Israe masare ñũ duaro ti cahapũ ñũno wahaa tiha. ²⁴Tópu ñũno sũro, Egipto macariro cũiro Moise coyeeare to ñano yoachu ñua tiha. Tiro to ñano yoaborirore dũcata duaro, Egipto

macariro sehere wajā cohānocaa tiha. ²⁵ Ā wajā cohāno, Moise õ sehe ni tūhotua timaha. “Yū coyea ti coyeirore yū yoadohochū ñua ‘Cohamacū marine noano yūhdūchū yoa dutiro warocare ahrirorē’, ni tūhotuahca yū coyea”, ni tūhotua timaha Moise. Wiho mejeta tina sehe ne ā ni tūhotueraa tiha. ²⁶ Pa dachoi Moise to coyeare p̄aro ti basi cahmacheinare boca sua tiha. Ā boca s̄uro, tinare yahu duaro tinare õ sehe ni yahua timaha: “¿Musa basi jipanahta cahmachejari musa?” ni yahua timaha Moise tinare. ²⁷ To ā ni yahuchū tūhoro, cūiro to coyeirore ñano yoiriro sehe Moisere tjurocaa tiha. “Mūhū s̄a pūhtoro jierara. S̄are yahuboriro jierara mūhū. ²⁸ ¿Can̄re Egipto macarirore mū wajāriro seheta yūhū cūhure wajā duacu nijari mūhū?” nia tiha tiro Moisere. ²⁹ To ā nichū Moise tūho c̄uaa waha, m̄urocaa duhti wahc̄ā, Madiā yahp̄ap̄ waha waha tiha. Tóp̄ure pa sehe macariro jiparota, numino boca, p̄aro pohna tia tiha.

³⁰ Ā yoa Moise cuarenta cūhmari waro tói to jiri baharo, Sinaí wama tidū tūcū cahai masa marienop̄u to jichū anjo tirore bajuaa tiha. Anjo sehe mahadūc̄ā j̄uri picha pohnai bajuaa tiha. ³¹ Tū yuc̄uc̄c̄ap̄u to j̄arucuchū ñūno, Moise ñū c̄uaa waha tiha. Tí pichacare cahac̄ā noano to ñū wahc̄āchū waroi Cohamacū to durucuchū tūhoa tiha. ³² “Cohamacū jija yūhū. Mū ñuchusuma cjiri, Abrahā cjiro, Isaa cjiro, Jacobo cjiro ti ño payoriro jija”, nia tiha Cohamacū Moisere. To ā nichū tūhoro Moise sehe tetere, ne ñū wahcōeraa tiha. ³³ Cohamacū õ sehe ni durucu namoa tiha tirore. “Yūhū ñaa marieriro yū õi jiro wato, mū ducuri yahpa sehe wiho jiri yahpa jierara. Ā jicū mū dahpo suhtire tjuwe cūga. ³⁴ Ā yoa yū yaina masa Egiptop̄u ti ñano yūhdūchū ñūja. Ti tiichū tūhoja. Ā jicū õp̄ure wihija yūhū, tinare yūhdū witichū

yoai tai. Ti ā wahachū, ñucū wahaga mūhū cūhū. Egiptop̄u mūhure warocaihtja. Tinare na wioi wahaga”, nia tiha Cohamacū Moisere.

³⁵ Tó panop̄u tina sehe mari coyea, Israe masa Moisere cahmaeraa tiha. “Mūhū s̄a pūhtoro jierara. Mūhū s̄are yoadohoboriro jierara”, ni tuhtia tiha tina tirore. Wiho mejeta baharo, Cohamacū ti ā niriro cjirore Egiptop̄u warocaa tiha, mari coyea Israe masare yūhdū witichū yoah tiro, ā jichū ti pūhtoro jihtiro cjihtore. Ā yoa anjo, tirore jūd̄up̄u bajuariro sehe to ā yoah tire yahua tiha tirore. ³⁶ Moise jia tiha mari coyea, Israe masare Egiptop̄u jiinare na wioriro. Tinare na wioro, Egiptop̄u Cohamacū tuua mehne tiro sehe yoa ño d̄uca tiha tóp̄u jiinare. Pjiri ma sohāri map̄u āta yoa ñoa tiha tjoa. Baharop̄u masa marienop̄u cūhure cuarenta cūhmari waro Cohamacū tuua mehne yoa ño m̄ujaa tiha tiro to masare. ³⁷ Ā yoa Moise cjiro jia tiha mari coyea, Israe masare õ sehe ni yahuriro: “Cohamacū cūiro musa coyeiro, to yare yahu mūhtahtiro, yū yoaro sehe jirirore warocarohca musare”, nia tiha Moise tinare. ³⁸ Moise masa marienop̄u mari coyea Israe masa mehne jia tiha. Tuhsū, Sinaí wama tidū tūcūp̄u ti cahmachuchū tirore yahuriro anjo mehne jia tiha. Ā yoa mari ñuchusuma panop̄u macaina cjiri mehne jia tiha tiro. Cohamacū to dutiare cūriro jia tiha Moise.

³⁹⁻⁴⁰ Ā jia tí dutiare tūcūi Moisere to cūno wato mari ñuchusuma cjiri Egiptop̄u tjua duaa Moisere yūhdūca tiha. Tina tirore cahmaeraa tiha. Ā cahmaeraa tina Moise cjiro wahminore Aarō wama tiriro cjirore õ sehe nia tiha: “Paina cohamanare yoaga mari yaina cjihti. Tina mari wahahti mahare marine sūho naahca. ¿Wiho mejeta marine Egiptop̄u jiinare na tariro Moise dohse wahari tiro? Masieraja s̄a”, nia tiha tina.

⁴¹ Ā jia tí dachorire tina wachu masure uru mehne yoaa tiha. Ā yoa tuhsu, tina wahiquinare wajā, ti yoariro cjiro cahai na ta, ño payoa tiha tirore. Ā jia tina ti yoariro cjirore wachure ñu, wahche, bose numu yoaa tiha. ⁴² Wachure ti ño payochu ñuno, Cohamacu tinare cohā wahcāa waha timaha. “Yuhure cohā, muanopu bajuaa, sū dacho macariro, sū ñami macariro, ā yoa ñahpichoha poca cūhure ño payowahnojaro”, nino cohā wahcāa waha timaha. Cohamacu yare yahu muhtaina cjiri ā ni joaa tiha:

“Musa Israe masa, yuhure nu ñano yoare.

Masa marienopu cuarenta cūhari waro jina wahiquinare musa wajāinare musa wajā, jū wa muopanahta, yuhure musa ño payoboriro seheta yoamare musa.

Wiho mejeta yuhu sehene musa ño payoerare.

⁴³ Ā jina musa Molo wama tiri masure ño payoina jiina, tí masure ño payori wuhure cjuare musa.

Ā yoa paio cohamacu ñahpichohaca Refā wama tiria to masure musa yoariare musa cjuare tjoa.

Tí masurine musa yoarire musa ño payore.

Musa ā yoari buhiri musare Babilonia sie sehempu cohārocaihija yuhu”,

ni yahu joaa tiha Cohamacu yare yahu muhtaina cjiri.

⁴⁴ Ā jia masa marienopu Cohamacu masa mehne to jiri wuhure wahiquina cahsari mehne ti yoari wuhure cjuaa tiha mari ñuchusuma cjiri panopu macaina. Tí wuhu Cohamacu masa mehne to durucuri wuhu jia tiha. Tí wuhupu Cohamacu dutia to joaa pjini tãa pjini jia tiha. Tí wuhure Cohamacu Moiserere to ñoriro seheta, “Ō sehe yoaga”, to ni yoa dutiro seheta yoaa, tí wuhure cjuaa tiha tina. ⁴⁵ Ā yoa ti panamanapu cūhu cjuu turia nunu tia tiha

tí wuhure, wahiquina cahsari mehne ti yoari wuhure. Baharo mari ñuchusuma cjiri Josué mehne Cohamacu mari coyea Israe masare to cūhti yahpapore, ahri yahpapore pu tia taha. Ti pu tia tachu ahri yahpai ji muhtaina cjirire Cohamacu cohānocaa tiha. Tí pjare Cohamacure ti ño payori wuhure na taa, cjuaa tiha tina ahri yahpapu, mipure mari jiri yahpapu. Pu Davi cjiro to jiri tjurupu cjuu batoo tiha tí wuhure. ⁴⁶ Tiro Davi cjiro sehe Cohamacure wahchechu yoariro jia tiha. Cohamacu ya wuhu cjihtore pa wuhu tiro yoa duaro, sinia timaha Cohamacure. ⁴⁷ To ā sinipachuta Salomopu Cohamacu ya wuhu sehene yoaa tiha. ⁴⁸ To ā yoapachuta Cohamacu Jipihitina Bui Jiriro sehe masa ti yoari wuhupure jierara. Ō sehe nia tiha Cohamacu yare yahu muhtariro cjiro:

⁴⁹ “Muano yu dujiro jira.

Tói dujicu dutija yuhu.

Ā jiro yahpa sehe yu dahporire duhu payoro yoaro sehe jira.

Yuhu tua yuhduariro jija.

Yu ya wuhu cjihtore yoa masierara musa.

Cohamacu yu jichu yu jikti wuhure musa yoa masierara.

⁵⁰ Yu basi ahri yahpare jipihitiro yoahi yuhu”, ni durucua tiha Cohamacu”, ni joaa tiha Cohamacu yare yahu muhtariro cjiro.

⁵¹ Musa Cohamacu yare tuhopanahta, tirore yuhti duaerara. Cohamacure masieraina yoaro sehe tuhutuina baro jira musa. Espiritu Santore yuhduraca yuhduara musa. Musa ñuchusuma cjiri ti yoariro cjiro seheta yoara musa cūhu. ⁵² Musa ñuchusuma cjiri jipihitina Cohamacu yare yahu muhtaina cjirire ñano yoaa tiha. Tina Cohamacu yare yahu muhtaina cjiri “Baharo cūiro ñaa buhiri Marieriro tarohca”, ti ni yahu quihō muhtachu tuhoa, musa ñuchusuma cjiri sehe tinare wajāa tiha.

Ā yoa mipu cūhure tiro “Naa buhiri Marieriro”, tó panopu ti niyuriro sehe opu to wihichu, “Mūhu mehne macaina jija”, ni ji mahño, tirore wajāhre. ⁵³Cohamacu dutiare anjoa sehe yahu turia timaha musare. Ti ā yahu turiachu musa tí dutiare cjuamaha. Wiho mejeta tí dutiare yuhdurucara musa —niha Estebā.

Tina Estebāre taa poca mehne doca wajāha

⁵⁴To ā nichu tuhoa tina sehe tuaro suaha. Ā tuaro suaa, cuaina wahaha. ⁵⁵Ti ā suapachuta Estebā sehe Espiritu Santo mehne wacū tuariro to tuaa mehne muanopu nuroca muo, Cohamacu si siteare nūha. Ā yoaro Cohamacu potu buhusehei Jesu to ducuchū cūhure nūha tiro. ⁵⁶Ā nuroca muono, ō sehe niha:

—Nū muoga musa. Muanopu mahanoā to tjuwe muachu, Jesu Cohamacu to warocariro Cohamacu potu buhusehei to ducuchū nūja yuhu —niha Estebā tinare.

⁵⁷To ā nichu tuhoata tina tuaro sañurucu, ti cahmo coparire bihanoca, cūno potori tiro cahapu muroca wahcā, tirore nahaha. ⁵⁸Naha tuhsu, tirore na wahcā, tí maca duhtu cahapu cohāha tirore. Ā jia taa poca mehne doca wajāha tirore. Ti ā wajāhto pano tirore yahusārina tirore taa poca mehne docahtina ti bui sāa suhtire tjuwe na, wahmunore Saulo wama tirirore ti suhtire cjuabasa dutiha. ⁵⁹Estebāre ti taa docaro watoi, sinino sehe ō sehe niha tiro:

—Jesu, yu puhtoro yu catiare naga —niha tiro.

⁶⁰Ni tuhsu, tiro na tuhcuca caha su, ō sehe ni tuaro sañurucuha:

—Puhtoro Jesu, ahrina mipu yuhure ti wajāri buhiri tinare buhiri dahrei tjia —ni sañurucuha Estebā.

Ā ni sañurucu batoarota, yariaa wahaha tiro.

Saulo Jesu yainare nāno yoaha

8 Estebā to ā yariachu nūno, “Noana”, niha Saulo sehe.

Tí dachoreta Jesu yainare Jerusalē macainare nāno yoa dūcaha Saulo mehne macaina sehe. Ti ā yoa dūcachu Jesu yaina Judea yahpau, Samaria yahpau yoaropu duhti site wahcā wahaha. Ti puhtoa, Jesu to cūrina dihta wahaeraha. ²Ā yoa paina Cohamacure ño payoina Estebā pjacu cjirore tāca copapu, duhu sāa, tiro cjirore tuaro tii payoha tiro cjirore tina. ³Wiho mejeta Saulo sehe Jesu yainare nābiario yoaa timaha. Tiro ti wuhusepu sāa, muare, numiare naha wahcā, peresupu biha dapoa tiha.

Samariai Jesu yare buheha Felipe

⁴Ā yoa yoaropu waha siteina cjiri nohoi ti waharoi Jesu yare buhea tiha.

⁵Cūiro tina mehne macariro Felipe cū maca, Samaria wama tiri yahpai jiri macapu su, Cristo masare yuhdoriro ya quitire buheha tí maca macainare. ⁶To ā buhechu, tó macaina sehe tirore tuho cahmachu, Cohamacu to tuaa mehne to yoa ñochu nūha tina. Ā jia tina jipihina cūno potori to yahuare noano tuho nunua tiha. ⁷Payu masa watia sāanohrina tiro cahai ti wihichu nūno, watia sehere tiro wijaa dutia tiha masapu jirinare. To wijaa dutichu, tina watia sehe tuaro sañurucu, wijaa wahaha. Tuhsu payu pjacu buhainare, pari yuri tiniina cūhure pjacu noaina wahachu yoaa tiha.

⁸To ā yoa ñochu nūha tí maca macaina payu masa wahchea tiha.

⁹Tí pjare Simo wama tiriro tí maca macariro yairo jiha. Ā jiro yaya ti yoarire yoa ñoa tiha Samaria macainare. To ā

yoa ñochu ñua, tó macaina ñu cúa waha, tiore cua pisaro ñuina jiha.

—Yuhu masi pahñoriro jija —nimaha Simo sehe tinare.

¹⁰To ã yoachu ñua masa sehe õ sehe nia timaha:

—Ahriro Cohamacu ya tuaare cñariro jira. Cohamacu yoaro sehe tuariro jira —nia timaha tiore masa, puhtoa mehne. Tina jipiltina noano tuho nũña tiore.

¹¹Tiro yaya ti yoaa mehne yoari pja yoa ñoa tiha tinare. To ã yoa ñochu ñua tina cúa wahaha. ã cúa waha, tina tiore ño payoa tiha. ¹²Wiho mejeta ti ã ño payopachuta Felipe sehe puhtoro Cohamacu to suho jiare, Jesucristo yare noaa buheare yahuha. To ã yahuchu tina tiore noano tuhoaha. Ti ã noano tuhochu ñũno mũare, numia cũhure bautisaha Felipe. ¹³ã jiro Simo cũhu Felipere noano tuhoa tiha. ã jiro tiro cũhure bautisaha. To ã yoari baharo Felipe mehne tjuaa tiha tiro. Felipe sehe Cohamacu tuaa mehne to yoa ñochu ñũno Simo ñu cúa waha tiha.

¹⁴ã yoa Samaria yahpa macaina Cohamacu yare ti tuaro cahmachu tuhoa Jerusalẽpu jiina tuhorocaa tiha tinare. ã ti cahmachu tuhoa Pedore, João cũhure warocaa tiha Samaria yahpapu. ¹⁵Tõpu sua Pedro cũhu Cohamacure siniha: “Ahriro Samaria yahpa macaina mũhure ño payoinare mũ Espiritu Santo sãajaro”, ni sini payoha tina Cohamacure. ¹⁶Tina Samaria yahpa macaina Jesucristo yaina jia to bautisarina jiha. Tí dihtare masiha tina. ã jiro Espiritu Santo tinare sãaerasiniha. ¹⁷ã jia Pedro, João mehne Samaria yahpa macainare ti wamomacarine ti dapupoca bui ti duhu payori baharo Espiritu Santo tinare sãari jire.

¹⁸ã yoa Pedro cũhu ti wamomacari mehne ti duhu payochu ñuaha Simo. Espiritu Santo tinare to sãachu cũhure ñuaha tiro. ã ñuriro jiro, tí tuaare cah-

mano niñeru mehne wapa duamaha. ¹⁹õ sehe nimaha Simo:

—Yuhu cũhure waga ahri tuaare. Yuhu cũhu yu wamomacari mehne masa dapupoca bui duhu payoi tai nija Espiritu Santo tinare to sãahto sehe. ã jicu ahri yu yoahiti wapare wapa duaaja —nimaha Simo tinare.

²⁰To ã nichu tuhoru Pedro õ sehe niha:

—Mũhu niñeru mehne Cohamacu ya tuaare mũ nuchu duari buhiri mũ niñeru mehneta pichacapu wahaga mũhu. Cohamacu mũ tuhutare masina. Mũhu ñariro jisinina. ²¹ã jicu ahrire sã yoaa yoa masierara mũhu. Ahri mũ yoaa baro jierara. ^{22–23}Paina ti cñaare ñucu suariro jira mũhu. ã jicu ñaa yoaa ne duhu masierara mũhu. ã jicu ahrire mũ ñaa yoirere cahyaga mũhu. Cohamacure mũ ñaa tuhutare to bohto sehe siniga mũhu. Mũ ã yoachu ñũno tiro mũ ñaa buhirire boboca, pa tehe nino —ni yahuha Pedro tiore.

²⁴To ã nichu tuhoru Simo õ sehe ni yuhtihati tiore:

—Yuhure sini payoga musa Cohamacure mũ niriro sehe yu wahaerahto sehe. Tí buhiri pichacapu waha duaeraja yuhu —niha Simo tiore.

²⁵Baharo Pedro João mehne Cohamacu yare yahuha: “Jesu to masa mũjachu ñuhi sã”, ni payu Samaria yahpai jia macari macainare noaa buheare buheha. Tinare Cohamacu yare buhe tuhsu, Jerusalẽpu tjuaa wahaha.

Felipe Etiopía yahpa macaritore buheha

²⁶ã yoa Cohamacu yairo anjo Felipere õ sehe ni yahuha:

—Mipure sur sehẽpu wahaga. Jerusalẽ cahai jiri mahapu Gazapu wahari mahapu, masa marienõpu jiri mahapu wahaga —ni yahuha anjo Felipere.

²⁷To ã nichu tuhoru tiro sehe tí mahapu wahaa tiha. Baharo tí mahapu

cãiro masunore piti bocaro taro niha. To piti bocahtiro jiha Etiopía yahpa macariro puhtoro. Tiro numiare cahmaerariro eunuco masuno jiha. ã jiro Candace wama tiricoro Etiopía macaricoro puhtorocoro yare niñerure jipih-tiare ñu wihboriro jiha. Wiho jiriro jieraha. Tiro Jerusalēpũ Cohamacũre ño payoro waha tuhsuha. ²⁸To ya macapũ tunuria mehne tjua taro tiapũ waha-parota buhero niha. Cohamacũ yare yahu muhtariro Isaia cjiro to joari pũre buhero niha. ²⁹ã jiro Espĩritu sehe Felipere õ sehe ni yahua tiha:

—Siro tunuriapũ wahariro cahapũ wahaga —niha Espĩritu tireore.

³⁰To ã nichũ tuhororo Felipe sehe tunuria cahapũ mũroca wahcã, Isaia cjiro to joarire Etiopía macariro to buhechũ tuhoha. ã tuhororo Felipe õ sehe ni sinituha tireore:

—¿Mũ buheare tuho ñahajari mũhũ? —niha tiro.

³¹To ã nichũ tuhororo Etiopía macariro õ sehe ni yuhtihã:

—Pairo yuhũre yahu yuhdoriro mariachũ noano masieraja yuhũ. Oĩ yuhũre yahu dujii taga yũ pari wahpa —ni yuhtihã tiro Felipere.

—Jai —ni nuju suha to cahai.

³²ã yoa Cohamacũ yare Etiopía macariro to buheri pũ õ sehe niha:

“Ovejare ti ñaha wajãriro seheta tiro cũhũre ñaha wajãahca masa.

ã jiro ovejacã to pjoare ti sachũ to saũrucueraro seheta tiro masuno cũhũ dihta marieriro jirohca.

³³Tirote tina bujũpeahca.

ã jia tiro to ñano yoaerapachũta tina sehe ñano yoaahca tireore.

Tiro ahri yahpapũ to jichũ tina tireore wajãahca.

ã jiro tiro pohna marieriro yariaa waharohca”,

ni joaha tí pũpũre.

³⁴Tí pũ to ã ni yahuchũ ñũno, Etiopía macariro õ sehe ni sinituha:

—Yahuga yuhũre. ¿Õ sehe Isaia cjiro to niriro diro baro jicari ahriro? ¿Isaia cjiro to basi yahuro nicari? ¿O pairore yahuro nicari? —ni sinituha Etiopía macariro.

³⁵To ã ni sinitu ñuchũ tuhororo Felipe sehe tí pũre ñu, Jesu yare yahua Etiopía macarirore. ³⁶ã yoa tina tia mehne waha, mácapũ suha.

—Ñuga, oĩ máca jira. Ahri mácapũ yuhũre bautisaga —niha Etiopía macariro.

³⁷[—Jesure mũ noano wacũ tuachũ ñucũ muhũre bautisaihtja —niha Felipe tireore.

—Jesure wacũ tuaja yuhũ. Tiro Cristo Cohamacũ macũno jira. Tíre noano masija yuhũ —niha Etiopía macariro.]

³⁸ã ninota tiro tunuria uturirore yusuo dutiha. Tia to yusũ caha sũri baharo wijaaha tina. Wijaa, tí mácapũ su, ñumurucũ suha tina. Tói ñumurucũ su, Felipe sehe tireore bautisaha. ³⁹Bautisa tuhsũ ti maja sũrucũ suchũ Cohamacũ to Espĩritu Felipere naa wahaha. To ã wahari baharo Etiopía macariro noano wahcheriro to ya yahpapũ tjuaa wahaha. To ã yoari bato tichũ ne pari turi Felipere ñueraha. ⁴⁰ã yoa tuhsũ Azotopũ suha Felipe sehe. Tuhsũ, payũ macarine noaa buheare buheha masare. Pũ Cesareapũ buhe batoa tiha.

Saulo Jesucristore ñũno tireore wacũ tua dũcaha

(Hch 22.6-16; 26.12-18)

9 Wiho mejeta tí pjare Saulo Jesu yainare ã ñũ tuhtirucusinino, “Tinare wajãihtja” nino, tiro sacerdotea puhtoro cahapũ wahaha. ²Tópũ sũro tiro joaa pũrine õ sehe ni siniha sacerdotea puhtorore:

—Joaa pũrine waga yuhũre yũ tuahiti pũri cjihtire. Tí pũripũ mũ wama

mũ joa payochũ, yũhũ sehe tí pũri mehne, mũ dutiro mehne Damascopũ wahaihtja. Tópũ sũ, judio masa mari buhea wũhusepũ Jesu yaina mũa, numia cũhũre boca sũcũ, tinare ñaha dũhte, òpũ Jerusalẽpũ na majare tjuaa taihtja —ni siniha Saulo sacerdotea puhtoare.

³Ti pũrine na tuhsũ, tiro waha, Damasco cahai to sũro cahachũ waro mũanopũ wacũenoca si siteroca boroha tirore. ⁴Wacũenoca to ã si siteroca borochũta tiro yahpapũ bora caha sũro, ò sehe ni durucuchũ tũhoha:

—Saulo, Saulo, ¿dohseacũ mũhũ yũhũre ñano yoajari? Mũhũ yũhũ mehne suacũ yũhũre yũhtieracũ, mũ basita ñano yũhdũra —nino coa taha.

⁵—Puhtoro, ¿diro baro jijari mũhũ? —ni sinitu ñũha Saulo sehe.

—Yũhũta jija Jesu, mũ ñano yoarucuriro —niha Jesu Saulore. ⁶[To ã nichũ ò sehe ni sinituha Saulo:

—Puhtoro, ¿dohse yũ yoachũ cahmajari mũhũ? —niha Saulo.]

—Wahcãrucaga mũhũ. Macapũ wahaga. Tí macapũ mũ sũchũ tó macariro mũ yoahũtiro yahurohca mũhũre —niha Jesu Saulore.

⁷To ã nichũ Saulo mehne macaina sehe to durucua dihtare tũhoha. Wiho mejeta Jesu sehere ñũeraha. To ã wahachũ ñũa, cuia, tina durucu masieraha. ⁸Ã jiro Saulo yahpapũ coãriro wahcãrucã, to ñũchũ to capari bajueraha. ã jia tina to wamomacare ñaha, Damascopũ tuã wahcãa wahaha tirore. ⁹Tópũ sũro, tiro tia dacho waro ne ñũera, chũera, ne sihniera tiha.

¹⁰Ã yoa cũiro Jesu to buheriro Anania wama tiri Damascoi jiha. ã jiro Jesu bajua tiha Ananiare. ã bajuaro ò sehe ni pisuha tirore:

—Anania, ¿jimajari mũhũ? —niha Jesu.

—Jimajã —ni yũhtiha Anania tirore.

¹¹To ã nichũ Jesu sehe ò sehe ni yahuha tirore:

—Potori Maha wama tiri mahapũ wahaga. ã wahacũ Juda ya wũhũpũ cũiro Tarso macariro Saulo wama tiriore macaga. Tiro Cohamacũre sinino nica.

¹²Tiro cahãnopũre tirore mũ yoahũtiro ño tuhsũhi yũhũ. Ò sehe jiare ñũhũre tiro: Mũhũ mũ wamomacarine tiro bui duhu payo, to capari noaa wahachũ ñũhũre tiro to cahãnopũre —niha Jesu Ananiare.

¹³To ã nichũ tũhoro Anania sehe ò sehe ni yũhtiha:

—Puhtoro, tiro mũ yainare, noainare Jerusalẽ macainare nu ñano yoa mũ jayuhti. Payũ masa yũhũre ã ni yahure.

¹⁴Ã yoa ò cũhũre tiro jipihtina mũhũre cahmainare peresu yoaro taro niyuhti. Sacerdotea puhtoa tirore ã yoa dutiyuhti —ni yũhtiha Anania Jesure.

¹⁵To ã nichũ Jesu sehe ò sehe ni yahuha tirore:

—Tiro Saulo sehe yũ beseriro jira. Tiro yũ ya buheare judio masa jierainare, ti puhtoare, ã jichũ Israe masa cũhũre buherohca. ã jicũ wahaga mũhũ. ¹⁶Payũ tahari yũ yare yoaro tiro ñano yũhdũrohca. Tíre tirore masichũ yoaihtja —niha Jesu Ananiare.

¹⁷To ã niri baharo Anania sehe waha, sũ, Saulo to jiri wũhũpũ sãaha. Sãa sũ, to wamomacarine Saulo bui duhu payo, ò sehe ni yahuha tirore:

—Coyeiro Saulo, mũ capari mũ ñũhto sehe, Espĩritu Santo mũhũ mehne to jightho sehe, to dutiriro seheta mũ yoahũto sehe, mari puhtoro Jesu sehe mahapũ mũhũre bajuariro yũhũre warocahre —ni yahuha Anania Saulore.

¹⁸To ã nichũta to caparire wahi nũtũri yoaro sehe bajua to caparipũ wahãa pahna borachũ ñũha Saulo. To ã ñũ tuhsũri baharo to wahcãrucũ sũchũ paio sehe tirore bautisaha. ¹⁹Tirore to bautisa tuhsũchũ, tiro sehe chũ, tuariro wahaha.

Saulo Damascoi Jesu yare buhe ducaha

Ā yoa Saulo mahaa dachoricā Damasco macaina Jesu yaina mehne jiha.

²⁰Dóí tí dachorita tiro judio masa buhea wuhusepū sū, Jesu Cohamacu macno to jiare yahu ducaha masare. ²¹To ā yahuchū ñua jipihtina tireore tuhoina cuaa wahaha.

—Cho, ahriro Jerusalēpūre Cohamacu yainare Jesure cahmainare ñano yoariro cjiro jira. Ā yoa tirota jimana ō macaina Jesure cahmaina cūhure ñaha, duhte, sacerdotea puhtoare wiaboriro. Ā yoa duaro ōpūre tari jimahre tiro —niha masa tireore tuhoina.

²²Wiho mejeta Saulo sehe cui tuhuro marieno buhe mihni wahcāa tiha. “Ahriro Jesu potocāta Cristo, marine yūhdohtiro jira”, to ni yahu mihnichū, tó macaina judio masa ti ni yūhti yūhdurūcaborirore bocaeraha.

²³Ā jia payū dachori baharo judio masa tireore wajā duaa, ti basi durucua tiha. ²⁴Wiho mejeta Saulo tireore ti wajā duachū masiha to basi. Tina tí macare sahrīno taa mehne ti yoari sahrīno macaa sopacarire dachopūre ñamipū cūhure cohtaa tiha tireore wajā duaa. ²⁵Ti ā wajā duachū ñua ñamipū Saulo buheina tireore pūhūro pjiri pūhi na sāa, tí maca macari sahrīno baharo buhusehei duhu boroha tireore. Tó sehe ti yoachū yūhdūha tiro.

Saulo Jerusalēi jiha

²⁶Ā yoa Saulo Jerusalēpū sūro, tópu Jesu yaina mehne tiro ji duamaha. Wiho mejeta tina tireore “Jesu buheriro jierara ahriro” nia, tireore cui niha. ²⁷Ti ā cuipachūta Bernabé sehe tireore na wahcāha Jesu to cūrina cahapū. Ā jiro Saulo mahai Jesure to ñūrire, Jesu Saulore to durucurire, ā jichū Damasco pu cuiro marieno Jesu yare to buhe

ducarire yahuha Bernabé sehe. ²⁸To ā ni yahuri baharo Saulo sehe tina mehne sāano, Jerusalēpū tina mehne jia tiha. ²⁹Tiro cuiro marieno judio masare Jesu yare yahu yūhdurūcaro niha. Tina judio masa griego masa yare durucuina jiha. Ā yoa Saulo to ā yahu yūhdurūcachū, tina tireore wajā duamaha. ³⁰Ti ā wajā duachū ñua, Saulo mehne macaina Jesu yaina sehe tireore Cesareapū na duhti wahcāa wahaha. Tópu tireore sūho jirucuma Tarsopū warocaha tireore.

³¹Ā yoa jipihtiropū, Judea yahpapū, Galilea yahpapū, Samaria yahpapū cūhure Cohamacu yaina noano jia tiha. Tí pjare ne masa ñano yoaera tiha tinare. Ā jia noano buheha tina. Tina Cohamacu yare buhe, tireore masi namo, noano yūhtia tiha. Ā yoa Cohamacure cua pisaro ñua tiha. Espiritu Santo tinare to yoadohochū tina sehe payū wahaa tiha.

Pedro Eneare noariro wahachū yoaha

³²Ā yoa Pedro jipihtia macaripū waharo, Jesu yaina Lida macaina cahapū cūhure sūha tiro. ³³Tópu sūro Enea wama tiriore boca sūha. Enea pjacu buhariro jiro, ocho cahmari waro ti pūpaha cūriro coāa tiha. ³⁴Ā jiro Pedro sehe tireore ō sehe niha:

—Enea, Jesucristo mūhure noariro wahachū yoara. Wahcārūcaga. Mū pūpaha coāri cahsarore cahnoga —niha Pedro tireore.

To ā nichūta tiro wahcārūcaha. ³⁵Ā jia jipihtina Lida macaina, Sarón macaina tireore ñua, tina ti ñaa yoaare duhu, Jesure wacū tuua tiha.

Dorca wama tiricorore masoha Pedro Jesu to tuua mehne

³⁶Ā yoa Jope wama tiri macai Jesure ño payoricoro Tabita wama tiricoro jiha. To wama Tabita griego ya dusero mehne Dorca jira. Ticoro noaare yoaro payū

waa tiha pjacuoinare. ³⁷ Ā jiro tí pjare ticoro dohati wahcō, yariaa waha tiha. To yariachu ñua, tina ticorore noano cosa, muano macari tahtiapu cūa tiha ticorore. ³⁸ Lida wama tiri maca Jope cahai jire. To ā jichu Jesu buheina Jope macaina Pedro Lidapu to jichu tuhoro-caa tiha. Ā tuhoro-caa, puaro warocaha Pedro cahapu. Tiro cahapu sua Pedrore ō sehe ni yahuha tina:

—Soaro mehne sā jiropu wahaga —ni yahuha tina.

³⁹ Ti ā nichu tuhoro tina mehne waha wahaha tiro. Tópu tirore ti na suri baharo muano macari tahtiapu na mu-jaa wahaha tirore. Ā jia jipihina wape-wahya tiro cahai suruca, tiia tiha. Tabita tina mehne jisininopu payu suhtire yoaa tiha. Ā jia tina to yoari suhti cjirire ñoha Pedrore. ⁴⁰ Wiho mejeta Pedro tinare tí tahtiapu jiiinare wijaa dutiha. Ti wijaa baharo tiro na tuhcuca caha su, Cohamacure ticorore sini payoha. Ā jiro to pjacu cjirire majare ñu:

—Tabita wahcāga —niha tiro.

To ā nichuta ticoro sehe ñu wahcō, Pedrore ñu, wahcā nuju suha. ⁴¹ To wahcā nuju suchu ñu, tiro to wamomacare ñaha, tuā wahcō dapoha ticorore. Ā jiro tiro tó macainare Jesu yainare, wape-wahyare pjiroca, ticorore catiricorore waha tinare. ⁴² To ā yoari baharo jipihina Jope macaina tíre masia, payu masa Jesure wacū tua dūca tiha. ⁴³ Baharo Jopepu Simo wahiquina cahsarire cahnoriro mehne payu dachori Pedro tiro mehne jia tiha.

Pedro Corneliore Jesu yare yahu dūcaha

10 Ti pjare Cesareapu cūiro Cornelio wama tiriro jia. Tiro cien surara puhtoro jia. Tina surara sehe ti ya curua Italiano wama tiha. ² Cornelio to ya wuhu macaina mehne judio masa jieraina jipahta, Cohamacure ño

payoina, cua pisaro ñuina jia. Tiro judio masa pjacuoinare yoadohoro payu waha. Ā yoa dachoripe tiro Cohamacure siniha. ³ Cū ñumu ñamichapupu tres jichu Cohamacu yairo anjo tirore bajuaha. Ā bajuaro Cornelio cahapu sāaha.

—Cornelio —niha anjo tirore.

⁴ To ā nichu tuhoro Cornelio tirore ñu, cuiro ō sehe niha:

—Puhtoro, ¿yabare cahmajari muhu? —niha tiro.

—Masa pjacuoinare mu warire, Cohamacure mu sinirire Cohamacu noano ñuno nina. ⁵ Ā jicu Jopepu mu muare warocaga. Tópu Simo Pedro wama tiriro jira. Tirore na ta dutiga mu muare. ⁶ Tiro paio Simo wahiquina cahsari cahnoriro cahai, pjiri ma duhtu cahai jiri wuhu jira —niha anjo Corneliore.

⁷ Anjo ā ni tuhsu, wijaa wahaha. To wijaa baharo Cornelio puaro tirore dahra cohtainare, ā yoa cūiro to surara mehne macarirore pjirocaha. Surara sehe Cohamacure ño payoriro jiro, dachoripe Corneliore yoadohoa tiha. ⁸ Ā jiro Cornelio tinare anjo to yahuri cjirire yahu pahño, Jopepu warocaha tinare.

⁹ Ā yoa pa dachoi Jopepu ti waharo watoi cohari pja jichu Pedro sehe wuhu buipu Cohamacure sinino wahaha. ¹⁰ To muja suri baharocā tirore jūca purichu chu duaha. Wiho mejeta paina to chuare ti dahrero watoi, tiro sehe ō sehe bajuachu ñuha. ¹¹ Muanoore parī muachu, pjiri cahsaro pititia sohtoarire duhteri cahsaro to duji tachu ñuha. ¹² Tí cahsaro puhichapure payu wahiquina bua tiniina, chihchōina, wuina peri cūhu jia. ¹³ Tíre to ñuri baharo, Pedro durucuro coa tachu tuhoha:

—Pedro, wahcārucaga. Ahrinare wājā chuga —nino coa taha tirore.

¹⁴ To ā nipachuta Pedro ō sehe niha:

—Puhtoro, ne tina barore chueraja yuhu. Ñainare, Cohamacu to chu du-

tierainare ne chæra tihî yũhũ —niha Pedro.

¹⁵To ā niri baharo Pedro pari turi durucuro coa tachũ tuhoha:

—Cohamacũ “Noaina jira”, to nirinare “Ñaina jira”, nii tjia mũhũ tinare —nino coa taha Pedore.

¹⁶Ā yoa tia taha ti ā ni durucuri baharo tí cahsaro mũanopũ mũjaa wahaha tjoa. ¹⁷To ā mũjaa wahari baharo, Pedro tuaro wacũ “¿Dohse ni duaro nijari ā bajuaro?” ni tuhoutuha tiro to basi. To ā ni tuhoutu watoi Cornelio mua to warocaina sehe Simo ya wũhũpũ suha. “¿Simo ya wũhũ nohopũ jijari?” ni, ti sinituri baharo to ya wũhũpũ suha tina.

¹⁸Sũ, tina sinitu ñũ bahrañoha. “¿Simo Pedro wama tiriro ahri wũhũi jijari?” ni sinitu ñũha tina. ¹⁹Ā jiro Pedro to tuhoutu watoi Espĩritu Santo tireore õ sehe ni yahuha:

—Ñũga. Tiaro mua mũhũre macaa nina. ²⁰Wahcārucaga. Dujiaga. Tina mehne wahaga. Jiape ni tuhoutuẽcũta wahaga noano mehne. Yũhũ sehe tinare õpũre warocahi —niha Espĩritu Santo Pedore.

²¹To ā nichũ tuhoro Pedro ti cahapũ dujia wahaha.

—Ñũga. Ōi jija yũhũ mũsa maca tariro. ¿Dohse yoana tana niri mũsa yũ cahai? —niha Pedro tinare.

²²To ā nichũta tina sehe õ sehe niha:

—Cornelio cien surara pũhoro, noare yoiriro, Cohamacũre cua pisaro ñũriro, jipihtina judio masa “Noariro”, ti niriro mũhũre pji ta dutiro warocahre sãre. Cohamacũ yairo anjo Corneliore mũhũre pji dutiyuhti. Ō sehe niyuhti: “Pedore mũ wũhũpũ na ta dutiga mũ mũare. Ā yoa tiro mũhũre to yahuchũ, noano tuhoga tireore”, ni pji dutiyuhti anjo Corneliore —ni yahuha Cornelio Pedore to pji dutirina sehe.

²³Ti ā nichũ Pedro sehe tinare sã ta duti, chũa wa, to jiri wũhũpũ carĩ

dutiha tinare. Pa dachoi Pedro wahcã, tina mehne wahaa wahaha. Ā yoa paina Cristo yaina Jope macaina Pedore piti ti wahcãha.

²⁴Pa dachoi tina Cesareapũ suha. Ti suhto panocã Cornelio sehe to coyeare, tiro mehne macaina cũhũre pji cahmachu, Pedore cohtaa niha. ²⁵Ā jiro Pedro Cornelio ya wũhũ cahapũ to tachũ ñũno Cornelio sehe tireore piti boca wijaa, to dahpori cahai caha suha. ²⁶Wiho mejeta Pedro tireore na wahcõ õ sehe niha:

—Ducuga mũhũ. Yũhũ cũhũ mũ yoaro seheta jiriro jija —niha Pedro tireore.

²⁷To ā ni tuhsuri baharo Cornelio tireore na sãa wahaha to ya wũhũpũ. Tópũ sãa sũro masa peri tí wũhũpũ cahmachu tireore cohtainare ñũha Pedro. ²⁸Tinare ñũno õ sehe ni yahuha tinare:

—Judio masũno jipaihta pa curua macaina mũsa mehne jicũ, mũsa wũhũsepũ sãacũ, judio masa sã dutiare yũhdũrucai nija yũhũ. Tĩre noano masina mũsa. Wiho mejeta pa curua macainare “Ñaina jira”, yũhũre ni dutierare Cohamacũ. Tĩre ni yahuhre yũhũre tiro. ²⁹To ā nichũ tuhocu õpũre mũsa cahapũre tahi. Mũsa yũhũre pjirocachũ “Ne wahaeraja”, nierahi. ¿Dohse jiro baro yũ õpũ tachũ cahmari mũsa? —niha Pedro tinare.

³⁰To ā nichũ tuhoro Cornelio sehe õ sehe niha:

—Pititia dachori wahara, Cohamacũ yairo anjo yũhũre to bajuari baharo. Tĩ dachore tres jichũ, ahri hora waroihta Cohamacũre yũ sinino watoi anjo minoa suhti tiriro yũ cahai ducuhre. ³¹Ā ducuro tiro yũhũre õ sehe nihre: “Cornelio, mũhũ Cohamacũre mũ sinichũ tiro tuhohre. Ā yoa pjacũoinare ti cahmaare mũ wachũ noano masino, Cohamacũ mũhũre yoadohorohca. ³²Ā jicũ Jopepũ mũ mũare warocaga, Simore, Pedro wama tirirore mũ cahapũ ti na tahto

sehe. Tiro paio Simo wahiquina cahsari cahnoriro ya wuhui, pjiri ma dultu cahai jiri wuhui jira tiro. Mu cahapu wihiro mure yahurohca”, ni yahuhre yahure tiro. ³³To a nichu tuhocu dolicata yu mare mure na ta duticu warocahi yuhu. A jicu noano yoacu tari jira muhu sa cahapure. A jina sa jipihitina ore Cohamacu to nurocaroi jina nija sa. Jipihitiare Cohamacu mure to yahu dutirote tuho duana, cohtahi sa —niha Cornelio Pedrose.

Pedro Jesu yare yahuha

³⁴To a nichu tuhoro, Pedro o sehe ni yahuha:

—Mipu masija. Potocã tjira. Cohamacu cõno potori noano yoara marine. ³⁵ã jiro jipihitia macari macaina Cohamacure cua pisaro ti nuhu, noare ti yoachu Cohamacu sehe tinare nu wahchera. ³⁶Cohamacu sa judio masa cahai Jesucristore noaa buheare yahuhtirote warocare. Masa Cohamacu mehne noano ji masica Jesu to yaria masa mujano mehne. Ti buheare musa masina. Jesucristo sehe jipihitina masa puhtoro jira. ³⁷João bautisariro masare, “Musa naa yoari buhiri tiare masiga”, ni yahu, to bautisari baharo, Galileapu noaa buheare Jesu sehe yahu ducare. Baharo Judea yahpau cõhure ti buheare yahu pahõre. ³⁸Ahriro Jesu Nazare macarirote Cohamacu sehe to tuaare Espõritu Santo mehne to yoa masihtire ware Jesure. A jiro Jesu noano yoaro wahare. A waharo watia saanohrinare, nano yuhdunare jipihitinare noaina wahachu yoare. Cohamacu Jesu mehne jiri jire. ³⁹Judea yahpai, Jerusalõ cõhure jipihitia to yoiri sa nuhi. Baharo tina crusapu cã puha wajahre tirote. ⁴⁰Wiho mejeta tia dacho wahaboroi Cohamacu tirote

masori jire. Maso, Jesure sare bajuachu yoari jire Cohamacu. ⁴¹Ti pjare Jesure jipihitina nurerare. Sa dihtare bajuahre tiro. Cohamacu to cahmainare, Jesure nu, painapure yahuhtinare panopu sare beseha. Sa sehe Jesu to masari baharo tiro mehne chu, sihnihi. ⁴²A jiro tiro sare o sehe ni dutihre. “Masare o sehe ni yahuga. Yuhu Jesu jipihitina catinare, yariaina cjiri cõhure ti naa yoari buhiri tiare yahuhtirote buhiri dahrehtiro yu jichu yoare yahure Cohamacu. A jina tire masare yahuga”, ni dutihre Jesu sare. ⁴³Dohse jiina baro Jesure ti wacu tuachu nu Cohamacu ti naa yoari buhiri tiare borohca. Tire jipihitina Cohamacu yare yahu muntaina cjiri panopu macaina yahuyuha —ni yahuha Pedro.

Judio masa jierainapu cõhure Espõritu Santo saarucu sua wahaha

⁴⁴Ti jipihitiare to a ni yahuro watoi, jipihitina tire tuhoinapure Espõritu Santo saarucu sua wahaha. ^{45–46}Tinapure to saarucu sua wahachu, tuho mahnoeraa duseri mehne wahchea mehne durucu ducaha tina. Ti duseri mehne Cohamacure “Tuariro, noariro jira muhu”, nia niha. Ti a nichu tuhoha Pedro mehne tarina judio masa, Jesu yaina. A tuhoa Espõritu Santo judio masa jierainapu cõhure to saarucu su yoadohochu nu, judio masa sehe cuaa wahaha. A jiro Pedro o sehe ni yahuha judio masare:

⁴⁷—Mari yoaro seheta Espõritu Santore cõhure ahrina cõhu. A jina tina bautisa duaa ti sinichu, tinare, ducataena tjijihna —niha Pedro tinare.

⁴⁸A ni tuhsu judio masa jierainare Jesu yaina ti jiare nõhto sehe bautisa dutiha Pedro. Ti a yoari baharo “Sa mehne mahaa dachoricã tjuasiniga”, niha tina Pedro cõhure.

**Pedro Jerusalē macainare
Jesu yainare yahuha**

11 Ā yoa judio masa jieraina cūhu Cohamacu yare ti noano cahmachu Jesu to cūrina sehe ti coyea Judeapu jiina mehne tuhoročaha. ² Ā jia Pedro Jerusalēpu to tju suchu űua judio masa Jesu yaina mahainacā tirore ō sehe ni tuhtiha:

³—¿Judio masa jierainare dohse jiro baro űui suri muhu? ¿Dohse jiro baro tina mehne churi muhu? —ni tuhtiha Peddrore tina.

⁴Ti ā nichu tuhoro Pedro to yoari cjiire yahu pahñoa tinare. Ō sehe ni yahuha:

⁵—Yuhu Jopepu jicu Cohamacure sinii nihi. Ā jiro yuhure ō sehe bajuahre. Pjiri cahsaro pititia sohtoarire dūhteri cahsaro muanopu yu cahai to duji tachu űuihi. ⁶ Ā jicu tí cahsarore noano űuihi “¿Yaba baro tí cahsaropure jijari?” nicu. Ā jicu űuihi tí cahsaropure jiinare: Tí cahsaro puhichapure payu wahiquina, bua tiniina, chihchōina, wuina peri cūhu jire. ⁷ Ā jicu yuhure to durucuchu tuhohi. “Pedro, wahcārucaga. Wajā chuga ahrinare”, nino coa tahre yuhure. ⁸ To ā nichu tuhocu ō sehe nihi yuhu: “Puhtoro, ne tina barore chueraja yuhu. űainare, Cohamacu to chu dutierainare ne chuera tih yuhu”, nihi yuhu. ⁹ Wiho mejeta muanopu pari turi yuhure durucuro coa tahre tjoa. “Cohamacu ‘Noaina jira’ to niinare, ‘űaina jira’, nii tjia muhu”, nino coa tahre yuhure. ¹⁰ Ā jiro tia taha sã ā ni durucuri baharo tí cahsaro muanopu mujahre tjoa. ¹¹ Yu ā űuno watoi tiaro mua sã jiri wuhupu suri jihre. Tina Cesarea macariro to warocarina jiri jihre. ¹² Ā jiro Espiritu Santo sehe yuhure tina mehne waha dutiro, “‘Tina űaina jira’, nii tjia tinare”, ni yahuhre yuhure tiro. Ā jia ahrina seis mehne yu coyea

Jesu yaina mehne Cesarea macariro ya wuhupu sãahi sã. ¹³ Ā jiro tiro sãre ō sehe ni yahuhre: “Anjo yu wuhui ducuchu űuihi yuhu. Ō sehe ni yahuhre yuhure: ‘Jopepu Simore Pedro wama tirirore na ta dutiga. ¹⁴ Tiro muhare mu coyea mehne musare jipihtinare pichacapu wahaborina musa yuhduhtore yahurohca’, nihre anjo yuhure”, ni yahuhre Cesarea macariro yuhure. ¹⁵ Ā yoa yu durucuro watoi Espiritu Santo sehe tinapure sãarucu suahre, marine to yoa muhtariro seheta. ¹⁶ Ā jicu Jesu to yahuhire wacūhi yuhu. Ō sehe ni yahuhre tiro: “João musare bautisaro, copu yoamahre. Yuhu sehe tí yuhdoro yoaihtja musare. Baharo Espiritu Santore musa mehne jirucuchu yoaihtja musare”, ni yahuha. ¹⁷ Ā jiro Jesucristo mari puhtoro mari wacu tachu űuno Cohamacu to Espiritu Santore wahre marine. Ā jiro Cohamacu marine to Espiritu Santore to wariro seheta judio masa jieraina cūhure tiro wahre. Cohamacu to ā yoachū űucū tirore yuhduruca masieraja yuhu —niha Pedro tinare, judio masare Jesu yainare.

¹⁸ To ā nichu tuhoa, tina tirore ne ni namoeraha. Ā ni namoeraa, Cohamacure wahche payo, tina ō sehe niha:

—Tí pja pini judio masa jieraina cūhure Cohamacu cahiri jira. Ti űaa yoari buhiri tiare masi, Cohamacure cahma, tina cūhu Cohamacu mehne ā catirucuahca —niha tina.

Antioquái paina Jesu yaina jiha

¹⁹ Ā yoa Estebare ti wajari baharo masa Jesu yainare űano yoaha. Ti ā yoachū űua Jesu yaina duhti sitea wahaha. Ā jia tina Feniciapu, Chiprepu, Antioquápu cūhure waha site, tōpore judio masa dihtare Cohamacu yare yahua timaha tina. ²⁰ Wiho mejeta paina Jesu yaina mehne macaina Chipre macaina,

Cirene macaina, Antioquíapū sū, judio masa jierainare Jesu yare buheha Cohamacu tinare to yūhdohto sehe. ²¹Ti ā buhechū, Cohamacu tinare yoadohoha. Ā jia masa payū Cohamacure cahma đaca, mari puhtoro Jesure wacū tuaha.

²²Ā yoa “Antioquía macainapū Jesure cahmaca”, ni tuhorocaha Jerusalē macaina Jesu yaina. Ti ā tuhorocari baharo Jerusalē macaina Bernabé wama tirirore Antioquíapū warocaha. ²³Tópu sūro, Cohamacu yoadohoa mehne judio masa jieraina to yaina ti wahachū nūno, tuaro wahcheha. Tuaro wahche, tiro tó macainare ō sehe ni yahuha:

—Jesure ā wacū tuarucuga. To yare ne duhuena tjiga —ni yahuha tiro jipihtina tinare.

²⁴Bernabé noariro jiro, Espíritu Santo dutiare yoariro Jesure noano wacū tuaha tiro. Ā jia to buheri baharo Jesure wacū tuaina payū waha namoha tjoa.

²⁵Baharo tiro Tarso wama tiri macapū Saulore macano wahaha. ²⁶Tópu tirore boca sūha. To boca sūri baharo Antioquíapū na majare tjuaaha Saulore. Tópu ti sūri baharo cū cūhma waro tina Cohamacu yaina mehne cahmachu, payū masare buheha tina. Ā jia Antioquíapū Cristo yaina Cristiano wama ti đacaha.

²⁷Tí pjare Cohamacu yare yahu mūhtaina Jerusalēpū jiina cjiri waha, Antioquíapū sūha. ²⁸Ā ti sūri baharo tina mehne macariro Agabo wama tirore Jesu yaina watoi ducuro, Espíritu Santo to tuaa mehne yahuha tinare. “Jipihtiro yahpapure tuaro jucarō waharohca”, ni yahuyuha tiro. Tí pjare chūa marieni pja jichū jipihtina bui puhtoro Claudio jiha. ²⁹Ā jia Cristo buheina, jipihtina ti cjuaro puro ti coyeare wa duaa ti basi cahma durucuha. “Judea yahpa macaina Jesu yainare niñerure warocajihna”, niha tina ti basi. ³⁰Ti ā niri baharo Bernabé Saulo mehne tí niñerure na wahcābasaha. Tópu sua Judea yahpa

macainare Jesu yaina puhtoare waha tí niñerure pja cūoinare tju wa dutia.

Pedrore peresu yoaha

12 Tí pjare puhtoro Herode cāinare Jesu yainare nāno yoa đacaha. ²Tiro João wahminore Santiago sehere yoari pjī mehne to wajā dutichū paio sehe tirore wajāha. ³Santiagoore to wajāchū judio masa wahcheha. Ti wahcheare Herode masino, “Ā dihta cahmana tina”, nino Pedro cūhure peresu yoaha. Tí dachorire bucuaerari pāore ti chūhti bose numūri pascua jiha.

⁴Ā jiro Herode Pedrore nāha, peresu yoaha. Peresu yoa diez y seis surarare cohta dutiha tirore. Pititiaro surara cohtaha tirore. Baharo pititiaro ti cohtotaina tirore cohta mūjaa tiha. Āta yoaha tina diez y seis surara. Herode sehe pascua baharo Pedrore peresupū jirirore masa panoi duhu dapo duamaha tirore wajā dutiro taro. ⁵Ā jiro Pedro peresupū jiha. Tópu to jichū Jesu yaina sehe Cohamacure tuaro sini payorucua niha tirore.

Cohamacu peresupū jirirore Pedrore wioha

⁶Ā yoa nāmine Pedro pūaro surara mehne comaa dari mehne ti duhteriro jiha. Ā ti duhteriro jiro, ti watoi carīno niha. Ā yoa paina surara sopacai cohtarucua niha tirore. Tí nāmi bohrearo Herode Pedrore judio masa panoi duhu dapo duamaha tirore wajā dutiro taro. ⁷Wacūenoca Cohamacu yairo anjo Pedro cahai to ducuchū to peresu jiri tah-tia buhria pihtia wahaha. Ā jiro anjo Pedro cahai ducuro Pedro patipahmai be careha, tirore wahcōno.

—Cjero wahcārucaga —niha tiro Pedrore.

To ā nichuta to wamomacarine ti duhtea dari comaa dari parī site boraa

wahaha. ⁸Ā yoa anjo tirore ō sehe ni yahuha:

—Tuā dihoga mu tuā dihori dare. Mu dahpo suhti cūhure sāga —niha tiro.

To ā nichu Pedro sehe to niriro seheta yoaha.

—Mu bui macari suhtirore sāa, yuhu mehne wahaga —niha anjo.

⁹To ā nichu tí tahtiapu jirirowijaa, anjo baharo wahaa wahaha tiro. Ā wahaparota ō sehe ni tuhotumaha tiro. “¿Ahri potocā jieracari? ¿Cahāi nicari yuhu?” ni tuhotumaha tiro. ¹⁰Ā yoa tina to jiri tahtia sopacai ducuina surarare yuhdu wahcā, paina yoawacūno ducuina cūhure yuhdu wahcā, pjiri sopacapu suha. Tí sopa pahma, comaa pahma macapu wahari mahare ducataripahma jiha. Tí sopa pahma to mu sūro parīchu tina wijaa wahaha. Wijaa waha, tina mahapu mahano wahachuta, anjo sehe buti mua wahaha. Ā jiro Pedro cūirota tjuaha. ¹¹Ā tirore anjo to wahari baharo to yoirire Pedro masiha. Ō sehe ni tuhotuha tiro. “Potocā tjira. Anjo Cohamacu to warocariro peresupu jirirowe yuhure wioro wihihre. Mipu tīre masija to ā yoirire. Judio masa sehe yuhure ti űano yoaborire Cohamacu sehe tinare yoa dutierare. Ā jiro yuhure, Herode to peresu yoirirore wiohre”, ni tuhotuha Pedro.

¹²To ā ni tuhoturi baharo María João pocoro ya wuhupu suha Pedro. João sehe pa wama Marco wama tira. Tí wuhupu masa payu cahmachu, Cohamacure sinia niha. ¹³Tí wuhupu sūro, Pedro sopa pahmare dotaha. Cūcoro ti cahamacono Rode wama tiricoro to dotachu tuhoru, űano suha ticoro. ¹⁴Ā yoro Pedro ticoro to pisuchū tuhoru to durucuaru tuho masi, tuaro wahche, sopa pahmare pjōoboricoro pjōeraha. Pedro tōi to ducuchuta ticoro majareruca mūroca sāa wahaha painare yahuro waharo.

—Pedro sopacapu wihihre —ni yahuro sāaha.

¹⁵To ā nichu tuhoa, tí wuhui jiina sehe:

—Ā ninocaco nica muhu —niha tina ticoro.

—Potocā tjira. Potocā nicota nija —niha ticoro.

To ā nichu tuhoa:

—Tiro jieraca. To yairo anjo wihirowi nica —nimaha tina sehe.

¹⁶Ti ā nino watoi Pedro sopa pahmare āta dotarucuro niha. To ā yoachu tuhoa, tina sopacare pjōo, tirore űu, cuaa wahaha. ¹⁷Ā jiro tiro Pedro to wamomaca mehne “Dihta mariahga” ni, Cohamacu peresupu tirore to wiorire yahuha tinare:

—Ahrire yahuga mūsa puhtoro Santiagore, paina Jesu yaina cūhure —niha tiro.

Ā ni yahu tuhsu tiro pa sehupu yuhdu wahcāa wahaha.

¹⁸Ā yoa bohrea bora tachū surara Pedro to dohse yoa wijaarire ne masieraha. Ā masieraa cuaa wahaha. ¹⁹Ā jiro Herode Pedrore maca dutimaha. Ā dutiro tiro surarare peresu cohtainare to sinituri baharo tinare wajā dutiha Herode sehe. Ā jiro Herode Judeapu jirirowa, Cesareapu jiro wahaha.

Herode yariaa wahaha

²⁰Ā yoa Tiro wama tiri maca macaina mehne, Sidō macaina mehne Herode sehe suaha. To ā suachu űua tí macari macaina sehe Herode tina mehne to suarire cahnoa waha, tiro mehne durucua wahaha. Ā jia to docai jirirowi puhtoro Blasto wama tirirore piti tiha. Ā jia tina Blasto to yoadohoro mehne Herode cahapu suha. Tiro cahapu suā, ō sehe niha:

—Mari noano jijihna. Mari basi űu tuhtiena tjijihna —ni sinia tina Herodere.

Tina ya yahpa macaina Herode ya yahpai chũare boca tiha. Ā jia Herode tinare ñu tuhtichũ cahmaeraha tina. ²¹ Ā yoa Herode to quihõri dachoi, puhtoro to sãa suhti noaa suhtire sãa tiha tiro. Ā sãano tiro to dujiroi duijtjiãhno, masare durucu ñoa tiha. ²² To ā durucu ñochũ tuhoa masa sehe õ sehe ni sañurucuha:

—Ahriru durucuro masũno jierara. Cohamacũ jira —ni sañurucu payomaha tina Herodere.

²³ Ti ā nichuta Cohamacũ yairo anjo Herodere dohatichũ yoaha. Cohamacũre ño payoeraro, “Cohamacũ jieraja yũhũ”, ne nieraha Herode. To ā nierari buhiri anjo tirore dohatichũ yoaha. To ā dohatichũ tirore dachoa chũ wajãnocaha.

²⁴ Ā yoa Jesu yaina payũ masare Jesu ya buheare buhea tiha.

²⁵ Ā jia Bernabé, Saulo mehne buhe tuhsũ, Jerusalẽpu tjuaa wahaha. Ā jia João Marco wama tirirore tina na wahcãha tina mehne.

Jesu yaina Bernabére Saulo cũhũre Cohamacũ yare buhe dutia warocaha

13 Tí pjare Antioquíapũ Cohamacũ yaina mehne macaina Cohamacũ durucuarẽ yahu turiaina jiha. Ā yoa Cohamacũ to joa na dutiri cjiire, Jesu yaina ti yoaa tiare yahuina cũhũ jiha. Bernabé, Simo Negro wama tiriro, Lucio Cirene macariro, Menahem, Saulo mehne tina jiha. Menahem sehe puhtoro Herode cjiro mehne tina puaro cũno potori bucaaina jimaha. ² Cũ numũ tina Jesu yaina chũ duhu, Cohamacũ yare ti buhero watoi Espiritu Santo õ sehe ni yahuha tinare:

—Bernabére, Saulo mehne cũga yũ cahmano sehe yoahntinare. Tíre yoahntinare bese cũi nija tinare —niha Espiritu Santo.

³ To ā nichũ tina sehe chũ duhu namo, Cohamacũre sini, Bernabé dapu bui Saulo dapu bui ti wamomacarine

duhu payoha. Ā duhu payoa tinare buhe dutia warocaha.

Chiprepũ Jesu to cũrina buheha

⁴ Ā jia tina Espiritu Santo to warocaina jia, Seleuciapũ sũ, tí macare dohoriapũ samu, Chipre wama tiri nucoũ pahãha tina. ⁵ Ā pahãa, Salamina wama tiri pitamahapũ wahã suha. Tí macai judio masa buhea wuhũsepũ, Cohamacũ yare yahu dũcaha tina. Ā yoa João Marco cũhũ tina mehne jiro, tinare yoadohoha. ⁶ Tuhsũ, tina tí nuco sohtoai maja, tí nuco topai jiri macapũ Pafo wama tiri macapũ sũa, yairore boca suha tina. Tiro judio masũno, Barjesu wama tiriro jiha. Barjesu griego ya mehne nia Elima ti ni pisuriro jiha. “Cohamacũ yare yahu muhtariro jija yũhũ” ni, masare mahũoperucuro jiha tiro. ⁷ Ā yoa tiro Sergio Paulo wama tiriro mehne macariro jiha. Sergio Paulo sehe tí nuco macaina puhtoro masi pahũoriro jiha. Ā jiro Cohamacũ yare tuho duaro tinare Bernabé, Paulo mehne pjirocacha tiro. ⁸ Wiho mejeta Elima yairo sehe tinare buhe dutieraha. Tiro Sergio Paulo Jesu yare to ño payochũ cahmasãaeraha yairo sehe. Ā jiro Sergio Paulore Cohamacũ yare cohã dutiro nimaha. ⁹⁻¹⁰ To ā dutipachũta Saulo, Paulo ti niriro Espiritu Santo dutiare yoiriro jiro yairore noano ñu diho cũi tirore õ sehe ni yahuha:

—Mũhũ mahũoa payũriro, ñariro, watĩno to dutiare yoiriro, noaare ñu yabiriro jira mũhũ. ĶDohseacũ Cohamacũ yare “Ñaa jira. Mahũoa jira”, ā nirucujari mũhũ? ¹¹ Mũhũ ā yoiriro jicu Cohamacũ mũhũre to pihachũ capari bajúerario jiihca mũhũ. Ā jicu mahaa dachoricã mũhũ ahri dachore ñusini —niha Paulo.

To ā nichũta tiro yairo sehe me yoaro sehe jiare ñu muhtano, baharo nahitiano dihtare ñuha. Ā jiro tirore tuãhtirore

macaha tiro. ¹²To ā wahachũ ñũno, Sergio Paulo sehe Jesu yare “Potocā tjira”, ni masiha. Mari puhtoro yare tiro tuho, cuaa waha, Jesure wacũ tua ducaha.

**Paulo Bernabé mehne Antioquíai
Pisidia yahpai jiri macai jiha**

¹³Ā yoa Paulo cũhũ Pafopũ jiina dohoría mehne pahā turía waha namo, Pergepũ suha. Perge Panfilia yahpapũ jira. Tópũ sũ, João Marco tinare cohā wahcā, Jerusalēpũ majare tjuaa wahaha. ¹⁴To ā wahapachuta tina sehe Pergepũ jiina waha namo, Antioquíapũ suha. Antioquíai Pisidia yahpapũ jira. Tópũ sua, Sabado dacho jichũ tina judío masa buheri wuhũpũ sãa sũ, tópũ dujiha. ¹⁵Tí wuhũ macaina puhtoa Cohamacũ dutiare, Moise cjiro masare to cūrire, ā yoa Cohamacũ yare yahu muhtaina cjiiri ti joari cjiirire ti buhe ñori baharo tina pjirocaha Paulo cūhũre:

—Coyea, ¿masare wahchechũ yoahiti cjihti m̄sa yahu duaa j̄jari? Tíre yahu duana, yahuga michapucacā —niha tí wuhũ macaina puhtoa.

¹⁶Ti ā nichũ tuhoró, Paulo wahcārũcu sũ, “Durucuena tjiga”, nino to wamomaca mehne c̄jā tuha. Ti dihta mariachũ ñũ, tiro ō sehe niha:

—Israe masa, ā yoa m̄sa Israe masa jieraina, Cohamacũre ño payoia, tuhoga m̄sa. ¹⁷Mari ñuchusuma cjiiri Cohamacũre ño payoa tiha. Tina cjiirire Cohamacũ besea tiha. Ā jia mari ñuchusuma cjiiri yoari p̄ja Egiptopũ jia tiha paina jipahta. Tópũ ti jichũ Cohamacũ noano yoaa tiha tinare. Ā jia payũ masaputia tiha tina. Ō sehe yoaa tiha tinare. Tinare Egiptopũ j̄inare to tuaa mehne wioa tiha Cohamacũ. ¹⁸To ā wiori baharo tina cuarenta cūhmari waro masa marienopũ tinia tiha. Tópũ tirore ti yūhdurũcachũ Cohamacũ āta tuhotunocaa tiha. ¹⁹Tuhsũ, Canaa wama tiri yahpapũre siete curuari macainare

cohā tuhsũ, Cohamacũ tí yahpare waa tiha Israe masa sehere. ²⁰Israe masa Egiptoi ti ji dũcachũ, pũ Cohamacũ ahri yahpare to wachupũ cuatrocientos cincuenta cūhmari waro yūhdũa tiha. Baharo Israe masare dutihtinare cūa tiha Cohamacũ tinare. Pũ, Cohamacũ to cūrina Samue to jichũpũ ji batoa tiha. Samue sehe Cohamacũ yare yahu muhtariro cjiro jia tiha.

²¹Baharo Israe masa sehe ti puhtoro cjihtore macaa tiha. Ā jia Cohamacũre sinia tiha. Ti ā sinichũ ñũno Cohamacũ Saulo cjirore cūa tiha tinare. Saulo cjiro Cis macũno jiro, Benjami ya curua macariro jia tiha. Ā yoa cuarenta cūhmari waro ti puhtoro j̄ihtiro cjihtore cūa tiha Cohamacũ tiro cjirore. ²²Cohamacũ Saulo cjirore to cohāri baharo Davi cjirore cūa tiha tiro. Ō sehe nia tiha Cohamacũ Davi cjirore: “Davi Jesé macũnore bocahi yūhũ. Tiro mehne wahcheja yūhũ. Tiro yũ cahmaare yoarohca”, nia tiha Cohamacũ. ²³Ahriro Davi cjiro to panamino ji turariro jira Jesu. Cohamacũ Jesure cūri jire Israe masare yūhdohtiro cjihto. “Masare noano yoaihca”, niha Cohamacũ. To niriro seheta yoare tiro. ²⁴To ā yoahito pano Jesu to tahto pano João cjiro ō sehe ni buheri jire: “M̄sa ñaa tuhotumari cjiirire tuhotu cohtota, Cohamacũre macaga. Ā yoana bautisarina jiga”, ni buheri jire João cjiro j̄ipiltina Israe masare. ²⁵João cjiro to buhe batoahito pano, to yariahto pano ō sehe ni yahua tiri jire: “¿Diro baro j̄jari yūhũ, m̄sa tuhotuchũ? Cristo jieraja yūhũ. Pairo jija. Ā jipachuta tuhoga yūhũre. Yũ baharo yũ yūhdo ro tuariro tarohca. Tiro noa yūhduariro jira. Tiro yoaro sehe jieraja yūhũ”, ni yahua João cjiro masare.

²⁶Coyea, Abrahā panamana, j̄ipiltina Cohamacũre cua pisaro ñũina marine ahri to yūhdohtore yahua buheare warocari jire Cohamacũ. ²⁷Jerusalē macaina

ti pūhtoa mehne Sabado dachori jichu Cohamacu yare yahu mūhtaina cjiri ti joarire buhepahta noano tuho ñahaerari jire. Ā tuho ñahaera, Jesu tinare yuhdohtiro to jichu cūhure masierari jire. Tina ā masierapahta Jesure wajā dutiha. Ā yoaa Cohamacu yare yahu mūhtaina cjiri ti joariro seheta yoaa niha. ²⁸ Tire to wajāhto pano tina Jesure yahusāmaha. Wiho mejeta to ñaa yoerapachuta tina Pilatore Jesure wajā dutia taa, siniha. ²⁹ Ā yoaa, panopu ti joariro seheta Jesure yoa tuhsu, tireo crusapu jirirore na boro, masa copapu tācai ti sahari copapu na sāa, duhu payoha tireore. ³⁰ Tireo ti ā wajāpachuta tiro to yariari baharo Cohamacu masori jire tireore. ³¹ Ā jia Galileapu taina Jerusalēpu tiro mehne suina payu dachori tireore yaria masa bajuarirore ñaa tiri jire. Ā jia mipure tireore ti ñure masare yahuhre tina.

³²⁻³³ Ā jina noaa buheare yahuja sā musare. Cohamacu mari ñuchusuma cjirire “Masare noano yoaiha”, panopu to niriro seheta mipure marine tinare ji nūnu ti turianare yoahre. Tīre to yahuri cjirire ō sehe yoahre tiro. Cohamacu Jesure masori jire. Ā jina Jesure to masorire yahuja musare. Salmo capítulo dosre panopu to joariro seheta ā wahari jire: “Mūhu yu macu jira. Michare mūhure yūhu mu Pucu jiare masichu yoahi”, nina Cohamacu to macnore”, ni joaa tiha panopu. ³⁴ Ā jiro Cohamacu Jesure to masohtire pari turi to yariaerahtore yahuyuro ō sehe ni yahu joaa tiha Salmo joariro. “Davire yu pja ñure seheta tireore yu niriro seheta potocāta noano yoaihtja musa cūhure”, nire Cohamacu”, ni joaa tiha. ³⁵ Tuhsu, pa Salmo cūhure ō seheta ni yahua tiha: “Cohamacu mu yairo ñaa buhiri marieriro to pjacure baa dutierara mūhu”, ni joaa tiha. ³⁶ Ā jiro Davi Cohamacu to cahmariro seheta to jisiniri

pja macainare yoadohoha. Baharo tiro yariaa wahaha. To yariari baharo to pūcusumare ti yoariro seheta masa copapu siō sāaha tiro cūhure. Ā jiro tiro baa wahaha. ³⁷ To ā baapachuta ahriro, Cohamacu to masoriro sehe ne baaerare. ³⁸ Ā jina musa yu coyea ahrire masiga: Jesu to yariaro mehne Cohamacu mari ñaa yoari buhiri tiare to cohāhtore musare yahuja sā. ³⁹ Ā jiro Jesure wacū tuainare Cohamacu ti ñaa ñano yoaa, buhiri tiare bonocanohca. Wiho mejeta Moise cjiro to cūri dutiare musa yoari mehne musa ñaa yoari buhiri tiare ne cohāsi Cohamacu. ⁴⁰ Ā jina noano yoaga. Musa noano yoerachū Cohamacu yare yahu mūhtaina cjiri ti joariro seheta musare wahaboca. Ō sehe ni joaa tiha:

⁴¹ “Tuhoga musa.

Cayoa payuina, yūhure ñu tuhtiina jira musa.

Yu ō sehe yoachū cuiga musa.

Ā jina pichacapu wahaga.

Musa jia dachorire musare yoa ñoihtja.

Yu ā yoa ñochū ñupanahta ‘Potocā tjira’, nisi musa.

Pairo tīre musare to noano yahupachuta ‘Potocā tjira’, nisi musa”,

ni joaa tiha Cohamacu yare yahu mūhtariro cjiro —ni yahuha Paulo tinare.

⁴² To ā ni yahuri baharo judio masa buheri wūhupu ti wijaari baharo, masa sehe tinare ō sehe ni siniha:

—Pa somanapu Sabado jichu sāre ahrire buhega tjoa —ni siniha tina Paulore.

⁴³ Ā yoa tí wūhupu jirina wijaa, judio masa payu, judio masa jieraina cūhu Paulo cūhu mehne wahaha. Judio masa jieraina sehe judio masa yare Cohamacu warore ti ño payoa tiare buheina jiha. Ti ā wahachū Paulo, Bernabé mehne noano yahuha tinare: “Cohamacu musare cahina. Ā jina tireore ño

payoina, wacū tuaina ā jirucuga mūsa”, ni buheha tina.

⁴⁴ Ā yoa pa somanare Sabado jichū jipihtina Jesu yare tūho duaina cahmachuha. ⁴⁵ Wiho mejeta judio masa sehe payū masare Jesu yare tūho duainare űua pahsu tia wahaha. Ā pahsu tia tina soro ni durucu, Paulore űano quiti dojomehneha. “Mū sare to buheha potocā jierara”, niha tina. ⁴⁶ Ti ā nichū tūhoa, Paulo, Bernabé mehne tinare quiti dojomehnerinare cuiro marieno ō sehe ni yahuha:

—Cohamacū to dutiriro seheta mū sare buhe mūhtamahi sā. Wiho mejeta mūsa sehe tīre cahmaera tuhsūhre. Cohamacū catia mehne ā catirucua cūhūre cahmaera tuhsūhre mūsa. Ā jina sā sehe judio masa jieraina sehere buhe dūcanahca. ⁴⁷ To joa dutiri cjiri mehne ō seheta dutiha Cohamacū sāre:

“Mūsa judio masa jierainare buhena tinare yū yare noano masichū yoanahca mūsa.

Ā jicū ahri yahpa mū sūro macainare mūsa buhechū, noano yūhūre wacū tuaina sehere pichacapū wahaborinare yūhdoihca yūhū”,

ni yahu dutiha sāre Cohamacū —ni yahuha Paulo, Bernabé mehne.

⁴⁸ Ti ā nichū tūhoa judio masa jieraina sehe wahcheha. “Cohamacū ya sehe noaa jira”, niha tina. Tōpeina Cohamacū to cahmaina, to catia mehne ā catirucua to wa duarina Jesure wacū tua dūcaha. ⁴⁹ Ā jia mari puhtoro Cristo yare tí yahpapūre yahu site pahñoha. ⁵⁰ Ti ā yahu site pahñochū űua judio masa ji coeraha. Ā jia tina Paulo cūhūre űano durucuha. Tópū Cohamacūre űo payoa numia, masa ti cua pisaro űua numia jiha. Ā jia judio masa Paulo cūhūre űano durucuha. Ti ā ni durucuchū tūhoa tí numia Paulo mehne, Bernabé mehne cūhūre suaha. Ā yoa tí maca macaina puhtoa cūhū tina mehne suaha. Ā suaa

tó macaina űano yoaha Paulo cūhūre. Ti ā yoari baharo Paulo cūhūre ti ya yahpai jīnare cohā wioha. ⁵¹ Ti ā yoachū űua Paulo, Bernabé mehne ti dahpori macaa dihta pohcarire cjā site boro cūha tí maca macaina ti űaa yoari buhiri tiare űoa. Ā yoa tuhsū tina Iconiopū wahaa wahaha. ⁵² Ā yoa tina Jesu yaina pījīro wahchea, Espīritu Santo dutiare yoaina jiha.

Paulo, Bernabé mehne Iconioi jiha

14 Ā yoa Iconiopū su, Paulo Bernabé mehne judio masa buheri wūhūpū sāa, Jesu yare noano durucu mihnia mehne yahuha. Ā jia payū masa Jesure wacū tua dūcaha, judio masa cūhū, judio masa jieraina cūhū. ² Wiho mejeta judio masa Jesure cahmaeraina cūhū tina mehne jiha. Tina judio masa jierainare Jesu yaina mehne ti suachū yoaha tjoa. Ti ā yoachū judio masa jieraina űano tūhotuha Jesu yainare. ³ Ti ā tūhotuchū űua Paulo, Bernabé mehne tōpū yoari pja jia, cuiro marieno mari puhtoro Jesu yare noano buheha. Cohamacū masare to cahīare buheha. Ā buheha Cohamacū to tuaa mehne yoa űoha tina, “Ahri buheha potocā tjira”, nia. ⁴ Wiho mejeta tí maca macaina dacho macai judio masa ya buheare cahmaina tjuaha. Dacho macaihta Jesu ya buheare cahmaina cūhū tjuaha. Tina pūa curua tjuaha. ⁵ Ā jia judio masa jieraina, judio masa ti puhtoa mehne Jesu to cūrinare űano yoa duama, tāa mehne doca wajā duamaha tinare. ⁶ Ti ā yoa duarire masia, Paulo Bernabé mehne Licaonia yahpapū duhti wahcāa wahaha. Tí yahpai jia macaripū Listra, ā yoa Derbepū sūha. ⁷ Tópū sua, noaa buheare buheha tjoa tí macari macainare, tó cahai jiina cūhūre.

Listrai Paulore tāa mehne docaha

⁸ Ā yoa Listrai tini masierariro jiha. Tiro wahma masa bajaroputa tini

masierariro jiro ne tinieraa tiha. ⁹⁻¹⁰ Ā jiro tiro Paulo to buhechū tūhoha. To tūhoro watoi Paulo sehe tiro dihtare nūha.

—Ahriri Jesure wacū tuara. Ā jiro tiro noariro waha duara —ni tūhotuha.

Ā ni tūhoturo tuaro mehne durucutjiāhno ō sehe niha Paulo tirore:

—Wahcārucaga —niha Paulo tirore.

To ā nichū tūhorota tini masierariro sehe pu sūrucū sū, wahaa wahaha. ¹¹ Paulo to ā yoachū nūa masa ti ya mehne, Licaonia ya mehne ō sehe ni sañurucuha:

—Ahrina cohamana, mūa yoaro sehe bajuina mūanopū jiina mari cahapū duji tari jira —ni sañurucuha tina.

¹² Ā jia tina cohamanare ti ni pisua wamari mehne tinare ni wama pisuha. Tina Bernabére “Zeus”, ni pisuha. Ā yoa Paulo buhe mūhtariro to jichū nūa, “Hermes”, ni pisuha tina tirore. ¹³ Ā jiro Zeusre ño payoina ya wūhū tí maca dūhtū cahai jiha. Ā jiro Zeus yaina ti sacerdote sehe wachūare cohorī mehne macapū sāa tari sopaca cahapū na taha. Zeusre ño payo duaro to wachūare jū mūono, Paulore, Bernabére wa duamaha tiro, to masa mehne. ¹⁴ Ti ā yoachū nūa Paulo, Bernabé mehne ti basi ti ya suhtire tūhrērocaha ti cahyaare masare ñoa. Tūhrēroca tuhsū masa watoi mūrocaa, ō sehe ni sañurucu wahcāha tina:

¹⁵ —Mūsa ō sehe yoaena tjiga. Sā cūhū mūsa yoaro seheta masa jija. Ō sehe mūsa yoaa ne yaba cjihti jierara. Ā jina mū sare buhena tahi mūsa ō sehe yoaare duhu dutina tana. Ahri cohamana mūsa niare, mūsa yoaa, wiho jia masūri jira. Tí masūrine cohāga. Ā jina Cohamacūre catiriro sehere ño payoga. Cohamacū sehe mūanore, yahpare, pjiri mare, jipihitiare yoariro jira. ¹⁶ Panopūre tiro jipihitia macari macaina ti yoarire ā ñūnocaha. ¹⁷ Wiho mejeta tiro to jia tiare ñona masare. Tiro masare noaare yoa, coro

tachū yoa, dichare wa, masare chūare ā warucura. To ā wachū masa wahchera. Tó seheta tiro to jia tiare ñona masare —niha Paulo, Bernabé mehne.

¹⁸ Wiho mejeta ti ā nichū tūhopahta masa wachūare wajā jū mūo tinare ño payo duamaha. Tó sehe ti ño payo duachū nūa tinare ā yoa dutieraha Paulo cūhū. Ti ā yoaare duhu duaerapahta duhuha tó macaina sehe.

¹⁹ Ā yoa paina judio masa Antioquía macaina, Iconio macaina cūhū Listrapū sūha. Tópū sua, Paulore ñano durucuha tjoa judio masa. Ti ā ni durucuchū tūhoa masa tiro mehne suaha. Ā suaa tāa mehne docaha tirore. Tāa mehne tirore doca tuhsū “Ahriri yariaa wahara” nia, tí maca dūhtū cahapū tirore waja sū cūnoca, wahaa wahaha. ²⁰ Ti ā yoari baharo Jesu yaina Paulore nūa wahaha. Tiro cahai ti cahmachurucū sūchū waro Paulo wahcārūca, tina mehne macapū wahaa wahaha. Ā yoa pa dachoi tiro Bernabé mehne Derbepū wahaha.

²¹ Tópū sū, tina noaa buheare tó macainare ti yahuri baharo, payū masa Jesure wacū tuaina ji dūcaha. Ā yoa baharo tina ti sua macaripe Litra, Iconio, Antioquíapū majare tjuaa wahaha. ²² Tí macaripū sua tí macari macainare Jesu yainare noaa buheare yahua, tinare noano yajeripohna tichū yoaha. Ā Jesure wacū tuarucu dutia ō sehe ni yahuha tinare:

—Cohamacū to jiropūre mari suhto pano, tuaro marine ñano yūhdūro cahamana —ni yahuha.

²³ Ā jia macaripe macainare Jesu yainare ti pūhtoa cjihtire cūha Paulo Bernabé mehne. Cū tuhsū, ti chū duhuri baharo Cohamacūre ō sehe ni sini payoha:

—Pūhtoro, ahrina mū yainare nū wihboga —ni sini payoha tina Cohamacūre ti wacū tuariroro.

Paulo Bernabé mehne Antioquíapū ti ji mūhtari macapū tjuua wahaha

²⁴Ti ā yoari baharo tina Pisidia yahpapū jirina cjiiri wahaa wahaha Panfilia yahpapū. ²⁵Tópū sū, Pergepūre tina buhe tuhsū Atalia wama tiri macapū wahaa wahaha. ²⁶Tí macapū sū, Antioquíapū tjuua, dohoria mehne pahāa wahaha. Tí macaihta panopū ti jisnichū Jesu yaina Cohamacū yare buhe dutia Paulo cūhūre warocaha. Ā warocaa:

—Cohamacū mū cahīa mehne ahrinare nū wihboga —ni warocaha tina.

Ā tju sūa tinare ti buhe dutirire buhe tuhsūha Paulo, Bernabé mehne. ²⁷Antioquíapū ti tju sūri baharo Jesu yaina mehne cahmachu, Cohamacū to tuua mehne ti yoirire yahu pahñoha tina. Judio masa jieraina cūhū Cohamacū yaina ti waharire yahuha tina. ²⁸Ā jia Paulo cūhū tópurē Jesu yaina mehne yoari pja jiha.

Jerusalēpū Jesu yaina cahmachuha

15 Ā yoa Judea yahpa macaina mahainacā Antioquíapū sūa, Jesu yainare ō sehe ni buhe dūcaha tina:

—Cohamacū to dutiare Moise cjirore cūno ō sehe ni cūha. Jipihtina ti pjacūre mahari cahsarocāre ti yihsotore yahu cūha Moise cjirore. Mūsa tíre yoerachū Cohamacū mū sare yūhdosi —ni buheha tina tó macainare.

²Ti ā ni buhechū tuhoa Judea yahpa macaina sehe cahma sayoha Paulo cūhūre Bernabé mehne. Ti ā cahma sayori baharo Jesu yaina sehe Paulore, Bernabére paina tó macaina cūhūre Jerusalēpū warocaha. Judea yahpa macaina ti buherire Jesu to cūrinare Jesu yaina puhtoā cūhūre sinitu nū dutia warocaha Paulo cūhūre.

³Ā jia Jesu yaina tinare ti warocachū waha, Fenicia yahpare sū, yūhdū wahcā,

Samaria yahpapū sūha. Tí macaripū sūa, judio masa jieraina Cohamacū yare ti cahma dūcarire yahuha tina tó macainare. Ti ā yahuchū tuhoa tó macaina Jesu yaina tuaro wahcheha.

⁴Ā yoa tina Jerusalēpū ti suchū nūa tó macaina Jesu yaina, Jesu to cūrina, to yaina puhtoā mehne wahchea mehne noano piti bocaha tinare. Ti ā piti bocachū Paulo, Bernabé mehne Cohamacū to tuua mehne ti yoirire yahuha tina Jerusalē macainare. ⁵Wiho mejeta tópurē fariseo curua macaina Jesu yaina mahainacā jiha. Ā jia tina tópurē wahcāruca, ō sehe ni yahuha:

—Tinare judio masa jierainare ti pjacūre mahari cahsarocāre yihsoro cahmana. “Cohamacū Moise cjirore to dutirire yoaga mūsa cūhū”, nino cahmana tinare —niha tina fariseo curua macaina cūhū.

⁶Ti ā nichū tuhoa Jesu to cūrina, to yaina puhtoā mehne ti ā nirire cahnoa taa, cahmachuha. ⁷Ā cahmachua tina payū ti durucuri baharo Pedro wahcāruca, ō sehe ni yahuha tinare:

—Coyea, panopū yūhūre mūsa mehne jirirore Cohamacū ō sehe yoa dutiro yūhūre cūre. Tiro yūhūre noaa buheare judio masa jierainare yahu dutiro cūre. Tinare Jesure wacū tua dutiro yūhūre tinare buhe dutire. ⁸Cohamacū masa ti tuhotuare masina. Ā jiro tiro judio masa jierainare to yaina to yoirire ñono taro tiro Espíritu Santore ware tinare, marine to yoiriro seheta. ⁹Ā waro tiro marine tina cūhūre cūno potori noano yoare. Tina tirore ti wacū tuachū ti nūa buhirire bore tiro. ¹⁰Mari sehe Cohamacū Moise cjirore to cūri dutiare cūno pjaeraja. Mari nūchusūma cjiri cūhū cūno pjaeraha. Ā mari cūno pjaerapachūta dohse yoana Jesu yainare judio masa jierainare tíre yoa duti duajari mūsa? Ā yoa dutina Cohamacū tinare to yoirire “Quihōno wahaerara”, nina nica mūsa. ¹¹Wiho

mejeta õ sehe sã tuhotuja. Mipure judio masa jieraina yoaro seheta mari cũhure mari puhtoro Jesu cahĩa mehne Cohamacu yuhdorohca. Dutiare mari yoaa mehne marine yuhdosi —niha Pedro tinare.

¹²To ã nichu tuhoa jipihtina dihta mariea wahaha. Ti ã dihta mariachũ Paulo, Bernabé mehne judio masa jieraina watoi Cohamacu tuaa mehne ti yoaa ñorire yahuha tinare. ¹³Ã ti yahu tuhsuri baharo Santiago õ sehe ni yahuha:

—Coyea, tuhoga yuhure. ¹⁴Cohamacu judio masa jierainare to yaina cjihtire to coã yoirire yahu tuhsuhre Pedro. ¹⁵Panopũ macaina Cohamacu yare yahu muhtaina cjiri ti yahuriro seheta ã wahahre judio masa jierainare. Õ sehe ni Cohamacu yare joaa tiha tina:

¹⁶“Panopũ Davi cjiro ya curua macaina ti puhtoa jiri cjiri pihtia wahare.

Baharo tjua taihca yuhũ.

Ã jicũ pari turi to ya curua macarirore puhtoro sõiha.

¹⁷Yũ ã yoari baharo jipihtina paina judio masa jieraina yuhure puhtoro tiaha tina.

‘Yũ yaina jiga’, yũ ni pjirocarina sehe yuhure cahmaahca.

¹⁸Ãta nina mari puhtoro.

Panopũ tiro ahrire masare yahua tiri jire”,

ni joaa tiha Cohamacu yare yahu muhtaina cjiri.

¹⁹Ã jicũ õ sehe ni tuhotuja yuhũ. Judio masa jierainare Cohamacu yare wahma cahma ducainare payũ yoaa dutiena tjijihna mari. ²⁰Wiho mejeta tinare joa, warocajihna mari. Õ sehe ni joarocajihna: “Ñaa chuare, ‘Cohamacu jira’, ti nia masurine ti waa chuare chuena tjiga. Tuhsũ, numia mehne ñano yoaena tjiga. Numia cũhũ mua mehne ñano yoaena tjiga. Ã yoaa wamua ti ñaha wajainare wahiquinare chuena tjiga. Dire sihniena

tjiga”, ni yahu joarocajihna. ²¹Yoari pja judio masa buhea wuhusepũ Sabado jichũ Cohamacu Moise cjirore to cũri dutiare buhea tire masa. Ã yoaa jipihtia macaripũ Moise cjiro to yahuare buhea tire. (Ã jina yũ niriro seheta judio masa jierainare Jesu yainare joarocajihna, judio masa sehe tina mehne “Suari”, nina) —niha Santiago.

²²Tĩ pjare Jesu to cũrina, Jesu yaina puhtoa, jipihtina Jesu yaina mehne puaro tina mehne macainare beseha ti warocahtinare. Antioquíapũ Paulo, Bernabé mehne ti wahachũ wahahtinare tinare bese warocaha. ã jia tina Judare, Sila mehne warocaha. Juda sehe Barsaba puaro wama wama tiha. Ti coyea Jesu yaina tinare ño payoha. ²³Tinare ti bese baharo Jesu yaina joarocari pũre warocaha tina mehne. Õ sehe ni joaha tina:

“Jesu to cũrina, to yaina puhtoa, mua coyea Jesu yaina mehne sã noa dutija musare. Jipihtina judio masa jierainare Antioquíapũ, Siriapũ, Ciliciapũ jiinare musare Jesu yainare noa dutija sã. ²⁴Sã mehne macaina mua cahapũ sua, musare payũ dutiare yoaa dutiyuhti. Ã yoaa musare cariboyuhti. Tina Cohamacu dutiare Moise cjirore to cũri cjiropure, mahari cahsarocãre yihsoa cũhure yoaa dutiyuhti. Wiho mejeta sã sehe tinare tĩre buhe dutina warocaerahi. ^{25–26}Ã jina sã jipihtina cũno potori mua cahapũ warocahtinare sã besehi. Mari cahĩinare Paulo, Bernabé mehne Cristo Jesu mari puhtoro yare cuiro marieno ti buhechũ payũ tahari paina tinare wajãmoñoha. Ti ã wajãmoñochũ mahanocã mehne yuhduha tina. Tina mehne sã beserinare mipure warocaja. ²⁷Ã jina Judare, Sila mehne mua cahapũ warocaja. Sã joarocarire tina sehe musare yahuahca. ²⁸Espĩritu Santo to wacũno seheta sã cũhũ tuhotuja. Õ sehe jira tĩ: Paye dutiapure cũer-

aja musare. Ahri dutia dihtare cūnahca musare: ²⁹ Naa chuare, ‘Cohamacu jira’, ti nia masurine ño payo ti duhu payoa chuare chuena tjiga. Dire sihniena tjiga. Wamuare ti ñaha wajainare wahiquinare chuena tjiga. Æ jina numia mehne ñano yoena tjiga. Numia cūhu mua mehne ñano yoena tjiga. Ahri yu yoa dutierare yoerana noare yoana nica musa. Tó puro tjira musare sã yahu duaa”, ni joarocaha Jesu yaina Jerusalēpu jina.

³⁰ Tí pūre joa tuhsu, waha Antioquíapū wahinare. Ti wari baharo waha, Antioquíapū suha. Ti tópu suri baharo payu masare cahmachu duti, ti joari pūre wiaha tinare. ³¹ Tí pūre ti buheri baharo tina yajeri sãa, noano wahcheha. ³² Æ jia Juda, Sila mehne Cohamacu yare yahu muhtaina jia, yoari pja Jesu yainare Cohamacu yare yahuha. Ti ã yahuchū tuhoa, Jesu yaina sehe wahche, noano tuhotuha. ³³ Æ jia Juda, Sila mehne tópu mahaa dachoricã ti jiri baharo Jerusalēpu ti tjuaa wahachu tó macainare ti coha sitichū, “Noano wahaga musa”, niha Antioquía macaina. Æ jia Juda cūhure warocarinare noa dutirocaha. Ti ã niri baharo Juda sehe tjuaa wahaha. ³⁴ [Wiho mejeta Sila sehe tóputa tjuanocaha Antioquíaputa.] ³⁵ Æ jia Paulo Bernabé cūhu mahaa dachoricã tjuasiniha tí macai tjoa. Tóí tina paina payu mehne Jesu yare buheha.

Pari turi Paulo noaa buheare buhe tinino wahaha

³⁶ Æ yoa mahaa dachoricã baharo Paulo õ sehe ni yahuha Bernabére:

—Jipihtinare mari buhe ducarinare “¿Dohse jijari tina?” ni, ññna wahajihna tjoa —niha Paulo cūhu ti basi.

³⁷ Æ ni tuhsu, Bernabé sehe João Marcocore tina mehne naa duamaha. ³⁸ To ã naa duapachuta tó pano tiro tina mehne

Panfiliapū sūro tina mehne tjuaeraha. Ti yoare cūno pjaeraro tjuaa wahaha. Æ jiro Paulo pari turi tirore naa duaeraha. ³⁹ To naa duaerachu ñño Bernabé Paulo mehne pūaro ti basi cahma durucu cahno masieraa, soro dihta waha wahaha. Bernabé sehe Chipre wama tiri nūcorū Marcocore na pahãa wahaha. ⁴⁰ Paulo sehe Silare piti ti wahcãa wahaha. Ti buhea wahahto pano Jesu yaina tinare waroca, “Cohamacu musare noano ññ wihbojaro”, niha. Ti ã niri baharo Paulo Sila mehne waha wahaha. ⁴¹ Æ waha, Siria yahpapū, Cilicia yahpapū cūhure sua, tópu Jesu yainare noano yajeripohna ti, Jesure wacū tua namochū yoaha tinare.

Timoteo Paulo mehne wahaha

16 Ti ã yoari baharo Paulo cūhu Derbepū, Listrapū sua, Timoteore boca suha. Timoteo Jesu yairo jiro, judio masono macūno jiha tiro. To pocoro cūhu Jesu yacorota jiha. To pūcūro sehe griego masūno jiha. ² Æ jia Lистра macaina, Iconio macaina Jesu yaina, “Timoteo masa noariro jira”, ni yahua tiha. ³ Æ jiro Paulo Timoteore naa duaha. Wiho mejeta tí yahpa macaina judio masa sehe Timoteo pūcūro griego masūno to jichū masiha. Æ jiro Paulo judio masare “Suari” nino, Timoteo pjacure mahari cahsarocã yihso naha. Judio masa ti dutia ti niriro seheta yoaha. ⁴ To ã yoari baharo tina ti sua macari macainare ti joarocari pū macaare yahuha. Tí pū Jesu to cūrina, to yaina pūhtoa mehne Jerusalēpu jina ti joarocari pū jiha. Æ jia tí dutiare noano yahu turiaha tó macainare Jesu yainare. ⁵ Ti ã yahuchū tuhoa Jesu yaina sehe Jesure wacū tua namoha. Æ yoa Jesure wahma wacū tua ducaina dachoripe payu waha namoha.

Paulo cahãnopu Macedonia macaritore ñuha

6-7 Ñ yoa Asia yahpapu sehere noaa buheare buhe dutieraha Espiritu Santo tinare. Ñ jia tina Frigia yahpare yuhdua Galacia yahpare yuhdua, Misia yahpa duhtu cahai suha. Tõpu su, Bitinia yahpa sehe waha duamaha tina. Wiho mejeta Espiritu Santo sehe tinare tõpure waha dutieraha. ⁸To ã niri baharo tina sehe Misia yahpare yuhdua, Tróadepu buhtu wihire. ⁹Tõpu ti buhtu wihiri baharo, tí ñamine õ sehe cahãri jire Paulo. Macedonia yahpa macariro to cahai ducuchu ñuri jire tiro. “Sãre Macedonia yahpa macainare yoadohoi taga” ni, pjiri jire tiro Paulore. ¹⁰To cahãri baharo wahcã wihi, sã yare cahno tuhsu, Macedoniapu wahaa wahai sã. “Cohamacu tí yahpare noaa buheare buhe dutiro nina marine”, ni tuhotui sã.

Paulo, Sila mehne Filipopu jiha

¹¹Ñ jina sã Tróadepu jiina dohoria mehne Somatracia wama tiri nãcopu pahã sui sã. Ñ yoa pa dachoi Neapolipu pahãa wahai sã. ¹²Tí macare yuhduana, Filipopu Roma macaina ya macapu sui sã. Tí maca Macedonia yahpai jiri maca jire. Wiho jiri maca jierare. Tõpure mahaa dachoricã sã jii. ¹³Tõpu jina Sabado jichu sã tí maca duhtu cahapu, dia duhtu cahapu sui. Tói Cohamacu mehne ti durucuro jire. Tói dujina tói cahmachua numia mehne suhudi sã. ¹⁴Cũcoro sãre tuhoricoro Tiatira wama tiri maca macaricoro Lidia wama tiricoro jire. Ticoro noaa suhti wapa tia suhtire duaricoro, Cohamacure ño payoricoro jire. Ñ jiro Paulo to yahuaire noano tuhochu yoare Cohamacu ticorore. ¹⁵To quihõno tuhochu ñuno ticorore to wuhu macaina mehne bautisare Paulo. To ã bautisari baharo õ sehe nire ticoro:

—“Jesu yacoro tjira muhu cõhu”, nina musa yuhure. Ñ jina ya wuhui sãa tasinia musa. Yuhu mehne tjuasinia — nire ticoro sãre.

To ã nichu tuhona to wuhui tjuasinii sã.

¹⁶Pa dacho Cohamacu mehne ti durucuropu sã wahachu watino to cohtotaricoro piti bocare sãre. Ticoro paina cahamacono jire. Ticoro watino yoadohoro mehne masare “Õ sehe waharohca musare”, ni yahuyuricoro jire. Ñ yahuro pjiro wapatabasare to puhtoare. ¹⁷Ñ jiro Paulo mehne sã wahachu, sãre nunu ti, sañurucure ticoro:

—Ahrina Cohamacu Jipihtina Bui Jiro to yoadohoina jira. Cohamacu marine to noano yuhdohtire yahura tina — ni sañurucure ticoro.

¹⁸Payu dachori ã ni cariborucure Paulore. To ã ni sañurucuchu Paulo mare ñu, õ sehe nire watinore:

—Jesucristo tuaa mehne dutija muhure. Ticorore wijaahga. Waharisa muhu —nire Paulo.

To ã nichuta watino sehe wahaa wahare.

¹⁹To ã wahari baharo ticoro puhtoa sehe niñeru to wapataeraricoro to wahachu ñua, tina Paulore, Sila cõhure ñahare. Ñaha tuhsu, tinare naahre tí maca dacho macapu jiina puhtoa cahapu. ²⁰Ñ naa wahcã, buhiri tiare cahnoina cahapu tinare cõre tina.

—Ahrina judio masa mari ya macare cariboa nina. ²¹Tina mari dutiare cohã dutia, paye buheare buhea nina. Mari ya dutiare yuhdurucachu yoa duaa nina. Mari Roma macaina jina ahrina ti yahua sehere yoa masieraja mari. Ñ jina ti buheare mari cahmaeraja —nire ticoro puhtoa buhiri tiare cahnoinare.

²²Ti ã nichu tuhoa masa payu Paulo cõhu mehne sua yuhdua wahare. Ñ jia buhiri tiare cahnoina sehe Paulo cõhu suhtire ti tuhrẽ cohãri baharo, yucuri

wasōri mehne tjana dutire tinare. ²³Tuaro tjana tuhsu peresu yoare tinare. Ti ā peresu yoari baharo peresure cohtaritore noano n̄u wihbo dutiha tina. ²⁴Ti ā dutiri baharo tinare cohtariro sehe tí wuhu puhicha macari tahtiapu tinare cū, taboa pahtari mehne ti dahporire biha dapoha.

²⁵Ńami dacho macai Paulo, Sila mehne Cohamacu sini, tirore basa payoha. Ti ā basachu tuhoha paina peresupu jiina. ²⁶Ti ā ni basachuta tí wuhu tuaro n̄uhmiha. To ā n̄uhmichu cūno potori jipihitia sopa pahmari parī mua, peresupu jiiinare ti duhteata dari comaa dari nuhnu site boraa wahaha. ²⁷To ā wahachu tí wuhure cohtariro sehe wahcā wihi, “Peresu jiina duhti tuhsuri jire”, ni tuhutumaha. Ā ni tuhuturo to n̄osari pjine naroca, to basi n̄osamaha. ²⁸To ā yoachū n̄no Paulo tirore tuaro sañurucu ō sehe niha:

—Mu basi n̄ano yoai tjiga. Jipihitina ōre jija sā —niha tiro tinare cohtaritore.

²⁹To ā nichu tuhoro tinare cohtariro sehe sihā buhria duti, tina cahapu muroca wahcā Paulo, Sila ti dahpori cahapu tetere, caha suha tiro. ³⁰Tuhsu, tiro tinare tí tahtiapu jiiinare na wijaa, sinituha tinare:

—¿Dohse yoaicari yuhu Cohamacu yairo ji duacu, to yuhdohtiro ji duacu? —ni sinituha tiro.

³¹—Jesucristore wacū tuaga m̄hu. Mu coyea cūhu tirore wacū tuajaro. Musa ā yoachū musare pichacapu wahaborinare Cohamacu yuhdorohca —ni yahuha tina.

³²⁻³³Ti ā niri hora n̄ami dacho maca baharocā jiha. Ti ā niri baharo tinare cohtariro to ya wuhupu naaha tinare. To ya wuhupu na su ti camine cosaha tiro. To ā cosa tuhsuri baharo to coyea mehne Cohamacu yare buheha Paulo cūhu. Ti buheri baharo bautisaha tinare. ³⁴Ti bautisa tuhsuri baharo tinare co-

htariro cjiro Paulo cūhure chuare payoha. Ā jia tiro to coyea mehne noaa buheare ti tuhori baharo tuaro wahcheha, Cohamacu masi ducaa.

³⁵Bohrea parī cahachu n̄na puhto sehe surarare peresupu warocaha Paulo cūhure wio dutia. ³⁶Ti ā wio dutiri baharo tí wuhure cohtariro Paulo cūhure yahuha:

—Puhto musare wio dutire. Ā jina cuenata wijaahga —niha tiro Paulo cūhure.

³⁷Ti ā wio duapachuta Paulo ō sehe ni yahuha surarare:

—Sā n̄ano yoaerahi. Ā jina sā ne buhiri cjueraja. Wiho warota tina puhto sehe masa ti n̄urocaroi yucuri wasōri mehne tjanahre sāre, Roma macaina sā jipachuta. Tjana tuhsu peresu yoahre sāre. Ā jia mipu masa ti n̄eraro wio duara sāre, sāre n̄ano ti yoarire “Buro yuhduri”, nia. Puhto ti basita ta, wioa tajaro sāre —niha Paulo surarare.

³⁸To ā nichu tuhoo surara sehe puhtoare yahua wahaha. Ti ā ni yahuri baharo Paulo, Sila mehne Roma macaina ti jichu masia puhto sehe cui niha. ³⁹Ā jia tina Paulo cūhu cahai su, ō sehe niha:

—N̄ano yoahiti sā musare. Ne pari turi ā yoasi —niha puhto Paulo cūhure.

Ā ni tuhsu puhto tinare peresupu jiiinare wio, tinare pa sehpu waha dutiha. ⁴⁰Ti ā niri baharo Paulo, Sila mehne peresupu jiina wijaa, Lidia wama tiri-coro ya wuhupu wahaha. Tí wuhupu ti suri baharo Jesu yainare piti bocaha. Ā jia tina Jesu yainare noano buhea, noano yajeripohna tichu yoaha tinare. Ti ā yoari baharo Paulo, Sila mehne wahaa wahaha.

Tesalónica macaina suaha Jesu yaina mehne

17 Ā yoa tina Anfipolipu su, yuhdu, Apoloniapu su, yuhdu, Tesalónica suha tina. Tóí judio masa buheri

wuhū jīha. ²Somanaripe to yoiriro se-heta Paulo buheri wuhupū wahaa tiha. Tópū sū, tia somana waro sabado dachoripe tiro panopū macaa ti joari cjirire Cohamacū yare masare buhe, tíre tina mehne suhūdua tiha Paulo. ³Ā yoaro tiro Cohamacū yare ō sehe ni yahuha:

—Judio masa, mūsa puhtoro mūsa cohtariro Cristo tari jire nāno yuhduhtiro. Cohamacū to ni cūriro cjiro sehetā tiro yariaa wahaha masa mūjano taro. Ā jiro ahrīro Jesu, yū yahūriro, tiro Cristo warota jira marine yuhdohtiro. Tirota jira mūsa cohtariro. Ō sehetā nina Cohamacū yare ti joari pū —ni yahuha Paulo.

⁴To ā nichū tuhoa, cāina tōi jīina “Potocā t̄jira”, niha. Ā jia tina Paulo cūhū mehne wahaha. Ā jia paina cūhū griego masa payū Cohamacūre nō payo-ina sehe Paulore quihōno tuhoa, ā yoa tina mehne macaa numia cūhū payū puhtoa numia masa ti cua pisaro nūa numia cūhū tirore quihōno tuhoa Jesu yaina tjuaha. Ā jia tina cūhū Paulo cūhū mehne wahaha. ⁵Wiho mejeta judio masa sehe ti ā wahachū nūa, pahsu tiha. Ā jia tina nāina dahraerainare payū p̄ji cahmachu ō sehe ni dutiha: “Ahrina nāno yoaa nina”, ni sañurucu dutiha tinare. Ā sañurucu jipihtina tí maca macainare suachū yoaha Paulo cūhū mehne. Ā jia judio masa Jasō ya wuhupū sāa, Paulo cūhūre macamaha, tinare masapūre waa taa. ⁶Wiho mejeta tinare bocaeraha. Ā jia Jasōre, paina Jesu yaina cūhūre nāha, waja wijaa wahaha tinare. Puhtoa cahapū na sū ō sehe ni yahusāha tina:

—Paulo cūhū masare jipihtropūre caribobiara. Ā jia mipūre tina mari ya macare wihi tuhsūre. ⁷Ā jiro ahrīro Jasō tinare to ya wuhupū sāa ta dutihre. Tina jipihtina mari bui puhtoro Roma macariro to dutiare yuhdurucara. “Pairo mūsa puhtoro jira. Jesu tirota

jira” nia, mari puhtoro dutiare yuhdurucara tina —ni yahusāha judio masa sehe puhtoare.

⁸Ti ā ni yahusāchu tuhoa, jipihtina masa, puhtoa cūhū sua, tuaro sañurucuha. ⁹Wiho mejeta puhtoa Jasōre, tiro mehne macaina cūhūre, niñerure wapa duti, wioha.

Paulo Sila mehne Bereapū suha

¹⁰Tí pjata nānipū Paulo cūhūre Jesu yaina nūo warocaha Bereapū. Tópū sua tina judio masa buheri wuhupū sāa wahaha. ¹¹Berea macaina sehe Tesalónica macaina yuhdoro Jesu yare noano tuhoina jīha. Ā jia tina Jesu yare ti tuhori baharo “¿Potocā t̄jijari?” ni masi duaa, dachoripe Cohamacū yare ti joari pūre ā buherucua tiha tina. ¹²Ā jia tina payū Jesure wacū tua dūcaha. Griego masa cūhū, mūa, puhtoa numia mehne Jesure wacū tuaina jīha. ¹³Wiho mejeta Paulo Bereapū Cohamacū yare to buhechū cūhūre tuhorocaa Tesalónica macaina judio masa tōpū suha. Tópū sua, Berea macainare q̄iti dojomehnea, Paulo cūhū mehne suachū yoaha tina. ¹⁴Ti ā yoachū nūa Jesu yaina Paulore soaro mehne pjiri ma duhtū cahapū warocaha. Wiho mejeta Sila, Timoteo mehne Bereapū tjuaha. ¹⁵Paina sehe Paulore Atenapū na wahcā soha. Tirore so tuhsū majare tjuaa wahaha Bereapū tjoa.

—Soaro mehne waha, piti tina wahaga Paulore —ni yahuha Silare, Timoteo cūhūre.

Ā ni yahu dutiha Paulo tinare.

Paulo Atenai jīha

¹⁶Ā jiro Paulo Atenapū cohtarō niha Sila, Timoteo cūhūre. Tinare cohtarō Atena macaina ti “Cohamana jira”, ti nia masūrine payū ti cjuachū nūno Paulo tuaro cahyaha tina mehne. ¹⁷Ā cahyaro, judio masa buheri wuhupū ju-

dio masa mehne, ã yoa judio masa jieraina mehne cūhure durucuha tiro. Judio masa jieraina sehe Cohamacūre ño payoina jiha. Æ yoa Paulo tí maca dacho macai dachoripe tiro cahapū ã tini majare sãaina mehne durucuha.¹⁸ Paina Epicureo yare buheina, Estoico yare buheina cūhū Paulo mehne durucuha:

—¿Ahriro durucua pih-tierariro dohse ni durucuro nijari tiro? —niha tina.

Paulo Jesu yare, to masa mujarire to yahuchū tuhoa õ sehe ni tuhotumaha masa: “Tiro paina cohamanare yahuro nica”, ni tuhotumaha tina.¹⁹ Ti tuhori baharo tina Areópago wama tiropū Paulore naaha.

—Ahri buhea, wahma buheare mū mipū yahurire masi duaaja sã.²⁰ Mū buhea soro sehe jira. Æ jina sã tíre masi duaaja —niha tina Paulore.

²¹ Jipihtina Atena macaina, ã yoa paye yahpari macaina cūhū Atenapū jiina dachoripe wahma buheare durucurucu duaha. Æ jia Paulo to yahua-re tuho duaha tina.

²² Æ jiro Paulo Areópago wama tiroi wahcārūca õ sehe ni yahuha:

—Atena macaina, payū mūsa cohamanare mūsa tuaro ño payoina mūsa jichū masija yūhū.²³ Ahri maca mūsa ya macare cohamanare mūsa ño payoa altarire ñū tinihi yūhū. Æ ñū tinicū yūhū cū altarpū, cohamanare ño payona mūsa waare mūsa cūnoi ahrire buhehi. “Cohamacū, mari masimahno-erariro ya altar jira”, ni joari jire mūsa tíre mūsa cūnoi. Mūsa tirore masierapanahita tirore ño payori jire mūsa. Tiroreta mūsa masierarirore yahu potoi nija yūhū musare.

²⁴ Cohamacū jipihtiri yahpare, jipih-tiare bajuamehneriro jira. Tiro muanore, yahpapūre pūhtoro jiro, tiro masa ti yoa wāhūsei jierara.²⁵ Æ jiro tiro mari jiare, mari yajeri naare, jipihtia marine paye barore wariro jiro, mari

yoadohoare cahmaerara. Tiro pjasoriro jierara.

²⁶ Tiro cūiro mūnore yoa dūcaha. Tiro mehneti jipihtia yahpari macaina cjihtire masare yoaha. Æ masare yoaro jipih-tiro yahpapūre marine cūha tiro. “Õ puro yoari pja õpūre jiahca”, nino quihō cūha marine.²⁷ “Tina yūhure maca, bocaboca”, ni tuhotuha Cohamacū. Wiho mejeta Cohamacū yoaropū jierara. Mari mehneti jira. Æ sehe ni joaa tiha paina:²⁸ “Marine jichū yoara tiro. Mari masapere catiina, ñuhmiina jichū yoara tiro”, ni joaa tiha. Mūsa mehne macaina panopū macaina basaare noano joaina quitu yahuina cjiri ti joariro seheta nii nija. “Mari cūhū Cohamacū pohna jija”, ni joaa tiha tina.²⁹ Æ jina mari to pohna jina õ sehe ni tuhotuena tjiga mūsa. Masurine, uru, plata, tãa mehne mūsa mū sūro mūsa yoari masurine “Cohamana jira”, ni tuhotuena tjiga mūsa.³⁰ Panopū masa ti masieraina jisnichū ti ñaare yoapachūta Cohamacū ã ñūnocasiniha. Wiho mejeta mipūre jipihtiri yahpa macainare ti ñaa yoari buhiri tiare masi, cahya dutira Cohamacū.³¹ Baharo Cohamacū to quihōri dachoi jipihtiri yahpa macainare potocā beserohca noaina, ñainare. Tiro to bese duti to cūiro Jesu sehe beserohca. Jesure yariarirore masoha tiro. Æ masono “Ahriro yū cūiro jira” ni, ñono niha Cohamacū masare —ni yahuha Paulo Atena macainare.

³² To ã nichū masa mujarire to durucuchū tuhoa paina tirore bujūpeha. Wiho mejeta paina sehe õ sehe niha:

—Pari turi ahrire mū yahuchū sã tuho duaaja —niha tina Paulore.

³³ Ti ã niri baharo Paulo wahaa wahaha.³⁴ To ã wahachū, cãina tiro mehne waha, Jesure wacū tua dūcaha. Dionisio Areópago macariro pūhtoa mehne macariro Jesure wacū tua dūcaha. Æ

yoa Damari wama tiricoro cūhū, paina mehne Jesure āta wacū tua dūcaha.

Paulo Corinto wama tiri macai jiha

18 Ā yoa, Paulo Atenapū jiro waha, Corinto wama tiri macapū suha. ²Tópū sūro, judio masuno Aquila wama tirirore boca suha tiro. Jipihina bui puhtoro Claudio wama tiro judio masare Romapū jinarere to cohāchū Aquila sehe to namono Priscila mehne waha, Corintopū suha. Aquila sehe Ponto wama tiri yahpai masa bajariro jiha. Ā jia tina Corintoi ti jichū, Paulo tina cahapū suha. ³Aquila cūhū suhti wuhūse yoaina jiha. Paulo cūhū suhti wuhūse yoarirota jiha. Ā jiro tiro tina mehne dahra, tói tjuaha. ⁴Ā jiro Paulo sabado jichū somanaripe judio masa ti buheri wuhūpū judio masare, judio masa jieraina cūhūre Cohamacū yare yahuha. To ā ni yahuchū tuhoa, “Potocā tjira”, niha tina cāina.

⁵Ā yoa Sila, Timoteo mehne Macedoniarū jina, Paulo cahapū suha. Tópū ti sūri baharo Paulo sehe jipihtia dachoripe judio masare noano buhea tiha.

—Jesu, Cristo masare yuhdohtiro mari cohtariro jira —ni yahua tiha.

⁶To ā ni buhepachūta, judio masa sehe tire tūho duaeraha. Ā jia tina nāno ni quitī dojomehneha tire. Ti ā yoachū Paulo tinare to tuhtiboriro seheta, to suhti macaa mene cā siteroca cūha.

—Musa ya buhiri pichacapū wahanahca. Cohamacū to dutirore seheta musare buhemahi yuhū. Wiho mejeta musa yuhūre tūho duaerare. Mipūre judio masa jieraina sehere buhei waihtja —niha Paulo judio masare.

⁷To ā niri baharo tiro tópū jiro waha, Ticio Justo wama tirore ya wuhūpū suha. Justo Cohamacūre nō payoriro jiha. To ya wuhū sehe judio masa buheri wuhū cahai jiha. ⁸Ā jia Crispo wama tirore

buhiri wuhū puhtoro, to namono, ti pohna cūhū Jesure wacū tuaina jiha. Ā yoa paina Corinto macaina payū Cohamacū yare tuhoa, Jesure wacū tuaha. Ti ā wacū tuaina jichū tinare bautisaha. ^{9–10}Cū nāmi Cohamacū cahānopū ō sehe ni yahuha Paulore:

—Muhū mehne jija. Ahri maca macaina yū yaina masa payū jira. Ā jia paina masa muhūre nāno yoa masierara. Ā jicu cuicē tjiga muhū. Wiho mejeta yū yare tuaro yahu namoga muhū. Yahu duhucē tjiga —ni yahuha Cohamacū Paulore.

¹¹Ā yoa cū cūhma noano, pa cūhma dacho maca waroi Paulo Corintopū ji, to macainare Cohamacū yare buhea tiha.

¹²To ā buhero watoi Galiō wama tirore Acaya yahpa macaina puhtoro to jichū, judio masa jipihtina cūno potori Paulore yahusā taa, tire buhiri tiare cahnoina cahapū naaha tina.

¹³—Ahriro Paulo masare Cohamacūre nō payo dutiro ahri yahpa macaa dutia sehere cohā dutiro nina —ni yahusāha judio masa buhiri tiare cahnoinare.

¹⁴Ti ā ni yahusāchū tūhoro Paulo sehe tinare yahu duamaha. Wiho mejeta Galiō sehe judio masare ō sehe ni yahuha:

—Ahriro sā Roma macaina ya dutiare yuhdūrcariro to jichū, musare yuhti-boa yuhū. ¹⁵Wiho mejeta musa judio masa ya dutia sehere ahriro yuhdūrcariro to jichū musa basi ahire cahnoga. Ahire masieraja yuhū musa mehne —ni yahuha tiro judio masare.

¹⁶Ā ninota tinare judio masa Paulore yahusāmarina cjirire to ya tahtiapū jinarere cohā wioha tiro. ¹⁷To ā cohā wiori baharo jipihtina tí wuhū jina Sostenerere judio masa buheri wuhū puhtoro Jesu yairore nāha, buhiri tiare cahnoina cahapū cāha tire. Ti ā cāchū nūno Galiō ā nūnocaha.

Paulo Antioquíapü tjuua wahaha

¹⁸ ã yoa Paulo Corintoi yoari pja jiro cjiro “Wahai nija”, ni coha sitiha tiro Jesu yainare. To ã niri baharo tiro Priscila, Aquila mehne Siria yahpapü pahãa taa niha. Ti pahãhto pano Cencrea wama tiri macapü sü, tópu jisinino Paulo Cohamacure “Õ sehe mühure yoabasaitja”, to niriye yoa tuhsüriropü jiha. ã jiro tó sehe yoaina judio masa ti yoarucuro sehetä to pjoarire wüha pahño dutiha. ¹⁹ Tíre to yoari baharo tina Efeso wama tiri macapü pahã sü, Priscilare, Aquila cãhure cü, judio masa ti buheri wühpü wahaha Paulo. Tí wühpü sü, Cohamacu yare yahuha. ã yahuro judio masa mehne sühdüha. ²⁰ To ã sühduri baharo tirore tina mehne tjua dutimaha.

—Tjuueraja müsa mehne. ²¹ Wiho mejeta Cohamacu cahmachü, pari turi tjuaa taihtja —niha tinare Paulo.

ã ni tuhsü, Efesopü jiro cjiro pahãa wahaha tiro.

²² Pahãa, Cesarepü pahã sü, yühdü wahcã, Jerusalëpü süha. Tópu sü, tó macaina Jesu yainare “¿Ne jimajari müsa?” ni, tinare nü yühdüa Antioquíapü süha. ²³ Tóí mahaa dachoricã jiha. Tóí jiro cjiro yühdüha. Galacia yahpai jia macaripü, Frigia yahpai jia macaripü pari turi sü, tí macari macainare Jesu yainare buhero, Jesure wacü tua namo wahchechü yoaha tiro.

Apolo wama tiri Efesoi buheha

²⁴ Tí pjare, judio masüno Apolo wama tiri, Alejandría macariro Efesopü süha. Tiro noano yahu mihniro jiha. ã jiro tiro Cohamacu to joari cjirire noano masiha. ²⁵ Pairö tirore Cohamacu yare yahu tuhsua tiha. ã jiro tiro João masare bautisariro to buhea dihtare masiha. ã jiparota tiro tuaro wahchea mehne Cohamacu yare noano buheha. ²⁶ ã jiro judio masa ti buheri wühpü tiro

cuiro marieno tinare buhe ducaha. To ã buhechü ti tühori baharo Priscila, Aquila mehne tirore tina mehne naaha. Cohamacu yare to quihöno yahu pahñoerachü nüa quihöno yahu pahñooha tina tirore. ^{27–28} ã jia tiro Apolo sehe Acaya yahpapü to waha duachü Jesu yaina tirore “Noano wahaga”, ni joaa pürine waha tirore. Tí püri Acayapü jiina Jesu yainare Apolore noano piti boca dutia püri jiha. ã jiro Apolo tópu süro, tó macainare noano yoadohoha. Tó macaina Cohamacu cahia mehne Jesure wacü tuaina jiha. Judio masare tí macari jüinare õ sehe ni yahuha:

—Cohamacu to warocariro müsa cohtariro jira Jesu. Cristo waro jira tiro —ni yahuha Apolo judio masare paina masa ti nürocaroi.

Cohamacu yare ti joari cjiri mehne to noano quihöno yahuchü tühoha tina “Potocã jierara”, ni masieraha.

Paulo Efesopü wahaha

19 Corintopü Apolo to jiro watoi, Paulo sehe tüyucupü müja yühdüa, Efesopü süha. Tópu süro cãina Jesu yainare bocaha. ² Tinare boca süro tiro tinare õ sehe ni sinitu nüha:

—¿Müsa Jesure wacü tuari baharo müsa sehe Espíritu Santore cjuä ducari? —ni sinitu nüha Paulo.

To ã nichü tühoha tirore õ sehe ni yahuha tina:

—“Espíritu Santo jira”, ni yahuerare säre —ni yahuha tina.

³ Ti ã ni yahuri baharo Paulo tinare õ sehe ni sinitu nüha tjoa:

—¿Noa ya buheare müsa tühori baharo bautisari musare? —niha tiro tjoa.

—João ya buheare sä tühori baharo bautisahre säre —ni yahuha tina.

⁴ Ti ã nichü tühoro õ sehe niha Paulo: —Masa ti ñaa yoarire cahya, tíre ti duhuchü nüno bautisaha João. ã jiro to bautisari cjiri sehe ti ñaa yoarire ti

duhurire masare ti ñohti cjihti jira. Wiho mejeta paye baro cūhure yahu namoha João. “Yū baharo tariro sehere wacū tu-aga mūsa”, ni yahuha tiro. Ā nino Jesure yahuro niha —ni yahuha Paulo tinare.

⁵To ā nichū ti tūhori baharo, Jesu wama mehne to tuaa mehne bautisaha tinare. ⁶Ā to bautisachū, Paulo tina cāina bui to wamomaca to duhu payochū, Espiritu Santo sehe wihiha tinapure. To ā wihiri baharo tina sehe tūhomahnoera dūseri mehne durucu, Cohamacū yare yahuha. ⁷Tina jipihtina doce mūa jia jiboa.

⁸Baharo Paulo judio masa ti buheri wūhupū sāa, tia sū waro cuiro marieno pūhtoro Cohamacū to sūho jiare yahu, durucuha tina mehne. Tirore ti ā tūhori baharo “Ahri potocā jira”, niha tina. ⁹Wiho mejeta paina sehe tūho duaeraha. Ā jia tina masa ti tūhoro noaa buheare ñano ni ñoha. Ti ā nichū tūhoro Paulo sehe Jesu yainare pji wijaa, pa sehēpū wahaha. Waha, Tirano wama tirore to buheri wūhupū dachoripe masare Cohamacū yare yahuha Paulo. ¹⁰Pūa cūhma waro buhea tiha tinare. To ā buhechū jipihtina Asia yahpa macaina judio masa, judio masa jieraina mehne mari pūhtoro Jesu yare tūhoha. ¹¹Ā yoa Cohamacū tuaa mehne Paulo masare ñū cūa yūhduachū yoa barore yoa ñoha. ¹²Masa sehe suhti cahsari Paulo to pjacure pihaa cahsari cjirire, ā yoa tirore pihaa suhti cūhure naa, dohatinare pihoha masa. Tí suhtire dohatinare ti pihochū noaa wahaha. Ā jichū watia tinapure jirina cjiri wijaa wahaha, tí suhtire ti pihori baharo.

¹³Wiho mejeta paina judio masa, ā tinirucuina, watiare cohāina jiha. Ā yoa pūhtoro Jesu wama pisuro mehne watiare cohā duamaha. Ā jia watiare ō sehe ni dutimaha tina:

—Paulo to yahuriro Jesu to wama mehne dutija mū sare. Wijaa hga. Ahriro

mehne pari turi jiena tjiga —nimaha tina watiare warocaa.

¹⁴Esceva wama tirore siete to pohna sehe āta yoamaha. Esceva sehe judio masuno sacerdotea pūhtoro jiha. ¹⁵To pohna watinore ti wijaa dutiri baharo, watino sehe ō sehe niha tinare:

—Jesure masija. Paulo cūhure masija. Ā masipacuta mūsa sehere masieraja —niha watino tinare.

¹⁶To ā nichūta watino to cohtotariro sehe tuaro mehne tinare ñaha mūaa wahaha. Tinare ñaha, ñaabiaro yoa, yūhduacanocaha. To ā yoachū Esceva pohna sehe suhti marieina, cami tiina mūroca wijaa wahaha tina tí wūhure. ¹⁷Ti ā yoari baharo jipihtina Efeso macaina, judio masa, judio masa jieraina mehne tíre tūhoa, cui yūhduaha tina. Ā jia pūhtoro Jesu yare būjūpero marieno durucuha masa sehe.

¹⁸Ā yoa masa payū Jesure wacū tu-aina ti ñano yoari buhirire yahu yūhduaha taha. ¹⁹Tina mehne macaina payū yaya puti siteina jiha. Ā jia tina ti joaa tjurire yaya ti yoaare yahua tjurire tōpū na ta, masa ti ñurocaroi tí tjurire jū cohānocaha tina. Tí tjuri ti wapa tirire tina ti quihōchū, jipihtia tjuri cincuenta mil tūri plata mehne ti yoa tūri posa waro wapa timaha tí tjuri. ²⁰Ā jia Cohamacū yare cahmaina payū wahaha. Cohamacū tuaa mehne to yaina wahaha.

²¹Ti ā wahari baharo Paulo ō sehe ni tūhotuha: “Macedonia yahpapū sū mūhta, tí yahpare yūhduaa Acaya yahpare sūihtja. Tí yahpare yū sūri baharo Jerusalēpū wahaihtja. Tí macare yū sūri baharo Romapū wahaihtja”, ni tūhotuha Paulo. ²²Pūaro tirore yoadohinare to pano waroca mūhtaha Macedonia yahpapū. Timoteo, Erasto cūhū jiha tina. Ā jiro Paulo sehe cūirota tjua nūnū tisiniha Asia yahpapū.

Efesoi masa sua, sañurucuha

²³Tí pjare Efesoi Jesu yare paina cahmaeraa, Paulo cūhure payu masa tuhti, sañurucuha. ²⁴Cūiro platare dahrariro Demetrio wama tiriro plata mehne cohamaco Artemisa wama tiricoro ya wuhū masuri yoiriro jiha. Á jiro tiro paina plata dahrainina mehne tí masurine dua, pjíro wapataha tina. ²⁵Á jiro Demetrio paina plata dahrainare pji cahmachu ō sehe ni yahuha tinare:

—Tuhoga musa. Ahri dahraa mehne pjíro mari wapatarire masina musa. ²⁶Ahriro Paulo to yoirire to buheri cūhure masina musa. Ō sehe ni buhera tiro: “Cohamana masuri masa ti yoari catiina jierara”, ni yahua tire tiro. To ā nichū tuhoa payu Efeso macaina, jipihitiroi paina Asia yahpa macaina cūhū tí buheare “Potocā tjira”, nia tire. ²⁷Á nia mari dahraare masa ñano durucuhto cua yuhduara. Á yoa masa mari cohamaco Artemisa ya wuhure “Wiho jiri wuhū jira”, ni cohāboca. Ti ā cohāchū ticoro jipihtina Asia yahpa macaina, jipihtiri yahpa macaina ti ño payoricoro to jipachuta to tuaa butiarohca. Á jia masa baharopu jiina ticorore masieraboca — niha Demetrio tinare.

²⁸To ā nichū tuhoa tina sehe tuaro sua, sañurucuha:

—Artemisa Efeso macaina mari yacoro cohamaco tuaricoro jira —ni sañurucuha tina.

²⁹Á jia Efeso macaina jipihtina sañurucu yuhdua, tuho masia pihtia wahaha. Á waha, Gayore, Aristarco cūhure ñaha, masa ti cahmachunopu tinare waja wahcāha. Gayo, Aristarco mehne Macedonia macaina jia, Paulo mehne tiniina jia tiha. ³⁰Á jia Paulore masa चाहai to waha duachū, Jesu yaina sehe tirore waha dutieraha. ³¹Á jia paina tí yahpa macaina puhto, Paulo mehne

macaina jia, ti cahamacare yahu dutiha Paulore:

—Masa ti cahmachunopu wahai tjiga —ni yahu dutiha puhto Paulore.

³²Á jia tói cahmachuina mehne macaina sehe payu “¿Dohseana tana mari cahmachuna nijari?” ni masieraha. Á jia tina sañurucu namoha. Ahrie sehepu jiina soro ni, sañurucuha. Paina cūhū soro ni sañurucuha. ³³Á jia judio masa sehe Alejandro wama tirirore masare yahu dutimaha. Á jiro Alejandro “Dihta mariahga”, nino to wamomaca mehne cjātuha. “Ahrina säre judio masare tuhtia nina”, ni tuhuturo judio masare ducata duaro, durucumaha. ³⁴Wiho mejeta tiro judio masuno to jichū ñua masa jipihtina cūno potori pu hora waro sañurucuha:

—Artemisa, Efeso macaina mari yacoro cohamaco tuaricoro jira —ni sañurucuha tina.

³⁵Ti ā ni sañurucuchū ñuno, Efeso macaina puhtoare yoadohoriro masare, “Dihta mariahga”, ni yahuha tinare.

—Musa Efeso macaina tuhoga. Efeso macaina tuaricoro cohamaco Artemisa ya wuhū cohtaina mari jichū jipihtia yahpari macaina masina. Á jia muanopu bora tari masure ñu wihboina mari jichū cūhure masina masa. ³⁶Á jia paina “Ahri potocā jierara”, ni masierara. Á jina suaena tjiga musa. Noano tuhutuga musa. ³⁷Ahrina musa ñaha taina mari cohamacore ñano ni durucuerare. Á yoa tina cohamana wuhusepure sã, yacaerare. Á jina noano yoaga musa. ³⁸Á jia Demetrio, plata dahrainina mehne ahrinare musa ñahainare yahusã duaa, buhiri tiare cahnoina sehere yahusã-jaro tina. ³⁹Pari turi cahmachuna noano mehne cahmachuga. Musa yoiriro sehe yoaena tjiga. ⁴⁰Michare musa sua, sañurucurire mari puhto tuhoa, “Marine cohā nica”, ni tuhotuahca tina. Á jina musa ni sañurucurire tinare noano potu

yahu masieraja mari —niha puhtoare yoadohoriro masare.

⁴¹ Ā ni yahu tuhsu, “Tó puro tjira. Wahaga”, niha tiro masare.

Macedonia yahpapu cūhure, Grecia yahpapu cūhure Paulo suha

20 Ti ā wahari baharo, Paulo sehe Jesu yainare pji cahmachu yahu quihōha. Yahu quihō tuhsu, tinare wahchechu yoa, tinare coha sitiha. Coha siti tuhsu, Macedonia yahpapu waha wahaha. ²Tópu su buhe, tí yahpai jia macari macainare Jesu yainare wahchechu yoaha tiro. Tinare buhe tuhsu, Grecia yahpapu suha tiro. ³Tói tiro tia sū waro jiha. Tói jirucuma, Siria yahpapu pahāa waha duamaha. Wiho mejeta judio masa cohtamaha tirore naha duaa. Ā jiro Paulo pa mahapu, Macedoniapu wahari mahapu manoputa majare tjuaa wahaha tjoa.

⁴ Ā waharo Asiaputa suha. Tói Berea macariro Sópatro wama tiroiro Pirro macuno Paulore piti ti wahcāha. Ā yoa Tesalónica macaina Aristarco, Segundo cūhu tirore piti ti wahcāha. Tuhsu, Derbe macariro Gayo wama tiroiro Timoteo cūhu tiro mehne wahaha. Asia macaina Tíquico, Trófimo cūhu Asiapu tirore piti ti wahcāha. ⁵Tiro mehne macaina to pano waha, Tróade wama tiri macapu tirore cohtari jire. ⁶Ti ā cohtachu bucuaerari pāore ti chua bosome numuri baharo sã sehe Filipoi jiina dohoriamehne waha, cinco dachori pahā, Tróadepu sã tinare mu sui. Siete dachori waro jii tópure.

Tróadepu Paulo tinino wahaha

⁷ Domingo jichu Jesu yaina cahmachu pāore duhu payore Santa Cena yoa taa. Ti ā yoahito pano Paulo tinare buhere. Ā yoaro Paulo pa dachoi wahahtiro jiro yoari pja tiro buhere. Nami dachoi macapu buhe duhuro taro nimare. ⁸ Ā

jina mūano macari tahtiai payu poca sihāa poca jiri tahtiai cahmachui sã. ⁹Paulore to tuhoro watoi, cūiro wahmuno Eutico wama tiroiro mahari sopaca cahai mūja pja dujire. Duji, Paulo tinare yoari pja to buhe namochu wahmunore wujo tare. Wujo ta, tiro carī mūa, tia casario buipu dujiriro majare bora waha. Bora waha, yaria yuhdua waha. To yariari baharo tina tirore yariariro cjiropure na wahcō dapore. ¹⁰Ti ā yoachu nūno Paulo dujia, wahmunore cja suhsure. To ā yoari baharo Jesu yainare ō sehe ni yahure tiro:

—Yajeripohna nāena tjiga. Yariarara ahriro. Catira —nire Paulo sehe.

^{11–12} To ā nichu wahmuno yariariro cjiro masaa waha. To ā masachu nūa tina wahche yuhduare. Ā wahchea mūano macari tahtiapu mūja, pāore duhu payore Santa Cena yoa taa. Ti ā yoari baharo yoari pja Paulo tinare buhe namore tjoa. Pu bohreahto panocāpu tinare buhe duhure. To buhe tuhsuchu waha wahai sã.

Paulo Tróadepu jiriro waha, Miletapu suha

¹³ Paulo pano dohoriamehne Asōpu sã sehe su muhtai. Paulo sehe mahapu waha duare. Paulo to niriro sehetā Asōpu tirore sã piti bocai. ¹⁴Tirore sã piti bocachu, sã mehne tiro samure dohoriapu. Tia mehne waha, Mitilenepu sã sui. ¹⁵Tópure su yuhdua pa dachoi Quío wama tiri nucore yuhduai sã. Pa dachoi Samopu sui sã. Pa numu sehere Miletapu sui sã. ¹⁶ Paulo Pentecoste dacho waroi Jerusalēpu su duare. Ā jiro Asia yahpapu yoari pja ji duarerare. Ā jiro Efesore potu yuhdua, Miletapu wahā sui sã.

Paulo Efeso macainare Jesu yainare puhtoare yahuha

¹⁷ Ā jiro Paulo Miletapu jiro, Efeso macainare Jesu yaina puhtoare pjirocare

tiro. ¹⁸ Ā to pjirocari baharo tina Paulo cahapu wihire. Ti wihichu ñuno tinare Paulo õ sehe ni yahure:

—Asiapu coã wihicu musa mehne yu yoirire masina musa. ¹⁹ Musa mehne jicu ne soro nino marieno Jesu, mari puhtoro yare yoaã tii yuhu. Ā yoacu musare pja ñui. “Musare yuhdurucaja”, nierahi yuhu. Judio masa yuhure ñano ti yoapachuta Cohamacu yare yoaã tii yuhu. ²⁰ Musa noano wahahtore cahmacu musare buhe pahñonocai yuhu. Masa ti ñurocaroi, ã yoa musa wuhusepu cuhure buhei yuhu. ²¹ Ā yoa judio masare, judio masa jieraina cuhure cño potori buhei yuhu. “Musa ñaa yoari buhiri tiare masi, Cohamacu mehne tjuaahga. Ā yoa Jesu mari puhtorore wacũ tuaga”, ni yahui yuhu. ²² Ā yoa mipure Espiritu Santo to dutiriro seheta Jerusalēpu wahai nija. Yuhu tōpu wahacu yu dohse wahahtore masieraja yuhu. ²³ Espiritu Santo to yahuri dihtare masija. Ō sehe nihre Espiritu Santo yuhure: “Nohoi mu sua macaripepu muhu ñano yuhduihca. Ā jia muhure peresu yoaahca”, nihre Espiritu Santo yuhure. ²⁴ To ã nipachuta noaa buheare, Cohamacu masare to cahña buheare yahuhtiro cjihto jija. Jesu mari puhtoro to yoa dutirire yoa pahño duaja. Ahrire yoariro jicu, yu yariahtore cuieraja yuhu.

²⁵ Musa mehne jicu puhtoro Cohamacu to suho jiare yahua tii yuhu musare. Mipure ne musare pari turi ñusi yuhu. Ahrire masija yuhu. ^{26–27} Ā masicu michare ahrire yahuja musare. Jipihitia Cohamacu yare yahui yuhu musare. Ā jiro jipihtina musa mehne macaina Cohamacu yare cahmaeraina ti jichu ya buhiri jierara. ^{28–29} Musa basi noano yoaga. Ā jina Jesu yainare Espiritu Santo musare to ñu wihbo dutiinare ñu wihboga. Ovejare ñu wihboina ovejare ti ñu wihboro seheta Jesu yaina cuhure

ñu wihboga musa. Cohamacu macño to yariaro to di cohãno mehne Cohamacu tinare to yaina cjihti yoare. Yu õre wahari baharo paina ñaina sehe yairo ovejare to chu cohãno seheta Jesu yare musa yoaborire dojomehneahca. Ā jina Jesu yainare noano ñu wihboga. ³⁰ Baharopure paina musa mehne macaina sehe Jesu yainare mahño, paye buheare tuho dutiahca. Ti ã dutichu tina tuhohto cua yuhduara. ³¹ Ā jina noano yoaga musa. Tia cuhma waro dachoripe, ñaminipe pja ñua mehne buhei yuhu musa jipihtinare. Tíre noano wacũga musa.

³² Mipure yu wahari baharo, Cohamacu musare ñu wihborohca. Masare to cahña buheare musa basi cahma buhena, noano jinahca musa. Cohamacu to buhea mehne musare wacũ tua namochu yoarohca. Baharopure to yainare “Noano yoaitja”, to niriro seheta musa cuhure noano yoarohca. ³³ Musa niñerure, musa suhti cuhure “Yuhure waga”, nierahi musare. ³⁴ Yu basi dahra wapatai yu ya cjihtire. Ā yoa yu cahmaare, yuhu mehne macaina ti cahmaa cuhure yu dahraa wapatai mehne nahi. Yu ã yoirire masina musa. ³⁵ Mari õ sehe tuaro dahrana paye baro cjuærainare yoadohoro cahmana marine. Ahrire musare yoa ñoi yuhu. Jesu mari puhtoro to niri cjiire wacũga musa. “To wachu ñahariro yuhdoro wariro sehe wahchera”, niri jire Jesu to basi —ni yahure Paulo Jesu yainare.

³⁶ Ā ni batoa Paulo tina mehne na tuhcuca caha su, Cohamacure sinire. ³⁷ To ã sini batoachu tina jipihtina Paulore cã suhsu, wahsupu wihmi, ti ihre. ³⁸ “Musare pari turi ñusi yuhu”, pano to nichu tuhoa tuaro cahyare tina. Ā jia tirore tju nunu ti buhare pu pitamahapu. Tōpu sãre ñu nunu tire sã wahachu.

Paulo Jerusalēpu pari turi wahaha

21 Jesu yainare “Wahana nija” ni, dohoria mehne Cos wama tiri nūcopu poto waha, pahā sui sã. Pa dachopu Roda wama tiri nūcopu pahā su, yuhdua, Pátara wama tiri macapu sui sã. ²Pátarai jina, Feniciapu wahahtiare, dohoriare bocai sã. Á jina tia mehne wahai sã. ³Á wahana Chipre wama tiri nūcore poto nū yuhduai sã. Cō buhusehe sehe jire tí nuco. Tí nūcore yuhdua, Siria wama tiri yahpapu sui sã. Á jina dohoria macaa pachere dohoria macariro Tiro wama tiri macai to dure mochū, tói pahsasini. ⁴Tói Jesu yainare ñuna, siete dachori waro tjuasini sã tí macai. Á jia tó macaina Jesu yainare Espíritu Santo to yahuriro seheta tina Paulore Jerusalēpu waha dutieramare. ⁵Ti á nipachuta tí macare siete dachori sã jiri baharo, wahai sã. Sã wahahto panocã jipihtina Jesu yaina, ti namosānumia mehne, ti pohna mehne, tí maca duhtu cahai sãre ñu tjuua wahare. Á jina jipihtina sã paduroi su, na tuhcuca caha su Cohamacure sinii. ⁶Sã á siniri baharo, “Wahana nija” ni, tinare cjã suhsu batoa, wahai sã. Sã wahachu ñu nunu ti, tina sehe majare majaa wahare ti ya wuhusepu.

⁷Tiro wama tiri macai jiina wahana Tolemaidapu wahā sui sã. Tóihita pjiri mare waha batoai sã. Tí macai su, Jesu yainare “Coyea, ¿jimajari?” ni, cū dacho sã tina mehne jisini. ⁸Á yoa pa dachoi tjoa Cesarea wama tiri macapu sui sã. Tópu su, noaa buheare yahuriro Felipe wama tiriro ya wuhupu sui. Á jina tiro mehne tjuai sã. Felipe Jesu yaina ti siete beseina mehne macariro jire. ⁹Tuhsu, tiro pititiaro numia pūcuro jire. Tí numia sehe Cohamacu yare yahua numia jire. Nuhmia jire. ¹⁰Tópu sã mahaa dachoricã sã jiri baharo, Agabo wama tiriro Cohamacu yare yahu turiariro Judeapu jiriro sãre ñuno wihire. ¹¹Á wihiro tiro

Paulo ya dare tuã dihori dare na, to basi to dahporire, to wamomacarine duhte cayo õ sehe ni yahure:

—Õ sehe nire Espíritu Santo: “Ahri dare cjuariro Jerusalēpu to suchu, judio masa áta duhteahca tirore. Duhte tuhsu, judio masa jierainare waahca tina tirore”, nire Espíritu Santo —ni yahure Agabo.

¹²To á nichu tuhona, sã Cesarea macaina mehne Paulore tuaro cahii sã. Tirore Jerusalēpu waha dutieramai. ¹³Sã á nichu Paulo sehe õ sehe ni yuhtire:

—¿Dohse ni tiina nijari musa? Yuhu sehene cahyachu yoaca musa. Tina yuhure peresu ti yoachu noanohca. Yuhu Jerusalēpu Jesu mari puhtoro yare yu yoari buhiri yu yariachu noanohca — nire Paulo sãre.

¹⁴“Wahaeraja”, to nichu tuho duana nimai sã. To “Wahaihtja” to nichu, á tuhotunocahi sã. Õ sehe nii:

—Mari puhtoro to cahmano seheta yoajaro —nii sã.

¹⁵Tíre sūhudu batoa, sã yare cahno, wahaa wahai sã Jerusalēpu wahana. ¹⁶Tópu sã wahachu mahainacã Cesarea macaina Jesu yaina sehe sã mehne wahare. Á yoa tina mehne macariro Chipre macariro Mnasõ wama tiriro ya wuhupu sui sã. Tiro yoari pja Jesu buheriro jire. Á jiro to ya wuhu sã caríhti wuhu jire. Tí wuhui sã carini baharo, Jerusalēpu sui sã.

Paulo Santiagore ñuno wahaha

¹⁷Jerusalēpu sã suchu, tó macaina Jesu yaina sehe “¿Wihimajari?” ni, wahchea mehne piti bocare sãre. ¹⁸Pa numui Paulo sã mehne Santiagore ñuno sure. Sã tópu suchu tói jipihtina Jesu yaina puhto a jire. ¹⁹Tói ti jichu ñuno Paulo tinare to wamomaca ñahari baharo judio masa jierainare to buherire yahu pahñore Jesu yainare. Cohamacu

to yoadohoa mehne to yoirire yahu pahñore. ²⁰To ã ni yahuchũ tuhoa, “Cohamacũ noariro, tuariro jira”, ni ño payore tina sehe. Æ ni tuhsũ tina Paulore õ sehe ni yahure:

—Coyeiro, mipũre payũ judio masa Jesure wacũ tuaina jira. Tĩre masina mũhũ. Æ jia tina õ sehe ni tuhotura: “Cohamacũ to dutiare, Moise cjiropũ marine to cũrĩre marine yoa pahñono cahmana”, nia nina. ²¹Õ sehe ni namona tina. “Pa sehẽpũ jĩinare judio masa jieraina watoi jĩinare judio masare Cohamacũ Moise cjirore to cũri cjiĩre cohã dutiha Paulo”, nimare õ macaina judio masa mũhũre. “Paulo judio masa pohmare mahari cahsarocãre yĩho na dutierara”, nimare mũhũre tina. “Judio masa ti yoa tiare Paulo duhu dutira”, ni ahri cũhũre ni yahuwajara mũhũre. ²²Æ jia mũ õre wĩhichũ tuhoa tina cahmachuahca mũhũre tuhtia taa. Æ jicũ õ sehe yoaro cahmana mũhũre. ²³Mũhũre sã dutiro seheta yoaga. Mipũre õre pititiaro mũa Cohamacũre wacũina “Õ sehe yoanahĩja”, niina jira. ²⁴Tina mehne wahaga. Æ jia Cohamacũ Moise cjirore to dutiriro seheta ti basi Cohamacũ yare yoa taa ti dutiare yuhdurũcaare cosaa nina. Mũhũ cũhũ ãta yoaga. Æ yoacũ ti ã yoahĩ wapare wapaga mũhũ sehe. Mũ ã wapari baharo ti pjoarire wũha duti masina tina. Mũ ã yoachũ ñua masa mũhũre ti nia mahñori jichũ masiahca jipihtina. Cohamacũ Moise cjirore to cũri dutiare yoiriro mũ jichũ masiahca tina. ²⁵Wiho mejeta judio masa jieraina Jesu yaina sehẽre sã joari pũre waroca tuhsũ. Õ sehe ni, joai sã. “Cohamacũ jira’, ti nia masũrine ño payo ti duhu payoa chuare, dire, wamũa ti ñaha wajĩinare wahĩquinare chuena tĩjiga mũsa. Æ jina numia mehne ñano yoena tĩjiga. Numia cũhũ mũa mehne ñano yoena tĩjiga”, ni yahu joahi sã joari pũpũre — nire tina Paulore.

Cohamacũ wũhũpũ judio masa Paulore ñahaha

²⁶Ti ã ni durucuri baharo pa dacho Paulo sehe pititiaro mũa mehne ti basi Cohamacũ yare yoa taa ti dutiare yuhdurũcaare cosaa taa, Cohamacũ wũhũpũ sãa wahaha. Tĩ wũhũpũ sãa sũro, tinare yahuha Paulo: “Õpe dachori dũhsara mũsa cosahto”, ni yahuha tiro pititiarore. Æ jia ti cosa batoari dachoi tina cãina Cohamacũre wahĩquinare ti wahti dacho jire.

²⁷Æ yoa ti cosa pahñoboriro mahancã dũhsachũ waro Cohamacũ wũhũpũ Paulo to jichũ Asia yahpa macaina judio masa sehe ñũha tirore. Æ ñua Paulore quti dojomehne, tĩ wũhũpũ jĩina jipihtinare tiro mehne suachũ yoaha tina. Æ suaa judio masa Paulore ñaha, ²⁸õ sehe ni sañurucuha:

—Mũsa sã coyẽa Israe masa sãre yoadohona taga. Ahriro jira marine dojomehneriro. Ahriro Cohamacũ Moise cjirore to cũri dutiare ahri wũhũ cũhũre “Wiho jia jira”, ni buhe sito tara jipihtinare. Æ yoa tiro Cohamacũ wũhũpũre judio masa jieraina cũhũre na sãare. Æ yoaro ahri wũhũre ñaa marieni wũhũre tiro dojomehnere —ni sañurucuha judio masa Asia yahpa macaina tó macainare.

²⁹Tó pano Jerusalẽi Paulo Tróximo wama tiriro mehne to jichũ judio masa ñua tiha. Tróximo sehe Efeso macariro judio masuno jierariro jire. To ã jichũ masia õ sehe ni tuhotuha tina: “Paulo Tróximore Cohamacũ wũhũre na sãano nica”, ni tuhotumaha judio masa.

³⁰Masare ã ni yahu ti sañurucuri baharo tĩ maca macaina payũ tuaro suaha. Payũ mũroca ta, Cohamacũ wũhũ jirirore Paulore ñaha waja wijaa wahaha. Æ wijaa tuhsũ, tĩ wũhũ sopacarire bihaha tina. ³¹Æ yoa tina tirore wajãa taa nimaha. Ti ã yoachũ ñua paina sehe “Jipihtina Jerusalẽ macaina sua, sañuru-

cua nire”, ni yahua wahaha surara puhtorore. ³²Ti ā nichu tuhoro surara puhtoro sehe to surarare, ti dutiina cūhure cahmachuroca, tina mehne Paulore wajā duaina cahapu muroca wahcā, suha. Surara ti suchu űna Paulore cjāmaina cjā duhunocaha. ³³Ā jiro surara puhtoro Paulo cahapu su, tireore űnaha, pua da comaa dari mehne tireore duhte dutiha. Ti duhte tuhsuchu űn, surara puhtoro Paulore cjāmainare sinitu űnaha:

—¿Diro baro jijari ahriro? ¿Yaba buhiri tireore ā yoari masa? —ni sinitu űnaha tiro tinare.

³⁴To ā sinituchu tuhoa masa sehe “Ō sehe yoare tiro” ni, paina cūhu soro ni sañurucu, yahuha surara puhtorore. Ā ni ti sañurucuchu surara puhtoro noano tuhoeraha. Ā jiro tiro surara ya wuhupu Paulore naa dutiha. ³⁵Ti wuhupu su, Paulo mujari escadai to mujano cahachu masa sehe tireore cjā duaa nimaha. Ti ā yoachu surara sehe tireore na wua, na mujaa wahaha. ³⁶Masa tinare payu nunu ti, sañu nunu tihaa:

—Tirore wajānocahga —ni sañuru-cuha tina Paulore.

Paulo “Ne masare űnaho yoeraja yuhu”, ni yahuha

³⁷Ā yoa Paulore ti wuhupu ti peresu yoahito pano, Paulo sehe surara puhtorore ō sehe ni siniha:

—Yuhu muhu mehne suhudu duaja —ni siniha Paulo.

—¿Muhu griego masa yare durucujari? ³⁸¿Sohō jiro, Egipto macariro jierajari muhu? Tiro masare ti puhtoare cohā dutiro, cuatro mil puhtoare cohā duaina sehere masa marienopu naari jire. ¿Tiro jierajari muhu? —niha surara puhtoro Paulore.

³⁹To ā nichu tuhoro Paulo ō sehe ni yuhtiha:

—Tiro jieraja yuhu. Judio masuno jija. Tarsoi Cilicia yahpai jiri macai masa ba-

juai yuhu. Wiho jiri maca macariro jieraja yuhu. Yuhu ahriha masa mehne durucu duaja yuhu —niha Paulo tireore.

⁴⁰To ā nichu tuhoro surara puhtoro sehe tireore durucu dutiha masa mehne. Ā jiro Paulo mujari escadai ducuro to wamomacari mehne “Dihta mariaha”, niha masare. To ā yoachu űna, dihta mariea pihtia wahaha. Ti dihta marieachu űn, Paulo judio masa ya mehne yahuha tinare.

22 —Yū coyey, yū yoarire yahuihtja masare. Yū yahuchu tuhoga masa —niha Paulo.

²To ā nichu Paulo judio masa ya mehne to durucuchu tuhoa masa sehe dihta marieina tjuaha. Ā jiro Paulo tinare ō sehe ni yahuha:

³—Yuhu judio masunota jija. Tarso wama tiri macai, Cilicia yahpai jiri macai masa bajuai yuhu. Wiho mejeta ahri maca Jerusalēihta bucui yuhu. Tuhsu, yuhure Gamalie wama tiriro buhea tire. Ā jicu yuhu mari űuchusuma cjiri dutiare noano buhei. Mipure Cohamacure masa yoaro sehetu yuhu cūhu űo payoa timai. ⁴Ā jicu Jesu yainare űano yoaa ticuru yuhu. Cāina tinare wajāa ticuru yuhu. Muare, numia cūhure űnaha, peresu yoaa tii yuhu. ⁵Sacerdotea bui puhtoro, judio masa bucuna mehne yū tuahti pūri cjihtire Jesu yainare űnaha dutia pūrine yuhure joabasare. Mari coyeyare Damasco macainare ti pūrine űoi tai nimai Jesu yainare űnaha tai. Tinare űnaha, na ta peresu yoai tai nimai. Jerusalēpu tinare na ta duamai buhiri dahrei tai. Ō sehe yū nichu sacerdotea bui puhtoro, judio masa bucuna cūhu noano masina —ni yahuha Paulo.

Paulo Jesu yairo to waha ducarire yahuha

(Hch 9.1-19; 26.12-18)

⁶Ā ni tuhsu ō sehe ni yahu namoha:

—Ā yoa cohari pja jichu, Damascopu yu sui cahachu waro manopu wacuenoca si siteroca boroa tire yuhure. ⁷To ā si siteroca borochuta yuhu yahpapu bora caha suai yuhu. Yu bora caha sari baharo durucuro coa tare yuhure. “Saulo, Saulo ¿dohseacu yuhure nāno yoajari?” ni durucuro coa tare yuhure. ⁸“Puhtoro, ¿diro baro jijari muhu?” ni sinitui yuhu. “Yuhu Jesu Nazare macariro, mu nāno yoariro jija yuhu”, ni yuhtire yuhure tiro. ⁹Yu ā wahachu yuhu mehne macaina buhriarore nure. Wiho mejeta yuhu mehne to durucuchu tuhoerare tina. ¹⁰“Puhtoro, ¿dohse yoahcari yuhu?” ni sinitui Jesure. “Wahcārucaga. Damascopu wahaga. Tói mu wahachu, mūhure jipihitia yu yoa dutihtire paio yahurohca mūhure”, nire tiro yuhure. ¹¹Tuaro to minoa siterocachu, yu capari wapoahare yuhure. Ā jia, yuhu mehne macaina yu wamomacare naha, Damascopu tuā wahcāre yuhure.

¹²Tói Anania wama tiro, Cohamacure nō payoriro, marine Cohamacu dutiare yoa pahñoriro jire. Tó macaina judio masa jipihtina ti nō payoriro jire. ¹³Ā jiro tiro yu cahi wihi taruca yuhure yahure. “Coyeiro Saulo, nūga pari turi tjoa”, nire tiro. To ā niri baharo pari turi nūi yuhu. Ā nū ducacu tirore nūi yuhu. ¹⁴Yu ā nūchu tiro Anania yuhure yahure: “Cohamacu to cahmaare noano masihtirore panopu bese tuhsuyhti mūhure. Ā jiro ‘Yu macu noarirore nū, tuhorohca’, ni yahuyhti mūhure Cohamacu panopu. Tiro jira mari nūchusuma mūna ti nō payoriro. ¹⁵Ā jicu mūhu mu nūrire, mu tuhorire yahuihca mūhu jipihtinare. ¹⁶Ā jina mipure yoari pja jiena tjiijhna. Wahcārucaga. Ā jicu bautisariro jiga. Jesure mu sinichu mu nāare yoari buhirire cohānohca”, nire yuhure tiro —niha Paulo.

Paulo judio masa jierainare to buherire yahuha

¹⁷Ā ni tuhsu Paulo ō sehe ni yahu namoha:

—Ā yoa tuhsu yuhu Jerusalēpu tjua ta, Cohamacu wuhupu Cohamacure sinii sui. ¹⁸Yu tói jichu Jesu yuhure bajua tire. Ā bajuaro yuhure yahure. “Jerusalē macaina yu yare mu yahuchu tuho duaerara. Ā jicu cjero pa sehēpu wahaga”, nire Jesu yuhure. ¹⁹To ā nichu tuhocu yahui tirore: “Puhtoro, mu yainare judio masa buhea wuhusei jinare yu naha, cjāri cjirire masina Jerusalē macaina. ²⁰Ā jicu mūhure yahurirore Estebā sehēre ti wajāchu nūcu ‘Noano yoa wajāna’, nimai. Tirore ti wajāchu ti suhtire cjuabasai yuhu. Tí cūhure masina ahri maca macaina. Ā jia yu yahuchu tuhoboca yuhure”, ni yahui yuhu Jesure. ²¹Yu ā nichu tuhoru Jesu yuhure ō sehe ni yahure: “Yoaropu judio masa jierainare buhehtirore warocaihtja mūhure. Ā jicu wahaga mūhu”, nire yuhure yu puhtoro —niha Paulo masare.

Surara puhtoro Paulo mehne durucuha

²²To yahu muhtari dihtare noano tuhomaha masa. Wiho mejeta judio masa jieraina cahi Jesu Paulore to warocahire to yahuchu tuhoa tina sañurucu ducaha tjoa:

—Ahriro mipu pinihtare yariawahnojaro —ni sañurucuha tina.

²³Ā jia tina sañurucu namo, sua mehne ti suhtire wahba siteruca, dihta mehne docaha. ²⁴Surara puhtoro surara ya wuhupu Paulore na sāa dutiha to surarare. Ā jiro surara puhtoro “¿Dohse yoa Paulo mehne sua ā nāca sañurucua nijari masa?” ni sinitu duamaha. Paulore tīre sinituro taro, yuta dari mehne tjana dutimaha tirore. ²⁵Wiho mejeta tirore ti

dahteri baharo, tiro cahai jiriore surara puhtoro ò sehe ni yahuha Paulo:

—Yuhũ Roma macariro jija. Ā jina “Ñano yoariro jira ahriro”, yuhũre ni yahusã masierara m̄sa. Ā yahusã masierana yuta dari mehne yuhũre tjana masierara m̄sa —niha Paulo tireore.

²⁶To ā nichũ tuhoro surara puhtoro, to bui puhtoro ò sehe ni yahuro wahaha:

—Ahriro Roma macariro jira. Ā jicu noano yoaga tireore —ni yahuha tiro to puhtoro.

²⁷To ā niri baharo surara bui puhtoro sehe Paulore sinituro wahaha:

—ĴPotocãta m̄hũ Roma macariro jija? Yahuga yuhũre tíre —niha tiro.

—Tiro tjija yuhũ —ni yuhũtiha Paulo.

²⁸To ā nichũ tuhoro surara bui puhtoro sehe tireore ò sehe ni yahuha:

—Yuhũ Roma macariro ji duacu niñeru pjíro wapai —niha tiro.

—Yuhũ Roma yahpa macari macapũ masa bajuai. Ā jicu Roma macariro jija —niha Paulo.

²⁹To ā nichũ tuhoa tireore tjanaborina wahaa wahaha.

Ā jiro Paulo Roma macariro to jiriore jichũ masino, tireore comaa dari mehne ti dahteri cjirire wacũno, cui niha surara puhtoro sehe.

Paulo judio masa puhtoro yahuha

³⁰Ā yoa surara puhtoro judio masa Paulore ti yahusãrire noano masi duaha. Ā masi duaro pa dachopũ comaa darire tireore to pjã dutiri baharo, sacerdotea puhtoare, judio masa bucuna mehne cahmachu dutiha surara puhtoro. To ā cahmachu dutiri baharo tiro tópu Paulore na wahcã, ti pano duhu dapoha tireore.

23 Ā jiro Paulo judio masa bucunare ñũ piti boca, ò sehe ni yahuha:

—Coyea, Cohamacũ to ñũrocaroi jipihã dachoripe noano yoarucuja yuhũ —niha Paulo.

²To ā nichũ tuhoro jipihãina sacerdotea bui puhtoro jiriore Anania sehe Paulo duserore cjã dutiha. ³To cahai ducunare cjã dutiha. Tireore ti cjãri baharo Paulo Ananiare tuhtiha:

—Masa ti ñũrocaro dihtare noano yoariro jira m̄hũ. Masa ti baharo buhũsehei ñano yoa cohtariro jira m̄hũ. “Cohamacũ dutiare yuhũdũrcai nina”, yuhũre nipaihta yuhũre cjã dutira m̄hũ. Ā cjã duticu m̄hũ sehe dutiare yuhũdũrcai nica —niha Paulo tireore.

⁴To ā nichũ tuhoa Paulo cahai ducuna ò sehe niha tireore:

—Cohamacũ to beseriro sacerdotea bui puhtoro ñano durucui tjiga m̄hũ —niha tina Paulore.

⁵Ti ā nichũ tuhoro Paulo ò sehe ni namoha tjoa:

—Coyea, tiro to sacerdotea bui puhtoro to jiare masierahi yuhũ. Ā jii ā nimacanocati yuhũ. Cohamacũ yare ti joari cjiri ò sehe ni yahura tireore: “Mũ ya maca macaina puhtoro ñano ni, durucui tjiga”, ni joaa tiha —niha Paulo tinare pjãno.

⁶Ā yoa tói pũa curua macaina jiha. Cũ curua saduceo curua macaina jiha. Pa curua sehe fariseo curua macaina jiha. Pũa curua ti jichũ masino, Paulo judio masa bucunare tuaro sañurucu ò sehe ni yahuha:

—Coyea, yuhũ fariseo curua macariro jija. Fariseo curua macariro macũno tjija yuhũ cũhũ. “Yariaina masa m̄jaahca”, yũ ā niri buhiri yuhũre ñano yoa duara m̄sa —niha Paulo.

⁷To ā nichũ tuhoa fariseo curua macaina, saduceo curua macaina ti basi cahma tuhtiha. Ā jia ti basi pũa curua tju waha. ⁸Saduceo curua macaina ò sehe niina jiha: “Yariaina masa m̄jasi. Espiritua, anjoa cũhũ ne mariahna”, niina jiha. Wiho mejeta fariseo curua macaina sehe tina yoaro sehe nieraha. Ā jia Paulo “Yariaina masa m̄jaahca” to nichũ tina

ti basi cahma tuhtiha. ⁹Ā cahma tuhtia, tuaro sañurucuha. Ā yoa fariseo curua mehne macaina judio masa buheina wahcārūca, tuhti, ō sehe ni yahuha:

—Ahrīro Paulo ñano yoerare. Ā jiro espīritu o anjo, potocā tiro mehne durucuro jiboca. [Ā jina ahrīrore buhiri dahrena, Cohamacūre ñū tuhtiina jiboca mari. Ā yoina jiena tjiga mūsa] —niha tina.

¹⁰Ti ā niri baharo, tina jipihtina cahma tuhti, tuaro suaha. “Ti basi cahma sua sayo, tirore wajāboca”, ni cuisāaha surara puhtoro sehe. Ā jiro Paulore, masa watoi ducurore na wio, to ya wuhupū na ta dutiro warocaha to surarare.

¹¹Pa ñamihi puhtoro Jesu Paulo cahai ducuro, ō sehe ni yahuha tirore:

—Wacū tuaga. Mipūre ōre Jerusalēi yū ya buheare yahure mūhū. Tó seheta Romapū cūhure yahui wahaihca mūhū —niha puhtoro Jesu Paulore.

Judio masa Paulore wajā duamaha

¹²⁻¹³Pa dacho bohrearo iudio masa cahmachu, ti basi ō sehe ni cahma durucuha:

—Ō sehe yoajihna. Paulore wajājihna. Cohamacūre ō sehe ni yahu cūjihna. Ne mari sihnisi. Ne chūsi, pū tirore mari wajāri baharopū. Tirore mari wajāerachū, mari sehere Cohamacū buhiri dahrejaro —niha tina ti basi.

Tina cuarenta bui curero judio masa jiha. ¹⁴Ti ā niri baharo tina sacerdotea puhtoare, bucūna cūhure yahua wahaha:

—Paulore sā wajāhto pano chūare sā chūeraja. “Tirore sā wajāerachū Cohamacū sā sehere buhiri dahrejaro”, nihi sā. ¹⁵Ā jina mūsa, bucūna mehne ō sehe ni pjirocaga. “Paulore pari turi sinitu duaja”, niga surara bui puhtoro. Mūsa ā niri baharo surara bui puhtoro na ta dutiga Paulore. Wiho mejeta Paulo

to ōre to wihiro cahachū waro tirore wajānahca sā —niha tina sacerdotea puhtoare.

¹⁶Wiho mejeta Paulo pjacamacūno ti ā ni durucuchū tuhoha. Ti ā nichū tuhoro waha, surara ya wuhupū Paulore yahuro sāaha. ¹⁷To ā yahuri baharo Paulo sehe cūiro surarare pjiroca, ō sehe ni yahuha tirore:

—Ahrīro wahmūnore puhtoro cahapū naahga. Ahrīro mū puhtoro yahu duaro nina —niha Paulo.

¹⁸To ā nichū tuhoro surara sehe Paulo pjacamacūnore to puhtoro cahapū na sū, ō sehe ni yahuha:

—Peresupū jiro Paulo sehe yūhure pjiroca, ahrīro wahmūnore mū cahapū naa dutihre. Ahrīro mūhure yahuro taro nihre —niha surara to puhtoro.

¹⁹To ā nichū tuhoro puhtoro sehe wahmūno to wamomacare ñaha tuā wahcā, masa marienopū tirore sinitu ñūha:

—¿Dohse nii tai niri mūhū yūhure? —niha tiro Paulo pjacamacūnore.

²⁰To ā sinituchū tuhoro ō sehe ni yahuha:

—Judio masa cūno potori, “Ō sehe yoajihna” ni, ñamichacapū judio masa bucūna cahapū mūhure Paulore naa dutiahca. “Bucūna Paulore pari turi sinitu duara”, ni mahñoahca. ²¹Wiho mejeta cuarenta bui curero mua tirore wajā duaina bucua caha duara. Tina tirore ti wajāhto pano chūare chūsi. Ā yoa sihnisi. “Tirore mari wajāerachū, Cohamacū mari sehere buhiri dahrejaro”, nire tina ti basi. Ā jia mipū mūhure Paulore na ta dutia tina sehe duhti cohta tuhsūhure, Paulore wajāa taa. Ā jicu ti yahua wihihū tinare yūhtii tjiga mūhū —ni yahuha wahmūno surara puhtoro.

²²To ā nichū tuhoro surara puhtoro ō sehe niha:

—Yuhure mu yahurire painare yahui tjiga —ni yahuha wahmunore.

Å ni tuhsu wahmunore “Wahaga”, niha tiro.

Paulore puhtoro Feli wama tiri cahapu warocaha

²³ Å ni tuhsu, surara puhtoro puaro to surarare pji wahcã, tinare õ sehe ni dutiha:

—Dos cientos surarare, setenta cawaloa bui pisainare, dos cientos doca yucu cjuaina mehne ti yare cahno dutina wahaga. Micha ñami nueve jichu Cesareapu wahanahca musa. ²⁴ Paulore cawaloare to pisahtinare cahnobasaga. Cesareapu puhtoro Feli cahapu, noano ñu nũu soga tirore —niha surara puhtoro.

²⁵ Å ni tuhsu papera joaro, õ sehe ni joaha tiro:

²⁶ “Yuhu Claudio Lisia muhure tuariro puhtoro Felire noa dutija. ²⁷ Judio masa ahriro Paulore ñaha, wajãmare. Å jicu tiro Roma macariro to jichu masicu, yu surara mehne tirore yoadohoi suhi. ²⁸ Å jicu tirore ti yahusãre masi duacu judio masa bucuna cahai nahi tirore. ²⁹ Å jicu tiro judio masa ya dutia dihtare to yuhdurucachu mari ya dutiare to yuhdurucaerachu ñucu, tirore perezupu cõ duaerahi. Yaba buhiri yariaro mariaha tirore. ³⁰ Å jiro judio masa tirore wajã dua, ti bucuna cahachu tuhoro paio yahure yuhure. To ã yahuri baharo Paulore mipure mu cahapu warocai nija. Å jicu tirore yahusãrinare to ñaa yoarire muhure yahu duti tuhsuhi yuhu”, ni joaha surara puhtoro.

³¹ Å yoa surara ti puhtoro to dutiriro seheta yoaha. Tí ñamine Antipatri wama tiri macapu Paulore na suha. ³² Pa dachoi paina surara cawaloa bui pisaeraina tí macai tjua taha ti ya macapu. Paina surara cawaloa bui pisaina dihta tirore na yuhdu wahcãha. ³³ Pu Cesareapu na

suha Paulore. Å jia surara puhtoro to warocari pure puhtoro Felire waha. Å jia Paulore na suha puhtoro cahapu. ³⁴ Tí ã wari baharo puhtoro tí pure to ñuri baharo tiro painare sinitu ñuha:

—¿Di yahpa macariro jijari ahriro Paulo? —ni sinitu ñuha tiro.

—Cilicia yahpa macariro jira —ni yahuha tirore.

³⁵ Tinare sinitu tuhsu, Feli Paulore õ sehe ni yahuha:

—Muhure yahusãrina õre ti wihichu mu yahuchu tuhohitja —niha Feli Paulore.

To ã niri baharo Herode ya wuhupu tirore cõha. Å jiro to muare tirore cohta dutiha puhtoro.

Paulo “Ñano yoerahi yuhu”, ni yahuha Felire

24 Cinco dachori baharo, Anania sacerdotea bui puhtoro, paina judio masa bucuna, dutiare mihniro Tértulo wama tiriro mehne Cesareapu suha. Å jia tina Paulore yahusã dua, puhtoro Feli cahapu suha. ² Å jiro Paulore tõpore ti na suri baharo Tértulo tirore yahusã ducaha. Å yahusã ducaro õ sehe ni yahusãha Felire:

—Muhu noano masiriro, sã puhtoro mu noano dutichu sã ahri yahpa macaina noano jinocaja sã cahmacheno marieno. Mu dutia mehne noaa sehere cohtotaro nina ahri yahpa. ³ Å jina sã noano jinocahna wahcheja. Å jina muhu mehne noano wahcheja. ⁴ Mipure mahanocã muhure cariboitja yuhu. Mahanocã muhu mehne suhudu duaja. Sãre tuhorocasinia muhu. ⁵ Ahriro sãre caribobiara. Jipihtia yahpari macainare judio masare ti sua sañurucuchu yoara ahriro. Å jiro masa ti basi cahma tuhtichu yoara ahriro. Å jiro nazareno wama tiri curua puhtoro jira. ⁶ Å jina Cohamacu wuhure ñano to yoa duachu ñuna sã ñahahi ahrirore. [Sã ña-

hari baharo sã ya dutiare to yũhdũrũ-cariro jichũ tirore buhiri dahre duamahi sã. ⁷Wiho mejeta surara puhtoro Lisia wama tirore tirore sãre tuaro mehne manocahre. ⁸Baharo tirore yahusãrinare mũ cahapũ waha dutihre Lisia. To ã nichũ tuhona tahi sã.] Mũhũ pinihta ahrirore sinitucũ, jipihtiare to ya buhirire masicũhca mũhũ —niha Tértulo Felire.

⁹To ã niri baharo paina judio masa “Tértulo to niriro seheta potocã tjira”, niha tina cũhũ. ¹⁰Ti ã ni yahusãri baharo puhtoro Feli Paulore yahu dutiha. Ō sehe ni yahuha Paulo:

—Payũ cũhmari ahri yahpa macainare mũ dutirire masija yũhũ. ã jicũ yũ yoarire mũhũre yahucũ wahcheja. ¹¹Doce dachorita wahara Jerusalẽpũ Cohamacũre yũ ño payori baharo. Mũhũ ahri potocã ti jichũ masi duacũ painare sinitu ñũga. ¹²Judio masa yũhũre Cohamacũ wũhũpũre boca ti ñahachũ masare ñano ni saũurucui nierahi. ã yoa masare sua saũurucũhũ yoai nierahi. ã yoacũ judio masa buhea wũhũsere, ti ya maca cũhũre ne ti nino sehe ñano yoaerahi. ¹³ã jia yũhũre yahusãrina sehe ti yahusãri cjirire “Ō sehe yoare ahriro”, ni yahu masierara mũhũre. ¹⁴Mipũ yũ yoarire yahuihtja mũhũre. Dóihã sã ñũchũsuma ti ño payorirore Cohamacũre ño payoja yũhũ cũhũ. ã jicũ to yare yoaja Jesu ya noaa buhea ti nino seheta. Ahrina “Jesu ya mahñopea jira”, ni durucura ahrina judio masa. Wiho mejeta Cohamacũ dutia, Moise cjiropũre to cũri cjirire tí cũhũre ño payoja yũhũ. Cohamacũ yare yahu mũhtaina cjiri ti joari cũhũre ño payoja yũhũ. ¹⁵Ahrina paina judio masa ti tuhuturo seheta Cohamacũ jipihtina masare yariainare noaina, ñaina mehne ti masa mũjachũ yoarohca. Yũhũ cũhũ ãta ni tuhutuja. ¹⁶ã jicũ buhiri mariaja yũhũ. Cohamacũ yũhũre tíre masina.

ã yoa masa cũhũ tíre masina. ã jii potocãta yahuja yũhũ mũhũre. ã jicũ noano tuhutonocaja.

¹⁷⁻¹⁸Paye cũhmarine pa sehẽpũ tiniriro jicũ Jerusalẽne tju wihi, yũ coyeare judio masa pjacũoinare niñerure wai tai nihi. Tju wihi Cohamacũre ño payoi tai to ya wũhũpũ samahi. ã jicũ Cohamacũ to cosa dutiriro seheta yũ basi yũ yũhdũrũcarire yũ cosari baharo wahiquirore wa duamahi tirore ño payoi tai. Tópũ yũ jichũ ahrina judio masa yũhũre bocahre. Ti bocachũ paina yũhũ mehne mariahare. Sua, saũurucuina mariahare. ¹⁹Wiho mejeta paina judio masa Asia yahpa macaina tói jihre. Tina yũ ñano yoachũ ñũrina jia yahusãa tajaro. ²⁰Ahrina õpũ jiina sehe judio masa bũcũna mehne yũ jichũ ñũina yũ ñano yoarire masia, tina cũhũ yahusãjaro. ²¹Cũnocã pinihtare yũhũre tina yahusã masina: Pano tina mehne jicũ õ sehe ni tuaro saũurucuihũ yũhũ: “Yariaina masa mũjaahca’, yũ niri buhiri, buhiri dahrera musa”, nihi tinare —ni yahuha Paulo Felire.

²²To ã ni yahuri baharo Feli õ sehe ni yahuha Paulore:

—Mipũ tó puro tjira. Surara puhtoro Lisia to wihiri baharo mũhũre yũ yoah-tore masiĩhca yũhũ —niha Feli Paulore.

Feli sehe Jesu yaina ti yoarire noano masi pahñoriro jiha.

²³ã ni tuhsũ, Paulore cohtariro surarare Feli noano ñũ nũnũ dutiha “Peresupũ jirore duhtiri”, nino. Wiho mejeta mahanoã ware to tinihtore. Paulo mehne macainare tirore peresupũ jirore yoadoho dutiro ã dutiha Feli.

²⁴Mahaa dachoricã baharo Feli to namono Drusila wama tiricoro mehne ta, Paulore pjihã. Feli namono sehe judio masono jiha. Paulore ti pjiri baharo, Jesucristore to wacũ tuaare Paulo sehe yahuha tinare. ²⁵ã yahuro quihõno

yoaare, ñaare yoa duaparota yoeraare, pihtiri dacho jichu Cohamacu masare to buhiri dahrethore yahuha Paulo. To ã ni yahuchu tuhoro Feli cuiro, Paulore õ sehe ni yahuha:

—Mipure waha. Baharo yuhure dahraa mariachu muhure pjihtja tjoa — niha Paulore.

²⁶ ã nino Paulo to niñeru wachu cahmamaha Feli. ã jiro tiro niñerure cahmano, payu tahari Paulore pji, tiro mehne durucua timaha Feli. ²⁷ Pua cuhma baharo Porcio Festo wama tiro puhtoro Felire cohtotariro jiha. Wiho mejeta Feli sehe judio masare tiro mehne wahchechu yoa duaha. ã jiro puhtoro Feli to puhtoro wijahto pano, tiro Paulore peresui ji dutisiniha.

Paulo Festore to yoirire yahuha

25 ã yoa Festo tí yahpapu tia dacho to jiri baharo, Cesareapu jiro waha, Jerusalèpu suha. ² Tói to jichu sacerdotea puhtoa, judio masa puhtoa mehne Paulore ti yahusãre yahuha Festore. ³ Paulo to mahapu wahachu tirore bucua caha, wajã duaa nimaha tina. ã jia tina Festore tuaro sinimaha:

—Paulore Jerusalèpu warocaga —ni sinimaha tina Festore.

⁴ Ti ã nichu tuhoro, Festo õ sehe ni yahuha tinare:

—Mipure Paulo Cesareapu peresu jira. Yuhu tópu wahai tai nija. ⁵ Paulo to ñano yoiro jichu, musa puhtoa Cesareapu yuhu mehne waha, tirore yahusãga — niha Festo.

⁶ ã jiro Festo ocho o diez dachori tina mehne to jiri baharo Cesareapu tjuaa wahaha. Pa dachoi tiro buhiri tiare cahnoru wuhui dujiro, Paulore na ta dutiha. ⁷ ã jia Paulo Festo cahapu to wihichu, judio masa Jerusalèpu tarina sehe Paulo cahai ducu, tirore tuaro mehne yahusã ducaha. ã yahusãpahta “Ahroro to ñano yoachu ñuhi”, ni yahu masieraha. ⁸ Ti

ã ni yahusãri baharo Paulo to yoirire yahuha:

—Judio masa ti dutiare, Cohamacu wuhu macaa dutiare, Roma puhtoro to dutiare yuhduracaerahi —niha Paulo.

⁹ Festo sehe judio masare wahchechu yoa duaro, Paulore õ sehe ni sinituha:

—¿Jerusalèpu waha duajari muhu? Mu yoirire yuhure tópu yahuihca muhu —niha Festo Paulore.

¹⁰ To ã nichu tuhoro Paulo õ sehe ni yahuha:

—Jipihtina bui puhtoro César to ya wuhui buhiri tiare cahnoru wuhui jija mipure. Ahri wuhu baroi yu yoirire tuhoga. Judio masare yu ñano yoerarire noano masina muhu. ¹¹ Dutiare yuhduracariro yu jichu, yuhure wajãchu noaboa. Wiho mejeta ahriina ti yahusãri sehe mahñoa ti jichu yuhure yahusãrinare yuhure wiho waro wia masierara muhu. Yu yoirire jipihtina bui puhtorore Césare yahu duaja. Tiro sehe yu buhiri tiare to cahnochuh cahmaja — niha Paulo.

¹² To ã nichu tuhoro Festo sehe noano masi yahuinare sinitu tuhsu, õ sehe ni yahuha Paulore:

—Muhu jipihtina bui puhtorore mu yoirire mu yahu duachu, tiro cahapu warocanahtja sã muhure —niha Festo Paulore.

Paulo puhtoro Agripare to yoirire yahuha

¹³ Baharopu puhtoro Agripa, Berenice wama tiricoro mehne Cesareapu Festore ñua suha.

—¿Ne, wihimari muhu cuhu? —niha tina Festore piti bocasinia.

¹⁴ Tói payu dachori ti jiri baharo Festo õ sehe ni yahuha Agripare Paulore:

—Õre Feli to peresu yoiro jira. ¹⁵ ã jia Jerusalèpu yu wahachu judio masa ti sacerdotea puhtoa, ti bucua mehne ahriore yahusãhre. “To ya buhirire wa-

jāga tirore”, ni sinihre tina yuhure. ¹⁶Ti ā nichu tuhocu yuhu tinare ō sehe ni yahuhi: “Roma macaina sehe peresu ti yoainare masare waerara. Ā jicu tirore waeraja musare. Sā naharirore tirore yahusārinare to űuhto pano tirore buhiri dahre masieraja sā. To basi to yoirre to yahuerasinichu tirore buhiri dahre masieraja sā”, nihi tinare. ¹⁷Ā jicu tina ōre ti wihichu űucū yoari pja yoerahi yuhu. Wiho mejeta pa dachoi buhiri tiare cahnorī wuhūi dujicu, ti yahusārirore pjirocāhi. ¹⁸Ā jia tī wuhūi to wihichu űua tirore űu tuhtiina wahcārūcare. Ti ā wahcārūcachū űucū “űabiaro ni yahusāhca”, ni tuhutumahi yuhu tinare. Tirore yahusā duapahta yahusā masierare tina. ¹⁹Wiho mejeta ahrirore Cohamacū yare to yahuri buhiri judio masa tirore tuhtihre. Jesu wama tiro yarirore cjiro to masa mjarire to yahuri buhiri yahusāhre ahrirore. Ahri dihtare yahusāhre. ²⁰Ahrirore masieracu tirore noano sinitu űuhi. “ĴJerusalēpu waha duajari yuhu mehne? Tōpu yahuga mu yoirre yuhure”, nimahi tirore. ²¹Wiho mejeta tiro waha duaerare. “Yu yoirre jipihtina bui puhtorores Césare yahu duaja”, nire tiro yuhure. To ā niri baharo ōihta tirore cohta dutihi jipihtina bui puhtoro cahai tirore yu warocahto pano —niha Festo Agripare.

²²—Yu basi tuho duaja tirore —niha Agripa Festore.

—űamichacapū tirore tuhoga muhu —ni yuhtiha Festo.

²³Pa dachoi Agripa, Berenice mehne ti buhiri tiare cahnorī wuhupu su, “Puhtoa jija sā”, nia cua pisaro yoa űoha tina, surara puhtoa, tī maca macaina puhtoa mehne. Tó sehe yoa sāa tihā tī wuhupu sāa. Ti sāa suri baharo Paulore pjirocāha Festo. ²⁴Ā jiro Festo ō sehe ni yahuha:

—Puhtoro Agripa, musa jipihtina ahri wuhure cahmachuina tuhoga. Ōre ahriro payu judio masa ti yahusāriro jira.

Jerusalēpu, Cesareapu cūhure tina tirore yahusāhre. “Tirore wajāga”, ā nirucua nina tina. ²⁵Ti ā nipachūta ō sehe tuhoutuja yuhu. Ahriro ne űano yoirro jierara. ĴYaba buhiri wajābocari mari tirore? Ā jicu jipihtina bui puhtorores César Augustore ahriro to yoirre to yahu duachu jipihtina bui puhtoro cahapu warocaihtja tirore. ²⁶⁻²⁷Ā jicu ahriro to yoirre noano masierasinija yuhu. Ā masierasinicū mari puhtorores yahu joa masieraja. Ā jicu musare to yahuchū tuho duti nija mipure. Puhtoro Agripa mipu pinihtare ahriro jira mu sinitu űuhtiro. Mu sinitu űu tuhuchū mari masiri baharo ahrirore ti yahusāriro noano yahu joaihtja. Ahriro to űano yoirre yu masierapachūta mari puhtoro cahapu tirore yu warocachu noaerara. Ā jicu mipure ti yahusāriro noano masi duai nija —niha Festo tinare.

Paulo Agripare to yoirre yahuha

26 To ā niri baharo Agripa Paulore ō sehe ni yahuha:

—Mu basita yahuga —niha tiro Paulore.

To ā niri baharo Paulo sehe, “Dihta mariahga”, nino to wamomacarine wahcārūca, to yoirre yahuha:

²—Puhtoro Agripa, yuhure judio masa ti yahusāriro, yu yoirre muhure yahucu, mipure noano yajeripohna tija. ³Muhu judio masa sā yoaa tiare, sā buhea cūhure mu noano masichu pinine wahcheja yuhu. Ā jicu muhu yuhure noano tuhoga —ni dūcāha Paulo.

Paulo Jesu yairo to jihto pano to jia tirire yahuha

⁴Ā ni tuhsuro ō sehe ni namoha tiro:

—Wahmuno yu jia tia cjirore jipihtina judio masa masina. Jipihtia dachoripe yu masa bajuari baharo yu ya dihtapure, Jerusalēpu cūhure yu jiri cjirore masina tina. ⁵Fariseo cu-

rua macaina paina yuhdoro sã dutiare yuhduruca dutieraina jira. Wahmanopure fariseo curua macariro jimai. Å jicu fariseo curua macaina ti dutiare, ti yoaa barore yoa pahñoriro yu jichu tina masina. Tina mähure yahu duaa, tıre yahu masina tina. ⁶ Ahri buhirita yuhure yahusã mujana. Sã ñachusuma cjrıre “Yariainare masoihtja”, Cohamacu to ni cırire “Potocã tjira”, yu niri buhiri ahrina yuhure yahusã mujana. ⁷ Yu coyea judio masa jipihtina doce curuari macaina Cohamacu masare to masohtore wahche cohtarucura. Å yoa Cohamacure ño payorucura. Å cohtarucuína jia sã yoaro seheta yoara tina. Puh-toro Agripa, ã cüno potori yoaina sã jipachuta tina sehe to masohtore yu cohtari buhiri yuhure yahusã mujana judio masa. ⁸ ¿Dohse yoana Cohamacu to masorire sã yahuchu tuho duaerajari musa judio masa? —ni yahuha Paulo.

Paulo Jesu yainare to ñano yoari cjrıre yahuha

⁹ Å ni tuhsu õ sehe ni yahu namoha:

—Jesure Nazare macarirore ñerasinicu, ñaa dihtare yoa duamai to yainare. ¹⁰ Å jicu Jerusalëpu ã yoaa timai yuhü. Sacerdotea puhtoa yuhure ti dutiri baharo payu Jesu yainare peresu yoaa tii. Å jicu puhtoa tinare ti wajã dutichu, wajã dutii yuhü cühu. ¹¹ Payu tahari jipihitia judio masa buhea wuhusei Jesu yainare ñano yoa dutia tii. Å yoacu Jesu yaina Jesure ti cohãchu yoa duai nimai. Tina mehne tuaro suai yuhü. Å jicu paina masa ya macaripu cühure tinare ñano yoai sua tihı yuhü —ni yahuha Paulo.

Paulo Jesu yairo to waharire yahuha

¹² Å ni tuhsu õ sehe ni yahu namoha:

—Damasopu Jesu yainare ñano yoa duacu sumai. Tinare ñano yu yoa duachu ñua sacerdotea puhtoa yuhure

waha dutire. ¹³ Õ sehe jire puhtoro Agripa: Cohari pja jichu waroi mahai yu wahachu müano macaa si sitea, sã dacho macariro yuhdoro, yuhure yuhü mehne wahaina cühure si sitere. ¹⁴ Sã jipihtina yahpau bora caha su, judio masa ya mehne yuhure to durucuchu tuhoi. “Saulo, Saulo, ¿dohseacu mühu yuhure ñano yoajari? Mühu yuhü mehne suacu yuhure yuhtieracu, mü basi ñano yuhdura”, nire yuhure. ¹⁵ “Puh-toro, ¿diro baro jijari mühu?” ni sinitui. “Yuhü Jesu, mü ñano yoariro jija. ¹⁶ Wahcãrucaga mühu. Mähure yu cahamacuno cjihto yoai tai mipu bajuaja yuhü. Michare yuhure mü ñurire, baharo mähure yu ñohti cühure painare yahuihca mühu. ¹⁷ Judio masare judio masa jieraina cühure mähure buhe ducicu, warocaihtja. Ti cahi mü jichu, mähure ti ñu tuhtichu mähure yoadohoihtja. ¹⁸ Yu yare tinare masichu yoaga mühu. Å jicu nahitianopu tiniina yoaro sehe jıinare ti ñaare duhuchu yoaga. Buhriaropu tiniina yoaro sehe noaa sehere cohtotachu yoaga tinare. Watınore cahmaerachu yoaga mühu. Å yoacu Cohamacu ya sehere yuhtichu yoaga mühu tinare. Mü ã yoachu tina yuhure wacü tuaahca. Ti ã wacü tuachu ñucu ti ñaa yoari buhirire boihca. Å jia tina Cohamacu to beserina mehne macaina jiahca. To wahtire cjuahitina jiahca tina”, nire Jesu yuhure —ni yahuha Paulo.

Paulo to yoarire to dahraare yahuha

¹⁹ Å ni tuhsu õ sehe ni yahu namoha:

—Puh-toro Agripa, müano macaa yu tuhoare yuhdurucaerahi. ²⁰ Damasoi buhe mühtai. Baharo Jerusalëi buhei tjoa. Baharo Judea yahpai, judio masa jieraina cahpu cühure masare “Ñaano yoeraja sã”, ni ti tuhotumari cjrıre tuhotu cohtota duti, Cohamacu yare cahma dutii. “Noaare musa yoachu ñua ‘Noaina jija sã’ ni, musa tuhotumari

cjirire m̄sa t̄hotu cohtotarire paina masiahca” nicu, tinare noaare yoa duticu buhei. ²¹ Cohamacu ya wuhui yu jichu yu a ni yahuri buhiri judio masa yuhure n̄aha, wajā duamare. ²² Wiho mejeta dachoripe Cohamacu to yoadohoro mehne ā buherucuja. Ā jicu mipure m̄sa jipiltina puhtoare wiho jina cūhure to yare yahui nija. Panopu macaina Cohamacu yare yahu m̄htaina cjiri, Moise cjiro mehne ti yahu m̄htariro seheta yahuja yuhu cūhu. Ō sehe ni yahu m̄htaa tiha tina: ²³ “Cristo Cohamacu warocariro sehe n̄ano yuhd̄urohca. Ā jiro yariaro masa m̄uja m̄htariro waharohca tiro. Ā jiro masare to yuhdohtore judio masare, judio masa jieraina cūhure masichu yoarohca”, ni yahu m̄hta joaa tiha panopu macaina cjiri. Yuhu cūhu ti yoaro seheta yahuja —ni yahuha Paulo Agripare.

Paulo Agripare Jesu yairo cjhito yoa duamaha

²⁴ To ā ni yahuri baharo Festo tirore tuaro sañurucu ō sehe ni durucuha:

—Paulo, m̄hu tuho masierariro jira. M̄hu payu buhecu tuho masierariro wahara —ni sañurucuha tiro Paulore.

²⁵ To ā nichu t̄horo Paulo ō sehe ni yuhtiha Festore:

—Puhtoro tuho masierariro jieraja yuhu. Yu yahua potocā tjira. Ā jicu yuhu ahrire cua pisaro mehne nija. ²⁶ Puhtoro Agripa sehe, ahri yu yahurire noano masina. Ā jicu yuhu tirore cuirō marieno yahuja. Ahri yahua jipiltina masa masina. Ā jicu jipiltina ahrire yu nirire puhtoro Agripa to masichu masija yuhu —niha Paulo Festore.

Ā ni tuhsu ō sehe niha Agripare:

²⁷ —Puhtoro Agripa, Cohamacu yare yahu m̄htaina cjiri ti yahuri cjirire t̄hora m̄hu. Ti yahua m̄ t̄hochu masija yuhu —niha Paulo Agripare.

²⁸ —¿Ahrire yuhure yahucu mahanocā m̄ yahua mehne Jesu yairo yu wahachu yoa duai nijari m̄hu? —niha Agripa Paulore.

To ā nichu Paulo ō sehe ni yuhtiha:

²⁹ —Mahanocā durucucu o yoari pja durucucu m̄sa, jipiltinare “Yu jiro seheta Jesu yaina jijaro”, ni sini payoja Cohamacure. Wiho mejeta yu yoaro sehe peresupu m̄sa jichu cahmaeraja yuhu —niha Paulo Agripare.

³⁰⁻³¹ To ā niri baharo Agripa, Festo, Berenice jipiltina paina mehne wahc̄aruca, wijaa, ti basi ō sehe ni durucuha:

—Ahriro to yoari buhiri ne peresu yoa masieraja mari. ¿Ā jina mari yaba buhiri tirore wajābocari? —ni durucuha tina ti basi.

³² —Ahriro “Jipiltina bui puhtorore Césare yu yoarire yahu duaja”, to nierachu mari wioboa tirore peresupu jirirore —niha Agripa Festore.

Paulo tirore ti yahus̄irire Romapu yahuro wahaha

27 Paulore Italiapu dohoria mehne warocaa taa, tirore paina mehne ti peresu yoarina mehne Julio wama tirirore cūre tina. Julio cien surara puhtoro jiro, to ya curua “César yaina surara”, wama tire. ² Ā jina Adramitio wama tiro macaria dohoriai samui s̄a. Tia Asiapu wahahtia jire. Samu tuhsu, tia mehne wahi. Aristarco Tesalónica wama tiri maca macariro s̄a mehne wahare. Tesalónica Macedonia yahpai jira. ³ Pa dachoi s̄a Sidōpu sui. Tōpu suro Julio Paulore noano yoare. Ā yoaro Paulore tō mehne macaina cahapu n̄uno waha dutire. Ā jiro Paulo mehne macaina tirore to cahmaare ti wachu “Noanohca”, nire Julio. ⁴ Dohoria mehne s̄a pahāchu tuaro wiñnono s̄are pa sehēpu wāroca pjohōre. Ā jina Chipre wama tiri n̄uco ducataroi potō buhuse-

hei wahai sã. ⁵ Pũ Ciliciare yũhdũa, Panfilia cũhũre yũhdũa, Mira wama tiri macapũ Licia yahpai jiri macapũ wahã sũi.

⁶ Tõpũ suna, Alejandrĩapũ tariare, Italiapũ wahahtiare dohoriare bocai. Á jiro sãre tiapũ surara pũhtoro naare. ⁷ Payũ dachori pjiro dero waha, “Nu warũoca” ni, waha, Gnido wama tiri maca potoi sũi sã. Tõpũ sũ yũhdũa, wihnono tuaro wã, sã waha duariroi sãre wãrocaerare. Á jina sã cõ bũhusehepũ majare paa wahai. Á jina Creta wama tiri nũco to dũcatari pahrẽ sehe sã pahãa waha, Salmo wama tiri ñoacare yũhdũai sã. ⁸ Tõpũ yũhdũ, tí nũco dũhtũ cahai waha, “Nu warũoca” ni, waha, Noari Pitamaha wama tiropũ wahã sũi. Pitamaha Lasea wama tiri maca cahapũ jira.

⁹ Tõpũ yoari pja sã jiri baharo, sã wahahto sehe cuabiare. Á jiro ti chũ duhuri dacho bose nũmũ yũhdũri baharo, Paulo tinare õ sehe ni yahure:

¹⁰ —Tũhoga mũsa. Chũ duhuri dacho bose nũmũ baharo mari wahachũ marine minihto cuabiara. Ahria dohoria, dohoria macaa, mũsa pache cũhũ mari mehne macaina cũhũ mari butiboca waha —nire Paulo.

¹¹ Wiho mejeta surara pũhtoro dohoria pũrore tũhoro, oturiro cũhũre tũhoro, Paulo to yahua sehere tũho duerare waha duaro. ¹² Ti pahsari pitamaha noari pitamaha puhiro jichũ ti pahsari pitamaha jierare. To ã jiri pitamaha jichũ dohoria macaina payũ waha dua, Fenicepũ yoja duamare. Fenice Creta wama tiri nũco macari pitamaha jiro, wihnono to tariropũ sũ mũja taro sehepũ cõ bũhusehepũ, poto bũhusehepũ cũhũre ñuroca, wihnono tachũ noano dũcatari maca jire. To ã jiri pitamaha jichũ masia tina tõpũ cũ puhiro ji duamare.

Pjiri mapũ wihnono, coro pjiro taha

¹³ Á yoa sur sehe pjiroca wihnono ta dũcare. “Michare noari dacho mari wahahti dacho jira”, ni tũhotumaha tina. Á ni tũhotua tina comaa tañore tuã wahcõ, Creta nũco dũhtũ caha cahai yojai sã. ¹⁴ Wiho mejeta baharo curero wihnono noreste wama tiri wihnono tuaro wãre. ¹⁵ Á jiro dohoriare wihnono tuaro wahã wihire. Wihnono to wãrũcarore waha masierana, majare paha, wihnono mehne wahai sã. ¹⁶ Cauda wama tiri nũcocã cahapũ sur sehepũ waha, tí nũcocã sãre mahanocã dũcatare. “Marine nu warũoro wahara”, nina tóre pjiria dohoria macaria mahariacã bũsocare noano waja payo dũhteĩ sã. ¹⁷ Tiare dohoriari sã waja payo dũhteri baharo pjiria dohoriapũ pjiri da mehne tina wahma ñaha payore. Sirte wama tiri padũre “Dohoria doca wahã sũri”, nia cui nire tina. Á jia tina co tũrũre ti duhu miori baharo dohoria dihtare wihnono wãrocare. ¹⁸ Wihnono, coro mehne tuaro tare. Pa dacho cũhũre wihnono mũnanota tjoa to tachũ ñua tina ti pachere diapũ dureroca ño tuhsũ pahãa wahai sã. ¹⁹ Pa dacho dohoria macaare diapũ cohãre tina ti basi. ²⁰ Payũ dachori ñichua dachori jichũ, sũ dacho macariro ñahpichoha poca cũhũ ne bajuerare. Á jiro tuaro wihnono tare. Á jina “Minia wahaja mari. Á jina yariaa wahanahca”, ni tũhotumai sã.

²¹ Á jia tina yoari pja ti chũ duhuri baharo Paulo ti pano ducu, õ sehe ni yahure tinare:

—Pano mũsare yũ yahuchũ tũhoerare mũsa. “Cretapũ jiina mari wahachũ cua nica”, yũ nichũ tũhoerare mũsa. Yũhũre tũhona, ahria macaa jipihtiare boeraboa mũsa. ²² Wiho mejeta mipũ mũsare yahuja. Cuiena tjiga. Jipihtina mari yũhdũnahca. Ahria dohoria dihta marine wahtiasarohca. ²³ Micha ñamine Cohamacũ yairo anjo yũhũre ba-

juahre. Cohamacu yairo jija yuhu. Ñ jicu tirore dahra cohtariro jija yuhu. Anjo sehe yu cahai taro, ò sehe ni yahuhre: ²⁴“Paulo, cuiecu tjiga. Jipihtina bui puhtorore mu yoari cjrيره muhure yahuro cahmana. Cohamacu noariro jira. Ñ jiro tirore mu siniriro seheta mipure muhu mehne macaina cùhure yoadohorohca”, nihre yuhure anjo. ²⁵Ñ jina cuiena tjiga musa. Anjo yuhure to niriro seheta waharohca. Cohamacure wacu tuaja yuhu. Ñ jicu to yahuriro seheta “Potocã tjira”, ni tuhoutuja yuhu. ²⁶Wiho mejeta marine nucopu wihnono wãroca, cohãnohca — ni yahure Paulo tinare.

²⁷Cũ ñami puã somana baharo pjiri ma Adriático wama tiri mai wihnono sãre tuaro wãre. Tí pjare ñami dacho macai dohoría macaina mua sehe “Duhtu cahapu jija mari”, ni tuhouture tina. ²⁸Ñ ni tuhoutua nucuri taño comaa tañore yuta da mehne duhte, duhuroca mio, quihõre. Treinta y seis metro waro cuãre. Mahanocã waha, quihõre tjoa. Tí pjare veintisiete metro waro cuãre. ²⁹Ñ jia tãare “Doca wahã suri”, nia dohoría oturopu pititia tañori comaa tañorine yuta dari mehne duhte, duhuroca miore diapũ. Ñ jia “Cjero bohreajaro” ni, tuaro sinire tina. ³⁰Dohoria macaina mua sehe duhtimare. Tina mahariacãre dohoría macariare diapũ waja boro, dohoría quenoí comaa tañorine ti boroboriro seheta yoare tina mahariacãre “Marine ñuri”, nia. ³¹Wiho mejeta Paulo surara puhtorore, to surara mehne yahure:

—Ahrina mua mahariacã busocai ti wahachu musa yarianahca —nire Paulo.

³²To ã nichu tuhoa surara sehe mahariacãre duhte darire yihso ta, tiare cohãre.

³³Bohreahto panocã Paulo tinare tuaro chu dutire.

—Puã somana waro ne chuerare musa.

³⁴Ñ jina mipure chuna taga. Tuaro musare chu dutija. Musa cati duana

chuga. Jipihtina musa yuhdunahca — nire Paulo tinare.

³⁵To ã niri baharo Paulo pãore na, jipihtina ti pano Cohamacure “Noana” ni, duhu payo, tíre chu ducare tiro. ³⁶To ã chachu ñua tina cuiro marieina waha, jipihtina tina cùhu chure. ³⁷Sã jipihtina doscientos setenta y seis masa dohoriapũ jii sã. ³⁸Tina jipihtina yapia waha “Ahría dohoría nucũ nica” ni, payu trigo chuare diapũ cohãre.

Dohoria paduropu doca pja suha

³⁹Bohreachu dohoría macaina mua nucore ñua, “Ñ sehe wama tiri nucõ jira ahri nucõ”, ni ñu masierare. Wiho mejeta tina pari tucũ paduro jichu ñua, “Mari tí tucũpu wahana, tãpũre doca pja suboca paduroi”, nire tina. ⁴⁰Ñ nia, comaa tañorine duhte darire yihso taroca mioha. Oturi pjĩ duhte dari cùhure yihso tanocare tina. Ti ã yoari baharo dohoría queno macari suhtirore wahcõ dapore poto wihnono wãrocachu cahmaa. ⁴¹Wiho mejeta dohoría queno sehe pa paduropu caha su, nuja masierare. Ñ jiro oturore tuaro pahcõri cjã wahcõchũ tia oturo wahtia wahare. ⁴²To ã wahachu ñua ò sehe nire surara:

—Ahría minichu mari peresu yoaina duhtu cahapu ba wahã su duhtinocaahca. Ñ jina tinare wajã pahñonocajihna —nire surara.

⁴³Wiho mejeta surara puhtoro sehe Paulore wajã duarero, jipihtina peresu jinare wajã dutierare. Ñ jiro jipihtina ba masiinare surara puhtoro poto duhtu cahapu ba wahã su dutire. ⁴⁴Ñ jia paina dohoría macaa pjĩni wahti sitea pjĩni mehne bora ñoja, tí pjĩni bui pisa ba nujare. Sã tó sehe yoana sã jipihtina duhtu cahai wahã sui.

Paulo Malta wama tiri nucõi jiha

28 Ñ yoa tí nucopu sã jipihtina maja surucu suna tí nucõ wa-

mare masii. Malta wama tiri nũco jire. ²Tí nũco macaina masa sãre noano yoare. Ā jina sã coro waari baharo yusua yuhduare sãre. Ā jia tó macaina sehe pichaca wijã tuhsũ, sãre sohma dutire. ³Paulo pichare na ta, na tiãre. To na tiãri baharo tí picha puhichapũ sãariro agã tuaro sichũ tũhoturo wijaa taro, Paulo wamomacai bahca wãha sure yahawero marieno. ⁴To bahca wahã suchũ ñña tí nũco macaina ti basi õ sehe ni durucure: —Ahriro masa wajãriro jiboca. Ā yoaro tuaricoro buhiri dahrerico mũano macaricoro tirore buhiri dahrero, cati dutierara. Tiro pjiri mapũ minino yuhdu tuhsũri jimare. Mipũre ticoro sehe tirore cati dutierara —nimare tina ti basi.

⁵Wiho mejeta Paulo agãre pichacapũ wajã siterocare. Tirore agã purĩerare. ⁶“Wipirohca” nia, cohtamare tina. Ne wipierare tirore. “Tiro yariaa waharohca” nia, tina cohtamare. Tirore purĩerare. Yoari pja baharo to wipierachũ ñña, to purĩerachũ ñña, soro tũhoture tina. “Ahriro cohamana mehne macariro jiboca”, nimare tina.

⁷Ti ba wahã sũriro cahacãi Publio wama tiroro ya weseri jire. Tiro tí nũco macariro pũhtoro jire. Ā jina tiro sãre to noano yoachũ, tia dacho waro to ya wũhũ jii sã. ⁸Publio pũcuro yojaro ti, juaro tiroro jire. Ā jiro tiro camai coãre. Ā jiro Paulo dohatiroro ya tahtiapũ sãa, Cohamacure sini, to wamomacarine tiro bui duhu payo, noariro wahachũ yoare tirore. ⁹To noariro wahachũ ñña jipih-tina paina tí nũco macaina dohatiinare Paulo cahapũ na tare. Ti ã na tachũ ñño Paulo noaina wahachũ yoare tina cũhũre. ¹⁰Baharo tina payũ sãre wapa marieno ware. Sã wahahto panocã jipih-tia sã cahmaare, sã wahana sã chũhtire dohoriapũ dure sãare tina.

Paulo Romapũ suha

¹¹Tia sũ tí nũcopũ sã jiri baharo dohoria mehne wahai sã. Tia dohoria quenoĩ pũaro cohamana Cãstor, Pólux wama tina ti masũ ducure. Alejandriapũ taria jire tia. Puhiro puro tí nũcopũ tia dohoria pahsare. ¹²Waha, Siracusa wama tiri macapũ sũna, tia dacho waro tí macare jii sã. ¹³Tí macare wijaa, waha, Regio wama tiri macapũ sã sui. Pa dachoi surpũ wihnono ta, sãre wãrocure. Pua dacho baharo Puteoli wama tiri macapũ sui. ¹⁴Tópũ Jesu yaina mahainacã sãre piti bocare.

—Cũ somana waro sã mehne tjuaga — nire tina sãre.

Ti ã nichũ tũhona cũ somana waro tina mehne tjuasinii. Baharo mahai maja, Romapũ sui sã. ¹⁵Tó macaina Jesu yaina sehe Romapũ sã sũhtire tũhoa, Apio wama tiropũ pache duaropũ sãre piti bocare. Paina Jesu yaina Tia Wũhũ wama tiropũ sãre piti bocare. Ti ã piti bocachũ ñño Paulo wahchea mehne Cohamacure “Noana” ni, noano yajeri sãa wahare. ¹⁶Romapũ sã sũri baharo ti peresu ti yoinare tó macarirore peresu cohtaina pũhtoro yahure. Wiho mejeta Paulo sehere cũirota cũre tó macaina pũhtoa. Ā jiro tirore cũirota surara cohtare.

Paulo Romai buheha

¹⁷Tia dacho baharo Paulo judio masa pũhtoa mehne cahmachuno taro, tinare pjire. Ti cahmachuri baharo tiro tinare õ sehe ni yahure:

—Coyea, mari coyeare soro yoerahi yũhũ. Ā yoa mari ñuchusũma cjiri ti yoa tirire, marine ti buheri cũhũre yuhdurũcaerahi yũhũ. Ā yũ yuhdurũcaerapachũta Jerusalẽpũ yũhũre ñahahre judio masa. Ti ñahari baharo Roma macainare yũhũre peresu yoa dutihre tina. ¹⁸Ti ã yoachũ Roma macaina

yuhure sinitu, yu ñano yoarerariro yu jichu yuhure “Buhiri tiro jira”, ni masierare. “¿Ne yaba buhiri wajābocari mari tirore?” nihre yuhure tina. Ā jia yuhure sinituina sehe yuhure wio duamahre. ¹⁹ Wiho mejeta judio masa sehe yuhure wiochu cahmaerare. Yu coyeare judio masare yuhure ti yoarire yahusā duaeraja. Wiho mejeta yuhure ti wio duaerachu ñucu, “Jipihtina bui puh-toro Césarē yu yoarire poto yahu duaja yuhu”, ni sinihi. ²⁰ Ā jicu musare ahrire yahu duacu pjihī. Cristo marine yuhdohtiro judio masa mari cohtariro to yare yu yahuri buhiri yuhu peresupu jija. Ā jicu tíre musare yahui tai pjihī —nire Paulo judio masa puh-toare.

²¹ To ā nichu tuhoa tina sehe tirore ō sehe ni yahure:

—Judea yahpa macaina Judio masa mūhure quti yahua pūrīne sāre ne waro-caerare. Ā yoa tōpu tarina cūhu mari coyea sāre mū ā waharire yahuera tire. Tina “Tiro ñano yoariro jira” ni, mūhure yahuera tire. ²² Wiho mejeta Jesu yare mū yahuri curua macainare jipihtiropu masa ñano ti durucuchū sā masija. Ā masina mū buheare mū yahuchū tuho duaja sā —nire tina tirore.

²³ Ā ni tuhsū, “Pa dachopū jijihna”, nire tina. Pa dachopū Paulo mehne cahmachu muhtaina yuhdoro masa payu to jiropu wihire. Nami curerocā puh-toro Cohamacu to suho jiare noa buheare tiro buhe duca, pu, ñamipū Moise cjirore Cohamacu to cūri dutiare, ā yoa Cohamacu yare yahu muhtaina cjiri ti joari cjiri cūhure buhere. Ā buhero, tinare Jesure “Tiro tjica mari cohtariro”, ni masichū yoa duaro nimare Paulo. ²⁴ Cāina to buherire noano mehne tuhore. Wiho

mejeta paina sehe tuho duaerare. ²⁵ Ā jia tina ti basi puā curua tju wa, wahaā taa nire. Ti wahahto pano Paulo Isaia cjiro to durucuri cjirore tinare yahure. Ō sehe nire tinare:

—Isaia Cohamacu yare yahu muhtariro cjiro to yahuri potocāta jira. Mari ñuchusūma cjirore yahuro taro Espiritu Santo Isaia cjirore ō sehe ni yahu joa dutiha:

^{26–27} “Ahrire ahrinare yahui wahaga:

‘Dapu butiina jira mūsa.

Yu yare tuho duaerara mūsa.

Cahmo copari susueraina yoaro seheta tuho duaerara mūsa.

Ā jina yu yare tuhopenahta tuho ñahasi mūsa.

Mūsa ā jieraina jina, noano tuho ñahaboa mūsa.

Ā jina yuhure cahmaboa mūsa.

Ā jicu musare pichacapū wahaborinare yuhdoboā yuhu’, niha Cohamacu Isaia cjiro to joari tjupu”

—nire Paulo tinare. ²⁸ Ā ni tuhsū, Paulo ō sehe ni yahu namore:

—Ahrire masiga mūsa. Cohamacu ya buheare masare to noano yuhdoare judio masa jierainare buhenahca sā. Tina sehe tuhoahca —nire Paulo judio masare.

²⁹ [To ā nichu tuhoa judio masa tíre ti basi tuaro cahma sayo, wijaare.]

³⁰ Puā cūhma waro Paulo to ā waparucuri wuhupū jire. Tóí jiro, jipihtina to wuhupū wihiinare wahchea mehne piti bocare tiro. ³¹ Ā jiro tiro cuiro marieno puh-toro Cohamacu to suho jiare, puh-toro Jesucristo ya cūhure buhea tire. To ā buhechū ne paina tirore “Buhei tjiga”, nierare.

Romanos

Paulo Roma macainare Jesu yainare joarocaha

1 Yuhu Paulo musare Roma macainare joarocaja. Yuhu jija Jesucristo cahamacuno. Tiro yuhure beseri jire. To ya noa buheare buhe duti warochahtiro cjihtore yuhure cūri jire tiro.

²Tí buheare noa buheare panopu Cohamacu “Yahui tai nija”, nia tiha. To ā ni yahuro sehta to yare yahu muhtaina cjiri panopu macainare to yahuhtire to ya pūi joa dutiha. ³Tí buheata to macunore yahua jira. Tiro masuno waro jiro taro, Davi cjiro panamino ji turiariro jiha tiro. ⁴Jesucristo mari puhtoro Cohamacu macuno űaa buhiri marieriro to jiare ō sehe űori jire Cohamacu. To yariari baharo Cohamacu to tuaa mehne tirore masa wijaachu yoari jire. Ā yoaro Jesucristo potocāta Cohamacu macuno to jiare űori jire Cohamacu masare. ⁵Tirota sāre pja űuno sāre to yare buhe dutiro warocare jipihtina Jesucristore wacū tua ti űo payohti cjihtire. ⁶Ā jiro musa cūhure Jesucristo yaina cjihtire be-seha tiro.

⁷Musare, Cohamacu to cahūinare, Roma macainare, to yaina cjihti yoare musare tiro. Musare jipihtinare ahri pūre joarocaja. Ā jicu Cohamacu mari Pucu, mari puhtoro Jesucristo mehne musare noa dutija. Tina ti yoadohoa mehne noano jiga musa.

Paulo Romapūre űuno waha duaro nimaha

⁸Ahrire yahu muhtaihtja musare: Jip-ihitia macari macaina Jesucristore musa wacū tuarire masa yahuhre yuhure. Ti ā ni yahuchū tuhocū “Noana”, nija Cohamacure. Jesucristo to yoadohoro mehne ā nija tirore. Cohamacure sini

payocu musa ya cjihti cūhure ā sini payorucuja. ⁹Tiro yuhure to dutichū to macuno ya buheare noa buheare tuaro buhecu to cahamacunota jija yuhu. Ā jiro musa ya cjihtire Cohamacure yū ā sini payorucuchū tiro masina. ¹⁰Ā sini payocu Cohamacu cahmachū mipu pinihtare musa cahapu yū űui wahahto cjihto cūhure sinija. Yoari pja musare űu duacu yū wahahtore cohtai yoanocamaja yuhu. ¹¹Espūrito Santo yuhure to buheri cjiire musare buhe turia duaja Jesure musa wacū tua namohto cjihto sehe. Ā jicu musare tuaro űu duaja yuhu. ¹²Jesure wacū tuaja mari. Ā jicu musare űu duaja Jesure mari wacū tuaa mehne pu buhuseheri mari cahma wahchechū yoahito cjihto sehe.

¹³Yū coyeya, ahrire musa masichū cahmaja. Noa buheare yū buheri baharo paye macari macaina musa coyeya judio masa jieraina cūhū Jesure wacū tuare. Ā jicu payu tahari musa cahapu waha duamahi tina, Jesure ti wacū turariro sehta musa mehne macaina cūhū ti wacū tuahto cjihto sehe. Ā waha duapaihta waha masiera tihi yuhu. ¹⁴Jip-ihinare noa buheare buhero jiro nina yuhure. Buheinare, buhemahnoeraina cūhure, masiinare, masieraina cūhure buhehtiro cjihto jii nija yuhu. ¹⁵Ā jiro jicu musare Roma macainare noa buheare tuaro buhe duaja.

Noa buheare masa tuhoa Jesure wacū tua ducara

¹⁶Noa buheare tuhoa Jesure wacū tua ducara masa. Ā jiro jipihtinare Jesure wacū tuainare Cohamacu to tuaa mehne pichacapu wahaborinare yuhdora. Ti ā yuhduchū masicu ahri buheare noa buheare buo tiro marieno yahuja. Ahri buheare judio masa tuho muhtari jire. Ti baharo, judio masa jieraina cūhū tuho turiari jire. ¹⁷Ahri buhea ō sehe ni yahura: Jesure wacū

tuainare “Ñaa buhiri marieina, noaina jira”, ni ñuna Cohamacu. Tire wacū tuaina dihtare ã ni ñuna Cohamacu. Ahri panopu ti ni joariro seheta jira: “Noaina jira’, to ni ñuna Cohamacure wacū tuaina dihta jira. Ā wacū tuaa, to ya catia mehne ã catirucuahca tina”, ni joaa tiha.

Masa ti ñaa yoari buhirire yahuha Paulo

¹⁸ Cohamacu muanopu jirirore masa ti yuhdurucare, ti ñaa yoari cūhure ñuno, ti ã yoari buhiri tina mehne suara. Tó sehe jiina barore to buhiri dahreitore masichu yoara tiro. Masa ti ñaa yoaa mehne painare noaa buheare tuhoerachū yoara tina sehe. ¹⁹ Cohamacu to basi to jia tiare masichu yoaha. To ã yoachū Cohamacure masichū mijoerara masare. ²⁰ Cohamacure mari ñerapachuta muanano macariro to jia tiare, tuariro to jia cūhure to basi masichū yoara tiro. Ahri yahpare to bajuamehneri baharo jipihtia to bajuamehnerire ñua “Cohamacu to yoari cjiri jira ahri” nia, Cohamacu to jia tiare masina masa. Ā jia masa Cohamacure masipahta ã ñaare yoarucua, buhiri tira. “Muhure masierahi. Ā jicu ñaare yoahi”, ni masisi Cohamacure. ²¹ Ā jia Cohamacu to jia tiare masipahta tina tire ño payoerara. Ā jia tiro tinare to noano yoapachuta tina sehe “Noana”, nierara tire. Ā tuho masieraina jia, wiho jia macaare, ñaa dihtare tuhoturucua baro jira tina. ²² “Tuho masina jija”, nipahta tuho masieraina wahara tina. ²³ Ā waha Cohamacure ã jirucurore tina ño payoerara. Ā ño payoeraa, ti ño payoboriro sehere cohtota, wiho jia masuri sehere “Cohamacu jira”, ti nia masuri sehere ño payora. Wiho jia masuri sehere yariahtina masa masurine, ã yoa minichahca masurine, chihchōina masurine, wahiquina masuri

cūhure “Cohamacu jira”, ni ño payora tina.

²⁴ Ti ã yoachū ñuno “Ti mu sūro ñaare goa pja, yoawahnojarō”, nino Cohamacu cohānocare tinare. To ã cohāri baharo tina ñabiario, pjro buoro wahachū yoare cahma yoarucura ti basi. ²⁵ Ā jia Cohamacu ya sehere cahmaeraa, mahñoa sehere noano tuhora tina. Cohamacu ya sehere mahñoa yoaro sehe jichū yoara tina. Potocāta Cohamacu warore jipihtiare bajuamehnerirore jipihtia dachoripe noano ño payoro cahmana. Wiho mejeta tina sehe tire ño payoerara. Ā tire ño payoeraa, Cohamacu to bajuamehneri cjiri, wiho jia sehere ño payora tina.

²⁶ Ti ã ño payochū ñuno “Ti mu sūro goa pja, yoawahnojarō”, nino Cohamacu cohānocare tinare. Ā jia tina numia mua mehne manū tiboina cohtota, ti basi numia dihta ñano yoara ti pjacuri mehne. ²⁷ Ti yoaro seheta jina mua cūhū numia mehne namo tiboina jipahta, tīre cohtota, mua ti basita ti pjacuri mehne ñabiario yoara. Ā yoaa, ti basita ti ñano yoari buhiri ti pjacuri sehe ñano yuhdura.

²⁸ Ā Cohamacure ti cahmaerari buhiri Cohamacu tinare cohāre. To ã cohāchū tina sehe ñano wacūrucu, ñano yoarucura. ²⁹ Ā jia tina tuaro ñano yoarucura. Numia mehne ñano yoarucua, mua mehne ñano yoarucua numia, ñaare goa pjarucua, paina yare tuaro cahmaina, painare ñano yoarucua, paina paye baro ti cjuachū ñua goa pjaina, masare wajaina, cahma sayoia, mahñoia, masare ñu tuhtiina, ñaa quitī dahreina, ³⁰ paina ti yoerapachuta ñano ni yahuwajaina, Cohamacure ñu tuhtiina, painare purīno yuhtiina, “Sā sehe masi yuhdurucū sūja”, ni tuhotuina, painare ã ni yahuina, paye ñaare yoa dūcaina, ti pūcūsumare yuhtieraina, ³¹ tuho masieraina, ti nino

seheta yoeraina, masare ne cahieraina, ti basi cahma susini duhueraina, ne pja ñueraina jira tina. ³² Æ ñano yoarucuinare Cohamacu pichacapu cohãnohca. To ã cohãhtire masipahta tina tí ñaare ã yoarucura. Æ jia paina tinare ñu cū ti yoaro seheta ñano ti yoachu ñua, “Mari yoaro seheta ñano yoara”, ni wahchera tina.

Masare buhiri dahre dutiro tíre quihõno yoarohca Cohamacu

2 “Tina ñabiaina jira”, ni yahuwajaena tjiga painare. Musa cūhu ti yoaro seheta yoara. “Ñaare yoeraja sã. Æ jina buhiri maeraja”, ni masierara musa. Musa yahu wajaina yoaro seheta ñaare yoana, musa cūhu musa basita buhiri dahre dutina nica. ² Tó sehe yoainare Cohamacu to buhiri dahrechū potocãta quihõno to buhiri dahrechū masija mari. ³ Painare “Buhiri tiaha”, ni yahu waja ti yoaro seheta musa yoachū, musa cūhure buhiri dahrerohca. Æ jina “Sãre buhiri dahresi”, ni tuhotuboca musa. Jierara. Musa cūhure buhiri dahrerohca tiro. ⁴ Musa ñano yoapachuta Cohamacu musare pja ñuno, dói waro buhiri dahrerara. Æ jina “Cohamacu yūhu mehne suasi”, ni tuhotuboca musa. Jierara. Cohamacu musare pja ñuno, dói waro buhiri dahrerara musa ñaa buhiri tiare cahyachū ñu duaro, tire musa yūhtichū cahmano. ⁵ Æ buhiri dahre duaeraparota, musa Cohamacure yuhti duaerachū, musa ñaa buhiri tiare musa cahyaerachū, buhiri dahrerohca musare. Tó pano musare to buhiri dahreboriro yūhdoro tí to buhiri dahrehti dacho waropure ñano, tuaro waro musare buhiri dahrerohca Cohamacu. Quihõno buhiri dahrerohca. ⁶ Cãinare ti yoa wapataro seheta yoarohca Cohamacu. ⁷ Cãina noaare yoarucuina jira. Tina Cohamacure noano wahchechū yoa duaina, jipihtia dachoripe Cohamacu

mehne ji duaina jira. Tina pinihtare dachoripe tiro mehne jirucuchū yoarohca Cohamacu. ⁸ Wiho mejeta paina sehe tina yoaro sehe jierara. Tina ti mu sūro jia ti, ñaare goa pja yoarucuina baro jira. Cohamacu ya warore cahmaerara. Tina mehne Cohamacu tuaro sua, buhiri dahrerohca. ⁹ Jipihtina ñano yoaina ñano yūhdūahca. Judio masare ãta waha muhtanohca. Tuhsū, judio masa jieraina cūhure ãta waharohca. ¹⁰ Jipihtina noaare yoaina sehene Cohamacu “Noana”, ninohca. Æ jia masa tinare ño payoahca. Æ jiro tinare noano jichū yoarohca Cohamacu. Judio masare ãta waha muhtanohca. Tuhsū, judio masa jieraina cūhure ãta waharohca.

¹¹ Cohamacu judio masare, ã jichū judio masa jieraina cūhure jipihtinare cūno sehe ñua. Mari yoirire ñuno, quihõno besera jipihtinare, ñaina, noaina cūhure. ¹² Paina Cohamacu Moise cjirore to dutia cjirore masieraina sehe buhiri tiare ti yoachū, to dutiare ti masierapachuta tinare buhiri dahrerohca Cohamacu. Æ yoa tí dutiare masiina cūhure buhiri tiare ti yoachū, tí dutiare ti yūhdurucari buhiri buhiri dahrerohca Cohamacu. ¹³ Cohamacu dutiare tuhopahta yūhtierainare “Buhiri marieina, noaina jira ahrina”, ni ñuerara Cohamacu. To dutiare yoaina sehene “Noaina jira”, ni ñua tinare Cohamacu. ¹⁴ Judio masa jieraina Cohamacu Moise cjirore to cūri dutia maerapahta, ti mu sūro noaare yoaa, Cohamacu dutiare yoaa nina. Æ yoaa Moise cjirore to dutiare joari pūre cjaerapahta tina ti mu sūro to dutiare masina. ¹⁵ Æ jia to dutiare ti tuhotuapu potocãta cjuara tina. Æ cjuaa ñaare yoaa dóicãta ti ñaa yoirire masina tina. Æ jiro ñaare yoiriro “¿Dohse jiro baro ñaare yoiri yūhu?” ni tuhotura tiro. Æ jiro noaare to basi to yoiri cūhure masina tiro. ¹⁶ Æ jiro Cohamacu

Jesucristore to warocahti dachoi masa ti yoarire ti yahu duaerarire Jesucristo masi pahñono, tiro tinare beserohca noaina, ñaina cühure. Tó sehe yoarohca tiro noaa buhea to nino seheta. Ahrita jira masare yu buhea.

Cohamacu Moise cjirore to dutirire yahuha Paulo

¹⁷Musa sehe judio masa jina, Cohamacu Moise cjirore to dutiare ño payoaina jina, “Cohamacu to yaina jija”, ni tñhotumana musa. ¹⁸Á jina Cohamacu dutiare masiina jina, to cahmaare masina musa. Á masiina jina, “Noaare sã yoahtore bese masija sã”, ni tñhotumana musa. ¹⁹Á ni tñhotuna õ sehe ni tñhotu namona musa: “Painare ne masierainare noano masichu yoaja sã. Tinare sã buherachu ne Cohamacure masieraboa tina. Á jia ñaare duheraboa”, ni tñhotumana musa. ²⁰Á jina “Tũho masierainare noaare yoa dutiina, macanacã cühure buheina jija sã”, ni tñhotumana musa. Á jina “Cohamacu dutiare cjuana, potocã jiare masi pahñoja sã”, ni tñhotumana musa. ²¹¿Á jina painare buheina jipanahta, dohse yoana musa sehe musa buheriro sehe yoajerari? ¿Painare yaca dutieraina jipanahta dohseana musa sehe yacajari? ²²¿Pairo namono mehne ñano yoa dutieraina jipanahta dohseana musa sehe pairo namono mehne ñano yoajerari? “Cohamacu jira”, ti nia masurine ñu yabiina jira musa. ¿Á ñu yabiina jipanahta dohseana tí masurine ti ño payoa wuhusepu sãa yacajari musa? ²³“Cohamacu Moise cjirore to dutiare cjuaja sã”, niina jipanahta to dutiare yñhdurucara musa. Á yñhdurucana Cohamacure ño payoerachu yoana nica musa painare. ²⁴Áta nina Cohamacu yare ti joari pui: “Cohamacu dutiare musa yñhdurucari buhiri judio masa jieraina sehere Cohamacure ti ñano du-

rucuchu yoara musa judio masa”, ni joa tiha Cohamacu yare ti joari pui.

²⁵“Cohamacu yaina jija”, ni tñhotura cãina judio masa mahanocã cahsarocãre yihsoina. Cohamacu yare ti yoachu judio masa ti jichu noa nina. To yare ti yoerachu judio masa ti jia tia yaba cjihti jierara. Yihsoina ti jia tia cühü yaba cjihti jierara. ²⁶Á jiro judio masa jieraina mahanocã cahsarocãre yihsoeraina ti jipachuta, Cohamacu dutiare ti yoachu ñuno “Yu yaina masata jira”, ni ñuna Cohamacu tinare. Judio masa sehere to ã ni ñuboriro seheta judio masa jieraina sehere ã ni ñuna. ²⁷Payu judio masa Cohamacu Moise cjirore to dutiare cjuapahta tíre yoerara tina. Á jia paina judio masa jieraina sehe mahanocã cahsarocãre yihsoeraina jipachuta to dutiare yoara. Á yoaina jia judio masa ti ñano yoarire masichu yoaina nina. ²⁸Mipure judio masuno waro to jiare yahuihtja musare. To pjacure mahanocã cahsarocãre yihsoeraina jiparota Cohamacure ño payoeraro potocãta judio masuno waro jierara. ²⁹Cohamacu yairo Espiriture cjuariro tirore yuhtiriro tiro tjira judio masuno waro. Á yoa to pjacure mahanocã cahsarocãre to yihso cohãriro seheta to ñaa yoare duhura tiro. To mu sũro dutiare yoariro jieraparota Espiritu Santo to yoadohoa mehne to ñaa yoare duhura. Tó sehe yoarirore “Noariro jira”, ni ñuna Cohamacu sehe. Masa sehe tirore ti ã nierapachuta, ã nina Cohamacu sehe.

3 ¿Yu ã nichu judio masa ti jia tia wiho waro jijari, musa tñhotuchu? Ne wiho waro jia nierara. ¿Cohamacu judio masare to dutiriro seheta ti pjacurire mahanocã cahsarocãre ti yihso cohãa wiho waro jijari, musa tñhotuchu? Ne wiho waro jia nierara. ²Judio masa ti jia tia wiho waro jierara. Cohamacu yare ti joari pure judio masare cü muhtaha. Á jia judio masa ti jichu noa nina tinare.

³ ã jia cãina judio masa Cohamacure ti tuhoerapachuta to niri cjiri potocãta jira. ã jiro to ni cãiro seheta yoarohca tiro.

⁴ ãta jira. Jipihtina masa mahñoina ti jipachuta Cohamacu sehe ne mahñoerara. Panopu to yare yahu mahtariro cjiro to ni joariro seheta ne mahñoerara Cohamacu. Õ sehe ni joaa tiha:

“Potocã niriro jira muhu Cohamacu.

Muhure ã jia masa ‘Cohamacu quihõno yoerara’, ni masierara muhure”, ni joaa tiha panopu.

⁵ Õ sehe ni tuhotuboca masa: “Mari ñaare yoana Cohamacu noaare to yoariro jichu masichu yoaja. ã jiro ñaare mari yoachu noa nina. ¿To ã noaa jipachuta dohsearo tiro mari ñaare yoari buhiri buhiri dahremacanocajari?” ni tuhotuboca masa. Masa ti tuhotuboriro seheta ã nii nija. ⁶ Tó jierara ti ã ni tuhotuchu. Mari ñaa yoari sehe noaa jichu Cohamacu mari ñaare yoari buhiri buhiri dahre masieraboa.

⁷ Masa sehe mahñoina jira. Cohamacu sehe ne mahñoerara. ã jina masa ti mahñochu ñuna Cohamacu sehe ne mahñoerariro to jichu noano nu masija mari. ã jia masa mahñoa, Cohamacu to mahñoerariro to jiare ñoa niboca tina. ãta ni tuhotumana cãina. ã ni tuhotua õ sehe ni tuhotu namomana tina: “Sã mahñoa mehne Cohamacu to mahñoerariro jiare ñona nija. ã ñona noano yoana nija. ã jia sã mahñoa noa nina. ¿Sã mahñoa noaa nichu dohse jiro baro sã mahñori buhiri sãre buhiri dahremacanocabocari Cohamacu?” ni tuhotumana cãina masa. ⁸ ã jia õ sehe ni mahñoa cãina sãre: “Ñano yoana Cohamacu to noariro jichu ñona nica. ã jina ñano yoajihna’, nihre Paulo cãhu”, ni mahño yahusãna sãre cãina. Ti ã niri buhiri tinare Cohamacu buhiri dahrerohca. ãta yoaro cahmana tinare.

Jipihtina buhiri tiina jija mari

⁹ ¿ã yoa dohse ni tuhotujari masa?

¿Mari judio masa paina yuhdoro noaina jijari mari? Jieraja mari. Judio masa, judio masa jieraina cãhu ñaa buhiri tia cãuaina dihta jija mari. ã jina jipihtina buhiri tiina jija mari. ãta jira. Jipihinare yu buheriro seheta jira.

¹⁰ Panopu to ni joariro seheta jira ahri: Õ sehe ni joaa tiha:

“Ne cãiro masno noariro mariahna, Cohamacu to nuhu.

¹¹ Jipihtina masa tuho ñahaeraina dihta jira.

Tuhsu, jipihtina masa ne Cohamacure macaeraina jia, tireore wacu payoerara.

¹² Tina Cohamacu yare cohãa jipihtina ñaare yoaina wahare.

Ne cãiro noaare yoariro pinihta mariahna.

¹³ Ti duseri masa copari ti pjõo dapori yoaro sehe jira.

Ti durucuchu, masa copari urã wi-jaaro sehe mahñoa dihta ti duserire wijaara.

ã durucua agã duseroi to ñima purã wi-jaaro seheta purino ti durucua wijaara ti duserire.

¹⁴ Tina painare ñano durucuina, purino durucuina jira.

¹⁵ ã jia sua ñaina dóicãta masare wajãina jira.

¹⁶ Nohoi ti waharoi tina masare ñano yoa, ñano yuhduchu yoara tinare.

¹⁷ Tó sehe jia paina masa mehne tina noano jierara.

¹⁸ ã yoa Cohamacure ne ño payoerara”, ni joaa tiha panopure.

¹⁹⁻²⁰ Cohamacu jipihtiare to joa na dutiri cjirire sãre judio masare cãhu. ã jiro tó sehe to ni joariro cjiro mari cãhure dutisinina. “Buhiri mariahna sãre”, ni masieraja mari. ã jina mari jipihitiro macaina judio masa, ã jichu judio masa

jieraina cūhū to buhiri dahrehtina mari jia tiare masija mari. Ā jina buhiri tiina mari jiare masina, “Noaina jija sã”, ni masieraja Cohamacure. Cohamacu to yoa dutia sehere ne mari yoaeraja. Ā jiro to dutia sehe buhiri tiina mari jia tiare masichū yoara marine. Ā masina, ō sehe ni masieraja mari: “Cohamacu dutiare yoa pahñohi. Ā jiro Cohamacu marine ‘Noaina jira’, ni ñuna”, ne ni masieraja mari jipihtiro macaina.

Cohamacure noano mari wacū tuana to yaina wahaja mari

²¹ Wiho mejeta mipure Moise cjirore to dutiri cjirore yoa pahñono marieno masare ti ñaa buhirire to cohārire masichū yoara marine Cohamacu. Moise cjiro to joari cjiri mehne, Cohamacu yare yahu mūhtaina cjiri ti joari cjiri mehne yahu cū mūhta tuhsūha ahrire. ²² Jipihtina Jesucristore wacū tuainare, tirore tūhoinare “Noaina jira”, ni ñuna Cohamacu. Tó sehe cūno potori ñuna tiro jipihtina dohse jiina Jesucristore wacū tuainare. ²³ Mari jipihtina ñaare yoaina buhiri tiina dihta jija. Ā jina Cohamacu to cahmano sehe mari jiboriro duhsa yuhduara. ²⁴ Mari ā jiina jipachūta Cohamacu marine pja ñuna. Ā jiro Jesucristo sehe mari ñaa buhirire wapabasari jire. To ā wapabasaro mehne “Buhiri marieina noaina jira”, ni ñuna Cohamacu marine. ²⁵ Panopu macaina cjiri buhiri tiina ti jipachūta Cohamacu dóicāta buhiri dahreraha tinare. Ā buhiri dahreraro ti buhiri tiare wiho waro ā tūhotunocano nieraha. Baharo tiro Jesucristore warocari jire mari ñaa buhiri yariahtiro cjihtore, to di mehne mari ñaa yoirire wapabasahtiro cjihtore. Jesucristore mari wacū tuachū Cohamacu sehe mari ñaa yoi buhirire borohca. Ahrire yoaro, quihōno yoiro to jia tiare masichū yoaro niha. ²⁶ Ā yoa mipu cūhūre quihōno yoiro to jia tiare masa ti ma-

sichū cahmana tiro. Quihōno yoiro jira tiro. Ā jiro Jesure warocari jire masa ti ñaa buhiri yariahtiro cjihtore. Ā jiro Jesure wacū tuainare, “Buhiri marieina, noaina jira”, ni ñuno, quihōno yoaro nica.

²⁷ ĶMipure “Noaina jija mari”, ni masicari mari musa tūhotuchū? Tīre ne ni masieraja mari. ĶDohseana ā ni masieracari mari? ĶCohamacu to dutiare yoana, “Noaina jija”, ni masibocari mari? Jierara. Tí cūhūre ni masieraja mari. Mari ā ni masierapachūta Jesure mari wacū tuachū “Noaina jira”, ni ñunohca marine Cohamacu. ²⁸ Ō sehe masija mari: Jesure mari wacū tuachū ñuno marine ñu jicoara Cohamacu. Ā jiro marine “Buhiri marieina, noaina jira”, ni ñuna tiro. To dutiare mari yoiro wapa ā ni ñuerara. Tirore mari wacū tuachū ā ni ñuna.

²⁹ Tuhsū, Cohamacu judio masa puhtoro dihta jierara. Judio masa jieraina puhtoro cūhū jira tiro. ³⁰ Ā jiro Cohamacu cūirota jiro jiro, jipihtina bui puhtoro jira. Ā jiro jiro judio masare, ā jichū judio masa jieraina cūhūre Jesure ti wacū tuachū, tinare cūno potori “Buhiri marieina, noaina jira”, ni ñunohca Cohamacu. ³¹ ĶĀ jina Jesure wacū tuana Cohamacu Moise cjirore to dutiare cohāna nibocari mari? Cohāeraja mari tīre. Jesure wacū tuaina jina, Cohamacu dutiare yoa pahñona nija mari.

Abrahā Cohamacure to wacū tuarire yahuha Paulo

4 Mari ñuchū cjiro panopu macariro Abrahā cjirore Cohamacu ō sehe yoaha: ² Abrahā cjiro noaare to yoa-pachūta “Noariro jira”, ni ñueraha Cohamacu tirore. Ā jiro noaare yoa-parota ñariro jisnino “Yūhū pini noariro jija”, ni masieraha Abrahā, Cohamacu to ñuchū. ³ Cohamacu yare ti joari pū ō sehe nina: “Abrahā Cohamacu to niri-

to quihõno tuho ñaha, tireore to wacũ tuachũ ñũno Cohamacũ tireore ‘Potocãta noariro jira’, ni ñũha”, ni yahura Cohamacũ yare ti joari pũi. ⁴Puhtoro dahrainare waparo, wiho waro to pja ñũa mehne waparo nierara. Ti dahrari wapa tinare waparo nina. ⁵Wiho mejeta Cohamacũre wacũ tuainare dahrainare ti waparo sehe yoerara Cohamacũ. Cohamacũre wacũ tuarirore “Noariro jira”, ni ñũna Cohamacũ. To ã ni ñũchũ tí noaa to yoari wapa jierara. Cohamacũ sehe tireore cahmaeraina cjiire tireore ti cahmachũ ñũno buhiri marieina, noaina wahachũ yoara. ã jiro masũno Cohamacũre to wacũ tuachũ ñũno “Noariro jira”, ni ñũna Cohamacũ tireore. ⁶ãta niha panopũ macariro Davi cjiro. Masũno noaare to yoapachũta Cohamacũ tireore “Noariro jira”, ni ñũeraca. Tireore to wacũ tuachũ ñũno pini Cohamacũ tireore “Noariro jira”, ni ñũna. Cohamacũ to ã ni ñũriro wahcheare yahuha Davi cjiro. Õ sehe niha:

⁷“Cohamacũ ti ñaa yoirire to cohãchu masiina sehe tuaro wahchera.

⁸‘Noaina jira. Mũsa buhiri tiare wacũsi yũhũ’, to nichũ tuhoina tuaro wahchera”,

niha Davi cjiro.

⁹¿Judio masa ti pjacũre mahanocã cahsarocãre yihsorina dihtare ti ñaa yoirire boari Cohamacũ? Jierara. Judio masa jieraina yihsoraina cũhũre ti ñaa yoirire bora tiro. Pari turi Abrahãre wacũga mũsa. Tiro Cohamacũre to wacũ tuachũ ñũno “Noariro jira”, ni ñũha Cohamacũ. ¹⁰¿Dohse jichũ ã yoari Abrahã, mũsa tuhõtuchũ? To pjacũre mahanocã cahsarocãre to yihsolto panopũta tireore “Noariro jira”, ni ñũha Cohamacũ. ã jiro yihsoro, to ñaa yoirire cohã tuhũriropũ yihsoha. ¹¹ã jiro dóihta Cohamacũre wacũ tua mũhtaha Abrahã. To ã wacũ tuachũ ñũno “Noariro jira”, ni ñũha Cohamacũ tireore. ã to wacũ

tuaare, to yairo to jiare to ñohto cjihtore Cohamacũ tireore to pjacũre mahanocã cahsarocãre yihsu dutiha. ã jiro Abrahã to yihsolto pano Cohamacũ sehe “Noariro jira”, ni ñũ tuhsũha tireore. Tiro to yihsolto pano to ã ni ñũriro seheta jipihũna Cohamacũre wacũ tuainare judio masa jieraina yihsorainare “Noaina jira”, ni ñũna Cohamacũ. To ã ni ñũina ti jichũ Abrahã ti ñũchũno cjiro waro yoaro sehe wahara. ¹²Tí yoaro seheta masa, yihsolina Cohamacũre ti wacũ tuachũ ti ñũchũno cjiro waro jia tiha Abrahã. Tiro to yihsolto pano Cohamacũre wacũ tuaha. ã jia tiro yoaro seheta wacũ tuaina judio masa Abrahã panamana ji turiaina jira.

Cohamacũ Abrahãre to ni cũrire “Potocã tjira”, niha Abrahã

¹³Panopũ õ sehe niha Cohamacũ Abrahãre: “Ahri yahpare mũhũre, mũ panamana ji turiaina pũ cũhũre waihtja”, ni yahu cũha Cohamacũ Abrahãre. To dutiare to noano yoari wapa ã nieraha Cohamacũ tireore. Abrahã Cohamacũre to wacũ tuari wapa sehere ã niha Cohamacũ tireore, “Noariro jira”, tireore to ni ñũri baharo. ¹⁴“Cohamacũ Moise cjirore to cũri dutia dihtare yoaro cahmana”, nina judio masa. Tó sehe nina Cohamacũre wacũ tuaro marieno ahri yahpa jipihũtireore na duara. Wacũ tuaro marieno ti nachũ mari sehe Cohamacũre mari wacũ tuaa yaba cjihti jieraboa. ã jiro Cohamacũ marine to ni cũri cjiro yaba cjihti jieraboa. ¹⁵Moise cjirore to cũri dutia sehere yoerara masa. ã jiro to dutiare ti yũhdũrucari buhiri masare buhiri dahrerohca Cohamacũ. Wiho mejeta to dutia mariachũ to dutiare yũhdũrucaro cũhũ mariaboa.

¹⁶ã yoa Cohamacũre wacũ tuaina dihta to wahtore naahca. Abrahã cjiro Cohamacũre wacũ tuaha. ã jiro jipihũna tiro yoaro sehe Cohamacũre wacũ tu-

aina ti ñuchuno waro yoaro sehe tjuara Abrahã cjiro. Æ jiro “Ahrire musare waihtja”, Cohamacu nino jipihtinare tirore wacũ tuaina pinihtare nino niha. Æ jia Cohamacu Moise cjirore to dutiri cjirore yoaina Cohamacure wacũ tuaina Cohamacu to wahtore naahca. Tina dihta nasi. Jipihtina Abrahã cjiro yoaro sehe Cohamacure wacũ tuaina cũhu tinare to wahtore naahca. ¹⁷ Tíre Abrahã cjirore to niriro seheta joaa tiha panopure: “Payu macari macaina ti ñuchuno cjihto cũhi mũhure’, ni cũa tiha Cohamacu Abrahã cjirore”, ni joaa tiha panopu. Æ jiro tiro Cohamacure wacũ tuaa tiha. Æ to wacũ tuachũ mari ñuchũ cjiro yoaa tiha Cohamacu tiro cjirore. Cohamacu sehe yariainare masoriro, jipihtinare, jipihtia cũhure bajuamehneriro jira.

¹⁸ “Payu yahpari macaina mu panamana ji turiaina jahca”, Cohamacu to ã ni cũchũ Abrahã cjiro sehe pohna marieriro jiparota, “Potocãta jira”, ni tũhotua tiha. Æ ni tũhoturo payu yahpari macaina mari ñuchũ cjiro yoaro sehe wahaha tiro Cohamacu tirore to ni cũriro seheta.

¹⁹ Æ jiro cien cũhmari cjuariro jiparota “Bucuro waro jija”, ni tũhotuparota, Sara to namono ne pohna marienicoro to jipachuta “Pohna ti masieraja sã”, ni tũhotueraa tiha Abrahã cjiro. Æ jiro Cohamacu to ni cũrire “Potocãta jira”, nia tiha Abrahã cjiro. ²⁰ “To niriro seheta yoaeraboca”, ne ni tũhotueraa tiha Abrahã cjiro. Æ jiro tiro Cohamacu to ni cũrire noano tũhoa tiha. To ã niare tũhotjiãhno “Cohamacu tuariro jira”, ni ño payoro nia tiha. Æ jiro Cohamacure wacũ tua namoa tiha tiro. ²¹ “Cohamacu to niriro seheta noano bihorohca”, ni tũhotu noano masia tiha Abrahã cjiro. ²² To ã masichũ Cohamacure to wacũ tuachũ Cohamacu sehe “Noariro jira”, ni

ñua tiha Abrahã cjirore. Æta ni joaa tiha Cohamacu yare ti joari pũi.

²³ Æ yoa Abrahã cjiro dihtare ã ni joaeraa tiha. ²⁴ Tíre mari masihtĩ cjihtire mari cũhure ã ni joaa tiha. Æ jiro Cohamacure mari wacũ tuachũ “Noaina jira”, ni ñunohca mari cũhure Cohamacu. Tiro pini mari puhtoro Jesu to yariachũ masori jire tirore. ²⁵ Jesu sehe mari ñaa buhiri yariari jire. To yariari baharo masa wijaari jire tiro Cohamacu marine “Noaina jira”, to ni ñũhto cjihtore.

“Noaina jira”, Cohamacu to ni ñuchũ õ sehe waharohca marine

5 Jesucristore mari wacũ tuachũ ñuno “Buhiri marieina, noina jira”, ni ñuna marine Cohamacu. To ã ni ñuchũ Cohamacu mehne macaina marine jichũ yoara mari puhtoro Jesucristo. ² Æ jina mari tirore wacũ tuachũ ñuno Cohamacu marine cahĩno, pichacapũ wahaborinare yũhdore tiro mehne mari jihto sehe. Cohamacu pinihta noa yũhduariro jira. Æ jiro tiro yoaro seheta jiina wahachũ yoarohca marine tiro. To ã yoahĩ cjihtire noano masi, wahcheja. ³ Æ yoa ñano yũhduna cũhu wahcheja mari. Ñano yũhduna, tíre cũno pja masija mari. Æ cũno pjana, ñano yũhdũpanahta noano Cohamacure wacũ tuaina waha namoja mari. Æ jina Cohamacu yare duhueraja mari. ⁴ Mari ã yoachũ ñuno “Noana”, ni ñunohca Cohamacu marine. Æ jina marine to yũhdohtore noano masi, wacũ cohtana nija mari. ⁵ Ne wiho waro wacũ cohtana nieraja. Cohamacu marine to Espĩritu Santore warocare mari mehne jihtirore. Æ jiro Espĩritu Santo sehe mari mehne jiro Cohamacu marine to ã cahĩrucuare masichũ yoara. To ã masichũ yoachũ marine to yũhdohto noano waro jiro nina. Potocãta yũhdũnahca mari.

⁶Tó pano mari ñaa yoirire mari basi mari yũdũ masierachũ ñũno, to quihõiro mũ sũchũ, Cohamacũre cahmaeraina mari jipachũta, Cristo sehe mari ñaa buhirire yariabasaha. ⁷Cũiro masũno noariro jiparota yariahtiro to jichũ paio sehe to yariaborirore cohtota, to yariabasa duachũ mijo yũdũara. Noaa dihtare yoiriro yaro jiborirore paio yariabasaboca pa tehe nino. ⁸Wiho mejeta Cohamacũ sehe õ sehe yoara. Buhiri tiina mari jisnipachũta mari yaro jiborirore Cristo yariaha. To ã yoachũ Cohamacũ marine to tuaro cahĩare masija mari. ⁹Mari yaro jiborirore to ñano di wijaa, yariachũ Cohamacũ sehe marine “Buhiri marieina, noaina jira”, ni ñũna. To ã ni ñũri baharo mipũ pinihtare marine pichacapũ wahaborinare yũdoroheca Jesu. Marine to yaina wahachũ to yari baharo marine buhiri dahresi pichacapũ Cohamacũ. ¹⁰Cohamacũre ñũ tuhtiina mari jipachũta, to macũno sehe yariaro, mari ñaa buhiri tiare cohãno, Cohamacũre mari ñũ tuhtirire duhuchũ yoare. To ã yoaro mehne Cohamacũ mari buhiri tiare bora. Tuhsũ marine to yaina wahachũ yoara. Mipũ pinihtare tí yũdũo curero yorohca marine. To yaina mari jichũ Jesu to masa mũjari mehne marine pichacapũ wahaborinare noano yũdoroheca tiro. ¹¹Ã jina baharopũ mari yũdũhtore masina wahcheja mari. Mipũre ahri cũhũre wahcheja. Mari puhtoro Jesucristo mari ñaa yari buhirire to yariari baharo Cohamacũ yaina jija mari. Ã jina wahcheja.

**Adãore, Cristore yahuha
Paulo Roma macainare**

¹²Adão cjiro Cohamacũre to yũdũrũcari baharo ahri yahpare ñaa buhiri tia ji dũcaha. Ñaa buhiri tia ji dũcaro mehne masa yaria dũcaha. Jipihtina mari ñaare

buhiri tiare yoaja. Ã jina jipihtina ñaina mari jiri buhiri yariaja. ¹³Cohamacũ to dutiare Moise cjirore to cũhto pano potocãta ahri yahpa macaina ñaa buhiri tiare yoaa tiha. Ti ã yoapachũta to dutia mariachũ to dutiare ti yũdũrũcari buhiri buhiri dahre masieraha. ¹⁴To ã buhiri dahre masierapachũta Adão cjiro cũhũ to baharo jiina cũhũ tí dutia mariasinipachũta yariaa tiha. Moise cjiro to jihto pano tí dutia mariasinipachũta masa yariaa tiha. Paina ñano yoaa Adão cjiro ñano to yoiriro sehe waro yoera timaha. Ã jipahta tina cũhũ yariaa tiha. Ã jiro Adão cjiro ñaare to yoa dũcariro seheta yari pja baharopũ ahri yahpapũ tariro noaare yoa dũcari jire.

¹⁵Adão cjiro to yũdũrũcari Cohamacũ masare to pja ñũa yoaro sehe jierara. Cohamacũ to pja ñũa sehe noa yũdũara. Adão cjiro cũirota jiparota ñaare to yoa dũcari buhiri payũ masa yariaa tiha. Cohamacũ sehe marine pja ñũno, Jesucristore warocari jire. To ã warocachũ tiro cũirota jiriro pichacapũ wahaborinare masare payũ yũdora. ¹⁶Ã jiro Cohamacũ masare to pja ñũa Adão cjiro to yũdũrũcari yoaro seheta jierara. Adão cjiro sehe cũirota jiriro ñaare to yari buhiri jipihtina masa ñaa buhiri tiina jira. Ã ti buhiri tiina jipachũta masa pjũro ti ñaare yoapachũta mipũre masare pja ñũno Cohamacũ ti ñaare bora. Ã boro “Noaina jira”, ni ñũna tiro tinare. ¹⁷Adão cjiro cũirota jiriro ñaare to yoa dũcachũ jipihtina masa yariarucura. Tí potocã tjira. To ã jipachũta ahri sehene wahchenahca mari. Mipũre Cohamacũ masare pja ñũno Jesucristo cũirota jiriro to yariaro mehne ti ñaare boro, tinare “Noaina jira”, ni ñũna. Ã jia jipihtina to ã ni ñũina mũnanopũ Cristo mehne puhtoa jahca.

¹⁸Adão cjiro cũirota to jipachũta to yũdũrũcari buhiri jipihtinapũ buhiri tiina waha dũcaha. Ã jia Cohamacũ

to buhiri dahrehtinapü tjuaha tina. Tó yoaro seheta Jesu cūhū cūirota jiparota noano yoaro jipihtina ti buhiri tiare cohā masina. Ti buhiri tiare to cohāchū, “Buhiri marieina, noaina jira”, ni ñuna tinare Cohamacū. Ā jia to ya catiare cjuaa, ā catirucuahca tina.

¹⁹ Adāo cjiro cūirota Cohamacūre yuhdurūcaha. To ā yuhdurūcachū, payū masa ñaa buhiri tiina wahaha. Tó yoaro seheta Jesu cūhū cūirota Cohamacūre yuhtiha. Ā yuhtiro, payū masa ti buhiri tiare cohā masina tiro. To ā cohāchū “Ñaaire ti yoari buhiri tia mariena, noaina jira”, ni ñuna Cohamacū tinare.

²⁰ Cohamacū to dutiare Moise cjirore cūa tiha tí mehne jipihtina masa ti ñaa buhiri tiare ti noano masihtore. Ā jia masa ti ñaa buhiri tiare masia tí yuhdoro Cohamacū tinare tuaro to cahīa tia cūhūre masiahca. Tiro marine cahī yuhduara. ²¹ Buhiri tiina ti jiri buhiri masa yariahtina jira. Ti yariari baharo, pichacapū wahaahca. Wiho mejeta Cohamacū masare cahī yuhduara. Ā tuaro cahīno, mari puhtoro Jesucristo masare to yariabasaro mehne masare “Buhiri marieina, noaina jira”, ni ñuna. To ā ni ñuina sehe to ya catia mehne ā catirucuahca.

Yariaina cjiri ti ñaaire yoareraro seheta Cristo yaina cūhū ñaaire yoarucuerara

6 ¿Dohse yoanahcari mari mipūre, musa tuhotuchū? Cāina ō sehe niboca: Ñaaire mari yoachū ñūno Cohamacū mari ñaa buhirire borohca. ¿Cohamacū marire to cahī namochū ñū duana ñaaire yoa namobocari mari? ² Jierara. Ñaaire yoarena tjijihna mari. Yariaina cjiri ñaaire ti yoareraro seheta Cristo yaina jina mari cūhū ñaaire yoarucu masieraja mari. ³ Jesu yaina mari jia tiare masa ti ñū masihtore copū bautisare marine paina. Ā jina mari puhtoro Jesucristo to yariachū, mari

cūhū tiro mehne yariaina seheta wahahi. ¿Tíre masierajari musa? ⁴ Ā bautisarina wahana Cristo pjacūre masa copapū ti siō sāa payo cohāriro seheta pano mari ñaa yoarire duhuja. Ā jina Cohamacū to tuaa mehne Cristo to masa mujariro seheta mari cūhū to tuaa mehne mari jia tia cūhūre, mari tuhotua cūhūre cohtotaja. Ā cohtotana to yare wahma yoarucaina wahaja mari.

⁵ Cristo yaina jina, tiro mari puhtoro mehne yariaina seheta jina, to masa mujariro seheta mari cūhū masa mujanahca. Tí potocāta jira. ⁶ Cristo yaina jiducana crusapū tiro mehne yariaina seheta wahai pari turi mari ñaaire yoarucuerahito sehe. Ā waharina jina ñaaire yoarucuina jia namo duasi mari. Tíre mari masija. ⁷ Yariariro cjiropūre ñaaire goa pja mariahna. Ā jiro tiro cjiro ñaaire to yoa duhuriro seheta tí ñaa sehe tirore to dutipe namoeraboro seheta tí ñaaire duhura tiro. ⁸ Cristo mehne yariaina yoaro sehe jina, to masa mujariro seheta mari cūhū masa mujanahca. “Tí potocā tjira”, ni tuhotuja mari. Ā jina tíre mari masa mujajtire wacū cohtaja mari. ⁹ Cristo to yaria masa mujari baharo ne pari turi yariasi. Ā catirucuriro jira tiro. Tíre mari masija. ¹⁰ Ā jiro Cristo cū tahata yariaro, masa ti ñaa yoari buhirire cohāno taro yariaha. To masa mujari baharo Cohamacū to cahmano seheta yoarucuhtiro jira tiro. ¹¹ Tiro yoaro seheta musa cūhū ō sehe ni tuhotuga: “Yariaina cjiri ti yoareraro seheta mari cūhū ñaaire yoa duaeraja. Jesu yaina jina Cohamacū to cahmano seheta yoahtina cjihtita jina nija mari cūhū”, ni tuhotuga musa.

¹² Ā jina musa yariahtina jina ñaaire yoarucuina jiena tjiga. Ā jina musa ñaa yoare goa pjapanahita tíre ā tuhotunocahga. ¹³ Ñaaire yoaina jiena tjiga. Musare pichacapū wahaborinare Jesu to yuhdorina jira musa. To ā yoarina jina

Cohamacu cahmaa dihtare yoaina jiga musa. Á jina noaare yoaina jiga musa. ¹⁴Mipure Cohamacu Moise cjirore to dutia mehne marine dutierara. Cohamacu marine cahno tiro sehe marine dutira. Á jina to yoadohoro mehne ñaare yoa dusa mari.

Musa ñaare yoarucuchu tí ñaa musa puhtoro yoaro sehe jira

¹⁵¿Yñ ã nichu dohse ni tuhutujari musa? ¿Cohamacu sehere yuhtihtina jina Moise cjirore to dutiare yuhtihtina jierana, ñaare yoarucubocari mari? Jierara. ¹⁶¿Ahrire masierajari musa? Musa noano yuhtiriro musa puhtoro jira. Á jina to cahamaca jira musa. Musa ã yuhti musa puhtoro tiro sehetã ñaare yoarucuina musa jichu tí ñaa yoaa musa puhtoro yoaro sehe jira. Á jina ñaare duhu masierara musa. Á jiina jina pichacapu wahahtina jira musa. Cohamacure noano ño payoina jina pinihta, to cahamaca jira musa. Á jina to yaina noaina jira musa. ¿Tíre masierajari musa? ¹⁷Panopu ñaare yoarucuina musa jichu tí ñaa yoaa musa puhtoro yoaro sehe jimare. Mipure sehere noaa buheare tuhona Jesure wacu tuana Cohamacure noano ño payoina wahare musa. Musa ã wahachu ñuna Cohamacure “Noana”, nija. ¹⁸Á wahana mipure ñaa tí dutiriro cjiro sehetã yoerara musa. Á jina Cohamacu cahamaca jina noaa sehere yoara musa. ¹⁹Cahamaca ti puhtoare ti noano ño payoare masi pahõna musa. Á jicu tí musa masiri mehne tí mehne piti dahre buhehi musare ahri buheare noano masieraina musa jichu ñucu. Panopu ñaare yoarucuina jimare musa. Musa ã yoarucuriro sehetã mipure sehere noaare yoarucuina jiga musa. Á jina Cohamacu cahmaa dihtare yoanahca musa.

²⁰Panopu ñaa dihtare yoaina jina, noaa sehere yoera tire musa. ²¹¿Tí jipure ñaa dihtare yoana dohse jirore

wapatari musa? Tí musa ñaa yoarire wacuna mipure buo tica musa. Tí ñaare musa yoari buhiri pichacapu wahaboa musa. Á jina ñaare yoana ne wapataerara. ²²Mipure sehere musa ñaa yoarire duhuna Cohamacu cahamaca wahare musa. Á jina Cohamacu cahmaa dihtare yoaina jinahca. Á jina jipihtia dachoripe Cohamacu mehne jirucunahca. ²³Ñaare mari yoari buhiri pichacapu wahahtina jija jipihtina mari. Mari ã jipachuta mari puhtoro Jesucristore mari wacu tuachu ñuno, jipihtia dachoripe tiro mehne marine jirucuchu yorohca. Mari ã jirucutore ã wanocanohca.

Cohamacu Moise cjirore to dutiare yahu namoha Paulo tjao

7 Yñ coyea, Cohamacu Moise cjirore to dutirire noano masina musa. Masuno to catisinichu tí dutiare yuhduruca dutierara. To yariari baharo pinihtare tí dutiare yoaro mariahna. Tí cühure masina musa. ²Õ sehe jira: Numinore to manuno to catiro puro tiro mehne dihta ji dutira Cohamacu Moise cjirore to dutiri sehe. To ã dutipachuta to manuno to yariari baharo ticoro sehe paire manu ti masina. Ticoro tí dutia mehne ji namoerara. ³Á jiro to manuno to jipachuta ticoro paire manu tiro, ñano yoricoro jira. Wiho mejeta to manuno to yariari baharopu paire manu tiro, Cohamacu dutiare yuhdurucaerara ticoro ã yoricoro. Á yoaro ñano yoricoro jierara ticoro.

⁴Musa cühu yñ coyea Jesu yaina wahana, Jesu to yariachu, musa cühu tiro mehne yariaina sehetã wahare. Á jina yariaina cjirore dutia ti marieno sehetã Moise cjirore to dutia to cüri cjiri musa cühure mariahna. Tí dutia musare dutierara. To manuno to yariari baharo, paire manu tiricoro yoaro sehetã musa cühu panopu musare dutimarire duhu, Cristo mehne jira, ticoro paio mehne to

jiro seheta. Æ jina mipure to yaina jira musa. Tiro sehe to yariari baharo masa mujari jire Cohamacu cahmaare mari yoahito cjihitore. ⁵ Panopu ñaare mari mu suro yoaa timai. Æ jina Cohamacu Moise cjirore to dutirire mari masiri baharo tí dutiare yuhduruca duamai. Tí dutia mariachu yuhduruca duaeraboa. Æ jina tí dutiare mari masiri baharo ñaare tuaro yoamai mari. Æ mari ñaare yoana mari pichacapu wahahtinata jia timai. ⁶ Æ wahaborina jipanahta Cristo yaina jina mipure tí dutia mehne jieraja mari. Æ jiro Espiritu Santo mari mehne jiro marine noaa sehere cohtotachu yoara. To ã yoachu panopu macaa dutia muna dutia to joari cjiri tí mehne jieraja mari mipure.

To ñaa yoiari cjirore yahuha Paulo

⁷ ¿Æ jina Cohamacu Moise cjirore to dutirire dohse nibocari mari? ¿Tí to dutia ñaa jicari, musa tuhutuchu? Jierara. Tí yuhure to dutiri mehne ñaare masii. Æ jicu to dutia mariachu ñaare masieraboa yuhu. To dutia õ sehe jira. “Paina yapure tuaro cahmaena tjiga”, niha to dutia. Ti ã nierachu paina yapure tuaro ti cahmari ti ñaa jichu masieraboa yuhu. ⁸ Æ jicu tí dutiare yu masiri baharo paina yapure tuaro cahmaa tii yuhu. Tí dutiare masierasinicu paina yapure tuaro yu cahmari ti ñaa jichu masieraboa yuhu. ⁹ To dutiare yu noano masihto pano ã tuhutonocai. To dutiare yu masiri baharo pinihta tuaro ñaare yoa duamai. Æ jicu pichacapu yu wahahitore masia tii. ¹⁰ Æ jia Cohamacu dutiare yuhdurucaeraa masa tiro mehne noano jirucuboa. Æ jia tí dutia sehe noano jirucuchu yoabori dutia jipahta yu yuhdurucari buhiri yuhure pichacapu waha dutimare. ¹¹ Æ jicu ñaare yoacu Cohamacu Moise cjirore to dutiare yuhduruca duamai. Ñaare goa pjariro jicu noaare masierahi. Tí ñaa yuhure dojomehner.

Æ jicu noano masierahi. Æ masieracu Cohamacu dutiare yuhdurucacai. Æ jicu to dutiare yu masiri baharo yu ñaa buhirire pichacapu yu wahaboriire masii. To dutia mehne ã masii.

¹² Æ jia Moise cjirore Cohamacu to cūri dutia noaata jira. Æ jia quihōno jita nina tí dutia. ¹³ ¿Æ jipahta marine tí noaa dutia sehe pichacapu wahachu yoajari? Jierara. Tōpu wahachu yoaerara. Mari ñaa yoaa sehe marine pichacapu wahachu yoara. To dutiare mari masiri baharo tí dutiare yuhdurucana ñaare yoana masija mari. Æ jina mari ñaina mari jiare masina mari pichacapu wahahto cūhure masija mari. Æ jina to dutiare masina mari yuhdurucarire tí ñaa yuhdua jichu masija mari.

¹⁴ Cohamacu to dutiare Moise cjirore cūha. Tí to cūa noaa ti jichu masija mari. Wiho mejeta yuhu sehe paina yoaro seheta ñariro jija. Æ jicūta ñaare yoarucuca yuhu. ¹⁵ ¿Dohse waharo nijari yuhure? Ne noano masieraja yu yoaare. Yu yoa duaa sehere ne yoaera, yu tuaro yoa duaeraa sehere yoaja yuhu. ¹⁶ Ñaare yoa duaerapaita ñaare yoaja yuhu. Tíre yoacu Cohamacu dutia noaa dutia ti jichu masija yuhu. ¹⁷ Æ jicu mipure yuhu waro tí ñaare yoeramaja. Wiho mejeta yu tuhutuapu jia ñaa tí sehe yuhure ñaare yoachu yoara. ¹⁸ Noaare tuaro yoa duapaita ne bihoeraja. Ahri yahpa macariro jicu yu tuhutuapu ñaa dihta jira. Ne noaa mariaputiar. Æ jicu noaare tuaro yoa duapaita ne bihoeraja. Ñaa sehe yuhure dojomehne mujana. ¹⁹ Noaa yu yoa duaa sehere yoeraja yuhu. Ñaare yu yoa duaeraa sehere yoaja. ²⁰ Yu yoa duaeraa yoacu mipure yuhu waro tíre yoeramaja. Yu tuhutuapu jia ñaa tí sehe yuhure ñaare yoachu yoara.

²¹ Æ jiro yuhure õ sehe wahara: Noaare yu yoa duapachūta yu tuhutuapu ñaa jira. Æ jicu noaa sehere ne yoa masier-

aca. ²²Cohamacu Moise cjirore to dutirire yu tuhotua mehne tuaro cahma, quihõno yoa duamaja. ²³Å jicu yuhu ahrire yu basi masija: Yu tuhotua mehne noare Cohamacu dutiare yoa duaja. Å yoa duapaihta yu basi ñaare tuaro yoa duaca. Yu mu sũro ñaare duhu masieraja yuhu.

²⁴Å ñaare duhu masieracu pjacũoriro jija yuhu. Ñaare yoacu pichacapu wahaiha yuhu. Cuenah. ¿Yuhũre pichacapu waha dutia ñaare noa yuhũre yuhdobasabocari? ²⁵Jesucristore yu wacũ tuachu tiro sehe ñaa yu yoari buhirire yuhdobasarohca. To å yoachu Cohamacure “Noana”, nija yuhu. Å jicu mipũre yuhu yu basi yu tuhotua mehne Cohamacu dutiare quihõno yoa duamaja. Å yoa duariro jipacũta yu pjacu mehne yu mu sũro ñaare duhu masieraja.

Espíritu Santore cjuaina ti jia tiare yahuha Paulo

8 Mipũre Jesucristo yainare ti buhiri tiboro mariaha. ²Å jiro Jesucristo yairo yu jichũ Espiritu Santo å catirucuchũ yoariro ñaare yuhdũrucachũ yoara yuhũre. Ñaare yuhũre yuhdũrucachũ yoaro yuhũre pichacapu wahaborirore yuhdore tiro. ³Cohamacu Moise cjirore to dutiare mari mu sũro ne yoa pahõosi. Å yoa pahõerana yuhdũrucaina jija mari. Å jina tí dutia yoaa mehne ne yuhdũsi mari. Mari å jiina jipacũta õ sehe Cohamacu marine yuhdorohca. To macũnore mari yoaro seheta pjacu tihtirore warocaha, mari buhiri tiare buhiri tihtiro cjihtore, marine yariabasahtiro cjihtore. Å jiro mari tuhotuapũ jia ñaare tiro duhuchũ yoari jire. ⁴Åta yoare Cohamacu dutiare to tuaa mehne mari bihohto cjihtore. To dutiare bihoina jina mari mu sũro

jieraja. Espiritu Santo to yoadohoa mehne to dutiro seheta yoaja mari.

⁵Ñaare yoa duaina, tí dihtare goa pjara. Espiritu Santo to dutiro seheta yoarucũina sehe tí to dutia dihtare wacũ nunũ, yoa duara tina. ⁶Ñaa dihtare goa pjaa, wacũ nunũina pichacapu wahaahca. Espiritu Santo to cahmano seheta tuaro yoa duaina sehe jipihitia dachoripe Cohamacu mehne å catirucuahca. Å jia tina Cohamacu mehne noano jinocaahca. ⁷Ñaa dihtare goa pja, wacũ nunũina Cohamacure ñu tuhtira. Tina Cohamacu dutiare ne yuhtierara. To dutiare yuhti duaerara. Yuhtia cũhu bihoeraboa tina. ⁸Å jia ti mu sũro yoina Cohamacure wahchechũ yoa masierara.

⁹Wiho mejeta mũasa sehe mũasa tuhotuapũ jia ñaare yoerara. Espiritu Santo mũasa mehne to jichũ to cahmano seheta yoara mũasa. Å jia Espiritu Santore cjuaraina sehe Cristo yaina jierara. ¹⁰Mũasa sehe to yaina jira. Mũasa ñaa buhirita mũasa pjacũri yariara. Å mũasa pjacũri yariahtina jipanahta Cristo mũasa mehne to jichũ tiro mehne to ya catia mehne å catirucunahca mũasa. Cohamacu mũasare “Buhiri marieina, noaina jira”, to ni ñuchũ mũasa tiro mehne å jirucunahca. ¹¹Cohamacũta Jesure masori jire. Å masoriro jiro Espiritu Santo mari mehne to jirucuchũ mari yariari baharo Cohamacu mari cũhũre masonohca. Å masono wahmaa pjacũri wahachũ yoarohca marine. Jesure to masoriro seheta masonohca mari cũhũre.

¹²Yu coyea, to å yoachu ñũna ñaa mari goa pjarire yoena tjijihna. ¹³Mari ñaare yoina jina, pichacapu wahahtinata jinocanata nija. Espiritu Santo to yoadohoa mehne ñaa yoare duhuna, jipihtia dachoripe Cohamacu mehne jirucunahca.

¹⁴Jipihtina Espiritu Santore yuhtiina Cohamacu pohna jira. ¹⁵Espiritu Santo

mari mehne to ji ducachuta Cohamacu pohna ji ducal. Wiho mejeta tiro marine dutipe, dahrachu yoahrtiro jierara. A jina panopu mari cuiri sehe mipu sehere mari cuieraja. To pohna jina, Espiritu Santo to yadohoa mehne mipure “Yu Pucu”, nija mari Cohamacure. ¹⁶ A jiro Espiritu Santo mari wacupu marine o sehe ni masichu yoara: “Potocata Cohamacu pohna jija mari”, ni masichu yoara. ¹⁷ A jina to pohna jina, Cohamacu jipihitiare to pohna “Waihtja”, to nirire mari sehe cjuanahca. Jesucristo cuhu cjuu, mari cuhu cjuanahca tije. Cristo yare mari yoari buhiri nana yuhduna jina mari tiro mehne manopu noano wahchea mehne jinocanahca. A jina Cohamacu to pohna to “Waihtja”, to nirire cjuanahca mari Cristo mehne.

¹⁸ Mipure ahri yahpai nana yuhdusiniya mari. Baharopure mari manopu noano jinocanahca. A jina mipure nana yuhduna, pjiro cahya tuhutuena tjijihna. Ahri mari nana yuhduu wiho waro jira. Baharo noano jinocanahca Cohamacu mehne. A jina tuaro wahchenahca. Ahri pini wiho waro jierara. ¹⁹ Cu nupu Cohamacu to pohna cohtotarohca. Buhiri marieina, yariaerhtina, noana waro jichu yoarohca marine. Mari a wahachu jipihitia Cohamacu to bajuamehneri cjiri cuhu wahma dihta cohtota pihitia wahaahca. ²⁰ Jipihitropure to bajuamehneri noa ti jiborire dojomehneha masuno nana yoa ducaro. Ti mu suro a wahaeraha. Masuno Cohamacure to yuhdurucaro mehne to bajuamehneri a waha. A jiro Cohamacu to bajuamehneri cjirire ata nana ji dutisiniha. Baharo to bajuamehneri cjirire noa wahachu yoarohca tjoa tiro. ²¹ A jiro Cohamacu to bajuamehneri cjirire baa pihitborire noa wahachu yoarohca

tjoa. Cohamacu pohna noana to wahachu yoariro sehta, tinare noano to yuhdoriro sehta noa wahachu yoarohca Cohamacu to bajuamehneri cjirire cuhu. ²² Jipihitia Cohamacu to bajuamehneri cjiri nana ti ji ducari baharo nana yuhduu tiha. Numino niji wahcono to nana yuhduro sehta to bajuamehneri cuhu dachoripe nana yuhdurucura. Tije mari masija. ²³ A yoa mari cuhu to bajuamehneri cjiri yoaro sehta nana yuhduja. To yaina mari wahachu, Cohamacu to yairo Espiritu Santore doihta ware marine. A jina “Waihtja”, to niriro sehta sohtori tirohca”, ni masija mari. A jina noa sehere marine to cohtotahtore tuaro waro cohtaja. A yoa to pohna mari tiro mehne mari noano jilto cuhu tuaro cohtaja mari. Tuhsu, wahma pjacure marine to wahto cuhu tuaro cohtaja. ²⁴ Mari a cohtaina jichu, tirota marine pichacapu wahaborinare yuhdore. Tiro cahapu jirina jina tiro cahapure mari wahahtore cohtaeraboa mari. Marine to yuhdo tuhsuri baharo tije cohta namoeraboa. ²⁵ A jina to wahtire nuerapanahca Cohamacu marine to yuhdohtore cohtana, noano mehne a cohtarucuja.

²⁶ A yoa Cohamacure wacu tuera cureina to cahmaare noano masieraina jija mari A jina tirore quihono siniina cuhu jieraja mari. Wiho mejeta mari a jiina jipachuta, Espiritu Santo sehe marine yadohora. Marine tuaro pja nuno mari ya cjihtire durucuro marieno to tuhutu mehne tiro Cohamacure tuaro sini payobasara. ²⁷ Cohamacu to cahmano sehta mari Jesu yaina ya cjihtire sini payobasara tiro Espiritu Santo. To a sini payobasachu Cohamacu mari tuhutuare masi pahnoriro jiro, Espiritu Santo to sini payobasaare masina.

Cristo to tuaa mehne ñaa yoaare yuħdurucanahca mari

²⁸ Ahrire yu yahuhtire masija mari: Jipihtina Jesure cahĩina mari jichu to cahmaare yoahinare besere marine tiro. Ā jiina mari jichu ñuno Cohamacu ā yoadohorucara marine. Ā jina mari ñano yuħdupanahta ñano yuħdurucu dojoaeraja. Ā jina Cohamacu yoadohoro mehne noano jinahca mari. ²⁹ Cohamacu marine to yaina cjihtire dõiputa masi, bese tuhsuha. Ā besero to macuno Jesu to yoaro seheta jihtina cjihtire marine cũha, payu masa to macunore mari wahmi tihto cjihtore. ³⁰ Panopu to yaina to ji dutirina mari jichu, to pohna mari jihtina cjihti cũhure beseha marine. Ā jiro marine to beserinare tiro “Buhiri marieina, noaina jira”, ni ñure. Marine to ā niinare tiro yoaro sehe jihtina cjihtire tiro mehne muanopu noano jichu yoarohca Cohamacu.

³¹ Tĩre masina õ sehe tuhotuja mari: Cohamacu marine to cahĩinare ne paina ñu tuhtia bihosi. ³² Cohamacu mari ya buhirire yariahtirore to macunore warocaha. “Yu macure cahija. Ā jicu tirore warocaeraja”, nieraha tiro. Marine ā tuaro yoadohoriro jiro, jipihtia marine duhsarire wa pahnonohca. ³³ Cohamacu to beseina mari jichu, tiro marine “Ñaa buhiri marieina, noaina jira”, ni ñure. Mari ā jiina jichu paina marine “Ñaina jira”, ne ni yahusa masierara. ³⁴ Cristo mari ya buhirire yaria masa mujaha. Mipure Cohamacu poto buhusehe sehei jira puhtoro jiro. Ā jiro tiro mari ya cjihtire potocata sini payoro nina Cohamacure. Ā jia paina sehe marine ne buhiri dahre duti masierara Cohamacure. ³⁵ Cristo marine to tuaro cahichu paina tirore “Cahii tjia”, ne ni masierara. Cahĩ duhusi tiro. Mari ñano yuħdupachuta, mari cuipachuta, paina marine ti ñano yoapachuta, mari

juca baapachuta, suhti marieina mari jipachuta, nu cuaroi mari jipachuta, marine ti wajapachuta Cristo marine ā cahirucurohca. ³⁶ Cohamacu yare ti joari pui mari ñano yuħduhtore yahuro, õ sehe nina:

“Mu yaina sa jichu masa nu jicoaeraa, ti wajahntina ā jirucunata nija.

Oveja ti wajahntina ti jiriro seheta sa cũhure ā wahara”,

ni joaa tiha Cohamacu yare ti joari pui.

³⁷ Ā jina mari ñano yuħdupanahta Cristo marine cahĩiro to yoadohoro mehne ti jipihtiare yuħdu witinahca. Ā yuħduna to yare ne duhusi mari. ³⁸⁻³⁹ Jesucristo yaina mari jichu ñuno Cohamacu sehe marine tuaro cahina. Ā jiro tiro marine ne cahĩ duhusi. Mari yariachu cũhure, mari catichu cũhure, mipure, baharopu cũhure, tiro marine cahĩ duhusi. Ā yoa anjoa, watia puhtoa, ahri yahpa macaina puhtoa, muano macaina, ahri yahpa macaina cũhu marine Cohamacure “Mu yainare cahii tjia”, nia bihosi tina. Cohamacu to ba juamehneri cjihipure tirore marine ne cahĩ duhuchu yoa mariaha. Marine ne tiro cahĩ duhusi.

Israe masa Cohamacu to beserina jira

9¹⁻² Yu coyea Israe masare wacucu tuaro cahyaja. Cristore cahmaerara tina. Ā jicu ñano cahya yajeripohna tjia yuhu. Ti yu ā ni yahua potocata jira. Yuhu Cristo yairo tjija. Ā jicu musare “Cahyaja”, yu nia sehe potocata jira. Musare ā nicu mahnoi nieraja. Espiritu Santo yu ā mahnoerachu masino, yuhure “Quihono mu cahyarire yahure mahu” ni, yuhure masichu yoare. ³ Israe masa yu coyea yu ya yahpa macaina pichacpu wahaahca. Cohamacure tinare yuħdo duti duacu õ sehe ni duamaca yuhu sehe: “Ti ya buhirire yuhu sehe pichacpu wahaihtja. Ā jiro ti yaro jiborirore yuhu sehere buhiri dahrejaro

Cristo”, ni duamaca yũhũ. ⁴Tina yũ coyea Israe cjiro panamana ji turiaina jira. Tinare to pohna cjihtire cũha Cohamacũ. Tuhsũ, to si sitea mehne ti watoi jia tiha. Tinare jipihtinare to noano wahachu yoaa cũhure yahu cũ muhtaa tiha. Tuhsũ, Moise cjirore to dutiri cũhure dóipũta tinare Israe masareta cũ muhtaa tiha. Tirere ti ño payohti macaa cũhure tinareta cũ muhtaa tiha. Tuhsũ, masare to yũhdohto cũhure yahu cũa tiha tinare Cohamacũ. ⁵Sã ya curuari waro doce curuari waro jira. Sã ñũchũsuma ji muhtarina cjiripũ ti panamana jia tiha. Ti panamana ji turia napũ jija sã Israe masa. Æ jiro mari yoaro sehe pjacũ tiriro taro, sã coyeiro Israe masũno waro jire Cristo. Tiro Cohamacũta jira. Æ jiro tiro jipihtina bui puhtoro jira. Jipih-tia dachoripe tirere noano ño payojihna mari. Æ ño payorucujihna.

⁶Paina Israe cjiro panamana ji turia jipahta Cohamacũ yaina waro jierara. Æ jina tina to yaina ti jierachu ñũna õ sehe ni tuhotuboca mũsa: “Israe masare yũ yaina jichũ yoaihtja’, ni parota cãinare Cohamacũ to niriro seheta yoerara”, ni tuhotuboca mũsa. Æ ni tuhotuena tjiga. ⁷Õ sehe jira: Paina Abrahã panamana ji turiaina ti jipachũta “Abrahã panamana ji turiaina waro jira”, ni ñuerara Cohamacũ tinare. Æ jiro õ sehe nia tiha Cohamacũ: “Mũ macũ Isaa panamana ji turiaina tina pinihta potocãta mũ panamana ji turiaina waro jiaha”, ni yahu cũa tiha Cohamacũ Abrahãre. ⁸To Æ ni yahu cũchũ ahrire masinahca mari: Abrahã cjiro panamana jipihtina waro Cohamacũ pohna jieraca. Cohamacũ to ni cũrire noano tuhoina tirere wacũ tuaina sehe tinata jica Cohamacũ pohna. Æ jia tinata jira Abrahã cjiro panamana ji turiaina waro.

⁹Õ sehe niha Cohamacũ Abrahã cjirore: “Pa cũhma ahri pja baroihta yũ tjua tachũ mũ namo Sara wihãrirocãre

cjuarohca mũ macũre”, nia tiha Cohamacũ Abrahã cjirore. Æ nino Cohamacũ Abrahã cjiro macũno to masa bajuahtore yahu cũyuro nia tiha.

¹⁰Baharo Isaa cjiro namono Rebeca wama tiricoro puaro pohna tia tiha. Ti puaro Isaa sã ñũchũ cjiro jia tiha. ¹¹⁻¹²Æ jia ti pohna ti masa bajuerasinipachuta, noare, ñaa cũhure ti yoerasinipachuta Cohamacũ ti pocoro cjihtore õ sehe nia tiha: “To bahũro sehe to wahminore dutirohca. Æ jiro to puhtoro jirohca”, nia tiha ticorore. Cohamacũ to cahmano seheta besera tiro. Æ jiro jiro cũirocãre besero ticorore Æta ni yahua tiha. Æ jiro masa ti yoare ñueraparota to cahmano seheta tiro to yaina cjihtire besera. ¹³Æta ni joaa tiha to yare ti joari pũi: “Jacobõ sehere cahãa tihi. Esaũ sehere cahãera tihi’, niha Cohamacũ”, ni joaa tiha panopũ.

¹⁴¿Tĩre wacũna dohse ni tuhotubocari mari? ¿Ti yoahtire ñueraparota cũirore Æ besero Cohamacũ quihõno yoaro nierabocari, mũsa tuhotuchũ? Jierara. ¹⁵Õ sehe nia tiha Cohamacũ Moise cjirore: “Diro yũ pja ñũ duarirore pja ñũihtja”, nia tiha tiro Moise cjirore. Æ jiro cũirore Æ besero quihõno yoaro niha Cohamacũ. ¹⁶Æ jina mari mũ sũro mari cahmano sehe Cohamacũre marine pja ñũchũ yoeraja mari. Tuhsũ, ne mari noare mari yoari wapa cũhure marine pja ñuerara tiro. To mũ sũro to pja ñũ duaina sehere pja ñũna. ¹⁷Egipto macaina puhtoro faraõ cũhure to cahmano seheta yoaa tiha tiro. Õ sehe nia tiha Cohamacũ faraõre: “Egipto macaina puhtoro cjihtore cũi nii muhũre yũ tuare jipihtinare yũ ñohto cjihtore. Tuhsũ, jipih-tia yahpari macaina yũhure ti masihto cjihtore puhtoro sõi nii yũhũ muhũre”, nia tiha Cohamacũ faraõre. Tõ seheta nina Cohamacũ yare ti joari pũi. ¹⁸Æ jiro to pja ñũ duinare to mũ sũro pja ñũna tiro. Tuhsũ, paina sehere to mũ

suro yuhtierachu yoara tiro. To cahmano seheta yoara tiro.

¹⁹To ā yoariro jichu nuna yuhu sehere ō sehe niboca musa: “Cohamacu marine to cahmano seheta to yoachu mari sehe tirore yuhdurucana bihosi. ĶMari ā yuhdurucana bihoerapachuta dohse jiro baro marine buhiri dahre duajari tiro?” ni susini sinituboca musa yuhure. ²⁰Tire ō sehe ni yuhtija musare: ĶMasa wiho jiina jipanahta Cohamacure tuhtijari musa? Dihi biato dahrerirore “ĶDohseacu yuhure ō sehe jiri biato yoari muhu?” ti biato to ni sinituboriro seheta nina nica musa Cohamacure. Tó sehe ni masierara musa. ²¹Dihi biato dahreriro dihi mehne to yoa duaro seheta yoara. Ā yoaro cūria dihica mehne noaare cūhti biatore yoa masina tiro. Tia dihica mehneti wiho jiare cūhti biato cūhure yoa masina tiro. Tiro yoaro seheta Cohamacu cūhu to yoa duaro seheta yoara.

²²Ā jiro Cohamacu pichacapu to cohāhtinare ti nāa yoarire to nū yabiare, to tuaa cūhure nōno taro, tinare dói buhiri dahre duamaha. Ā dói buhiri dahre duaparota, yoari pja ti nāa yoare ā nūocasiniha. Ā jiro tinare buhiri dahrerasiniha. ²³Āta yoaha Cohamacu noabiariro to jiare, to tuaa cūhure mari masihto cjihtore. Panopu marine to pja nūina cjihtire tiro beseri jire jipihtia to tuaare to noaa cūhure mari cjuahito cjihto sehe. ²⁴Ā jina mari sehe to beserina jinata nija. Ā jia to beserina sehe cāina judio masa dihta jierara. Cāina judio masa jieraina cūhu jira to beserina. ²⁵Āta nina judio masa jierainare Cohamacu yare Osea cjiro to joariro seheta: “Pano yu yaina jieraina cjiri cūhure baharopu tinare ‘Yu yaina jira’, nihtja. Ā yoa pano yu cahīeraina cjiri cūhure baharopu tinare ‘Yu cahīina jira musa’, nihtja”, nia tiha Cohamacu.

²⁶“Yu yaina jierara musa’, Cohamacu to nia yahpari macaina tina Cohamacu catiriro pohnata jahca”,

ni joaa tiha Osea cjiro panopure.

²⁷Tuhsu, panopu macariro Isaia cjiro cūhu Israe masare ō sehe ni yahua tiha: “Pjiri ma macaa padu yaparicāre mari quihōna bihoeraja. Israe masa tí yaparicā peri payu ti jiro sehe jiina ti jipachuta mahainacā Cohamacu yuhdorohca tinare. ²⁸Cohamacu ahri yahpa macainare payu masare to nino seheta cjero mehne potocāta buhiri dahre bahrañonohca”, nia tiha Isaia cjiro. ²⁹Ā yoa pari turita Isaia cjiro ō sehe ni joaa tiha tjoa:

“Mari puhtoro jipihtina bui puhtoro mahainacā mari mehne macainare yuhdoeraro, marine judio masare jipihtinare butichu yoaboa tiro.

Sodoma macainare, Gomorra macaina cūhure to butichu yoariro seheta mari cūhure butichu yoaboa tiro”, ni joaa tiha Isaia cjiro yu coyera Israe masare.

Judio masa noaa buheare cahmaeraha

³⁰Ā tjira. Ā jina ahrire masi namoga musa: Judio masa jieraina Cohamacure macaerapahta tirore bocare. Jesucristo ti wacū tuachu nūno, “Buhiri marieina, noaina jira”, ni nūre tinare Cohamacu. ³¹Wiho mejeta judio masa sehe “Cohamacu dutiare mari yoachu tiro marine yuhdorohca”, nia Cohamacu Moise cjirore to dutiare yoapahta, bihoerare. Ti ā bihoerachu nūno, Cohamacu “Noaina jira”, ni nūerare tinare. Ā jia noaina ji duapahta bihoerare. ³²Ō sehe yoaa, tina bihoerare: Tina Cohamacure wacū tuaro marieno ti mu sūro Moise cjirore to dutirire yoa duamare, to yaina ji duaa. Mari piti dahre buhechu Cristo tāca yoaro sehe jiriro jira. Ti mu sūro yoainare Cristo puha

tu borachũ yoari tãca yoaro sehe jiriro jira. Mũroca wahcãriro sehe tãcapũ pũha tu, bora sũ caharo to wacũ wahcãnopũre ne sũerara. (Pũha tu borariro yoaro se-heta tina Cristore tãca yoaro sehe jiriore cahmaeraina Cohamacũ cahapũ ne susi.)³³ Āta ni joaa tiha Cohamacũ yare ti joari pũi:

“Jerusalẽ wama tiri macai pũha tu borachũ yoari tãca yoaro sehe jiriore cũja.

Mari piti dahre buhechũ õ sehe jira: Mũroca wahcãriro tãcapũ doca wahã sũ bora sũ caharo to wacũ wahcãnore sũerara.

Tãca yoaro sehe jiriore cahmaeraina sehe tiare pũha tu bora, ti wacũ wahcãnopũre ti sũeraro seheta Cohamacũ cahapũ susi.

Wiho mejeta tirore wacũ tuaina sehe tiro mehne ã wahcherucuahca”,

ni joaa tiha.

10 Yũ coyeya, Israe masare pichacapũ wahaborinare Cohamacũ to yũhdohtore, tuaro yũ yajeripohna mehne cahmasãamaja yũhũ. Ā jicu Cohamacũ tinare to yũhdohto cjihtore sini payoja yũhũ. ²Potocãta tina Cohamacũ cahmaare tuaro yoa duamana. Ā yoa duapahta to cahmaa warore masierara. ³Tuhsũ, tinare Cohamacũ to noaina wahachũ yoaborire tina tũho ñahaerare. Ā tũho ñahaeraa, ti mũ sũro noare yoa duapahta bihoerare. Ti ã yoachũ tinare Cohamacũ to wacũ tua dutiriro seheta ti yoerachũ ñũno, tiro sehe tinare “Noaina jira”, ni ñũerare. ⁴Wiho mejeta Cristore wacũ tuaina sehene “Noaina jira”, ni ñũna Cohamacũ. Ā jina dutia yoa mehne yũhdũeraja mari. Cristo mehne yũhdũja.

⁵Moise cjiro panopũ macariro õ sehe ni joaa tiha: “Cohamacũ to dutirire ne cũno dũhsaro marieno mari yoa pahũochũ Cohamacũ yũhdorohca marine”, ni joaa tiha tiro. ⁶⁻⁷To ã ni joa-

pachuta mipũre masa Cristore ti wacũ tuachũ ñũno Cohamacũ tinare “Noaina jira”, ni ñũna. Tĩ buhea noaina ti wahachũ yoari buhea õ sehe ni yahura: Cristo to basi ahri yahpapũ wihi tuhsũri jire. Tuhsũ, masa mũja tuhsũri jire. Ā jina õ sehe ni tuhutuena tũja mũsa: “¿Diro sehe mũanopũ Cristore na tabasaro wahabocari marine to yũhdohtõ sehe? ¿Diro sehe yariaina cahapũ Cristore masobasa na tabocari? Tirore na taboriro mariaha”, ni tuhutuena tũja mũsa. ⁸Õ sehe ni yahura Cohamacũ yare ti joari pũi: “Cohamacũ ya buheare mari macachũ to buhea õi jira. To buheare masi tuhsũra mũsa. Ā yoa to buheareta durucua tire mũsa”, ni joaa tiha. Tĩ buheare Cristore wacũ tuaa buheare masare yahuja sã. ⁹Tĩ buhea õ sehe ni yahura: “Jesu mari pũhtoro jira”, ni mari yahuchũ, “Cohamacũ Jesure yariariro cjirore potocãta masore”, ni mari wacũ tuachũ, Cohamacũ marine pichacapũ wahaborinare yũhdorohca. ¹⁰Jesure mari wacũ tuachũ Cohamacũ sehe marine “Noaina jira”, ni ñũnohca. Jesure mari wacũ tuaare painare mari yahuchũ tiro marine pichacapũ wahaborinare yũhdorohca.

¹¹Õ sehe nina Cohamacũ yare ti joari pũi: “Cohamacũre wacũ tuaina tirore ti wacũ tuaa mehne ne cahyasi”, niha Cohamacũ yare ti joari pũi. ¹²Judio masare, judio masa jieraina cũhũre Cohamacũ cũno poterita yoadohora. Mari pũhtoro jipihtina bui pũhtoro jira tiro. Ā jiro tirore to yoadohoare siniinare jipihitinare noano waro yoadohorohca tiro tinare. ¹³Õ sehe ni joaa tiha panopũre: “‘Yũ buhiri tiare cohãbasa, yũhũre yũhdoga’, ni mari pũhtorore masa ti sinichũ tinare pichacapũ wahaborinare mari pũhtoro yũhdorohca”, ni joaa tiha Cohamacũ yare. ¹⁴Wiho mejeta masa sehe Cristore wacũ tuaeraa, tirore ã ni sini masierara tina. Tuhsũ, to buhea cũhũre

tũhoeraa, tirore wacũ tua masierara. Ā yoa to buheare yahuriro mariachũ cũhũre tĩre tina masisi. ¹⁵ Tuhsũ, to buheare yahuhtinare Cohamacũ sehe to warocaerachũ to buheare yahu masierara. Ā ni joaa tiha Cohamacũ yare ti joari pũi: “Noa buheare yahuhtina ti tachũ noano wahcheja mari”, ni joaa tiha panopũre.

¹⁶ Tĩ Ā ni joari jipachũta masa payũ noaa buheare tuho duaerara. Āta ni joaa tiha Isaia cjiro: “Yũ puhtoro, tinare mari yahurire tina ne tuho duaerare”, ni yahua tiha Isaia cjiro Cohamacũre. ¹⁷ Ā jia masa noaa buheare tuhoa Cristore wacũ tuare. Ti tuhoa sehe noaa buhea sehe Cristo ya buhea waro jira.

¹⁸ Ā jicu ahrire õ sehe ni sinitu ñũ duaja musare: ¿Israe masa Cohamacũ yare tuhoerari, musa tuhotuchũ? Potocãta tina tuhoa waro tuhomare. Āta nina Cohamacũ yare ti joari pũ cũhũ:

“Cohamacũ noa putiariro to jia tiare yahuina jipihtiropũ yahu sitea wahare.

Ā jia jipihtiropũ macainapũ to yare tuho sahseare”,

ni joaa tiha panopũre. ¹⁹ Pari turi musare õ sehe ni sinitu ñũ duaja tjoa: ¿Israe masa tuhopahta noano masierari tina, musa tuhotuchũ? Masia timaha tina. Ahrire yahu namocũ Moise cjiro to nirire yahu muhtaitjta. Ā sehe ni joaa tiha tiro: “Õ sehe ni yahura Cohamacũ Israe masare: ‘ “Tuho masieraina, ñaina jira”, ni musa ñũina sehere yũ yaina cjihti wahachũ yoaitjta.

Yũ Ā yoachũ musa sehe tina mehne sua, tinare ñũ tuhtinahca.

Ā yoacũ musare suachũ yoaitjta yũhũ’, ni yahure Cohamacũ Israe masare Israe masa jierainare to yaina jichũ yoaro taro”,

ni joaa tiha Moise cjiro. ²⁰ Tuhsũ, Isaia cjiro cũhũ cuiro marieno õ sehe nia tiha:

“Õ sehe nina Cohamacũ: ‘Yũhũre macaeraina sehe yũhũre bocahre.

Ā jicu yũhũre cahmaerainare tinare yũhũre masichũ yoahi yũhũ’, nire Cohamacũ”,

ni joaa tiha Isaia cjiro judio masa jierainare. ²¹ Tuhsũ, Israe masa sehere õ sehe ni joaa tiha Isaia cjiro: “Õ sehe nina Cohamacũ: “Tina yũhũre yũhdũrucaina, yũhũre cahmaeraina jira. Ā jicu tinare ti ñaare cahya duticũ “Yũ yaina wahaga”, Ā nirucumai tinare. Wiho mejeta tina sehe yũhũre ne yũhti duaerare’, nire Cohamacũ”, ni joaa tiha Isaia cjiro.

Mahainacã Israe masare pichacapũ wahaborinare yũhdorohca Cohamacũ

11 Ā jiro Israe masare Cohamacũ to beseina cjirore cohãno niri tiro, musa tuhotuchũ? Jierara. Tinare cohãerare tiro. Yũhũ cũhũ Israe masũno, Abrahã panamino ji turiariropũ jija. Benjami ya curua macariro jija yũhũ. ² Panopũre Israe masare to ya curua macaina cjihtire Cohamacũ besea tiha. To Ā beserinare cohãerare. Cohamacũ yare ti joari pũi Elia cjiro ya quitire yahura. ¿Elia cjiro Cohamacũre sinino, Israe masare to yahusãrĩre masierajari musa? Ā sehe ni yahusãha tiro: ³ “Yũ puhtoro Cohamacũ, tina Israe masa mu yare yahu muhtainare wajãre. Tuhsũ, tinata paina muhũre ño payoa taa, wahiquinare wajã jũ muoa tuhuri cũhũre cohãre. Ā jicu yũhũ dihta mu yairo duhsaja mipũre. Yũ Ā jichũ tuhoa yũhũ cũhũre wajã duara tjoa, mipũre”, niha Elia cjiro Cohamacũre. ⁴ To Ā nichũ tuhorõ Cohamacũ sehe õ sehe ni yũhtiha Elia cjirore: “Siete mil waro mũa yũ yaina jira mipũre. Tinare wihboi yũhũ. Tina yũ yaina sehe Baal wama tiri masũre ne ño payoera tire tina. Ā jicu cuii tjiga muhũ”, nia tiha Cohamacũ Elia cjirore panopũre. ⁵ Tĩ pjare Elia cjiro to

jia tiri pjaþure to yaina masare to beseriro seheta mipu cūhure mahainacā Israe masare to yaina cjihtire besere Cohamacu. Cohamacu tinare cahmano tinare pja ñuno besere. ⁶Noaare ti yoari wapa tinare besero nierare. Tinare ā cahmano, pja ñuno besere. “Noaare musa yoari wapa musare beseihtja” nino, tiro tinare potocāta pja ñuno nieraboa.

⁷Ā yoa ō sehe jira: Israe masa Cohamacu tinare “Noaina jira”, to ni ñuchu yoa duapahta tina cūno pjaerare. Wiho mejeta Cohamacu to basi to beserina sehe noaina to yaina wahare. Tirore cūno pjaeraina sehe to yare tuho duaerare. ⁸Āta nia tiha Cohamacu yare ti joari pūi:

“Cohamacu tirore cahmaerainare to yare tuho ñahaerachū yoare.

Ā jiro potocā jiare ti tuhupachuta tinare ne noano tuho ñahaerachū yoare Cohamacu.

Āta jirucura tina mipu cūhure”, ni joaa tiha panopure. ⁹Ā yoa panopu macariro Davi cjiro Israe masa Cohamacure ti cahmaerari buhiri ō sehe nia tiha Cohamacure:

“Tina Israe masa ti bose numuri, ti wahchea numuri ti yuhdoro wato, yurica ñahñoriro to ñano yuhdoro seheta tina cūhure ñano yuhdūchū yoaga.

Tó sehe yoainare tinare ñano buhiri dahrega muhu.

¹⁰Tuhsu, mu yahuare tinare ne tuho ñahaerachū yoaga muhu.

Ā buhiri tirucuina ji, ā cahyarucuina jijaro tina”,

nia tiha Davi cjiro Cohamacure.

**Judio masa jierainare
pichacapu wahaborinare
yuhdorohca Cohamacu**

¹¹¿Judio masa Cristore ti cahmaerachū ñuno, Cohamacu tinare cohāno warota nibocari, musa tuhotchū? Co-

hāsi tinare. Ā cohāeraparota tina Cristore ti cahmaerachū mipure judio masa jieraina sehere Cohamacu yuhdorohca. Mipure tinare to yaina jichū yoare Cohamacu. To ā yoachū ñua cāina judio masa sehe tina mehne sua sayo, Cohamacu yainata ji duaahca. ¹²Judio masa ti yuhdūrucachū ti noano yoerachū paina sehere ahri yahpa macainare cāinare Cohamacu yuhdore. To ā yuhdochū tina sehere noano wahare. To ā yoariro yuhdoro, baharo judio masa sehe Cristore ti noano wacū tua dūcachū pinihtare ahri yahpa macainare jipihtiropure noaputiaro waharohca.

¹³Mipure musare judio masa jierainare yahui tai nija. Cristo cūre yuhure judio masa jierainare buhehtiro cjihtore. Ā jia yu dahraa sehe wiho jia jierara. ¹⁴To cūriro seheta yuhū musare buheja, yu coyca judio masa sehere musare ti ñu cūchū yoa duacu. Cohamacu yuhdorina musa jichū ñua tina cūhū Cristore cahmaa, to yuhdoina wahaboca. ¹⁵Judio masare cohābo curero, judio masa jieraina sehere noaa buheare Cohamacu yahu dutire. Tí buheare ti tuhori baharo Jesure ti wacū tuari baharo cāina judio masa jieraina, jipihtiro ahri dacho macaina Cohamacu yaina wahare. Ā jiro judio masare to cohābo curechū noano wahare paye yahpari macaina sehere. To ā yoariro yuhdoro judio masa to cohābo cureina cjirire pari turi to yaina cjihti to yoachū pinihtare jipihtinapure ahri yahpa macainare noaputiaro waharohca. To yaina cjihti pari turi ti wahachū, jipihtinapu to yaina yariaina cjiri sehe pari turi ti masaboro seheta jirohca.

¹⁶Ō sehe jira: Trigo yubu mehne wahma pāoca ti yoaria Cohamacu yaria cjihto Cohamacure ti wachū, tiare ti yoa duhari yubu cūhū to yariata jira. Tuhsu, yucucu nuhcori cūhū Cohamacu ya nuhcori cjihti jia, tu dupuri cūhū

Cohamacu yata jira. Õ sehe mari ni piti dahre buhechu Abrahã sã ñuchu cjiro Cohamacu yairo to jiriro seheta to panamana ji turiaïnape cûhu Cohamacu yaina jahca Cristore wacû tuaina jia. Yoa duhari yubu cûhu to yariata jica. Tuhsu yucucu nuhcori cûhu Cohamacu ya nuhcori cjihti jia, tu dupuri cûhu Cohamacu yata jica. Õ sehe mari ni piti dahre buhechu, Abrahã sã ñuchu cjiro Cohamacu yairo to jiriro seheta to panamana ji turiaïnape cûhu Cohamacu yaina jira, Cristore wacû tuaina jia.

¹⁷Ti ã jihtina jipachuta cãinare ti coyea sehere judio masare Cohamacu cohãre. Olivo wama tidu dupurire cãa dupurire to dute cohãboro seheta cãina judio masa sehere Cohamacu cohãre. Æ yucucu dupurire cohãno to cohãri dupuri jiriro cjiroi paye dupurire nucû macadu olivocu dupurire cohtota duhu õhre. Tó yoaro seheta Cohamacu musare judio masa jierainare Abrahã panamana ji turiaina cohtotare musare, musa cûhure yuhdoro taro. ¹⁸Musare to ã cûchu “Judio masa yuhdoro noaina jija sã”, ni tuhoutuena tjiga. Ahrire yu yahuhtire wacûga musa: Judio masa sehere bese muhtaha Cohamacu. Æ besero ti coyeiro cjihtore cûha Cristore, musare yuhdoro taro. Æ jina “Judio masa yuhdoro noaina jija”, ni tuhoutuena tjiga musa.

¹⁹Musa judio masa jieraina sehe õ sehe niboca: “Cãa ñaa dupurire to cohãboro seheta Cohamacu cãina judio masare cohãre. Paye dupurire cohtota to õno seheta to yaina marine cûno taro ã cohãre tinare”, niboca musa judio masare yuhduruca duana. ²⁰Ti musa nia potocãta jira. To ã jipachuta tina Jesure ti wacû tuaerari buhiri Cohamacu cohãre tinare. Æ jiro musa cûhure Jesure musa wacû tuaerachu to yaina cjihti musare cûerabo. Æ jina “Judio masa yuhdoro noaina jija sã”, niena tjiga

musa. Æ nieranata “Cohamacu cua pisariro jira”, ni tuhoutuena musa. ²¹Olivocu ji muhtaa dupuri waro yoaro sehe judio masa sehe Cohamacu yaina ji muhtaha. To cohtotaa dupurire to õboro seheta Cohamacu to yaina musa sehere cohtota cûha. Wiho mejeta to yaina ji muhtaina judio masa tirore ti wacû tuaerachu, cãinare cohãre. Tinare to cohãri seheta musa cûhure cohãnohca, tirore musa wacû tuaerachu. ²²Cohamacu musare noano yoariro to jichu masiga musa. Tuhsu, cua pisaro mehne buhiri dahreriro to jichu cûhure masiga musa. Tirore ño payoerainare tiro buhiri dahrerohca. Æ jiro tirore musa ño payoerachu olivocu dupuri warore to cohãriro cjiro seheta musa cûhure cohãnohca Cohamacu. ²³Æ yoa judio masa to cohãbo curerina cjiri Cristore ti wacû tua ducachu ñño, olivocu dupuri warore pari turi to duhu õno seheta Cohamacu to yaina cjihti yoarohca tinare. Cohamacu to ã yoa masihtu cjihtireta tuare cjuara tiro. Æ jiro tiro tinare cãinare to yaina cjihti yoarohca. ²⁴Musa judio masa jieraina jina, nucû macadu olivocu dupuri yoaro sehe jira musa. Æ jiina musa jipachu olivocu toadui nucû maca dupurire to na ta õboro seheta, Cohamacu musare to yaina cjihti yoahre. To ã yoachu, ne mijoerare tirore. Judio masa Cohamacu to bese muhtarina jira. Olivocu toadu dupuri waro yoaro sehe jira tina. Æ jiro ti jidu waro cjiropure pari turi to duhu õboro seheta to yaina cjihti pari turi judio masare to yoachu, ne mijoerara tirore.

**Baharo judio masare
pichacape wahaborinare
yuhdorohca Cohamacu**

²⁵Yu coyea, ahrire masa ti masierare musare yahuihtja. “Mipure sã dihtare besere Cohamacu. Cohamacu sã masi yuhdurucu suchu ñño, tiro sare

besere”, m̄sa ni t̄hotuerahto sehe ahrire yahuihtja m̄sare. Ō sehe jira: Mip̄re payu judio masa Cohamac̄re t̄ho duasi. Wiho mejeta payu judio masa jierainare Cohamac̄u to quihōriro puro to yaina to yoari baharo judio masa c̄hu tirore cahma d̄caahca. ²⁶ Ti ā cahmachu judio masa payu warore pichac̄pu wahaborinare Cohamac̄u yūhdoro-hca. Cohamac̄u yare ti joari p̄i āta ni yahu joa tiha:

“Jerusalē wama tiri macai judio masa ya macai tinare yūhdotiro tarohca.

Jacobo panamana ji turianare ti ñaa yoari buhirire tiro cohānohca.

²⁷ Tinare yūhdocu panopu tinare yu ni c̄riro seheta yoai nija’, nire Cohamac̄u”,

ni joa tiha Cohamac̄u yare ti joari p̄i.

²⁸ Mip̄re tina judio masa Cristo yare ño payoeraina Cohamac̄re ñu tuhtira. Ti ā yoach̄u mip̄re m̄sa sehe judio masa jieraina Cristore wac̄u tua d̄care. Judio masa sehere Cohamac̄u bese muhtari jire. Judio masa ñuchusuma cjiri to beserina ti jich̄u mip̄u jiina judio masa c̄hure tiro cahina. ²⁹ Cohamac̄u to ni c̄riro seheta tinare to beseriro seheta quihōno yorohca tiro. To nirire ne bos̄i tiro. ³⁰ Panop̄re m̄sa c̄hu Cohamac̄ure yūhdur̄cari jire. Mip̄re judio masa Cohamac̄ure ti yūhdur̄cach̄u ñno tiro m̄sa sehere pja ñno yūhdore.

³¹ Mip̄re judio masa tirore yūhdur̄care. Ti ā yoapachuta Cohamac̄u m̄sare to pja ñuriro seheta tina c̄hure baharop̄re pja ñnohca. ³² Ō sehe jira: Jipih̄tina masare “Yūhure yūhdur̄caina jira”, nina Cohamac̄u. Ā jiro jipih̄tina tirore yūhdur̄caina ti jich̄u ñno jipih̄tinare pja ñu masina tiro.

³³ Cohamac̄u tua yūhdur̄cu suri-ro jira. Noano masi pah̄noriro jira tiro. Ā jiro to t̄hotuare, to yoarire marine noano masiht̄o basioerara. ³⁴ Ō sehe ni joa tiha Cohamac̄u yare: “Cohamac̄u

mari p̄h̄toro to t̄hotuare ne masa noano masierara. Ā jia masa tirore ‘Ō sehe yoaga’, ni masierara. ³⁵ Ā jia masa Cohamac̄ure paye barore ti wari baharo ‘Tiro marine wapamona’, ni masierara masa”, ni joa tiha panop̄re. ³⁶ Cohamac̄u jipih̄tiare yoaa tiha. Tuhs̄u, to tuaa mehne jipih̄tiare jisnich̄u yoara tiro. Ā jia jipih̄tia to ya jira. To ā jiriro jich̄u jipih̄tia dachoripe tirore ño payojih̄na mari. Āta yorucujih̄na.

Cohamac̄u cahmaare marine yoarucu dutiha Paulo

12 Cohamac̄u marine tuaro pja ñure. To ā pja ñuriro to jich̄u ñna, yu coyea, m̄sa sehe oveja noarirore ti j̄u wa m̄oriro seheta Cohamac̄ure ti ño payoriro seheta m̄sa c̄hu tirore ño payorucuga, to yare m̄sa noano yorucuhto sehe. M̄sa ā yoach̄u, tiro wahcherohca. Āta yoaro cahmana marine, Cohamac̄ure quihōno ño payona tana. Ā jicu m̄sare t̄re tuaro yoa dutija. ² Ahri yahpa macaina ñaare yoaina yoaro sehe yoarena tjiga m̄sa. Ā yoa m̄sa t̄hotuap̄re Cohamac̄u noaa t̄hotua sehere to cohtota, c̄ch̄u, yuhtiga m̄sa. Ā yuhtina, noaa sehere t̄ho cohtotarina jinahca m̄sa. Ā yoana noare, Cohamac̄u cahmaare, ñaa mariare, potoc̄a jiare masinahca m̄sa.

³ Cohamac̄u yūhure to yare yoa masich̄u yoariro buhe dutiro beseri jire yūhure. Ā jicu jipih̄tina m̄sare ō sehe ni t̄hotu dutieraja yūh̄u. “Noabiaina ji yūhdur̄caja s̄a”, ni t̄hotuena tjiga. Ā t̄hotunocahga. Jesure m̄sa wac̄u tuari baharo, Cohamac̄u m̄sa c̄ainare noare yoa masiht̄ire to c̄ch̄u, “To yoadohoro mehne ahri noare yoaja”, ni t̄hotuina jiga m̄sa.

⁴ Ō sehe ni yahu namoihtja yūh̄u m̄sare. Mari wamomacari, mari dahpori, mari capari jipih̄tiro mari pjacui jia payu jira. Mari pjacui jia c̄u pjacui

jiparota soro jia dahraa cjuara. ⁵Tí jiro sehetá soro sehe jia dahraare cūna Cohamacu marine. Á jina payu masa jipanahta Cristore wacū tuaina jina, to pjacu cū pjacu yoaro sehetá cū curuata jija mari.

⁶Cohamacu marine to yoadohoro purota to tuaa mehne yoa dutira. Á yoaro marine cāinare soro jia mari yoahitre cūna tiro. To á yoachū marine to cūrire mari sehe noano yoajihna. Á jia Jesu yaina ō sehe yoajaro. Cāinare Cohamacu to yare yahuhtinare cūna. Á jia tina Cristore ti wacū tuaro puro to yare noano yahujaro. ⁷Cāinare Cohamacu musare yoadohohtinare cūna. Á jia tina musare noano mehne yoadohojaro. Cāinare Cohamacu musare buhehtinare cūna. Á jia tina musare noano buhejaro. ⁸Á yoa paina cūhu musare suho wahchechū yoahitina jia, musare noano suho wahchechū yoajaro. Tuhsu, paye barore wahtina jia, ti wahtire noano mehne yajeripohna ti, wajaro. Á yoa paina cūhu musare suho ji muhtahtina jia, noano mehne suho jijaro. Á yoa pjacuoinare yoadohohtina jia, wahchea mehne yoadohojaro.

Jesu yaina jina ō sehe yoaina jiga

⁹“Sā basi cahma cahija”, ni mahñono marieno musa basi cahma cahiga. Á yoana ñaare ñu yabiina jiga musa. Tuhsu, noaa sehere á cahmarucuga. ¹⁰Tuhsu musa bahana warore musa cahino sehetá Jesu yainare musa mehne macainare cahiga. Á yoana musa basi noano cahma ño payoga musa.

¹¹Cohamacu cahmaare yoana, ne caparo marieno yoaga. Á yoana mari puh-toro to dutiro sehetá noano wahchea mehne yoaga.

¹²Cohamacu musare pichacapū wahaborinare to yuhdorinapū jira musa. Á jiro musa wahahto noaputiaro jira. Tíre masina wahchega musa. Á yoa

ñano yuhduna, cūno pjaga “Cristo yare duhuri”, nina. Tuhsu, Cohamacu á sinirucuga.

¹³Paye baro Jesu yainare duhsachu waga tinare. Á yoa musa ya wuhusepū cūhare masa ti suchū noano yajeripohna tiro mehne tinare piti bocaga.

¹⁴Musare ñano yoainare “Noano wahajaro tinare”, ni sini payoga. Tinare á sini payona, “Tina ñano yuhduwahnojaro”, niena tjiga.

¹⁵Á yoa paina wahcheina mehne jina, musa cūhu tina mehne wahchega. Tuhsu paina ñano cahyaro mehne tiina mehne jina, musa cūhu cahya, tiidohoga tinare.

¹⁶Musa mehne macaina mehne noano jiga musa. Á jina “Paina yuhdoro noaina jija”, ni tuhoutuena tjiga. Ō sehe ni tuhoutuaga: “Wiho jiina jija”, ni tuhoutuaga. Á jina “Masi yuhdurucaina jija sā”, ni tuhoutuena tjiga.

¹⁷Paina musare ti ñano yoapachuta, tinare ñano yoa cahmaena tjiga. Noaa sehere yoaga, noaina musa jia tiare jipihitina masa ti masihtti cjihitire. ¹⁸Musa bihoro puro jipihitina mehne noano jinocahga musa. ¹⁹Musa yu cahina, yu coyea paina musare ti ñano yoapachuta tina yoaro sehe ñano yoa cahmaena tjiga. Cohamacu sehe musare ti ñano yoari buhiri buhiri dahrejaro tinare. Cohamacu yare ti joari pui áta ni joa tiha: “Yuhū sehe musare ti ñano yoari buhiri buhiri dahreriro jija. Á jicu potocāta buhiri dahreihitja”, nina mari puh-toro”, ni joa tiha panopure. ²⁰Á jina ō sehe yoaga musa: Musare ñu tuhtiriro to jaca baachū ñuna nuga tirore. To ñahma yapiochū cūhare ñuna tirore sihōga. Musá á yoachū ñuno musare to ñano yoari buhiri buho tirohca. ²¹Á jina paina musare ti ñano yoapachuta musa sehe tinare ñano yoa cahmaena tjiga. Tinare noaa sehere yoaga musa. Á yoana ñaa sehere cahmaerana nica musa.

13 Jipihtina m̄sa bui puhtoa c̄jhtire Cohamacu dihta bese c̄na. Ne c̄iuro puhtoro Cohamacu to bese c̄uaririo mariahna. To ā c̄irina ti jichu n̄na jipihtina m̄sa tinare noano yuhtiga. ²Mari puhtoare noano yuhtierana Cohamacu to bese c̄irinare yuhturucanare Cohamacu ni ja mari. Ā yuhturucanare Cohamacu sehe buhiri dahrerohca. ³Noainare cuichu yoahntina jierara puhto. Ānaare yoaina sehere cuichu yoahntina jira tina. Noaare yoaga m̄sa puhtoare m̄sa cuierahto c̄jhtosehe. Ā yoana cuisu m̄sa. Noaare m̄sa yoachu puhtoro sehe “Noaare yoare m̄sa”, m̄sare ni n̄nohca. ⁴M̄sa puhto Cohamacu to c̄no seheta m̄sare yoadohohtinata jira m̄sa noano jinocahto c̄jhtosehe. Wiho mejeta m̄sa n̄aare yoana pini tinare cuiga. Tina m̄sare buhiri dahrehtina c̄jhtita jira. Jipihtina n̄aare yoainare buhiri dahre dutiro Cohamacu tinare besere. ⁵Ti ā buhiri dahrehtina ti jichu n̄aare yoana m̄sa puhtoare cuiga. Ā jina n̄o payoa mehne “Noaare yoaro cahmana yuhure”, ni tuhoturo mehne noano yuhtijihna. ⁶M̄sa puhto ti dahrahti c̄jhtire Cohamacu c̄ure. Ā jina ti dahraare ti yoachu n̄na m̄sa puhtoare wapa nabasainare wapara m̄sa.

⁷Jipihtinare m̄sa puhtoare noano yuhtiga. Tuhsu, puhtoare wapa nabasaina c̄uhure wapaga m̄sa. Ā yoa puhto sehe payere ti wapa dutichu c̄uhure wapaga. Ā jina jipihtina puhtoare noano n̄o payoga. ⁸Tuhsu, paina masare wapamoena tjiga. Tinare cahino cahmana. To cahai jinare cahiriro Cohamacu dutiare yoa pahno tuhsuriro jira. Ā jina m̄sa cahai jiina c̄uhure cahiga. ⁹Ō sehe nina Cohamacu dutia: “Pairo namonore wuana tiena tjiga. Numia c̄uhu pacoro manonore wuana tiena tjiga. Masare wajāena tjiga. Yacaena tjiga. Paina yare goa pjaena tjiga”, ni yahura to dutia. Paye

dutia c̄uhu jira. Ti ā jipachuta c̄no dutiare m̄sare yahui tai nija. Tí dutia c̄no dutia to jipachuta tí dutiare yoana Cohamacu dutiare yoa pahnona nija mari. Tí dutia ō sehe nina: “M̄sasi m̄sasi cahino seheta m̄sasi cahai jiina c̄uhure cahiga”, nina. Tí dutiare yoana Cohamacu dutiare yoa pahnoina jina nina. ¹⁰M̄sasi cahai jinare cahina, tinare n̄ano yoasi. Ā jina tinare cahina, Cohamacu dutiare yoa pahnoinata jira m̄sa.

¹¹Ā jina carina yoaro sehe jiena tjiga m̄sa. Noano wacu masiga. Jesure noano wacu cohtaga. Jesu marine to tjua ta naahto mahanocā duhsatjiana. Tirero mari coā wacu tua ducachu Jesu marine to yuhdoro tahto mahanocā duhsamare. Mip̄u pinihtare cahacā waro jira to tahto. Ahri yu nirire masina m̄sa. ¹²Mip̄ure n̄aina ya dacho jira. To tahto mahanocā duhsara. Tíre masina, buhiri tichu yoare, nahitiano yoaro sehe jiare duhu pahnojihna mari. Ā jina Cohamacu cahmaa sehere yoajihna mari. Ā Cohamacu yare yoana, n̄aare duhu pahnonahca mari. Ahri dachore payu n̄aa baro jichu, n̄ami yoaro sehe jira. Wiho mejeta Cristo to tachu, n̄ami yoaro sehe jiro pihtia waha, pa dacho, buhria muja taro yoaro sehe waharohca. Surara coma suhtiro to sāa ducataro seheta Cohamacu n̄aare to ducataare noano c̄ua pahnojihna mari. Ā tíre c̄uana n̄aare duhu, Cohamacu cahmaa sehere mari yoajihna. ¹³Ā jina Jesu to tahtore wacu cohtaina jina, noa sehere yoajihna. Bose numurine yoana n̄ano yoana tjijihna. Tuhsu, cahaena tjijihna. Ā jina numia mehne n̄ano yoana, paina mehne n̄ano yoana, cahma sayoia jiena tjijihna. M̄sa numia c̄uhu m̄sa mehne n̄ano yoana tjiga. ¹⁴Wiho mejeta Jesucristore puhtoro tina, tirero yuhtiga m̄sa. Ā yuhtina to jiro seheta jiga m̄sa. Ā jina n̄aare m̄sa goa pja sehere yoana tjiga.

Musa coyeare Jesu yainare “Ñano yoaa nina”, ni yahuwajaena tjiga

14 Jesure wacū tuaritore to noano wacū tuaro dūhsasinichū ñuna tire to jira coaro mehne cahmaga. To ã jiro jichū ñuna “Ne masierara mūhū” ni, tiro mehne cahmasayoena tjiga. ²“Jipihtiare chū masija yūhū”, ni tuhotura paina. Paina sehe Jesu yare noano masierasinia wahiquinare chueraina, toaa dicha dihtare chura. ³Jipihtiare chūina sehe toaa dicha dihtare chūinare ñu tuhtiea tjijaro. Æ yoa toaa dicha dihtare chūina cūhū jipihtiare chūinare “Ñano yoaa nina”, ni cahma yahuwajaea tjijaro. Jipihtiare chūina sehe Jesure wacū tuaina ti jichū Cohamacu tinare to yaina yoa tuh-sure. To yaina ti jichū ñuna wahiquinare chueraina sehe tinare yahuwajaea tjijaro. ⁴Jesure wacū tuaina Cohamacure dahra cohtaina dihta jira. Ti ã jichū ñuna musa tinare yahuwaja masierara. Jesure wacū tuaina to cahmano sehe ti quihōno yoerachū ñuno tiro dihta ti puhtoro jiro, tīre yahu poto masina. To cahmaare quihōno ti yoachū cūhūre tīre yahu masina tiro. Æ jiro tiro sehe to yainare “Ñano yoare mūhū”, ni yahuhtiro jirohca. Æ jiro tire dahra cohtainare noaa dihtare yoarucu masichū yoiro jira Cohamacu.

⁵Cāina cāa dachori cua pisaro mehne Cohamacure ti ño payohti dachori cjihtire cjuara. Paina sehe, “Dohse jiri dachore Cohamacure ño payochū, noana”, ni tuhotu, ño payoina jira. Tina cūno potori ã yoeraina jipahta jipihina ō sehe ni tuhotujaro: “Jesu to cahmano seheta noano yoana nija”, ni tuhotu masijaro. ⁶Cūiro cāa dachori cua pisaro mehne Cohamacure ti ño payoa dachorihi Cohamacure ño payoro, tiro cūhū quihōno ño payoro nina. Tuhsū jipihtiare churiro churota, Cohamacure

“Noana”, ni wahche payora tiro. Æ jiro tiro cūhū Cohamacure ño payorota nina. Æ yoa paio sehe cāa chūare chuerara, Cohamacure ño payoro. Tiro cūhū Cohamacure “Noana”, ni wahche payora.

⁷Tuhsū, mari cahmaa dihtare yoina ne jira masieraja mari. Cristo jira mari puhtoro. Æ jiro mari catichū mari yariachū cūhūre mari puhtorota jira. ⁸Mipure mari catisinino puro Cristo yare yoahntina jija mari. To yaina jija. Mari yariari baharopū cūhūre to yainata jinahca. Æ jiro mari catichū mari yariachū cūhūre Cristo mari puhtoro jira. ⁹Æta jira. Cristo yaria masa mujaha catinane, ã jichū yariaina cūhūre ti puhtoro jiro taro.

¹⁰¿Dohseana tana musa coyeirore Jesu yairore “Ñano yoaro nina”, ni yahuwaja duajari musa? ¿Dohseana tana musa coyeirore tu diho cū duajari musa? Mari jipihina Cristo panoi mari ducuchū tiro sehe mari yoirare masi pahñonoriro jiro, marine beserohca noainare, ñainare. To ã besetiro to jichū musa coyeirore “Ñariro jira”, ni yahuwajaena tjiga. ¹¹Cohamacu yare ti joari pūi ō sehe ni joaa tiha:

“Ō sehe nire mari puhtoro: ‘Yūhū catiriro jija.

Æ jicu ō sehe ni quihōno warota yahuja musare.

Jipihina yū panoi na tuhcuca caha suahca.

Æ na tuhcuca caha su, “Noariro, tuariro jira mūhū” ni, yūhūre ño payoahca’, nire mari puhtoro”,

ni joaa tiha. ¹²Æ jiro jipihina mari yoirare Cohamacu siniturohca marine. “¿Dohse yoana ã yoiari?” ni siniturohca. To ã sinituchū yūhtiro jica marine.

Musa coyeirore ñano yoachū yoena tjiga musa

¹³Æ jina mari mehne macainare “Ñaina jira musa”, ni cahma

yahuwajaena tjijihna. Ā yoana mari coyeirote Jesu yairote dojomehnena tjijihna “Jesure wacū tua duhuri”, nina. ¹⁴Yuhū Jesucristo yairo jicu, ahri yu nihtire noano masija yuhū. Yuhū sehe jipihtia chūare yu chūchu yu chūri buhiri, buhiri mariahna. Wiho mejeta pairo sehe “Ahri chūare chūcu buhiri tii nica yuhū”, ni tūhoturiro sehe chūro, potocāta buhiri tiro jira. ¹⁵Tí potocā tjira. Paina ti sio, chūera barore mūsa chūchu nūno, mūsa coyeiro nū cū chūro, “Cue, nāno yoai nica yuhū”, ni pjiro tūhotuboca tiro. Tirore ā nū cū chūchu yoana, tirore cahīna nieraca mūsa. To sio, chūera barore mūsa chūchu, tiro cūhū nū cū chūboca. Ā chūro “Nāno yoai nija”, ni tūhoturo Cristore duhuboca. Mūsa coyeiro yaro jiboriro cūhūre yariari jire Cristo. Ā jina “Cristore duhuri”, nina tirore nū cū chūchu yoana tjiga. ¹⁶Ā jia “Ahri sā yoari noa nica”, mūsa ni tūhotuchū paina mū sare yahuwajaboca. Ti ā yahuwajachū nūna mūsa ā yoarire yoa namoena tjiga, “Yahuwaja namori”, nina. ¹⁷Cohamacū sehe mari puhtoro jira. To ā jichū mari chūa, mari sihnia cūhū ā jinocaa nina. Wiho warota jira. Ā jia mari puhtoro to dutiare, noa cūhūre mari yoachū tí waro jia nina. Paina mehne mari noano jinocachū cūhūre noa waro jia nina. Tuhsū, Espiritu Santo yoadohoa mehne mari wahchechū noa waro jia nina. ¹⁸Tó seheta Cristo yare yoarirore nūa Cohamacū, masa cūhū “Noano yoare mūhū”, niahca.

¹⁹Tó seheta yoajihna mari pinihta noano mari jinocahto cjihtore, mari basi mari cahma yoadohohto cjihtore. Ā yoana Jesure wacū tua namonahca. ²⁰Pairo Jesu yairo to chū dutierari cjirire mūsa chūchu nūno tiro sehe nū ji coeraro Cohamacū yare cohāboca. Ā jina tíre chuena tjiga. Potocāta jipihtia chūa

noa chuata jira. Tí ā jipachūta paye barore mari chūchu pairo “Nāa chūa jica ahri”, niriro jiparota nū cū chūboca. Ā chūro nāno yoaro nica tiro. Ā jina marine to nū cū chūchu, mari cūhū nāno yoana nija. ²¹Wahiquina dihire mūsa chūchu nūno, vinore mūsa sihnichū nūno, pairo Jesu yairo “Tíre chūcu nāno yoai nica yuhū”, ni tūhoturiro jiparota tiro cūhū nū cū, chū sihniboca. Ā ni tūhoturiro pinihta chū sihnino nāno yoaro nina. Ā jina tiro to nāno yoaer-ahto sehe Jesure to wacū tua duhuer-ahto sehe wahiquina dihire, vino cūhūre mūsa sehe mūsa duhuchū noa nina. ²²“Jipihtiare chū masija”, ni tūhotuna, tíre Cohamacū dihtare yahuga. Nāare yoarerariro, “Noano yoai nica yuhū”, ni tūhoturiro wahcheriro jira. ²³Pairo sehe “Ahri chūare chūcu nāno yoai niboca yuhū”, ni tūhoturiro jiparota tí chūare chūro, buhiri tiro jira tiro. “Ahrire chūcu potocāta noaare yoai nija”, ni tūhotuerara tiro. Ā ni tūhotueraro tíre chūro, to chūri buhiri buhiri tira tiro. “Noaare yoai nija”, ni tūhotueraro tíre yoaro, buhiri tira tiro.

Mari cahai jiiinare noano yoajihna

15 Mari Cohamacūre noano wacū tuaina sehe wacū tuara cureinare yoadohojihna. Ā yoana mari ya cjihti dihtare yoana tjijihna. ²Ā jina mari cahai jiiinare Jesu yainare noano yoajihna ti noano jinocahto cjihtore, Cohamacūre ti noano wacū tua namohto cjihtore. ³Cristo sehe to ya dihtare yoeraha. Āta nina Cohamacū yare ti joari pūi. Ō sehe ni joaa tiha: “Cristo ō sehe nire Cohamacūre: ‘Mūhū sehēre nāno durucuborina yuhū sehēre nāno durucure’, nire Cristo Cohamacūre”, ni joaa tiha panopūre. Ā nāno ti durucuriro jiro Cristo to Pūcūro ya sehēre yoaro niha. ⁴Panopū Cohamacū yare ti joari pūi tina joaa tiha

mari noano buhehto cjihtore. Æ jina tí püre buhena wahcheja. Æ buhena mari ñano yuhduna cño pjana, noano mari yuhduhtore cohtanahca. ⁵Cohamacu musare tuachu yoariro wahchechu yoariro musare jipihtinare cño potori noano jichu yoajaro, Cristo to cahmano seheta. ⁶Äta yoajaro tiro musa jipihtina cño potori Cohamacure mari puhtoro Jesucristo Pucurore “Noariro, tuariro jira”, ni musa ño payohto cjihtore.

Judio masa jierainare noaa buheare yahu ducaha

⁷Cristo marine to yoariro seheta musa mehne macainare noano cahma piti bocaga. Musa ã yoachu ñua “Potocãta Cohamacu noariro jira”, ni ñuahca masa sehe. ⁸Musare ahrire niita nija: Judio masare yoadohohtiro cjihto taha Cristo. Cohamacu tirore warocaró judio masa sã ñuchusuma cjiripure to ni yahuriro cjiro seheta yoaro niha. Tíre to yoari cjirire masare masichu yoahhtiro cjihto taha Cristo. ⁹Masare Cristo to yoadohochu Cohamacu pja ñuno nire tinare. To ã pja ñuchu judio masa jieraina cñu Cohamacure “Noariro, tuariro jira” ni, ño payora mipure. Tina cñhure to yaina jichu yoaro taha Cristo. Cohamacu yare ti joari pui äta ni joaa tiha:

“Cristo õ sehe niha Cohamacure: ‘Judio masa jieraina cahai muhure “Cohamacu noariro, tuariro jira”, ni ño payoihtja.

Æ jicu tina cahai basacu mu ya cjihtire basaihtja’, niha Cristo Cohamacure”,

ni joaa tiha panopure. ¹⁰Tuhsu, õ sehe ni joaa tiha tjoa:

“Cohamacu to beserina judio masa mehne cahma wahchega musa cñu judio masa jieraina”,

ni joaa tiha panopure. ¹¹Tuhsu, õ sehe ni joaa tiha tjoa:

“Judio masa jieraina jipihtina Cohamacure ño payojaró.

Æ jia jipihtiro macaina tirore ‘Noariro, tuariro jira’, ni ño payojaró”, ni joaa tiha. ¹²Ä yoa Isaia cjiro cñu õ sehe ni joaa tiha:

“Jesé panamino ji turariro tarohca.

Æ taró judio masa jieraina bui puhtoro jirohca tiro.

Æ jia tina sehe tirore wacü tuaa, tinare pichacapu wahaborinare to yuhdohtore masiahca tina”,

ni joaa tiha panopure.

¹³Cohamacu marine baharopu to yuhdohtore wacü cohtachu yoariro noano musare wahchechu yoajaro. Tuhsu, musare Jesure wacü tuainare noano jinocachu yoajaro tiro. Musare to ã yoachu musare to yuhdohtore Espiritu Santo to tuaa mehne wahchea mehne wacü cohta namochu yoajaro.

¹⁴Ahrire musare yu yahuhtire noano masija. Musa sehe noaina jira. Tuhsu, Jesu yare noano masina musa. Ä masina musa basi noano cahma yahu, buhe masina musa. ¹⁵Musa ã masiina musa jipachuta cãa tahari ahri püpure musare cuiro marieno noano yahu pahño joahi tíre musa boerahto sehe. Cohamacu yuhure cahino musare buhe dutiro cüre yuhure. Æ jicu to cüriro seheta yoaja, musa tíre boerahto sehe. ¹⁶Yuhure to ã cñu, sacerdote to yoaro sehe yoaja yuhu. Æ yoacu, Jesucristo yare noaa buheare judio masa jierainare buheja yuhu. Yu ã buhechu tuhoa, tina Jesure wacü tuara. Tina Jesure wacü tuainare yuhu sehe sacerdote wahiquinare wajã jũ muo Cohamacure yu waboriro seheta, tinare “Mu yaina jira”, nija Cohamacure. Yu ã niinare Espiritu Santo sehe tinare Cohamacu yaina cjihti jichu yoara. Ti ã jiina jichu ñuno, Cohamacu sehe ji coaro mehne tinare ñahanohca.

¹⁷Cohamacu to buhe duti cüriro jicu Jesucristo to yoadohoa mehne yu yoari

cjirire wahchea mehne yahuja musare. ¹⁸⁻¹⁹Tuhsu, ahri pinihtare musare pototi yahu duahi. Yu yahua yu mu suro yu yahua ne jierara. Paina judio masa jierainare Cristo to yoadohoa mehne tinare yu buhechu tuhoa, yu yoarire nua, a jia Jesu tuaa mehne yu yoa norire nua, Espiritu Santo to tuaa mehne tina Cristore wacu tuare. Jerusalapu wahma yu buhe ducari baharo jipihitia macaripepu buhe wahcahi. Pu Ilirico yahparu cuhure Cristo ya buhea noaa buheare buhei sui. ²⁰Cristo yare masieraina dihtare noaa buheare tuaro buhe duahi, yuhu mehne macaina ti buherinapure buhe duaeracu. ²¹Ata ni joaa tiha Cohamacu yare ti joari pui: "Panopu tirore ne tuhoeraina cjiri tirore masiahca.

A yoa tirore ne tuhoeraina cjiri to yare noano tuhoahca", ni joaa tiha Cohamacu yare ti joari pui.

Paulo Romapu to wahahtore yahuha

²²A jicu jipihitiro macainare buheriro jicu payu tahari musa cahai waha duapaihta waha masiera tihi. ²³Mipu pinihtare ahri yahparipure yu dahraa pihitia wahahre. A jicu payu cuhmari musa cahapu waha duariro jicu musa cahapu wahahtja. ²⁴Espanapu wahacu, musare toi nu yuhduahitja. A yoacu musa mehne wahcheihtja. Tuhsu, musa mehne mahanoca yu jiri baharo yuhure musa yoadohoa mehne Espanapu yuhdu wahcaihtja. ²⁵Mipure Jerusalapu wahasinii tai nija. To macainare Jesu yainare yu coyeare niherure naasinii wahi nija. ²⁶Macedonia yahpa macaina, Acaya yahpa macaina cuhu noano mehne Jesu yainare Jerusalapu jinare pjacuinare niherure warocahre tinare yoadohoa. A jicu tinare tire wai wahi nija. ²⁷Ti niherure waa, noano mehne wahre tina. Ti a yoachu noa nina, yu tuhotuchu.

Tinare judio masa jierainare judio masa sehe Cohamacu yare buhe muhtare. A jia tinare to yuhdohto cuhure buhe muhtare judio masa. Ti a buhechu nucu Macedonia macaina Acaya macaina mehne judio masare ti yoadohochu noa nina yuhure. Tinare ti buheri wapa yoaro sehe jira ti, yu tuhotuchu. ²⁸A jicu Jerusalé macainare ti niherure wa tuhsucu Espanapu wahahtja. Topu wahacu musare nu yuhduahitja. ²⁹A yoa musa cahapu yu wahachu Cristo yare musare yu buhechu tiro musare noano yajeripohna tichu yoarohca.

³⁰Yu coyea, mari puhtoro Jesucristore wacu tuara musa. A yoa Espiritu Santo to tuaa mehne painare cahina musa. A jiina jina yuhu cuhure tuaro sini payoga Cohamacure. ³¹O sehe ni sini payoga: Judea yahpa macaina Jesure no payoeraina yuhure ti nano yoa duachu Cohamacu yuhure to nu wihbohto sehe sini payoga. Tuhsu, Jerusalé macaina Jesu yainare niherure yu wabasachu tina tire wahchea mehne ti nahahto sehe sini payoga. ³²Musa a sinichu Cohamacu cahmachu wahchea mehne musa cahapu wahahtja. A jicu musa mehne jicu wahchea mehne soihtja. ³³Cohamacu marine noano jinocachu yoariro musa mehne jirucujaro.

Paulo noa dutiha

16 Mari coyeacoro Febe wama tiri-coro musa cahapu waharo taro nina. Ticoro Cencrea wama tiri macai Jesu yainare cahmachuinare yoadohoricoro jira. ²A jiro payure yoadohoricoro yuhu cuhure yoadohoricoro jihre ticoro. Tuhsu, mari puhtoro Jesu yacoro jira. A jina ticorore noano mehne musa mehne ji dutiga. To sehetu yoaro cahmana marine Jesu yainare. A yoana ticorore paye baro to maerachu nuna ticorore waga musa.

³ Aquila, to namono Priscila cūhū noajaro. Jesucristo yare yū buhechū tina cūhū yūhū mehne dahrare. ⁴ Tinare mahano wajāmoñore paina yūhure ti wajā duachū ti yoadohori buhiri. Ā jicu tina mehne wahcheja yūhū. Tuhsū, judio masa jieraina Jesu yaina jipihtina tina cūhū tina mehne wahchera. ⁵ Aquila ya wūhūi cahmachuina cūhū Jesu yaina noajaro. Yū cahīriro Epeneto cūhū noajaro. Tiro Asia yahpa macariro tōi jiro Cristore wacū tua muhtararo jire. ⁶ María cūhū noajaro. Ticoro musa mehne tuaro dahrahe. ⁷ Yū coyea Andrónico, Junia cūhū noajaro. Peresui yū jichū tinata yūhure piti tiina jihre. Ā jia yū pano Cristore wacū tua muhtarare tina sehe. Paina Jesu to cūrina sehe tinare “Potocāta noaina jira”, ni durucura.

⁸ Ampliato cūhū yū cahīriro Jesu yairo jira. Tiro noajaro. ⁹ Urbano cūhū noajaro. Tiro cūhū mari mehne Cristo yare dahrahe. Ā yoa yū cahīriro Estaqui noajaro. ¹⁰ Apele cūhū noajaro. Tiro potocāta noano Jesure wacū tuara. To yoarire ñuna tíre masija mari. Tuhsū, Aristóbulo ya wūhū macaina jipihtina to namono to pohna cūhū noajaro. ¹¹ Yū coyeiro Herodiō noajaro. Ā yoa Narciso ya wūhū macaina Jesu yaina noa pihtinocajaro. ¹² Ā yoa Trifena, Trifosa cūhū noajaro. Tí numia mari puhtoro Jesu ya dahraare yoara. Mari cahīricoro Pérside cūhū noajaro. Ticoro mari puhtoro yare tuaro yoara. ¹³ Rufo mari puhtoro Jesure noano wacū tuariro, to yare noano yoiro noajaro. To pocoro cūhū noajaro. Ticoro yū poco yoro sehe jiri-coro jira. ¹⁴ Asíncrito, Flegonte, Herme, Patroba, Herma, paina Jesu yaina tina mehne macaina cūhū noajaro. ¹⁵ Tuhsū, Filólogo, Julia, Nereo, to bahoro cūhū, Olimpa, paina tina mehne macaina cūhū Jesu yaina noajaro.

¹⁶ Ā yoa musa mehne macainare piti bocana, noano mehne piti bocaga. Jipihtina Jesu yaina jipihtiro macaina musare noa dutira.

¹⁷ Yū coyea, musa mehne macaina cāina musare cahma ñu tuhti, cahma tju wachū yoaina jira. Ā jia musare Jesu ya buheare dojomehna. Ā jina tó sehe yoainare ñuna noano yoanohbū, “Dojomehneri”, nina. Ā yoainare piti tiena tjiga. ¹⁸ Tó sehe yoaina mari puhtoro Jesucristo yare yoerara. Ñaare ti goa pjaa dihtare yoara. Tuhsū, noano tuho ji coaro dero mahño buhera noano masierainare. Ti ā mahño-chū tinare noano tuhora. Ā jina ā yoainare piti tiena tjiga musa. ¹⁹ Musa sehe Jesure noano yūhtiina jira. Tíre jipihtina masina. Ā noano yūhtiina musa jichū wahcheja yūhū. Ā jicu noano musa yoahtore musa masichū cahmaja yūhū. Ā yoa ne ñaare yoeraina musa jichū cūhure cahmaja yūhū. ²⁰ Ā jiro Cohamacū marine noano jinocachū yoiro mahanocā baharo watino Satanare yūhdurucachu yoarohca musare. Ā yoa mari puhtoro Jesucristo musare noano wahachu yoajaro.

²¹ Timoteo yū piti musare noa dutira. Yū coyea judio masa cūhū, Lucio, Jasō, Sosípatro musare noa dutira.

²² Yūhū Tercio ahri pūre Paulore joabasariro jija. Yūhū Jesu yairo jicu musare Jesu yainare noa dutija.

²³ Gayo ya wūhūi jinocai nija yūhū Paulo. To ya wūhūi Jesu yaina cahmachuna. Tiro cūhū musare noa dutira. Ā yoa Erasto ahri maca macaina puhtoare niñerure ñu wihbobasariro musare noa dutira. Mari coyeiro Jesu yairo Cuarto cūhū musare noa dutira.

²⁴ [Yū coyea mari puhtoro Jesucristo musare jipihtinare to cahīa mehne noano yoajaro. Āta yoajaro.]

**Paulo Cohamacure ño
payoro joa batoara**

²⁵⁻²⁷ Mari puhtoro Jesucristo ya buhea mehne noaa buhea mehne Cohamacu musare tirore wacū tua namochu yoa masina. Panopure tí buhea noaa buhea ne masare yahuerari buhea jimaha. Mipure Cohamacu yare yahu muhtaina cjiri ti joari cjiri mehne tí buheare yahua jira. Yuhu cūhu treta buheja. Tí buheare

Cohamacu ã jirucuriro to yahu site dutiro seheta jipihtiro macainapu mipure masina. Tí buheare tirota yahu dutiha masa tirore yuhti, ti wacū tuahto cjihto sehe. ã jina tirore “Potocāta noariro, tulariro jira muhu”, ni wahche payojihna. Tiro cūirota Cohamacu dihta noano masi pahñoriro jira. Jesucristo to yoadohoa mehne Cohamacure ã ño payorucujihna mari. ãta yoarucujihna.

1 Corintios

Paulo Cohamacu yainare Corinto macainare joarocaha

1¹⁻² Yuhū Paulo, Jesucristo yare buhe duti to cūriro jija. Cohamacu to cahmano seheta Jesu to cūhtiro cjihtore beseri jire yuhūre tiro. Sostene wama tiriro mehne musare Cohamacu yainare Corinto macainare joarocaja sã. Ahriro cūhu mari coyeiro Jesu yairo jira. Jesucristo mehne macaina musa jichū Cohamacu yaina cjihti beseri jire Jesu musare. Á yoa jipihtina paina mari puhtoro Jesucristore siniina jia, tina cūhu Cohamacu yainata jira. Ti ā jichū Jesucristo sehe mari jipihtina puhtoro jira. Ā jina musare jipihtinare joarocaja sã. ³ Ā yoa Cohamacu mari Pucū mehne, mari puhtoro Jesucristo mehne musare noa dutija. Cohamacu to yoadohoa mehne noano jiga musa.

Jesucristo sehe musare noano yoabasaha Cohamacure

⁴ Jesucristo yaina musa jiri baharo tiro sehe musare noano yoabasari jire Cohamacure. To ā yoabasachū ñucū, Cohamacure “Noana”, nirucuja yuhū dachoripe. ⁵ Cristo yaina musa jichū ñno Cohamacu sehe musare noano jichū yoari jire. Tuhsū, to yare musare painare noano yahuhtina cjihtire yoari jire tiro. Ā jiro tiro to yare noano masichū yoari jire musare. ⁶ Cristo yare musare sã buheriro seheta ā yoari jire musare, Cristo yaina musa wahachu. ⁷ Ā yoa Cohamacu musare noano yoadoho pahñonocanohca. Mari puhtoro Jesucristo ahri yahpapū to tjua tahtore musa cohtaro watoi Cohamacu musare ā yoadohorucurohca. ⁸ Cohamacu musare yoadohorohca to yare musa ne duhuerahto sehe. To ā yoachū musa sehe da-

choripe, ahri dacho pihtichupū cūhure ñaa buhiri marieina jirucunahca, Cohamacu to ñuchū. Ā jina Jesucristo mari puhtoro to tjua tachupure ñaa buhiri marieina jinahca musa. ⁹ Tīre Cohamacu to niriro seheta tiro yoara. Tiro to macuno mari puhtoro Jesucristo yaina cjihtire marine beseri jire. To ā berinare Jesu yaina jichū yoare marine.

Jesu yaina Corinto macaina cahmachua cahma sayoha ti basi

¹⁰ Yū coyea, mari puhtoro Jesucristo to dutiro mehne musare tuaro mehne yahui tai nija ahrire: Musa basi cahma sayoena tjiga. Ā yoa musa basi cahma tju wa dapo jiena tjiga. Cū curuaihta jiga musa. Ā jina jiape ni durucuena tjiga musa basi. Ā yoana musa yoahto cjihtore tuhotuna, cūno pоторita yoaga musa. ¹¹ Yū coyea, musa basi cahma sayona niyuhca musa. Ā ni yahure cāina Cloé ya wuhū macaina yuhure.

¹² Cāina musa mehne macaina ō sehe ni cahma sayoyuhca: “Paulo ya curua macaina jija sã”, ni cahma sayoyuhca cāina musa. Ā yoa paina “Apolo ya curua macaina jija sã”, niyuhca tina cūhu. Paina sehe tjoa “Pedro ya curua macaina jija sã”, niyuhca tina cūhu. Paina sehe tjoa “Cristo ya curua macaina jija sã”, niyuhca tina cūhu. ¹³ Musa ā nipachuta Cristo yaina cū curuaihta jija mari. Mari basi cahma tju wa dapo masieraja mari. Cū curuaihta jija mari. Yuhū Cristo jieraja. Tiro yoaro sehe musa ya buhirire crusapū yariariro cjiro jieraja. Tuua maeraja. Ā jicu wiho jiriro jija. Ā yoa musare paio bautisaro, Cristo yaina musa jichū musare bautisari jire. Yū yaina musa jichū sehere musare bautisaerari jire. (Ā jina yuhū sehere ñu wahāena tjiga musa.)

¹⁴ Musare, musa mehne macaina cūhure bautisaerahi yuhū. Crispore, Gayo cūhure tina dihtare bautisahi.

Paina sehere bautisaerariro yu jichu noana, yu tuhotchu. ¹⁵Payu masare bautisariro yu jichu “Paul yaina sa jichu bautisare sare”, ni nu wahaboa musa yuhure. A jicu ture musa yoachuh cahmaeraja. ¹⁶Estefana ya wuhu macaina cuhure bautisahi yuhu. Tópeinata bautisahi yuhu. Yu bautisarinare painare wacueraja yuhu. ¹⁷Cristo yuhure warocaró, masare bautisatirore cuerare yuhure tiro. Noaa buheare buhehtiro sehere yuhure cure. Cristo crusapu to yariarire mari buhechu tí buhea marine noaina wahachu yoara. To a yoapachuta noaa buheare yu mu suro yu buhechu yuhu sehere nu wahaboa musa. Musa a nu wahana noaa buhea sehere no payoeraboa musa. Tuhsu noaina wahaeraboa. A jicu Jesu ya buheare buhechu yu mu suro yu masia mehne buheraja yuhu.

Cohamacu to tuua cuhure to masia cuhure cjuariro jira Cristo

¹⁸Pichacapu butihtina sehe Cristo crusapu to yariarire mari yahuri buheare “Tuhó masieraina ya buhea jira tí”, ni mana butihtina sehe. Mari sehe Cristo to yuhdunchu yoachtina cjihti jina o sehe nija: “Crusapu to yariarire mari yahuri buhea tí waro jia nina. Tí buhea Cohamacu to tuaare yahura marine”, nija mari. ¹⁹Cohamacu sehe to yare ti joari pui o sehe nina:

“Ahri yahpa macainare ‘Noano masiina jira’, ti niinare ti masia yaba cjihti jierachuh yoaihca yuhuh”, nia tiha Cohamacu to yare ti joari pui.

²⁰A jia ahri yahpa macaina noano masiina ti masia yaba cjihti jierara. Sa coyea judio masare buheina cuhu ti masia yaba cjihti jierara. Mipure ahri yahpa macaare durucu sayo mihniina cuhu ti masia yaba cjihti jierara. Ahri yahpa macaina noano masiina ti jipachuta qui-

hono masieraina ti jirire masichuh yoare Cohamacu. ²¹Cohamacu pinihta noano masiriro jira. To a jichuh ahri yahpa macaina ti ya masia mehne Cohamacure ne masierara tina. Cohamacu to masi dutieraro seheta a wahare tinare. Cohamacure cahmaeraina sehe o sehe nina noaa buhea warore: “Tuhó masieraina ya buhea jira”, nimana. A jia noaa buheare “Tuhó masieraa buhea”, ti nia buheare tuhó Cristore masi ducara masa. Ti a masi ducachuh Cristore ti wacu tuachuh nu no tinare pichacapu waha borinare yuhdunchu yoara Cohamacu.

²²Judio masa Cohamacu to tuua mehne to yoa norire nu duua nina. A yoa griego masa judio masa jieraina sehe noano ti masihti cjihtire macaa nina.

²³Mari sehe Cristo crusapu to yariarire yahuri buheare buheja mari. Tí buheare judio masa sehe nu yabira. A yoa tí buheare judio masa jieraina sehe “Tuhó masieraina ya buhea jira”, ni tuhótura. ²⁴Ti a ni tuhótupachuta Cohamacu to yaina cjihti to beserina sehe tí buheare o sehe nina. “Cristo ya buhea Cohamacu to tuaare, to noano masiare masichuh yoara marine”, nina tina ahri buheare. Tina judio masa, judio masa jieraina jipahta, a nina Jesu yaina. ²⁵Cohamacu masi pahñoriro jira. “Tiro tuhó masierariro jira”, masa ti ni tuhótupachuta ahri yahpa macaina yuhdoro noano masi pahñoriro jira tiro. Tuhsu Cohamacure “Tuarerariro jira”, masa ti ni tuhótupachuta ti bui tua yuhduracu sñoriro jira tiro.

²⁶Yu coyea, Cohamacu musare to yaina yoachuh musa payu wiho jiina musa jirire wacuga musa. Ahri yahpa macainare “Noano masiina”, ti niinare mahainacã Jesu yaina cjihtire beseri jire Cohamacu. Tuhsu puhótoa cuhure mahainacã Jesu yaina cjihtire beseri jire tiro. A yoa puhótoa pohna cuhure pache puu pohna cuhure mahainacã

Jesu yaina cjihtire beseri jire tiro. ²⁷“Tuho masieraina jira”, ti niinare Cohamacu beseri jire “Noano masiina jira”, ti niina ti buoro wahahto cjihto sehe. Tuhsu “Yaba cjihti jierara”, ti niinare Cohamacu beseri jire, “Wiho jiina jierara”, ti niina ti buoro wahahto cjihto sehe. ²⁸Masa ti nu yabiinare “Yaba cjihti jierara”, nina masa. Ti a nirinare Cohamacu to yaina cjihtire beseri jire tinare. A besero “Puhtoa waro jira”, ti niinare wiho jiina ti jiare masichu yoari jire Cohamacu tinare. ²⁹To a yoachu nua ahri yahpa macaina ne cuiro “Tuariro, noano masiro jija”, ne ni yuhduruca masierara, Cohamacu to nuhu.

³⁰Cohamacu sehe marine Jesu yaina jichu yoare. To yaina jina marine to yuhdichu yoari baharo jipihtia dachoripe Cohamacu mehne jirucunahca mari. Jesucristo sehe Cohamacu yare noano masichu yoara marine. Tuhsu mari naa buhirire cohana. A yoaro mari naa yoari buhirire cosaro, marine “Noaina jira”, to ni nuhu yoara Cristo Cohamacure. A yoaro marine pichacapu wahaborinare yuhdichu yoara. ³¹To a yoachu Cohamacu yare ti joari puu to ni joariro seheta a wahara: “Yu mu suro masi pahnoriro jija’, niriro ture nieno tji-jaro. O sehe nijaro: ‘Mari puhtoro Cristo sehe marine yuhdichu yoariro jira’, nijaro tiro”, nina Cohamacu yare ti joari puu.

Cristo crusapu to yariarire sa yahuri buhea jira ahri

2 Yu coyea, musa cahapu sucu “Noano masi pahnoja”, musare ni buherahi. Cohamacu yare musare buhecu, to sehe ni buhecu nierahi. ²“O sehe ni buhehtja”, nicu musa mehne jicu Jesucristo ya dihtare crusapu to yariari dihtare wacucu, ti buheare buhei yuhu. ³Tuhsu, musa mehne jicu wiho jiro yoaro sehe jii yuhu. A jicu Cohamacu yare quihono

buhe duariro jicu cuiriro tetereriro yoaro sehe jii yuhu. ⁴A jicu Cohamacu yare buhecu, “Masi pahnoja”, ni buherahi. Mijoa durucua mehne yu mu suro buherahi. To yare yu buhechu Espiritu Santo to tuua mehne yu buhechu nure musa. ⁵O seheta ni buhei yuhu musare masa ti mu suro ti buhea sehere musa cahmaer-ahto sehe. Cohamacu sehere musa wacu tuahtore a ni buhei yuhu.

Espiritu Santo sehe Cohamacu to jia tiare buhera marine

⁶A jina Cohamacu ya buheare musare Jesure noano masiinare yahuja sa. Masa ti mu suro ti buhea yoaro sehe jierara ahri musare sa buhea. Ti puhtoa ya buhea cuhu jierara. Tina sehe pih-tia wahaahca. ⁷Paina ti masierari cjirire Cohamacu ya durucua cjirire yahuja sa sehe. Panopure ahri buheare Cohamacu yaina cjiri noano masi pahnoerari jire. Ahri yahpa to jihto pano ahri buhea ti niriro seheta “Ata wahajaro”, ni tuhsua tiri jire Cohamacu. Marine pichacapu wahaborinare to yuhdichu yoah-to cjihtore, tiro mehne mari jirucuhto cjihtore, tiro yoaro seheta mari wahahto cjihto cuhure. “Ata wahajaro”, nia tiri jire tiro. ⁸To a nichu Cohamacure cahmaeraina puhtoa ne to buheare tuho du-aeraa, masierari jire. Ture noano masia, mari puhtorore Cohamacu macno warore crusapu cja puha wajeraboa tina. ⁹Cohamacu yare ti joari tjuu o sehe nina:

“Jipihtina Cohamacure cahina ya cjihtire Cohamacu noano cahnobasa tuhsua.

Noa yuhduara ti to cahnobasari.

Ti to cahnobasarire mari ne nuerana, tuhoerahi.

A jina ‘O sehe yoarohca Cohamacu’ ni, dohse masiyu pahnohto basioerara marine”,

nina Cohamacu yare ti joari pui. ¹⁰To ã nipachuta Espiritu Santo Cohamacu yare masichu yoare marine. Jipihtia Cohamacu yare Espiritu Santo masi pahõna. Æ masino tiro marine tíre masichu yoara.

¹¹Ne paina sehe masuno to masiare masierara. Wilho mejeta masuno sehe to basi to waciapu to tuhoutuare masina. Tó sehetá paina Cohamacu to masiare ne masierara. Cohamacu to Espiritu Santo dihta to masiare masina, masuno to basi to tuhoutuare to masino sehetá. ¹²Æ yoa mari sehe Jesu yaina jina masa ti mu suro ti buheare cjueraja. Cohamacu to Espiritu ware marine masichu yoaro taro. Tiro marine to noano yoahore masichu yoara Espiritu Santo sehe. ¹³Cohamacu yare musare buhena, masa ya masia mehne sã mu suro buheraja sã. Espiritu Santo to buhea sehere musare buheja. Æ buhena Espiritu Santore cjuainare Cohamacu yare noano buheja sã.

¹⁴Espiritu Santore cjueraina sehe Espiritu Santo yare ne cahmaerara. “To ya wiho warota jira”, nimana tina. Espiritu Santo to yoadohoro marieno ne to yare masihtó basioerara masare. Æ jia tina to yare ne masierara. ¹⁵Espiritu Santore cjuaina sehe Cohamacu yare noano masina. Æ jia jipihtiare noano bese masina. Paina sehe tinare “Noaina jira. Ñaina jira”, ni bese masierara Espiritu Santore cjuainare. ¹⁶Õ sehe nina Cohamacu yare ti joari pui: “Mari puh-toro Cristo to tuhoutuare masiina ne mari-ahna. Æ yoa tirore masa ne ‘Õ sehe yoaga’, ni masierara”, nina to yare ti joari pui. Mari sehe Cristo yaina jina, Cristo yoaro sehetá masija mari.

Jesu yaina cãno potori Cohamacure dahra cohtaina jira

3¹⁻²Yũ coyeyá, musare buhecũ Espiritu Santore noano yuhtinare yu

buhero sehetá buhe masierahi musa sehere. Cristo yaina jipanahta, wihã-nacã ti wahiquiro dihirore ti chu masierariro sehetá Cohamacu yare noano masierare musa. Mipu cũhure noano masierasiniyuhca musa. Æ jina wihã-nacã pẽchore ti pũno sehetá mijoera curea buhea dihtare tuhoyuhca musa. Æ jicu tó sehe jia buhea dihtare buhei musare. Cristo yaina jipanahta wihã-nacã ti chu masierariro sehetá Cristo yare noano masierayuhca musa. ³Musa sehe musa mehne macainare ti noano wahachu ñuna ñu tuhtina, cahmachena, musa basi cãa curuari tju warucu suna, Espiritu Santore cjueraina yoaro sehe yoana niyuhca musa. Æ yoana ahri yahpa macaina Cristore cahmaeraina yoaro sehe yoayuhca musa. ⁴Õ sehe niyuhca musa: “Paulo mehne macaina jija sã”, niyuhca cãina musa. Æ jia paina musa mehne macaina sehe “Apolo mehne macaina jija sã”, niyuhca. Musa ã ni durucuna Espiritu Santore cjueraina yoaro sehe ni durucuna nica musa.

⁵¿Yũhũ Paulo, Apolo mehne dohse yoahina cjihti jijiari sã, musa tuhó-tuchũ? Õ sehe yoahina jina nija sã: Cohamacu to dutiriro sehetá tirore dahra cohtaina wiho jiina jija sã. Æ jina musare sã buhechũ tuhona Jesucristore wacũ tua ducare musa. ⁶Noaa buheare buheina wesepũ dahrainá yoaro sehe jira mari piti dahre buhechũ. Wese pũro to toa muhtariro sehetá yũhũ cũhũ musare buhe muhtahi. Tuhstũ, paio wesere to cure nunũ tirore sehetá Apolo sehe yũ baharo musare buhe namo nunũ tire. Sã ã buhepachuta wese macaa toaare bucua namochũ to yoariro sehetá Cohamacu sehe musare to yare masi namochũ yoahre. ⁷Æ jicu yũhũ buhe muhtariro jipaihta wiho jirore jija. Æ jiro Apolo yũ baharo buhe nunũ tirore cũhũ wiho jirore jira. Cohamacu pinihta toaare to bucua namochũ yoariro sehetá to

yainare tirore masi namochu yoara. ã jiro Cohamacu sehe wiho jiriro jierara. ⁸Toa muhtariro, baharo cure nunu tiroro cãno potori dahra cohtaina wiho jiinata jimana tina. ã jia ti dahrariro purota wapatarã tina. Tó seheta jija sã, Apolo mehne. ⁹ã jina sã Cohamacu yare dahra cohtaina jija. ã yoa Apolo yu piti jira. Sã ã jichu musa sehe Cohamacu ya wese yoaro seheta jira. Musa ã jichu Cohamacu wese macaa toaare to bucua namochu yoariro seheta musare to yare masi namochu yoarohca tiro.

ã yoa Cohamacu musare to yainare noari curua yoaro nina. ã jina tãa mehne ti yoari wuhu yoaro sehe jira musa to ya curua macaina mari piti dahre buhechu. ¹⁰Musa ã jichu Cohamacu yuhure to dutiriro seheta yuhu sehe wuhu dahre mihniriro tãare to cã muhtariro seheta Jesucristo yare musare buhe muhtai. ã jiro tí tãa bui paio to yoa namo mujariro seheta paio yu baharo buhe namo nunu tiro nina. ã buhe namono noano yoaro cahmana. Ne papero marieno noano buhejaro tiro. Cristo ya dihtare buhejaro tiro. ¹¹Wuhure ti dahre duca ti cã muhtari tãa yoaro sehe Cristo jira. ã jina tí tãare sã noano cã muhtariro seheta Cristo yare buhe tuh-sui. Pairo ya buhea sehere mari buhechu tó wahaerara. ¹²⁻¹⁵Uru mehne, plata mehne, wapa bujua tãa mehne mari yoari wuhure mari ju ñuchu jierara. Tó seheta Jesucristo yare mari noano yoari baharo pihtiri dacho jichu Cohamacu mari yoarire to ju ñuno seheta yoarohca mari yoarire masino taro. Tó sehe to yoachu noari wuhu to jierariro seheta mari yoarire ti noaa jichu masinohca. ã yoaro mari noano yoarina mari jichu masichu yoarohca tiro. Noaare mari yoari wapa noano yoarohca marine. Yucuri mehne, tja mehne, ñaia pãri mehne mari yoari wuhure mari ju ñuchu jua waharohca. Tó seheta Jesucristo

yare mari noano yoareri baharo pihtiri dacho jichu, Cohamacu mari yoarire ju ñuno sehe yoarohca mari yoarire masino taro. Tó sehe to yoachu ñari wuhu to jua wahariro seheta mari yoarire ñaa ti jichu tiro masinohca. ã yoaro mari noano yoaraina mari jichu marine masichu yoarohca tiro. Noano yoaraina mari jichu ñuno noaare mari yoamari wapare noano yoasi. Tó sehe jianare Cohamacu yuhdũchu yoarohca. To ã yuhdũchu yoapachuta tó sehe noano yoaraina mahanoã cohõbo cure yuhduahca.

¹⁶Musa sehe Jesu yaina Cohamacu ya wuhu yoaro sehe jira. Musa ã jichu ñuno tí wuhui to jiboro seheta Espiritu Santo sehe musa mehne jira. ¿Tíre masierajari musa? ¹⁷Cohamacu ya wuhu ñaa marieni wuhu jira. ã jina musa cũhu tí wuhu yoaro sehe jina to yaina warota jira. ã jiro to yainare cãiro to dojomehnechu Cohamacu pichacapũ cohãnohca tiro sehere.

¹⁸Mahnoare tuhutuena tjiga musa. “Mipũ macaina ya masiare noano masija”, ni tuhoturiro musa mehne macariro jiro Jesu ya sehere noano masijaro. To ã masichu ñua paina tirore “Tũho masierariro jira”, niahca. ã jiro Jesu yare masino, potocãta noano masiriro waharohca. ¹⁹Masa ti mu sũro ti basi ti masiare “Wiho warota jira”, ni tuhutura Cohamacu. ãta nina Cohamacu yare ti joari pũi: “Ti mu sũro masiina ti masia yaba cjihti jierara Cohamacu to ñuchu. ã jiro ti yoa duaare ducatarã tinare”, nina Cohamacu yare ti joari pũi. ²⁰ã yoa pa pũpũ õ sehe nina: “Masa ti mu sũro masi pahnoina ti tuhutua yaba cjihti ti jierachu masina mari puhtoro Cohamacu sehe”, nina Cohamacu yare ti joari pũi. ²¹⁻²²ã jina “Sã mu sũro yoahi”, ni masieraja mari masa jina. ã jina yuhu Paulo, Apolo, Pedro mehne sã jipihtina Cohamacu musare to yoadoho

dutiina jina, musare dahra cohtaina jija sã. Jipihtia musa ya jira. Cohamacu to bajuamehnerire, catia cühure ware musare. Tuhsu, pichacapu wahaerachu yoarohca musare. Mipu jiare baharopu jikti cühure musare warohca. Å jia jipihtia musa ya jira. ²³ Å yoa musa sehe Cristo yaina jira. Cristo sehe Cohamacu yairo jira.

Cristo to yare buhe duti to cürina ti dahraare yahuha Paulo

4 Õ sehe ni tuhotuga musa yühure Apolo cühure: “Tina sehe Cristore dahra cohtaina jira. Å jia masa ti masierari cjirire Cohamacu yare buheina jira”, ni tuhotuga musa sãre. ² Dahra cohtaina ti puhtoro to dutiro seheta yoa cohtara. ³ Wiho mejeta yühure musa yahuwajapachuta ã tuhotunocaja yuhu. Paina puhtoa yühure ti yahuwajachu cühure ã tuhotunocaja yuhu. Yu yoare ñuna “Ahri noaa jira. Ahri ñaa jira”, ni masierara musa. Yuhu cühu masunota jija. Å jicu yu yoare noano masi pahñoeraja yuhu cühu. ⁴ “Cristo yare yu yuhdurucari yühure mariahna”, ni tuhotumaja yuhu. Yu õ sehe ni tuhotupachuta buhiri tia jisiboca yühure. Mari puhtoro Cristo dihta yu yoare ñuno, noano masina. ⁵ Å jina mari puhtoro to tjua tahto pano masare ñano ni yahuwajaena tjiga musa. Tiro tjua taro masa ti yoarire, panopu paina ti masierari cjirire Cristo masichu yoarohca. Å jiro mari yoa duarire, mari tuhotuare tiro masichu yoarohca. Å yoaro to yare yoainare Cohamacu “Noano yoare musa”, ninohca.

⁶ Yu coyeya, yuhu Apolo mehne sã buheri cjirire yahuhi yuhu musare buhecü tacu, sãre musa ñu cühuto sehe. Å yahuhi yuhu Cohamacu to yare ti joari püi to niriro seheta quihõno musa yoarucuhto sehe. Å yoana musa mehne macainare cüno potori ño payoga. Cüiroreta ño payoena tjiga.

⁷ Musa sehe paina yuhdoro noaina jierara. Masi yuhdurucaina jierara musa. Cohamacu musare to wari cjiri dihtare cjuara musa. Å cjuana musare to yahuri cjiri dihtare masina musa. ¿Musa mu suro cjuaina, musa mu suro masiina jierapanahta, dohse yoana “Masi pahñoina jija”, nijari musa? Å nina “Sã mu suro masija sã”, niborina seheta yoara musa.

⁸ Musa sehe “Cohamacu yare masi pahñoja sã. Sãre yaba waro duhsaerara”, nimana musa. Tuhsu, musa cahai sã jierachu musa õ sehe ni tuhotumana: “Puhtoa yoaro sehe masiina jija sã”, ni tuhotumana musa. Potocãta Cohamacure masi pahñoina puhtoa yoaro sehe masiina musa jichu musare noabiaboa. Musa ã jichu musa mehne sã cühu puhtoa yoaro sehe masiina jiboa.

⁹ Õ sehe ni tuhotuja yuhu pinihta: Sãre Jesu to yare buhe dutiro cüno, masape doca macari curua cüre sãre. Paina ti wajãhtina yoaro sehe ñuna masa sãre. Ahri yahpa macaina masa, anjoa cühu wapanañoina yoaro sehe ñuna sãre.

¹⁰ Cristo yare sã buhechu ñua “Tuho masieraina jira”, ni ñuna masa sãre. Å jia Cristo yare sã yoachü ñua, sãre ñu tuhtira. Musa sehene ñua, “Noano masiina jira”, ni tuhotumana masa. “Cohamacure wacü tuaeraina jira”, ni tuhotumana masa sãre. Musa sehene ñua, “Noano wacü tuaina jira”, ni tuhotumana tina. Musa sehene masa ño payora. Sã sehene tina ne ño payoerara.

¹¹ Sã sehe mipure ñano yuhduina, juca baaina, ñahma yapioina, ñano suhti maeraina, wuhuse maeraina jija. Tuhsu, paina sãre ño payoeraa, sãre ñano yoara.

¹² Å yoa sã tuaro dahraja. Tuhsu, paina sãre ñano ni ti durucupachuta sã sehe tinare “Noano jiga”, nija sã. Å yoana paina sãre ñano ti yoapachuta ã tuhotunocaja sã. ¹³ “Ñano yoaina jira”, sãre ti nipachuta sã sehe noano mehne tinare yoaja. Panopu, mipu cühure ñaa wete

tiina yoaro sehe masape curuari doca macari curua yoaro sehe ñña masa säre.

¹⁴⁻¹⁵ Músare noaa buheare buhe mäh-tacu msa pucu yoaro seheta wahai yuhu. Payu músare Cristo yare buheina ti jipachuta músare buhe muhtariro cüirota jija yuhu. Á jiro jicu músare buo tichu yoai tai ahrire joai nieraja yuhu. Yu pohna warore, yu cahinane yu dutiboriro seheta músare noano mehne duticu tacu ahrire joaja yuhu. ¹⁶ Á jicu ahrire músare tuaro mehne dutii tai nija yuhu. Yuhure ñu cüga musa.

¹⁷ Ahrire yoa duticu tacu musa cahai Timoteore warocahi. Tiro yu cahiro mari puhtoro Jesu yairo jira. Á jiro Cristo yare yoarucura tiro. Cristo yare mari yoahire jipihtina Jesu yaina cahapu buhei yuhu. Timoteo tíre músare wacürucuchü yoarohca. Á jicu Cristo yare yu yoariro seheta msa ñu cühto sehe Timoteore warocahi yuhu. ¹⁸ Timoteore yu warocachü cáina msa mehne macaina puhtoa ji duaina õ sehe nimana: “Paulo marine cuiro, mari cahapu tasi”, ni tuhotumana tina. ¹⁹ Cohamacu cahmachü msa cahapu michapucacáta suihca. Á sucü puhtoa ji duainare msa mehne macainare ti durucua quihõno jichü masihtja yuhu. Á yoa Cohamacu tuare potocáta ti cjuachü cühure masihtja yuhu. ²⁰ “Cohamacu sã puhtoro jira”, mari ni yahupachuta to yare mari yoerachü tí mari ã niamari cjiri yaba cjihti jierara. Cohamacu to tuaa mehne to cahmano sehe yoa masija. Tí pinihta wiho waro jierara. ²¹ ¿Musa cahapu músare buhiri dahrehtiro músare tuhtitiro yu wahachü cahmajari msa yuhure? ¿O músare cahiro músare wahchehtiro yu wahachü cahmajari msa yuhure? ¿Dohse jiro yu wahachü cahmajari msa?

Corinto macaina ti wuana tirire yahuha Paulo

5 Potocáta õ sehe quiti tira säre paina: Cüiro msa mehne macariro to pucuro namonore wuana tiyuhca. Áta ni yahura masa säre. Paina Cohamacure cahmaeraina jipahta tina sehe tó sehe yoana jierara. ² Msa mehne macariro to ã yoapachuta msa sehe “Quihõno yoana nija sã”, ni tuhotumana. ¿Dohse yoana to ñaa yoarire masipanahta cahyaerajari msa? Á jina ã ñano yoaritore msa mehne Jesu yaina mehne jirirore cohã wioboa msa. ³ Yuhu msa mehne jierapaihta yu wacüapü msa mehnetta jija yuhu. Á jicu msa mehne jicu yu niboriro seheta ñano yoarirore to ã ñano yoari buhiri buhiri dahre duti tuhsuja yuhu. ⁴ Jesu to dutiro mehnetta ã yoa dutija. Á jina msa cahmachuna yu wacüa mehnepu msa mehne yu jichü to pucuro namono mehne ñano yoarirore cohã wiona, mari puhtoro Jesu to tuaa mehne õ sehe niga ñano yoaritore: ⁵ “Watino to cahmano seheta mähure yoawahnojaro”, niga tirore. Áta niga tirore ñaare to goa pjari cjirire to duhuhto sehe. Msa ã cohächü tiro ñano yuhdurohca. Mari puhtoro Jesu to tjua tari dachoi ñano yoariro cjiro Jesu mehne to noano yuhduhto sehe mipure tirore ã niga.

⁶ “Quihõno yoana nija sã”, nipanahta ñano yoana nica msa. Ñano yoaritore msa ã ñnocahna, tí ñaare msa jipihtina piha pihtia wahanahca. Pã bucuaro trigore to noano sãarucu suriro seheta tí ñaa músare piha, noano sãarucu sua waharohca. ¿Tíre masierajari msa? ⁷ Yu coyea judio masa pascua jichü ovejare wajã, jü muo, Cohamacure ño payora. Tó seheta oveja to yariariro seheta Cristo mari ñaa buhirire yariari jire. To ã waharire masina, msa sehe ñano yoaritore msa mehne macarirore

cohã wioga tí ñaa musare to pihaer-
ahto sehe. Mûsa ñaa yoari buhirire cohã
tuhsure Cristo. Æ jina ñano yoarirore
cohã wioga “Tí ñaare pihari”, nina. ⁸Pão
bucûaro trigore to sâarucu sãriro seheta
panopu ñaare ñu cû yoa pihtiina jimai
mari. Æ jina pascua bose numurihi pão
bucûaro marieno pãore ti chãriro se-
heta mari cûhu ñaare goa pjaro marieno
ñano yoaro marieno jijihna. Panopu
mari ñaare mari yoaa tãriro sehe yoaena
tjijihna. Æ yoana potocã noano tãhtua
mehne, noano yoaina jijihna.

⁹Musare yu joarocari pũpũre Jesu
yairo jiparota ã wũana tirucurirore
ne piti ti dutieramahi. ¹⁰Æ nicu nu-
mia mehne ñano yoainare, mûa mehne
ñano yoaa numiare, paina yare goa
pjainare, yacainare, “Cohamacu jira”, ti
nia masurine ño payoinare Jesu yaina ti
jierachu “Tina mehne jiena tjiga”, nier-
aja. Ahri yahpai tó sehe jiina marieno
Jesure cahmaeraina marieno mari dihta
ji masieraja. Jipihtiropu jira tina sehe.
¹¹Æ jicu musare joarocacu õ sehe yoa
dutimahi: Mûsa mehne macariro “Jesu
yairo”, ti niriro to jipachuta numino
mehne ñano yoariro, paye barore goa
pjariro, “Cohamacu jira”, ti nia masurine
ño payoriro, ñano quiti dahrerucuriro,
cahariro, yacariro to jichu tiore piti
tiena tjiga. Æ jina tó sehe yoariro mehne
pinihtare chũena tjiga. ¹²Jesu yaina
jierainare ti ñaa yoari buhirire ne buhiri
dahre dutiriro jieraja yuhu. Tó sehe
buhiri dahre dutiriro jira Cohamacu
sehe. Yu ã nipachuta mûsa mehne cah-
machuina Jesu yaina mûsa basi mûsa
yoarire ñuna masino cahmana mûsa se-
here. Æ tãhtunocãeraro cahmana. Æ
jina mûsa sehe tina ti ñano yoachu
ñuna buhiri dahrega tinare. ¹³Jesu yaina
jieraina sehere Cohamacu sehe buhiri
dahrerohca. Æ jina mûsa sehe mûsa
mehne macarirore ñano yoarirore cohã
wioga.

Jesu yainare ti basi ti yahusaãrire yahuha Paulo

6 ¿Musa basi cahma ñu tuhti yahusã
duana dohse jiro baro Jesu yaina
jieraina cahapu mûsa coyeare Jesu
yainare yahusãna wahajari? Jesu
yainare mûsa mehne macainare yahusã
duana paina Jesu yaina sehere tíre
yahuro cahmana musare. Æ jia Jesu
yainapu besejaro. ²Pihtiiri dacho jichu
mari Jesu yaina sehe masa jipihtina
ti yoarire ñuna “Ahri ñaa jira. Ahri
noaa jira”, besenahca mari tinare. ¿Tíre
masierajari mûsa? Æ jina pihtiiri dacho
jichu masa jipihtinare besehtina jina,
mipu cũhũre bese masija mari. Æ jina
mipũre wiho jiacã buhiri cũhũre bese
masija mari. ³Anjoa ti yoarire ñuna
tina cũhũre besenahca mari. ¿Tíre
masierajari mûsa? Mari ã besehtina jina
potocãta tí yũdoro mipu cũhũre Jesu
yaina ti yoarire ñuna bese masija mari.
⁴¿Æ jina dohse yoana mûsa mehne
macainare yahusã duana mari mehne
jieraina cahapu Jesu yainare yahusãna
wahajari mûsa? ⁵Ahrire nii nija mûsa
quihõno yoerarire mûsa cahyahto
cjhũtore. ¿Musa mehne macainare mûsa
cahma sayochu musare yahuhtiro
mûsa mehne macariro noano masiriro
mariajari? Jira. ⁶To ã jipachuta mûsa
mehne macariro Jesu yairo paio
Jesu yairore yahusã duaro Jesure
cahmaerainare yahusãno wahara.

⁷Masare beseina puhtoare mûsa
mehne macainare yahusãna Jesu yaina
jipanahta quihõno yoarara mûsa. Pairo
mûsa mehne macariro musare ñano
to yoachu ã ñunocãboa mûsa. Jesure
cahmaerainare mûsa yahusãhto pano
mûsa coyeirore mûsa ã ñunocachu
noabiãboa. Jesu yairo musare to
yacachu tiore mûsa yahusãhto pano
tiro to yacarire mûsa ã ñunocachu
noabiãboa. ⁸Æ yoaborina jipanahta

paina m̄sa mehne macaina Jesu yaina ti jipach̄ta tinare ñano yoaina, yacaina jira m̄sa.

⁹⁻¹⁰Tó sehe yoaina puhtoro Cohamacu to suho jiropure muanopure waha masierara. ¿Tíre masierajari m̄sa? Mahñoare tuhotuena tjiga m̄sa: Wuana tiina, “Cohamacu jira”, ti nia masurine ño payoina, numia mehne ñano yoaina, m̄sa mehne ñano yoaa numia, m̄sa sahsero ti pjacuri mehne ñano yoaina, numia sahsero ti pjacuri mehne ñano yoaa numia, yacaina, paina yare goa pjaina, cahaina, masare ñano tuhtipeina, masa ti cjuare maina baro ne Puhtoro Cohamacu to suho jiropure muanopure waha masierara.

¹¹Panopure m̄sa c̄hu tó sehe yoaina tjimahre. Ñ yoamarina m̄sa jipach̄ta mipure m̄sa ñano yoari buhirire cosa tuhsuri jire Jesucristo sehe. Ñ to cosarina m̄sa jichu to yaina cjihtire yoare Cohamacu m̄sare. Ñ yoaro “Noaina jira”, ni ñuna m̄sare tiro. Ñta yoare m̄sare mari puhtoro Jesucristo, Espiritu Santo c̄hu ti tuaa mehne.

Mari pjacuri Cristo ya pjacuri jia nina

¹²“Ȳh cahmano sehe yoa masija yuh̄”, niyuhca caina m̄sa. Tí potocã to jipach̄ta tíre yoacu noano jieraboca yuh̄. Ȳh cahmano sehe yoa masija. Ñ yoa masipaihta cãa tahari ñ yoariro jicu tíre duhu masieraboca yuh̄. Ñ jicu tíre pari turi yoasi yuh̄, “Tíre duhu masieraboca”, nicu. ¹³Õ sehe nina m̄sa: “Jipihtia chua mari pjaro macaa cjihti jira. Tuhsu mari pjaro chua posa tihti pjaro jira”, nina m̄sa. Tí potocã tjira. Ñ jiparota baharo Cohamacu sehe mari chuare mari pjaro c̄hure ti pihtia wachu yoarohca. Ñ jia mari chua wiho warota jia nina. Chua mari pjaro macaa cjihti jira. Ñ jiparota mari pjacuri numino mehne ñano yoahiti pjacuri jierara. Mari pjacuri sehe mari puhtoro Cristo ya

puhtoro sehe mari puhtoro noano yoahitiro cjihti jira. ¹⁴Cohamacu to tuaa mehne mari puhtoro Cristore masori jire. Ñ to yoariro seheta mari c̄hure masonohca tiro.

¹⁵¿Ñ jina m̄sa pjacuri Cristo ya pjacuri ti jichu masierajari m̄sa? ¿Ti ñ jichu Cristo ya pjacu mehne ñano yoaricoro mehne mari ñano yoach̄ noajari, m̄sa tuhotuchu? Noaerara. ¹⁶Ñano yoaricorore ñahariro to pjacu sehe ticoro ya pjacu mehne jiro, c̄hu pjacu yoaro seheta jira. ¿Tíre masierajari m̄sa? Ñta ni joaa tiri jire Cohamacu yare ti joari tjui: “Tina puaro jipahta c̄hu pjacu yoaro sehe wahara”, ni joaa tiri jire. ¹⁷Mari puhtoro to yaina mehne jira. Ñ jiro Jesu yairo Jesu mehne puaro jipahta c̄hu potori tuhotuina c̄hurota ti jiboro seheta jira.

¹⁸Ñ jina numia mehne ñano yoaare, m̄sa mehne ñano yoaare goa pjaena tjiga. Tíre m̄sa yabiro seheta tíre yoaena tjiga. Paye ñaare mari yoana mari pjacure dojomehneraja. Numino mehne ñano yoariro sehe to pjacure ñano dojomehna. ¹⁹Espiritu Santore marine ware Cohamacu. Ñ jiro mari mehne jiro nina Espiritu Santo sehe. ¿Tíre masierajari m̄sa? Ñ jia m̄sa pjacuri m̄sa catia c̄hu m̄sa ya cjihti waro jierara. Cohamacu yaina cjihti waro jira m̄sa. ²⁰M̄sa ñaa buhirire buhiri dahre tuhsure Cristore. Ñ jina to yaina cjihti waro jira m̄sa. To yaina jina m̄sa pjacuri mehne Cohamacu to cahmano sehe yoaga. Ñ yoana Cohamacure ño payona nina m̄sa.

Namo tiare yahuha Paulo

7 Mipure yuh̄re m̄sa sinitu m̄sa joarocari cjirire yuh̄ c̄hu yuhti cahmai tai nija: Masuno namo tierach̄ c̄hure, noanocahna, yu tuhotuchu. ²Tí ñ jipach̄ta m̄sa sehe namo tijaro paina numia mehne ti ñano yoaerahito sehe. Ñ

jia numia cūhu manū tjaro paina mūa mehne ti ñano yoaerahto sehe. ³⁻⁴Manū tiricoro to pjacu to ya pjacu dihta jierara. To manūno ya pjacu cūhu jira. To manūno cūhu to pjacu to ya pjacu dihta jierara. To namono ya pjacu cūhu jira. Ā jina mūsa mūa sehe mūsa namosānumiare noano cjuaga. Ā yoa mūsa numia cūhu mūsa manūsumare “Yū pjacure pihæcū tjiga”, niena tjiga. ⁵Wiho mejeta Cohamacure p̄aro mūsa sini duana “Mahaa dachoricā mari basi jiena tjijihna. Cohamacure sinijihna”, cūno potori ā nina, mūsa basi wahā duhu masina mūsa. Mūsa ā duhuri baharo mūsa jiriho sehetā jirucuga tjoa, Satana ñano mūsa to yoa dutierahto sehe. “Paina mehne ñano yoaboca” nina, mūsa basi piti ti duhuena tjiga. Mūsa jiriho sehetā jirucuga tjoa.

⁶Ahrire mūsa mipū yū niri cjiire yahucū mūsa dutia waro mehne nieraja. Ā yahuta nija mūsa yoahore mūsa masihto sehe. ⁷Jipihtina mūsa yū yoaro sehetā namo tieraina mūsa jichū noaboa yūhure. Ā ji duapanahta mari jipihhtina cūno potori jieraja. Cāinare marine namo ti dutira Cohamacū. Cāinare namo ti dutierara.

⁸Ā yoa namo marieinare, manū marieinare, wapewahya cūhure ō sehe nija: Namō marieina, manū marieina ji masina, āta jinocahga mūsa yū yoaro sehetā. ⁹Ā ji masierana tuaro ñaare goa pjana, potota namo tīga. Ā yoa numia cūhu manū tīga. Ñaare mūsa goa pjachū noaeraputiara mūsa. Mūsa ā goa pjana mūsa namo tichū pinihta noa nina. Ā yoa mūsa manū tichū cūhure noana.

¹⁰Mūsa namo tiinare, manū tia numiare ō sehe dutija. Yū ā nipachūta ya dutia waro jierara ahri. Mari puhtoro Cristo ahrire dutira: Mūsa numia sehe mūsa manūsumare cohāena tjiga. ¹¹Mūsa manūsumare cohāna, manū

mariea numia sehe tjuaga. Ā tjuerana pari turi tjoa mūsa manūsuma mehne noano jiga tjoa. Ā yoa mūsa cūhu mūsa mūsa namosānumiare cohāena tjiga.

¹²Ā yoa mūsa cūhure painare ō sehe nija yūhu. Mari puhtoro to dutia jierara ahri. Yūhu sehe ō sehe nija mūsa: Cāina mūsa mehne macaina Jesu yaina sehe Jesure cahmaeraa numiare namo tiina jira. Ā jina mūsa namosānumia mūsa mehne ti tjuā duachū tí numiare cohāena tjiga mūsa. ¹³Ā yoa cāina mūsa mehne macaa numia Jesu yaina numia Jesure cahmaerainare manū tia numia jira. Ā jina mūsa manūsuma mūsa mehne ti tjuā duachū tinare cohāena tjiga. ¹⁴Mūsa manūsuma Jesure cahmaeraina jipahta Jesu yaina numiare ti namo tichū, Cohamacū noaina yoaro sehe ñūna tinare. Ā yoa mūsa mūa sehe Jesu yaina mūsa jichū mūsa namosānumia Jesure cahmaera numia jiboca. Ti ā jipachūta mūsa mehne tí numia manū tichū Cohamacū noa numia yoaro sehe ñūna tí numia cūhure. To ā ñūerachū mūsa pohna Jesure cahmaeraina pohna yoaro sehe ñūboā Cohamacū. Wiho mejeta ti pohna cūhure noaina yoaro sehe ñūna Cohamacū. ¹⁵Ā yoa mūsa mūa sehere mūsa namosānumia Jesure cahmaeraa numia mūsa cohā duaa, āta yoajaro. Mūsa manūsuma cūhu ā cohā duaa, āta yoajaro. Noano mari jichū cahmana Cohamacū. Ā jiro tí numia mūsa to cohā duachū “Tí numia mehne jisiniga”, ni dutierara Cohamacū. ¹⁶Ti namosānumia Jesu yaina numia sehe noano ti yoachū ñūa baharopū ti manūsuma sehe Jesure cahmaboca. Ā ti cahmachū Cohamacū tinare pichacapū wahaborinare yūhdūchū yoarohca. Ā yoa ti manūsuma Jesu yaina sehe noano ti yoachū ñūa baharopū ti namosānumia Jesure cahmaboca. Ti ā cahmachū Cohamacū tí numiare pichacapū wahabori numiare yūhdūchū yoarohca. Ā

Jesure cahmaborina ti jipacheta potota Jesure ti cahmahtore masiyuhto basioerara musare.

¹⁷ Ā jina jipihtina musa mari puhtoro Cristo musare to ji dutiriro seheta yoaga. Ā yoana Cohamacu musare to cūri cjirire yoaga musa. Tíre jipihitina Jesu yainare ā yoa dutirucuja yuhū. ¹⁸ Jesu yaina musa jihto pano circuncisiōre yoarina cjiri jina, āta jirucuga. Tuhsu, Jesu yaina musa jihto pano circuncisiōre yoeraina cjiri jina mipu cūhure āta jirucuga. ¹⁹ Mipure circuncisiōre yoarina musa jichu yaba cjihti jierara. Tíre yoeraina musa jichu cūhure yaba cjihti jierara. Wiho mejeta Cohamacu dutiare mari yoachū tí pini wiho waro jierara. ²⁰ Ā yoana Cohamacu Jesu yaina musare to cūri pja musa jiriho seheta tjuaga. ²¹ Jesu yairo mu ji dūcahto pano masunore dahra cohtariro mu jichu noanohca. Āta tjuasiniga. Mu puhtoro muhure to wio duachū sehene wijaga muhū. Mu wijachū noanohca muhure. ²² Mari puhtoro Jesu yairo cūiro jiro masunore dahra cohtariro jiparota Jesu to yuhdūchū yoariho jira. Āta pairo mari puhtoro Jesu yairo jiro, masunore dahra cohtariro jieraparota Jesure dahra cohtariro jira tiro cūhū. ²³ Mari űaa buhirire buhiri ti tuhsuri jire Cristo. Ā jina tiro dihtare “Yū puhtoro waro jira”, ni tuhotuga musa. Paina musare tíre ti ā ni tuhotu dutierachū tinare tuhoena tjiga. ²⁴ Ā jina yū coyeyā, Jesu yaina cjihti Cohamacu musare to cūri pja musa jiriho seheta tjuaga. Ā tjuana Cohamacu mehne macaina jiga.

²⁵ Mipure namo marieinare, manū maria numia cūhure yahu duaja musare. Mari puhtoro ahrire “Ō sehe niga”, nierare yuhure. Yuhure to pja űuchū yuhure to yoadohochū to cahmano seheta yoarucuriho jija yuhū. Ā jiriho jicu ahrire noano yahuihtja musare. ²⁶ Mipure musa űano yuhdūna nica. Ā

jiromahchū musa namo marieina cūhū manū maria numia cūhū musa tjuachū noanohca, yū tuhotuchū. ²⁷ Namō tiina, manū tia numia musa jina āta tjuaga. Ā yoa namo marieina, manū maria numia musa jina āta tjuaga. ²⁸ Namō tina űano yoerara musa. Ā yoa musa nuhmia manū tina űano yoerara musa cūhū. Wiho mejeta namo tiina, manū tia numia musare wapuro tjuarohca ahri yahpahi masa ti űano yuhdūro seheta musa űano yuhdūchū. Ā jicu musare “Ā wapū tiri” nicū, “Namō marieina, manū maria numia tjuaga”, nihi yuhū.

²⁹ Yū coyeyā, ahrire musare yahui nija. Cristo ahri yahpapū to tjuā tahto mahānocā dūhsara. Ā jia mipure namo marieina Cohamacu to cahmano sehe ti noano yoa masino seheta noano yoaro cahmana namo tiina cūhure. Ā yoa manū tia numia cūhure āta Cohamacu to cahmano sehe noano yoaro cahmana. ³⁰⁻³¹ Ahri yahpa to mipu jiro seheta baharocāta pihtia waharohca. Ā pihtihiti yahpa to jichū mipure mari űahacaha tiia, mari wahchea, mari cjuāa pihtia wahaahca. Ā jia tí wiho waro jira. Cohamacu yare yoaa sehe wiho waro jierara. Ā jia ahri yahpa macaare cjuaina, cjueraina yoaro sehe jijaro. Ahri yahpa macaare pjiro tuhotuea tjijaro. Ahri yahpa to mipu jiro seheta baharocāta pihtia waharohca.

³² Musā űano yuhdūerachū cahmaja yuhū. Pjiro musa tuhotuerachū cūhure cahmaja. Namō marieriro Jesu yairo jiro Jesu yare wacūrucura. Ā wacūrucuro Jesu cahmaare tuaro yoa duara. ³³ Namō tiriro sehe to namono cahmaa sehene tuaro yoa duara. Ā jiro ahri yahpa macaare pjiro tuhotura. ³⁴ Ā jiro tiro puaro macaare yoa duara. Jesu cahmaa cūhure, to namono cahmaa cūhure tiro yoa duara. Ā yoa bucoro manū marienico jiro, ticoro mari puhtoro Jesu cahmaare tuaro yoa duara. Nuhmīno cūhū

ãta yoa duara. Ñ yoa duaro to pjacu mehne, to wacũa mehne cũhure ticoro tuaro Cohamacu yacoro ji duara. Manu tiricoro sehe ahri yahpa macaa sehere to manũno cahmaa sehere tuaro yoa duara. Ñ jiro ahri yahpa macaare pjĩro tũhotura.

³⁵ Ahrire musare nii nija musare yoadhocu tacu. Warũoa dutiare musare cũ duaeraja. Ñ cũ duaerapaihta noano musa yoachũ cahmaja. Jesu mari puhtoro yare musa tuaro yoa duachu cahmaja yũhũ.

³⁶ Musa mehne macariro to sũhũduri-coro to bucuro curero to wahachu ñũno namo tijaro tiro ticorore. “Ñta yoaro cahmana ticorore”, ni tũhoturo to niriro seheta yoajaro tiro ticorore. Ticorore namo ti masina. Ñ yoaro tiro ñano yoerara. ³⁷ Pairo sehe to sũhũduri-coro namo ti duaeraro, to cahmano seheta yoajaro tiro ticorore. “Ticorore namo tieraja yũhũ”, ni tũhoturo to cahmano seheta yoa duaro, tó seheta yoajaro. Ñ yoariro noano yoara. ³⁸ Ñ yoa to sũhũduri-coro namo tiriro cũhu noano yoara. Tuhsũ, to sũhũduri-coro mipũre namo tierariro sehe paio yũhdoro noano yoaro nina.

³⁹ Manu tiricoro to manũnore cohã dutierara Cohamacu. To ã cohã dutierapachũta to manũno to yariari baharo ticoro paio mehne to cahmariro mehne manũ ti masina. Ticoro to manũ tirirore Jesu yairo jiro cahmana tirore. ⁴⁰ Ticoro manũ marienico tjuaro, manũ tiri-coro yũhdoro noano wahchericoro jirohca ticoro. Ñta ni tũhotuja yũhũ sehe. Cohamacu to Espĩritu Santore cjuariro jija. (Yũ ã jĩro jichũ masina ahri yũ yahurire masiga musa.)

“Cohamacu jira”, ti nia masurine ño payo ti duhu payoa chũare yahuha Paulo

8 Mipũre “Cohamacu jira”, ti nia masurine ño payo ti duhu payoa

chũare yahu duaja. Jipihtina musa tí barore “Masija”, ni tũhotura musa. Ñ ni tũhotuna “Painare masi yũhdũru-caja”, ni tũhotumana cãina. Ñ ni tũhotua painare yoadoherara tina. Painare cahĩa tinare yoadohora. Ñ yoa masia yũhdoro painare cahĩa sehe wiho waro jierara. ² “Masi pahũnocaja”, ti mu sũro niina jia, Cohamacu noare to masi dutiare masierasĩnica tina. ³ Wiho mejeta Cohamacure ti cahĩchũ tinare masina tiro. (Ñ jia to yaina jira tina.)

⁴ Ñ yoa “Cohamacu jira”, ti nia masurine ño payo ti duhu payoa chũare ahrireta yahuihtja: Tĩ masuri ne yaba cjihti jierara. Potocãta tí masuri yajeripohna mariaha. Cohamacu sehe cũirota jira. Paina cohamana mariaha. Ahrire mari masija. ⁵⁻⁶ “Payũ cohamana jira. Tina mari puhtoa jira”, ni tũhotumana masa. Ñ yoa muanopũ, ahri yahpapũ cũhure “Cohamana”, ti niina jipachũta mari sehere cũirota jira Cohamacu. Tiro mari Pũcu jipihtiare ba-juamehneriro jira. Ñ yoaro to yaina cjihti yoari jire tiro marine. Ñ jiro mari puhtoro Jesucristo cũirota jira. Tiro jipihtiare mari Pũcure yoabasariro jira. To yaina cjihtire yoari jire tiro marine. Ñ jina tiro mehne ã jirucunahca mari.

⁷ Yũ niriro sehe ã jipachũta paina Jesu yaina tíre masierara. Panopũ tina “Cohamacu jira”, ti nia masurine “Catiina jira”, ni tũhoturucumaha. Tĩ pjarũre ã yoarĩna jia mipũ cũhure tí masurine ño payo ti duhu payoa chũare “Cohamana ya chũa jira”, ni tũhotumana. Ñ yoaa tí chũare chũa, “Mari ñano yoana nija cohamana ya chũare chũna”, ni tũhotumana. Tĩre ti yoarire noano masieraa, ã ni tũhotumana. Ñ jia tina ñano yoaa nina, ti tũhotuchũ. ⁸ Tĩ chũare mari chũchũ mari chũerachũ cũhure Cohamacu marine “Noaina jira”, ni ñũerara. Ñ yoa tí chũare mari chũchũ wiho warota jinocahno nina tí chũa. Mari tíre

chuna ñano yoaeraja. Tí chũare mari chũerachũ cũhũre wiho warota jinocahno nina. Ti duhu payoa chũare mari chũerana paina yũdoro noaina jieraja mari cũhũ. ⁹⁻¹⁰Wiho mejeta noano yoaga musa. Tí chũare churina cjiri musa jichũ paina musare, “Masija” nininare, ñũ cũ chũboca. Á ñũ cũ chũa ti yoarire noano masieraa, “Ñano yoana nija mari”, ni tuhotuahca tina cũhũ. Ti á ni tuhotuchũ tina sehere ñano yoachũ yoana nica musa. Á jina noano yoaga musa. ¹¹“Mari tí chũare mari chuchũ noanohca marine”, musa ni tuhutuina jina paina noano masieraina cjirire ñano yoachũ yoaboca musa, musare ti ñũ cũchũ. Tina ya cjihti cũhũre yariari jire Cristo. Á yoana Cristo yainare musa coyeare ñano yoachũ yoana niboca musa. ¹²Noano masierainare Cristo yainare musa ñano yoachũ yoana, Cristo cũhũre ñano yoana nica musa. ¹³Á jicũ tí masũrine ño payo ti duhu payoa chũare yũhũ chũcũ Cristo yainare ñano yoachũ yoai niboca yũhũ. Cristo yaina ti ñano yoachũ cahmaeraja. Á jicũ “Yũhũ tinare ñano yoachũ yoari” nicũ, tí chũare ne pari turi chũsi yũhũ.

Paulo Jesu to cũriro to jia tiare yahuha

9 Jesu to yare buhe dutiro to cũriro jija. Á jicũ paina to cũrina ti yoaro seheta yoa masija yũhũ cũhũ. Mari puh-toro Jesure ñũriro tjija yũhũ cũhũ. Á jina Jesu yare yũ buhechũ musa sehe tíre noano tuhõrina jina to yaina wahare musa. Á to yaina waharina jina Jesu to cũriro yũ jichũ masi tuhsura musa. ²Paina yũhũre yahuwajaa “Tiro Jesu to cũriro jierara”, niboca. Ti á nipachũta musare yũ buheri baharo Jesu yaina wahana, “Jesu to cũriro jira” ni, yũhũre masi tuhsura musa. Á jina paina ti yahuwajapachũta musa sehe to cũriro yũ jia tiare masina.

³Yũhũre yahuwajainare õ seheta ni yũhtihtja: ⁴Mũsare yũ buheri baharo yũ chũhtire yũ sihnihti cũhũre yũhũre waboa musa yũ buheri wapa. ⁵Á jicũ namo tiriõ jicũ yũ namo Jesu yacoro to jichũ ticoro mehne tini masiboa yũhũ. Paina Jesu to cũrina, Jesu bahana, Pedro cũhũ ti namosãnumia mehne ti tiniriõ seheta yũhũ cũhũ tini masiboa. ⁶Yũhũ Bernabé mehne mũsare noaa buheare sã buhepachũta sãre ne paye barocã waerare musa. Á jina sã basita sã chũhti cjihtire dahra wapatai sã. ¿Sã dihtare wapataro marieno buhero cahmajari, musa tuhotuchũ? ⁷Ahrina yũ yahuhtina sehe ti dahrari wapa wapataro. Cũiro surara to dahrachũ to puhõtoa tirore wapara. To basi wapaerara. Chũare toariõ cũhũ to toari dicha tichũ tíreta chũ masina. Á yoa ovejare ñũ wihboriro to nuina pẽchore sihni masina tiro. ⁸“Ti dahrari wapare waparo cahamana”, nicũ masa ti dutia dihtare mũsare yahueraja. Cohamacũ to dutiapũ to niri cjiri cũhũre musare yahui nija. ⁹Moise cjiõro to cũriõ dutiare to yare ti joari pũi õ sehe ni yahura: “Wachũ trigo yaparire to dahpori mehne suhtiwirõro to chũ duachũ to duserõre ducataena tjiga”, nia tiri jire Cohamacũ dutia. ¹⁰Á dutiro wachũare nino nierari jire. Á dutiro marine nino niri jire marine buhero taro. Wesere saharõro cũhũ tí dichare narina cũhũ ti dahrari baharo dicha tiri pja jichũ ti wapatahtõro cohtara tina. (Á jina dahrainare ti dahrari wapare waro cahmana marine.)

¹¹Mũsare Cohamacũ yare noaa buheare buhei sã. ¿Sã á buhechũ musa sehe sãre chũare waeraro cahmajari, musa tuhotuchũ? Waro cahmana. Mũsa wachũ noaboa sãre. ¹²Á waerarina jipanahta paina chũare mũsare ti sinichũ musa tina sehere wara. Tina mũsare ti chũare sinichũ sã sehe tina yũdoro mũsare chũare sinibõrina jimaja.

Ã wa dutiborina jipanahta sã sehe “Sãre waga”, ne nierahi. “Cristo ya buheare musapu cahmaeraboca” nina, sãre chua mariapachuta musare ne sinierahi. ¹³ Cohamacu wuhui dahraina tí wuhuihta ti chũare nana. Ã yoa Cohamacure ti ño payori mesai cohtaina wahiquirore ti jũrirore mahanocã na chũra tina cũhũ. ¿Tĩre masierari musa? ¹⁴ Tó seheta ti yoariro seheta noaa buheare buheinare ti buheri wapare ti chũhtire tinare waro cahmana musare. Ãta yoa dutire mari puhtoro Jesu. ¹⁵ Ã jicu musare siniboriro jipaihta yũhũ ne paye barore sinierahi musare. Ã jicu ahrire mipure joacu paye barore wapa cahmai tai joai nieraja. Musare ne wapa cahma duaeraja. Yarihtiro jipaihta ne wapa cahmasi yũhũ musare. Wapa marieno buhecũ ji coa yũhũduaja. Ã jicu musare yũ buheri wapa ne wapata chũsi.

¹⁶ Noaa buheare buhe dutiro yũhũre cũre Cohamacu. Tĩre buheri masũno jinocaihta nija yũhũ. Noaa buheare buheracu pjacũoriro jiboa yũhũ. Ã jicu tí buheare buhecũ “Painare masi yũhdũrucaja”, niboriro jieraja yũhũ. ¹⁷ Noaa buheare yũ mũ sũro buhecũ yũ buheri wapa wapaa naboja yũhũ. Cohamacu yũhũre to yare buhe dutiro cũre yũhũre. Ã jicu yũ mũ sũro buheraja. ¹⁸ ¿To yare ã buhecũ yaba barore wapatajari yũhũ? Õ sehe jira yũ wapataa: Noaa buheare buhecũ musare ne paye barore sinieracu wapa marieno tí buheare buheja musare. Yũ ã nirire masicu wahcheja. Yũ wahcheata jira yũ wapataa.

¹⁹ Ne masare dahra cohtariro jierapaihta jipihtinare dahra cohtariro yoaro sehe jija yũhũ payũ paina masa Jesu yaina ti wahahto sehe. ²⁰ Ã jicu yũ coyeya judio masa mehne jicu, ti yoaro seheta yoaja yũhũ Jesu yaina ti wahahto sehe. Cohamacu to dutia cjirire Moise cjiroro to cũri cjirire ño payoriro jierapaihta, tí dutia dihtare ño payoina mehne jicu tí

dutiare ño payoriro baro yoaro seheta jija yũhũ. Ãta yoaja yũhũ tina Jesu yaina ti wahahto sehe. ²¹ Ã jicu Cristo yairo jicu Cohamacu dutiare Moise cjiroro to cũri cjirire yũhdũruca duaeraja. Tí dutiare yũhdũruca duaerapaihta tí dutia marieina mehne jicu tí dutia marieriro yoaro seheta jija. Ãta yoaja yũhũ tina cũhũ Jesu yaina ti wahahto sehe. ²² Jesure noano masieraina mehne jicu ti yoaro seheta jija. “Masi pahũoriro jija”, nieraja yũhũ. Ãta yoaja yũhũ tina cũhũ Jesu yaina ti wahahto sehe. Ã jicu jipihtina masa ti jiro sehetã jija yũhũ cãina tina Jesu yaina to yũhdũchũ yoaina ti wahahto sehe. ²³ Ahrire yoaja noaa buheare jipihtina ti tũhohto cjihtore. Yũ ã yoachũ ñũno Jesu to buheriro seheta tiro yũhũ cũhũre noano yoara. (Ã jicu masa ti jia tiro seheta jija.)

²⁴ Õ seheta jira mari piti dahre buhechũ. Mũrocapeina mũrocaa tina jipihtina mũroca. Ti ã mũroca pihtipachuta mũroca yũhdũrucariro sũ muhtana. Ã sũ muhtariro wapataa. Ã jina ti mũrocariro seheta musa cũhũ Cohamacu cahmaare yoaga musa wapatahto sehe. ²⁵ Jipihtina mũrocaina ti pjacũre dojomehneare duhunoca noano mũrocapora ti mũroca tuahto sehe. Tuhsũ, ti noano mũrocahto cjihtore quihõno chũa, quihõno caria, noano yoara tina. Ãta yoara tina mũroca sũ, ti wapatahto sehe. Ã jia ti ã yoa wapataa pũri mehne ti yoari soro jira. Tí soro ñaco baaerara. Mari sehe Cohamacu yare noano buheja to yare mari wapatahto sehe. Tí wapataa pinihta ne baaerara. ²⁶ Ã jicu yũhũ pa sehe mũrocariro yoaro sehe yoeraja. Potori da mũrocariro yoaro sehe yoaja yũhũ. Tuhsũ, cahmacheperiro pa sehe dota moũroca mũjariro yoaro sehe yoeraja. Ã yoa duaeracu Cristo yare quihõno yoa duaja. ²⁷ Ã jicu mũrocapeina, cahmachepeina cũhũ ti

pjacũre ti buheriro seheta ti noano quihõno ti yoariro seheta yũhũ cũhũ yũ pjacũ mehne noaa dihtare yoapoja. ˆ yoaeracu painare buheriro jipaihta yaba cjihti jieraboa yũhũ sehe.

“Cohamacũ jira”, ti nia masũrine ño payo dutieraha Paulo

10 ˆ yoa yũ coyea, ahrire masiga musa. Sã Israe masa ñuchusuma cjiri panopũ macaina jipihtina Cohamacũ to me curuare ñũ ñũũ ti wahcãa, wahaa tiri jire. ˆ wahaa sohãri mare co watoi jiri mahai wua cahari mahai pahã tinia wahari jire. ²ˆ wahaa tina jipihtina me curua mehne sohãri ma macaa co mehne bautisarina yoaro sehe wahari jire. Bautisarina wahana Cristo yaina mari jiare ñona nija. Tó seheta tina sohãri mare bautisarina yoaro sehe wahaa, Moise cjiro yaina ti jiare ñoa nia tiri jire. ³ˆ yoa tina jipihtina muano macaa chuare chua tiri jire Cohamacũ to waare. ⁴ˆ chua tina jipihtina Cohamacũ to waa co cũhũre sihnia tiri jire. Tí pjapũre tí core Cohamacũ to cũri tãcai wijaa core sihnia tiri jire tina. Tia tãca yoaro sehe jiri, tinare co wariro Cristo jiri jire. ⁵Tina ˆ waharina ti jipachũta paina tina mehne macaina ñano ti yoachũ ñũno Cohamacũ sehe payũ tina mehne macainare ñũ ji coaerari jire. ˆ jiro tinare masa marienopũ yariachũ yoari jire Cohamacũ. ˆ yoaro masa marienopũ ti pjacũre cohã sitea wahari jire.

⁶ˆ Ata yoari jire Cohamacũ tinare marine buhero taro. ˆ jiro tinare ñũ cũ ñaare mari goa pjaerahto cjihtore Cohamacũ ˆ yoari jire tinare. ⁷ˆ jina “Cohamacũ jira”, ti nia masũrine ti ño payoriro seheta yoena tũga musa sehe. Tí masũrine ti ño payorire Cohamacũ yare ti joari pũi yahuro õ sehe nina: “Tina chũ duji sihni tuhsũ, wahcãrũcũ sũ, bese ñũũ yoa dũcari jire wachũ masure ño

payoa taa”, ni joaa tiri jire panopũre. ⁸Baharo paina sehe Israe masa numia mehne ñano yoari jire. Ti yoariro seheta yoeraro cahmana marine. Tina ti ñano yoari baharo cũ dachoihta tina veintitrẽ mil masa yariaa wahari jire. ⁹Ti ˆ wahari baharo pari turi paina Israe masa sehe Cohamacũre tina mehne suachũ yoari jire. “Marine buhiri dahresi”, nia ñaa warore yoari jire. ˆ yoa tirore suachũ yoari jire. Ti ˆ yoari buhiri Cohamacũ agãa mehne bahca wajãri jire tinare tjoa. ˆ jina tina yoaro sehe Cristore yoena tũga musa “Marine buhiri dahresi”, nina. ¹⁰Pa tehe tjoa paina ñaa quitu dahre ti tuhtichũ anjo masare wajãriro tinare wajãri jire. ˆ jina tina yoaro sehe yoena tũga.

¹¹ˆ Wajã dutiri jire tinare Cohamacũ marine buhero taro. Mari sehe pihtiri dacho panocã jiina jija. Mari ˆ jiina jichũ panopũ macaina ti ˆ waharire Cohamacũ joa dutiri jire marine noano buhero taro. ¹²ˆ jina “Noaina jija sã, Cohamacũ to ñuchũ”, ni tuhutuina jina, noano yoaga musa “Ñaare yoari”, nina. ¹³Mari jipihtina cũiro dũhsaro marieno cãa tahari ñaare wacũja. ˆ wacũna tí ñaare yoa duaja. Mari ˆ yoa duapachũta Cohamacũ marine yoadohorucuriro jira. ˆ jiro tí ñaa wacũare musa bo masierachũ tiro sehe musare yoadohorohca. ˆ jiro tí ñaare musa yoa duachũ ñũno Cohamacũ tí ñaare musare yoa duaerachũ yoarohca. To ˆ yoachũ tí ñaare yoa duasi musa.

¹⁴ˆ jina yũ cahĩina yũhũre tuhoga. “Cohamacũ jira”, ti nia masũrine ne ño payoena tũga. ¹⁵Musa noano masiina jichũ musare yahuja. ˆ jina yũ nihti cjihtire quihõno ti jichũ masiga musa basi. ¹⁶Cristore ti ñahari ñamine vinore to sihnihito pano Cohamacũre “Noana”, niri jire. To niriro seheta mari cũhũ tí core sihnina Cohamacũre “Noana” nina, mari ya buhiri Cristo to yariarire masichũ

yoana nija. To di wijaarire masichu yoana nija. Tuhsu, to yaina mari jia tia cūhure masichu yoana nija mari. Ā yoa pāore mari Cristo yaina nuha, chūna, mari ya cjihtire to pjacu crusapu to yariarire masichu yoana nija. Tuhsu, to yaina mari jia tia cūhure masichu yoana nija. ¹⁷ Ā jina payu masa jipanahta cū curi pāo curire chūna jipihtina mari Cristo yaina cū curuata jija.

¹⁸ Israe masa ti yoarire wacūga musa: Tina wahiquirore wajāa, jū muo waa, Cohamacure ño payora. Ā ti wari baharo cū curuaihta ti wariro cjirore chura. Ā chūa Cohamacure ti ño payoare masichu yoara tina. ¹⁹ Cohamacure ti waa chūare yahucu “Cohamana jira”, ti nia masurine ti waa chūa sehe tí waro jira”, nii nieraja. Tí chūa pinihta wiho waro jia nina. Tí masuri cūhu wiho waro jia nina. ²⁰ Tí chūa ti yaba cjihti jierapachuta tí chūare chūeraro cahmana. Ō sehe jira tí. Cohamacure cahmaeraina wahiquirore wajā, jū muoa, Cohamacure ño payoa nierara. Ā yoa watia sehere ño payora tina. Ti ā ño payoina jichu tina mehne chūna watino yaina yoaro sehe yoana nica musa cūhu. Musa ā yoachu pinihtare ne cahmaeraja. ²¹ Santa Cenare mari yoari dachoi mari puhtoro Jesure wacūna tana sihnija. Mari ā sihniina jina, watia sehere ño payo masieraja mari. Ā yoa Jesure wacūna tana pāore chuja. Mari ā chūina jina, watia sehere ño payo masieraja mari. ²² Ķ Jesure musa mehne suachu yoa duajari musa, puarore musa ño payona? Ķ Tiro yuhdoro tuaina jijari musa? Jierara. (Ā jina noano yoaga musa.)

Cohamacu to cahmaa dihtare yoaga

²³ Ō sehe nina cāina: “Sā cahmano seheta yoa masija sā”, nina. Musa yoari cjiri ñaa ti jierapachuta tíre yoana painare yoadohoeraboca musa. Tuhsu, tíre yoana Jesure wacū tua namochu

yoaeraboca musa painare. ²⁴ Musa cahmaa dihtare yoaena tjiga. Paina sehere noano yoadohoga musa.

^{25–26} Chūa duaropure chūare nuchūna “Ķ Ahri chūa masurine ti duhu payoa chūa jijari?” ni sinitu ñuena tjiga. “Ñaaare yoari” nina, sinitu ñuboca musa. Ā ni sinitu ñuena tjiga. Ahri yahpa, ahri yahpai jia cūhu Cohamacu ya jira. Ā jina tí chūare “Ķ Ñaa chūa jijari?” niena tjiga.

²⁷ Jesure cahmaeraro musare chū dutiro to pjirocachu waha duana wahaga. Ā wahana musare to duhu payoare chūga. “Ķ Ahri chūa masurine ti duhu payoa chūa jijari?” ni sinitu ñuena tjiga. ²⁸ Ā jina paio Jesu yairo “Ahri chūa masurine ti duhu payoa chūa jira”, musare to ni yahuchū tí chūa pinihtare chūena tjiga. Musare ā ni yahuriro “Ñaa chūare chūra ahrina”, musare to ni tuhotaeraho sehe chūena tjiga musa. Musa cūhu ā ni tuhotaeraho sehe chūena tjiga. ²⁹ Ā chū dutieracu musa ya cjihtire ā nierahi. Musare ahrire yahuriro ya cjihti sehere tí chūare chū dutieraja. Tiropu musare “Ñaa chūare chūra ahrina”, niboca. “Ā niri” nina, tí chūare chūena tjiga.

“Chūena tjiga”, yu nichu ō sehe ni sinitu yuhtiboca musa yuhure: “Ķ Dohse jiro baro paioire ‘Soro tuhotaeraho’ nina, chūerabocari sā? ³⁰ Ķ Cohamacure ‘Noana’, sā niri baharo sā chūchū dohsearo tíre sā chūri buhiri paio sare yahuwajabocari?” ni sinitu yuhtiboca musa yuhure. ³¹ Ahri jipihtiare yahucu ō sehe nii nija musare: Dachoripe Cohamacu to dutiro sehetā wahchea mehne chū, sihnija, Cohamacure masa ti ño payohto sehe. Ā jina jipihtiare noano yoarucuga Cohamacure masa ti ño payohto sehe. ³² Ne judio masare, judio masa jierainare, Cohamacu yaina cūhure ñano yoachu yoaena tjiga musa tinare. ³³ Ō seheta yoaga yuhū sehe. Masa jipihtinare yoadoho

duaia. Ā yoacu ya cjihti waro sehere pjiro tuhotueraia. Yu nana yuhduchu noanohca. Payu masa sehere yoadohoia tinare pichacapu wahaborinare Cohamacu to yuhduchu yoahito sehe.

11 Ā jina Cristore yu nu cirire yu yoachu masa cuhu yuhure nu cuga.

Corinto macaina ti cahmachunoi numia ti yoahitore yahuha

²Musare yu buhe turiari cjiire yu yoari cuhure wacu pahnoyuhca masa. Ā wacina musare yu yoa dutiriro sehetia yoayuhca masa. Ā yoana noano yoara masa. ³Ā yoaina masa jipachuta ahri cuhure masa masichu cahmaja: Jipihitina mua ti puhtoro, Cristo jira. Tuhsu, to namono puhtoro to manuno jira. Ā jichu, Cristo puhtoro to Pucuro jira. ⁴Cohamacure siniriro to dapure mohariro sinino, to puhtoro Cristore no payoeraro sehetia yoaro nina. Cohamacu yare yahuriro cuhu to dapure mohano ata yoaro nina tiro cuhu. ⁵Tuhsu, to dapure mohaeraricoro Cohamacure sinino, to manunore no payoeraro sehetia yoaro nina. Cohamacu yare yahuricoro cuhu to dapure mohararo ata yoaro nina ticoro cuhu. Ā yoaro to pjoarire wuha pahnoricoro yoaro sehetia yoara ticoro. ⁶To dapure moha duaeraro ticoro to pjoarire saa pahno dutijaro. To a yoari baharo to dapure buo tiro, ticoro mohajaro to dapure. ⁷Mua sehe Cohamacu noariro, tuariro to jia tiare nona tina sehe. Ā jia ti dapupure mohaeraro cahmana tinare. Numia sehe mua ti puhtoa jia tiare nona. Ā jia tina numia sehe ti dapupure mohajaro. ⁸Cohamacu munore yoaro, numino ya pjacu macano mehne munore yoerari jire. Numino sehere yoaro, muno ya pjacu macano mehne ticorore yoari jire. ⁹Tuhsu, munore yoaro, numino yairo cjihtore yoerari jire. Numino sehere yoaro muno yacoro cjih-

tore yoari jire Cohamacu ticorore. ¹⁰Ā jia numia ti dapupure mohajaro anjia cuhu mua ti puhtoa ti jirire ti masihtu sehe. ¹¹⁻¹²Cohamacu numinore yoaro, muno pjacu macano mehne yoari jire. Āta mipure muno masa bajuaro, numino pjacu masa bajuara. Tuhsu, jipihitinare Cohamacu sehe yoari jire. Ā jiro muno to ji muhterachu numino mariaboa. Ā yoa numino to mariachu muno cuhu mariaboa.

¹³¿Musa basi dohse tuhutujari? ¿Numino to dapu mohaeraricoro, Cohamacure to sinichu noajari, masa tuhutuchu? Noeraputiara. ¹⁴Tuhsu, muno pjoa nahmo muro to jichu naa nica. Jipihitina masa ti mu soro tire masina. ¹⁵Ā yoa numino to pjoa nahmo to dapure mohari cahsaro yoaro sehe jira. Ticoro pjoa nahmo muricoro jiro noaricoro bajura ticoro. Ti cuhure jipihitina masina. ¹⁶Musa mehne macariro ahire yu yahurire to tuho duaerachu, o sehe ni yahuihtja tire: “Yu ni yahuriro sehetia mari yoa tia jira. Paina Jesu yaina cuhu ata yoarucura tina cuhu. Sa a yarina jichu nucy yu ni yahuriro sehetia yoaga muhu cuhu”, ni yahuihtja yu yahurire tuho duaerarire.

Santa Cenare ti churo watoi dojomehneha Corinto macaina

¹⁷Mipure musare ahire yahui tai, “Noano yoaina jira”, nieraja yuhu musare. Musa cahmachuna noano yoerara. Nana yoara masa. ¹⁸Ō sehe ni yahu muhtaihtja musare: Musa cahmachunopu cahma sayona masa basi caa curuari tju wayuhca masa. Paina tire yuhure ti yahuchu “Potocā tjica”, ni tuhutu cureja yuhu. ¹⁹Āta yoayuhca masa. Musa a tju warina masa jichu nuna baharo Jesu yaina waro jiina sehere masinahca mari. ²⁰Musa basi a nu tuhtiina jina masa

cānoi cahmachu chūchū tó wahaerara. Potocāta Santa Cena waro yoana nierayuhca. ²¹ Mūsa cahmachuna cāina mūsa sahsero chū mūhcona, paina sehere jūca baachū yoana niyuhca mūsa. Tuhsū, sihni muhtaina sehe cahaa wahayuhca. ²² ¿Mū sare mūsa wūhūse pūta chū, sihni ga. Mipūre Cohamacū yaina ti cahmachunore dojomehna niyuhca mūsa to yaba cjihti jieraboro sehetā. Tuhsū, paina Jesu yaina pjacūoinare chūa maeraina sehere mūsa sehe būoro yūhdūchū yoayuhca. ¿Dohse ni yahuihcari yūhū mū sare? “Noano yoana nina mūsa”, nieraja yūhū.

Santa Cenare yoaa taa, ti chūrire yahuha Paulo

(Mt 26.26-29; Mr 14.22-25; Lc 22.14-20)

²³ Mari puhtoro Jesu to chū batoarire yahure yūhūre. Ā to yahuri baharo yūhū sehe mū sare tíre yahu turiahi. Tí ō sehe jira: Tirore nū tuhtiinare Juda to űohti űamihī mari puhtoro Jesu-cristo pāore na, Cohamacūre “Noana”, niyuhti. ²⁴ To ā niri baharo tí pāore nuha, to buheinare witiyuhti. Ā witiro ō sehe niyuhti: “Ahrīre chūga. Ahri yū pjacū jira. Mūsa yaro jiborirore yariaihca. Yūhūre mūsa wacūhti cjihtire ahrīre chūga”, niyuhti Jesu mari puhtoro. ²⁵ Ā ti chūri baharo tiro sihni wahware na wahcāno ō sehe niyuhti: “Mūsa űaa yoari buhirire cohācū tacū yariaihca. Ā yoacū yū dire cohāihca. Cohamacū ‘Mū sare yūhdūchū yoaihtja’, to niriro mū sūchū yū yariaro mehne to niriro sohōri tiarohca. Ahri wahwai posa tiare sihni, yū di cohāire wacūnahca. Ahrīre sihni, yūhūre mūsa wacūhti cjihtire sihni ga”, niyuhti Jesu. ²⁶ Ā yoa Santa Cena macaa pāore mūsa chūna, sihniare sihni na, Jesu mari puhtoro mari ya buhirire to yariarire űona nina mūsa. Ā űoru-

cunahca mūsa pū ahri yahpapū to tjuatachūpū.

“Santa Cenare chū sihni ű sehe yoaga”, ni yahuha Paulo

²⁷ Santa Cenare chū, sihni na, Jesure űo payoro marieno yoana, cua pisaro yoerana, to pjacūre to di cohāri cūhūre būjūpero sehe yoana nija mari. Ā yoana Jesure būjūpēna nija mari. Tó sehe yoana buhīri tiina jira. ²⁸ Ā jina mari yoarīre, mari jia tiare noano wacūjihna. Ā wacūna Santa Cenare chū, sihni masija mari. ²⁹ Mari puhtoro mari ya cjihtire to pjacū to yariarire wacūno marieno Santa Cenare chū, sihni na mari buhīri tinahca. ³⁰ Ō sehe dihta yoayuhca payū mūsa mehne macaina. Ā yoaa tina cāina tuaeraina, dohatiina wahayūhti. Tuhsū, paina ti ā yoari buhīri yariaa wahayūhti. ³¹ Wiho mejeta Santa Cenare mari chū, sihni na, mari yoarīre, mari jia tiare noano wacūna, mari űaa yoarīre duhuna tí buhirire buhīri tisi mari. ³² Mari puhtoro sehe marine tuhtira, tí buhirire marine buhīri ti dutieraro. Paina űaina Jesure űo payoeraina buhīri tihtina dihta jira. Tina yoaro sehe marine buhīri tichū cahmasāerara mari puhtoro.

³³ Ā jina yū coyēa, Santa Cenare chūna tana cahmachuna, cohtasiniga mūsa coyēare. ³⁴ Tuhsū, mūsa mehne macaina jūca baa, ti ya wūhūsepū chūsinijaro. Ā yoana Santa Cenare chūna tana cahmachuna, cua pisaro yoeraina ya buhīri buhīri tisi mūsa. Paye barore yahu duamahi mū sare. Baharo yū basi sūipū mū sare yahuihtja tíre.

Cohamacū yare mari yoahōre cūno marine yoa masichū yoara Espīritu Santo

12 Yū coyēa, ahrīre yahu duaja mū sare. Cohamacū yare mari yoahōre cūno marine jipihtinare yoa

masichu yoara Espiritu Santo. Ñ jicu tíre musa noano masichu cahmaja.

²Jesu yaina jierasinina soro jia buheare tuho nunuina jina, musa sehe “Cohamacu jira”, ti nia masurine, durucuera masurine ño payosinimare. Tíre masina musa. ³Ñ jiina musa jirina cjiri jichu mipure õ sehe ni yahuihtja musare: “Jesu ñano wahajaro”, niina Cohamacu yairo Espiritu to tuaa mehne ã nia nierara. Espiritu Santo warore cjuærara tina. Tuhsu, “Jesu mari puhtoro jira”, niina Espiritu Santo to tuaa mehne ã niina jira tina.

⁴Cohamacu yare yoa masia payu jira. Ti ã jipachuta marine yoa masichu yoariro sehe cüirota jira. Tiro Espiritu Santo jira. ⁵Ñ yoa Cohamacu yare yoahntina payu jina, to yare soro sehe mari yoahnti cühu payu jira. Tí ã jipachuta mari puhtoro Jesu sehe cüirota jira. ⁶Ñ yoa Cohamacu yare yoa cühu payu jira. Ti ã jipachuta Cohamacu marine yoa masichu yoariro sehe cüirota jira. ⁷Marine Jesu yainare Espiritu Santo yoadohoro Cohamacu tuare ñono nina. Õ sehetu yoadohora tiro Jesu yainare jipihtinare mari noano yoadohohto sehe. ⁸Cáinare noano masi, yahuchu yoara Espiritu Santo. Tuhsu, painare Cohamacu yare noano buhe masichu yoara tiro Espiritu Santo pinihta. ⁹Ñ yoa painare Cohamacure noano wacu tuachu yoara tiro. Ñ yoaro painare Cohamacu tuare wara tiro. Tí tuaa mehne tina sehe dohatiinare noina wahachu yoara. Espiritu Santo cüirota jiriro tí tuare wara. ¹⁰Tuhsu, tiro painare Cohamacu tuaa mehne yoa masichu yoara tiro. Ñ yoaro painare Cohamacu yare noano yahu masichu yoara tiro tinare. Ñ yoaro paina Jesu yainare buheare noano bese masichu yoara tiro. Ñ masia watino ya buhea ti jichu masina tina. Espiritu Santo waro ya buhea cühure ti jichu masina tina. Tuhsu, painare

tuhomahnoeraa duserire ti durucu masichu yoara tiro. Ñ yoa tuhomahnoeraa duserire durucuina ti nino sehetu yahu yuhdo masichu yoara tiro painare. ¹¹Espiritu Santo cüirota jiriro to cahmano sehetu marine cáinare ahri jipihtiare yu yahuriro sehetu yoa masichu yoara. Cáinare soro yoa masichu yoara. Paina cühure soro yoa masichu yoara.

Cristo yaina jina cü curuata jija mari

¹²Õ sehe jira ahri mehne mari piti dahre yahuchu: Mari pjacu cü pjacu to jipachuta wamomacari, capari, dahpori, cahmori tí pinihta payu jira mari pjacui jia. Ñta jija mari Cristo yaina cühu. Cristo yaina to pjacu yoaro sehe cü curuata jira. ¹³Ñ jina Cristo yaina jina, to pjacu yoaro sehe cü curuata jija mari. Judio masa, judio masa jieraina, dahra cohtaina, dahra cohtaina jieraina, payu curuari jipanahta cüirota jiriro to pjacu yoaro sehe cü curuata jija mari. Espiritu Santo cüirota jiriro to tuaa mehne bautisarina jija mari. Ñ jina cüiroreta Espiritu Santore cjuaja mari, Cristo ya curua macaina jina.

¹⁴Mari pjacu cü pjacu to jipachuta wamomacari, capari, dahpori, cahmori tí mari pjacui jia payu jira. ¹⁵Mu dahporo durucuri dahporo jiro, õ sehe nibo mühure soro ni duaro: “Wamomaca jieraja yuhu. Ñ jicu pjacu macariro jieraja yuhu”, nibo. Mu dahporo ã niparota pjacu macano jirota nina. ¹⁶Mu cahmono durucuri cahmono jiro õ sehe nibo mühure soro ni duaro: “Capariaca jieraja yuhu. Ñ jicu pjacu macariro jieraja yuhu”, nibo. Mu cahmono ã niparota pjacu macano jirota nina. ¹⁷¿Mari pjacu capariaca dihta jichu dohse tuhobocari mari? Basioeraboa. ¿Ñ jina mari pjacu cahmono dihta jichu dohse wijí tuhobocari mari? Basioeraboa. ¹⁸Tó sehe jierara mari pjacu. Õ sehe jira. Mari pjacui jiare Cohamacu to

cahmano seheta cūri jire mari pjacure. ¹⁹ ¿Mari pjacui jia mariachū dohse wahaboari mari pjacū? ²⁰ Mari pjacū ō seheta jira: Cū pjacū to jipachuta mari pjacui jia payū jira.

²¹ “Mū yoadohochū cahmaeraja”, mū capariaca ni masierara mū wamomacare. Ā jichū, mū dapu mū dahporire “Mū yoadohochū cahmaeraja”, ni masierara. ²² Paye mari pjacui jiare “Wiho jia curea jira”, mari nia sehere pototi cahmaja mari paye mari pjacui jia yūhdoro. ²³ Paye mari pjacui jiare “Soro jira”, mari ni tūhotupanahta tíre mari pjacui jiare noano yoaja. Tuhsū, paye mari pjacui jiare mari buo tiare suhti mehne nūoja mari. ²⁴ Paye mari pjacui jiare nūoeraja mari. Tí pinine ñona, buo tieraja. Ō sehe ji dutiri jire Cohamacū mari pjacure. Mari ñoeraare mari pjacui jiare mari noano ño payoa mehne cjuaja. Āta yoa dutiri jire Cohamacū. ²⁵ Ā jia mari pjacui jia ti basi cahma yoadohora, cū pjacuta to noano jihto sehe. ²⁶ Ā jia mari capari ñano yūhdūchū paye mari pjacui jia cūhū ñano yūhdara. Tuhsū, mari capari noaa wahachū mari pjacui jia cūhū wahcheina masa yoaro seheta noano tūhotura.

²⁷ Ā jicu ō sehe nii nija mū sare: Mūsa sehe Cristo to pjacū yoaro sehe cū curuata jira. Ā jina jipihtina mūsa to pjacui jia yoaro sehe to yaina jira. ²⁸ Ā jiro Jesu yainare mari yoadohohti cjihtire cūri jire Cohamacū marine. Ō sehe cūri jire tiro marine. Cāinare marine buhe dutiro to cū mūhtainare cūri jire tiro. Painare to yare yahuhtinare cūri jire. Painare masare buhehtinare, painare Cohamacū tuaa mehne yoahhtinare, painare dohatininare ti yūhdūchū yoahhtinare, painare masare yoadohohtinare, painare masa pūhtoa jihtinare, painare tūhomahnoeraa dūserire durucuhtinare cūri jire Cohamacū marine. ²⁹ Ā to cūchū jipi-

htina cūno potori to cūrina jieraja mari. Paina Cohamacū yare yahuhtina jierara. Paina Cohamacū buhe dutiro to cūrina jierara. Tuhsū, paina masare buheina jierara. Paina Cohamacū tuaa mehne yoaina jierara. ³⁰ Tuhsū, paina dohatininare yūhdūchū yoaina jierara. Paina sehe tūhomahnoeraa dūserire durucuina jierara. Tuhsū, paina tūhomahnoeraa dūseri durucuare yahu yūhdoina jierara. Ā jiro cāinare mari yoahhtire cūri jire tiro. ³¹ Wiho mejeta Cohamacū yare yoa masi duana noa yūhdūa sehere tuaro cahmaga mūsa. Jipihtia ahri yū niri yūhdoro mūsa cahmahti cjihtire mipure yahuhtija mū sare yūhū.

Painare noano ti cahihtire yahuha Paulo

13 Masa ya dūserire durucu masipanahta, anjoa ya dūserire durucu masipanahta, painare cahīerana yaba cjihti jieraja mari. Mari durucua cūhū yaba cjihti jierara. Painare cahīerana mari durucuna, wiho waro durucuna nija. ² Cohamacū yare noano yahu masipanahta, masa ti masierari cjiirire Cohamacū yare ti buheri cjiri cūhūre masi pahñopanahta, painare cahīerana yaba cjihti jieraja mari. “Ahdū tūcū pa sehēpū wahajaro”, mari nichū, “Potocāta mari siniriro seheta Cohamacū yorohca”, ni mari tūhotuchū āta yorohca. Cohamacūre ā ni tūhotuina jipanahta painare cahīerana, yaba cjihti jieraja mari. ³ Jipihtia mari yare pjacūoinare wapanaha painare mari cahīerachū tí mari wari yaba cjihti jierara. Tuhsū, Cohamacū yare yoana tana mari pjacure mari jū dutipachuta, painare mari cahīerachū marine yaba cjihti jierara.

⁴ Suaeraja painare cahīna. Tinare cahīna noano yoaja tinare. Tuhsū, painare cahīna tinare pahsu tieraja. Mari cahīriro mehne jina “Mū yūhdoro

jiriro jija”, niina jieraja mari. Painare cahīna “Mūsare masi yūhdurūcaja”, ni tūhotueraja mari tinare. ⁵ Ā yoa painare cahīna tinare ño payoro mehne yoaja mari. Painare cahīna “Sā cahmano sehe yoaja. Mūsa cahmano sehe yoaeraja”, nieraja mari. Tuhsū, tinare cahīna suaeraja mari tina mehne. Painare cahīna marine ñano ti yoachū cūhure tina mehne ā suarucueraja mari. ⁶ Painare cahīna ñaare ti yoachū ñuna wahcheraja mari. Noaa sehere quihōno ti yoachū ñuna tuaro wahcheja. ⁷ Painare cahīna ti ya buhiri ñano yūhdūpanahta tinare ā cahīrucuja mari. Painare cahīna paina sehe tinare ti yahuwajachū tūhōpanahta tīre tūho duaeraja mari. Painare cahīna “Tina ñaare yoasi”, ni tūhotuja mari tinare. Painare cahīna ñano yūhdūpanahta tinare cahī duhusi mari.

⁸ Painare cahma cahīa ne pihtisi. Cohamacū yare masa mari yahua sehe baharo pihtia wahaahca. Tūhomahnoeraa dūserire durucua cūhū baharo pihtia wahaahca. Cohamacū yare masa ti buheri cjiri cūhū baharo pihtia wahaahca. Painare cahma cahīa sehe ne pihtisi. ⁹ Mipūre Cohamacū yare mari masi pahño masieraja. Ā jina to yare yahuna mari yahu pahño masieraja. Mari masi pahñohto dūhsasinina mini. ¹⁰ Ā jina Cristo ñaa marieriro to tjua tari baharo mari masi pahñonahca. “Masieraja”, ni namosi.

¹¹ Mari masi pahñohto ō sehe jira: Nijinocā jicu nijinocā yoaro sehe durucumai yūhū. Nijinocā to yoaro sehe tūhoturucumai. Būcūro wahaipū nijinocā to yoariro seheta duhunocai. (Tó seheta mari mipūre “Masi pahñoeraja”, nipanahta baharopūre masi pahñonahca.) ¹² Nóno to noano masū bajueraro seheta mipūre noano masi pahñoerasinija mari. Baharo paire noano mari ñū masino seheta mari masi

pahñonahca. Mipūre mari masi pahñohto marine dūhsasinina mini. Cohamacū marine to noano masi pahñoriro seheta baharo mari cūhū noano masi pahñonahca. ¹³ Ā yoana tiarore mari yoa masija mipūre. Cohamacūre wacū tua masija. Ā yoa marine to yūhdūchū yoahtore masina, mari noano cohta masija. Ā yoa painare cahma cahī masija. Ahri tiaro jira pototi mari yoahiti. Tuhsū, painare cahma cahīna, ahri pūaro yūhdoro yoana nija. Wacū tuua, to yūhdūchū yoahtore cohtaa yūhdoro jira cahma cahīa sehe.

Tūhomahnoeraa dūseri durucuaare yahuha Paulo

14 Ā jina painare cahma cahīina jiga mūsa. Ā yoa Cohamacū yare mūsa noano yoa masihtore cahmaga mūsa. Cohamacū yare mūsa yahuhti pinihtare tuaro cahmaga mūsa. ² Tūhomahnoerari dūserore durucuriro Cohamacū mehne dihta durucura. Ā ni durucuro masa mehne durucuro nierara tiro. To ā ni durucuchū tūhoa masa sehe ne tūho ñahaerara tiore. Masa ti masierare Espīritu Santo to tuua mehne durucuro nina tiro. ³ Cohamacū yare yahuriro sehe masa sehere yahura. Ā yahuro tiro masare yoadohoro nina. Tinare buhero nina tiro. Tuhsū, ti ñano yūhdūchū tiro tinare wahchechū yoara. ⁴ Tūhomahnoerari dūserore durucuriro cūirotā buhera. Painare buherara. Cohamacū yare yahuriro sehe painare Jesu yainare buhero, yoadohora tiro.

⁵ Tūhomahnoeraa dūserire jipihtina mūsa durucuchū noaboa, yū tūhotuchū. Wiho mejeta Cohamacū yare mūsa yahuchū pinihtare tuaro cahmaja. Cohamacū yare yahuriro pinihta tūhomahnoerari dūserore durucuriro yūhdoro painare yoadohora. Ā jipachūta tūhomahnoerari dūserore durucuriro to durucuaare paio to yahu yūhdochū tí sehe

pototi painare yoadohora. To durucuaire yahu yuhdoriro jiro tiro sehe painare Jesu yainare buhero nina. ⁶Tuhomahnoerari duserore musa mehne durucucu pairo musare to yahu yuhdoerachu musare yoadohoeraboca yuhu. A jicu Cohamacu yuhure to yahurire yahucu, to yare yu masiare yahucu, payere to yare yahucu musare yoadohoi nija. Tire musa tuhohoto sehe musare buhecü musare noano yoadohoi nija yuhu.

⁷Tuhomahnoerari duserore durucuriro to durucua ti putipea ti buaputëa yoaro sehe jira. Carisure putina, arpare buaputëna tire mari quihõno yoerachu ti basaare painare masihtõ basioerara. ⁸A yoa cornetare putiriro surara jiro ti cahma wajãhto panore quihõno to putierachu paina surara sehe ti cahma wajãhtore masisi. A jia ti cahma wajãhto pano ti wajãhtire wamoare cahnoyueraina jiahca tina. ⁹Tõ sehetã musa cühure tuhomahnoerari duserore musa durucuchü tuhoa, yahu yuhdoriro mariachü paina tire ne masisi. Ti a masierachü musa durucua yaba cjihti jierara. ¹⁰Ahri yahpai payü duseri durucua jica. A jia ti duserire durucua ti basi ti a durucuaire noano tuhora. ¹¹To ya duserore yu tuhoerachü ñuno tire durucuriro sehe “Pa dihta macariro jira”, ni tuhoturõhca yuhure. A jicu yuhu cühü äta ni tuhoturõhca tire. ¹²Äta jire musa cühü tuhomahnoerari duserore durucua. Espiritu Santo to tuua mehne tuaro yoa duamana musa. To tuua mehne a yoa duana paina Jesu yainare musa buhehti sehere tinare musa yoadohõhti sehere tuaro cahmaga musa.

¹³A jiro tuhomahnoerari duserore durucuriro to durucuaire to noano yahu yuhdohto cjihtore Cohamacure sinijaro tiro. ¹⁴Tuhomahnoerari dusero mehne Cohamacure sinicu Espiritu Santo

mehne sinii nija. A sinicu yu tuhutuare masi namochü yoeraja. ¹⁵Ahrire masina, õ sehe yoanahca mari: Espiritu Santo to tuua mehne tuhomahnoerari dusero mehne Cohamacure sininahca. Tuhsü, pa tehe noano masi tuhutu paina ti noano tuhohoto sehe ti ya durucua mehne Cohamacure sinina, ti cühure sininahca tjoa. Espiritu Santo to tuua mehne tuhomahnoerari dusero mehne Cohamacu yare basanahca. Tuhsü, pa tehe noano masi tuhutu paina ti noano tuhohoto sehe ti ya durucua mehne Cohamacu yare basana, ti cühure basanahca tjoa. ¹⁶Mari a yoerachü tuhomahnoera duseri mehne Espiritu Santo tuua mehne Cohamacure “Noariro, tuariro jira”, mari nipachüta paina ne tuhoerara. A tuhoeraa “Tõihtã jira”, ni masierara. ¹⁷Tuhomahnoera duseri mehne Cohamacure “Noana”, ni masija mari. Mari a nia noaa jipachüta tire yahu yuhdoerana painare buheraja mari. A jina tinare yoadohoeraja mari. ¹⁸Jipihtina musa yuhdoro yuhu sehe tuhomahnoeraa duserire durucuja. A jicu Cohamacu yuhure a durucu masichü to yoachü tire “Noana”, nija yuhu. ¹⁹A durucuriro yu jipachüta Jesu yaina cahmachuina watoi yu jichü, tuhomahnoerari dusero mehne payü duserire yu nipachüta yaba cjihti jierara. Ti yuhdoro masa ti noano tuhohoto sehe mahaa dusericã yu yahupachüta noa nina, yu tuhoturõhca.

²⁰Yu coyëa, macanacã tuho masieraina ti jiro sehe jiena tjiga musa. Wahma masa bajuaina ñaa yoare ti masieraro sehetã jiga musa cühü. Tuhsü, bucuna tuho masiina ti jiro sehe jiga musa. ²¹Cohamacu yare ti joari püi õ sehe nina: “Tuhomahnoeraa duserire durucuaire ahrina masare yu yare yahu dutiiltja. A yoa pa dihta macaina ya durucua mehne yu yare yahu dutiiltja ahrina masare.

Tinare ti ã yahupachuta ahrina yu yahuare tuhosi', nina Cohamacu mari puhtoro", nina Cohamacu yare ti joari pui. ²² Tuhomahnoeraa duserire durucua Jesu yainare Cohamacu tuaare masichu yohti cjihti jierara. Ti durucua Jesure cahmaeraina sehere Cohamacu tuaare masichu yohti cjihti jira. ã yoa Cohamacu yare yahua Jesure cahmaerainare Cohamacu tuaare masichu yohti cjihti jierara. Cohamacu yare yahua Jesu yaina sehere Cohamacu tuaare masichu yohti cjihti jira. ²³ ã yoa jipihtina musa Jesu yaina cahmachuchu tuhomahnoeraa duserire musa durucuchu tire masieraina, paina Jesure cahmaeraina cuhu sa ta tuhoboca. ã tuhoa "Tina tuho masieraina jira", niboca musare tina. ²⁴ Jipihtina musa Cohamacu yare musa yahuchu pinihta tire masierariro, Jesure cahmaerariro sa ta tuhora, to naa yoari buhirire masiboca tiro. ã masino to naa yoarire cahyaboca tiro. ²⁵ ã jiro potocã to jia tiare to tuhotua cuhure masiboca tiro. ã yoaro Cohamacu panoi na tuhcuca caha saro, tirore no payorohca. Tuhsu, "Cohamacu potocãta musa mehne jira", ninohca tiro musare.

Musa cahmachuna noano yoaga dojomehnenno marieno

²⁶ ã jicu yu coyea, musare ahrine nii nija: Musa Jesu yaina cahmachuna caina musa mehne macaina Cohamacu yare basa duara. ã yoa paina musa buhe duara. Tuhsu, paina musa Cohamacu musare to buheri cjirire yahu duara. Paina musa tuhomahnoerari duserore durucu duara. Tuhsu, paina musa ti duseri durucua yahu yuhdo duara. Ti jipihtiare ã yoana musare tuhoina ti noano masihto sehe tire yoaga. ²⁷ ã jina tuhomahnoerari duserore musa durucuna puaro, tiaro topeinata durucuga musa. ã yoana cainata durucuga. Musa ã

durucuchu, cuiro musa mehne macariro musa durucua painare yahu yuhdojaro. ²⁸ Musa durucua yahu yuhdoriro mariachu musa cahmachuna jipihtina musa tuhomahnoeraa duserire durucu duaina durucua tjiga. ã jina masa marienoi Cohamacu mehne durucuga musa. ²⁹ ã yoa Cohamacu yare yahu duana puaro, tiaro topeinata yahuga musa. Musa ã yahuchu paina musare tuhoina musa yahurire Cohamacu ya to jichu noano masijaro. Cohamacu ya to jierachu cuhure noano masijaro. ³⁰ ã yoa Espiritu Santo Cohamacu yare pairore toi dujirirore to yahu ducachu tiro cuhu Jesu yainare yahu duara. ã jiro Cohamacu yare yahu muhtariro sehe dihta mariajaro. ³¹ ã jina jipihtina musa Cohamacu yare yahuna, cainata yahuga musa jipihtina paina ti noano tuhohto sehe, ti noano wahchehto sehe. ³² ã jina Cohamacu yare yahuina jina, noano tuho masi, noano tuhotu dapo, durucuina jiga. ³³ Cohamacu to yaina ti cahmachunopu ti cahma wisiachu cahmaerara tiro. Dojomehnenno marieno ti noano jichu cahmana tiro.

Jipihtiropu Jesu yaina cahmachua, o sehe yoara tina: ³⁴ Ti cahmachunoi numiare masa panoi yahu dutierara. Ti numiare mari sehe durucu dutieraja. Cohamacu to joari pu to niriro sehetu numiare muare noano yuhtia numia jiro cahmana. ã jia cahmachunoi numia durucua tjijaro. ³⁵ Jesu yaina ti cahmachunoi numia ti durucuchu naa nina. ã jiro paye barore masi duaro numino to ya wuhuputa to manunore sinitujaro.

³⁶ Ahri yu yahuhtire noano masiga musa. Cohamacu durucua yahu ducaina jierara musa. Tuhsu, to yare tuhoina musa dihta jierara. Paina cuhu to ya buheare cujara. ³⁷ Musa mehne macariro "Yuhu Cohamacu yare yahuriro jija", ni tuhoturiro jiro ahri musare yu joari cjiiri Cohamacu to dutia jichu masijaro

tiro. Tuhsu, paio “Espíritu Santo to tuaa mehne yoa masija”, ni tūhoturiro jiro tiro cūhū ahri yu joari cjiri Cohamacu to dutia jichū masijaro tiro. ³⁸Tíre to masi duaerachū yu joari cjirire “Potocā jierara”, to nichū tirore duhunocahga. Tuhoena tjiga tirore.

³⁹Á jina yu coyea, Cohamacu yare yahuina musa jiltore tuaro cahmaga musa. Tuhsu, musa mehne macaina musa cahmachunoi tūhomahnoeraa duserire ti durucu duachū ā durucu dutiga tinare. ⁴⁰Á cahmachuna noano, cahma dojomehnenno marieno yoaga musa.

Cristo to masa mǎjarine yahuha Paulo

15 Mipure yu coyea, noaa buheare musare yu yahurire musare wacūchū yoa duaja. Tí buheare noano cahmare musa. Á cahmana tí buheare ā yūhtirucure musa. ²Musa ā cahmachū tíre musa ā yūhtirucuchū Cristo musare pichacapū wahaborinare yūhdūchū yoa tuhsure. Musa ā tūhori baharo Cristo yare musa duhunocachū tí musa tūhori cjiri yaba cjihti jierara.

³Ó sehe ni yahu mūhtaihtja musare. Ahri wiho waro jierara. Musare buhecū yūhure Cristo to yahuri cjirire musare ō sehe ni yahui: Cohamacu yare ti joariro seheta mari űaa buhirire Cristo yariari jire. ⁴Á yoa Cohamacu yare ti joariro seheta Cristo to yariari baharo paina to pjacu cjirore copapure ti duhu payori baharo tia dacho jiboroj tiro masa wijaari jire. ⁵Tiro to ā masa wijaari baharo Pedrore bajuari jire. To ā bajuari baharo to buheinare bajuari jire tjoa. ⁶To ā bajuari baharo cū tahata quiniento bui jiinare to yainare tiro bajuari jire tjoa. Cāina tirore űarina cjiri mipure yariarina cjiri jira. Ti ā jipachuta payu tina mehne macaina cjiri mipure jisninina. ⁷Baharo Cristo Santiagore bajuari jire tjoa. Á to bajuari ba-

haro jipihtina to buhe duti to cūrinare bajuari jire tjoa.

⁸Jipihtina painare to bajuari baharo yūhū cūhure bajuare tjoa. Wihārirocā to quihōri dachoi masa bajuerarirocā to masa bajua nūnū tiriro seheta yūhū cūhū Jesure wacū tua nūnū tiriro jija. Yu ā jiriro jichū ti baharopū bajuare Jesu yūhū cūhure tjoa. Yūhureta tiro bajua batoare jūna. ⁹Panopure Jesu yainare űano yoamai. Á yoariro cjiro jicu paina Jesu to cūrina jipihtina ti docapū waro jija yūhū. Á jicu mipū cūhure Jesu buhe duti to cūboriro jieramaja yūhū, yu tūhotuchū. ¹⁰Á jipaihta Cohamacu yūhure to cahīchū mipure Jesu to cūriro jija yūhū. Á jicu tiro yūhure to cahīchū mipure to cahmaare yoa pahñoja. Á jicu yūhure to cahīchū to yairo ā jinocai nieraja. Jipihtina paina to cūrina yūhdoro yūhū sehe tuaro buhei. Á buhecū yu mū sūro buherahi. Cohamacu yūhure cahīno yūhure yoadohore. ¹¹Yūhū sehe ahri buheare yu buhecū tūhorina jiboca musa. O paina sehere tūhorina jiboca musa. Á jipachuta yūhū, yūhū mehne macaina cūhū cūno potori ahri buheare buheja sā jipihtina Jesu to cūrina. Á sā buhecū tūhona musa sehe ahri buheare noano tūhore.

Yariarina cjiri ti masa mǎjarine yahuha Paulo

¹²Cristo to yariari baharo to masa mǎjarine sā buhepachuta “Yariarina cjiri ne masa mǎjaerara”, nina musa mehne macaina cāina. ¿Dohse jiro baro ā nijari tina tíre? ¹³Á jiro yariarina cjiri ti masa mǎjaerachū Cristo cūhū ne masa mǎjaeraboa. ¹⁴Á yoa Cristo to masa mǎjaerachū noaa buheare sā yahuri cjiri ne yaba cjihti jieraboa. To masa mǎjaerachū tirore musa wacū tuaa cūhū yaba cjihti jieraboa. ¹⁵Masa mǎjano mariachū sā sehe Cohamacu yare mahñoona nibo. Yariarina cjiri ti masa mǎjaerachū Cohamacu sehe Cristore masa mǎ-

jachũ yoaeraboa. To ã yoaerachũ “Cohamacũ Cristore masa mũjachũ yoari jire”, sã nina mahñoina jiboa sã. ¹⁶ Yariarina cjirire Cohamacũ masoeraro, Cristo cũhũre tiro masoeraboa. ¹⁷ Æ jiro Cristo to masa mũjaerachũ tirore masa wacũ tuaa yaba cjihti jieraboa. Æ yoa mũa ñaa yoari buhiri buhiri tiina jisniniboa mũa. ¹⁸ Masa mũjano mariachũ Cristo yaina cjiri yaria muhtaina cjiri pichapapũ waha tuhsũboa. ¹⁹ Cristore mari wacũ tuari baharo mari yariana masa mũja masierana jipihtina paina masa yuhdoro pjacũoina jiboa mari sehe.

²⁰ Potocãta Cohamacũ Cristore masa mũjachũ yoari jire. Cristo to masa mũjari baharo mari cũhũ yarianapũ masa mũjahtina tjija. Tiro ã masa mũjano, marine suho masa mũja muhtararo jira. ²¹ Õ sehetã jira ahri: Adão mehne masa yaria dũcaha. Tó sehe Jesu mehne yariarina cjiri masa mũjaahca. ²² Adão yaina ji nũnũ tiinapũ mari jipihtina yarianahca. Tó sehetã Cristo yaina mari jichũ mari yariari baharo marine masa mũjachũ yoarohca Cohamacũ. ²³ Cãa curuari Cohamacũ to quilhõiro mũ suchũ masa mũjaahca. Cristo marine suho ji muhtararo masa mũja muhtari jire. Baharo tiro ahri yahpapũ to tjua tachũ mari to yaina cũhũ masa mũjanahca. ²⁴ Tí pjata pihtiri dacho jirohca. Æ jiro jipihtina ñaina puhtoare, dutiinare, tuinare cohãno Cristo yuhdũrucarohca. To ã yoari baharo jipihtina bui to puhtoro to jirire Cristo wiarohca Cohamacũ to Pũcũrore. ²⁵ To wiahto pano to Pũcũro Cristore ñũ tuhtiinare to yuhdũrucã pahñohto pano Cristo pinihta jipihtina bui puhtoro jirohca. Æ jiroto jiro cahmare tirore. ²⁶ Tirore ñũ tuhtiinare to yuhdũrucari baharo, yariaro cũhũre cohã batoarohca tiro. Yariaro pihtia waharohca. Pari turi yariasi masa. ²⁷ Jipihtina bui dutihtiro cjihtore cũri jire Cohamacũ Cristore. Jipihtia pũro cũhũre cũri jire tirore. Æta

nina Cohamacũ yare ti joari pũi. Cohamacũ sehe tirore cũriro jira. Æ jiro “Jipihtina bui dutihtiro cjihtore cũri jire tirore” nino, “Cohamacũ bui dutihtiro jira tiro”, nino nierari jire to yare ti joari pũi. ²⁸ Jipihtina bui dutihtiro Cristo Cohamacũ macũno to jichũ Cohamacũ tirore cũriro sehe to macũno bui dutihtiro jirohca. Æ jiro Cohamacũ sehe jipihtina bui puhtoro waro jira. Jipihtia pũro cũhũ jira.

²⁹ ¿Masa mũjano mariapachũta dohse yoa paina masa yariarina cjiri ya cjihtire ti bautisarina jijari? Yariarina cjiri masa mũjaerachũ ti ya cjihtire paina bautisarina ti jichũ tí yaba cjihti jieraboa.

³⁰ Sã sehere sã buheri buhiri dachoripe paina sãre ti ñano yoa duachũ cua nina sã cũhũre. Sãre ã cuapachũta masa mũjano to jichũ masina ã buherucuja sã. ³¹ Yũ coyeyã, mari puhtoro Jesu-cristo yaina masa jichũ tirore wacũ tua namoina mũa wahachũ yũhũ sehe tuaro wahche tuhotuja musare. Tí potocãta jira. Æ yoa, “Dohse jiri nũmũ yũhũre yariahto cua nina”, yũ nichũ tí cũhũ potocãta jira. ³² Efeso macaina suaina noaa buheare yũ buheri buhiri yũhũre tuhti, cjãhre. Masa mũjano mariachũ Jesu yairo yũ jierachũ, yũ ã ñano yuhdũri yaba cjihti jieraboa. Wiho waro ñano yuhdũri niboã yũhũ. Yariarina cjiri ti masa mũjaerachũ õ sehe niboã mari: “Baharo curero yarianahca. Dohse wahasã mari. Æ jina chu sihnijihna. Mari mũ suro yoajihna”, niboã mari.

³³ Mahñoare tuhotuena tjiga mũa. “Ñainare piti tina, noaa mũa yoaa tiare duhunahca mũa”, nina masa. Tí potocãta jira. ³⁴ Noaare tuhotuina jiga mũa. Tuhsũ, noaare yoaina jiga tjõa. Æ yoa ñaare yoa namoena tjiga tjõa. Cãina mũa mehne macaina sehe ne Cohamacũre masierara. Mũa bũo tihto sehe musare ã nija.

**Yariarina cjiri masa mujaina ti
pjacuri cjihtire yahu namoha Paulo**

³⁵ Ñ yoa musa mehne macariro ò sehe ni sinituboca yuhure: “¿Dohse yoa yariarina cjiri masa mũaahcari? ¿Dohse jia pjacuri masa mũaahcari?” ni sinituboca. ³⁶ Ñ sinituriro tuho masierariro seheta bisiro coa tara. Toari yapare mari toari baharo tí yapa baro cahachu waro dura. Tó sehe wahaeraro ne dusi. Tíre masina musa. ³⁷ Bucu yucurure toaeraja mari. Pja yapari dihtare toaja mari. Tí yapari trigo yapari jia ji, o paye yapari baro jia jiboca. ³⁸ Tí yaparire mari toari baharo Cohamacu to cahmariro seheta tí yaparire bucua mujachu yoara. Ñ yoaro mostaza yaparire mostaza yucu wahachu yoara tiro. Trigo yaparire trigo yucu wahachu yoara. Áta du dutira Cohamacu. ³⁹ Jipihtina pjacuri cño potori bajuerara. Masa pjacuri sehe cño sehe jira. Wahiquina pjacuri cñu soro sehe bajura. Minichahca pjacuri cñu soro sehe bajura. Wahi cñu soro sehe pjacuri tira.

⁴⁰ Ñ yoa mũaano macaa poca cñu soro sehe bajura. Tuhsu, ahri yahpa macaina cñu pjacu tira. Á yoa mũaano macaina pjacuri soro sehe bajura. Ñ jia ahri yahpa macaa mũaano macaa yoaro sehe jierara. ⁴¹ Ñ seheta jira. Sũ dacho macariro si sitera. Ñ yoa ñami macariro cñu soro jira. Potota buhriara. Tuhsu, ñahpichoha poca cñu soro sehe bajua si sitea cjuara. Ñahpichoha poca peri cñure mari ñuchu cãa poca pjiroca sia poca bajura. Ñ yoa paye poca tuaro sia poca bajura. ⁴² Tó seheta jira yariarina cjiri ti masa mujachu. Masũno to pjacure mari yari baharo to pjacu baa waharohca. Baharo pa pjacu soro jiri pjacu jipihtia dachoripe catihti pjacu masa mujanohca. ⁴³ To pjacure mari yachu yariariro cjiro pjacu nina. Cohamacu tirore to masochu to pjacu noa yuhduari

pjacu jira. Tuhsu, to pjacu mari yari pjacu wiho jiri pjacu jira. Cohamacu tirore to masochu pinihtare to pjacu wiho jiri pjacu jieraro, tua yuhduara. ⁴⁴ Ahri yahpa macari pjacure mari yachu tiro yariariro cjiro to masa mujachu to pjacu mũaano macari pjacu jirohca. Ahri yahpa macari pjacure mari cjuana, mũaano macari pjacu cñure cjuanahca, masa mujana.

⁴⁵ Ñ sehe ni yahura Cohamacu yare ti joari pũi: “Ahri yahpai ji muhtariro Adão wama tirore catiriro wahaa tiha”, ni joaa tiha. To ñ jipachuta Adão yoaro sehe jiri bato tirore Cristo sehe catiare waro tari jire. ⁴⁶ Ahri yahpa macari pjacu ji muhtari pjacu jira. Baharopũ mũaano macari pjacu jirohca. ⁴⁷ Ñ seheta jira: Ji muhtariro Adão sehe ahri yahpa macariro dihta mehne to yoari pjacure pjacu tiri jire. To baharo tariro, Cristo sehe mũaanopũ tari jire. ⁴⁸ Dihta mehne ti yoari pjacu ti muhtariro to jiriro seheta jipihtina paina dihta mehne to yoari pjacu tiina jija mari. Á yoa mũaanopũ tariro yoaro seheta to yaina jipihtina to yoaro sehe pjacu tiina jinahca mari. ⁴⁹ Dihta mehne to yoari pjacu tirore Adão yoaro sehe bajuja mari. Baharo mũaano macariro Cristo yoaro sehe bajunahca mari.

⁵⁰ Yũ coyea, musare ahrire yahu duaja: Ahri yahpa macari pjacu di mehne, dihi mehne jiri pjacu puhtoro Cohamacu to suho jiropure mũaanopure ne wahasi. Mari pjacuri baahiti pjacuri jira. Ñ jia mũaanopũ jipihtia dachoripe mari jih-topure ahri pjacuri wahasi. ⁵¹ Panopure masa ti masierari cjiirire mipure musare yahu duaja: Mari mehne macaina cãina yariasi. Ñ jina dóicãta, mari pjacurire cohtotaina jinahca. ⁵² Corneta to puti batoari dachoi ñta waharohca marine. Dóicãta, mari capari wihmitjiã mari ñũ pjõorocaró sehe ò sehe waharohca. Corneta to bisiri baharo yariarina

cjirire Cohamacu masonohca jipiltia dachoripe mari jiltina cjihtire. Tuhsu, mari pjacurire cohtotaina jinahca mari cūhu. ⁵³Mari pjacurire to cohtotachu tó pano mari bahti pjacuri ti jipachuta mari cohtotari baharo ne baasi. Ā yoa mari pjacuri ti cohtotachu tó pano mari yariahti pjacuri ti jipachuta ne yariasi. ⁵⁴Mari bahti pjacuri ne baerahti pjacurire cohtotarohca. Ā yoa mari yariahti pjacuri ā jiruochti pjacurire cohtotarohca. Marine to ā cohtotachu panopu to joairo seheta ā waharohca: “Naina mari jiri buhiri tiare Cristo to cohā pahñori baharo, Cohamacu yariarore cohānocari jire. ⁵⁵Ne pari turi mari yariasi. Ā jina yariaro mehne pari turi nāno yūhdusi mari”, ni joaa tiri jire panopure. ⁵⁶Mari nāa buhiri jichu pinihta yariaropu nāno yūhdunahca. Ā yoa Cohamacu dutia Moise cjirore to cūri cjirire mari masiri baharo, buhiri tija mari. Ā jiro marine pichacapu waha dutira Cohamacu dutia. ⁵⁷To ā dutipachuta mari puhtoro Jesucristo sehe marine pichacapu wahaerachu yoara. To ā yoairo jichu masina Cohamacu mehne wahche “Noana”, nija mari.

⁵⁸Ā jina yu coyey, yu cahīina, Cristore wacū tua duhuena tjiga. Ā yoana paina musare noaa buheare ti cohā dutichu, ne cohāena tjiga tīre. Ā yoa dachoripe mari puhtoro Jesucristo to yoa dutirire noano yoarucuga musa. Mari puhtoro Jesucristo yare mari yoachu, ahri wiho waro jierara. Ahrire masina to yoa dutirire noano yoarucuga musa.

Painare Jesu yainare Corinto macaina niñeru ti wahtire yahuha Paulo

16 Mipure painare Jesu yainare musa niñeru wahtire yahu duaja musare. Galacia yahpa macainare Jesu yainare yu dutiro sehetā musa cūhu yoaga. ²Somanaripe domingo jichu jipiltina musa Jesu yainare

wahti cjihti niñerure mahanocā waga. Mahanocā cjuana mahanocā waga. Ā yoa pji curero cjuana pji curero waga. Somanaripe musa ā yoachu musa cahapu yu suchu musa warochahti cjihti niñeru ji tuhsurohca. ³Musa wahtire, musa warochahtina cūhure yahuri pure joaihtja. Ā jicu musa cahapu sucu tī pure Jerusalēpu wahahtinare musa beserinare waittja. Ā wa tuhsucu Jesu yainare musa warocari niñerure nahtina cjihtire tinare warocaihtja Jerusalēpu. ⁴Tī macapure yu yohti jichu yūhu cūhu wahaihca. Yu ā wahachu yūhu mehnetā tina wahaahca.

To tinihto cjihtore yahuha Paulo

⁵Macedonia yahpa macainare masa boca yūhdūihca yūhu tinare. Yūhdū wahcā, musa cahai Corintopu suihsca. ⁶Tópu sucu musa mehne mahaa dachoricā jiboca yūhu pa tehe nicu. Yoa cureri pja puhiro puro musa mehne jiboca yūhu. Ā jina pa sehēpu yu wahachu musa cūhu yūhure yoadohoroca masina. ⁷Mahaa nūmūricā ji duaeraja yūhu musa mehne. Ā jicu Cohamacu cahmachu yoa cureri pja musa mehne jiihtja yūhu. ⁸Ā ji duapaihta Pentecoste bose nūmūri jichupu Efesoi jisinihca yūhu. ⁹Ōi Efesoi mipure mari puhtoro Jesu yare tūho duaina payu jira. Ti ā tūho duachu tinare yahuja. Yu ā yahuchu yūhure nū yabiina payu jira.

¹⁰Timoteo yu yoaro sehetā mari puhtoro yare yoara. To ā yoairo jichu musa cahapu to suchu noano mehne tirore piti boca, tiro mehne noano wahchea mehne jiga musa. ¹¹Ā yoana tirore nū yabiro marieno noano mehne piti bocaga musa. Tuhsu, to coha sitichu noano mehne tirore yoadohorocaga yu cahapu to tjua tachu. Tiro paina Jesu yaina mehne ti tahtore cohtana nija sā. Ā jina noano mehne yoadohorocaga tinare.

¹²Apolo mari coyeiro Jesu yairo musare to ñuno wahachũ tuaro cahmamahi. Ā jicũ tirore waha dutimahi paina Jesu yaina mehne to wahahto cjih-tore. Yũ ā waha dutipachuta mipure tiro waha duaerare. Ā jiro baharo tirore yoaa mariachũ musa cahapũ waharohca tiro.

Paulo noa duti batoaha

¹³Noano wacũ masiga musa. Cristore wacũ tua duhuena tjiga musa. Ne cuieraina jirucuga musa. Ā yoaa Cohamacũ tuua mehne wacũ tuaina jirucuga musa. ¹⁴Dohse jiare musa yoana, painare cahĩa mehne tíre yoaga musa.

¹⁵Mipure yũ coyea musare ahrire yahu duaja: Estéfana ya wũhũ macaina Acaya yahpa macaina noaa buheare tuho muhtaina, ti ya yahpai Cristore wacũ tua muhtaina jire tina sehe. Tuhsũ, painare mari coyeare Jesu yainare noano yoadohorucure tina. Tíre musa masina. ¹⁶Tina yoaro sehe jiiinare, paina Cristo yare yoadohoinare musa noano yũhtichũ cahmaja yũhũ. ¹⁷Estéfana, Fortunato, Acaico cũhũ yũ cahapũ wihi tuhsuhre. Ōi ti jichũ pjíro mehne wahcheja yũhũ. Musa mariachũ

musare tuaro wacũi nimahi yũhũ. Ā jicũ tina ti wihichũ wahcheja yũhũ. ¹⁸Tina mehne jicũ noano yajeripohna tiriro wahahi yũhũ musa cũhũ tina mehne musa wahcheriro sehetã. Tinare noano ño payoa mehne tuhoga musa. Ā yoaa paina tina yoaro sehe jiina cũhure ño payoa mehne tuhoga.

¹⁹Asia yahpa macaina Jesu yaina musare noa dutira. Ā yoaa Aquila, Priscila, ti ya wũhũ cahmachuina mehne Cristo to cahĩa mehne musare pjíro noa dutira. ²⁰Ō macaina Jesu yaina jipihtina musare noa dutira. Musa mehne macainare noano mehne piti bocasinia.

²¹Yũhũ, Paulo yũ basi ahri dihtare joaja. Musare noa dutija.

²²Mari puhtoro Jesucristore paio to cahĩerachũ, Cohamacũ tirore buhiri dahrejaro. Mari puhtoro cjero tjua tajaro.

²³Yũ coyea mari puhtoro Jesucristo musare jipihtinare to cahĩa mehne noano yoajaro. ²⁴Yũhũ Jesucristo yairo jicũ, to yaina musa cũhũ musa jichũ musare tuaro cahĩja.

2 Corintios

Õ sehe ni joarocaha Paulo Corinto macainare

1 Yuhũ Paulo Jesucristo buhe du-tiro to cūriro jija. Cohamacũ to cahmariro seheta cūre yuhũre Jesu. Yuhũ, mari coyeyro Jesu yairo Timoteo mehne musare Cohamacũ yainare, Corinto macainare joarocaja tjoa. Jipihtina Cohamacũ yainare Acaya macainare mũa cūhũre joarocaja. ²Ã jina Cohamacũ mari Pũcũ, mari puhtoro Jesucristo mehne musare noa dutija. Cohamacũ to cahĩa mehne to yoadohoa mehne noano jiga mũa.

Paulo to ñano yuhũdũre õ sehe ni yahuha

³Mari puhtoro Jesucristo Pũcũro Cohamacũ marine pja ñũana. Ã jiro tiro marine ã yoadohorucura. “Noa yuhũdũriro jira tiro”, nijihna mari. ⁴Mari ñano yuhũdũchũ ñũano jipihtinare marine to yainare yoadohora tiro painare mari yoadohohto sehe. Cohamacũ marine to yoadohoa mehne mari cūhũ paina cūhũre yoadohonahca. ⁵Cristo yaina mari jiri buhiri mari ñano yuhũdũchũ tiro tuaro yoadohorohca marine. ⁶Sã sehe musare yoadohona ñano yuhũdũja. Cristo mehne mũa yuhũduhto sehe musare sã yahuri buhiri ñano yuhũdũja. Ã yoa Cristo sãre to yoadohochũ sã sehe mũa cūhũre yoadoho masija. Ã jina sã ñano yuhũdũriro seheta mũa cūhũ ñano yuhũdũna, noano mehne cūno pjanahca mũa. ⁷Noano mehne mũa cūno pjah-tore sã masija. Sã ñano yuhũdũriro seheta ñano yuhũdũre mũa cūhũ. Ã jina Cohamacũ to yoadohoa mehne wahche, sã cūno pjariro seheta mũa cūhũ wahchena, cūno pjanahca.

⁸Sã coyey, mipũre ahri yũ yahuhtire mũa noano masichũ sã cahmaja. Asia yahpai ñabiario yuhũdũi sã. Õ sehe ni tuhotumai sã: “Ne bihosi mari. Ne cūno pjasi. Ã jina mari yarianahca”, ni tuhotumai sã. ⁹“Marine wajãnocaaahca”, ni tuhotumai sã. Ã ñano yuhũdũna Cohamacũ dihtare tuaro sã wacũ tua namoi. Sãre ti ñano yoachũ cahmaha Cohamacũ tirore sã wacũ tua namohto sehe. Tiro sehe yariainare masoriro jira. Ã tirore wacũ tuana sã mũ sũro sã cūno pjaerarire masija. Cohamacũ sehe marine yoadohora. ¹⁰⁻¹¹Sãre cuabiaro jipachũta to yoadohoro mehne sã yuhũdũi. Baharopũ cūhũre pari turi sãre yuhũdoro-hca. Sãre Cohamacũre mũa sini payochũ tiro sãre yoadohorohca. Sãre to yoadohohtore masija sã. Ã jina sãre to yoadohochũ ñũana, tirore “Noana”, ni-nahca mũa. Payũ mũa sini payorire to yuhũtichũ ñũana wahche, “Noana”, ni-nahca mũa Cohamacũre. Payũ paina cūhũ ãta niahca.

Paulo Corintopũ to waha duamarire yahuha

¹²Mũa mehne sã jirire wacũna wahchea mehne õ sehe tuhotuja sã: Ahri yahpai Cohamacũ to yoadohoa mehne mahũono marieno noano mehne masare piti ti buhehi. Mũa pinihtare noano piti ti buhei. Õ sehe yoana sã mũ sũro sã masia mehne yoerahi. Cohamacũ cahĩa mehne to tuua mehne ã yoahi. ¹³⁻¹⁴Ã yoana noano yahu joarocahi musare, noano mũa masihtõ sehe. Mipũ sãre mũa masi pahũohto dũhsasinina mini. Sã jia tiare mũa noano masichũ tuaro cahmaja sã. Ã sãre noano masina, mari puhtoro Jesu to tjua tachũ sã mehne wahchenahca mũa. Mũa mehne sã wahcheriro seheta mũa cūhũ sã mehne wahchenahca.

¹⁵⁻¹⁶Õ sehe nicũ Macedonia yahpapũ waha duamaja yuhũ. Ã wahacũ musare

ñu yuhdu wahcã duamaja yuhu. Ñ jicu tópure suricu tjua tacu pari turi musa mehne mahaa nãmuricã jiboca yuhu. Ñ jina pua taha musa mehne yu jichu ñuna pjíro yuhu mehne musa wahcheboca. Baharo musa cahapu jiricu Judea yahparu yu wahachu ñuna yuhure yoadohoboca musa. ¹⁷“Wahaihtja”, yu nichu tuhorigina jina musa cahapu yu suerachu ñuna “Paulo mahñono niri jira”, ¿ni tuhoutjari musa? “Wahaihtja”, nicu yu mu suro ã nicu nieraja yuhu. “To niriro seheta yoerara”, ¿yuhure ni tuhoutjari musa? ¹⁸Ñ sehe ni mahñoriro jieramaja yuhu. Ñ jicu “Yoaihtja”, nicu yu niriro seheta yoaja yuhu. Tíre masina Cohamacu. ¹⁹Yuhu, Sila, Timoteo mehne Jesucristo Cohamacu macno yare musare yahui sã. Cristo sehe “Yoaihtja” nino, quihõno yoariro jiro nina. Cohamacu to niriro seheta Cristo yoara. ²⁰Jipihtiare Cohamacu to yahurire Cristo yoa pahñoa. To ã yoariro jichu ñuna Jesu yoadohoro mehne to yare sã painare “Á tjira”, ni yahuja Cohamacure ti ño payohto sehe. ²¹Cristo yaina marine jirucuchu yoariro Cohamacuta jira. Á jiro to yare yahuhtinare sãre besere tiro. ²²Á yoa to yaina mari jiare ñuno tíre marine masichu yoara tiro. Á yoaro, Espíritu Santore mari mehne ji dutire tiro. Mari mehne jiro tirota marine Cohamacu to yuhdohtore masichu yoara.

²³Mipure poto yahuihtja musare. Poto yu yahuerachu Cohamacu sehe musare poto yahujaro. Tirota yu tuhoutjare masina. Musare tuhti duaeracu musa cahapu wahaerahi. “Musare cahyachu yoari”, nicu musa cahapure Corintopu wahaerahi. ²⁴Ñ jina “Musare wacũ tua dutiina jija sã”, nina nieraja. Cristore noano wacũ tua tuhsure musa. Ñ jina “Ñ sehe Cristore wacũ tuaro cahmana musare”, nina nieraja sã. Musare yoad-

oho duaja sã musa noano wahchehto sehe.

2 Ñ jicu ò sehe ni tuhoutuhi: “Pari turi tinare cahyachu yoa duaeraja. Ñ jicu mipure wahaeraja”, ni tuhoutuhi. ²Musare cahyachu yoa duaeraja. Musa cahyachu ñucu yuhu sehe musare wahcheraboa. Ñ jina yuhure wahchechu yoahntina jieraboa musa sehe. ³Ñ jicu musa cahapu wahaerahi. Wiho mejeta musare wiho joaroca bahrañoa. Musa yuhure wahchechu yoahntina jipanahta yuhure cahyachu yoaboa musa, musa cahapu yu suchu. Musa mehne yu wahchechu, musa cãhu wahchenahca. Tíre masija yuhu. Ñ jicu mipure musa mehne cahya duaeracu wahaerahi musa cahapu. ⁴Pjíro tuhoutucu, ñano yajeripohna ticu, tuaro yahco mehne musare joarocapacuta musare cahyachu yoa duaerahi. Musare tuaro yu cahĩrre musare masichu yoa duacu musare joarocahi.

Tina mehne macariro to ñano yoarire bo dutiha Paulo Jesu yainare

⁵Cãiro musa mehne macariro yuhure cahyachu yoariro jire. Wiho mejeta musare to tuaro cahyachu yoariro seheta yuhu sehene pjíro cahyachu yoerare tiro. Á ñano yoariro cãina musa sehene tua curero cahyachu yoayuhti. “Tua curero”, nija yuhdo curero yahu duaeracu. ⁶Payu musa mehne macaina tirore buhiri dahre tuhsuyuhti. Tó purota buhiri dahre duhuro cahmana tirore. ⁷Tirore musa buhiri dahrerucuchu tuaro cahyaboca tiro. Ñ jiro Cristo yare duhuboca. Ñ jina to ñaa yoarire boga musa. Tirore yoadohoga to wahchehto sehe. ⁸Tuhsu, tirore noano yoaga musa tirore musa cahĩrre to masihtu sehe. Musa ã yoachu tuaro cahmaja yuhu. ⁹Tó pano musare joarocacu “¿Potocãta yuhure yuhtiahcari?” nicu ã ni yahu joarocahi

m̄sare. Yuh̄ure m̄sa yuh̄tich̄u ñu duacu m̄sare ã ni joarocahi. ¹⁰Mip̄ure to ñaa yoarire m̄sa bochū ñuc̄u yuh̄u c̄uh̄u tíre boihtja. Yuh̄ure ñano yoareri jire tiro. M̄sa sehere ñano yoayuhti. To ã jiro jipach̄uta to ñaa yoarire boja yuh̄u c̄uh̄u. M̄sare noano yoadoho duacu Cristo to ñurocaroi to ñaa yoarire boja. ¹¹Tíre boja Satana marine to yuh̄dur̄ucaeraho sehe. Tiro marine ñaare yoach̄u cahmana. Tíre noano masija mari. Æ jina Jesu yaina ti ñaa yoarire wac̄urucueraja mari, “Tinapu Satana yare cahmari”, nina.

Tróade wama tiri macai jiro Titore bocaeraro pjíro cahya tuh̄otuha Paulo

¹²Æ yoa Tróade wama tiri macapu sui Cristo yare buhe duacu. Tópu yū jich̄u payū masa noaa buheare tuh̄o duaina jire. Mari puhtoro to yoadohoa mehne to yare yū buhehtina payū masa jire. ¹³Æ jipach̄uta mari coyeirore Titore bocaeracu pjíro cahya tuh̄otui. Æ jicū tó macainare coha siti tuhsucū Macedonia yahpapū wahai.

Cristo to yoadohoa mehne ñaare yoarucueraja mari

¹⁴Æ yoa Cohamacu Satanare to yuh̄dur̄ucari baharo mari c̄uh̄ure tirore yuh̄dur̄ucach̄u yoara, Cristo mehne ñaa yoare marine duhuch̄u yoaro. Surara mahapū pari pohna wahaga ti yuh̄dur̄ucarire ti yoa ñono seheta mari c̄uh̄u Cohamacu mehne Satanare mari yuh̄dur̄ucarire yoa ñona nija Cohamacu mehne. Æ jina “Noana”, nija tirore. Æ jina Cohamacu marine to dutich̄u masina jipihtiropū Cristore masare masich̄u yoaja mari. Æ tirore masia tina noano wahchera me sitiare ti wahcheriro seheta. ¹⁵Cristo yaina jina, Cohamacu sehere wahchecū yoaja mari, me sitiare mari wahcheriro seheta. Æ jia Cristo yaina mari jia

tiare ñu masina paina Cohamacu to yuh̄dohtina. Paina ti ñaa buhiri pichacapū wahahtina c̄uh̄u Cristo yaina mari jia tiare ñu masina. ¹⁶Cristo yaina mari jich̄u ñua, ti ñaa buhiri pichacapū wahahtina sehe pichacapū ti wahahtore masina. Cohamacu to yuh̄dohtina sehe marine Jesu yainare ñua jipihtia dachoripe tiro mehne ti jilhtore masina. Æ jia Cristo ya wiho jia buhea jierara. Æ jiro ahrire Cristo yare to mū s̄uro buhe sohtori tiriro ne mariaha. ¹⁷Payū paina Cohamacu yare buhemana niñerure wapata duaa. Sã sehe tina yoaro sehe yoarera. Mah̄ño no marieno Cristo to tuaa mehne to yare buheja sã. Cohamacu sãre to c̄uh̄u to ñurocaroi noano buheja sã.

3 ¿Pari turi sã jia tiare m̄sare yahuna nijari sã, m̄sa tuh̄otuch̄u? Paina m̄sare ti buhehto pano ti jia tiare masi duana ti joari p̄ure cahma muhtare m̄sa. Sãre masi tuhsura m̄sa. ¿Sãre masipanahta tí p̄u barore cahmajari m̄sa? ¿O paina cahapū sã buhena wahana tí p̄u barore sãre nano cahmajari, m̄sa tuh̄otuch̄u? ²Tí p̄u barore cahmaeraja sã. M̄sa sehere jipihtina paina ñua m̄sare sã noano buherire masiaha. M̄sare sã buhechū Cristo yaina ji ducare m̄sa. ³Æ jina tí p̄u baro yoaro sehe jira m̄sa sehe. Cristo painare to joarocari p̄u yoaro sehe jira m̄sa. Tí p̄ure tiro to joarocaboro seheta, Esp̄ritu Santo tuaa mehne m̄sa jia tiare noano cohtotach̄u yoari jire Cristo, painare to tuaare ñono taro. Potota tinta mehne to joarocari p̄u yoaro sehe jierara m̄sa. Cohamacu catiriro waro to Esp̄ritu Santo mehne m̄sare cohtotach̄u yoaro, joarocari p̄u painare to joaroca ñono seheta, m̄sa sehe Cristo yaina wahana, to yare m̄sare sã quih̄ono buherire noano ñona painare. ⁴Ahrire jipihtiare michapucacã yū ni joarire tuh̄otuja sã Cohamacure noano wac̄u tuana. Cristo to yoadohoa

mehne ã wacũ tuarucuja sã. ⁵“Sã mu sũro ahri dahraare yoaja sã”, ni masieraja sã. Cohamacu to yoadohoa mehne bihoja sã.

⁶Mipure to yahuare noaa buheare Cohamacu sehe noano sãre buhe masichu yoara. Ahri buhea panopu to dutia to joari cjiri yoaro sehe jierara. Noaa buhea sehere buheja sã. Panopu to dutirire mari mu sũro ne bihoeraja. ã mari bihoerari buhiri pichacapu wahaboa mari. Noaa buhea sehere tuhona Espiritu Santo to yoadohoa mehne Cristore wacũ tuaja. ã wacũ tuana jipihitia dachoripe Cohamacu mehne jirucunahca mari.

⁷Cohamacu to dutiare cũno tãa pjĩnipu joa õ tuhsu, Moise cjirore cũri jire. To ã cũri baharo to si sitea bajuari jire. Moise cjiro wuhduu si siteri jire. Minoa yuhduari jire. Baharo tí si sitea pihtia wahari jire. Baharo to si sitea to pihtia wahahto to jipachuta wahmanore to wuhduare masa ne ñuroca õa bihoerari jire. Tí dutiare masa ti yoa pahnoerari buhiri pichacapu wahahtina jia tiri jire. ã jia tí dutia masare pichacapu waha dutipahta, tuaro si sitea mehne ji ducari jire tí dutia. ⁸Tí dutia yuhdoro noaa buhea sehe noa yuhduara. Ahri buheare painare mari buhechu ti noano tuhochu Espiritu Santo tina mehne jirohca. ã jia panopu macaa dutia yuhdoro Cristo ya sehe noa yuhduara. ⁹Cohamacu dutia panopu macaa masare pichacapu waha dutiri jire. ã dutipahta Cohamacu tuaa mehne to si sitea mehne ji ducari jire. Tí yuhdoro noaa buhea sehe Cohamacu to tuaa mehne jira. Tí buhea mehne noaina wahara masa Cohamacu to ñuchu. ¹⁰Panopu Cohamacu to dutiri cjiri sehe wiho jia dutia yoaro sehe tjuanocahna mipure noaa buhea mehne mari ñu piti bocachu. Noaa buhea sehe noa yuhduara. ¹¹Panopure to

dutia yoa cureri pja si sitea jirucuma, pihtia wahaha. Tí dutia yuhdoro noaa buhea sehe noa yuhduara. Tí buheare noano tuhona, Cohamacu mehne ã jirucunahca.

¹²⁻¹³Mari ã jirucutore masina, cuiro marieno noaa buheare noano yahu pahnoocaja sã. Moise cjiro sehe sã yoaro sehe yoerari jire. “Cohamacu to si sitea pihtiro nina’, Israe masa ni ñuri”, nino to wuhduare ducataro jire Moise cjiro. Sã sehe tiro yoaro sehe yoeraja. Cuiro marieno, ducataro marieno to yare noaa buheare buheja sã. ¹⁴Tí pjavu macaina Israe masa sehe ne masiera tiri jire. Mipu cũhure Cohamacu yare panopu to joaa pũrine tina buhea, ne masierara. Moise cjiro to wuhduare to ducatachu Cohamacu to si siteare ti ñuroca õerariro seheta tina noaa buheare noano masierara. Cristore cahmaeraa, masisi tina. Tirore noano wacũ tuaa, tí pja pinihta to yare masiahca. ¹⁵Mipu cũhure Israe masa Cohamacu dutia Moise cjirore to cũrire buhea, tinare ducataro seheta noaa buheare ti tuhoborore ducataro. ¹⁶Mari sehe mari puhtoro mari cahmachu tirota marine masichu yoara. Moise cjiro to wuhduu ducatarore to nanocaboriro seheta mari puhtoro marine to yare noano masichu yoara. ¹⁷“Mari puhtoro” nicu, Espiritu Santore nii nija. Cohamacu to Espiritu Santo mari mehne to jichu pichacapu wahaborinare to yuhdoina jija. ã jina “Panopu macaa dutia mehne mari yuhdunahca”, nieraja mari. ã jina tí dutiare duhuna, Espiritu Santo to cahmano seheta yoaja mari. ¹⁸ã jina Jesu yaina jina, Cohamacu yahuare masija mari. Ti wuhduu pocare ducataro marieina yoaro seheta Cristo to tuaare ñona nija mari. ã jiro mari puhtoro Espiritu Santo marine noaa sehere cohtotachu yoaro nina. To ã yoachu Cristo noa yuhduariro to jiro seheta wahana nija mari.

4 Æ yoa Cohamacu säre pja ñño, noaa buheare yahuhtinare cüre säre. To ã cürina sã jiare masina, to yare buhena pomerana, bujua witi tuhoturaja. ²To yare buhena mahño cure buheraja. Tuhsu, sã tíre cohtotaeraja. Soro curero buhena buoro yuhduboa. Æ jina tó sehe yoare cahmaeraja sã. Cohamacu to ññurocaroi jija sã. Æ jina noaa buheare noano quihõno buheja sã. Sã ã buhechu ñña tíre noano masina säre tuhoina. ³Sã ya buheare noaa buheare buheja sã. Sã tíre buhepachuta paina ne noano tuhoerara tíre tinare ducataro seheta. Æ tuhoeraina pichacapu wahahtina jira. ⁴Satana ñariro ahri yahpa macaina bui puhtoro tinare masierachu yoara. Capari ññeraina ti ññ masieraro seheta masierachu yoara tinare. Noaa buheare Cristo tua yuhdurucu suriro ya buheare ti masierachu yoara tiro. Cristo sehe Cohamacu to jia tiare marine masichu yoara. Tiro Cristo Cohamacu waro jira. ⁵Sã buhena “Sã sehene ño payoga”, ni buheraja. Æ sehe ni buheja sã: “Jesucristo sehe jira mari puhtoro”, ni buheja sã. Sã sehe Jesure yuhtiina jina, musare dahra cohtaina yoaro sehe jina, to yare musare buheja sã. ⁶Panopu õ sehe niha Cohamacu: “Nahitianopure buhriaro jiga”, ni dutiha tiro. Mipure tirota jira marine to tuaare masichu yoariro. Buhriarocaró marine to noano bajuchu yoaro seheta, tiro to tuaare marine masichu yoara. Cristo Cohamacu tuaare, to jia tia cühure marine masichu yoara.

Cristo to tuaa mehne mari jija

⁷ Æ masiina jina, to tuaare, noa buhea cühure painare masichu yoaja. Æ yoina jipanahta wiho jiina jija sã. Dihi biato dóihta to wahtiro yoaro seheta sã cühü wiho jiina jija. Æ jipanahta Cohamacu to tuaare, noa buhea cühure painare buheja sã. Sã ã buhechu ñña, wiho jiina sã jichu ñña, säre tuhoina

õ sehe ni, masiahca. “Ti mu suró ahri buheare masierara. Cohamacu sehe tua yuhdururo tinare masichu yoara”, ni masiahca paina säre. ⁸Jipihtina paina säre ñano yoapahta Cohamacu säre to yoadohochu tina säre yuhdurucaerara. Æ jina “Ñano yuhduna nija”, ni tuho-tupanahta, Cohamacu yare ne duhueraja. ⁹Säre ti ñano yoarucupachuta Cohamacu säre ã yoadohorucura. Säre ti cjäroca cü mujapachuta to yoadohoa mehne yarieraja sã. ¹⁰Ti wajähtina jinocanata nija sã, Cristo ahri yahpai to ñano yuhdururo seheta. Æ ti wajähtina jinata nija sã Cristo catiare wariro to jiare masa ti masihto sehe. Sã ã ñano yuhduchu ñña tíre masiahca masa. ¹¹ Æ yoa dachoripe säre paina nu wajähto cuara Cristo yaina sã jiri buhiri. Æ seheta ñano yuhduja sã Cristo to catiare wariro to jiare paina ti masihto sehe. Sã pjacuri baharo yariaa wahaahca. Sã ã wahahtina jipanahta Cristore catiare warirore masichu yoaja sã painare. ¹² Æ jia musare sã buheri buhiri sã sehene paina nu wajähto cuara. Sã buheare musa tuhori baharo jipihtia dachoripe Cohamacu mehne jirucuhtina jira musa.

¹³ Cohamacu yare ti joari püi õ sehe nina: “Cohamacure wacü tuacu, to yare yahuhi”, ni joaa tiha panopu macariro. Sã cühü tó seheta yoaja. Cohamacure wacü tuana, to yare yahuja. ¹⁴ Æ buheja sã ahri yu nihtire noano masina: Cristo to yariari baharo Cohamacu tirore masori jire. Æ jiro Cristo yaina mari jichu ñño tiro mari cühure masonohca. To ã masori baharo to cahapu naanohca marine. ¹⁵ Æ jina musare yoadohona, ñano yuhduja sã. Æ jina Cristo yaina musa payu wahana, payu musa Cohamacure wahchea mehne ño payonahca. Tirore “Noana”, ninahca.

¹⁶ Musa ã wahachu ñña, sã ñano yuhdurupanahta cahyaeraja. Æ jina Cristo yare buhe duhueraja. Dachoripe wah-

yarucuna nija sã. Sã ã wahyarucupanahta dachoripe wahcheina jirucuja sã. ¹⁷ Mipũre ñano yũhdũpanahta ñano yũhdũ dojoaeraja. Tí mari ñano yũhdũa pihtia wahaahca. Æ jina marine mahanoã ñano yũhdũro cahmana. Æ mari ñano yũhdũrina cjiri jina, baharopũre pjíro wahchea mehne jirucunahca Cohamacu mehne. Æ jina mari ñano yũhdũri yũhdũro pjíro wahchea mehne jirucunahca. ¹⁸ Mari ñũri cjiri baa pihitia wahaahca. Mari ñũerari sehe ã jirucuahca. Æ jina mari ñũeraare Cohamacu yare ã wacũrucuja mari. Æ wacũrucuna baharopũ mari noano jiltore wahcheja.

5 Wũhũre to cohãboriro seheta baharo mari pjacũri sehe butia wahaahca. Æ jiro wahma wũhũre to yoaboro seheta Cohamacu wahmaa pjacũrire yoarohca. Æ yoaro tí pjacũrire marine warohca. Tí pjacũri masa ti yoaa pjacũri jierara. Æ jina mũanopũ ã jirucunahca tí pjacũri mehne. Tíre mari masija. ² Æ jina tí pjacũrire mũano macaa pjacũrire tuaro cahmana, mari ã cohtarucuna nija. ³ Tí pjacũrire tuaro cahmaja, mari yariari baharo suhti marieina mari jiboro seheta pjacũri marieina ji duaerana. ⁴ Mipũre ahri pjacũrire cohã duaerapanahta wahmaa pjacũri sehere tuaro cohtaja mari. Mipũre mari pjacũrire cohã duaerapanahta jipihtia dachoripe Cohamacu mehne mari jiltore tuaro cahmaja mari. Æ jina ahri mari pjacũri yariahtí pjacũri ti jichũ masina, wahmaa pjacũri mehne Cohamacu mehne ã jirucu duaja mari. ⁵ Mari ã jirucuhtore cahnore Cohamacu sehe. Æ cahnono Espĩritu Santore ware marine. Æ jiro Espĩritu Santo mari mehne jiro, marine Cohamacu to yoahore “Potocã tjira” nino, marine masichũ yoara tiro.

⁶ Æ jina Cohamacũre wacũ tuarucuja mari. Cuiro marieno jija mari. Ahri mari ji mũhtari pjacũri jina, mari pũhtoro mehne jierasinija. ⁷ Mũano macaare

Cohamacu cũhũre mari ñũerapanahta “Tí potocãta jira”, ni tũhotuja mari. Æ jina tirore wacũ tuaja mari. ⁸ Æ jina mari cuieraja. Mari pjacũrire ahri yahpai cohãna mari pũhtoro mehne mũanopũ jirucunahca mari. Æ yoa mari yariachũ noa nina marine. ⁹⁻¹⁰ Æ jina Cristore wahchechũ yoa duaja mari. Ahri yahpa macari pjacũri mehne jisnina tirore wahchechũ yoa duaja. Mũanopũ cũhũre tirore wahchechũ yoa duaja.

Jipihtina Cristo cahapũ mari wahachũ ñũno tiro mari yoarire ñũno marine beserohca. Ñano mari yoarire masinohca tiro. Æ masino wapa marieno to waborire marine wasi tiro. Noaare mari yoari cũhũre masinohca. Æ masino wahchero marine noano yoarohca. To ã masiri ro jichũ ñũna tirore wahchechũ yoa duaja mari.

Cohamacu marine to ñũ tuhtichũ ñũno Cristo marine yahura

¹¹ Æ jina cua pisaro mehne Cristore ño payoro cahmana marine. Ahrire masina, Cristo yare masichũ yoaja sã masare. Tinare cuisãana, tirore wacũ tuachũ yoa duaja sã tinare. Noano mehne sã tíre sã buherire Cohamacu noano masina. Sã ã buherire mũsa cũhũre noano mũsa masichũ cahmaja yũhũ. ¹² Pari turi noaina sã jia tiare mũsare yahuna nieraja. “Painare yũhdũrucaja”, niinare mũsa yahuhto sehe noano mehne sã buherire yahuna nija sã mũsare. Tina sehe ti tũhotuapũ ñaina jipahta masa ti ñũrocaro dihta noaina yoaro sehe yoa ñomana. Æ jina sã mehne mũsa wahchehto sehe ahri jipihtiare mũsare yahu joana nija. “Paulo cũhũ sãre noano mehne buhere”, sãre painare mũsa ni dũcatahto sehe ahri jipihtiare mũsare yahu joana nija. ¹³ ¿Sã õ sehe ni yahuna tũho masieraina jijari sã, mũsa tũhotuchũ? Masa sãre ñũna, tũho masieraina yoaro sehe ñũna sãre. Cohamacu yare sã yoachũ ñũna ã

ni ñuboca sãre. Ti ã ñuborina jipanahta ã jiina jieraja sã musare yoadoho namona tana. ¹⁴Cristo marine to cahichu ñña musare ã yoadohoja. To ã cahichu ñña to yare ã yahurucuja sã. Cũirota Cristo jipihitina mari ñaa buhirire yariari jire. To ã yariari baharo mari sehe jipihitina mari ñaa buhirire yariarina yoaro sehe jina, ñaare yoa namo duaeraja. ¹⁵Jipihitina mari ñaa buhiri yariari jire tiro Cohamacu ya dihtare mari yoahito sehe. Mari mu sũro yoa dutieraro, to cahmaa sehere marine yoa dutiro yariari jire tiro. Tiro sehe mari yaro jiborirore yariaro, masa mujari jire. ¹⁶Ã jina mipũre sã mu sũro masare “Noaina jira. Ñaina jira”, ni ñũeraja sã. Panopũ sã mu sũro yoaa timai. ã jina Cristore masierahi. ¹⁷Ã jina Cristo yaina wahana wahma masa bajuaina yoaro sehe wahaja mari. Panopũre mari mu sũro mari tũhotumarire, mari yoamarire duhunocaja mari. Mipũre wahma masa bajuaina yoaro sehe jina, noaa sehere cohtotana, Cohamacu ya dihtare yoa duaja mari.

¹⁸Cohamacu sehe marine noaa sehere cohtotachu yoare. Cohamacure ñu tuhtiina mari jichu ñũno Cristo sehe mari ñaa buhiri tiare cohãre. ã cohãno mari ñu tuhtirire duhuchu yoare tiro. ã yoachu yoare Cohamacu Cristore. ã yoaro sãre to yare buhe dutiro cũre. ã buhena, painare Cohamacu mehne ti ñu tuhtirire duhuchu yoaja sã cũhu. ¹⁹Õ sehe masare yahu dutire Cohamacu sãre: “Cristore mari wacũ tuachu ñũno mari ñaa buhirire buhiri dahrerara Cohamacu marine. ã yoaro marine ñu tuhtiriro cjiro jiparota tiro marine to yaina jichu yoara”, ni yahu dutire Cohamacu sãre. ²⁰Ã jina Cristo yare buhehtina to cũrina jija sã. Cohamacu musare to yahuboriro sehetã sã sehe õ sehe ni musare yahuja: Cristore yahubasana nija. ã jina musare bosaja. Cohamacure musa ñu tuhtiare tó purota duhuga. ²¹Cristo ñaare to yoær-

apachuta Cohamacu sehe tirore mari ñaa buhirire yaria dutiri jire. ã yoaro mari ñaa buhirire buhiri dahreri jire Cohamacu tirore. ã jiro Cristo yaina mari wahachu Cohamacu yoaro sehe noaina jichu yoare tiro marine.

6 Cohamacu yare buhedohoina jija sã. ã jina ahrire tuaro musare yoa dutija sã. Cohamacu yare noaa buheare musa tũhoriro sehetã yoaga musa. Musã tũhoriro sehe musa yoærachu tí musa tũhori yaba cjihti jierara. ²Õ sehe nina Cohamacu:

“Yũ quihõri pjare, musare yũ noano yoahiti pjare musa siniare tũho, yũhtihĩ.

ã yoacu musare yũ yũhdohti dachore musare yoadohohĩ”, nina tiro. Tũhoga musa. Mipũre Cohamacu musare to noano yoahiti pja jira. Mipũre Cohamacu musare to yũhdohti dacho jira.

³Ne mahanocã painare ñano yoærãja sã. Painare ne ñano ni durucuerãja, “Noaa buheare musare sã buheare cahmaerari”, nina. ⁴ã jina Cohamacure dahra cohtaina sã jiare musare masichu yoa duaja. Õ sehe jija sã: Ñano yũhdũna, paina ti ñano yoarina jina cũhu ã tũhotunocaja. Sãre ti ñano yoærãchuta suaro marieno jija. ⁵Õ sehetã ñano yũhdũi sã: Masa sãre cãchũ, peresu ti yoachu, payũ masa sãre wajã dua ti sañurucuchũ, ñano yũhdũi sã. Sã tuaro dahra wahyana, wũjo purĩpachuta carĩerana, jũca baana ñano yũhdũi. ⁶Numiare ã ñũnocai. ã jina ne ñano yoærãhi. ã yoa Cohamacu yare noano masi buhei musare. Tuhsũ, ne suaerãhi sã. ã yoa noano niji siaro mehne yoi sã musare. ã yoana Cohamacure dahra cohtaina sã jiare masichu yoana nii sã musare. Espĩritu Santo to yoadohoa mehne Cohamacure dahra cohtaina sã jiare masichu yoana nii musare. Potocã musare sã cahichu ñña, tirore dahra cohtaina sã jiare masina

musa. ⁷ Æ jina noaa buheare musare quihõno sã buhechũ ñña, Cohamacu tuaa mehne sã yoachũ ñña tirore dahra cohtaina sã jiare masina musa. Noaa sehe jipihtia sã yoari cjiri sã wamoa yoaro sehe jira noano sã ducatahto sehe. Tí noare yoana watĩnore sã ducatahana nija. Æ yoana tí noare sã yoari mehne tirore sã yuhdurucaja. ⁸ Paina sãre ño payora. Paina sehe sãre ño payoerara. Paina noano ni durucura sãre. Quihõno sã buhepachuta “Mahñoina jira”, ni yahusãna paina sehe sãre. ⁹ Paina sãre ñũ masiina jipahta sãre ñũ masieraina yoaro sehe yoara. Sãre ti wajã duapachuta catisinija sã. Ñuga sãre. Potocã tjira. Sãre buhiri dahre ti cãchũ, yari-erasinija sã. ¹⁰ Sã cãa tahari cahyaina jipanahta, ã wahcherucuja. Pjacuoina jipanahta painare noaa buheare buhena tinare pjĩro pachere sã waboro seheta yoana nija tinare. Paye baro cjueraina jipanahta, potocãta Cohamacu yare cjuã pahñonocaja sã.

¹¹ Ne Corinto macaina yũ coyea musare noano mehne yahu pahño joahi sã musare. Musare tuaro cahĩna, ã yahuhi musare. ¹² Sã sehe musare cahĩ duhueraja. Musa sehe sãre cahĩera curera. ¹³ Æ yoa pohna ticũ yũ pohnare yũ yahuboro seheta musare yahuihtja: Musare sã tuhoturiro seheta musa cũhu ãta noano tuhutuga sãre. Æ jina sãre cahĩga musa cũhu.

Cristore cahmaerainare piti ti dutieraha Paulo

¹⁴ Æ yoana Cristore cahmaeraina mehne ã piti tirucuena tjiga. Tina mehne macaina jiena tjiga. Cãno potori jierara musa. Noare yoariro ñaare yoariro mehne noano ji masierara. Cohamacure cahmaina Cohamacure cahmaeraina mehne noano cahma piti ti masierara, buhriaro nahitiano mehne to ji masieraro seheta. ¹⁵ Æ

jia Cristo watĩno mehne cãno potori tuhoturera. Æ yoa Cristo yairo, Cristore cahmaerairo mehne noano cahma piti ti masierara. ¹⁶ Cohamacu wũhui “Cohamacu jira”, ti nia masurine mari cjuachũ ñaa nina. To ya wũhui tí masurine mari cũchũ tó wahaerara. Tó seheta Cristo yaina Cristore cahmaeraina mehne mari piti tirucuchũ cũhũre ñaa nina. Tina pũa curua cãno mehne ji masierara. Cohamacu catiriro to wũhu yoaro seheta jija mari. To wũhui to jiro seheta mari mehne jira tiro. Õ seheta nina Cohamacu:

“Tina mehne jiihtja yũhu.

Ti watoi ã jirucuihtja.

Yũhu Cohamacu ti pũhtoro jiihtja.

Æ jia tina sehe yũ yaina masa jiahca”, nina tiro.

¹⁷ Æ yoa õ sehe ni namona tiro mari pũhtoro:

“Ñaina mehne tjuaena tjiga.

Tinare piti tiena tjiga.

Cristore cahmaeraina ti ñaa yoare ñũ cũena tjiga.

Musa ã yũhũre yũhtichũ ñũcũ, yũhu sehe musare piti tihtja.

¹⁸ Æ jicũ musa Pũcũ jiihtja.

Musa sehe yũ pohna jinhca”,

nina Cohamacu mari pũhtoro tua yũhũariro.

7 Yũ coyea, yũ cahĩina, ahri jipihtiare Cohamacu to ã ni yahuchũ tuhona jipihtiare ñaa yoare duhujihna mari. Ñaa wacũa cũhũre duhujihna mari. Cohamacure noano ño payoa mehne ñaa buhiri tia marieno jijihna mari.

Paulo wahchea mehne yahuha Corinto macainare

² Noano mehne jiga musa sã mehne. Ne mahanocã mehne ñano yoerahi sã musare. Æ yoa tuhsũ, musare buhena, ne musare dojomehnerahi. Ne cũiro musa mehne macarirore mahñoa mehne wapa cahmaerahi. ³ Æ nicũ musare

tuhtii nieraja. Mūsare yahu tuhsūhi. Sā yajeripohnari mehne tuaro cahija sā mūsare. Catisinina mūsare ā cahīrucunahca. Mari yariari baharopu cūhure mūsare ā cahīrucunahca. ⁴Yū niriro seheta mūsa yoirire, mūsa yoahiti cūhure masija yūhū. Ā jicu mūsare wacūrocacu wahcheja. Sā nāno yūhdūro watoi mūsa sehe yūhure pjīro wahchechū yoara.

⁵Ā yoa Macedonia yahpapū sā suri baharo tōpu jina, ne soerahi sā. Tōpūre nāno yūhdūhi sā. Paina sā mehne cahma sayo yūhdurūcahure. Ā jina “Cristo yare duhuri”, nina Cristo yaina sehene cuisāahi sā. ⁶Sā ā nāno yūhdupachuta Cohamacū sāre wahchechū yoahre. Tiro cahyainare wahchechū yoiriro jira. Ā jiro Tito sā cahapū to wihiro mehne sāre wahchechū yoahre Cohamacū. ⁷Tito to wihichū nūna wahchehi. Tirore mūsa wahchechū yoirire sāre to yahuchū wahchehi. Ahri cūhure wahchehi. Mūsare to quiti yahuchū cūhure tuaro wahchehi sā. Yūhure mūsa nū duarire yahuhre sāre. Yūhure mūsa cahya mūsa pjīro tūhoturi cūhure yahuhre tiro. To ā ni yahuchū tūhocū pjīro wahchehi yūhū.

⁸Tó pano yū joarocari pū mehne mūsare cahyachū yoamahi. Ā yoiricu jipaihta cahyaeraja yūhū sehe. Tí pūre mūsa buheri baharo cahyayuhti mūsa. Tuhsū, mahanocāta cahya duhuyuhti mūsa. Ā jicu wahma joaroca muhtacu cahyapaihta mipūre cahyaeraja. ⁹Mipū pinihtare wahcheja yūhū. Mūsa cahyachū tūhocū wahcheraja. Wiho mejeta ā cahyana, mūsa nāare tūhotumarire cohtotayuhti mūsa. Ā mūsa cahyachū nūno, Cohamacū sehe to cahmano seheta mūsa nāare tūhotumarire cohtotachū yoiri jira. Ā jina mūsare cahyachū yoana, nāno yoa dojomehnena nierahi sā mūsare. ¹⁰Ā jina Cohamacū to cahmano seheta cahyana, mari nāare

tūhotumarire cahyanahca. Cohamacū to cahmano seheta cohtotannahca. Tó sehe mari cahyachū nūno marine pichacapū wahaborinare yūhdora Cohamacū. Mari ā cahyachū noa nina marine. Cristore cahmaeraina sehe ti nāare tūhotumarire cahyaerapahta, ā cahyamacanocaa, pichacapū wahahtina jisina. ¹¹Mūsa sehe Cohamacū to cahmano seheta cahyayuhti. Mūsa ā cahyana ō sehe yoayuhti mūsa: Mipūre nāare yoinare ā nūno caerayuhti mūsa. Tinare duhu dutiyuhti mūsa. Ā jina ti nāa yoare cuiyuhti mūsa “Tina yoaro sehe sā yoiri”, nina. Ā yoana yūhure nū duayuhti mūsa. Tuhsū, nāare yoirirore buhiri dahre duayuhti mūsa. Tí jipihitiare mūsa yoana mipūre quihōno yoaina mūsa jirire masichū yoahre mūsa sāre. ¹²Panopū nāno yoirirore mūsare yahu joarocapaihta tirore yoadohocū tacū ā ni yahu joarocaerahi. To nāno yoa payoriro cūhure yoadohocū tacū ā ni joarocaerahi. Mūsa sehene yoadohocū tacū tí pūre joarocahi. Sāre noano nō payora mūsa Cohamacū to nūrocaroi. Tíre mūsa nō payorire noano mūsa masihtō sehe tí pūre joarocahi mūsare. Cohamacū tíre mūsare masichū cahmare. ¹³Ā jina Tito mūsa yoirire to quiti yahuchū tūhona tuaro wahchehi sā.

Tito cūhū tuaro wahchere. Tirore mūsa noano mehne mūsa piti bocachū tūhona, mūsa mehne to wahcherire tūhona sā cūhū noano wahchehi. ¹⁴Wahmanopū mūsa cahapū to wahahto pano mūsa mehne yū wahcherire, noaina mūsa jirire yahuhiti tirore. Yū ā yahuchū yū niriro seheta noano yoayuhti mūsa tirore. Ā jicu tirore yū nirire būo tieraja. Mūsare quihōno ā yahurucuja sā. Tó seheta Tito cūhure quihōno sā yahuhiti mūsare to nūriro seheta. ¹⁵Mūsa cahapū to sūchū nō payoa mehne tirore piti bocayuhti mūsa. Mūsa ā piti bocachū, noano

yūhtiina, yūhdurucaro marieina mūsa jichu nūyūhti tiro. Ā jiro mūsare cahī namono nina tiro. ¹⁶Mipure noano yūhtiina, Cohamacu to cahmano seheta mūsa noano yoa pahñoina mūsa jichu noano masija yūhu. Ā masicu tuaro wahcheja.

Cristo yaina jina, painare ā wanocano cahmana marine

8 Sā coyea, ahri yū yahuhtire mūsare masichu cahmaja sā. Cristo yaina Macedonia yahpa macaina Cohamacu cahīa mehne to pja nūa mehne ti yoirire mūsare yahuihtja. ²Tina nāno yūhdupahta, niñeru maeraina jipahta niñerure cahīno marieno ā wanocahre pjacuoinare Jesu yainare. Cristo mehne tuaro wahcheina jia, tina Judea yahpa macainare noano mehne ti cjuare ā wanocahre. ³Mūsare niita nija. Tina ti cjuaro puro wahre. Jierara. Bui curero wahre. Sā sinibasaerapachuta pjacuoinare wahre tina. ⁴Cohamacu yainare pjacuoinare tuaro yoadoho dua, “Macedonia macainare tuaro wa duaja sā”, nire tina sāre. ⁵“Ō puro waahca”, tinare sā ni tuhaturiro bui curero wahre tina. Ō sehe yoahre tina: Wahmanore niñerure ti wahto pano mari puhtoro Cristo to cahmano seheta yoa pahñori jihre tina. Ā yoa tuhsu, Cohamacu to cahmano seheta sā cūhure ño payoa mehne yūhtiri jihre. Ā yoaina jia tina niñerure wahre. ⁶Ti ā wa tuhsuchu nūna Titore sā sehe ō sehe nihi: “Corinto macainare mū buhe ducariro seheta noano mehne pjacuoinare ti wahren buhe pahñoga”, nihi sā tirore. Mūsa cūhu painare pja nūna, mūsa yoadohohto sehe ā nihi tirore. ⁷Mūsa sehe jipihtiare noano yoaina ji tuhsura: Cristore potocāta noano wacū tuara mūsa. Ā jina to yare noano yahura mūsa. Ā yoa Cohamacu yare noano masina mūsa. Ā masina, Cohamacu to cah-

mano seheta tuaro yoa duara mūsa. Ā yoa sāre cahīna mūsa. Ō seheta noano yoaina ji tuhsura mūsa. Mūsa ā noaina jipachuta mahanocā duhsasinina mini mūsare. Pjacuoina pinihtare mūsa pja nūchu cahmaja sā. Ā jina jiape nino marieno tinare noano mehne mūsa pjiro wachu cahmaja sā.

⁸Ā nicu mūsare dutii waro nieraja. Ā ni yahuita nija mūsare. Paina pjacuoinare ti tuaro yoadohore mūsare yahui nija. “¿Potocāta pja nūna jijari mūsa?” ni masi duai nija. ⁹Mari puhtoro Jesucristo sehe marine to pja nūrire masina mūsa. Tí to pja nūri potocā tjira. Tiro muanopu pjiro cjuariro jiparota ahri yahpau taro pjacuoriro wahari jire. Ā yoaro mari yaro jiborirore yariaro pjacuoriro wahari jire. Ō sehe wahari jire tiro mari sehe to yare pjiro mari cjuahito sehe, tiro mehne mari ā jirucuhto sehe.

¹⁰Mūsare ā yahuita nija noare mūsa masihto sehe. Ō sehe ni tuhutuja yūhu sehe pja cuoinare mūsa wahtire: Cū cūhma wahara pja cuoinare mūsa wahtire mūsa wihbori baharo. Tí yūhdoro noano yoayūhti mūsa. Paina ti wa duahto pano mūsa sehe pjacuoinare wa dua muhtayūhti. ¹¹Ā jina mūsa wa dua muhtariro seheta mipure noano waga tinare. Ā yoana pjiro cjuaina jina, pjiro waga. Mahanocā cjuaina jina, mahanocā waga. ¹²Tuaro mūsa wa duachu tīre mūsa warire Cohamacu wahcherohca. Ā jina noho mūsa wa duaro puro waga. Mūsa wariro purota mūsa wachu wahcherohca Cohamacu. “Pjacuoinare wa yūhdoga”, mūsare nino nierara tiro.

¹³“Pjacuoinare waga”, nicu tinare pjiro cjuā duticu nieraja. Ā jicu mūsa sehere pjacuoina jichu yoa duaeraja.

Mūsare cūno potori cjuā duticu ā nii nija. ¹⁴Mipure mūsa sehe pjiro cjuara. Ā cjuana paye baro maerainare wa masina

musa. Baharo musare paye baro maerachü tina cühu wa masina musare. Musa ä cahma wana cüno potori cjuannahca jipihitina Cristo yaina. ¹⁵ Ö sehe nina Cohamacu yare ti joari püi: “Pjiro nariro cühu paina bui curero cjuarerare. Mahanocä nariro cühure ne mahanocä dahsaerare”, nina Cohamacu yare ti joari püi.

Tito tó mehne macaina mehne Corintopu wahaha

¹⁶ Ä yoa musare yu yoadohoriro sehetä Tito cühu musare yoadoho duara. Cohamacu sehe musare to yoadoho duachü yoahre tirore. To ä yoachü nücu “Noana”, nija Cohamacure. ¹⁷ Titore musa cahapu sä waha dutichü tiro noano mehne yuhtihre. Tirore sä waha dutihtito panoputa to basita musa cahapu tuaro waha dua tuhsüriro jire.

¹⁸ Tirore paio Jesu yairo mehne piti dahrerocahi sä tirore. Tito pitire jipihitina paina Jesu yaina noano ño payora. Noaa buheare to noano yahuriro jichü nüa tirore noano ño payora. ¹⁹ Ä jia Jesu yaina tirore cahmahre sä mehne to tinino wahahto sehe. Tí niñerure pjacuinare cahapu sä nachü sä mehne wahahtirore cahmahre tirore. Ä jia tí niñerure sä wabasachü nüa “Marire yoadohoriro jira”, niahca masa Cohamacure. Sä ä wabasana tinare tuaro mari yoadoho duarire masichü yoanahca tinare. ²⁰ Ä jina ahri niñerure, pjiro Jesu yaina ti warire naabasana, noano nü wihbonahca ti warocarire, “Säre yahusäri”, nina. ²¹ Mari puhtoro to nürocaroi quihöno, noano yoa duaja sä. Masa ti nürocaro cühure quihöno yoa duaja.

²² Ä yoana tana paire mari coyeirore warocanahca Tito cühu mehne. Sä piti dahrerocarirore payu tahari painare to noano yoadohochü nühi sä. Ä jiro mipure musa sehe painare musa yoad-

oho duachü nüno tiro tó pano to yoariro yuhdoro noano musare yoadoho duara. ²³ Tito sehere musare yahuihtja. Tiro yu piti jira. Musare yu yoadohochü tiro yuhü mehne dahrariro jira. Paina tiro mehne wahahtina Jesu yaina ti beserina ti warocarina jira. Tina Cristo yare yoara paina tirore ti ño payohto sehe. ²⁴ Ä jina cahia mehne noano mehne tinare piti bocaga musa. Musa ä yoachü nüa paina Jesu yaina sehe musa cahiare masiahca. “Noano piti bocaahca Corinto macaina”, ni yahu tuhsühi painare. Musa ä noano piti bocachü nüa tí sä yahuri cjiri quihöno ti jichü masiahca paina Jesu yaina.

Jesu yainare pjacuinare ti wahtore yahuha Paulo

9 Ä yoana Cohamacu yainare musa yoadohohtore musa wahtore masi tuhsüra musa. ² Painare musa yoadoho duaare masija yuhü. Ä masicu Macedonia yahpa macainare ö sehe ni yahui: “Corinto macaina, ti ya yahpa Acaya yahpa macaina cühu Jesu yaina sehe painare yoadoho dua tuhsühre. Cü cühma yuhdura ti yoadoho duariro”, ni yahu tuhsühi tinare musare. Musa ä yoadoho duachü tuhoa payu tina cühu pjacuinare yoadoho duahre. ³ Musare ä ni yahuriro jicu mipure ahrinare mari coyeare musa cahapu warocai tai nija, Macedonia yahpa macainare yu yahuriro sehetä musa yoahto sehe. Ä jicu pjacuinare musa wahtore musa cahmachu musa cjuayuhito sehe ahrinare warocai nija. ⁴ Tinare warocaeracu Macedonia yahpa macaina mehne musa cahapu sücu, musa wahtire musa cjuacerachü nücu buo tisäboa yuhü musare. “Pjacuinare waahca”, musare yu ni tuhoturi baharo musa waerachü nücu buo tisäboa yuhü. Musa cühu buoro yuhdüboa. ⁵ Ä jicu musa cahapure yu sühto pano tinare mari coyeare waroca mühtai nija.

“Pjacuoinare wanahca”, pano m̄sa nirire m̄sa cjuayuhto sehe tinare waroca m̄htai nija. M̄sa wahtire m̄sa cahmachuch̄u tina sehe m̄sare yahu quihōahca. M̄sa wahtire m̄sa cjuayu tuhsuch̄u wahchea mehne m̄sa wa duarire masiahca jipihtina. M̄sare s̄a wa dutiri jisi tí. M̄sa m̄ s̄uro m̄sa wari jahca.

6 ã jina ahrire wacūga m̄sa: Mahaa yaparicā toariro mahaa pocacā nanohca. Paȳu yapari toariro paȳu poca nanohca. (Tó sehe jira pjacuoinare mari wachu. Mahanocā mari wachu, Cohamacu mahano cā warohca marine. Pj̄iro mari wachu, pj̄iro marine warohca.) 7 ã jina cāina m̄sa “Õ puro wanahtja”, ni waga. Niñerure cah̄ino marieno waga. “Marine wa dutire”, nino marieno waga. Wahchea mehne wainare cah̄ina Cohamacu. 8 Tiro sehe m̄sa cahmano yuhdoro m̄sare warohca. ã jina jipihtia m̄sa cahmarire d̄hsaro marieno c̄jua pah̄ionahca. ã jia painare m̄sa wachu cūh̄ure noano m̄ suahca m̄sa c̄juaa. 9 Õ sehe nina Cohamacu yare ti joari p̄ui: “Pjacuoinare pj̄iro wara Cohamacu.

Noano mehne masare ã yoarucura tiro”, nina to yare ti joari p̄ui. 10 ã jiro toaa dicha tiri baharo toariro to toahti capare wara Cohamacu. Baharo to toarire dicha tich̄u yoara to ch̄htire. Pjacuoinare m̄sa pj̄iro wachu toarirore to wariro seheta m̄sa cūh̄ure pj̄iro warohca Cohamacu. Tó sehe dihta m̄sare warohca pjacuoinare m̄sa wa namohto sehe. 11 ã tjira. Pj̄iro warohca m̄sare painare pj̄iro m̄sa ã warucuhto sehe. ã jia m̄sa warocari niñerure pjacuoinare s̄a wachu paȳu tina sehe Cohamacure wahchea mehne “Noana”, niahca. 12 ã yoana pjacuoinare Cohamacu yainare wana, tinare yoadohora m̄sa. ã yoadohona wahchea mehne Cohamacure “Noana”, ti nich̄u yoanahca m̄sa. 13 ã painare m̄sa yoadohoch̄u ñua, Cohamacure ño

payoa mehne durucuahca masa. Tinare paina cūh̄ure pj̄iro m̄sa wachu ñua Cohamacure “Noa yuhduariro jira”, niahca masa. Õ seheta niahca Cristo ya buhea noaa buhea ti niriro seheta m̄sa yoach̄u ñua tinare m̄sa wachu ñua. 14 ã jia Cohamacu m̄sare tinare to wa dutich̄u m̄sa sehe tinare m̄sa p̄a ñuch̄u tina sehe m̄sare cah̄ia mehne sini payoahca Cohamacure. 15 Cohamacu marine noa yuhduaro yoara. To ã yoarire masina “Noa yuhduaro yoara”, nijihna mari tire.

Jesu buhe duti to cūriro to jiare yahuha Paulo

10 Mip̄ure yuh̄u Paulo, m̄sare yahuihtja. Cāina m̄sa mehne macaina ò sehe nina yuh̄ure: “Mari mehne jiro painare yuhd̄ur̄uca duaerariro, wiho jiriro yoaro sehe jira. ã jiparota pa seh̄ep̄u jiro marine cuirō marieno tuhtirocara”, nina m̄sa cāina yuh̄ure. Cristo sehe ne suaerariro, masare noano yoariro jira. Tiro yoaro seheta yuh̄u cūh̄u ji duaja. 2 ã jic̄u m̄sare ahrire tuaro mehne yahuihtja: M̄sa cahap̄u ȳu such̄u noano yoaga m̄sa “Paulo s̄are tuhtiri”, nina. Cāina yuh̄ure ò sehe nina: “Tiro to m̄ s̄uro, Cohamacu to dutiro marieno yoara”, nina yuh̄ure cāina. Tó sehe niina pinihtare tuhtiboca yuh̄u. 3 S̄a cūh̄u ahri yahpa macainata jina nija. ã jipanahta ahri yahpa macaina ti m̄ s̄uro ti yoaro sehe yoeraja s̄a, Cohamacu dutiare yoana. 4 Surara cahma waj̄a ti yuhd̄ur̄ucariro seheta s̄a sehe ñaare yuhd̄ur̄uca duaja. Tí ñaare yoa duaeraja. S̄a ã yoach̄u s̄a wamoa ahri yahpa macaina ti wamoa yoaro sehe jierara. Surara ti wamoa ti c̄juaoro seheta s̄a sehe Cohamacu to tuaare c̄juaaja. Tí tuaa mehne Cohamacure cahma dutierainare coh̄aja s̄a. Masa ti m̄ s̄uro ti masiare ti yaba c̄jihti

jierachũ masichũ yoaja sã tí tuaa mehne. ⁵Tuhsũ, jipihtina yũhdũrũca duainare, ti mũ sũro tũhotuinare, Cohamacũre masi dutieraina sehere duhuchũ yoaja sã. ˆA yoa tí tuaa mehne Cohamacũre cahmaerainare Cristore noano yũhtiina ti jichũ yoaja sã. Cristo to cahmano seheta tinare tũhotuchũ yoaja sã. ⁶ˆA yoa, paina mũsa mehne macaina Cristore ti yũhdũrũcachũ ñũna tinare buhiri dahrenahca sã. Mũsa sehe mũsa noano yũhtiri baharo Cristore yũhdũrũcainare ˆa buhiri dahrehtinata jinahca sã.

⁷Yũ pjacũ dihtare masina mũsa. Yũ jia tia sehere ne masierara mũsa. “Cristo yaina jija”, niina jina, ˆo sehe masiga mũsa: Sã cũhũ mũsa yoaro sehe Cristo yaina tjija. ⁸“Mari pũhtoro ya buheare noaa buheare buhe dutiro, cũre sãre”, nicũ payũ tahari mũsare ˆa ni yahupaihta bũo tieraja yũhũ. Sãre ˆa buhe dutiro mũsare yoadohohtinare cũre sãre. Mũsare dojomehnehtinare cũno nierare sãre. ⁹ˆO seheta poto ni yahuja mũsare “Cuiiri”, nicũ. Ahri yũ joarocari pũre ñũna mũsa ñũ cuachũ cahmaeraja. ¹⁰Cãina mũsa mehne macaina ˆo sehe nina: “Paulo joarocarõ tuhtiriro yoaro seheta joaroca mũjana marine. ˆA jiriro jiparota mari mehne jiro ne ˆa jica nierariro jira. Pjacũroriro yoaro sehe jira. ˆA jia, marine to durucua yaba cjihti jierara”, nina cãina. ¹¹Tó sehe niinare ˆo sehe ni yahuihtja: “ˆO seheta yoanahca”, sã ni joarocariro seheta tó seheta yoanahca sã, mũsa cahai jina.

¹²Cãina mũsa mehne macaina “Noano masi pahñoina jija”, ni durucua ti basi. Cuenah, noacaro masiina jijari tina ˆa ni durucua. Sã sehe ti yoaro sehe ne ˆa ni durucusi. Ti basi cahma ñũ piti boca “Mari sehe noa yũhdũrũcaina jija”, nina tina ti basi. Tũho masieraina jira tina. ¹³Sã sehe tina yoaro sehe yoasi. Cohamacũ sãre buhe dutiro to cũri di-

htare yahuja sã sehe mũsare. Paina ya dahraare “Yoahi”, nina nieraja. Tiro mũsare buhe dutiro sãre cũre. ¹⁴ˆO sehe nina, mahñona nieraja sã. Noaa buheare Cristo yare mũsare buhe muhtana suhi sã. ˆA jina Cohamacũ sãre buhe dutiro to cũri dihtare buhena nija mũsare. ¹⁵ˆA jina paina ya dahraare “Sã sehe tíre yoahi”, ne nieraja sã. Wiho mejeta Cristore mũsa wacũ tua namochũ cahmaja sã. ˆA cahmana mũsare buhe namo duaja sã. ˆA buhena Cohamacũ to dutiriro purota buhe duaja mũsare. ¹⁶ˆA yoa mũsa ya yahpa yũhdũropũ noaa buheare yahuna wahanahca. ˆA wahana paina ti buheri baharo sũna, “Sã buhehi”, nisi sã.

¹⁷Mari yoaare “Sãta yoaja”, nieraro cahmana. Mari pũhtoro Jesu to yoa sehere ñũna wahchero cahmana. Tí sehere painare yahuro cahmana. ¹⁸Masa ti basi “Sã sehe yoahi”, ti nichũ ji coarera Cohamacũ. Mari pũhtoro Cristo “Ahrina noano yoare”, to niina sehere ji coara Cohamacũ.

“Jesu to cũrina jija sã”, ni mahñoinare yahuha Paulo

11 Yũ jia tiare yahucũ tuho masierariro yoaro sehe yahui nija. ˆA yahuriro yũ jipachũta yũhũre tuhosiniga mũsa mipũre. ²Cohamacũ mũsare to cahĩno seheta tuaro cahija yũhũ cũhũ mũsare. Cristo yare mũsare yũ buhechũ tũhona tire wacũ tua dũcare mũsa. ˆA jicũ ahrire nija mũsare: Manũ tihticoro to manũno cjihto dihtare to cahĩno seheta, Cristo sehere tuaro cahĩga painare mũsa cahĩriro yũhdoro. Tó sehe yoaina ñaa buhiri tia marieina mũsa jichũ mũsare Cristore wa duaja to yaina cjihtire. Tó sehe jiinare, “Tinare mũhũre waihtja”, nihi Cristore. ³Paina ñaina mũsare mahñoa, soro jia buheare cahmachũ yoaboca mũsare. Agã Evare mahñono to masia mehne ticorore Cohamacũre to yũhdũrũcachũ

yoari jire panopure. To ã yoariro seheta mipure ñaina musare mahñoa, Cristore musare noano ño payoerachũ yoaboca. Æ jicũ musare cuisãja. ⁴Tina “Õ sehe jiriro jira Jesu”, ti mũ sũro soro ni ti mahño buhepachũta tũhoyuhca musa. Musare sã buheriro sehe jierapachũta musare mahño buheinare tũhoyuhca musa. Tuhsũ, “Õ sehe jiriro jira Espĩritu Santo”, ti mũ sũro soro ni ti mahño buhepachũta tũhoyuhca musa. Musare sã buheriro Espĩritu Santo waro jira. Tiro sehere quihõno ti yahuerapachũta musare mahño buheinare tũhoyuhca musa. Tina soro jia buheare ti mahño buhechũ noaa buheare ti buherapachũta tíre tũhoyuhca musa. ⁵Musa mehne macaina “Jesu to cũrina jija”, nimarina yũhũre masi yũhdũrũcaerara. Tinare docarũcaeraja yũhũ. ⁶Noano yahu mihniro jieraboca yũhũ. Noano yahu mihnierapailta Cohamacũ yare noano masija. Yũ ã masiare payũ tahari musare noano masichũ yoahi.

⁷Noaa buheare Cohamacũ yare musare buhecũ ne wapa cahmaerahi. Musare yoadoho duacũ wapa cahmaerahi. Wiho jiriro yoaro sehe jii yũhũ. ¿Yũ ã wapa cahmaerachũ noajerari, musa tũhotuchũ? ⁸Musare yũ buhechũ paye macari macaina Jesu yaina yũhũre niñerure ware. Ti ã wachũ tí niñerure ñahai sinino marieno musare buhei tai. Musa sehe yũhũre musa waborirore tina sehe yũhũre ware. ⁹Musa mehne jicũ paye baro yũhũre duhsapachũta musare niñerure ne sinierahi. Mari coyea Macedonia yahpa macaina Jesu yaina jipihtia yũ cahmarire na wihire yũhũre. Panopure musare ne cariboerahi yũhũ. Baharopũ cũhũre musare ne caribosi. ¹⁰Cristo potocãta to yahuriro seheta yũhũ cũhũ mipure musare potocãta yahui nija. Jipihtiro Acaya yahpai jĩinare ahri musare yũ sinierari cjirire ã

yahurucuihtja. ¹¹¿Musare yũ sinierari cjirire painare yũ ã yahurucuchũ tũhona, dohse ni tũhotujari musa? “Paulo ã ni yahuro sãre cahĩeraro nina”, ¿ni tũhotujari musa? Jierara. Musare cahĩja. Musare yũ cahĩare Cohamacũ masina.

¹²Wapa cahmano marieno musare yũ buhe dũcariro seheta sohtori tiitja. Yũ buheri wapa yũ wapa nachũ ñua tina “Jesu to cũrina jija”, ni mahñoina õ sehe niboca: “Paulo noaa buheare buhero, wapa nana. Æ jina sã cũhũ to yoaro seheta yoaja”, niboca tina “Paulo yoaro sehe yoaja sã”, ni dua. “Æ niri” nicũ, wapa cahmano marieno buhehtja musare. ¹³Tina potocãta Jesu to cũrina waro jierara. Tinare ne cũerare tiro. “Jesu to cũrina jija”, ni mahñoa, sã yoaro seheta jimana. ¹⁴Ti ã mahñoina jichũ masi tuhsũja yũhũ. Satana cũhũ noariro yoaro sehe cohtota mũjana. Tiro anjo si siteriro yoaro sehe ji duaro cohtotamana. ¹⁵To ã yoariro jichũ masicũ Satana yaina “Jesu to cũrina jija”, ni mahñoina Cohamacũre yoadohoina yoaro sehe ti mahñoina jichũ ñucũ, mahñoina ti jiare masi tuhsũja yũhũ. Æ mahñoina ti jichũ ñũno, pihtiri dacho jichũ jipihtia ti ñano yoari buhirire buhiri dahrerohca Cohamacũ tinare.

To ñano yũhdũrũre yahuha Paulo

¹⁶Pari turi ahrire musare yahuihtja. Ne “Tũho masierariro jira”, yũhũre niena tjiga. Yũ ã ni dutierapachũta yũhũre musa ã ni tũhotuchũ noanohca yũhũre. “Tũho masierariro jira”, yũhũre ni tũhotupanahta tũhosiniga musa yũhũre. Mahanocã yũ jia tiare yũ yahuchũ tũhoga musa. ¹⁷Musare ã yahucũ tũho masierariro yoaro sehe yoai nija. Mari puhtoro Jesu yũhũre “Mũ basi mũ jia tiare yahuga”, nierare yũhũre. ¹⁸To ã nierapachũta ahrire yahuihtja musare. Ti mũ sũro

“Noaina jija”, niina payu paina ti jichu ñucu yuhu cūhu yu jia tiare musare yahuihtja. ¹⁹Musa sehe tuho masierainare tuhona wahchea mehne ñuyuhca musa tinare. Noacaro masiina jijari musa sehe ã tuhona. ²⁰Musare cahamaca ti dahrechū, musare ti wapa cahmachū, musa yare ti machū, ã ñnocahna musa. ã yoa musare ti doca dahrechū, musa wahsupurire ti cjāchū, ã tuhutonocahna musa. ²¹Noacaro yoajari musare tina. Cue, masare yuhdurucaina jijari tina. Sã sehe tina yoaro sehe yuhdurucaina jieraja.

ã jina tina yoaro sehe yoeraja. Tina yoaro sehe jierapaihta tina “Õ sehe jina jija”, ti nichu tuhocu yuhu cūhu ãta ni yahuboca. Pari turi tuho masierariro yoaro sehe yoacu, õ sehe ni yahuihtja musare tjoa. ²²Tina “Hebreo masa jija”, nina painare yuhduruca duaa. Hebreo masunota jimaja yuhu cūhu. “Israe masa Cohamacu to beserina jija”, nina tina tjoa. Ti yoaro seheta to beserirota jimaja yuhu cūhu. “Abrahã cjiro panamana ji turiaina jija”, nina tina tjoa painare yuhduruca duaa. Ti yoaro seheta Abrahã panaminota jimaja yuhu cūhu. ²³“Cristo cahamaca jija”, nina tina tjoa. Yuhu cūhu Cristo cahamacunota jija. Tina yuhdoro Cristo yare noano yoaja yuhu. Cuenah, ã nicu tuho masierariro yoaro sehe durucui nija. Tina yuhdoro tuaro mehne dahrai yuhu Cristo yare yoacu. Payu tahari tina yuhdoro Cristo yairo yu jiri buhiri peresu yoare paina yuhure. Tina yuhdoro payu tahari tjanare yuhure masa. Tina yuhdoro Cristo yairo yu jiri buhiri payu tahari masa yuhure wajã duamare. Ti ã wajã duachu mahanocã yuhdui yuhu ti wajaboriro. ²⁴Cinco tahari judio masa yuhure ñahare. Yuhure ti ñahape tahari treinta y nueve tahari yuhure tjanare. ²⁵Tia taha paina yuhure ñahare. ã ñahaa tina pinihta yuhure ñano yucuri

mehne cjäre. Pa tehe yuhure paina tãa mehne docare. Tia taha dohoria mehne tãcapu doca wahã su, minii. ã jicu cū dacho, cū ñami pjiri ma dacho macapure ba pahsai. ²⁶Payu tahari macaripure buhe tini sui. Yu ã buhe tinichu cua yuhduare yuhure. Yuhure nu minihto cua nire. Yuhure yacahto cua nire. Yu ya dihta macaina judio masa, judio masa jieraina cūhu yuhure ñano yoahto cua nire. Macaripu, masa marienopu, pjiri mapu cūhure yuhure nu yariahto cua nire. “Muhu mehne macaina jija”, ni mahñoina cūhu yuhure ñano yoahto cua nire. ²⁷Cristo yare yoacu tuaro dahraa tii. ã dahracu ñano wahyaa tii. Payu tahari yuhure wujo ñano puripachuta ã dahrarucua tii. ñano juca baa tii. ã yoa ñahma yapioro jia tire yuhure. Payu tahari chua bocaeraa tii. Yu suhti sãaboa cūhu ne mariea tire yuhure. ã yoa yuhure yusua yuhdua tire.

²⁸Õ sehe ñano yuhdupaihta dachoripe jipihtina paina Cristo yainare, musa cūhure pjiro wacū tuhoutuja. ²⁹ã jicu cūiro Cristo yairo to ã jinocariro to jichu ñucu cahyaja. Paina Cristo yairore ñano yoa dutiboca. Ti ã yoachu ñucu Cristo yairore cuisāacu, tina ñaina mehne suaja. ³⁰Yahu duaerapaihta yu jia tiare yahui tacu, yu mu suro wiho jiriyo yu jia tiare musare wahchea mehne yahuja. ³¹Cohamacu mari puhtoro Jesu pucuro dachoripe mari ño payohtiro tirota musare yu mahñoerachu masina. Ahrire musare quihõno yahuihtja. ³²Damasco wama tiri macapu yu jichu ñuno, cūiro puhtoro yuhure ñaha duamare. Jipihhtina masa bui puhtoro Areta wama tiroto docai jiriyo puhtoro pinihta yuhure ñaha duamare. ã ñaha duaro tí maca macari sahrño, tãa mehne ti yoari sahrño macaa sopacaripe surarare cohta dutiri jire. ³³Ti ã cohtarato watoihita yuhu mehne macaina pjiri puhuropu yuhure duhu sãa, tí sahrño macari sopacacapu

yuhure duhu borore. Tí sahrino baharo bñhusehepu yuhure duhu borore. Ti ã duhu borori baharo duhti wahcãa wahai.

Cristo Paulore to ñorire yahuha Paulo

12 Yũ jia tiare wahchea mehne yũ yahuchũ yaba cjihti jierara. To ã jipachũta yũ jia tiare yahu namoihtja musare. Mari puhtoro Jesu yuhure to ñorire to masichũ yoarire yahuihtja musare. ² Õ sehe ño dũcare tiro yuhure: Catorce cũhmarĩ waro wahara yuhure Cristo yairore mũanopũ to naa mũjari baharo. Mũanopũ ñahpichoha buipũ yuhure naa mũjare. Yũ tũhotua dihtare to naachũ masieraja yũhũ. O yũ pjacũ cũhure to naachũ ne masieraja. Cohamacũ dihta tíre masina. ³⁻⁴ ã jiro paraíso wama tiropũ naa mũjare yuhure. Yũ tũhotua dihtare to naachũ masieraja yũhũ. O yũ pjacũ cũhure to naachũ masieraja. Cohamacũ dihta tíre masina. To ã naa mũjachũ sũcũ tũpũre to yahuaire tũhoi. Tí yũ tũhorire masa ne masierara. Tí to yahurire marine yahu dutierara. ⁵ Tó sehe yuhure to ñorine musare yahucũ, “Yũhũ cũirota painare yũhdũrucariro jija”, niboa yũhũ. Æ nieraja yũhũ. Yũ mũ sũro masierariro yũ jiare ñano yũhdũriro, wiho jiriro yũ jiare wahchecũ musare yahuihtja. Tí dihtare wahchecũ musare yahuihtja. ⁶ “Painare yũhdũrucaja”, musare ni yũ yahu duachũ yũ niri cjiri potocã tji-boa. Tó sehe ni yahucũ tũho masierariro jieraboa yũhũ. Wiho mejeta “Õ sehe painare yũhdũrucaja”, ni yahusi yũhũ musare, “Cua pisaro choro yuhure ñũri”, nicũ. Yuhure ñũ masina ño payora mũsa. Mũsa ã ño payopachũta tí yũhdoro yuhure mũsa ño payochũ cahmaeraja. Yũ yoarire ñũna, yũ nirire tũhona quihũno mũsa ño payoriro yũhdoro yuhure mũsa ño payochũ cahmasãeraja musare.

⁷ Cristo noa yũhdũare mũanore yuhure to ñochũ ñũriro jicũ, “Painare yũhdũrucaja”, niboca yũhũ sehe. Æ yũ nierahito sehe Satana yũ pjacũre to duti dahrechũ ñũno “Noanohca”, niri jire Cohamacũ. Yuhure duti dahreri jire Satana yuhure ñano wahachũ yoaro. Ahri dohatiro potaca sãano to purino seheta yuhure purina. ⁸ Õ yũ dohatirore yuhure yũhdo duticũ sinia timai Cristore mari puhtorore. Tia taha sinia timai. ⁹ Õ sehe ni yũhtia tire yuhure tiro: “Õ mũ dohatiro pinihtare mũhure yũhdũchũ yoasi yũhũ. Æ mũhure yũhdoerapaihta mũhure cahĩja. Yũ cahĩa mehne noano jiihca mũhũ. Dohaticũ ñano yũhdũriro, wiho jiriro jicũ yũ tuaare noano masichũ yoaihca mũhũ. Tuaina yũhdoro mũhũ sehe yũ tuaare masare masichũ yoaihca”, ni yũhtia tire tiro yuhure. To ã nichũ tũhocũ ñano yũhdũriro, wiho jiriro yũ jiri cjirire masicũ wahcheja. Æ jicũ ñano yũhdũriro, wiho jiriro yũ jiare musare wahchea mehne yahuihca. Õ seheta ni yahuihca Cristo to tuaa mehne yũ noano jiare mũsa noano ñũ masihtio sehe. ¹⁰ Æ jicũ Cristo yairo yũ jiri buhiri yuhure purichũ wahcheja. Paina ñano yuhure ti ni durucuchũ, ñabiario yũhdũcũ wahcheja. Yuhure ti ñano yoarucuchũ, ñano yũhdũcũ Cristo tuaa mehne cũno pjaja tirore wacũ tuacu. Æ jicũ wahcheja.

Corinto macainare Cristo yainare pjũro cahya tũhotuha Paulo

¹¹ Yũ jia tiare yahucũ tũho masierariro yoaro sehe yoahi yũhũ. Yũ ã yahupachũta tí mũsa ya buhiri jira. Mũsa sehe yũ jia tiare painare noano yahuboa. Yũhũ yũ mũ sũro jicũ yaba cjihti jieraboa yũhũ. Æ jiboriro jipaihta “Jesu to cũrina, masi pahũoina jija”, ni mahũoinare docarũcaeraja yũhũ. ¹² Potocãta ñano yũhdũriro jipaihta Co-

hamacu tuaa mehne yoa ñomai musare. Ā ñocu Jesu to cūriro yu jiare ñoi ni-mai musare. ¹³ Ō seheta yoamai. Paye macari macainare Jesu yainare musa cūhure cūno potori yoaa timai yuhū. Wiho mejeta musa dihtare cariboerahi. Musa dihtare paye barore sinierahi. ¿Yu ā sinierachu ñaa nijari, musa tuhotuchū? Tí ñaa jichu tí ñaare boga musa yuhure.

¹⁴ Pua taha musa cahapu yu suri baharo pari turi waha duaja tjoa. Tópu sūcu musare caribosi yuhū. Paye barore sinisi yuhū musare. Musa yare cahmaer-aja. Cristo ya sehene musa yuhtiina jichu cahmasāja yuhū. Masa pohna sehe ti pūcūsumare ti cahmaare waerara. Ti pūcūsuma sehe ti pohna cahmaa sehene wara. (Tó seheta musa yu pohna yoaro sehe jiina yu cahmaa sehene wasi musa.) ¹⁵ Ā jicu yuhū pinihta yu cjuaa sehene wa duaja musare yoadohocu tacu. Musa cahamacūno yoaro sehe ji duaja musare yoadohocu tacu. Musa sehene yu ā tuaro cahīpachūta yuhure musa sehe pjiroca cahīna, yu tuhotuchū.

¹⁶ Ā jicu musa mehne jicu musare cariboerahi. ¿Potocā tjijarita, musa tuhotuchū? Wiho mejeta cāina musa mehne macaina ō sehe niboca: “Paulo paye baro marine na duaro mahñore marine”, niboca. ¹⁷ ¿Musa ā niriro seheta yoariro jicu, dohse tíre yoari yuhū, musa ñūchū? ¿Musa cahapu yu warocarina yaba barore yuhure mahño mabasari tina musare, musa ñūchū? Mahño maerari jire tina. ¹⁸ Sohō jiri pjaru musa cahapu Titore waha duti tuhsūhi tirore. Ā jicu pairore Cristo yairore tiro mehne piti dahre warocahi. ¿Tito paye barore musare mahño mari, musa ñūchū? Mahño maerari jire. Tiro yu yoaro seheta Cohamacu to cahmano seheta yoariro jira. ¿Ā jiro yu yoaro sehe yoerari tiro, musa ñūchū? Yu yoaro seheta yoari jire.

¹⁹ “Ñano yoaeraja sã”, ni dūcatana nieraja sã. Cristo yaina jija. Ā jina Co-

hamacu to ñūrocaroi musare yahuna nija. Yu coyea, yu cahīina, musare yahui musa sehene yoadoho duana. Musare yahuna, sã sehene musare cahmachū yoana nierahi. ²⁰ Tópu yu sūchu yu cahmano sehe yoaina jieraboca musa. Ā jicu musare tuaro cuisāaja. Ā yoa musa cahmano sehe yoariro jieraboca yuhū cūhū, tópu sūcu. Soro musa yoachū ñūcu yahuihca musare. Tópu yu sūchu musa sehe cahma sayoina, painare pahsu tiina, ñaco suaeraina, musa mū suro painare yuhdūruca duaina, painare ñano durucuina, ñaa quitidahreina, “Painare yuhdūrucaja” niina, musa cahmachunore dojomehneina jiboca musa. Ā jina musa jirore dojomehnena niboca musa. “Tíre yoari” nicu, cuisāaja yuhū musare. ²¹ Tópu yu sūchu musare yuhure buo tisāachu yoaboca Cohamacu. Jipihtinare panopu ñano yoainare, ti ñaare cahyaerainare ñūcu tuaro cahyaihca yuhū. Numia mehne ñano yoainare, mūa mehne ñano yoaa numiare, wuana tiinare, ñaare goa pjainare ñūcu cahyaihca yuhū.

Paulo yahu batoaha

13 Mipure musa cahapu wahacu tia taha sūihca tópure. Pua taha tópure sū tuhsūi. Ō sehe nina Cohamacu yare ti joari pūi: “Cūi-rore mari buhiri dahrehto pano tiaro ti-rore yahusāno cahmana. Tiaro mariachu puaro ti-rore yahusāno cahmana. Ti ā yahusāri baharo buhiri dahre masija mari”, nina Cohamacu yare ti joari pūi. ² Panopure ñano yoaina cjiiri musa jichū musare, jipih-tina paina cūhure ahrire cuaro mehne yahui. Cū taha musa cahai pari turi sūcu musare ahrire yahui. Mipure musa mehne jieracu pari turi musare ahrire yahurocaih-tja tjoa: Mipure musa cahapure sūcu, panopu ñano yoainare paina cūhure potocāta buhiri dahreih-tja yuhū. ³ Yu ā yoachū ñūna, Cristo to

cūriro yu jia tiare to tuaa mehne yu buherire masinahca musa, musa masi duariro seheta. Cristo sehe musare dutiriro tua yūhdurucu sūriro jira. Ā jiro to tuaare ñona musare. ⁴Mari yoaro sehe pjacu tiro, to tuaare ñoaeraro tiro wiho jiriro yoaro sehe crusapu yariari jire. Ā yariaparota Cohamacu to tuaa mehne catiriro jira tiro mipure. Tiro crusapu jiro wiho jiriro to jiriro seheta sā cūhu wiho jiina jija. Ā jipanahta Cohamacu tuaa mehne jinahca musare yoadohona tana.

⁵Ā yoa musa sehe cāina musa basi ō sehe ni tūhotuga: “¿Potocāta Cristore wacū tuajari yūhu?” ni tūhotuga musa cāina. “¿Potocāta Cristo to cahmano seheta jijari yūhu?” ni tūhotuga musa cāina. Musa ā jierana to yaina waro jierara musa. To yaina waro musa jichu Cristo musa mehne jiro nina. ¿Tíre masierajari musa? ⁶Sā sehe “Jesu yaina, to yare yahu duti to cūrina jija”, ni mahñoina jieraja. To yaina, to cūrina waro jija sā. Tíre musa masichu cahmaja yūhu. ⁷Ā jicu musa ñano yoerahto sehe Cohamacure sini payoja musare. Āta sini payoja sā noare, Cristo yare musa yoahito sehe. Musa ā yoachū ñuna sā ō sehe niboca: “Corinto macainare buhena, quihōno buhei sā”, niboca sā painare sāre ño payo dutina. Ā ño payo dutieraja sā. Tí yaba cjihti jierara. Ā jina Cohamacure sini payona, musa ya cjihtire sini payona nija. Paina sāre “Mahñoina jira”, ti nipachuta noare, Cristo yare quihōno musa yoachū pinihtare cahma yūhdūaja sā. ⁸Ō sehe dihta musa noare yoachū cahmasāja sā.

Cristo yare, potocā jiare soro ni yahu masieraja sā. ⁹“Cristo cahmaare yoerara musa”, ni musare yahusā masierana, wiho jiina yoaro sehe jiboca sā, musa ñuchū. Noanohca. Noaare, Cristo yare yoana musa sehe wiho jiina jierara. Musa ā jichū ñuna wiho jiina yoaro sehe sā jipanahta wahcheja. Ā jina Cristore wacū tuaina, noano yūhtiina musa wahahtore Cohamacure sini payona nija sā musare. ¹⁰Ā jicu musa mehne jieracu musare ahri tjure joarocayui nija. Musa cahapu sucū, ñano yoaina musa jichū ñuchū musare buhiri dahrehtja. Cristo yūhure to dutiriro seheta musare buhiri dahrehtja. Yu ā buhiri dahrehtja sehe ahri tjure musare joarocayui nija. Cristo yūhure to dutiriro seheta musare yoadohotirota jija. Musare dojomehnehtiro jieraja.

¹¹Mipure yu coyeya, ahrire yahu baitohtja musare. Noano wahcheina jirucuga musa. Cristore wacū tua namoga. Ā yoana noaina, tirore yūhtiina jiga. Musa mehne macaina mehne cūno mehne jiga. Musa basi noano mehne jiga. Musa ā jichū ñuno musa mehne Cohamacu jirohca. Tiro marine cahma cahichū yoariro, marine noano mehne jichū yoariro jira. ¹²Ā yoana musa mehne macainare noano mehne piti bocasiniga. ¹³Jipihtina ō macaina Cohamacu yaina musare noa dutira.

¹⁴Mari puhtoro Jesucristo musare to cahīa mehne, Cohamacu cūhu musare to cahīa mehne Espiritu Santo musa mehne jirucuro to yoadohoa mehne noano jiga musa.

Gálatas

Galacia wama tiri yahpa macainare Jesu yainare joarocaha Paulo

1 Yuhũ Paulo, Cristo yare buhe du-tiro to cūriro jija. Masa ti cūriro jieraja yuhũ. Ā yoa masa sehe yuhũre Cristo buhe dutiro to cūhtore yuhũre yahuerare. Cohamacũ Jesu Pucũro sehe Jesure yariarore masoriro yuhũre cūre to yare buhehtirore. Jesucristo cūhu yuhũre cūre. Ti ā cūriro jicu ahrire joarocaja musare. ²Yuhũ musare Jesu yainare Galacia yahpa macainare noa dutija. Yuhũ mehne macaina Jesu yaina cūhu musare noa dutira. ³Cohamacũ mari Pucũ, mari puhtoro Jesucristo mehne musare noa dutija. Cohamacũ to yoad-ohoa mehne noano jiga musa. ⁴Tiro Jesucristo sehe mari ñaare yoari buhirire yariari jire. Mipũre masa ti ñaare yoari dacho jira. Ā jiro ahri dacho baroihta tiro yariari jire Cohamacũ mari Pucũ to cahmariro seheta marine yuhdũchu yoaro taro. Ā to yuhdũchu yoachũ ñaare mipũre ti yoariro seheta yoa duasi mari. ⁵Ā yoa jipihtia dachoripe tirore mari Pucũre ño payojihna. Āta yoajihna.

Cohamacũ masare to yuhdũchu yoahiti buhea cūnota jira. Paye buheapũ mariahna

⁶Cristo musare cahĩno to yaina cjihtire musare cūre. Ā jicu musare cūriro yare cohāna, soro jia buhea sehere dói musa cahmachũ ñũ cuaa wahaja yuhũ. ⁷Paye buhea noaa buhea yoaro sehe jia buhea waro jierara. Ti ā jierapachũta cāina musa cahai jiina musare cariboa, soro jia buheare buhea, noaa buheare ni dojomehne duara. ⁸Ā yoa musare sã buhe muhtari cjiirire mari cohāchu soro jia buhea sehere mari buhechu Cohamacũ marine buhiri dahrejaro. Tuhsũ,

anjo mũano macariro ā to buhechu tiro cūhũre buhiri dahrejaro Cohamacũ. ⁹Pano sã niriro seheta mipũre pari turi nihtja tjoa: Cūiro musare sã buherire cohāno, soro jia buheare to buhechu Cohamacũ tirore buhiri dahrejaro.

¹⁰Ā nicũ “Tiro dihta noano buheriro jira”, yuhũre ni dutii nieraja. Cohamacũ sehe yuhũre “Noano buhere muhũ”, to nichũ cahmaja. Masare wahchechu yoacu tacũ soro jia buheare buheboa yuhũ. Ā buhechu ne Cristo cahamacũno jieraboa yuhũ.

Paulo Cristo to buhe duti to cūriro to ji ducarire yahuha

¹¹Yũ coyera, ahrire musa masichũ cahmaja yuhũ: Noaa buheare yũ buheri cjiiri masa ya buhea jierara. ¹²Tĩ buhea masũnore yũ tuhori jierara. Ā jia paina masa yuhũre tí buheare yahuerare. Jesucristo sehe yuhũre tí buheare masichũ yoare.

¹³Panopũre yũ coyera judio masa ti yoaa tiriro sehe yũ yoariro jichũ masina musa. Ō sehe yoaa tii yuhũ: Jesu yainare tuaro ñano yoacu tinare noano wajã pahĩonoca duamai. ¹⁴Sã ñuchusũma ti buherire tuabiaro yoa duacu yũ coyera yũ cūno potori bucuarina yuhdoro yoa muhtariro jia timai yuhũ. ¹⁵Yũ ā jiro jipachuta yũ masa bajahto pano Cohamacũ yuhũre bese tuhsuri jire. Ā jiro yuhũre cahĩno tiro to yairo cjihto, to cahamacũno cjihto cūre yuhũre. ¹⁶Ā yoa to cahmano seheta to macũnore yuhũre masichũ yoare to yare noaa buheare judio masa jierainare yũ buhehti cjihtire. To ā yoachũ “¿Dohse ni buhero cahmacari yuhũre?” ni masare sinitu ñuerahi yuhũ. ¹⁷Ā yoa Cristo to cūrina yũ pano jirina cahapũre Jerusalẽpũre sinitu ñũi wahaerahi. Arabia yahpapũ wahai yuhũ. Ā jicu Damascopũ majare wihii tjoa.

¹⁸Tia cūhma baharo Pedrore ñucu wahai yūhu Jerusalēpu. Tópure pu somana waro jii. ¹⁹Á yoacu painare Cristo to cūrinare ñuerahi. Santiago dihtare mari puhtoro bahurore ñui. ²⁰Ō sehe ni joarocacu Cohamacu mehne ne mahñope joaeraja.

²¹Baharo Siria yahpapu, Cilicia yahpapu cūhure wahai. ²²Tópure yu suchu tí pjare Judea yahpapu jiina Jesu yaina yūhure ne ñu masierasinire. ²³Á jia ahri dihtare yūhure masi ducare tina: “Panopure marine ñano yoariro mipure noaa buheare to cohā duari buheare buhero nina”, ni masi ducare tina. ²⁴Yūhure ā masia Cohamacure “Noa yūhdariro jira”, nire tina.

Paina Cristo to cūrina Paulore piti boca dóihita cahmana

2 Catorce cūhmari baharo pari turi Jerusalēpu wahacu Bernabé mehne wahai. Tito cūhu wahare yūhu mehne. ²Cohamacu yūhure to waha dutichu tópure wahai. Jerusalēi jicu Jesu yaina puhtoa ti sahsero ti cahmachuchu ñucu noaa buheare judio masa jierainare yu buherire yahui tinare. “¿Judio masa jierainare noaa buheare yu buhechu noajari, masa tūhotuchu?” nicu, ā ni yahui tinare. Á ni yahui tinare panopu yu buherire mipure yu buheri cūhure ti noano masihto cjihtore, tíre “Noana”, ti nihto cjihtore. Ti ā nierachu yu buheri cjiri yaba cjihti jieraboa. ³Yūhu mehne macariro Tito judio masuno jierariro jiro, circunciōre yoaerariro jira. To ā yoamahnoerariro to jipachuta Jesu yaina puhtoa “Mūhu cūhu circunciōre yoaga”, nierare tirore. ⁴Ti ā nierapachuta cāina “Jesu yaina jija”, ni mahñoina wacūenoca sã mehne sãa, tirore circunciōre ti yoachu cahmamare tina. Jesu yaina mari jina “Panopu macaare ti dutiriro sehe yoana tí mehne yūhdusi”, ni tūhotuja mari. Mari ā ni

tūhotuina jichu mari yoaare ñu duaa tina sehe sã mehne mahño sãare. Á yoaa sã ñuchusuma ya dutiare yoa duti duaa, tí dutiare ño payorucuina jichu yoa duamare sãre tina. ⁵Ti ā yoa duapachuta noaa buheare quihōno masa noano masihto cjihtore ne mahanocā mehne tūho duarahi sã tinare.

⁶Á yoa Jesu yaina puhtoa noaa buheare yu buherire ti tūhori baharo “Ō sehe ni yahu namoga judio masa jierainare”, ni yahu quihōerare tina yūhure. Jesu yaina puhtoare wiho jiina yoaro seheta tūhotuja tinare. Cohamacu sehe jipihtinare cūno potori tūhotura. Á jicu āta tūhotuja yūhu cūhu. Tina sehe yu buheriro sohtoare buhedoho masierare. ⁷Á jia judio masa jierainare yu buhehtire Cohamacu yūhure to cūrire tūhoa, “Tóihita jira”, nire tina. Judio masare buheare Cohamacu Pedrore to cūriro seheta tó seheta yūhu cūhure cūre judio masa jierainare yu buhehtiro cjihtore. ⁸Judio masare Pedrore buhe dutirotira yūhu cūhure tirota buhe dutire judio masa jierainare.

⁹Á jia Santiago, Pedro, João mehne “Jesu yaina puhtoa”, ti niina noaa buheare buherire Cohamacu yūhure to cūrire tūhoa “Tóihita jira”, nire tina. Á niata yūhure Bernabé mehne noano wahchea mehne wamomaca ñahare sãre piti tia. Á jina judio masa jierainare buheina jija sã. Santiago cūhu sehe judio masare buheina jira. “Áta wahajaro”, nii sã sã basi. ¹⁰Á nipahta tina judio masare pjacuoinare yoadoho dutire sãre. Pjacuoinare yoadohohtiro jiita nija yūhu.

Antioquíai Paulo Pedrore tuhtiha

¹¹Á yoa Pedrore Antioquíapu to sūri baharo quihōno to yoaerari buhiri tuhti tirore. ¹²Ō sehe yoare tiro: Santiago to warocaina Antioquíapu ti sūhto panocā, Pedro sehe judio masa jieraina mehne

churo nire. Santiago warocaina judio masa jierainare “Circuncisiõre yoaga” niina, judio masa panopu macaina ya dutiare yoa dutiina jire. To ã churo watoi tina sure. Æ churiro jiparota tina to cahapu ti suchu ñuno, tinare cuiro, Pedro judio masa jierainare duhunoca, pari turi tina mehne churo wahaerare. “Mipure wihiina yuhure tuhtiri” nino, judio masa jieraina mehne chu namoerare. ¹³To ã mahño cureriro seheta to yoachu ñua, paina judio masa cūhu tireore ñu cū, tina cūhu tó seheta yoare. Æ jiro Bernabé masa noariro jiparota tina yoaro seheta yoare tiro cūhu. ¹⁴Æ jicu judio masa jierainare ti duhuri buhiri noaa buhea ti niriro seheta tina ti yoaerachū ñūcū, jipihtina Jesu yaina panoi Pedroro yahui: “Judio masa ya dutiare yoa dutiina ti ñurocaroi judio masa jieraina mehne mu chu duaerachu ñua õ sehe ni tuhotuboca tina judio masa jieraina: “Jesu yaina dihta jina judio masa yoaro sehe yoajihna mari cūhu”, ni tuhotuboca. Æ ni tuhotuchū yoara muhu tinare. ¿Dohseacu tinare judio masare ñu cūchu yoa duajari muhu ã piti ti duhucu? Judio masuno jipaihta judio masa jieraina yoaro sehe yoamare muhu. Æ yoacu judio masa yoaro sehe yoaerare muhu. ¿Æ yoariro cjiro jipaihta dohseacu judio masa jierainare judio masare ñu cūchu yoa duajari muhu?” nii tireore.

Judio masare paina masa yoaro seheta Jesure wacū tua dutiha Cohamacu

¹⁵Sã sehe judio masa masa bajuana, paina ñano yoaina judio masa jieraina yoaro sehe jieraja sã. ¹⁶Æ jiina sã jipachuta Cohamacu dutiare Moise cjirore to cūrire yoarina sã jichū “Noaina jira”, ni ñeraboa Cohamacu sãre. Tíre mari masija. Æ yoa Jesucristore mari wacū tuachu Cohamacu marine “Noaina jira”,

ni ñunohca. Tíre masina, sã cūhu Jesucristore wacū tuaja tireore sã wacū tuari mehne sãre “Noaina jira”, Cohamacu to ni ñuhto cjihtore. To dutia cjirore sã yoarina jichū “Noaina jira”, ni ñeraboa Cohamacu sãre. Ne tí dutia yoaa mehne noaina jierara masa, Cohamacu to ñuchū.

¹⁷Wiho mejeta Cristore mari wacū tuaa mehne noaina Cohamacu yaina mari waha duachu, ñaina mari jiare masichū yorohca Cristo. ¿Cristo mari ñaare marine masichū yoaro ñaina marine jichū yoajari tiro, musa tuhotuchū? Ne mahanocã mehne yoaerara. ¹⁸Sã dutia yoaa mehne yuhdu duamarina cjirore jipanahta tí buheare cohã. Æ cohãpanahta pari turi tí buheare yoana tí dutiare sã yoa pahnoerari buhiri potocãta buhiri tinahca sã. ¹⁹Cohamacu dutiare Moise cjirore to cūrire cūno pjaeraja mari. Æ jia, tí dutia marine duti namoerara. Cohamacu to tuaa mehne to yaina jija mari. Cristo mehne crusai yariaina yoaro sehe jija mari. ²⁰Æ jina yariariro to mu sūro to yoaerariro seheta mari mu sūro yoaeraja mari. Cristo ya tuaa mehne yoaja. Æ yoa mipure Cohamacu macunore wacū tuaa mehne jirucuja mari. Tiro Cohamacu macuno marine cahire. Æ jiro mari ya buhirire yariare. ²¹To dutia yoaa mehne noaina Cohamacu yaina mari wahachu Cristo to yariari sehe ne yaba cjihti jieraboa. Cohamacu marine to cahirire, Cristo to yariarire wiho jia yoaro sehe jichū yoa duaeraja yuhū sehe. Æ jicu “Dutia mehne yuhduihca”, ne nieraja yuhū.

Cohamacu dutia Moise cjirore to cūrire, wacū tuaa cūhure yahuha Paulo

3 Yu coyea, musa Galacia macaina tuho masieraina ji wama tira musa. Jesucristo crusai to yariari buheare jipihtina ti ñurocaroi musare yahui. ¿Æ jina

mipure to yare msa yuhduracahtore paina msare ti dojomehnechũ dohse yoana tinare yuhtiri msa? ²Ahrieta yahu duaia msare: Dutiaere msa yoaa mehne Espiritu Santore cjuacerara msa. Noaa buhea sehere tuhona Cristore msa wacũ tuaa mehne Espiritu Santore cjuara msa. ³Espiritu Santo mehne msa Cristo yaina ji ducana mipure msa mũ sũro msa yoaa mehne Cohamacũ cahapũ msa waha duachũ ña nina. Tũho masieraina jira msa, ã yoana. ⁴¿Noaa buheare msa yoari buhiri payũ tahari msa ñano yuhdũna wiho warota ñano yuhdũnocana niri msa, ã wahana? Wiho waro jierara msa ã wahari. ⁵¿Dohse msa yoari wapa Espiritu Santore msare wari Cohamacũ, msa tuhutuchũ? To dutiare msa yoari wapa waerare tiro. To buheare noano msa tuhochũ ñano tirore msa wacũ tuari baharopũ Espiritu Santore ware tiro. ¿Cohamacũ msa watoi to tuaa mehne yoa ñono dohse jiro baro ã yoa ñojari tiro, msa tuhutuchũ? To dutiare msa yoari wapa ã yoa ñoerare tiro. To buheare noano msa tuhochũ ñano tirore msa wacũ tuari baharopũ ã yoa ñore tiro.

⁶Abrahã cjiro Cohamacũre wacũ tuaa tiri jire. To ã yoachũ tirore Cohamacũ “Noariro jira”, ni ñua tiha. ⁷Ã jina ahri yũ nihtire masiga msa: Cohamacũre wacũ tuainata potocãta Abrahã cjiro panamana ji turainana waro pa turu macaina yoaro sehe jira. ⁸Panopũ Cohamacũ yare ti joari pũi õ sehe ni yahua tiha: Judio masa jieraina Cohamacũre ti wacũ tuachũ ñano “Noaina jira”, ni ñuna Cohamacũ. To ã ni ñuhtore Cohamacũ pano masiyuro, tiro noaa buheare Abrahãre pano yahu mũhta tuh-sua tiha. “Mũhũ mehne ahri yahpa macainare jipihtinare noano yoaihtja”, nia tiha Cohamacũ Abrahãre. ⁹Ã jiro Abrahã cjiro Cohamacũre noano tuho

wacũ tuaa tiha. To ã wacũ tuachũ ñano Cohamacũ tirore noano yoaa tiha. ã yoa paina masa Cohamacũre ti wacũ tuachũ, tina cũhũre noano yoarohca Cohamacũ, Abrahã cjirore to yoariro sehta.

¹⁰“Moise cjirore to cũri dutia mehne Cohamacũ yaina wahanahca”, ni tuhutu-ina buhiri tiina jira. To joari pũi ãta nina: “Cohamacũ dutiare to ya tjui ti joarire yoa pahũoeraina buhiri tiina jira tina jipih-tina”, ni joaa tiha. ¹¹Cohamacũ yare ti joari pũi õ sehe nina: “Cohamacũre wacũ tuainare ‘Noaina jira’, ni ñuna Cohamacũ. ã wacũ tuaa jipihtia dachoripe Cohamacũ mehne ã jirucuahca”, nina Cohamacũ yare ti joari pũi. To ã nichũ ahri yũ nihtire mari noano masija: To dutiare ti yoaa mehne masa noaina wahaerara, Cohamacũ to ñũchũ. ¹²Dutia yoaa mehne Cohamacũ cahapũ waha duaina Cohamacũre wacũ tuaerara. Õ sehe nina Cohamacũ yare ti joari pũi: “Dutia yoaa mehne noaina waha duainare tí dutiare yoa pahũono cahmana tinare, duhsaro marieno”, nina Cohamacũ yare ti joari pũi. Wiho mejeta to dutiare yoa pahũoeraina jira masa. ã jia Cohamacũ ñurocaroi noaina waha masierara.

¹³Ã jia tí dutia marine buhiri tichũ yoara. Mari ã buhiri tichũ ñano Cristo sehe to basi mari yaro jiborirore buhiri tiriro waharo, mari buhiri tiborirore tiro sehe cohãbasare marine. Cristo to buhiri tihtore yahuro õ sehta ni joaa tiha panopũre: “Jipihtina yucũcũpũ ti duhu õina buhiri tiina jira”, ni joaa tiha panopũre. ¹⁴To ã ni yahu joariro sehta ã yoari jire Cristore. Cohamacũ Abrahã cjirore “Ahri yahpa macainare noano yoaihtja”, to niriro sehta yoaro niri jire masare. ã yoari jire Cristo mehne. Tiro yariari jire Cohamacũ judio masa jierainare noano to yoahito cjihtore. ã yoaro Jesucristo mehne Cohamacũ Abrahãre to niriro sehta tuh-suri jire. ã yoari jire tiro tirore mari

wacū tuari baharo Espíritu Santore mari cjuáhto cjihtore.

**To buherire quti mehne
yahu namoha Paulo**

¹⁵ Yŭ coyea, masa ya quti mehne tí yŭ nirire yahuihtja musare: Cũiro paio mehne “Ó sehe yoajihna mari”, ni cũno mehne ti joa cŭpachuta paio tí pũre soro ni dojomehne joa namo masierara. Ā yoa tuhsŭ, tí pũre “Quihõno jierara”, ni masierara tiro. ¹⁶ Tí pũre cũno potori ti joa cũriro seheta “Musare noano yoaihtja”, Cohamacu nino, Abrahãre to panamino ji turiariro cũhure ni yahu cũno nia tiha. Ā ni yahu cũno paina to panamana ji turiainapũre ni yahu cũno niera tiha. Cũiroreta to panamino ji turiariro dihtare ni yahu cũno nia tiha Cohamacu. Tiro Abrahã panamino Cristo jira. ¹⁷ Mipũre noano yahuihtja musare: Abrahã cũhure Cohamacu “Musare noano yoaihtja”, to ni cũri baharo cuatrocientos treinta cŭhmari yuhdũri baharo to dutiare Moise cjirore cŭa tiha. Ā cũno Abrahã cũhure Cohamacu “Musare noano yoaihtja”, to yahu cũri cjirore boro taro niera tiha. ¹⁸ Cohamacu marine yuhdũchũ yoaro, dutiare mari yoaa mehne marine yuhdũchũ yoerara. Dutiare yoaa mehne mari yuhdũchũ Cohamacu “Musare noano yoaihtja”, to ni yahu cũri sehe yaba cjihti jieraboa. Wiho mejeta to dutia mariasinichũpũ Abrahãre Ā ni cũ muhta tiha.

¹⁹ Ā jiro dohse jiro baro to dutiare cũri Cohamacu? To dutiare cũha tí dutiare mari yuhdũrcarire mari noano masiht sehe. Ā jiro panopũre Cohamacu “Mũ panami mehne masare noano yoaihtja”, Abrahãre to niriro to wihihito pano Cohamacu to dutiare cjuaa timaha masa. Cohamacu to dutiare to cũchũ to anjoa sehe tíre duti turiaa tiha. Ā yoa Moise cjirore ti cũchũ, tiro sehe

masare cũ turiaa tiha tjoa. ²⁰ To dutiare Moise cjiro to cũ turiachũ Cohamacu to basita masare cũera tiha. Ā cũera-parota Cohamacu “Mũhure noano yoaihtja”, Abrahã sehere ni yahu cũno, to basita Ā ni yahu cũa tiha.

²¹ Cohamacu Moise cjirore to dutiare cũno, tó pano Abrahãre to ni yahu cũriro “Yŭ niriro sehe yoasi yuhũ”, nino niera tiha tiro. Abrahãre to niriro seheta yoaro taro nia tiha. To dutia yoaa mehne Cohamacu yaina wahana tí pja pinihta dutiare mari yoaa mehne noaina wahaboa mari. ²² Wiho mejeta Cohamacu to yare ti joari pũ sehe jipihtina ñaa buhiri tiina, ñaare duhu masieraina ti jirire yahua tiha. Ā ni yahua tiha Cohamacu “Musare noano yoaihtja”, pano to niriro seheta to yoahito cjihtore. Ā yoaro Jesucristore wacū tuainare noano yoara tiro pano to niriro seheta.

²³ Jesucristo ya buheare mari tũhohto pano, tirore mari wacū tuahto pano Cohamacu Moise cjirore to cũri dutia dihtare masimahi mari. Ā masimarina jina ñaa buhiri tiina, peresupũ jiina yoaro sehe tí ñaare duhu masieraina jina, dutia dihtare masiina jimahi mari. ²⁴ Ā jia Cristo to wihihito pano Cohamacu dutia sehe marine yahure dahra cohtariro to pũhtoro pohnare to yahuriro seheta. Ā yahure marine baharo Cristore mari wacū tuaa mehne Cohamacu “Noaina jira”, marine to ni ñũhto cjihtore. ²⁵ Mipũ pinihtare Cristore mari wacū tuari pja jira. To Ā jichu dahra cohtariro yoaro sehe to dutia sehe marine yahu namoerara. Marine dutirucu namoerara. ²⁶ Ā jina Cristo Jesure wacū tuaina jina Cohamacu pohna jira musa. ²⁷ Jipihtina musa co mehne bautisarina jira Cristo yaina musa jiare ñona tana. Ā yoana to yaina jina, Cristo yoaro sehe jiina wahana nina musa. ²⁸ Mipũre pũa curua jierara musa. Judio masa jieraina, judio masa mehne pũa curua jierara

musa. Dahra cohtaina, dahra cohtaina jieraina mehne pua curua jierara musa. Mua, numia mehne pua curua jierara musa. Jipihtina musa Cristo yaina jina, cū curuata jira musa. ²⁹ Cristo yaina jina, Abrahā Cohamacure to wacū tuariro seheta yoaina jina, Abrahā panamana waro jira musa. Musa ā jiina jichū Cohamacu Abrahāre “Musare noano yoaihtja”, to ni yahu cūriro seheta musa cūhure noano yorohca tiro. Cristo yaina musa jichū ñuno musare noano yorohca.

4 Õ sehe jira ahri quiti mehne yu yahu namochu: To pucuro baharo to yare nahtiro wahma bucuariro jiropu jipihtia to ya jipachuta dahra cohtariro yoaro seheta ne paye baro maerariro yoaro seheta jira tiro. ² ã jia tiro wahma bucuariro to jichū tireore ñu wihboina to yare ñu wihbora. ã yoa to pucuro to quihōri pja mu suchupu to pucuro yare cjuarohca to macuno. ³ Õ seheta wahma bucuariro yoaro seheta jimai mari cūhū. ã jiina mari jisinchū dahra cohtainare ti dutiriro seheta Moise cjirore to cūri dutia, mari ñuchusuma panopu macaina ti cūri dutia cūhū marine dutisinimare. ⁴ Mari ā jiina jipachuta to quihōri pja mu suchū Cohamacu to macunore warocari jire. ã to warocachu to macuno cūcoro numino mehne masa bajuari jire. ã jiro tiro judio masuno masa bajuaro Cohamacu dutia Moise cjirore to cūri cjirore yorucuriro jiri jimare. ⁵ Mari cūhure tí dutiata dutisiniri jimare. ã jiro marine yuhdūchu yoahrtiro cjihtore warocari jire Cohamacu to macunore, to pohna waro mari wahahto cjihtore.

⁶ ã jiro to pohna musa jichū ñuno, Cohamacu macuno to yairo Espiritu Santore musa mehne jihtirore warocari jire Cohamacu. To yairo Espiritu sehe Cohamacure “Mai”, niriro jira. ⁷ ã jina musa Cohamacu to yoadohoa mehne dahra cohtaina jierara musa mipure. To

pohna jira musa. ã jina to pohna jina, Cohamacu to wahtire cjuanahca musa.

Paulo Galacia macainare Jesu yainare cuisāha

⁸ Panopu Cohamacure musa masierasiniina jina “Cohamacu jira”, musa nia masurine ño payona tí masurine dahra cohtaina jiri jimare musa. Musa ā ño payoina potocāta cohamana waro jierari jire. ⁹ ã jirina cjirore jipanahta mipure Cohamacu warore masina musa. Jierara. Tiro pinihta musa sehene masina. ¿To ā masipachuta dohse yoana ahri yahpa macaina ya buhea sehene cahmajari musa tjoa? Ti ya buhea mehne noano yuhdū duapanahta ne yuhdūsi musa. ã yoa baharo Cohamacu jipihtia dachoripe musare to wahtire cjuasi musa. ã yoana tí buhea mehne yuhdū duana, pari turi ti ya dutiare dahra cohtaina yoaro sehe wahana nica musa. ¹⁰ Cāa dachorire, cāa sūrine, cāa puhibucure, cāa cūhmarine bose numurine dahre dutira musa. “Mari ā yoaa mehne dutia mehne yuhdūnahca”, ni tūhotumana musa. ¹¹ Musa ā ni tūhotuchū musare tuaro yu buheri cjirore yaba cjihti jieraboca, yu tūhotuchū.

¹² Yu coyera ahriro tuaro dutiiltja musare: Cristore yu tūhoturiro seheta musa cūhū tireore tūhotuga. Panopu dutia yoaa mehne yuhdū duaina jierari jimare musa judio masa jieraina jina. Mipu sehene yuhū cūhū musa yoaro seheta wahai dutia yoaa mehne yuhdū duaeracu. ã jina Cristore yu tūhoturiro seheta musa cūhū āta tireore tūhotuga. Musa mehne yu jichū ne ñano yoarerare musa yuhure. ¹³ Ahriro masina musa. Tōpu dohatiriro jicu, pa sehenu waha masieracu noaa buheare musare buhe dūcai. ¹⁴ Yu ā dohatiriro jipachuta, yuhure pumeborina musa jipanahta, yuhure yabierare

musa. Ā jina yuhure “Waharisa”, nierare musa. Ā jina Cohamacu yairo anjore, Jesucristo cūhure musa piti bocaboriro seheta yuhure noano piti bocare musa. ¹⁵ Ķ Mipure dohse wahari yuhū mehne musa wahchea? Musare ahrire nihtja: Cūno pjana musa caparire orewe na yuhure waboa musa. ¹⁶ Ķ Yuhū mehne macaina jipanahta mipure quihōno musare yū yahuchū űn tuhtijari musa yuhure?

¹⁷ Sohō jiina soro ni buheina musare tuaro cahmasāana. Ti tuhotua soro jira. Noaa jierara. Tina musare yuhure yuhdurucachū cahmana, tina sehere musa cahmahto sehe. ¹⁸ Noano mehne musa noano wahahto sehe musare ti cahmasāachū noa niboa. Ā yoa tōpūre yū mariachū cūhure ti ā cahmasāachū noa niboa. ¹⁹ Yū pohna, niĵi wahcōricoro to űnano yuhdūro seheta musare űnano wacū tuhotuja yuhū. Pū Cristo yoaro sehe musa jichupū musare wacū duhuiha. ²⁰ Michapucā musa mehne jicū tuhtiro marieno wahchea mehne musa mehne yū suhūduchū noaboa yuhure. Musare pjīro tuhotui niĵa yuhū.

Agar Sara mehne ti jiri cjirire yahuha Paulo

²¹ Tuĵoga musa yuhure. Cohamacu to dutiare yoaa mehne yuhdū duaina jipanahta to dutia sehere noano masierara musa. ²² Ō sehe nia tiha Cohamacu yare ti joari pūi: Abrahā pūaro pūcūro jia tiha. Tirore dahra cohtaricoro Agar wama tiricoro mehne cūiro pohna tia tiha. Ā yoa to namono poto Sara wama tiricoro mehne cūiro pohna tia tiha. ²³ Wiĵo mejeta tirore dahra cohtaricoro macūno masa mari yoaro seheta masa bajuaa tiha tiro. To namono poto macūno sehe Cohamacu “Cūirocā pohna tinahca musa”, to niriro seheta masa bajuaa tiha tiro sehe. ²⁴ Ahri quti marine noano piti dahre yahura: Cohamacu

pūa taha masare “Musare yoadohihtja”, to nia yoaro seheta jira ahri numia pūaro numia. Cūcoro Sinaí wama tidupū to dutiare wari yoaro sehe jira. Ticoro Agar jira. Ticoro mehne mari piti dahre buhechū judio masa cūhū dutiare yoarucua mehnetā yuhdū duaina ticoro yoaro sehe jira. Tina dahra cohtaina yoaro sehe jira. ²⁵ Ticoro Sinaí wama tidū Arabiapū jidū yoaro sehe jiricoro jira. Mipure Jerusalē macaina judio masa dutia yoaa mehne yuhdū duaina dutiare dahra cohtaina yoaro sehe jira. Ā jia mari piti dahre buhechū tina ticoro yoaro sehe jira dahra cohtaricoro to jia tiro sehe. Tina Cohamacu pohna jierara. ²⁶ Pacoro sehe Abrahā namono poto mūanopū jiri maca Jerusalē wama tiri maca yoaro sehe jira, mari piti dahre buhechū. Ticoro dahra cohtaricoro jieraro, to macūno cūhū dahra cohtariro jierari jire. (Ā yoa Jesucristore wacū tuaina mari jina, Sara macūno yoaro sehe jija. Mari cūhū Cohamacu Moise cĵirote to cūri dutia mehne yuhdū duaina jieraina jina, dahra cohtaina yoaro sehe jieraja.) ²⁷ Cohamacu yare ti joari pūi ō sehe ni joaa tiha Cohamacu pohna warore, Sara yoaro sehe jiricore yahuro:

“Pohna marienicoro, wahcheĵa.

Ā yoa wahchea mehne sañurucuga, niĵi wahcōno purīnore masieraricoro jico.

Mūhū sehe manu tiricoro yuhdoro payū pohna ticohca.

Ā jico wahcheĵa”,

ni joaa tiha panopūre to pohna tihto pano Sara yoaro sehe jiricore yahuro.

²⁸ Yū coyēa, Cohamacu to niriro seheta Isaa masa bajuaa tiha. Mari cūhū tiro yoaro sehe Cohamacu to niriro seheta to pohna jija mari. ²⁹ Wiĵo mejeta tí pĵapūre masa yoaro sehe masa bajuariro űnano yoaa tiha pairore Espīritu Santo to niriro seheta masa bajuarirore. Mipū

cūhure āta jira to jiro sehta. ³⁰Wiho mejeta ō sehe nina Cohamacu yare ti joari pūi: “Dahra cohtaricoro macuno to pucuro yare cjuā masierara. To namono potō macuno sehe to pucuro yare cjuā masina. Ā yoa ticorore dahra cohtaricoro cjirore to macuno mehneta cohānocahga”, ni joaa tiha. ³¹Yū coyea, ne dahra cohtaricoro pohna yoaro sehe jieraja mari. Wiho mejeta to namono potō pohna yoaro sehe jija mari.

Jesucristo yare noano tuho ñahana, tíre duhuena tjiga

5 Dutia yoaa mehne yūhdu duaina tí dutiare dahra cohtaina ti dutipeina yoaro sehe jira. Cristo yaina wahana ti dutipeina mari jiare wijaana, Cristo mehne yūhduja mari. Ā to yūhdūchu yoarina jina, to yare ā yoarucuga, “Tí dutia yoaa mehne yūhdūnahca”, ni tūhoturo marieno.

²Mipure yūhū Paulo ahrire yahuihtja mūsare: “Circuncisiōre mari yoari mehne yūhdūnahca”, mūsa ni tūhotuna, Cristo mūsare to yoadohore yaba cjihti jierachu yoana nina mūsa. ³Jipihtina circuncisiōre mūsa yoari mehne yūhdu duainare pari turi ō sehe ni yahuihtja yūhū: Circuncisiōre mūsa yoari mehne yūhdu duana, paye Cohamacu dutiare yoa pahñoerana, yūhdūsi mūsa. ⁴Dutia yoaa mehne yūhdu duaina jina Cristo sehere cohāre mūsa. Ā yoaina jina, Cohamacu mūsare to cahīre, mūsare to yūhdūchu yoa duaire cahmaerara mūsa. ⁵Wiho mejeta mari sehe Espiritu Santo to tuaa mehne Cohamacure wacū tuaja. Mari ā wacū tuachu “Noaina, ñaa buhiri marieina jira”, ni ñūna Cohamacu marine. To ā ni ñūchu marine to yūhdūchu yohtore masija mari. ⁶Cristo Jesu yaina jina circuncisiōre mari yoachu ne yaba cjihti jierara. Circuncisiōre mari yoerachu cūhure ne yaba cjihti jierara. Wiho mejeta Cristo

pinire wacū tuana painare cahīnahca mari. Tí wacū tuaa sehe wiho waro jia nierara. Tí waro jia nina.

⁷Mūsa Cristore noano wacū tuasinimare. ¿Diina baro noaa buheare yūhdūruca dutiari mūsare? ⁸Ti ya buhea Cohamacu mūsare to pohñare cūriro to ya buhea jierara. ⁹Ahri yū nihtire wacūga mūsa: Mahanocā pāo bucuaro trigo yūbure noano sahserucu sūra. (To ā sahserucu sūriro sehta yū coyea judio masa ya buhea sehere mūsa cahmarucūchu ñua payu masa mūsa mehne macaina cūhū tí buheare cahmaboca tina cūhū.) ¹⁰Mari puhtoro Cristore wacū tuaja mari. Ā jicu ahri yū nihtire masija yūhū. Cristo to yoadohoa mehne paye buheare baharopure cahmasi mūsa. Tíre masija yūhū. Mūsare dojomehne cohtaina dohse jiina jica. Tinare Cohamacupu buhiri dahrerohca.

¹¹Yū coyea, “Dutia yoaa mehne yūhdūnahca”, ti nia buheare yū buheriro jichū judio masa yūhure ñano yoaeraboa. Cristo crusai to yariari buheare yū buheri buhiri tina ñano yoara yūhure. Cristo ya buhea mehne judio masa ya buheare yū buhe morechu yūhure ñano yoaeraboa tina. ¹²Mūsare dojomehne cohtaina mūsare mahanocā mūsa pjacu macari cahsarocāre yihso dutiina ti basi dihta yihsojaro.

¹³Yū coyea, “Dutia mehne yūhdūnahca”, ni tūhotu dutierara Cohamacu mūsare. Wiho mejeta “Dutia mehne yūhdūnahca”, ni tūhotuina jierapanahca “To dutiare yūhdūrucajihna”, ni wacūena tjiga. Ā yoa mūsa mehne macainare cahma cahīna, tinare dahra cohtaina yoaro sehta yoadohoga tinare. ¹⁴Cūnota dutiare noano yoana, Cohamacu dutiare yoa pahñoa nija mari. Ō sehe jira tí dutia: “Mū basi mū cahīno sehta mū

cahai jiina cūhure cahīga”, ni dutia tiha. ¹⁵Ā jina wahiquina suaina yoaro sehe mūsa basi cahma sayoena tjiġa. Tuhsu, cahmachena tjiġa. Mūsa mehne macaina jipihtinare “Dojomehneri”, nina noano yoaga mūsa.

**Masa űaare ti goa pjaare,
Espíritu Santo to cahmaa
cūhure yahuha Paulo**

¹⁶ Espíritu Santo to cahmariro seheta jirucuga mūsa. Ā jina mūsa űaare mūsa goa pjaare yoarena tjiġa. ¹⁷ űaare mūsa goa pjachu tíre mūsa yoachu, Espíritu Santo űu yabira. To ā űu yabichu tí űaare duhunahca mūsa. Ā jina űaare mūsa goa pjana, tíre yoana, Espíritu Santore űu tuhtira mūsa. Ā űu tuhtina to cahmano sehe yoerara mūsa. Ā jina mūsa goa pjaare mūsa yoa duaro seheta yoa masierara mūsa. ¹⁸ Ā yoa Espíritu Santo to cahmaare yoaina jina “Dutia mehne mari yūhdunahca”, ni tuhotuerara mūsa.

¹⁹ Masa űaare ti yoare mari noano masi tuhsuja. Ō sehe jira tí: Numino mehne űano yoaa, mūno mehne űano yoaa, wūana tia, tó sehe jia űaare buo tiro marieno yoaa, ²⁰⁻²¹ “Cohamacu jira” ti nia masarine űo payoa, puti sitea, paye yaya ti yoaa, űu tuhtia, cahma sayoa, doaa, suaa, to basi dihta cjuā duaa, űu tuhti cahma tju waa, cū curua macaina pa curuare űu tuhtia, paina yare tuaro cahmaa, cahaa, cahaa bose numarine dahrea, tó sehe jia jira űaare yoaa. Panopu musare cuaro mehne yu niriro seheta mipu cūhure nihtja: Tí barore yoaina puhtoro Cohamacu to suho jiropure muanopure ne susi.

²²⁻²³ Espíritu Santo sehe marine ō sehe yoaina jichu yoara: Masare cahīina, wahcheina, cuiro marieina, so suaeraina, painare noano yoaina, noaina, duhuro marieno Cohamacu cahmaare yoaina, painare yūhdurūca dueraina, noano mehne yoaina, ti

űaa goa pjaare yoeraina jichu yoara marine tiro. Tó sehe yoainare “Ā yoarena tjiġa”, ne cūiro nierara. ²⁴ Cristo Jesu yaina jina mari űaa goa pjaare yoa namoeraja. ²⁵ Espíritu Santo marine Cohamacu mehne ā jirucuchū yoarohca. Ā jina to cahmano seheta yoarucina jijihna mari.

²⁶ “Painare masi yūhdurūcaja sā”, ni tuhotuina jiena tjiijihna mari. Ā jina mari mehne suachu yoarena tjiijihna painare. Ā yoana mari mehne macaina noano ti wahachu űūna tinare sua tuhotuena tjiijihna.

Mūsa mehne macainare yoadohoga

6 Yu coyea, cūiro mūsa mehne macariro to űaare yoachu űūna, Cristore noano wacū tuaina jina niji siaroca dero tirore yoadohoga noare pari turi to yoahito cjihto sehe. Ā yoana mūsa cūhu “űaare goa pjari”, nina noano yoaga. ² Mūsa mehne macaina ti űano yūhduchū cūhure yoadohoga tinare. Mūsa ā yoana Cristo to dutiro seheta yoana nina mūsa.

³ Cūiro wiho jiro jiparota “Painare yūhdurūcaja”, ni tuhoturo, to basi mahūoa dihtare tuhoturiro jira. ⁴ Cāina mūsa sahsero mūsa yoarire “Ahri noaa jira. Ahri űaa jira”, ni masiga. Ā masina mūsa yoari noaa jichu mūsa basi wahchenahca. Ā jina “Painare yūhdurūcaja”, nisi mūsa. Ā nierana painare mūsa yūhdurūcari mehne wahchesi mūsa. ⁵ Ā jiro Jesu yairo to mū sūro Cohamacu yare yoara. Pairo masūno tirore tíre yoadoho masierara.

⁶ Ā jina noaa buheare buherirore paye baro mūsa cjuāare tirore waga mūsa to yahuare tuhoina.

⁷ Toari masūno űaa yaparire toaro űaa dichare cjuarohca. Noaa yaparire toaro noaa dichare cjuarohca. (Tó se-heta mari cūhu űaare yoana űaare cjuanahca. Ā jiro mari űari buhiri

buhiri dahrerohca. Noaare yoana noaare cjuanahca. Ā jina noano jinahca.) Ā jina “Sā ñaare yoachū Cohamacū sāre buhiri dahresi”, ni tuhotuena tjiġa. Ñaare yoaina Cohamacūre bujupeina jira. Cohamacūre bujupeinare buhiri dahrerohca tiro. ⁸ Mari ñaare goa pjana, tře yoana, tí mehneta yarianahca. Ā jina pichacapū wahanahca. Espírītu Santo sehe to cahmaare mari yoachū tiro marine jipihtia dachoripe muanopū jirucuchū yoarohca. ⁹ Ā jina noaare yoana tře pumena tjiġihna mari. Cohamacū to quihōri pja jichū noaare cjuanahca mari pumerana. ¹⁰ Ā jina jipihtinare mari ñūinape noano yoajihna mari. Mari coyea Jesu yaina pinihtare paina yuhdoro noano yoajihna.

Paulo yahu batoaro, noa duti batoaha

¹¹ Bujuā letrari mehne yū wamomaca waro mehne musare yū joarocarire ñūga mūsa. ¹² Mū sare circuncisiōre yoa dutiina masa tinare ño payochū cahmana. Cristo crusai to yariari buheare mari buheri buhiri masa ñano yoara marine. Ti ā yoachū ñūa ahrina mū sare circuncisiōre yoa dutira “Judio masa ya buhea sehere yoaja”, nia. Ā ti yoa dutichū judio masa tinare ñano yoeraboca. Ā jia circuncisiōre yoa dutira. ¹³ Mū sare circuncisiōre yoa dutiina sehe Cohamacū to

dutiri cjiire yoa pahñoerara. Ā jia circuncisiōre musare ti yoa dutiri baharo mūsa yuhtichū ñūa, judio masa tinare musare dutiinare ño payoboca. Ti ā ño payohti cjihtire musare circuncisiōre yoa dutira tina. ¹⁴ Mari puhtoro Jesucristo crusai yariariro ya buhea dihtare jipihtinare wahchea mehne yahu duaġa. Ne paye buheare ā ni yahu duaeraja. Ā crusai to yariachū ahri yahpa macaa ñaare watīno yuhūre yoa dutiro bihoerara. Ā yariaro tí ñaare yuhūre cahmaerachū yoare tiro. ¹⁵ To ā yoachū Cristo Jesu yaina mari jichū circuncisiōre mari yoachū ne yaba cjihti jierara. Circuncisiōre mari yoaerachū cūhūre ne yaba cjihti jierara marine. Wiho mejeta pari turi masa bajuaina yoaro sehe, Cohamacū cahmano seheta yoaina, marine to cohtotachū pinihta wiho waro jierara. ¹⁶ Jipihtina ahri yū buherire yoaina, Cohamacū yaina waro jina, cuiro marieno noano ġiga mūsa. Ā jina Cohamacū to pja ñūa mehne ġiga mūsa. ¹⁷ Mari puhtoro Jesure dahra cohtariro yū jiri buhiri yū pjacūre cami tija yuhū. Yū ā jiriro jichū mipare paina yuhūre cariboea tjiġaro. ¹⁸ Yū coyea mari puhtoro Jesucristo musare jipihtinare to cahīa mehne noano yoajaro. Āta yoajaro.

Efesios

Efeso macainare joarocaha Paulo

1 Yũhu Paulo musare Efeso macainare joarocaja. Yũhu Jesucristo yare buhe dutiro to cũriro jija. Cohamacu to cahmano seheta Jesu yũhure to yare buhehtirore cũre. Ā jicu musare Cohamacu yainare Jesucristore ā wacũ turucũinare joarocaja yũhu. ² Ā joarocacu yũhu musare noa dutija. Cohamacu mari Pũcu, ā yoa mari pũhtoro Jesucristo cũhu musare noano yoa, noano jichũ yoajaro.

Cristo yaina mari jichũ ñũno Cohamacu noano yoara marine

³ Cohamacu, mari pũhtoro Jesucristo Pũcuro marine noano yoarucura Cristo yaina mari jichũ ñũno. Jipihtia to ya mũano macaa noaa mehne tiro marine noano yoarucura. Espĩritu Santo mehne marine ā noano yoarucura. To ā yoariro jichũ ñũna noano ño payoa mehne tirore noano wahche payojihna. ⁴ Ō sehe yoaa tiri jire tiro marine to yainare: Ahri yahpare to bajuamehnehto pano mipũre to yaina jihtinare beseyu tuhsua tiri jire tiro marine. Ā besea tiri jire marine ñaa buhiri marieina mari jilto sehe. Ā yoana ñaa buhiri marieina jija mari, Cohamacu to ñũchũ. Ā jiro marine “Ñaa buhiri tiina jira”, nisi tiro. ⁵ Panopũ ō sehe nia tiri jire tiro marine: “Yũ macu Cristo tinare to yoabasari mehne tina yũ pohna jiahca”, ni cũa tiri jire marine panopũ. To ji coariro seheta to cahmariro seheta ā wahachũ yoaa tiri jire tiro marine. ⁶ Wiho jiina mari jipachũta marine to ā noano yoachũ ñũna ño payoa mehne tirore noano durucujihna. To macũno to cahĩriro yaina mari jichũ ñũno noano marine yoara tiro. Ā jina tirore noano durucujihna.

⁷⁻⁸ Cristota jira marine pichacapũ waha-borinare yũhdũchũ yoariro. Cristo mari ñaa buhirire yariabasaro, to dire cohã, mari ñaa yoari buhirire cohãri jire. Mari ñaa yoari buhirire to cohãchũ ñũno, Cohamacu sehe mari ñaa buhirire bonocahna. Marine ñaa dihtare yoaborinare ā cahmano marine noaputiaro yoari jire Cohamacu. Ā yoa marine to ā yoainare noano waro tuho masiina wahachũ yoari jire. ⁹⁻¹⁰ Tuho masiina wahachũ yoa, baharopũ to yoahore marine masichũ yoare. Panopũ painare tíre masichũ yoerari jire tiro. Ō sehe jira baharopũ to yoahito: Tiro to cahmariro seheta to tuhoturiro seheta jipihtinare cũ curuata Cristo yaina jichũ yoarohca. Ā jiro jipihtiare to ya jichũ yoarohca. To quihõri pja mũ sũchũ mũano macainare, ahri yahpa macaina cũhũre, cũ curuata to yaina jichũ yoarohca tiro. Ā yoa mũano macaare, ahri yahpa macaa cũhũre to ya jichũ yoarohca. Ā jiro Cristo sehe jipihtina bui pũhtoro jirohca. Ā yoa jipihtia pũro jirohca. Ā jilhtiro ji dutia tiha Cohamacu tirore.

¹¹ Ā yoaro Cristo yaina mari jiltore masino panopũ Cohamacu marine bese tuhsua tiha to yaina mari jiltinare. Ahri jipihtiare to yoarire, baharopũ to yoahito cũhũre, “Ā waharohca”, ni cũyua tiha tiro to tuhoturiro seheta, to cahmariro seheta yoaro taro. Ā yoaa tiha tiro to yare sã yoahito cjihtore. ¹² Sã sehe judio masa Cristore cahma muhtaina jina sãre to yũhdũchũ yoahore cohta muhtaina jija. Cohamacu sãre besea tiha to yare sã yoahito cjihtore. Cohamacu yare sã ā yoachũ ñũa, paina tirore ño payo, “Turariro jira”, ti nihto sehe Cohamacu sãre besea tiha. ¹³ Mũsa cũhu quihõno durucuaireta noaa buheare tuhore. Tí buhea “Cohamacu cahapũ mũsa waha duachũ, ō sehe jira”, ni yahura marine. Tíre tuhona tirore wacũ tua, noano tuhona to yaina wahare mũsa. To yainare ō

sehe niri jire Cristo: “Musare Espiritu Santore warocaihtja”, ni yahu cūri jire. ¹⁴ Ā jiro tirore mūsa wacū tua, noano tūhochū ñūno to yairo Espiritu Santore ware musare. Ā jiro Espiritu Santo mari mehne jiro Cohamacu yaina mari jia tiare masichū yoara tiro sehe. Ā yoa Espiritu Santo parore masichū yoara. Cohamacu mari ñaa buhirire bore marine yūhdūchū yoaro. Ā jiro baharo to cahapū naanohca marine to yainare. Marine to naahto pano Espiritu Santo sehe Cohamacu cahapū mari suri baharo to yare mari cjaughtore masichū yoara marine. Cohamacu marine ã yoara tirore ño payoa mehne “Noariro jira”, mari nihto cjihtore.

Paulo Cohamacure sini payoha Jesu yainare

¹⁵⁻¹⁶ Cristore wacū tuaina mūsa jichū tūhorocacu Cohamacure ã sini payorucuja musare. Mari puhtoro Jesucristore mūsa wacū tuarire, jipihtina to yainare mūsa cahīre tūhorocacu Cohamacure “Noana”, nija. ¹⁷ Ō seheta tirore sini payoja musare: Cohamacu muano macariro mari puhtoro Jesucristo Pucuro, noa yūhdūariro to yare mūsa noano masihto sehe sini payoja. Ā yoaro tirore mūsa noano masihto sehe sini payoja musare. ¹⁸ Ā jicu paye yū nihti cūhure mūsa noano masihto sehe musare sini payoja Cohamacure. Tiro musare yūhdūchū yoaro, to yaina cjihtire yoare. To ã yoachū noa yūhdūara marine. Tīre mūsa masihto sehe sini payoja musare Cohamacure. Ā yoa marine to wahtire noa yūhdūa tí waro ti jichū cūhure mūsa masiyuhto sehe sini payoja musare Cohamacure. ¹⁹ Ō sehe cūhure mūsa masihto sehe sini payoja musare Cohamacure. Cohamacure wacū tuaina mari jichū ñūno to tuaa mehne marine yoadohora tiro. Tiro sehe paina bui tua yūhdūariro jira. Tí cūhure mūsa masi-

hto sehe sini payoja Cohamacure. ²⁰ Tí to masia mehne, to tuaa mehne tiro Cristo yariaritore masori jire. Ā maso tuhsuro, muanopū to poto buhusehei Cristore dujichū yoari jire Cohamacu, jipihtinare dutihtiro to jihto sehe. ²¹ Tóí dujiro jipihtina muano macaina puhtoa bui, ã yoa jipihtina ahri yahpa macaina dutiina bui jiro jira Cristo. Mipure jipihtina ahri dacho macaina bui puhtoro jira. Baharopū jipihtina pa tjuru macaina cūhure ti bui puhtoro jihtiro cjihtota jira tiro. ²² Ā yoa jipihtina bui cūri jire Cohamacu Cristore. Ā yoaro jipihtiare puhtichū yoari jire tirore. Ā jiro Cristo yaina cū curua jiina bui puhtoro sōri jire tirore. Ti dapu jira tiro sehe. ²³ Cristo yaina cū curuata jina, to pjacu yoaro sehe jija mari. Cristo jipihtiropū ã jirucura. Ā jina mari to yaina mehne to jirucuchū, to jiro seheta wahana nija. Ā wahana to jia tiare ñona nija.

Cohamacu marine cahīno, pja ñūno yūhdūchū yoaha marine

2 Cohamacu yūhdūrucaina, ñaa buhiri tiina yariaina cjiri yoaro sehe jiri jimare mūsa, Cohamacu to ñuchū. ² Panopure ahri yahpa macaina Cohamacure yūhdūrucaina yoaro sehe yoraruci jimare mūsa cūhū. Ā yoana watīno to dutiro seheta yoraruci jimare mūsa. Tiro watīno ahri yahpai dutiro Cohamacure yūhdūrucaina puhtoro jira. Watīa puhtoro cūhū jira tiro. ³ Panopure jipihtina mari ã dihta yorarina jimai. Mari ñaa dihtare goa pjamai. Mari mu sūro, mari tūhotu, mari cahmano seheta yoamai. Ā yoina jina jipihtina paina yoaro seheta, mari cūhū ñaa buhiri tiina jirucumai. Mari ã jiina jiri buhiri, Cohamacu to buhiri dahreborina jimai. ⁴ Mari ã jiina jipachūta, Cohamacu marine tuaro pja ñūno, noano cahīri jire marine. ⁵ Ā cahī yūhdūro, Cohamacure yūhdūrucaina,

yariaina yoaro sehetā mari jipachūta Cristo mehne marine catichū yoari jire. ⁶Ā jiro Cristo yaina mari wahachū, Cohamacū Cristo mehne marine maso, ā yoa muanopū Cristo mehne dujihtinare marine sō daporī jire, tiro mehne dutihtina cjihti mari jihto sehe. Cristo yaina jina, āta wahaina baro jija mari, Cohamacū to űuchū. ⁷Ō sehetā noano yoara tiro marine to pja űurire, to tuaro cahīre baharopū jihtinare masichū yoaro taro. Cristo yaina mari jichū űno ā yūhdūchū yoara tiro marine. ⁸Cristore wacū tua, mari noano tuhochū űno Cohamacū marine pichacapū wahaborinare yūhdūchū yoara. Marine pja űno, marine cahīno marine yūhdūchū yoara. Mari mū sūro mari noano yoaa mehne Cohamacū cahapū waha masieraja mari. Cohamacū sehe marine yūhdūchū yoara. Ā jiro tiro mehne mari ā jirucuhore cūna marine. ⁹To ā cūchū mari mū sūro noare mari yoari wapa jierara tí.

“Sā mū sūro yūhdūhi’, niboca”, nino ō sehe dutiri jire tiro: Mari mū sūro yūhdū dutierara marine. ¹⁰Cristo yaina jichū yoare marine Cohamacū sehe noaa dihtare yoahitina mari jihto sehe. Panopū noare mari yoahitire cū tuhsua tiri jire tiro marine.

Cristore cjuana mari noano jija

¹¹Ā jina panopū mūsa jia tirire mipū cūhure wacūga mūsa. Cristo yaina jierasina judio masa jieraina jina mūsa coyea yoaro sehe yoarina jiri jimare mūsa. Circuncisiōre yoaeraina jire mūsa mipū mūsa jiro sehetā. Mūsa ā yoaeraina jichū űna sā judio masa sehe circuncisiō yoaina sehe mū sare ō sehe nia tii. “Circuncisiōre yoaeraina jia, Cohamacū yaina jierara”, nia tii mū sare. Circuncisiōre yoaina mūa pjacūre mahanocā cahsarocāre yihso narina jira. ¹²Panopū Cristo yaina jierari jimare mūsa. Sā ju-

dio masa sehe Cohamacū to beseina jia tii. Sā ā jichū “Mū sare yūhdūchū yoahitja”, ni cūa tiha Cohamacū sāre. Mūsa sehe to ā ni cūrina jierari jimare. Ā yoa Cohamacū to beserinare űu tuhtiina jisiniri jimare mūsa. Mūsa űaa buhirire pichacapū wahahtina jiri jimare mūsa. Cohamacū maeraina jina pichacapū butiborina jia tiri jimare mūsa. ¹³Mipū sehere Cristo Jesu yaina jira mūsa. Panopū Cohamacū űu tuhtiina jipanahta, mipūre to yaina jira mūsa. Cristo mūsa űaa buhiri crusapū to di cohāri mehne Cohamacū yaina jichū yoare mū sare. ¹⁴Sā judio masare cahma űu tuhtiina mūsa jichū űno Cristo marine “Mūsa basi cahma űu tuhtiena tjiga”, ni yahure. Masare noano yahuriro jira tiro. Sā judio masa, judio masa jieraina mehne pūa curua mari jichū űno, tiro cū curuata yoare marine. Ducatari sahrīnore ti tju site cohāno yoaro sehe mari cahma űu tuhtirire duhuchū yoare tiro. ¹⁵⁻¹⁶Ō sehe tíre yoare tiro: Mari űaa buhirire crusapū yariaro marine pichacapū wahaborinare yūhdūchū yoare. Ā yūhdūchū yoaro to yaina jichū yoare marine. Ā yoaro pūa curua mari jimarire cū curuata wahma curua jichū yoare marine. Ā yoaro panopū mari cahma űu tuhtiina mari jimarire marine cūnoi noano jichū yoare. Ā yoaro judio masa sā dutia cjurire cohāre tiro. Tí dutia marine pūa curua ji dutiri jimare. Mipūre cū curuata jija mari. Cristo Cohamacū yaina jichū yoare marine.

¹⁷Ā yoa Cristo noaa buheare marine yahuro tari jire. Mūsa judio masa jieraina Cohamacū yare cjueraina jiri jimare. Mūsa ā jichū űno mū sare yahuro tari jire tiro. Sā judio masa sehe Cohamacū yare cjuai. Sā cūhure yahuro tari jire. Ā yahuro taro jipihtina marine cū curuata noano mehne ji dutiro tari jire tiro. ¹⁸Mipūre jipihtina mari judio masa, judio masa jieraina cūhu

Cohamacu mari Puc̄u mehne noano ji masija mari. Espiritu Santo to yoado-hoa mehne mari Puc̄u mehne noano ji masija mari. Cristo sehe marine ā noano jichu yoari jire. ¹⁹ Ā jina mip̄ure pa dihta macaina yoaro sehe jierara musa. Mip̄ure Cohamacu yainare ñu tuhtiina jierara musa. Cohamacu yaina mehne macaina jira musa. To ya curua macaina jira musa. ²⁰ Cohamacu ya durucuaire yahu turiaina, sā cūhu to yare buhe dutiro to cūrina jina to ya durucuaire musare yahu dūcai sā, wahma wuh̄ure Cohamacu ya wuh̄ure ti dahre dūcariro seheta. Tí wuh̄i ti cū muhtari tāca yoaro sehe jiro Cristo sehe marine yuh̄d̄uch̄u yoariro mariach̄u mari ne yuh̄d̄eraboa. ²¹ Ā jiro to tuaa mehne marine to yainare cū curuata jichu yoare tiro, Cohamacu wuh̄ure ñaa marieni wuh̄ure ti dahreboriro seheta. To ā yoach̄u to tuaa mehne noaina wahaja mari, Cohamacu to ñuch̄u. Mari ā jichu ñno, tirota mari mehne jirucura. ²² Ā jina Cristo yaina jina jipihtina paina to yaina mehne cū curua wahare musa cūhu. Musa ā wahach̄u Cohamacu to Espiritu Santo musa mehne jiro nina, Cohamacu ya wuh̄i to jiboro seheta.

Judio masa jierainare noa buheare yahuri jiha Paulo

3 Ā to ya curua macaina musa jichu ñuc̄u yuh̄u Paulo musare sini payoja Cohamacure. Cristo Jesu yare musare jipihtina judio masa jierainare yu yahuri buhiri peresup̄u jija yuh̄u. ² Cohamacu wiho jiina mari jipachuta, marine cah̄ino, noaa buheare musare judio masa jierainare yuh̄ure yahu dutiro cūre. Tíre masi tuhs̄ure musa. ³ Panop̄u masare to yahuerari cjirire Cohamacu baharop̄ure yuh̄ure masich̄u yoare. Ahrire mahanoc̄a yahu musare joaroca tuhs̄uhi. ⁴ Yu ā joarocarire buhena Cristo to yare yuh̄ure to

masich̄u yoarire masinahca musa. ⁵ Tí to yahuri cjirire panop̄u macainare tiro yahuera tiha. Mip̄u sehere sāre Jesu to cūrinare Cohamacu yare yahu muhtaina cūh̄ure sā jipihtina tirore dahra cohtainare to yahuri cjirire masich̄u yoare Cohamacu. To yairo Espiritu Santo sehe sāre masich̄u yoabasare Cohamacure. ⁶ Ō sehe jira to yahuri cjiri: Sā judio masa dihtare Cohamacu yuh̄d̄uch̄u yoerara. Judio masa jieraina cūh̄ure yuh̄d̄uch̄u yoarohca tiro. Ā jina sā judio masa, musa judio masa jieraina mehne Cristo yaina jina, cū pjac̄u yoaro sehe cū curuata jija mari. Ā jina mari jipihtina Cristo Jesu yaina jina cūno potori Cohamacu “Musare yuh̄d̄uch̄u yoaihtja”, ni to yuh̄d̄uch̄u yoaina jija mari.

⁷ Cohamacu yuh̄ure pja ñno, yuh̄ure cah̄ino ahri noaa buheare yahuhtirore yuh̄ure cūre. To tuaa mehne ā cūre yuh̄ure tiro. ⁸ Jipihtina Jesu yaina ti doca macariro waro jija yuh̄u. Yu ā jipachuta judio masa jierainare noaa buheare yahuhtirore cūre Cohamacu yuh̄ure. Tí buhea Cristo noa yuh̄duariro to jiare, noa yuh̄dua to cjuare to wahtire yahura marine. ⁹ Yuh̄ure ā cūno Cohamacu “Ō sehe yuh̄d̄uch̄u yoaihtja masare”, nino to yuh̄d̄uch̄u yoahtore noano yahu pah̄nohtirore cūre yuh̄ure tiro. Ā jiro panop̄u macainare tí buheare ne yahu pah̄noerasinia tiha Cohamacu. Jipihtiare bajuamehneriro jira tiro. ¹⁰ Mip̄ure noaa buheare yahu dutiro cūre marine to yainare tiro to noano masi pah̄noare masich̄u yoaro taro. Masi pah̄noriro to jia tiare muano macaina p̄uhtoare masich̄u yoa duari jire. Ā yoaro taro noaa buheare buhe dutire marine Jesu yainare. ¹¹ Ahri yahpa to jihto panop̄uta “Masare pichacap̄u wahaborinare yuh̄d̄uch̄u yoaihtja”, nia tiha Cohamacu. Ā niro jiro mip̄ure mari puhtoro Cristo Jesu yaria to masa

mujano mehne to niriro seheta marine yuhduchu yoara Cohamacu. ¹²To ā yuhduchu yoachu mipure Cristore wacū tuana to yaina wahaja mari. To yaina jina wacū tuaa mehne, cuiro marieno Cohamacu mehne durucu masija mari. ¹³Noaa buheare musare yu buheri buhiri mipure peresupu jicu yu nāno yuhduchu nāna cahyaena tjiga. Noaa buheare yu yahuchu tuhona Cohamacu yaina wahare musa. Yu ā yoari buhiri peresui jija. Ā jicu musare yu yoadohori buhiri nāno yuhdui nija. Musa noano yuhduhto sehe ā wahaja yuhu. Tíre masina wahchega musa. Tíre tuaro wahche dutija musare.

Cristo masare tuaro cahina

¹⁴Ā jicu ahri jipihtia Cohamacu mari Pucū to yoarire wacūcu tiro pano na tuhcuca caha sūcu sini payoja musare. ¹⁵Tiro jipihtia curuari macaina muanopu jiina, ahri yahpai jiina cūhu ti Pucuro jira. Jipihtinare bajuamehneriro jira tiro. ¹⁶Tirore ō sehe ni sini payoja musare: Tiro masi pahñoriro jira. Tua yuhduariro jira. Ā jicu to tuaa mehne musare noano to wacū tuachu yoahito sehe sini payoja. Espiritu Santo to yoadohoa mehne ā yorohca. ¹⁷Ā sini payocu Cristore musa wacū tua namohto sehe tiro musa mehne to noano jihto sehe sini payoja musare. Ā jicu painare noano cahina musa jihto sehe sini payoja musare. ¹⁸⁻¹⁹Jipihtina paina Cohamacu yaina cūhu musa mehne Cristo masare to tuaro cahiare musa masihto sehe sini payoja. Tiro jipihtina masare cahī yuhduariro jira. To ā cahī yuhduarire noano masi pahñohto basioerara. Ā jipachuta to ā cahīriro to jia tiare musa noano masihto sehe sini payoja musare. Ā yoa to cahiare musa masichu cahmaja Cohamacu musa mehne to noano jihto sehe. Noa yuhduariro, nāa marieriro

to jiro seheta musa wahahto sehe to cahiare musa masichu cahmaja. Ā jicu to cahiare musa masihto sehe sini payoja musare Cohamacure.

²⁰⁻²¹Ā yoa Cohamacure pjíro ño payoa mehne “Tiro tuariro jira”, nijihna. To tuaa mehne noaa sehere cohtota masina marine tiro. Marine noaina jichu yoa masina. Mari siniri yuhdoro yoa masina tiro. Mari cahmaare mari tuhaturi yuhdoro yoa masina tiro. Cristo Jesu yaina to ya curua macaina jina jipihitia dachoripe jipihtina Cohamacure ño payojihna. Āta yoajihna.

Cristo yaina jina cū curuata jija mari

4 Ā jicu yuhu, mari puhtoro Cristo to cahmaare yu yoari buhiri peresupu jiro jicu, musare ō sehe ni tuaro dutija: Cohamacu to yaina cjihtire musare besea tiri jire. Ā to beserina jina to cahmano seheta yoaina jiga musa. ²“Sā pinihta masi yuhdurucaina jija”, ni tuhoutuina jiena tjiga. Painare noano mehne yoaga suaro marieno. Musa mehne macaina musare ti nāno yoapachuta tinare cahia mehne noano yoaga. ³Ā jina Espiritu Santo to yoadohoa mehne noano mehne cūno mehne jirucuga musa. Ā yoana cahmachea marieno jinahca musa. ⁴Cū pjacu yoaro seheta cū curuaihta jija mari. Ā yoa Espiritu Santo cūirota jira. Cohamacu to yaina cjihti musare besea tiha musare yuhduchu yoaro taro. Ā jina to yuhduchu yoahitore cohtasinina musa. Cūnota jira musa cohtaro. ⁵Mari puhtoro Cristo cūirota jira. To yahua, mari wacū tuaa cūhu cūnota jira. To yainare bautisarire yahua cūhu cūnota jira. ⁶Ā jiro Cohamacu cūirota jira. Tiro jipihtina Pucuro jira. Ā jiro jipihtina mari puhtoro jira. Jipihtinare marine to cahmano seheta yoachu yoa masina tiro. Jipihtina mari mehne jira. Ā yoa jipihitropu jira tiro.

⁷Cũ curua mari jipachũta jipihtina marine cãinare mari yoa masihtire cũre marine Cristo. Tiro to cũriro seheta yoa masija mari. Tiro marine ã cũno paye barore to ã wanocaboriro seheta yoaro nire tiro. ⁸Ãta nina Cohamacũ yare ti joari pũpũ:

“Cohamacũre ñũ tuhtiinare to yũhdũrũ-cari baharo tiro tinare naa mũjaa wahare.

Ã naa mũjano tiro payũ ã wanocare ahri yahpa macaina sehere”, ni joaa tiha panopũre.

⁹“Tiro mũjaa wahare”, to nichũ wahanore mũanopũ jiro ahri yahpapũre to tari cũhũre mari masija. Ahri yahpapũre to duji tarire mari masija.

¹⁰Ã jiro õpũre duji tariro tirota jira mũjaa wahaari. Jipihtiro bui mũjaa wahaari jire tiro, jipihtiropũ jiro taro.

¹¹Tiro jira “Ahri yahpa macainare payũ ã wanocariro”, ti niriro. Masare to ã wanocano seheta tiro payũ ti yoa masihtire cũri jire masare. Õ sehe cũri jire tiro: Cãinare Cristo to yare yahu duti to warocahtinare cũri jire. Painare Cohamacũ ya durucuaare yahu turiahtinare cũri jire. Noaa buheare buhe tinihtinare painare cũri jire. Cristo yaina cahmachuinare ñũ wihboina cjihtire, noano buhehtina cjihtire cũri jire painare. ¹²Tõ sehe yoa, dahrahtina cjihtire cũri jire marine painare to yainare mari yoadohõto sehe Cohamacũre mari masi noano namohto sehe. ã cũri jire marine to yainare tirore mari wacũ tua namohto sehe. ¹³Ã jina mari jipihtina noano mehne cũno mehne jinahca. Ãta jiro cahmana marine Cristore wacũ tuaina jina. ã jina mari jipihtina Cohamacũ macũnore noano masinahca. ã yoana Cristo tuariro, noano masiro to jiro sehetã mari cũhũ noano masina, Cohamacũre noano wacũ tuaina wahanahca.

¹⁴Mari ã wahana macanacã yoaro sehe jisi mari. Macanacã noano tuho masierasina. Paina ti buhechũ “Ahri potocã jira”, ni ti mahũno mihnia mehne ti mahũnochũ tinacã yoaro sehe jiina soro jia buheare cahmana. ã yoa paina ti soro buhechũ tí buhea sehẽre cahmana tjoa. Pjiri ma macaa pahcõri ti ã cohtotarucuro seheta tõ sehe ã cohtotarucua jira tinacã yoaro sehe jiina. Tina yoaro sehe jisi mari. ¹⁵Õ sehetã yoanahca mari: Mari mehne macainare cahma cahina, potocã noaa buheare cahma yahunahca mari basi. ã yoana macanacã bucua tuho masiina ti wahaari seheta mari cũhũ tuaina, Cohamacũ yare noano masiina wahanahca. Cristo to jiro sehe wahanahca. Tiro jira mari dapu. ¹⁶To yaina jina to pjacũ yoaro sehe cũ curuaihta jija mari. ã jina mari capari, mari cahmori, mari dahpori cũ pjacũ ti noano jiro seheta mari cũhũ payũ jipanahta cũno potori noano jija. Mari ã cũno potori mari jilto sehe Cristo yoadohora. ã jina mari wamomaca mari pjacũre to noano yoadohoro seheta mari noano yoadohõto paina Cristo yainare. Mari mehne macainare Cristo yainare noano cahina, tinare noano yoadohõto, tuaina Cristore wacũ tua namoina wahanahca mari.

Cristo yaina wahana mari ñaa yoare duhu, noaa sehẽre cohtotaja mari

¹⁷Ã yoa mari puhtoro Cristo to dutiro mehne õ sehe nihtja musare: Cohamacũre cahmaeraina waro yoaro sehe yoana tjiga musa. Tina ti tuhotua sehe ñaa dihta jira. ã jia ti tuhotua yaba cjihti jierara. ¹⁸Ã jia nahitianoi ti ñũ masieraro seheta tina Cohamacũ yare ne masieraputiara. To yare ne tuhoeraputiara. Tuho duaerara tina. ã jia Cohamacũ to noano ji dutiro seheta jierara tina. ¹⁹Ã jia tina ñaare yoaa ne buõ tieraputiara. ã yoa ne cahyaerara. Ñaare ti goa pjaa dihtare yoarucura. Jipihtia

ti ñaare yoaare duhu duaerara. ²⁰Musa sehe ã yoerare, Jesure masi ducana. ²¹Potocã to yare tuhoina musa jichu, Jesu yare noano masiina musa jichu musa sehere tina yoaro sehe yoa dutierara tiro. ²²Ã jina ñano weté tia suhtire musa tjuwe cohãno seheta panopu musa yoari cjirire duhunocahga. Tí pjare ñaare yoarucuina musa jichu tí ñaa sehe musare dojomehnero niri jimare. “Ñaare yoana, noano wahchenahca”, ni tuhoutuina jipanahta ne potocã wahcherare musa. ²³Ã yoa musa tuhoutuare noaa sehere Cohamacu to cahmano seheta cohtotaro cahmana musare. ²⁴Ã jina noaa sehere cohtotaina jiga musa. Tó sehe jina Cohamacu yoaro seheta jira. Musa ã jiina jina, noaare yoarucunahca. Ñ yoana ñaare ñu yabinahca.

²⁵Ã jina mahño namoena tjiga musa. Musa mehne macainare quihõno yahuga, mahñono marieno. Mari cū pjacu yoaro sehe cū curua macainata jina nija. Ñ jina musa mehne macainare mahñoena tjiga.

²⁶Paina mehne suana, ñaano yoaena tjiga. Ñ jina suana, cū dacho waro noano suarucuena tjiga. ²⁷Yoari pja suana, watino to cahmano sehe yoana nica. Ñ yoaena tjiga watino musare “Dojomehneri”, nina.

²⁸Musa mehne macaina Jesu yaina musa jihto pano yacaina jirina cjiri parituri yacaena tjiga. Ñ yoana mipu sehere noano dahraga musa wapataa mehne pjacuoinare musa yoadohohto sehe.

²⁹Ne ñano durucuena tjiga “Painare dojomehneri”, nina. Noaare durucuna painare yoadohora Cohamacu cahmaare musa masi namohto sehe. Ñ jina noaa dihtare durucuga. ³⁰Ñaare yoana Espiritu Santore cahyachu yoana nica musa. Ñ yoaena tjiga. Mipure pihitiri dacho pano Cristo marine to naahto pano Cohamacu to Espiritu Santo marine ñu wihbora ñaare mari yoerahto sehe. Ñ jiro Co-

hamacu yaina mari jiare masichu yoara tiro marine. Ñ jina tirore cahyachu yoaena tjiga.

³¹Ã jina ne painare ñano yoa namoena tjiga. Cahma sayo namoena tjiga. Painare sua, ñano ni sañurucu namoena tjiga. Painare ñano quiti dahre namoena tjiga. Ne painare ñano ni tuhoutu namoena tjiga. ³²Ã yoa musa mehne macainare noano mehne noano yoaga. Cristo yaina musa jichu ñano musa ñaa buhirire bonocahre Cohamacu. Tó seheta musa cūhu paina musare ti ñano yoachu ñana ti ñaa yoarire bonocahga.

“Cohamacu pohñare õ sehe jiro cahmana”, ni yahuha Paulo

5 Ñ yoa Cohamacu pohña to cahña jina Cohamacu to jiro sehe jiga musa. ²Ã jina painare ã cahñrucuga. Cristo marine cahño, mari ñaa buhiri yariari jire. Ñ yariaro Cohamacure ji coachu yoari jire tiro. Ñ jina marine to cahñiro seheta musa cūhu painare cahña.

³Ã jina Cohamacu yaina jina ne numia mehne ñano yoaena tjiga. Numia cūhu musa mehne ñano yoaena tjiga. Paye ñaare tó sehe jia ñaare yoaena tjiga. Paye barore cahma yuhdurucaena tjiga. Ne ã yoeraro cahmana musare, Cohamacu yaina jina. ⁴Ñ yoana buoro durucueraro cahmana musare. Tūho masieraina yoaro sehe durucueraro cahmana musare. Ñ jina ñano ni bujuperaro cahmana musare. Ahri sehere yoaro cahmana musare. Cohamacu mehne durucuga musa. Ñ durucuna tirore “Noano yoahre muhu sãre”, nino cahmana. ⁵Paye barore goa pjana, tíre tuaro cahmana, “Cohamacu jira”, ti nia masurine ti ño payoro seheta yoana nija mari tíre. Ñ yoa numia mehne ñano yoina, ñaa dihtare tuhoutuina, paye barore goa pjaina Cohamacu Cristo mehne puh-

toro ti suho jiropu ne wahasi tina. Tíre noano masija mari. ⁶Õ sehe yoaina ti yoari buhiri buhiri dahrerohca Cohamacu tirore yuhdurucainare. Á jina paina musare “Ahri ñaa jierara”, ti ni mahñochu tuhoena tjiga. ⁷Á jina tó sehe yoa yuhdurucainare ne piti tiena tjiga.

⁸Cristo yaina musa jihto pano á jirina cjirita jire musa cūhu nahitianoi jina yoaro seheta. Mipū sehere to yaina jina buhriaroi jiina ti ñu masino seheta, Cohamacure noano masina musa. Cohamacu yaina noaare yoara. Á jina tó seheta yoaga musa cūhu. ⁹Á jina Cristo yaina jina buhriaroi jiina yoaro seheta noaare, Cohamacu cahmaare, mahñoono marieno yoarucunahca musa. ¹⁰Noaare mari yoachū ñūno mari puhtoro Cristo wahchera. Tó sehe jiare, mari puhtore wahchechū yoaa sehere masi wahcāga musa. Á masina tíre yoaga. ¹¹Cristore cahmaeraina nahitianoi jiina yoaro seheta ñaa ti yoaa, ñaa waro jira. Á jina tina yoaro seheta musa sehe yoaina tjiga. Noaa buheare Cristo yare yahuga tinare. Á yoa ti ñaa yoare tinare masichū yoaga buhriaroi mari ñu masino seheta. ¹²Masa ti ñuenoi tina ñano yoa cohtara. Ti á yoarire durucuna mari buo tiboaa. Á yoaa ñaputiaro yoara tina. ¹³Á jina tinare noaa buheare mari yahuna ñaputiina ti jia tiare masichū yoana nija mari tinare buhriaroi mari ñu masino seheta. ¹⁴Tó seheta noaa buheare tinare yahuna, ñaina ti jia tiare masi pahñochu yoana nija tinare. Á jia õ sehe ni yahura paina:

“Ne, cariina ti tuhoeraro seheta yuhure tuho duaeraina, tuhoga musa cariina ti wahcāno seheta.

Á yoana yariaina tuhoeraina ti jiro seheta Cohamacu yare tuhoeraina ji namoena tjiga.

Musa á yoachū ñūno, Cristo buhriaroi yoaro sehe jiriro musare noano masichū yoarohca”,

ni yahura.

¹⁵Á jina dachoripe noano yoaga musa. Tuho masieraina yoaro sehe jiena tjiga. Tuho masiina jiga. ¹⁶Mipū macaina masa ñabiaro yoarucura. Á jina musa sehe noaare, Cristo yare musa yoa masino seheta á yoarucuga musa. ¹⁷Á yoana tuho masieraina jiena tjiga. Cohamacu to cahmaa sehere noano masiga. Á masina tíre yoaga. ¹⁸Á yoa cahena tjiga. Cahainare ñano wahahto cua yuhduara. Á jina pahmoa core pjíro cahmaena tjiga. Espíritu Santo sehere pjíro cahmaga musa mehne to noano jihto sehe. Tirore noano yuhtiina jiga. ¹⁹Musa basi Cohamacure ño payoa basaare cahma durucuga. Á yoa Salmore Cohamacu yare basaare, paye tirore ño payoa basaa cūhure tirore basa payoga musa. Noano wacū ño payoa mehne basa payoga. Á yoana mari puhtoro Cristore wahche payoga. ²⁰Cohamacu mari Pucū jipihtiare musare to warire, to yoari cūhure wahchena, “Noana”, á nirucuga musa tirore. Mari puhtoro Jesucristo yaina jina mari Pucure “Noana”, á nirucuga musa.

“Musa cūhu wuhū macaina Jesu yaina jina, õ sehe yoaga”, ni yahua Paulo

²¹Á yoa musa mehne macainare noano ño payoa mehne cahma yuhtiina jiga Cristore noano ño payoina jina.

²²Musa namosānumiare yahuihtja mipure. Mari puhtoro Cristore mari yuhtiriro seheta musa manusumare noano mehne yuhtia numia jiga.

²³Jesucristo marine yuhduchu yoare to pjacu yoaro sehe jiina to ya curua macaina mari jihto sehe. Á yoa mari to ya curua macaina mari puhtoro to jiro seheta musa manusuma musa namosānumia bui puhtoa jira. ²⁴Cristo yaina jina tirore á yuhtirucuja mari. Tó seheta musa manu tia numia musa

manusumare noano yuhtirucua numia jiga.

²⁵ MUSA manusumare yahuihtja tjoa mipure. Cristo marine to yaina jichu yoaro taro, marine cahino, mari yaro jiborirore yariari jire. A jina marine to cahirore seheta musa cuhu musa namosanumiare noano cahirucuga.

²⁶ Cristo ya buheare tuhona Cohamacu yaina wahahi mari. A jina to ya buheare "Quihono jira", ni mari tuhutori baharo, mari naa buhirire cosawere ti buhea mehne. Co mehne marine ti bautisachu cuhure mari naa buhirire Cristo to cosawerire nona nija mari.

²⁷ A cosawere tiro marine to yaina cjihti yoaro taro. To a cosawechu ne naa buhiri marieina jinahca, Cohamacu to nuchu. ²⁸ MUSA namosanumiare cahina, musa basi musa pjacurire musa cahino seheta ti numiare cahiga. Mari namore cahina jina mari pjacure cahina jija.

²⁹⁻³⁰ Ne mari pjacurire nano wahachu cahmaeraja. Mari chure chuna noano yoana nija mari pjacurire. Cristo yaina jina to pjacu yoaro sehe to ya curua macaina jija mari. A jiro marine noano yoara tiro. Cristo marine to noano yoariro seheta mari cuhu mari pjacure noano yoaja. (A jina mari namosanumia cuhure ata noano yoaro cahmana marine.) ³¹ Ata nina Cohamacu yare ti joari pii: "A yoa muno to pucsumare wijaaro to namono mehne jirohca. A jia tina puaro jipahta cuiro yoaro sehe jahca", ni joaa tiri jire panopure.

³² Ahri to joari cjirire paina noano tuhoerari jire. Tire o sehe ni yahuihtja musare. O sehe ni yahuro nica: "Cristo to yaina mehne cu pjacu yoaro seheta cu curuata jira", ni yahuro nica. ³³ A jicu musare o sehe ni yahu namoihtja tjoa: MUSA pjacurire musa cahino seheta musa namosanumiare cahiga. A yoa musa manusumare noano no payoga musa.

6 Mipure musa pohmare yahuihtja. Mari puhtoro Cristo yaina jina musa pucsumare noano yuhtiina jiga. MUSA a yoana, quihono yoana nina. ²⁻³ O sehe nia tiri jire Cohamacu dutia: "MUSA pucsumare noano no payoga", ni dutia tiri jire tiro. Ahri dutia mehne Cohamacu yahu namoa tiri jire. O sehe nia tiri jire: "MUSA pucsumare no payona, ahri yahpau yoari pja wahchea mehne jinahca musa", ni yahua tiri jire. A ni yahuro ahri dutiare mari yuhtichu mari noano wahahtore coa cuno nia tiri jire. A jina to niriro seheta musa pucsumare no payoga.

⁴ Mipure ti pucsumare yahuihtja: MUSA pohmare a tuhtirucuenta tjiga, "Suachu yoari", nina. Mari puhtoro Cristo to cahia mehne to yoadohoa mehne tinare noano bucogoga. A yoa quihono ti yoaerachu nuna tinare noano yahuga.

⁵ Mipure dahra cohtainare yahuihtja: Cua pisaro mehne, no payoa mehne ahri yahpa macainare musa puhtoare, musare dahra dutiinare noano yuhtiina jiga. Mahono marieno noano yuhtiina jiga. Cristore musa yuhtiro seheta tinare yuhtiga musa.

⁶ Ti nurocaro dihtare yuhtiina jiena tjiga. To sehe yoana masa dihtare tinare nu jicoachu cahmana. MUSA sehe Cristore dahra cohtaina musa jiro seheta musa puhtoa cuhure a yuhtirucuga. Cohamacu to cahmano seheta noano wahchea mehne yuhtiina jiga. ⁷ A jina Cristore yuhtiina musa jiro seheta wahchea mehne yuhtiga musa puhtoa cuhure. Masa dihtare yuhtiina jierara musa. ⁸ A yoana ahrire wacuga musa: Mari jipihitina noaare mari yochu nuna mari puhtoro Cristo noano yoarohca marine. Dahra cohtainare, dahra cohtaina jieraina cuhure noano yoarohca.

⁹ Mipure puhtoare dahra dutiinare yahuihtja: Musare dahra cohtainare

noano yoaga. Tinare noano yu yoa dutiriro seheta yoaga musa cūhu tinare. Tinare noano mehne dutiga, tuhtiro marieno. Muano macariro Cohamacu potocāta ti puhtoro jira. Musa yairo puhtoro jira tiro cūhu. Ā jina jipihtina musa tirore dahra cohtaina dihta jira. Ā jiro tiro cūno potori űana musare jipihtinare. Ā jina musare dahra cohtainare noano mehne dutiga, tuhtiro marieno.

Cristo yaina watīnore ti dūcataare yahuha Paulo

¹⁰Ahrire yahu batoihtja musare: Cristore noano wacū tuaina jiga musa. Mari puhtoro Cristo musa mehne jira. Ā jina tua yūhdūriro to jia mehne wacū tuaina jiga. ¹¹Watīno marine mahñono, űano yoa dutira marine. Cohamacu marine dūcatara űaare mari yoerahto sehe. Marine to dūcataa surara to dūcatari suhtiro, comaa suhtiro yoaro sehe jira. Ā jina tí suhtirore musa sāano seheta Cohamacu to dūcataare noano cĵua pahñoga. ¹²Jesu yaina mari jichu, marine űu tuhtiina masa waro jierara. Muano macaina űaina, tuaina, tina sehe jira marine űu tuhtiina. Watīa ahri yahpa macaina puhtoa jira. Ā jia tina cūhu jira marine Jesu yainare űu tuhtiina. ¹³Ā jina mipure dūcatari suhtirore musa sāano seheta Cohamacu musare to dūcatahto sehe to yare noano cĵua pahñoga. Ā yoana watīno musare to űano yoa dutichu, musare to űano yoa duachu, tirore dūcatanahca. Ā yoa tirore yūhdurūcanahca. ¹⁴Ā yoana tuaina jiga. Cohamacu musare to dūcatahto cĵihtore ō sehe yoaga musa: Surara to comaa suhtirore to tuā dihori dare sari dare noano tuā diho to dūcatariro seheta, Cohamacu yare potoca yahuare noano wacūga musa, watīnore musa dūcatahto sehe. Ā yoa, surara to comaa suhtiro mehne to yajeripohnare to dūcatariro seheta Cristo to yoado-

hoa mehne quihōno yoaina jiga musa, watīnore musa noano dūcatahto sehe. ¹⁵Surara to dahpo suhti mehne to dahporire to noano dūcatariro seheta noaa buheare noano masiga musa, watīnore musa dūcatahto sehe. Tí buhea marine noano jichu yoara. ¹⁶Surara to dūcatari tū mehne to dūcatariro seheta Cristore noano wacū tuarucuga musa, watīnore musa dūcatahto sehe. Buea yucu mehne musare to bueboro seheta watīno musare űano yoachu yoa duara. Ā jina Cristore noano wacū tuana, watīnore dūcatanahca musa. ¹⁷Surara to comaa chapea mehne to dapure to dūcatariro seheta musare pichacapu waborinare Cristo to yūhdūchu yoarina jiga musa, watīnore musa dūcatahto sehe. Surara to űosari pĵi mehne to dūcatariro seheta Cohamacu ya buheare noano masiga musa, noano musa dūcatahto sehe. Ā jina painare noano yahuga to yare. Tí Cohamacu ya buheare Espīritu Santo marine yahura. ¹⁸Ā watīnore musa dūcatana Cohamacure dachoripe ā sinirucuga. Espīritu Santo to yoadohoa mehne ā sinirucuga. Ā yoana noano wacū masiga. Ā sinina, pumena tĵiga. Jipihtina Cohamacu yainare ā sini payorucuga. ¹⁹Ā yoana yūhu cūhure sini payoga Cohamacure. Ō sehe ni sini payoga: Noaa buheare, panopu ti masierari cĵirire noano yu yahuhto sehe sini payoga yūhure. Ā jina cuiro marieno yu yahuhto sehe sini payoga yūhure. ²⁰Cristo to yare yahu dutiro yūhure warocare. Yu ā yahuri buhiri peresupu jija mipure. Ōi jipacūta cuiro marieno to yare yu yahuhto sehe sini payoga yūhure. To yare yahuhtiro jiita nija yūhu.

Paulo noa duti batoaha

²¹Mipure Tíquico musa cahapu sūro yu jia tiare musare yahu pahñonohca. Tiro mari coyeiro mari cahīriro jira.

Ã jiro mari pũthoro Cristore dahra cohtariro ã jirucura. ²²Sã jia tiare mũsare yahu duticũ tirore warocai nija mũsa noano wahchehto sehe.

²³Cohamacũ mari Pũcũ mari pũthoro Jesucristo cũhũ mũsare Jesu yainare

tirore wacũ tuainare noano jichũ yoajaro. Ã jiro mũsare noano cahma cahĩchũ yoajaro. ²⁴Jipihtina mari pũthoro Jesucristore cohtotaro marieno cahrucuinare mũsare noano jichũ yoajaro.

Filipenses

Peresupū jiriho ahri tjure joarocaha Paulo

1 Yuhū Paulo, Timoteo mehne Jesucristore dahra cohtaina jija sã. Ā jina jipihtinare musare Jesucristo to noaina wahachū yoainare Filipino macainare joarocaja sã. Mūsa pūh-toa cūhure, musare yoadohoina cūhure joarocaja. ²Cohamacū mari Pūcū, mari pūhtoro Jesucristo mehne musare noa dutija. Cohamacū to yoadohoa mehne noano jiga mūsa.

Paulo Jesu yainare Cohamacūre sini payoha

³⁻⁶Cohamacū musare noaa sehere cohtotachū yoaro nina. Ā jiro musare to ā yoa dūcariro seheta sohtori dahrerohca tiro. Ā jina Jesucristo ahri yahpapūre to wihichūpūre nāa marieina jinahca mūsa. Wahmanopūre Jesu yaina mūsa jiri baharo, mipū cūhure yoadohora mūsa yūhure noaa buheare yū buhechū. Mūsa ā yoaina jichuta Cohamacūre “Noana”, nija yūhū. Musare wacūcū ō sehe dihta nija yūhū. Musare Cohamacūre sini payocū, wahchea mehne sini payoja. ⁷Musare yū ā tūhotuchū noa nina. Noaa buheare “Potocā tjira”, pūhtoare yū ni tua yūhdurūcachū mūsa yūhure yoadohore. Tí buheare potocā ti jiare tinare yū yahuchū yoadohore mūsa. Peresui yū jichū cūhure mūsa yūhure yoadohore. Cohamacū marine noano yoaro, to yare cūre marine. Mūsa yūhure yoadohore. Ā jina to cūrire mari cūno potori yoana nija. Ā jicū yū yajeripohna mehne tuaro wacūja yūhū musare. ⁸Jesucristo to cahīa mehne tuaro musare wacūja yūhū. Yū ā wacūchū Cohamacū tīre masina. ⁹Musare ō sehe ni sini payoja yūhū Cohamacūre: Cohamacū

yare noano masia mehne, tūho masi pahñoa mehne painare mūsa cahī namohto cjihtore sini payoja yūhū musare Cohamacūre. ¹⁰Noa yūhdūare mūsa masichū cūhure sini payoja musare. Mūsa ā masina Cristo ahri yahpapū to tjua tachū noaare yoaina, nāa buhiri marieina jinahca mūsa. ¹¹Ā jiina jina noaare, Cohamacū cahmaare yoanahca mūsa. Musare ā yoachū yoarohca Jesucristo sehe. Cohamacū noabiaro tuariro to jiare ñono taro, jipihtina tirore ti ño payohto cjihtore to cahmaare musare yoachū yoarohca.

Paulo Cristo yairo to jia tiare yahuha

¹²Yū coyeya, ahrire mūsa noano masichū cahmaja yūhū. Mipūre peresui jiriho yū jiro watoi noaa buhea sehe ā mū tārucuro nina. Paina masa tí buheare cahmaina waha namoa nina. ¹³Ā yoa Cristo yairo yū jiri buhiri peresui yū jirire masi pihtira pūhtoro ya wūhū macaina surara. Jipihtina paina cūhū ōi jiina tīre masina. ¹⁴Ā jia peresui yū jichū ñūa, payū mari coyeya Jesu yaina mari pūhtoro Jesure wacū tua namoa nina. Ā wacū tuaa, cuiro marieno noaa buheare painare buhera tina.

¹⁵Cāina Cristo yare buheraborina jipahta yūhure ñū tuhtia, Cristo yare buhera paina tina sehere ñū wahāchū cahmaa. Paina sehe noano mehne Cristo yare buhera. ¹⁶Noaa buheare yū ni tua dūcatahti cjihtire Cohamacū yūhure to cūrire noano masina ahrina sehe. Ā masia tina cahīa mehne Cristo yare buhera. ¹⁷Paina sehe yūhure ñū tuhtia, masa tina sehere ti ñū wahāchū cahmaa, Cristo yare buhera. Ā yoaa peresui yū jichū tina yūhure ñāno yūhdūchū yoa duara. ¹⁸Noanohca. Cristo yareta buhea nina. Tina Cristore potocā cahīerapahta Cristo yareta buhera. Paina sehe noano mehne buhera. Jipihtina tina to

yare ti buhechũ wahcheja. Ā jicu wahche namoihca yũhũ.

¹⁹ Cohamacũre mũa sini payori mehne Jesucristo Espĩritu to yoadohoa mehne Cohamacũ to wioriro jiihca yũhũ peresupũ jiriro. Tĩre masija. Ā jicu ā wahcherucuihca yũhũ. ²⁰ Ō seheta yoaihca yũhũ. Dachoripe yũ yoariro seheta mipũ cũhũre cuiro marieno Cristo yare buheja masa tirore noano ti ño payohto sehe. Ō seheta yoa duaja yũ yoarire yũ buheri cũhũre yũ bũoro yũhdũerahto sehe. Catisinicũ waro ō seheta yoa duaja. Tina yũhũre ti wajã duapachũta ō seheta yoa duaja.

²¹ Catisinicũ Cristo yare yoasiniihca. Yariacũpũ pinihta tí yũhdoro noano tjuaihca yũhũ. ²² Ā nipacũta catisinicũ Cristo yare yũ yoa namohto sehe cati namosini duaja. Ā nipaihta yariaa cũhũre cahmaja. ¿Di baro sehere yũhũ cahmabocari? Masieraja yũhũ. ²³ Yũ ō sehe ni durucuchũ mijo nina yũhũre. Cristo mehne tuaro ji duaja. Ā jicu mipũre tiro cahapũ waha duaja. Catia yũhdoro ahri sehe noa yũhdũrucara.

²⁴ To ā jipachũta musare yũ yoadohohto cjihto sehe catisinino cahmana yũhũre.

²⁵ Tĩre masicũ ōi mũa mehne yũ jisinihtore masija yũhũ. Ā jisiniihca mũa Cristore wacũ tua namohto cjihtore tí wacũ tuaa mehne mũa wahchehto cjihtore. ²⁶ Ahri yahpai jisinicũ mũa cahapũ pari turi yũ wahachũ mũa wahchenahca. Cristo Jesu yũhũre to yoadohochũ masina, “Tuariro jira tiro”, ni ño payonahca mũa tirore.

²⁷ Mipũre ahri dihtare yahuihtja musare. Cristo ya buhea ti niriro seheta jirucuga mũa. Wacũ tuaina jiga. Ā yoa cahma tju waro marieno noa buheare ni tuaga. Ō seheta yũ mariachũ cũhũre yũ jichũ cũhũre mũa yoachũ cahmaja. Ā jiina mũa jichũ tũhoroca duaja yũhũ. ²⁸ Musare ñũ tuhtiinare

cuiena tjiga. Mũa ā cuierachũ ñũa Cohamacũ yaina mũa jichũ masiahca tina. Ā masia tina pichacapũ ti wahahto cũhũre masiahca. Cohamacũ musare to yũhdũchũ yoahito cũhũre masiahca. Ō seheta masichũ yoara Cohamacũ masare. ²⁹ Cristore mũa wacũ tuahtore Cohamacũ cũha musare. Ahri cũhũre cũha tiro. Cristo yare mũa yoari buhiri mũa ñano yũhdũhto cjihto cũhũre cũha Cohamacũ. ³⁰ Ō sehe jira tí. Cristo yaina mũa jiri buhiri paina musare ñano yoara. Musare ti yoariro seheta yũhũ cũhũre ñano yoara tina. Mũa mehne yũ jichũ yũhũre ti ā yoachũ ñũre mũa. Mipũ cũhũre yũhũre ti ā yoachũ tũhorocayuhti mũa. Ā jina mari cũno potori ñano yũhdũja.

Cristo wihio jiriro to sãari baharo, jipihitina bui pũhtoro cjihto wahaha

2¹⁻² Cristo musare noano yajeripohna tichũ to yoachũ Cristo to cahĩa mehne mũa wahchena, yũhũre noano wahchechũ yoaga mũa. Ā yoa Espĩritu Santo jipihitina mũa mehne to jichũ painare cahĩina, pja ñũina jina, yũhũre noano wahchechũ yoaga mũa. Ahri yũ nihtire mũa yoachũ wahcheihca: Cũno potori noano yajeripohna tiga mũa. Tuhsũ, cũno potori tũhotuina ji, mũa basi cahma cahĩga. Ā yoa cũno mehne noano jiga. ³ Mũa ya dihtare tũhotuina, painare yũhdũrucã duaina jiena tjiga. Ā tũhotunocaina jiga mũa. Ā jina painare noano ño payo, ō sehe ni tũhotuga: “Tina sehe yũ yũhdoro noaina jira”, ni tũhotuga. ⁴ Cũiro painare yoadoho duaeraboca. To ya cjihti dihtare tũhoturiro jiboca. Tiro yoaro sehe yoarena tjiga. Paina cũhũre yoadohoga.

⁵ Cristo Jesu painare yũhdũrucã duaerariro to jiriro seheta mũa cũhũ painare yũhdũrucã duaeraina jiga. ⁶ Tiro sehe Cohamacũ waro jiparota “Cohamacũ mehne cũno potori yũ jiare ne

wijaasi yuhu”, ni tuhotuerari jire tiro. ⁷ Ā ni tuhotueraro tiro Cohamacu mehne cūno potori to jiare wijaa, opu taro, masunota masa bajuaro, tiro dahra cohtariro yoaro sehe ji ducari jire. ⁸ Ā jiro tiro masuno cūno potori pjacu tiriro jiro, wiho jiriro waro sāari jire. Ā sāano “Crusapu wajāga tire”, ti nichu tiro yuhdurucaerari jire. Crusaputa yari-ahitiro jiparota tiro yuhdurucaerari jire. ⁹ Ā jiro Cohamacu jipihtina ti ņo payohtirore cūri jire Jesure. Ā jiro jipihtina bui puhtoro sōri jire Cohamacu tire, ¹⁰ jipihtina muano macaina, ahri yahpa macaina, yariaina cjiri yahpa puhichapu jiina cūhu Jesu wamare tuhoina ti na tuhcu caha su ti ņo payohto sehe. ¹¹ Ā puhtoro sōri jire tire Cohamacu jipihtina “Jesucristo mari puhtoro jira”, ti nihtiro cjihtore. Ā nia Cohamacure mari Pucure ņo payoa nina.

Cristo yaina buhriaro yoaro sehe jia, noaare masare yahu, masichu yoara

¹² Ā jina yu cahina yu coyea Jesu yaina masa mehne yu jichu masa yuhtirucuriro sehetā, mipu yu yoaropu jichu cūhure pano masa yuhtiriro yuhdoro yuhtiga yuhure. Ā jina pichacapu wahaborina to yuhduchu yoarina jina, Cristo yoaro sehe wahana tana, Cristo to yoadohoro mehne ņaa marieina jiga. Ā jina ņo payoa mehne papero marieno Cohamacu yare yoaga. ¹³ Cohamacu noaa sehere musare cahmachu yoaro nina to cahmano sehetā masa yoahito sehe. Ā jiro tīre masa yoahitōre yoadohoro nina Cohamacu. (To ā yoachū tī yu niriro sehetā Cohamacu yare yoaga masa.)

¹⁴ Jipihtiare yoana nureno marieno, masa basi jiape ni durucuro marieno yoaga. ¹⁵ Cohamacu pohna jira masa. Ā jina nureno marieno jipihtiare yoaga masa ņaa buhiri marieina, ņaare yoaeraina masa jihto cjihto sehe. Ā

yoaga masa masa mahnoina, ņaina watoi dojomehnenō marieno masa jihto cjihto sehe. Tina ņaina watoi jina buhriaro to ņu masichu yoaro sehetā noaa buheare buhena masichu yoara masa ahri yahpa macainare. ¹⁶ Tī buheare masa tuho ņahari baharo Cohamacu mehne ā jirucuhitina wahare masa. Tī buheare ahri yahpa macainare masa ā buhechu ņucū masa mehne wahcheihca. Ā jicu musare yu buherire “Wiho waro buherari jica yuhu”, niihca yuhu. Ā jicu Cristo ahri yahpapu to tjua tachū masa mehne wahcheihca. Ā jicu buoro yuhdusi yuhu. ¹⁷⁻¹⁸ Cristore masa wacū tuachū Cohamacu musare ņu jicoarohca. To ā ņu jicoachū masicu musare Cristo yare yu buheri buhiri yuhure ti wajā duapachuta wahcheihtja. Ā jina mari jipihtina cūno potori wahchenahca. Tō sehetā masa cūhure cahyaro marieno wahchero cahmana yuhu mehne, yu yariari baharo.

Timoteore, Epafrodito cūhure yahuha Paulo

¹⁹ Mari puhtoro Jesu to cahmachu soaro mehne Timoteore masa cahapu waroca duaja yuhu masa jia tiare masicu tacu. Ā masiiputa wahcheihca. ²⁰ Tiro Timoteo yu yoaro sehetā masa noano jihto cjihtore potocāta pjīro tuhotura musare. Pairo to yoaro sehe jiriro mari-ahna yuhu mehne. ²¹ Paina sehe jipihtina ti cahmaa dihtare yoa duaa, Cristo Jesu to cahmaa sehere yoa duaerara. ²² Timoteo sehe noano yoariro to jiare masina masa. Yu macu yoaro sehetā tiro yuhu mehne noaa buheare yahua tihre. ²³ Ā jicu puhtoā yuhure ti dohse yoahitōre masicuta, Timoteore masa cahapu waroca duaja. ²⁴ Ā yoacu mari puhtoro Jesu to yoadohoa mehne soaro mehne yuhu cūhu masa cahapu wahaihtja.

²⁵⁻²⁶ Yuhure yoadoho dutina masa Epafroditoro warocari jire yu cahapu.

Tiro yu coyeiro Jesu yairo yuhu mehne dahrariro, yu piti, Cohamacu yare buhe tuariro jira. Tiro musare tuaro wacuro-cara. A jiro to dohatirire musa tuhochu masino tiro sehe pjiro cahya tuhohure. A pjiro to tuhotuchu nucu "Tirore musa cahapu waroca tjuro cahmana yuhure", ni tuhoutuja yuhu mipure. ²⁷ Potocata tiro tuaro dohatihre. Mahano yariabiho yuhdure. To a tuaro dohatipachuta Cohamacu tirore pja nuno, yuhduchu yoahre. Tiro to yariachu yuhu sehe pano yu cahyariro yuhdoro tuaro cahyaboa. A jiro Cohamacu yuhu cuhure pja nuhre tirore yuhduchu yoaro. ²⁸ A jicu mipu pinihtare soaro mehne tirore musa cahapu waroca duaja pari turi musa tirore nu, musa yajeri sahto sehe. Musa a wahchechu nucu yuhu cuhu wahcheihtja. ²⁹ A jina tirore Epafroditore mari puhtoro yairore mari coyeirore noano wahchea mehne piti bocaga. A yoana painare tiro yoaro sehe jiinare no payoa mehne nuga. ³⁰ Tiro Cristo yare yoadohomahno mahano yariabiho yuhdure. Musa sehe yuhure yoadoho masierachu tiro sehe yuhure yoadohomahre. A yoaro yariamahre tiro.

Noano yoaa warore yahuha Paulo

3 Mipu pinihtare ahrire yahu ba-toihtja. Mari puhtoro yaina musa jina wahchega. Ahri buheare pano yu yahurire pari turi musare yahu joarocacu ji coaja yuhu. A jicu musare ahrire yahucu yoadohoi nija musare. ² Noano yoaga musa. Naare yoarucuina, dieya yoaro sehe jiina naina circuncisiore yoa dutia, musa pjacurire yihso duara. Noano yoaga musa a yoa dutiina sehe "Soro ni buheri", nina. ³ Tina circuncisiore yoapahta Cohamacu dutiare noano yoerara. Mari sehe potocata Cohamacu dutiare noano yoaina jija mari. Espiritu Santo to yoadohoa mehne Cohamacure no payoja mari. A jina Jesu

yaina mari jiare wahchea mehne painare mari yahuja. "Sa mu suro Cohamacu dutiare bihoja", ne ni tuhoutueraja. ⁴ A ni tuhouterariro jipaihta "Tinare doca dahrenocaja", ti yoaro sehe niriro jicu a tjioba yuhu cuhu. Pairo "Tinare doca dahrenocaja", ni yuhduruca duara. Yuhu sehe tiro yuhdoro a niboja yuhu. ⁵ O sehe yoariro jimai yuhu: Ocho dachori yu masa bajuari baharo circuncisiore yoari jire yuhure. Israe masuno jicu Benjami ya curua macariro jija yuhu. Yu pucusuma hebreo masa ti jichu potocata hebreo masuno warota masa bajuai. Cohamacu dutiare quihono pahno duacu fariseo curua mehne samai yuhu. ⁶ "Cohamacu ya jipucu", nicu noano yoamai. A yoacu Jesu yaina sehere nana yoaa timai yuhu. Potocata Cohamacu dutiare yoacu ture yuhdurucaro marieno yoa pahnoi. ⁷ Panopure "Ti noaa jipucu", ni tuhutumai. "Ti yu a ni tuhouturi cjiri panopu yu jia tiri yaba cjihti jierari jira", ni tuhoutuja mipure. O seheta ni tuhoutu ducal yuhu Cristore wacu tuacu tacu. ⁸ Cristo Jesu yu puhtorore yu masichu pinihta noa yuhduara. A jicu paye sehere masa "Noaa jira", ti nirire "Ti jipihitia yaba cjihti jierari jira", ni tuhoutuja yuhu. Ti jipihtiare duhunocai Cristo ya sehere yoai tai. A jicu ture yu duhurire "Wiho jia waro jiri jira", ni tuhoutui Cristore noano masicu tacu tiro mehne macariro jicu tacu. ⁹ A jiro yu mu suro noano yu yoari wapa "Noariro jira", ni nuerara Cohamacu yuhure. A jiro Cohamacu dutia Moise cjirire to curire yu yoari wapa cuhure "Noariro jira", ni nuerara. Cristore yu wacu tuari baharo "Noariro jira", ni nuna tiro yuhure. Cohamacu sehe marine buhiri marieina jichu yoara, tirore mari wacu tuachu. ¹⁰ A jicu pano yu ni tuhoutu muhtamari cjirire duhunocaja Cristore noano masicu tacu. Cohamacu tuua mehne Cristo masa mujari jire. Ti tuua mehne ji du-

aja. Ā yoa tí tuaa mehne noare yoa duaja. Cristo crusaþu yariari jire mari ñaa yoari buhirire cohãno taro. Ā jicu to yare yu yoari buhiri tiro yoaro seheta ñano yuhdu duaja yuhu cūhu. ¹¹ Ā jicu Cristo to masa mujariro seheta masa mujahrtiro jiihca yuhu cūhu. Cristo yuhure to ā masa mujachu yoahore wacū cohtaja yuhu.

¹² Ahri jipihtiare ā nicu, “Cristo yare yoa pahñonocaja yuhu”, ni tuhotureraja. Yu ā ni tuhoturapachuta Cristo sehe to yairo yoa tuhsure yuhure. Ā jicu to yare tiro cūhure noano masi namo duacu tuaro mehne to yare yoaja yuhu. Ā yoahitiro cjihtore besere tiro yuhure. ¹³ Yu coyea, “Cristo yare noano yoa pahñonocaja”, ni tuhotureraja. Ā tuhoturapaihta ahri pinihtare yoaja: Pano yu yoari cjiirire ā ñnocaja. Tíre pjíro tuhotureraja. Ā yoacu Cristo yare noano yoa pahñonoca duacu, tíre tuaro yoaja mipure. ¹⁴ Murocaperiro to wapata duariro seheta Cristo yare tuaro yoaja yuhu yu wapatahtore yu ñahahto sehe. Cristo yairo yu jichu ñuno Cohamacu tí yu wapatahtore yuhure waro taro muanopu pjirocara yuhure to catia mehne yu catirucuhto sehe.

¹⁵ Ō sehe yu tuhoturiro seheta tuhutuga musa cūhu Cristore noano masina jina. Wiho mejeta, ahri musare yu yahurire musa taho duaerachu, soro musa tuhotuchu Cohamacu musare noano masichu yorarohca. ¹⁶ Ā jina to yare mari masirire noano yoa sohtori tijihna.

¹⁷ Yu coyea, musa jipihtina yuhure ñu cūga. Ā jina paina sã yoaro sehe yoinare noano ñuga musa tinare musa ñu cūhto sehe. ¹⁸ Payu tahari painare yahui yuhu musare. Mipu cūhure tuaro cahyacu tinareta yahuja musare. Payu tina Cristo crusai to yariari buheare ñu yabiina jira. ¹⁹ Tina pichacaru wahahtina jira. Ti ñaa goa pja

sehene tuaro cahmana tina. Tuhsu, ti buo tiboare yoaa, tíre “Noaa jira”, nina tina. Ahri yahpa macaa dihtare noano tuhutura tina. ²⁰ Mari sehene mari ya maca muanopu jira. Ā jiro tóþata marine yuhduchu yoahitiro, mari puhtoro Jesucristo tarohca. Ā jina to tahtore cohtana nija mari. ²¹ Tiro taro mari pjacurire wiho jia pjacurire soro sehe jia pjacuri dihta cohtotarohca tiro. Ā yoaro to ya pjacu yoaro sehe noa yuhduari pjacure si siteri pjacure warohca marine to tuaa mehne. Jipihtina bui puhtoro sãari jire tiro tí to tuaa mehne. Ā jiro jipihtia þuro jira tiro tí tuaa mehne.

Dachoripe mari puhtoro mehne wahchega

4 Ā jina yu coyea, yu cahina, tuaro yu wacūina, yuhure wahchechu yoina, pano musa wacū tuariro seheta mipure musare yu yahu joariro seheta mari puhtoro Jesure tuaro wacū tuana, to yare ne duhuena tjiga musa.

² Ahrire yahuihtja musare Evodiare, Síntique cūhure: Jesu yaina numia jira musa. Ā jina cahma sayoro marieno noano mehne jirucuga musa. ³ Muhu sehe potocãta yu piti warota jira. Muhu cūhure yahuihtja: Tí numia yuhu mehne, Clemente mehne, paina yu piti tina mehne dahrare noaa buheare sã buhechu. Cohamacu tina jipihtina wamare joa õha to ya tjuí. Jipihtia dachoripe catiare to warina wamare to joa õri tjuí joa õha. Ā jicu tí numiare “Cãno mehne noano jiga”, ni yahuga muhu.

⁴ Dachoripe mari puhtoro mehne wahchega. Pari turita yahuihtja tjoa: Wahchega. ⁵ Noano yoaga jipihtinare masa yoaro seheta. Mari puhtoro Cristo to tahto mahanocã duhsara.

⁶ Ne cahya pjíro tuhutuena tjiga. Cohamacure noano yahu pahñoga. Ā yoana tireore siniga. Ā sinina, “Noana”, niga tireore. ⁷ Musa ā yoachu noano

jichu yoarohca musare Cohamacu. To ã yoachu noa yuhduara. Ahri mari noano jia noa yuhduara. Masa jina, marine to ã noano jichu yoarire noano tuho ñaha masieraja mari. Cristo Jesu yaina mari jichu marine noano jichu yoaro, Cohamacu marine noano yajeripohna tichu yoarohca. A yoaro cahya tuhoturachu yoarohca marine.

Noaare tuhutuga

⁸Ahrire yahu batoi tai nija musare, yu coyea. Quihõno jiare, masa ti ño payoare, noano yoare, ñaa mariare, ji coare, masa “Noaa jira”, ti niare tuhutuga musa. Noa yuhdua ti jichu tíreta tuhutuga. Masa noaare ñua ti wahchea sehere musa cūhu wahche tuhutuga.

⁹Musare yu buheriro seheta ã yoarucuga musa. Ñ yoana, yuhure ñu cūga musa. Musa ã yoachu Cohamacu musare noano jichu yoariro musa mehne jirohca.

Filipo macaina Paulore ti wari cjiire yahuha tiro

¹⁰Mipu pinihta yoari pja baharo musa pari turi yuhure wacūna musa yoadohore wahcheja. A wahchecu mari puhtoro Cristore “Noana”, nija. “Yuhure boaa wahare musa”, nieraja yuhu. Panopure yuhure yoadoho duapanahata yoadoho masierare musa. ¹¹Yuhure musa yoadohore yahucu yuhure duhsarire musare yahui tai nieraja. Musare paye barore cahmacu ã nii nieraja. Yu cjuaa mehne ji masija yuhu. ¹²Paye baro cjuaceracu cūhu noano ji masija yuhu. A yoa pjíro cjuacu cūhu noano ji masija. Dachoripe juca baacu cūhu jipoaja. Yapiro jicu cūhu jipoaja. Pjíro cjuacu cūhu jipoaja. Yuhure paye baro mari-

achu cūhure jipoaja. ¹³Cristo yuhure tuachu yoariro mehne jipihtiare Cohamacu to cahmaare yoa masi pahñoja yuhu. ¹⁴Yu ã jipoariro yu jipachuta yu ñano yuhduchu musa yoadohona yuhure noano yoare musa.

¹⁵Noaa buheare yu buhe ducachu Macedonia yahpai jiriro cjiro yu wahachu musa dihta yuhure yoadohore. Tíre masina musa. ¹⁶Ñ yoa Tesalónicai yu jisinicu ñua yuhure yoadohona cā tahari warocari jire musa. ¹⁷Paye barore sinicu ã nicu nieraja. Painare musa yoadohochu Cohamacu musare noano yoarohca. Musa ã yoadohori wapa Cohamacu musare to noano yoachu cahmaja yuhu. ¹⁸Mipure yuhure noano wa pahñohre musa. Yu cahmari yuhdoro wahre musa yuhure. Yuhure Epafrodito mehne musa warocari baharo paye baro ne duhsarera yuhure. Cohamacu wuhuru inciensore jū mo Cohamacure ti noano ji coachu yoariro seheta yuhure musa wari cūhu Cohamacure noano ji coachu yoara. ¹⁹Cristo yaina jira musa. A jiro jipihtiare musare duhsarire warohca Cohamacu musare, noa yuhdua to cjuare. ²⁰Jipihtia dachoripe mari Pucure Cohamacure ño payojihna. Ata yoajihna.

Paulo noa dutiha

²¹Jiphtina Cohamacu yaina, tópu jiina, Jesucristo yaina noajaro. Mari coyea cūhu Jesu yaina yuhu mehne macaina musare noa dutira. ²²Jiphtina Cohamacu yaina, õ macaina, Jesu yaina noa dutira. Roma macaina bui puhtoro ya wuhu macaina pinihta tuaro noa dutira.

²³Mari puhtoro Jesucristo musare to cahña mehne noano yoajaro.

Colosenses

Colosa macainare joarocaha Paulo cūhu

1¹⁻² Yūhu Paulo mari coyeiro Timo-
teo mehne musare Colosa macainare
joarocaja sā. Yūhu Jesucristo to yare
buhe dutiro to cūriro jija. Cohamacu
to cahmano seheta Jesu yūhure to yare
buhehtirore cūre. Ā jina musare sā coyea
Cristore wacū tuarucuinare joarocaja. Ā
jina Cohamacu mari Pucu mehne musare
noa dutija. Ā jina tiro mehne noano jiga
musa.

Jesu yainare Paulo sini payoha Cohamacure

³ Musa ya cjihtire Cohamacure sini
payona “Noana”, ā nirucuja sā. Tiro sehe
mari puhtoro Jesucristo Pucuro jira.
⁴⁻⁵ Tirore “Noana”, nirucuja sā musa jia
tiare tuhorocana. To ya buhea potocā
jia buheare musa tuhoro sehta jipi-
htia dachoripe manopu musare jichu
yoarohca Cristo sehe. To ā yoahrtiro
jichu tīre musa ā cohtarucu wama tira.
Ā jina Cristo Jesure wacū tua wama
tira musa. Tuhsu, to yainare cahī wama
tira musa. Musa ā jiina jichu Cohamacu
mehne wahche tirore “Noana”, nija sā.
⁶ Jipihitropure Jesu yaina potocā jia bu-
heare noaa buheare ti yahuchū tuhoa
masa Cohamacu yare cahmaa, noaa se-
here cohtota namoa nina. Musa cūhu
noaa buheare Cohamacu musare to
cahīare quihōno musa tuho ducari ba-
haro tina yoaro sehe Cohamacu yare
cahmana, noaa sehere cohtota wama
tira musa. ⁷ Ahrireta musa cūhure Epafra
noaa buheare yahuri jire. Tiro sā tu-
aro cahīriro sā mehne Cristore dahra co-
htariro, Cristo yare ne duhuerariro jira.
Musare sā buhe masierachu tiro sehe
sāre cohtotariro jiro, musare buheri jire.

⁸ Tiro jira musa jia tiare sāre yahuriro.
Espiritu Santo to yoadohoa mehne Jesu
yainare musa cahīrire yahure sāre.

⁹ Ā jina musare tuhorocana musare
sā tuhorocari dachoihta dōihta ā sini
payorucuja sā Cohamacure. Cohamacu
to cahmaare musa masi pahūohto sehe
tirore sini payoja sā. Espiritu Santo yoad-
ohoro mehne Cohamacu yare noano
masiina musa jihto sehe sini payoja sā.
¹⁰ Ō sehta sini payoja sā mari puhtoro
Cristo to cahmano seheta noano
musa yoahiti cjihtire. Musa ā yoachū
ñuno tiro wahcherohca. Ā jina jipih-
tia noaare musa yoahito sehe sini payo-
ja. Cohamacure musa masi namohto
sehe sini payoja. ¹¹ Ahri yu yahuhti
cūhure sini payoja sā. Cohamacu ya tuaa
noa yūhdūara. Cohamacu tī tuaa mehne
musa tuahtore musare sini payoja. Ō
seheta sini payoja musa ñano yūhdū-
panahta wahchea mehne musa cūno
pjahto sehe. ¹² Cohamacu to yaina cji-
htire marine jichū yoari jire. Ā yoaro
to waare cjuahitina cūhure yoari jire
marine tiro. To jiropu buhriaropu mari
cjuahitire warohca tiro. To ā yoachū
ñuna tirore musa “Noana”, nihto cjih-
tore sini payoja sā musare. ¹³ Tirota ma-
rine pichacapu wahaborinare yūhdūchu
yoari jire. Tó panore ñaare yoa duhu
masieramai mari. Ñariro sehe nahitiano
jiriro marine dutiroro jisiniri jimare. Co-
hamacu sehe to macūnore to cahīrirore
puhtoro sōno manopu marine jichū
yoari jire. Ā jina to macūno mehne ji-
nahca. ¹⁴ To macūno mehne marine yūh-
dora Cohamacu. To macūno to yariaro
mehne mari ñaa yoari buhirire bori jire
Cohamacu.

Masa Cohamacu mehne ti cahma ti pu buhuseheri ti ñu tuhtichū ñuno Cristo bosaha

¹⁵ Jesu Pucurore ñumahnouerara. To
macūno sehe to Pucuro to dohse jia

tiare ñona masare. Tiro to macuno jipihtina pano jipihtia pano ji tuhsuri jire. Ā jiro jipihtia puro, jipihtina bui puhtoro jira tiro. ¹⁶Cohamacu to dutichu to macuno sehe to Pucuro mehne jipihinare, jipihtiare bajuamehneri jire. Muanopu jiare ahri yahpau jia cuhure bajuamehneri jire. Mari ñurire mari ñuerari cuhure bajuamehneri jire. Muno macaina ñmahnoerainare puhtoare, dutinare, jipihinare bajuamehneri jire. Ā jia jipihina to yaina cjihti jimari jire. Jipihia cuhu to ya cjihti jimari jire. ¹⁷Jipihina pano jipihtia pano Cristo ji tuhsuri jire. Ā yoa to tuaa mehne jipihia cuhu jipihina cuhu mipure jia nina. ¹⁸Mari to yaina jipihina to pjacu yoaro sehetu to ya curua macaina jia. Ā jiro tiro mari dapu mari puhtoro jira. Tiro yariaro masa muja muhtariro jira jipihina bui puhtoro, jipihia puro jiro taro. ¹⁹Cristo to Pucuro mehne cano potori to jiro sehetu jira. To ā jichuta cahmana Cohamacu sehe. ²⁰Jipihina to Pucurore cahma nu tuhtia tiri jire. Ā ti cahma nu tuhtichu ñuno Cristo tinare “Ñu tuhtiena tjiga”, ni yahuri jire. Muno macinare ahri yahpa macaina cuhure to Pucurore “Ñu tuhtiena tjiga”, ni yahuri jire Cristo. Ā yoa muno maca ahri yahpa maca cuhu noano ti jichu cahmari jire tiro. Ā mari nu tuhtire duhuchu yoa duari jire tiro crusapu yariaro to di cohano. To Pucuro to cahmariro sehetu ā yoari jire Cristo.

²¹Musa cuhure ata yoari jire tiro. To Pucurore nu tuhtiina tiro mehne jieraina jimari jire musa cuhu. Naare yoari jimare musa. ²²Ā jimarina musa jipachuta tiro to yariaro mehne to Pucurore musare nu tuhtierachu yoari jire tiro. Ā yoari jire tiro noaina ñaa buhiri marieina musare to yohto cjih-tore. Musa ā jichu tiro musare to sehe jianapure to Pucurore warohca. ²³Āta

warohca tiro musa tirore wacu tuarucuhu. Āta yoarohca tiro noaa buheare musa tuhorire musa boerachu ti buheare musa ā yuhtirucuhu. Ti buheare noaa buheare jipihina ahri yahpapore jiina tuhori jire. Ā jicu yuhu cuhu Paulo Cristore dahra cohtariro jicu, ti buheareta yahuriro jia.

Jesu yainare tina mehne macinare yoadohtinare cūha Paulo

²⁴Cristo mari ñano yoari buhirire ñano yuhduri jire. Ā jicu yuhu cuhu musare yu buheri buhiri ñano yuhducu wahcheja. Ā ñano yuhducu Cristo marine to curire yoa sohtori tii nija. Ā jicu wahcheja. Cristo yare mari yoari buhiri mari ñano yuhdu namohto dhasasinina mini. Ā jicu tirore musa wacu tuahtore ñano yuhducu, wahcheja yuhu. To pjacu yoaro sehe jiina to ya curua macaina jira musa. ²⁵Jesu yainare yoadohtirore cure Cohamacu yuhure. Musa ya cjihtire yoahirore yuhure cure tiro. To yare jipihitropure yahu pahnohtirore cure yuhure. ²⁶Ti to yare panopure payu tjururi macinare yahu pahnoera tiri jire Cohamacu. Mipure ahri tjuru macinare to yainare ture noano yahu pahnonocare juna. ²⁷“Judio masa jieraina ya cjihtire yu ya buhea noa yuhduara”, ni to yainare ture yahuri jire. Pano to yahuerari cjirire yahuri jire. Ō sehe jira to ya: Cristo to yaina mehne jira. To ā jichu to yaina muanopu Cohamacu cahapu noa yuhduaropu jahca. Ti jira panopu ti masierari cjiri Cohamacu ya.

²⁸Cristoreta yahuja. Jipihinare cuisana tinare buheja sa. Noano masia mehne buheja sa noano Cristore masare masichu yoana tana. Ā buheja sa to yare noano yoaina ñaa buhiri marieina tinare jichu yoana tana. ²⁹Ahri jira yu dahraa. Cohamacu to ya tuaa mehne yuhure to wari tuaa mehne tuaro dahraja yuhu, to yare buhecu.

2 Ahrire mŕsa masichŭ cahmaja yuħu. Mŕsa ya cjihtire, Laodicea macaina ya cjihtire, jipihntina paina ya cjihti cŭħure tuaro dahraja yuħu. Jipihntina mŕsa yuħure ñeraina ya cjihti cŭħure tuaro dahracu mŕsare tuaro yoadohoja yuħu. ²Ō seheta mŕsare yoadohoja yuħu mŕsa noano yajeripohna tihto cjihtore. Mŕsa mehne macainare mŕsa cahma cahihnto cjihto cŭħure ā mŕsare yoadohoja yuħu. Cohamacu ya panopu to yahuerari cjiri Cristore masichu yoaa jira. To yare mŕsa masichu noa yuħduara. Cristore mŕsa noano masihto cjihtore, tiro mehne mŕsa noano jihto cjihto cŭħure tuaro yoadohoja mŕsare. ³Paina ti masierari cjirire, noa yuħduare Cohamacu to masiare Cristo dihta noano masichu yoara marine. ⁴Ahrire nija mŕsare “Paina mŕsare tuħo wisiachŭ yoaa durucua mehne mahñori”, nicu. ⁵Yuħu mŕsa watoi jierapacuta yu wacũno mehne mŕsa watoi jiro yoaro seheta tuhotuja. Ā jicu Cristore mŕsa noano wacũ tuarurire, quihõno mŕsa yoari cŭħure masichu wahcheja yuħu.

⁶Ā jina Cristore mŕsa wacũ tua ducariro seheta āta tirore wacũ tuaa mehne dachoripe noano jirucuga. ⁷Tirore noano masiina jiga mŕsa. Ā yoa dachoripe tirore masi namoga pano mŕsare paina ti buheriro seheta. Ā yoa Cristore wahche, “Noana”, nirucuina jiga mŕsa.

Cristo yaina jina noaa sehene cahmaja mari

⁸⁻¹⁰Noano yoaga mŕsa. Masa ti mŕsuro ti mahño buheare tuħoena tjiga mŕsa. Tina panopu macaina ti mŕsuro ti niare buhera. Ti ā nia yaba cjihti jierara. Ahri yahpa macaina ti mŕsuro ti tuhotuare buhe, Cristo ya sehere buherara. Cristo Cohamacu to jiro seheta jiro jiro, ahri yahpau pjacu

tiro, Cohamacu warota jirota nina. To yaina jina Cohamacu mehne noano jija mari. Tirota jira jipihntina anjoa puħto bui paina bajueraina bui puħtoto jiro. Tiro masina mahñoare buheinare tuħoena tjiga. ¹¹Circuncisiõre ti yoariro seheta mahanocã pjacu cahsarocãre ti yihso cohãriro seheta Cristo ñaa buhiri tiina mŕsa jia tiare cohã, duhuchu yoari jire. Ahri circuncisiõ masa ti pjacurire mahanocã cahsarocãre ti cohãri jierara. Ahri circuncisiõ yoaro sehe yoaro, Cohamacu sehe ñaa buhiri tiina mari jia tiare cohãna Cristore mari wacũ tuachŭ ñũno. ¹²To yaina jina bautisarina wahari jire mŕsa. To bautisarina wahana õ sehe ñona niri jire mŕsa: Panopu macaa mŕsa ñaa yoarire mŕsa duhurire ñona niri jire mŕsa. Tí mŕsa ñaa yoari buhirire mŕsa ya cũboro seheta tiro duhuri jire mŕsa. Cristo masa mujano noanopu wahari jire. To ā waharo seheta Cohamacure wacũ tuana “Tiro tuariro jira”, niina jina noaa sehere cohtotari jire mŕsa. Tiro Cohamacu sehe Cristore masoriro jira. To bautisarina wahana noaa sehere mŕsa cohtotarire ñona nina mŕsa. ¹³Panopure ñaa buhiri cjuarina mŕsa jiri buhiri picapau wahaborina jimari jire mŕsa. Ā wahaborina jimari jire mŕsa Cohamacu yaina jierasina. To dutiare cjueraina jimari jire mŕsa. Mipure Cohamacu marine tiro mehne ā jirucutinare yoari jire. Cristo to yariaro mehne ā yoari jire tiro marine. Ā yoaro jipihntina mari ñaa yoari buhirire bonocari jire tiro. ¹⁴Cohamacu to dutiare ti joari cjirire yuħdurucaina mari jipachuta Cristore mari wacũ tuachŭ ñũno tiro marine buhiri ti dutiare. Cristo crusapu to yariaro mehne Cohamacu sehe mari ñaa buhirire cohãnocahna panopu to dutiare, marine buhiri ti dutiare to cohãnocaboriro seheta. Crusapu yariaro tí taõpu panopu macaa dutiare ti joari pũre to cã puha

ōboro seheta tí dutiare cohānocahna. ¹⁵Masa ti nūrocaroi watīa puhtoare Cohamacu yūhdurucari jire. Wiho jiina, tu-aeraina tjuanocari jire tina sehe. Ā yoaro tinare buoro wahachu yoari jire, surara ti yūhdurucainare masare ti naa ño ti buoro wahachu yoaro seheta. Crusapu yariaro Cristo watiare yūhdurucari jire.

Muano macaare Cohamacu yare cahmaga

¹⁶Ā yoa paina musa chuare musa si-hnia cūhure ñua musare “Buhiri tiina jira”, ni ñuboca. Ti ā ni ñuchū ā ñunocahga tinare. Sūripe jia dachorire, somanaripe jia dachorire, bose nūmuri musa yūhdoerachū ñua musare “Buhiri tiina jira”, ni ñuboca tina. Ti ā ni ñuchū ā ñunocahga tinare. ¹⁷Panopu tí chua dutiare, bose nūmurine yūhdo dutiare, paye dutia cūhure cūri jire Cohamacu marine buhero taro. Tí dutia mehne baharopu to dohse yoahtore Cohamacu yoa ñono niri jire. Cristo to jia tia cjihtire yoa ño curero niri jire masare. “Tiro ō sehe waharohca”, nino ā yoa ñono niri jire. Ā yoa ñohti cjihti jiri jimare tí dutia. ¹⁸Ō sehe nimana tí dutiare yoa dutiina. “Soro jiare bajuachu ñūhi sā” nia, tina Cohamacure ti ño payoboro sehe anjoare ño payomana. Ā jina jia “Masi pahñonocaja sā”, ni tuhotumana tina masa ti mu sūro ti tuhoturiro seheta. Ā jia tina painare yūhdurucacarina, noaina yoaro sehe yoa ñomana musare. Ā yoa “Quihōno yoerara musa”, ni yahusāna musare. Ti ā ni yahusāchū, tinare ā ñunocahga. ¹⁹Tó sehe yoapahta musare yahusāina Cristo to dutiro sehe yoaa nierara. Cristo sehe to yaina dapu ti puhtoro jira. To yaina sehe to pjacu yoaro sehe jiina to ya curua macaina jira. Mari cohāri dohsaa mari wa dari cūhu mari pjacure cū pjacu jichu yoara. Tó seheta Cristo sehe to yainare cūnoi noano mehne jichu yoara. Ā yoa

marine yoadohora Cohamacu cahmaare mari noano yoahito sehe.

²⁰Ā yoa Cristo yaina jina tiro mehne yariarina yoaro sehe jira musa, Cohamacu to ñuchū. Ā jina ñaare musa yoarire duhurina jira musa. Ā jina ahri yahpa macaa ñaa buheare, masa ti mu sūro ti buheare cahmaeraborina jira musa. Ā jiborina jipanahta dohse yoana masa ti mu sūro ti dutiare yuhtijari musa? ²¹Ō sehe ni dutira ti mu sūro dutiina: Ahri barore chūena tjiga. Ahri barore ne chū ñūena tjiga. Ahri barore pihaena tjiga. Tó sehe ni dutira tina. ²²Mari paye barore chuchū dói pihitia wahara. Tó sehe jia barore pihtia barore tuhotua nina ā dutiina. Ti ā dutichū ahri yahpa macaa dutia dihta jira tí dutia. Masa ti mu sūro ti buhea dihta jira ahri buhea. Ā jia yaba cjihti jierara. ²³Tí dutiare yoaina Cohamacure ño payoina yoaro sehe jimana. Ā yoa painare yūhdurucacarina yoaro sehe yoa ñomana. Ti pjacurire ñano yoaa Cohamacure ño payoina seheta yoa ñomana tina. Ti ā yoachū ti ya dutia sehe masi pahñoina ya dutia yoaro sehe jimana. Ā jierara. Tí dutiare yoapahta ti ñaare goa pjaare duhuerara. Ā jia tí dutia sehe yaba cjihti jierara.

3 Ā yoa Cristo yaina jira musa. Ā jina Cohamacu tuua mehne Cristo to masa mujariro seheta tí tuua mehne pano musa ñaa yoarire duhu, noaa sehere cohtotare musa. Ā cohtotaina jina muano macaare Cristo yare cahmaga musa. Tópure muanopu Cohamacu potu buhusehei dujira tiro. ²Muano macaa Cohamacu yare noano tuhotuga musa. Ahri yahpa macaare ne wacū nūnūena tjiga musa. ³Cristo yaina jina tiro mehne yariaborina seheta musa wahana ahri yahpa macaare pjiro tuhotuena tjiga. Ā jiro Cristo mehne musa jirucuhore cahno tuhsuri jire Cohamacu. ⁴Ā yoa Cristo muanopu marine ā jirucuhinare

yoariro si sitea mehne to tachũ tiro mehne wahanahca mari. Ǻ wahanã tiro mehne mũanopũ Cohamacũ yare cjuanahca.

**Cristo yaina jierasinina
ñaare yoamai mari**

⁵Ǻ yoa ahri yahpa macaa ñaa mũsa yoaare duhunocahga mũsa: Numino mehne ñano yoaare, mũno mehne ñano yoaare, ñaa yũhduaro yoaare, paio namonore goa pjaare, pacoro manũnõre goa pjaare, ñaa goa pjaare duhunocahga mũsa. Paye barore tuaro cahmaina jiena tjiga. Paye barore cjona, tíre tuaro cahmana “Cohamacũ jira”, ti nia masũrine ti ño payoro seheta yoana nija mari tíre. ⁶Tí ñaare yoaina Cohamacũre yũhdũrucaina jira. Ti ã yoa yũhdũrucachũ ñũno tinare buhiri dahrerohca. ⁷Panopũre mũsa sehe tí ñaare yoirina jina tina mehne macaina jiri jimare mũsa. ⁸Wiho mejeta mipũre ahri ñaare duhu pihtinocahga mũsa: Suaare, sua yũhduare, painare ñano ni tuhotuare, painare ñano quti dahreare, ñano durucuaire tí jipihtiare duhunocahga. ⁹⁻¹⁰Mũsa sehe Jesu yaina wahanã tí ñaa yoaare duhu tuhsũri jire. Ǻ jina mũsa tuhotuare cohtotaina jira mũsa. Mũsare noa sehere cahmachũ yoaro nina Cohamacũ to yoaro sehe mũsa jightho sehe. Ǻ seheta yoara tiro noano tirore mũsa masi namohto sehe. Ǻ jiina jina mũsa mehne macainare mahũnoena tjiga. ¹¹Cristo yaina jina judio masa, judio masa jieraina cũhũ cũno poterita jira mũsa, Cohamacũ to ñũchũ. Circuncisiõre yoaina, yoaeraina cũhũ Cristo yaina jia cũno poterita jira, Cohamacũ to ñũchũ. Pa yahpa macaina, masieraina, mũsa ya yahpa macaina cũhũ Cristo yaina jia cũno poterita jira, Cohamacũ to ñũchũ. Dahra cohtaina, dahra cohtaina

jieraina cũhũ Cristo yaina jia cũno poterita jira, Cohamacũ to ñũchũ. Jesu jipihitina to yaina mehne jira. Wiho jiriro jierara tiro, to yaina ti ñũchũ.

¹²Ǻ yoa Cohamacũ to beserina, noaina, to cahĩina jina õ sehe jiga mũsa: Painare pja ñũina, painare noano yoaina, painare yũhdũrucã duaeraina, painare niji siaro dero yoaina, mũsare ti ñano yoapachũta ã tuhotunocaina jiga mũsa. ¹³Mũsa mehne macaina mehne suana, dóihita mũsa basi mũsa suaire pjãga. Mari puhtoro mũsa ñaa yoari buhirire bohre. Ǻ to boriro seheta mũsa cũhũ mũsa mehne macaina mũsare ti ñaa yoirire boga. ¹⁴Ahri dutia mehne õ sehe ni dutija mũsare: Painare cahĩga. Mũsa ã yoana noano jipihtina mehne cũno mehne jinahca.

¹⁵Cristo marine noano jichũ yoara jiape ni durucueraina mari jihto sehe. To ã yoachũ noano jiga mũsa, mũsa basi. Ǻ seheta jihtina cjihtire to yaina cjihtire bese cũri jire Cohamacũ mũsare. Ǻ jina to pjacũ yoaro seheta cũ curuata jira mũsa. Ǻ yoa Cohamacũre “Noana”, ni wahcheina jiga mũsa Cohamacũ mehne.

¹⁶Cristo ya buheare noano wacũrucuga mũsa. Noano masi buhega to yare. Cua pisaro mehne tíre yahuga. Ǻ yoa tuhsũ, Salmore, Cohamacũ yare basaare, paye tirore ño payoa basaare tirore basa payoga. Noano wacũ ño payoa mehne basa payoga. Ǻ basana to yare noano wacũga mũsa. Ǻ yoana Cohamacũre “Noana”, ni wahcheina jiga mũsa Cohamacũ mehne. ¹⁷Jipihtia dohse jia mũsa yoaare noano yajeripohna ti yoaga mari puhtoro Jesu to wahchehto sehe. Cristore ño payora mũsa. Ǻ yoa tirore ño payoa mehne noa dihtare durucuga. Ǻ yoana Cristo to yoadohoa mehne Cohamacũ mari Pũcũre “Noana”, ni wahche payo siniga tirore.

Jesu yainare noano mehne ti jihti dutia õ sehe jira

¹⁸Musa manũ tia numia, musa manũsumare noano yũhtiga musa. Āta yoaro cahmana mari puhtoro Cristo ya numia jina. ¹⁹Musa namo tiina sehe, musa namosãnumiare cahĩga. Ā yoa ti numiare ne tuhtiena tjiga. ²⁰Musa ti pohna cũhũ, musa pũcusũmare yũhdũrũcaeraina jiga. Musa Ā yoachũ ñũno mari puhtoro noano ji coara. ²¹Musa ti pũcusũma cũhũ musa pohmare suachũ yoaena tjiga “Cahyachũ yoari”, nina. ²²Musa tinare dahra cohtaina, musa puhtoare ahri yahpa macainare noano yũhtirucuga. Ti ñũrocaro dihtare yũhtiina jiena tjiga. Ti mariachũ cũhũre yũhtiina jiga. Mari puhtoro Cristore cua pisaro musa ñũriro seheta noano mehne yũhtiga musa puhtoa cũhũre. ²³Potocãta Cristo yaina jina noano yũhtira musa tirore. Ā jina musa puhtoare ahri yahpa macainare yũhtina, tina dihtare yũhtina nierara. Cristo cũhũre musa yũhtiboro sehe yũhtinata nina musa. Ā yoana musa puhtoa ti dutiro seheta tuaro mehne dahraga, Cristo ya dutia ti jiboriro seheta. ²⁴Musa Ā yoachũ Cristo musare noano yoarohca. “Musare waihtja”, to niare musare warohca mari puhtoro. Tĩre masina musa. Mari puhtoro Cristore dahra cohtaina jira musa. Ā jiro tiro sehe musa puhtoro waro jira. ²⁵Ñaaare yoainare buhiri dahrerohca mari puhtoro. Ā yoainare cũiro dũhsaro marieno cũno potori buhiri dahrerohca tiro.

4 Musa puhtoa sehe, musare dahra cohtainare potocãta noano yoaga tinare. Musa cũhũ puhtoro cjuara. Musa puhtoro musa cjuariro sehe mũano macariro jira.

²Dachoripe Cohamacũre siniga musa. Noano wacũ tuhotu siniga. Ā yoana

“Noana”, niga Cohamacũre. ³Sã ya cjihti cũhũre sini payoga tjoa. Cristo yare paina pano ti masierari cjirire buhena nija sã. Tinare sã noano masichũ yoahito sehe sini payoga Cohamacũre. Cristo yare yũ buheri buhiri yũhũ mipure peresupũ jija. ⁴Ā jicũ musa Ā sini payochũ cahmaja to yare yũ noano yahuhto cjihto sehe. Cristo to dutiro seheta yũ yahuhto cjihto sehe sini payoga.

⁵Jesu yaina jieraina mehne jina noano yoaga musa. Cristo yare yahuga tinare. Tina mehne musa jiro puro Āta noano yoaga. ⁶Paina mehne sũhũduna noano ji coaro mehne sũhũduga. Noaa dihtare durucuga. Paina musare ti sinituchũ noano masi yũhtiga tinare.

Noa duti batoaha Paulo

⁷Tĩquico mari coyeiro Jesu yairo jira. Tiro mari cahĩriro, Cristo yare buhero, sã mehne dahrariro jira. Ā jiro Cristo yare ne duhuerara tiro. Tiro yũ jia tiare musare yahurohca. ⁸Musa cahapũ tirore warocai nija yũhũ sã jia tiare musa masihtohito sehe, musare wahchechũ yoahitiro cjihtore. ⁹Onesimo mari coyeiro mari cahĩriro mehne piti dahre warocai nija. Tiro cũhũ Cristo yare ne duhuerara. Musa mehne macariro jira. Tina pũaro sã õre dohse sã yũhdũrire yahuahca musare.

¹⁰Aristarco peresupũ jiro yũhũ mehne macariro musare noa dutira. Marco cũhũ noa dutira. Tiro Bernabé taũno jira. Tirore yahuroca tuhsui musare. Musa cahapũ to sũchũ ñũna noano mehne tirore piti bocaga. ¹¹Jesu “Justo” ti ni pisuriro cũhũ noa dutira musare. Ahrina tiarota yũhũ mehne dahraina judio masa waro jira. Judio masa waro tina dihta Cohamacũ yare yũhũ mehne buhera. Ā sehe buheja sã Cohamacũ yaina masa ti wahahto sehe, Cohamacũ ti puhtoro to jihto sehe. Tina yũhũre noano yoadohoina

jira. ¹²Epafrā mūsa mehne jiro cjiro mūsare noa dutira. Tiro Cristore dahra cohtariro jira. Cohamacūre sinino, mūsa ya cjihtire tuaro sini payorucura tiro. Cohamacūre noano wacū tuarucuhtina, to cahmano sehe yoahina mūsa jihto sehe ā sini payorucura tiro Cohamacūre. ¹³Tiro mūsa ya cjihtire tuaro sini payore mūsare pjíro tuhoturo. Laodicea macaina ya cjihtire, Hierapoli macaina ya cjihti cūhure tiro tuaro sini payore. To ā yoariro jichū ñācū mūsare yahurocai nija. ¹⁴Duhturu Luca mari cahíriro mūsare noa dutira. Dema cūhū noa dutira.

¹⁵Noajaro mari coyēa Jesu yaina Laodicea macaina. Ninfa cūhū noajaro.

Jesu yaina ticoro ya wūhū cahmachuina cūhū noajaro. ¹⁶Ahri pūre yū joarocari pūre mūsa mehne macainare mūsa buhe tuhsūri baharo Laodicea macaina cūhure warocaga. Ā yoa tinare Laodicea macainare yū joarocari pūre mūsa cūhū buhega. ¹⁷Ā yoa ō sehe niga Arquipore: “Mari puhtoro Jesu yairo mū jichū to yare buhehtiro cūre mūhure. To ā cūhū noano buhe sohtori tīga mūhū”, niga tirore.

¹⁸Yūhū Paulo, yū wamomaca mehne ahrire joaja. Mūsare noa dutija yūhū. Peresui yū jiare wacū, sini payoga mūsa Cohamacūre. Noano jiga mūsa. Cohamacū to cahīa mehne mūsare noano yoajaro. Āta yoajaro.

1 Tesalonicenses

Paulo cūhū joarocaha Jesu yainare Tesalónica macainare

1 Yuhū Paulo, Silvano, Timoteo sã tiaro ahri pū mehne musare noa dutija. Mūsa sehe Tesalónica macaina mari Pucū Cohamacū yaina jira. Mari puhtoro Jesucristo yaina cūhū jira mūsa. Ā jina Cohamacū mari Pucū, mari puhtoro Jesucristo ti cahīa mehne musare noa dutija. Cohamacū yoadohoa mehne noano jiga mūsa.

Jesu yaina Tesalónica macaina sehe Jesure noano wacū tuaha

²Cohamacūre sinina, jipihtina Jesure mūsa wacū tuaare wacūna “Noabiara sãre”, nirucuja sã musare. Cohamacūre sinina, mūsa ya cjihtire ā sini payorucuna nija sã. ³Mūsa sehe Jesucristore noano wacū tuayuhca. Ā wacū tuana, Jesu yare yoayuhca mūsa. Jesucristore, paina cūhūre cahiyuhca mūsa. Ā cahīna, Jesu yare tuaro yoana niyuhca mūsa. Jesucristore mari puhtorore wacū tuarucuyuhca mūsa. Ā wacū tuarucuna musare to yuhdohtore masina, tíre cohtana niyuhca mūsa. Ā yoa tirore wacū tua duhuerayuhca mūsa nãno yuhdūpanahta. Cohamacū mari Pucūre sinina, tíre mūsa ā yoirire wacūja sã. ⁴⁻⁵Sã coyey, Cohamacū to cahīina jira mūsa. Musare to beserire masija sã. Sohō jiri pja musare noaa buheare buhena ā yahunocana nierahi musare. Espíritu Santo to tuaa mehne noaa buheare buhena nii musare. Ā buhena tí buheah quihōno jichū noano masii sã. Ā jina mūsa watoi sã jina, sã yoirire masina mūsa. Musare yoadohona ā yoai sã. Musare buheina jina Cohamacū to beserina mūsa jichū masija sã.

⁶Sohō jiri pjarure mūsa nãno yuhdūina jina, noaa buheare cahmare mūsa. Mūsa ā cahmachū, Espíritu Santo sehe musare noano wahchechū yoare. To ā yoachū mūsa sehe sãre nū cū, sã yoiriro seheta yoare. Ā yoana Jesu cūhūre nū cūre mūsa. ⁷Ā jia Jesu yaina Macedonia yahpa macaina, Acaya yahpa macaina cūhū Jesu yare mūsa yoirire masire. Ā masia tina cūhū musare nū cū, mūsa yoiriro seheta yoara. ⁸Macedonia yahpa macaina Acaya yahpa macaina cūhū mari puhtoro yare mūsa buhechū tuhrocare. Cohamacūre mūsa wacū tuarire tuhorina sehe tina dihta jierare. Jipihtiro macaina mūsa wacū tuarire tuhoyuhti. Ā jia sã tinare yahuerapachūta tíre masi tuhsure tina. ⁹Ā jia mūsa cahai sã tinirire, sãre mūsa noano piti bocarire yahure tina jipihtiro macainare. Ā yoa Cohamacū sehere wacū tuana, “Cohamacū jira”, mūsa nia masurine mūsa cohānocarire, Cohamacū ya sehere mūsa yoirire yahure tina jipihtiro macainare. Tiro Cohamacū sehe catiriro, Cohamacū waro jira. ¹⁰Ā yoa “Cohamacū macūnore muanopū tahtirore Tesalónica macaina cohtaa nina”, ni yahura masa musare. To macūnore yariariro cjirore Cohamacū masori jire. To ā masochū to macūno Jesu sehe marine nãbiaro to buhiri dahreborinare yuhdori jire.

Tesalónica wama tiri macapū to dahrarire yahuha Paulo

2 Mūsa cahai jina sã ā jinocana niera tii. Musare noano yoadohoina jia tii sã. Tíre noano masina mūsa, sã coyey. ²Ā yoa Filipoi jina nãno sã yuhdūrire, sãre nãno ti yoirire potocāta masina mūsa. Sãre ti ā yoapachūta Cohamacū to yoadohoa mehne cuiro marieno Cohamacū yare noaa buheare buhei sã

musa cūhure. Sāre masa payu ti ñu tuhtipachuta noa buheare buhei sā musare. ³Musare buhena noano sā masirire buhei sā musare. Ā buhena musare dojomehne duana nierahi. Ā yoa mahñorahahi. ⁴Cohamacu to cahmano seheta buheja sā. Noa buheare buhehtina cijihtire Cohamacu besere sāre. To ā beserina sā jichu to ya buheare sā buhechu noa nina, Cohamacu to ñuchu. Ā jina ō seheta buheja sā. Masa ti tuho ji cohtire buhena nieraja sā. Cohamacu sehe sāre to ñu ji cohto cijhtore to yare buheja sā. Tiro sehe mari tuhotuare, dohse mari yoa duaare noano masina. ⁵Noa buheare buhena tuho ji coaa duseri mehne buhena nierahi. Ahrire masina musa. Ā yoa sā buhena, musare paye barore wapa cahmana nierahi sā. Ahrire Cohamacu masina. Potocā nii nija. ⁶Ā buhena masa sāre ti ñu wahāhti cijhtire yoana nierahi sā. Musare paina cūhure sāre ñu wahā dutina tana nierahi. ⁷Ā ñu wahā dutierapanahta Cristo to cūrina jija. Ā jina musare wapa cahmaboa sā. Ā yoa puhtoa yoaro sehe musare dutiina jiboa sā. Wiho mejeta numino wihārirocāre to noano bucūoriro seheta noano nihi siaroca dero yoai sā musare. ⁸Ā jina musare noano cahmana, Cohamacu yare noa buheare buhei sā musare. Ā yoana tí dihtare yoeraí musare. Musare noano yoadohoi sā catisinina waro. Sā cahīina musa jichu musare ā yoadohoi sā. ⁹Ā musare cahīna tuaro yoadohoi sā musare. Tíre wacūna musa, sā coyca. Cohamacu yare noa buheare buhena musa cjuāare sini cariboeraí musare. Ā jina dachopu, ñamipū cūhure dahrai sā.

¹⁰Noano, musare ñano papero marieno, mahñono marieno musare Jesu yainare sā yoirire masina musa. Cohamacu cūhu tíre masina. ¹¹Ā jina ti pūcūro to pohñare to noano yahu to wahchechu yoiriro seheta musa cūhure

yahuna wahchechu yoai musare. Tíre masina musa. ¹²Puhtoro Cohamacu to sūho jiropu, noa yūhdūaropu musare pjirocāre. Ā jina to yaina musa jichu Cohamacu to cahmariro seheta musare ji dutii sā.

¹³Cohamacu yare musare sā yahuri cijirire musa tuhona, ō sehe ni tuhoture musa: “Masa ti mu suro ti buhea jierara. Cohamacu ya buheata jira”, ni tuhoture musa. Tíre musa tuhotuchū masina wahcheja sā. Ā jina Cohamacure sinina “Noana”, nirucuja sā tire. Tóihita jira. Musare sā buhea Cohamacu durucua potocā jiata nina. Ā jiro Cohamacu musa Jesure wacū tuaina jichu to ya buhea mehne musare noa sehere cohtotachū yoaro nina. ¹⁴Jesucristore wacū tuainare Judea yahpa macainare ti yoiriro seheta musa cūhure yoare paina. Judea yahpa macainare Jesu yaina sehere judio masa ñano yūhdūchu yoare. Musa cūhure musa ya dihta macaina āta ñano yūhdūchu yoare. ¹⁵⁻¹⁶Judio masa sehe Cohamacu yare yahu muhtaina cijirire panopu macainare wajāa tiri jire. Ā jia mari puhtoro Jesu cūhure wajāri jire tina. Tuhsu, tina sāre cohāre. Cohamacure tina cahyachu yoahre. Ā yoaina jia, payu masare ñu tuhtira tina. Judio masa jierainare Cohamacu yare sā yahu duamai tina cūhure pichacapu wahaborinare “Cohamacu yūhdojaro”, nina. Sā ā yahu duapachuta judio masa sehe sāre ne Cohamacu yare painare yahu dutierare. Ā yahu dutieraa pjiro buhiri ti namoa nina tina. Mipūre tinare tuaro Cohamacu buhiri dahrerohca juna.

Paulo Tesalónica macaina cahapu pari turi tini duamaha

¹⁷Sā coyca, mipūre mahanocā musa mehne jierana musare wacūna nija. Ā jina musare tuaro ñu duana, musa cahai waha duamai. ¹⁸⁻¹⁹Cāa tahari yūhu Paulo musare ñui waha duamai. Yu ā

waha duapachuta Satana sehe sã waha-
haborirote ducatare. Æ jina wahaer-
ahi sã. Sãre wahchechũ yoaina m̄sa
jichũ musare ñũ duamai. Mari puhtoro
Jesu ahri yahpapũ to t̄jua tachũ m̄sa
sehe sãre wahchechũ yoanahca. Æ jina
wahchea mehne m̄sa mehne Jesu panoi
ducunahca. ²⁰ Æta jira. M̄sare ñũno
Jesu sehe “Noano buheri jira m̄sa”, ni-
nohca sãre. Æ jina noano wahcheja sã.

3¹⁻² Æ yoa m̄sare yoari p̄ja ñũer-
ana musare tuaro tuho duana tíre
wacũna, Timoteore m̄sa cahapu waro-
cai. Tiro mari coyero Jesu yairo Co-
hamacure dahra cohtaroro jiro, sã mehne
noaa buheare buheriro jira. Æ jina tirote
warocai Jesucristore noano m̄sa wacũ
tuahti c̄jiltire, m̄sa wahchehti c̄jilti
cũhure. Tirore warocana sã sahsero
Atena wama tiri macai t̄juai. ³ M̄sa
ñano yũhdũpanahta Jesu yare m̄sa
cohãerahto c̄jiltore warocai sã Tim-
oteore. Jesu yaina jina ñano yũhdũ-
nahca mari. Tíre masina m̄sa. ⁴ M̄sa
mehne tó panopũre jisina mari ñano
yũhdũtoreta yahu tuhsui m̄sare. Æ
jina sã niriro seheta mari ñano yũhdũi.
Tíre m̄sa noano masina. ⁵ Æ jicu
m̄sare yoari p̄ja ñũeracũ m̄sare tu-
aro tuho duai. Æ jicu Jesure m̄sa
wacũ tuarire masii tai Timoteore waro-
cai yũhũ. “Watĩno m̄sare ñano yoa du-
tiri” nicũ, “M̄sare sã buheri c̄jirire m̄s-
apũ duhuri” nicũ, tirote warocai yũhũ.

⁶ Æ yoa mipure Timoteo m̄sa cahapu
jiriro sã cahapu t̄ju wihihre. Æ t̄ju wi-
hiro noaa quitire sãre yahure tiro. Jesure
m̄sa noano wacũ tuare, painare m̄sa
cahãa cũhure tiro yahure sãre. Æ ni
tuhsũ sãre m̄sa noano wacũrere, m̄sare
sã ñũ duaroro seheta m̄sa cũhũ tu-
aro sãre m̄sa ñũ duarire yahure sãre
tiro. ⁷ Æ jina sã coyera, mipure sã ñano
yũhdũpanahta m̄sa Jesure noano wacũ
tuachũ tuhona sã wahcheja. ⁸ Jesure
m̄sa noano wacũ tuarire to yare m̄sa

cohãerarire tuhona noano yajeri sãaja
sã. ⁹ M̄sare Æ ni tuhotuna, Cohamacũ
to ñũrocaroi sã tuaro wahcheja. Æ
wahchena Cohamacure “Noana”, nija sã.
¹⁰ Dachõ cũhure, ñamipũ cũhure Co-
hamacure sinija sã musare sã ñũhti
c̄jiltire. Jesu yare m̄sa noano masi
pahũochũ yoa duaja sã noano m̄sa
tirote wacũ tua namohto sehe.

¹¹ Cohamacũ mari Pũcũ to basi, mari
puhtoro Jesu cũhũ sãre ti yoadohochũ
cahmaja sã m̄sa cahapũ sã wahahto
sehe. ¹² Æ yoa mari puhtoro Jesu jip-
ihtina m̄sa mehne macainare, jipi-
htina paina cũhure cahĩ namochũ yo-
jaro musare. M̄sare sã cahĩrro seheta
tuaro cahĩ namochũ yoajaro m̄sare.
¹³ M̄sare noano to yoadohochũ, buhiri
marieina, ñaa marieina jinahca m̄sa,
Cohamacũ mari Pũcũ to ñũchũ. Mari
puhtoro Jesu jipiltina to yaina buhiri
marieina mehne ahri yahpapũ t̄jua taro
ã jiina jichũ yoajaro m̄sare.

“Cohamacure ji coachũ yoa duana õ sehe yoaga”, ni yahuha Paulo

4 Mipure Jesu mari puhtoro to dutiro
mehne m̄sare õ sehe ni yahu ba-
toaja: “Cohamacure ji coachũ yoa du-
ana õ sehe yoaga”, ni buhei sã m̄sare.
Sã Æ buheri baharo sã buheriro se-
heta yoayuhti m̄sa. M̄sa Æ yoaroro se-
heta yoa namoga. Tíre tuaro yoa dutija
m̄sare.

² Jesu mari puhtoro to buhe
dutirote mehne m̄sare sã buheriro
noano masina m̄sa. ³ Ahrire m̄sare
yahu namoihtja: M̄sa õ sehe jichũ
cahmana Cohamacũ: Ñaare yoeraina,
Cohamacũ yare yoaina jiga. Æ jina
numia mehne ñano yoarena t̄jiga. M̄sa
cũhũ numia m̄sa mehne ñano yoarena
t̄jiga. ⁴ Ñano yoapero marieno, ño
payoro mehne m̄sa namosãnumiare
c̄juaga. Cohamacũ m̄sa tíre masichũ
cahmana. ⁵ Cohamacure cahmaeraina

Cohamacure masieraina ñaare goa pjaa, numia mehne ñano ti yoariro seheta yoena tjiga mŕsa cŕhu. ⁶Mŕsa ã yoachŕ cahmaerara Cohamacu to yairore mŕsa coyeyore mŕsa ñano yoerahto sehe. Mŕsa ã ñano yoana mŕsa coyeyore yuħdurucana nica. Mari puħtoro Cohamacu tı ñaare ti yoachŕ ñano buhiri dahrehtiro jinocanota nina. ã jina tıre yahu tuhsŕi musare “Tı buhirire buhiri tiri”, nina. ⁷Ñaare yoachtina cjihtire beserari jire marine Cohamacu. Ñaare yoeraina cjihtire beseri jire marine. ⁸ã jina jipihtina mŕsa ahri sã buherire yuħdurucana, masa ya buhea sehere yuħdurucana nierara mŕsa. Cohamacu ya sehere yuħdurucana nina. Tiro musare Espıritu Santore wariro jira.

⁹⁻¹⁰Mŕsa coyeyare Jesu yainare mŕsa cahıhtire Cohamacu musare buhe tuhsŕi jire. To ã buhechŕ potocãta Jesu yainare Macedonia macainare jipihtinare noano cahına mŕsa. Mŕsa ã cahıchŕ ñuna “Mŕsa coyeyare cahıga”, ni buheraja musare. Tinare cahı tuhsŕa mŕsa. ã ni buhe namoerapanahta ahri sehere musare dutija. Mıpŕe painare mŕsa cahıno seheta cahı namoga mŕsa. ¹¹ã yoa mŕsa basi cahma ñu tuhtiro marieno jiga mŕsa. Painare soro ni ħurucuenta tjiga. ã ñnocahga tinare. ã jina mŕsa ya dahraa sehere noano dahraga. Panopŕta musare ã yoa dutii. ¹²ãta yoaga mŕsa, paina musare ti ño payohto sehe, paina yare mŕsa cariboerahto sehe.

Ahri yahpapŕe Jesu to tjua tahtore yahuha Paulo

¹³Coyea, mıpŕe yariarina cjiřire yahuihtja musare: Jesure cahmaeraina Cohamacu cahapŕ wahasi. ã jia tina mehne macaina ti yariachŕ ñna tuaro cahyara. Yariarina cjiři ti wahahtore quihõno noano mŕsa masichŕ cahmaja

sã, paina ti cahyariro seheta mŕsa cahyaerahto sehe. ¹⁴Jesu to yariari baharo masa mŕjari jire. “Ti potocãta jira”, nija mari. ã niina jina ahri cŕhure “Potocãta jira”, nija mari. Cohamacu sehe to yaina cjiřire yariarina cjiřire masa mŕjachŕ yoaro, baharopŕ Jesu mehne na tarohca. Tı cŕhure “Potocãta jira”, nija mari.

¹⁵Jesu to tjua tachŕ to yaina yariarina cjiři catiina pano masa mŕja muħtaahca. Mari puħtoro Cohamacu ya yahua tjira ahri. ¹⁶õ sehe jirohca Jesu to tjua tachŕ: Mari puħtoro to basi tuaro sañurucu muħtanohca. ã jiro to anjoa puħtoro tuaro pisurohca. ã to pisuchŕ Cohamacu to corneta bisiro coa tarohca. Ti ã yoachŕ Jesu yaina yariarina cjiři masa mŕja muħtaahca. ¹⁷Baharo catinare, yariarina cjiři mehne Cohamacu manopŕ me yehsea cururıpŕ mŕjachŕ yoarohca. To ã yoachŕ mari puħtoro Jesure piti bocanahca mari. ã piti bocana jipihtia dachoripe mari puħtoro Jesu mehne jirucunahca mari. ¹⁸Ahri yŕ yahurire mŕsa mehne macainare yahuga. ã ni yahuna wahchenahca mŕsa jipihtina.

5 Yŕ coyeyare, Jesu to tjua tahti dachore “Ahri dachoi tjua tarohca” ni, musare yahu joarocarohca cahmaerara. ²Mıpŕ mŕsa masino seheta to tjua tahti dachore marine masihtohca basioerara. Yacariro ñamıpŕ wacŕenoca to yacaro tarohca ahri yahpapŕe mari puħtoro wacŕenoca tjua tarohca. Ahri mŕsa basita noano masina. ³“Mıpŕe mari noano jinocaja. Cuaro mariaha marine”, masa ti ni wacŕchŕ dıocãta ñano waharohca tinare. To ã wahachŕ tina duhti masisi. Niji wahcõricoro wacŕenoca to purıno tuhoturo seheta wacŕenoca ã waharohca masare. ⁴Yŕ coyeyare, mŕsa sehere ã wahasi. Yacariro wŕhŕ pŕore to cuoriro seheta mŕsa sehere ã wahasi. Jesu tarohca musare cuosi.

Nahitianoi jiina ti ñu masieraro seheta paina Jesure ne masierara. MUSA sehe tina yoaro sehe jierara. ⁵MUSA jipihitina Jesu yaina jira. Á jina buhriaroi ti ñu masino seheta Jesu to tahtore masina MUSA. Paina nahitianoi jiina seheta tirore masieraina yoaro sehe jieraja mari. ⁶Á jina carina yoaro sehe Cohamacure tuho nuneraina jiena tjijihna mari. Paina áta yoara. Tina yoaro sehe yoarena tjijihna mari. Carieraina yoaro sehe quihono yoaina, noano wacu masiina jijihna mari. ⁷Carina namipu carina. Á jia cahaina namipu cahara. ⁸Mari sehe buhriaroi jiina yoaro sehe Jesure masiina jina, noano wacu masiina jijihna. Á yoa surara comaa suhtiro mehne to cutirotore to sa ducatariro seheta Cohamacure wacu tuaga MUSA, watinore to ducatahto sehe. Á yoana Cohamacure, paina cuhure cahiga. MUSA á yoachuta Cohamacu musare nu wihborohca. Á jina musare pichacapu waborinare Jesu to yuhdohtore “Potocá tjira”, niga MUSA. MUSA á niina jichu surara to dapure comaa chapea mehne to pisa ducatariro seheta watino musare to nano yoa duachu Cohamacu tirore ducatarohca. ⁹To buhiri dahrehtinare marine beserari jire Cohamacu. Jesucristo mari puhtoro pichacapu waborinare to yuhdohtina cjihtire marine beseri jire tiro. ¹⁰Jesu mari ya cjihtireta yariari jire tiro mehne mari jihito sehe. Catiina, yariaina cuhu tiro mehneta jiahca. Á jina jipihitina tiro mehne jinahca mari to yaina jina. ¹¹Á jina MUSA mehne macainare mipu MUSA wahchechu yoariro seheta MUSA basita wahchechu yoaga tjoa. Á yoana MUSA basita Cohamacure wacu tua namochu yoaga MUSA mehne macainare.

Jesu yainare Paulo yahu batoaha

¹²MUSARE buheinare, Cohamacu dutiare musare yahuhtinare mari puh-

toro buhe dutiro taro beseri jire. To á ni beserinare noano no payoga MUSA. MUSA á no payochu cahmacu tuaro dutija musare. ¹³Ti dahraare ti yoachutinare cahia mehne noano no payoga. Á yoa MUSA mehne macaina mehne cahmacheno marieno jiga.

¹⁴MUSARE sa coyeare, ahrire tuaro dutija: Dahra duaerainare dahra dutiga MUSA. Cahyainare wahchechu yoaga MUSA. Jesure wacu tuaera cureinare yoadohoga. Tina jipihitina mehne noano suaro marieno ji coaro jiga MUSA.

¹⁵Curo musare to nano yoachu nuna tirore nano yoa cahmaena tjiga. Á jina MUSA mehne macainare, jipihitina paina cuhure noano yoaga.

¹⁶Á yoana dachoripe á wahcherucuga MUSA. ¹⁷Á jina Cohamacure á sinirucuga dachoripe. ¹⁸MUSA nano yuhdapanahca Cohamacure wahche, “Noana”, niga. MUSA noano yuhduri pja cuhure “Noana”, niga tirore. Á nina Cohamacu to cahmano seheta yoana nica MUSA. Cristo Jesu yaina MUSA jichu nuno MUSA á nichu cahmana tiro.

¹⁹Espiritu Santore yuhti duaeraina jiena tjiga. ²⁰Espiritu Santo to masia mehne paina sehe musare buhera. Ti á buhechu ti buheare cahmaeraina jiena tjiga. ²¹Paina musare soro ti ni buhechu ti Cohamacu ya jierachu masiga MUSA. Á jina Cohamacu ya buhea ti jichu cuhure masiga MUSA. Á masina noaa buhea dhtare cahmaga. ²²Á yoana jipihitia naare cahmaena tjiga MUSA.

²³Cohamacu marine noano jichu yoariro jira. Tiro to basi musare to yainare noaina naa marieina jichu yoa namojaro musare. MUSA pjacuri cuhure MUSA catia cuhure noano nu wihbojaro. Mari puhtoro Jesucristo ahri yahpapure to tjua tahto pano musare Cohamacu noano nu wihbojaro naare MUSA yoerahto sehe. To á yoachu Cristo to tachu naa marieina jinahca MUSA. ²⁴Áta

jichu yorohca Cohamacu. Tiro musare beseriro to niriro seheta yoara.

Paulo cūhu noa dutirocaha

²⁵Sā ya cjihtire Cohamacure sini payoga mūsa, sā coyea.

²⁶Mūsa mehne macainare noano mehne piti bocasiniga.

²⁷Jipihtina Jesu yainare ahri tjure buhega mūsa. Jesu mari puhtoro to dutia mehne ahrire musare dutija yūhu.

²⁸Jesucristo mari puhtoro to cahia mehne musare noano yoajaro.

2 Tesalonicenses

Paulo cūhū joarocaha Jesu yainare Tesalónica macainare

1 Yuhū Paulo, Silvano, Timoteo cūhū ahrire mūsare joarocaja tjoa. Mūsa sehe Tesalónica macaina mari Pūcū Cohamacū yaina jira. Mari pūhtoro Jesucristo yaina cūhū jira mūsa. ² Ā jina Cohamacū mari Pūcū, mari pūhtoro Jesucristo mehne mūsare noa dutija. Cohamacū yoadohoa mehne noano jiga mūsa.

Ahri yahpapure Cristo tjua taro buhiri dahrerohca

³ Cohamacūre sinina Jesure mūsa wacū tuaare wacūna “Noabiara sāre”, nirucuja sā Cohamacūre. Sā ā nichū noa nina. Dachoripe Cohamacūre mūsa noano wacū tua namona niyuhca. Ā yoana dachoripe mūsa mehne macainare cahī namona niyuhca mūsa. Ā jichū Cohamacūre “Noabiara sāre”, sā nichū noa nina. ⁴ Paina mūsare nāno ti yoapachūta Jesure wacū tuarucuyuhca mūsa mipū cūhūre. Ā yoa tirore wacū duhuerayuhca. Mūsa ā yoachū nūna tīre mūsa yoirire paina Cohamacū yainare wahchea mehne yahuja sā. ⁵ Ā wacū tuarucuna Cohamacū mari pūhtoro yaina mūsa jiri buhiri nāno yūhdūna niyuhca mūsa. Ā jiro pūhtoro Cohamacū to suho jiropure waha dutira mūsare. To ā dutichū to quihōno yoariro jichū masija mari.

⁶ Ā yoa Cohamacū quihōno yoariro jira. Ā jiro mūsare nāno yūhdūchū yoaina sehere nāno yūhdūchū yoarohca tiro. ⁷ Ā yoaro mūsa nāno yūhdūrina cjiri jichū tiro mūsare noano jichū yoarohca. Sā cūhūre noano jichū yoarohca. Mari pūhtoro Jesu to yaina anjoa tuaina mehne, picha

pohna mehne mūanopū bajuaro noano jichū yoarohca marine, nāno yūhdūrina cjirire. ⁸ Ā yoa Cohamacūre masierainare, mari pūhtoro Jesu to buheare noaa buheare yūhdūrcarinare Cohamacū buhiri dahrerohca. ⁹ Cohamacū tinare ō sehe buhiri dahrerohca: Pichacapū tina nāno yūhdūrucuahca. Ā jia tina tuariro mari pūhtoro Jesu cahai ne ji masierara. Ā jia tua yūhdūariro to jiare nūsi tina. ¹⁰ Āta waharohca tí dachoi Jesu to tjua tahti dachoi. Tí dachoihta tiro tarohca noaina tirore wacū tuaina “Noariro, tuariro jira Jesu”, ni wahchea mehne ti nō payohto cjihtore. Mūsare sā buherire mūsa noano tūhore. (Ā jina mūsa cūhū tiro mehne jinahca.)

¹¹ Ā jina Cohamacūre ā sini payorucuja sā mūsa ya cjihtire. Ō sehe ni Cohamacūre sini payoja sā: To cahmano seheta yoahtinare mūsare to cūriro seheta mūsa jihtina cjihtire sini payorucuja sā mūsare. Mūsa noaina ji duanata niyuhca. Ā jina Cohamacū to tuua mehne noaina mūsa ji duariro seheta mūsa jilhti cjihtire sini payorucuja sā. Mūsa Cohamacūre wacū tuayuhca. Ā wacū tuana to yare yoayuhca mūsa. Tīre mūsa noano yoa namohti cjihtire Cohamacūre sini payorucuja sā mūsare. ¹² Ā yoana mari pūhtoro Jesucristore painare nō payochū yoanahca mūsa. Mūsa ā yoachū Jesucristo yaina mūsa jichū nūa paina nō payoahca mūsare. Cohamacū to cahīa mehne, mari pūhtoro Jesucristo cūhū to cahīa mehne ā waharohca.

Nāno yoarucurirore yahuha Paulo

2 Mipure mari pūhtoro Jesucristo ahri yahpapure to tjua tahtore, tirore mari cahmachu mari piti bocahtore yahu namo duaja yūhū. Ō seheta tuaro yahu duaja mūsare, sā coyeyā: ² Paina mūsare ō sehe niboca: “Mari pūhtoro to tjua

tahti dacho, pihtiri dacho jiropu nina”, niboca musare. Ti ā nichu tuhona, tuho cūaena tjiga. Ā yoa tuho wisiena tjiga. “Cohamacu yuhure āta niri jire”, niboca musare paio. Pairo cūhu musare buhero āta niboca. Pairo cūhu āta ni joarocaboca, “Yuhu Paulo tjija”, ni mahño joarocarō. ³Paina musare ti ā mahñochu tuhoena tjiga musa. Tí dachoi ahri yahpa to pihtilto panocā payu masa Cohamacure duhuahca. Ā jiro tí dachoi nāo yoarucuro pichacapu wahahtiro bajuarohca jipihina ti nūhtiro cjihtore. ⁴Tiro Cohamacu warore, paina bajueraina masa ti ño payoina cūhure jipihina masare ño payo dutisi nāno yoarucuro. Tiro ō sehe ni tuhurohca. “Ahrina jipihina bui puhtoro jija yuhu”, ni tuhurohca. Ā jiro Cohamacu wuhui dujiro “Yuhu sehe Cohamacu jija”, ninohca.

⁵Musa mehne jisinicu tíreta yahui. ¿Tíre wacūerajari musa? ⁶Mipure paio sehe nāno yoarucurore ne ji dutierasina. Ā yoa tirore ji dutierarore masina musa. Tiro sehe to dutichu to quihōri dacho jichu nāno yoarucuro bajuarohca. ⁷Mipure masa ti nūenoí tiro yoaro seheta paina nāare yoa tuhura. Ti ā yoapachuta nāare yoa dutiariro to wahahto pano tiro nāno yoarucuro sehe jisi. ⁸To wahari baharo pinihtare nāno yoarucurota bajuarohca. Baharo mari puhtoro Jesucristo tirore yuhdurucarohca. Ahri yahpapu to si sitea mehne tjua taro, to dusero mehne putirocaro, tirore wajā boarohca. ⁹Nāno yoarucuro sehe watino tuua mehne taro, payu bajuamehnerire, mahñoa bajuamehnerire yoa ñonohca. ¹⁰Payu nāa to yoa ñoa mehne to ā mahñochu pichacapu wahahtina sehe tirore tuhoahca. Tina sehe noaa buheare cahmaerare. Ti ā cahmaerachu Cohamacu tinare pichacapu wahahtinare yuhdosi. Tina pinihta nāno yoarucuro mahñoriro

to yoirere “Potocā tjira”, niahca. ¹¹Ā jiro noaa buheare ti cahmaerari buhiri Cohamacu tinare wisiomehnenohca. Ā wisiaa mahñoare cahmaahca tina. ¹²Ā jiro jipihina noaa buheare tuho du-aerainare, nāa dihtare yoa ji coainare tirota buhiri dahrerohca.

“Cohamacu musare beseha to yaina jichu yoaro taro”, ni yahuha Paulo

¹³Musa sā coyega, mari puhtoro Jesu to cahina jira musa. Dóiputa wamanopureta musare pichacapu waha-borinare to yuhdohtina cjihtire Cohamacu beseri jire musare. Musare beseri jire Espiritu Santo to tuua mehne to yaina nāa marieina musare jichu yoaro taro. Ā jiro noaa buheare “Potocā tjira”, nihtina musa jichu nūno musare beseri jire. To ā beserina musa jichu nūna Cohamacure wahche, “Noana”, nirucuja sā. ¹⁴Noa buheare musare sā buhechu Cohamacu musare beseri jire mari puhtoro Jesucristo to masa mujariro seheta musa cūhu musa masa mujahito cjihtore.

¹⁵Ā jina yu coyega, noano wacū tuaina jiga musa. Ā jina sā durucua mehne sā joarocaa pūri mehne musare sā buherire noano wacūga musa. Ā yoa tí buheare yuhdurucaena tjiga. ¹⁶Mari puhtoro Jesucristo to basi, Cohamacu mari Pucu cūhu marine cahia, jipihia dachoripe marine wahchechu yoare. Marine cahia marine pichacapu waha-borinare yuhdoahca. Ā jina Cohamacu to yuhdohtore noano masina wahcheja mari. ¹⁷Jesucristo, mari Pucu mehne musare noano yoajaro pjiro musa wahchehto sehe. Ā yoa jipihia noare musa yoahito sehe, musa noano durucuhto sehe Cohamacure musare sini payoja.

“Sā ya cjihtire Cohamacure sini payoga”, ni joaha Paulo cūhu

3 Mipu sā coyega, sā ya cjihtire Cohamacure sini payoga mari puhtoro

toro Jesu to buhea payu masare sã buhehto sehe. To buheare m̄sa noano cahmariro seheta paina c̄hu tí buheare ño payoa mehne ti cahmahto sehe sini payoga m̄sa Cohamacure. ²Cãinata Jesure wacũ tuara. Paina sehe to yare tuho duaeraa, Jesure wacũ tuaerara. Á jina ñaina masa sãre ti ñano yoa duachũ Cohamacure sini payoga m̄sa sãre to yoadohohto sehe. ³Mari puhtoro Jesu to niriro seheta yoariro jira. Á jiro musare tirore wacũ tuachũ yoarohca. Á yoa tuhsu, watino musare to ñano yoa dutichũ tiro musare yoadohorohca. ⁴Cohamacũ musare to yoadohorire masija sã. Á jina musare sã dutiriro seheta m̄sa yoachũ c̄hure masija sã. Á yoa ãta yoarucunahca m̄sa. Tí c̄hure masija sã. ⁵Cohamacũ musare to cahĩare musare masichũ yoajaro. Á jina Cristo yoaro sehe ñano yuhdũpanahta c̄no pjaina jichũ yoajaro musare mari puhtoro.

Marine tuaro dahraro cahmana

⁶Jesucristo mari puhtoro to dutiro mehne õ sehe ni dutija musare: Jesu yainare dahra duaerainare, musare sã buheriro seheta yoaerainare, tinare piti tiena tjiga. Á ñuncahga tinare. ⁷Sohõ jiri pja m̄sa mehne sã jichũ tuaro sã dahrachũ ñure m̄sa. Á jina sã yoariro seheta m̄sa c̄hure dahraro cahmana. Tíre noano masina m̄sa. ⁸Á jina m̄sa chuare wapa marieno chuerahi sã. Á yoa dachopure, ñamipũ c̄hure tuaro dahrai sã “M̄sa chuare sã siniri”, nina. ⁹Sã buheri wapa musare wapa cahmaboa sã. Á wapa cahmaborina ji-

panahta wapa cahmaerana tuaro dahrai sã, m̄sa sehe sãre m̄sa ñũ cũhto sehe. ¹⁰M̄sa mehne jina, õ sehe ni buhei musare: “Dahraeraina chuea tjijaro”, ni buhei sã musare. ¹¹Cãina m̄sa mehne macaina ne dahra duaerayuhca. Á dahra duaeraa, painare ã yahu wajamacanoca, caribobiario yoayuhca tina. ¹²Mari puhtoro Jesucristo to dutiro mehne ã dahra duaerainare õ sehe nija: Noano wahchea mehne dahrajaro tina ti noano jihto sehe, ti ya chuare ti chuhto sehe.

¹³Sã coyega, m̄sa sehe noare yoarucuna pumena tjiga. ¹⁴Cãina tó macaina ahrire sã joarocarire yuhdũrucaboca. Ti ã yoachũ ti yoarire noano ñũga. Á ñuna tinare piti tiena tjiga ti buoro wahahto sehe. ¹⁵Á piti ti duhupanahta tinare ñũ tuhtiena tjiga. Tina m̄sa coyega, Jesu yaina tjira. Ti ã jichũ ti yuhdũrucarire yahuga tinare tíre ti yoerahto sehe.

Paulo tinare noa duti batoaha

¹⁶Mari puhtoro Jesu marine noano jichũ yoariro mehne dachoripe noano jirucuga m̄sa. Á jicũ “Mari puhtoro m̄sa jipihtina mehne jirucujaro”, nicũ musare noa dutija.

¹⁷Yũhũ Paulo, yũ wamomaca mehneta mipure yũ basita joa batoai nija: Á joacũ musare noa dutija. Jipihtia yũ joarocaa pũrine õ sehe dihta yũ wamomaca mehne joa batoaja yũhũ. Yũ õ sehe dihta yũ joa batoachũ ñuna yũ joarocari pũ to jichũ masinahca m̄sa. ¹⁸Mari puhtoro Jesucristo to cahĩa mehne noano yoajaro musare jipihtinare.

1 Timoteo

Paulo Timoteore joarocaha

1¹⁻² Yuhũ Paulo ahrire mũhũre Timoteore joarocaja. Cohamacũ marine pichacapũ wahaborinare yũhdoriro jira. Jesucristo yare buhe dutiro to cũriro jija yuhũ. To Pũcũro, to Macũno Jesu mehne ti dutiriro seheta ti cũriro jija yuhũ. Jesuta marine yũhdora. Ā jina marine to yũhdohtore masina, tíre cohtaja mari. Mũhũre Timoteore Jesu yare buhei. Yũ Ā ni buhechũ tuhocũ Jesure wacũ tua dũcare mũhũ. Ā jicũ mũhũ potocãta yũ macũ yoaro sehe jicũta nina. Cohamacũ mari Pũcũ mehne, mari pũhtoro Jesucristo mehne mũhũre noa dutija. Ā yoa mũhũre cahĩa, pja ñna ti yoadohoa mehne noano jiga mũhũ.

Paulo mahñoa buheare buhe dutieraha

³ Sohõ jiri pjare Macedonia yahpapũ wahacũ mũhũre Efesoi cũ yũhdu wahcãi. Tõi cãina ti ya buheare mahñoa buheare buheina jire. Tí buheare mũ buhe dutierahtiro cjihtore cũi yuhũ mũhũre. ⁴Tina ti mũ sũro Ā buhemacanocahna. Ā yoa ti coyea panopũ macaina cjiri ti mũ sũro ti buherire Ā buherucura. Tí buhea mehne paina mehne cahma sayorucura. Cohamacũ marine to dutirire noano yoachũ yoerara tina Ā buhea. Cohamacũ ya sehene yoana tirore wacũ tuaja. Ā jicũ ti mũ sũro ti buherire buhe dutierahtiro cjihtore cũi mũhũre.

⁵ Ā cũi mũhũre Jesu yaina painare ti cahĩhti cjihtire. Ñaa buhiri mariea mehne, noaa wacũa mehne, potocã Cohamacũre wacũ tuaa mehne painare ti cahĩhti cjihtire Ā cũi mũhũre. ⁶ Cãina ahri noaa buheare cohã tuhsũ paye buhea sehene cahmana tjoa. Ā ti cah-

machũ, tí buhea sehene ti cahma sayochũ tó wahaerara. Tí buheare ti cahma sayoa yaba cjihti jierara. ⁷ Tina Cohamacũ dutiare buheina ji duamana. Ā buhe duapahta tí buheare tina ti basi noano masierara. Tí buheare masiina yoaro sehe buhepahta tí buheare ne masierara tina.

⁸ Cohamacũ dutiare Moise cjiro marine to cũi cjiirire quihõno mari buhechũ noaa dutia jira. Tíre mari noano masija. ⁹⁻¹⁰ Tí dutiare buhena ahrire masino cahmana: Tí dutia noaare yoainare ti buhehti cjihti jierara. Ahriina sehene ti buhehti cjihti jira. Pũhtoare cohã duainare, dutiare yũhdũrcainare, ñaa dihtare yoainare, ñano buhiri tiinare, Cohamacũre ño payoerainare, Cohamacũ yare cahmaerainare, ti pũcũsumare wajãinare, ti pocosãnumia cũhũre wajãinare, paina masare wajãinare, numia mehne ñano yoainare, mũa mehne ñano yoaa numiare, cahma numia mehne ti ñano yoariro seheta mũa sahsero o numia sahsero jipahta ti pjacũri mehne ñano yoainare, masa pohnare paina cũhũre duhti yacainare, mahñoinare, painare mahñoa mehne yahusãinare Cohamacũ dutia Moise cjiro marine to cũi cjiri sehe tinare buhehti cjihti jira. Ā yoa paina jipihtinare noaa buheare yũhdũrcainare buhehti cjihti jira Cohamacũ to dutia. ¹¹ Tí buhea noaa buhea sehe noariro Cohamacũ to ya buheata jira. Tí buhea sehene yũhũre Cohamacũ buhe dutire.

Cohamacũ Paulore to pja ñnare yahuha tiro

¹² Ā yũ buhechũ Jesucristo mari pũhtoro yũhũre tuaare waro yũhũre yoadohora. “Paulo noano buherohca yũ yare”, ni tuhoture Jesu yũhũre. Ā jiro yũhũre besero tirore yoadohohtiro cjihtore cũre yũhũre. To Ā yoachũ “Noana”, nija yuhũ tirore. ¹³ Tó panopũre Cristore yũ

ñano durucupachuta, to yainare ñano yu yoapachuta, tiro yuhure beseri jire. Tirore masierasinicu tirore ñano yoacu “Ñano yoai nica yuhu”, ni tuhotueracuru. Yu ã masierasinicu ñuno tiro pja ñure yuhure. ¹⁴ Æ pja ñuno, Cohamacu mari puhtoro yuhure tuaro cahino, noano yoare yuhure. Æ yoa Cristo Jesure wacu tuachu yoare yuhure tiro. Æ yoaro painare cahichu yoare yuhure Cohamacu.

¹⁵ Yuhu sehe paina yuhdoro ñaa yuhduariro jimai. Ñaina mari jipachuta Jesucristo ahri yahpapu tari jire ñainare pichacapu wahaborinare yuhdohtiro cjihto. Tí potocã tjira. To ã jiriro jichu jipihtina tíre masijaro. ¹⁶ Ñaa yuhduariro yu jipachuta tiro yuhure pja ñure. Æ pja ñuno Jesucristo suaro marieno yuhure to noano yoarire masichu yoaro nire painare baharo tirore wacu tuahtinare masichu yoaro taro. Æ wacu tuahtina manopu ã jirucuahca. ¹⁷ Cohamacu jipihtia dachoripe masa bui puhtoro jira. Tiro ne yariaerara. Mari mehne to jipachuta tirore ñueraja mari. Tiro dihta Cohamacu waro jira. “Potocãta noariro, tuariro jira tiro”, nijihna tirore. Jipihtia dachoripe tirore ño payojihna. Æta yoajihna.

¹⁸ Timoteo, yu macu yoaro sehe jira muhu. Æ jicu mipure ahrire muhure dutija: Mari coyera Jesu yaina Cohamacu yare yahu muhtaina baharo mu yoahitre ti ni muhtariro sehetu muhure dutija. Cristo yare noano yahurucuga. Æ yoa ñano yuhdupaihta tirore wacu tua duhui tjiga muhu. Tuhsu, to yare quihono buherainare poto yahuga duhuro marieno. ¹⁹ Jesure ã wacu tuarucuga. Ñaa buhiri marieriro jiga. Noaa dihtare yoaga. Cãina tíre yoeraa Jesu yare cohãna. Æ cohãna tirore wacu tua duhure. ²⁰ Æta yoare Himeneo, Alejandro mehne. “Watino to cahmano sehetu yoawahno-

jaro musare”, ni cũi tinare, ñano Cohamacure ti durucu namoerahto sehe.

Cohamacure sini payoare yahuha Paulo

2 Mipure õ sehe ni dutija musare. Ahri wiho waro jierara: Jipihtina ya cjihtire Cohamacure sini payoga. Æ sini payona “Noana. Wahcheja”, niga Cohamacure. ² Puhtoa, paina masa bui dutiina cuhu ti ya cjihti cuhure Cohamacure sini payoga, cahmacheno marieno Cohamacure ño payoina mari noano jihto cjihtore. Æ sini payona mari Cohamacu cahmaare, quihono yoaina noano ji masija. ³⁻⁴ Tõ sehe paina ya cjihtire mari sini payochu noa nina. Tíre mari yoachu ñuno Cohamacu marine yuhdohtiro sehe marine noano ñu jicoara. Jipihtina pichacapu wahaborinare to yuhdoina jichu cahmana Cohamacu. Æ yoa noaa buheare ti masichu cahmana tiro. Æ jiro paina ya cjihtire mari sini payochu wahchera tiro. ⁵ Cũirota jira Cohamacu. Æ yoa Cohamacure mari ñu tuhtichu Cohamacu cuhu marine to ñu tuhtichu bosariro cũirota jira. Tiro masunota jiriro, Jesucristota jira. ⁶ Wapamonore waparo sehetu jipihtina ti ñaa yoari buhirire yariari jire tiro. Cohamacu to quihõri pjai tíre masare masichu yoari jire. ⁷ Tíre yahuhtiro cjihtore, Jesu to cũhtiro cjihtore tiro yuhure beseri jire. Judio masa jierainare Jesure wacu tuaare, noaa buheare buhehtiro cjihtore beseri jire yuhure. Potocãta musare yahui nija yuhu. Mahnoeraja.

⁸ Cohamacu yare noano yoaina jipihtiro macaina sehe Cohamacure ti sinichu cahmaja. Æ yoa tina suaro marieno, cahma sayoro marieno tiro mehne ti durucuchu cahmaja. ⁹ Æ yoa, numia sehere carera numia yoaro sehetu ti suhti tiina jichu cahmaja. Æ jia soro bajua pjoari ti pjoarire yoaea tji-

jaro. Uru dari busaa darire perla yapari dari cūhure busaea tjjaro tí numia painare “Goa pjachū yoari”, nia. Ā yoa wapa bujua suhtire sāaea tjjaro tina Jesu ya numia. Painare goa pjachū yoaa numia jiea tjjaro. ¹⁰ Ā yoa tí numia noaa sehere yoajaro. Āta yoaro cahmana “Cohamacū ya numia jija”, nia numiare. ¹¹ Dihta marieno ño payoa mehne buheare tūhojaro tí numia. ¹²⁻¹⁴ Ā jia numia muare buhea tjjaro. Ā yoa muare dutiea tjjaro. Tí numia sehe dihta mariea numia jijaro. Adāore Cohamacū bajuamehne muhtari jire. To baharo Evare bajuamehneri jire. Ā yoa watīno to mahñochū tūhoriro Adāo jierari jire. To mahñochū tūhoricoro sehe Eva jiri jire. Ā to mahñochū tūhororo, Cohamacūre yūhdurucaricoro wahari jire ticoro. Ā jia numia sehe muare dutiea tjjaro. ¹⁵ Numino ji muhtaricoro to yūhdurucapachūta numia ti pohna tichū ñño tinare Cohamacū yoadohorohca. Tí numia pohna tia numia sehe Cohamacūre ti wacū tuarucuchū tiro yoadohorohca tinare. Ā yoa masare, Cohamacū cūhure ti cahīrucuchū, noaa numia ti jirucuchū, quihōno yoaa numia ti jichū Cohamacū tinare yoadohorohca.

Jesu yaina puhtoia ti yoahtire yahuha Paulo

3 Masa Jesu yaina puhtoia ji duaa, noaare yoa duaa nica tina. Tí potocāta jira. ² Jesu yaina puhtoare besecu ō sehe jiiinare besega: Buhiri marieinare besega “Paina tinare ñano ni yahusāri”, nicū. Ā yoa cāa numiata namo tiinare, noano tūho masiinare, quihōno yoainare, paina ti ño payoaina, masare wahchea mehne ti wūhure sāa ta dutiinare, painare noano buhe mihniinare besega muhū. ³ Ā besecu cahaerainare, cahmacherainare, masare noano yoainare, cahma sayoerainare, niñerure cahīerainare besega muhū. ⁴ Ā

yoa muhū beseina ti ya wūhū macainare noano yahuina, ti pohñare noano ño payoa mehne yūhtichū yoaina, noano yahuina jijaro. ⁵ Tinare yūhtichū yoa masieraa, noano yahu masieraa, Jesu yaina cūhure noano yahu, yūhtichū yoa masieraboca tina. ⁶ Jesu yaina puhtoia ji duaina Jesu yaina wahma sāaina jia, tina puhtoia ji masierara. Wahma sāainare Jesu yaina puhtoia musa cūchū tina “Noa yūhdūaina jija”, ni tūhotuboca. Ti ā ni tūhotuchū Cohamacū tinare buhiri dahre dutirohca watīnore to yoariro seheta. Watīno cūhū āta ni tūhotua timaha Cohamacūre yūhduruca duaro. ⁷ Ā yoa puhtoia ji duaina Jesu yaina jieraina ti ño payoaina jiro cahmana tinare. Noano yoaina ti jichū ñña paina ño payoahca tinare. Ā jia masa tinare ñano quiti dahresi. Ā jiro watīno tinare dojomehne masisi.

Jesu yainare yoadohoina ti yoahtire yahuha Paulo

⁸ Ā yoa Jesu yainare yoadohohtina sehere besecu ō sehe jiiinare besega: Tina masa ti ño payoainare, noano potocāta durucuinare, cahaerainare, niñerure cahīerainare, mahñoa mehne wapata duaerainare, ⁹ Cohamacū to yahuri buhea to nino seheta yoainare, ñaa buhiri marieinare besega muhū. ¹⁰ Tinare muhū besehto pano Jesu yainare yoadohoina ji duainare ti yoarire ñuga muhū. Tinare muhū ā ñuri baharo tina sehe ñaa buhiri marieina, ñaare yoeraina jia, Jesu yainare yoadohoina sāajaro tina. ¹¹ Ā yoa ti namosānumia ō sehe ti jichū cahmaja mari. Masa ti ño payoa numia, masa noaa numia, ñano quiti dahrera numia, tūho masia numia, jipihtiare noaare yoarucia numia ti jichū cahmaja mari. ¹² Jesu yainare yoadohohtinare besecu cāa numiata namo tiinare, ti pohñare paina ti wūhū macaina cūhure noano

yáhtichu yoainare besega. ¹³Á jia mu beseina Jesu yainare ti yoadohochu paina tinare noano ñu ji coahca. Á jia tina yoadohoina sehe noaa buheare, Jesucristore ti wacü tuua cühure cuiro marieno buheahca tina.

Cohamacu ya buheare yahuha Paulo

¹⁴⁻¹⁵Mipure mu cahapu waha duai nimaja. Á waha duapaihta mipure wahaerasinicu ahri püi yahu, mühure joarocai nija. Jesu yaina cahmachuina watoi musa dohse yoahcore mühure yahu joarocai nija, “Michapucaca yuhu wahaerasiniboca”, nicu. Jesu yaina Cohamacu catiriro yaina jira. To yaina potocã jia buheare Cohamacu ya buheare cjuara. Á cjuaa, tíre buherucura. ¹⁶Ahri potocã tjira. Marine Cohamacu to buheri cjiri, panopu mari noano masierari cjiri noa yuhduu buhea jira. Ahri buhea õ sehe jira:

Tiro Cristo mari pjacu seheta pjacu tiro masa bajuari jire.

Noariro, ñaa marieriro to jichu ñore Espiritu Santo sehe.

Anjoa cühu tirore ñari jire.

Á yoa buhe duti to cürina paye yahpari macainare to yare buhei sã.

Á jia ahri yahpai masa payu tirore wacü tuare.

Baharo manopu Cohamacu naahre tirore.

Tí jira noaa buhea.

Noa buheare cohärina cjirire yahuha Paulo Timoteore

4 Espiritu Santo ahrire noano yahura: Pihitiri dacho panocã cãina masa Jesu ya buheare cohãahca. Á cohãa mahñoa buheare watia ya buhea sehere tuho nunuahca tina. ²Tí buheare mahñorucuina yahuahca masare. Tina mahñorucuina sehe “Ñaa buhiri mari-ahna sãre”, ni tuhotuina jira. Á jia tina ti ñaa yoare ne tuhoturara. ³Õ sehe

ni buheahca tina: “Namo tiena tjiga. Ahri chüare chüena tjiga”, ni buheahca tina. Ti á chu dutierapachuta Cohamacu chüare bajuamehnenno mari chuhti cjihtire noare cüri jire tiro. Mari Cristore wacü tuaina jichu noaa buheare mari masiina jichu, mari ya cjihtire tí chüare bajuamehnea tiri jire tiro. Tí chüare cjuana tirore “Noana”, mari nichu cahmana tiro. ⁴Jipihtia Cohamacu to bajuamehneri cjiri noaa jira. Á jina to bajuamehneri chüare nana, Cohamacure “Noana” nina, tíre marine cohäreraro cahmana. Tíre marine chu ji coaro cahmana. Á jicu paina ti chu dutierachu tuhoecu tjiga tinare. ⁵To bajuamehnea noaa ti jichu yahu tuhsua tiri jire Cohamacu. Á jia tirore “Noana”, mari ni wahcheri baharo tí chua to yoari chua noaa waro jia nina.

Jesucristore dahra cohtarirore noarirore yahuha Paulo Timoteore

⁶Ahri yu yahurire Jesu yainare mari coyeare buhecu Jesucristore dahra cohtariro noariro jira mühu. Á buhecu noaa buheare, quihõno mu tuhori cjirire mühure ti yahuriro seheta noano mu masirire yahuriro jiihca mühu. ⁷Á jicu ti mu saro ti buherire, Cohamacu ya jieraare tuhoi tjiga. Cohamacu cahmaa sehere yoaporiro jiga mühu. ⁸Mu murocapochu noa curera. Mu murocaporiro yuhdoro Cohamacu cahmaare mu yoapochu noa yuhduara mühure. Cohamacu cahmaare yoapocu mipure noano jiihca mühu. Mu yariari baharopu cühure masa mujacu noano jiihca mühu. ⁹Tí potocãta jira. Jipihtina tíre yu nirire masiinare “Potocãta jira”, nino cahmana tinare. ¹⁰Jipihtina tíre ti nihti cjihtire Cohamacu cahmaare ti yoahiti cjihtire mari tuaro dahraja. Á jina ñano yuhduja mari, paina marine ñano ti yoachü. Cohamacu catiriro, jipihtinare pichacapu wahaborinare yuhdoriro jira.

Tirote wacū tuaina pinihtare tiro yuhdorohca. Ā jina to yuhdohto cjihtore masina, cohtaja mari.

¹¹Ahri jipihtia yu nirire dutiga Jesu yainare. Ā yoa tīre buhega muhū. ¹²Wahmūno mu jichū nūa paina Jesu yaina muhūre yuhdurūca duaboca. Ti ā yoerahto sehe ō sehe yoa noga tinare. Masare cahīga. Ā yoa Jesure wacū tuarucu, buhiri marieriro jiga. Wahmūno jipaihta mu ā yoachū nūa muhūre yuhdurūcasi tina. Ā jia mu durucurire tuhoa, mu yoirire nūa muhūre nū cūahca. ¹³Ā jicu mu cahapū yu suhto pano Jesu yainare Cohamacū yare ti joari pūre buhe tuhsū, musa cahmachupe tahari tinare ā yahurucuga. ¹⁴Jesu yaina mehne macaina pūthoa Cohamacū yare yahu tuhsū mu bui ti wamomacarine duhu payore. Ti ā duhu payochū Cohamacū ya cjihtire mu yoa masihto sehe cūre muhūre Cohamacū. To ā cūrire boecu tjiga. Ā yoa tīre ā yoarucuga.

¹⁵Ahri dutiare tuaro cahmaga. Ā cahmacū ahri dutiare ā yoarucuga muhū. Mu ā yoiro baharo noaare mu yoa namochū jipihtina nūahca. ¹⁶Muhū sehe noano yoaga, “Soro yoiro”, nicū. Ā yoa noano buhega muhū, “Soro buheri”, nicū. Ā jicu mu basita pichacapū wahaboriro yuhdoriro jiihca. Ā jia muhūre tuhōrina cūhū pichacapū wahaborina yuhdurina jiahca.

“Paina Jesu yainare ō sehe yoaga muhū”, niha Paulo Timoteore

5 Ne bucuore tuhtiecu tjiga. Mu pūcūre mu noano yoiro seheta bucuo cūhūre noano mehne yahuga. Ā yoa mu bahanare mu noano yoiro seheta wahma yapia cūhūre noano nō payoro mehne tinare yahuga. ²Ā yoacu mu pocore mu noano yoiro seheta bucu numia cūhūre noano nō payoa mehne yahuga. Mu bahana numiare mu noano

nō payoriro seheta nuhmia cūhūre nāno goa pjaro marieno, noano nō payoa mehne yahuga tina numiare.

³Ā jicu wapewahyaa numiare potocāta pjacuoa numiare nō payoa mehne yoadohoga tī numiare. ⁴Wapewahyoro pohna tīcoro to jichū, o panamana tīcoro to jichū cūhūre tina sehe tīcorore yoadohojaro. Ā yoadohoa Cohamacū masare ti coyere to yoa dutirire yoa nina tina. Ā yoa tina tīcorore ti wapamonore wapaa nica tīcoro to bucuori wapa. Ti ā yoachū nūno Cohamacū noano wahchera. ⁵Pjacūricoro, wapewahyoro coyera marienico jiro, Cohamacū tīcorore to yoadohohto cjihtore cohtara tīcoro. Ā jiro nāminipe, dachoripe tīcoro Cohamacū mehne ā durucurucura. ⁶Pacoro sehe wapewahyoro ā yoamacanocarico carerico jiro, tīcoro catīcoro jiparota pichacapū butihtico jī tuhsūra. ⁷Ahri jipihtia yu yahurire Jesu yaina cūhūre yoa dutiga muhū, noaa dihtare ti yoahiti cjihtire. Ti ā yoachū nūa paina tinare “Nāno yoa nina”, ni masierara. ⁸Cūiro to coyere nū wihboeraro, to pohna, ti pocoro cūhūre noano nū wihboeraro “Jesu yairo jija”, ni masierara. Ā jiro Jesure cahmaeraina yuhdoro nā yuhduariro jira tiro.

⁹Wapewahyaa numiare yoadohonahca musa. Ō sehe besega musa yoadohohti numiare. Ti wamare joa ōhti pūi joai tai ō sehe besega tī numiare: Sesenta cūhmari suerarico to wamare joa ōi tjiga. Tuhsū, tō pano pūaro cjirore manū tīcoro wape wahyoro to wamare joa ōi tjiga. Cūirota manū tīcoro wapewahyoro wamare joa ōga. ¹⁰Tī numiare, “Noaare yoa numia jira”, masa ti nia numiare, ti pohnare noano bucuo numiare besega. Ā yoa tuhsū, ti wūhūsei painare noano sāa ta dutia numiare, dahra cohtaina yoaro sehe Jesu yainare yoadohoa

numiare, ñano yuhdünare yoadohoa numiare, noaa dihtare yoaa numiare besega. Tí numiare m̄sa yoadohohti numiare bese tuhsucu, ti wamare joa ôga muhu.

¹¹ Wiho mejeta wapewahya numia nuhmia curero ti jichu tí numia sehere besei tjiga. Á jicu tí p̄i ti wamare joa ôi tjiga. Baharo tina m̄are goa pja, Cristore cohã, pari turi manũ tiboca. ¹² Tina Cristore “Pari turi manũ tisi sã. Mũ yainare yoadohonahtja”, niri numia jipahta baharopure ti niriro seheta yoeraboca tí numia. Ti ã yoerari buhiri buhiri tiaha. ¹³ Tí numia ô sehe yoaa numia jira: Dabraera numia jipora. Á jia paina ya wuhusepu waharucu, ñaa quiti dahre, tí numiare mari sinituerapachuta ti m̄ s̄ro mari jia tiare ã yahurucura. Tuhsu, ti yahu dutierari cjirire yahura tí numia. ¹⁴ Á jicu ti ô sehe yoachũ cahmaja yuhũ: Wapewahya numia nuhmia curero jia numia manũ tijaro. Á manũ tia, pohna tijaro. Ti ya wuhũ macainare noano ñũ wihbojaro. Mari ya numia wapewahyaa numia ti ã yoachũ marine ñũ tuhtiina marine “Ñaaare yoaa nina”, ni tuhti masierara. ¹⁵ Mipũ pinihtare cãa numia wapewahya numia Cristo yare duhu, watino cahmaa sehere yoaa tuhsura. Á jicu ã ni yahuja muhure.

¹⁶ Jesu yaina ti coyecoro wapewahyoro to jichũ tina to coyea ticorore yoadohojaro. Paina Jesu yaina sehe ticorore yoadohoea tjijaro. Á jia tina paina Jesu yaina ticorore coyea cjuaricorore yoadohoeraa, paye numia wapewahya numia coyea mariea numia sehere yoadoho masina.

¹⁷ Jesu yaina puhtoaa musare ti noano buhechũ ti dahraare ti noano yoachũ ñũna ji coaro mehne ñũga tinare. Á yoaa noano wapaga tinare. Cãina tina mehne macaina Cohamacũ yare yahuina, musare buheina cũhu jira. Tina pinihtare paina yuhdoro ji coaro mehne

ñũga. ¹⁸ Cohamacũ yare ti joari p̄i ô sehe nina, dahrarirore ti wapahtore yahuro: “Wachũ trigo yaparire to dahrarirore mehne suhti werirore to chũ duachũ to duserore ducataena tjiga”, ni joaa tiri jire. Á yoaa pa p̄i ô sehe nina: “Dahrarirore to dahrari wapare waro cahmana”, nina Cohamacũ yare ti joari p̄i. (To ã nichu tuhona Jesu yaina puhtoare ji coaro mehne ñũ, noano wapaga tinare.)

¹⁹ Jesu yaina puhtoro to ñano yoachũ ñũno cũirota paina Jesu yaina cahmachuinare yahusã masierara. Puhtoro to ñaaare yahusãtina tiaro jia, tirore yahusã masina. Tiaro mariachũ puaro yahusã masina. ²⁰ Á yoaa ñaaare yoarucurirore jipihtina m̄sa watoi to jichũ tirore tuhtiga, cuia, paina ñaaare ti yoerahto cjihtore. ²¹ Á jicu Cohamacũ, Jesucristo, to beserina anjoa cũhu ti ñurocaroi ahrire dutija muhure: Mipũ muhure yũ dutiri cjirire yoaa pahũoga. Á yoariro jicu jipihtinare Jesu yainare cũno potori yoaga. Pairore soro, pairore soro yoai tjiga. ²² Painare Cohamacũ dahraare m̄ cũhti cjihtire ti bui m̄ wamomacarine m̄ duhu payohto pano soaro marieno noano tuhotu pahũo, tinare besega. Tina ñaina jiboca. Á jiiinare Cohamacũ dahraare cũi tjiga. Á cũcu muhu cũhu m̄ beseina ti ñaaare yoaro seheta yoai nica. Tó sehe yoai tjiga. Á yoaa ñaa marieriro jiga muhu.

²³ Suroca pjaro cariro jira muhu. Mipũre co dihtare sihnimana muhu. Á jicu mahanocã vino cũhure sihniga muhu. Co jira tí.

²⁴ Cãina ti ñaaare yoachũ mari ñũja. Á jina Cohamacũ tinare to buhiri dahrehtore masija mari. Paina sehere ti ñaa yoarire mari masieraja. Ti ñaa yoarire baharo masinahca. ²⁵ Tó seheta cãina noaare ti yoachũ tíre mari masija. Paye ti noaa ti yoerarire mari masierapanahca

baharo masinahca mari. Tíre n̄ohto basierara.

6 Dahra cohtaina Jesu yaina sehe ti puhtoare noano ño payojaro. Ti ã ño payoch̄u ñua paina Cohamac̄ure, mari buhea c̄uh̄ure ne ni dojomehne masierara. ² Ti puhtoa Jesu yaina ti jich̄u ñua tinare dahra cohtaina sehe Jesu yaina jia, tinare ñupoa ño payoeraboca. Æ yoareraro cahmana. Ti puhtoa Jesu yaina ti jich̄u pinihtare tinare dahra cohtaina noano ño payojaro tinare. Æ ño payoa dahra cohtaina sehe Jesu yainare, ti cah̄iinare ti coyeare yoadohoa nina. Ti puhtoare Jesu yainare dahra cohtaina jia, Jesure cahmaerainare ti ño payoriro yuhdoro Jesu yaina sehere ño payojaro puhtoa ti cah̄iina ti jich̄u. Ahri yu yahurire buhega. Æ jicu ahrire dutiga.

Cohamac̄ure ño payoa c̄uh̄ure noano jia c̄uh̄ure yahuha Paulo

³ Soro jia buheare buheriro mari puhtoro Jesucristo ya buheare noaa buheare “Potocã tjira”, ni tuho duaerara. Æ tuho duaeraro, mari ya buheare Cohamac̄ure ño payoa buheare cahmaerara. ⁴ Æ jiro tiro “Masi pah̄oriro jija”, n̄iparota tíre ne masierara. Æ masieraro, tuho masierariro yoaro sehetu turo cahma sayo duara tiro. Æ yoa Cohamac̄u yare ã nimacanoca sayorucuriro tjira. Masa tiro yoaro sehe jiina cahma sayoa, paina ti noano wahach̄u ñu tuh̄tia, cahma ñu duaeraa, noano mehne jierara. Tuhsu, painare ñano quiti dahre, masierapahta masare ñano ni tuh̄tura tina. ⁵ Tina ñaa dihtare tuh̄tuina, potocã jiare ne masieraina ã cahma sayorucurina jira. Æ yoa “Cohamac̄u yare buhena niñerure wapatanahca mari”, ni tuh̄tura tina. ⁶ Mari ya mahanocã mari c̄juaa mehne wahchena, Cohamac̄ure ño payona, to cahmano sehetu yoana, potocãta noano jina nija. ⁷ Ahri yahpap̄ure masa bajuana ne paye barore na taer-

ahi mari. Æ yoa mari yariari baharo wahan̄a ne paye barore naa masieraja mari. ⁸ Æ jina mari ch̄uare mari suhti c̄uh̄ure c̄juaana payere cahma namoena tjijihna. Mari c̄juaoro purota wahchejihna mari. ⁹ Pache p̄ua ji duainare watino ñaare to yoa dutich̄u tina sehe jiape ñaare yoaruc̄uina jiboca. Æ yoaa tina payu tahari tuho masieraina sehetu paye barore turo cahmaa, ñaa yoare duhueraa, ti basita ñano yuh̄dura. Æ duhueraa pichac̄ap̄u wahaahca tina. ¹⁰ Niñerure tuoro cahmaa, jiape ñaare yoa d̄ucara masa. Cãina niñerure cah̄ia, tuoro cahmaa, Jesure wac̄u tua duhua, payu tahari ñano yuh̄dura tina.

Cohamac̄u yare yoana ñaare duhuga

¹¹ M̄uh̄u pini Cohamac̄u yairota jira. Æ jicu ahri ñaare yoai tjiga. Noaa sehere cahmaga. Cohamac̄u yare yoaga. Æ yoac̄u Jesure wac̄u tuaga. Painare cah̄iga. Ñano yuh̄d̄upaihta c̄no p̄jaga. Æ yoa painare noano dero yoaga. ¹² Surara cahmachero tuaro to yoariro sehetu, m̄uh̄u c̄uh̄u Cohamac̄ure wac̄u tuac̄u to yare tuaro yoaga. M̄uanop̄u ã jiruc̄uhtiro c̄jih̄tore Cohamac̄u beseri jire m̄uh̄ure. Æ jicu Cohamac̄ure m̄u wac̄u tuaare payu masare noano yahuhre m̄uh̄u. Æ jicu ñano yuh̄d̄upaihta tirore wac̄u tua duhui tjiga. M̄uanop̄u ã jiruc̄uhtiro jiga. ¹³ Cohamac̄u jipih̄tinare, jipih̄tiare jich̄u yoariro jira. Jesucristo sehe Poncio Pilatore Cohamac̄u yare noano yahuriro jira. Æ jicu tina Cohamac̄u, Jesucristo c̄uh̄u ti ñ̄urocaroi ahrire m̄uh̄ure yoa dutiit̄ija: ¹⁴ M̄uh̄ure Cohamac̄u to dutirire yoa pah̄ñonocahga. Jesucristo to tjua tahto pano masa m̄uh̄ure ñaare ti ne yahus̄er̄ahto c̄jih̄tore to dutirireta yoarucuga. ¹⁵ To quih̄oroihta Cohamac̄u Cristore tjua tach̄u yoarohca. Cohamac̄u noariro, tiro dihta masare dutiriro jira. Æ jiro jipih̄tina paina puhtoa ti bui puhtoro jiriro jira tiro. ¹⁶ Tiro dihta ne yariaerario

jira. To si sitea mehne jiro jira. To si sitea cahapu waha masierara masa. Ā yoa tirore masa ne ñuerare. Mipu cūhure tirore ñuerara. Tiro sehere ño payojihna. Ā jina “Jipihtia dachoripe tuariro jira tiro”, nijihna tirore. Āta yoajihna.

¹⁷Ahri yahpa macaina pache pware õ sehe ni dutiga mūhū: “Painare yūhdurucaja”, ni ti basi tūhotuea tjijaro tina. Ti pache ti cjuaa pihtia wahaahca. Ā jia ti cjuaa dihtare wahchea tjijaro. Cohamacu sehere tuaro wahchejaro. Jipihtia pototi mari cahmaare wariro jira tiro. Tiro sehere wacū tuajaro tina pache pua. ¹⁸Ā jia tina noaa sehere yoajaro pjiro noaare yoaina ti jihto sehe. Ā yoa ti cjuare waina jijaro. ¹⁹Ti ā yoachū

muanopu Cohamacu cahai ti ya jahca. Ti ya tōpu jia, ne butisi. Ā jia tōpu ā jirucuahca tina.

Paulo Timoteore duti batoaha

²⁰Timoteo, mūhure Cohamacu to cūrire to buhe dutirire noano yoanohbu. Voi ninohbu mūhū. Cāina masa Cohamacure cahmaeraina yoaro sehetā mahñoare, tūho masieraina ya buheare durucurucura. Ā durucua “Noano masiina ya buhea jira”, nimana tina. Ā ti ni durucua tūho nūni tjiga. ²¹Cāina tí durucua tūho nūniina Cristo yare cohānocare. Cohamacu to cahīa mehne musare noano yoajaro.

2 Timoteo

Paulo Timoteore pari turi joarocaha

1 Yuhu Paulo, ahrire muhare Timoteore joarocaja tjoa. “Jipihtina Jesucristore wacu tuaina manopu a jirucuahca” ni, cure marine Cohamacu marine yuhdachu yoariro. To a ni cure yahuhtiro cjihtore yuhure bese cure Jesu. A cūno Cohamacu to cahmano seheta yoaro nire yuhure. ²Muhu Timoteo yu cahiro jira. Muhure Jesu yare yu buhechu tuhocu tirore noano wacu tua ducare muhu. A jicu yu macu yoaro sehe jira muhu. A jicu Cohamacu mari Pucu, mari puhtoro Jesucristo mehne muhare noa dutija. A yoa muhare pja nuu, cahia tina ti yoadohoa mehne noano jiga muhu.

Masare Cristo yare ti yahurire yahuha Paulo

³Namipu dachopu cūhure Cohamacu mehne durucucu mu ya cjihtire sini payocu muhu mehne wahcheja. A wahchecu Cohamacure “Noana”, nija yuhu. Panopu macaina yu coyea Cohamacu yare ti yoariro seheta yuhu cūhu “Buhiri tija”, ni tuhuro marieno mipure to yare yoaja. ⁴Sohō jiri pjare yu wahachu mu tii nunu tirire wacūcu muhare tuaro nu duaja muhu mehne noano wahche duacu. ⁵A jicu Jesure potocāta mu wacu tuarire wacūja yuhu. Mu nuhococho Loida, mu poco Eunice cūhu Jesure wacu tua muhtare mu pano. A yoa mipure muhu cūhu tirore mu wacu tuachu noano masija yuhu.

⁶A jicu ahrire muhare wacūchu yoa duaja. Mu bui yu wamomacarine yu duhu payochu Cohamacu yare mu yohti cjihtire tuaare ware muhare. Tī tuaa mehne yoa namoga muhu. ⁷Cohamacu marine Espiritu Santore wari

jire. A jiro masare marine cuierachu yoara Espiritu Santo. A yoaro tuaina, masare cahina, tuho masiina marine jichu yoara tiro. ⁸A jicu mari puhtoro ya cjihtire painare yahucu, buo tiecu tjiga muhu. Yuhu to yare yu yoari buhiri peresui jiro jija. Peresui yu jichu yuhure buo tisai tjiga muhu. Wiho mejeta noa buheare mu buheri buhiri nana yuhdacu “Noanohca”, niga muhu cūhu. Mu a nana yuhdachu Cohamacu muhare yoadohorohca. ⁹Cohamacu sehe marine pichacapu waha borinare yuhdachu yoare. A yoa noaina to yaina jihtina cjihtire tiro besea tiri jire marine. Mari noano yoari mehne besera tiri jire marine Cohamacu. To mu sūro to cahmariro seheta yoaro ahri yahpare to bajuamehnehto pano marine cahino, tiro marine besea tiri jire. Marine a cahino marine yuhdachu yohtiore Jesucristore warocari jire Cohamacu. ¹⁰Mipure Jesucristore marine yuhdachu yohtiore warocaro, marine potocāta to cahiare noano masichu yoaro niri jire Cohamacu. Jesu marine to yainare pichacapu wahaerachu yoare. A yoaro “Yuhure wacu tuana Cohamacu mehne a jirucunahca” nino, buhriaro marine to nu masichu yoaro seheta noa buheare marine masichu yoaro tari jire tiro.

¹¹Tī buhea noa buheare yahuhtiro cjihtore to cūhtiro cjihtore besea tiri jire yuhure. ¹²A to beseriro jicu mipure nana yuhduja yuhu. Ō sehe nana yuhdupacuta yuhu buo tieraja. Yu wacu turirire Jesure masija yuhu. Tuariro jira tiro. A jiro yuhure to yare buhe duti cūno noano yoadohorohca yuhure. A yoa ahri yahparu to tjua tahto pano, “Muhure yuhdachu yoaihtja”, to niriro seheta sohori tirohca yuhure. Yuhure yuhdachu yoarohca tiro. Tīre noano masija.

¹³Muhure noano yu yahurire yoa pahōga. Cristo Jesu yaina jina tirore

noano wacū tuaja mari. Ā yoa painare noano cahija. Ā jicū tirore ā wacū tuarucuga mūhū. Tuhsū, painare noano cahīrucuga. ¹⁴ Espīritu Santo mari mehne jiriro to yoadohoro mehne noaa buheare noano yoaga. Quihōno buhega. Soro ni buhecū tjiga.

¹⁵ Jipihitina Asia yahpa macaina Jesu yaina yūhure yoadoho duaeraa cohā wahcāa wahare. Tina mehne macaina p̄aro Figelo, Hermógenes āta yoare tina cūhū. Ti ā cohā wahcāire masi tuhsura mūhū. ¹⁶⁻¹⁷ Ti ā cohāpachūta Onesíforo sehe payū tahari yūhure yoadohoro noano yajeri sāachū yoare. Ā yoaro p̄esuī yū jichū tiro yūhure buo tisāerare. Ā jiro Romai yū jichū ā macarucuri jire yūhure. Ā macarucuro yūhure bocare. Ā jiro tirore, jipihitina to ya wūhū macaina cūhure p̄ja n̄nohca Jesu mari pūhtoro. To ā yoah̄to sehe tirore sini payoja. ¹⁸ Ā yoa ahri yahpapū Jesu mari pūhtoro to tjua tahti dachoi tirore p̄ja n̄nohca. To ā yoah̄to sehe tirore sini payoja. Efe-soi payū tahari yūhure to yoadohorire noano masina mūhū.

Ñano yūhdūparota Jesu yairore cūno p̄jaro cahmana

2 Mūhū sehe yū macū yoaro sehe jiriro, Jesucristo marine noano yoariro to yoadohoro mehne tirore wacū tuarucuga. ² Ā yoacū payū masare yū buherire mū tūhorire paina cūhure buhega mūhū. Tina mū buheina Cohamacū yare yoarucuina jijaro. Ā jia painare buhe turiaina jijaro.

³ Surara ñano yūhdūparota to cūno p̄jariro seheta mūhū cūhū Jesu yairo jicū ñano yūhdūcū cūno p̄jaga mūhū. ⁴ Surara to pūhtoro dutia sehene yoara tirore wahchechū yoaro taro. Ā yoaro tiro surara jieraina yoaro sehe wiho jiare yoarerara tiro. (Mūhū cūhū tó seheta Cohamacū dutia dihtare yoaga.) ⁵ Mūrocaperiro mūroca dutiina ti dutiare qui-

hōno yoareraro to mūroca yūhdūri wapare na masierara. (Ā jicū mūrocaperiro ti dutiare quihōno to yoariro seheta Cohamacū dutiare quihōno yoa pah̄noga mūhū.) ⁶ Ā yoa wese dahrariro wapū tiro mehne noano dahrariro sehe tí wese maca dichare noano na mūhta, noano wapatarā. (Ā jicū mūhū cūhū tiro yoaro sehe Cohamacū yare mū noano yoachū tiro mūhure noano yoarohca.) ⁷ Jipihitiare noano masichū yoarohca Jesu mari pūhtoro mūhure. Ā jicū mipūre mūhure yū nirire noano wacū tūhotuga.

⁸ Ā jicū Jesucristore wacūga. Tiro pūhtoro Davi c̄jiro panopū macariro to panamino jī turiariro jia tiri jire. Ā jiro yariaro masa mūjari jire tiro. Noaa buheare buhecū to ā waharireta buhei nija. ⁹ To yare buhecū ñano yūhdūja yūhū. Ā jicū tíre yū buheri buhiri ñaare yoariro yoaro sehe peresupū jija yūhū. Yū ā jipachūta Cohamacū ya durucuarē buhe duhuchū yoa masierara masa. ¹⁰ Ā yoa Cohamacū to beserinare buhecū payū tahari ñano yūhdūja yūhū, tina cūhū Jesucristo yaina ti jihti c̄jiltire. To yaina jia tina pichacapū wahaborina sehe to yūhdūchū yoah̄tina jiahca. Ā jia tina Cohamacū mehne ā jirucuahca.

¹¹ Ahri yū yahuhti potocā tjira: Cristo crusapū to yariariro seheta wahana, yariaina ti yoare ti duhuriro seheta mari ñaa yoarire mari duhuna, Cristo mari mehne macariro ā jirucurohca.

¹² Ā yoa to yare mari yoari buhiri ñano yūhdūpanahta cūno p̄jana pūhtoro to suho jiropūre tiro mehne pūhtoata jinahca mari cūhū.

“Cristore s̄a masieraja”, mari nichū, tiro cūhū marine āta ninohca.

¹³ Tirore mari yūhdūrucachū ñuno to niriro seheta marine yoarohca.

To niriro seheta yoariro jira tiro. Ne mah̄noerara tiro.

Cohamacu to ñu ji coainare, to yare buheinare yahuha Paulo Timoteore

¹⁴Ahrire muhu mehne macainare wacūchu yoaga. Ti mu suro durucu ti yuhdurūcaa yaba cjihti jierara. Ā jia tinare tuhoinare ñano yoachū yoaa, tinare dojomehna. Ā jicu mari puhtoro to ñurocaroi ō sehe ni yahuga tinare. “Ā ni durucuena tjiga masa”, niga tinare. ¹⁵Muhu sehe Cohamacu yare noano buhega. Ā yoa Cohamacu yare tuaro yoaga. Mu ā yoachū ñano “Noano yoare muhu”, ninohca Cohamacu muhure. Ā jicu mu buherire to ñuchū buo tisi muhu. Ā jicu to buheare noano masiga muhu. Tíre quihōno buhega. ¹⁶Ti mu suro durucu yuhdurūcaina ñaare ā yoarucu, Cohamacu yare yoerara. Ā jicu ti ā ni durucua ā ñunocahga. Tinare tuhoi tjiga muhu. ¹⁷Tina ti durucua sehe camino to ñano baa mujano yoaro sehe jira. Camino to ñano baa mujano sehetā ti durucua cūhu paina Jesu yainare ñaina wahachū yoaahca. Ā durucuina mehne macaina Himeneo, Fileto cūhu jira. ¹⁸Tina “Jesu yaina masa mija tuhsuhre”, ni buhea, noaa buheare duhunocahre tina. Ā soro buhea cāina Jesu yainare tirore wacū tua duhuchū yoahre tina. ¹⁹Ti ā ñano buhepachuta Cohamacu ya buhea sehe ne cohtotaerara. Ō sehe nina to buhea: “Mari puhtoro Jesu to yainare masina”, nina. Ā yoa ō cūhure nina: “Jipihtina, ‘Jesu yaina jija’, niina ñaare duhunocajaro”, ni yahura Cohamacu ya buhea.

²⁰Mari piti dahre buhechū masa pja wahwari yoaro sehe jira. Pjiri wuhūi uru, plata mehne ti yoaa wahwari jira. Tuhsu, tí wuhūi paye wahwari yucūcu mehne, dihi mehne ti yoaa wahwari jira. Uru, plata mehne ti yoaa wahwari noare ti posahiti jira. Paye wah-

wari wiho jiare ti posahiti jira. ²¹Ā yoa ñaare yoerariro uru wahwa noari wahwa yoaro sehe jirohca. Ā jiro tiro sehe Jesu ya dihtare yoarucuriro jirohca. Wuhū pūro noari wahwa mehne noare to yoiro sehetā, ñaare yoerariro Jesu ya cjihtire noare yorohca.

²²Wahmāno jira muhu. Ā jicu wahma yapia ñaare goa pja ti yoiro sehetā yoi tjiga muhu. Ā jicu noare yoaga. Jesure wacū tuarucuga. Tuhsu, tirore, masa cūhure cahīga. Ā yoa muhu mehne macaina Jesu yaina mehne jicu cahmacheno marieno noano jiga muhu. Tina Cohamacure yuhtiina tirore sinirucuina cūhu āta yojaro. ²³Ā jicu tuhōturo marieno ti durucu yuhdurūcaare muhu cūhu tuhō nunūi tjiga. Tuhsu, muhu cūhu durucu yuhdurūcai tjiga. Ā durucu yuhdurūcaa masa ti basi cahma suara. ²⁴Cohamacure dahra cohtarirore durucu yuhdurūcaeraro cahmana. Ā yoa jipihtinare noano yoiro, buhe mih-niro, dóicāta suaerariro tirore jiro cahmana. ²⁵Ā jiro paina tiro mehne ti durucu yuhdurūcachū tiro tinare yahuro noano mehne suaro marieno yuhtiro cahmana tirore. To ā yuhtichū ñua Cohamacu to yoadohoa mehne tina sehe ti ñaa yoare cahyaboca. Ā jia noaa buheare masi ducaboca. ²⁶Tinare watīno sehe peresu yoaro sehe jainare cjuamare to cahmaare yoahitina cjihtire. Ā jia quihōno ti tuhōturi baharo noaa buheare masia, watīnore cohānocaahca.

Pihtiri dacho cjihtore yahuha Paulo Timoteore

3 Pihtiri dacho panocāre ñano yuhduahca masa. Tíre noano masiga muhu. ²Tí pjare masa painare wacū payoeraina, niñerure cahma yuhdurūcaina, “Painare yuhdurūcaja”, ni ti basi tuhōtuina, tíre painare ā ni yahurucuina, Cohamacure ñano durucuina, ti pūcūsumare

yuhdũrucaina, ti wapachuta “Noana”, nieraina, Cohamacũre ño payoeraina jiahca. ³⁻⁴Á jia masare cahĩeraina, paina mehne sua, tíre bo duaeraina, ñaa quti dahreina, ti mũ sũro ñano yoarucuína, masare á cjárucuína, noare ñũ yabiina, tina mehne macainare ñano yoaina, tuhotua marieina, “Masi pahñoina jija”, ni tuhotuina jiahca masa. Tina ñaare ti goa pjaare yoa ji coaina jia Cohamacũ sehere cahmaeraina jiahca. ⁵Á jia tina masa ti ñurocaroi Cohamacũre ño payopahta “Cohamacũ wiho jiro jira”, ni tuhotumana tina. Á niinare piti tii tjiga mũhũ.

⁶Tina mehne macaina tuho masieraa numia ya wuhũsei sãa, tí numiare mahñoare buhera. Tí numia sehe á ñaare yoarucua numia, tuaro ñaare yoa duara. ⁷Tí numia wiho jia buheare á buherucua numia jia, soro jia buheare tuhoa numia jia, Cohamacũ ya buhea sehere ne masierara. ⁸Panopũ Jane, Jambre yaya jirina Moise cjirore ti ñũ tuhtiro sehetu pihitiri dacho panocã jiina masa noaa buhea sehere ñũ yabiahca. Tina ñaa dihtare tuhotuina jiahca. Á jia Jesure wacũ tuaina waro jierara. ⁹Tó sehe yoaina mahñoa bihosi. Baharo ti mahñoare tuho masieraina ti jia cũhũre jipihtina masiahca. Jane, Jambre mehne ti mahñoare panopũ masa ti masiro sehetu áta masiahca pihitiri dacho panocã jiina ti mahñoare.

Paulo Timoteore duti batoaha

¹⁰Yũ buheare, yũ yoaa tiare, yũ jia tiare, Jesure yũ wacũ tuaare masina mũhũ. Yũ á jiro jichũ, suaro marieno yoiro yũ jichũ, masare cahĩro yũ jichũ, ñano yuhdũpailta yũ cũno pjachũ masina mũhũ. ¹¹Á yoa yũhũre ti ñano yoare, yũ ñano yuhdũare masina mũhũ. Antioquái, Iconioi, Listrai yũhũre ñabiario ti yoiro cũhũre masina mũhũ. Yũ

á wahachũ ñũno mari puhtoro Jesu sehe yũhũre yoadohore. ¹²Jipihtina Jesucristo yaina ti ji duachũ Cohamacũ to dutiro sehetu ti yoiro duachũ paina tinare ñano yoaahca. Tí potocã tjira. ¹³Ñaina sehe mahñoa buheina cũhũ ñabiaina wahaahca. Painare mahñoa, ti basi cũhũ mahñoare tuhoa, áta ñabiaina wahaahca.

¹⁴Mũhũ sehe mũhũre yũ buherire, noano mũ tuhorire á wacũrucuga. Á jicu yũ buheriro sehetu yoaga. Mũhũre buherinare masina mũhũ. ¹⁵Mũhũ wihĩro jicũputa Cohamacũ yare ti joiro pũre masi dũcari jire. To yare ti joiro pũi ó sehe ni yahura mũhũre: “Jesucristo wacũ tuaina dihtare pichacapũ waborinare yuhdũchũ yoara Cohamacũ”, ni yahura mũhũre. ¹⁶Cohamacũ yare ti joiro pũi jipihtiare Cohamacũ sehe joa dutia tiri jire. Á jina tí pũre buhena mari masi namoja. Tí pũre buhena Cohamacũ dutiare mari yohtire masija. Á buhena mari ñaa yoiro “Ahri ñaa jica”, ni tuhotu jia mari. Á jiro tí pũ marine noaa sehere cohtota dutira. Á jiro dachoripe mari noare yoirochũti cjihtire yahura tí pũ. ¹⁷Cohamacũ yairo to ya pũre buhero, masi pahñonohca. Á masino jipihtia noare yoa masinohca tiro.

4 Jesucristo jipihtina bui puhtoro, tjua tahtiro, catinare, yariaina cũhũre buhira dahre dutihtiro to ñurocaroi mũhũre ó sehe ni yahuihtja. Cohamacũ cũhũ to ñurocaroi ó sehe ni yahuihtja mũhũre. ²Dachoripe masa ti tuho duachũ ti tuho duaerachũ cũhũre Cohamacũ yare yahuga. Á yahucũ masa ti ñaa yoiro buhirire masichũ yoaga tinare. Á yoa ti ñaa yoiro “Yoa namoena tjiga”, ni yahuga tinare. Noaa sehere yoa dutiga. Á buhecũ ne suaerariro, pumerariro jiga mũhũ. Á jicu ne painare buhe duhui tjiga. ³⁻⁴Baharo, pa tehepũre masa noaa buheare

tũho duasi. ˆ Tũho duaeraa ti cahmano sehetã yoaa, ti tũho ji coaa dihtare buheinare cahmaahca tina. ˆ Jia mahñoa buheare payũ buheinare cjuaaahca. Tina ˆ yoaa noaa buhea sehere cohã, ˆ ti buhemacanoocarire tũho nũnũahca. ˆ Jicũ noaa buheare buhe duhui tjiga mũhũ. 5 Mũhũ cũhũ ˆ jicũ dachoripe tũho masiriõ jiga. ˆ Nano yũhdũpaihta cõno pjaga. ˆ Yoacũ noaa buheare ˆ buherucuga. Cohamacũ mũhũre to yoa dutirire yoa pahñonocahga mũhũ.

6 Yũhũ Cohamacũ yare yũ yoari buhiri yũ yariahto mahanocã duhsara. ˆ Jicũ mahaa dachoricã catisiniihca. ˆ Jicũ mipũre mũhũre dutija. 7 Yũ yariahto panocã ahrire yahuihtja: Jesu noaa buheare yũhũre buhe dutiro to cũrĩre noano buhe sohtori tihĩ. To dutiare noano yoa pahñonocahi. ˆ Jicũ ñano yũhdũpaihta tiõre ne wacũ tua duhuerahi. 8 Mipũre Cohamacũ yare yũ yoari wapare mũanopũ wihboro nica. ˆ Jiro mari pũhtoro buhiri dahre dutiro quihõno yahuriõ to tjua tahti dachoi to yare yũ yoari wapare warohca yũhũre pũhtoro to pisari soro uru mehne ti yoari sorore yũhũre to waboriõ sehetã. Paina cũhũre to tjua tahtore cohtainare tiõre cahĩĩnare to yare ti yoari wapare warohca Jesu.

Paulo yahu namoha Timoteore

9 Yũ cahapũ cjero ñũĩ taga mũhũ. 10 Demã ahri yahpa macaa jipihtiare tuaro cahmano yũhũre yoadoho duaeraro yũhũre cohã wahcãã wahahre Tesalõnicapũ. Crescente cũhũ Galacia yahpapũ wahahre. ˆ Yoa Tito Dalmaciapũ wahahre. 11 Luca dihta yũhũ mehne jira. Marco yũhũre noano yoadohohtiro jira Cristo yare yũ buhechũ. ˆ Jicũ tiõre na tahga mũhũ. 12 ˆ Yoa Tiquicore Efesopũ warocahi. 13 Opũ tacũ, yũ bui sãari suhtirore, Troai Carpo ya wũhũi yũ cũri suhtirore na tahga. ˆ Yoa sohõ jia tjuri

joaa tjuri cũhũre na tahga. Sohõ jia cahsari joaa cahsari pinihtare tuaro cahmaja yũhũ. ˆ Jicũ tí cahsari cũhũre na tahga.

14 Alejandro comaare dahrariro yũhũre ñabiaro yoare. ˆ Jiro to ˆ yoari buhiri Cohamacũ tiõre buhiri dahrerohca. 15 Tiro Alejandro mari buheare tuaro ñũ yabire. ˆ Jicũ tiro mũhũre “Ñano yoari” nicũ, tiõre ñũcũ noano wacũ masiga.

16 Masare beserirore peresu yoa dutirirore yũ yoarire, yũ buheri cũhũre tiõre yũ coã yahuchũ ne cũiro baro Jesu yairo yũhũre yoadohoerare. Jipihina yũhũre yoadohoeraa cohã wahcãã wahahre. Ti ˆ cohãpachũta yũhũre ti cohãri buhiri Cohamacũ buhiri dahrero tjijaro. 17 Yũ ˆ wahapachũta Cohamacũ yũhũre yoadohõre. ˆ Jiro to buheare yũ noano yahuihtia cjihtire to tuaare wahre yũhũre, jipihtina judio masa jieraina tí buheare ti tũhohti cjihtire. ˆ Jiro yũhũre ñano ti yoa duapachũta yũhũre ti wajãborirore yũhdũchũ yoare mari pũhtoro suaina yayare yũhũre to yũhdũchũ yoaboriõ sehetã. 18 Jipihtina yũhũre ñano yoainare yũhdũrucaro, yũhũre yoadohõroca mari pũhtoro. ˆ Jiro mũanopũ pũhtoro to suho jiropũ yũhũre ji dutiro yũhũre yũhdũchũ yoarohca tiro. ˆ Jina “Tiro noa yũhdũariro, tua yũhdũariro jira”, nijihna mari jipihtia dachoripe. ˆ Ata nijihna.

Paulo noa dutiha Timoteo cahai jijnare

19 Prisca, Aquila, Onesiforo ya wũhũ macaina cũhũ noajaro. 20 Erasto Corintoĩ tjuaõre. Trófimo Miletoĩ dohatia wahahre. ˆ Jicũ tiõre tõi cũhi yũhũ. 21 Puhiro pano cjero taga mũhũ. Eubulo, Pudente, Lino, Claudia cũhũ, jipihtina paina Jesu yaina mehne mũhũre noa dutira.

22 Mari pũhtoro Jesucristo mũhũ mehne jirohca. ˆ Jiro Cohamacũ to

cahã mehne m̄sare jipih̄tinare noano
yoajaro.

Tito

Paulo Titore joarocaha

1 Yũhu Paulo Cohamacure dahra cohtariro, Jesucristo yare buhe dutiro to cūriro jija. Cohamacu to beserina Jesure ti wacū tuahti cjihtire noaa buheare ti masihtu cjihtire Jesu buhe dutiro yũhure cūre. Tí buhea Cohamacu to dutiro seheta mari yoahtire yahura. ² Ā jicu jipihtia dachoripe Cohamacu yaina mũanopu ti jirucuhto cũhure buheja tinare. Cohamacu ne mahñoa marieriro ahri yahpare to bajuamehnehto pano õ sehe ni cūa tiri jire marine: “Mũanopu ã jirucunahca”, ni cūa tiri jire marine. ³ Ā jiro to quihõri pjai Cohamacu to ni cūrire yahu dutire masare. Tó seheta yũhure ni yahu dutire tiro. Marine pichacapu wahaborinare yũhdoriro jira tiro. ⁴ Mũhure Titore Jesu yare buhei. Yu ã buhechu tũhocu Jesure wacū tua dũcare mũhu. Ā jicu mũhu potocāta yu macu yoaro sehe jicuta nina. Mũhure ahrire joarocai nija. Cohamacu mari Pũcu mehne, Jesucristo marine yũhdoriro mehne mũhure noa dutija. Mũhure pja ñua, cahia ti yoado-hoa mehne noano jiga mũhu.

Creta wama tiri nũcoi Tito to yoahtire yahu quihõha Paulo

⁵ Creta wama tiri nũcoi mũhure yu cũchu Jesu yaina ti buhehto cjihto dũhsasinire tí pjare. Ā jicu ti yoahtire yahutiro cjihtore cūi yũhu mũhure. Ā yoa macaripe macaina Jesu yaina pũtoa cjihtire bese duticu cūi mũhure. ⁶⁻⁸ Tina pũtoa Cohamacure dahra cohtaina jira. Ā jicu tinare besecu noainare besega soro yoerainare. Ā besecu, cãa numiata namo tiinare, “Painare yũhdũrucaja”, ni tũhotuerainare, suaerainare, cahaerainare, cahmacherainare,

paina yare mahñoa mehne tuaro na duaerainare besega. Ā besecu ti wũhũsere sãa sũinare noano ñũ wihboinare, noaa sehere noano ji coainare, tũho masinare, noaare yoarucuinare, ñaa marieinare, ñaare yoerainare, caparo marieno dahrainare besega. Ā yoa mũ besehtina pohñare õ sehe jiina jiro cahmana: Jesure wacū tuaina, noano yoarucuína, jipihtinare noano yũhtina jiro cahmana pũtoa pohñare. ⁹⁻¹⁰ Ā yoa noaa buheare quihõno mari buherucuriro seheta ne duhueraina jijaro pũtoa mũ besehtina. Ā jia tina noaa buheare yahuina jahca paina tí buhea mehne ti wahchehto sehe. Ā yoa noaa buheare ñũ yabiinare buhea, ti ya mahñoa ti jichũ masichũ yoahca tina. Ā jicu noano besega Jesu yaina bui pũtoa jihtinare.

Payũ ti pũtoare yũhdũrucaina, noano tũhotu durucueraina, mahñoina jira mipũre. Ā yoaina judio masa pinihta ñabiaro yoaa nina. Ti ya buhea ti potocã jierachu tinare masichũ yoaro cahmana. ¹¹ Tina judio masa sehe niñerure wapata duaah mahño buhera. Ā yoeraro cahmana tinare. Ā buhea cãa wũhũse macainare jipihtinare Cohamacu ya sehere cohãchu yoaa nica tinare. Ti ã yoachũ tinare ã yoa dutieraro cahmana.

¹² Ti yare panopũ yahuriro tina mehne macariro jiparota õ sehe ni yahuri jire: “Creta nũco macaina ã mahñorucuina jira. Tina nũcu macaina wahiquina yoaro sehe suaina jira. Ā yoa ã chũrucuina jia ne dahra duaeraa, capa bũjũina jira”, niri jire tiro to ya nũco macainare. ¹³ To ã nia potocã tũjira. Ti ã jichũ ñũcu tinare tuaro tuhtiga Jesu ya buhea sehere noano ti masihtu cjihtore. ¹⁴ Ā jicu judio masa panopũ macaina ti mũ sũro ti nimacanocari cjirire, Jesu yare potocã jiare cahmaeraina ti dutia cũhure Creto macaina ti tũho nũnũerahto cjihtore tuhtiga tinare.

¹⁵Buhiri marieina noa dihtare tũhota. Ñaare yoarucuina, Jesure wacũ tu-aeraina sehe ñaa dihtare tũhotura. Tina ti tũhotua sehe ñaa yũdũara. Ā jia noa sehere bese masierara.

¹⁶Tina “Cohamacure masija sã” ni-pahta, ñaare yoara. Ā yoaina ti jichũ ñña Cohamacure masieraina ti jichũ masija mari. Ā jia tina ñaa yũdũaina, Cohamacu yare yũdũrucaina jira. Ne noare yoa masierara.

Noa buheare quihõno yahu dutiha Paulo Titore

2 Mũhũ sehe buhecũ noaa buhega ti nino sehetã noano buhega. ²Bucunare õ sehe ni yahuga: Cua pisaina, masa ti ño payoina, tũho masiina, Jesure noano wacũ tuaina, Jesure, masa cũhũre cahĩina, ñano yũdũpahta cũno pjaina jijaro tina. ³Bucũ numia cũhũre āta ni yahuga: Cua pisaa numia, Cohamacure ño payoa numia, ñaa quiti dahrera numia, cahaera numia jijaro tí numia cũhũ. Ā jia numia jia, noare buhejaro paye numiare. ⁴⁻⁵Paye numiare õ sehe ni buhejaro bucũ numia: Ti manũsumare, ti pohna cũhũre ti cahĩltore, tũho masia numia, paina mũa mehne ñano yoaeraa numia, cũ wũhũ macaina jiina noano ñũ wihboa numia, masa noaa numia, ti manũsumare noano yũhtia numia ti jiltore buhejaro tí numia Cohamacu ya buheare paina ti dojomehnerahto sehe.

⁶Ā yoa wahma yapia cũhũre õ sehe ni yahuga: Tũho masiina jijaro tina. ⁷Mũhũ sehe noaa dihtare yoarucuga mũhũre ti ñũ cũhto sehe. Buhecũ ne mahõono marieno buhega. Ā buhecũ cua pisaro mehne buhega mũhũ. ⁸Ā buhecũ noano tũho masino mehne noano buhega ne paina “Ahriro ñano yoaro nina” ni, mũhũre ti yahusãerahto sehe. Mũa ã buhechũ ñña marine ñũ tuhtiina jipahta marine wiho warota yahusã masierara.

Marine wiho waro ã yahusãmacanoca bũoro wahaahca tina.

⁹Ā yoa dahra cohtainare õ sehe ni yahuga: Ti pũhtoare noano yũhtiina jijaro. Ā jia ti pũhtoare noano wahchechũ yoajaro. Ā dihta yoajaro. Ā jia ti pũhtoare purĩno yũhtiea tjijaro. ¹⁰Ā yoa ti pũhtoa yare yacaea tjijaro. Tuhsũ, noaina, ti pũhtoa dutiare quihõno yoarucuina jijaro. Ā noano yũhtiina ti jichũ ñña Cohamacu marine yũdũoriro to buheare tũho ji coahca paina.

¹¹Masare to cahĩare Cohamacu masare ño tuhsure. Ā cahĩno jipihtina pichacapũ wahaborinare Cohamacu tuaro yũhdo duara. ¹²⁻¹³Masare ã cahĩno Cohamacu marine õ sehe ni buhera: Cohamacure ñũ yabiare, ñaa goa pjaare duhunoca dutira marine. Cohamacu tuariro, Jesucristo marine yũdũoriro to si siteare mari ñũhti dachore, noari dachore mari cohtana nija. Ā jiro mari cohtari dacho panoi tũho masiina, noare yoarucuina, Cohamacu cahmaare yoarucuina, marine ji dutira Cohamacu. ¹⁴Tiro Jesucristo mari ya cjihtireta variari jire jipihtia mari ñaa yoare duhuchũ yoaro taro marine to yaina wahachũ yoaro taro. Mari ñaa yoari cjrĩre to ã cohãchũ mari ñaa yoari buhiri marieina jinahca. Ā jina tuaro noare yoa duaina jinahca.

¹⁵Ahri jipihtiare tí nucõ macainare Jesu yainare buhega mũhũ. Ti pũhtoro jinocaita nina mũhũ. Ā jicũ tinare yahuga. Ti ñaare yoachũ ñucũ yahuga tinare. Jipihtina paina mũhũre ño payoa mehne yũhtijaro.

Jesu yaina ti yoahiti cjihtire yahuha Paulo

3 Ā sehe ni yahuga tó macaina Jesu yainare: Ti pũhtoare paina tinare dutiina cũhũre noano yũhtiina jijaro. Jipihtia noare yoahitiina jijaro. ²Ā yoa painare ne ñano quiti dahrea tjijaro. Ā

jia masa noaina, jipihtinare ño payoina jijjaro.

³ Панопуре mari cūhu tuho masieraina, yūhdurucaina, mahñoare tuho nūnūina, ñaare yoa ji coaina, tíre goa pja duhu masieraina, dachoripe ñaare yoarucuina, paina ti cjuaaare cjoina jia timai mari cūhu. Á yoa marine paina ñu tuhtire. Mari cūhu tinare ñu tuhtimai. ⁴⁻⁵ Á jirina cjiri mari jipachuta Cohamacu marine pichacapu wahaborinare yūhduchū yoare. Á yūhduchū yoaro to noariro jiare, masare to cahia cūhure marine ñono nire tiro. Noano mari yoari mehne yūhduchū yoaerare marine. Marine pja ñuno mari ñaa yoari buhirire cosaro, Espíritu Santo mehne marine yūhduchū yoare. Á yoaro marine to pohna wahachū yoare. Á to yoachū Espíritu Santo sehe noaina mari jilhtina cjlhtire cohtotachū yoare marine. ⁶ Jesucristo marine yūhduchū yoariro to yaria masa mūjaa mehne Cohamacu to yairo Espíritu Santore ware marine pjíro to tuaa mehne marine yūhduchū yoahrtiro cjlhto. ⁷ Marine cahño, marine noano yoa duare. Á yoa duaro tiro to yairo Espíritu Santore marine ware ñaa buhiri marieina mari jlhto cjlhtore, muanopu mari ā jirucuhto cjlhtore. Mari ā jirucuhtore masina, tíre cohtana nija.

⁸ Tí yu niri potocāta jira. Á jicu tíre yu ni joariro sehetā masare buhecū tí dutiare yoa pahño dutiga mūhu. Á jicu Cohamacure wacū tuainare tíre buhega noare ti noano yoahito cjlhtore. Ahri yu ni buheri noaa buhea jira. Á jia jipihtina masa ahri buheare ti tuho nūnuchū wiho

waro jierara. ⁹ Paina ti durucua sehe yaba cjlhti jierara. Á jia masierapahta ti ni yūhdurūcaare mū tuho nūnuchū yaba cjlhti jierara. Á jia ti coyēa panopu macaina ti jia tiare ti ni yūhdurūcaare, Cohamacu Moise cjirore to dutirire ti ni yūhdurūcaare tí jipihtiare noano mū tuho nūnuchū yaba cjlhti jierara. Á jicu tíre tuho nūnūi tjiga.

¹⁰ Mūsa mehne macariro ā ni yūhdurūcariro mū sare cahma tju wachū to yoachū ñūcu “Yoi tjiga”, niga tirore. Pua taha tíre tirore mū yoa dutierari baharo to yūhtierachū ñūcu tirore piti tiecu tjiga. ¹¹ Tó sehe yoariro ñaa dihtare goa pjarucuriro jira. To ā jichū ñūna to ñariro to jichū masija mari.

Paulo duti batoaha

¹² Nicopolipu puhiro puro jii tai nija. Á jicu Artemare o Tíquicore mū cahapu yu waroca mūhtachū yu warocahtiro tópure to suchū, Nicopolipu yūhure piti bocaga mūhu tiro mehne. ¹³ Á yoa dutiare noano mihñirirore Zena wama tirirore, Apolo cūhure noano yoadohoga ti wahahto cjlhtore. Á yoacu ti cahmaare jipihtiro tinare waga “Paye baro dūhsari”, nicū. ¹⁴ Á jia Jesu yaina mari mehne macaina noare yoapojaro paye barore dūhsainare ti yoadohohto sehe noare yoarucuina ti jlhto sehe.

Paulo noa dutirocaha Jesu yainare

¹⁵ Jipihtina yūhu mehne macaina mūhure noa dutira. Tó jiina Jesu yaina säre cahñina noajaro. Cohamacu to cahia mehne mū sare jipihtinare noano yoajaro.

Filemón

Paulo Filemo wama tirirore joarocaha

1 Yuhü Paulo, Jesucristo yairo yu jiri buhiri peresupü jija. Yuhü, mari coyeiro Jesu yairo Timoteo mehne mühure Filemore joarocaja sä. Mühü sä cahïriro Cristo yare sä mehne dahrado-horiro jira mühü. ²Ä jina Jesu yaina mü ya wuhü cahmachuina cühure joarocaja sä. Mari coyeacoro Jesu yacoro Apia cühure joarocaja sä. Arquipo cühure joarocaja sä. Arquipo sehe sä yoaro sehe Cristo yare yahuriro jira. ³Ä jina Cohamacu mari Pucü, mari pühtoro Jesucristo mehne müsare noa dutija. Cohamacu to macüno mehne ti cahïa mehne, ti yoadohoa mehne noano jiga müsa.

Filemo painare to cahïare, Cristore to wacü tuaare yahuha Paulo

⁴⁻⁵Yu coyeiro Jesu yairo Filemo, Cohamacure mühure sini payocu mühure wacücü “Noana”, nija tirore. Cristore mü cahïchü, tirore mü wacü tuachü, paina Cohamacu yainare mü cahïchü tühorocahi yuhü. Ä jicu Cohamacure “Noana”, ni wahcheja. ⁶Cristore mari wacü tuana cüno potori to yaina jina nija mari. Ä wacü tuaina jina, Cristore mari noano cahïna, pjíro noaare cjuanahca mari. Tíre müsa noano masihtö sehe sini payoja Cohamacure. ⁷Coyeiro, mipure painare mü cahïchü tühocü wahcheja yuhü. Jipihtina Cohamacu yainare noano wahchechü yoayuhti mühü. Mü ä yoachü tühocü wahcheja yuhü.

Paulo Onésimo ya cjihtire sini payoha Filemore

⁸⁻¹⁰Ä jicu mipure Onésimore mühure dahra cohtarirore mü yoachtire mühure sini payo duaja. Peresupü yuhü mehne to jichü Cristo yare yahuhi yuhü tirore. Tíre tühoro Cristore cahmahre tiro. Ä yoaro tiro Cohamacu yairo wahahre. Ä waharo yu macü yoaro sehe jiriro jira. Ä jicu yuhü Paulo bæcuro jicu Cristo yare yu buheri buhiri peresui jicu mühure yahurocaihtja Onesimore mü yoachtire. Cristo buhe dutiro to cüriro jija yuhü. Ä jiriro jicu tirore mü yoachtire duti-boa yuhü. Ä jiriro jipaihta mühure dutisi yuhü. Cahïa mehne mühure yahurocaihtja tó purota.

¹¹Cristo yairo to jihto pano Onésimo mühure dahra cohtariro jiro yaba cjihti jierasiniri jire. Mühure noano yoadoho masierasiniri jire. Mipü pinihtare tiro mühure, yuhü cühure noano yoadoho masiriro jirohca. Mipure Cristo yairo jiro wiho jiriro waro jierara. ¹²Ä jicu mipure tirore mühure waroca tjuí nija. Ä jicu tirore noano piti bocaga mühü. Tirore tuaro cahïja. ¹³Noaa buheare yu buheri buhiri peresupü yu jiro watoi tirore yuhure yoadoho duti-boa yuhü tirore warocaeracü. Yuhü mehne tjuá duti-boa yuhü. Mühü sehe yuhure mü yoadoho masierachü tiro sehe yuhure yoadohoriro tjuaboa, tirore warocaeracü. ¹⁴Yuhure yoadohoriro to jipachüta tirore mühure waroca tjuja. Mühü sehe tirore “Paulo mehne tjuasiniga”, mü nichü masicü yuhü mehne tirore tjuá duti-boa yuhü. Yuhü sehe “Yuhü mehne cüga tirore”, ni duaeraja mühure. Ä jicu tirore waroca tjuí nija. ¹⁵Tiro Onésimo mahaa nümüricä mühure to duhti wahcári baharo pari turi mühü mehne jira. Cohamacu to cahmariro se-heta mühure duhti wahcári jire tiro Cohamacu yairo to wahahto sehe, yu tühö-

tuchu. Ñ jiro pari turi mũhu mehne jiro ã jirucurohca mũhu mehne.¹⁶ Ñ jiro tiro mipũre dahra cohtariro jierara. Dahra cohtariro bui curero jiriro jira tiro, yu ñũchu. Mipũre tiro mu coyeiro Jesu yairo jira. Ñ jicu tirore tuaro cahija. Mũhu sehe yu yũdoro tirore cahĩihca. Mu ã cahĩiro jiro dahra cohtariro jisini-parota mipũre dahra cohtariro to jiriro sehe jierara tiro. Tiro mu coyeiro Jesucristo yairo jira.

¹⁷ Ñ jicu yũhure mu piti bocaboriro se-heta Onésimo cũhure noano piti bocaga. Mũhu mehne macariro yu jichu tuhutucu tiro cũhure noano piti bocaga mũhu.¹⁸ Ñ jicu mũhure soro to yoariro jichu mũhure to wapamoriro jichu yũhu sehe tíre wapaihtja.¹⁹ Yũhu Paulo yu basi ahrire mũhure yahu joaihtja: Yũhu sehe wapaihtja mũhure. Mũhure yu buheri baharo Cristo yairo wahacu jip-ihitia dachoripe Cohamacu mehne jirucuhitiro jira mũhu. Mũhure yu ã buheri baharo mũhu cũhu yũhure pjiro wapamoriro jiboca. Mu ã jipachuta mũhure

wapaihtja to wapamonore.²⁰ Yu coyeiro yu cahĩiro mari pũhtoro Cristo yairo jira mũhu. Cristo yairo jicu yu coyeiro jira mũhu. Ñ jiriro jicu yũhure noano wahchechu yoaga. (Ñ jiriro jicu Onesimore noano piti bocaga.)

²¹ Ahri yu yahurire noano yoaihca mũhu. Yu yahuri yũdoro yoaihca mũhu. Tíre masicu mũhure joarocai nija.²² Ahri cũhure yahuihtja mũhure. Musa cahapu yu wahahto sehe Cohamacure sini payoyuhti musa yũhure. Musa ã sini payorire tiro yũhtiboca. “Jai” to nichu cahmaja yũhu. Ñ jicu musa cahapu yu suhti tahtiare cahnoyuga mũhu.

Paulo noa duti batoaha Filemore

²³ Epafra mũhure noa dutira. Tiro sehe Cristo yare to yoari buhiri yũhu mehne peresupu jiriro jira.²⁴ Ñ jia Marco, Aristarco, Dema, Luca mehne mũhure noa dutira. Cristo yare yu buhechu tina sehe yũhu mehne buheina jira.

²⁵ Mari pũhtoro Jesucristo to cahia mehne musare noano yoajaro.

Hebreos

Cohamacu macuno to Pucurore yahubasaha masare

1 Panopu Cohamacu payu tahari mari coyeare panopu macaina cjrيره to yare yahua tiri jire. Payu to beserina to yare yahu turiaa tiri jire. To yare yahu muhtaina cjrيره yahu dutiro, a yahua tiri jire tiro mari coyeare. ² Mipure pihiri dacho panocai jia dachorire to macunore to yare to yahu dutichu tiro sehe marine yahua tire. Tiro to Pucuro to yoa dutiro mehne ahri yahpare, muano cuhure yoariro jira. To Pucuro sehe pihiri dacho panocai jipihitiare cjuahitire cuia tiri jire tirore. ³ A jiro to macuno sehe to Pucuro si siteare cjuariro jiro, cino potori to Pucuro yoaro seheta jiro, to Pucuro to jia tiare marine nona. A yoa to macuno to tuua mehne to dutichu ahri yahpa, muano cuhu a jirucura. A yoa mari nano yoari buhirire to cosari baharo manopu to Pucuro tua yuhduariro potu buhusehei dujiri jire tiro, to puh-toro jiare nono.

Cohamacu macuno anjoa bui jira

⁴ Tiro Cohamacu macuno wama tira. Ti wamare curi jire Cohamacu tirore. A wama tiro paina bui puh-toro jira. A jiro tiro anjoa yuhdoro tua yuhduaricariro jira. ⁵ To yaina anjoa sehene Cohamacu ne o sehe ni yahuerari jire: "Yu macu jira mahu. Michare yu macu mu jiare masichu yoaihca", niri jire Cohamacu to macunore. Anjoa sehene ne o sehe ni yahuerari jire. Tinare ahri cuhure ne yahuerari jire: "To pucuro jija yuhu. A yoa tiro yu macu jira", niri jire Cohamacu to macunore. Anjoa sehene ne o sehe ni yahuerari

jire. (A jiro to macuno tina yuhdoro tua yuhduaricariro jira.) ⁶ Pa tehe to macunore wahma masa bajuaritore ahri yahpai cino o sehe niri jire Cohamacu tirore:

"Jipihitina yu yaina anjoa na tuhcuca caha su, no payoahca tina yu macure", niri jire tiro. ⁷ A yoa to yaina anjoa sehere yahuro taro o sehe niri jire tiro: "Yu yaina anjoare wihnono yoaro sehe pjacu tichu yoaja yuhu.

Tina yuhure dahra cohtaina jira. Tinare pichaca yoaro sehe pjacu tichu yoaja yuhu",

ni yahuri jire Cohamacu. ⁸ Tinare a ni-parota to macuno sehere o sehe niri jire: "Mahu Cohamacu jipihitina bui puh-toro a jirucuihca.

Quihono dutiuhca mahu mu yainare.

⁹ Mahnono marieno yoare, noano yoare tuaro cahmana mahu.

A jicu naa yoare nu yabira mahu.

Mu a jiriro jichu nucu yuhu mu Pucu jipihitina paina yuhdoro mahu se wahchechu yoahi",

niri jire Cohamacu to macunore. ¹⁰ Ahri cuhure niri jire tiro to macunore "Puh-toro", ni pisuro:

"Puh-toro, wahmanopure ahri yahpare, muano cuhure bajuamehnere mahu mu basi.

¹¹ Ti jipihitia cohtota pihitia wahaahca.

Mahu sehe ne cohtotasi.

A jirucuihca mahu.

Ti jipihitia suhtiro to baa boraro seheta pihitia wahaahca.

¹² Ti jipihitia muanore ahri yahpa cuhure cohtotachu yoaihca mahu.

Munano suhtirore mu cohaboro seheta ti jipihitiare cohtotachu yoaihca mahu.

Suhtirore tjuwe na mu cohtotaro seheta ti jipihitia cohtotaahca.

Mahu sehe ne cohtotasi.

A jirucuihca mahu",

niri jire Cohamacu to macunore. ¹³Ne anjoa sehere ahrire yahuerari jire Cohamacu:

“Yu poto buhusehei dujiga muhu.

Puhtoro jira muhu.

Å jicu muhure nu tuhtinane doca dahre, yuhdurucabasaihtja.

Tina bui puhtoro jilhca muhu”,

niri jire Cohamacu to macunore. ¹⁴Jip-
ihtina anjoa sehe Cohamacure dahra
cohtaina jira. Å jiro Cohamacu waro-
cara tinare to yaina anjoare Cristo to
yuhdachu yoahntinare yoadoho dutiro.

Cohamacu yare noaa buheare marine å tuhotunocano cahmaerara

2 Å yoa Cohamacu macuno waro ma-
rine yahuriro to jichu masina to
yahuare mari tuhorire noano wacuno
cahmana marine, “Tíre bori”, nina. ²An-
joa masare Cohamacu dutia cjrيره ti
yahu cu turiariro seheta tí dutiare
yuhduruca dutierari jire. Å jia masa
sehe anjoa ti yahurire ti yuhdurucachu
nu Cohamacu tinare quihono buhiri
dahrerari jire. ³Anjoa ti yahurire mari
yuhtiri yuhdoro Cristo sehere yuhtiro
cahmana. Tiro mari puhtoro marine to
yuhdachu yoahntore yahu muhtari jire.
Å jia tirore tuhorina sehe to yahurire
marine yahu turiare marine noano ma-
sichu yoaa taa. Å jiro tí buheare ma-
rine to yuhdachu yoahnti buheare mari å
tuhotunocachu Cohamacu tuaro marine
buhiri dahrerohca. Tíre duhti masier-
aja mari. ⁴Tí buheare tuho muhtaina
painare ti buhero watoi Cohamacu sehe
tí buhea quihonota ti jichu nono nire. To
tuua mehne nono nire. Å yoa payu tahari
to tuua mehne yoa nono, tí buheare
quihono ti jichu nono nire. Å yoaro to
yainare ti yoahntire to cahmano seheta
cūri jire to buhea quihono ti jiare ti masi-
hti. Espiritu Santo sehe jira marine å yoa
masichu yoariro.

Jesucristo mari yoaro seheta pjacu tiroro masa bajuaha

⁵Pihtiri dacho baharoi jiina
Cohamacu cahai jiina michapucacā yu
yahurina cjiri bui puhtoa jisi anjoa sehe.
Tina anjoare puhtoa sōsi Cohamacu.

⁶Wiho mejeta cūiro Cohamacure to
durucurire õ sehe ni joari jire panopu:

“Masa wiho jiina ti jipachuta tinare
wacuna muhu. Masare noano yoara
muhu.

⁷Mahaa numuricā anjoa docai masare
cūri jire muhu.

Å cūpacuta mipure tinare tuaare wacu
puhtoa sōri jire muhu.

⁸Mu å sōchu ahri yahpa macaa bui jipi-
htia bui jira masa”,

niri jire panopu macariro Cohamacure.
Å cūno ahri yahpa macaina wahiquina
jipihtina bui, jipihtia bui cūri jire Co-
hamacu. Masare to å puhtoa sōpachuta
jipihtina ahri yahpa macaina, ahri yahpa
macaa bui jierasínica masa. ⁹Å tina
bui jierasínipanahta, Jesu sehere masija
mari. Mahaa numuricā anjoa docai Co-
hamacu to macuno cūhure cūri jire, mari
yaro jiborirore yariahtirore. Cohamacu
marine cahno Jesure mari yariaborirore
to yariachu cahmari jire. Å jiro to å yari-
achu nu tirore tuaare waro, puhtoro
sōri jire tirore.

¹⁰Cohamacu jipihtiare bajuamehner-
iro jira. Å yoa jipihtia to ya dihta jira.
Å jiro Jesure to yaria dutichu, tiro sehe
mari nāa yoari buhirire cohāri jire. Å co-
hāri jire tiro masa payu to yaina jihtinare
muanopu naano taro. Jesu to nāno
yuhdachu masare yuhdachu yoahntiro
Cohamacu to waha dutiro seheta yoaro
niri jire tirore. To å yoachu pinihta noa
nina. Å jiro Jesu sehe marine yuhdachu
yoariro waro, mari puhtorota jira. ¹¹Jip-
ihtina masare ti nāa yoari buhirire Jesu,
to cosawerina mehne pucu tira Co-
hamacure. Å jiro mari Pucu cūirota

jira. Mari Pꝛꝛꝛ to jichꝛ Jesu marine to yainare to cosawerinare “Yꝛ coyea jira”, ni pisuro ne bꝛo tierara. To ā ni pisurire mꝛsare yahuihtja. ¹² Ō sehe nino niri jire tiro:

“Cohamacꝛ, mꝛ jia tiare yahuihtja yꝛ coyepꝛꝛe.

Jipihitina yꝛ yaina panoi mꝛhꝛe ño pay-
ocꝛ ‘Tuariro jira’, ni yahuihtja yꝛhꝛ
tinare”,

niri jire tiro to Pꝛꝛꝛore. ¹³ Ahri cꝛhꝛe
niri jire tiro:

“Cohamacꝛe wacꝛ tꝛaihca yꝛhꝛ”,

niri jire tiro. Ahri cꝛhꝛe niri jire tiro:

“Ōi jija yꝛhꝛ.

Cohamacꝛ pohna mehne ōi jija.

Yꝛhꝛe to cꝛrina yꝛ coyea mehne ōi jija’,
niri jire tiro to yainare ‘Yꝛ coyea’”,
ni pisuro.

¹⁴ “Cohamacꝛ pohna”, to niina pꝛacꝛ
tiina mari jichꝛ ñꝛno, Jesu sehe mari
ya pꝛacꝛ yoaro sehe jiriro tari jire.
Ā jiriro tari jire tiro crupꝛ yari-
aro taro, watĩnore butichꝛ yoaro taro.
Tiro watĩno sehe yariachꝛ yoariro jira.
¹⁵ Ā yoa watĩnore butichꝛ yoaro, ma-
rine yꝛhdꝛchꝛ yoare. Mari sehe da-
choripe mari yariahtore cuimai. Ā cuiina
jina pichacꝛꝛ wahaborina jimai mari.
Ā jiina mari jichꝛ ñꝛno tiro marine
yꝛhdꝛchꝛ yoare. ¹⁶ Ā yꝛhdꝛchꝛ yoaro
anjoa sehere yoadohoro taerari jire tiro.
Abrahā panamanare Cohamacꝛ yainare
mari sehere yoadohoro tari jire. ¹⁷ Ā
taro tiro mari coyero warota tari jire.
Cāno potori mari yoaro sehe pꝛacꝛ tiri-
ro tari jire. Ā taro mari yꝛhdꝛhtire mari
ñaa yoari buhirire Cohamacꝛe cohā du-
tiro taro niri jire. Ā yoaro mari sacer-
dotea pꝛhtoa bui pꝛhtoro to yoariro sehe
yoaro taro niri jire. Mari yoaro sehe jiro
marine noano pꝛa ñꝛna. Ā yoa marine
noano yoadohora. Ā jiro tiro mari sacer-
dotea pꝛhtoa ti bui pꝛhtoro jiro nina
Cohamacꝛe dahra cohtariro jiro. ¹⁸ Tiro
ñano yꝛhdꝛi jire. Ā jiro watĩno tirore

ñano yoa dutimari jire. Yoaerari jire tiro.
Ā ñaare yoaerariro jiro, tiro sehe mari
cꝛhꝛe ñaare yoaerachꝛ yoa masina.
Watĩno to ñaare to yoa dutichꝛ ñꝛno ma-
rine ñaare yoaerachꝛ yoa masina Jesu.

Jesu Moise cjiro bui jiriro jira

3 Jesu to ā jiriro jichꝛ ñꝛna tirore
noano wacꝛga mꝛsa. Yꝛ coyea Jesu
yaina, Cohamacꝛ to beseina jira mꝛsa.
Tiro Jesu sehe Cohamacꝛ to warocariro
jiro mari sacerdotia pꝛhtoa ti bui pꝛh-
toro jira. To buheare noaa buheare mari
quihōno tꝛho, buheja. Tiro sehe Co-
hamacꝛ warocariro, mari sacerdotia bui
pꝛhtoro to jia tiare noano wacꝛga mꝛsa.
² Cohamacꝛ tirore marine to yꝛhdꝛchꝛ
yoahtore to cꝛchꝛ tiro sehe to cꝛriro se-
heta yoari jire. Ne yꝛhdꝛꝛcaerari jire.
Moise cjiro cꝛhꝛ Cohamacꝛ yaina Is-
rae masare yoadohoro ne yꝛhdꝛꝛcaer-
ari jire. Āta yoari jire Jesu cꝛhꝛ. ³ Moise
cjirore ti ño payoriro yꝛhdoro Jesu se-
here ño payoro cahmana marine. Ō
sehe jira tí mari piti dahre buhechꝛ:
Wꝛhꝛe mari ño payoriro yꝛhdoro wꝛhꝛ
dahreriro sehere ño payoro cahmana
marine. Ā jiro Jesu sehe wꝛhꝛ dahreriro
yoaro sehe jiriro to jichꝛ Moise cjirore
mari ño payoriro yꝛhdoro tiro sehere
ño payoro cahmana marine. ⁴⁻⁶ Ō sehe
jira ti: Mari Cristo yaina Cohamacꝛ ya
curua macaina jija. Cristo sehe wꝛhꝛe
to cꝛboriro seheta marine to ya curua
macaina cjihtire cꝛno nina. Masa sehe
wꝛhꝛe yoaina jira. Cohamacꝛ sehe jip-
ihtiare yoariro jira. Moise cjiro sehe Co-
hamacꝛ ya curua macainare yoadoho-
rururiro jiro, baharopꝛ Cohamacꝛ to
yahuhtore yahua tiri jire masare. Cristo
sehe Cohamacꝛ macꝛno jiro, Cohamacꝛ
yare yoarururiro jiro, Cohamacꝛ ya cu-
rua macaina bui pꝛhtoro jira. To ā jiriro
jichꝛ ñꝛna Moise cjirore mari ño pay-
oriro yꝛhdoro Cristo sehere ño payoro
cahmana marine. Ā jina mari sehe Cri-

store wacū tua duhuerana, marine to yuhdūchū yoahore ã wahcherucuna to ya curua macaina jija mari.

Cohamacū to yainare tiro mehne ti noano sochū cahmana

⁷ Ñ jina Cristore mari wacū tua duhuerahore ò sehe yoaro cahmana marine. Ò sehe nina Espiritu Santo:

“Michare yūhū Cohamacū mūsare yū yahuchū, yūhti duaeraina jiena tjiga.

⁸ Noano yūhtiga mūsa yūhure.

Panopū Israe masa masa marienopū jia, āta yūhdūrucarucure yūhure.

Ñ jina tina yoaro sehe yoarena tjiga mūsa yūhure.

⁹ Tópure cuarenta cūhmari waro tinare yū tuaa mehne yoa ñomai.

Yū ã yoa ñopachūta tina sehe ò sehe ni tūhotua timare: ‘¿Ñaaire mari yoachū ñūno Cohamacū marine buhiri dahrebocari?’ ni tūhotua timare.

Ñ ni tūhotua ñano yoa ñua tire.

¹⁰ Ti ã yoachū ñūcū tina mehne sui.

Ñ suacū ò sehe nii: ‘Tina yū durucure tūho duaeraa, soro jia buheare ã wacūmacarucua nina.

Ya sehere ne yūhti duaerara’, nii tinare.

¹¹ Ñ jicū tina mehne suacū ò sehe ni yahui: ‘Tina yūhū mehne macaina ne jisi.

Ñ jia wapū tiro marieno jisi tina’, ni yahuri jire Cohamacū”,

niri jire Espiritu Santo sehe.

¹² Ñ jina yū coyēa, noano yoaga mūsa, “Cohamacūre cohāri”, nina. Mūsa ñaaire tūhotuna, Cohamacūre catirirore wacū tuaerana, tirore cohāboca mūsa. Ne cūiro mūsa mehne macariro ã yoaero tjijaro. ¹³ Ñ jina ahri sehere yoaro cahmana mūsare: Mūsa mehne macainare dachoripe Cohamacū yare mūsa basi cahma durucuga “Ñaaire yoari”, nina. Ñaaire yoana, “Tí mehne wahcheja”

nina, mahñoare tūhotuna nija mari. Ñ ni tūhotuena tjiga. Ñaaire yoarucuna Cohamacū ya sehere ji coeraja mari. Ñ yoana ñaaire duhu duaeraja. “Ñ yoari” nina, mūsa mehne macainare Cohamacū yare mūsa basi cahma durucuga. Cristo to tahto pano dachoripe tīre ã cahma durucurucuga. ¹⁴ Wahmanore Cristore mari wacū tua dūcariro seheta tó seheta mari wacū tuaerucuna, mari catiro puro to yare duhuerana, tiro mehne macaina jija.

¹⁵ Ò sehe nina Cohamacū yare ti joari pūi:

“Michare yūhū Cohamacū mūsare yū dutichū noano yūhtiga mūsa yūhure.

Panopū macaina Israe masa yū yahupachūta ño payo duaeraa, yūhure yūhti duaerare.

Ñ jina tina yoaro sehe yoarena tjiga mūsa, niri jire Cohamacū”,

ni joaa tiri jire panopūre. ¹⁶ Ñ yoa Cohamacū to yahurire tūhomarina jipahta tina tirore yūhtierari jire. Tina jipiltina Egiptopū jiina Moise to na wiorina jipahta tirore ne yūhtierari jire. ¹⁷ Ñ jia ã ñano yoarucua, cuarenta cūhmari waro Cohamacūre suachū yoa mūjaa tiri jire.

Ti ã yoari buhiri masa marienopū yariari jire tina. ¹⁸ Tirore ti ã yūhti duaerachū ñūno ò sehe cua pisaro mehne niri jire tiro: “Tina yūhū mehne macaina ne jisi. Ñ jia wapū tiro marieno ne jisi tina”, niri jire tiro. ¹⁹ To ã nichū tūhona ahri sehere masinahca mari: Tina Cohamacūre ti wacū tuaerari buhiri tiro mehne macaina ji masierari jire. Ñ jia tiro mehne noano so masierari jire.

Ti ã yoari buhiri masa marienopū yariari jire tina. ¹⁸ Tirore ti ã yūhti duaerachū ñūno ò sehe cua pisaro mehne niri jire tiro: “Tina yūhū mehne macaina ne jisi. Ñ jia wapū tiro marieno ne jisi tina”, niri jire tiro. ¹⁹ To ã nichū tūhona ahri sehere masinahca mari: Tina Cohamacūre ti wacū tuaerari buhiri tiro mehne macaina ji masierari jire. Ñ jia tiro mehne noano so masierari jire.

Ti ã yoari buhiri masa marienopū yariari jire tina. ¹⁸ Tirore ti ã yūhti duaerachū ñūno ò sehe cua pisaro mehne niri jire tiro: “Tina yūhū mehne macaina ne jisi. Ñ jia wapū tiro marieno ne jisi tina”, niri jire tiro. ¹⁹ To ã nichū tūhona ahri sehere masinahca mari: Tina Cohamacūre ti wacū tuaerari buhiri tiro mehne macaina ji masierari jire. Ñ jia tiro mehne noano so masierari jire.

Ti ã yoari buhiri masa marienopū yariari jire tina. ¹⁸ Tirore ti ã yūhti duaerachū ñūno ò sehe cua pisaro mehne niri jire tiro: “Tina yūhū mehne macaina ne jisi. Ñ jia wapū tiro marieno ne jisi tina”, niri jire tiro. ¹⁹ To ã nichū tūhona ahri sehere masinahca mari: Tina Cohamacūre ti wacū tuaerari buhiri tiro mehne macaina ji masierari jire. Ñ jia tiro mehne noano so masierari jire.

Ti ã yoari buhiri masa marienopū yariari jire tina. ¹⁸ Tirore ti ã yūhti duaerachū ñūno ò sehe cua pisaro mehne niri jire tiro: “Tina yūhū mehne macaina ne jisi. Ñ jia wapū tiro marieno ne jisi tina”, niri jire tiro. ¹⁹ To ã nichū tūhona ahri sehere masinahca mari: Tina Cohamacūre ti wacū tuaerari buhiri tiro mehne macaina ji masierari jire. Ñ jia tiro mehne noano so masierari jire.

Ti ã yoari buhiri masa marienopū yariari jire tina. ¹⁸ Tirore ti ã yūhti duaerachū ñūno ò sehe cua pisaro mehne niri jire tiro: “Tina yūhū mehne macaina ne jisi. Ñ jia wapū tiro marieno ne jisi tina”, niri jire tiro. ¹⁹ To ã nichū tūhona ahri sehere masinahca mari: Tina Cohamacūre ti wacū tuaerari buhiri tiro mehne macaina ji masierari jire. Ñ jia tiro mehne noano so masierari jire.

Ti ã yoari buhiri masa marienopū yariari jire tina. ¹⁸ Tirore ti ã yūhti duaerachū ñūno ò sehe cua pisaro mehne niri jire tiro: “Tina yūhū mehne macaina ne jisi. Ñ jia wapū tiro marieno ne jisi tina”, niri jire tiro. ¹⁹ To ã nichū tūhona ahri sehere masinahca mari: Tina Cohamacūre ti wacū tuaerari buhiri tiro mehne macaina ji masierari jire. Ñ jia tiro mehne noano so masierari jire.

Ti ã yoari buhiri masa marienopū yariari jire tina. ¹⁸ Tirore ti ã yūhti duaerachū ñūno ò sehe cua pisaro mehne niri jire tiro: “Tina yūhū mehne macaina ne jisi. Ñ jia wapū tiro marieno ne jisi tina”, niri jire tiro. ¹⁹ To ã nichū tūhona ahri sehere masinahca mari: Tina Cohamacūre ti wacū tuaerari buhiri tiro mehne macaina ji masierari jire. Ñ jia tiro mehne noano so masierari jire.

4 Ñ jiro panopū macainare tiro mehne ti noano sohtore cahmano, tinare “Yūhū mehne wapū tiro marieno sonahca”, ni cūri jire Cohamacū. Mari cūhure āta ni cūri jire tiro. Ñ jina cuaro mehne Cohamacūre yūhdūrucaena tjijihna mari, “Cohamacū yare yoa moñori”, nina. Ñ yoa moñona tiro mehne noano

4 Ñ jiro panopū macainare tiro mehne ti noano sohtore cahmano, tinare “Yūhū mehne wapū tiro marieno sonahca”, ni cūri jire Cohamacū. Mari cūhure āta ni cūri jire tiro. Ñ jina cuaro mehne Cohamacūre yūhdūrucaena tjijihna mari, “Cohamacū yare yoa moñori”, nina. Ñ yoa moñona tiro mehne noano

4 Ñ jiro panopū macainare tiro mehne ti noano sohtore cahmano, tinare “Yūhū mehne wapū tiro marieno sonahca”, ni cūri jire Cohamacū. Mari cūhure āta ni cūri jire tiro. Ñ jina cuaro mehne Cohamacūre yūhdūrucaena tjijihna mari, “Cohamacū yare yoa moñori”, nina. Ñ yoa moñona tiro mehne noano

4 Ñ jiro panopū macainare tiro mehne ti noano sohtore cahmano, tinare “Yūhū mehne wapū tiro marieno sonahca”, ni cūri jire Cohamacū. Mari cūhure āta ni cūri jire tiro. Ñ jina cuaro mehne Cohamacūre yūhdūrucaena tjijihna mari, “Cohamacū yare yoa moñori”, nina. Ñ yoa moñona tiro mehne noano

sosi mari. ²Panopu macaina cjiri Cohamacu yare ti tuhoro sehta mari cūhu noa buheare tuhohi. Tina tuho muhtaina cjiri sehe tuhoa, “Cohamacu ya waro jira”, ni tuhoterari jire. Ā jia ti tuhori cjiri yaba cjihti jierari jire.

³Mari sehe tirore wacū tuana Cohamacu mehne macaina jija. Ā jina tiro mehne noano jinocahna, tiro mehne sonahca. Wapu tiro marieno jinahca. Cohamacu to niro sehta jira tí. Ō sehe niri jire tiro tirore yuhtieraina cjirire:

“Tina mehne suacu cuaro mehne ō sehe ni yahui: ‘Tina yūhu mehne macaina ne jisi.

Ā jia wapu tiro marieno ne jisi’, ni yahui”,

niri jire Cohamacu yare ti joari pūi. Ahri yahpare to yoari baharo dahra duhusiniri jire tiro. Yoari pja dahra duhuparota tina sehere tiro mehne so dutierari jire tiro. ⁴Ahrire mari masija. Seis dachori ahri yahpare to yoari baharo to dahra duhurire yahuro ō sehe niri jire Cohamacu ya durucua ti joari pūi:

“Seis dachori baharo jipihtiare to dahraare pahñono, Cohamacu dahra duhuri jire”,

niri jire to yare ti joari pūi. ⁵Ā yoa pari turi Cohamacu yare ti joari pūi ō sehe ni yahura tiro mehne noano jierinare:

“Tina yūhu mehne macaina ne jisi.

Ā jia wapu tiro marieno ne jisi, niri jire Cohamacu”,

nina to yare ti joari pūi. ⁶Noa buheare tuho muhtaina tirore ti yuhduru-cari buhiri tiro mehne macaina jisi tina. Ā jia tiro mehne wapu tiro marieno jisi tina. Paina sehe tiro mehne macaina jiahca. Ā jia tiro mehne wapu tiro marieno soina jiahca. ⁷Ā jiro masare to yuhdūchu yohti dachori paye dachorire cūri jire pari turi Cohamacu. Tí dachorita mipure jira. Payu cūhmari baharo Israe masa cjiri Cohamacure ti tuho muhtari baharo

tí dachorire yahuri jire Davi cjiro sehe. Cohamacu tirore to yahu dutichu yahuri jire tiro. Cohamacu ya durucua ti joarire musare yu yahua dachorire ō sehe ni joari jire Davi cjiro:

“Ahri dachorire yūhu Cohamacu musare yu yahuchu yuhduru-caro marieno noano yuhtiga musa yuhure”,

ni joari jire panopure. ⁸Tí pjarure Josué cjiro Israe masare Cohamacu to wari yahpai na sūri jire. “Yūhu mehne wapu tiro marieno soina jiahca” nino, tí yahpai ti sohtore nino nierari jire Cohamacu. Tí yahpai so dutiro, paye dachori to yuhdūchu yohti dachorire cūeraboa tiro. ⁹Wiho mejeta seis dachori baharo ahri yahpare to yoari baharo Cohamacu to dahra duhuri sehta mari to yaina cūhu tiro mehne wapu tiro marieno mari sohto jirohca. Tiro mehne mari noano jihto jirohca. ¹⁰Cohamacu sehe to dahrarire duhunocasiniri jire. Tó sehta tiro mehne soina cūhu mari wapu tirire duhunocanahca. ¹¹Ā jina mari to yaina noano yoajihna. Cohamacu yare noano yuhtijihna tiro mehne mari noano sohto sehe. Panopu macaina mari coyca cjiri ti yuhduru-cari baharo Cohamacu mehne macaina ji masierari jire tina. Tina yoaro sehe yoaena tjiijihna mari.

¹²Cohamacu ya durucua marine catichu yoara. Noa sehere marine cohtotachu yoara. Ā jia to ya durucua wiho jia jierara. Ā yoa ñosari pjī pu buhuseheri siori pjī mehne dihirore ti yihso ñu ti masiro sehta to ya durucua cūhu mari jia tiare noano masichu yoara. To durucua mari tuhochu, tíre mari buhechu mari jia tiare, mari tuhota cūhure noano masi pahnochū yoara marine. ¹³Ne Cohamacure mari jia tiare mari dohse yoarire nu masieraja mari. Jipihtiare to bajuamehnerire, to bajuamehnerina cūhure ñuna tiro. Ā jina mari yoarire tirore yahu yuhduro cahmana marine.

**Jesu tuariro mari sacerdotea
puhtoa bui puhtoro jira**

¹⁴Jesu Cohamacu macuno to Pucuro cahapu tjuariro jira. Tiro tuariro mari sacerdotea puhtoa bui puhtoro jira. Ā jiro marine Cohamacure sini payora. To ā jiro jichu nuna mari sehe to yare noano yuhtijihna. Tirore noano wacu turucujihna. ¹⁵Tiro mari sacerdotea puhtoa bui puhtoro mari nana yuhdchu nuno noano pja nuriro jira. Mari naa goa pjaare masina tiro. Watino jipihtiare naare marine to yoa dutiriro seheta tiro cuhure naare yoa dutimari jire. To ā yoa dutipachuta tiro naare yoerari jire. Ā naare to yoa dutimari jiro, marine pja nuno tiro yoadoho masina marine. ¹⁶Ā jina cuiro marieno Cohamacure sinijihna. Tiro marine cahina. Ā jiro tirore mari sinichu tiro sehe pja nuno, marine yoadohorohca. Watino marine to naare yoa dutichu, mari nana yuhdchu cuhure tiro marine yoadohorohca.

5 Sacerdotea puhtoa bui puhtore besero, masunore besera Cohamacu. Ā to beseriro jiro sacerdotea puhtoa bui puhtoro sehe tiro mehne macainare yoadohoro taro, Cohamacure dahra cohtariro jira. Ā jiro ti naare ti yoari buhiri Cohamacure sinibasara tiro mehne macainare. Wahiquirore wajā jū muono, Cohamacure sinibasara. ²Sacerdotea puhtoa bui puhtoro paina masa yoaro sehe noano masi pahnoerariro jira. Ā masi pahnoerariro jiro paina masierainare yoadoho masina. Ā jiro noano yoeraina cuhure noano yoadoho masina. ³Ā jia sacerdotea noano yoa pahnoeraina jia naa buhiri tiina jira tina cuhu. Ā jia ti basi ti naare ti yoari buhiri wahiquirore wajā jū muo, Cohamacure sinina. Paina masare yoadohoa taa, ti naa buhiri ti sinibasariro seheta ti basi ti naa buhiri cuhure sinina Cohamacure.

⁴To basi to mu suro sacerdotea puhtoa bui puhtoro saerara. Cohamacu sehe tirore besero, sacerdotea puhtoa bui puhtoro sōna. Panopu macariro Aarō cjirore to cūriro seheta paina sacerdotea puhtoa bui puhtoro cuhure cūna tiro. ⁵Tō seheta Cristo cūhu to basi to mu suro sacerdotea puhtoa bui puhtoro saerari jire. Cohamacu sehe tirore puhto sōno, ō sehe niri jire:

“Yū macu jira mūhu.

Michare yū macu mu jiare masichu yoaihca”,

niri jire Cohamacu. ⁶Pa tehe ō sehe niri jire Cohamacu Cristore:

“Jipihtia dachoripe sacerdotē jirucuihca mūhu.

Melquisede to jiro sehetā sacerdotē jirucuihca mūhu”,

niri jire to macunore. ⁷Cristo ahri yahpai jiro saunucua mehne, yahco mehne Cohamacure tuaro siniri jire tiro

“Yuhure masoga”, nino. Cohamacu sehe tirore yariarore maso masiriro jira. To ā sinichu Cohamacu tuhori jire tirore. Co-

hamacu cahmaa dihtare to yochu nuno Cohamacu sehe to sinirire tuhoro, tirore yuhtiri jire. ⁸Cristo Cohamacu macuno jiparota nana yuhduri jire tiro. Ā nana yuhdoro yuhtiri jire Cohamacure. Ā yuhtiro noano yuhtiare masiri jire. ⁹Ā nana yuhdoro, crusapu yariaro jipihina

tirore yuhtihtinare yuhdchu yoahiro wahari jire. ¹⁰Ā jiro Cohamacu sehe tirore sacerdotea puhtoa bui puhtoro cūri jire. Ā jiro Melquisede sacerdotea puhtoro to jiro sehetā jira Cristo.

**Cristo yaina tirore wacu
tua duhuchu cua nina**

¹¹Payu ō sehe jiare musare yahu namo duaja sā. Sā ā yahu namo duapachuta musa sehe dapu butiina jira. Ā jina musare sā yahuchu mijo nina sare. ¹²Yoari pja Cristo yaina jimana musa. Ā jina mipure painare buheinapu

ji tuhsuboa m̄sa. M̄sa ā j̄inap̄u j̄i-
borina j̄ipach̄ta paina m̄sa sehere
buheahca t̄joa. Cohamac̄u yare m̄joera
curea buhea dihtare tuhora m̄sa. Wi-
h̄ainac̄ā p̄cho dihtare ti sihni masino
seheta m̄sa c̄h̄u m̄joera curea di-
htare noano tuhora. Wahma buhe d̄u-
caina yoaro sehe jira m̄sa. ¹³P̄cho sih-
niina wih̄ainac̄ā jis̄inina. Tina yoaro se-
heta m̄sa c̄h̄u jira m̄jo cureare tuho-
erana. “Ahri ñaa jira. Ahri noaa jira”, ni
bese masierara m̄sa. ¹⁴Chuare ch̄uina
sehe buc̄na jira. Tina yoaro sehe jiina
noano tuho masiina noano buheina jira.
“Ahri ñaa jira. Ahri noaa jira”, ni bese
masina tina sehe.

6¹⁻² Ā jina Cohamac̄u yare noano
masiina, noano yuhtiina jijihna.
Cristo yare wahmanore mari buhe d̄u-
cana õ sehe masi d̄uca: Mari m̄ s̄ro
mari yoaa yaba c̄j̄hti jierara. Mari noano
yoaa mehne yuh̄d̄si mari. Cohamac̄ure
wac̄u tuaro cahmana marine. Ahrire
wahmanop̄ure buhe d̄ucare marine. Ā
jia bautisaare, wamomacarire marine ti
duhu payoare, yariaina ti masa m̄jaare,
ahri dacho to pihtiri baharo Cohamac̄u
to buhiri dahrehtore, to buhiri dahre-
htina ti ñano yuh̄d̄rucuhto c̄h̄ure ahri
c̄h̄ure wahmanop̄ure marine buhe d̄u-
care. Õ sehe jia buheare masi tuhs̄,
paye sehere noano buhe namojihna t̄joa.
³ Ā jina Cohamac̄u to cahmach̄u āta
yoanahca mari.

⁴ Mari ā yoerana Cohamac̄u yare
duhuboca mari. Cohamac̄u yare masi-
ina j̄ipahta t̄re duhuinare ne pari turi
pano ti ñaa tuhotumarire cohtotach̄u
yoa masierara. Tó sehe jiina Cohamac̄u
tinare to noano yoah̄tore masia, Es-
p̄ritu Santo to yoaa tiare mahanoc̄ā
masimare. ⁵ Ā yoa Cohamac̄u ya duru-
cuare tuhoa noaa durucua ti j̄ich̄u masi-
mare. Tuhs̄, pihtiri dacho baharop̄u Co-
hamac̄u to tuaa mehne mari ā j̄irucuh̄-
tore, masare to buhiri dahrehto c̄h̄ure

tina masimare. ⁶ Ā j̄inap̄ure Cristo yare
duhurinare pari turi ti ñaa tuhotumarire
tinare cohtotach̄u yoa masierara. Tó
sehe yoaina Cohamac̄u mac̄nore pari
turi crusap̄u ti c̄j̄ā puharo seheta tirore
yoaa nina. Ti ā yoach̄u ñua paina masa
Cristore buj̄upera. Ti ā yoach̄u tinare ti
ñaa tuhotumarire tinare cohtotach̄u yoa
masierara. ⁷ Õ sehe jira tí mari piti dahre
buhech̄u: Noari yahpare p̄j̄iro coró tach̄u
tí toaa noano du, dicha tira. Ā j̄iro tí
wese p̄ro dichare c̄juara to chuhtire. Tí
yahpa Cohamac̄u noano to yoari yahpa
jira. (Tó seheta noano yoara tiro to yaina
c̄h̄ure.) ⁸ Wiho mejeta aḡā pota mehne,
t̄ja mehne tí yahpa diaro yaba c̄j̄hti jier-
ara. Ā j̄iri yahpa Cohamac̄u to j̄ū co-
h̄āhti yahpa jira. Ā j̄iro tí yahpare j̄ūno-
canohca. (Tó seheta yoara tiro tirore
duhuinare.)

Cristore ā ño payorucuinare yuh̄d̄uch̄u yoara Cohamac̄u

⁹ Ȳu cah̄ina, m̄sare ā ni yahu-
paihta m̄sa sehere “Cristore duhuina
jira”, nii nieraja. M̄sa sehe Cristo to
yuh̄d̄uch̄u yoaina jira. Ā jina noaare
yoana nica m̄sa. T̄re masija yuh̄u.
¹⁰ Noano mari yoari wapa quih̄ono ma-
rine noano yoariro jira Cohamac̄u. Ā
j̄iro to yare m̄sa tuaro dahrari wapare
bosi tiro. Tirore cah̄ina noano yoadohore
m̄sa tirore. Paina Cristo yaina c̄h̄ure
yoadohore m̄sa. Ā yoa tinare yoado-
hosinina nica m̄sa. Ā yoaina m̄sa j̄ich̄u
ñ̄no bosi tiro. ¹¹ M̄sa catisinino puro
painare m̄sa cah̄rucuch̄u, m̄sa yoado-
horucuch̄u c̄h̄ure cah̄maja s̄ā, baharop̄u
Cohamac̄u yare m̄sa duhuri nina. M̄sa
ā noano yoach̄u ñ̄no noano yoarohca
Cohamac̄u m̄sare. ¹² Ā jina m̄sa capa
buj̄uina m̄sa j̄ich̄u cah̄maeraja s̄ā. Paina
Cristo yaina ñ̄ano yuh̄d̄upahta to yare ne
duhuerara. Ti ā yoach̄u ñ̄no Cohamac̄u
“M̄sare waiht̄ja”, to nirire tinare wa

pahñonohca. Æ jina musa cūhu tina yoaro seheta yoarucuga.

¹³⁻¹⁴ Panopu Cohamacu Abrahã cjirore õ sehe ni cūa tiri jire: “Yu wama mehne ahrire potocã nii nija mūhure. Mūhure noano yoaihtja. Æ yoacu mū panamana ji turiainarure payu masa jichu yoaihtja”, ni yahu cūa tiri jire Cohamacu Abrahã cjirore. Æ ni yahu cūno to ya wama mehne ã ni yahuro niri jire. Pairo tiro bui jiriro ne mariachu to ya wama mehne to basita ã ni yahua tiri jire. ¹⁵ “Mūhure noano yoaihtja”, Cohamacu to ni cūrire Abrahã cjiro sehere noano to cohtachu ñno to niriro seheta tirore noano yoaa tiri jire. ¹⁶ “Cohamacu mehne potocã nina nija”, masa sehe nia, tina ti bui jiriro wama mehne ã ni yahua nina. “Cohamacu mehne potocã nii nija”, cūiro to nichu tūhoro tiro pairo mehne cahma sayoriro “Potocã tjira”, ninohca. Æ jia cahma sayo duhuahca tina. ¹⁷ Cohamacu Abrahãre “Mūhure noano yoaihtja”, ni cūno to ya wama mehne ã ni yahua tiri jire. To ã ni yahurire tūhona “Potocã tjira tí. Æ yoa to niri ne cohtotasi” ni, masija mari. Tíre mari masihto sehe to ni cūri mehne “Yu wama mehne potocã nii nija”, ni yahua tiri jire Cohamacu. ¹⁸ Æ jiro puaro to ni durucuri mehne potocãta to nirire masichu yoari jire Cohamacu marine: To ni cūri cūhu “Yu wama mehne potocã nii nija”, to ni yahuri cūhu tí puaro mehne to ni durucurire yahua tiri jire tiro. To ni cūri cūhu, “Yu wama mehne potocã nii nija”, to ni yahuri cūhu ne cohtotaerara. Cohamacu ne mahñorerara. To ã jiriro jichu masina, marine to yoadohohtore macana, tirore noano wacū tuana, wahchea mehne marine to yūhdūchu yoahore cohtanahca mari. ¹⁹⁻²⁰ Æ to yūhdūchu yoahore cohtana, wacū tuaina jija mari. Æ jina cuieraja. Sacerdotea

puhtoa bui puhtoro Cohamacu to jiri tahtia waropu sãano, ducataru suhtirore yūhdū sãahna. Æ sãano masa ya cjihtire sini payobasara Cohamacure. To ã yoaruro seheta Jesu cūhu baharo mari wahahto seheta muanopu Cohamacu cahapu waharo, mari ya cjihtire sini payobasara Cohamacure. Tõpu mari wahahto pano tiro sehe wahari jire. Æ jiro jipihtia dachoripe sacerdotea puhtoa bui puhtoro jira tiro. Melquisede sacerdote to jiriro seheta sacerdotea puhtoro jirucura tiro cūhu.

Melquisede sacerdote to jiriro seheta Jesu sacerdote jira

7 Melquisede cjiro sehe Salẽ wama tiri maca macaina bui puhtoro jia tiri jire. Sacerdote jiro Cohamacu tuarirore, mūano macarirore sini payobasariro jia tiri jire. Æ jiro paina puhtoare Abrahã cjiro cahma wajã yūhdurūca tuhsu, to tjua tachu waro Melquisede cjiro to ya macai jiriro Abrahã cjirore piti bocaro sua tiri jire. Æ piti bocaro tirore sini payobasaa tiri jire Cohamacure: “Noano yoaga ahrirore”, ni sini payobasaa tiri jire Cohamacure Abrahã cjirore. ² To ã piti bocahto pano Abrahã cjiro sehe tirore ñu tuhtiinare wajã tuhsu to wajãrina cjiri puhtoa yare naa tiri jire. To ã nari cjirire mahanocã waa tiri jire Melquisede cjirore. Cohamacu to dutiuro purocãta mahanocã waa tiri jire Melquisede cjirore. Melquisede cjiro to wama sehe “Bui puhtoro noano yoaruro jira”, nino nina. Tiro cjiro Salẽ wama tiri maca macaina puhtoro to jichu to wama õ sehe nino nina: “Bui puhtoro noano jichu yoaruro”, nino nina. “Salẽ” nino, “Noano jia”, nino nina. ³ Ne Melquisede cjiro pucūsumare, to pano ji mūhtainare to coyeare ti yahu joa õri mariahna. To masa bajarire, to yariari cūhure yahu joa õri mariahna. Æ jiro ã jirucururo yoaro sehe jira tiro cjiro. To ã jiriro jichu

Cohamacu tiro mehne marine piti dahre buhera. Cohamacu to macyno to sacerdotote to jirire marine buhera. Melquisede cjiro sacerdotote ā jirucuriro yoaro sehe jira. Tiro yoaro seheta Cristo cūhu sacerdotote ā jirucuriro jira.

⁴ Ā jiro Melquisede ne wiho jiro jiera tiri jire. Abrahā mari nūchu cjiro puhtoro waro jiparota mahanocā to tjua narire tiro sehene waa tiri jire. Mahanocā waa tiri jire Melquisedere. ⁵ Ā jia Cohamacu dutia Moise cjirore to cūri dutia jipihtina paina Israe masare tō purota wapa dutira. Ā dutiro Leví panamana ji turiainare ti coyea waparire naha dutiro, cūa tiri jire. Leví panamana sacerdototea wahaa tiri jire. Ā jia Israe masa Abrahā panamana ji turiaina jipahta ti sacerdototeare wapa tiri jire. ⁶ Melquisede sehe Leví panamino ji turiaro jieraparota wapa naa tiri jire Abrahāre. Cohamacu “Mūhure noano yoaihtja”, to ni cūriro jiparota Abrahā sehe Melquisedere wapa tiri jire. Ā jiro Melquisede sehe Cohamacure Abrahāre sini payobasaro noano yoa dutia tiri jire. ⁷ Noano yoa dutiriro Melquisede cjiro sehe to noano yoa dutiriro bui Abrahā bui jira. Tíre mari noano masija. ⁸ Mari mehne macaina sacerdototea marine mahanocā wapa naina mari yoaro seheta masa jira. Ā jia yariahtinata jira tina cūhu. Ahriro Melquisede sehe Abrahāre mahanocā wapa nariro cjiro ā catirucuriro yoaro sehe jira, mari piti dahre buhechu. To yariarore yahueraro, āta nino nia tiri jire Cohamacu yare ti joari pūi. ⁹ Mipū macaina Leví panamana ji turiaina sacerdototea jia, mahanocā wapa nana. Ā jiina ti jipachūta Abrahā Melquisedere mahanocā waparō jipihtina Leví panamana ji turiaina ya cjihti cūhure wabasaro sehe yoaro nia tiri jire. Ā jia tina cūhu Melquisedere mahanocā wapaina yoaro sehe jira. ¹⁰ Melquisedere Abrahā to wapari pjare Leví sehe masa

bajuerasinia tiri jire. Ā masa bajuerasiniparota to nūchūno cjiro Abrahā pjacpū to jiboriro seheta Leví sehe ji tuhsūro nia tiri jire. Ā jiro Melquisede Abrahāre to piti bocachu Leví cūhu to nūchūno cjiro mehne jiro sehe jiro nia tiri jire. Ā jia Leví, to panamana ji turiaina mehne Melquisedere mahanocā wapaina yoaro sehe jia, tina to docai jia nia tiri jire.

¹¹ To dutiare cūno Cohamacu Levíre to coyea cūhure sacerdototea ji dutia tiri jire. Ā jia to dutia ti niriro seheta tina sacerdototea wahiquinare wajā jū muo, sinibasaa tiri jire Cohamacure masa ya cjihtire. Ti ā yoari mehne mari yūhdūna, paio sacerdotere soro sehe jiro sacerdotere cahma namoeraboa mari. Ā jina paio sacerdotere cahmaja mari mipure, Melquisede yoaro sehe jirirore. Leví ya curua macariro Aarō cjiro yoaro sehe jiina sacerdototeare mipure mari cahmaeraja. ¹² Ā jina sacerdotere mari cohtotana, marine dutia cūhure cohtotaro cahmana marine. (Sacerdototea ti yoadohoa mehne mari yūhdūeraro seheta tí dutia mehne mari yūhdūeraja. Ā yoana tí dutiare cohtota pahūono cahmana marine.) ¹³ Aarō, Leví cūhu ti ya curua macaina dihtare sacerdototea sāa duti muhtaa tiri jimare Cohamacu to dutiare cūno. To ā dutipachūta mipure mari puhtoro sacerdotote to sōriro pa curua macariro jira. Tí curua macariro ne sacerdotote jierasiniro. ¹⁴ Tiro Cristo Juda ya curua macariro masa bajuari jire. Tíre mari noano masija. Moise cjiro sehe sacerdototea sōno, Juda ya curua macainare ne cūriro sacerdotote sōera tiri jire.

¹⁵ Ahrire masina, ō sehe mari noano masija: Mipure wahma to sōriro sacerdotote Cristo Melquisede yoaro sehe jiro jira. ¹⁶ Panopū macaa dutia ti niriro seheta Leví ya curua macaina dihta sacerdototea sāari jire. Mipure to sōriro sacerdotote ti yoaro sehe jiro sacerdotote sāerari jire. Tiro Cohamacu tuaa mehne jip-

ihtia dachoripe jiro jira. Ā jiro tí tuaa mehne sacerdote s̄ari jire tiro. ¹⁷ Ō sehe nina Cohamacu yare ti joari p̄i:

“Jipihitia dachoripe sacerdote jirucuihca m̄h̄u.

Melquisede sacerdote to jiro sehetā sacerdote jirucuihca m̄h̄u, nia tiri jire Cohamacu to macunore”,

ni joaa tiri jire panop̄u. ¹⁸ To dutia to cū muhtari dutiare masa ti bihoerach̄u yaba cjihti jierari jire. Ā jiro tí dutiare duti namoerari jire Cohamacu. ¹⁹ Moise cjirore to cūri dutia mehne ne yūhd̄uēra masa. Ā jiro mip̄u sehere Cohamacu marine to yūhd̄uch̄u yoah̄tore marine cūre. To ā yoach̄u mip̄ure tiro cahap̄u waha masija mari. Ā yoa tiro mehne durucu masija.

²⁰ Ā yoa Cristore sacerdote s̄ono, “Yū wama mehne potocā nii nija”, nino tirore s̄ori jire to P̄uc̄uro. Paina sacerdotearē tirore to yoiri sehe wama payo s̄erari jire. ²¹ Cristo sehe Cohamacu tuaro to yahuri mehne sacerdote s̄ari jire. Ō sehe nia tiri jire to P̄uc̄uro Cristore:

“Yūh̄u m̄u p̄h̄toro yū wama mehne m̄h̄ure potocā yahuihtja.

Ah̄rire ne duhu cūno marieno yahuja m̄h̄ure.

Jipihitia dachoripe sacerdote jirucuihca m̄h̄u”,

ni cūa tiri jire Cohamacu to macunore.

²² Ā “Yū wama mehne potocā nii nija”, to nino mehne cūno, wahma buheare noaa buheare marine cūno, marine to yūhd̄uch̄u yoah̄tore cūno nia tiri jire. Panop̄u macaa dutia yūhd̄oro mari noano jih̄tore cūno nia tiri jire. Ā cūno Cohamacu “M̄sare yūhd̄uch̄u yoaihtja”, to niriro sehetā yoaro taro, Jesure warocari jire marine yūhd̄uch̄u yoah̄tiro cjihtore. ²³ Ji muhtaina sacerdotēa ti yariach̄u n̄ua paina cohtota s̄ana tjoa. Ā jia tina paȳu sacerdotēa wahara. ²⁴ Jesu sehe ā jirucura. Ā jia tirore co-

htotaina mariaha sacerdotēa. ²⁵ Ā jiro tiro ā jirucuro, Cohamacure ā sini payobasarucura to yaina ya cjihtire. Ā yoa Cohamacu mehne ti ā jirucuhto sehe masare yūhd̄uch̄u yoa masina tiro. Jipihitina tirore wacū tuaina Cohamacu cahap̄u wahaahca. Ā jiro Jesu jira pototinare yūhd̄uch̄u yoiri.

²⁶ Ā jiro Jesu jira mari sacerdotēa p̄h̄toa bui p̄h̄toro. Tiro pinihtare tuaro cahmaja mari. Ne n̄aa buhiri marieriro jira tiro. Masa yoaro sehe ne n̄aare yoerare. Ā jiro Cohamacu tirore n̄aina cahai jirirore naahno, m̄uanop̄u cū, jipihitina paina bui p̄h̄toro s̄ori jire. ²⁷ Paina sacerdotēa yoaro sehe jierara tiro. Tina sehe dachoripe wahiquinare wajā, jū m̄uoā, Cohamacure sinia tihre. Ti basi ti n̄aa yoiri buhirire sini m̄h̄ta tihre. Baharo paina masa ti n̄aa buhiri cūh̄ure sinibasaa tihre tina. Ā jia paȳu tahari tina Cohamacure sinia tihre. Jesu sehe sacerdotēa jiro, cū tahata to yariaa mehne siniri jire Cohamacure masa ti n̄aa buhirire cohāno taro. Ā yariaro to basi to pjacure to catia cūh̄ure Cohamacure to waboriro sehetā yoaro niri jire. ²⁸ Cohamacu dutia Moise cjirore to cūri cjirore sacerdotēa p̄h̄toare s̄a dutira. Ā s̄apahta n̄aa marieina jierara ā sacerdotēa s̄a. Tí dutia baharo jia buhea mehne Cohamacu “Yū wama mehne potocā nii nija”, to nino mehne to yahuri buhea mehne to macuno sacerdotēa p̄h̄toro s̄ari jire. Tiro sehe n̄aa marieriro ā jirucura.

**Cohamacu “M̄sare yūhd̄uch̄u yoaihtja”, ni cūha tjoa Moise cjirore to cūrire cohtotaro.
Tíre yahubasariro jira Jesu**

8 Tí jipihitiare yahuna, ahri pinihtare m̄sare yahuna nija: M̄sare s̄a yahuri sacerdotēa p̄h̄toa bui p̄h̄toro tiro pini mari yairo waro jira. Muanop̄u Cohamacu tua yūhd̄uariro to

puhtoro dujira cahai to potō buhusehei dujira Cristo mari sacerdotea puhtoro. ² Ā jiro ahri yahpa macari wuhui, masa ti yoari wuhui sacerdotea dahraare yoaerara tiro. Muano pu jiri wuhupure mari puhtoro to yoari wuhupure sacerdotea dahraare yoara tiro. Tí wuhū pinihta Cohamacu waro ya wuhū jira.

³ Jipihina ahri yahpa macaina sacerdotea puhtoa wahiquinare wajā jū muoa, wara, Cohamacure ño payoa. Āta yoa dutia tiri jire tinare. Mari yairo sacerdote cūhure wa dutia tiri jire Cohamacure mari ño payohto sehe. Mari ñaa buhirire tirore wa dutia tiri jire. Ā jiro Cristo mari ñaa buhiri yariaro wahchechu yoari jire Cohamacure sacerdotea puhtoa Cohamacure waa ti wahcheriro seheta. ⁴ Mari judio masa mari dutia ti niriro seheta ahri yahpapu sacerdotea masa ti ñaa buhirire wara Cohamacure sinia. Ahri yahpapu sacerdotea ji tuhsura. Ā jiro Jesu sehe mari yairo sacerdote ahri yahpapu jisinino, sacerdote jieraboa tiro sehe. ⁵ Ahri yahpa macaina sacerdotea ti dahraare ahri yahpa macari wuhuihta dahrara. Tí wuhui Cohamacure ti ño payorire ñuna muano macari wuhupure tirore mari ño payohtore masi cureja. “Tí wuhū yoaro sehe jira”, nino nia tiri jire Cohamacu tūcui Moise cjirore to wuhure dahre dutiro. To ā dahrehto panocā Cohamacu ō sehe nia tiri jire tirore: “Tūcui muhure yu ñoriro seheta tí wuhū to jiriro seheta yu ya wuhure quihōno dahrega”, nia tiri jire Cohamacu tirore. ⁶ Mipu sehene Jesu sacerdote jiro to dahraa paina sacerdotea ya dahraa yuhdoro jira. Wiho waro jierara. Cohamacu marine “Musare yuhdūchu yoaihtja”, to ni yahuri cjiri panopu macaa dutia Moise cjirore to cūri dutia yuhdoro jira. Marine to yahuri cjiri tí dutia yuhdoro marine noano jichū yoaaahca. Ā jiro marine Cohamacure yuhdūchu yoabasariro

jiro, Cristo sehe paina sacerdotea yuhdoro jira.

⁷ Wahmanopure to dutiri cjiri mehne mari yuhdueraja. Tí dutia mehne mari yuhdūchu, paye buheare cūeraboa Cohamacu. ⁸ Wiho mejeta tí dutiare ti yoa pahño masierarire yahuro ō sehe nia tiri jire to yainare Israe masare:

“Ō sehe nina mari puhtoro: ‘Noano tuhoga.

Baharopu paye buheare “Ō sehe yoadohoihtja musare”, ni yahuihtja yu yainare Israe masare, Juda ya curua macaina cūhure.

⁹ Tí buhea ti ñuchusuma cjirore yu yahu cūri cjiri yoaro sehe ne jisi.

Yu basi tinare Egipto yahpai jiinare na wiocu tinare yahumai.

Yu ā ni yahurire yuhdūrucare tina.

Ti ā yoachū ñūcu tinare ā ñūnocahi.

¹⁰ Ā jicu baharopu Israe masare ō sehe ni yahuihtja: Yu dutiare tinare wacūchu yoaihtja.

Ā jia yu dutiare yuhtiaha.

Ā jicu yuhū Cohamacu ti puhtoro, tinare ñū wihboriro jiihtja.

Tina sehe yu yaina masa jiaha.

¹¹ Ā jia tí pjare tina mehne macainare ne tina ō sehe cahma nisi: “Mari puhtorore Cohamacure masiga musa”, ne ni cahma buhesi.

Tina jipihina yuhure masi tuhsuahca.

Wihānacā, bucūna cūhu yuhure masiina dihta jiaha.

¹² Ā jicu ti ñaa yoari buhirire boihca yuhū.

Tinare buhiri dahresi yuhū.

Ti ñaa yoari buhirire pari turi wacūsi yuhū’, nia tiri jire mari puhtoro”, nina Cohamacu yare ti joari pūi.

¹³ Mipure marine wahma buheare cūno, panopu macaa dutiare duhuro nire. Ā yoa muna dutia cjirore mahanocā to duhuri baharo tí dutia cjiri cohtotaa wahara.

**Ahri yahpa macari tahtiare muano
macari tahtia cūhure Cohamacure
ño payori tahtiare yahuha**

9 Wahmanore Cohamacu to dutiare Moise cjirore cūno masa tirore dohse ti ño payohto cūhure cūa tiri jire. Á yoa Cohamacure ti ño payohti wūhu cūhure yoa dutiro cūa tiri jire. ²Tí wūhu wahiquina cahsari wūhu jia tiri jire. Pua tahtia cjuaa tiri jire. Pjiwacūri tahtia ti sāa su muhtari tahtia Cohamacu ya tahtia wama tia tiri jire. Tí tahtiai ti sihā buhriadu jia tiri jire. Á jiro mesa cūhu jia tiri jire. Tí mesa bui Cohamacure ti wari pāo pisaa tiri jire. ³Pa tahtia suhti cahsari mehne ti ducataru tahtia jia tiri jire. Tí tahtia Cohamacu to jiri tahtia waro wama tia tiri jire. ⁴Tí tahtiai uru mehne ti yoari altar, inciensore ti jū mūori altar jia tiri jire. Á yoa uru noaa mehne ti duhu ōri caro tói coāa tiri jire. Tí caro puhichapū uru wahwa maná wama tia chūa posa tiri wahwa jia tiri jire. Á jiro tí caro puhichapū Aarō to tjuadu cjiro pūri tidu jia tiri jire. Á yoa pua pjī taa pjīni Cohamacu to dutiare to joa ōa pjīni cūhu tí caro puhichapū sāa tiri jire. ⁵Tí caro bui pūaro anjoa masu jia tiri jire. Tí masu Cohamacu to si siteare, tí tahtiai to jiare ñoa nia tiri jire. Tí caro mohano bui ti wua dupūri mehne mohaa tiri jire. Tí caro mohano bui masa ñaa buhirire ti warire wajā site payoa tia tiri jire sacerdotea puhtoro. Tó purota yahuihtja ahri wūhu macaare mipure.

⁶Á yoa tí wūhure ti noano cahnori baharo sacerdotea dachoripe ti sāa su muhtari tahtiai sāa su, ti dahraare yoaa tia tiri jire. ⁷Sacerdotea puhtoa bui puhtoro dihta pa tahtiapu sāa tiri jire. Cuhmaripe cū tahata to sāari dacho baroihta sāa tiri jire tiro. Á sāano ti wajāriro wahiquiro ti wariro dire na sāano, Cohamacure ño payoa tiri jire. Di marieno ne sāaera tiri jire. To basi wacūenoca

to yoari buhirire, to ñaa buhirire, jipihitina paina Israe masa wacūenoca ti yoari buhirire, ti ñaa buhirire dire na sāa tiri jire tiro Cohamacure sini payoro taro. ⁸Jipihtia ahri mehne Espiritu Santo ō sehe ni marine buhero nina: Tí wūhu Moise cjirore to cūri wūhu mari ño payosinina, to cūri dutiare yoahitina jisina, wiho jiina Cohamacure ño payona wahaeraboa mari. Sacerdotea puhtoa bui puhtoro dihta Cohamacu to jiri tahtia waropu sāa masina. Á jina wiho jiina ti ño payoa wahaeraro sehetā āta jiboa mari cūhu Moise cjirore to cūri dutiare cjuasinina. ⁹Ahri jipihtiare Cohamacure ño payori wūhupū jiare marine cūno, marine mipū macainare buhero niri jire Cohamacu. Wahiquinare wajā jū mūoa, masa Cohamacure ti ño payori mehne ne Cohamacu cahapū wahasí. Ti ā yoari mehne ti ñaa yoari buhirire cosawerara. ¹⁰Á wahiquinare waa, ti chūa, ti sihnia, ti pjacu cosaa, ti ō sehe yoaa mehne Cohamacure ño payoa timari jire. Ahri ti ā yoari wiho warota jira mipure. Á yoa tí dutia Moise cjirore to cūri dutia marine noaina wahachu yoarerari jire. Tí dutiare yoapanahata muanota jirucunocaja mari. Mari tuhutare cohtotaeraja mari. Á jia wahma buheare Cohamacu to cūri baharo mūna dutia sehe yaba cjihti jierara.

¹¹Cristo sehe mari sacerdotea puhtoro jiro ta tuhsuri jire. Á jiro marine noaare cū tuhsuri jire. Cohamacure ño payori wūhu muanopu sacerdotea puhtoro dahrari wūhu paina sacerdotea ti dahraa wūhuse yūhdoro noari wūhu jira. Muano macari wūhu jira. Tí wūhu ahri yahpa macari wūhu jierara. Á yoa masa ti yoari wūhu jierara.

¹²Cristo muanopu Cohamacu to jiro waropu cū tahata sāari jire mari ñaare yoari buhirire Cohamacure waro sehe yoaro taro. Tópu muanopu ōpu to jiri tahtia waro yoaro sehe jira mari piti

dahre buhechu. Ñ yoaro cabritoa dire, wachuacã dire na sãa, waerari jire tiro. Tiro sehe to ya di warore Cohamacure to waro sehe yoaro niri jire yariaro. Jipihitia dachoripe Cohamacu mehne mari jirucuhto sehe to dire cohãri jire. Mari ñaa buhirire yariari jire. ¹³“Yariainare pihana m̄sa pjacu wete tiina jira”, ni cúa tiri jire Cohamacu Moise cjirore. Tó sehe jia ñaare wete tiare cosawea tiri jire cabritoa dire ti wari mehne. Wachua dire ti wari mehne, wachuacãre ti juri nitine ti wari mehne tó sehe jia ñaare cosawea tiri jire. ¹⁴Tó sehe jia ñaare wahiquina dire ti wari mehne, nitine ti wari mehne ti cosaweriro seheta tí yuhdoro Cristo sehe to dire to cohãno mehne mari ñaare yoirire noano cosawe pahñonocahna. Tiro ñaa mari-eriro jiro, crusapu yariaro to basita to pjacu to catia mehne Cohamacure waro sehe yoari jire. Espiritu Santo ã jirucuriro to yoadohoa mehne ã yoari jire tiro. Ñ yoa mari ñaa yoari buhirire Cristo to cosawechu ñuno mari ñaa buhirire Cohamacu bonocahno, mari ñaa yoirire duhuchu yoara. Tí ñaa buhirire cjuasinina pichacapu wahahtina jimai mari. To cosawerina jina, Cohamacu catiriro yare yoaina jija mari.

¹⁵ Ñ jiro “Õ sehe musare yuhduchu yoaihtja”, masare Cohamacu to ni yahu cūchu Cristo sehe to yahuaare yahubasariro jira. Ñ yahubasara tiro Cohamacu to beserinare yuhduchu yoaro taro. To ã yuhduchu yoachu jipihtia dachoripe tiro mehne jirucunahca mari to yaina. Ñ jina mari to yainare Cohamacu to wahtire cjuanahca mari. Moise cjirore to cūri dutia dihta jichu masa ti ñaa buhiri jisia tiri jire. Ñ yoa crusapu yariaro tí pjata ti ñaa yoari buhirire yuhduchu yoari jire tiro to yainare. ¹⁶⁻¹⁷ Masuno baharo to coyeare to wahtire joa õyura papera pui. To wahtire yahuro

taro joa õyura. Tí pūre joa õyuriro to yariaerasinichu tí pū yaba cjihti jierara. To coyea to cjuarire na masierasinina. Wiho mejeta, to yariachu ñua tí pūi to ni joariro seheta to yare naahca tina. ¹⁸ To yariahto pano tí pū to yaba cjihti jieraro seheta yariaro marieno di wijaro marieno Cohamacu Moise cjirore to cūri dutia cūhu ne yaba cjihti jieraboa. Ñ jiro wahiquiro dire sacerdote to wajã siteri baharo to dutiare quihõnota yoaro nia tiri jire. ¹⁹ Ñ yoaro õ sehe yoa muhtaa tiri jire Moise cjiro: Cohamacu to cūri dutiare masare yahu pahñoa tiri jire. Baharo wachuacã dire, cabritoa dire co mehne morea tiri jire. Tuhsu, hisopo wama tidu dupu mehne oveja pjoari sohãa mehne ti ñimiori pjoarire torãa tiri jire. Tí dupu mehne dire soharo, Cohamacu dutiare to joari tju bui wajã site payoa tiri jire. Jipihtina masa bui cūhure wajã site payoa tiri jire. ²⁰ Ñ yoaro õ sehe nia tiri jire tiro: “Cohamacu marine to yahuri cjiri to dutiri cjiri ahri di mehne ti potocã jichu masija mari. Ahri dire ñuna to niriro seheta marine to yoahitire masija mari. Tí dutiri cjirire yuhti dutiri jire tiro marine”, nia tiri jire Moise cjiro. ²¹ Ñ yoaro masare to yoiriro seheta Cohamacure ti ño payori wuhu wahiquina cahsari wuhure, jipihtia tí wuhui jia cūhure wajã sitea tiri jire. ²² Ñ tjira. To dutia ti niriro seheta payu ñaare di cohãno mehne cosawero cahmana. Mahanocã duhsaa ñaare paye baro mehne ti cosawechu noana. Ñ jiro Cohamacu mari ñaa yoari buhirire ne bosu to di cohãerachu.

Cristo to dire cohãno, to yaina ti ñaa yoari buhirire cosaweha

²³ Tí jipihtia Cohamacure ti ño payori wuhu, tí wuhui jia cūhu muano macari wuhui jia yoaro seheta jiri jire mari piti dahre buhechu. Muano macari wuhu

sehe potocāta Cohamacu ya wuhu waro jira. Ā jia ahri yahpa macari wuhure, tí wuhui jia cūhure wahiquina dire to wajā siteri mehne cosawero cahmari jire. Tí yūhdoro muanopu wahahtinare ti űaa buhiri cjuainare cosawero cahmana. Ā jiro wahiquina yūhdoro jiro ya di to cohāno mehne tinare ti űaa yoari buhirire cosawero cahmana. ²⁴ Ā yoa Cohamacure ti űo payori wuhu masa ti yoari wuhu jira. Mūano macari wuhu yoaro seheta jira tí wuhu cūhu, mari piti dahre buhechu. Ā jiro Cristo sacerdote jiro marine sini payobasaro taro ahri yahpa macari wuhure sāaerari jire. Potota muanopu wahari jire tiro Cohamacu panoi marine sini payobasaro taro. ²⁵ Mari judio masa mari sacerdotea puhto bui puhtoro cūhmaripe Cohamacu to jiri tahtia waropu sāa tiri jire wahiquina dire waro taro. Cristo sehe to dire Cohamacure waro sehe yoaro taro, yariaro payu tahari sāaerari jire. ²⁶ Payu tahari yariariro jiro, ahri yahpa to jiro puro payu tahari yariaboa tiro. Payu tahari tiro mari űaa buhirire yariarucuriro jiboa. Wiho mejeta pihtiri dacho panocā mipure marine jipihtinare yūhduchū yoaro taro cū tahata bajuari jire tiro ahri yahpai. Ā bajuari jire to yariaa mehne mari űaa buhirire cohāno taro. ²⁷ Jipihtina masa cū tahata yariaahca. Ti ā yariari baharo masa noainare, űaina cūhure beserohca Cohamacu. ²⁸ Cū tahata mari yariaro seheta Cristo cūhu cū tahata yariari jire payu masa ti űaa yoari buhirire cohāno taro. Baharo pari turi tarohca. Mari űaa yoari buhirire cohā tuhsuriropu jirohca. Ā jiro pari turi mari űaa yoari buhirire cohāno taro nisi. Ā taro tirore cohtainare wahchea mehne tirore űu duainare yūhduchū yoaro tarohca.

10 Cohamacu to dutia Moise cjirore to cūri cjiri noaa buhea yoaro seheta jipahta, cūno potori jierara. Tí

dutia ti yoa dutiriro seheta cūhmaripe wahiquinare wajā, jū mūo, Cohamacure űo payorucura. Ti ā yoaa mehne masa ti űaa yoari buhirire cohāerara. ² Tí mehne ti űaa yoari buhirire cohāa, cū tahata Cohamacure ti űo payori baharo “Mipure űaa buhiri mariahna sāe”, ni tuhotuboa masa. Ā jia pari turi wahiquinare wajā jū mūo Cohamacure űo payoeraboa. Ti ā yoarire duhunocaboa. ³ Cūhmaripe wahiquinare wajā jū mūo, Cohamacure ti űo payochū tí tinare ti űaa yoari buhirire wacūchu yoara. Tó purocāta yoadoho duara tí tinare. ⁴ Wachua di mehne mari űo payori mehne, cabritoa di mehne mari űo payori mehne ne mari űaa yoari buhirire cohāerara.

⁵ Tí potocāta jira. Ti ā jichū űūno Cristo ahri yahpapure to tahto pano ō sehe nia tiri jire Cohamacure:

“Wahiquinare jū mūo ti wachū, trigo pohcare ti wachū cūhure mūhu űūcu űū ji coaerara mūhu.

Ā jicu yu pjacure yoare mūhu yu ya pjacu cjihtore.

⁶ űaa yoari buhirire ti cohāhtore wahiquinare wajā ti jū mūochū űūcu űū ji coaerara mūhu.

⁷ Mū ā űū ji coaerachū űūcu ō sehe nihi mūhure:

‘Ōi jija. Mū cahmano seheta yahpapu yoai wahaihtja.

Āta yuhure ni yahura mū ya tjupe’, nihi yuhū”,

nia tiri jire Cristo to Pūcurore.

⁸ “Wahiquinare jū mūo ti wachū űūcu, trigo pohcare ti wachū cūhure űūcu űū ji coaerara mūhu”, ni yahu mūhtaa tiri jire tiro. Wahmanopure to dutia wahiquinare, trigo pohca cūhure ti waa mehne ti űo payo dutipachūta ā nia tiri jire tiro. ⁹ Ā ni tuhsū ō sehe ni namoa tiri jire: “Ōi jija. Mū cahmano seheta yahpapu yoai wahaihtja”, nia tiri jire. To ā nichū ō sehe masija mari. Panopu wahiquinare wajā jū mūoa

mehne ti ño payori cjiire duhuchu yoaro paye buhea sehere cūno niri jire Cohamacu. Ā cūno mipure Cristo to yariaro mehne masare yuhdachu yoarohca Cohamacu. ¹⁰Jesucristo to pjacure waro, yariaro, jipihtina mari to yainare mari ñaa buhirire cohāri jire. Cū tahata to pjacure wari jire mari ñaa yoari buhirire cohāno taro. Ā yoaro Cohamacu to cahmano seheta yoaro niri jire.

¹¹Jipihtina mari judio masa mari yaina sacerdotea dachoripe Cohamacure ño payori wuhui dahrarucura. Ā dahrarucua dachoripe mnanota wahiquire waja, jū mō, Cohamacure sinirucura. Ti ā waja jū mōpachuta tí mari ñano yoari buhirire ne cohāerara. ¹²Cristo sehe cū tahata mari ñaa yoari buhirire yariaro, mari ñaa yoari buhirire noano cohā pahñonocari jire. Tíre cohā tuhsu waha wahari jire to Pucuro cahapu to potu buhusehei dujuro waharo. Puhtoro jiro tōpu dujira. ¹³Tōpu dujuro cohtaro nina. Tire ñu tuhtiinare Cohamacu sehe to yuhdurucabasahtore cohtaro nina Cristo. ¹⁴Ā jiro cū tahata to yariaro mehne ti ñaa yoari buhirire to cohābasarinare ñaa buhiri marieina ti ā jirucuchū yoara tiro. ¹⁵Tí potocā tjira. Āta ni yahura Espiritu Santo marine. Ō sehe ni yahura tiro:

¹⁶“Ō sehe nina Cohamacu: ‘Baharopure ō sehe ni yahuihtja Israe masare, ‘Yu dutiare ti wacūapu cūihtja’”, ni yahuihtja”, nina tiro. ¹⁷Ō sehe ni namona Cohamacu:

“Ti ñaa yoari buhirire yu dutiare ti yuhdurucari cūhure pari turi wacū namosi yuhū’, nina tiro”,

ni yahura Espiritu Santo. ¹⁸Mari ñaa yoari buhirire to ā bochu pari turi mari ñaa yoari buhiri yariahtirore cahmaeraja mari.

Cohamacu cahai suna cuiro marieno tiro mehne mari durucuboriro seheta tiro mehne durucu masija mipure

¹⁹Ā jina yu coyea Cristo to yariaro mehne to di cohāno mehne mipure mari cūhū cuiro marieno Cohamacu to jiri tahtia waropū sāana, tiro mehne durucu masija. Ā yoana tire sine masija. ²⁰Mari catirucuto cjihtore Cohamacu marine ā coā yoaro niri jire. Cristo sehe mari ñaare yoari buhirire yariaro to di cohāri mehne Cohamacu mehne durucu masija mari. Sacerdotea puhtoa bui puhtoro tí tahtiapu to sāariro seheta Cristo sehe Cohamacu cahapu sūri jire mari ñaa yoari buhirire bo dutiro waharo. Tí tahtia macari suhtirore ducataro suhtirore to tuhre cohāboro seheta Cristo to pjacure cohāri jire Cohamacu mehne mari jirucuto sehe. ²¹Ā jiro Cohamacu ya wuhui dahraruro mari Yairo Sacerdote tua yuhdururo jira tiro. ²²Ā jina Cohamacure sinijihna mahñono marieno. Tire noano wacū tuua mehne, cuiro marieno tire sine jihna. Cristo mari ñaa yoari buhirire to cosaweinapu jija. Ā jina “Buhiri tiina jija mari”, ni tuhutuina jieraja mari. Ā yoa wete mariea co mehne mari cosawero seheta Cristo to cosaweinapu jija. Ā jiina jina Cohamacure sinijihna. ²³“Musare yuhdachu yoaihtja”, to niro seheta yoarohca. Ā jina tiro marine to yuhdachu yoatore noano masija mari. Tire masina, ne boena tjijihna. Cohamacure ā wacū tuarucujihna. ²⁴Mari mehne macainare cahina, tinare yoadohojihna mari jipihtina mari cahma cahī yoadohohto sehe. ²⁵Ā jina noano cahmachurucujihna Cohamacu yare yoana tana. Paina sehe ti cahmachumarirore duhua nina. Tina yoaro sehe yoana tjijihna. Mari mehne macainare wahchechū yoajihna. Ahri yahpapure mari puhtoro to tahto mahanocā duhsara. Tíre masina

tuaro wahchechũ yoajihna mari mehne macainare Jesu yainare.

²⁶ Potocã jia buheare noaa buheare mari masipanahta ñaare mari pari turi ã yoarucuchũ mari ñaa yoari buhirire cosawe namohto basioerara. ²⁷ Æ jiro tó sehe yoainare cua nina. Jipihtina tirore ñũ tuhtiinare buhiri dahrero, tuaro jũnoi cohãnohca Cohamacũ tinare. Æ jia to buhiri dahretore cuiina dihta jimana tirore duhuina. ²⁸ Cohamacũ dutia Moise cjirore to cũri cjirore yũhdũrcainare buhiri dahrea, mari coyea judio masa wajãna tinare. Ne pja ñũno marieno wajãna tinare. Tiaro ti yahusãchũ tũhoro beseriro ti yũhdũrcarire masino tinare buhiri dahre dutira. Tiaro mariachũ pũaro ti yahusãchũ tinare buhiri dahre dutira. To ã dutichũ tinare wajãna. ²⁹ Tí yũhdoro Cohamacũ macũnore ñũ yabiina to buhiri dahretina jiahca. Cohamacũ Cristo to di cohãno mehne mari ñaa yoari buhirire cohãna. To ã cohãhtore yahuri jire tiro marine. Æ jia tina ti ñaa yoari buhirire cohãrina jipahta baharo pari turi ñaare yoarucua ti ñaa yoari buhirire to cohãrire to di cũhũre “Wiho waro jira”, nia nina. Æ niina, to buhiri dahretina waro jia niahca. Æ niina Espiritu Santore ñano ni durucuina jira. Tiro tinare cahĩriro jira. Ti ã ñano durucuchũ ñũno tuaro buhiri dahrerohca Cohamacũ tinare. ³⁰ Ahrire mari noano masija. Cohamacũ to basita õ sehe nia tiri jire: “Yũhũ jija buhiri dahretiro. Ti ñaare yoari buhiri buhiri dahreihitja yũhũ”, nia tiri jire tiro. Õ sehe ni namoa tiri jire: “Yũhũ ñano yoainare yũ yainare buhiri dahreihitja”, nia tiri jire tiro. ³¹ Cohamacũ catiriro marine to buhiri dahrechũ cua yũhdũara.

³² Panopũ musa jirire wacũga musa. Tí pjare Cohamacũ yare wahma masi dũcana payũ tahari ñano yũhdũpanahta

to yare duhuerare musa. ³³ Cãa tahari masa ti ñũrocaroi paina musare ñano ni, ñano yoapere musare. Paina Jesu yainare ti ñano yoachũ ñũna, tinare pja ñũ, tinare piti tire. ³⁴ Ti peresu yoainare pja ñũre musa. Tuhsũ, musa yare ti mapachuta wahchea mehne, “Noanohca”, nire musa. Ahri yahpa macaa yũhdoro noaare cjuara musa muanopũ. Tí noaa ã jirucuahca. Tĩre masina, musa cjuare ti machũ cahyaerare musa. ³⁵ Æ jina cuiena tjiga. Cohamacũre ã wacũ tuarucuga. Musã ã yoachũ ñũno tiro noano yoarohca musare. ³⁶ Cohamacũ “Musare õ sehe yoadohoihtja”, to ni cũrire noano cohtaga musa ñano yũhdũpanahta. Æ cohtaina jina to cahmaare yoanahca musa. Æ yoana to ni cũrire cjuanahca. ³⁷ Õ sehe nina Cohamacũ yare ti joari pũi: “Mahanocã dũhsara Cristo to wihihto. Æ taro dói wihi bahrañonohca.

³⁸ Yũ yaina noaina sehe yũhũre wacũ tuarucuahca.

Æ yoaa yaina jirucuahca.

Yũhũ mehne ã jirucuahca.

Yũ yare cohãina sehere ñũ yabija yũhũ”, nia tiri jire to ya durucua ti joari pũi.

³⁹ Mari sehe Cohamacũ yare cohãina jieraja mari. Æ jina pichacapũ wahahtina jieraja mari. Cohamacũre wacũ tuaja mari. Æ jina to yũhdũchũ yoaina jija.

Wacũ tuaare yahuha

11 Õ sehe jira wacũ tuaa: Cohamacũre wacũ tuana, marine to noano yoahore noano masija mari. Cohamacũ to niriro sehetã to yoaerasinipachuta to yahuaire “Potocã tjira”, ni tũhotuja mari tirore wacũ tuana. Tirore ñũerapanahta, tirore wacũ tuana, “Potocã tjira”, ni tũhotuja mari to yahuaire tũhona. ² Panopũ macaina Cohamacũre ti wacũ tuachũ ñũno ñũ ji coaa tiri jire tiro sehe.

³ Cohamacũ to durucua mehne jipihitiare bajuamehnea tiri jire. Æ jiro tiro

mari ñuerari mehne jipihtia mari mipu ñuare bajuamehnea tiri jire. Tíre mari noano masija Cohamacure wacū tuana pinihta.

⁴Cohamacure wacū tuaro Abe sehe corderore wajā, jū m̄uo, Cohamacure ño payoro “Noana”, nia tiri jire. To wahmino Caī yuhdoro noanore waro, ño payoya tiri jire tiro Cohamacure. Á jiro Cohamacu to warire wahchea tiri jire. Á wahchero “Noariro jira”, ni ñua tiri jire tiro Abere. Á Cohamacure to wacū tuachu ñua mari tirore ñu cūja. To yariari baharo jipachuta to wacū tuarire ñu cūja mari.

⁵Enoco Cohamacure to wacū tuachu ñuno wahchea tiri jire Cohamacu. Á wahchero tirore to cahapu na m̄uo tiri jire. Áta nina Cohamacu yare ti joari pui. To na m̄ori baharo ne masa tirore bocaera tiri jire. To na m̄oriro jiro ne yariaera tiri jire. ⁶Cohamacure wacū tu aerana, tirore wahchecu yoa masieraja mari. Cohamacure wacū tu aerana, tirore ño payo masieraja mari. “Potocāta tiro Cohamacu warota jira. Á jiro tirore mari ño payochu marine noano yoara tiro”, mari ni tuhotuerana tirore sini masieraja mari.

⁷Noé Cohamacure wacū tuaro, tirore to yahurire noano yuhtia tiri jire. Baharopu ti ñano wahahtore to yahuchu tuhoro noano yuhtia tiri jire tiro. Á yuhtiro, pjiria dohoriare yoaa tiri jire. Á yoa tia dohoria mehne tiro to coyea mehne dia miniore yuhdua tiri jire. Á wacū tuariro jiro ahri yahpa macaina ñaina ti wacū tuerarire ti pichacapu ti wahahto cūhure ñono nia tiri jire. Á jiro to wacū tuachu ñuno “Noariro jira”, ni ñua tiri jire Cohamacu tirore.

⁸Abrahā cjiro cūhu Cohamacure wacū tuaro tirore yuhtia tiri jire. Pa dihtapure tirore to wahti dihtapure Cohamacu to waha dutichu tuhoro Abrahā yuhtia tiri jire. To ya dihtai jiriro wijaa waharo,

to masierari dihtapu sua tiri jire. ⁹“Ahri dihtare m̄uhure waihtja”, Cohamacu to nichu tuhoro tirore wacū tuaro tí dihtaihta tjuaa tiri jire tiro. Tói jiro pa dihta macariro jiparota tóihta tjuanocaa tiri jire. Tirore, to macuno Isaa cūhure to panamino Jacobo cūhure tina cañare “Ahri dihtare musare waihtja”, ni yahua tiri jire Cohamacu sehe. Á jia tina tí dihtai jia, wahiquina cahsari wuhusei jia tiri jire m̄nano jieraina jia. ¹⁰Tói jisinia tiri jire Abrahā Cohamacu mehne to jihore cohtaro. Pa macapu Cohamacu to jiri macapu m̄anopu to wahahtore cohtaro nia tiri jire tiro. Tí macare dahrea tiri jire Cohamacu. Á jiro tí maca ne pihtisi.

¹¹Cohamacure wacū tuaro Abrahā cjiro bucuro waro jiparota, to namono Sara mehne pohna tia tiri jire. To namono pohna marienicoro to jipachuta, “To niriro seheta yoarohca”, Cohamacure nino, tirore wacū tuaro pohna tia tiri jire Abrahā. ¹²Á jiro Abrahā bucuro waro jiparota pohna tia tiri jire. Á jia to panamana ji turianapu payu wahanocari jire. Ñahpichoha perire, padu pohcaricā cūhure mari quihōna bihoeraro seheta to panamana ji turaina cūhure quihōna bihoeraja mari.

¹³Jipihtina ahrina yu yahuina cjiropu Cohamacure wacū tua tuhsuinapu yariaa tiri jire. Cohamacu tinare “Musare waihtja”, to ni quihō cūrirore suerapahta yariaa tiri jire. Tíre ñahaerapahta Cohamacu to niriro seheta yoari pja baharopu ti cjuahtere masia tiri jire. Á masia wahchea tiri jire. Á jia õ sehe nia tiri jire tina: “Ahri yahpai tiniina jija. Pa yahpa macaina jija”, nia tiri jire tina. ¹⁴Tó sehe niina pa yahpare ti ya yahpa cjihtore cohtaa nina. Tíre mari noano masija. ¹⁵“Pa yahpa macaina jira”, nicu panopu ti cohāri yahpare nicu nieraja. Pa

yahpapu ti ji muhtari yahpapu waha duaa, wahaboa. ¹⁶Noa yuhduari yahpa sehere cahmaa nia tiri jire. Tí yahpa muanopu jira. Ti ā cahmachu nuno “Cohamacu sā puhtoro jira”, ti nichu tuhoro buo tierara Cohamacu. Ti ya maca cjihtore dahrebasa tuhsua tiri jire tiro.

^{17–18}Cohamacu Abrahāre to macunore Isaare wajā jū muo dutia tiri jire. Tirere nū duaro ā dutia tiri jire, “¿Potocāta yuhure wacū tuajari?” nino. Cohamacure wacū tuaro to niriro seheta yoa tiri jimare Abrahā. “Mū macu Isaa mehne mū panamana ji turiainare payu cjuaiha muhū”, Cohamacu to niriro jipachuta to macunore wajāno taro nia tiri jimare Cohamacure ño payoro taro. ¹⁹“Yū macu Isaare yū wajāchu Cohamacu tirere masonohca”, ni tuhuro tirere wajāno taro nia tiri jimare. Ā niriro jiparota Cohamacu tirere ducata, wajā dutiera tiri jire. To pucuro to ā wajāboriro jiro, masariro yoaro sehe jia tiri jire Isaa, Abrahā to nūchu. Ā jiro Abrahā tirere catirirore pari turi cjuaa tiri jire.

²⁰Isaa Cohamacure wacū tuaro, to pohnare Jacobore, Esaú cūhure “Baharopu Cohamacu musare pjiro noano yoarohca”, nia tiri jire. ²¹Cohamacure wacū tuaro Jacobo to yariahto panocā José pohnare, muare “Cohamacu musare pjiro noano yoarohca”, nia tiri jire Jacobo. Na tuhcuca caha sū, to tjuadu mehne tjua naha caha sū, Cohamacure ño payoro, “Cohamacu musare noano yoarohca”, ni cūa tiri jire. ²²Cohamacure wacū tuaro José to yariahto panocā Israe masa Egiptoi jiina ti wijahtore yahuyua tiri jire. Ā ti wijahtore masiyuro to yariari baharo to pjacu cjirore naa dutia tiri jire to pohnare.

²³Cohamacure wacū tuaa, Moiscāre tia sū waro nūo cjuaa tiri jire to

pucsuma, to masa bajuari baharo. Noarrocā to jichu nūa tirocāre nūoa tiri jire. Tí yahpa macaina bui puhtoro ti pohnare to wajā dutirore yuhduru-canocaa tiri jire tina. Tirere cuiera tiri jire. ²⁴Moise cjirore bucucorico Egipto yahpa macaina bui puhtoro macono jia tiri jire. Ā to bucucoriro jiro Cohamacure wacū tuaro “Ticoro macuno”, tirere ti ni pisuchū cahmaera tiri jire Moise. ²⁵Cohamacure yuhduru-cariro jiro tirere bucucorico cahapu mahaa numricā noano jiboa. Ā jiboriro jiparota tí yuhdoro tiro Cohamacu yaina mehne nāno yuhdu duaa tiri jire. ²⁶Ā nāno yuhduro Cristore ti bujupehto seheta ti bujuperiro jia tiri jire. Baharopu to noano yoari wapa Cohamacu tirere to noano yoah-tore masino nāno yuhdu duaa tiri jire Cristo to nāno yuhduhto seheta. Jipih-tina Egipto macaina ti noaare ti cjuaro yuhdoro tiro Cohamacu sehere tuaro cahmaa tiri jire. Nāno yuhduparota, Cohamacure cahmaa tiri jire. ²⁷Cohamacure wacū tuaro, Egipto macaina bui puhtoro tiro mehne to suachu cuieraa tiri jire Moise. Ā cuieraro tí yahpai jiriro tí yahpare cohā wahcāa waha tiri jire. Ā waharo Cohamacure bajuer-arirore to nūboriro seheta cuierariro jia tiri jire. Cohamacu tirere to yoa dutirire ne duhuera tiri jire Moise cjiro.

²⁸Cohamacure wacū tuaro Moise cjiro Israe masare Cohamacu to yuhduchu yoah-tore masia tiri jire. Ā masino Cohamacu to dutiriro seheta Israe masa ti sopacarire ōa pjīnine di mehne wajā site dutia tiri jire tiro. Ti ā yoachu nūno anjo masare wajāriro ti masa wahmisu-mare wajāboriro Israe masa ti wahmisu-mare wajāera tiri jire. ²⁹Cohamacure wacū tuaa, Israe masa “Sohāri ma”, ti niri mapu co watoi jiri wahsai co marieni wahsai waha waha tiri jire. Ti ā wahachu nūa Egipto macaina cūhu tinare

ñu cū, nñu ti wahcāmaa, mini yariaa waha tiri jire.

³⁰ Cohamacure wacū tuaa Israe masa Jericó wama tiri maca macari sahrīno tãa mehne ti yoari sahrīno sē butiri sahrīno baharo bñhusehei soroa majarea tiri jire. Siete dachori waro tí macare soroa tinia tiri jire. Tópe dachori ti soroa tiniri baharo tí sahrīno sehte bora pihitia waha tiri jire. ³¹ Cohamacure wacū tuaro tó pano mña mehne ñano yoarucuricoro cjiro Rahab wama tiricoro, tí maca macaricoro Israe masare yoadohoa tiri jire. Tí macare ti cohãhto pano mahainacã Israe masa tópu sãa ti duhti ñuchũ ticoro tinare yoadohoa tiri jire. To ã yoadohochũ ñña Israe masa wajãera tiri jire ticorore. Tí maca macainare Cohamacure yũhdũrcainare wajãpahta ticoro sehere wajãera tiri jire.

³² Painare Cohamacure wacū tuainare yahu namoboa yũhũ. ã yahu duapaihta payũre ã Cohamacure wacū tuainare yahu joa pahño masieraca yũhũ. Payũ jira tina. Gedeõ, Baraca, Sansõ, Jefté, Davi, Samue, Cohamacu yare yahu mũhtaina cũhũ ahrina jipiltina yũ yahuborina jira. ³³ Cohamacure wacū tuaina cãina paye yahparipũ jia, tí yahpari macainare cahma wajã yũhdũruca tiri jire. ã yoa paina noano dutiina jia tiri jire. Cohamacu tinare “Mũsare yoadohoihtja”, to niriro seheta tinare yoadohoa tiri jire. Tirore ti wacū tuachũ ñũno ã tinare yoadohoa tiri jire. ã wacū tuaa, yaya tinare ti chũ duachũ ti duserire bihachũ yoaa tiri jire tina. ³⁴ Tuaro jũri pichacapũ jipahta jũera tiri jire tina Cohamacure wacū tuaa. Paina tinare ti ñosa wajã duachũ duhti wahcãa waha tiri jire Cohamacure wacū tuaa. Tu aeraina jipahta Cohamacure wacū tuaa, tuaina waha tiri jire. Cohamacure wacū tuaina jia, cahma wajã tuaina jia tiri jire. ã jia paye yahpari macaina surara tinare wajãa taina ne cũno pjaera tiri

jire tinare. ³⁵ Cãa numia Cohamacure ti wacū tuachũ ñũno ti coyeya ti yariachũ ñũno Cohamacu sehe tinare masobasaa tiri jire.

Paina “Cohamacure cahmaena tjiga”, ti ni peresu yoaina ti ñabiaro yoapeina Cohamacure wacū duhuera tiri jire. “Cohamacure mũa wacū duhuchũ mũsare wionahca”, nia tiri jimare tinare peresu yoaina Cohamacu yainare. Ti ã nipachuta tinare yũhtiera tiri jire Cohamacu cahapũ tuaro waha dua. ã jia tinare ñabiaro ti yoapechũ yariaa waha tiri jire. ³⁶ Painare Cohamacure wacū tuainare ñano ni bũjupe tinare tjana mũjaa tiri jire. ã yoa painare dahporire, yachũrire dũhtenoca peresu yoaa tiri jire. ³⁷ Cohamacure wacū tuainare ñaina tãa mehne doca wajãa tiri jire. Painare ti pjacũrire seroti mehne yihso ta mũjaa tiri jire. Painare ñosaa pjĩni mehne ñosa wajãa tiri jire tina. Ti ã ñano yoapeina oveja cahsari mehne, cabra cahsari mehne suhti tiina pjacũoina jia tiri jire. ã jia paina tinare ñano yoapea tiri jire. ³⁸ Tina Cohamacure wacū tuaina peri yũ yahuina noa yũhdũaina ti jichũ ahri yahpa macaina ñaina tina mehne jiborina jierara. Ahrina Cohamacure wacū tuaina wũhuse marieina jia, masa marienopũ, tũyucapũ ji sitotaa tiri jire. ã ji sitotaa, tũyucapũ jia coparipũ, yahpai jia coparipũ cũhũre carĩ sitotaa tiri jire. ³⁹ Ahrina jipiltina Cohamacure ti wacū tuachũ ñũno wahchea tiri jire tiro. Ti ã wacū tuapachuta Cohamacu tinare “Mũsare yũhdũchũ yoihtja”, to niriro mũ suerasinia tiri jire. ⁴⁰ To yũhdũchũ yoerasinire yahuro õ sehe ni tũhotua tiri jire Cohamacu. “Ahrina yũ yainare baharopũ jiina yũ yaina mehne cũno potori yũhdũchũ yoihtja”, ni tũhotua tiri jire. ã ni tũhoturo to niriro seheta yoarohca. To ã yochũ noa yũhdũara to pano yoariro yũhdoro.

Jesure ã wacũrucujihna mari

12 ã jina ahrina yũ yahurinare payũ Cohamacũre wacũ tuainare masina, jipihtia ñaa yoare duhuncajihna mari cũhũ. Ô sehe jira mari piti dahre buhechũ: Mũrocaperirore tireore mũroca tuachũ dojomehnea jira paye. To dahpo suhti mũcũa suhti tireore mũroca tuaerachũ yoaboca. Ti yoaro seheta Cohamacũ cahmaare mari yoa duchũ dojomehnea cũhũ jira. Ahri cũhũre duhujihna mari. ã yoana mũrocapeina soro marieno ti mũrocaro seheta mari cũhũ Cohamacũ to cahmano seheta soro marieno yoajihna. ² ã jina Jesure ã wacũrucujihna mari. Tirota jira marine wacũ tua dũcachũ yoariro. ã yoa marine wacũ tua namochũ cũhũre yoara tiro. Crusapũ yariaro cũno pjari jire. Baharo to wahchehtore masino crusapũ yariari jire. ã yariaro bũo tiboriro jiparota bũo tierari jire tiro. ã yoaro mipũre Cohamacũ to pũhutoro dujiro poto bũhusehei dũjtĩjãhno tiro dutiriro jira.

³ Ñaina masa tireore ti ñabiaro yoapachũta cũno pjari jire tiro. Tĩre wacũga mũsa, mũsa cũhũ ñano yũhdũna, “Cũno pjaerari”, nina. Tĩre wacũga mũsa “Tirore wacũ tua duhuri”, nina. ⁴ Jesu to ñano yũhdũriro sehe ñaare yoerapanahta ñabiaro waro yũhdũerasinica mũsa. Ñaina mũsare wajãerasinica. ⁵ ¿Cohamacũ mũsare to pohñare to yahurire bonocajari mũsa? Mũsa ñano yũhdũhtire to yahurire wacũga mũsa. Ô sehe nia tiri jire tiro:

“Yũ macũ, mũhũre yũ yahuchũ yũhũre ã ñũnocai tũga ñano yũhdũpaihta. Mũhũre yũ tuhtichũ tuhocũ cahyai tũga.

⁶ Jipihtina yũ cahĩĩnare yahuja.

ã yoa jipihtina ‘Yũ pohña jira mũsa’, yũ ni ñũĩnare yũhdũrucũ dutieraja.

ã jicũ ti yũhdũrucachũ ñũcũ tinare buhiri dahreja”,

nia tiri jire Cohamacũ. ⁷ Ñano yũhdũna Cohamacũ yare duhuena tũga. Cohamacũ mũsare to pohñare buhero nina. Ti pũcũsuma ti pohñare ã yahurucura. ã yoa tinare buherucura. Tó seheta yoara Cohamacũ cũhũ marine to pohñare. ⁸ Cohamacũ jipihtina to pohñare ã yahurucura. ã jina mũsare to yahuerachũ to pohña waro jierara mũsa. Pũcũsuma marieina yoaro sehe jira mũsa to yahueraina. ã jina “Sã Pũcũ waro jira”, ni masierara mũsa Cohamacũre, mũsare to yahuerachũ. ⁹ Mari pũcũsuma marine ti yahuchũ tuhona tinare ño payoja mari. Mari pũcũsumare mari ño payoriro yũhdoro ño payoro cahmana mari Pũcũre Cohamacũre to yahuchũ. ã jina tireore yũhtiro cahmana marine. ã yũhtiina jina jipihtia dachoripe tiro mehne jinahca. ¹⁰ Mahaa mũmũricã ahri yahpai mari jisnichũ mari pũcũsuma marine yahua, buhiri dahrera. Ti mũ sũro ti masino pũrocãta marine yahua, buhiri dahrera. Cohamacũ sehe marine noano yahura. ã jiro to masia mehne marine buhiri dahrera marine noaina bũcũa dutiro. ãta yoara tiro marine tiro yoaro sehe noaina mari jilto sehe. ¹¹ Marine to buhiri dahrechũ wahcheraja mari. Wiho mari cahyaja. ã cahyapanahta to ã buhiri dahreri baharo noaina bũcũanahca mari. ã jina soro yoaro marieno noano jinahca.

Cohamacũ marine to dutiare mari yũhtierachũ cua nina marine

¹² ã jina wacũ tuaera cureina jipanahta Cohamacũre wacũ tuaina jiga. Tirore duhuena tũga. ¹³ Noano potori mahare mũsa wahaboro seheta noano potocã yoaga mũsa. Mũsa ã yoachũ ñũ cũa, paina Jesu yaina soro jiare yoasi. Mũsa noano yoachũ ñũ cũa, noano wacũ tuaera cureina cũhũ wacũ tuaina wahaahca.

¹⁴Jipihtina masa mehne noano jiga, cahmacheno marieno. Ā yoa n̄ano yoarucuenta t̄jiga. N̄aa buhiri marieina dihta mari puhtoro Cristore n̄uahca.

¹⁵Noano yoaga m̄usa. Cohamacu m̄sare to yoadohochu tirore noano yuhtiga. N̄aa diaa ti toaare ti dojomehnenno seheta m̄usa c̄uh̄u Cristo yare duhuena t̄jiga, “Painare dojomehneri”, nina. ¹⁶Ne numia mehne n̄ano yoaina jiena t̄jiga. Ā yoa Cohamacu yare cahmaeraina jiena t̄jiga. Cohamacure cahmaerariro jia tiri jire Esaú cjiro. Tiro masa wahmino jia tiri jimare. Ā jiro to p̄uc̄uro to yariari baharo to p̄uc̄uro yare c̄juahtiro jisinia tiri jimare. Cohamacu to p̄uc̄urore to ni c̄uri c̄uh̄ure c̄juahtiro jisinia tiri jimare. Ā jiro jiro c̄u dacho c̄u wapaihta ch̄uare cahmano, tí wapa mehne to bahuro sehere to wahmino yoaro taro cohtotaa tiri jire. ¹⁷To ā yoari baharo to dohse waharire masina m̄usa. To p̄uc̄uro tirore to wahtire tuaro cahmaa tiri jimare Esaú. To ā cahmapach̄uta to bahurore to wahmino to yoari buhiri, baharo to c̄juaaborire waera tiri jire to p̄uc̄uro Esaúre. T̄ire yahco mehne to sinipach̄uta tirore waera tiri jire to p̄uc̄uro.

¹⁸Cohamacu to dutiare Moise cjirore to c̄uh̄u mari coyea Israe masa cjiri Cohamacu mehne jia tiri jire. Tina tiro mehne ti jiro seheta m̄usa sehe jierare. Ō sehe yoaa tiri jire tina sehe. T̄uc̄up̄u Cohamacu mehne jia taa, sua tiri jire. T̄u sehe Sinaí wama tid̄u jira. T̄up̄u ti such̄u tuaro pichaca j̄ua tiri jire. Ā jiro nahitiano, buiri, tuaro wihnono c̄uh̄u jia tiri jire t̄u t̄uc̄ui. ¹⁹Tóp̄u ti such̄u corneta bisiro coa taa tiri jire. Ā yoa durucua bisiro coa taa tiri jire. To ā durucua bisiro coa tach̄u tuhoa, masa c̄uno p̄jaeraa, “Ā durucu namoeno t̄jijaro”, tuaro ni sinia tiri jire. ²⁰Cohamacu cuaro mehne ō sehe ni, dutia tiri jire tinare:

“Jipihtina ahdu t̄uc̄ure pihainare t̄aa mehne doca waj̄aga tinare. Ahdure pihariro wahiquiro waro to jipach̄uta tiro c̄uh̄ure t̄aa mehne doca waj̄aga tirore. O n̄osadu mehne n̄osa waj̄aga tirore”, nia tiri jire Cohamacu. To ā nich̄u tuhoa to ā ni dutiare c̄uno p̄jaera tiri jire tina. ²¹Jipihtia t̄u t̄uc̄ui jiro to n̄urire n̄u cuiro, ō sehe nia tiri jire Moise cjiro: “Cuicu teterei nija”, nia tiri jire tiro.

²²Tó sehta Cohamacu mehne ti ji d̄ucariro seheta jierara m̄usa sehe. Cohamacu mehne jina wahana, Siō wama tid̄up̄u m̄uano macad̄up̄u m̄usa s̄uboro seheta potota Cohamacu mehne durucure m̄usa. Cohamacu catiriro to ya macap̄u m̄usa s̄uboro seheta potota tiro mehne durucure m̄usa. Tí maca pa maca wahma maca Jerusalē m̄uano macari maca jira. Tóp̄ure paȳu anjoa peri jira. ²³Tina Cohamacu mehne wahchea taa cahmachuina jira. Ā jina m̄usa sehe to ya maca macaina jina, tóp̄u Cohamacu pohna ji m̄uhtaina mehne m̄usa cahmachuboriro seheta jira. Tina to pohna wamare to joa ōri p̄ui m̄uanop̄u ti wamare to joa ōina jira. Tiro Cohamacu sehe jipihtinare besehtiro jira. Tiro mehne macaina jira m̄usa sehe. Ā jina paina noaina Cohamacu yaina mehne cahmachuina seheta jira m̄usa c̄uh̄u. Tinareta n̄aa marieina jich̄u yoa tuhs̄uri jire Cohamacu. ²⁴Ā jina Jesu mehne macaina jira m̄usa sehe. Wahmanop̄u Moise cjirore to duti c̄uri cjirire cohtotaro “Musare yuh̄d̄uch̄u yoaihtja yuh̄u”, ni c̄ua tiri jire Cohamacu marine. To ā ni c̄uriro seheta yoariro jira Jesu. To dire coh̄a to yariaro mehne ā marine yuh̄d̄uch̄u yoara. Abe cjiro to di coh̄ach̄u n̄uno Cohamacu Abere waj̄arirore buhiri dahrea tiri jire. Jesu sehe to dire coh̄a to yariaro mehne noano yuh̄d̄uja mari. Ā jiro Abe to di coh̄ari wiho warota jia tiri jire. Cristo sehe to di coh̄ari baharo noa

yuhduaro yoari jire Cohamacu marine. Á jia to di cohãri wiho warota jierara.

²⁵ Á jina noano yoaga musa. Cohamacu yare musare yahurirore noano yuhtiina jiga. Panopu ahri yahpai jiro Moise cjiro Cohamacu yare to yahuchu tuhoa, payu tíre tuho duaera tiri jire. Á ti tuhoerari buhirire buhiri dahrea tiri jire Cohamacu tinare. Cristo sehe muanopu jiro Cohamacu yare yahuri jira. Á jiro panopu macainare to buhiri dahreriro yuhdoro buhiri dahrerohca Cohamacu Cristore cahmaerainare. Cristo sehe muanopu jiro Cohamacu yare yahuri jira.

²⁶ Tí pjare Moise cjirore to dutiare to cûri pjare Cohamacu to durucuro mehne yahpa ñuhmichu yoaa tiri jire. Mipu sehene ò sehe ni yahuri jire tiro: “Ahri yahpa to ñuhmichu cû taha yoa namoihtja. Ahri yahpa dihtare ñuhmichu yoasi yuhu. Muano pu cûhure ñuhmichu yoihtja”, ni yahuri jire tiro. ²⁷ “Ahri yahpa to ñuhmichu cû taha yoa namoihtja”, nino jipihtiare to bajuamehnerire to cohãhtore masichu yoaro niri jire. Puhtoro Cohamacu to suho jiro pure cohãhto basioerara. Á jiro to bajuamehneri cjirore to cohãchu puhtoro to suho jiro dihta tjuarohca. ²⁸ Puhtoro to suho jiro pu wahanahca mari. Á jina puhtoro to suho jiro pure to cohãerachu ñuna, Cohamacure “Noana”, nijihna mari. Á jina tirore ño payoa mehne, cua pisaro mehne to yare yoajihna mari tirore wahchechu yoana tana. ²⁹ Pichaca jûno to cuaro to jiro seheta Cohamacu cuaro choro buhiri dahreriro jira.

Õ sehe Cohamacure wahchechu yoaga

13 Musa mehne macainare cahí duhuena tjiga. ² Masa musa masieraina ti jipachuta tinare musa wuhusepu noano mehne sãa ta dutiga.

Paina ã yoaa, masierapahta anjoare ti wuhusepu sãa ta dutiri jire. Á jina ti yoaro seheta yoaga musa cûhu.

³ Peresui jiinare pja ñuga. Musa sehe tina mehne peresui jiina musa jiboro seheta tinare pja ñuga. Paina ti ñano yoaina cûhure pja ñuga. Tina yoaro sehe musa cûhu musa ñano yuhduboro seheta tinare pja ñuga.

⁴ Wamomaca duhteina jipihtina musa basi noano cahma ño payoga. Á yoa paina mehne ñano yoena tjiga. Jipihtina numia mehne ñano yoainare, mua mehne ñano yoaa numia cûhure buhiri dahrerohca Cohamacu.

⁵ Niñerure cahíina ne jiena tjiga. Ò sehe nia tiri jire Cohamacu: “Musare ne cohãsi. Á yoadohorucuihtja musare”, nia tiri jire tiro. Noho puro musa cjuaa mehne tó purota wahchega. Pjiro cahma namoena tjiga. ⁶ Á jina cuiro marieno ò sehe ni tuhotunahca mari:

“Mari puhtoro Cohamacu marine yoadohoriro jira.

Ne cuisu mari.

Masa marine ti ñano yoahutore cuisu mari”,

ni tuhotunahca mari.

⁷ Cohamacu yare musare yahurinare musare dutirinare wacûga musa. Á yoa noano ti jia tirire noano ti yoaa tirire wacûga. Á wacûna, Cristore ti wacû tariro seheta yoaga musa cûhu.

⁸ Jesucristo ne cohtotaerara. Panopu, mipu cûhure, baharopu cûhure to jiro seheta jirucurohca tiro. ⁹ Payu buheare soro jia buheare tuhoena tjiga musa “Noa buheare sãpu cohãri”, nina. “Ahrirre chuga. Ahrirre chûena tjiga”, ni buhera cãina. Á ni ti nia buheare mari yuhtichu tí marine yoadohoerara. Á jiro tó sehe jia buheare mari yoachu wiho warota jira. Tí marine wacû tuaina jichu yoarera. Cohamacu sehe marine pja ñuno wacû tuaina jichu yoara. Á

jina to ya tuaa mehne tirore wacū tuaina jiga mūsa cūhū.

¹⁰ Cristo mari űaa buhirire yariari jire mari űaare cohāno taro. Sacerdotea sehe ō sehe niina jira: “Wahiquina mari wajā jū muoina, mari waina mehne yūhdūnahca”, niina jira sacerdotea. Ā niina ti űaa yoari buhirire cohāina ne ji masierara. Cristo to crusai to yariaro mehne yūhdūina ji masierara tina ā ni tuhoituina. ¹¹ Mari judio masa mari sacerdotēa puhtoro Cohamacū to jiri tahtia waropū dire na sāano wajā sitea tiri jire, masa ti űaa yoari buhirire cosawero taro. Ā yoa to wajāriro wahiquiro to pjacūre tí maca dūhtū cahapū jū cohānocahna. ¹² To yoariro seheta Jesu cūhū maca dūhtū cahapū yariari jire, masa ti űaa buhirire to di cohāno mehne cosawero taro. ¹³ Maca dūhtū cahapū to yariachū űaa, ti ya buheare to cohāchū űaa judio masa puhtoa tirore űū tuhtiri jire. Ā jina mari cūhū tiro mehne macaina jijihna. Mari ā jichū űaa, masa mari cūhūre űū tuhtiahca. ¹⁴ Ahri yahpapū mari ji dojoahti maca ne mariahna. Ā jina mipūre mari baharopū jihti macare cohtana nija mari. ¹⁵ Ā jina Jesu to yoadohoro mehne Cohamacū mehne durucuja mari. Ā jina tirore noano sinijihna. Sacerdote wahiquirore jū mūo, Cohamacūre to űo payoriro seheta Cohamacūre mari dūseri mehne noano durucu űo payojihna mari. “Cohamacū tuariro jira”, ni űo payorucujihna. Mari ā nichū tiro wahcherohca. ¹⁶ Mūsa mehne macainare noano yoaga. Ā yoa tinare yoadohoga. Tíre boena tjiga. Mūsa ā noano yoana Cohamacūre űo payonā nica mūsa. Ā yoana tirore wahchechū yoana nica.

¹⁷ Mūsa puhtoare noano yūhtiga. Ti dutiro seheta yoaga. Cohamacū mū sare űū wihbo, buhe dutiro cūre tinare. To ā cūrina jia mū sare ā űū wihborucua nina “Cohamacūre yūhdurucari”, nia. Ā

jina tinare noano yūhtiga mūsa. Mūsa ā yūhtichū űūa wahchea mehne mū sare yoadohoa hca tina. Mūsa yūhtierachū űūa tina cahyaahca. Ā yūhtierana noano jisi mūsa.

¹⁸ Sāre sini payorucuga Cohamacūre. Dachoripe noaa dihtare yoa duaja sā. Ā jina “űaare yoana nija”, ni tuhotueraja sā. ¹⁹ Ahri pinihtare tuaro sini payoga Cohamacūre yūhūre: Soaro mehne mūsa cahapū yū wahahtore tirore sini payoga.

Ahri pūre joariro noa duti batoaha

²⁰ Cohamacū mari puhtoro Jesure yariarirore masori jire. Marine noano jichū yoariro jira. Tiro “Mū sare yūhdūchū yoaihtja”, ni cūa tiri jire Cohamacū marine. To ā ni cūrire yoariro marine yūhdūchū yoariro Jesu sehe jira. Mari űaa buhirire yariari jire tiro. Ā jiro tiro tuariro ovejare űū wihboriro yoaro sehe jiro, marine to yainare noano űū wihbora. ²¹ Ā jiro Cohamacū tirore masoriro mūsa cūhūre yoadohojaro jipihtia noare to cahmaare mūsa yoahto sehe. Ā jiro Jesucristo to yoadohoro mehne Cohamacū to cahmano seheta jipihtinare marine noaa sehere cohtotachū yoajaro. Jipihtia dachoripe Cristore űo payojihna. Āta yoajihna.

²² Yū coyēa, ahrire tuaro mū sare duti ihtja: Ahri pūi yū yahurire noano mehne tuhoga mūsa. Ahri mū sare yū joarocari pū pjíri tju jierara. Ā jina ahrire noano tuhoga. ²³ Ahri cūhūre mū sare yahuihtja: Mari coyēirore Timoteore peresu jirirore wioyūhti. Soaro mehne to wihichū mū sare űūi wahacu tirore naaihtja. Yūhū mehne waharohca.

²⁴ Mūsa puhtoare, jipihtina painare Cohamacū yainare tó ijinare noa dutija. Italia macaina Jesu yaina cūhū mū sare noa dutira.

²⁵ Cohamacū to cahīa mehne mū sare jipihtinare noano yoajaro.

Santiago

Santiago Israe masare macari waharinare joarocaha

1 Yuhũ, Santiago ahri pũi musare noa duti joarocai nija. Cohamacũre, mari puhtoro Jesucristo cũhure dahra cohtariro tjija yuhũ. ã jicũ Israe masa ya curuari macainare doce curuari macainare Jesu yainare macari waharinare yũ coyea musare joarocai nija.

Cohamacũ sehe noano masichũ yoara

²Yũ coyea, payũ jiahca mũa ñano yũhdũhti. ã ñano yũhdũna noano wahchea mehne tũhotuga. ³ã ñano yũhdũna, potocãta Jesure mũa wacũ tuaare ñona ninahca mũa. ã jina ñano yũhdũpanahta Jesure mũa noano wacũ tuaina jina, tirore wacũ tua namoina wahanahca. ã wahana mũa ñano yũhdũare cũno pjanahca. ⁴ã yoana duhuro marieno ã cũno pjarucuina jiga mũa, tuho masiina, Cohamacũ cahmaare noano masiina mũa jihto sehe. ã jina duhsaro marieno to yare yoarucuina jinahca mũa.

⁵Cohamacũ duhsaro marieno jipitinare wara. ã waro tirore siniinare soro nino marieno wara tiro. To ã jiriro jichũ masina, mũa masihti duhsachũ tũhotuna, tirore siniga. Mũa ã sinichũ musare masi namochũ yoarohca tiro. ⁶ã sinina Cohamacũre noano wacũ tuatjãhna siniga mũa. “Sã sinichũ Cohamacũ waeraboca sãre”, ni tũhotuena tjiga. Tó sehe ni tũhotuina pjiri ma macaa pahcõri yoaro sehe jira. Pahcõri ti sũroca cohtotaro seheta tina cũhũ ti wacũapũre sũroca cohtotara. Cũno potori yoerara tina. ã jia Cohamacũre wacũ tuaerara. ⁷Tó sehe ni tũhotuinar ti sinipachũta ne mahanocã ti siniare tinare wasi mari puhtoro Co-

hamacũ. ⁸Michare ahrire cahmariro jiparota ñamichacapũre soro tũhotura tjoa. ã yoarirore tó wahaerara.

⁹Jesu yainare wiho jĩinare Cohamacũ sehe puhtoa sũnohca. To ã yoahina jia wahchejaro tina. ¹⁰ã jia Jesu yaina pache pũa jia ti ya pache pihtihore masia wahchejaro. Tí pache wiho warota jira, Cohamacũ to ñuchũ. Cohori ti dói baa boraa waharo seheta tí pache pihtia wahaahca. ã jia tina cũhũ wahchejaro. ¹¹Sũ muja taro to tuaro sichũ tja sehe ñaia wahara. ã yoa cohoru cũhũ ñai boraa waha, noaa cohoru ti jia cjiri pihtia wahara. ãta waharohca pache puare ti pachere ti na cahmachuno watoi. Tina ti pache mehmeta butia wahaahca.

Ñano yoa dutiare yoerariro wahcheriro jira

¹²Ñano yũhdũriro cũno pjaro, ñano yoa dutiare yoeraro wahcheriro jirohca. To ã cũno pjachũ, to ñaare yoerachũ jipihtia dachoripe muano macaa catiare tirore warohca Cohamacũ. “Tí catiare waihca”, ni cũa tiri jire Cohamacũ jipihtina tirore cahĩinare. ¹³Musare ti ñano yoa dutichũ “Cohamacũ yũhure ñano yoa dutiro nina”, ni tũhotuena tjiga. Ñano yoaare tũhotuerariro jira Cohamacũ. ã jiro tiro sehe masare ñano yoa dutiriro jierara. ¹⁴Masa tuaro ñaare ti goa pjaata tĩta tinare ñano yoachũ yoara. ¹⁵ã jia ñaare goa pjara masa. ã goa pjaa, tí sehere tũhotura. ã tũhotua, tí ñaare yoarucura tina. Ti ã yoarucuri buhiri Cohamacũ tinare pichacapũ cohãnohca.

¹⁶ã jina yũ coyea yũ cahĩina, “Cohamacũ yũhure to dutichũ ñano yoahi”, ni tũhotuena tjiga. Potocã jierara tí. ¹⁷Cohamacũ muano macariro marine noaa dihtare wara. Tiro pinihta sũ dacho macarirore, ñami macarirore, ñahpichochoa poca cũhure bajuamehneriro jiro, tiro sehe to jiriro seheta ã jirucunoc-

ahna. Ne cohtotaerara. ¹⁸To cahmariro sehetä tiro noaa buhea mehne marine to pohna wahachü yoare. Ä yoare tiro to pohna ji muhtaina mari jшто sehe.

Potocäta Cohamacüre ño payoa õ sehe jira

¹⁹Yü cahüina, yü coyea ahrire noano tuhoga müsa. Cohamacü yare noano tuhoga müsa. Ä tuhona, noano tuhoturo marieno durucuena tjiga. Ä yoa suaena tjiga. ²⁰Cüiro suariro jiro, Cohamacü to cahmano sehetä quihõno yoariro jierara. ²¹Ä jina jipihitia müsa ñaa yoarire, müsa ñaare goa pjarire duhuga müsa. Ä jina Cohamacüre noano yuhtiina jina to buheare tuaro cahmaga müsa. To ya buheare müsa tuaro cahmachü Cohamacü sehe müsare pichacapü wahaborinare yuhduchü yoarohca.

²²To yare tuhopanahta to nino sehe yoerana mahñoare tuhotuna nica müsa. “To nino sehe yü yoerachü noanohca”, ni tuhotuna mahñoare tuhotuna nica müsa. Ä jina to yare tuhona tí sehere yoaga. ²³Cohamacü yare tuhopanahta, to nino sehe yoerana, to wuhduare ñõno mehne ñüriro yoaro sehetä jira müsa. ²⁴Tiro to wuhduare to ñüri baharo waha, to ñürire boa wahara. ²⁵Pairo sehe to ñürire to boerario sehetä Cristo to dutirire tuhoro türe yoaro, wahcheriro jirohca. Tí dutia Cristo to cahña mehne masare to yuhduchü yoahü buhea jira. Tí buheare ne cohäerario wahcheriro jirohca. Tiro pinihta to tuhore yoariro jira. Ä yoarirore noano yoarohca Cohamacü.

²⁶Cüiro to ä durucumacancarire duhu masieraro, potocäta Cohamacüre ño payoerara. “Cohamacüre noano ño payoja”, ni tuhoturiro jiparota mahñoare tuhutura tiro. “Cohamacüre ño payoja”, niriro to jipachüta to ño payoa ne yaba cjihti jierara.

²⁷Potocäta Cohamacüre mari Püçüre mari ño payona, to cahmano sehetä ño payona, õ sehe yoaja mari: Püçüsuma marieinare, wapewahya numia cühäre ñano ti yuhduchü ñüna, tinare yoadohja mari. Ä jina ahri yahpa macaina ñaare ti yoaa barore ne yoa duaeraja mari. Ä yoana potocäta Cohamacüre ño payoina jija mari.

Masare cüno potori noano yoaro cahmana marine

2Yü coyea, noa yuhduarirore Jesucristo mari puhtoro tuhona, tirore wacü tuaina jira müsa. Ä wacü tuaina jina masare cüno potori noano yoaro cahmana müsare. ²⁻³Ä yoa uru sororire, wamomaca säa sororire cjuariro, wapa tia suhtire säariro müsa Jesu yaina cahmachuno cahapü to tachü ñüna tirore noano mehne piti bocaboca. “Öi dujiro jira”, niboca müsa tirore. Ä nipanahta tí pjata pjacuroro cühü ñano suhti tiriro müsa cahai to tachü ñüna tiro sehere noano piti bocaeraboca. “Öi ducuga. O yahpai dujiga”, niboca müsa tirore. ⁴Müsa ä yoana masare cüno potori yoerana nica müsa. Ä yoana ñaare tuhoutuina masare beseina yoaro sehe jina nica müsa. “Ahriro sehe noariro jira. Ahriro ñariro jira”, ni besemana müsa.

⁵Yü coyea, yü cahüina, yuhüre tuhoga. Payü pjacüoina sehere Cohamacüre noano wacü tuahtina cjihtire, puhtoro to suho jiropüre jihtina cjihtire besea tiri jire Cohamacü. “Tópüre wahanahca müsa”, ni cüa tiri jire Cohamacü tirore cahüinare. ⁶Tinare to ä besepachuta müsa sehe pjacüoinare noano yoerare. Pache pua sehe müsare ñano yoara. Ä yoaa tina masare beseriro cahapü müsare naahna müsare yahusäa taa. ⁷Müsa sehe “Cristo yaina”, masa ti niina jira. Payü pache pua sehe Cristore ñano ni durucuina jira. (Ä jiro pjacüoinare müsa ño payoriro yuhdoro

pache puare musa ño payochu sehere ñaa nina.)

⁸Cohamacu dutia mehne macaa dutiare paye dutia bui curero jia dutiare õ sehe ni joaa tiri jire: “Mu basi mu cahino sehetu mu cahai jiina cūhure cahiga”, nina Cohamacu dutia. Ahri dutiare yoana, noare yoara musa. ⁹Wiho mejeta masare cūno potori yoerana ñano yoana nina musa. ã jina Cohamacu dutiare yūhdurucaina jira musa. ãta nina Cohamacu yare ti joari pūi. ¹⁰Cohamacu dutiare yoaina jipanahta cūnotare musa yoerachū paye dutiare musa yoa pahñopachuta yaba cjihti jierara. Naa buhiri tiina jisina musa. ¹¹“Pairo namono mehne ñano yoena tjiga” ni, musare dutiriro Cohamacuta jira. “Masare wajāena tjiga”, niriro tirota jira Cohamacu. Pairo namono mehne ñano yoerapanahta masunore wajāna Cohamacu to dutiare yūhdurucaina jira musa. ¹²Cristo marine tuaro cahino, marine dutira marine yūhdūchū yoaro taro. To dutiare mari yoarire, mari yoerari cūhure ñūno marine besero tarohca. To ã besehtina jina to dutiare noano yojihna. ã yoa to cahmano sehetu durucujihna mari. ¹³Mipure painare mari pja ñuerachū Cohamacu sehe masare to beseri pja jichū marine pja ñusi. Wiho mejeta painare mari pja ñuchū Cohamacu sehe pja ñūno, marine buhiri dahresi.

Cristore wacū tuaina sehe noare yoara

¹⁴Yū coyeyu tuhoga musa. “Cristore wacū tuaja yūhū”, cūiro to nipachuta painare to noano yoadohoerachū to ã nimari cjiri sehe ne yaba cjihti jierara. Tõ sehe ni wacū tuamacanocarirore Cohamacu yūhdūchū yoasi. ¹⁵⁻¹⁶¿Jesu yairo, Jesu yacoro ñaa suhti dihta ti cjuachū ñūna ti chūhti mariachū ñūna dohse yoajari musa tinare paye baro

cjuaina jina? “Noano jiga musa. ã yoana noano suhti tiga. ã jina noano chūa mehne yapi wahcāga”, nipanahta ti cahmaare musa waerachū musa ã nimari cjiri ne yaba cjihti jierara. ¹⁷ã yoa “Cristore wacū tuaja”, musa nipachuta noare musa yoerachū Cristore musa wacū tuaja ne yaba cjihti jierara.

¹⁸Musa mehne macariro ahri yū buherire tuho duaeraro õ sehe masijaro. Noare yoeraparota “Cristore wacū tuaja”, niboca tiro. Noare yoeraro Cristore to wacū tuare painare masichū yoa masierara. Noare yoariro pinihta noare to yoa mehne Cristore to wacū tuare masichū yoa masina. ¹⁹“Cohamacu cūirota jira”, ni tuhutura musa. Musu ã ni tuhutuchū noa nina. ã jipachuta tõ purota Cohamacure yūhtiro marieno tirore musa masichū tī yaba cjihti jierara. Watīa cūhū musa tuhuturo sehetu tuhutura. ã yoa Cohamacu to jia tiare masina tina. ã masia, cuia, teterera. ²⁰Cūiro noano yoeraparota “Cristore wacū tuaja”, ni tuhuturiro jiro tuho masierariro jira. Cristore wacū tuamariro painare noano yoeraro potocāta Cristore wacū tuarera. Õ sehe ni yahuihtja musare ahrire: ²¹Abrahā mari ñuchū cjiro to macūno Isaa wama tiriro cjirore wajābasaa tiri jimare Cohamacure. ã yoaro tirore tãa mehne ti yoari tuhu bui duhu payoa tiri jimare. ã duhu payoro Cohamacu to dutiriro sehetu to macunore wajāno taro nia tiri jimare Cohamacure ño payoro taro. To ã yochū ñūno potocāta Cohamacure to wacū tuarire masia tiri jire Cohamacu. To ã wacū tuariro to jichū masino, “Potocāta noariro jira”, ni ñūa tiri jire Cohamacu tirore. ²²To ã ni ñuchū ahrire masina musa: Abrahā Cohamacure wacū tuaro tirore yūhtia tiri jire. ã yūhtiro Cohamacure to wacū tuarire masichū yoaro nia tiri jire. ²³ã jiro Cohamacu yare ti joari pūi to niriro sehetu ã wahaa tiri jire:

“Abrahā Cohamacure wacū tuaa tiri jire. To ā yoachū ñño ‘Noariro jira tiro’, ni ñña tiri jire Cohamacu tirore”, ni joaa tiri jire Cohamacu yare ti joari pūi. To ā ni ññchū masia “Abrahā Cohamacu mehne macariro jira”, nina masa tirore.

²⁴ Ā jina ahri yū yahuiltire masina mūsa: “Cohamacure wacū tuaja” niriro, to noano yoerachū ñño Cohamacu sehe tirore “Noariro jira”, ni ññerara. Cohamacure wacū tuariro sehere potocāta to noano yoachū ñño “Noariro jira”, ni ñña Cohamacu tiro sehere.

²⁵ Āta ni ñña tiri jire Cohamacu Rahab wama tiricorore mūa mehne ñano yoarucuricoro cjirore. Josué cjiro to warocarinare noano piti boca “Noano sāa tahga”, nia tiri jire ticoro. Ā yoaro tina ti tjuaa duachū ticoro sehe pa maha sehere ñoa tiri jire tinare “Tinare ññ tuhtiina wajāri”, nino. To ā yoachū ñño “Noaricoro jira”, ni ñña tiri jire Cohamacu ticorore. ²⁶ Ā tjira. Mari pjacupure catia mariachū ji masieraja mari. Ā jiro catia marieno mari pjacu yaba cjihti jierara. Tó seheta “Cohamacure wacū tuaja”, nipanahta painare mari noano yoerachū potocā jierara mari wacū tuaa. Ā jiro mari noano yoaa mariachū mari wacū tuaa yaba cjihti jierara, catia marieni pjacu to yaba cjihti jieraro seheta.

Mari duseroi wijaare yahuha

3 Cohamacu yare masare buheina to yare ti noano yoerachū ñño tina pinihtare masare buheraina yūhdoro Cohamacu buhiri dahrerohca. Tíre masina mūsa, yū coyeyā. Ā jina mūsa mehne macaina masare buheina payū jiena tjiga. ² Jipihtina payū tahari mari ñaare yoaja. Cūiro ñaare durucuerariro Cohamacu cahmaare noano yoariro jira tiro. Ā jiro paye ñaa cūhure yoerara. ³ Ō sehe jira ahri mari piti dahre buhechū: Cawalo to duseroi comaa pjī

to ñahmanore ña dihohti pjīne mari cūja, tirore mari majarerucachū yoana tana. Ā yoana tí pjī comaa pjī mehne tirore to wahahto mari waja majareruca dapoja. Tí pjīca mahari pjīca to jipachūta tí pjī mehne tirore wahachū yoaja mari. (Ō seheta mari dusero mahanocā to jipachūta tí dusero mehne pjīro ñano yoaja mari.) ⁴ Dohoria quiti mehne piti dahre yahu namoihtja mū sare: Busoca pjiria to jipachūta tiare wihnono to tuaro wārocapachūta oturiro sehe mahari pjīca mehne tia nohoi to waha duaroi oturocara. ⁵ Tó seheta jira mari duseroi wijaa. Mari dusero mahanocā to jipachūta tí dusero mehne pjīro yoaja mari. Mahari pichacacā pjīro to jū wahcāno seheta mari dusero mehne pjīro ñaare yoa masija. ⁶ Ā jiro mari dusero pichaca yoaro sehe jira. Mari duseroi wijaa jipihtia ñaare yoachū yoara marine. Pichaca to jū ducaro seheta mari duseroi wijaa mehne mari noano jiborirore ñabiaro yoaja mari. Ñaare durucuna watīno to dutiro seheta mari yoana nija. ⁷ Jipihtinare nūcū macainare wahiquinare, minichahcare, chihchō wahcāinare, wahire mari masa sitichū yoa masija. Mari payū tina barore masa sitichū yoa tuhsuja. Ā jia tina noano tuho masina. ⁸ Tinare mari yūhtichū yoapachūta mari dusero sehe ñaare durucuro ne tjueraputiara. Ā jiro nuina ti niji siariro seheta mari dusero sehe ne niji siaeraputiara. Mari duseroi wijaa ñabīaa jira. Ā jiro ñīma painare to wajāno seheta marine paina cūhure ñabiaro wahachū yoara mari duseroi wijaa. ⁹ Mari dusero mehne Cohamacu mari pūhtoro mehne mari noano durucuja. Ā durucupanahta masa Cohamacu yoaro sehe jīinare to bajuamehnerina ti jipachūta tinare ñabiaro ni durucuja mari. ¹⁰ Cū duseroihta noaa durucua cūhū, ñaa durucua cūhū wijara. Yū coyeyā, ā ni durucueraro cahmana.

¹¹ Máca pohtai m̄ wiori copai noaa co, ñaa co cūh̄ ne wijaerara. ¹² Yū coyēa, higueraçū olivo pocare dicha tierara. Tuhsū, secū higuera pocare dicha tierara. Ā yoa máca pohtai m̄ wiori copai moa tia co to wijaachū moa mariea co wijaaerara. (Tó seheta mari duseroi noaa durucua, ñaa durucua mehne wijaachū yoeraro cahmana. Ā ni durucuaeraro cahmana.)

Noano masia waro õ sehe jira

¹³ Cāina m̄sa mehne macaina noano masiina jira. Noano masiina m̄sa jia tiare õ sehe yoa ñonahca m̄sa. “Paina yūhdoro noano masija s̄”, niena t̄jiga. Ā nienata noaare yoaga m̄sa. Ā noaare yoana potocāta noano masiina jira m̄sa. ¹⁴ Wiho mejeta paio paye barore to cjuachū ñūna tíre tuaro cahmaina jina, paina mehne suarucuina jina, painare yūhdur̄ca duaina jina, “Noano masiina jija s̄”, niena t̄jiga m̄sa. M̄sa ā niina jina mahñoina jira m̄sa. ¹⁵ Ā yoaina ti tuhotua ne Cohamacū ya tuhotua jierara. Ti tuhotua Cohamacūre yūhdur̄caina ti ñano tuhotua jira. Tí tuhotua sehe wat̄ino ya jira. ¹⁶ Masa ti cjuare tuaro cahmaina, painare yūhdur̄ca duaina ā cahma sayorucura. Ā yoaina jia jipih̄tia ñaare yoarucura. ¹⁷ Paina sehe Cohamacū yare noano masiina sehe tina pinihta ā yoamacanocaa nierara. Ā yoa tina ne cahma sayoerara. Ā jia masa noaina, painare noano yuhtiina, pja ñūina, masare yoadohoina, masare cūno potori yoaina jira tina. Tíre yoaa, mahñono marieno yoara tina. ¹⁸ Ā yoana cahmachea marieno jina, painare “Cahmachena t̄jiga”, mari ni yahuna, noaina wahachū yoana nija mari masare.

Ahri yahpa macaa ñaare cahmana, Cohamacūre cahmaeraina jira m̄sa

4 ¿Dohse jiro baro m̄sa cahma sayoari? ¿Ā jina dohse jiro baro cah-

machejari m̄sa? Ñaare goa pjana, cahmache duara m̄sa. Noaare yoa dua-panahta ñaare yoara m̄sa. ² Paye barore m̄sa cahmana. Ā cahmana masare wajāna m̄sa ti yare nana tana. Pairo paye barore to cjuachū ñūna tíre m̄sa tuaro cahmana. Ā cahmapanahta tíre na masierara m̄sa. Ā yoa tíre cahma sayorucura m̄sa. Cohamacūre sinierana, m̄sa cahmaare ne bocaerara. ³ Ā yoa sinina, m̄sa ya cjihti dihtare sinimana m̄sa, m̄sa cahmano seheta yoarucuna tana. Paina ya cjihti sehene sini payoerara m̄sa. Ā jiro m̄sa sinichū Cohamacū m̄sa siniare waerara. ⁴ Cohamacūre cohāina jira m̄sa. Ahri yahpa macaa ñaare cahmana, Cohamacūre cahmaeraina jira m̄sa. Ahri yahpa macaa ñaare cahmaina Cohamacūre cahmaeraina ji tuhsura. ¿Tíre masierajari m̄sa? ⁵ Ā sehe nia tiri jire Cohamacū yare ti joari p̄i: “Cohamacū Esp̄ritu Santore mari mehne jihtirore cūhre. Ā jiro Esp̄ritu Santo sehe marine cahño, ñaare mari tuaro cahmapachuta cahmasāerara tiro. To manūno to namonore to cah̄i doaro seheta marine tuaro cahña Esp̄ritu Santo”, ni joa tiri jire panop̄re. To ā ni joari wiho warota jierara. Potocāta jirota nina. ⁶ Ā yoa Cohamacū marine noano yoadohora tirore mari noano yuhtihto cjihtore. Ā sehe nina Cohamacū yare ti joari p̄i: “Yūhū pinihta painare masi yūhdur̄caja’ nirirore, Cohamacū ñū tuhtira. Pairo sehene ‘Ñariro, wiho jiriro jija’, niriro sehene Cohamacū yoadohora”, nina to yare ti joari p̄i. ⁷ Ā jina Cohamacūre noano yuhtiina jiga m̄sa. Ā yoa wat̄inore yuhtiena t̄jiga. M̄sa ā yuhtierachū ñūno tiro sehe musare duhti wahcā m̄rocaa waharohca. ⁸ Cohamacūre noano yuhtiga m̄sa. M̄sa ā yoachū tiro sehe musare yoadohorohca. Ñaina jira m̄sa. Ā jina ñaare yoa namoena t̄jiga. Ñaa cūh̄re cahmana, noaa cūh̄re cahmaina jira m̄sa. Ā

jina m̄sa ñaa t̄hotumarire cohtotaga. M̄sa ā yoach̄u ñ̄no Cohamac̄u m̄sa ñaa yoari buhirire cohānohca. ⁹M̄sa ñaa yoarire tuaro cahyana, bujua witi-ga. Ā yoana m̄sa ñaare yoari buhirire tiiga. Tíre wahcheina jiena tjiga. Ā jina m̄sa ñaa yoarire ñano yajeripohna t̄ga. ¹⁰“Ñariro, wiho jiriro jija yuh̄u”, nina Cohamac̄ure ño payoga. M̄sa ā yoach̄u ñ̄no tiro sehe ño payoa mehne noano yoarohca m̄sare.

Ti coyeare Jesu yainare ti basi ñano quti dahre dutieraha

¹¹Ȳu coyea Jesu yaina jina, m̄sa basi ñano quti dahrena tjiga. M̄sa coyeirore ñano quti dahrena, tirore buhiri dahre duti duaina jina nica m̄sa. Cristo ya dutia sehe masare buhiri dahrehti dutia ji tuhsura. Ā jina masare ñano quti dahrena Cristo ya dutiare ō sehe nina nica m̄sa: “Marine noano dutierara Cristo ya. Ā jina mari m̄ s̄ro buhiri dahre dutijihna”, nina nica m̄sa masare ñano quti dahrena. Ā nina Cristo ya dutiare ñano ni durucuina tjuara m̄sa. Ā jina tí dutiare yoaeraina tjuara. ¹²Masare dutiare wariro, masare beseriro Cohamac̄uta jira. Masare pichac̄ap̄u wahaborinare tirota yuh̄d̄uch̄u yoa masina. Ā yoa tirota masare pichac̄ap̄u cohā masina. Ā jina mari sehe masare “Ñaina jira”, ni masieraja. Cohamac̄u dihta mari coyeare besetiro jira.

Ñamichac̄ap̄ure dohse mari jhtore masieraja mari

¹³Mip̄ure yuh̄ure t̄hoga m̄sa. Ō sehe niina t̄hoga yuh̄ure: “Michare, ñamichac̄are pa mac̄ap̄u jina wahanahca. Tóp̄ure c̄u c̄uh̄ma jina, paye baro dua, nuch̄nahca. Ā yoana wapatanahca mari”, nina c̄aina m̄sa mehne macaina Cohamac̄ure wac̄ino marieno. Ā niina jina, yuh̄u sehene t̄hoga m̄sa. Tó sehe niinare ahrire

yahui tai nija: ¹⁴Ñamichac̄ap̄u dohse m̄sa jhtore masierara m̄sa. Me ti ji, dói pihti m̄ano seheta jira mari jia tia. Me mahanoc̄ā jiro, pihtia wahara. Tó seheta mari c̄uh̄u mahanoc̄ā jina, yarianahca. ¹⁵Ā jina ō seheta ni t̄hoturo cahmana m̄sare: “Cohamac̄u to cahmach̄u jinahca mari. Ā jina ō sehe yoanahca mari”, ni t̄hoturo cahmana m̄sare. ¹⁶Ā jipanahta mip̄ure “Mari m̄ s̄ro ō sehe yoanahca”, nirucumana m̄sa Cohamac̄ure wac̄ino marieno. Tó sehe nirucuna painare yuh̄d̄urucaina jina, ñaare yoara m̄sa. ¹⁷Ā jina noaare mari yoah̄t̄ire masipanahta tíre yoaerana ñaare yoana nija mari.

Pache p̄are yahuha Santiago

5 Pache p̄a m̄sa mip̄ure t̄hoga yuh̄ure. Baharop̄ure m̄sa ñano yuh̄d̄nahca. Ā jina tii sañurucuga m̄sa. ²M̄sa pache ba pihtia wahaahca. Ā yoa m̄sa suhtire cas̄ipoca c̄uh̄u ch̄u pahñoahca. ³Ahri dachorire, pihtiri dacho pano niñerure m̄sa pj̄iro wihboch̄u ne tí yaba c̄ijhti jierara. M̄sa ā wihboch̄u ñ̄no niñerure m̄sa cah̄ich̄u masina Cohamac̄u. Tí niñeru to wapo wijiboriro seheta tí niñeru pihtia waharohca. Ā jina niñerure m̄sa cah̄iri buhiri ñano yuh̄d̄nahca pichac̄ap̄u m̄sa j̄uch̄u m̄sa pjac̄ure j̄u p̄jaro seheta. ⁴M̄sa weserire dahra cohtainare wapaerare m̄sa. Tinare mah̄nore m̄sa. Ā jiro tinare m̄sa wapaerari niñerure ñ̄no, m̄sa mah̄norire masina Cohamac̄u. M̄sare dahra cohtaina wapa na duaa, sañurucura tina. Ti ā ni sañurucuch̄u mari p̄htoro Cohamac̄u tinare t̄hora. ⁵Ahri yahpap̄ure paȳu pache mehne jia tira m̄sa. Ā jina m̄sa ji coa dihtare yoaa tira m̄sa. Ā jina pj̄iro wach̄u ti noano nuriro yoaro sehe jira m̄sa. Pj̄iro wach̄u pj̄iro to ch̄uri baharo tirore ti waj̄hti cuhtup̄u na wahc̄ana.

Tó seheta mŭsa cŭhure pjíro mŭsa cjuari baharo mŭsare to buhiri dahrehtopŭ na wahcānohca Cohamacŭ. ⁶Noainare ñano ti yoerapachuta peresu yoa wajā dutire mŭsa tinare. Mŭsa ā yoachŭ tina sehe mŭsare yuhdurŭca masierare.

Cristo to tjuatahtore noano cohta dutiha marine Santiago

⁷Ā jina yŭ coyeya, mari puhtoro Cristo ahri yahpapure to tjuatahtore noano cohtaga. Wese puro to toaa dicha tihti pjare noano to cohtaro seheta noano cohtaga. Puhiro to dŭcachŭ. baharopŭ coro to ta namochŭ cŭhure to toaapure “Coro ta sājaro” nino, to wesere to noano duhtore noano cohtara tiro. ⁸To ā cohtariro seheta mŭsa cŭhŭ noano cohtaga. Mari puhtoro to tjuatahto mahanocā dŭhsara. Ā jina Cohamacure ā wacŭ tuarucuna to tahtore ā cohtarucuga mŭsa.

⁹Yŭ coyeya mŭsa basi nurena tjiga Cohamacŭ mŭsare to buhiri dahrehta sehe. Ā yoa ahrire wacŭga mŭsa. Buhiri dahrehtiro to tahto mahanocā dŭhsara. ¹⁰Yŭ coyeya, ñano yuhdŭpanahta mari puhtore noano cohtaga Cohamacŭ yare yahu muhtaina cjiri ti yoiriro seheta. Tina ti cŭno pjariro seheta cŭno pjaga mŭsa cŭhŭ tinare ñu cŭna. ¹¹Ā yoa ahri yŭ yahuhtire wacŭga mŭsa. Ñano yuhdŭpahta Cohamacure duhueraina wahcheina jira. Panopŭ macarirore Job wama tirore cjire tuhore mŭsa. Tiro ñano yuhdŭparota Cohamacure duhuerari jire. Ā jiro to ñano yuhduri baharo Cohamacŭ tirore noano yoiari jire. Cohamacŭ mari puhtoro noano pja ñŭriro jiro āta yoiari jire tiro. Tí jipihtiare masina mŭsa.

¹²Yŭ coyeya ahrire noano tuhoga tjoa. Ō sehe ni wama payora masa: “Mŭano macariro mehne potocā nina nija”, nina masare tuho dutia. Tuhsŭ, “Ahri yahpa mehne potocā nina nija”, nina masa. Paye mehne cŭhure wama payora tina.

Tina yoaro sehe ā ni wama payoena tjiga. Ahrire mŭsare tuaro dutija. Mŭsa painare yahuna, noano potota yahuga tinare. Wama payoro marieno ni yahuga tinare. Ā mŭsa potocā yahuchŭ ñno Cohamacŭ soro mŭsa niri buhirire buhiri dahresi.

¹³Mŭsa mehne macariro ñano yuhduriro jiro, Cohamacure sinijaro tiro. Pairo wahcheriro jiro Cohamacure wahchea mehne basajaro. ¹⁴Mŭsa dohatina, Jesu yaina puhtoare pjirocaga mŭsa. Mŭsa ā pjirocachŭ tina sehe mŭsare se mehne wisōahca mari puhtoro Jesu wama mehne to tuaa mehne. Ā wisō tuhsŭ, mari puhtore Cohamacure mŭsare sini payoahca tina. ¹⁵Ā ti sini payochŭ “Mari sinino seheta tiro yorohca”, ti ni tuhotchŭ Cohamacŭ mŭsare dohatiinare mŭsa dohatiare yuhdŭchŭ yorohca. Ā yoa mŭsa ñaa yoiari buhiri mŭsa dohatiina jichŭ ñna mŭsare sini payoahca. Ti ā sini payochŭ ñno mŭsa ñaa yoiari buhirire borohca Cohamacŭ. ¹⁶Ā yoa mŭsa mehne macaina mehne mŭsa ñaa yoiari cahma pŭ buhuseheri yahuga. Ā ni tuhsŭ, mŭsa basi Cohamacure cahma sini payoga. Mŭsa ā sini payochŭ mŭsa sini payoinare Cohamacŭ yuhdŭchŭ yorohca. Noaare yoaina mŭsa jichŭ Cohamacure tuaro mŭsa sini payoriro seheta yorohca tiro. Ā jia mŭsa sini payoa tua nica. Wiho jia jierara. ¹⁷Cohamacŭ yare yahu muhtariro cjiro Elia wama tirore mari yoaro seheta masŭno jia tiri jimare. Ā jiro “Coro taero tjijaro” ni, tuaro sinia tiri jire Cohamacure. To ā ni sinichŭ tia cŭhma noano pa cŭhma dacho macai ahri yahpapure ne coro taera tiri jire. ¹⁸Pari turi tjoa Cohamacure corore to sinichŭ coro taa tiri jire. Ā jiro pari turi ahri yahpai yucŭri bucŭa, dicha tia tiri jire. (Ā jia Cohamacure mari sinia wiho jia jierara.)

¹⁹Үч коҕеа, муса мeһне маҕарио
 Соһамасу ҕаре дуһурио сҕиро
 Соһамасу ҕаре пари тури то саһмаһто
 сҕиһтоге тироге ҕаһуна, ноано ҕоана
 нина муса. ²⁰А ҕоа аһриге масига
 муса: Соһамасуге дуһурио сҕироге

Соһамасуге пари тури саһмачу ҕоана,
 пичасапу ҕаһаборироге ҕаһдучу
 ҕоана нина муса. А сҕиро паҕу то
 наа ҕоари буһире Соһамасу бо
 паһһоноһса.

1 San Pedro

Jesu yainare macari waharinare joarocaha Pedro

1 Yuhũ, Pedro, Jesucristo buhe dutiro to cūrirota jija. Á jicũ m̄sare yoaro macaa macaripũ waha siterinare Ponto yahpapũ, Galacia yahpapũ, Capadocia yahpapũ, Asia yahpapũ, Bitinia yahpapũ tí yahparipũ waharinare m̄sare jipih̄tinare joarocaja yuhũ. M̄sare noa duti joarocaja yuhũ. ²Wahmanopũre Cohamacũ mari Pũcũ “Ō sehe yoaihtja”, to ni wacũyuro seheta m̄sare besea tiri jire. To ā beseri baharo to yairo Espĩritu Santo sehe m̄sare Cohamacũ yaina cjihtire sōri jire. Ō seheta sōri jire tiro Jesucristore noano yuh̄tihtina m̄sa jightho sehe, to di cohāri mehne m̄sa ñaa buhirire cosarina m̄sa jightho sehe. Cohamacũ to cahĩa mehne m̄sare noano jichũ yoajaro.

Jesu yaina jina marine m̄uanopũ to naah̄tore cohtana nija mari

³⁻⁵Cohamacũ marine tuaro pja ñũno, Jesucristo yariaro to masa m̄jari mehne marine pichacapũ wahaborinare yuh̄dũchũ yoare tiro. Á marine yuh̄dũchũ to yoachũ pari turi mari masa bajuariro seheta Cohamacũ to pohnata wahaja mari. Á wahana tiro mehne mari ā jirucuh̄tore noano masija mari. Á jiro m̄sare noano yoaro taro m̄sare cohtaro nina. Tiro mehne m̄sa ā jirucuh̄tire cūnohca tiro. Á jina ā jirucunahca m̄sa. Tópũ Cohamacũ m̄sare to wahto ne baasi. Ahri yahpapũ mari ya ti wete wahāno seheta, ti ñaia waharo seheta Cohamacũ m̄sare to wahto ne ā wahasi. Á jia ne pihtisi. Á jiro tirore m̄sa wacũ tuachũ, Cohamacũ to tuaa mehne m̄sare ñũ wihboro, yuh̄dũchũ yoarohca. Pihtiri

dacho jichũ m̄sare to yuh̄dũchũ yoarire masichũ yoarohca tiro. Marine to ā pja ñũchũ ñũna, Cohamacũre mari puhtoro Jesucristo pũcũrore ño payo, “Noana”, nijihna tirore.

⁶Á to yuh̄dũchũ yoah̄tina jina, mahano ahri yahpai m̄sa jiro puro payũ tahari m̄sa ñano yuh̄dũpanahta wahchera m̄sa. ⁷Á ñano yuh̄dũpanahta Cohamacũre duhuerana m̄sa tirore noano wacũ tuarire masichũ yoana nica m̄sa. Uru ahri yahpa macaa pini pihtia wahaahca. Uru yuh̄doro m̄sa wacũ tuaa sehe wiho waro jierara. Á jia masa uru to jiare masi duaa doha ñũna. Urure ti doha ñũno seheta m̄sa wacũ tuare Cohamacũ ñũ duaro “Ñano yuh̄dũjaro”, niboca m̄sare. M̄sa ā ñano yuh̄dũri baharo potocāta tirore m̄sa noano wacũ tuarucuchũ, Cristo ño payoa mehne m̄sare “Noano yoahre m̄sa”, ninohca. Ahri yahpapũ tjua taro ā ninohca.

⁸⁻⁹Tirore Jesucristore m̄sa ñũerapanahta cahĩna m̄sa. Á yoa mipũre tirore ñũerapanahta tirore wacũ tuara. Á wacũ tuana, tuaro wahchera m̄sa. Cohamacũ ā m̄sare to wahchechũ yoachũ pjĩro wahchera m̄sa. Tĩ wahchea noa yuh̄dũara. Cohamacũ m̄sare pichacapũ wahaborinare yuh̄dũchũ yoarohca m̄sa tirore noano wacũ tuachũ. Á jina pjĩro wahchera m̄sa.

¹⁰Cohamacũ m̄sare to ā yuh̄dũchũ yoah̄tore, m̄sare to tuaro cahĩare panopũ macaina Cohamacũ yare yahu m̄ũtaina cjiri tíre masi duaa, buhe, sinitu ñũa tiri jire. Á jia tíre yahuyu joaa tiri jire. ¹¹Cristo to ñano yuh̄dũh̄tore, to masa m̄jajh̄tore, jipih̄tina bui puhtoro to sũho jightho tina to masa bajuah̄to panopũta yahuyu tuhsũa tiri jire. Jesucristo to yairo Espĩritu Santo to yoadohoa mehne ā yahuyua tiri jire tina. Á yahuyua tina Cohamacũ yare yahu m̄ũtaina cjiri

ti yahurire noano masi duaa sinitu ñña tiri jire tina Cohamacure. Espiritu Santo “Cristo wihirohca”, to nirirore “¿Dohse jichu wihirohcari?” ni sinitu ñña tiri jire tina. “¿To wihichu dohse waharohcari?” nia, tó cūhure sinitu ñña tiri jire. ¹²Tí ti yahuyuri cjiri ti basi ti masihtu cjihti jiera tiri jire. Tíre tinare masichu yoaa tiri jire Cohamacu. Mari sehe mari masihtu cjihti jiri jire Cohamacu yare yahu muhtaina cjiri ti joari cjiri. Muanopu tariro Espiritu Santo to yoadohoa mehne mipure noaa buheare musare sã yahuja. Panopu musa masihtu cjihtire ti yahuyuri cjiri títa jinocaata nina mipure musare sã yahua. Tí buheare anjoa cūhu tuaro masi duaa tiri jire.

Cohamacu marine ñaa marieina ji dutira

¹³ Ñ jina noano wacū masitjiāhna jiyuga musa. Ñ yoana noano tuho masina jiga. Cristo to tjua tachu Cohamacu musare noano to yoahore wacūga. Ñ yoa tíre noano cohtaga. ¹⁴ Panopu Cohamacure masierasina ñaare goa pjaina jimare musa. Mipure tíre yoena tjiga. Ñ yoerana ti pohna ti pucusumare noano ti yuhtiriro seheta Cohamacure yuhtiga musa. ¹⁵ Ñ yoana to yaina cjihtire musare beseriro ñaa marieriro to jiro seheta musa cūhu ñaa marieinata jiga. Ñ jina noaa dihtare yoana jiga. ¹⁶ Ñta ni joaa tiri jire Cohamacu yare ti joari pūi: “Ñaa marieriro jija yuhu. Yu ñ jichu musa cūhu ñaa marieina jiga”, ni joaa tiri jire.

¹⁷ Tiro Cohamacu jipihtina cāinare ti yoirire ñuno cūno potori besera tinare. Ñainare, noainare besera. To ñ beseriro jichu tirore “Yu Pucu” ni duana noano yoaga. Ahri yahpai musa jiro puro cua pisaro mehne Cohamacure ño payoro mehne noano jirucuga musa jiape nino marieno. ¹⁸ Musa ñuchusuma cjiri ti

yoari cjiri ne yaba cjihti jierari jire. Musa cūhu ti yoiriro sehe yoaina musa jipachuta Cristo musare to yaina cjihti yoare. Wapamoinare ti wapamorire ti boriro seheta tiro sehe musa ñaa yoari buhirire potota bonocare. Tíre noano masina musa. Musare ñ yoaro plata mehne, uru mehne wapa wioerare tiro musare ñ yoaro. Plata, uru butia waahca. ¹⁹ Tiro sehe oveja noariro, wete marieriro yoaro seheta jiriro Cristo to di mehne to yariari mehne musa ñaa yoari buhirire cohā, musare yuhdachu yoare. To di mehne marine ñ yoaro wiho waro ñ yoaro nierare. ²⁰ Panopure ahri yahpare to bajuamehnehto pano Cristo to ñ wahahto cjihtore masi tuhsua tiri jire Cohamacu. Mipu sehene pihtiri dacho panocā to jichu, Cristore noano masichu yoare Cohamacu musare. ²¹ Cristo to yoadohoro mehne Cohamacure wacū tuara musa. Cohamacu sehe Cristore yariarirore masori jire. Ñ yoaro tirore muanopu cūno jipihtinare tirore ño payochu yoari jire Cohamacu. To ñ yoachu tirore Cohamacure wacū tuara musa. Musa ñ wacū tuachu tiro noano yoara musare. Ñ jina musare to yuhdachu yoahore noano masi, cohtara musa.

²² Noaa buhea ti niriro seheta yoaina jina, musa ñaa yoari buhirire cohārina jira musa. Ñ jiina jina potocāta mari coyeare Jesu yainare cahí masina musa. Ñ jina musa mehne macainare musa yajeripohnari mehne tuaro cahíga. ²³ Ñ yoa pari turi wahma masa bajuaina yoaro sehe jiina Cohamacu pohna wahare musa. Mari pucusuma ti pohna tirina jina baharo yarianahca. Tí yoaro sehe jierara Cohamacu pohna musa wahachu. Cohamacu to buhea mehne to catichu yoaa buhea mehne to pohna wahare musa. Tí buhea mehne Cohamacu mehne ñ jirucunahca mari. ²⁴ Ñ sehe nina Cohamacu yare ti joari pūi: “Jipihtina masa tja yoaro sehe jira.

Ä yoa noaa ti cjuaa, tja cohorì yoaro sehe jira.

Tja ñaia wahara. Cohorì cãhu buru bora, baa wahara.

Tí yoaro sehetã yariara masa cãhu.

²⁵ Mari puhtoro ya buhea sehe ne pihtisi. To niriro sehetã ä waharohca”, ni joaa tiri jire. Tí buhea musare ti yahuri cjiri noa buheata jira.

2 Ä Cohamacu pohna jina jipihtia ñaa yoaa, mahñoare, ti baharo buhusehe ñano yoa cohtaare, paina ti cjuaa cjoare, painare ñaa quitì dahreare tíre duhuga musa. ² Ä yoa wahma masa bajuaina pẽ chore ti tuaro cahmano sehetã musa cãhu noa buheare Cohamacu yare tuaro cahma namoga. Ä cahma namoga musa tirore musa wacũ tua namohto sehe, to yuhduchu yoaina musa wahalto sehe. ³ Ä yoaga musa mari puhtoro musare to noano yoaaresi masiina jina.

Cristo catichu yoariro tãca yoaro sehe jiriro jira

⁴ Cristo catichu yoariro tãca yoaro sehe jiriro jira. Wuhu dahreina cãria tãcare ti cahmaeraro sehetã masa tirore cahmaerare. Cohamacu sehe tirore to ñuchu to beseriro noa yuhduariro jira. To ä jiriro jichu tirore wacũ tuaga. ⁵ Musa cãhu wuhu macaa tãa yoaro sehe jira. Musa ä jina Cohamacu ya wuhu macaa tãare noano ti cãriro sehetã musa to yaina cãhu noano mehne jinahca musa. Ä yoana Cohamacu ya wuhu macaina noaina sacerdotea jinahca musa. Ä jina sacerdotea wahiquinare wajã jũ muoa Cohamacure ti wariro sehetã Jesucristo to yoadohoa mehne Cohamacu yare noano yoanahca musa. Musa ä yoachũ ñũ ji coarohca Cohamacu. ⁶ Ö sehe nina Cohamacu yare ti joari pũi:

“Tãca wuhũ ti cũ muhtari tãca marieno wuhure yoa dũca masierara.

Tó sehetã Cristo marieno yu yaina waha masierara masa.

Ä jiro tiro wiho jiriro jierara.

Ä jicu tirore Jerusalẽpu mipure cãi nija. Tiro yu beseriro noa yuhduariro jira.

Ä jia tirore wacũ tuaina wahche, ne buo tisi”,

ni joaa tiri jire Cohamacu yare ti joari pũi. ⁷ Tirore wacũ tuaina sehe noa yuhduaro wahaahca. Ä jiro wiho jiriro jierara tiro. Tirore wacũ tuaraina sehe soro wahaahca. Tinare ö sehe nina Cohamacu yare ti joari pũi:

“Ahrriro Cristo tãca yoaro sehetã jira.

Tãcare wuhu dahreina ti cohãno sehetã masa tirore cohãahca.

Ti ä yoapachuta mipure wuhu dahreina wuhure yoaa ti cũ muhtari tãcare ti cũno sehetã Cohamacu tirore puh-toro sõre”,

ni joaa tiri jire. ⁸ Ö cãhure nina Cohamacu yare ti joari pũi:

“Murocariro tãcare doca wahã sũro to wacũ wahcãnore ne sũerara.

Tó sehetã tãca yoaro sehe jirirore Cristore cahmaerana, tirore yuhdurucana, Cohamacu cahapu susi mari”, ni joaa tiri jire panopũ. Tina Cohamacu ya buheare yuhtierare. Cohamacu panopũ “Ä waharohca”, to niriro sehetã Cristore cahmaerare tina. Ä yoahtinare cãa tiri jire Cohamacu tinare.

Ö sehe jira Cohamacu yaina

⁹ Musa sehe Cohamacu to beserina jira. Tiro mari puhtoro to yaina sacerdotea tirore dahra cohtaina jira musa. Ä jina to ya curua macaina ñaa marieina Cohamacu yainata jira musa. Äta jira musa. Cohamacu noa yuhduare to yoarire painare yahuhtina cjihti jira musa. Musare besea tiri jire nahitianoi jiina musa jiboro sehetã ñaare yoarucu dutieraro. Ä besero noano buhriaroi jiina ti noano ñũ masino sehetã, Cohamacure noano

masiina, to yare yoarucuina ji dutira musare. ¹⁰Panopure Cohamacu yaina jierari jire musa. Mipu pinihtare to yaina jira musa. Panopure musare pja ñariro musare mariasiniri jire. Mipu sehene musare Cohamacu pja ñare.

Cohamacu yare yoaina jiga musa

¹¹Yu cahiina, ahri yahpai ji do-joachtina jierara musa. Cohamacu yaina jira musa. Musa ã jiina jichu ahrire tuaro yahuja musare: Musa ñaare goa pjaare ne yoena tjiga. Tí ñaare yoana, Cohamacure ñu tuhtiina, ñaina waha nica musa. ¹²Cohamacure cahmaeraina watoi jina noano yoaina jiga musa, musare “Yahusãari”, nina. Musa ã yoaina jichu tina mipure musare ñano yahusã duapahta, musa noano yoare masiaha tina. ã masia, tina Cohamacure “Noariro, tuariro jira”, niaha. Õ seheta niaha Cristo ahri yahpapu to tjua tachu.

¹³Mari puhtoro yuhti duana ahri yahpa macaina puhto cühure yuhduru-caina jiena tjiga musa. Ahri yahpa macarirore musa jipihtina bui puhtoro jirirore tiro cühure yuhtiga. ¹⁴Puhtoare yuhduru-cainare buhiri dahre dutiro, warocara tiro tirore yoadohinare. ã yoa noano yoainare “Noano yoare musa”, ni dutiro warocara tiro. To ã warocachu, tina cühure yuhtiga musa. ¹⁵Musa noano yoachu ñua tuho masieraina ti musuro musare quti dahre duapahta quti dahre masierara. Musa ãta yoachu cahmana Cohamacu. ã jina musa puhtoare yuhtiga.

¹⁶Cohamacu musa puhtoro jira. Painare dahra cohtaina jierara musa. ã jipanahta “Sãre dutiriro mariaha. ã jina ñaare yoanaha”, ni tuhoutuena tjiga “Ñaare yoari”, nina. Cohamacure dahra cohtaina jira musa. ã jina tirore noano yuhtiina jiga musa. ¹⁷Jipihtina masare

ño payoga. Mari coyea Jesu yainare cahiga. Cohamacure cua pisaro mehne ñuga. Ahri yahpa macaina jipihtina ti bui puhtoro jiriro cühure ño payoga.

Cristo ñano yuhdure to cño pjariro seheta cño pjaga musa cñu

¹⁸Dahra cohtaina, cua pisaro mehne musa puhtoare yuhtiina jiga. Noaina, musare noano yoaina dihtare yuhtiina jiena tjiga. Musa mehne suaina cühure yuhtiga musa. ¹⁹Musa ñano yoera-pachuta musare ti buhiri dahrechü Cohamacu to cahmano seheta tíre musa cño pjachu “Noano yoare musa”, ninohca Cohamacu musare. ²⁰Musa ñano yoari buhiri tina musare ti buhiri dahrechü tíre musa cño pjachu tí yaba cjihti jierara. Tí yaba cjihti jierapachuta noano musa yoapachu ti buhiri dahrechü tíre noano mehne musa cño pjachu Cohamacu “Noano yoare musa”, ninohca musare. ²¹ã ñano yuhduhtinare ji dutire Cohamacu musare to yainare. Cristo musa ya cjihtire ñano yuhdure tirore musa ñu cñuto sehe. ²²Tiro ne ñano yoerare. ã yoa ne mahñoerare. ²³Tirore ti tuhtichü, tiro sehe tinare tuhti cahmaerare. Tirore ti ñano yoapachuta “Cjãihtja musare”, ne nierare tiro. Ti ã yoapachuta tinare Cohamacu to buhiri dahrehtore quihõno to yoah-tore masino, “Yu Pucupu tinare buhiri dahrerohca”, ni tuhature tiro. ²⁴Tiro to basi crusapu mari ñaa buhirire yariare. ã waha yariare pari turi mari ñaare yoerahto sehe, Cohamacu cahmaa sehene mari yoah-to sehe. Tiro ñano cami tíre marine pichacapu wahaborinare yuhduchu yoaro taro. ²⁵Oveja wisia ti butiro seheta mari cñu pichacapu butihtina jimai. Mipu sehene Cristore ovejare ñu wihboriro yoaro sehe jirirore, marine ñu wihborirore wacu tuaja mari. ã wacu tuana, to yaina wahai mari.

**Wamomaca dũhteinare õ
sehe yoaro cahmana tinare**

3 Æ yoa dahra cohtainare yu du-tihiro seheta m̄sa namosãnumiare dutiit̄tja. M̄sa man̄sumare yũhdũru-caena t̄jiga tina Cohamacu ya bu-heare ti cahmahto sehe. Cãina tina to ya buheare cahmaeraina jia, tinare m̄sa yũhdũrucaerachũ ñua Cohamacu ya buheare cahmaboca tina. Tí bu-heare m̄sa yahuerapachũta to yare cahmaboca tina. ² Æta cahmaboca tina m̄sa noano yoare, m̄sa ño payoa cũhũre ñua. ³ M̄sa numia, carea numia yoaro sehe yoarena t̄jiga. Æ yoa m̄sa pjoarire wuhawe sapahtaa numia, uru darire busaa numia, wapa ti yũhdũa suhtire sãa numia jiena t̄jiga m̄sa, musare “Goa pjachũ yoari”, nina. ⁴ Æ yoa m̄sa cua pisaro mehne painare niji siaroca mehne yoaa numia jina, noano sũhũdua numia jina, ahrireta ñũ ji coachũ yoaga. Ahrirete m̄sa yoachũ wiho waro jierara, Cohamacu to ñũchũ. ⁵ Õ seheta yoaa tiri jire panopũ macaa numia Cohamacu ya numia cjiri. Tí numia Cohamacure wacũ tuaa numia jia, ti man̄sumare yũhdũrucaera tiri jire. ⁶ Tó seheta Sara cjiro to man̄no Abrahã cjirore noano mehne yũhtia tiri jire. Æ jiro tirore “Pũhtoro”, ni pisua tiri jire. Æ jina m̄sa noano yoaa numia jina, cuiro mariea numia jina, Sara cjiro pohna numia yoaro sehe jira m̄sa cũhu.

⁷ To noano yoariro seheta m̄sa cũhu m̄sa m̄sa namosãnumiare noano yoaga. Tí numia mari m̄sa yoaro sehe tua numia jierara. Æ jina ño payoa mehne noano yoaga tí numiare. Cohamacu jip-ihtia dachoripe tiro mehne mari jiltore marine to wariro seheta tí numia cũhũre warohca tiro. Ti ã jiina jichũ tí numiare noano yoaga. Cohamacure m̄sa siniare m̄sa dojomehnerahto sehe tí numiare noano yoaga.

**Noano ti yoapachũta paina tinare ti
ñano yoare yahuha Pedro**

⁸ Ahri mehne yahu batoit̄tja: M̄sa jip-ihtina cãno mehne noano mehne jiga. Æ jina m̄sa mehne macainare noano pja ñũina jiga. M̄sa coyea Jesu yainare pũ buhũseheri cahma cahiga. Æ jina noano yoaga tinare. Æ yoa “Wiho jiina jija”, ni tuhotuga. ⁹ Paina musare ñano ti yoachũ tinare ñano yoa cahmaena t̄jiga. Musare ti tuhtichũ tinare tuhti cahmaena t̄jiga. Musare ti ã yoapachũta noano yoaga tinare. Æ yoana “Noano jiga”, niga tinare. Tíre yoahina cjihtireta to yaina cũre musare Cohamacu sehe musare noano yoaro taro.

¹⁰ Æta nina Cohamacu yare ti joari pũi: “M̄sa noano wahchea mehne ji duana ne ñano ni durucuena t̄jiga.

Painare mahñoena t̄jiga.

¹¹ Ñaa yoare duhunocahga.

Noaa sehete yoaga.

Cahma m̄sa basi ñũ tuhtiro marieno jiga.

M̄sa noano jiltore tuaro cahmaga.

¹² Cohamacu cahmaare yoaina mari puhtoro ã ñũ wihborucuro nina.

Tirote ti siniare ã tuhorucuro nina.

Ñano yoaina sehete tiro ñũ tuhtira”, ni joaa tiri jire.

¹³ Noare m̄sa tuaro yoachũ paina sehe musare ñano yũhdũchũ yoa dua bihosi tina. ¹⁴ Noano m̄sa yoapachũta musare ñano yũhdũchũ ti yoachũ ñuno Cohamacu musare noano yorohca. Æ jina painare cuiena t̄jiga. Æ yoa pjĩro tuhotuena t̄jiga. ¹⁵ Cristore “Sã puhtoro jira” ni, m̄sa tuhotuna, ño payoga tirote. Æ yoana Cristore m̄sa wacũ tu-aare, Cohamacu mehne m̄sa jiltore paina ti sinituhto pano tinare m̄sa yũhtiltore noano masiyuga. Æ yũhtina niji siaro mehne, noano ño payoa mehne yahuga tinare. ¹⁶ Noaina jiga. Æ jina “Ñaa yoaja”, ni tuhotusi m̄sa. Æ jia

Cristo yare noano yoaina m̄sa jichu paina m̄sare ñaa quiti dahrea, buoro wahaahca tina. ¹⁷Ñaaare m̄sa yoari buhiri m̄sa ñano yuhd̄uch̄u noaerara. Ā yoa Cohamacu cahmachu noaare m̄sa yoapachuta m̄sa ñano yuhd̄uch̄u noa nina tí pinihta.

¹⁸Ō sehet̄a yuhd̄ure Cristo. Cū tahata jipihtina ti ñaa buhirire yariare tiro. Noariro jire. Ā jiro ñaina mari jichu mari yaro jiborirore ñano yuhd̄ure tiro. Ñano yuhd̄ure tiro marine Cohamacu yaina wahach̄u yoaro taro. To pjacu yariaa wahare. Ā yariaparota to catia mehne masari jire. ¹⁹Ā masariro jiro tiro ti buhiri dahrehtore cohtaina cjiri presu jiina cjiri yariarina cjirire buheri jire. ²⁰Tina cohtaina panopu Cohamacure yuhtieraina cjiri jia tiri jire. Tí pjapure Noé cjiro to jiri pjapure, pjiria dohoriare dohoro nia tiri jire. Tiare to dohoro watoi Cohamacure yuhtieraina cjirire ti yuhtich̄u cahmano yoari pja cohtaa tiri jimare Cohamacu. Ā yoa mahainacā ochota dia miniore yuhd̄ua tiri jire. ²¹Minia ti yuhd̄uriro sehet̄a bautisaa mehne yuhd̄ura masa. Mari pjacure mari wete tju cosaro sehe jierara bautisaa. Soro sehe jira bautisaa. “Ñaa buhiri marieina jija”, mari ni masiht̄o cjihtore Cohamacure “Muh̄ure wacū tuaja”, mari ni yahua jira ahri bautisaa. Ā yoa Jesucristo to masa mujari mehne yuhd̄uja mari. ²²Tiro Jesucristo m̄uanopu wahari jire Cohamacu poto buhusehei jiro, tiro mehne dutiro taro. Ā jiro tiro anjoa bui, m̄uano macaina puhtoa bui, dutiina bui ti puhtoro jira.

Cristo yaina jina noa sehere cohtotaina jinahca

4 Mari ñano yuhd̄una ñano yoaare duhunocaja mari. Cristo ñano yuhd̄uri jire. Ā jina tiro ñano yuhd̄uro to cuierariro sehet̄a to suaerariro sehet̄a m̄sa cūhu to yoariro sehet̄a yoaga.

²Ō sehet̄a yoaga m̄sa ñaaare m̄sa goa pjaare pari turi m̄sa yoaeraho sehe, Cohamacu cahmaa sehere m̄sa yoaruculto sehe. ³Panopu Cohamacure cahmaeraina ñaaare goa pjaare ti yoariro sehet̄a yoarucuri jimare m̄sa cūhu. Buo tiro marieno ñano yoana, ñaaare goa pjaare yoana, cahana, cahaa bose numurine yoana, “Cohamacu jira”, m̄sa nia masurine, Cohamacu to ñu yabia masurine ño payona ahri sehereta yoari jimare m̄sa. Ā jina tó purota yoa batoaga. ⁴Ā jia tí ñaputiare yoaina mehne m̄sa jisinch̄u mipure m̄sa tíre yoaerach̄u ñua tina sehe ñu cuaa wahara. Ā yoa m̄sare ñano quiti dojomehnena. ⁵Ti ā yoach̄u ñuno ti ñaa yoirire Cohamacu sehe sinitu ñuno, yahu yuhd̄u dutirohca tinare. Tiro catiinare, yariaina cūhure besehtiro buhiri dahrehtiro jira. ⁶To ā besehtiro jich̄u jipihtina masa sehe mipu yariarina cjirire noa buheare yahure Cristo ti yariahto pano. Ō sehet̄a ni yahure ti pjacurire Cohamacu to yaria dutipachuta. Ā yahure tiro Cohamacu jipihtia dachoripe to jiro sehet̄a tiro mehne ti jiruculto cjihtore.

⁷Pihtiri dacho cjihto mahanocā duhsara. Ā jina noano tuho masiina jiga, mipure Cohamacu mehne m̄sa duruculto noano. ⁸Painare cahina payu tahari ñaaare ti yoapachuta ā ñunocaja mari. Ā jina m̄sa mehne macainare ā cahirucuga. Paye dutia yuhdoro tíreta yoaga. ⁹M̄sa mehne macainare ne nureno marieno m̄sa wuhusepu sãa ta dutiga tinare. ¹⁰Cohamacu m̄sare cāinare m̄sa yoa masihtipe cūri jire. To ā cūch̄u, m̄sa yoa masiriro sehet̄a m̄sa mehne macainare tíre noano yoaga. To cūriro sehet̄a painare noano yoadohona, Cohamacu to cūriro sehet̄a noano yoana nica m̄sa. ¹¹M̄sa Cohamacu yare noano yahuina jina, Cohamacu to yuhboriro sehet̄a noano yahuga m̄sa cūhu.

Masare yoadohoina jina Cohamacu to cūri tuaa mehne painare yoadohoga. Tí jipihtiare yoana Cohamacure masa ti ño payohto sehe ã yoarucuga. Jesucristo sehe tíre masa yoachū yoadohorohca. Tirore jipihtia dachoripe ño payoa, “Tuararo jira”, nino cahmana jipihtinare. Āta nijaro.

Jesu yaina ti jiri buhiri ti ñano yuhduare yahuha Pedro

¹²Yū cahīina, mipure ñaputiaro yuhduna, “Cue, soro jiro wahaca yuhure” ni, wacū cuaena tjiga. Musa ñano yuhduchū Cohamacu masa tirore wacū tua namochū yoa duaro, “Ñano yuhdujaro”, nino nica tiro. ¹³Cristo to ñano yuhduriro seheta masa cūhu ã wahana, wahchega masa. Ā wahchena Cristo to si sitea mehne to tjua tachū masa noano wahchenahca. ¹⁴Cristo yaina masa jiri buhiri paina masare ti tuhtichū Cohamacu to yairo Espiritu Santo to si siteriro masa mehne jiro nina. Ā jina wahchega masa. ¹⁵Ā yoa masare masa wajāri buhiri, masa yacari buhiri, paina ti yoirire ñuna tinare masa soro ni dojomehneri buhiri masa ñano yuhduchū ñaa nina. ¹⁶Ā jipachuta Cristo yaina masa jiri buhiri ñano yuhduna, bno tiena tjiga. Ñano yuhdupanahta Cristo yaina masa jiare wahchena, Cohamacure “Noana” ni, ño payoga masa.

¹⁷Cohamacu to yaina ti yoirire ñuno to besehti pja jiro nina mipure. Jipihina mari to yaina mari yoirire ñuno bese muhtanohca “Ahri ñaa jira. Ahri noaa jira”, nino. ¿Ā bese muhtano dohse yorohcari to yaina jieraina sehere? Tirore yuhtieraina sehere tuaro buhiri dahrerohca. ¹⁸Ō sehe nina Cohamacu yare ti joari pū: “Noaina yuhduahca. Ti ã yuhduhto mijo curera. To ã mijo curechū Cohamacure cah-

maeraina sehe ne yuhdusi. Basioerara tinare”, nina Cohamacu yare ti joari pū. ¹⁹Ā jina Cohamacu to cahmachū masa ñano yuhduina jina, noaare masa yoirire ne duhuena tjiga. Ā yoa masare bajuamehnerirore masare ne duhuerarirore tirore wacū tuarucuga masa.

Jesu yaina ti yoahore yahuha Pedro

5 Mipure Jesu yaina cahmachuina puhtoare yahuhtja. Yuhū Jesu yaina puhtoro jija. Masa cūhu ti puhtoa tjira. Masare yū yoaro sehe puhtoa jiinare ahrire yahui tai nija yuhū. Cristo to ñano yuhdurire ñuriro cjiro jicu, manopu Cristo mehne yuhduhtiro jicu ahrire masare yahuhtja: ²Cohamacu yaina oveja yoaro sehe jira. Masa sehe ovejare ñū wihboina yoaro sehe jira. Tinare Cohamacu masare to cūrinare masa yaina masare noano ñū wihboga. Ā yoana Cohamacu to cahmariro seheta noano yajeripohna tia mehne tinare ñū wihboga. Ā tinare ñū wihbona, “Sā ñū wihbori wapa niñerure wapatanahca”, niena tjiga masa. Wahchea mehne tinare ñū wihboga. Wahchea mehne tinare ñū wihboga. ³Ā ñū wihbona tinare ñano dutipena tjiga. Ā jina noano yoaga masa Jesu yaina masare ti ñū cūhto sehe. ⁴Masa ã yoana Cristo jipihtinare marine ñū wihboriro to tjua tachū puhtoro to pisari soro noano si siteri sorore masare to waboriro seheta tiro masare noaare to wahtore cjuanahca. Tí masa cjuahiti ne pihtisi. Ā jina tiro mehne yuhduhahca masa.

⁵Tinare yū dutiriro seheta masa wahma yapia cūhu tinare masa puhtoare yuhtiina jiga. Ā yoa masa mehne macainare jipihtinare ño payoa mehne yoadohoga. Ō sehe nina Cohamacu yare ti joari pūi: “Masare yuhduruca duainare Cohamacu ñū tuhtira.

Painare ño payoina sehere ‘Wiho jina jija’, ni tãhotuina sehere noano yoara tiro”, nina to yare ti joari pũ. ⁶ ã jina Cohamacũ tuariro musare to dutichũ “Wiho jiina jija” ni, tirore ño payoga. Mũsa ã yoachũ to quihõri pja jichũ musare paina ño payoahca to dutiro mehne. ⁷ Tiro musare pjĩro tãhotu ñũ wihbora. ã jina ne pjĩro tãhotuena tjiga mũsa sehe.

⁸ ã yoa wacũ masi jinohbũ. Mũsare ñũ tuhtiro watĩno yairo suariro to macachũro seheta musare ñano yũhdũchũ yoa duara. ã yoa musare ñano yoa dutira. ⁹ Jipihtiropũ ahri yahpãpãre paina Jesu yainare ñano yũhdũchũ yoa, ñano yoa dutira watĩno. Tĩre masina, tirore yũhtiena tjiga. ã jina Cristore tuaro wacũ tuaga mũsa. ¹⁰ ã yoa mahanocã mũsa ñano yũhdũri baharo Cohamacũ musare yoadohorohca. Mũsare noaina jichũ yoarohca. Tirore mũsa wacũ tua namochũ, tirore mũsa ne duhuerachũ yoarohca musare. Tiro jip-

ihitia dachoripe mũanopũ Cristo mehne mũsa jihtore mũsare cũriro jira. Tiro Cohamacũ jira jipihtinare pja ñũriro. ¹¹ “Jipihtia dachoripe tiro tuariro jira”, ni ño payojihna tirore. ãta yoarucujihna.

Noa duti batoaha Pedro

¹² Ahri pũcãre mahari pũcãre mũsare yũ waroca duachũ Silvano sehe yũhũre joabasahre. Tiro Jesu yairo yũ coyeiro, Jesu yare ã yoarucuriro jira, yũ tãhotuchũ. Mũsare noano yahu duaja. ã jicũ “Ahri buhea potocãta Cohamacũ musare to cahĩa buhea jira”, ni yahucũ musare ahri pũre joarocaja. ã jina ahri buheare ne duhuena tjiga mũsa.

¹³ Mũsare to yaina cjihtire to beseriro seheta Jesu yaina Babilonia macaina cũhũre besea tiri jire Cohamacũ. Tina sehe musare noa dutira. Marco yũ macũ yoaro sehe jiro cũhũ musare noa dutira. ¹⁴ Mũsa mehne macainare noano mehne piti bocasiniga.

Jipihtina Jesucristo yaina noano jiga mũsa.

2 San Pedro

Jesu yainare joarocaha Pedro

1 Yũh Simo Pedro Jesucristo buhe dutiro to cūrirota jija. Tirere dahra cohtariro jija. Jesucristo, Cohamacu waro jiro, ñaa buhiri marieriro jiro marine cūno poterita yũhdũchũ yoariro jira. ã jiro tirere mũa wacũ tuachũ, to yaina wahachũ yoare musare. Mũa ã wacũ tuachũ wiho waro jierara, Cohamacu to ñũchũ. ã to yaina mũa wahachũ mari cūno poterita to yaina jija. ã jicu musare joarocaja.

² ã yoa Cohamacu cũhũre mari puhtoro Jesu cũhũre masi namona ti cahĩa mehne noano jirucunahca mũa. ã noano mũa jihito sehe musare sini payoja. ã nicũ musare noa dutija. Cohamacu musare pjĩro noano yoa namojaro.

Õ sehe jira Cristo yaina

³ Cohamacu ñaa marieriro jiro, to tuaa mehne marine to yaina jihtinare bese cũ tuhsua tiri jire. To ã bese cũchu tũhona, tirere masina to yaina wahaja mari. ã wahana Cohamacure masi namona, to tuaa mehne to cahmano seheta noaina jinahca mari. ⁴ Tĩ to tuaa mehne marine noa yũhduaro yoare. “Õ seheta musare noano yoaihtja”, to niriro seheta marine noa yũhduaro yoara. Marine to ã yoachũ ñũna Cohamacu to jiro seheta waha namonahca mari. ã jina ahri yahpa macaa ñaare, mari ñaare goa pjaare mari duhunocaja. Tĩ ñaa sehe marine dojomehne yũhduamahre.

⁵ Cristore noano wacũ tuaina ji tuhsura mũa. ã jina õ sehe yoa namoga tjoa: Noaare yoaina jiga mũa. ã jina Cohamacu cahmaare noano masiina jiga mũa. ⁶ Ñano yoa duapanahca Cohamacu cahmaa sehere yoarucuina jiga mũa. ã yoa Cristo yaina mũa jiri

buhiri ñano yũhdupanahca ã cūno pjarucuga mũa. ã jina Cohamacure ño payoina, to cahmaare yoaina jiga mũa. ⁷ ã yoa mũa mehne macainare cahma ño payoina, tinare noano yoadohoina jiga mũa. ã yoa jipihtina paina cũhũre cahĩina jiga.

⁸ Mũa õ sehe yoa namochuta noa yũhduara. Mũa ã yoa namona, noano yoaina jirucunahca. ã jina Cristo to cahmaare noano yoarucuina jinahca mũa. Wiho waro jiina jisi mũa. ã yoa Cristore mũa wacũ tuari wiho waro jisi. Yũ niriro seheta mũa yoa namochũ pinihtare noa yũhduara. ⁹ Mũa ã yoa namoerana Cohamacu yare ne masieraputiara mũa. ã yoa namoeraina jina capari ñũeraina o capari noano ñũ bocaeraina yoaro sehe jina, Cohamacu cahmaare ne masierara mũa. ã yoa namoerana Cristo mũa ñaa yoari buhirire to cohãri cjiire ne wacũ payoerara mũa. ãta bonoca duara mũa. ¹⁰ ã jina, yũ coyeya, Cohamacu to yaina cjihtire musare to ji dutichũ yũhtire mũa. ã yũhtiina jina, to yare ne wacũ duhuerana to cahmaare tuaro yoarucuga. Mũa ã yoarucuna potocãta Cohamacu mehne jinahca mũa. ã yoa potocãta to beserina jinahca mũa. ã yoana to yare duhuina jisi mũa. ¹¹ Mũa ã to cahmano sehe yoaina jina mari puhtoro marine yũhdũchũ yoariro Jesucristo to suho jiropũ noano wahanahca mũa. Tõpũ tiro mari puhtoro ã jirucurohca. Potocã to yaina waro mũa jichũ ñũno “Noano mehne yũhũ mehne jiga mũa”, ninohca Jesu musare.

¹² ã yoa ahrire musare ã wacũchũ yoarucuihtja. Ahri musare yũ yahurire masi tuhsũhre mũa. ã masina Cohamacu yare mũa tũhoriro seheta noano yoana nina mũa. ã yoaina mũa jipachuta ahri musare yũ yahurire ã wacũchũ yoarucuihtja musare. ¹³⁻¹⁴ Mahanocã duhsara yũ yariahto. Tĩre noano yahure mari puhtoro Jesucristo yũhũre.

Ã jicũ catisinicũ waro ahri yũ yahurire musare ã wacũchũ yoarucuihtja. Yũ ã yoachũ noa nina. ¹⁵Ã jicũ ahri yũ yahu joari cjirire musare joa cũ pahñoihca yũ yariari baharo musa noano masihtto sehe. ã jina ahri yũ yahurire ã wacũru-cunahca musa.

**Cristo to tuariro to
jia tiare ñũha Pedro cũhu**

¹⁶Ã yoa Cristo to tuaa cũhure to tahto cũhure musare yahuna, sã mũ sũro yahuna nieraja. Masa ti mũ sũro ti masia mehne ti yahua jierara musare sã yahua. Tuariro to jiare sã basita ñũ. ¹⁷Cristo to tua yũhduariro to jiare sãre ñore Cohamacũ mari Pũcũ. To ã ñochũ tiro sehe noano si siteriro jire. To ã si sitechũ õ sehe nino coa tare to si sitero watoi: “Ahriro yũ macũ, yũ cahĩriro jira. Tiro mehne tuaro wahcheja”, nino coa tare Cohamacũ tua yũhduariro. ¹⁸Mũanopũ to ã nino coa tachũ tuhoi sã. Tũcũ buipũ Cohamacũ to jiri tũcũi Cristo mehne jii sã.

¹⁹Tĩre ñũrina jina, Cohamacũ yare yahu muhtaina cjiri panopũ macaina ti joari cjiri potocã ti jichũ noano masija sã. Ti joari cjirire noano ñũ buherucuna noano yoana nina musa. Tĩ ti joari cjiri Cohamacũ yare marine noano masichũ yoara. Ahri yahpai ñaare ti yoari yahpai nahitianoi mari jiboro seheta buhriaro marine to noano ñũ masichũ yoaro seheta Cohamacũ noano masichũ yoara marine. ã jina Cohamacũ yare ti joarire ã buherucuga. ã buherucuna Cristo to tjua tachũpũ buhe duhunahca. ã tjua taro to yare mari masierarire marine noano masi pahñochũ yoarohca. ²⁰Jipihitia ahri yũ yahuri yũhdoro ahri sehere noano masiga musa: Cohamacũ yare yahu muhtaina cjiri panopũ ti joari cjirire mari mũ sũro tĩre buhena, “Õ sehe nino nica”, ni masieraja. ²¹Ne masa ti mũ sũro Cohamacũ yare joaera tiri jire.

Panopũ macaina cjiri Cohamacũ yare ti joachũ Espĩritu Santo sehe ti joahore tinare masichũ yoaa tiri jire.

**Cohamacũ yare potocã
buherainare yahuha Pedro**

2 Panopũ mari coyca judio masa mehne macaina “Cohamacũ yare yahu muhtaina jija”, ni mahñoina jia tiri jire. Ti yoaro seheta mipũ cũhũre musa mehne macaina ã ni mahñoina jiahca. Tina potocã ti buheboro seheta mahñoa sehere buheahca. ã buhea Cristo ya sehere dojomehneahca. ã yoa Cristo to yũhdũchũ yoaborina jipahta tirore “Sã puhtoro jira”, ni tuhotuerara. Tĩ jipihitiare ti ã yoari buhiri dõihtta Cohamacũ tinare tuaro buhiri dahrerohca. ²Ã mahño ti buhechũ tuhoia tina ti ñaare goa pjariro seheta payũ masa tinare ñũ cũ ñano yoahca. Ti ã ñano yoachũ ñũa paina masa cũhũ noaa buheare ñano quitĩ dahreahca. ³Ã jia tina mahñoina niñerure wapa cahmaa, mahñoa, ti mũ sũro ti yahua buheare buheahca musare. Ti ã buheri buhiri Cohamacũ tinare tuaro buhiri dahrerohca yũhdũro marieno. Panopũta ã yoainare buhiri dahre duti tuhsua tiri jire tiro.

⁴Tõ seheta panopũta Cohamacũ ñaina anjoa cũhũre to buhiri dahrehtore cũ tuhsua tiri jire. Tinare pichacapũ nahitianopũ peresu yoaa tiri jire. ã yoaro pihtiri dacho baharo tinare buhiri dahrerohca. ⁵Tõ seheta panopũ macainare Cohamacũre cahmaerainare tiro buhiri dahrea tiri jire. ã yoaro jipihtiro ahri yahpare miono, jipihtina masa ñainare mio wajãa tiri jire. To ã miohto pano Noe cjiro sehe tĩ pja macaina cjirire noaare yoa dutiro yahua tiri jimare. To ã yoaro watoi Cohamacũ ahri yahpare miono, Noẽne tiro mehne macaina cũhũre yũhdũchũ yoaa tiri jire. Tina jipihtina to yũhdũchũ yoarina ocho masa jia tiri jire. ⁶Tõ seheta

Sodoma wama tiri maca macaina cjiire Gomorra wama tiri maca macaina cjiire cūhure Cohamacu buhiri dahrea tiri jire. Tí macarine pichaca mehne noano jū pahñonocaa tiri jire. Ā yoaro baharopu jiltinare tirore cahmaerainare ñono nia tiri jire. Ñainare to buhiri dahrehtore ñono nia tiri jire tinare. ⁷Ā yoaro Lote wama tiriro cjiro sehene yūhdūchu yoaa tiri jire. Lote sehe noariro jia tiri jire. Ā jiriro jiro Sodoma macaina Cohamacu dutiare yūhdūrucaina ñabiaro ti yoachū ñūno pomea waha, ñano tūhotua tiri jire. ⁸Tiro noariro ñaina watoi jiro, dachoripe ñabiaro ti yoachū ñūno, ñano ti durucuchū tūhoro ñano yajeripohna tia tiri jire.

⁹Tirore to yūhdūchu yoachū ñūna ahri yū yahuhtire masija mari. Cohamacu mari puhtoro tirore cahmainare ti ñano yūhdūchu ñūno tinare yoadohorohca. Ā jiro ñaina sehene peresu yoaro tinare cjuara pihtiri dacho jichū to buhiri dahrehto sehe. ¹⁰Ñaa tuaro goa pjainare Cohamacure yūhdūrucainare tina pinihtare ñano buhiri dahrerohca tiro. Ahrina mūsa mehne macaina mahño buheina ñaa yoaa, ne cuierara. Ā yoa būo tierara tina. “Painare masi yūhdūrucaja”, ni tūhotuina jira tina. Ā jiina jia mūano macaina tuainare ne ño payoeraa, cuiro marieno ñano ni bujūpera tinare. ¹¹Anjoa sehe ne ti yoaro sehe yoerara. Tina sehe mahño buheina yūhdoro tuaina jira. Ā jipahta tina ne bujūpea mehne mūano macaina tuainare ñano yahūsāerara Cohamacure, “Painare yūhdūrucaja”, nieraina jia.

¹²Wiho mejeta ahrina mahño buheina sehe nūcu macaina wahiquina yoaro sehe tūho masieraina jira. Nūcupu boca sua ti wajāhtina yoaro sehe jira tina. Tí cahmano seheta yoara tina. Ā jia ti masierainare bujūpe, ñano ni durucu cohtara. Ā yoaina jia wahiquina yari-

ahtina ti jiro seheta tina cūhu to buhiri dahrehtina jirucuahca. ¹³Tinare ti ñano yoari buhiri buhiri dahrerohca Cohamacu. Tina ñaa goa pja yūhdūara. Ā yoaa dachopu masa ti ñurocaroi to jipachuta ñano yoarucura. Mūsa mehne bose nūmu yoaa, tí bose nūmū ñaa yo yūhdūara. Ā jia mūsa bose nūmure ti wete dahrero seheta tinare mūsa ñū cūchu tí ñaa pihara mūsa.

¹⁴Ā yoaa numiare ñūa, ñaha duara tina. Tuhsū, ñaa ã yoarucu duara. Cohamacure wacū tuaera cureinare ñaa yo dutia, tó sehe jiiinare tinare ñū cūchu yoara. Ā yoa ti sahsero paye barore, niñeru cūhure mahño ma mihniina jira. Tina Cohamacu to buhiri dahrehtina jira. ¹⁵Tina Cohamacu yare buheraa, soro jia buhea sehene buhera. Ā yoaa Balāa yoaro sehe yoaa nina. Balāa, Beor macūno jia tiri jire. Tiro sehe panopu to ñaa yoari mehne niñerure wapata duaa tiri jimare. ¹⁶To Ā yoachū ñūno Cohamacu tuhtia tiri jire tirore. To burro durucueraricoro jiparota masūno yoaro sehe to pūrore durucu tuhtia tiri jire. To Ā tuhtichū tūhoro Balāa tuaro to ñaa yo duamarire duhunocaa tiri jire. Tūho masierariro to yoa duamarire duhunocaa tiri jire.

¹⁷Ahrina mahñoina mári pohtaripu co marieno yoaro sehe jira. Co mariea mári pohtari ti yaba cjihti jieraro seheta tina mahñoina ne yaba cjihti jierara. Ā yoa me curuari mūano macaa core waboa curuarire wihnono to wāro-cachū ti curuari yaba cjihti jierara. Ā ti yaba cjihti jieraro seheta, tina mahñoina cūhu masare yoadohoera, ne yaba cjihti jierara. Ā jiro nahitiano warore yoa tuhsūa tiri jire Cohamacu tópu tinare buhiri dahrero taro. ¹⁸Tina mahñoina ti durucua yaba cjihti jierara. Masiina yoaro sehe masare ã buhemacanocahna. Ō sehe ni buhera tina: “Mari cahmano seheta mari yoachū noa nina”, ni

buhemana tina. Ti ã ni buhechu masa tuhoa ñaare goa pjaa, ti ya buheare cahmana. Paina masa Cohamacu potocãta wahma cahma ducaina mahanocãta wahara ti ñaare ti duhuri baharo, quihõno yoaeraina mehne macaina ti jiri baharo. Tinare mahõnoina ti buhechu tuhoa ñaare cahmana tjoa Cohamacu yaina jiborina jipahta. ¹⁹Tinare õ sehe ni buhera mahõnoina: “Mari cahmano se-heta mari yoachu noa nina”, ni buhemana tina. Ti ã ni buhepachuta ti niriro sehe wahaerara tinare. Ñaare duhu du-aeraa, tãre duhu masieraputiara. Ti ã duhu masierachu, tí ñaa ti puhtoro yoaro sehe jira. ²⁰Mari puhtoro Jesucristore marine yuhduchu yoarirore wahma cahma ducaina sehe ahri yahpa macaa ñaare duhunocamare. Ti ã duhuri baharo pari turi ñaare yoaa tjoa, ñabi-aro waro tjuara tina. Cristore ti masihto pano ti ji muhtariro yuhdoro ñabi-aro tjuara juna, pari turi ñaare yoaa tjoa. ²¹Ã ñabiario tjuaa, Cohamacu tinare to dutiare yuhdurucãa, noaa buhea sehere ti ne masi muhtaerachu noabiaboa tinare. ²²Ã jia pari turi ñaare yoaa, masape ti ni durucurucuriro seheta yoaa nina tina. O sehe ni durucura masa: “Diero toa tuhsu pari turi to toa cãri cjirire chura. Æ yoa yesere ti cosari baharo pari turi tiro ñari sahbai cuhsura tjoa. (Tõ seheta yoara noaa buheare cahmamarina cõhu pari turi ñaare cahmaa tjoa)”, ni durucura masa.

Cristo ahri yahpau to tjuatahtore yahuha Pedro

3 Yu cahina, musare cõ pã joaroca tuhsu. Æ jicu ahri pãre mipure musare joarocai nija tjoa. Tuhsu pã taha joarocacu ahri jipihtiare musare wacõchu yoa duai nija noaa dihtare musa tuhotuhto sehe. ²Panopu macaina noaina Cohamacu yare yahu muhtaina cjiri ti yahu joari cjirire wacõga musa.

Mari puhtoro marine yuhduchu yoariro Cristo to dutia cõhure wacõga. Tã dutiare sã to cõrina musare buhei.

³Ahrire musa masichu tuaro cahmaja. Æ jina wahmanore ahrire wacõ muhtaga: Pihitiro dacho panocã Cohamacu yare bujupeina jiahca. Tina ñaare goa pjarucuna jiahca. O sehe ni bujupeahca: ⁴“Cristo ‘Tjua taihtja’, niparota ne tjua tasi. ¿Tjua ta duaparota dohsearo ne bajuerajari tiro? Ahri yahpa to ji ducari baharo mari ñuchusuma muna ti yariari baharo jipihtiro soro sehe waharo marieno Æ jirucura. Æ jiro ahri yahpare tahtiro muanopure mariahna”, ni bujupeina jiahca. ⁵Ã ni bujupea ahri sehere ne wacõerara tina: Panopure Cohamacu to dutiro mehne ahri yahpare, muano cõhure bajuamehnea tiri jire. Æ yoa tuhsu ahri yahpai co dihta jiriro cjirore yahpa jichu yoaa tiri jire tiro. Æ yoaro co mehne ahri yahpa mipu to jiro seheta ahri yahpare yoaa tiri jire tiro. ⁶Ã yoa baharopu ahri yahpare miono, cohã pahõno tiri jire ahri yahpa macaare ahri yahpa macaina cõhure. (Æ jiro ahri yahpare cõ tahata soro wahachu yoa tuhsua tiri jire Cohamacu.) ⁷Ã soro wahachu yoaparota mipure muanore, ahri yahpa cõhure pari turi cohtotachu yoerasinire tiro. Tiro to dutiro mehne ahri yahpare muano cõhure mipure ti jiro seheta jirucu namochu yoaro nina. Æ jiro cohtarõ nina baharo jipihtiropure juno taro. Æ cohtarõ nina Cohamacu tirore cahmaerainare buhiri dahrero taro. Æ buhiri dahrero tinare pichacapu cohãnohca.

⁸Yu cahina ahrire wacõga musa: Mil cõhmarine “Yoabiari pja jira”, mari ni tuhotupachuta cõ dachota jira Cohamacu to ñuchu sehere. ⁹“Cohamacu to niriro sehe ne so yoeraputiara”, nina masa. Æ jierara. Masare noano yoa duaro cohtasinino nina. Ne cõiro masunore pichacapu cohã duaerara tiro. Æ jiro

jipihtina pano ti ñaare tuhotumarire ti duhuchũ, Cohamacũre ti cahmachũ cahmasinina tiro.

¹⁰Ñamipũre yaca bucũro to wacũenoca yacaro sãariro seheta Cristo ahri yahpapũre wacũenoca tarohca. To tachũ to tuaro bisichũta mũano macaa pihtia wahaahca. Jũ pihtia wahaahca. Ā yoa ahri yahpa, ahri yahpa macaa cũhu jũ pihtia wahaahca. Cohamacũ ahri yahpa macainare buhiri dahrero taro nina.

¹¹“Ahri jipihtia pihtia wahaahca”, Cohamacũ to nichũ tuhona ñaare duhuina, Cohamacũ cahmaare yoaina jiro cahmana marine. ¹²Mari pũthoro Cristo ahri yahpapũ to tahtore cohtaina jina, soaro mehne to tachũ yoaga mũsa. Tí dachoi mũano macaa jũ pihtia wahaahca. Jipihtia jũ sipĩa wahaahca. ¹³To Ā cuaro wahahto to jipachũta mari sehe Cohamacũ to ni cũriro seheta jipihtiare to cohtotahtire cohtaja mari. Jipihtia ti jũ pihtiaro baharo õ sehe jirohca. Mũanopũ cũhu ahri yahpapũ cũhu wahma jahca. Ā yoa tí pãpũre noaa dihtare yoahca jipihtina. Ahrireta cohtaja mari.

¹⁴Ā yoa yũ cahĩina, mari pũthoro to tahtore cohtaina jina Cohamacũ to ñurocaroi noano yoaina jiga mũsa ñaa buhiri marieina mũsa jihto sehe. Ā noano yoaina jiga mũsa Cohamacũ mũsa mehne to wahchehto sehe. ¹⁵Yoa

cureri pja to bajuerachũ ñũna ahrire masiga mũsa. Masa tirore cahmaina to yũhdũchũ yoachtina dũhsasinina mini. Ā jiro tinare cohtasinino nina Cohamacũ. Āta ni mũsare joarocari jire mari coyeiro mari cahĩiro Paulo. Cohamacũ to masia mehne tíre joarocari jire tiro. ¹⁶Ā dihta ni joarocara Paulo to joarocaa taharipe. Cristo to tahtore, ñaare yoeraina mari jihto cũhũre yahuro õ sehe dihta ni joarocari jire tiro. Cãa tahari mijo cureare tiro yahu joarocari jire. Paina ne masieraina, tuho masieraina mahũoa mehne to Ā nirire cohtota mũjana. To Ā niri jipachũta soro ni cohtota yahurina. Paye Cohamacũ yare ti joaa pũri cũhũre tó seheta yoara tina. Ti Ā yoachũ ñũno Cohamacũ tinare tuaro buhiri dahrerohca.

¹⁷Yũ coyeyã, yũ cahĩina ahri jipihtiare ti Ā wahahto pano yahuyui nija mũsare. Ā jina ahrire masina, noano yoaga mũsa. Ñaina mũsare soro ni ti buhechũ ne tuhoena tjiga tinare, “Cristore wacũ tua duhuri”, nina. ¹⁸Ā jina mari pũthoro marine yũhdũchũ yoarirore Cristore noano wacũ tua namoga mũsa. Tirore, marine to cahĩã cũhũre noano masi namoga mũsa. Mipũre, jipihtia dachoripe tirore noano wahche payojihna mari. “Noariro, tuariro jira”, nijihna mari tirore. Āta nijihna.

1 San Juan

Jesucristo catiare wariro jira

1 Jesu Cohamacu ya duserore yahuriro jira. Dóiputa wahmanoputa jiri tiro masare Cohamacu mehne ā jirucuchu yoariro jia tiri jire. Mipure sā tirore yahu joana nija. Tirore tuhona, catirirowore tirore ñui sā. Ā tjira. Tirore ñuna, sā wamomacari mehne tirore dahra ñui sā. ²Ahriro Cohamacu mehne ā jirucuchu yoariro ahri yahpapu to masa bajuari baharo tirore sā ñui. Ā jina tirore yahuja sā musare. Tiro jipihitia dachoripe to Pucuro mehne jirucuriro to jichu, mipure Cohamacu tirore ñore sare. Tíre yahuja sā musare. ³Cohamacu mehne macaina jija sā. To macuno mehne macaina cūhu jija sā. Ā jina musa cūhu sā mehne macaina, Cohamacu mehne macaina, to macuno mehne macaina musa jitho cjihtore sā ñurire, sā tuhorire musa cūhure sā yahuja. ⁴Ahrireta sā joaja noano mari wahchehti cjihtire.

Buhriaro to wete marieno seheta Cohamacure ñaa yoaa ne mariaha

⁵Ahri buhea Cohamacu macuno sare to yahuri cjiri jia nina. Miputa ahrirehunahca sā musare: Cohamacu buhriaro yoaro sehe jira. Buhriaro wete marieno to jiro seheta tirore ne ñaa yoaa mariaha. Ñaa sehe nahitiano yoaro sehe jira. Cohamacure ne ñaa yoaa mariaha. To ā jia tiare yahuja musare. ⁶Ā jina nahitianoi jiina yoaro seheta mari ñaaare yoaina jipanahta “Cohamacu mehne macaina jija” nina, mari mahñona nija. Ā yoa Cohamacu yare quihōno yoeraja. ⁷Ā yoa buhriaropu jina yoaro seheta Cohamacu to yoariro seheta mari noaa sehere yoana, paina

Jesu yaina mehne noano jina nija. Mari ā yoaina jichu Cohamacu macuno Jesu to di cohāno mehne, crusai to yariari mehne jipihitia mari ñaa yoari buhirire cohāna.

⁸“Yūhu pini ne ñaaare yoeraja”, ni wacūna, mahñoare tuhutuna nija mari. Mari ā ni tuhutuna Cristo yare potocā jiare ne masieraja. ⁹Wiho mejeta Cohamacure mari ñaa yoarire mari yahuchu tiro quihōno yoariro jiro, mari ñaaare borohca. Ā boro jipihitia mari ñaa buhirire cosawerochca tiro. To niriro se-heta yoariro jira tiro. ¹⁰“Ñaaare yoeraja” nina, “Cohamacu mahñoriro jira”, nina nija mari. Ō seheta niina to buheare cahmaerara.

Cristo marine yoadohora

2 Yu pohna, musa ñaaare yoerahto sehe ahrireh joai nija. Yu ā ni joapachuta ñaaare yoaboca musa. Musā ā yoachū ñuno Jesucristo noariro musa ya cjihtire to Pucurore ō sehe ni sini payorohca: “Ahrina ti ñaaare yoari buhirire buhiri dahrei tjiga”, ni sini payorohca to Pucurore. ²Cristo mari ñaa yoari buhirire cohāriro jira. Mari ñaa yoari buhirire mari dihtare cohāerara. Jipihitiro macainapu cūhure ti ñaa yoari buhirire cohā masina tiro.

³Cohamacu to dutiare yoana, tirore potocāta noano masija mari. ⁴Cūiro Cohamacu dutiare yoeraparota “Yūhu Cohamacure masija” nino, tiro mahñoriro jira. Ā jiro Cristo yare potocā jiare ne masierara. ⁵Pairō sehe Cohamacu dutiare yoariro Cohamacure tuaro cahīriro jira. “¿Cohamacu mehne macaina jijiari mari?” ni masi duana, ō sehe mari masinahca: ⁶“Cohamacu mehne macariro jija”, niriro Jesucristo yoaro se-heta noaare yoariro jiro cahmana tirore. To ā yoariro jichu ñuna “Cohamacu mehne macariro jija”, ni masija mari.

Wahma dutiare yahu ducaha

⁷Yü cahüina, ahri dutia mipure musare yu yahuhto wahma dutia jierara. Ahri dutia musa wahmanopure cjuariro cjiro muna dutia tjira. Tí dutiare musa tuho tuhsure. ⁸Mipü sehere musare yu yahuhto muna dutia jiparota wahma dutia cühu jira. Cristo, musa cühu tí dutiare yoara. Mipüta nahitiano to pihiti wahcächü mari nü masino seheta mari masierarire masi ducä wahcäna nija mari. Ä jiro buhriaro mehne mari nü masino seheta Cristo musare potocã jiare masichü yoaro ta tuhsure.

⁹“Yühu buhriaropü jiriyo yoaro seheta Cohamacü dutiare yoariro jija”, cüiro niparota, painare nü tuhtiriyo jiro, tiro Cohamacü dutiare yoarera. ¹⁰Ä yoa pairore cahüiro pinihta buhriaropü jiriyo yoaro seheta Cohamacü dutiare yoariro jira tiro. Ä jiro ñaare pari turi yoa duaerara. ¹¹Pairore nü tuhtiriyo sehe nahitianopü jiriyo yoaro seheta jiro nina. Tiro capari ñuerariro yoaro seheta jira. To wahahtore nü masierara tiro.

¹²Yü pohna, Cristo to yariaro mehne musa ñaa yoari buhirire cohäri jire. Ä jicü musare yahu joai nija. ¹³Musa pücsüma cühu, musa Cristore wahmanopure jiriore masina musa. Musa ä masiina jichü musa cühure yahu joai nija. Musa wahma yapia ñariro watinore yuhdürücare musa. Musa ä yuhdürücaina jichü musa cühure yahu joai nija.

¹⁴Yü pohna, Cohamacü mari Pücre musa masina. Musa ä masiina jichü musare mipure yahu joai nija. Musa pücsüma, musa Cristore wahmanopure jiriore masina musa. Musa ä masiina jichü musare yahu joai nija. Musa wahma yapia potocãta musa Cohamacüre wacü tuaina jira. Ä jina musa Cohamacü yare yoara. Ä yoana, musa ñariro watinore yuhdürücare. Ä jicü musare yahu joai nija.

¹⁵Ahri yahpare ahri yahpa macaa ñaare cahmaena tjiga. Ahri yahpa macaa ñaare cahmaina jina Cohamacü mari Pücu sehere cahmaerara musa. ¹⁶Ñaina ti basi ñaare ti goa pjari, ñaare ti nü duari mari Pücu Cohamacü ya jierara. “Noano cjuä pahñoriro, masi pahñoriro jija yühu. Ne cüiro masuno yühure yuhdürücaerara”, masa ti ni tuhotua mari Pücu Cohamacü ya jierara. Tí jipihitia ahri yahpa macaa jira. ¹⁷Ahri yahpa, ahri yahpa macaa cühu masa ti cahmari cjiri pihtia wahaahca. Cohamacü cahmaare yoariro sehe jipihitia dachoripe Cohamacü mehne jirucurohca.

Cristore nü tuhtiriyo sehere yahuha João

¹⁸Yü pohna, ahri dacho to pihtihito mahanocã duhsara. “Cristore nü tuhtiriyo tarohca” ni, Jesu yaina musare yahu tuhsure. Mipure Cristore nü tuhtina payü ji tuhsure. Ti ä jichü ñüna mipure pihtihti dacho cjihto mahanocã to duhsachü masija mari. ¹⁹Ahrina Cristore nü tuhtiina sehe mari mehne jipahta potocã mari mehne macaina jierare. Ä jia tina marine cohänocare. Tina mari mehne macaina jia, mari mehne jiboa. Marine cohänocare. Ti ä cohächü mari mehne macaina ti jierachü masija mari.

²⁰Cristo Espiritu Santore musa sehere ware. Ä jiro Espiritu Santo musa mehne jira. Ä jina musa jipihitina Cristo yare potocã jiare masi tuhsura. ²¹Musare yahucü “Cristo yare masierara musa”, ni tuhotueraja yühu. Musa Cristo yare masiina jichü nücu musare yahuja. Cristo ya ne mahñoa jierara. Tí cühure masiina musa jichü masija yühu.

²²Ahriro jira mahñoriro: “Jesu Cohamacü masare yuhdüchü yoa duti to warocariro Cristo waro jierara”, niriro sehe mahñoriro jira. Potocãta Cristore nü tuhtiriyo jira tiro. Cohamacüre, to

mac̄no cūh̄re cahmaerariro jira Cristore ñu tuhtiriro. ²³ Ō sehe tjira: Jesure cahmaerariro sehe to P̄uc̄ro cūh̄re cahmaerariro tjira. Jesure cahmariro sehe to P̄uc̄ro cūh̄re cahmariro jira.

²⁴ Wahmanop̄ure Cohamac̄ure m̄sa tuh̄ori cjirire noano wacūga. Tíre wacūna, Jesu mehne macaina jinahca m̄sa. Á yoa to P̄uc̄ro mehne macaina jinahca. ²⁵ Tíreta Jesu marine yahure. Ō sehe jira to yahuri cjiri: “M̄sa jipihtia dachoripe Cohamac̄u mehne jirucunahca”, ni cūre Jesu marine.

²⁶ Paina m̄sare mahñoa nina. Ti á mahñoare masicu m̄sare yahu joai nija. ²⁷ Á ti mahñoina m̄sa jipachuta m̄sa sehere Cristo Esp̄ritu Santore wa tuh̄sure. Esp̄ritu Santo m̄sa mehne jira. M̄sa mehne jiro m̄sare buheriro jira. Á jiro tiro jipihtiare m̄sare yahura. To yahua potocāta jira. Mahñoare yahuerara tiro. Á jina paio m̄sare buhehtirore cahmaerara m̄sa. Esp̄ritu Santo to niriro seheta yoaga m̄sa mip̄ure. Á yoana m̄sa Cristo yare tuhona, tiro mehne macaina jiga.

²⁸ Á tjira. Ȳu pohna, Cristo mehne macaina jiga m̄sa. Á jina Cristo to tahti dachore m̄sa cuis̄i. Á jina tiro to tahti dachore m̄sa b̄uo ti duhtisi. ²⁹ Cristo noare yoariro to jich̄u m̄sa masina. Tíre masina ahri cūh̄re masiga m̄sa. Jipihtina noare yoaina Cohamac̄u pohnata jira. Ahri cūh̄re masiga m̄sa.

Musata Cohamac̄u pohna jira

3 “Musa ȳu pohna jira” nino, tuacaro cah̄i yuh̄dur̄cajari Cohamac̄u marine. To á cah̄ina jinata to pohna jija mari. Ahri yahpa macaina ñaina Cohamac̄ure masierara. Á jia Cohamac̄u pohna mari jich̄u ñua tina mari cūh̄re masierara. ² Ȳu cah̄ina, mip̄ure Cohamac̄u pohna jija mari. Á jipanahta baharo mari j̄iht̄i c̄j̄iht̄ire mari noano masierasinija. Á masierapanahta ahri se-

here masija. Cristore mari ñua, dóihta mari tirore ñu masinahca. Á jina Cristo marine to bajuach̄u tiro to jiro seheta mari cohtotannahca. ³ Jipihtina ahrire masiina Cristo to tahtore cohtaina tirore ñu cūa ñaare yoa duaerara.

⁴ Ñaare yoana to dutiare yuh̄dur̄c̄ana nija. Á jia jipihtina ñaare yoaina Cohamac̄u dutiare yuh̄dur̄c̄aina jira. ⁵ Cristo masare ti ñaa buhirire coh̄ht̄iro c̄j̄iht̄o bajuari jire. Tiro ne ñaare yoaerara. Tíre masina m̄sa. ⁶ Á jia jipihtina Cristo yaina ñaare yoarucuerara. Pairo sehe ñaare á yoarucuriro Cristore wac̄i tuaeraro, ne tirore masierara. Á jiro Cristo yairo jierara. ⁷ Ȳu pohna, m̄sare mahñoinare ne tuh̄oena tjiga. Jipihtina noare yoaina Cristo yoaro sehe noaina jira. ⁸ Pairo sehe ñaare á yoarucuriro wat̄ino yairo jira. Wat̄ino pinihta dóihta ñaare yoariro jia tiri jire. Á jiro wat̄ino to ñaare yoare, to ñaare yoa dutia cūh̄re duhuch̄u yoah̄t̄iro c̄j̄iht̄o Cohamac̄u mac̄no bajuari jire.

⁹ Cohamac̄u pohna jina Cohamac̄u yoaro seheta jiina jija. Á jinata ñaare yoarucueraja. Cohamac̄u mari P̄uc̄u to jich̄u mari sehe ñaare yoarucu masieraja. ¹⁰ Ō sehe jiinare Cohamac̄u poh̄nare masinahca: Cohamac̄u pohna wat̄ino pohna yoaro sehe jierara. Ñaare yoarucuina, painare cah̄ieraina Cohamac̄u pohna jierara.

Musa mehne macainare cah̄iga

¹¹ “Mari mehne macainare cah̄ijihna”, ni buheare wahmanop̄ure tuh̄o tuh̄sure m̄sa. ¹² Mari Cāi to ñano yoariro seheta yoarena t̄j̄ijihna. Tiro wat̄ino yairo jiro, to bah̄orore waj̄aa tiri jire. ¿Dohse yoaro tirore waj̄ari, m̄sa tuh̄otuch̄u? Tíre yahuiht̄ja m̄sare: Cāi to yoari cjiri ñaa jia tiri jire. To bah̄uro sehe to noare yoariro jich̄u ñu tuhtiro to wahmino sehe tirore waj̄aa tiri jire.

¹³ Æ jina yu coyea, ahri yahpa macaina musare ti nu tuhtichu “¿Dohse jiro baro marine nu tuhtijari tina?”, ni tuhotuena tjiga. ¹⁴ Mari pichacapu waha-haborina jimai. Mipure manopu a jirucuh-tina cohtotarinapu jina nija mari. Jesu yainare cahina, Cohamacu marine to cohtotachu yoirare masija mari. Masare cahierariro pichacapu wahahtiro jira. ¹⁵ To coyeirore nu tuhtiriro masare wajariro jira, Cohamacu to nu chu. Masare wajaina ne manopu Cohamacu mehne jirucusi. Tíre noano masina musa. ¹⁶ Masare cahiare o sehe masinahca. Jipihtia dachoripe Cohamacu mehne mari jihto cjihtore Cristo yari-aro marine tuaro cahire. Æ yariaro marine to a cahirucurire masichu yoaro nire. Æ jina Cohamacu to cahmachu mari cuhure Jesu yaina yaro jiborirore yari-aro cahmaboca. ¹⁷ Payu cjuariro Jesu yairore pjacuorirore nu parota tirore pja nueraro, Cohamacure cahierara tiro. ¹⁸ Yu pohna, mari cahia sehe mari dusero dihta wijaero tji-jaro. Masare mari cahina, potocata tinare yoadohoro cahmana marine.

Cuiro marieno Cohamacu cahai ji masija mari

¹⁹ To sehetu cahina mari potocã Cohamacu yaina mari jia tia cuhure masinahca. Æ jina Cohamacu cahai ne cuiro marieno mari ji masija. ²⁰ Æ jina “Ñaa buhiri jica yuhure”, mari ni tuhotu-panahta, Cohamacu cahai cuiro marieno ji masija. Tiro sehe mari yuhdoro tuariro jiro jipihtiare masi pahnoriro jira. ²¹ Yu cahina, noaare yoana, “Noaa sehere yoana nija”, ni tuhotuna, Cohamacu cahai mari cuiro marieno ji masija. ²² Cohamacu to dutiare, to cahmaa cuhure mari yoachu, tirore mari sinino purota tiro warohca. ²³ O sehe dutira tiro marine: “Cohamacu macunore Jesucristore wacu tuaga. Æ yoa Cristo marine to

dutiriro sehetu musa mehne macainare cahiga musa”, ninota dutira marine.

²⁴ Cohamacu dutiare yoariro Cohamacu mehne macariro jiro nina. To a jiriro jichu, Cohamacu tiro mehne macariro jira. Cohamacu mari mehne macariro to jiare mari masi duachu marine to wariro Espiritu Santo tíre marine masichu yoarohca.

Mahnoare ti buhechu, Cohamacu yare ti buhechu cuhure noano nu masi dutiha

4 Yu cahina, paina “Cohamacu yairo Espiriture cjuaja”, niina ti jipachuta ti buhea mahnoa jira. Paina sehe Espiritu Santo warore cjuaina ne mahnono marieno buhera tina. Payu “Cohamacu yare yahu muhtaina jija”, nipahta mahnoina jira mipure. Jipihtiro-pu jira tina. Æ jina paina musare ti buhea sehe mahnoa buhea jichu nu masiga musa. Cohamacu ya ti jichu cuhure nu masiga musa. ² Cohamacu yairo Espiritu Santore cjuainare musa nu masi duana, o sehe masinahca: “Jesucristo ahri yahpapu mari yoaro sehe pjacu tiroro bajuari jire” ni, buheina Cohamacu yairo Espiritu Santore cjuaina jira tina. Æ jina a ni buheinare nu masinahca musa. ³ Paina sehe “Jesu ahri yahpapu mari yoaro sehe pjacu tiroro bajuerari jire” ni, buheina Cohamacu yairo Espiritu Santore cjuainera jira. Ti ya tuhotua Cristore nu tuhtiriro to tuhoturo sehetu jira. “Cristore nu tuhtiriro tarohca”, ti nirire tuho tuhsure musa. Æ yoa to ya buhea ahri yahpapure wihi tuhsure.

⁴ Musa sehe yu pohna, Cohamacu yaina jira musa. Æ jina “Cohamacu yare yahu muhtaina jija sa” ni, mahnoinare yuhduruca tuhsure musa. Musa mehne jiriro Espiritu Santo sehe tua yuhdurucara. Æ jiro ahri yahpa macaina yairo watino yuhdoro tuara. Æ jina

mahñoinare yuhdurucare m̄sa. ⁵ Ā jina ti buheare cahmaerare m̄sa. ⁵ Mahñoina sehe ahri yahpa macaina ñaina jira. Ā jia tina ahri yahpa macaa ñaare ti buhechũ ahri yahpa macaina ñaina sehe tinare noano tũhora. ⁶ Mari sehe Cohamacũ yaina jija. Ā jia Cohamacũre masiina marine noano tũhora. Paina sehe Cohamacũ yaina jieraa, marine ne tũho duaerara. Ti ā tũho duaerachũ ñũna ti ya buhea Cohamacũ ya buhea ti jierachũ masinahca mari. Paina sehe marine ti tũhochũ ti ya buhea noaa buhea ti jichũ cũhure masija mari.

Cohamacũ painare tuaro cahĩrucuro jira

⁷ Yũ cahĩina, Cohamacũ marine painare cahĩchũ yoariro jira. To ā yoariro jichũ ñũna mari mehne macainare cahĩjihna mari. Masare noano cahĩina sehe Cohamacũ pohna jira. Ā jia tina Cohamacũre noano masina. ⁸ Cohamacũ jipihtinare tuaro cahĩrucuro jira. To ā cahĩrucuro to jichũ masare cahĩeraina sehe Cohamacũre masierara. ⁹ Cohamacũ marine to cahĩare mari masi duana, ō sehe masinahca: Cohamacũ sehe to macũnore cũirota jirirore marine yuhdũchũ yoahrtiro cjihtore ahri yahpapũre warocari jire. Ā warocaro marine to cahĩare marine masichũ yoaro niri jire. ¹⁰ Cahĩa waro ō sehe jira: Cohamacũre mari cahĩri cjiri sehe potocã cahĩa waro jierara. Marine Cohamacũ to cahĩa sehe potocãta cahĩa waro jira. Ā yoa to macũnore mari ñaa buhirire cohãhtiro cjihtore warocaro marine tuaro cahĩna tiro.

¹¹ Yũ cahĩina, Cohamacũ ā tuaro marine to cahĩchũ ñũna mari cũhũ mari mehne macainare cahĩjihna. ¹² Masa sehe ne Cohamacũre ñũerare. Tirore ñũeraina mari jipachũta mari mehne

macainare mari cahĩchũ, Cohamacũ sehe mari mehne ā jirucuro nina. Ā jiro potocãta marine cahĩ namorucuchũ yoara tiro. ¹³ Cohamacũ sehe marine to yairo Espĩritu Santore ware. Ā jina Espĩritu Santore cjuana, Cohamacũ mehne mari noano jia tiare, tiro sehe mari mehne to noano jia tia cũhure masija mari. ¹⁴ Ā yoa Cohamacũ mari Pũcũ to macũnore ahri yahpa macainare yuhdũchũ yoahrtiro cjihtore to warocarire sã ñũi. Tĩre ñũna painapũre tĩre yahuja sã. ¹⁵ Cohamacũ mehne macariro ō sehe niriro jira: “Jesu Cohamacũ macũno jira”, niriro tiro pini Cohamacũ mehne macariro jiro nina. Ā yoa Cohamacũ cũhũ tiro mehne macariro jiro nina.

¹⁶ Ā yoa marine Cohamacũ to cahĩare masija mari. Cohamacũ jipihtinare tuaro cahĩrucuro jira. Ā jiro cũiro masare cahĩrucuro jiro, Cohamacũ mehne macariro jira. Ā jiro Cohamacũ cũhũ tiro mehne macariro jira. ¹⁷ Ā jina mari noano cahĩ namorucuja Cohamacũre, paina cũhure, buhiri dahreri dacho jichũ mari cuiro marieno mari jihito cjihtore. Ā jina cuiro mari ahri yahpai Cristo yoaro sehe jina. ¹⁸ Painare cahĩa mehne ne cuiro mariahna. Cohamacũ marine to cahĩare masina mari ñano wahtore ne cuieraja. Masa cuja tinare buhiri dahrehtore cuiina jira. Ā jiro cuiro sehe Cohamacũ cahĩare masierariro jira.

¹⁹ Marine Cohamacũ cahĩ muhtari jire. Ā jina mari cũhũ tirore cahĩja. ²⁰ Cũiro “Cohamacũre cahĩja”, niriro jiparota pairore ñũ tuhtiro jiro, mahñoriro jira tiro. Tiro to ñũrirore cahĩeraro, Cohamacũre cahĩ masierara tiro, tirore ñũeraro. ²¹ Ā jiro ōi jira marine Cristo to dutia: Cohamacũre cahĩriro jicũ mũ cahai jiriro cũhure cahĩga.

Cohamacu pohna ahri yahpa macaa ñaare yoa duaerara

5 Jipihtina Jesure “Cohamacu masare yuhduchu yoa duti to warocariro Cristo jira” niina, Cohamacu pohna jira. Paina pucurore cahina, to pohna cuhure cahija mari. ²Tó sehetá Cohamacure cahina, to dutiare noano yoana to pohna cuhure mari cahina nija. ³To dutiare noano yoana Cohamacure cahina nija. Cohamacu to dutiare mari yoachu marine waruorerara. Mari jipihtina Cohamacu pohna jina, ahri yahpa macaa ñaare cahmaeraja mari. Ñ jia to dutiare mari yoachu waruorerara. ⁴Cohamacure wacú tuana ne ahri yahpa macaa ñaare cahmaeraja. Ñ jina tirore mari wacú tulari baharo ñano yoa duaeraja. ⁵Ñaare cahmaerana õ sehe niina jija mari: “Jesu Cohamacu macuno jira”, niina jina ahri yahpa macaa ñaare cahmaeraina jija mari.

Cohamacu macunore yahuha João

⁶Jesucristo ahri yahpapu to tachu tirore João co mehne to bautisarire masina, crusapu to di cohãri cuhure masina, Cohamacu macuno to jiare masija mari. To bautisari dihta Cohamacu macuno to jiare marine masichu yoerara. To di cohãri cuhu marine tíre masichu yoara. Espíritu Santo “Jesucristo Cohamacu macuno jira”, ni yahura marine. Tiro potocã ni yahuriro jira. ⁷Ñ jia Jesu Cohamacu macuno to jiare tiaro marine yahura: ⁸To macuno to jiare Espíritu Santo sehe marine yahura. Ñ yoa Jesure co mehne to bautisari cuhure masina, Cohamacu macuno to jiare masija mari. Ñ jina mari ya cjihtire to yariarire to di to cohãrire masina, Cohamacu macuno to jiare masija mari. Ñ jia tí sehe cãno potori marine masichu yoara Jesu Cohamacu macuno to jiare. ⁹Masa ti yahua-

tuhona “Potocã tjira”, nija mari. Ñ niina jipanahta Cohamacu to macunore to yahuchu masa ti yahua yuhdoro tiro sehere noano tuhoro cahmana marine. Cohamacu waro to jichu to macunore to yahua tuhoro cahmana marine. ¹⁰Ñ jia jipihtina Cohamacu macunore wacú tuaina Jesure yahua buheare noano tuhora. “Potocã tjira”, ni tuhotura tina Jesure yahua buheare. Cohamacu to macunore to yahua tuhoerariro “Cohamacu mahñoriro jira”, niriro jira tiro. ¹¹Cohamacu marine jipihtia dachoripe to catia mehne ã jirucuchu yoarohca. Cohamacu macuno yaina mari jichu ñuno ã jirucuchu yoarohca marine. Ahri jira Cohamacu marine to yahua. ¹²Cohamacu macuno yaina jia to catia mehne ã jirucuahca. Paina tirore cahmaeraina sehe to catia mehne ne ã jirucusi.

Yahu to joa batoa jira

¹³Musa Cohamacu macunore wacú tuaina Cohamacu catia mehne ã jirucunahca. Tíre musa masihti cjihtire musare yahu joai nija.

¹⁴Cohamacu to cahmariro sehetá mari tirore dohse jiare mari sinichu tiro marine noano tuho nãnuhca. Ñ mari sinina “Potocãta noano tuhora tiro”, ni masija mari. ¹⁵Tirore mari sinichu, tiro marine tuhora. To ã tuhorire masina, tirore mari sinino purota to wahtiro jichu cuhure masija mari.

¹⁶Musa coyeiro to ñaare yoachu ñuna, tí ñaa Cohamacu pichacapu to waha dutia ñaa jierachu, tirore sini payobasaga Cohamacure. Ñ jiro Cohamacu tirore yoadohoro to catia mehne ã jirucuchu yoarohca tirore. Cohamacu pichacapu to waha dutieraina dihtare sini payobasaga musa. Paye ñaa sehe Cohamacu pichacapu to waha dutia ñaa waro jira. Cãiro tí ñaa warore to yoachu “Tirore sini payobasaga musa”, nieraja yuhu. ¹⁷Jipih-tia ñaa yoaa ñaa warota jira, Cohamacu

to ñuchũ. Ti ã jipachuta paye ñaa Cohamacũ pichacapũ to waha dutia ñaa jierara.

¹⁸Cohamacũ macũno Jesu sehe Cohamacũ pohñare noano ñũ wihbora. To ã ñũ wihbochũ watĩno sehe Cohamacũ pohñare ne ñano yoa masierara. ã jia Cohamacũ pohña sehe ñaare ã yoarucuerara. Ahrire mari masija.

¹⁹Mari sehe Cohamacũ yaina jija. Watĩno sehe ahri yahpa macaina puh-toro jira. Ahri cũhũre mari masija.

²⁰Cohamacũ macũno ahri yahpapurẽ taro marine noano masichũ yoare

tiro. To ã yoachũ potocãta Cohamacũ waroreta mari noano masija. Ahri cũhũre mari masija. Cohamacũ macũno Jesucristo yaina jija mari. ã jina potocãta Cohamacũ waro mehne macaina jina nija. Ahriro yũ niriro potocãta Cohamacũ waro jira. ã yoa ahriro to macũno to catia mehne ã jirucuchũ yoariro jira. ²¹Yũ pohña, “Cohamacũ jira”, ti nia masũrine ño payoena t̃jiga.

2 San Juan

Jesucristo yare, potocã cahĩa cũhure yahuha

1¹⁻² Yũhũ bucũro mũhũre Cohamacũ to besericorore mũ pohna cũhũre ahri pũre joarocaja. Jesucristo yare yũhtiina jija mari. Tiro to buhea cũhũ mari mehne jipihtia dachoripe ã jiru-cuahca. ã jicũ potocãta mũsare cahĩja yũhũ. Yũhũ dihta cahĩcũ nieraja mũsare. Paina Jesu yare masiina tina cũhũ potocãta cahĩna mũsare.³ Cohamacũ mari Pũcũ, Jesucristo to macũno cũhũ potocãta ti cahĩa mehne marine noano yoahca. ã jia pja ñũa mehne marine noano jichũ yoajaro tina.

⁴ Cohamacũ mari Pũcũ marine to dutiriro seheta cãina mũ pohna to yare yũhtiina ti jichũ masicũ wahcheja yũhũ.⁵ Yũ cahĩricoro, mipũre mũhũre yũ dutihtõ wahma dutia jierara. Wahmanopũre ahri dutia marine dõipũta ji tuhsũri jire. Õ sehe dutira marine. Mari mehne macainare cahĩjihna.⁶ To dutiare yoa pahĩõna mari tirore cahĩja. Wahmanopũre mũsa tuhoriro seheta mipũ cũhũre õ sehe dutira mũsare. Painare ã cahĩrucuina jiga.

Payũ mahñõina jira

⁷ Payũ mahñõina “Potocã Jesucristo ahri yahpũ mari yoaro sehe pjacũ

tiriro masa bajuerari jire”, niina cũhũ ahri yahpa macainare buhea wahare. Tõ sehe niina mahñõiro, Cristore ñũ tuhtiriro yoaro sehe jiina jira.⁸ Noano yoaga mũsa. Cohamacũ ya wapare mũsa noano yoari wapare boena tũga. Mũsa ã boerachũ Cohamacũ noa yũhũaro yoarõhca mũsare.

⁹ Jipihtina Cristo yare yũhũrucaina, Cristo yare quihõno buheraina Cohamacũ yaina jierara. ã yoa Cristo yare ne cohãeraina Cohamacũ mari Pũcũ, to macũno mehne macaina jira tina.¹⁰ Cristo ya buheare ne cahmaerario, paye buheare yahuriro mũsa cahai to tachũ, tirore mũsa wũhũi sãa ta dutiena tũga. Tirore piti bocaena tũga.¹¹ Paye buheare yahuriro Cristo yare cahmaerario ñano yoara. ã jiro tirore piti bocariro sehe ñano yoarirore yoadõhoro nina.

Yahu joa batoa jira

¹² Payũ mũsare yahu duapailhta tĩre joa duaeraja. Mũsare ñũi waha duaja. Mũsare ñũcũ mũsa mehne sũhũduihtja mari noano wahchehti cijhtire.

¹³ Cohamacũ to besericoro mũ baho pohna sehe mũhũre noa dutira.

3 San Juan

João Gayo wama tirirore “Noariro jira”, niha

1 Yuhu bucuro mähure Gayore potocã yu cahĩrirore ahri pũre joarocaja.

²Yu cahĩriro, Cohamacu mehne macariro mu jichu masija yuhu. Tiro mehne mu noano jiro sehetu mu noano yuhduhti cjihtire, mu pjacu dohatiro marieno mu jihti cjihtire Cohamacure sini payoja mähure.

³Mahainacã Jesu yaina yu cahai wihia mu jia tiare yahuhre yuhure. “Cristo to cahmano sehetu potocãta yoa namono nihre Gayo”, ni yahuhre tina yuhure. Ti ã ni yahuchu tuhocu tuaro wahchehi yuhu. ⁴Musa Jesu yare yu buherina cjiri to cahmano sehetu musa yoachu tuhocu tuaro wahcheja.

⁵Yu cahĩriro, Jesu yainare yoadohocu noano yoara muhu. Mu ñu masieraina ti jipachuta, tinare yoadohocu noa yuhduaro yoara muhu. ⁶Tina panopu mu ñu masieraina sehe Jesu yainare õi cahmachuinare sãre õ sehe ni yahuhre: “Gayo Jesu yainare noano cahĩna”, ni yahuhre panopu mu ñu masieraina sehe. Baharo mu ya macare ti yuhdu wahcãchu ñucu tinare noano yoadohoga Cohamacu to wahchehto sehe. ⁷Tina Jesu yare buhe tinia waha, Cohamacure cahmaeraina ti yoadohochu cahmaerara. ⁸Ã jina tinare Jesu yare buhe tiniinare yoadohojihna mari. Tinare ã yoadohona nija potocã jiare ti yahuhti cjihtire.

Diotrefe to ñaa yoirire yahuha João

⁹Tó macainare Jesu yainare mahanocã joarocamahi. Yu ã

joarocapachuta Diotrefe to basi ti puhtoro yoaro sehe ji duaro, yuhure tuho duaerayuhca. ¹⁰Musa cahai yu sũri baharo to yoirire musare yahu pahĩoihtja. Sãre ñano durucuyuhca tiro. Mahñoa payũriro jira tiro. Æ yoa paye ñaa cũhure yoayuhca tiro. Jesu yainare to yare buhe tiniinare ne tiro to wuhure sãa ta dutierayuhca. Æ yoa paina tó macaina Jesu yaina sehe buhe tiniinare ti sãa ta dutichu ñuno tiro sehe “Buhe tiniinare sãa ta dutiena tjiga musa ya wuhusepũre”, ni yahusãyuhca tinare. “Musa ya wuhusepu buhe tiniinare musa sã ta dutiri buhiri mari Jesu yaina mari cahmachuri wuhũpũre sãaena tjiga musa sehe”, niyuhca Diotrefe tó macainare Jesu yainare.

¹¹Yu cahĩriro ñainare ñu cũi tjiga. Noano yoaina sehere ñu cũga. Noaare yoaina Cohamacu yaina jira. Ñaare yoaina Cohamacure masierara.

Demetrio noaa to yoirire yahuha João

¹²Jipihtina noano durucura Demetrio sehere. Æ yoa to yoirire ñua noano to yoiriro jichu masina masa. Sã cũhu tirore ãta ni yahuja. Sã yahua sehere potocã jichu masina musa.

Yahu batoaha João

¹³Mähure payu yahu duamahi. Æ yahu duapaihta tũre joeraja. ¹⁴Mahanocã baharota mähure ñu duaja. Æ jina tũpu mari basi suhudunahca.

¹⁵Noano jiga muhu. Mari mehne macaina õ macaina Jesu yaina cũhu mähure noa dutira. Tó macaina mari mehne macaina jipihtina noajaro.

San Judas

Juda Jesu yainare joarocaha

1 Yuhũ Juda Santiago bahũro Jesucristo dabra cohtariro musare Jesu yainare ahri pũre joarocaja. Musare Cohamacũ mari Pucũ besea tiri jire. Ā jina to cahĩa mehne noano jira musa. Ā yoa musare Jesucristo ñũ wihboro nina. ²Noa dutija musare. Cohamacũ musare pja ñũno to yoadohoro mehne to cahĩa mehne noano jiga musa.

Mahñoina ti buheare yahu dũcaha Juda

(2P 2.1-17)

³Cohamacũ marine pichacapũ waha-borinare to yũdũchũ yoaa sehere tuaro joaroca duamaha musare, yũ cahĩinare. Ā joa duapailta musare mipũre mahñoa buheare cahma sãaeracũ musare joarocaja. Ā jina Jesucristo ya yahua sehere tuaro yahuga. Ahri yahua sehere tũhona, mari Cohamacũre noano wacũ tuaja. Ahri yahua sehe Jesu to cũrina to yainare ti yahuri cjiri āta jirucunocahna cohtotaro marieno. ⁴Mahainacã masa ñaina Cohamacũre cahmaeraina wacũenoca musa cahai wihire. Mũsa mehne jia tina õ sehe ni yahumana musare: “Cohamacũ yaina musa jichũ, tiro cahĩna musare. Ā jiro numia mehne musa ñano yochũ tiro musare ne buhiri dahresi”, ni yahumana tina. Ā jia mari pũhtoro cũirota jirirore Jesucristo “Cohamacũ macũno jierara”, ni yahumana tina. Õ sehe ni yahuinare Cohamacũ to buhiri dahrethore yahua tiri jire panopũre. To yare ti joari pũĩ ã ni yahua tiri jire.

⁵Mipũre musare payere wacũchũ yoa duaja. Ahrire musa masipachũta pari turi ahrire musare wacũchũ yoa duaja. Cohamacũ judio masare Egiptoĩ ji-

inare to naa wiori baharo tina mehne macainare tirore wacũ tuaerainare tiro wajãa tiri jire. ⁶Ā yoa paina cũhũre wacũga musa. Paina anjoa sehe Cohamacũ dutiare yoa duaera tiri jire. Ā jia tinare to ji duti to cũriroro tina ji du-aera tiri jire. Ā yoa ti jimarirore cohãno-caa tiri jire tina. Ti ã cohãchũ ñũno Cohamacũ nahitianopũ tinare peresu yoaa tiri jire. Ā jia tina pihtiri dacho pano co-maa dari mehne dũhterina yoaro sehe jirucuahca tina to peresu yoarina. Ā jiro pihtiri dacho jichũ tinare buhiri dahrethore Cohamacũ. ⁷Āta yoaa tiri jire paina cũhũ. Tina cũhũre wacũga musa. Tina Sodoma wama tiri maca macaina, Gomorra wama tiri maca macaina tí macari cahacãĩ jia macari macaina cũhũ numia mehne ñano yoaa tiri jire. Soro yoaa cũhũre yoaa, tina mũa sehe ti basita ti pjacũri mehne ñano yoaa tiri jire. Numia cũhũ āta yoaa tiri jire. Ti ã yoari buhiri Cohamacũ tinare jũ pahñonocaa tiri jire. Tinare jũno Cohamacũ jipihtina tirore yũdũrũcainare to buhiri dahrethore masare ñono nia tiri jire. Tinare to buhiri dahrethore pichaca ne yatisi.

⁸Tina Cohamacũ to buhiri dahrethore cjiri yoaro sehetã mipũ cũhũre āta yoarucura mahñoare buheina. Tina tũho masieraina yoaro sehetã ti pjacũri mehne ñano yoara. Ā yoa Cohamacũ dutiare ne cahmaerara tina. Ā yoa mũano macaina si siteinare tina sehe ñano durucu cohtara. ⁹Noaina anjoa sehe tuaina jipahta ã ni durucuerara. Miguel wama tirore anjoa pũhtoro sehe Moise pjacũ cjirore cahmano, watĩno mehne cahma sayoa tiri jire. Tua yũdũariro jiparota tiro “Watĩno yũdoro yũhũ pinihta tuaja”, ni tũhotuera tiri jire. Ā jiro to mũ sũro watĩnore ñano durucuera, tirore tuhtiera tiri jire. Ā jiro õ sehe nia tiri jire watĩnore. “Cohamacũpũ mũhũre tuhtijaro”, nia tiri jire Miguel watĩnore. ¹⁰To

ã yoiro jipachuta ahrina mahñoina sehe ti masierainare ñano durucu cohtara. Á yoa wahiquina tuho masieraina ti mu suro ti yoaro sehetá tina mahñoina cūhu yoara. Á yoaina jia, pichacapū wahaahca.

¹¹ Tinata ñano yuhduahca. Caī cjiro to yoiro sehetá ñano yoara tina cūhu. Á jia Balāa to yoiro sehetá tina niñerure na duaa, mahñoare buhera. Á yoa Coré to puhtorore cohā duariro cjiro yoaro sehetá tina cūhu tó sehetá yoara. Á jia tiro yoaro sehetá tina cūhu pichacapū wahaahca. ¹² Tina mahñoina sehe musa cahma cahīhti bose numurine chua, ño payoa marieno mehne tina ti cahmano pape, ti sahserota chūare bora painare waro marieno. Wete yoaro sehe tina musa bose numurine noaa dachori jiborirore dojomehne cohtara. Me curuari wihnono to wārocaa curuari, co mariea me curuari ti yaba cjihti jieraro sehetá tina mahñoina ne yaba cjihti jierara. Á yoa dicha tiri pja jichū dicha tieraa yucūri yoaro sehe jira tina. Tí yucūri pua tahapū yariaa wahara. Cū taha dicha tieraa yucū, yariaa yucūri yoaro sehe waha tuhsura. Tí yucūrire ti duhari baharo pari turi yariaa wahara tjoa. Tí yucūri yoaro sehetá jia yaba cjihti jierara tina mahñoina. ¹³ Á yoa pjiri ma macaa pahcōri bujua pahcōri yoaro sehe jira tina. Tí pahcōri ti cjāruca ōchū, wete tia sahpo wahara. Dohse jiare tina mahñoina ti yoachū pahcōri macaa sahpo wete tia sahpo ti waharo sehetá mahñoina ti ñaa yoaa jira. Á yoa si mu wahcāa poca ñahpichoha poca yoaro sehe jira tina. Tí ñahpichoha poca ti wahahti mahare duhunoca, ti ã cohtotarucuro sehetá tina cūhu quihōno buheraa, ã cohtotarucura. Ti ã yoiro buhiri nahitianopū, ñanopū ã jirucuahca tina mahñoina.

¹⁴⁻¹⁵ Enoco panopū macariro cjiro Adāo panamana seis baharo

to panami tiro o sehe nia tiri jire tinare mahñoinare: “Tuhoga yūhure. Cohamacū payū to yaina anjoa noaina mehne jipihtina ñainare ti ñaa buhiri buhiri dahrero tarohca. Á yoaro jipihtina Cohamacure ñu tuhtiinare ti ñaa yoiro buhirire tinare buhiri dahrero tarohca Cohamacū. Cohamacure ñano ti durucuri buhiri cūhure tinare buhiri dahrero tarohca”, ni yahuyua tiri jire Enoco. ¹⁶ Tina mahñoina painare tuhtiina, nurerucuina ti ñano wacūa dihtare yoara tina. Á yoa “Painare masi yuhdurucaja sā”, nirucura tina. Á jia ti cahmano sehe yoa duaa, paina ti cjuare na duaa, mahño cū durucura tuho ji coaroputa.

Jesu yainare yahu namoha Juda

¹⁷ Mari puhtoro Jesucristo buhe duti to cūrina ti buherire wacūga musa, yū cahīina. ¹⁸ Ō sehe ni buhere tina marine. “Ahri yahpa to pihtihto panocā Cohamacure, musa to yaina cūhure ñano durucu bujūpeina jiahca. Tina Cohamacure cahmaeraa, ñaare ti goa pjaare yoahca”, ni yahure Jesu to cūrina musare. ¹⁹ Jesu yainare ti basi ti cahma ñu tuhtichū yoara tina mahñoina sehe. Á yoa tina ñaina ti mu suro yoaina jia, Espiritu Santore ne cjuarara tina. Ti ñaa goa pja dihtare yoara tina.

²⁰ Musa sehe yū cahīina, Jesucristo ya buheare noano tuho namoga, noano wacū tuaina musa jilto sehe. Tí buhea sehe ñaa mariea buhea noa yuhduara. Espiritu Santo yoadohoa mehne Cohamacū mehne durucuga musa. ²¹ Cohamacū musare tuaro cahīna. Tíre masina tirore noano yuhtiina jiga musa. Á yuhtiina jiga, Jesucristo mehne musa ã jirucuhire musa cohtaro watoī. Tiro marine pja ñuno muanopū ã jirucuhū yoarohca.

²² Cristo yare “Quihōno jieraboca”, ni tuhotuinare pja ñuga. ²³ Painare yoado-

hoga pichacapũ ti wahaerahto sehe. ã jina painare pja ñuga m̃sa. Tinare yoadohona m̃sa cũhũ ti ñaa yoaare ñũ cüena tjiga. Wete tiri suhtirore m̃sa cahmaeraro seheta, paina ti ñaa yoaare cahmaena tjiga m̃sa, “Ti ñaa yoaare ñũ cü yoari”, nina.

Juda Cohamacure to ño payoa jira

²⁴ Cohamacũ mari pũhtoro marine ñũ wihbo masina ñaare mari yoerahto sehe. ã jiro tiro si siteriro marine ñaa

buhiri marieinare m̃anopũ to cahapũ cü masina. ã marine tópu to cũchũ mari wahchenahca. ²⁵Tiro Cohamacũ cüirota jira. Pairo mariahna. Pichacapũ waha-borinare marine yũhdũchũ yoariro jira. Tiro sehe panopũ, mipũre, jipihtia dachoripe cũhũre noa yũhdũariro, mari bui pũhtoro jiro, tua yũhdũariro, jip-ihtinare dutiriro jira. To ã jiro jichũ mari pũhtoro Jesucristo to yoadohoa mehne tirore ño payoa mehne wahchejhna. ãta yoajihna.

Apocalipsis

Baharopure ahri dacho to dohse wahahtore marine masichu yoaha Jesucristo

1 Ahri pui Jesucristo marine to masichu yoarire yahu joarocai nija. Cohamacu sehe tire yahu dutiro cūri jire tire, to yainare tire dagra cohtinare masichu yoa dutiro. ã jiro michapucacāta to dohse wahahtore masichu yoi jire tiro. Mahanocā dūhsa mūjano nina to ã wahahto. Jesucristo to ã cūchu tiro sehe anjore tire yūhure Joāore yahu dutiro warocari jire. ² ã jicu yūhu Joāo jipihtiare yū ñūrire yahu joarocai nija. Cohamacu ya durucare Jesucristo ya buheare yahu joarocai nija.

³ Ahri pui baharopu to dohse wahahtore yahu joai nija. Mahanocā dūhsa mūjano nina ahri jipihtia ti ã wahahto. ã jia jipihtina ahri pūre buheina, yū yahuare noano tuhoina yū yahuriro sehe yoina wahcheina jiahca.

Siete curuari macainare Jesu yaina cahmachuinare joarocaha Joāo

⁴ Yūhu, Joāo mūsare siete curuari macainare Jesu yainare Asia yahpa macainare joarocaja: Cohamacu to cahia mehne mūsare noa dutija. ã yoa to yoadohoa mehne noano jiga mūsa. Tiro panoputa ã jirucuro jia tiri jire. Mipū cūhure ã jirucura. Baharopu tarohca. To puhtoro dujiro panoi jiina siete pjacu bajueraina jira. Tina ti cahia mehne noano jiga mūsa tjoa. ⁵ Jesucristo to cahia mehne noano jiga mūsa tjoa. Cohamacu yare mahñono marieno yahuriro jira tiro. ã jiro to yariari baharo to masa mūjari baharo ne pari turi yariasi tiro. “Ō sehe masa mūjaahca yū yaina”, ni ñū quihō mūhtariro jira tiro. ã jiro jiro jipihhtina ahri yahpa macaina puhtoa ti bui

puhtoro jira tiro. Marine cahino to di cohāri mehne mari ñaare cosawere tiro. ⁶ ã cosawero marine puhtoa sōre tiro. Sacerdotea marine wahachu yoare tjoa. Cohamacu Jesu Pūcuro to yare yoahinare marine sacerdotea sōre tiro. Jipihtia dachoripe “Tuariro jira”, ni wahche payorucunahca mari jipihtina tire. Jipihhtina bui puhtoro ã jirucura tiro. ãta jirucujaro.

⁷ Noano wacū masi cohtaga mūsa. Me curuari watoī duji tarohca Cristo. To ã tachū ñuahca jipihtina. Tire cja puha wajarina cjiri cūhu tire ñuahca. To ã tachū ñua ahri yahpa macaina tire cahmaeraina jipihtia curuari macaina tuaro cahya, tiaahca. ãta yojaro.

⁸ Ō sehe nina mari puhtoro Cohamacu: “Yūhu jipihtiare bajuamehneriro jija. ã yoa jipihtiare pihtichū yoahiro jija. Tua yūhdurucariro jija yūhu. Panopu ã jirucua tii. Mipū cūhure ã jirucuja. Baharopu taihtja”, nina Cohamacu tua yūhdurucariro.

Cristore si siterirore to ñūrire yahuha Joāo

⁹ Yūhu Joāo mūsa coyero Jesu yairo jija. ã jicu mūsa yoaro sehta yūhu cūhu Jesu yare yū yoi buhiri ñano yūhdūhi. ã yoa mūsa yoaro sehta yūhure ti ã ñano yoapachūta Jesu yoadohoa mehne Jesure cohāerahi. Mari cūno potori puhtoro to suho jiro macaina cjihti jija. Yū ya dihta macaina ti cohāriro jicu Patmo wama tiri nūcopū jiji. Cohamacu yare, Jesucristo to buheri cūhure painare yū buheri buhiri tōpū ti cohāriro jiji. ¹⁰ Tōi yū jichū cū dacho domingo jichū Espiritu Santo yūhure cahānopū ñono nihre. To ã ñochū yū baharo bāhusehei tuaro durucua bisiro coa tahre. Corneta to tuaro bisiro sehta tō sehta bisiro coa tahre to durucua. ¹¹ Ō sehe nino coa tahre yū tuhochū:

—Mip̄ m̄ n̄htire joari p̄i joa ōga. M̄ ā joa ōri baharo siete curuari macainare Cohamac̄ yainare warocaga tí p̄re. Tina siete curuari Asia yahpai jia macari macaina jira. Efeso macainare, Esmirna macainare, Pérgamo macainare, Tiatira macainare, Sardis macainare, Filadelfia macainare, Laodicea macainare m̄ n̄htire joarocaga —nino coa tahre yuh̄re.

¹²To ā nich̄ tuhoc̄ majareruc̄ahi yuh̄re durucurirore n̄i tai. Ā majareruc̄ac̄a siete sih̄a pocare ti duhu payoa yuc̄re uru mehne ti yoari yuc̄re n̄hi.

¹³Tí yuc̄ watoi ducurirore mas̄no yoaro sehe bajurirore n̄hi. Tiro yoari suhtiro to dahporip̄ s̄ri suhtirore s̄ariro jihre. Ā jiro uru mehne ti yoari cahsaro mehne to p̄buh̄ bui tūā dihoriro jihre. ¹⁴Ā yoa to pjoa yaja pjoari yoaro sehe noano yehsehre. To capari pichaca poh̄na yoaro sehe sihre. ¹⁵To dahpori bronze wama tiri comaa siri comaa yoaro sehe si sitehre. Broncere pichaca mehne ti noano j̄weri baharo tíre wahtara noano si pa dutia. Ti noano wahtariro yoaro sehe to dahpori noano si sitehre. Ā yoa to durucua paȳ poayeri yoaro sehe tuaro bisiro coa tahre.

¹⁶To wamomaca poto buh̄sehei siete n̄hpichoha pocare c̄jahre. Ā yoa to d̄seroi n̄sari p̄j̄ p̄ buh̄seheri siori p̄j̄ne cuhc̄uhre. Ā yoa s̄ dacho macariro to tuaro minoano seheta to w̄hd̄a tuaro si sitehre.

¹⁷Ā jicu tirore n̄cu to dahpori cahai doca caha s̄hi yariariro yoaro sehe. Ȳ ā doca caha such̄ n̄no tiro to wamomaca poto buh̄sehe mehne yuh̄re duhu payo ō sehe nihre:

—Cuii tjiga. Yuh̄ jipihtiare bajuamehneriro jija. Ā yoa jipihtiare pihtich̄ yoah̄tiro jija. ¹⁸Catiriro jija yuh̄. Yariariro jimai. Mip̄re n̄ga. Jipihtia dachoripe ā catirucuriro jija yuh̄. Ā yoa yariaina ti jiroi puhtoro

jija. Yariaina ti jiro macari sopaca sawire ȳ c̄jaboriro seheta tópū j̄inare na wio, pari turi catich̄ yoa masija yuh̄. ¹⁹Ā jicu mip̄ wahahtore n̄cu, joa ōga. Baharop̄ to dohse wahahto c̄h̄re n̄cu joa ōga muh̄. ²⁰Ahri siete n̄hpichoha pocare ȳ poto buh̄sehei ȳ c̄jaa pocare yahuihtja muh̄re. Siete sih̄a pocare ti duhu payoa yuc̄ uru yuc̄ c̄h̄re yahuihtja. Ō sehe jia yahuare panop̄ masare ne yahuera tii. Ō sehe jira tí: Siete n̄hpichoha poca siete curuari macaina ȳ yaina cahmachuina puhtoa jia nina mari piti dahre buhech̄. Ā jia siete sih̄a pocare ti duhu payoa yuc̄ siete curuari macaina ȳ yaina jia nina mari piti dahre buhech̄ —nihre yuh̄re.

Efeso macainare Jesu yainare joa d̄ca dutiha Jōore

2 Ā ni tuhs̄ ō sehe ni namohre yuh̄re joa dutiriro:

—Efeso macaina ȳ yaina, ti puhtoro c̄h̄re ō sehe ni joarocaga muh̄: “Ȳ wamomaca poto buh̄sehei siete n̄hpichoha pocare c̄jariro jija. Ā jicu site sih̄a dapoa yuc̄ uru mehne ti yoaa yuc̄ watoi tiniriro jija. Ā tiniriro jicu musare ō sehe ni yahuja: ²Jipihtia musa yoirire masi pah̄noja. Ȳ ya c̄jhtire tuaro musa dahrarire, yuh̄re musa wac̄ tua duhuerari c̄h̄re noano masija. N̄aare yoainare musa n̄ yabich̄ c̄h̄re masija. Ā yoa ‘Jesu buhe dutiro to c̄rina jija’, n̄marinare quih̄no ti buherach̄, quih̄no ti yoaerach̄ n̄na, mah̄noina ti jich̄ masire musa. ³Ȳ yare musa yoari buhiri musa n̄ano yuh̄d̄panahta yuh̄re ne duhuerare musa. ⁴Ā noano yoaina jipanahta c̄nore tó yoarerare musa. Ahri jira tí: Yuh̄re musa noano cah̄ muhtariro seheta mip̄re yoerara musa. ⁵Yuh̄re musa cah̄ muhtarire wac̄ga musa tjoa. Mip̄re yuh̄re musa cah̄era curerire wac̄ga. Ā yoa Co-

hamacu yare tuaro cahmaga tjoa. Ā cahmana, yu yare musa yoa muhtariro seheta yoaga tjoa. Musa ā yoerachū sihāriare yu duhu payodu musa ya dāre yu dapodure musare nanocaihtja. (Ā nicu ō sehe ni yahui nija musare. Musa tó macaina yuhure cohāboca. Ā cohāna tó purota pihtinahca musa űaa yoare duhuerana.)⁶ Yuhure cahiera cureina jipanahta ahrire noano yoare musa: Nicolaita wama tiina ti űaa yoarire űu yabira musa. Yuhu cūhu ti yoarire űu yabija.⁷ Cahmori tiina jira musa. Ā jina musa ya curuari macainare yu yainare Espiritu Santo to yahurire tuhoga musa. Ō sehe nina tiro: ‘Jipihtinare Jesure wacū tua duhuerainare Cohamacu masare to cūno paraíso wama tiro macadu dichare chu dutiitja. Tu dicha caticu yoaa jira’, nina Espiritu Santo”, ni yahu joarocaga Efeso macaina yu yainare, ti puhtoro cūhure.

Esmirna macainare Jesu yainare joaroca dutiha Joāore

⁸Esmirna macaina yu yainare, ti puhtoro cūhure ō sehe ni joarocaga muhu: “Yuhu jipihtiare bajuamehneriro jija. Ā yoa jipihtiare pihtichu yoahitiro jija. Yariaa wahai. Pari turi catija tjoa. Ā jicu ō sehe ni yahuja musare: ⁹Musa űano yuhdure masija. Pjacuoina musa jichu cūhure masija. Ā jipanahta Cohamacu yare noare pjiro cjuara musa. Paina sehe ‘Judio masa jija’, nimarina mahūoina jira. Tina musare ti űano quiti dahrerire masija. Tina Satana yaina jira. ¹⁰Mipure musa űano yuhduhtire cuiena tjiga. Tuhoga musa. Watino musare Cohamacure duhu dutiro cāina musa mehne macainare peresu yoa dutirohca. Diez dachori waro űano yuhduhca musa. Ti ā űano yoachū musare ti ā wajāmoņopachuta yuhure yu ya cūhure cohāena tjiga. Musa ā yuhure cohāerachu űucu jipihtia dachoripe Cohamacu

cahapu musare ā jirucuchū yoaihtja. ¹¹Cahmori tiina jira musa. Ā jina musa ya curuari macainare yu yainare Espiritu Santo to yahurire tuhoga musa. Ō sehe nina tiro: ‘Jipihtina Jesure wacū tua duhueraina pichacapu wahasi. Ti yariari baharo pichacapu wahasi’, nina Espiritu Santo”, ni joarocaga Esmirna macaina yu yainare, ti puhtoro cūhure.

Pérgamo macainare Jesu yainare joaroca dutiha Joāore

¹²Pérgamo macaina yu yainare, ti puhtoro cūhure ō sehe ni joarocaga muhu: “Yuhu űosari pjī pu buhuseheri siori pjīne cjuariro jija. Musare ō sehe ni yahuihtja: ¹³Musa yoarire, musa ya maca macaina ti yoari cūhure masija. Tó macaina puhtoro Satana jira. Tó macaina Satanare űo payoina Antipare yu yare noano yahuriro cjirore wajāre. Tirore ti ā wajāchu űupanahta yu yare yoarucuna yuhure ne wacū tua duhuerare musa. ¹⁴Musa ā wacū tua duhuerapanahta mahanocā yuhure yuhdurucare musa. Cāina musa mehne macaina Balāa ya buheare cahmana. Panopu Balāa puhtoro Balac wama tirirore ō sehe ni buhea tire: ‘Israe masare yuhduruca duacu ‘Cohamacu jira’, musa nia masurine űo payo musa duhu payoa chūare chu dutiga tinare. Ā yoa numia mehne űano yoachū yoaga tinare’, ni buhea tire Balāa cjiro. Cāina musa mehne macaina to buheare cahmana. ¹⁵Ā yoa paina musa mehne macaina Nicolaita wama tiina ya buhea sehene duhu duaerara. ¹⁶Ā jina musa űaa tuhutumari cjirore tuhutu cohtota, Cohamacu yare tuaro cahmaga tjoa. Musa ā cahmaerachu űucu soaro mehne musa cahapu wahacu, ā űano yoaina mehne cahmacheihca yu duseropu jiri pjī űosari pjī mehne. ¹⁷Cahmori tiina jira musa. Ā jina musa ya curuari macainare yu yainare Espiritu Santo to yahurire tuhoga musa. Ō sehe

nina tiro: ‘Jipihtinare Jesure wacū tua duhuerainare maná wama tiri chũare to nũori chũare waihtja. Yehsea tãa cũhũre waihtja tinare. Tí tãare wahma wamare yũ joa ōa tãa jiahca. Paina tí wamare ne masisi. Tí tãare naina dihta tí wamare masiahca’, nina Espíritu Santo”, ni joarocaga Pérgamo macaina yũ yainare, ti puhtoro cũhũre.

Tiatira macainare Jesu yainare joaroca dutiha Joãore

¹⁸ Tiatira macaina yũ yainare, ti puhtoro cũhũre ō sehe ni joarocaga muhu: “Yũhu Cohamacu macũno yũ capari picha pohna yoaro sehe sira. Ā jia yũ dahpori bronce wama tiri comaa ti wahtari comaa yoaro sehe si sitera. Musare ō sehe ni yahuja: ¹⁹ Mũsa yoarire masija yũhu. Cohamacũre paina cũhũre mũsa cahĩrĩre, yũhũre mũsa cohãer-arire, painare mũsa yoadohorire, ñano yũhdũpanahta yũhũre mũsa duhuerarire masija. Wahmanopũ mũsa yoariro yũhdoro mipũ sehere noano yoa namona nina mũsa. Tí cũhũre masija yũhu. ²⁰ Mũsa ā noano yoaina jipanahta ō sehe yũhũre yũhdurũcahũre mũsa: Jezabe wama tiricoro ‘Cohamacu yare yahu muhtaricoro jija’, ni mahñoricooro musare to ñano buhechũ tuhona ticorore tuhtierare mũsa. Mahño buhero yũ yainare yũhũre dahra cohtainare numia mehne ñano yoachũ yoara. Ā jiro ‘Cohamacu jira’, ti nia masurine paina ño payo ti duhu payoa chũare chu dutira ticoro yũ yainare. ²¹ To ñaare to cahyah-tore cohtasinimai. Yũ ā cohtapachũta mũsa mehne to ñano yoare duhu du-aerare. ²² Yũhũre tuhoga mũsa. Ticorore dohatichũ yoaihtja. Ticoro mehne ñano yoaina cũhũre dohatichũ yoaihtja. Ā jia tina pjĩro ñano yũhduahca. Āta yoaihca tinare ticoro mehne ti ñano yoare ti cahyaerachũ, tíre ti duhuerachũ. ²³ Ā yoa ticoro ya buheare cah-

mainare wajãihtja. Yũ ā yoachũ ñua jipihtina yũ yaina yũ noano masiriro jichũ masiahca. Masa ti tuhotuare ti goa pjaa cũhũre masija. Yũ ā masiriro jichũ masiahca tina ticorore yũ buhiri dahrechũ ñua. Jipihtina mũsa ñaare yoari buhirire buhiri dahrehtja musare. Ā yoa mũsa noare yoari wapa sehere noano yoaihtja musare. ²⁴ Paina mũsa mehne macaina Tiatira macaina ticoro ya buheare cahmaerare. Mũsa sehe Satana ya buheare ‘Pano to yahuerari cjiri’, ti nia buheare cahmaerare mũsa. Ā jicu mũsa sehere duti namosi yũhu. ²⁵ Ahri dihtare yoa duti namoihtja musare: Mũsa cahapũ yũ tahto pano yũ buheare mũsa masirire ne mahanoã duhuena tjiga. ²⁶⁻²⁷ Jipihtina ñaare duhuinare yũ yare ā yoarucuinare puhtoa sõihtja. Yũ Pũcu yũhũre to puhto sõriro seheta mũsa cũhũre puhtoa sõihtja. Jipih-tia yahpari macaina bui puhtoa sõihtja musare. Ā puhtoa sãana, mũsa docai jĩnare jipih-tia yahpari macainare tuaro dutinahca mũsa. Dihi biatore mari yucũcũ mehne pohachũ dói to wahtiaro seheta Cohamacũre yũhdurũcainare āta yoanahca mũsa. ²⁸ Ā jicu musare yũ yare ne duhuerainare bohrea muja tachũ muja tariare waihtja musare. ²⁹ Cahmori tina jira mũsa. Ā jina mũsa ya curu-ari macainare yũ yainare Espíritu Santo to yahurire tuhoga mũsa”, ni joarocaga Tiatira macaina yũ yainare, ti puhtoro cũhũre.

Sardis macainare Jesu yainare joaroca dutiha Joãore

3 Sardis macaina yũ yainare, ti puhtoro cũhũre ō sehe ni joarocaga muhu: “Yũhu siete pjacu bajuerainare Cohamacu yainare dutiriro jija. Ā yoa siete ñahpichoha pocare cjuariro jija. Musare ō sehe ni yahuja: Mũsa yoarire masija. Ō sehe ni tuhutumana paina musare: ‘Tina Cohamacu yare noano

yoa pahñoina jira', ni tūhotumana musare paina. Ti ā ni tūhotupachūta Cohamacū yare noano yoerara mūsa. ²Ā jina noano yoaga mūsa 'Ŋaare yoari', nina. Cohamacū yare mūsa masirire noano wacūga, 'To yare duhuri', nina. Cohamacū to ŋūchū noano yoa pahñoerasinire mūsa. ³Ā jina yū yare mūsa tuho muhtarire noano wacūga mūsa. Ā wacūna yū yare yoaga tjoa. Cohamacū yare pari turi cahmaga tjoa. Yū nino sehe mūsa yoerachū wacūenoca musare buhiri dahrehtja. Yacariro wacūenoca to yacaro sāariro sehetā musare wacūenoca buhiri dahrehtja. ⁴Cāina mūsa mehne macaina Sardis macaina ŋaare yoarucuina jierara. Wete marieni suhtirore mūsa sāaboriro sehetā tī suhtirore mūsa wete piho duaeraro sehetā ti ŋaa yoare piha duaerare mūsa. Ā noaina jina, yehseri suhtiro sāaina yūhū mehne tininahca mūsa sehe. Ā yoachtina cjihti jira mūsa. ⁵Jipihtina yū yare duhueraina āta yehsea suhti sāaina jahca. Ā yoa yūhū mehne ā jirucuhtina ti wamare to joa ōri pūi tina cūhū ti wamare joa ōina jahca. Ti wamare to joa ōrire pahā cohāsi yūhū. Yū Pūcū to ŋūrocaroi, anjoa cūhū ti ŋūrocaroi yū yaina mūsa jirire yahuihtja tinare. ⁶Cahmori tiina jira mūsa. Ā jina mūsa ya curuari macainare yū yainare Espiritu Santo to yahurire tūhoga mūsa", ni joarocaga Sardis macaina yū yainare, ti puhtoro cūhūre.

**Filadelfia macainare Jesu
yainare joaroca dutiha Joāore**

⁷'Filadelfia macaina yū yaina, ti puhtoro cūhūre ō sehe ni joarocaga mūhū: "Yūhū ŋaa marieriro jija. Yū nino sehetā yoariro jija. Davi cjiro panopū macariro puhtoro dutiriro waro sawire cjuariro jiro masare to dutiriro sehetā

tuaa mehne dutihtja yūhū cūhū. Tī tuaa mehne yū yoa dutichū ne paina tīre ducata masierara. Yū yoa dutierachū ne paina tīre yoa masierara. ⁸Jipihitiare mūsa yoare masija yūhū. Wacū tuaera cureina jipanahta yū buheare noano tuho, tīre ne duhuerare mūsa. Ā jicū yū yare cūi musare tīre buhe duticū. Ā jia paina 'Tīre buhena tjiga', ni ducata masierara musare. ⁹Ā jicū ō sehe yoaihtja: Paina mūsa cahai jina Satana yaina jira. 'Judio masa jija', nipahta judio masa waro jierara. Tinare mūsa panoi na tuhcuā caha sū musare ŋo payochū yoaihtja tinare. Yū ā yoachū ŋūa musare yū cahīare masiahca tina. ¹⁰Musare yū yare yū duhu dutierachū tūhona noano yūhtire mūsa. Mūsa ā yoachū ŋūcū ahri yahpa macaina jipihtina ti ŋano yūhūhtī pja jichū musare ducataihtja mūsa ŋano yūhūdūrahto sehe. Tī pja jipihtina ti ŋano yūhūhtī pja jirohca. ¹¹Mahanocā dūhsara ahri yahpapū yū tjua tahto. Yū yare mūsa masirire boena tjiga. Ā yoa yūhūre ā yūhtirucuga, mūsa noano yoari wapare 'Butiri', nina. ¹²Ā jicū yū yare ā yoarucuinare yū Pūcū ya wūhū macaina cjihtire cūihtja tinare. To ya wūhū macāa botari ti yoari pja ti jirucuro sehetā Cohamacū mehne jirucuchū yoaihtja tinare. Ā jia Cohamacū mehne macaina ā jirucuahca. Ā jicū Cohamacū wūhū macāa botaripū yū joa ōno sehetā tinare ti pjacūripū ō sehe ni joa ōihtja: Cohamacū yū Pūcū wamare, to ya macā wama cūhūre joa ōihtja. To ya macā wahma macā Jerusalē jirohca. Tī macā mūanopū Cohamacū cahapū tari macā jirohca. Yūhū wahma wama cjuaihca. Tī wama cūhūre joa ōihtja ti pjacūripū. ¹³Cahmori tiina jira mūsa. Ā jina mūsa ya curuari macainare yū yainare Espiritu Santo to yahurire tūhoga mūsa", ni joarocaga Filadelfia macaina yū yainare, ti puhtoro cūhūre.

Laodicea macainare Jesu yainare joaroca dutiha Joãore

¹⁴Laodicea macaina yu yainare, ti puhtoro cùhure ò sehe ni joarocaga muhu: “Yuhu Cohamacu jipihtia to yoirire, to yoahti cùhure yoa sohtori tiriro jija. Yuhu potocã yoiriro jija. Æ jicu mahõono marieno yu ñurire ã yahuruciriro jija. Jipihtiare yu Pucu to yoirire yoabasariro jija yuhu. ¹⁵Jipihtia musa dohse yoirire masija yuhu. Yuhure wacũ tuaina jipanahta mahanocã wacũ tuaina jira musa. Õ sehe jira tí: Co yusuera co sũ mehne pjiroca si putia co yoaro sehe jira musa. Tó sehe jia core mari ji coareraro seheta yuhure wacũ tuaera cureina musa jichu yuhu cùhu musare ji coeraja. Yuhure musa noano wacũ tuachu noaboa yuhure. Yuhure musa wacũ tuaerachu ña niboa yuhure. Yuhure musa wacũ tuaerari yuhdoro mahanocã wacũ tuaina musa jichu ña yuhduara. ¹⁶Musa ã jichu ñucu ñu yabi yuhduaja yuhu. Ñaa core yu cho cohãno seheta yuhure mahanocã wacũ tuainare ñu yabi yuhduaja yuhu. ¹⁷Æ jina ò sehe ni tuhutumana musa: ‘Jipihtiare cjuaja. Ne yaba duhsaerara marine’, ni tuhutumana musa. Æ nipanahta pjacuoina yoaro sehe jira musa. Æ jina capari ñneraina ti ñu duaare ti masieraro seheta Cohamacu yare ne masierara musa. Æ jina suhti marieina ti buo tiro seheta Cohamacu to ñurocaroi musa ñaa yoirire buo tihtina jira musa. ¹⁸Musa ã jiina jichu ñucu ò sehe ni yahuihtja musare: Uru warore musa nuchaboro seheta noaare yu cjuare naga musa. Musare yuhure wacũ tuachu yoihtja. Æ jina potocãta Cohamacu ya mehne pjíro cjuanahca. Æ yoa yehseri suhtirore musa nuchu musa sãano seheta yu di cohãri mehne yu yariaro mehne musa ñaa yoaare cosawerina jiga. Æ yoana noa suhti sãaina ti buo tieraro se-

heta musa ñaare cosawerina jina buo tisi musa cùhu. Æ yoa musa caparire musa co tiri baharo noano musare bajuro seheta Cohamacu yare noano tuhoga, musa noano masihto sehe. ¹⁹Jipihtina yu cahĩinare yahuja. Æ jicu yu cahĩina ti jichu ñucu, ti tuhoerachu tinare quihõno yoa dutija, tinare yoadohocu tacu. Æ jina yu ya sehere tuaro cahmaga. Æ yoa musa ñaare tuhutumari cjiire cohtota, tí ñaare duhuga. ²⁰Tuhoga yuhure. Musa wuhure bihari wuhure yu suruca yu sãa dua yu pisurucuboro seheta, musa mehne macariro ji duai nija. Yu ã ji duachu tuhoina jina yuhure musa mehne ji dutiga. Yu yaina jiga. Musa ã ji dutichu musa mehne jiihtja. Æ jicu mari suho churo seheta musa mehne noano jiihtja. Æ jina yuhu mehne macaina jinahca musa. ²¹Watĩnore yu yuhdurucari baharo yu Pucu puhtoro to dujiro cahai dujija, yuhu cùhu duticu tacu. Tó seheta musa cùhu ñaa yoirire musa yuhdurucari baharo yu puhtoro dujiro cahai dujinahca, musa cùhu dutina tana. Musare yu cahai dujichu yoihtja. ²²Cahmori tiina jira musa. Æ jina musa ya curuari macainare yu yainare Espĩritu Santo to yahurire tuhoga musa”, ni joarocaga Laodicea macaina yu yainare, ti puhtoro cùhure —nihre yuhure joa dutiriro.

Muanopu Cohamacure na tuhcu caha su ti ño payoare ñuha João

4 Yuhure to ã ni yahuri baharo muanopu pjõari sopacare ñuhi. Pari turi corneta to tuaro bisiro seheta tuaro durucua bisiro coa tahre yu tuhochu. Õ sehe nihre yu tuhochu:

—Õpu muja taga. Ahri yu yahuhti cjihti baharopure wahahtore muhure ñoihtja. Yu niriro seheta ã waharohca —nino coa tahre muanopu.

²To ã ni yahuchuta tõpu muja sucu Espĩritu Santo tuua mehne ñui nihi. Æ jicu puhtoro dujirore muanopu ñuhi. Tói

cãiro dujihre. ³Noano si siteriro dujihre. Diamante wama tia tãa yoaro seheta, rubí wama tia tãa yoaro seheta noano si siteriro dujihre tiro. Æ jiro buhini soro esmeralda yoaro sehe si siteri soro dacho macai dujihre tiro. ⁴Æ yoa to dujiro cahai veinticuatro dujiare ñuhi. Tí dujia puhtoia dujia yu ñu muhtarirore duji soroahre. Tí dujiapu veinticuatro Jesu yaina puhtoia dujihre. Yehsea suhti tina jihre. Æ yoa puhtoia ti pisaa sorori uru sororire pisaina jihre tina. ⁵Yu ñu muhtariro dujiro oocasitehre. Æ yoa soro sehe jiro choro bisiro coa tahre. Wupo cũhu bisiro coa tahre. Tí dujiro panoi siete sihãa poca jihre. Siete sihãa poca mehne to piti dahre buhechu Cohamacu yaina siete pjacu bajueraina jihre. ⁶Æ yoa to dujiro panoi pjiri ma yoaro sehe vidro yoaro sehe sipari ma jihre. Noano co sitiri ma yoaro sehe jihre.

Ti dujiro cahai pititiaro soro sehe bajuina jihre. Ti pjacuri panoi ti baharo buhusehe cũhure payu capari tiina jihre tina. ⁷Yu ñu muhtariro soro bajuriro yairo sohãriro yoaro sehe bajuhre. To baharo jiriro wachu yoaro sehe bajuhre. Ti baharo jiriro masuno wuhdua sehe wuhdua tiro jihre. Tina tiaro baharo jiriro cja to cjãmuadupurire saño dujiriro yoaro sehe bajuhre. ⁸Tina seis dupuri wua dupuri tiina jihre. Æ jia ti wua dupuri pu buhuseheriputa payu capari tia dupuri jihre. Æ yoa dachoripe, ñaminipe Æ durucua nihre. Ne durucu duhuerare. Õ sehe ni durucuhre:

“Noariro, noariro, noariro Cohamacu mari puhtoro tua yuhduariro jira.

Tiro panoputa Æ jirucua tiri jire.

Mipu cũhure Æ jirucura.

Baharopu tarohca”,

ni durucurucua nihre.

⁹Æ ni durucua tina pititiaro soro bajuina to tuaare durucua nihre puhtoro dujiro dujirirore. Æ durucua, tirore

jipihtia dachoripe jirucurirore wahche payoa “Noana”, nia nihre. ¹⁰Ti Æ yoa payochu ñua veinticuatro Jesu yaina puhtoia sehe puhtoro dujiro dujiriro panoi na tuhcuca caha su, tirore ño payohre. Tiro jipihtia dachoripe jirucuriro jira. Æ ño payoa ti puhtoia pisaa sororire to dujiro panoi doca payohre. Æ doca payoa Õ sehe nihre tina:

¹¹“Mũhu Cohamacu sã puhtoro waro jira.

Tuariro, noariro jira mũhu.

Mũhu sã ño payoriro jii nina.

Mũhure Æ ño payorucuro cahmana sãre.

Jipihtiare bajuamehneriro jira mũhu.

Mu cahmariro seheta tí jipihtiare bajuamehnea tiri jire mũhu”,

nihre tina Cohamacure, tói dujirirore.

Joari pũre turẽri tiare cordero cũhure yahuha João

5 Baharo tói dujiriro to wamomaca pote buhusehei to cjuari pũre joari pũre ñuhi. Tí pũ pu buhuseheri to joari pũ to turẽri tia jihre. Æ yoa siete wihtã ñahaa mehne to wihtã ñahari tia jihre. ²Tí tiare turẽri tiare ñu tuhsu, tuariro anjore ñuhi. Tiro tuaro durucua mehne Õ sehe ni yahuhre:

—¿Ahri tiare wihtã ñahaare pahrẽboriro ñaa buhiri marieriro diro sehe jijiari, mũsa tuhutuchu? —nihre tiro anjo.

³Æ niparota tí tiare pahrẽtirore bocaerare. Muanopu, ahri yahpapu, catina watoi, yaria tuhsuina watoi ne tí tiare ñahaare pahrẽtiro mariahe. Æ jiro tí tiare buhehtiro mariahe. ⁴Æ jicu pahrẽtirore, tí pũre ñuhtirore ti bocaerachu ñucu tuaro tihi yuhu. ⁵Yu Æ tiichu ñuno cãiro Jesu yaina puhtoia mehne macariro Õ sehe nihre yuhure:

—Tiiecu tjiga. Tí tiare ñahaare cãiro pahrẽ masina. Tiro Juda ya curua macariro tuariro jira. Tuariro jiro “Yairo sohãriro”, ti ni pisuriro jira. Tiro puhtoro Davi panamino ji turiariro jira. Watĩnore

yuhdũrũcariro jira tiro. ã jiro tiro tí tiare siete ñahaare pahrẽ masiriro jira —nihre tiro yuhũre.

⁶To ã nichũ tuhocũ puhtoro dujiro panoi cordero to ducuchũ ñũhi. Cuatro soro bajuina, Jesu yaina puhtoa tina watoi ducuhre tiro cordero. Tiro ti wajãriro cjiro sehe bajuhre. Siete sahari tiro, siete capari tiro jihre. Tí siete sahari ã yoa siete capari mehne to piti dahre buhechũ Cohamacũ yaina pjacũ bajueraina siete bajueraina yoaro sehe jira. Tina to yaina pjacũ bajueraina jipihitiro ahri yahpapũ Cohamacũ to warocarina jihre. ⁷ã jiro cordero sehe puhtoro dujiro cahapũ sũro, tirore to potu buhũsehei to cjuari tiare tuãwe nahre.

⁸To ã tuãwe nachũ ñũa cuatro soro bajuina, veinticuatro puhtoa cũhũ cordero panoi na tuhcuca caha sũ, tirore ño payohre. Tina puhtoa jipihtina arpa wama tia buaputẽare, uru wahwari cũhũre cjuahre. Tí wahwari incienso noano wahpaa posa tia wahwari jihre. Tí incienso mehne to piti dahre buhechũ Cohamacũ yaina tirore ti sini payori yoaro sehe jihre. ⁹⁻¹⁰ã tirore ño payoa õ sehe ni wahmaa basaare tina basa payohre tirore:

“Mũhũ ti wajãriro cjiro jira.

ã jicũ mũ di cohãri mehne sã ñaa yoari buhirire cohãre mũhũ Cohamacũ yaina sã jihto sehe.

ã jicũ jipihtia curuari macainare cãinare, jipihtia duseri durucuinare cãinare, jipihtia yahpari macainare cãinare sã ñaa yoari buhirire mũ di cohãri mehne cosawere mũhũ Cohamacũ yaina sã jihto sehe.

Sãre jipihtinare Cohamacũ yaina cjihtire cũre mũhũ.

ã jicũ sacerdotia cũhũre mũhũ sãre Cohamacũre dahra cohtaina sã jihto sehe.

ã yoacũ ahri yahpa macaina bui puhtoa sũhũre mũhũ sãre.

ã yoariro jicũ tí tiare wihtã ñahaare pahrẽhtiro jira mũhũ”, ni basa payohre tina corderore.

¹¹Pari turi ñucũ millones anjoa perire ñũhi. Puhtoro dujirore cuatro soro bajuinare, veinticuatro puhtoare anjoa sehe tinare soroa ducũ sũhũre. Tina anjoa peri tuaro ti saũurucu payochũ ñũhi. ¹²õ sehe ni tuaro saũurucu payohre tina: “Cordero ti wajãriro mũhũ jipihtinare dutiriro, jipihtiare cjuariro, masi pahũoriro, tua yuhdũarigo jira mũhũ.

Masa ti ñaa buhiri ti wajãriro mũ jichũ ñũna ã ni ño payoja mũhũre.

‘Noabiarigo jira’, ninahca mũhũre.

Mũhũre noano durucunahca”,

ni saũurucu payohre anjoa peri.

¹³ã jicũ paina cũhũre ti saũurucu payoa coa tachũ tuhohi. Jipihtina mũano macaina, ahri yahpa macaina, catiina, yariaina cahapũ jiina cũhũ, pjiri ma macaina, jipihitropũ jiina õ sehe ni durucu payoa coa tahre:

“Cohamacũre to dujiropũ dujirirore, Cordero cũhũre mũsare puarore noano durucunahca.

Mũsare wahche payonahca.

‘Noa Yuhdũaina, Tua Yuhdũaina jira’ nina, jipihtia dachoripe ã nirucunahca mũsare”,

ni durucu payoa coa tahre.

¹⁴ã jia tina cuatro soro bajuina ti ã durucu payochũ tuhõa “ãta ni durucu payojarõ”, nihre. ã jia Jesu yaina puhtoa sehe na tuhcuca caha sũ Cohamacũre, Cordero cũhũre ño payohre.

Papera tiare to nari tiare wihtã ñaharire pahrẽna Cordero

6 Baharo papera tiare to nari tiare Cordero wihtã ñaha mũhtanore pahrẽhũre. To ã pahrẽchũ ñũhi. To ã pahrẽri baharo cũiro soro bajuina mehne macarigo, “Ñũna taga”, nihre. ã nino wũpo yoaro sehe bisihre tiro.

²To ā niri baharo ñuhi yuñu. Yehseriro cawalore ñuhi. Tiro bui pisariro buedure cjuahre. Tirore puhtoro pisari sorore wahre paior sehe. To ā wari baharo tiro sehe tirore ñu tuhtiinare yuhdurucaro wahahre.

³Baharo cū wihtā ñahanore pahrē tuhsu Cordero pa wihtā ñahanore pahrēhre tjoa. To ā pahrēri baharo paior soro bajuina mehne macariro “Ñuna taga”, to nichu tuhohi tjoa.

⁴Ā jicu paior cawalore sohārirore ñuhi tjoa. Tiro bui pisarirore tuaare wahre paior sehe. Ahri yahpa macainare cahma wajā dutihtirore cūhre tirore. Ā jia jipihitiro macaina cahma wajāahca ahri yahpapu. Ā yoa pjiri pjī ñosari pjīne wahre tirore.

⁵Baharo puarore pahrē tuhsu Cordero parore pahrēhre tjoa. Ā jicu puaro ti durucuri baharo paior soro bajuina mehne macariro “Ñuna taga”, to nichu tuhohi.

To ā niri baharo ñiri cawalore ñuhi. Tiro bui pisariro balanza quihōnore cjuahre. ⁶Tirore yu ñuri baharo soro bajuina watōi ō sehe nino coa tahre:

—Cū dacho dahrari wapa mehne trigore cū kilota nuchuahca masa. Cū dacho dahrari wapa mehne cebada wama tia yaparire tia kilota nuchuahca masa. (Trigo, cebada cūhu piltia wahaahca. Ā jia tí wapa buju niahca.) Wiho mejeta chua dahrea sere, vino cūhure dojochu yoena tjiga —nino coa tahre.

⁷Baharo tiarore pahrē tuhsu Cordero parore pahrēhre tjoa. To ā pahrēri baharo paior soro bajuina mehne macariro ji bato tiriro “Ñuna taga”, nihre tjoa.

⁸To ā nichu tuhocu wapoariro cawalore ñuhi. Tiro bui pisariro “Yariachu yoariro” wama tihre. Ā yoa to baharo tariro “Yariaina ti jiro” wama tihre. Ā jiro tinare tuaare wahre paior sehe. Ahri yahpapure cuarta parte masare wajā dutihre. Cahma wajāa mehne, juca baa mehne,

dohatia mehne, wahiquina nēcuri macaina suaina mehne tópeina masare ti wajāhtore cūhre tinare.

⁹Baharo pititiaro wihtā ñahaare pahrē tuhsu Cordero paro ñahanore pahrēhre tjoa. To ā pahrēchu altar docai Jesu yaina ti wajārina ti catiri yajeripohnarine ñuhi. Cohamacu yare ti yahuri buhiri, “Jesu yaina jija”, ti ni yahuri buhiri tinare wajāri jire. ¹⁰Tina sañurucua ō sehe nihre Cohamacure:

—Muhu sā puhtoro, ñaa marieriro, mahñono marieno, mu niriro seheta yoariro jira muhu. ¿Ahri yahpa macainare, sāre wajārinare dohse jichu buhiri dahreihcari muhu? —ni sañurucuhre tina.

¹¹Ā jiro tinare yehsea suhti yoaa suhtire wahre. Tinare ā waro ō sehe nihre tinare:

—Sosiniga. Paina musa coyey Jesu yaina musa yoariro seheta mipu cūhure noaa buheare buhesinia nina. Musare ti wajāriri seheta tina cūhure ti wajā pahñohto duhsasinina. Ā jina tinare jipihtinare ti wajāhto pano mahanocā sosiniga musa —nihre tinare.

¹²Baharo cinco wihtā ñahaare pahrē tuhsu Cordero paro wihtā ñahanore pahrēhre tjoa. Tóre to ā pahrēchuta taro yahpa ñuhmihre. To ñuhmini baharo sū dacho macariro ñiri choro wahahre. Ñiri suhtiro yoaro seheta ñiri choro wahahre. Ā yoa sū ñami macariro di yoaro sehe sohāriro wahahre. ¹³Ā yoa ñahpichoha poca yahpapu boraahahre. Yucucu dicha yahsaare wihnono to wā bure bororo seheta ñahpichoha poca boraahahre. ¹⁴Ti ā wahari baharo muano butia wahahre. Papera tiare mari turēchu to bajueraro seheta bajuerare muano. Ā yoa jipihtia tūyucu cūhu nēcopo cūhu pa sehēpu sūrūcahre. ¹⁵To ā wahachu ñua, ahri yahpa macaina bui puhto coparipu tūyucu macaa taa docapu cūhure duhtihre. Paina puhto,

surara puhtoa, pache puu, tuaina, jipih-
tina tinare dahra cohtaina, dahra co-
htaina jieraina cūhu tóihita duhtimahre.
¹⁶ Ā duhtia tūyucure, taa cūhure õ sehe
nihre:

—Sā bui bora pjaga. Sāre nuoga.
Siro puhtoro to dujiroi dujiroro cui
yuhduaja. Cordero suaro, sāre nāno
buhiri dahrerohca. “Ā buhiri dahreri”,
nina nuoga sāre. ¹⁷ Jipihntinare tuaro ti
buhiri dahrehti dacho ji tuhsura. Ā jia ti
buhiri dahretore ne cūiro duhtiro biho-
eraro, cūno pjasi —nihre tina jipihntina.

Israe masa pjacūre Cohamacu to wama nā õhtore yahuha Joāo

7 Baharo pititiaro anjoare nūhi. Tina
jipihntiro pu wahahre. Cūiro nortepu
waharo tōpu tari wihnonore taerachu
yoahre. Pairo surpu, pairo sū muja
taropu, pairo sū sāanopu wahahre.
Nortepu wahariro yoaro sehetā yoahre
tina cūhu. Ā jiro ahri yahpapu, pjiri
mapu cūhure ne wihnono taerare. Ne
cūdu yucūre wihnono wā nūhmichu
yoaerare. ² Ā yoa pairo anjore nūhi tjoa.
Sū muja taropu taro nihre tiro. Co-
hamacu catiriro to wama nā õnore na
taro nihre tiro. Ā na taro paina piti-
tiaro anjoare tiro sañurucuhre. Tina an-
joa sehe ahri yahpare, pjiri ma cūhure
Cohamacu to dojomehne dutiina jihre.
³ Tinare sañurucuro õ sehe nihre anjo:

—Cohtasiniga. Cohamacure dahra co-
htaina ti wuhduā pocare to wamare
õna tana nija. Sā ā õhto pano ahri
yahpare, pjiri mare, yucuri cūhure do-
jomehnesiniena tjiga musa —nihre tiro
paina pititiaro anjoare.

⁴ Ā jiro Cohamacu to wama mehne ti
wuhduā pocare ti õhtinare “Õpeina jira”,
ni yahuhre yuhure cūiro. Israe masa
doce curuari macaina ciento cuarenta y
cuatro mil masa ti õhtina jiyuhti. ⁵ Ah-
rina jiyuhti ti õhtina: Doce mil masa
Juda panamana ji turiaina ti õhtina

jihre. Paina doce mil masa Rubē pana-
mana ji turiaina ti õhtina jihre. Paina
doce mil masa Gad panamana ji turiaina
ti õhtina jihre. ⁶ Paina doce mil masa
Aser panamana ji turiaina, paina doce
mil masa Neftalí panamana ji turiaina,
paina doce mil masa Manase panamana
ji turiaina ti õhtina jihre. ⁷ Paina doce
mil masa Simeo panamana ji turiaina,
paina doce mil masa Leví panamana
ji turiaina, paina doce mil masa Isacar
panamana ji turiaina ti õhtina jihre.
⁸ Paina doce mil masa Zabulō panamana
ji turiaina, paina doce mil masa José
panamana ji turiaina, paina doce mil
masa Benjami panamana ji turiaina ti
õhtina jihre. Tópeinata jipihntina masa
ciento cuarenta y cuatro mil to wama
mehne ti õhtina jihre.

Payu yehsea suhti tiinare yahuha Joāo marine

⁹ Baharo payu masare nūhi. Jipih-
tia yahpari macainare, jipihntia curuari
macainare, jipihntia duseri durucuinare,
jipihntia macari macainare cāinare Cri-
store cahmaina dihtare tói ducuinare
nūhi. Puhtoro to dujiro panoi, Cordero
panoi ducuhre tina masa. Payu masa
jihre. Ā jia quihō bihoina jierare. Yehsea
suhti tiina jihre tina. Ā yoa pjaa pō
pūrīne cjuahre. ¹⁰ Ā jia tina jipihntina õ
sehe ni tuaro sañurucuhre:

“Cohamacu jira sāre yuhduchu yoariro.
Tiro to dujiroi dujiro jira.
Cordero cūhu sāre yuhduchu yoariro
jira”,

ni sañurucuhre tina. ¹¹ Ā jia jipihntina an-
joa, Jesu yaina puhtoā cūhu, soro ba-
juina mehne puhtoro to dujiro cahai
ducuhre. Ā ducua to dujiro panoi doca
caha su, Cohamacure wahche payohre.
¹² Õ sehe ni wahche payohre tina:
“Ā tjira.

Cohamacu sā puhtoro mūhure noano
durucuja.

Noa yuhduariro, masi pahñoriro jira muhu.

Muhure 'Noana', nija.

Muhure ño payoja.

Tua yuhduariro jira muhu.

Mu tuaa mehne yoariro jira muhu.

Tó seheta jirucuriro jira muhu jipihitia dachoripe.

Ã tjira",

ni wahche payohre tina.

¹³Ti ã nichu tuhoro cüiro Jesu yaina puhtoah mehne macariro yuhure õ sehe ni sinituhre:

—¿Ahrina yehsea suhti tinare masijari muhu? ¿Ti tarirore masijari muhu?

—ni sinitu ñuhre yuhure.

¹⁴To ã nichu tuhocu:

—Masieraja —ni yuhtihi.

—¿Noa jijari tina? —ni sinituhi tirore.

Yu ã nichu tuhoro õ sehe nihre yuhure:

—Ahrina ñabiaro yuhduri dacho jichu cüno pjaina jira. Ti suhti cosawerina ti jiro seheta Cordero to di cohano mehne ti ñaa buhirire cosawerina jira. Æ jia noano yehsea suhti tiina jira.

¹⁵Æ to cosawerina jia Cohamacu to dujuro panoi tirore ã ño payorucura. Dachoripe, ñaminipe tirore ã ño payorucura, sacerdotia Cohamacu wuhai ti yoariro seheta. Æ jiro tina mehne ã jirucuro, tinare yoadohorohca Cohamacu "Soro wahari", nino. ¹⁶Ne pari turi jüca baasi tina. Æ jia ñahma yapiosi tina. Ne sü dacho macariro siro tinare ne jü pjasi. Tuaro sia tinare ñano yuhduchu yoasi. ¹⁷Puhtoro dujuro potoi ducuriro Cordero tinare ñu wihborohca. Ovejare ñu wihboriro yoaro sehe tinare ñu wihborohca. Æ ñu wihboro mári pohtaripu catichu yoaa mári pohtaripu tinare mu tá wahcānohca, ovejare ñu wihboriro to mu táno seheta. Æ yoaro ã wahcherucuchu yoarohca tinare. Æ jia ne pari turi tiisi tina —ni yahuhre Jesu yaina puhtoah mehne macariro yuhure.

Seis papera ti wihtã ñahaare pahrẽ tuhsuro parore pahrẽha Cordero

8 Seis papera ti wihtã ñahaare pahrẽ tuhsuro parore pahrẽhre tjoa Cordero. To ã pahrẽ tuhsuchu cü hora dacho macai tópu muanopu noano dihta marieaa wahahre. ²To ã wahari baharo siete anjoare Cohamacu panoi ducuinare ñuhi. Tinare siete cornetarire wahre paio. ³Paio anjo uru wahware inciensore posa tihti wahware cjuariro altar cahapu su, ducuhre. Tóti to ducuchu payu inciensore tirore wahre, jipihitina Cohamacu yaina tirore ti siniri mehne morehtire. Æ jiro uru altarpü Cohamacu to dujuro panoi jiri altarpü tí inciensore jü mñohre Cohamacure. ⁴Æ jia anjo to cjuari wahwa macaa inciensore altarpü to poho siteri baharo tí incienso macaa me Cohamacu yaina tirore ti siniri mehne mujaa wahahre. ⁵Æ wahari baharo altar macaa niti mehne tí wahwa yahpa wahachu, yahpai poho cünocahre. To ã poho cünocachuta wupo pja, soro sehe jiro bisi mua, oroca site mua, yahpa ñuhmi muahre.

Cornetarire yahuha João

⁶Baharo siete anjoa cáina ti cornetarire putia taa nihre.

⁷Cüiro anjo to yariare puti muhtahre. To ã putichu co poca yusua poca pichaca mehne, di mehne morea poca yahpapu bora su cahahre. Ti bora su cahachuta yahpa jüa wahahre. Æ puro jühre: Ahri yahpa dacho maca soro caharoi jüa wahahre. Æ jiro tó puro posata yucuri cühu jüa wahahre. Tó puro posata tja cühu jüa wahahre.

⁸Anjo cüiro to ã puti muhtari baharo paio anjo to yaria cornetare putihre tjoa. To ã putichu pjidu tácu yoaro sehe bajudu noano jürucudu pjiri mapure waharoca ñojaa wahahre. Æ jiro yahpa to

jūriro puro tó purota pjiri ma di ma do-joa wahahre. ⁹Ā jia pjiri ma macaina wahi dacho maca mahano sūboro waroi yariaa wahahre. Tópe busota dohoa buso cūhu minia wahahre pjiri mapure.

¹⁰Puaro anjoa ti putiri baharo paio anjo cūhu to yaria cornetare putihre tjoa. To ā putichū pjiria űahpichohaca, sihāria yoaro sehe siria yahpapū bora sū cahaa wahahre. Ahri yahpa macaa mári dacho macabo cureroi tópe mári bui bora sū cahaa wahahre űahpichohaca. Tópe co wijaa copari bui cūhure bora sū cahaa wahahre. ¹¹Tópe márita suēa mári wahahre. To ā wahachū payū masa tí mári macaa core, tí copari macaa co cūhure sihnimaa, yariaa wahahre. Tia űahpichohaca “Suēnia”, wama tihre.

¹²Tiario anjoa ti putiri baharo paio anjo cūhu to yaria cornetare putihre tjoa. To ā putichū sū dacho macariro, űami macariro cūhu dacho maca sūboro waroi dojoa wahahre. űahpichoha peri cūhu dacho maca sūboro waroi jia poca tópe pocata dojoa wahahre. Tópe poca muano macaa poca noano buhrierare. Dachopū pititia horari waro sū dacho macariro ne buhrierare. űamine pititia horari waro sū űami macariro, űahpichoha poca cūhu ne buhrierare.

¹³Baharo űuroca muohi tjoa. Muano pū wūrirore cjare űuhi. Ā jicu to sañurucuchū tūhohi. Ō sehe nihre tiro:

—űabiara. űabiara. Tiario anjoa mipū putierasiniina ti putiri baharo pinihtare űabiaro waharohca. To ā wahachū ahri yahpai jiina űabiaro yūhduahca —nihre tiro.

9 Baharo pititiario anjoa ti putiri baharo paio anjo to yaria cornetare putihre tjoa. To ā putichū űahpichohaca yoaro sehe jiro anjo muano pū bora tarirore űuhi. Yū ā űano watoi tirore cūāri copa macari sawire wahre. ²Ā jiro tiro tí copare to pjōochū pichaca me wijahhre. Pjiri pichaca macaa me

yoaro sehetā pjiro me wijahhre tí copare. Ā wijaro tí me dōihtā sū dacho macarirore, muano cūhure butia wahachū yoahre. ³Ā yoa tí me puhichai jiina poreroa yahpapū tahre. Pichōno soroa ti tuaro purīno sehetā tina cūhu tuaro purīhre. ⁴Ā jiro tjure, yucūrire, paye toare űano yoa dutierare tinare. Masa dihtare űano yoa dutihre tinare. Cohamacū to wamare ti wūhduā pocare űamahnoeraina dihtare űano yoa dutihre tinare poreroare. ⁵Ā űano yoa dutiparota tinare wajā dutierare. Tinare wajā dutieraparota cinco sūri waro tinare űano purichū yoa dutihre. Pichōno soroa tjoa ti purīno sehetā purichū yoina jihre poreroa cūhu. ⁶Tinare ti ā purichū yoachū masa yariaa waha duaahca. Ti ā yaria duapachūta tinare yaria dutisi.

⁷Poreroa sehe cawaloa yoaro sehe bajuhre. Ti cahma wajāhto pano cawaloare ti suhti sāraro sehetā tó sehetā bajuina jihre tina poreroa cūhu. Ti dapu pocai puhto ti pisaa sorori uru sorori yoaro sehe bajuhre. Ti wūhduā poca masa yoaro sehe bajuhre. ⁸Ti pjoari numia pjoari yoaro sehe jihre. Ā yoa ti piri yaya piri yoaro sehe jihre. ⁹Pē buhu ducatarī cahsaro comaa cahsaro yoaro sehe bajuhre ti cutiro. Ā yoa tina ti wuchū payū cawaloa murocaina ti murocaro sehe ti wua dūpuri bisihre. Cawaloa tunua busore wajaina ti cahma wajānopū wahaa, ti bisiro sehetā bisihre poreroa wua dūpuri. ¹⁰Ā yoa pichōno soroa ti pichōno tiro sehetā, tjoariaca ti cjuaro sehetā jihre tina poreroa. Ti pichōri mehne tjoa, cinco sūri waro masare purichū yoahre. ¹¹Tina puhtoro cjuaina jihre. Cuāri copa puro jihre ti puhtoro. Tiro anjo jihre. Hebreo ya mehne Abadón wama tihre tiro. Griego ya mehne Apolión wama tihre. (Apolión “Pihtichū yoariro”, nino nina.)

¹² Poreroa masare ñano ti purĩno yoari baharo ahri ti ñano yũhdũ muhtariro cjiro pihtia wahahre. Tó baharo pua taha pari turi ñano yũhdũsiniahca masa.

¹³ Baharo cũ wamomaca pihtiina anjoa ti putiri baharo paio anjo to yaria cornetare putihre tjoa. To ã putichũ Cohamacũ panoi ducuri altarpũ uru altarpũ durucua bisi wijaro coa tahre. Tí altar macaa sahari pititia saharipũ durucua bisi wijaro coa tahre. ¹⁴ ã durucuro cornetare putiriro anjore yahuhre:

—Eufrates wama tiri ma pjiri mapũ peresupũ jiinare anjoare wioga. Tina pititiro anjoa jira —nino coa tahre.

¹⁵ ã nino coa tachũ tuhoro anjo sehe tinare pititiarore wiohre, payũ masare wajãhtinare. Ahri horare, ahri dachore, ahri sũre, ahri cũhmare quihõno cohtaa nihre tina pititiaro anjoa. Ti cohtariro mũ sũra. ã jia wajãa taa nina. Jipihina dacho maca doca curero masare wajãahca. ¹⁶ ã yoa ti surarare “Õpeina jira”, ti nichũ tuhohi. Tina cawaloa bui pisaina jihre. Doscientos millones surara jihre.

¹⁷ ã yoa cawaloare tina bui pisaina cũhure ñũhi. Tina cawaloa bui pisaina ti pẽ buhure dũcataa suhti, comaa suhti, sohãa suhti, yahsaa suhti, ewũ sehe bajua suhti jihre. ã jia cawaloa ti dapu poca yaya sohãina yoaro sehe bajuhre. Ti dũseripũ pichaca, me, azufre wama tia me cũhũ wijaahre. ¹⁸ ã jia cawaloa dũseri wijaa masare wajãhre. Jipihina dacho maca mahano sũboro waroi tópeina masare wajãhre. Pichaca mehne, me mehne, azufre mehne payũ masare wajãhre. ¹⁹ Tina cawaloa ti dũseri mehne wajãhre. ã yoa ti pichõri mehne wajãhre tjoa. Ti pichõri sohtoapũ agãa dapu poca yoaro sehe bajuhre. ã jia ti pichõri mehne ñano yoahre tina masare.

²⁰ Payũ masa yariaeraina ti wajã duharina sehe ti ñaa yoarire ne duhuerare.

Watiare ño payo duhuerare. “Cohamacũ jira”, ti nia masuri cũhure ño payo duhuerare. Tí masuri uru mehne, plata mehne, bronce wama tiri comaa mehne, tãa mehne, yucuri mehne ti yoari masuri jihre. Tí masuri sehe ñuerare. Tũhoerare. Tinierare. ²¹ Paye ñaa cũhure tina ne cahyaerare. Masare ti wajãrire, numia mehne ti ñano yoarire, ti yacari cũhure ne cahyaerare tina. ã jia yaya ti yoaro sehe yoaa, tí cũhure ne cahyaerare tina.

Mahari tiacãre papera tiacãre na taha anjo

10 Baharo paio tuariro anjo mũanopũ to duji tachũ ñũhi. Me curua watoi tahre. ã yoa buhini soro to dapu bui pisahre. To wãhdũa sũ dacho macariro yoaro sehe si sitehre. To ñũchũa pichaca yoaro sehe bajuhre. ² ã yoa mahari tiacã papera tiacãre to pjãri tiacãre cjuahre tiro. To dahporo poto bũhusehe macari dahporo mehne pjiri mápũ tũ cũhre. To dahporo cõ bũhusehe macari dahporo sehe macarocai tũ cũhre. ³ ã ducuro yaya ti sañurucuro sehetã tiro tuaro sañurucuhre. To ã sañurucuri baharo siete wũpoa yahua coa tamahre. ⁴ Ti ã yahuchũ tuhocũ joa dũcamahi. Yũ ã joa dũcapachũta mũanopũ yũhure õ sehe ni durucuro coa tahre:

—Siete wũpoa ti nirire painare yahui tjiga. ã jicu tíre joa nai tjiga —nino coa tahre yũhure.

⁵ To ã niri baharo pjiri mapũ ducuriro, macarocai ducuriro anjo to wamomaca poto bũhusehe siõroca mũohre mũanopũ. ⁶ ã siõroca mũono Cohamacũ ã catirucuriro wama mehne wama payohre. Tiro Cohamacũ sehe jipihitiare mũanore, mũano macaare, ahri yahpare, ahri yahpa macaare, pjiri mare, pjiri ma macaare yoariro jira. ã wama payoro õ sehe nihre anjo:

—Cohamacu mehne potocã nii nija. Tó purota cohtanahca. ⁷Seis anjoa cornetarire ti putiri baharo paio anjo to putichu Cohamacu panopu “Õ sehe yoaihtja”, to niriro seheta ã yoarohca. Panopu masare tíre noano yahuera tiri jire. Baharo tirore dahra cohtanare, to yare yahu mahtaina sehere noano yahu pahñoa tiri jire tiro. Tí to yahu cürire mipure yoarohca tiro —nihre anjo.

⁸To ã niri baharo manopu yuhure durucuro coa tariro pari turi durucuro coa tahre tjoa. Õ sehe nino coa tahre yuhure:

—Pjiri mápu ducuriro macarocai ducuriro siro anjo cahapu wahaga. Æ wahacu papera tiacãre to cjuari tiacãre naga —nino coa tahre yuhure.

⁹To ã nino coa tachu tuhocu anjo cahapu wahahi. Tiore papera tiacãre yu sinichu tuhoro õ sehe ni yuhtihre yuhure:

—Naga. Æ jicu ahri tia papera tiacãre chuga. Mu wahma chuchu mi yoaro sehe noano bisirohca. Mu pjaropu mu burori baharo suëa waharohca —nihre yuhure.

¹⁰To ã nichu tuhocu tí tiacãre anjore yu nari baharo chuhi. Yu wahma chuchu mi yoaro sehe bisihre. Yu chu burori baharo yu pjaropu suëa wahahre. ¹¹Yu ã churi baharo õ sehe nihre yuhure:

—Pari turi macari macaina, yahpari macaina, payu duseri durucuina, tina bui puhtoã cühu baharo ti dohse wahah-tore, Cohamacu tinare to dohse yoah-to cühure yahuyuga muhu —nihre yuhure.

Puaro Cohamacu yare yahuhtinare yahu joaha João marine

11 Baharo yuhure quihödure wahre Cohamacu. Tjuadu puro yoadu jihre tu. Ture waro õ sehe nihre yuhure:

—Yu ya wuhure quihöi wahaga. Tí wuhu macari altar cühure quihöga. Æ yoa tuhsu, tí wuhui yuhure ño payoinare quihöga. ²Sopaca wija surucari wapare

noari wapare quihöi tjiga. Tí wapa yuhure cahmaerainare ti cüri wapa jira. Tina cuarenta y dos süri waro Cohamacu ya macare tí maca macaina cühure ñano yoahca. Æ jicu quihöi tjiga ti ya wapare noari wapare. ³Æ jicu yu yare yahuinare puarore warocaihtja. Mil do-scientos sesenta dachori waro yu yare yahuahca. Masa ti coyea ti yariari baharo ti säa suhti barore säaina jiahca tina yu yahu dutiina —ni yuhure yuhure.

⁴Ahri yahpa macaina bui puhtoro Cohamacu panoi puadu Olivo wama tia yucu ducura. Puadu sihä payoa yucu cühu tí yucu cahai ducura. Tí yucu mehne piti dahre to buhechu ahri-puaro to yare yahuina tí yucu yoaro sehe jira. ⁵Æ jia tinare nu tuhtiina tinare ti ñano yoa duachu tina sehe ti dusero macaa picha pohna mehne jü pahñoahca tinare nu tuhtiinare. Õ se-heta tinare ñano yoainare wajãahca tina puaro Cohamacu yare yahuina. ⁶Æ yoa tina puaro ti coro ta dutierachu coro tasi. Æ jiro Cohamacu yare ti yahuro puro coro tasi. Æ jia marine di mári wahachu yoahca tina. Æ jia ahri yahpare ñano wahachu yoahca. Jipihtia dohse jiare, jipihtina dohse jiiinare masare ñano wahachu yoahca. Ti dohse yoa duaro puro ã ñano wahachu yoahca ahri yahpare.

⁷Ti ã yoa pahñoachu waro cuäri copapu jiro ñariro nucü macariro wijaarohca. Æ wijaaro Cohamacu yare yahuina mehne cahmachenhca. Æ cahmacheno tua yuhdurucaro tinare wajãnohca. ⁸To ã wajäri baharo ti pjacuri cjiri pjiri maca macari mahapu coãahca. Yahuina puhtorore ti cjã puha wajäri maca jira tí maca. Tí maca macaina ñaina jia Sodoma macaina, Egipto macaina yoaro seheta jia, tí pjare Sodoma, Egipto cühu wama tirohca tí maca mari piti dahre buhechu. ⁹Æ coãa tia numu noano coãa, pa numu dacho macai ti pjacuri tí mahai coãahca. Æ jia jipihtia yah-

pari macaina, jipihtia curuari macaina, jipihtia duseri durucuina tópe nãmuri waro ti pjacũre ñãrucuahca. Æ ñũrucua tópe nãmuri waro ti pjacũre ya dutisi. ¹⁰Ti ã yariarina jichũ ñua ahri yahpa macaina wahcheahca. Æ wahchea bose nãmure yoaa, ti basi paye barore ã wanocaahca. Tina pũaro Cohamacũ yare yahuina masare ñano yũhdũchũ yoarina jiri jire. Æ jia ti ã yariachũ ñua wahche yũhdũahca ahri yahpa macaina. ¹¹Æ jiro tia nãmũ baharoi pa nãmũ dacho macai Cohamacũ ti pjacũre masonohca. To ã masochũ tina pari turi wahcãrucũ suahca. Ti ã wahcãrucũ suchũ ñua jipihitina cui yũhdũahca tinare. ¹²Baharo tina pũaro mũanopũ tuaro durucuro coa tachũ tuhoahca. Õ sehe ninohca tinare:
—Õpũ mũja taga mũsa —nino coa tarohca.

To ã nichũ tuhoa me curua watoi mũjaa wahaahca. Ti yabirina cjiri ti mũjachũ ñuahca. ¹³Ti ã mũjachũta yahpa tuaro ñuhminohca. To ã ñuhmichũ tí maca macaa wũhuse décima parte boraa wahaahca. Æ jia yahpa ñuhmino mehne siete mil masa yariaa wahaahca. Paina duhsaina sehe cuaa waha, Cohamacũre mũano macarirore “Tuariro jira”, ni ño payoahca tirore.

¹⁴Ahri jipihtia ti ã wahari baharo pua taha masa ñano yũhdũ tuhsuina jiahca. Ti ã yũhdũri baharocãta pari turi dóihita masa ñano yũhdũahca tjoa.

Seis cornetarire ti putiri baharo paio putiha

¹⁵Baharo seis cornetarire ti putiri baharo paio anjo to yariare putihre. To ã putichũ mũanopũ tuaro durucua coa tahre. Õ sehe nia coa tahre:
“Mipũ Cohamacũ Cristo mehne ahri yahpa macaina bui pũthoa jiahca. Æ jia jipihtina bui pũthoa ã jirucuahca”, nia coa tahre. ¹⁶Æ yoa Cohamacũ panoi pũthoa dujiapũ dujiina veinticuatro Jesu

yaina pũthoa Cohamacũ panoi caha sũ, tirore ño payohre. ¹⁷Æ ño payoa õ sehe nihre:

“Sã pũthoro Cohamacũ, tua yũhdũariro jira mũhũ.

Mũhũ panopũ ã jirucua tiri jire.

Mipũ cũhũre ã jirucura mũhũ.

Mũ tuaa mehne masa ti pũthoro mũ jirucachũ ‘Noana’, nija mũhũre.

¹⁸Jipihtina ahri yahpa macaina mũhũre cahmaeraina mũhũ mehne suamare. Mipũre tinare mũ buhiri dahrehti pja jira.

Yariaina cũhũre mũ buhiri dahrehti pja jira.

Æ jiro mũ yaina sehere noaare ti yoari wapare mũ wahti pja jira.

Cãina tina mũhũre dahra cohtaina mũ yare yahu mũhtaina jira.

Æ yoa tina, paina mũ yaina mehne jipihitina mũhũre ño payoia jira.

Æ jicũ pũthoare, wiho jiina cũhũre mũ yaina ti jiri wapa noano yoaihca mũhũ.

Æ jiro ahri yahpa macainare dojomehne cohtainare mũ cohãhti pja jira mipũre”,

ni ño payohre pũthoa Cohamacũre.

¹⁹Ti ã yoari baharo mũano macari wũhũ Cohamacũ ya wũhũ to pjõori wũhũ jihre. Æ jina tí wũhũi jiri carore ñũhi sã. Tí caro puhichapũ Cohamacũ masare to dutiare joa õa pjĩni tãa pjĩni sãahre. Sã ã ñũchũta orocasite mũa, wũpo pja mũa, soro jiro bisi mũa, yahpa ñũhmi mũa, co poca yũsua poca mũanopũ payũ bora tahre.

Numinore pinono cũhũre yahuha João

12 Baharo ahri yahpa to dohse wahatore mũanopũ ñohre. To ã ñori wiho waro jierara. Õ sehe ñũ mũhtahi: Mũanopũ numinore ñũhi. Ticoro to suhtiro sũ dacho macariro yoaro sehe si sitehre. Sũ ñami macariro bui

ducuhre. Pũhtoro to pisari soro barore doce ñahpichoha poca cjuari sorore pisaricoro ducuhre. ² Ñ ducuro mahanocã dũhsahre to pohna tihto. Ñ jiro ticoro sañurucuhre. ³ Baharo pari turi ñũhi mũanopũ: Pjiriro pinonore sohãrirore ñũhi. Siete dapu poca tiro jihre. Jipihĩa to dapu poca pũhtoa ti pisaa sorori barore pisaa dapupoca jihre. Ñ jiro diez sahari tiro jihre tiro. ⁴ To pichõno mehne ñahpichoha pocare wahba siteroca borohre. Jipihtĩa ñahpichohare dacho macabo cureroi wahba siteroca borohre. Ñ jiro numino pohna tihticoro panoi ducuhre pinono. To macũnocã to bajuachũ chũro taro nimahre. ⁵ Baharocãta cjuã tuhsũhre wihãrirocãre. Jipihtĩa yahpari macaina ti pũhtoro cjihto jihre tirocã. To ã pũhtoro tũariro jichũ, masa tirore yũhdũrucaa cũno pjasi. To ã masa bajuachũta Cohamacũ to dujiro cahapũ tirocãre naa wahcãa wahahre. ⁶ To ã yoachũ numino sehe masa marienopũ duhti wahcãa wahahre. Cohamacũ to cahnoyuriropũ duhti wahcãhre ticoro. Tõpũre mil doscientos sesenta dachori waro Cohamacũ ticorore ñũ wihborohca.

⁷ Wahmanore mũanopũ cahma wajã dũcaa tiri jire. Miguel wama tiroiro anjo to yaina anjoa cũhũ pinono mehne cahmachea tiri jire. Ti ã cahmachechũ pinono to yaina anjoa mehne Miguere cahmachea tiri jire. ⁸ Ñ yoa Miguel cũhũ pinonore yũhdũrucaa tiri jire. Ñ jiro pinono yaina anjoa cũhũre mũanopũ ji namo dutiera tiri jire. ⁹ Ñ jiro pjiriro pinonore cohãnocaa tiri jire Cohamacũ. Tiro pinono watĩnota jiro nina. Satana wama tiroiro jira. Panopũ tiro pinono pjacu tiroiro jia tiri jire. Tiro jipihĩtiro yahpa macainare mahĩoriro jira. Tirore to yaina anjoa mehne mũanopũ jirirore yahpapũ cohã boroa tiri jire.

¹⁰ Baharo mũanopũ sañurucuro coa tachũ tuhohi:

—Mipũre Cohamacũ masare yũhdũchũ yoahre jũna. Mipũ pinihtare Cohamacũ mari pũhtoro jiro tahre to tuaare ñono taro. To warocariro Cristo cũhũ to pũhtoro jiare to tuaare ñohre jipihtinare. Watĩnore mũanopũ jirirore yahpapũ cohã borohre. Ñ cohã bororo to tuaare ñohre Cohamacũ. Tiro watĩno sehe dachoripe, ñaminipe Jesu yainare “Ahrina ñaina jira”, ni yahusãno niri jire Cohamacũre. Ñ jiro mari coyeare Jesu yainare yahusãriro jiri jire. ¹¹ Cristo Cordero wama tiroiro to di cohãri mehne mari coyea Jesu yaina tirore wacũ tuaina ti ñaa yoari buhirire cohãre tiro. Ñ wacũ tuaina jia watĩnore yũhdũruccare. Ñ yoa Cohamacũ yare yahua, watĩnore yũhdũruccare. To yare ti yahuri buhiri paina tinare ti wajã duapachũta, tina cuieraa, Cristo yare duhuerare. ¹² Ñ jina mũsa mũano macaina wahchega. Watĩnore yahpapũ to cohã borochũ ñũna wahchega. Wiho mejeta ahri yahpa macaina, pjiri ma macaina cũhũ pjacuoina wahanahca mũsa sehe. Ahri yahpapũ tirore to cohã borori baharo mũsa cahapũ jira watĩno. Tirore to buhiri dahrehto mahanocã dũhsara. Ñ jiro sua yũhduara tiro. Mũsa cahapũ sũro, pjacuoina mũsare tjuachũ yoarohca tiro —ni sañurucuro coa tachũ tuhohi.

¹³ Pinonore yahpapũ to cohã borochũ ñũno, pinono sehe numinore, wihãrirocã pocorore nũnũ ti wahcãhre. ¹⁴ Ñ jiro ticorore pjiriro cja to wua dũpũrire wahre Cohamacũ, masa marienopũ to wũ duhti wahcãhto sehe. Tõpũ to sũri baharo tia cũhma noano pa cũhma dacho maca waroi ticorore ñũ wihbohre Cohamacũ. To ã ñũ wihbochũ pinono ticorore ñano yoa masierare. ¹⁵ Tõi to jichũ ñũno pinono pjĩro core cho cohãhre ticorore mũroca bũrochũ yoaro taro. ¹⁶ To ã yoachũ yahpa sehe ticorore yoadohohre. Pinono to dũseroi wijaa

core yahpa sehe wihmi na pahñonoc-ahre. ¹⁷To ã wahachũ ñũno pinono sua yũhdũahre. Æ suaro cãina ticoro panamana ji turaiaina mehne cahmacheno wahahre pinono. Tina sehe Cohamacũ dutiare yoaina jia, Jesu ya buheare noaa buheare ne duhueraina jihre. ¹⁸Æ yoa pinono pjiri ma dũhtũ cahai ducuhre.

Puaro nũcũ macainare yahuha Joã

13 Æ yoa nũcũ macarirore tí mai jirirore to wahcã wihichũ ñũhi. Tiro sehe siete dapu poca, diez sahari tiro jihre. To sahari puhtoia ti pisaa sorori barore pisahre. To dapu pocare to wamare joa õri dapu poca jihre. Tí wama to ñari wama jichũ ñũ yabira Cohamacũ. ²Tiro nũcũ macariro yairo dohroriro yoaro sehe bajuhre. Æ jiro oso yoaro sehe dahpori tiro jihre. Yairo sohãriro pjiriro wũrũ yoaro sehe dũsero tiro jihre. Æ yoa pinono sehe to tuaare wahre nũcũ macarirore. Æ waro tirore to puhtoro dujiroi cũno, tiro yoaro sehe payũ masare dutichũ yoahre pinono nũcũ macarirore. ³Cũ dapu nũcũ macariro dapu ti wajãmariro dapu yoaro sehe bajuhre. To ã bajupachuta to camino sehe yatia wahahre. Tí dapu to catichũ ñũa, cũaa wahahre jipihtina ahri yahpa macaina. Æ cũaa, nũcũ macarirore ño payohre. Æ jia tiro mehne macaina wahahre masa. ⁴Æ yoa nũcũ macarirore pinono to tuaare to wachũ ñũa masa sehe tirore pinonore na tuhcuca caha sũ, ño payohre. Æ jia nũcũ macariro cũhũre na tuhcuca caha sũ, tirore ño payohre. Æ ño payoa õ sehe nihre:

—Ne paio mũ yoaro sehe tuariro mariahna. Pairo mũhũre ne yũhdũrũca masierara —ni ño payohre masa nũcũ macarirore.

⁵Æ yoa tiro nũcũ macariro “Tua yũhdũrũcariro jija”, to nipachuta Cohamacũre to ñano durucupachuta Æ tũhotunocasinihre Cohamacũ sehe. Æ

jiro cuarenta y dos sũri waro tiro nũcũ macariro masare dutisinimahre. Tó purota to puhtoro jihtore cũre Cohamacũ. ⁶Æ jiro tiro Cohamacũre ñano durucuhre. To wamare, to wũhũre, mũanopũ to jiro macaina cũhũre ñano durucuhre nũcũ macariro. ⁷Æ yoaro Cohamacũ yainare cahma wajãno tinare yũhdũrũcuhre. To ã yoapachuta ñ ñũnocasinihre Cohamacũ. Cohamacũ to ã yoa dutierachũ yoaerboa. Æ jiro jipihtina ahri yahpa macaina bui puhtoro sãasinimahre nũcũ macariro. Jipihtina yahpari macaina bui, macari macaina bui, jipih-tia dũseri durucuina bui puhtoro sãasinimahre tiro. ⁸Æ jia jipihtina ahri yahpa macaina tiro nũcũ macariro panoi na tuhcuca caha sũ tirore ño payohre. Ahri yahpare Cohamacũ to bajuamehnehto pano to yaina cjihtire ñ jirucuhntinare ti wamare joa õ tuhsũa tiri jire. Tí tju to ã joa õri tju Cordero ti wajãriro ya tju jira. Tí tju ti wamare joa õeraina dihta nũcũ macarirore ño payohre.

⁹Cahmori tiina jira mũsa. Æ jina tuhoga. ¹⁰Jipihtina Cohamacũ yaina peresu wahahtina, baharo peresu wahaahca. Jipihtina tina ñosari pjĩ mehne ti ñosa wajãahtina, baharo tí pjĩ mehne yariaahca. Tíre masina mari Cohamacũ yaina ñano yũhdũpanahta tirore cohãena tjijihna. Æ yoa tirore wacũ tuarucujihna.

¹¹Baharo paio nũcũ macarirore ñũhi tjoa. Yahpa puhichapũ jiriro to wijaachũ ñũhi. Pua sahara oveja sahara yoaro sehe bajua sahara sahara tiro jihre. Æ yoa pinono yoaro sehe durucuhre. ¹²Æ jiro nũcũ macariro ji mũhtariro sehe baharo jiriro sehere puhtoro sũhre. To ã puhtoro sũriro sehe jipihtia yahpari macainare ji mũhtarirore ño payochũ yoahre. Ji mũhtariro nũcũ macariro ti wajãmariro camino yatiriro jihre. ¹³Æ yoa baharo jiriro nũcũ macariro bajuamehneare yoahre masa ti ñũ cuahto sehe. Æ

yoaro masa ti ñurocaroi pichaca pjiri pichaca muanopu bora tachu yoahre. ¹⁴Á yoa ji muhtariro to ñurocaroi paio nucu macariro sehe bajuamehnea mehne masare mahñohre “Ahriro musa ño payohtiro jira”, nino. Tiro masare mahñono, ji muhtariro masure masare yoa dutihre tirore ti ño payohto sehe. Tiro ji muhtariro ñosari pji mehne ti ñosari jiparota catiriro jihre. Tiro yoaro sehe bajuri masureta yoa dutihre paio nucu macariro masare. ¹⁵Á yoa baharo jiriro nucu macariro sehe ji muhtariro masure catichu yoahre masare to dutihtu sehe. Á jiro tí masure ño payoerainare wajã dutihre masare masu sehe. ¹⁶Á yoaro jipihtinare ti wamomacari poto buhusehei ti wuhdua poca cühure joa õ dutihre nucu macariro baharo jiriro. Wiho jiinare, puhtoare, pache puare, pjacuoinare, dahra cohtainare, dahra cohtaina jierainare, jipihhtinare ti wamomacarine ti wuhdua poca cühure joa õ dutihre. ¹⁷Tiro ji muhtariro nucu macariro to wamare, to númerore joa ñerainare ne nuchu dutierare. Tuhsu, tinare dua dutierare. ¹⁸Tíre noano wacú masiga musa. Tuho masiina jina nucu macariro to númerore noano ñu masiga. Tí número muno wama yoaro sehe jira. Tí número seis cientos sesenta y seis jira.

Cohamacu to yuhduchu yoaina cūnota wahma basaare basaha

14 Baharo Siõ wama tidu tucu bui ducurire Corderore ñuhi. Tiro mehne ciento cuarenta y cuatro mil masa jihre. Tina to ya wamare to Pucuro ya wama cühure ti wuhdua pocare ti joa õrina jihre. ²Tinare yu ñuchuta muanopu durucuro coa tahre. Pjiri poaye to bisiro seheta wpu pjíro to bisiro seheta bisiro coa tahre to durucua. Á yoa arpa wama tiare ti buaputêno seheta bisiro coa tahre to durucua. ³Tói

puhtoro to dujiro cahai pititiaro soro bajuina, Jesu yaina puhto cūhu paina jihre. Á jia tina panoi ciento cuarenta y cuatro mil masa ducuhre. Tói ducua cūnota wahma basaare basaa nihre. Tí basaare tina dihta masihre. Ahri yahpai jiina ciento cuarenta y cuatro mil Cristo to yuhduchu yoaina dihta tí basaare masihre. ⁴Ne tina cū tahacā numino mehne ñano yoerare. Á yoa Corderore ñu cūna jia, to yare ā yoarucina jihre. Á jiro tinare ñaina mehne jiinare to yuhduchu yoahhtinare naahre Cohamacu sehe. Á to yuhduchu yoarina jia, Cohamacu yaina cjihti, Cordero yaina cjihti cūhu ji muhtaina jihre. ⁵Tina mehne macaina ne cūiro mahñoriro mariahna. Á jia Cohamacu to tuhutuchū ñaa buhiri marieina jihre tina.

Tiaro anjoa yahuroca boroha

⁶Baharo muanopu wurirore anjore ñuhi. Tiro ahri yahpa macainare jipihtia curuari macainare, jipihtia duseri durucuinare, jipihtia yahpari macainare noaa buheare yahuhtiro jihre. Tí buhea ne cohtotaeraa, ā jirucura. ⁷Á jiro anjo sañurucuro õ sehe niroca borohre:

—Cohamacure cui, ño payoga. “Tua yuhduariro, noa yuhduariro jira”, niga tirore. Mipure tiro masare to buhiri dahrehti pja jiro nina. Tiro muanore, yahpare, pjiri mare, mári pohtari cühure yoariro jira. Á jina tirore na tuhcuca caha su, wahche payoga —ni sañurucuhre anjo.

⁸To ā niri baharo paio anjo muanopu wuriro õ sehe niroca borohre:

—Tinare cohānocahre. Pjiri maca Babilonia wama tiri maca macainare cohānocahre Cohamacu. Tina to cohārina sehe jipihtina painare ñano yoachu yoare. Masa tinare ñu cūa ñaare goa pjaa, tíre yoare. Cahaina vinore ti tuaro goa pjaro seheta tina ñaare tuaro goa

ɸjare Babilonia macainare ñu cúa —ni yahuroca borohre paio anjo.

⁹⁻¹⁰Tina ɸuaro anjoa ti ã niri baharo paio anjo ti baharo wuriro õ sehe tuaro niroca borohre:

—Jipihtina ñucu macarirore ño payoinare, to masure ño payoinare, ti wuhduu pocare, ti wamomacarine to wamare joa õrina cũhure buhiri dahrerohca Cohamacu. Tina mehne suaro, tina pinine tuaro waro buhiri dahrerucurohca Cohamacu. Ñucu macarirore ño payoina jipihtina pichacapu wahaahca. Tõpu tuaro purĩnohca tinare pichaca mehne, azufre wama tia mehne ti wijãri pichaca mehne. Noaina anjoa, Cordero cũhu ti ñurocaroi ñano yuhduahca tina. ¹¹Tí pichaca ã me tirucurohca. Ne yatisi. Tinare ã purĩrucuchu yoara. Jipihitina ñucu macarirore na tuhcuca caha su ño payoinare ã purĩrucurohca. Dachoripe, ñaminipe ã purĩrucunocanohca. To masure ño payoina, to wamare ti joarina cũhu tó sehetã ñano yuhduahca —niroca borohre anjo.

¹²Ti ã ñano yuhduchu ñña Cohamacu yaina to dutiare yoaina, Jesure cohãeraina jina, to yare duhuena tjiga. Ñano yuhdupanahta Cohamacu yare cohãena tjiga.

¹³Baharo muanopu yuhure durucuro coa tachu tuhohi. Õ sehe nihre yuhure:

—Ahrire joaga muhu. Cohamacu yaina tirore cohãeraina jina mipure musa yariari baharopu cũhure wahcheina jira musa —niroca borohre yuhure.

To ã niri baharo Espiritu Santo sehe õ sehe ni namohre tjoa:

—Ã tjira. Potocã tjira. Tina tuaro ti dahraare duhu, soahca. Muanopu ti wahachu noano ti yoarire wacũnohca Cohamacu. ã yoa ti ã yoiari wapa tinare noano yorohca. ã jia tina wahcheina jira —ni namohre Espiritu Santo.

Wese macaa toa dichare mari besenano sehetã Cohamacu to yainare besenano. Ñaina sehere soro besenano

¹⁴Baharo me curua yehseri curuare ñuhi. Tí curua bui masuno yoaro sehe bajuriro dujihre. Tiro uru soro ɸuhtoro to pisari soro barore pisahre. ã yoa yoiari ɸjĩ siori ɸjĩne cjuahre tiro. ¹⁵Baharo paio anjo Cohamacu wuhui jirore wijaa tahre. ã wijaa taro tuaro sañurucuhre me curua bui dujirirore:

—Mu yoiari ɸjĩ mehne wese macaa dichare ahri yahpa macaa dichare dute naa pahõoga. Mipure to quihõri ɸja sura. Mipu dica sehe sohã tuhsuhre —nihre anjo.

¹⁶To ã nichu tuhoro to yoiari ɸjĩ mehne ahri yahpa macaa dichare naa ducahre me curua bui dujiriro.

¹⁷Baharo paio anjo cũhu muano macari wuhui Cohamacu wuhui jirore wijaa tahre. Tiro cũhu yoiari ɸjĩ siori ɸjĩne cjuahre. ¹⁸ã yoa paio anjo altar cahu ɸjĩrore wijaa tahre. Tiro sehe altar macari pichacare ñu wihboriro jihre. ã wijaa taro yoiari ɸjĩ siori ɸjĩne cjuarirore õ sehe ni sañurucuhre:

—Mu yoiari ɸjĩ mehne ahri yahpai jiri wese, se wese macaa dichare naaga. Se sehe ñi tuhsuhre —ni sañurucuhre.

¹⁹To ã nichu tuhoro anjo to yoiari ɸjĩ mehne ahri yahpa macaa se tõhorine yihso nahre. To ã yoiari baharo tí tõhorine se tõhorine to tu tihãto cohãhre. To ã cohãriro sehetã Cohamacu tirore cahmaerainare tuaro suaro, cohãnohca. ²⁰Tí maca dũhtu cahai ti tu tihãto tí se tõhorine tu tihãhre. Tó ti tu tihãchu di wijaa. Di ma yoaro sehe jihre tí di. Trescientos kilómetros yoiari ma, cũ metro noano pa metro dacho macai cuãri ma jihre.

Masa ti ñano yuhduhtore anjoa cū batoaha masare

15 Baharo muanopu soro jirore ñuhi. Tíre ñua masa cuaa wahaca. Ahri yahpapure to dohse wahahtore marine ñohre. Á jiro tí wiho waro jia nierara. Ó sehe ñuhi: Siete anjoa jihre. Cohamacu suaro, siete tahari masare buhiri dahre batoaro taro nihre. Á jia tina siete anjoa sehe buhiri dahre dutiro to cūhtina jihre.

²Anjoare yu ñuri baharo pjiri mare noano co sitiri ma yoaro sehe jiri mare ñuhi. Tí ma pichaca mehne jiri ma jihre. Á yoa nucū macarirore to masū cūhure yuhdurucainare ñuhi. Tina to wamare to númerore cjuæraina jihre. Tina yu ñuchū pjiri ma co sitiri ma duhtū cahai ducuhre. Tóí ducuina arpa wama tiare buaputēare cjuahre. Tí buaputēa Cohamacu to wari jihre. ³Á jia Cohamacure dahra cohtariro Moise cjiro ya basaare cūnota basaa nihre tina. Cordero ya basaa cūhure basaa nihre. Ó sehe ni basahre:

“Sā puhtoro muhu Cohamacu tua yuhduariro jira.

Mu yoarire ñua ñu cuaa wahaja sā.

Mu yoi noa yuhduara.

Muhu jipihitia yahpari macaina bui puhtoro jira.

Noano mahñono marieno, quihōno yoarucura muhu.

⁴Jipihitia muhure wahche payoahca.

Jipihitia muhure ‘Tuariro jira’, niahca.

Muhu dihta ñaa marieriro jira.

Jipihitia yahpari macaina mu cahapu sua, na tuhcuca caha su, muhure wahche payoahca.

Áta yoaahca tina jipihitia noano mu yoarire ñua”,

ni basaa nihre tina.

⁵Baharo muanopu ñuroca mucu, Cohamacu wuhure pjōori wuhure ñuhi. Tóí Cohamacu to ya tahtia waroi to

dutia to joaa pjini taa pjini ti wihbori pjini jihre. ⁶Tí wuhure yu ñuchūta siete anjoa tí wuhu puhichapu jirina wijaa tahre. Tina Cohamacu to buhiri dahre dutiro to cūhtina jihre. Tinape ti buhiri dahrehtire cjuahre tina siete anjoa. Noaa suhti, wete maria suhti, si sitea suhti tiina jihre. Á jia ti cutiro bui uru cahsaro mehne tuā dihorina jihre. ⁷Tí wuhupu jirina ti wijaa tachū pititari soro bajuina mehne macariro tinare siete anjoare siete uru wahwarire wahre. Tí wahwari Cohamacu suaa to buhiri dahrehti mehne noano wahpaa wahwari jihre tí wahwari. Tiro Cohamacu ā jirucuriro jira. ⁸To ā wachū Cohamacu wuhu puhichapu to si sitea mehne to tuaa mehne me ti sahsea wahahre. To ā me wuhu wahachū ne masa tí wuhure sāa masierare. Siete anjoare Cohamacu buhiri dahre dutiro to cūriro seheta masare ti buhiri dahre batoari baharo pari turi tí wuhupu sāa masina tjoa. To buhiri dahrehto pano sāa masierare.

Cohamacu masare to buhiri dahrehtore yahuha

16 Baharo Cohamacu wuhui tuaro durucuro coa tahre. Siete anjoare yahuro nihre:

—Siete wahwarihi posa tiare yahpapu pio siteroca borona wahaga. Yahpa macainare Cohamacu to niriro seheta buhiri dahresiniga mipare —ni durucuro coa tahre.

²To ā nino coa tachū tuhoro ji muhtariro anjo to cjuari wahwai posa tiare yahpapu pio siteroca borohre. To ā pio sitechū nucū macariro wamare joa ōrina, to masure ño payoina ñano cami tihre. Tí cami tuaro purihre tinare.

³To ā pio siteri baharo paio anjo tjoa to cjuari wahwai posa tiare pio siteroca borohre tjoa pjiri mapu. To ā pio sitechūta tí ma di ma wahahre. Yariariro

di yoaro sehe jihre tí di. Ā wahachu tí ma puhichapũ jiina yaria pihtia wahahre.

⁴ Pũaro ti ā pio siteri baharo paio anjo tjoa to cjuari wahwai posa tiare pio siteroca borohre tjoa máripũ, tí mári poharipũ cũhure. To ā pio sitechũ mári di mári dihta wahahre. ⁵ To ā wahachu ñano paio anjo márire cohtariro ō sehe nihre:

—Cohamacũ mũhũ ñaa marieriro jira. Mipũ cũhure ā jirucuriro jira mũhũ. Panopũ cũhure ā jirucua tíre mũhũ. Ā jicu masa ti ñano yoachũ ñucũ quihõno tinare buhiri dahrehre mũhũ. Di márine yoacũ noano yoahre mũhũ. ⁶ Nũcũ macariro yaina sehe mũ yainare wajãa, di cohãchũ yoahre. Mũ yare yahuina cũhure wajãa, di cohãchũ yoahre. Ti ā wajãri buhiri mári di mári wahahre. Ā yoa tinare dire mũ ā sihnichũ yoachũ noa nina. Ō sehetã mũ yoachũ cahmahre tina —nihre márine cohtariro anjo.

⁷ To ā niri baharo altarpũ durucuro coa tahre:

—Ā tjira. Cohamacũ sã pũtoro tua yũhduariro jira mũhũ. Mahõono marieno, quihõno masare bese, buhiri dahrera mũhũ —ni durucuro coa tahre.

⁸ Tiaro anjoa ti pio siteri baharo paio anjo to cjuari wahwai posa tiare pio siteroca borohre tjoa sũ dacho macariro bui. To ā pio sitechuta sũre masare tuaro sichũ yoahre Cohamacũ. ⁹ Ā jiro sũ dacho macariro masare tuaro sihre. Ā jia Cohamacũ tinare to buhiri dahre dutichũ masia, tirore ñano durucuhre masa. Ā ñano yũhduaphta Cohamacũre maca duaerare. Cohamacũre “Tuariro jira”, ni wahche payo duaerare.

¹⁰ Pititiaro anjoa ti pio siteri baharo paio anjo tjoa to cjuari wahwai posa tiare pio siteroca borohre tjoa nũcũ macariro to dujiro bui. Pũtoro dujiro jihre to dujiro. To ā pio siteri baharo nũcũ macariro to yaina ti jiri yahpapũ nahitiano wahahre. Ā jia to yaina masa

ñano purichũ bahca dihohe. ¹¹ Tinare ñano puripachuta, ñano cami tipahta, ne ti ñaa yoirere cahyaerare. Ā yoa tíre duhuerare. Ā jia Cohamacũ tinare to cami dahrechũ masia tirore mũano macarirore ñano durucuhre.

¹² Cũ wamomaca pihtiina anjoa ti pio siteri baharo paio anjo tjoa to cjuari wahwai posa tiare pio siteroca borohre tjoa Eufrates wama tiri ma pjiri mapũ. To ā pio sitechuta tí ma sihbi cahaa wahahre. Sũ mũja taro macaina pũthoa ti yaina masa mehne tí máre ti pahã tahto sehe ā yoahre.

¹³ Baharo tiaro watĩare taharo bũcũna yoaro sehe bajuinare ñuhi. Cũiro pinono puhichapũ jiriro to dũseropũ wijaa tahre. Pairo watĩno nũcũ macariro dũseropũ wijaa tahre. Pairo watĩno “Cohamacũ yare yahuriro jija”, ni mahñoriro dũseropũ wijaa tahre. ¹⁴ Tina tiaro watĩa bajuamehneare yoaina jihre. Jipihtiuro macaina pũthoate cahmachuchũ yoahre tina cahma wajã dutia taa. Ti ā cahma wajãhti dacho Cohamacũ tua yũhduariro jipihtinare to dutihti dacho, pihtihti dacho jira. ¹⁵ Ō sehe nihre Jesu: “Ñũga mũsa. Yacariro wacũenoca to yacaro taro sehetã yũhũ cũhũ wacũenoca taihtja. Yũ tahtore noano cohtariro wahcheriro jirohca. To yare noano cahnoriro, to suhti sãariro jira wahcheriro. Ā yoiriro jiro yũ tachũ bũo tisi tiro suhti marieriro yoaro sehe jieraro”, nihre Jesu. ¹⁶ Baharo tiaro watĩa yahpari macaina bui pũthoate cahmachuchũ yoahre tinare. Ti cahmachuno Hebreo ya dũsero mehne “Armagedon” wama tihre.

¹⁷ Seis anjoa ti pio siteri baharo paio anjo tjoa to cjuari wahwai posa tiare me curuari cahapũ pio siteroca borohre tjoa. To ā pio siteri baharo pũtoro dujiropũ Cohamacũ wũhũ jiri dujiropũ tuaro durucuro coa tahre:

—Tó puro tjica —nino coa tahre.

¹⁸To ã nichuta orocasite mua, wupo pja mua, soro jiro bisi mua, cuaro yahpa ñuhmihre. Ahri yahpai masa ti ji ducari baharo ne tó sehe ñaca yahpa ñuhmiera tihre. Paye ñuhmia yahdoro cuaro yahpa ñuhmihre. ¹⁹Á to ñuhmichu pjiri macare tia maha yihti muaa wahahre. Á jia bujua macari ahri yahpai jia macari boraah wahahre. Á jiro Babilonia wama tiri maca pjiri maca macainare wacũhre Cohamacu tinare buhiri dahrero taro. Ti ñaare yoari buhiri tina mehne tuaro suahre. Á suaro tinare tuaro buhiri dahrehre. ²⁰To ã yoachũ jipihtia nacopo, tũyucu cũhu cohõ pihtia wahahre. Á jia ne mariahare. ²¹Á yoa bujua poca co poca yũsua poca yahpapũ masa bui bora tahre. Jipihtia poca co poca cuarenta kilos nucua poca jihre. Tina bui ti ã bora tachũ Cohamacu masare to tuaro buhiri dahrechũ masia ñano durucuhre masa Cohamacure.

**Mua mehne ñano yoarucuricorore
ñabiaro yoaricorore
buhiri dahre dutirohca**

17 Baharo siete wahwarire cjuaina anjoa mehne macariro yũ cahapũ wihiro õ sehe nihre yũhure:

—Ñui taga. Payũ mári bui dujiricorore mua mehne ñano yoarucuricorore ñabiaro yoaricorore Cohamacu to buhiri dahrehre ñuihca mũhu. ²Ahri yahpa macaina puhtoa ticoro mehne ti ñano yoaboro seheta ticoro yoaro seheta yoare tina. Cohamacu ya sehere cahmaerare. Ahri yahpa macainare to cahachũ yoaboro seheta tina mehne to ñano yoaboro seheta ticoro masare ñaare goa pjachũ yoare. Á yoaro ñaare yoachũ yoare masare —ni yahuhre anjo yũhure.

³To ã niri baharo Espiritu Santo sehe to bajuamehneare yũhure ñohre. Anjo sehe masa marienopũ naahre yũhure. Tói numinore ñuhi. Ticoro nucũ

macariro sohãriro bui pisaricoro jihre. Nucũ macariro sehe to pjacũ payũ wama ti joa õriro jihre. Tí wama ñaa wama Cohamacu to ñũ yabia wama jihre. Á yoa siete dapu poca tiri, diez sahari tiriro jihre nucũ macariro. ⁴Tuhsũ, numino sehe noano yahsaa suhti puhtoa ti sãa suhti sehe jiare sãaricoro jihre. Sohãa suhti cũhure sãaricoro jihre. Payũ urure, wapa tia taare, perla yapari cũhure õa suhtire sãaricoro jihre ticoro. Uru wahware cjuahre ticoro. Tí wahwai posa tia ñaa to yoari jihre. Mua mehne ñano yoaro pjiro ñano yoahre ticoro. Tí ñaare ñũ yabira Cohamacu. ⁵To wũhduai to wama ti joa õricoro jihre. Tí wamare noano masieraja mari. Tí wama piti dahre buheri wama jira. Ahri jira tí wama: “Pjiri maca Babilonia wama tiri maca jira. Jipih-tia ñaa yoare goa pjaare yoa ducaricoro, Cohamacure cahmaerachũ yoaricoro jira” ni, to wũhduai ti joa õricoro jihre. ⁶Á jicũ ticoro payũ Cohamacu yainare wajãricoro to jichũ masihi. Cahare to wahchero seheta tinare wajãno ti di cohãchũ wahchehre ticoro. Jesu yare ti yahuri buhiri ticoro wajãhre tinare. Ticorore ñucũ, ñũ cuaa wahahi.

⁷—¿Dohseacu mũhu ñũ cuaa waharide? —nihre anjo yũhure—. Mũ masieraire mũhure yahuihtja. Numinore mũhure yahuihtja. To pisaricoro cũhure yahuihtja. Tiro nucũ macariro, siete dapu poca tiri, diez sahari tiriro jihre. ⁸Tiro panopũ jiro jire. Mipure mariaha tiro. Baharo tiro cuãri copapũ jiro wijaa tarohca. To ã wijaa tari baharo pichacapũ waharohca. Ahri yahpa macaina tirore ñũ cua, ño payore tirore. Ahri yahpa to jihto pano Cohamacu to yaina cjihtire ã jirucuhinare ti wamare joa õa tiri jire. To joa õeraina jire nucũ macaricoro ño payoina. Tiro sehe panopũ jia tiri jire. Mipũ sehere mariaha. Baharo pari turi bajuarohca tjoa. Á

jia to bajuachũ ñña masa tirore ñũ cña wahaahca.

⁹Mipũre yũ yahuiltire masi duana, noano tũhonahca mũa. Ā yoana noano masiina jiga. Nũcũ macariro dapu poca siete dapu poca siete tũyucũ jira, mari piti dahre buhechũ. Tí tũyucũ bui pisara ticoro mũa mehne ñano yoarucuricoro. Tí dapu poca siete puhtoa yoaro sehe jira, mari piti dahre buhechũ. Payũ masa bui puhtoa jira. ¹⁰Cinco puhtoare cohã tuhsũre. Pairo tina baharo jiro puhtoro jira mipũre. Pairo sehe baharo puhtoro sãanohca. Ā sãano mahanocã puhtoro jirohca tiro. ¹¹Ā jiro nũcũ macariro panopũ ji muhtariro, mipũ marieriro tina siete puhtoa baharo puhtoro jirohca. Siete puhtoa mehne macariro jira. Baharo pichacapũ waharohca.

¹²Nũcũ macariro sahari diez sahari diez puhtoa yoaro sehe jira mari piti dahre buhechũ. Payũ masa bui puhtoa jira. Tina puhtoa sãaerasinihre. Baharopũ puhtoa sãa mahanocã puhtoa jia. Yoari pja ji dutisi tinare. Ā puhtoa jia nũcũ macariro mehne puhtoa jia. ¹³Tina diez puhtoa cũno potori tũhotuina jira. Tina nũcũ macarirore ti ya yahpari macaina bui puhtoro sãahca. ¹⁴Ā jia Cordero mehne cahma wajãahca. Ti Ā cahma wajãpachũta Cordero to beseina mehne tirore ne cohãeraina mehne tinare yũhdũrũcaahca. Tiro jipih-tina paina puhtoa bui puhtoro jira. Ā jiro tinare yũhdũrũcarohca —ni yahuhre yũhũre anjo.

¹⁵Ahrire yũhũre yahu namohre anjo:

—Mũa mehne ñano yoarucuricoro mări bui dujire. Tí mări ahri yoaro sehe jira mari piti dahre buhechũ: Yahpari macaina, payũ curuari macaina, payũ dũserire durucuina yoaro sehe jira tí mări. ¹⁶Nũcũ macariro, diez puhtoa mehne mũa mehne ñano yoarucuricoro ñũ yabiahca. Tina diez puhtoa nũcũ macariro mehne ticoro yare

ma pahño, suhti marienico cohãahca ticorore. Ā yoaa to pjacũre chũahca. Ti Ā yoari baharo ticorore jũ pahñoahca. ¹⁷Tina diez puhtoa cũno potori tũhotua nũcũ macarirore ti ya yahpari macaina bui puhtoro sãahca. Tinare Ā yoachũ yoare Cohamacũ, to cahmano sehta yoaro taro. Ā jiro nũcũ macariro sehe puhtoro jirohca. Jipihtia Cohamacũ panopũ to yahuri sehta to yoari baharo nũcũ macarirore cohãnohca. ¹⁸Ticoro mũ ñuricoro mehne õ sehe ni piti dahre buhera: Ticoro pjiri maca Babilonia wama tiri maca yoaro sehe jira. Jipih-tina paina puhtoa bui jira tí maca macaina —nihre anjo yũhũre.

Babilonia wama tiri maca to cohãri maca jira

18 Baharo paio anjo mũanopũ dujiarirore ñũhi. Tiro puhtoro waro jihre. To si sitea jipihtiropũ noano buhria sahsea wahahre. ²To Ā dujari baharo õ sehe ni tuaro sañurucu yahuhre:

—Cohãri jihre. Babilonia wama tiri maca pjiri maca macainare cohãri jihre. Mipũre watia, payũ ñaina pjacũ bjueraina cũhũ tí macai jia nina. Ñaina baro wahiquina wũina peri cũhũ masa ti ñũ yabiina tí macai jia nina. ³Jipih-tia yahpari macaina tí maca macainare ñainare ñũ cũa, tina cũhũ ñano yoare. Ā yoa yahpari macaina bui puhtoa tí maca macaina numia mehne ñano yoare. Ticoro Ā mua mehne ñano yoarucuricoro jiro wapa tiare nuchũa tire. Pjĩro to Ā nuchũchũ ahri yahpa macaina pache duaina pjĩro wapatare —ni yahuhre anjo.

⁴Baharo pari turi mũanopũ durucuro coa tahre. Ő sehe nihre:

—Yũ yaina ahricoro mũa mehne ñano yoarucuricoro mehne jiena tjiga mũa. Ticoro mehne mũa jichũ mũa cũhũre buhiri dahrerohca. Ā jina to ñano yoare ñũ cũena tjiga. ⁵To ñano yoari payũ jinocahna. To ñano yoarire pari tju mari

duhu payo m̄uochu t̄i t̄ju sehe m̄uanopu wahā s̄unocaboa. Ā jia to ñano yoari payu jinocahna. Ā jiro to ñano yoarire wacūna Cohamacu. Ā wacūno ticorore buhiri dahre dutirohca. ⁶Ticoro tuaro to buhiri dahrehticoro jijaro. Masare to ñano yoachu yoariro seheta ticoro cūhure ñano yuhdachu yoajaro. Masare ā ñano to yoariro seheta t̄i yuhdoro ticorore ñano buhiri dahrejaro. ⁷Ticoro “Noaricoro jija”, ni tuhutumare. Ā ni tuhuturo, wapa bujuare pj̄iro cjuare ticoro. To wapa bujuare pj̄iro to cjuaro purota ticorore pj̄iro ñano yuhdachu yoajaro. Tó purota ticorore cahyachu yoajaro. To basi ò sehe ni tuhutumana ticoro: “Ōi p̄utorocoro yoaro sehe jiricoro dujija. Wapewahyoro jieraja. Ā jico ne ñano yuhdasi yuhū”, ni tuhutumana ticoro. ⁸Ā ni tuhuturicoro to jichu wacūenoca ticorore buhiri dahrehto jirohca. Ticoro dohati, yariainare yahco tii, jūca barohca. Tuhsu, ticorore jū borohca. M̄usa p̄utoro Cohamacu ticorore buhiri dahre dutiriro tua yuhduariro jira. Ā jiro tó seheta yu niriro seheta ticorore buhiri dahre dutirohca —nino coa tahre m̄uanopu.

⁹Ā jia ticoro yoaro sehe jiri macare Babiloniare Cohamacu to buhiri dahreri baharo ahri yahpa macaina p̄htoa tuaro cahya, tiiahca. Tí maca macaina mehne ñano yoaina jire. Ā jia t̄i maca to jūchu ñua tiiahca tina. ¹⁰To ā jūchu ñua tina p̄htoa yoaropu ñurocarucuahca, “Mari cūhure buhiri dahreri”, nia. Tó ñurocarucua ò sehe niahca:

—Cue, pjac̄ori maca jira, Babilonia. Sí maca pj̄iri maca tuari maca jimahre. Wacūenoca sí macare buhiri dahrehre —niahca tina.

¹¹Jipihtiropu macaina pache duaina t̄i macare ñua tuaro cahya tiiahca. Tí maca to pihtichu ñua, ti pachere nuchūina mariachū ñua cahyaahca tina. Ā jia tiiahca. ¹²Ti na tarire urure, platare, wapa

bujua tāare, perla wama tia poca cūhure nuchūina mariaha. Ā yoa paye ti na tari cjirire suhti noaa suhtire, yahsaa suhti p̄htoa ti s̄aa suhti yoaro sehe jia suhtire, seda wama tia suhtire, sohāa suhtire nuchūina mariaha. Ā yoa paye ti na tarire yucuri me sitia yucurire nuchūina mariaha. Ā yoa paye ti na tarire marfil wama tiro mehne ti yoarire, wapa bujua yucuri mehne ti yoarire, bronze wama tiri comaa mehne ti yoarire, comaa mehne ti yoarire, marmol wama tiro mehne ti yoarire nuchūina ne mariaha.

¹³Ā yoa paye ti na tarire canela wama tiare ti chuare coachu yoare, paye ti chuare coachu yoare, inciensore, mirra wama tia me sitiare, paye me sitiare nuchūina mariaha. Ā yoa paye ti na tarire vinore, chua wajaa sere, trigo pohcare noano ti suhaweri pohcare, trigo yaparire, wachuare, corderoare, cawaloare, tunua buso cawaloa ti waja busore nuchūina mariaha. Dahra cohtainare nuchū tinare cjuaina cūhu mariaha. Masa ti jipachuta tinare nuchūina jimahre. Mipure mariaha. Ā jia cahyaahca pache duaina. ¹⁴Ā jia ò sehe niahca tina t̄i maca macaina cjirire:

—Ade, ñacaro wahajari. Jipihtia m̄usa cahiri cjiri pihtia wahahre. Ā yoa jipihtia noaa m̄usa cjuari cjiri pihtia wahahre. Ā ti pihtia wahachu t̄ire pari turi bocasi m̄usa —niahca pache duaina.

¹⁵Tina t̄i macare pachere duaa, pj̄iro wapatamare. Ā jia tina t̄i macare yoaropu ñurocarucuahca, “Mari cūhure buhiri dahreri”, nia. Ā ñurocarucua t̄i macare tuaro cahya, tiiahca. ¹⁶Ō sehe niahca t̄i macare:

—Cue, pjac̄oina jira sí maca pj̄iri maca noari maca macaina cjiri. Sí maca numino yoaro seheta noare cjuahre. Numino sehe noaa suhtire, yahsaa suhti p̄htoa ti s̄aa suhti yoaro sehe jia suhtire, sohāa suhti cūhure s̄ahre. Ā yoa uru, wapa bujua t̄aa, perla wama tia poca òa

suhtire sãahre. Tó seheta yoahre sí maca macaina. ¹⁷ ã jia wacüenoca sí maca buti pihntia wahahre —niahca tí macare.

ã yoa jipihtina dohoa buso mehne tiniina, tí buso pua, ti mua, paina pjiri mapu dahra wapataina cühu tí macare yoaropu ñurocarucuahca. ¹⁸ Tóí ñurocaruca tí macare to jüchü ñua õ sehe ni sañurucuahca:

—Noaa macari sí maca yoaro sehe jia macari ne paye macari mariahna —ni sañurucuahca tina.

¹⁹ ã cahyaina jia ti dapu poca bui diltare orë payoahca. ã jia tuaro yahco tiia õ sehe niahca:

—Cue, pjacuoina jira sí maca macaina cjiri. Noari maca jimare. Jipihtina dohoa buso cjuaina pjiri mapu tiniina sí maca macaa pache mehne noano wapatamahi mari. ã yoa dóihnta sí maca macaa buti pihntia wahahre —niahca buso macaina.

²⁰ Tí macare to cohãchü ñuna wahchega musa müano macaina. Cohamacu yaina, Jesu to cürina, to yare yahu mühtaina jipihtina musa wahchega. Tí maca macaina müsare ñano yuhdüchü yoare. Ti ã yoari buhiri buhiri dahrehre Cohamacu. ã jina wahchega musa.

²¹ ã yoa tuariro anjo pjiria täcare arëni soro puro jiria täcare na wahcõ, pjiri mapu doca ñohre. ã doca ñono õ sehe nihre:

—Ahria täca to bora ñojariro seheta pjiri maca Babilonia wama tiri maca tuaro boraro bisirohca. To ã borari baharo tí macare pari turi ñusi masa. ²² Tí macare butia wahachü yoarohca. ã jia tí macai basaare musa basarucuriro sehe ne coa tasi. Arpa wama tiare musa buapütërucuriro sehe, flauta wama tia pocare, corneta cühure musa putirucuriro sehe pari turi tí macai coa tasi. ã yoa tí maca mariachü pari turi tí macai dahraina dahراس. ã yoa täca mehne musa soari cühure tuhohnos. ²³ Ne tí

maca to buhria coãriro sehe ne jisi. ã yoa wamomaca dühteina musa bose nãmure musa dahreriro sehe pari turi ne coa tasi. Tí maca macaina pache duaina nuchüina mehne paina yuhdoro cjuahre musa. ã jina yaya wijõ wijüina yoaro sehe yoana jipihtiro macainare mahñohre musa. Musa ã yoarire ñu cüaa, Cohamacu sehere cahmaerare masa —nihre tuariro anjo.

²⁴ Tí maca macaina Cohamacu yare yahu mühtainare paina to yaina cühure jipihtiro macainare wajäri jire.

19 Babilonia to dohse wahahtore yu ñuri baharo müanopu payu masa sañurucua coa tahre yu tuhochü. Õ sehe ni sañurucuhre:

“Aleluya.

Cohamacure noano durucujihna.

Cohamacu marine yuhdüchü yoariro jira.

Tirore noano ño payojihna.

Tua yuhdüariro jira tiro.

² Mahñono marieno quihõno masare buhiri dahrera tiro.

Ñaricorore mua mehne ñano yoarucuricorore ñu cüa jipihtiro macaina, ahri yahpa macaina ñano yoahre.

Ticoro sehere buhiri dahrehre Cohamacu.

ã jiro tirore dahra cohtainare ticoro to wajäri buhiri buhiri dahrehre tiro”, ni sañurucua coa tahre.

³ Pari turi sañurucua coa tahre:

“Aleluya. Cohamacure noano durucujihna. Tí maca ñari maca to jüri maca ã me tirucurohca”,

ni sañurucua coa tahre.

⁴ ã yoa veinticuatro Jesu yaina pühtoa, pititiaro soro bajuina mehne na tuhcuca caha sü, Cohamacure to dujiroi dujirirore wahche payohre. Õ sehe ni wahche payohre tina: “Amén. Aleluya. ã tjira. Cohamacure noano durucujihna”, nihre tina.

⁵ Baharo pūhtoro dujiropū ò sehe nino coa tahre:

“Mari pūhtoro Cohamacure wahche payoga.

Tirote dahra cohtaina, tirote ño payo-
oina, wiho jiina, pūhtoa cūhū jipi-
htina mūsa tirote noano durucuga”,
nino coa tahre.

**Cordero to wamomaca dūhtehti
nūmū bose nūmūre yahuha Joāo**

⁶ Baharo payū masa ti durucuchū
tūhohi. Pjiri poaye, wūpo mehne to
bisiro coa taro seheta durucua coa tahre
yū tūhochū:

“Aleluya.

Cohamacure noano durucujihna.

Tiro mari pūhtoro sehe pūhtoro sāa
tūhsure.

Tua yūhdūariro jira tiro.

⁷⁻⁸ Cordero to wamomaca dūhtehti pja
jira mipure.

To wamomaca dūhtehticoro noano ti
cahno tūhsūricoropū jira.

Ticorore noari suhtiro wete marieni
suhtirore wahre.

Tí suhtiro Cohamacū yaina noaare ti
yoari yoaro sehe jira, mari piti dahre
buhechū.

Ā jina ti wamomaca dūhtehti pja to jichū
wahchejihna mari.

Cohamacure “Tua yūhdūariro jira”,
nijihna”,

ni durucua coa tahre.

⁹ Tí ā niri baharo anjo ò sehe nihre
yūhure:

—Ahrire joa naga: “Cordero to wamo-
maca dūhteri nūmū bose nūmūre to
pjirocarina wahcheina jira”, ni joa naga
—nihre anjo yūhure.

Ā ninota ò sehe ni namohre:

—Potocā tjira ahri yū yahuri. Co-
hamacū ya durucua jira —ni namohre
yūhure.

¹⁰ To ā nichū tūhocūta tiro panoi na
tuhcua caha sū, tirote ño payoi tai

nimahi. Yū ā yoai cahachū waro ò sehe
nihre tiro yūhure:

—Tíre yoai tjiga. Mū yoaro
seheta yūhū cūhū Cohamacure
dahra cohtarirota jija. Mū coyea
Jesu yaina jipihtina to ya buheare
duhueraina yoaro sehe yūhū cūhū
Cohamacure dahra cohtarirota jija. Ā
jicū Cohamacure na tuhcuca caha sū, tiro
sehete ño payoga —nihre anjo yūhure.

Cohamacū yare yahu mūhtaina cjiri
panopū macaina Espiritu Santo to
yoadohoro mehne Jesu ya buheareta
yahuyua tiri jire.

**Cawalo yehseriro bui
pisarirore yahuha Joāo**

¹¹ Baharo mūano parī mūa wahachū
ñūhi. Tóí cawalo yehseriro jihre. Tiro
bui pisariro ò sehe wama tihre: To
niriro seheta yoariro potocā yoariro
wama tihre tiro. Quihōno masare ñaina,
noinare bese, tirote ñū tuhtiina mehne
cahma wajāna. ¹² To capari picha pohna
yoaro sehe jihre. Ā yoa to dapui payū
pūhtoa pisaa sorori jihre. Ā jiro to pjacui
wama joa ōriro jihre. Tí wamare tiro di-
hta masihre. Paina masierare. ¹³ To sāari
suhtiro yoari suhtiro di wahāri suhtiro
jihre. Tiro ò sehe wama tihre: Cohamacū
ya dūserore yahuriro wama tihre tiro.

¹⁴ Ā jia to yaina surara mūano macaina
tiro baharo wahare. Yehseina cawaloa
bui pisaina noano yehsea suhtire, wete
mariea suhtire sāaina jihre. ¹⁵ To dūseroi
ñosari pjīne siori pjīne cuhcūhure. Tí
pjī yahpari macainare to yūhdūrucāhti
pjī jihre. Ā jiro to tuaa mehne to du-
tichū ne cāiro tirote yūhdūrucaro bi-
hosi. Cohamacū tua yūhdūariro payū
yahpari macaina mehne sua yūhdūara.
To ā suachū cawalo bui pisariro tinare
tuaro buhiri dahrerohca. ¹⁶ To suhtiroi,
to ñūchūcū cūhure ahri wamare joa ōri
jihre: “Jipihtina paina pūhtoa bui pūh-
toro”, ni joa ōri jihre.

¹⁷ Baharo sũ siroi ducurirore anjore ñũhi. Jipihtina mũanopũ wũinare yucaa perire sañurucu mũohre tiro. Õ sehe ni tuaro sañurucu mũohre:

—Cahmachuna taga. Cohamacu to bose mũmũi chũna taga. ¹⁸ Payũ yahpari macaina bui puhtoare, surara puhtoare, surara perire, cawaloare, tina bui pisainare, jipihtina paina masare, dahra cohtainare, dahra cohtaina jierainare, paina puhtoare, wiho jiinare tina jipihtina ti pjacuri cjirire chũna taga — nihre anjo yucaare.

¹⁹ Baharo nũcu macarirore, ahri yahpa macaina bui puhtoa ti surara peri cũhũre ñũhi. Tina cahmachuhre cawalo bui pisariro mehne to yaina surara peri mehne cahma wajãa taa. ²⁰ Ti ã cahma wajãchũ cawalo bui pisariro nũcu macarirore peresu yoahre. Pairo “Cohamacu yare yahu mũhtariro jija”, ni mahñoriro cũhũre peresu yoahre. Tiro mahñoriro sehe nũcu macariro to ñũrocaroi bajuamehneare yoariro jihre. To bajuamehnea mehne nũcu macariro to wamare wahãinare to masũre ño payoinare mahñohre “Ahri Cohamacu ya jira”, nino. Tina pũarore to peresu yoari baharo tinare catiinareta pichacapũ cohãhre. Tĩ pichaca pjiri ma puro jiri pichaca pjiri pichaca azufre mehne jũri pichaca jihre. ²¹ ã jiro dũhsainare ti surara peri cjirire ñosari pjĩ mehne to dũseroi jiri pjĩ mehne wajãhre cawalo bui pisariro sehe. ã to wajãri baharo yucaa peri ti pjacuri cjirire chũa, yapi yũhdũa wahahre.

Mil cũhmari waro Cristo to yaina mehne masare dutirohca

20 Baharo paio anjo mũanopũ to dujia tachũ ñũhi. Cuãri copa macari sawire, pjiri da, comaa da cũhũre cjuahre tiro. ² ã duji wihiro pinonore ñahahre tiro. Tiro pinono panopũ pinono sehe pjacu tiro jiro, watĩno Satana

wama tiro jihre. Tirore ñahano tirore dũhtehre mil cũhmari waro peresu yoaro taro. ³ ã dũhte tuhsũ, cuãri copapũ cohãhre tirore jipihtia yahpari macainare mil cũhmari waro to mahñoerahto sehe. ã cohã tuhsũro tí copare biha, wihtã ñahanocahre. ã jiro mil cũhmari baharo pari turi mahaa dachoricã tirore wiosininohca.

⁴ Baharo puhtoa dujiare ñũhi. Tĩ dujiai dujiina cũhũre ñũhi. Tinare masa bui dutihtinare cũhũre Cristo. Paina cũhũre ñũhi. Tina sehe Jesu yare Cohamacu yare ti yahuri buhiri ti dapu pocare dũte cohãrina cjiri jihre. Nũcu macarirore to masũ cũhũre ne na tuhcuca caha sũ ño payoerare. ã yoa ti wũhdũa pocare ti wamomacari cũhũre to wamare joa õ dutierare tina. ã jia paina tinare ti wajãri baharo masaa wahahre tjoa. Masahre tina mil cũhmari waro Cristo mehne puhtoa jia taa. ⁵ Paina Cristo yaina yariaina cjiri sehe masaerasinire. Ti wajãrina ti masari baharo mil cũhmari puhtoa ti jiri baharo paina cũhũ masaa wahaahca. ã jia ti wajãrina cjiri Cristo yaina to baharo masa mũhtaina jihre. ⁶ To maso mũhtaina sehe tuaro wahcheina jahca. Ñaa marieina jahca tina. ã jia pichacapũ wahasi tina. Masa pichacapũ waha, pari turi ti yariaro sehe wahara. ã jia tina to maso mũhtaina pichacapũ wahaerara. Tina yaria masa mũhtaina sacerdotea jahca, Cohamacũre, Cristo cũhũre ño payoa taa. ã jia mil cũhmari waro Cristo mehne masa bui puhtoa jahca.

⁷ Mil cũhmari baharo Satanare peresui jirirore wiorohca. ⁸ To ã wiori baharo ahri yahpa macainare mahñono waharohca tiro. Gog wama tiinare, Magog wama tiina cũhũre mahñono waharohca. ã jia tina to mahñoare tũhoa, ti surara perire cahmachuahca cahma wajãa taa. Tina surara peri payũ jahca. Pjiri ma macaa padũ pohcaricã payũ ti

jiro seheta payu surara jiahca. ⁹Tina ahri yahpapure waha sitea, Cohamacu yaina ti jiri macare Cohamacu to cahiri macare soroa wahaahca. Ti a soroari baharo Cohamacu tinare muano macari pichaca mehne juroca bororohca. ¹⁰A wahari baharo watinore tinare mahñorirore pichacapu cohānohca. Tí pichaca pjiri ma puro jiri pichaca azufre mehne juri pichaca jira. Tópu nucu macarirore “Cohamacu yare yahu muhtararo jija”, ni mahñorirore cohā tuhsuhre. Tói ti jichu dacho, namipu cūhure a ñano purirucurohca tinare.

Cohamacu masare buhiri dahre batoara

¹¹Baharo pjiro puhtoro to dujirore noano yehserore ñuhi. Tí dujiro bui dujiri cūhure ñuhi. Tói to dujichu, ahri yahpa macaa cūhu muano macaa cūhu pihtia wahahre. A pihtia waha pari turi ji namoerare. ¹²A yoa puhtoro panoi yariaina cjiri ti ducuchu ñuhi. Tina wiho jiina, puhtoa cjiri cūhu jihre. Tói ti ducuchu joa oã tjurire pjōohre. Tí tjuri masa ti yoarire ti joa oã tjuri jihre. A jiro beseriro tí tjurire ñu tuhsu ti yoarire masihre. Tíre masino yariainare besehre ñaina, noainare. Baharo pa tju cūhure pjōohre. Tí tju Cohamacu mehne a jirucuhinare ti wamare joa ori tju jihre. ¹³Baharo pjiri mapu yaria miniina, diapu ti cohārina cūhu wahcā mujaa wahahre. A yoa yahpa puhichapu jiina, yariaina ti jiro pu jiina cūhu mujaa wahahre. Ti a mupa suchu tói dujiro ti yoarire masi pahñono, tinare besehre ñaina, noainare. ¹⁴Baharo yariarore, yariaina ti jiro cūhure cohānocahre Cohamacu pari turi mari yariaerahto sehe. Pichacapu cohānocahre. Tí pichaca pjiri ma puro jiri pichaca pjiri pichaca jihre. Pichacapu wahaina sehe pari turi yariaina seheta wahara. ¹⁵A jiro a jirucuhina ti wamare Co-

hamacu to joa ori tju jipihtina ti wamare joa omahnoeraina sehene pichacapu cohāhre tiro.

Muano, yahpa cūhure wahmaare cohtotarahca Cohamacu

21 Baharo muano, ahri yahpa cūhure wahmaare to cohtotarire ñuhi. Muano pu ji muhtarari, yahpapu ji muhtarari, pjiri mapu ji muhtarari cūhu pihtia wahahre. Mariahre. ²A yoa yuhu Joao noari macare, wahma macare Jerusalene ñuhi. Tí maca muano pu Cohamacu cahapu to duji tachu ñuhi. Wamomaca duhtehticoro noaa suhti mehne wahma suora wamomaca duhtehtirore wahchechu yoaro taro. Tó seheta tí macare cahnoyure Cohamacu, to yainare wahchechu yoaro taro. ³Tíre yu ñuri baharo puhtoro dujiropu to sañurucuro coa tachu tuhohi:

—Ñuga. Mipure masa watoi jiro nina Cohamacu. Tina mehne jirohca tiro. A jia to yaina jiahca tina. A yoa Cohamacu to basi tina mehne macararo jiro, ti yairo Cohamacu jirohca. ⁴A jiro a wahcherucuchu yoarohca tiro tinare. A jia pari turi cahyasi tina. A jia ne pari turi yariasi tina. Ne ñano yajeripohna tia, yahco tia, puria cūhu mariahca tinare. Ahri jipihitia panopu macaa cjiri pihtia wahaahca —ni sañurucuro coa tahre.

⁵Baharo puhtoro dujiropu dujiro o sehe nihre:

—Ñuga. Jipihtiare wahma cohtotachu yoaihca —nihre.

To a niri baharo yuhure o sehe nihre tjoa:

—Ahri yu niare joa naga. Yu nia potocã tjira. A jiro yu niriro seheta a waharohca. A jicu yu niare joa naga —nihre yuhure.

⁶Baharo o sehe nihre tjoa yuhure:

—Tó puro tjica. Yuhu jipihtiare ba juamehneriro jija. A yoa jipihtiare pihtichu yoahrtiro jija tjoa. Nahma yapi-

oina tuaro ti core cahmano seheta yu cahapu waha duaina Jesure cahmaahca. Á jia Jesure yuhtiaha. Tiro catichu yoaa co yoaro sehe jira. Tirore cahmainare wapa cahmano marieno yuhu mehne á jirucuchu yoaihtja tinare. ⁷Jipihtina yuhure wacu tua duhuerainare o sehe yoaihtja: Ti yairo Cohamacu jiihtja. Á jia tina sehe yu pohna jiaha. ⁸Wiho mejeta cuia yu yare duhuina, yuhure cahmaeraina, ñabiaare yoaina, masare wajaina, numia mehne ñano yoaina, mua mehne ñano yoaa numia, yaya, “Cohamacu jira”, ti nia masurine ño payo- oina, jipihtina mahñoina pichacapu wahaahca. Tói pjiri ma puro jiri pichaca pjiri pichaca azufre mehne juno nina. Tópu wahaina pari turi ti yariaro sehe waha nina —nihre yuhure.

Wahma maca Jerusalene yahuha

⁹Baharo cuiro anjo yu cahapu wihire. Tiro siete wahwari cjuaina, to buhiri dahre dutiro to cuna anjoa mehne macariro jihre. Á wihiro, o sehe nihre yuhure:

—Ñui taga. Cordero to wamomaca duhtericorore ñoihca mhure —nihre anjo yuhure.

¹⁰To á nini baharo Espiritu Santo yuhure Cohamacu ya macare ñohre. Ó sehe bajuro ñohre yuhure: Muadu tucu buipu yuhure na mujahre. Tópu Jerusalene Cohamacu ya macare noari macare ñohre yuhure. Cohamacu cahapu manopu jiri maca duji taro nihre ahri yahpau. ¹¹Cohamacu to si sitea mehne si siteri maca jihre tí maca. Wapa tia taa yoaro sehe si sitehre. Diamante wama tia taa yoaro sehe si sitehre. Á yoa vidro yoaro sehe noano co sitiri maca jihre tí maca. ¹²Pjiri sahrino mvari sahrino ti sahrí sari maca jihre tí maca. Doce sopacari tihre tí sahrino. Tí sopacaripe cohtahre anjoa. Tí maca macaa sopa pahmaripu Israe masa cu-

ruari doce curuaripe ti wama wahahre. ¹³Su muja taro sehe tí sahrino cjuahre tia sopaca. Norte sehe tia sopaca jihre. Sur sehe tia sopaca jihre. Su sano sehe cuhure tia sopaca jihre. Jipihtiro doce sopacari waro cjuahre tí sahrino. ¹⁴Tí sahrino doce taa bui pisahre. Tí taape Cordero to curina doce to curina sa caina wama wahahre.

¹⁵Á yoa anjo yuhure yahuriro quihodu uru mehne ti yoadure cjuahre. Tí macare, tí maca macaa sopacaripe, sahrino cuhure quihono taro nihre. ¹⁶Tí maca to yoaro purota sahare. Mmano cuhu to purota muahre. Á yoa anjo to quihodu mehne tí macare quihohre. Tí maca dos mil doscientos kilómetros yoari maca jihre. Tó purota sari maca jihre. Tó purota mvari maca jihre. ¹⁷Á jiro tí maca macari sahrinore quihohre anjo. Sesenta y cinco metros mvari sahrino jihre. Masa mari quihono seheta quihono nihre tiro anjo.

¹⁸Tí sahrino diamante wama tia taa mehne to yoari sahrino jihre. Á yoa tí maca sehe uru mehne to yoari maca jihre. Tí uru wete mariea jia vidro yoaro sehe noano co sitihre. ¹⁹Tí sahrino docai jia taare payu soro jia wapa tia taa wahahre. Tí taa sahrinoi pisaa taa doce taa jihre. Ji mhtaría tãcare diamante wama tia taa wahahre. To baharo jiria tãcare zafiro wama tia taa wahahre. Puaría baharo jiria tãcare ágata wama tia taa wahahre. Tiaria baharo jiria tãcare esmeralda wama tia taa wahahre. ²⁰Pititia poca baharo jiria tãcare ónice wama tia taa wahahre. Cũ wamomaca pihtia poca baharo jiria tãcare rubí wama tia taa wahahre. Seis poca baharo jiria tãcare crisólito wama tia taa wahahre. Siete poca baharo jiria tãcare berilo wama tia taa wahahre. Ocho poca baharo jiria tãcare topacio wama tia taa wahahre. Nueve poca baharo jiria tãcare crisoprasa wama tia taa wahahre. Diez

poca baharo jiria tãcare jacinto wama tia tãa wahãhre. Once poca baharo jiria tãcare amatista wama tia tãa wahã ba-toahre. ²¹ Æ yoa doce sopa pahmari doce perla mehne to yoa pahmari jihre. Tí pahmaripe cū yapa perla yapa mehne to yoa pahmari jihre. Æ jiro tí maca macari maha uru mehne to yoari maha jihre. Tí uru wete marieni uru jihre. Æ jiro vidro yoaro sehe noano co sitiri maha jihre tí maha.

²² Tí macai Cohamacū wuhure ñuer-ahi. Mariahre. Tí macai jipihitropū mari puhtore Cohamacū tua yuhduaritore, Cordero cūhure ño payora masa. Æ jiro tí maca jipihitiro Cohamacū wuhū yoaro sehe jihre. ²³ Tí macai Cohamacū to si sitea noano buhriahre. Cordero cūhū si-hãria yoaro sehe buhriahre. Æ jia sū dacho macariro cūhure ñami macariro cūhure tói ti buhriachū cahmaerare. ²⁴ Æ yoa ahri yahpai ti buhria mehne jiahca jipihitiro macaina. Æ jia jipihitia yahpari macaina puhtoia tí macapū noa yuhduā ti cjuare na wihiahca. ²⁵ Æ yoa dachore tí maca macaa sopacari pjōori sopacari jiahca. Tópū ne ñami marianohca. Æ jia ti sopacarire ne bihasi. Æ susurucuahca. ²⁶ Æ yoa jipihitia yahpari macaina noare ti cjuare tí macapū naa wihiahca. ²⁷ Æ naa sehere tí macapū ne naa wihisi. Bno tichū yoaina, ñaare yoaina cūhū tí macapū ne wahasi. Mahñoina cūhū wahasi. Cordero to joari tjui ti wama wahãina dihta tí macapū wahaahca. Tí tju to yuhduchū yoaina ti wamare to joa ōri tju jira. Tí tjui ti wama wahãina ã jirucuahca.

22 Baharo noari mare catichū yoari mare ñohre yuhure anjo. Tí ma noano co sitiri ma Cohamacū, Cordero cūhū ti dujiropū tari ma jihre. ² Æ yoa tí maca macari maha dacho macai buruahre tí ma. Tí ma pū buhuseheri dūhtū cahai catichū yoaa yucū ducuhre. Tí yucū sūripe dicha tihre. Cū cūh-

mare doce tahari dicha tihre. Æ yoa tí yucū macaa pūri mehne noano co tiahca jipihitia yahpari macaina. ³ Tí macare ne ñaa marianohca. Tí macai Cohamacū to dujiro jirohca. Cordero to dujiro cūhū jirohca tói. Æ jia jipihitina masa tói jiina tinare dahra cohtaina tina pano na tuhcuca caha sū, tinare wahche payoahca. Æ jiro tói ñaa marianohca. ⁴ Tina Cohamacūre ñu piti boca dujiahca. Æ yoa ti wuhduā pocai to wama wahãina jiahca. ⁵ Tópūre ñami marianohca. Æ jia sihãa pocare cahmasi tói jiina. Sū to buhriachū cūhure cahmasi. Mari puhtoro Cohamacū to buhriaro jirohca. Æ jia tí macai jiina pa sehe macaina bui puhtoia ã jirucuahca.

Jesucristo ahri yahpapū to tjua tahto mahanocā dūhsara

⁶ Baharo anjo yuhure ō sehe nihre:

—Jipihitia ahri ti yahuri cjiri potocā tjira. Æ jia ti niriro seheta waharohca. Mari puhtoro Cohamacū to yare yahu muhtainare masichū yoariro jira. Tiro sehe mipūre to yairo anjore warocahre tirore dahra cohtainare masichū yoaro taro. Baharocā to dohse wahahtore masichū yoaro taro to yairo anjore warocahre —nihre anjo yuhure.

⁷ Jesu sehe ō sehe nihre:

—Tuhoga mūsa. Mahanocā dūhsara yū tjua tahto. Ahri tju macaa yahuare yuhducaeraina wahcheina jiahca —nihre Jesu.

⁸ Yuhū João ahri jipihitiare yū joa narire tuhohi. Æ yoa tíre ñūhi. Æ jicū yū tuhori baharo, yū ñūri baharo yuhure ñoriro anjo panoi na tuhcuca caha sumahi. Tiore ño payoi tai nimahi. ⁹ Yū ã yoachū ñūno ō sehe nihre yuhure:

—Tíre yoai tjiga. Mū jiro seheta jiriyo yuhū cūhū Cohamacūre dahra cohtarirota jija. Mū coyea Cohamacū yare yahu muhtaina, jipihitina ahri tju macaa dutiare yoaina cūhū ti jiro seheta yuhū

cūhū Cohamacūre dahra cohtarirota jija. Ā jicū Cohamacū panoi na tuhcuā caha sū, tiro sehere ño payoga —nihre anjo yūhure.

¹⁰ Ā yoa ō sehe ni yahu namohre yūhure:

—Ahri tjuī baharo to dohse wahahtore yahura. To ā wahahto mahanocā dūhsara. To ā mahanocā dūhsachū ahri tjuī yahurire nūoi tjiga mūhū. ¹¹ Tí pja yū yahuri pjare ñaina sehe ā yoarucuwahnojarō ñaare. Ñaputiina cūhū ñabiario yoarucuwahnojarō. Noaina sehe noano yoarucujaro. Ā yoaga ñaa marieina ā ñaa marieina jirucujaro tí pjare —nihre anjo yūhure.

¹² Ō sehe nihre Jesu:

—Tūhoga mūsa. Mahanocā dūhsara yū tjua tahto. Mūsare yū yainare yū wahtore na tai tai nija. Ā jicū noaare mūsa yoari wapa mūsare noano yoaihtja. ¹³ Yūhū jipihtiare bajuamehneriro jija. Ā yoa jipihtiare pihtichū yoahrtiro jija tjōa.

¹⁴ Jipihtina wete mariea suhtire sāaina ti jiro seheta ti ñaa yoari buhirire cosaweina tí macapū sūahca. Ā sūa, tí maca macaa yucū catiare waa yucū dichare chūahca. Ā jia wahcheina jiahca tina. ¹⁵ Tí macapū sūeraina sehe ahrina jira: Ñabiaina, yaya, numia mehne ñano yoaina, mūa mehne ñano yoaa numia, masare wajāina, “Cohamacū jira”, ti nia masrine ño payoina, mahño ji coaina, mahñoa payūina cūhū jira tí macapū sūeraina —nihre Jesu.

¹⁶ Ā yoa ō sehe ni yahu namohre Jesu:

—Yūhū, Jesu yū yairo anjore warocahi mūsare yū yainare ahri tju macaare yahui tai. Pūhtoro Davi panamino ji turi-

ariro jija yūhū. Yūhū bohrea mūja tachū mūja taria noano si siteria ñahpichoca yoaro sehe jiro jija —ni yahu namohre Jesu.

¹⁷ Espiritu Santo Jesure “Tjua taga”, nina. Jesu yaina to wamomaca dūhtehticoro yoaro sehe jiina cūhū “Tjua taga”, nina. Jipihtina ti “Tjua taga”, nirire tūhoina cūhū “Tjua taga”, nijaro Jesure.

Ñahma yapioina core tuaro ti cahmano seheta Cohamacū cahapū waha duana Jesure tuaro cahmaga. Tiro catichū yoaa co yoaro sehe jira. Tirore cahmainare wapa cahmano marieno ā jirucuchū yoarohca Cohamacū.

¹⁸ Yūhū João, jipihtina ahri tju macaare Cohamacū yare tūhorinare mūsare ō sehe ni cua pisaro mehne yahuihtja. Ahri buhea mehne paye buhea mehne more suhu yahu namoina Cohamacūre yūhdūrucāa nina. Ti ā yūhdūrucachū ñūno jipihtia ahri tjuī to buhiri dahrehtore to yahuriro seheta cūnohca tina cūhūre. Ā jiro tó seheta tina cūhūre buhiri dahrerohca. ¹⁹ Ā yoa ahri tju macaa yahuaire yahu dūhaina Cohamacūre yūhdūrucaina jira. Ti ā yūhdūrucachū ñūno catichū yoaa yucū dichare tinare chū dutisi. Ā jia ā jirucusi tina. Tuhsū, to ya macapū noari macapū waha dutisi. Tí yucū, tí maca cūhū ahri tjuī ti yahuripū jira.

²⁰ Jipihtia ahri tju macaare yahuriro ō sehe nina:

—Ā tjira. Mahanocā dūhsara yahpapū yū tjua tahto —nina tiro.

Ā tjia. Sā pūhtoro Jesu tjua tahga.

²¹ Mari pūhtoro Jesu to cahīa mehne jipihtina mūsa noano jiga.